


Compromisu xi majo xi casahmi nina cojo xuta (El  
Nuevo Testamento en el mazateco de Chiquihuitlán  
de Juárez ... y en español)



New Testament in Mazatec, Chiquihuitlán (MX:maq:Mazatec,  
Chiquihuitlán)

**Compromisu xi majo xi casahmi nina cojo  
xuta (El Nuevo Testamento en el mazateco de  
Chiquihuitlán de Juárez ... y en español)  
New Testament in Mazatec, Chiquihuitlán  
(MX:maq:Mazatec, Chiquihuitlán)**

copyright © 1991 Wycliffe Bible Translators, Inc.

Language: Mazatec, Chiquihuitlán

Translation by: Wycliffe Bible Translators, Inc.

Mazateco, Chiquihuitlán [maq], Mexico

**Copyright Information**

© 1991, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mazatec, Chiquihuitlán

**© 1991, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files dated 29 Jan 2022

3ee7eab4-2659-54e8-8e90-b0a016392daf

## Contents

San Mateo . . . . .	1
San Marcos . . . . .	85
San Lucas . . . . .	140
San Juan . . . . .	241
Hacutjin Casahmi Apóstol . . . . .	313
Romanos . . . . .	400
1 Corintios . . . . .	437
2 Corintios . . . . .	471
Gálatas . . . . .	494
Efesios . . . . .	506
Filipenses . . . . .	518
Colosenses . . . . .	527
1 Tesalonicenses . . . . .	536
2 Tesalonicenses . . . . .	543
1 Timoteo . . . . .	547
2 Timoteo . . . . .	558
Tito . . . . .	565
Filemón . . . . .	570
Hebreos . . . . .	572
Santiago . . . . .	601
1 Pedru . . . . .	610
2 Pedru . . . . .	621
1 Juan . . . . .	627
2 Juan . . . . .	636
3 Juan . . . . .	638
San Judas . . . . .	640
Apocalipsis . . . . .	643

## Cjuandajyihi xi catsihindu San Mateo Tsëhë Jesucristu

### *Xutachanga rë Jesucristu*

<sup>1</sup> Xujun vihi ne, setaha xujun ñihi rë xutachanga rë Jesucristu, me xi tjë rë David, hacuaha tjë rë Abraham.

<sup>2</sup> Abraham ne, me vëhë xi xutachanga xi má nahmi rë Isaac. Isaac ne, me vëhë xi xutachanga xi má nahmi rë Jacob. Jacob ne, me vëhë xi xutachanga xi má nahmi rë Judá cojo hntse cha. <sup>3</sup> Judá ne, nahmi má me tsëhë Fares cojo Zara; naa rë me ne, Tamar hmí rë. Fares ne, me vëhë xi xutachanga xi má nahmi rë Esrom. Esrom ne, me vëhë xi xutachanga xi má nahmi rë Aram. <sup>4</sup> Aram ne, me vëhë xi xutachanga xi má nahmi rë Aminadab me xi xutachanga xi má nahmi rë Naasón, me vëhë xi xutachanga xi má nahmi rë Salmón. <sup>5</sup> Salmón ne, nahmi rë Booz me; hane Rahab ne, naa rë me. Booz ne, nahmi má me tsëhë Obed. Naa rë me vë; má Rut. Obed ne, me vëhë xi xutachanga xi má nahmi rë Isai. <sup>6</sup> Isai ne, me vëhë xi xutachanga xi má nahmi rë David. David jan ne, me vëhë xi cavitexa nangui rë Israel. Hane David ne, me vëhë xi xutachanga xi má nahmi rë Salomón. Naa rë Salomón ne, titjun chjuun rë Urías camá me.

<sup>7</sup> Salomón ne, me vëhë xi xutachanga xi má nahmi rë Roboam. Roboam ne, me vëhë xi xutachanga xi má nahmi rë Abías. Abías ne, me vëhë xi xutachanga xi má nahmi rë Asa. <sup>8</sup> Asa ne, me vëhë xi xutachanga xi má nahmi rë Josafat. Josafat ne, me vëhë xi xutachanga xi má nahmi rë Joram. Hane Joram ne, me vëhë xi xutachanga xi má nahmi rë Uzías. <sup>9</sup> Uzías ne, me vëhë xi xutachanga xi má nahmi rë Jotam. Jotam ne, me vëhë xi xutachanga xi má nahmi rë Acaz. Acaz ne, me vëhë xi xutachanga xi má nahmi rë Ezequías. <sup>10</sup> Ezequías ne, me vëhë xi xutachanga xi má nahmi rë Manasés. Manasés ne, me vëhë xi xutachanga xi má nahmi rë Amón. Amón ne, me vëhë xi xutachanga xi má nahmi rë Josias. <sup>11</sup> Josias ne, me vëhë xi xutachanga xi má nahmi rë Jeconías cojo hntse cha. Nixtin hya ne, xutaxín ne, cafaxin me xuta nangui rë Israel, quijicojo me xuta jan nangui Babilonia.

<sup>12</sup> Hane xi cama quiji me Babilonia, Jeconías vë ne, camá me vëhë xutachanga xi má nahmi rë Salatiel. Salatiel ne, me vëhë xi xutachanga xi má nahmi rë Zorobabel. <sup>13</sup> Zorobabel ne, me vëhë xi xutachanga xi má nahmi rë Abiud. Abiud ne,

me vëhë xi xutachanga xi má nahmi rë Eliaquim. Eliaquim ne, me vëhë xi xutachanga xi má nahmi rë Azor. <sup>14</sup> Azor ne, me vëhë xi xutachanga xi má nahmi rë Sadoc. Sadoc ne, me vëhë xi xutachanga xi má nahmi rë Aquim. Aquim ne, me vëhë xi xutachanga xi má nahmi rë Eliud. <sup>15</sup> Eliud ne, me vëhë xi xutachanga xi má nahmi rë Eleazar. Eleazar ne, me vëhë xi xutachanga xi má nahmi rë Matán. Matán ne, me vëhë xi xutachanga xi má nahmi rë Jacob. <sup>16</sup> Jacob ne, má me nahmi rë José, xihin rë María naa rë Jesús me xi hacuaha yaha ñihi rë Mesías.

<sup>17</sup> Cuatjin camá xi cavatju teñuju ndiya xi cavatju xi cjin xuta tsetsin me nixtin rë Abraham hisca nixtin rë David. Hacuaha cama teñuju ndiya xi cjin xuta tsetsin me nixtin rë David hisca hya xi xutaxín jan ne, cafahehin me xuta nangui rë Israel, quijicojo me xuta nangui Babilonia. Hane hacuaha camá teñuju ndiya tsëhë nixtin hya hisca nixtin xi catsin Mesías.

### *Hya xi catsin Jesucristu*

<sup>18</sup> Cuitjin camá nixtin xi catsin Jesucristu: María, naa rë Jesús ne, tacun vasen cjuavixan rë na cojo José. Peru chaja sa xi cjuaha xicjin na cojo me ne, casacu rë na quihndi ngatsë rë Hasen rë Nina. <sup>19</sup> José, me xi cuixan cojo na jan ne, tyjahi me cojo cjuatacun rë me xcun Nina. Hane xi mijí scandi me cjuasava rë na, catsingatahacacun me xi taha hma ni ne tsismicacun me na. <sup>20</sup> Cuatjin catsingatahacacun me xi sahmi me peru hora hya ne, cafehetejen ngu ángel rë Nina ngajñi chini rë me, hane cuitjin cachja ángel:

—José, ngaye quihndi tjë rë David, ximacjintacuín xi chjehentse María cuma chjuun riji na ta, sacuaha quihndi xi yaha na ne, ngatsë rë Hasen rë Nina, camá xi casacu rë na. <sup>21</sup> Tsin rë na ngu quihndi xihin. Quihndi vë ne, tehe ñihi rë Jesús. Cuatjin cjuaha ñihi ta, tsëhë xi cuaxëtje rë xuta rë tsëhë jyé rë me.

<sup>22</sup> Yëjë xcusun vihi ne cuatjin cama, cojo sa xi cuetjucaa jain cjua xi cachja profeta nixtin hatsëë cuitjin:

<sup>23</sup> Ngayujun ni nutsujun ta ngu chjuun xungun ne, sacu rë na ngu quihndi xihin.

Quihndi jan ne, suañihi me Emanuel.

Emanuel ne, vëhë cjua xi vijne: Nina ne, jiya me ngajñi naja.

<sup>24</sup> Ngajan xi hya xi cavaasca rë José ne, casahmi me tutjin cachja ángel cojo me. Cafahatsja me María ne xi camá chjuun rë me na. <sup>25</sup> Peru hisca xi cavatju catsin quihndi ne, sehe caviyuju cojo xicjin me. Hane casuañihi rë me quihndi jan, Jesús.

## 2

*Ngu jo cha xi vechu cjuatacun rë ne, cavëë cha niñú tsëhë Jesucristu*

<sup>1</sup> Nixtin xi catsin Jesús nangui Belén, distritu Judea, nixtin hya ne, Herodes vitexa me xuta nangui vë. Hacuaha nixtin hya ne, ngu jo cha xi vechutaha cjuatacun rë ne, cavetjun cha ladu vetjucaa tsuhi cafehe cha nandya Jerusalén. <sup>2</sup> Hane cuitjin cachja cha:

—¿Jani sacu niji quihndi xi cuitexa nangui Israel? ta cahyin xi cavetjucaa niñú rë me ngajan ladu vetjucaa tsuhi. Hane nduvintjinguin me xi chjihinrcuin me.

<sup>3</sup> Hya xi cama ne, jemu cama xti rë Herodes xi tu cahndë me cjua jan; cojo xuta nangui Jerusalén ne, cama xti rë me. <sup>4</sup> Hya xi cama ne, Herodes ne, cajindayavaha me yëjë ni nahmi xi matitjun cojo yëjë cha vicuya cjuachacun rë xuta nangui Israel. Sehe cavinenguise me ¿jani xi tsin xu me xi má Cristu? <sup>5</sup> Hane cuitjin cafayangui me:

—Ngajan nandya Belén, distritu Judea tsin ta cuatjin catsihindu profeta tsëhë nandya jan xi ngajan tsin quihndi:

<sup>6</sup> Ngaye, nandya Belén, ngaye nandya tsëhë xuta tjë rë Judá, hacuaha vengui chji ri xcun xuta matitjun nangui Judá.

Ta ngajñi rë xuta riji ne cuetjutsejen ngu me xi cuitexa rë xuta naha, xuta nangui Israel.

<sup>7</sup> Hya xi camá ne, Herodes ne, cajindayahma me cha xi vechu cjuatacun rë jan. Cafahataha rë me cha. ¿Mé hora cjuaquixi tsëhë mé nixtin camatsejen niñú jan? <sup>8</sup> Ngaxtun vëhë ne, sehe cavitexa me cha xi cjue cha Belén. Hacuaha cuitjin cachja me cojo cha:

—Tangun ngajan Belén. Chjinengunsunndujun yëjë tsëhë quihndi. Hane xi sacu nuju cjuaquixi ne, ningatjun ná cjua sehe cojo ngahan ne hacuaha cjuë cjuahárcun quihndi.

<sup>9</sup> Xi cavihndë cha xi cuicun vi cjua jan, cavetju cha quiji cha. Hane niñú xi cavetjucaa ngajan ladu vetjucaa tsuhi jan ne, hacuaha quiji titjun hisca xi cavechu cahndë hiscan xi jiña quihndi, hane ngajan cavasén. <sup>10</sup> Hane xi cavëë cha niñú xi ngajan cava sen ne, jercu tu ndama camaha ni rë cha. <sup>11</sup> Hane xi cavisehen cha ndihya hiscan siu me ne, cavëë cha quihndi jan. Hacuaha cavëë cha naa rë me, xi hmí rë María. Sehe quiji cavixcuhnchi cha cafaharcun cha quihndi jan. Hane sehe cavuxaha cha hiscan hinchá rë cha cuatjo, hane casua cha oro cojo tyjungunsa cojo tyjungunjne xi hmí rë mira. <sup>12</sup> Hya xi cavatju vëhë ne, tsëhë xi cachja chini cojo rë cha xi cuyaa in cha taha ladu hiscan tacun Herodes ne, tahaxin cavuya cha nangui rë cha.

### *Quiji me hiscan nangui Egipto*

<sup>13</sup> Hya xi quiji cha xi vechu cjuatacun rë jan ne, cafehetsejen ngu ángel rë Nina ngajñi chini rë José, hane cachja cuitjin:

—Tisatjinhngue, tihincueje quihndi cojo naa rë. Tiyun hiscan nangui Egipto. Hane ngajan cuinechun hisca xi tsingátju cjua xi cuyun. Cuatjin nihñu ta tsëhë xi Herodes ne, cuanguise me quihndi xi tsiquehen me.

<sup>14</sup> Hane cavisatjenhnga me nixten quijicojo me quihndi jan cojo naa rë, cafe me Egipto. <sup>15</sup> Hane xi cafehe me ngajan Egipto ne, ngajan caviyujutaha me hisca nixtin xi cahme Herodes. Cuatjin cama sehe hatuxa camachihin cjua xi catsingatju Nina cojo profeta rë me hatsëë nixtin. Cuitjin chja cjua jan: “Cajindáya rë quihndi naha xi nduvaniji tsëhë nangui Egipto.”

<sup>16</sup> Hya xi camachaya rë Herodes xi camá cavindacha cha xi vechu cjuatacun rë jan ne, jercu cama cjan rë me. Hane cavitexa me yo xi tsiquehen rë yëjë ni quihndi xihin xi cjëë cjuë jyan nu, yëjë ni quihndi nandya Belén cojo distritu rë. <sup>17</sup> Vëhë cjua xi cachja Nina xi catsihindu profeta Jeremías:

<sup>18</sup> Vinuhya rë cjuava ngajan nandya Ramá.

Jemu tjin cjuandusin.

Na Raquel ne, jihndava na ngatsë rë quihndi rë na.

Hane tsajin cjuetacun xi cuma rë na ta tsëhë xi ha café quihndi.

<sup>19</sup> Hane xi cavatju cahme Herodes ne, cavuya cafehetsejen nga ángel rë Nina ngajñi chini rë José ngajan Egipto ne, <sup>20</sup> cuitjin cachja:

—Tisatjinhngue tihincueje quihndi cojo naa rë. Tihinniji nandya Israel. Tihin ta tsëhë xi ha cahme cha xi meje tsiquehen rë quihndi. Cuatjin cachja.

<sup>21</sup> Hya xi camá ne, cavisatjenhnga José ne, sehe cavetju me quijicojo me quihndi cojo naa rë, hane sehe cavisehen nga me nangui Israel. <sup>22</sup> Peru xi cahndë José xi Archelaus vitexa me distritu Judea ta me vëhë vitexa me ngojo rë nahmi rë me, Herodes, vëhë xi camacjincacun José mijí cjue me ngajan. Hane xi cachja chini cojo rë me ne, sehe cavisehen me distritu Galilea. <sup>23</sup> Caviyujutaha me ngajan ngu nandya xi hmí rë Nasaret. Cuatjin cama sehe cuetjucaa cjua xi catsihindu profeta tsëhë me xi xuta ne, cuichja me xi Jesús ne, xuta Nasaret me.

## 3

*Cachja Juan Vitenda rë Xuta ngajan ngu xín tsëhë nandya*

<sup>1</sup> Nixtin hya ne, cavetjucaa tsejen Juan Vitenda rë Xuta ngajan nguijña tsëhë distritu Judea. <sup>2</sup> Cuitjin catsiquihndë me xuta:

—Nindegun cjuatacun nuju ta, camatiña nixtin xi Nina ne, cuitexa me ngasunhndë.

<sup>3</sup> Cuatjin tsëhë cha Juan vihi, cha vihi xi camahindu tsëhë cha xcun xujun xi chja cjua rë profeta Isaías xi chja cuitjin: Cuitjin jercu hñu tsiquihndë ngu xuta ngajan hiscan jemu xín tsëhë nandya:

“Tuhun chjinu ndiya xi cuinduva Nina;

hacuaha ninguixun cjuatacun nuju tsëhë me.” Cuatjin cachja me.

<sup>4</sup> Tsjian rë Juan jan ne, tsja rë chu camellu camá hacuaha cojo ngu cinturón chuxin tsihñu me cahntsua me. Hane xi jinë me ne, chu nchahva cojo tsjen rë chu tusen. <sup>5</sup> Hane jemu cjín xuta quijitjengui me Juan, xuta nandya Jerusalén, xuta distritu Judea cojo xuta xi siutahandee rë ndajyë Jordán. <sup>6</sup> Xuta jan, xi cavijacun me jyë rë me cojo Nina camá cavitenda Juan me ngajan ndajyë Jordán.

<sup>7</sup> Peru xi cavutsejen Juan xi cjín xuta tifehe tixtenda me; cha tsëhë partidu fariseo cojo cha tsëhë partidu saduceo ne cachja me cojo cha cuitjin:

—¡Ngayujun ni ngayun quihndi rë chu tsehen matsejen ne!, ¿yo cavinchangui nuju xi nihñu ngahñu xi cjuetjuntjun tsëhë castigu xi hatuxa tsingatju Nina? <sup>8</sup> Sá xi meje jain cjuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuatacun rë me. <sup>9</sup> Xicanujuun cahntsua xahasen nuju cjua vihi: “Ngayaan ne, tsajin mé cuma naja ta, tsëhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca cojo ndyojo xi cuicun vi ne, cuma sahmi me xi cumá tjë rë Abraham. <sup>10</sup> Chutsujun ta ngayun matsejen ne, tangun ngayun cojo yatjë xi ha quitahachjine quicharcu tyjama rë xi cuetsihin xti rë. Yëjë ni yatjë xi suaain tu xi ndaja matsejen ne, xti rë, sehe cueti. <sup>11</sup> Ngahan matsejen ne, cojo nandá ni tiviténdu nuju, peru sehe cuinduva me xi hitsë sa jyë ngahñu tjin rë cjuatacun rë xi cuma ná ngahan, me xi hitsë sa jyë hnga cojo cjuatacun rë xi cuma ná ngahan. Hane me vëhë cueya me Hasen rë Nina cahntsua xahasen nuju, hacuaha tangun me sacuaha ngu ndihi xi tsityjahi rë cjuatacun nuju. <sup>12</sup> Me vëhë matsejen ne, sacuaha xi ha yahatsja me quicha xi tsicaha rë xtë rë trigu cojo sa xi cuma tyjahi ndaja trigu xi casechun rë tsëhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ndihi xi tsajin nixtin coho. —Cuatjin cachja Juan.



*Caxtenda Jesús*

<sup>13</sup>Nixtin hya ne, hacuaha cavetju Jesús tsëhë distritu Galilea hane cafehe me ndajyë Jordán xi xtenda me. <sup>14</sup>Peru mijí sua Juan cahndë ta cachja me:

—Hitsë sa ndaja xi ngayun cuitendun ná. Hacuuiin xi ngahan cuitenda nuju.

<sup>15</sup>Ngajan xi cafayangui Jesús cuitjin:

—Jéya, cuatjin ndatjin xi cuma quihndë ta mameje rë xi cumachihin yëjë xcusun xi cavitexa Nina.

Hane catsingatihin Juan ne, cavitenda me Jesús. <sup>16</sup>Xi cama caxtenda Jesús ne, xi tu tivetju me tsëhë nandá jan ne, ngajan cavëë me xi ngahnga ne, catuxaha. Hane Hasen rë Nina ne, canduvajnetsejen casesun rcu me. Hane sacuajyihi xcusun rë ngu paloma jyihi. <sup>17</sup>Hacuaha canuhya rë ngu cjua ngajan ngahnga xi cachja cuitjin:

—Cha vihi xi quihndi naha xi hmú cáacun. Jemu ndama ná ngatsë rë cha.

**4***Cafahachuva Satanás Jesús xi choho sahmi me*

<sup>1</sup>Hya xi camá ne, Hasen rë Nina ne, quijinihi xu cojo Jesús ngajan ngu xín tsëhë nandya ta ngajan cjuahachuva xitsehen me.

<sup>2</sup>Hya xi cama ne, Jesús ne, yachan nixtin cojo yachan nixten cajinii me niñu. Hya xi cavatju vëhë ne, jercu camavojo rë me.

<sup>3</sup>Sehe camatiñataha xu xitsehen xi cjuahachuva rë me. Cachja cojo rë me cuitjin:

—Sá xi ngaye jain xi Quihndi rë Nina ngaye ne, tinoje cojo ndyojo vihi ne, catama niñu. —Cuatjin xu cachja xitsehen cojo rë me.

<sup>4</sup>Peru cuitjin cafayangui me tsëhë xitsehen jan:

—Xcun xujun rë Nina ne, cuitjin camahindu: “Hacuuiin suvá ngatsë rë niñu xi siu xuta cjuahñu ta hacuaha mameje rë me tsëhë yëjë ni cjua xi catsingatju Nina.”

<sup>5</sup>Sehe xitsehen jan quijicojo xu rë me nandya Jerusalén, nandya ximinchacun, quijisun xu me rcu cjin yungun xi matitjun <sup>6</sup>sehe ngajan xi cachja xu xitsehen:

—Sá xi ngaye jain xi Quihndi rë Nina ngaye ne, ningatjin yojo riji tsëhë ndyá ne hisca nangui. Ndaja hye ta tsajin mé cuma ri ta xcun xujun rë Nina ne, cuitjin chja:

Nina ne cuitexa me ángel rë me xi sahmi ri cuidadu.

Cjuahántsa ri,

cojo sa xi ntsacui ne, sacuinhmuaain rë cojo hisca ngu ndyojo.

<sup>7</sup>Ngajan xi cafayangui xu Jesús tsëhë xitsehen cuitjin:

—Hacuaha cuitjin chja xcun xujun rë Nina: “Mijí rë xi chjuhunchuvun Nina nuju.” —Cuatjin xu cachja Jesús.

<sup>8</sup> Hane ngu ndiya nga quijicojo xitsehen Jesús, quijicojo rë me ngu ndetjún hnga ne, sehe catsingacun xitsehen jan me jingujyë ni nandya tsëhë ngasunhndë cojo yëjë ni cjuanchina xi tjin rë. <sup>9</sup> Ngajan xi cachja xitsehen cojo rë me cuitjin:

—Suá ri yëjë nandya xi cuacún vë cojo cjuanchina rë. Hatuxa suá rí sa xi cuindove cuiticjexcuin nguehe xi chjehercuin ná.

<sup>10</sup> Sehe cafayangui Jesús tsëhë xitsehen cuitjin:

—Tihinxin Satanás, ta tsëhë xi xcun xujun rë Nina ne, cuitjin camahindu: “Meje rë xi chjuhuncun Nina naja, hacuaha ngu ni me vëhë xi meje rë xi nihñuchuhun hacutjin xi meje rë me.”

<sup>11</sup> Xi cuatjin xu cachja Jesús cojo xitsehen jan ne, cavetjuxin tsëhë me. Hane cafehe tjengui ángel me xi cjuahacuenda rë me.

*Jesús ne, vetsihin sahmi me xa ngajan distritu Galilea*

<sup>12</sup> Xi camachaya rë Jesús xi jiya Juan Vitenda rë Xuta ndavaya ne, quiji me distritu Galilea. <sup>13</sup> Hane cavetjuxin me tsëhë nandya Nasaret, quiji cavejña me nandya Capernaum. Nandya jan ne, tacun tjeheh rë ndajyë. Hane nandya jan ne tsëhë xuta tjë rë Zabulón cojo Neftalí. <sup>14</sup> Cuatjin cama sehe camachihin cjuá xi camahindu xcun xujun xi chja cjuá rë profeta Isaiás xi chja cuitjin:

<sup>15</sup> Xuta xi viyuju me nangui rë Zabulón cojo Neftalí, nangui ngajan ngunda ndajyë Jordán, ngajan tjeheh rë ndachacun, tsëhë distritu Galilea, nangui rë xutaxín.

<sup>16</sup> Xuta jan xi jñu cjuatacun rë me, cavëë me ngu me xi sacuaha ngu ndihi seti xi sua rë me cjuahasen. Xuta xi jemu tsavi siu me tsëhë cjuaveya, ndihi jan ne casua rë me hasen rë.

<sup>17</sup> Nixtin hya ne, Jesús ne, cavetsihin catsujyihya me cachja me cojo xuta cjuá rë Nina. Cuitjin cachja me:

—Nindeyun cjuatacun nuju ta tsëhë xi camatiña nixtin xi Nina ne cuitexa me ngasunhndë.

*Jesús ne, jindaya me cha xi tjun cumá xuta ladu rë me*

<sup>18</sup> Cama ngu nixtin xi tsujyihya me ngajan tjeheh laguna tsëhë Galilea ne, cavëë me jo me xi hntsë, ngu me xi hmí rë Simón cojo ngu me xi hmí rë Andrés. Titsingatjenya me changa ngajñi ndachacun, tsëhë xi hatuxa xá rë me xi faha me chu ti. <sup>19</sup> Hane Jesús ne, cachja me cojo me cuitjin:

—Nduvun cuanguen cojo ná. Hane cuicuyá nuju xi cuangu nuvun xuta xi cuisehen me ladu naha ngojo rë xi nuvun chu ti. —Cuatjin cachja me.

<sup>20</sup> Hane hora vëhë ni caviyuju me changa jan, hane cavetju me quiji me cojo Jesús.

<sup>21</sup> Hitsë sa nguvan ne, cavëë Jesús jo cha xi hacuaha hntsë: Jacobo cojo Juan, cha quihndi rë Zebedeo. Hinchä cha cahntsua barcu cojo nahmi rë cha, ngajan tifuyataha cha changa rë cha. Hacuaha cajindaya Jesús cha xi cjucojo me cha. <sup>22</sup> Sehe caviyuju cha barcu jan, hane cavejña cha nahmi rë cha quiji cha cojo Jesús.

<sup>23</sup> Hane Jesús ne, catsujyihya me yëjë ni ladu tsëhë distritu Galilea. Xi cavisehen me yungun ne, cavicuya me xuta, cachja me cojo xuta cjuandajyihä tsëhë gobiernu xi sahmi Nina. Hacuaha catsirqui me xuta hmu rë; camandaja xuta tsëhë yëjë ni chíhin cojo tsëhë yëjë ni cjuahmu rë me. <sup>24</sup> Hane cavitsojo cjua tsëhë cjuarcun xi casahmi Jesús. Cavitsojo cjua jan hisca yëjë nangui xi hmí rë Siria. Hane xuta ne, cafetjengui me Jesús yaha me xuta hmu rë tsëhë yëjë xcusun chíhin hane catsirqui me. Hacuaha catsirqui me xuta xi hinchä xitsehen cahntsua xahasen rë me cojo xuta xi má rë me chajan cojo xuta xi cahme yojo rë. <sup>25</sup> Hane quijitjengui xutacjín jan Jesús ne, xuta tsëhë cahndë xi cuicun vi: tsëhë të nandya xi tsëhë Decápolis, cojo nandya Jerusalén, cojo yahnga sa xuta tsëhë distritu Judea, cojo xuta tsëhë nangui ngunda tsëhë ndajyë Jordán.

## 5

### *Xuta xi ndaja tsëhë cojo xuta xi hmu tsëhë*

<sup>1</sup> Hya xi cavutsejen Jesús xi camatangun xutacjín jan ne, quijinihi me ngu ndetjun, hane xi cavéjña Jesús ne, casahmitña xuta tsëhë Jesús. <sup>2</sup> Sehe cavetsihin cavicuya me xuta jan cuitjin:

<sup>3</sup> —Jemu ndaja tsëhë me xi machaya rë me xi tsichaja sa rë cjuatacun rë me xcun Nina matsejen ta satë rë me gobiernu xi sahmi Nina.

<sup>4</sup> Jemu ndaja tsëhë me xi jihndava me tsëhë cjuachoho matsejen ta Nina sua rë me cjuetacun.

<sup>5</sup> Jemu ndaja tsëhë xuta jeya, xuta xi hacuiin xta me matsejen ta, cjuahatsja me nangui xi sua Nina.

<sup>6</sup> Jemu ndaja tsëhë me xi sacuaha sahmi yahnga xuta xi vojo rë xi fi tjengui rë comida, cuanitjin tjengui me xcusun xi cuma tyjahä cjuatacun rë me xcun Nina matsejen ta, cuechu nixtin xi cuiyujuchihin cjuatacun rë me.

<sup>7</sup> 'Jemu ndaja tséhë me xi tjin rë cjuayumatacun cojo xuta, ta hacuaha cjuahatsja me cjuayumatacun tséhë Nina.

<sup>8</sup> 'Jemu ndaja tséhë me xi tjin ngu cjuatacun tyjahi cahntsua xahasen rë me matsejen ta, scuëë me Nina.

<sup>9</sup> 'Jemu ndaja tséhë me xi tsinguejyu rë xuta xi chohovëë xicjin me matsejen ta, me vëhë jan ne, cuichja Nina xi quihndi rë me.

<sup>10</sup> 'Jemu ndaja tséhë me hya xi tsujyihya tjengui xuta me cojo cjuahngatacun ngatsë rë xi tjin rë me ngu cjuatacun cojo Nina matsejen, ta satë rë me gobiernu xi sahmi Nina.

<sup>11</sup> 'Jemu ndaja tsujun ngayun ne sá xi ngatsë naha choho cuichja xuta tsujun o sá xi tsujyihya tjengui nuju xuta cojo cjuahngatacun o sá xi cojo cjuandesu tsicanijiyë me ngayun.

<sup>12</sup> Nixtin hya ne, jemu catama sua rë xahasen nuju ngatsë rë cjuañihi vë ta jemu jyë ngu cjuandaja xi tacunya nuju ngajan ngahnga. Cuanitjin ni choho casahmi xutachanga naja cojo profeta rë Nina xi caviyuju hatsëë nixtin.

### *Xuta ne, meje rë xi sahmi me sacuaha naxa*

<sup>13</sup> 'Ngayun, tjin hacutjin machji rëhë ngayun ngajñi rë xuta sacuaha sahmi naxa xi sahmi xtya rë ngu xichine. Ta sá xi naxa cjuë xtya rë ne, tsajin sa ngu xcusun xi cuma sahmi xtya rë. Hane sá xi cjuë xtya rë ne, tsajin me machji rëhë ta, scandi ni xuta, ngajan ni sune me.

### *Má naja ndihi rë ngasunhdë*

<sup>14</sup> 'Cuanitjin ne, tjin hacutjin machji rëhë ngayun ngajñi rë xuta sacuaha machji rëhë ngu ndihi xi sua hasen rë. Ta sá xi ndetjun tacun nandya matsejen ne, hatuxa tsejen; tsajin me xi cuatsa rë. <sup>15</sup> Cuanitjin ne, hacuaha tsajin ngu xuta xi ha xcun xi ha cavetaha rë me ngu ndihi ne, sehe cjuaha me cuejñatsejen me cahndë rë cojo sa xi xuta xi siu me hiscan xi seti ndihi jan ne, cuechu hasen rë. <sup>16</sup> Hacuanitjin chuva vëhë, meje rë xi nihñu cjuandaja xi scuëë xuta xcusun xi nihñu hane ngatsë rë xcusun jan ne, sahmi jyë me sahmi hnga me Nahmi nuju xi tacun me ngahnga.

### *Cjua xi cachja Jesús tséhë ley rë xuta tjë rë Israel*

<sup>17</sup> 'Xi caningatuntacuun matsejen xi nduvá tsinguétsun ngahñu rë ley xi catsihindu xutachanga naja Moisés o cjua xi cachja profeta. Cahndë rë xi tsinguétsun ne, sahmechihin cjua jan. <sup>18</sup> Hatuxa cuichjá cojo nuju cjuaquixi ta hya xi tacun cuaha ngahnga ne tacun cuaha ngasunhdë ne, cumaji chjahanxin rë cjua rë ley jan cojo yëjë ni letra rë ta, cuejña cuaha hiscan cumachihin cjua rë. <sup>19</sup> Vëhë xi tu yo ni xi sahmicuendaain tséhë hisca ngu rquí cjua rë, hane sá

cuinchangui me yahnga xuta xi cuanitjin sahmi me, chuva cuengui chji rē me hya xi sahmi Nina gobiernu. Peru tu yo ni me xi cjuahacuenda me hacuaha tsingacun me xuta xi cjuahacuenda me ley jan, me vëhë cuma titjun me hya xi sahmi Nina gobiernu. <sup>20</sup> Nguehe cuichjá cojo nuju ngayun ta meje rē xi hitsë sa tyjahi cjuatacun nuju xi cumá rē cjuatacun rē xuta xi vicuya me ley o sá xi xuta partidú fariseo, ta sá tsajin ne, satiin nuju gobiernu xi sahmi Nina.

*Cjua xi cavicuya Jesús tsëhë xuta xi hngacacun*

<sup>21</sup> 'Ha hyun cjua xi cafaha xuta hatsëë nixtin xi chja xi canicuun xingun hacuaha chja xi yo xi tsiquehen xicjin matsejen ne, cjue me xcun juez xi tsichuva me jyë rē me. <sup>22</sup> Peru cuichjá cojo nuju xi hisca yo xi macjan rē cojo xicjin ne, satë rē xi tsichuva me. Hane yo xi chjataha xicjin ne, cjue xcun juez xi matitjun. Cuanitjin yo me xi cuichja tsëhë xuta: "Ngarca ngayun", cuechji me tsëhë jyë rē me ngajan xcun ndihi xi tsajin nixtin coho.

<sup>23</sup> 'Ngatsë rē vihi, sá xi hora xi vejñu chjë nuju ngasunscun ne, sá xi tu ñahñu ni vitsjen nuju xi choho canihñu cojo xingun <sup>24</sup> ngajan catejñavasen chjë nuju, titjun cuangun tjengun xingun, hane chjayun rē me cjuaninchataha hane xi camandaja yun cojo me, sehe cuyun cuejñu chjë nuju jan.

<sup>25</sup> 'Sá ndiya tivangun cojo xuta xi meje cuinchajyë nuju xcun xutaxa rē ne, meje rē xi cuisiajmuchuhun cojo me, cojo sa xi ngajñi nuju cuma chihin ta sá tsajin ne, cjuecojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane cjue cueya nuju me ndavaya. <sup>26</sup> Ta cuichjá cojo nuju cjuaquixi ta hatuxa tsajin nixtin xi cuetjun tsëhë ngajan jinguyëjë rē xi cjëë cuechjun yëjë ni tujún xi quitjun.

*Cjua xi cavicuya Jesús tsëhë xuta xi sahmi cjuatsehen cojo rē ngu xi hacuiin tsëhë me*

<sup>27</sup> 'Ha hyun cjua xi cafaha xuta hatsëë nixtin xi chja cuitjin: "Xicanihñuu cjuatsehen cojo rē ngu chjuun o cojo rē ngu xihin xi hacuiin tsujun." <sup>28</sup> Peru cuichjá cojo nuju xi hisca xi ngu xihin xi vutsejen me ngu chjuun xi macacun me cojo na, ngajñi cjuatacun rē me ne, ha casahmi me cjuatsehen cojo ran.

<sup>29</sup> 'Hindë sá xi cjuatacun nuju meje rē xi nihñu ngu jyë tsëhë xcusun xi chutsujun cojo tuxcuun ladu quixi, hitsë sa ndaja tsujun sá xi chjuhunxun tuxcuun jan chandunxun cojo sa xi hacuiin tsitsehen nuju, ta hitsë sa vengui chji rëhë xi ma chaja nuju ngu rquí yojo nuju hane hacuiin xi cuangun jingu hiscan xi má hasen rē nima castigu. <sup>30</sup> Cuanitjin ne, sá xi cjuatacun nuju meje rē xi nihñu ngu jyë cojo ntsun quixi ne, hitsë sa

venguichji rēhē xi chandunxun ntsun jan ta hitsē sa ndaja tsujun xi machaja ngu rquí yojo nuju tsēhē xi cuangun jingu hiscan xi má hasen rē nima castigu.

*Jyě rē xuta xi tsismi xicjin me sehe cuixan cojo jingu sa*

<sup>31</sup> 'Hacuaha cafaha xuta hatsēē nixtin cjua xi chja cuitjin: "Ngu cha xi tsismi chjuun rē ne catejña cha ngu xujun tsja chjuun jan xi ha quihndē mijí rē cha na." <sup>32</sup> Peru nguehe cuichjá cojo nuju ta yo xi tsismi chjuun rē handasa ndastu mé cjuatsehen casahmi chjuun jan cojo ngu xihin xi hacjahi, hacuaha tjin rē me jyě ta sehe ngatsē rē xi catsismi me na ne sahmi chjuun jan cjuatsehen. Hacuaha yo xi cuixan cojo chjuun jan ne, tangun jyě rē cojo ngu xi sahmi cjuatsehen cojo ngu chjuun xi hacuiin chjuun rē.

*Hacutjin meje rē xi sua cjuaquixi naja*

<sup>33</sup> 'Hacuaha hyun cjua xi cafaha xuta hatsēē nixtin xi chja cuitjin: Hya xi cuinújun: "Vēē Nina", hatuxa sahmi ngujoyē xi nihñuchuhun cjua xi canújun. <sup>34</sup> Peru nguehe cuichjá cojo nuju ta hora xi cuisiajmu cojo xingun ne, hacuiin cuinújun xi vēē Nina, hacuiin cuinújun xi vēē sa jingu sa quihndi ngasunhndē. Cuinujuun xi vēē ngahnga ta ngahnga ne, tacun Nina xi vitexa me. <sup>35</sup> Hacuaha cuinujuun xi vēē ngasunhndē ta ngasunhndē ne, tangun sacuaha ngu yatē hiscan xi tine ntsacu Nina. Cuinujuun xi vēē Jerusalén ta Jerusalén ne, nandya xi tsēhē Nina, Me xi Matitjun. <sup>36</sup> Cuinujuun cuitjin: "Sá xi quixiin jain cjua naha ne, catinduva ngu cjuacjintacun xi cuatjun", ta tsēhē xi ngayun ne, hisca hitsē cumaji cuitexun sá xi cuma jma tsjarcun o sá xi cuma tyjava. <sup>37</sup> Hya xi cuisiajmu, sá xi "joho" nújun ne, cuanitjin ni cuitejña; o sá xi "jéya" nújun, hacuaha cuanitjin ni ndatjin ta, sá xi vetjutē visiajmu cjua cjín jan ne, cjua cjín jan ne, nduva tsēhē cjuatsehen.

*Meje rē xi nihmutacun xuta xi chohovēē naja*

<sup>38</sup> 'Hyun cjua xi cafaha xuta hatsēē xi chja cuitjin: Cha xi cuahaxin tuxcun xicjin ne, hacuaha chjahaxin rē tsēhē cha. Cuanitjin cha xi cuahaxin nehñu xicjin ne, hacuaha cuanitjin ni chjahaxin rē nehñu cha. <sup>39</sup> Peru nguehe cuichjá cojo nuju ta, canicuyuun cjuatsehen. Sá xi tjin yo xi vanguihmu nuju, yo xi vajaya ngu ladu tsa nuju matsejen ne, nicuyun sa ngu ladu catajaya. <sup>40</sup> Cuanitjin ne, sá xi tjin yo xi cjucojo nuju xcun juez xi fahataha chingá nuju matsejen ne, hacuaha tuhun rē me cojo yějē ni tsjian hasu nuju. <sup>41</sup> Cuanitjin ne sá xi ngu xuta ne, sahmi nuju me ngujoyē xi chanuju chaha rē me ngu kilómetro, cahndē rē ngu ni, tanguncujun jo kilómetro. <sup>42</sup> Yějē ni xuta xi fehya nuju me mé xi machaja rē me matsejen ne, tuhun rē me. Hane sá xi scuxetaha nuju me, tuhun rē me.

<sup>43</sup> 'Hyun cjuá xi cafaha xuta hatsëë nixtin xi chja cuitjin: "Nihmutacún xuta xi siutahndee nuju; choho hyun xuta xi má condra nuju." <sup>44</sup> Peru cuichjá cojo nuju ta, hacuaha nihmutacún xuta xi má condra nuju; ndaja nihñu cojo xuta xi choho vëë nuju me. Nújunyumuntuhun rë xuta xi tsujyihya tjengui nuju me cojo cjuahngatacun. <sup>45</sup> Sá xi cuatjin nihñu ne, cumatsejen xi chjayunngun sacuaha sahmi Nahmi nuju xi tacun ngahnga ta, Nina ne, sahmi me xi ngu chihin ni vetjucaa tsuhi xi casahmi me hane vechu hasen rë hiscan siu xuta tsehen hacuaha hiscan siu xuta ndaja. Hacuaha sahmi me xi vaha tsi xcun jnu rë xuta xi tjin xi cun rë me, hane hacuaha xcun jnu rë xuta xi tsajin xi cun rë me xcun Nina. <sup>46</sup> Tsajin yo xi sua chjí nuju tsëhë xi hmutacún xuta xi hmucacun nuju me matsejen, tsëhë xi hacuaha hisca cha faha tujúnsa (xi jemu vaxë cha tujún) matsejen ne, hmucacun cha xuta xi hmucacun rë cha. <sup>47</sup> Hacuanitjin ne, sá xi suvun cuinújun nina cojo xuta nuju ne, ¿há hitsë sa ndaja yun xi cuma rë yahnga xuta? ¡Jéya! Hisca xuta xi macjaain rë me Nina ne, tjin rë me xcusun ndaja vë. <sup>48</sup> Vëhë xi mameje rë xi tangun cojo ngasunhndë nuju cojo ngu xcusun xi tyjahi chichihin ni, cumatangun xcusun nuju cojo xcusun rë Nina xi tyjahi chichihin cjuatacun rë me.

## 6

*Jesús ne, vicuya me tsëhë cjuandaja xi meje rë sahmi xuta*

<sup>1</sup> 'Hya xi nihñu ngu cjuandaja ne, nihñu nguñajatacun, hacuiin nihñu tsëhë xi scuëë nuju xuta; ta sá tsajin ne, ndastu me chji sacu tsëhë Nahmi nuju xi tacun ngahnga. <sup>2</sup> Cuanitjin ni sacuaha cjuá vë, hya xi tuhun ngu caridad matsejen ne, xi canijanuu ngu tyjo xi tuhun cumachaya rë xuta cjuandaja jan. Hacuaha cuatjin sahmi xuta xi jo xcun jo hntsua me hya xi sua me caridad ngajan yungun o ndiya ngatsë rë xi vaxëndaja xuta me. Tichjá cojo nuju ta ha vëhë ni chji sacu rë me. <sup>3</sup> Vëhë xi ngayun ne, hya xi tuhun caridad ne, catuun cumachaya rë ntsun ladu xcun mé xi tuhun cojo ntsun ladu quixi. <sup>4</sup> Cuatjin hya xi tuhun caridad ne, tuhunhmu matsejen ne, hane xi cuatjin nihñu ne, Nahmi nuju xi tacun ngahnga ne xi cavëë me cjuandaja xi canihñu ne, sua me chji nuju.

*Jesús ne, vicuya me hacutjin nihña oración*

<sup>5</sup> 'Hacuaha hya xi nihñu oración, xi canihñuu sacuaha xuta xi jo xcun jo hntsua me ta me vëhë ne, jemu meje sahmi me oración cahntsua yungun cojo sa hiscan sahmi cru ndiya të hiscan xi scuëë xuta me. Nguehe cuichjá cojo nuju ta ha vëhë ni chji sacu rë me. <sup>6</sup> Vëhë xi ngayun ne, hya xi nihñu oración ne, techjun tingotjo ndya nuju hane tangun

cahnchun, ngajan hma nihñu oración cojo Nahmi nuju xi tacun ngahnga ta ngu ni me vëhë xi tacun me cojo nuju. Hane Nahmi nuju jan xi vëë me yëjë xcusun xi hincha hma ne, sua me chji nuju.

<sup>7</sup> Hacuaha hya xi nihñu oración, caveyunnanguun ngu cjua xi hisca suvun vijniircun sacuaha xcusun xi sahmi xuta xi hvíin me cjua rë Nina, ta xi má rë me vë ne, xi hitsë cjin cjua cuichja me ne, hacuaha hitsë sa cuahacuenda Nina tsëhë me.

<sup>8</sup> Mijí rë xi nihñu xcusun vëhë, ta hisca chaja sa xi chjahyun rë Nahmi nuju xi tacun ngahnga ne, ha vëë me mé xcusun xi mameje nuju. <sup>9</sup> Cuanitjin nújun hya xi nihñu oración:

Ngayun Nahmi niji xi nechun ngahnga ne,  
meje rë xi ngayijin ni xuta ngasunhdë chjihinrcuin nuju.

<sup>10</sup> Nduvun nihñu niji gobiernu.

Catamachihin cjuatacun nuju nguehe ngasunhdë sacuaha ngahnga xi ha camachihin.

<sup>11</sup> Nchunchujun ni ne, tuhun niñu xi xini.

<sup>12</sup> Ninchatuhun niji tsëhë yëjë ni jyë niji ta hacuaha ngayin suvin ni tininchatihin rë xuta xi choho sahmi me cojo niji.

<sup>13</sup> Caningatjuun xi chjaháchuva niji cojo cjuatacun niji ta, tuhun niji ngahñu xi cuma cuetjinxin tsëhë cjuatsehen.

Tsujun suvun gobiernu cojo ngahñu, hacuaha tsujun ni hasen rë ngahñu cjua nuju. Tsujun yëjë vë, yëjë nu, yëjë nixtin.

<sup>14</sup> 'Hya xi cajnetaha oración jan, cachja sa Jesús cuitjin: sá xi ninchatuhun xuta xi choho casahmi me cojo nuju ne, hacuaha Nahmi nuju xi tacun ngahnga ne, tsinchataha me jyë nuju, <sup>15</sup> peru sá xi ninchatuun xuta xi choho casahmi me cojo nuju ne, hacuaha Nahmi nuju jan ne, tsinchataain me jyë nuju.

*Jesús vicuya me tsëhë hya xi nechun xun rë Nina*

<sup>16</sup> 'Ngayun ne, nixtin xi nechun xun rë Nina ne, nihñuu va xcusun nuju sacuaha sahmi xuta xi jo xcun jo hntsua me ta sahmi va me xcusun rë me, ta me vëhë ne, hisca catsindeya me xcusun rë me sehe cumatsejen xi tacun me xun rë Nina. Cuichjá quixi cojo nuju ta ha vëhë chji xi sacu rë me. <sup>17</sup> Vëhë xi ngayun ne, hya xi nechun xun rë Nina ne, tinchacun, nihñu tyjahi yojo nuju. <sup>18</sup> Cuatjin nihñu cojo sa xi tsajin yo vëë rë xi nechun xun rë Nina, ta suva Nina, Nahmi nuju vëë me. Hane me vëhë ne cuechji me yun.

*Cjuanchina xi tacunya ngahnga*

<sup>19</sup> 'Cavetjuun cjuanchina nuju nguehe ngasunhdë, ta nguehe ne, sahmi dañu chu xavi cojo xutsë. Nguehe ne cuma



scuxahaya cha chëjë, hane sehe tsichëjë cha. <sup>20</sup> Hitsë sa ndaja ne, tetjún cjuanchina ngajan ngahnga ta ngajan ne tsajin dañu xi sahmi chu xavi cojo sa xutsë. Ngajan ne scuxaaïn cha sehe xi tsichëjë cha. <sup>21</sup> Cuatjin meje rë xi ngajan cuetjun tsujun ta, tsëhë xi hiscan tetjo cjuanchina nuju ne, hacuaha ngajan quitaha cjuatacun nuju cojo.

### *Ndihi rë yojo naja*

<sup>22</sup> Tuxcuun matsejen ne, vëhë xi sacuaha ndihi rë yojo naja. Vëhë xi hya xi tuxcuun ndacun ne, hatuxa seya cjuahasen cahntsua yojo naja. <sup>23</sup> Peru sá xi tuxcuun hmu matsejen ne, hacuaha ma jñu cahntsua yojo naja. Sacuaha hasen xi jiya cahntsua yojo naja ne, sá xi hacuiïn hasen xi cjuaquixi jain ta, suva jñú ne, ijercu tu jñú camahani cuma sa!

### *Tsajin yo xi ma fahacuenda xa tsëhë Nina cojo tsëhë cjuanchina*

<sup>24</sup> Tsajin yo xi ma fahacuenda xa tsëhë jo patrón ta, tsëhë xi choho scuëë rë patrón xi tjun hane tsihmu cacun rë patrón xi majo jan. O sá tsajin ne, jemu cuetaha yojo rë cojo patrón xi tjun hane patrón xi majo jan ne, hisca sahmicuendaïn rë. Vëhë xi xi ngu tangun ni ne, cumaji nihñu hacutjin xi meje rë Nina cojo hacutjin meje rë cjuanchina tsehen xi tsëhë ngasunhdë.

### *Sahmi cuidadu Nina xuta ladu rë me*

<sup>25</sup> Vëhë xi cuichjá cojo nuju ta hacuiïn cuityjanguntacun sá sacu o sá sacuiïn mé xcusun xi xinu xi sua nuju ngahñu. Hacuaha hacuiïn cuityjanguntacun sá sacu o sá sacuiïn tsjian xi chujun. Hitsë sa vengui chji rë cjuahñu nuju xi cumá rë xi chinu, hacuaha hitsë sa vengui chji rë yojo nuju xi cumá rë tsjian xi chujun. <sup>26</sup> Chutsujun chu nisë xi vitjen chu ngahnga ta hacuiïn tsitjë chu, hacuiïn fanchi chu, hacuaha tsajin rë chu ndyahnga hiscan cuinchandaja chu xi sinë chu, peru Nahmi nuju xi tacun me ngahnga ne, tsicjen me chu. Ngayun ne, hitsë sa vengui chji nuju xi cumá rë chu nisë vë. <sup>27</sup> Hacuaha tsajin hisca xi ngu xuta xi cuma cuesuntaha me cjuahñu rë me hisca ngu hora ta hacuiïn cavatsë chji me cjuahñu rë me. Tu mahya ne xi tjercu vityanguicacun me.

<sup>28</sup> Cuanitjin ne, ¿mé má chji rëhë xi cuityjanguntacun tsëhë tsjian xi chujun? Chutsujun naxu liriú xi vetju nguijña ta tsihyaain nachjun hacuaha fahyaain tsjian rë. <sup>29</sup> Peru ngahan cuichjá cojo nuju ta tsjian rë xutachanga naja Salomón ne, handasa jercu ndacun camahani, peru hitsë sa ndajyihi tsejen ngu naxu vëhë xi cuma rë tsjian jan. <sup>30</sup> Sá xi cuatjin tsicaja Nina xca nguijña xi ngu nixtin ne siutaha nguijña, hane xi tu cuma nchujun nga ne, cueti ne, hitsë guan sa ngayun

xi hatuxa tsicaja nuju me. Peru ngayun ne, cjëë cumanguta-cunndujun cojo me. <sup>31</sup> Vëhë xi hacuiin cumacjintacún hane cuinengunsuun cuitjin: “¿Mé comida xini? o sá ¿jani sacu niji xi sihin? o sá ¿mé tsjian chijin?” <sup>32</sup> Hacuiin ta, tsëhë xi xcusun vëhë ne, xuta xi hvín me cjuarë Nina ne, me vëhë xi vityanguicacun me xcusun vëhë. Peru ngayun ne, Nina Nahmi naja ne, ha vëë me xi machaja nuju xcusun vëhë. <sup>33</sup> Tityjanguntacun hacuaha nechunyun rë gobiernu xi sahmi Nina, hacuaha catama tangun cjuatacun nuju cojo cjuatacun rë me ne, hane yëjë ni xcusun vëhë ne, quitahacoo sa sacú nuju. <sup>34</sup> Cuanitjin ne, hacuiin cumacjintacún tsëhë mé xi cuma cuatju nchujuni, ta xi cumá rë nchujuni matsejen ne, hya yaha cjuacjintacun rë. Ngu nixtin ngu nixtin ne, chjuhun cuendun cjuacjintacun rë ta jima ngu nixtin cojo tsëhë.

## 7

### *Mijí rë xi nichuvan jingu sa xuta cojo cjuatacun rë me*

<sup>1</sup> Hacuiin nichuvun jingu sa xuta cojo cjuatacun rë me, sehe hacuiin tsichuva Nina ngayun. <sup>2</sup> Canichuvuun ta sá tsajin ne, chuva xi quixi yun cojo xuta ne, hacuaha cuanitjin quixi Nina cojo nuju; hacuaha chuva xi nichuvunyun matsejen ne, vëhë ni tsichuva Nina yun. <sup>3</sup> ¿Hacutjin má xi matsejen nuju xtë xi jiya tuxcun xingun? ta ngayun ne hitsë sa jyë xi jiya túxcun. <sup>4</sup> ¿Hacutjin má xi cuma cuinújun cojo xingun xi meje naxun xtë xi jiya tuxcun me jinguyëjë rë xi suvun matsejen ne, machayiin nuju xi hitsë sa jyë xta xi jiya túxcun vë ni? <sup>5</sup> Ngayun xuta xi jo xcun jo hntsua ne, naxun titjun xtë jyë xi jiya túxcun vë, sehe cumatsejenndaja nuju xtë xi jiya tuxcun xingun cojo sa xi cuma naxun.

<sup>6</sup> Sá xi tjin nuju mé xi venguichji rëhë sacuaha tjin rë cjuandaja xi casua Nina yun, tetjuhunndujun hacuiin tu yo ni tuhun rë ta sá tsajin ne, xuta jan ne, tsitjungui me xi ngayun jemu ximinchacun xi cuma nuju. Hacuaha cuichjataha nuju me.

### *Chjahyun rë Nina mé xi machaja nuju*

<sup>7</sup> Chjahyun rë Nina, hane sua nuju me. Tinchunsun, hane sacú nuju. Tinújun hacuaha chjahyun cahndë, hane Nina sua me cahndë xi cuisuhun cuinújun cjuacjintacun nuju. <sup>8</sup> Cuatjin nihñu ta, yëjë ni xuta xi fehya rë me ne, cuahatsja me, hane yo xi vanguise ne, sacú rë me, hane yo xi chja hacuaha fehya cahndë me ne, sacú cahndë cuisehen me.

<sup>9</sup> ¿Há tjin ngu nahmi xi, hya xi quihndi rë me cjuehya ngu niñu ne, cahndë rë xi vëhë ne, sua me ngu ndyojo, <sup>10</sup> o sá xi cjuehya quihndi yojo rë chu ti ne, cahndë rë vëhë ne, sua me ngu yë? <sup>11</sup> Sá xi ngayun xi xuta jyë yun ma tuhun rë quihndi

nuju xcusun xi ndaja. Hitsë guan sa Nina Nahmi naja xi tacun me ngahnga xi jyë hnga me cojo cjuandaja rë me ne, me vëhë vëë me mé cuatjo ndaja xi cuma sua me xuta xi cjuehya rë me.

<sup>12</sup> Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rë me: cuatjin nihñu ta cojo ngu xcusun ni xi tinihñu vëhë ne, ngayun tinihñuchuhun yëjë ni cjua rë ley cojo yëjë ni cjua xi catsihindu profeta.

*Ejemplu tsëhë tingotjo xcu*

<sup>13</sup> Cuisuhun hiscan sahmi Nina gobiernu sá xi cuisuhun tingotjo xcu ta, tsëhë xi sá xi cuisuhun táha tingotjo të o ndiya xi cjín me vatjun me ne; vëhë ni cjuecojo nuju cjuaveya hiscan xi jemu cjín xuta cjue me. <sup>14</sup> Ta tingotjo xcu o ndiya hndë ne, vëhë xi cjue cojo nuju hisca xi sacu nuju cjuahñu. Jemu chuva xuta xi sacu rë me tingotjo xcu jan.

*Tsejen mé xcusun xuta me ngatsë rë mé xi sahmi me*

<sup>15</sup> Cuidadu tsëhë profeta ndacha ta xi tjengui nuju me, jeya tsejen xcusun rë me sacuaha xcusun rë chu tsánga, peru quixiin vëhë ta suva cjuandacha ta xahasen rë me ne, quitsë rë cjuatsehen sacuaha cahntsua xahasen rë chu lobo.

<sup>16</sup> Tsejen mé xcusun xuta me ngatsë rë xcusun xi sahmi me. Sacuaha ngu ya ne, tsejen mé xcusun rë ngatsë rë tu xi sua. Sacuiin rë xuta uva tsëhë ya nahyálatu, hacuaha sacuiin rë xuta tuhaxi xi hmí higo tsëhë nahyándeHYA. <sup>17</sup> Quixi jain ta ngu yatjë xi ndaja ne, sua tú xi ndaja, hacuaha ngu ya xi machjiriin ne, hacuaha machjiriin tu rë. <sup>18</sup> Vëhë xi ngu yatjë ndaja ne, cumaji sua tú xi machjiriin, hacuaha ngu ya xi machjiriin ne, cumaji sua tú xi ndaja. <sup>19</sup> Hane yatjë xi machjiriin tú rë ne, xtijñi rë tsëhë xi ndaja sehe cueti. <sup>20</sup> Cuanitjin xuta ne, tutjin rë yatë vë ne, cuatjin rë me ta, tsejen xcusun rë xahasen rë me ngatsë rë xcusun xi sahmi me.

*Cachja Jesús xi hacuiin yëjë ni xuta cuisehen me gobiernu xi sahmi Nina*

<sup>21</sup> Tjin yo me xi cuichjacojo ná ta nai rë me ngahan, peru cuiiin me gobiernu xi sahmi Nina nahmi naha; ta ngajan cuisehen suva xuta xi sahmichihin me cjuatacun xi vitexa Nahmi naha xi tacun me ngahnga. <sup>22</sup> Vëhë xi handasa xi jemu cjín me cuichja me nixtin hya jan cuitjin ta: “Nai naha, ngatsë rë xi hñu ngayun, vëhë xi caveyinnangui ñihi nuju ne canújin cjua rë Nina, hacuaha xi canújin ñihi nuju ne, canaxinxin xitsehen, hane cojo ngahñu rë ñihi nuju cama canihñi cjuarcun.” Cuatjin cuichja me nixtin hya. <sup>23</sup> Ngajan xi ngahan ne, cuitjin cjuayanguë tsëhë me nixtin hya: “Tángxunxun tsahan ta hveen yo ngayun, ngayun xi nihñu cjuatsehen.”

*Ejemplu tsëhë jo ndihya*

<sup>24</sup> Yahnga xuta xi visiñuju me cjua naha hacuaha sahmi me sacuatjin chjá cojo rë me matsejen ne, tangun me cojo ngu cha quicun xi hya xi casahmi cha ngu ndihya matsejen ne, hiscan xcun nanguihñu casahmi cha. <sup>25</sup> Hane hya xi cavaha tsi, camajyë ndajyë hacuaha casesuntë nandá, hacuaha cavanga tjo hñu ne, jercu hñu catsivaha rë ndihya jan, peru caticjaainjnii tséhë xi xcun nanguihñu secun. <sup>26</sup> Peru yahnga nga xuta xi visiñujuu me cjua naha hacuaha sahmi me sacuatjin chjá cojo rë me matsejen ne, tangun me cojo ngu cha ngarca xi hya xi casahmi cha ngu ndihya matsejen ne, hiscan xcun nangui tsumi casahmi cha. <sup>27</sup> Hane hya xi cavaha tsi, camajyë ndajyë hacuaha casesuntë nandá, hacuaha cavanga tjo hñu ne, jercu hñu catsivaha rë ndihya jan, hane tu ngu ñahñu ne caticja ndihya jan, ngu cafë cavetsunya.

<sup>28</sup> Xi cajnetaha cachja Jesús ne, xutacjín ne jercu quijircun rë me tséhë cjua xi cavicuya Jesús ta, <sup>29</sup> tséhë xi cjua xi vicuya me ne, jercu tjin rë ngahñu, hacuiin sacuatjin cjua xi vicuya maestru xi vicuya ley.

## 8

*Casahmi Jesús xi camandaja ngu cha xi yaha chuxin rë cha chíhin vitaha*

<sup>1</sup> Hya ha cavijne me tséhë ndetjun jan, jemu cjín xuta tjengui rë me. <sup>2</sup> Hya xi camá ne, cafehe ngu cha xi jinguyë ni chuxin rë yaha rë ngu chíhin xi vitaha, caticjaxcun cha cafaharcun cha Jesús hane cachja cha cuitjin cojo rë me:

—Tatá. Sá xi meje nuju ne, cuma chjuhunxun chíhin xi yaha ná vi. —Cuatjin cachja cha.

<sup>3</sup> Hane xi catsixinga Jesús tsja me ne cavetahatsja me cha ne, sehe cachja me cuitjin:

—Meje ná. Catamandaja ngaye. —Cuatjin cachja me.

Hane chíhin jan ne, ngutjen ni cafëya. <sup>4</sup> Sehe cavitexa me cha cuitjin:

—Hisca xi ngu ni canujiin cojo. Tihin ningacuin yojo riji xcun nahmi sehe catutsejen me xi camandaja ye. Sehe tihinchjehe cjuatjo riji xi tehe rë Nina ngatsë rë xi camandaja ngaye tséhë chihin jan, sacuaha cavitexa Moisés xutachanga naja. Cuatjin nihñi cojo sa xi cumatsejen xi camandaja jain ngaye.

*Casahmi Jesucristu xi camandaja cha mosu xi cavatsë capitán*

<sup>5</sup> Xi cavatju vihi ne, sehe rë cavisehen me nandya Capernaum, hane ngajan cafehe tjengui rë me ngu capitán cafehya cha me favor <sup>6</sup> cuitjin cachja cha:

—Tatá. Tjin ná ngu cha mosu xi jiñahmu ndya naha. Cahme yojo rë cha hane jemu jiñañihi cha.

<sup>7</sup>Ngajan cafayangui Jesús:

—Cjué ngahan, tsírquë rë cha.

<sup>8</sup>Ngajan xi cafayangui capitán jan cuitjin:

—Hisca hacuiin sahmi ngujoyë xi ngayun cuinduvun ndya naha ta tséhë xi hitsë sa hñu cjua yun xi cuma ná ngahan. Quihndë ne, ndastu tinújun xi cumandaja mosu naha hane cuma ndaja cha. <sup>9</sup>Hacuaha ngahan ne, tjin ná xuta xi matitjun tsahan, hane hacuaha tjin ná ngu cientu sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi; hacuaha xi chjá cojo ngu nga xi cuinduva ne, nduva, hane mosu naha ne, xi chjá cojo xi sahmi mé xi meje ná ne, sahmi. —Cuatjin cafayangui capitán.

<sup>10</sup>Hane xi cahndë Jesús cjua vëhë ne, jemu quijircun rë me tséhë capitán jan, hane cachja me cojo xuta xi tjengui rë me cuitjin:

—Cuichjá cojo nuju ngu cjua ta, ngajñi naja ngayejen ni ngayaan xuta tjë rë Israel ne, cjëë scuëë ngu xuta xi cuatjin ndaja mangucacun me cojo ná sacuaha capitán vihi xi hacuiin xuta tjë naja me. <sup>11</sup>Hacuaha cuichjá cojo nuju ta cuinduva xutaxín tséhë táha ladu vetjucaa tsuhi cojo táha ladu vetje tsuhi cuiyuju me sinësuhi me cojo Abraham cojo Isaac cojo Jacob ngajan hiscan sahmi Nina gobiernu, <sup>12</sup>Peru xuta tjë rë Abraham xi quihndi cjuaquixi ne, cuma tsingatju me hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.

<sup>13</sup>Hya xi camá cachja Jesús cuatjin cojo xuta ne, sehe cachja Jesús cojo capitán jan cuitjin:

—Cuma cuangun ta tséhë xi xcusun xi vetjutacun xi má sahme, camachihin.

Hane hora xi cachja me cuatjin ne, camandaja cha.

*Jesucristu casahmi me xi camandaja nahya rë Simón Pedru*

<sup>14</sup>Hya xi cama ne, cavisehen Jesús ndava Pedru ne, hane cavëë me xi jiñahmu nahya rë Pedru cojo chíhin suë. <sup>15</sup>Ngajan xi cavetahatsja Jesús tsja na, hane ngutjen cavetjuxin chíhin jan tséhë na. Hane hora vëhë ni ne, cavisatjenhnga na hisca cama cafacuenda na me.

<sup>16</sup>Hane hora xi tivetje tsuhi ne, xuta ne, quijicojo me cjín xuta xi hincha rë xitsehen hane quiji me hiscan tacun Jesús. Hane Jesús ne, cavaxëxin me xitsehen jan cojo cjua ni, hacuaha catsirqui me yëjë xuta hmu rë. <sup>17</sup>Cuatjin casahmi me sehe cumachihin cjua xi cachja profeta Isaías xi cachja me cuitjin: “Cafaha suva me yëjë chíhin hinda xi tjin rë yojo naja, hane suva me cavaha me chíhin naja.”

*Xuta xi meje cjué cojo Jesucristu*

<sup>18</sup> Xi cavëë Jesús xi jemu tsë xuta hiscan tacun me ne, casua me cjuá cojo xicjin me xi cjuexin cojo rë me ngunda laguna. <sup>19</sup> Ngajan cafehe tjengui rë me ngu cha maestru rë ley sehe cachja cha cuitjin:

—Maestro. Tu yani ni xi cuangun ne, cjuë cojo nuju. —Cuatjin cachja cha.

<sup>20</sup> Sehe Jesús ne, cafayangui me cuitjin:

—Chu ninda ne, tjin nguïjo hiscan viyuju chu, hane nisë xi vitjen chu ngahnga ne, tjin ndava chu, peru ngahan xi hatuxa Quihndi rë Xuta ngahan ne, hisca ndya naha tsajin. —Cuatjin cachja me.

<sup>21</sup> Ngu nga xuta xi tjengui rë me cachja cojo rë me cuitjin:

—Tatá. Cuanguen cojo nuju peru hya xi cuatju seyaniji nahmi naha.

<sup>22</sup> Peru cafayangui Jesús cuitjin:

—Hanguen. Tehe vëhë catisahmi xuta xi cahme cjuatacun rë me, me vëhë catinchaniji me nima.

*Jesucristu casahmi me xi cuasen tjo cojo tsindyu rë nandan*

<sup>23</sup> Hya xi camá ne, cavisehen Jesús cahntsua ngu barcu hane ngajan quiji tjengui rë me xuta ladu rë me. <sup>24</sup> Hora xi cjuï barcu jan ne, canduva ngu tjohñu xi cavanga xcun laguna jan, hane hisca meje tsa rë barcu jan cojo tsindyu rë nandan xi satë rë jan. Peru hora vëhë Jesús ne, jiñafë me. <sup>25</sup> Sehe xuta ladu rë me ne, catsingasca rë me, hane cuitjin cachja me:

—¡Tatá, tatá! ¡Naxuntjun naja! ¡Nguehe cjuëyan! —Cuatjin cachja me cojo Jesús.

<sup>26</sup> Hane cachja Jesús cuitjin:

—¿Mé má cuatjin jemu rcun ngayun, ngayun xi cjëë cumangutacún cojo ná?

Hya xi cachja me cuatjin ne, cavisatjenhnga me cavatëcja me ngahñu rë tjo jan cojo tsindyu rë nandan jan, hane jingu-jyë ni jan ne, cavejñajyuu. <sup>27</sup> Hya xi camá ne, xuta jan ne, jercu quijircun rë me hane cachja me cuitjin:

—¿Yo xuta me vihi xi hisca tjo hisca tsindyu rë nandan vihndë tsëhë me?

*Cha Gadara xi hinchá xitsehen xahasen rë*

<sup>28</sup> Hya xi camá ne, cafehe Jesús cojo cha ladu rë me ngunda vëhë, hisca ladu rë xuta nandya Gadara ne, ngajan jo me xi hinchá xitsehen xahasen rë quiji tiña me tsëhë Jesús. Catsijo me xi cuacun jan ne, siu cahndë me ngojo naxi hisca xi sacuaha tsjun. Hacuaha jemu cjan rë me hisca tsajin yo xi tsujyihya taha vë jan. <sup>29</sup> Hya xi cavechu me hiscan tacun Jesús, cojo ngahñu rë xitsehen jan, cavetsihin cachja me cuitjin:

—Mé má cuatjin ninguisuhunjñu cojo niji ngayun Jesús, Quihndi rē Nina. ¿Há tuhun niji cjuañihi handasa chaja sa nixtin rē?

<sup>30</sup> Nixtin hya ne, ngajan tiñataha ne, tacun ngu cahndē hiscan jemu cjín chu chinga hinchataha chu tijine chu. <sup>31</sup> Hane xitsehen jan ne, ña yuma chja cojo Jesús cachja cuitjin:

—Sá xi hatuxa naxunxun niji tsēhē xahasen rē cha xi cuicun vi, ningatjun niji hiscan siutaha chinga, hacuaha ningatuhun niji xi cuisihin cahntsua xahasen rē chu.

<sup>32</sup> Hane cachja Jesús ta:

—Joho, tangun.

Hya xi camá ne, cavetjuxin xitsehen tsēhē cahntsua xahasen rē cha jan, hane cavisehen cahntsua xahasen rē chu chinga jan. Hya xi camá ne, yējē ni chu chinga jan ne, cavanga chu quijijne chu taha rcu ndetjún, hane ngajan cavixuya chu ngajñi nandá tsēhē laguna, hane ngajan café chu, cahme chu.

<sup>33</sup> Hane ngatsē rē chircun jan ne, cha xi sahmi cuidadu rē chu chinga jan, cavanga cha quiji cha nandya. Hane xi cavisehen cha nandya, casua cha camachaya rē xuta tsēhē xcusun xi camá rē chu chinga jan cojo xcusun xi cavatju jo cha xi hinchá rē xitsehen jan. <sup>34</sup> Hya xi camá ne, yējē xuta tsēhē ladu tsēhē nandya Gadara ne, quijitjengui me Jesús hiscan tacun me, hane xi cavechutaha xuta me ne, cafehya me Jesús xi catje me tsēhē ladu rē me jan.

## 9

### *Casahmi Jesús xi camandaja ngu xuta xi cahme yojo rē*

<sup>1</sup> Hya xi camá ne, cavisehen nga Jesús barcu, café me nangui rē me ta tacun ngunda laguna. <sup>2</sup> Hya xi camá ne, ngutjen ni quijitjengui xuta me hane xuta jan ne, yahahnga me ngu cha xi cahme yojo rē cha, jiña cha xcun nijña rē cha. Hane xi cavēē Jesús xi cuatjin mangu cacun xuta xi cuacun jan cojo rē me ne, sehe cachja xu me cojo cha hmu rē jan cuitjin:

—Tuhun cjuasua xahasen nuju ta jyē nuju, tsan ne, ha camanchataha. —Cuatjin cachja me.

<sup>3</sup> Ngajan xi ngu jo maestru xi vicuya cjuachacun ne, cavet-sihin catsingataha cacun me cuitjin: “Nina tsixcuehyu cha.”

<sup>4</sup> Hane tsēhē xi vēē Jesús cjua xi tsingatahacacun maestru jan ne, cuitjin cavinenguise me cha:

—¿Mé má cuatjin chojyihí ningatuhuntacun? <sup>5</sup> Xi má nuju, ¿jarē cjua xi hitsē sa tsaviin fi xi cuichjá: há xi “Jyē nuju ne, ha camanchataha” o há tsajin ne; há “Tisatjunhngun ne, tujyuhunyun?” <sup>6</sup> Peru nguehe suá cumachaya nuju ta ngahan

xi Quihndi rë Xuta Jain ngahan ne, yahá xá xi tsinchátaha jyě rë xuta nguehe ngasunhndë.

Sehe ngajan cachja xu Jesús cojo cha hmu rë jan:

—Quihndë ne, ngayun tsan ne, tisetjunhngun chjuhun nijña nuju vë, sehe tjangun ndya nuju.

<sup>7</sup> Hya xi camá ne, cavisatjenhnga cha quiji cha ndava cha.

<sup>8</sup> Xi cavëë xuta xcusun xi camá ne, quijircun rë me, sehe casahmi hnga me Nina ta Nina ne, casua me cahndë Jesús xi cuatjin casahmi me.

### *Cavaxijin Jesucristu Mateo*

<sup>9</sup> Xi quiji sa xu Jesús ne, cavechu me hiscan cavëë me ngu xihin xi tacun cahndë hiscan xi faha tujúnsa. Mateo hmí rë me. Ngajan xi cachja Jesús cojo me cuitjin:

—Nduvun, cuanguen cona.

Hane Mateo jan ne, cavetju me quiji me cojo Jesús.

<sup>10</sup> Ha nixtin vëhë ne, tijine Jesús niñu ndava Mateo. Hane jemu cjín sa cha xi faha tujúnsa cojo yahnga cha xi tsitjungui xuta nangui vë ne, hacuaha tijine cha niñu ngajan. <sup>11</sup> Peru xi cavëë cha partidu fariseo xcusun jan, sehe cavinenguisse cha cojo cha ladu rë Jesús cuitjin:

—¿Mé má jinë hvi maestru nuju cojo cha xi faha tujúnsa cojo ngujo sa cha xi hacuaha cha tsehen cha? —Cuatjin cachja cha.

<sup>12</sup> Peru cavihndë Jesús cjua xi cachja cha, hane cafayangui me cuitjin:

—Xuta xi hacuiin hmu rë me ne, mamijí rë me xi cjua-hacuenda rë me doctor ta suvá ni xuta xi hmu rë me ne, me vëhë meje rë xi cjuahacuenda rë me doctor. <sup>13</sup> ¿Há vijni rrun mé vijne cjua rë Nina vihi?: “Hitsë sa ndama ná xi mayuma nuju xingun xi cuma rë xi nicuhun chu sacuaha cjuatjo xi tuhun ná.” Hacuanitjin ná ngahan ta ngahan ne, hacuiin canduvá xi squindáyavaha rë xuta xi tsajin xi cun rë me xcun Nina, ta xa xi canduvá ne, xi squindáyavaha rë xuta tsehen, hane cuichjá cojo me xi tsindeya me cjuatacun rë me. —Cuitjin cachja Jesús.

### *Mé tsëhë xi casahmii Jesucristu cojo xuta rë me xun rë Nina.*

<sup>14</sup> Ngajan xi xuta ladu rë Juan ne, cafehe me cavinenguisse me Jesús cuitjin:

—Ngayijin ni, vinechin xun rë Nina hacuaha cha partidu fariseo hacuaha viyuju cha xun rë Nina. ¿Mé tsëhë xi xuta ladu nuju ne, sahmii me cuatjin ne?

<sup>15</sup> Ngajan xi Jesús ne, cuitjin cachja me cojo cha:

—Cumaji xi xuta rë cha xi tivixan ne, sahmii me xun rë Nina jinguyëjë rë xi cha xi tivixan ne, tacun cha cojo rë me. Peru cuechú nixtin xi cha xi tivixan jan ne, chjaháxin rë cha tsëhë



xuta rë cha, hane hya cuma sahmi me xun rë Nina. —Cuatjin cachja Jesús.

<sup>16</sup> Hacuaha cachja sa me ta: —Tsajin yo xi cueyacoo ngu tsjian changa cojo ngu rquí tsjian xi cjëë cjueyu ta sá xi cuatjin sahmi me, xi cjueyu tsjian xatsë jan ne, cuicheya rë tsjian changá jan hane sahmi jyë sa rë hiscan xi ntsun. <sup>17</sup> Cuanitjin ne, tsajin yo xi vincha xan xatsë cahntsua chuxin changá ta, sá xi cuatjin sahmi me ne, tsitsingá rë chuxin jan. Hane cjuë cuixu xan jan, hacuaha cuetsun chuxin jan. Xi meje rë ne, xan xatsë ne, xincha cahntsua chuxin xatsë ta cuatjin ne, catsijo ni ne tsajin mé cuma rë.

*Catsicuya Jesucristu cjuahñu rë quihndi rë Jairo; hacuaha camandaja ngu na xi casatëtsja tsjian rë Jesucristu*

<sup>18</sup> Hora xi tivisiajmi me cuatjin ne, canduva ngu me xi xutaxa rë yungun. Hane quiji caticjaxcun me xcun Jesús cachja me cuitjin:

—Ndicumaha ni cahme na lihndi naha. Peru sa xi cuanguen ne, cuisanu ntsun na ne, cuya nga na cjuahñu.

<sup>19</sup> Hya xi camá ne, cavetju Jesús quiji me cojo nahmi rë na lihndi jan hacuaha quiji xuta ladu rë Jesús. <sup>20</sup> Hane ngajñi cjui me ne, ngu na xi tjin rë tejó nu xi yaha rë na chíhin xahmajni quiji tiña na táha ngaxtun Jesús ne, quiji cavetahatsja na ntsacu tsjian rë me ta, <sup>21</sup> catsingatahacacun na cuitjin: “Sá xi cuetahantsa ndastu tsjian rë me ne, cumandaja ngahan.” <sup>22</sup> Peru cavuya Jesús taha ngaxtun me ne, sehe cavutsejen me na hane cachja me cojo na cuitjin:

—Tuhun cjuasua xahasen nuju, tsan, camandaja ngayun ta camacjain nuju.

Hane ngutjen ni ne, camandaja na.

<sup>23</sup> Hya xi camá ne, cafehe Jesús ndava xutaxa rë jan. Ngajan cavëë me xi ha siu cha chjinytyjo cojo xutacjín xi jihnda me ngatsë rë cjuandusin. <sup>24</sup> Sehe cachja me cojo xuta cuitjin:

—Tjangunxun. Na lihndi vë ne, hacuiin cahme na ta jiñafë ni na. —Cuatjin cachja me.

Ngajan xi xuta jan ne, tu cavejnucëë me Jesús. <sup>25</sup> Peru xi casahmi me xi cavetju xin xuta jan, sehe cavisehen Jesús hiscan jiña nima lihndi jan ne, cafaha me tsja na hane catsatjenhnga me na. <sup>26</sup> Hya xi camá ne, cavitsojo cjua rë xcusun jan jingujyë nangui vë.

*Casahmi Jesús xi camatsejen rë jo cha rcá*

<sup>27</sup> Xi cavetju Jesús quiji me tsëhë ngajan ne, canduva tjengui rë me jo cha rcá hane cajindaya cha cachja cha cuitjin:

—¡Ngayun Jesús, tjë rë David! Catamayuma nuju ngayin. —Cuitjin cachja cha.

28 Xi cavisehen Jesús ndihya ne, sehe cavechutaha cha rcá me, hane cavinenguise Jesús cha cjua vi:

—Xi má nuju, ¿há cuma sahme xcusun xi chjayun?

Cafayangui cha cuitjin:

—Macjain niji, Tatá, cuma nihñu.

29 Hya xi camá ne, cavetahatsja me tuxcun cha hane cachja me cojo cha cuitjin:

—Cuatjin catama cojo nuju xcusun sacuaaha xi macjain nuju.

30 Hane ha hora vëhë ni ne, catuxaha tuxcun cha hane camatsejen rë cha. Ngajan xi Jesús ne, cavitexa me cha cuitjin:

—Tsajin yo cuinújun cojo tsëhë xcusun vihi.

31 Peru cavatju xi quiji cha jan ne, cavitsojo cjua tsëhë me jingujyë nandya jan.

*Cavaxëxin Jesús ngu xitsehen xi casahmi lihmi rë ngu cha*

32 Hora xi ha quiji jo cha jan ne, cafehe xuta xi canduva me cojo ngu cha xi hincha rë xitsehen; hane xitsehen jan ne, casahmi lihmi rë cha. 33 Hane hya xi cavetju xitsehen tsëhë cha lihmi jan, cavetsihin cachja cha. Hane xutacjín xi cavutsejen me ne, jemu quijircun rë me ne cachja me cuitjin:

—Nguehe nangui naja Israel ne, tsajin ngu nixtin xi tsejen cjuarcun sacuaaha tijimá quihndë.

34 Peru cha partido fariseo ne, cachja cha cuitjin:

—Xitsehen xi matitjun ne, vëhë casua rë cha xa xi vaxëxin cha xitsehen.

*Jemu cjín xuta xi meje rë xi cuisñuju me cjua rë Nina*

35 Jesús ne, catsujyihya me jemu cjín nandya cojo ranchun ne, ngajan cavicuya me xuta cahntsua yungun rë me. Casua me camachaya rë me cjuandajyihí xi chja tsëhë gobiernu xi sahmi Nina. Hacuaha catsirqui me xuta tsëhë yëjë ni chíhin cojo yëjë ni xcusun xi cjuahmu. 36 Peru xi cavëë Jesús xutacjín ne, camayuma rë me xuta jan ta tsëhë xi jemu va tjín rë xahasen rë me, jemu camachohocacun me sacuaaha chu tsánga xi tsajin yo xi cjuahacuenda rë chu. 37 Vëhë xi cuitjin cachja me cojo cha ladu rë me:

—Xutacjín vi ne siu me sacuaaha siu niji ngajan nguijña xi jemu ndaja camá peru tsajin cha mosu xi cuanga rë. 38 Vëhë xi meje rë xi chjahyun rë Nai naja xi tsingatju me xuta xi cuanga me.

## 10

*Cavaxijín Jesús tejó xuta ladu rë me*

1 Cavechú ngu nixtin xi casahmitangun Jesús xuta ladu rë me xi tejó jan ne, sehe casua rë me ngahñu hacuaaha casua

rë me xá xi me xi cuacún vë, cuitexa me yëjë xitsehen hane cuaxëxin me xitsehen tsëhë xuta; hacuaha sahmi me xi xuta xi hmu rë me ne cuma ndaja me tsëhë tu me ni chíhin xi yaha rë me.

<sup>2</sup> Cha xi tejó jan ne, cuitjin hmí rë cha: titjun ne, Simón, me xi hacuaha yaha ñihi rë Pedru, cojo Andrés hntsë Simón, Jacobo quihndi rë Zebedeo cojo Juan hntsë Jacobo, <sup>3</sup> Felipe cojo Bartolomé, Tomás cojo Mateo, cha xi faha tujúnsa, Jacobo quihndi rë Alfeo cojo Tadeo, <sup>4</sup> Simón xi tsëhë partidu cananayu cojo Judas Iscariote, me xi sahmi entregadu rë Jesús.

*Catsingatju Jesucristu tejó xuta ladu rë me xi cuichja cjuandajyihi rë Nina*

<sup>5</sup> Tejó xuta jan ne, catsingatju Jesús me ne, cavitexa me cuitjin:

—Tanguun ngajan ndiya xi fi xuta xi hvíin me cjuar rë Nina, hacuaha cuisuun nandya rë distritu Samaria ta; <sup>6</sup> tángun hiscan siu xuta nandya rë Israel, xuta jan ne tangun me cojo ngu chu tsánga rë Nina xi cachaja chu. <sup>7</sup> Tuhun cumachaya rë xuta cjuandajyihi rë Nina xi jima tiña gobiernu xi sahmi me. <sup>8</sup> Nihñu xi cuma ndaja xuta hmu rë, nicuyun cjuahñu rë nima, nihñu xi cuma ndaja xuta xi yaha chuxin rë me chihin vitaha, hacuaha naxunxun xitsehen. Ngahñu xi meje nuju xi cuatjin nihñu ne, tu cuatjo ni sacu nuju, vëhë xi hacuaha tu cuatjo ni tuhun ngahñu jan.

<sup>9</sup> 'Xicachjuun oro o sá quicha tyava o tu mé ni tujún xi cuinchunndujun cahntsua tsá tujún nuju xi tsëhë gastu nuju. <sup>10</sup> Xicachjuun changa, xicachjuun ngu xúta tsjian, hacuaha xicachjuun ngu xúta chuxinxte o sá ngu bastón ta, xuta xi sahmi me xá ne, tsëhë xá jan sacu rë me gastu rë me.

<sup>11</sup> 'Cuanitjin ne, tu mé ni nandya o sá tu mé ni ranchun xi cuisuhun ne, ngajan cuinchunsun ngu xuta xi ndaja xahasen rë me, ngajan ndava me ne, nechuncahndun hisca xi cuetjunixun tsëhë nangui jan. <sup>12</sup> Hane hya xi cuisuhun ngu ndihya ne, tinújun ngu nina cuitjin: “Nina sua nuju me cjuandaja cjuajeya.” <sup>13</sup> Hane sá xi nai rë ndihya jan ndaja vëë me yun ne, catisatë rë ndava me jan cjuajeya; peru sá xi hacuiin ndaja vëë me yun ne, satiin rë me cjuajeya jan. <sup>14</sup> Hane hiscan xi tjin xuta xi cjuahatsjaain nuju me, xi chjuhun ndiya xi cuetjunixun tsëhë nandya vëhë ne, titsunu chojo rë ntsacu. <sup>15</sup> Cuichjá cojo nuju ngu cjuaquixi ta hya xi cuechú nixtin xi tsichuva Nina xuta tsëhë jyë rë me ne, hitsë sa jyë castigu cuatju xuta tsëhë nandya xi cafachatsjaain nuju jan, xi cumá rë xuta tsëhë nandya Sodoma cojo xuta nandya Gomorra.

### *Cjuañihi xi cuatjun cuma*

<sup>16</sup> 'Ngahan titsingátju nuju ngayun xuta jeya xi cuangun ngajñi rë xuta hnga cacun sacuaaha cjue ngu chu tsánga ngajñi rë chu cjan rë. Vëhë xi meje rë xi ndaja quicuntacun sacuaaha quicuncacun chu yë, peru hacuiin tsavi yun sacuaaha tsajin tsavi chu paloma. <sup>17</sup> Peru nechun cuidadu ta, cjuaha nuju xuta cjuecojo nuju me xcun xutaxa rë ndihyavasen, hacuaaha cuaja nuju me ngajan yungun rë me, <sup>18</sup> hisca cjuecojo nuju me xcun gobernador, hacuaaha cjuecojo nuju me xcun me xi vitexa me jinguyjë ni nandya. Cuatjin cuangun ngatsë rë xi ladu naha má ngayun. Ngatsë rë vëhë sacu nuju cahndë xi ninguijxun cjua xi cavicuyá nuju xcun xuta jan cojo xuta xi hvín me cjua rë Nina. <sup>19</sup> Hya xi cuatjin cjuecojo nuju me ne, hacuiin cuityjanguntacun tsëhë hacutjin xi ninguijxun ta, tsëhë xi hora vëhë ne, Nina sua me ngayun cjua xi nicuyun. <sup>20</sup> Ta tsëhë xi hacuiin cjua nuju xi cuinújun ta tsëhë Hasen rë Nina cuinduva cjua xi cuinújun.

<sup>21</sup> 'Hacuaha xuta ladu naha ne, hntsë me, cuinchajyë rë me, xutacha rë me, cuinchajyë rë me, quihndi rë me cuinchajyë rë me cojo sa xi xutaxa rë ne, cjuaha rë me me ne, tsiquehen rë me. <sup>22</sup> Yëjë ni xuta ne, choho scuëë nuju me, tsëhë xi ladu naha ngayun. Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. <sup>23</sup> Hya xi tsujyihiyatjengui nuju me ngu nandya ne, tangun ngu nandya tiñataha ta, cuichjá quixë cojo nuju ta xi chaja sa cuatjun jinguyjë ni nandya tsëhë nangui rë Israel ne, cúa ngahan Quihndi rë Xuta.

<sup>24</sup> 'Ngu cha xi sehe tivutaya matsejen ne, hacuiin hitsë sa matitjun cha xi cumá rë maestru rë cha, cuanitjin ne, ngu cha hndixahan ne, chuva venguichji rë cha xi cumá rë nai rë cha. <sup>25</sup> Catamangucacun cha tsëhë xi cuechú nixtin xi tangun cuenguichji rë cha cojo maestru rë cha o tangun cuenguichji rë hndixahan cojo nai rë. Ha chuva vëhë ni cuatjun ta sá xi choho cuichja xuta nai rë ndihya ne, ngu xitsehen me, hitsë sa choho cuichja me tsëhë xuta rë nai rë ndihya jan.

### *Xicarcuun xuta*

<sup>26</sup> 'Xicarcuun xuta condra nuju. Yëjë ni xcusun xi caset-sangui ne, cuechú nixtin xi chjaháxin rë xi titsangui rë. Vëhë xi yëjë ni xcusun xi hma ne, handasa sahmangui ne, peru cuechú nixtin xi cuetjucaa tsejen. <sup>27</sup> Yëjë ni cjua xi cuichjá cojo nuju hiscan jñu ne, cuinújunsun hiscan hasen. Yëjë ni cjua xi cuichjáhma ne, cuechú nixtin xi cuinuhya rë jinguyjë ni nandya. <sup>28</sup> Xicarcuun xuta xi cuma tsiquehen yojo nuju, peru ngaxtun vëhë ne, tsajin me dañu ma sahmi me cojo hasen nuju. Hitsë sa ndaja ne, rcun Nina, me xi tjín rë chuva rë xi

tsiquehen me yojo nuju hane hacuaha tsingatjenya nuju me hiscan xi má hasen nuju castigu.

<sup>29</sup> 'Chutsujun ta jo chu nisë langa ne, ngu ni tujún chji rë chu, peru handasa cuatjin ne, hiscan ngu chu cumaji cueya chu sá xi suaain Nina cahndë. <sup>30</sup> Hane ngayun ne, hisca jimangu tsjarcun ne xqui tjin rë Nina. <sup>31</sup> Vëhë xi xicarcuun ta, tsëhë xi jimangu ngayun ne, hitsë sa jercu vengui chji nuju xi cumá rë chu nisë vë, handasa jemu cjin chu.

<sup>32</sup> 'Yëjë xuta xi tsinguixi me xcun yahnga xuta xi xuta ladu naha má me ne, hacuaha ngahan tsinguixë xcun Nahmi naha xi tacun ngahnga xi xuta ladu naha má me. <sup>33</sup> Peru yëjë xuta xi tsinguixiin me xcun yahnga xuta xi hacuiin xuta ladu naha má me ne, hacuaha hacuanitjin ni tsinguixë ngahan xcun Nahmi naha xi tacun ngahnga.

*Ngatsë rë cjua rë Jesucristu xi sahmi condra xutacjin xicjin me*

<sup>34</sup> 'Xi má nuju ngayun ne, ¿há cjuajeya canduvácojo xi cumá rë xuta ngasunhdë? Hacuiin cuatjin. Ngahan ne, si canduvá cojo. <sup>35</sup> Canduvá tsinguetsuntaha xicjin xuta. Cha quihndi ne, sahmi condra cha nahmi rë cha, hane na quihndi ne, sahmi condra na naa rë na, hane jahnda ne, sahmi condra na nahya rë na. <sup>36</sup> Cuatjin xuta condra rë me ne, cuma ni xuta rë me.

<sup>37</sup> 'Sá xi ngu me ne hitsë sa tsihmu cacun me nahmi rë o sá xi naa rë me xi cumá ná ngahan ne, vechiin chuva rë xi tsahan cuma me. Hacuaha sá xi ngu me ne hitsë sa tsihmu cacun me quihndi rë me sá xihin sá chjuun xi cuma rë xi tsihmu cacun me ngahan ne, vechiin chuva rë xi tsahan cumá me. <sup>38</sup> Ha cuanitjin ne, sá xi ngu me ne mijí cjuejñahñu xahasen rë me xi cjuecojo me ndiya naha handasa cueya me xcun cru ne, cumaji cuechu me chuva rë xi tsahan cumá me. <sup>39</sup> Xuta xi nguehe ni ngasunhdë meje cjuenduju me cojo cjuahñu rë me ne, titsichajá me cjuahñu xatsë xi sua Nina me. Peru xuta xi titsichajá me cjuahñu rë me nguehe ngasunhdë ne ngatsë naha ne, hatuxa sacú rë me cjuahñu xatsë xi sua Nina me.

*Cjuatjo xi sua Nina*

<sup>40</sup> 'Xuta xi cjuahatsja me yun, tangun sacuaha xi cjuahatsja ná me ngahan suva, hane xuta xi cjuahatsja ná me ne, tangun sacuaha xi cjuahatsja me Nahmi naha, me xi catsingatju ná. <sup>41</sup> Xuta xi cjuahatsja me ngu me xi chja me cjua rë Nina ne ngatsë xi chja me jan cjua rë Nina ne, tangun chji sacú rë me cojo me jan. Hacuaha xuta xi cjuahatsja me ngu xihin xi tyjahi cjuatacun rë me xcun Nina ngatsë rë ndaja xihin jan ne, tangun chji sacú rë me cojo xihin jan. <sup>42</sup> Cuanitjin ne, xuta xi sua me ndastu ngu vasu nandá cjuahatsja tu yo ni xi xuta

ladu naha ne handasa jemu yuma jyihi me ne, sacu chji rë me ngatsë rë xi cuatjin sahmi me cojo xuta xi tjengui ná.

## 11

### *Cha xi catsingatju Juan Vitenda rë Xuta*

<sup>1</sup> Hya xi camá ne, xi cajnetaha cjua xi cavitexa Jesús cha xi tejó má jan, sehe cavetjuxin me quiji me nandya xi siutahndee, ngajan cavicuya me xuta cachja me cojo tsëhë cjuandajyihî rë Nina.

<sup>2</sup> Nixtin hya ne, ha jiya Juan Vitenda rë Xuta ndavaya, hane ngajan camachaya rë me tsëhë xcusun xi sahmi Jesús. Vëhë xi catsingatju me ngujo cha ladu rë me xi quiji cha <sup>3</sup> cavinenguisse cha Jesús cuitjin:

—¿Há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin cavinenguisse xuta xi catsingatju Juan jan.

<sup>4</sup> Hya xi camá ne, catsicuya Jesús cjua cojo cha xi cuacun jan hane cuitjin cachja me:

—Tjangun ne, sehe tinújun cojo Juan yëjë cjua xi canuhyun cojo yëjë xcusun xi cahyun. <sup>5</sup> Tinújun ta xuta rcá ne, camá camatsejen rë me; xuta rengun ne, camá quijindaja me; xuta xi yaha rë chíhin vitaha xi setaha yojo naja ne, camandaja me; nima ne, cavuya nga cjuahñu; xuta yuma ne, casacu camachaya rë me cjuandajyihî rë Nina. <sup>6</sup> Hacuaha jemu ndaja tsëhë tu yo ni xuta xi hacuiin tsismicacun me xi mangu cacun me cojo ná. —Cuatjin cachja Jesús.

<sup>7</sup> Hane hya xi cavetju quiji xuta ladu rë Juan jan ne, sehe cavetsihin cachja Jesús cojo xutacín jan cuitjin tsëhë Juan:

—Hya xi cavetjun catsangun ngajan ngu xín tsëhë nandya catsangun tjengun Juan matsejen ne, ¿há caningatuhuntacún xi cuechuntuhun ngu xihin xi hacuiin ngu ni cjuatacun rë me, sacuatjin rë ngu ndeje xi fi nguehe fi ngajan rcu sacuatjin cjui tjo? <sup>8</sup> O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihî camahani? Hacuuiin cuatjin. Ha hyaan matsejen ta xuta xi jercu tu ndacun camahani tsjian vaja me ne, sacuiin naja ngajan xin jan, ta sacu naja ndava ngu xuta nchina. <sup>9</sup> Peru ngayun matsejen ne, catsangun cachutsujun ngu profeta. Hacuaha cjuaquixi xi vëhë cachutsujun. Peru profeta Juan vë matsejen ne, hitsë sa vengui chji rë me xi cumá rë yëjë sa profeta xi yahnga. <sup>10</sup> Hacuaha me vëhë xi cachja Nina tsëhë me xcun sujun rë me cuitjin:

Ngahan ne, tsingátju titjun ngu cha xi scuxaha cjuatacun rë xuta tsëhë xi cjuehe ngaye.

<sup>11</sup> Cuichjá cojo nuju matsejen ta ngajñi rē yējē xuta xi catsin me tsēhē naa rē me matsejen ne, tsajin ngu xi hitsē sa vengui chji rē xi cumá rē Juan. Peru hya xi cuetsihin Nina sahmi me gobiernu nguehe ngasunhdē matsejen ne, xuta xi chuva cuengui chji rē me nixtin hya matsejen ne, hitsē sa cuengui chji rē me nixtin hya, xi cuma rē xi vengui chji rē Juan quihndē.

<sup>12</sup> Hisca nixtin xi caxtenda Juan hisca nixtin quihndē ne, má cjuasuē xi satē rē gobiernu xi sahmi Nina; xuta ne, meje cuisehen me ngajan, handasa cojo cjuachan. <sup>13</sup> Xi chaja sa nduva Juan ne, yējē ni xujun xi catsihindu profeta cojo xujun rē ley ne, suva casua camachaya rē xuta tsēhē gobiernu xi sahmi Nina. <sup>14</sup> Sá xi meje nuhyun cjuaquixi ne: Juan ne, hacui Elías, xi sehe nduva xu. <sup>15</sup> Yo ngayun xi tjin nuju cjuasua xi cuinuhyun cjua vihi matsejen ne, ndaja tetuhunrcun.

<sup>16</sup> 'Ngayun xuta tsēhē nixtin vihi matsejen ne, ¿mé xi tangun ngayun cojo? Tangun ngayun cojo langa xi siu ngajan ndetsin, xi jindaya xicjin <sup>17</sup> cojo cjua vihi: "Canijani tsujun ne, mijí xtun; casin va ne, mijí chjihndun." Cuatjin jindaya langa. <sup>18</sup> Cuatjin chjá cojo nuju matsejen ta, Juan xi vitenda nuju ne jinii me niñu hacuaha hviin me xan, hane nújun ta jiya xitsehen xahasen rē me. <sup>19</sup> Hane ngahan xi Quihndi rē Xuta Jain matsejen ne, jinē hacuaha hvē, hane nújun ta ngu cha cahntsuaníñu ngahan, ngu cha cahntsuanaxan ngahan, hacuaha ngu cha amigu rē cha xi faha tujúnsa cojo jingu sa xuta tsehen ngahan. Tsejen xi ndaja ngu cjuatacun xi casacu rē ngatsē rē xi ndaja tivetjucaa tsujun xi tihñuchuhun.

*Chojyihi tsēhē xuta nandya xi vindeyaain cjuatacun rē me*

<sup>20</sup> Hya xi cama ne, cavetsihin Jesús chjataha me xuta nandya jani hitsē sa jemu casahmi me cjuarcun camá, ta catsindeyaain me cjuatacun rē me. Cuitjin cachja me:

<sup>21</sup> —¡Jemu chojyihi tsujun xuta nandya Corazín! ¡Hacuaha jemu chojyihi tsujun xuta nandya Betsaida! Jemu chojyihi tsujun ta, tsēhē xi sá xi xutaxín tsēhē Tiro cojo xutaxín tsēhē Sidón cavēē me cjuarcun xi cahyun ne, ha catsindeya me cjuatacun rē me, hacuaha ha cavajá me tsjian xi sacuaha tsánaxá hacuaha caviyuju me ngajñi ndesu, sacuaha xcusun naja hya xi choho má naja. <sup>22</sup> Vēhē xi hya xi tsichuva Nina yējē xuta tsēhē jyē rē me ne, xuta nandya Tiro cojo xuta nandya Sidón ne, hitsē sa chuva castigu cuatju me cumá xi cumá nuju ngayun xuta nandya Corazín cojo ngayun xuta nandya Betsaida. <sup>23</sup> Hane ngayun xuta nandya Capernaum ne, ¿há cuangun hisca ngahnga hiscan tacun Nina? ¡Hacuiin! Hatuxa cuangun nduchin, cahndē hiscan fi hasen rē nima ta, tsēhē xi sá xi xuta tsehen tsēhē Sodoma cavēē me cjuarcun xi cahyun

ne, ha catsindeya me cjuatacun rë me, hane tacun cuaha nandya jan hisca quihndë. <sup>24</sup> Vëhë xi hya xi tsichuva Nina xuta ne, hitsë sa chuva castigu cuatju xuta Sodoma xi cumá nuju ngayun xuta nandya Capernaum.

*Casahmi jyë casahmi hnga Jesucristu Nina*

<sup>25</sup> Nixtin hya ne, cachja Jesús cojo Nina cuitjin:

—Ngayun nahmi naha ne, sahme jyë sahme hnga nuju, ngayun xi Nai rë ngahnga cojo nangui, ngayun, tsëhë xi ngayun caveyúnhmu cjuatacun vëhë xi cuma rë xuta xi jemu vechú cjuatacun rë, hane catuhun camachaya rë xuta xi jñu tsëhë me. <sup>26</sup> Ngayun nahmi naha, cuatjin canihñu ta, tsëhë xi cuatjin xi cachuya nuju. —Cuatjin cachja Jesús cojo Nina.

<sup>27</sup> Cachja me cojo xuta:

—Yëjë ngarca matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin yo xi vëë Nahmi naha matsejen ne ta, suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. <sup>28</sup> Ngayun xi fenda rë xahasen nuju, ngayun xi hai tjin tacun tsëhë jyë nuju ne, nduvun tjengun ná, hane cjuaháxen vëhë xi sahmi hai nuju. <sup>29</sup> Ningatuhun xi chjuhun yugu naha sacuaha má cojo ndyaja hya xi cjuaha chu xa sahmi chu, hacuaha chjayunngun tsahan. Ta ngahan ne, tjin ná cjuandaja cjuajeya, hane sacu hñu rë xahasen nuju. <sup>30</sup> Ta yugu xi suá nuju vihi ne, hacuiin hai, tanguaain cojo tsëhë chu ndyaja, hane xa xi suá nuju ne, hacuaha hacuiin hai.

## 12

*Cavotohosun xuta ladu rë Jesucristu trigu nixtin xi chjahájenda rë*

<sup>1</sup> Nixtin hya ne, cuatjin camá ngu nixtin xi chjahájenda rë. Hora xi tivatju Jesús cojo xuta ladu rë me hiscan tjin tjë trigu ne, cama vojo rë xuta ladu rë me, cavetsihin cavotohosun xuta jan tsë tsë trigu jan ne, catsufëtsja me cajine me. <sup>2</sup> Hane cha tsëhë partidu fariseo xi cavëë cha xi cuatjin casahmi me, cachja cha cojo Jesús cuitjin:

—Chutsujun ni, xuta ladu nuju ne, tisahmi me xa quihndë nixtin xi chjahájenda rë, handasa chja ley naja xi cumaji xi cuatjin nihña.

<sup>3</sup> Hane cafayangui Jesús cuitjin:

—Ngayun, ha cacutayun xcusun xi casahmi xutachanga naja David hatsëë nixtin hya xi jercu camá vojo rë me cojo xuta xi siu cojo me. <sup>4</sup> Cavisehen me ndava Nina, hane cafaha me pan xi viyuju xcun Nina xi tsajin cahndë xi tu yo ni sinë ta suvá ni nahmi xi cuma sinë me. Peru David ne, cajiñë



me hacuaha casua me cajinë xuta xi siu cojo me. <sup>5</sup> Cuanitjin ne, ha cachutayun xi chja cjua rë ley naja xi nahmi xi sahmi xa ndava Nina ne, ngajan tjin xa xi satë rë me nixtin xi chjahájenda rë peru tsajin jyë xi cuma rë me handasa tisahmi me xa nixtin hya. <sup>6</sup> Cuichjá quixë cojo nuju ta nguehe tacun ngu xi hitsë sa meje rë xi chjahanrcun rë xi cumá rë yungun xi matitjun. <sup>7</sup> Cjëë cuijnercun cjua xi chja: “Hitsë sa ndama ná xi cumayuma nuju xingun tsëhë xi cumá rë xi nicuhun chu sacuaha cjuatjo xi tuhun ná.” <sup>8</sup> Hacuaha cachja sa Jesús cuitjin: Ngahan xi Quihndi rë Xuta Jain ngahan ne, ngahan xi vitéxa mé xi cuma nixtin xi chjahájenda rë.

*Casahmi Jesucristu xi camandaja cha xi quixihñu ngu tsja*

<sup>9</sup> Hya xi camá ne, xi quiji sa Jesús ne, cavisehen me yungun ngajan. <sup>10</sup> Hane tacun ngu cha cahntsua yungun jan xi quixihñu tsja quixi cha. Hane cha xi vicuya cjuachacun cojo cha fariseo ne, cavinenguise cha Jesús cuitjin:

—¿Mé xi tsingatihi ley xi nihña nixtin xi chjahájenda rë? ¿Há sua cahndë xi nirquen rë xuta hmu rë? —Cuatjin cavinenguise cha me xi sehe cuma cuinchajyë cha me.

<sup>11</sup> Hane cuitjin cafayangui Jesús tsëhë cha:

—¿Há cuma xi ngu ngayun handasa hya xi nixtin xi chjahájenda rë ne, cuanguun naxun chu tsánga nuju sá xi cjuinenguia chu ngu ngojo xi jemu nungun? <sup>12</sup> Sá cuatjin vengui chji rë ngu chu tsánga ne, hitsë sa cjin vengui chji rë ngu xihin. Vëhë xi tsingatihi ley xi nixtin xi chjahájenda rë ne nihña cjuandaja.

<sup>13</sup> Sehe cachja Jesús cojo cha hmu rë cuitjin:

—Nixingun ntsun. —Cuatjin cachja me.

Hane cuatjin cahmi cha. Hane tsja cha xi quixi ne, ha camandaja sacuatjin jyihi tsja cha xingu. <sup>14</sup> Hya xi camá ne, cha partidu fariseo jan ne, cavetju cha quiji cha, cachja cha ngajñi rë cha cojo xicjin cha xi meje rë xi sacuya ra xcusun hacutjin cuma tsiquehen cha Jesús.

*Cjua xi catsihindu profeta tsëhë Jesús*

<sup>15</sup> Peru Jesús ne, machaya rë me cjuatacun jan, hane cavetju me quiji me tsëhë ngajan. Hacuaha cjin xuta quiji tjengui cojo rë me, hane catsindaja me yëjë ni xuta tsëhë chíhin xi má rë me, <sup>16</sup> sehe cachja me cojo me xi cuichjaain të me yo me jan. <sup>17</sup> Cuatjin cahmi Jesús xi cuetjucaa cjua xi catsihindu profeta Isaías xi chja cuitjin:

<sup>18</sup> Cha vihi ne, cha mosu naha, cha xi cavitéxa ngahan, cha xi tsihmúcacun, cha xi ndama ná tsëhë.

Suá cha Hasen naha, cuichja cha cojo xutaxín tsëhë hacutjin quixi Nina hya xi tsichuva me xuta.

19 Cha vihi ne, hacuiin cjin cuisiajmi cha cojo xuta; hacuiin jindaya të cha xi chja cha.

Cuichjaain hñu cha cojo sa xi jemu catjaha cuenda rë cha xuta xi tsujyihya me ndiya të.

20 Xcotaain cha cjuatacun rë hisca ngu xuta yuma xi tangun me cojo ngu ndeje xi caxtane, hacuaha sahmi chuvaain cha cjuatacun rë xuta yuma xi tangun me cojo ngu candil xi ha ndiya coho.

Yëjë xcusun vihi ne, sahmi cha hisca xi cumatsejen cjuaquixi rë gobiernu rë cha.

21 Hane xuta ngasunhdë ne, cuetahacacun me cha.

### *Cachja xuta xi Satanás casuaxa rë Jesús*

22 Cavechú ngu nixtin xi cafehe tjengui xuta Jesús hane yaha me ngu cha xi jiya xitsehen xahasen rë cha. Rcá cha jan hacuaha lihmi cha. Hya xi camá ne, Jesús ne casahmi me xi camandaja cha jan hisca cama cachja cha hisca cavutsejen ndaja cha. 23 Hane xutacjín ne, jemu quijircun rë me cachja me cuitjin:

—¿Há cumacacun xi cha vihi hacui quihndi tjë rë David xi tsingatju Nina?

24 Peru cha partidu fariseo xi camachaya rë cha cjua jan ne, cachja cha cuitjin:

—Hacuiin suvá cha vaxëxin cha xitsehen ta Beelzebú, xitsehen xi matitjun ne, vëhë casuaxá rë cha xi vaxëxin cha xitsehen.

25 Peru Jesús ne, tsëhë xi ha vëë me mé xi tsingataha cacun xuta xi cuacún jan ne, cuitjin cachja me cojo cha:

—Hya xi xuta tsëhë ngu nandya ticjan me ngajñi rë me cojo xicjin me, cjuë ngahñu cjua rë, hane cjuincanii rë me. Hacuaha sá xi xuta tsëhë ngu ndihya ne, scaan me ngajñi rë me ne, ngajan chajá ngahñu cjua rë ndihya jan. 26 Ha cuanitjin rë Satanás ta, sá xi Satanás ne vaxëxin xitsehen xi yahnga ne, cavatëcja ngahñu cjua rë, hane cumaji cuitexa xicjin. 27 Vëhë xi sá xi Beelzebú casua ná xa xi vaxëxin xitsehen ne, hacuaha ha Beelzebú vëhë casua rë ngu ngu xuta ladu nuju xa xi hacuaha vaxëxin me xitsehen. Vëhë xi me vëhë ni cuma cuichja me xi cuaintjin cjua xi nújun xi Beelzebú casua ná xa. 28 Peru sá xi hacuiin Beelzebú casua ná xa ta Nina casua me ne, ngajan matsejen xi gobiernu xi sahmi Nina ne, ha tivetsihin.

29 Hisca ngu cha chëjë cumaji tu cuisehen ni cha ndava ngu xuta xi hñu cjua rë sá xi tacun me. Titjun tsihñu cha xuta xi ndava ta cuatjin xi cuma tsichëjë cha tsëhë me.

<sup>30</sup> Xuta xi fiin me favor naha ne, condra naha má me. Hane xuta xi visecuaain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta.

<sup>31</sup> 'Hacuaha cuichjá cojo nuju cjuaquixi ta tu mé ni jyë xi sahmi xuta hacuaha tu mé ni cjua xi choho cuichja me tsëhë xuta ne, sacú rë me cjuaninchataha sa xi cuijacun me jyë jan. Peru tu yo ni xi choho cuichja tsëhë Hasen rë Nina ne, tsajin cjuaninchataha xi cuma rë. <sup>32</sup> Cuanitjin ne, tu mé ni cjua xi choho cuichja xuta tsëhë Quihndi rë Xuta Jain ne, cuma sacú rë me cjuaninchataha. Peru tu yo ni xi choho cuichja tsëhë Hasen rë Nina ne, tsajin cjuaninchataha nguehe nixtin vi, hacuaha tsajin cjuaninchataha nixtin xi nduva.

*Ngatsë ni rë xcusun xi sahmi me ne, tsejen mé xcusun xuta me*

<sup>33</sup> '¿Jarë xi meje nuju?, ¿há xi ndaja ya hacuaha ndaja tu rë? o há tsajin ne, ¿há xi ndajin ya hane ndajin tu rë? Jima ngu ya ne, cuma tsejen sá xi ndaja o sá xi ndajin ngatsë rë tu xi sua.

<sup>34</sup> Ngayun quihndi rë chu tsehen, maji nújun cjua xi ndaja. Maji ta tsëhë xi cjua xi quitsë rë xahasen nuju ne, vëhë cjua xi vetju nújun. <sup>35</sup> Vëhë xi xuta ndaja ne, tsëhë cjuandaja xi tetjo rë me cahntsua xahasen rë me cojo cahntsua cjuatacun rë me ne, tsëhë ngajan vetju cjuandaja. Cuanitjin ne xuta tsehen ne, tsëhë cjuatsehen xi tetjo rë me ne, ngajan vetju cjuatsehen. <sup>36</sup> Cuichjá cojo nuju ta tu mé ni cjua xi cuinújun, handasa tu visiajmu ni ne, tuhuncuenda rë Nina cjua jan nixtin xi tsichuva me yaan. <sup>37</sup> Cuatjin ta cojo cjua xi canújun ne, cjua jan cuma testigu xi cuetjunxun tsëhë castigu, o sá tsajin ne, cjua xi canújun vëhë cuma testigu tsëhë castigu xi cueyun.

*Cafehya xuta tsehen ngu seña xi sua Nina*

<sup>38</sup> Ngajan xi ngujo cha xi vicuya cjuachacun cojo ngujo cha partidu fariseo catsicuya cha tsëhë me, cuitjin cachja cha:

—Maestro, ningacun niji ngu cjuarcun xi sua seña yo ngayun.

<sup>39</sup> Ngajan cafayangui Jesús cuitjin:

—Ngayun xuta tjë rë Israel xi nechun nixtin vihi matsejen ne, tsehen cjuatacun nuju, hacuaha majotacun xcun Nina. Vëhë xi chjahyun ná ngu seña xi sua Nina. Peru seña vëhë ne, sacuiin nuju ta ngu ni seña xi sacú nuju matsejen ne, vëhë seña xi casua profeta Jonás hatsëë nixtin. <sup>40</sup> Sacuatjin rë profeta Jonás ne, jyan nixtin cojo jyan nixten caseya me cahntsua chu ti jyë, hane ha cuanitjin ni ne cumá rë Quihndi rë Xuta Jain, ta jyan nixtin cojo jyan nixten seya me ngahma nangui.

<sup>41</sup> Hya xi cuechú nixtin xi tsichuva Nina jyë nuju, ngayun xi nechun nixtin vihi ne, yëjë ni xuta nandya Nínive matsejen ne, cjue cuinchajyë nuju me; ta me vëhë ne catsindeya me

cjuatacun rë me hya xi casua profeta Jonás camachaya rë me cjuarë Nina. Peru nguehe ne ha tejña ngahan sacuaha ngu seña xi hitsë sa vengui chji rë xi cuma rë profeta Jonás. <sup>42</sup> Hacuaha nixtin hya ne, na xi cavitexa ngajan nangui Sabá ne, cjue cuinchajyë nuju ta, tsëhë xi jemu cjuañihi cavatju na tsëhë xi jercu cjin hiscan canduva na xi cuihndë na cjuatacun ndacun rë Salomón, me xi cavitexa xuta naja nixtin hatsëë. Peru nguehe tejña ngahan xi hitsë sa vengui chji rë cjuatacun naha xi cumá rë cjuatacun rë Salomón.

### *Xitsehen xi vuya*

<sup>43</sup> 'Hya xi vetjuxin xitsehen tsëhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nangui quixí camahani, vanguise cahndë hiscan xi cuejñajenda. <sup>44</sup> Hane xi sacuiin rë cahndë hiscan cuejñajenda ne, cuitjin tsingatahacacun: “Cúya rë cjuë ndya naha hiscan xi cavétjuxen.” Cuatjin tsingatahacacun xitsehen jan. Hane hya xi vuya fehe xitsehen jan cahntsua xahasen jan ne, vutsejen xitsehen jan cahntsua xahasen jan sacuaha ngu ndihya tiya, ngu xi caxtecha tyjahi tyjahi, hacuaha siundaja chichihin ngu tsë ngu xti. <sup>45</sup> Xi vutsejen xitsehen xi cuatjin jyihí jan ne, sehe fi jaha sa rë yatu sa xitsehen xi hitsë sa tsehen xi cumá rë vëhë ne, sehe visehen nga viyujucahndë jan. Peru xi má ngascan ne, hitsë sa chojyihí tsëhë xuta vëhë xi cumá rë titjun. Cuitjin cumá tsëhë xuta xi siu nixtin vihi. —Cuatjin cachja Jesús.

### *Naa rë Jesucristu cojo xicjin me*

<sup>46</sup> Hya xi tichja me cojo xutacjín ne, naa rë me cojo xicjin me ne, cafehétjengui me Jesús, hane maji vechútahacjin me xi cuichja me cojo ta tsëhë xi jemu quitsë xuta. <sup>47</sup> Ngajan xi cachja ngu xi cachja cuitjin:

—Nutsujun ni. Ná nuju cojo nixti xingun ne, hinchacun me ngajan candatsen, xi meje nduvatjengui nuju me cuichja me cojo nuju. —Cuatjin casacu camachaya rë me.

<sup>48</sup> Hya xi camá ne, cavuya me catsicuya me cjua cuitjin:

—¿Yo xi má nuju xi ná naha cojo xingueen?

<sup>49</sup> Hya xi cuatjin cachja me ne, catsingacun tsja me xuta ladu rë me sehe cachja me cuitjin:

—Ngayun xi nechun nguehe ne, ngayun xi sacuaha ná naha cojo sacuaha xingueen ngayun ta, <sup>50</sup> tu yo ni me xi sahmi me sacuaha meje rë Nahmi naha xi tacun me ngahnga ne, me vëhë tangun ni cojo xingueen, cojo ná naha.

## 13

*Ejemplu tsëhë cha xi catsitjë trigu*

<sup>1</sup> Nixtin hya ne, cavetjuxin Jesús tsëhë ndihya ne, quiji me tjeheh laguna ngajan cavejña me. <sup>2</sup> Hane ngajan camatangun xutacjín. Vëhë xi cavisehen me ngu barcu ngajan cavéjña me. Hane xutacjín jan ne, caviyuju me nangui quixí tjeheh nandan jan. <sup>3</sup> Sehe cavicuya Jesús me jemu cjín cjuua sacuaaha xcusun rë ejemplu. Cuitjin cachja me:

—Cuejña ne xi ngu cha xi tsitjë cha trigu matsejen ne, cavetju cha quiji cha xi tsitjë cha trigu. <sup>4</sup> Hane jinguyëjë rë xi titsitjë cha matsejen ne, ngujo matsejen ne, cavixu ndiya. Hane canduva chu nisë, catsicjë chu cajine chu. <sup>5</sup> Hane ngujo nga matsejen ne, cavixu hiscan xi jemu naxindya, hacuaaha jemu chuva nihndë quisun. Ngajan jemu xati cavetju ta tsëhë xi hacuiin tjain nihndë quisun. <sup>6</sup> Hane xi cavetjucaa tsuhi ne, cavaca rë cojo ndavá jan. Hane tsëhë xi tsajin tyjama rë xi nungun matsejen ne, caxintsen. <sup>7</sup> Ngujo nga ne, cavixu ngajñi nahyá. Hane xi camacha tangun matsejen ne, nahyá jan ne, vëhë casahmi hndë rë catsixi rë. <sup>8</sup> Hane xi yahnga matsejen ne, cavixu hiscan nihndë ndaja. Hane camayehe ne, ngujo ne casua tutjë rë ngu cientu sa cuatjin sacuatjin xi camatjë, ngujo nga ne, yachantë sa, hane ngujo nga ne, cantë sa sacuatjin xi camatjë. <sup>9</sup> Yo ngayun xi tjín nuju cjuasua xi cuinuhyun cjuua naha ne, ndaja tetuhuncun. —Cuatjin cachja me.

*Mé má ejemplu cachja Jesucristu cojo xuta*

<sup>10</sup> Hya xi camá ne, cafehetiña xuta ladu rë me cavinenguise me Jesús tsëhë ejemplu xi chja me ta, ¿mé tsëhë xi ejemplu ni vicuya me cojo? <sup>11</sup> Hane cafayangui me tsëhë xuta jan cuitjin:

—Nina ne casua me cahndë xi ngayun ne, cuijne rcu cjuatacun tsëhë gobiernu xi sahmi Nina, cjuatahahma xi titjun ne tsajin yo machaya rë. Peru yëjë sa me xi yahnga ne, casuaain me cahndë xi cuijnercu me. <sup>12</sup> Me xi ha tjín rë cjuatacun jan ne, sua sa Nina me, ndaja cuijne rcu me. Hane me xi tsajin cjín rë cjuatacun jan ne, cjuahataha Nina hitsë xi tjín rë me. <sup>13</sup> Vëhë xi suvá ejemplu tichjá cojo rë me ta, handasa vutsejen me, peru sahmicuendaain me; visiñuju me ne, peru sahmi me sacuaaha xi vihndiin me hacuaaha vijni rcu me. <sup>14</sup> Xi cuatjin sahmi me ne, sahmichihin me cjuua xi catsihindu profeta Isaías xi catsihindu cjuua vihi:

Handasa cuisñuju ngayun ne, peru ha tuxa cuijni rcun;  
Handasa chutsujun ne, peru cumatsijiin nuju.

<sup>15</sup> Xuta xi cuacun vë ne, tichjá cjuatacun rë me, tyjavañuju me cojo tuxcun me ne, cavechja me, ta sá tu scuëë me cojo tuxcun me, hane sá cuihndë me cojo tyjavañuju me, hacuaaha cuijne rcu me cojo cjuatacun rë me, sehe cuya me ladu naha xi cuaxëtjë me.

16 'Peru ngayun ne, jemu ndaja tsujun ngayujun ni tsëhë xi hatuxa tichutsujun cojo tuxcun; hacuaha visinëju cojo tyjavañuju. 17 Nguehe cuichjá quixë cojo nuju ta jemu ndaja tsujun ta, tsëhë xi hacuaha jemu cjin profeta hacuaha jemu cjin xuta xi matitjun xi caviyuju titjun ne, jemu meje scuëë me xcusun xi ngayun tichutsujun, peru casacuiin cavëë me. Hacuaha jemu meje cuisinëju me cjua xi tivisinëju ngayun, peru casacuiin cavisinëju me ta, tsëhë xi cjëë cuechu nixtin.

*Cachja Jesús mé vijne ejemplu tsëhë cha xi catsitjë trigu*

18 'Cuatjin hindë ne, nuhyun mé meje cuichja ejemplu tsëhë cha xi catsitjë trigu. 19 Hya xi visinëju ngu xuta cjua tsëhë gobiernu xi sahmi Nina ne, peru vijniircu me cjua jan, sehe vinduva Satanás ne, fahataha cjua jan tsëhë xahasen rë me. Cjua vi ne, hacui sacuaha trigu xi cavixu ndiya. 20 Hane tsëhë trigu xi cavixu hiscan jemu naxindya ne, hacui sacuaha hya xi vihndë xuta cjua rë Nina, hane fahatsja me cojo cjuasua. 21 Peru trigu xi cuacun vë ne, jemu chúva tyjama rë vetju. Hacuanitjin ni vatju ngujo xuta má. Macjain rë me ngujo nixtin peru hya xi vechú ngu nixtin xi satë rë me cjuañihi o cjuandya xi sua xuta me ngatsë rë cjua rë Nina ne, fëcacun me cojo cjua jan. 22 Hane tsëhë trigu xi cavixu ngajñi nahyá ne, hacui sacuaha hya xi vihndë xuta cjua rë Nina, peru ha xcun xi cjuinduju me cojo nixtin rë me ne, tsingataha cacun me tsëhë cjuatacun xi satë naja nguehe ngasunhdë, hacuaha meje rë me cjuanchina xi cjuicanii rë, hane vëhë suaain cahndë xi cumajyë cjua rë Nina cahntsua xahasen rë me, hacuaha sahmi me ngu cjuandaja xi tsingacun xi xuta rë Nina má me. 23 Hane hya xi vixu yahnga trigu hiscan nihndë ndaja ne, hacuaha hacui sacuaha hya xi vihndë xuta cjua rë Nina hane vijne rcu me mé vitexa Nina, hane sahmi me cjuandaja. Tjin me xi jercu quisun cjuandaja sahmi, hane tjin nga me ne, chuva cjuandaja sahmi me, hane yahnga me, hitsë sa chuva cjuandaja sahmi me.

*Ejemplu tsëhë xi jiyahma cojo tutjë rë trigu*

24 Sehe cachja nga me ngu ejemplu cojo me, hane cuitjin cachja me:

—Gobiernu xi sahmi Nina ne, cumá sacuaha camá hya xi catsitjë ngu xuta tutjë rë trigu ndaja xcun nangui rë. 25 Peru nixten ne, hya xi jiñafë xuta ne, cafehe ngu xi condra rë me catsitjë cha ngu ndiji xi meje tanguncun cojo trigu. Ngajan ngajñi rë trigu jan catsitjë hma cha sehe quiiji cha. 26 Hya xi camá ne, hisca xi cavetju xca rë, cavetju tú rë, sehe camachaya rë me tsëhë ndiji jan. 27 Hya xi camachaya rë me ne, cafehe mosu rë me xi tsëhë nangui jan, cavinenguisse mosu

me: “Nai, tutjē ndaja xi camá canitjun, ¿há cutjin cavetjun xi casecjan cojo ndiji ne?” <sup>28</sup> Ngajan cafayangui me tsēhē mosu jan: “Ngu me xi condra naha casahmi me.” Hane cafayangui mosu jan cuitjin: “¿Há hanguin chjanijñi ndiji jan?” <sup>29</sup> Peru cafayangui me cuitjin: “¡Jéya! Caveni chjanujñu ndiji jan ta sá tsajin ne, hacuaha chjanu trigu xi ndaja. <sup>30</sup> Catamacha catsijo, sehe cuichja hya xi tjune rē xi tjun ni cjuanejñi cha ndiji, sahmi cha xtē rē xi cuaca cha. Sehe cjuaya cha trigu, cuinchandaja cha cahndē rē.” Cuatjin fi ejemplu xi cachja Jesús.

### *Ejemplu tsēhē tutjē lihndi*

<sup>31</sup> Jesús ne, cachja nga me ngu ejemplu cuitjin:

—Gubiernu xi sahmi Nina ne, hacuaha cumajyē tangun cojo ngu tutjē ya mostasa ta jemu lihndi camahani ne. Tutjē jan ne, cafaha ngu cha catsitjē cha xcun nangui rē cha; <sup>32</sup> Tutjē rē ya mostasa ne, handasa hitsē sa lihndi má xi cumá rē yējē ni tutjē xi yahnga ne, hya xi camá cha ni, hitsē sa jyē camá xi cumá rē yējē ni ya xi yahnga. Cuma ngu ya xi hiscan nisē xi vitjen chu ngahnga ne, cuma sahmi chu ndava chu rcu ya jan.

### *Ejemplu tsēhē san rē pan*

<sup>33</sup> Cavuya cachja nga Jesús cuitjin:

—Gubiernu xi sahmi Nina ne, hacuaha tangun sahmi sacuaha san rē pan xi visecjan ngu chjuun ngajñi rē jyan chuva rē nahyu rē pan cojo sa xi sahmixa ngajñi rē yējē ni nahyu cjín jan.

### *Me tsēhē xi Jesús ne, sahmixa me cojo ejemplu*

<sup>34</sup> Cuatjin cachja Jesús cojo xutacjín, ta ejemplu ni cachja me cojo xuta ne, cachjaain me chichihin ta, suvá cojo ejemplu. <sup>35</sup> Cuatjin cavicuya me sehe cuetjucaa cjua xi catsihindu profeta ta:

Cjua xi vetju ntsuva ne, suva ejemplu ni;

Cuichjá cjua xi hinchahma hisca ntsacu cavetsihin nga-sunhndē.

### *Cachja Jesús mé vijne ejemplu tsēhē ndiji jan*

<sup>36</sup> Hya xi cavatju cachja me, sehe catsicjē Jesús cjua cojo xutacjín jan, cavisehen me cahntsua ndihya hane ngajan cafehe tjengui rē me cha ladu rē me, cavinenguise cha me ¿mé vijne ejemplu tsēhē ndiji nguijña jan?

<sup>37</sup> Sehe cafayangui Jesús cuitjin:

—Cha xi catsitjē trigu ne, hacui Quihndi rē Xuta Jain.

<sup>38</sup> Hane nguijña ne, hacui ngasunhndē. Tutjē ndaja ne, vēhē xuta xi vihndē me tsēhē Nina, hane ndiji jan ne, hacui xuta xi vihndē tsēhē xitsehen. <sup>39</sup> Cha condra xi catsitjē cha ndiji jan ne, hacui xitsehen xi matitjun cha. Hacuaha nixtin xi

cjuanga ne, hya xi cjuë ngasunhdë. Hane cha xi cjuanga ne, hacui ángel. <sup>40</sup> Cuanitjin sacuaha ndiji xi casahmi cha xtë rë xi cueti, cuatjin cumá cojo xuta xi hndiin tsëhë Nina hya xi cjuë ngasunhdë. <sup>41</sup> Hya ne Quihndi rë Xuta Jain ne, tsingatju me ángel rë me xi cuahaxin me yëjë ni xuta xi candiya xicjin me ngajñi rë cjuatsehen cojo xuta xi sahmi me cjuatsehen, cuaxëxin me tsëhë gobiernu xi sahmi Nina. <sup>42</sup> Hya xi camá cavaxëxin me ne, scandiya me xuta hiscan cuaca me ngu ndihi jyë, ngajan jemu squihnda me hacuaha jemu cuanerii nehñu me. <sup>43</sup> Peru xuta xi tyjahi cjuatacun rë me xcun Nina ne, cumá me sacuaha tsuhi xi seti xi sua hasen rë camá ngajan gobiernu xi sahmi Nina nahmi rë me. Yo ngayun xi tjin nuju cjuasua xi cuinuhyun cjua naha ne, ndaja tetuhuncun. —Cuatjin cachja me.

*Ejemplu tsëhë tujún xi caseyanijihma*

<sup>44</sup> 'Xuta xi meje cuisehen gobiernu xi sahmi Nina ne, hacuaha tangun me sacuaha ngu cha xi casacu rë cha ngu cahndë hiscan xi caseyanijihma tujún cjín. Hane hya xi camá ne, cavetsa nga cha tujún jan, sehe quiji cha cojo cjuasua ne, caviteña cha yëjë xi tjin rë cha sehe cavechutaha cha chji rë xáhva jan.

*Ejemplu tsëhë tuseti xi hnga chji rë*

<sup>45</sup> 'Hacuaha xuta xi meje cuisehen me gobiernu xi sahmi Nina ne, tangun me sacuaha ngu cha viteña xi vanguisse cha ngu tuseti xi hitsë sa ndaja seti. <sup>46</sup> Hane xi sacu rë cha ngu xi jercu tu venguí chji rë ne, quiji cha caviteña cha yëjë xi tjin rë cha sehe cavechutaha cha chji rë tuseti jan.

*Ejemplu tsëhë changa rë chu ti*

<sup>47</sup> 'Hacuaha gobiernu xi sahmi Nina ne, cumá sacuaha ngu changa jyë xi catsingatjeya xuta ndachacun. Hane hya xi camá ne, ngajan cahntsua changa jan camá tangun yëjë xcusun chu ti. <sup>48</sup> Vëhë xi hora xi catsë rë ne, cajuvë nga xuta changa jan ne cavejña me tjehen rë ndachacun ngajan cavaxijin me chu. Chu xi chine ne, cavinchanndaja me, peru cacandi me chu xi yahnga. <sup>49</sup> Cuanitjin ne cumá hya xi cjuë ngasunhdë, ta cuinduva ángel ne, cuatëcja me xuta xi tsehen cjuatacun rë me tsëhë xuta xi tyjahi cjuatacun rë me, <sup>50</sup> sehe scandi me xuta tsehen hiscan cuaca me ngu ndihi jyë. Hane ngajan ne, jemu squihnda me hacuaha jemu cuanerii nehñu me.

*Cjuanchina xatsë cojo cjuanchina changa*

<sup>51</sup> Hya xi camá ne, Jesús ne, cavinenguise me xicjin me:

—¿Há cavijne rcu cjua ví?

Ngajan cafayangui me:



—Juun, cavijnircuin.

<sup>52</sup> Sehe ngajan cachja Jesús cuitjin:

—Hya xi ngu maestru xi vicuya me ley ne, sá xi scutaya me xi meje cuisehen me ladu tséhë gobiernu xi sahmi Nina ne, sahmi me sacuaha nai rë ngu ndihya jyë. Xuta jan ne, vaxë me xcusun xatsë ne, hacuaha vaxë me xcusun changá tséhë cahndé xi cavinchandaja me.

*Jesús ne, cavuya me nangui rë me*

<sup>53</sup> Hya xi camá cajnetaha cachja Jesús ejemplu vihi ne, sehe cavatju quijixin me. <sup>54</sup> Hane xi quiji me ne, cafehe me nangui rë me, ngajan cavicuya me xuta cahntsua yungun rë. Hya xi camá ne, jercu cavëhërcun me Jesús, hane cachja me cuitjin:

—¿Jani cavutaya cha vihi ta jemu tjin rë cha cjuatacun? ¿Jani casacu rë cha cahndé xi sahmi cha cjuarcun? <sup>55</sup> Cha vihi ne, quihndi rë cha chjineya jan. Naa ra ne, María hmí na. Hacuaha xicjin cha ne, hacui Jacobo, José, Simón cojo Judas. <sup>56</sup> Hacuaha tichjá cha ne, xuta nandya naja. Ha hyun ta cuatjin peru, ¿jani casacu rë cha cjua xi tichja cha?

<sup>57</sup> Cuatjin ne mijí cjuaha cuenda me cjua rë Jesús tséhë xi tangun nangui rë me. Sehe cachja Jesús cuitjin:

—Ngu profeta ne, macjain rë xuta me, peru hatuxa xuta nangui rë me macjaain rë me tséhë me. Hacuaha xuta ndava me ne, macjaain rë me tséhë me.

<sup>58</sup> Cuatjin camá ta tséhë xi ngatsë rë xi macjaain rë xuta me ne, ndastu cjín cjuarcun casahmi me ngajan.

## 14

*Xi má rë Herodes ne, Jesús ne, hacui Juan Vitenda Xuta*

<sup>1</sup> Nixtin hya ne, camachaya rë me xi matitjun xi hmí rë Herodes cjua xi tichja xuta tséhë Jesús. <sup>2</sup> Ngajan xi cachja me cojo xuta xi faha cuenda rë me ta:

—Cha vëhë ne, hacui nima Juan Vitenda Xuta. Handasa cahme nima, peru ha cavascaya rë, vëhë xi tjin rë cha ngahñu xi má sahmi cha cjuarcun.

<sup>3</sup> Ta Herodes jan ne, ha catsingatju me cachjaha rë Juan ne, catsihñu me cha xi quiji cha ndavaya. Cuatjin casahmi Herodes ta tséhë xi cuatjin cachuya rë na Herodía, chjuun rë hntsë Herodes. <sup>4</sup> Tséhë na vë cachja Juan cojo Herodes cuitjin:

—Chja ley ta ndajintjin camahani xi chjahan chjuun rë xingueen.

<sup>5</sup> Herodes ne, meje tsiquehen me Juan jan, peru camaji ta tséhë xi xi má rë xuta ne, cha Juan ne, hacui profeta má cha. Hane Herodes ne, tsacjun me xuta. <sup>6</sup> Cuatjin camá xi hya xi cavechu nixtin rë suhi tséhë Herodes, na quihndi rë na Herodía ne, catë na ngajñi xuta xi siu suhi jan. Hane

jemu cachuya rē Herodes xi cuatjin catē na. <sup>7</sup> Sehe ngajan xi Herodes casua na me cjua quixi rē me xi sua me na tu mé ni xi meje cjuehya na. <sup>8</sup> Ngajan xi na vë ne, hya xi ha cavinchangui na naa rē na ne, cachja na cuitjin:

—Meje ná xi cahntsua ngu tyuva ne, tuhun ná rcu Juan Vitenda Xuta.

<sup>9</sup> Hya xi camá ne, jercu choho cama rē Herodes. Peru tséhë xi hisca Nina caveyanangui me hane tséhë xi xcun cjín xuta jan casua me cjua ne, catsingatju me cjua xi cuatjin cumá. <sup>10</sup> Hane cavitexa me sindadu cavatësun cha rcu Juan ngajan ndavaya. <sup>11</sup> Hya xi camá ne, cafehe cha cojo rcu jan xcun ngu tyuva hane casua me na. Sehe quijitjengui na naa rē na, casua na naa rē na. <sup>12</sup> Hya xi camá ne, xuta ladu rē Juan jan, cafehya me nima caveyaniji me. Sehe quiji me casua me camachaya rē Jesús.

### *Catsicjen Jesucristu hñú mil xihin*

<sup>13</sup> Hane xi camachaya rē Jesús ne, cavetju me ngajan cavisehen me ngu barcu quiji me ngu cahndë xín. Peru xi camachaya rē xuta ne, cavetju me tséhë nandya ne, quiji ntsacu me tjehen laguna quiji tjengui me Jesús. <sup>14</sup> Xi tu cavetju Jesús tséhë barcu ngunda ne, cavutsejen me xutacjín jan, hane camayuma rē me xuta jan. Hane catsindaja me xuta hmu rē. <sup>15</sup> Hane hya xi jimá nguixun ne, cafehe xuta ladu rē me cachja cojo me cuitjin:

—Jemu xín camahani cahndë vi, hane ha quiji hora. Ninguijnutuhun cjua cojo xutacjín vë ne, sehe catji me nandya xi siu tiñataha catatsë me comida xi sinë me.

<sup>16</sup> Peru Jesús ne, cuitjin cachja me cojo cha xi tejó jan:

—Sahmii ngujoyë xi cjuexin me ne, ngayun tuhun xi sinë me.

<sup>17</sup> Sehe ngajan xi cachja cha ladu rē me cuitjin:

—Hñu pan ne cojo jo ti tjin naja. —Cuatjin cachja cha.

<sup>18</sup> Sehe cachja Jesús cuitjin:

—Nduvuncujun.

<sup>19</sup> Hya xi camá ne, casahmi Jesús xi catiyuju xutacjín jan xcun ndiji; sehe cakahatsja me hñu rquí pan jan cojo jo ti jan. Hane tivutsejenniji me ngahnga ne, casua me nacuechji rē Nina, sehe cavotoho langa me pan casua me pan jan cha ladu rē me xi cjue sua cha sinë xuta. <sup>20</sup> Hane xuta ne, yëjë ni me cajinë me hacutjin cachuya rē xahasen rē me. Hane xi cachjaya rē xi cavangui cajinë xuta jan ne, catsë tejó chajne. <sup>21</sup> Me xi cajinë pan jan ne, hñú mil má me xi xihin. Ha xin yachjin cojo langa xi hacuiin cojo camaxqui.

### *Quiji ntsacu Jesucristu xcun nandá*

<sup>22</sup> Hya xi camá ne, Jesús ne, casahmi rë me nguÿyë xuta ladu rë me xi cuisehen me barcu hane cjue titjun ni me ngunda vëhë, jinguyëjë rë xi tsinguijnetaha me cjua cojo xutacjín jan. <sup>23</sup> Hane hya xi camá quiji xutacjín ne, sehe camijixin Jesús rcu ndetjún xi cuisiajmi me cojo Nina. Hane hora xi camá nguixun ne, tacun suvá me. <sup>24</sup> Peru barcu jan ne, vasantjin laguna cjui, hane jemu chja cjui ngatsë rë tsindyu rë nandá xi tsivaha rë barcu ta, tsëhë xi tjo ne, taha hiscan cjui ne, ngajan nduva.

<sup>25</sup> Hane hya xi tiña sahasen ne, quiji ntsacu Jesús xcun nandan ne quiji tjengui me me tsëhë me. <sup>26</sup> Hya xi cavëë xuta ladu rë me xi nduva ntsacu me xcun nandan ne, jemu camá xti rë me cachja me ta nima xi meje cuincharcun rë me, hane cajindayatë me. <sup>27</sup> Ngajan xi cachja Jesús cojo me ta:

—¡Xi carcuun! ¡Tuhun cjuetacun xahasen nuju ta ngahan vi!

<sup>28</sup> Hya xi camá ne, cafayangui Pedru tsëhë Jesús cuitjin:

—Nai, sá xi quixi xi ngayun ne, tuhun ná cahndë nduvá tjenguë nuju.

<sup>29</sup> Sehe cachja Jesús cuitjin:

—Nduvun.

Hane cavitjujne Pedru tsëhë barcu jan, quiji ntsacu me quiji tjengui me Jesús. <sup>30</sup> Peru xi camachaya rë me tjoxtin ne, catsacju me camá, sehe cavetsihin cavisehen ngahma me ngajñi nandan. Hya xi camá ne cajindayatë me Jesús cachja me cuitjin:

—¡Nai, naxuntjun ná!

<sup>31</sup> Hya xi camá ne, ngutjen cafaahatsja Jesús me, cavaniji me me ne, cachja me cojo me cuitjin:

—Ngayun ne, cjëë cumangutacunndujun cojo ná, ¿mé má macjaain nuju?

<sup>32</sup> Hya xi camá ne, cavisehen catsijo me cahntsua barcu jan, hane hora vëhë ne casejyu tjo jan. <sup>33</sup> Ngajan xi xuta xi hincha barcu jan ne, cavixcuhnchi me cafaaharcun me Jesús cachja me cuitjin:

—Ngayun ne, quixi jain xi Quihndi rë Nina yun.

### *Casahmi Jesús xi camandaja xuta nandya Genesaret*

<sup>34</sup> Xi quiji sa me cojo barcu ne, cafehe me tjehen laguna hiscan nandya xi hmí Genesaret. <sup>35</sup> Hane xi camachaya rë xuta xi Jesús xi cafehe me, catsingatju me cjua rë yëjë ni nandya xi siutahndee, hane xuta ne quijicojo me xuta hmu rë me hiscan tacun Jesús. <sup>36</sup> Sehe cafehya me cojo Jesús xi ndastu satëtaha xuta hmu rë jan ntsacu tsjian rë Jesús. Hane yëjë ni xuta hmu rë xi casatëtaha ntsacu tsjian rë Jesús ne, camandaja me.

## 15

*Cha partidu fariseo ne, fahataha cha Jesús*

<sup>1</sup> Ngu ndiya ne, ngujo cha tsëhë partidu fariseo cojo ngujo cha maestru rë ley ne, canduva cha tsëhë nandya Jerusalén, quiji cha hiscan tacun Jesús, cachja cha cojo me cuitjin:

<sup>2</sup> —¿Hacutjin cumá xi cha ladu nuju ne, sahmii cha sacuaha yaha xcusun rë xutachanga naja? Ta cuatjin vanii cha tsja cha hora xi jinë cha niñu.

<sup>3</sup> Ngajan xi Jesús cafayangui me tsëhë cha cuitjin:

—Hane ngayun ne, ¿hacutjin cumá xi vejñuxun cjua xi cavitexa Nina ngatsë rë xi nihñu xu xcusun rë xutachanga naja?

<sup>4</sup> Cachja Nina ta: “Chjuhuncun na nuju, chjuhuncun nahmi nuju”, hacuaha chja ta: “Yo xi choho chja tsëhë xutacha rë ne, xuta ne tsiquehen rë.” <sup>5</sup> Peru ngayun tuhun cahndë xi cuichja xuta cojo xutacha rë ta: “Ha quihndë cumaji cuisécoo nuju ta yëjë ni xcusun xi tjin ná ne, ha cavejñá tsja Nina.” <sup>6</sup> ¿Mé má cuatjin tuhun cahndë xi faharcuiin cha nahmi rë cha? Cuitjin ne, ngatsë rë xcusun nuju sacuaha xi venguichjiin rë cjua rë Nina xi cuma rë xuta. <sup>7</sup> Ngayun ne, xuta jo xcun jo hntsua ngayun. Cachja quixi profeta Isaías xi cuitjin catsihindu me tsujun:

<sup>8</sup> Xuta xi cuacun vi ne, ndaja chja me tsahan peru xi cojo xahasen rë me ne, hisca tsinguitsjiin me ngahan.

<sup>9</sup> Tu mahya xi faharcun ná me ta, Xi vicuya xicjin me ne, hacuiin cjua naha ta tu cjua rë xuta.

<sup>10</sup> Hya xi camá cachja me cuatjin ne, cajindaya Jesús xutacjín cachja me cojo cuitjin:

—Ngayujun ngarca ni ne, nuhyun ndaja cjua vi: <sup>11</sup> Xcusun xi tsitsehen rë xuta ne, hacuiin xcusun xi chine xi visehen hntsua me, ta xcusun xi tsitsehen rë xuta ne, xcusun xi vetjun tsëhë hntsua me.

<sup>12</sup> Sehe cafehe xuta ladu rë Jesús ne, cavinenguisse me cuitjin:

—¿Há hyun xi canicjun rë cha partidu fariseo ne xi cuatjin canújun?

<sup>13</sup> Peru cafayangui Jesús cuitjin:

—Tu mé ni tutjë xi catsitjiin nahmi naha xi tacun ngahnga ne, tjune rë hisca cojo tyjama rë. <sup>14</sup> ¡Caveni! ¡Nihñuu cuendun me! Me vëhë tangun me cojo xuta rcá xi cjuecani xicjin me. Hane sá xi cuatjin ne, cuixuya catsijo me xanga.

<sup>15</sup> Sehe cachja Pedru cuitjin:

—Ningacun niji mé vijne ejemplu jan.

<sup>16</sup> Ngajan xi Jesús cachja cojo me ta:

—¿Há hiscan ngayun cajni rcun cjua xi cachjá ni? <sup>17</sup> ¿Há hyun xi xcusun xi jinë xuta ne visehen cahntsua me? Fë

ne, vetjutaha ndatsen. <sup>18</sup> Peru xcusun xi vetju chja me ne, nduva tsëhë xahasen rë me, hane vëhë tsitsehen rë me, <sup>19</sup> ta tsëhë xi tsëhë xahasen rë xuta ne, nduva cjuatacun tsehen sacuaha jyë xi tsiquehen xicjin xuta, sacuaha jyë xi sahmi chjuunnahñu rë me jingu sa chjuun, sacuaha yachjin xi viteña yojo rë, sacuaha cjuachëjë, sacuaha testigu xi vindacha me, sacuaha cjuachjataha. <sup>20</sup> Yëjë cjuatsehen xi cuacun vëhë ne, nduva tsëhë xahasen rë xuta, hane vëhë tsitsehen rë me; peru sá jinë me niñu cojo tsja me xi cjëë cuane me ne, tsitsiin rë me.

*Jesús ne, visecoo me ngu chjuun xutaxín, na xi hacuiin na ladu tsëhë Israel*

<sup>21</sup> Hane Jesús ne, cavetju me ngajan, quiji me ngu nanguixin táha distritu nandya Tiro cojo nandya Sidón. <sup>22</sup> Hya xi camá ne, cafehetjengui rë me ngu chjuun cananea xi tsëhë ngajan. Cajindaya na cachja na cojo Jesús cuitjin:

—¡Nai! Ngayun, quihndindaicjin rë David, ¡catamayuma nuju ngahan! ta na quihndi naha ne, jiya xitsehen xi jemu suandya rë na cahntsua xahasen rë na.

<sup>23</sup> Peru Jesús ne, ndastu me cjuacatsicuya me. Hane xuta ladu rë me ne, cafehya me Jesús cuitjin:

—Ningatjunixun na, ta jemu si nduvatjengui na yaan fehyataha na yun. —Cuatjin cachja me.

<sup>24</sup> Ngajan xi cafayangui Jesús cuitjin:

—Nina ne, catsingatju me ngahan ngatsë rë xuta rë nangui Israel, ta me vëhë sacuaha tsánga xi cachaja má me.

<sup>25</sup> Hya xi camá ne, cafehetiña na tsëhë Jesús cavixcuhnchi na xcun Jesús xi cafaharcun na me. Cachja nga na cuitjin:

—Tatá, nihñu favor tiseacun ná.

<sup>26</sup> Ngajan xi cachja Jesús ejemplu vi:

—Sechiye ne catijnetaha catjine nixti ta, hacuiin ndatjin xi chjahantahan niñu tsëhë nixti hane sehe tahan rë naña.

<sup>27</sup> Hane cafayangui na cuitjin:

—Quixi jain xi nújun, peru naña xi siu ngahma maxë ne, sacu xi rë pan xi vixuhndu ngahma maxë rë nai rë chu hane jinë chu.

<sup>28</sup> Sehe cafayangui Jesús cachja me cojo na cuitjin:

—Ngaye chjuun, jemu ndaja mangutacuin cojo ná. Cata-mandaja quihndi riji sacuaha xi meje ri.

Hya xi camá ne, hora hya ne, camandaja quihndi rë na.

*Casahmi Jesús xi camandaja xuta tjehen rë laguna Galilea*

<sup>29</sup> Hya xi camá ne, cavetju Jesús taha vëhë quiji me tahndee rë laguna Galilea sehe ngajan camiji me ngu ndetjún, ngajan cavejña me. <sup>30</sup> Hane jemu quijitjengui rë me xutacjín, yaha me xuta rengun, xuta rcá, xuta lihmi, xuta yoho cojo xuta xi má rë hacjahi chíhin ne caviyujutë me xuta jan xcun

Jesús hane Jesús ne, casahmi me xi camandaja me. <sup>31</sup> Xi cavëë xutacjín xi cuatjin camá ta, cama cachja xuta lihmi, camajingu xuta yoho, findaja xuta rengun hacuaha tsejen rë xuta rcá ne, sehe jercu quijircun rë me, hane casahmi hnga me, casahmi jyë me Nina, Nina jan xi faharcun xuta nangui Israel.

*Cjuarcun xi catsicjen Jesús ñuju mil xihin*

<sup>32</sup> Ngajan cajindaya Jesús xuta ladu rë me, cafehe me cachja Jesús cojo rë me cuitjin:

—Jemu yuma má ná xutacjín vi ta ha quihndë jyë nixtin hinchataha me cojo naja, hane ha quihndë tsajin camahani mé xi sinë me. Tsajin mangucacun xi tsingátju me cjue me xi cjëë sinë me niñu ta, sá tsajin ne, cjuaha rë me hinda ndiya.

<sup>33</sup> Sehe ngajan xi xuta ladu rë me ne cafayangui me tsëhë me cuitjin:

—Peru nguehe nangui xín ne ¿jani cuma sacú niji pan xi sinë xutacjín vi?

<sup>34</sup> Ngajan xi cavinenguise Jesús cojo xuta cuitjin:

—¿Há cjín pan tjín nuju?

Ngajan xi cachja me ta:

—Yatu má pan hacuaha siu ngujo ti langa.

<sup>35</sup> Ngajan xi Jesús ne cavitexa me xutacjín xi cuiyujutë me nangui. <sup>36</sup> Hya xi camá casahmi xuta ne, sehe cafaha Jesús yatu pan cojo ti jan ne sehe casua me nacuechji rë Nina. Hane cavotoho langa me pan cojo ti jan, casua me xuta ladu rë me xi cavatëcja me ne cafaha xutacjín. <sup>37</sup> Cuatjin camá cajine xuta jan, hane jemu ndaja cama rë xahasen rë me. Hane xi cafaya xuta xi cavangui cajinë xuta jan ne catsë yatu nisinya. <sup>38</sup> Xuta xi cajinë ne, sacuaha ñuju mil má me xi xihin me, hacjahi má xuta chjuun cojo quihndi. <sup>39</sup> Hya xi cajnetaha vëhë ne, catsingatju Jesús xuta cafe me, hane suvá ni me, cavisehen me ngu barcu quiji me taha nandya Magadán.

## 16

*Cha partidu fariseo cojo cha partidu saduceo ne fehya cha xi tsingacun Jesús ngu seña*

<sup>1</sup> Xi cafehe me ngajan ne, hacuaha cafehe cha tsëhë partidu fariseo cojo cha partidu saduceo hane ta tsëhë xi meje cjuahachuva cha me, cafehya cha me ngu cjuarcun xi nduva ngahnga, cojo sa xi scuëë cha xi Nina catsingatju rë Jesús.

<sup>2</sup> Peru Jesús ne, cafayangui me cojo ejemplu vi cuitjin:

—Nguehe ne, hya xi chutsujun xi má haní ngahnga ne, nújun jain, ta: “Tyjahi nchujun ni, ndajyihí nixtin.” <sup>3</sup> Cuanitjin hya xi sahasen ne, sá xi má haní ngahnga hane hinchá yufí jma ne, nújun ta: “Va cumá nixtin.” Jo má tacun. ¿Hacutjin

cuma xi jemu hyun mé vjine xcusun xi cún ngahnga, peru vjiniircun mé vjine xcusun xi tijima nguehe nixtin vihi ni? <sup>4</sup>Xuta tséhë nixtin vihi ne, xuta xi tsehen cjuatacun rë me, xi tjenguiin me Nina cojo ngu ni cjuatacun, xuta vë xi fehya me ngu seña. Peru sacuiin rë me seña ta seña xi sacu rë me ne, sacuaha seña xi ha catsingacun profeta Jonás hatsëë nixtin.

Sehe xi cajnetaha cachja Jesús cjua vëhë ne, caviyuju me xuta jan ne, quiji me.

### *Ejemplu tséhë san rë pan*

<sup>5</sup>Hya xi cafehe xuta ladu rë me ngunda laguna ne, hacuaha cachaya rë me cjuaha me pan. <sup>6</sup>Sehe Jesús cachja cojo me:

—Nechun cuidadu tséhë san rë pan tséhë cha partidu fariseo cojo xi tséhë cha partidu saduceo.

<sup>7</sup>Sehe cha ladu rë me ne, cavisiajmi cha cojo xicjin cha cuitjin:

—Tséhë xi cachaya naja pan ne, vëhë xi cuatjin chja me.

<sup>8</sup>Peru xi camachaya rë Jesús xi veyanangui cha xi tsajin rë cha pan ne, cachja me cojo cha cuitjin:

—Ngayun ne, cjëë cumangutacun nduju cojo ná. ¿Mé má cuatjin nújun xi chjá ta tséhë xi tsajin nuju pan? <sup>9</sup>¿Há nuhyuun? ¿Há vitsjiin nuju? Hya xi cajinë hñu mil xuta hñu pan ne, ¿há cjín chajne cachjayun tséhë pan xi cavangui jan?

<sup>10</sup>Hacuaha hya xi cajinë ñuju mil xuta yatu pan ne, hya ne ¿há cjín chajne cachjayun? <sup>11</sup>¿Hacutjin cuma xi nuhyuun xi hacuiin tséhë pan xi cachjá cjua jan? Xi chjá ne, nechun cuidadu tséhë san rë pan tséhë cha partidu fariseo cojo xi tséhë cha partidu saduceo.

<sup>12</sup>Hya xi camá ne, camachaya rë me xi cachjaain me xi meje cuidadu cojo san xi sahmixa pan ta cachjá me tséhë xi meje cuidadu cojo cjuachacun xi sahmixa cha partidu fariseo cojo cha partidu saduceo.

### *Catsinguixi Pedru yo Jesucristu*

<sup>13</sup>Ngu ndiya xi ha cavisehen Jesús distritu tséhë nandya Cesarea tséhë Filipo ne, cavinenguise me xuta ladu rë me cuitjin:

—Mé chja xuta tsahan, ¿yo ngahan, Quihndi rë Nina Jain?

—Cuatjin cavinenguise me cha.

<sup>14</sup>Sehe ngajan xi cachja cha cojo Jesús cuitjin:

—Yahnga me ne, chja me ta nima Juan Vitenda rë Xuta ngayun, hane yahnga nga me ne, chja me ta Elías, hane yahnga nga me ne, chja me ta nima Jeremías, hane me xi yahnga nga ne, chja me ta ngayun ne, ngu profeta xi hacjahi.

<sup>15</sup>—Hane ngayun ne, ¿mé nújun ni, yo ngahan? —Cuatjin cavinenguise Jesús.

16 Ngajan xi cafayangui Símon Pedru cuitjin:

—Ngayun ne, Mesías xi catsingatju nuju Nina; ngayun, Quihndi rë Nina, Nina quicun jain.

17 Sehe cachja Jesús cuitjin:

—Ndatjin tsujun, Símon, quihndi rë Jonás. Tsajin ngu xuta xi casua camachaya nuju cjuaja, ta Nahmi naha xi tacun me ngahnga ne, me vëhë xi casua me xi camachaya nuju tsëhë. 18 Hane ngahan ne, suá cumachaya nuju xi ngayun ne, ngayun xi hmí nuju Pedru. Hane ñihi nuju ne, vijne ndyojo. Hane xcun ndyojo vihi sahme yungun naha; yungun jan ne, hisca cjuaveya ne tsajin ngahñu xi tsicjëya rë. 19 Suá nuju quicha tsëhë gobiernu xi sahmi Nina, ngajan xi xcusun xi nihñucjun nguehe ngasunhdë ne, hacuaha cumahñucjan ngajan ngahnga, hacuaha xcusun xi chundecjun nguehe ngasunhdë ne, hacuaha tundecjan ngajan ngahnga.

20 Sehe Jesús ne, cavitexa me xuta jan xi tsajin camahani yo xi cuichja me cojo tsëhë xi Mesías má me.

### *Cachja Jesús xi tsiquehen xuta me*

21 Hya xi camá ne, sehe cavetsihin vicuya Jesús xuta ladu rë me tsëhë xi sahmi ngujoyë xi cjue me nandya Jerusalén, hane ngajan ne, jemu cjín cjuañihi cuátju me cuma xi sahmi xuta changá cojo nahmi xi matitjun tsëhë nahmi cojo cha xi vicuya cjuachacun ne. Tsitjungui cha me, tsiquehen cha me; peru xi cumá jyan nixtin ne, tsicuya Nina me cjuahñu. 22 Ngajan xi Pedru ne, quiixin me cojo Jesús. Sehe cavetsihin cachjataha me Jesús cuitjin:

—Tatá, ¡catamamiji rë Nina! ¡Hatuxa cumaji cuatjun cuatjin!

23 Hane xi cavuya Jesús cavutsejen me Pedru, ngajan cachja cojo me cuitjin:

—Tihinxin ngaye Satanás, ngaye ne, sacuaha ngu ndyojo xi meje xtenguiya ná ngajni cjuatsehen tsëhë xi ningati-intacuín ngaye sacuaha tsingatahacacun Nina ta ningatehetacuín sacuaha ngu xuta ngasunhdë ni.

24 Sehe cachja Jesús cojo cha ladu rë me cuitjin:

—Sá xi tjin yo xi meje rë xi cuma cuisehen me ladu naha ne, ha quihndë mijí rë xi sahmi me hacutjin xi meje rë suvá me ta nchunchujun ni meje rë xi catejñahñu xahasen rë me xi cjuenduju me cojo ndiya naha, handasa hisca cueya me xcun cru. 25 Yo xi mijii cuisehen ladu naha tsëhë xi tsacjun me xi cueya me ne, cahndë xi vetjo me cjuahñu rë me ne, tsichaja me cjuahñu xatsë xi sacu rë me. Peru yo xi ngatsë rë xi cavisehen ladu naha cueya ne, sacu rë cjuahñu jan. 26 ¿Mé machji rëhë rë yo xi sacú rë yëjë cjuanchina rë ngasunhdë peru sehe cueya ne cumá castigu? Tsajin mé xi cuma tsindeya xicjin me cojo cjuahñu xatsë. 27 Ta ngahan, quihndi rë



Xuta Jain, cuinduvá cojo hasen ndajyihi tséhë Nahmi naha hacuaha cojo ángel naha cuinduvá; hane hya ne, cuechji me jimangu me, ¿há ndaja há ndajin casahmi me? <sup>28</sup> Cuichjá quixë cojo nuju ta tjin yahnga ngayun xi sechun nguehe xi cueyuun jinguyëjë rë xi cjëë chun xi cuitexa Quihndi rë Xuta Jain gobiernu xi sahmi Nina.

## 17

### *Cavindeya xcusun rë Jesucristu*

<sup>1</sup> Hya xi camá cavatju jyun nixtin ne, quijixin Jesús quijicojo me Pedru cojo Jacobo cojo Juan, hntsë Jacobo, quijinihi me ngu naxi hnga. <sup>2</sup> Ngajan camá xi cavëë me xi cavindeya xcusun rë Jesús: Xcun me ne, camaseti sacuaha seti tsuhi, hacuaha tsjian rë me ne, jemu tu tyava camahani camá sacuaha hasen rë ndihi. <sup>3</sup> Hacuaha ngajan cavëë me xi cafehetsejen nima profeta Moisés cojo profeta Elías, me xi caviyuju hatsëë nixtin ne, tivisiajmi me cojo Jesús.

<sup>4</sup> Sehe cachja Pedru cojo Jesús cuitjin:

—Nai, tu ma rë xi nguehe nechin ne, sá xi meje nuju ne, sahme jyan puestu; ngu cuma tsujun ne, ngu cuma tséhë Moisés, hane cojo ngu cuma tséhë Elías. —Cuatjin cachja me.

<sup>5</sup> Hane hora xi tichja Pedru ne, canduva ngu yuffi xi seti tsejen casahmi tjahnguen rë tséhë me, hane canuhya rë ngujo cjua xi cavetju ngajñi yuffi jan xi cachja cuitjin:

—Cha vihi xi Quihndi naha cha xi jemu hmu cacún. Jemu ndama ná ngatsë rë cha. Tinuhyun cjua xi chja cha.

<sup>6</sup> Hya xi cahndë xuta rë me cjua jan ne, caticaxcun me. Hane jemu catsacjun camahani me camá. <sup>7</sup> Ngajan xi cafehe Jesús cavetahatsja me me, hane cuitjin cachja me:

—Tisatjunhngun. Xicarcuun. —Cuatjin cachja me.

<sup>8</sup> Hane xi cavutsejenniji me ngajan ne, ndastu yo siu ta suva ni Jesús tacun me.

<sup>9</sup> Xi tu tivijne me tséhë rcu naxi jan cojo xuta ladu rë me xi quijicojo me jan ne, ngajan xi cachja me cojo me ta tsajin yo xi cuichja me cojo xcusun xi cavëë me. Xi cuatju cueya Quihndi rë Xuta Jain, sehe cuya nga me cjuahñu ne, hya cuichja me.

<sup>10</sup> Ngajan xi cavinenguise me cojo Jesús cuitjin:

—¿Mé má cuatjin chja maestro tséhë ley xi titjun Elías cuinduva me, sehe cuinduva Mesías?

<sup>11</sup> Ngajan cafayangui Jesús cuitjin:

—Quixi xi Elías cuinduva me titjun ta me vëhë cuiyujuchihin me yëjë ni xcusun. <sup>12</sup> Peru cuichjá cojo nuju ta ha canduva me, peru xuta ne, hvíin me xi hacui me, hane choho casahmi xuta cojo me hacutjin meje rë xahasen rë me. Hane hacuanitjin sahmi me xi cuátju cjuahñi Quihndi rë Xuta Jain.

<sup>13</sup> Ngajan xi camachaya rë xuta rë me ta tichja me tsëhë Juan Vitenda xuta hya xi chja me Elías.

*Jesucristu ne, casahmi me xi camandaja cha xi faha rë chajan*

<sup>14</sup> Hane xi quiji me ne cavechutaha me xutacjín ne, ngajan cafehetjengui rë me ngu xihin, cavixcuhnchitaha cha Jesús cachja cha cuitjin:

<sup>15</sup> —Nai. ¡Catamayuma nuju cha lihndi naha ta, jemu faha rë cha chajan hane jemu choho sahmi cojo cha. Jiya hora ne, finenguiya cha ngajñi ndacahi, hane jiya hora nga ne, viticjaya cha ngajñi nandan. <sup>16</sup> Cëjëcojo cha xcun xuta ladu nuju xi tsirqui me cha peru camaji casahmi me.

<sup>17</sup> Sehe ngajan xi Jesús ne, cuitjin cafayangui me:

—Ngayujun ni ne, xuta xi macjaaín rë ngayun hacuaha xuta xi cavetjuxin tsëhë ndiya ndajyihi ngayun. ¿Há jyë sa xi cuitejña cojo nuju? ¿Há jyë sa nixtin xi scaa ná cojo nuju? Nduvuncujun cha nguehe. —Cuatjin cachja me.

<sup>18</sup> Hya xi camá ne, cachjataha Jesús xitsehen xi hincha xahasen rë cha, hane cavetjuxin xitsehen jan, hane hora hya ne, camandaja cha.

<sup>19</sup> Hya xi camá ne, xi cafehe xuta ladu rë Jesús cavinenguisse me me cuitjin:

—¿Mé má ngayin ne xi camaji canaxinxin xitsehen jan tsëhë xahasen rë cha vë?

<sup>20</sup> Ngajan xi cachja Jesús cojo me ta:

—Camaji ta hacuiin ndaja macjain nuju. Ta cuichjá quixë cojo nuju ta sá xi mangutacún cojo ná ndastu hitsë ne, hacuaha cuma cuinújun cojo naxi vihi: “Catjixin, catjin catisekun ngajan tavëhë.” Hane cuihndë tsujun. Hisca sá xi mangutacún cojo ná ndastu hitsë ne, tsajin me xi cumaji nihñu. <sup>21</sup> Peru sacuaha xitsehen xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxexeen.

*Cachja nga Jesús xi tsiquehen xuta me*

<sup>22</sup> Nixtin xi caviyuju Jesús cojo xuta ladu rë me ngajan distritu Galilea ne, cachja Jesús cojo me ngu nixtin cuitjin:

—Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta <sup>23</sup> xi tsiquehen ná me. Peru xi cjuë xi jyan nixtin ne, cuya nga cjuahñu.

Hane xi cahndë me cjuaja ne, jemu cafaha me cjuachoho.

*Jesucristu ne, cavechjitje me tujúnsa tsëhë yungun*

<sup>24</sup> Hya xi cafehe me nandya Capernaum, cafehe xuta xi faha me tujúnsa rë yungun, camatiña me tsëhë Pedru cachja me cojo me cuitjin:

—Maestru nuju ne, ¿há vechjitje me tujúnsa rë yungun?

<sup>25</sup> Ngajan cafayangui Pedru cuitjin:

—Juun, vechjitje me.

Hya xi camá ne, xi cavisehen Pedru ndihya ne, peru chajasa xi cuichja me ne, ngajan xi cachja Jesús cojo me cuitjin:

—Simón, ¿mé nújun? Sacuaha me xi matitjun tséhë nandya ngasunhdë ne, ¿yo vitexa me xi satë rë xi cuechjitje tujúnsa? ¿Há quihndi rë me? ¿Há xutaxín?

<sup>26</sup> Ngajan xi cachja Pedru cuitjin:

—Xutaxín cuechji me.

Cachja nga Jesús cuitjin:

—Sá xi cuatjin ne, quihndi rë me xi matitjun jan ne, ha cavatjuhnga tséhë. <sup>27</sup> Quixi vë, peru cojo sa hacuiin ngatsë rë vëhë cumacjan rë me o maxti rë me cojo naja ne, tangun laguna ne, chandunyun tsitin ngajñi nandan ne, hane hya xi faha tsitin ngu ti ne, chu xi tjun faha rë ne, chjuhun chu nuxuhun hntsua chu hane ngajan cahntsua hntsua chu jan ne, sacú tujún xi stetaha cuechjun tujúnsa xi satë ná cojo xi satë nuju.

## 18

### *Yo xi matitjun*

<sup>1</sup> Hya ne, xuta ladu rë Jesús cafehe tjengui me me, cavinenguise me cuitjin:

—¿Yo xi hitsë sa cumatitjun hya xi sahmi Nina gobiernu?

<sup>2</sup> Hya xi camá ne, cajindaya Jesús ngu lihndi, cavejña me cavasencja. <sup>3</sup> Sehe cachja me cuitjin:

—Hisca ngu ngayun cumaji cuisuhun gobiernu xi sahmi Nina ne, sá xi hacuiin nindeyun cjuatacun nuju hisca cuma yun sacuaha ngu quihndi. <sup>4</sup> Vëhë xi yo xi tsinguijne suvá me yojo rë me xi cuihdë me sacuaha vihndë ngu quihndi ne, me vëhë xi hitsë sa cumatitjun me hya xi sahmi Nina gobiernu. <sup>5</sup> Hane tu yo ni xi cjuahatsja rë ngu quihndi xi cuacun vë ngatsë rë xi ladu naha má ne; vëhë cuma sacuaha xi cafhatsja me ngahan.

### *Xuta xi nduvacojo me xcusun xi tsitsehen rë xicjin*

<sup>6</sup> Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tséhë xuta vëhë xi xtyangui ngu ndyojo natsi nguisin me sehe ningatjeya rë me ngajñi ndachacun. <sup>7</sup> Jemu choho vatju xuta ngasunhdë ngatsë rë xcusun xi tsitsehen rë me xi sahmi me cjuatsehen. Hatuxa cuinduva xcusun xi meje sahmi xi tsismicacun xuta ndiya rë Nina, peru jemu chojyihí tséhë xuta xi nduvacojo me xcusun vëhë.

<sup>8</sup> Hane sá xi cjuatacun nuju meje rē xi nihñu ngu jyě cojo ntsun o sá xi cojo ntsacu ne, vengui sa chji rē xi chandunxun, ta hitsē sa ndaja tsujun xi cuma yoho yun xi cuma rē xi cuechun jingu cojo catsijo ntsun o catsijo ntsacu xcun ndihi xi tsajin nixtin tsajin nixten xi coho. <sup>9</sup> Hacuaha sá xi cjuatacun nuju meje rē xi nihñu ngu jyě cojo xcusun xi chutsujun cojo tuxcun ne, chjuhunxun tuxcun jan chandunxun, ta tsēhē xi hitsē sa ndaja tsujun xi sacu nuju cjuahñu xatsē handasa cojo ngu ni tuxcun xi cuma xi cojo catsijo tuxcun cuechun xcun ndihi xi sahmi castigu rē nima. <sup>10</sup> Cojo yējē ni ne, nihñu cuidadu xi nitjunguun ngu quihndi sacuaha quihndi vihi, ta tsēhē xi ángel xi sahmi cuenda me ne, yējē nixtin yējē hora ne, siu tangun me cojo Nahmi naha hane sahmi ngujyē xi cjuehya me cahndē xi cuichja me cojo.

*Ejemplu tsēhē chu tsánga xi cachajá*

<sup>11</sup> Quihndi rē Xuta Jain ne, canduvá me xi cuaxētje me xuta xi cachajá. <sup>12</sup> ¿Mé xi nújun? Cuejñaa ne xi ngu xihin tjin rē me ngu cientu chu tsánga. Hane sá xi chajá ngu chu rē me, ¿há hyuun xi cuiyujutaha me chu xi ñujuchan tyjuhun ñuju jan nguijña ne, sehe cjue me cuanguise me ngu chu xi cachajá jan? <sup>13</sup> Hane hya xi sacú rē me chu ne, hitsē sa jyē cjuasua tjin rē xahasen rē me ngatsē rē xi casacu rē me chu xi cachaja xi cuma rē cjuasua tsēhē ñujuchan tyjuhun ñuju chu xi tetjo. <sup>14</sup> Cuanitjin xi cuma rē Nahmi nuju xi tacun ngahnga, ta mijí rē me xi chajá hisca ngu quihndi rē me cuatjin.

*Hacutjin meje rē xi cuinújantahan xingueen*

<sup>15</sup> Hane sá xi ngu xingun choho sahmi cojo nuju ne, tangun suvun tinújuntuhun rē, hane sá xi tsindeya cjuatacun rē ne, ndatjin, ta hacuiin cuetsuntaha cjuandaja xi tjin nuju cojo me. <sup>16</sup> Peru sá xi vihndiin me tsujun ne, tangun chjuhun ngujo xuta tanguncujun xi tinújuntuhun rē tsēhē xi hya xi cuma me testigu nuju tsēhē, sehe cumatsejen cjuaquixi. <sup>17</sup> Sá xi hisca cojo me vē vihndiin me tsēhē me ne, tangun tinújun tsēhē xcun xuta yungun, hane sá xi hacuaha vihndiin me cjuatacun rē xuta yungun jan, cumá me xi cuma nuju sacuaha ngu xutaxín o sacuaha ngu xuta ndacha xi faha rē tujúnsa.

<sup>18</sup> Cuichjá quixē cojo nuju ta xcusun xi nihñucjun nguehe ngasunhndē ne, hacuaha mahñucjan ngajan ngahnga, hacuaha xcusun xi nihñu ndaya nguehe, hacuaha mandaya ngajan ngahnga. <sup>19</sup> Hacuaha cuichjá cojo nuju ta sá nguehe ngasunhndē ne matangun cjuatacun rē jo ngayun tsēhē ngu xcusun xi chjahyun rē Nina ne, cuetjucaa jain tsujun ta sahmi chihin Nahmi naha xi tacun me ngahnga. <sup>20</sup> Ta tu mé ni cahndē xi cuiyujuntangun ngu jo jyan xuta xi ngajan

veyanangui ñihi naha, hacuaha ngajan ngajñi rë me tejña ngahan.

<sup>21</sup> Sehe cafehe Pedru cachja cojo me cuitjin:

—Nai, ¿há cjín ndiya sahmi ngujoyë xi tsinchátaha xingueen sá xi choho sahmi me cojo ná? ¿Há ndatjin xi yatu ndiya?

<sup>22</sup> Ngajan cafayangui Jesús cuitjin:

—Hacuiin yatu ndiya ni, ta cuichjá cojo nuju ta mameje rë xi jyanchan të cuatjin xi yatu ndiya ninchatuhun rë me.

### *Ejemplu tsëhë cha xi mijí tsinchataha xicjin cha*

<sup>23</sup> 'Ngajan tsejen xi hya xi Nina sahmi me gobiernu ne, cumá sacuaha ngu me xi matitjun xi meje cuaxëchihin me cuenta xi tjin rë me cojo xuta rë me. <sup>24</sup> Hane hora xi tijima ne, cajindaya rë ngu cha xi cafehe cha hane cha jan ne, të mil tujún quitjen cha. <sup>25</sup> Hane ngatsë rë xi tsajin camahani cha rë tujún xi sahmingojo cha, cachja me xi matitjun jan xi xteña cha xi cuma cha ngu mosu, xteña suva cha, hacuaha cojo chjuun rë cha cojo quihndi rë cha cojo yëjë ni xi tjin rë cha, hane sehe cuatjin cuma cuechji cha tsëhë xi quitjen cha. <sup>26</sup> Hya xi camá ne, cavixcuhnchi cha xcun me cafaharcun cha me cafehya cha me cuitjin: "Nai, catijnehnchan cjuacjan nuju, tuhun ná hitsë cahndé hane cuechjë tsujun." <sup>27</sup> Ngajan xi me xi matitjun jan ne, camayuma rë me cha, catsijyëcacun me tsëhë cha tsëhë cjuacjintacun jan, catsinchataha me cha.

<sup>28</sup> 'Peru xi cavetju quiji cha jan, cavechutaha cha jan ngu cha xicjin cha xi quitjen tsëhë cha hitsë tujún, hane cafaha cha nguisin xicjin cha jan, cachja cha cuitjin: "Nihñi ngojo yëjë xi quitjin tsahan." <sup>29</sup> Hane xi cavixcuhnchi xicjin cha xcun cha ne, cachja xicjin cha jan cuitjin: "Catijnehnchan cjuacjan nuju, tuhun ná hitsë cahndé ta cuechjë tsujun." <sup>30</sup> Peru mijí sua cha cahndé, hane quiji caveya cha xicjin cha ndavaya, ngajan seya xicjin hisca xi cuma sahmingojo tujún. <sup>31</sup> Hya xi cavëë yahnga mosu xcusun xi camá cavatjun jan, jemu camá xti rë me quiji casuacuenda me tsëhë cojo me xi matitjun tsëhë me. <sup>32</sup> Ngajan xi cajindayavaha me xi matitjun cha jan, cachja me cuitjin: "Ngaye, jemu choho xcusun rijí. Catsinchátaha yëjë ni xi quitjin tsahan, tsëhë xi jemu cachjahye. <sup>33</sup> Hane ngaye, ¿hacutjin cumá xi tsajin ri cjuayuma cojo xinguin? ta ngahan ne, cama yuma ná ngaye." <sup>34</sup> Cuatjin camá xi jemu camacjan rë me xi matitjun cojo cha jan, catsingatju me cha cjuañihi ngajan ndavaya jñu hisca nixtin xi cjuë cuechji cha xi quitjen cha.

<sup>35</sup> 'Hane cuatjin sahmi Nahmi naha xi tacun ngahnga cojo nuju, sá xi ninchatuun xingun cojo yëjë xahasen nuju.

## 19

*Cjuachacun tsëhë xuta xi tsismi xicjin*

<sup>1</sup> Hya xi cajnetaha cachja Jesús cjuá vi, sehe cavetju me distritu Galilea ne, cavisehen me distritu Judea ngajan tahndee ndajyë Jordán ladu vetjucaa tsuhi. <sup>2</sup> Hacuaha quiji tjengui rë me xutacjín hane casahmi me xi camandaja xuta hmu rë.

<sup>3</sup> Hya xi camá ne, ngajan cafehe cha tsëhë partidu fariseo ne, quiji cha hiscan tacun Jesús hane tsëhë xi meje cjuachuva cha me cojo cjuá rë me ne, cachja cha cuitjin:

—¿Há tsingatihi ley xi ngu xihin ne, tsismi chjuun rë ngatsë rë tu mé ni xcusun xi chuyiin rë me tsëhë?

<sup>4</sup> Ngajan xi cafayangui me cuitjin:

—Ngayun ne, ¿há cachutayuun ta tsëhë xi hisca ntsacu cavetsihin casahmi Nina ngasunhdë ne, casahmi me xi chjuun xi xihin xuta? <sup>5</sup> Cachja Nina ta ngatsë rë xi cuatjin casahmi me xuta ne: “Vëhë xi ngu xihin ne, cuejña cha nahmi rë cha, hacuaha cuejña cha naa rë cha, hane cumatangun cha cojo chjuun rë cha sacuaha ngu ni xahasen.” <sup>6</sup> Ha quihndë hacuiin jo ta sacuaha xi ngu ni xahasen. Hane tsëhë xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tsëhë xicjin me. —Cuatjin cachja Jesús.

<sup>7</sup> Ngajan cavinenguisse cha cuitjin:

—Sá xi cuatjin ne, ¿mé má casua Moisés cahndë xi ngu xihin cuma cuejña cha ngu xujun tsja chjuun rë cha xi ha quihndë mijí rë cha na? Hane xi cuatjin ne, cuma tsismi cha na.

<sup>8</sup> Sehe ngajan xi Jesús ne, cachja me cojo cha ta:

—Ngatsë rë cjuataja rë xahasen nuju ne, vëhë xi Moisés ne casua me cahndë xi nismu chjuun nuju, peru hacuiin cuatjin cavitexa Nina ntsacu cavetsihin. <sup>9</sup> Cuichjá cojo nuju ta yo xi tsismi chjuun rë handasa ndastu mé cjuatsehen casahmi chjuun jan cojo ngu xihin hacjahi, hane cuixan cojo ngu nga chjuun ne, tjin jyë rë me ta tsëhë xi ngatsë rë cjuá rë me sahmi chjuun jan cjuatsehen.

<sup>10</sup> Ngajan xi cachja xuta ladu rë Jesús cuitjin:

—Sá xi cuatjin sacuaha xi nújun, ndajintjin tsajan xi cuixan.

<sup>11</sup> Cachja nga Jesús cuitjin:

—Hacuiin yëjë ni xuta ma vijnercu me cjuá vi, suva xuta xi Nina casua cahndë xi vijnercu me ne, me vëhë vihndë me. <sup>12</sup> Tjin xuta xi cumaji cuixan me, sacuaha xihin xi hisca chaja sa catsin me ne, maji matangun me cojo ngu chjuun. Hacuaha tjin yahnga me xi catsixindë xuta me, hacuaha tjin yahnga me xi faain me ngu chjuun ngatsë rë xi sahmixa rë gobiernu xi sahmi Nina. Catjahatsja cjuá vi tu yo ni xi cuma cjuahatsja rë.

*Catsinchacun Jesucristu nixti*

<sup>13</sup> Hacuaha quijicojo xuta nixti rë me hiscan tacun Jesús xi cuisanetsja me nixti jan hacuaha cjuehya me cjuandaja rë Nina ngatsë rë me. Peru hya xi cavëë xuta ladu rë Jesús xi cuatjin tijima ne, cavatëcja me cjuatacun rë xuta jan.

<sup>14</sup> Peru Jesús ne, cachja me cojo xuta ladu rë me cuitjin:

—Tuhun rë nixti cahndë catinduva tjengui ná. Xicanichuun rë cahndë ta, tsëhë xi gobiernu xi sahmi Nina ne, má tsëhë nixti xi cuacun vë.

<sup>15</sup> Hane ngajan cavisanetsja me nixti jan sehe cavetju me tsëhë cahndë jan.

*Jemu chja cuisehen xuta nchina ladu rë Nina*

<sup>16</sup> Hya xi camá ne, cafehe ngu cha nixti xi cavinenguisse cha Jesús cuitjin:

—Ngayun Maestro, ¿mé cjuandaja meje rë xi sahme cojo sa xi sacú ná cjuahñu xatsë xcun Nina? —Cuatjin cachja cha.

Ngajan xi cachja Jesús cuitjin:

<sup>17</sup> —¿Mé má noje tsahan xi ndaja ngahan? Ngu ni Nina xi ndaja me. Peru sá xi meje sacú ri cjuahñu xatsë jan, nohye cjua rë ley xi cavitexa Nina.

<sup>18</sup> Ngajan cafayangui cha cuitjin:

—¿Jarë cjua jan?

Hane cachja Jesús ta:

—Xicanicuun xuta, xicanihñuu cjuatsehen cojo rë ngu chjuun o cojo rë ngu xihin xi hacuiin tsujun, xicanihñuu cjuachëjë, xicanujuun cjuandesu tsëhë xuta, <sup>19</sup> chjuhuncun nahmi nuju hacuaha chjuhuncun na nuju. Hacuaha nihñu hmutacun xingun sacuaha hmutacun suva yojo nuju.

<sup>20</sup> Ngajan cachja cha nixti jan ta:

—Yëjë ni cjua vëhë ne, ha cáhndë tsëhë hisca cjualihndi naha. ¿Mé sa meje rë xi sahme? —Cuatjin cachja cha.

<sup>21</sup> Ngajan cafayangui Jesús cuitjin:

—Tjin sa ngu cjua sehe cuma chihin yëjë ni: yëjë ni xcusun xi tjin ri ne, titeñi, hane sehe tichecje tujún rë ngajñi rë xuta yuma. Hane xi cuatjin nihñi ne, jemu jyë cjuanchina sacú ri ngajan ngahnga. Hane xi cjuë cuichecje tujún vëhë ne, sehe ndove tisecue ná.

<sup>22</sup> Peru xi cahndë cha nixti cjua xi cachja Jesús ne, jemu va camá cacun cha hane quiji cha, tsëhë xi jemu nchina camahani cha.

<sup>23</sup> Hya xi camá quiji cha ne, cachja Jesús cojo xuta ladu rë me cuitjin:

—Cuichjá quixë cojo nuju ta jemu chja xi ngu xuta xi tjin rë me cjuanchina cuisehen me hiscan sahmi Nina gobiernu.

<sup>24</sup> Hisca cuichjá nga xi hitsë sa chjaain cuatju ngu chu camellu

ngojo rë ngu nîndu xi cuma rë xi cuisehen ngu xuta nchina hiscan sahmi Nina gobiernu.

<sup>25</sup> Ngajan xi xuta ladu rë me ne jemu quijircun rë me cjuarë me tsëhë xi cachja me tsëhë xuta nchina hane cavinenguise me Jesús cuitjin:

—Sá cuatjin ne, ¿yo xi cuma cuetjutje ni?

<sup>26</sup> Ngajan xi Jesús ne, cavutsejen me hiscan siu xuta jan ne, cachja me cojo me cuitjin:

—Xuta ne, maji sahmi me; peru yëjë ni xi maji sahmi xuta ne, Nina ne, hatuxa ma sahmi me.

<sup>27</sup> Sehe cachja Pedru cojo me cuitjin:

—Chutsujun ni. Ngayin ne, ha canismitacuïn yëjë ni xcusun xi tjin niji, hane tiviseacuïn nuju. Hindë ne, ¿mé sacu niji?

<sup>28</sup> Sehe cachja Jesús cuitjin:

—Cuichjá cojo nuju cjuaquixi ta hya xi cuechu nixtin xi cumá xatsë yëjë ni ne, nixtin xi cuejña Quihndi rë Xuta Jain xcun silla xi sahmi me gobiernu ne, ngayun xi tejó ne, ngayun xi cavisuhun ladu naha hacuaha cuinechun xcun silla nichuvun cjuatacun rë yëjë tejó tjë naja, ngayaan xi tjë rë xutachanga naja Israel ngayaan. <sup>29</sup> Hacuaha yëjë xuta xi tsismicacun me ndava me, tsismicacun me xicjin me, tsismicacun me xutacha rë me, tsismicacun me quihndi rë me, tsismicacun me nangui rë xitjë rë me, ngatsë naha; sacú rë me ngu cientu sa quisun tsëhë hane hacuaha sacú rë me cjuahña xatsë. <sup>30</sup> Peru xuta xi matitjun quihndë ne, jemu cjin me xi cumachjiriin me hya, hane xuta xi hacuiin matitjun quihndë ne, hya ne cumachji rëhë me xi cumatitjun me.

## 20

### *Ejemplu tsëhë chji rë mosu*

<sup>1</sup> Sua Nina cahndë xi cuisehen xuta gobiernu xi sahmi me ne, sacuaha casahmi ngu me xi nai rë ngu ranchun. Xati nguitajña quiji me cavanguise me mosu xi sahmi xá hiscan catsitjë me uva. <sup>2</sup> Hya xi casacu rë me ngujo cha, casahmi me compromisu hane cavejña chji rë cha xi ngu tujún xi hmí rë denario xi ngu nixtin. Hane hora hya casua me cha xá quiji cha nguijña xitjë. <sup>3</sup> Hya xi camá ne, sacuaha fane ñaja ne, cavuya nai jan ndetsin hane ngajan cavëë me cha xi hacjahi hane mahya rë cha. <sup>4</sup> Sehe cachja me cojo cha cuitjin: “Hacuaha tangun xitjë naha, sehe sua nuju hacutjin satë nuju.” Hane quiji cha jan. <sup>5</sup> Hane jo ndiya nga ne, sacuaha nchisen hane sacuaha fane jyan ne, quiji nai jan ndetsin, tangun casahmi me tangun cachja me. <sup>6</sup> Hane xi cavechu sacuaha fane hña nguixun ne, quiji nga me ndetsin, ngajan casacu rë me yahnga cha xi mahya rë, sehe cachja me



cojo cha cuitjin: “¿Mé má tu nechun ni nguehe cuahanixtin?”  
<sup>7</sup> Hane cafayangui cha cuitjin: “Tséhë xi tsajin yo xi casua niji xa.” Sehe cachja me cuitjin: “Hacuaha tangun nihñu xa xitjè naha.”  
<sup>8</sup> Hane hya xi ha camá nguixun, nai rë xitjè ne, cachja me cojo cha xi fahacuenda rë xitjè jan cuitjin: “Chjindayun rë mosu ne, tuhun rë me chji rë yějè ni me, titjun ne tuhun chji rë cha xi cafehe ngascan hane cuatjin ne hisca xi cuijnetaha ne, sehe tuhun rë cha xi tjun cafehe.”  
<sup>9</sup> Hane xi cafehe cha xi casacu rë xa sacuaha fane hñu nguixun ne, cafahatsja cha chji ra xi ngu denario.  
<sup>10</sup> Hane xi camachaya rë cha xi tjun casacu rë xá ne, xi má rë cha ne, hitsë sa hnga cumá chji rë cha, peru hacuaha cafahatsja cha ngu denario ni.  
<sup>11</sup> Hane xi cafahatsja cha chji rë cha ne, cachjataha cha nai jan cuitjin:  
<sup>12</sup> “Cha vë ne, ngascan cafehe cha, ngu ni hora casahmi cha xa, hane tangun catuhun chji rë cha cojo niji. Ngayin ne, canihñi xa cuaha nixtin hacuaha cacaa niji ndavá.”  
<sup>13</sup> Peru nai rë xitjè jan ne, cafayangui me tséhë cha jan cuitjin: “Tai, tsajin me cjuachan, ¿há quixi, há quixiin xi cavisiajme xi chji nuju ne, ngu denario?”  
<sup>14</sup> Chjuhun tujún xi satë nuju hane cuangun; ta ngahan ne, cachuya ná ngahan xi ngu chichihin suá rë cha hacuaha suá nuju.  
<sup>15</sup> Ngahan xi tsahan ne, ngahan cuitexa. ¿O há tsajin ne, há machinitacun tséhë xi casahme cuatjin?”  
<sup>16</sup> Hacuaha chuva vëhë ni, xuta xi matitjun quihndë ne, cumachjiriin hya, hane xuta xi hacuiin matitjun me quihndë ne, cumachji rëhë me xi cumatitjun me. Jemu cjin má me xi cachjindaya rë xi canduva me, peru tséhë yějè me jan ne, chuva má me xi catuxijin rë.

*Camá jyan ndiya cachja Jesucristu xi cueya me*

<sup>17</sup> Hya xi camá ne, hora xi jiya ndiya Jesús xi cjuí me nandya Jerusalén, quijixin me cojo xuta ladu rë me xi tejó ni cachja me cojo me cuitjin:

<sup>18</sup> —Chutsujun ni, tivanguen Jerusalén, hane ngajan ne, ngahan xi Quihndi rë Xuta jain ne, cuma ngahan entregadu tsja nahmi xi matitjun cojo maestru tséhë ley; hane cuichja me jyě naha ne, vechu chuva rë xi cueya ngahan.  
<sup>19</sup> Sehe sahmi entregar me ngahan xutaxín, cuejncüë ná xuta, cuëhënatya ná me, cuaja ná me ne, sehe cuetaha ná me xcun cru. Peru xi má jyan nixtin ne, cúa nga cjuahñu.

*Meje scaaya xuta ladu rë Jesús tséhë yo me xi cumatitjun*

<sup>20</sup> Hya xi camá ne, naa rë quihndi rë Zebedeo quijitjengui na Jesús cojo cha quihndi rë na. Cavixcuhnchi na xcun Jesús tséhë xi fehya na ngu favor.  
<sup>21</sup> Sehe cavinenguise Jesús na cuitjin:

—¿Mé xi meje rë xahasen nuju?

Hane cuitjin cafayangui na:

—Tuhun cahndé xi cuiyujutaha cha quihndi naha ngu ngu ladu tjehen nuju, hya xi nihñu gobiernu nuju.

<sup>22</sup> Ngajan cachja Jesús cojo cha cuitjin:

—Ngayun ne, hyuun mé xi chjayun. ¿Há scaa nuju cuatjun cjuañihi xi cuátju ngahan ni?

Sehe cafayangui catsijo cha:

—Juun, scaa nihi.

<sup>23</sup> Ngajan xi cachja nga Jesús cojo cha cuitjin:

—Cjuañihi xi cuátju ngahan cuma ne, hatuxa hacuaha cojo ngayun cuatjun cuma. Peru xi cuinechuntuhun ngu ngu ladu tjehen naha ne, hacuiin ngahan cuichjá ta Nina cuichja me yo xuta xi sua rë me cahndé xi cuiyujutaha me.

<sup>24</sup> Xi cahndé yahnga xuta xi tē jan cjua xi cachja Jesús ne, cavetsihin camacjan rë me cojo jo me xicjin me jan. <sup>25</sup> Ngajan xi cajindaya Jesús yějē ni me, cachja cojo me cuitjin:

—Ngayun ne ha hyun ta yějē ni xuta xi matitjun nguehe ngasunhdē ne, jemu sahmi yehe me yojo rë me sacuaha xi me vëhë xi nai rë xuta, hacuaha jercu meje cuitexa me.

<sup>26</sup> Peru hacuiin cojo ngayun cuatjin nihñu ta xi meje rë ne, ngu ngayun xi meje nihñi yehe yojo nuju ne; ninguijnu yojo nuju tiseacun xingun. <sup>27</sup> Hane ngu ngayun xi meje cumatitjun ngayun, nihñu xi cuma yun sacuaha ngu mosu rë xingun.

<sup>28</sup> Ta cuanitjin ne, casahme ngahan Quihndi rë Xuta Jain, ta canduvá ne, peru hacuiin canduvá xi xuta cuisecoo ná me ta ngahan cuisécoo rë xuta, hacuaha tsingatehen xi tsiquehen ná xuta, cojo sa xi ngatsë rë vëhë cjín xuta cuaxëtje Nina me. —Cuatjin cachja Jesús.

*Casahmi Jesucristu xi camatsejen nga rë jo cha rcá ngajan Jericó*

<sup>29</sup> Hya xi cavetju me nandya Jericó ne, jemu xutacjín quijit-jengui rë me. <sup>30</sup> Hane ngajan hiscan cavatju me siu jo cha rcá xi viyuju cha tjehen ndiya, hane xi canuhya rë xi Jesús tivatju me, cajindaya cha cachja cha cuitjin:

—¡Nai, ngayun tjë rë David! Catamayuma nuju ngayin. —Cuatjin cachja cha.

<sup>31</sup> Hane xuta xi siu ne, cavisiajmicjan me cojo cha xi sejyu cha, peru cha vëhë ne, hitsë sa jercu cajindaya cha chja cha ta:

—¡Nai, ngayun tjë rë David! Catamayuma nuju ngayin.

<sup>32</sup> Hya xi camá ne, ngajan casecunhñu Jesús, cajindaya me cha xi nduva cha. Sehe cavinenguise me cha cuitjin:

—¿Mé xi meje nuju xi sahme cojo nuju ni?

<sup>33</sup> Ngajan xi cachja cha rcá jan ta:

—Tatá, xi meje nihi ne, xi cuma tsejen nihi.

<sup>34</sup> Hane Jesús ne, camayuma rë me cha; cavisanetsja me tuxcun cha. Hane ngutjen ni, camatsejen nga rë cha, sehe quiji cha cojo Jesús.

## 21

### *Cafehe Jesús nandya Jerusalén*

<sup>1</sup> Hane hya xi ha jima tiña Jesús xi cjuehe me Jerusalén, cavechu me nandya Betfajé, ngajan ndetjún xi hmí rë Ndetjún Olivu ne, sehe catsingatju me jo xuta ladu rë me xi cjue tixa rë me, <sup>2</sup> hane cuitjin cachja me cojo me:

—Tángun nandya xi tsejen tacun vë. Hane ngutjen xi cjuhun tjeheh rë ne, sacú nuju ngu burru xi tjihñu chu cojo quihndi rë chu. Hane chundecjun chu, nduvuncujun chu. <sup>3</sup> Hane sá xi tjin yo xi cuichja cojo nuju tsëhë chu, sehe tinújun ta: “Maestru niji ne, meje rë me chu.” Hane sehe sua me cahndë.

<sup>4</sup> Cuatjin camá cojo sa xi cuetjucaa jain cjua xi cachja profeta cuitjin:

<sup>5</sup> Tinújun cojo xuta nangui Sion:

“Chutsujun ne, nduva me xi matitjun tsujun hiscan nechun.

Hacuiin xta me ne, nduva me quisun me chu burru, quisun me quihndi rë chu xi vaniji chaha.”

<sup>6</sup> Sehe xuta ladu rë me jan, cavetju quiji me hane casahmi me hacutjin cachja Jesús, <sup>7</sup> canduvacojo me chu burru cojo quihndi rë chu hiscan tacun Jesús. Hane caviyujusun me tsjian rë me ngaxtun chu, sehe camiji Jesús burru jan. <sup>8</sup> Hane xi quiji Jesús ne, quisun me burru jan, hane xutacjín ne, táha cacandi me tsjian rë me ndiya hiscan cjui Jesús. Hane yahnga me ne, quiji cavotohosun me xca xcuen hane hacuaha cacandi me ndiya hacutjin cjui Jesús. <sup>9</sup> Hane yëjë ni me xi cjui tjun cojo yëjë me xi tjengui jan ne, cavetsihin jercu cajindaya me cachja me:

—¡Hosana! ¡Nacuechji rë Nina xi cafehe me xi cuitexa naja sacuaha cavitexa David hatsëë! ¡Jemu catsinchacun Nina me xi nduva vi tsëhë xi Nina catsingatju rë me! ¡Hisca ngahnga ne, cuechu cjua rë cjuandaja rë Nina!

<sup>10</sup> Hya xi camá ne, xi cavisehen me nandya Jerusalén jercu jyë cjuandya camá hane cavinenguise xuta nandya cuitjin:

—¿Yo me vihi?

<sup>11</sup> Ngajan cafayangui xutacjín jan cuitjin:

—Me vihi, hacui profeta Jesús, xuta Nasaret tsëhë distritu Galilea.

### *Cavaxë Jesucristu xuta xi sahmi ndetsin ndatsen yungun*

<sup>12</sup> Hya xi camá ne, quiji me yungun xi matitjun. Hane hya xi cavisehen me ndatsen yungun jan; cavaxë me xuta xi sahmi me ndetsin. Hacuaha catsindefa me maxë xi xinchasun tujún

xi tsindeya cha cojo tujún rë xuta ngu nangui cojo puestu rë cha xi viteña nisëtyava. <sup>13</sup> Sehe cachja me cojo cha jan cuitjin:

—Chja cjua rë Nina ta: “Ndya naha ne, tacunxa xi cjue xuta sahmi me oración rë me. Peru ngayun ne, tinihñuxun cojo sacuaaha ngu cahndë xi matangun xuta xi sahmi cjuamaña.”

<sup>14</sup> Hya xi ha cavatju vëhë ne, ngajan yungun xi matitjun ne, cavechutaha me xuta rcá cojo xuta rengun; hane casahmi me xi camandaja me. <sup>15</sup> Ngajan xi cavëë nahmi xi matitjun cojo cha xi vicuya cjuachacun ne cjuarcun xi casahmi Jesús, hacuaaha cahndë me xi jindaya nixti ta: “¡Hosana! ¡Nacuechji rë Nina xi cafehe me xi cuitexa naja sacuaaha cavitexa David hatsëë!”; hane jemu cama xti rë me. <sup>16</sup> Cachja me cojo Jesús cuitjin:

—¿Há nuhyun cjua xi tichja me?

Ngajan xi cafayangui Jesús cuitjin:

—Juun, vihndë. Hane ngayun ne, ¿há cjëë chutahanyun cjua rë Nina xi chja tsëhë? Chja cjua ta:

Hisca cjua rë nixti hisca cjua rë quihndinda ne canihñu xi cuetju xi sahmi hnga nuju.

<sup>17</sup> Hya xi camá cachja me ne, cavetju Jesús tsëhë Jerusalén quiji me nandya Betania cavejña me nguixun.

*Jesús ne, cachja xi quihndë cuaquiin tu rë ngu yaxujun xi cavangui me tú rë hya xi vojo rë me*

<sup>18</sup> Xi camanchujun jan ne, xi cavuya nga Jesús Jerusalén ne, cama vojo rë me. <sup>19</sup> Hya xi camá ne, tjehen ndiya ne, cavëë me ngu yaxujun xi chine tú rë, peru xi cavechu me ngajan ne, ndastu me tú yaja rë, ta suva xca ni yaja rë. Ngajan xi cachja Jesús tsëhë:

—Quihndë tsajin nixtin xi cuaquí tú riji.

Hane ngutjen ne, caxintsen ya jan. <sup>20</sup> Hya xi cavëë xuta ladu rë me xi cuatjin camá ne, cafaharcun me Jesús cachja me cuitjin:

—¿Hacutjin cumá xi jemu xati caxintsen yaxujun jan?

<sup>21</sup> Ngajan cafayangui Jesús tsëhë me cuitjin:

—Cuichjá quixë jain cojo nuju ta sá xi macjain nuju Nina hane hacuiin jo cjuatacun nuju ne, cumá nihñu sacuaaha casahme cojo yaxujun vi. Hacuaaha hisca sá xi cuinújun cojo ndetjún vihi ta: “Tihinxin tsëhë nguehe. Tihin tisihin ngajñi ndachacun.” Hane cuatjin cumá. <sup>22</sup> Yëjë ni xcusun ne, tu mé ni xi chjahyun cojo Nina hane sá xi macjain nuju xi sacú nuju ne, cuetjucaa quixi.

*Cavinenguise xuta cojo Jesús yo cavitexa rë me*

<sup>23</sup> Hane xi vicuya Jesús ngajan ndatsen yungun xi matitjun ne, camatangun nahmi xi matitjun cojo xuta changá, hane cuitjin cavinenguise me Jesús:

—¿Yo cavitexa nuju xi nihñu xa vi? ¿Yo casuaxa nuju?

<sup>24</sup> Hane xi cafayangui Jesús ne, cuitjin cachja me:

—Hacuaha cuinenguësë nuju ngu cjua, hane sá xi chjayungun tsahan ne, sehe cuichjá cojo nuju yo cavitexa ná xi sahme xcusun vihi. <sup>25</sup> ¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin cachja me.

Sehe ngajan xi xuta xi cuacun jan ne, cavisiajmicjín me ngajñi rë me, cachja me cuitjin:

—Sá xi cuinújan xi Nina cavitexa me cha Juan vë ne, cjuinenguise naja me: “Sá cuatjin ne, ¿mé má camacjaain nuju cha?” <sup>26</sup> Hane sá xi cuinújan xi xuta cavitexa rë cha ne, tsajin yo hvë mé sahmi xuta cojo naja ta, tsëhë xi yëjë ni xuta ne, ha macjain rë me xi cha vëhë ne, profeta cha.

<sup>27</sup> Hane xi cafayangui xuta jan tsëhë Jesús ne chja me ta:

—Hyiin.

Ngajan xi hacuaha Jesús ne, cachja me ta:

—Hacuaha cuichjaan cojo nuju yo cavitexa ná xi sahme xá vihi.

### *Ejemplu tsëhë jo cha quihndi*

<sup>28</sup> Peru ¿mé nújun tsëhë cuentu vi? Ngu xihin ne, jo má cha quihndi rë me. Hya xi camá ne, cafehe cachja me cojo ngu cha cuitjin: “Tsan, tihin nihñi xá ngajan hiscan camatjë xca rë uva.” <sup>29</sup> Peru cha quihndi jan ne, cafayangui cha cuitjin: “¡Jéya! ¡Mijí cjué!” Peru hya xi camá ne, cavindeya cjuatacun rë cha hane quiji cha xcun xá jan. <sup>30</sup> Sehe hacuanitjin cachja nahmi jan cojo quihndi xi má jo, hane cuitjin cafayangui cha jan cachja cha: “Tatá, ngahan ne, cjué.” Peru quijiin cha. <sup>31</sup> Hindë ne, ¿jarë cha xi casahmi chihin cha xcusun xi meje rë nahmi rë cha?

Ngajan cafayangui me ta:

—Cha xi tjun cachja.

Sehe cachja Jesús cojo me cuitjin:

—Cuichjá quixë cojo nuju ta xuta xi cojo cjuamaña faha tujúnsa cojo chjuun xi viteña na yojo ran hitsë sa tjun cuisehen me gobiernu xi sahmi Nina xi cuma nuju ngayun, <sup>32</sup> ta cafehe Juan cavicuya me ngayun hacutjin nihñu xcun Nina hane camacjaain nuju cjua rë me. Peru xuta xi faha tujúnsa cojo chjuun xi viteña yojo rë na, me vëhë camacjain rë me. Ngayun ne, handasa cahyun yëjë xcusun vëhë ne, canindeyuun cjuatacun nuju; camacjaain nuju.

### *Ejemplu tsëhë cha xi sahmixa xi jemu tsehen cha*

<sup>33</sup> 'Nuhyun sa ngu ejemplu xi cuitjin fi: Ngu nai rē ngu ranchun matsejen ne, catsitjē me xcun nangui rē me xca rē uva. Hacuaha casahmi me hnchua xondyojo tahndee rē xitjē jan, hane ngajan ni ne, cafanguiya me ngu ndyojotē hiscan cuaxē nandá rē uva jan. Hacuaha casahmi me ngu cahndē hiscan xi cavesun me ngu nachan ngahnga xi sesun xuta xi sahmi cuidadu xitjē rē me. Sehe casua me ngujo cha sahmixa xi cjuahacuenda cha. Sehe cjuaha tsē tsē me cojo cha. Hane hya xi camá ne, cavetju me quiji me ngu nangui xin. <sup>34</sup> Xi cavechú nixtin rē tútjē jan matsejen ne, sehe catsingatju me mosu rē me xi quiji cachja cha cojo cha xi fahacuenda xitjē jan xi sua cha hitsē tutjē xi satē rē me. <sup>35</sup> Peru cha xi sahmixa jan ne, cafaha cha mosu jan tu cavaja cha ngu mosu, catsiquehen cha ngu nga, hane cavetaha cha ndyojo xcun ngu nga. <sup>36</sup> Sehe catsingatju nga me mosu hacjahi xi hitsē sa cjin má cha tsēhē mosu xi tjun catsingatju me, peru cha xi sahmixa jan ne, ha chuva vēhē ni casahmi cha cojo yējē ni.

<sup>37</sup> 'Hya xi camá ne, hisca catsingatju me suva quihndi rē me ta catsingatahacacun me cuitjin: "Tuxa cjuaharcun rē cha, xi quihndi naha." <sup>38</sup> Peru xi cavēē cha xi hatuxa quihndi rē me xi nduva ne, cavisiajmicjín cha cojo xicjin cha cuitjin: "Cha vihi ne, quihndi xi cjuahatsja xitjē vi cha. Niquen cha, cojo sa xi tsajan cuma nangui vi." Cuatjin cavisiajmicjín cha. <sup>39</sup> Hya xi camá ne, cafaha cha cha quihndi jan quijicojo cha ndatsen cahndē jan, sehe catsiquehen cha cha.

<sup>40</sup> 'Hindē ne, xi má nuju ne, ¿mé sahmi nai rē xitjē jan cojo cha xi cuacun fahacuenda jan?

<sup>41</sup> Ngajan cafayangui me tsēhē Jesús cuitjin:

—Cjue tsiquehen me cha xi tsehen cjuatacun rē jan, sehe sua me xitjē jan cjuahacuenda jingu sa cha sahmixa, cha xi sua cha xitjē xi satē rē me hya xi cuechú nixtin rē. —Cuatjin cafayangui me.

<sup>42</sup> Sehe cachja Jesús cojo me cuitjin:

—¿Há chhutayuun xujun rē Nina xi chja cuitjin?:

Ndyojo xi catsitjungui chjinevexo ne, vēhē ndyojo xi cavéjña tjun tjun yuju rē xihndēnaña.

Cuatjin casahmi Nina xi cuma. Hane xi chutsejen ngayaan ne, jemu chjahanrcun xahasen naja.

<sup>43</sup> Vēhē xi cuichjá cojo nuju ta, chjahataha nuju cahndē xi cuisuhun gobiernu xi sahmi Nina, hane sua Nina xuta nanguxin cahndē jan, xuta xi sua me xi satē rē me. <sup>44</sup> Hane ndyojo jan ne, hya xi ngu xuta cjuinenguisun me xcun ndyojo vēhē matsejen ne, cuatēlanga rē me. Hane hya xi ndyojo vēhē cuinenguisun rē ngu xuta matsejen ne, ña cumá tē me.

<sup>45</sup> Hane xi cahndë nahmi xi matitjun cojo cha partidu fariseo ejemplu xi cachja Jesús tsëhë xuta vë ne, camachaya rë me xi condra rë me tichja Jesús. <sup>46</sup> Vëhë xi cavangui me chuva rë hacutjin cuma xi cjuaha me Jesús peru camaji ta tsacjun me xuta, ta xi má rë xuta ne, ngu profeta má Jesús.

## 22

### *Ejemplu tsëhë ngu suhi cjuavixan*

<sup>1</sup> Sehe quiijinduju sa cachja Jesús ejemplu cojo rë me cuitjin:

<sup>2</sup> —Nina ne sahmi me cojo xuta xi cuisehen me gobiernu xi sahmi me sacuaaha casahmi ngu xihin xi matitjun tsëhë ngu nangui hya xi casahmi me suhi xi cuixan quihndi rë me. <sup>3</sup> Hya xi casune hora rë, catsingatju me mosu hndixahan rë me quiiji cha ndava xuta xi ha casua me camachaya rë xi nduva me cjuavixan, peru canduvaain me suhi. <sup>4</sup> Sehe catsingatju me hndixahan xi hacjahi ne, cuitjin cavitexa me: “Tinoje cojo xuta xi nduva cuitjin: Chutsujun ni tai, ha tjin chihin comida, ha cahme chu xi tetjo ná tsëhë suhi vi, hane cachjan yojo. Tjin chihin yëjë ni: nduvun ne, xinëësuhi.” <sup>5</sup> Peru casahmi cuendaain me cjua jan, hane quijixin me cafachacuenda me cjuacjintacun rë me. Ngu me quiiji me xcun xitjë rë me, ngu nga me hiscan sahmi me negocio. <sup>6</sup> Hane yahnga nga me ne, cafaha me mosu hndixahan jan, choho casahmi me cojo cha hisca catsiquehen me cha. <sup>7</sup> Hya xi camá ne, me xi matitjun jan ne, cama cjan rë me. Catsingatju me sindadu rë me. Catsiquehen sindadu cha tsiquehen jan hane cavaca me nandya rë cha. <sup>8</sup> Hya xi camá ne, cachja nga me cojo hndixahan rë me cuitjin: “Ha tjin ndaja xcusun rë cjuavixan. Peru xuta xi cuinduva ne, hacuiin ndaja cjuatacun rë me ndajintjin xi nduva me. <sup>9</sup> Vëhë xi tihin hisca cruci ndiyatë ne, hane tu hacutjin cjin má xuta xi sacu ri, noje cojo yëjë ni me xi catinduva me catjinesuhi me.” <sup>10</sup> Ngajan xi quiiji hndixahan jan hiscan ndiyatë rë nandya ne, hane yëjë ni xuta xi cavechutaha cha, sá xuta tsehen, o sá xuta ndaja ne, casahmi cha xi camatangun me quiiji me suhi. Hane ña catsëxtin xuta ndava suhi.

<sup>11</sup> Hya xi tijima suhi ne, xi cavisehen me xi matitjun jan xi scutsejen me xuta xi cafehe me, cavutsejen me ngu cha xi yuma jyihi cojo tsjian rë. <sup>12</sup> Ngajan xi cachja me cojo cha cuitjin: “Tai, ¿hacutjin cama xi cavisuhun nguehe handasa jemu yuma jyihi tsjian nuju?” Peru cavejñajyuu cha vë cachjaain cha. <sup>13</sup> Sehe cachja me xi matitjun jan cojo hndixahan rë me cuitjin: “Tetuhunhñu tsja cha cojo ntsacu cha sehe naxun cha ndatsen hiscan jñu. Ngajan hiscan hinchaxuta xi tijihnda

me, hacuaha titsijanerii me nehñu me.”<sup>14</sup> Cjín má me xi cachjinda rë xi nduva me, peru chuva má me xi tuxijijñi rë.

*Cjuacjintacun tsëhë tujúnsa*

<sup>15</sup> Hya xi camá ne, cha partidu fariseo ne, cavisiajmichihin cha casacuse rë cha ngu cjuacjintacun xi tsavi fi xi cjuayangui Jesús tsëhë. <sup>16</sup> Hya xi camá ne, catsingatju cha ngujo cha ladu jan, cojo cha ladu rë Herodes ne, cachja cha cojo Jesús cuitjin:

—Maestro, ngayin ne, hyin ta ngayun ne xuta ndaja ngayun. Vicuyun ndiya rë Nina cojo cjuaquixi. Ha tuxa cjuaquixindaja xi nújun, ha ndasa cojo xuta nchina visiajmu o sá cojo xuta yuma. <sup>17</sup> Xi má nuju ne, mé xi ndaja cuinújan. Sacuaha ley rë Moisés ne, ¿há tsingatihi xi cuechjen tujúnsa naja cojo César, me xi matitjun, o há tsingatiin?

<sup>18</sup> Peru Jesús ne, tsëhë xi ha vacun rë me xi jemu choho xcusun rë cha ne, cachja me cojo cha cuitjin:

—¿Mé má cuatjin meje chjuhunchuvun ná? Xuta ndacha ngayun. <sup>19</sup> Ningacun ná ngu tujún jan scutsejen.

Hane canduvacojo cha ngu tujún tyava.

<sup>20</sup> Sehe cavinenguisse me cha cuitjin:

—¿Yo xcusun rë hacuaha yo ñihi rë xi quitaha xcun tujún vë? —Cuatjin cavinenguisse Jesús.

<sup>21</sup> Hane cha xi cuacun vë ne, cuitjin cafayangui cha:

—Tsëhë César.

Sehen ngajan xi Jesús ne, cuitjin cachja me cojo cha:

—Cuatjin ne, tuhun rë César xi tsëhë me, hane tuhun rë Nina xi tsëhë me.

<sup>22</sup> Hya xi cahndë cha cjua xi cachja Jesús ne, quijircun rë cha, sehe cavetju cha quiji cha tsëhë cahndë xi tacun me.

*Cjuachjinenguisse tsëhë xi cuya nima cjuahñu*

<sup>23</sup> Sehe nixtin hya ne, cafehe tjengui Jesús cha partidu saduceo, cha xi vicuya cjuachacun xi chja xi xuta xi cahme ne, cuyaainga me cjuahñu. Sehe cavinenguisse cha Jesús cuitjin:

<sup>24</sup> —Maestro, Moisés ne cachja me ta: “Sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuaha quihndi rë nima vëhë.” <sup>25</sup> Quihndë ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane tsëhë xi tsajin quihndi rë cha, hntsë nima vë ne, cafaha cha chjuun jan. <sup>26</sup> Hane cuanitjin cavatju cha xi majo cojo cha xi majyan hisca chuva ngu chuva ngu cha hisca cojo cha xi má yatu.

<sup>27</sup> Hane xi cajnetaha ne, sehe cahme chjuun jan. <sup>28</sup> Quihndë ne, hya xi cuya yëjë nima cjuahñu ne, ¿jarë cha xi cuacún vë xi chjuun rë cha na xi cjuaquixi ta, tsëhë xi yëjë ni xi yatu cha ne, camá chjuun rë cha na? —Cuatjin cachja cha.



29 Ngajan xi cachja Jesús cojo cha ta:

—Ngayun ne, cuaaintjin xi nújun, tséhë xi vijinii rcun cjua xi chja xujun tséhë Nina, hacuaha hyuun xi Nina ne, jemu hñu cjuatacun rë me. <sup>30</sup> Ta hya ne, cumaji cjuavixan hacuaha tsinguixaain xicjin me hya ta, sacuaha ángel xi siu ngahnga ne, cuatjin cuiyuju me. <sup>31</sup> Quihndë xi tinújun tséhë nima xi cuya cjuahñu ne, cuinenguësë nuju ne, ¿há cjëë chutayun cjua xi cachja Nina cojo nuju xcun xujun rë me tséhë nima xutachanga nuju xi cuicun vi? <sup>32</sup> “Ngahan xi Nina rë Abraham ngahan, Nina rë Isaac hacuaha cojo Nina rë Jacob.” Cuatjin cachja Nina. Peru ndaja hyun ta Nina ne, hacuiin Nina rë nima ta Nina rë xuta xi quicun me.

<sup>33</sup> Hya xi cahndë xutacjín cjua jan, jercu tu quijircun rë me cjua xi catsicuya Jesús.

*Cjuachjinenguise tséhë jarë artículo tséhë ley xi hitsë sa matitjun*

<sup>34</sup> Peru cha partidu fariseo xi camachaya rë cha xi catsinguejyu Jesús cjua rë cha partidu saduceo ne, camatangun cha cojo xicjin cha, <sup>35</sup> hane sehe cavitexa cha ngu maestru rë ley xi cavinenguise cha me cjua vi cojo sa xi cuma cjuahachuva cha me. Cuitjin cachja maestru jan:

<sup>36</sup> —Maestro, tséhë yëjë ni cjua xi cavitexa Nina naja xcun xujun ley ne, ¿jarë artículo xi hitsë sa matitjun?

<sup>37</sup> Ngajan xi cafayangui Jesús cuitjin:

—“Meje rë xi nihmutacún Nina naja cojo nguñajatacún, cojo yëjë ni xahasen nuju, cojo yëjë ni ngahñu nuju, cojo yëjë ni cjuatacun nuju.” <sup>38</sup> Cjua vë xi hitsë sa venguichji rë ne, hitsë sa matitjun xi cumá rë yëjë ni cjua rë ley. <sup>39</sup> Hane xi má jo ni: “Meje rë xi nihmutacún xingun sacuatjin hmutacún suvun yojo nuju.” <sup>40</sup> Tséhë jo artículo vi ne vetjun sa yëjë cjua rë ley xi catsihindu Moisés cojo yëjë cjua xi catsihindu profeta. —Cuatjin cachja Jesús cojo cha.

*¿Yo tjë rë má me xi catsingatju Nina?*

<sup>41</sup> Hya xi ha camá tangun cha partidu fariseo ne, sehe cavinenguise Jesús cha cuitjin:

<sup>42</sup> —¿Mé nújun? Mesías o sa Cristu ne, ¿yo tjë rë má me?

Cafayangui me ta:

—Tjë rë David má me.

<sup>43</sup> Sehe cachja Jesús cuitjin:

—Sá xi quixi xi cuatjin ne, ¿hacutjin cavátju xi suva David ne, hya xi catsihindu me cjua xi cachja Hasen tséhë Nina cojo rë me, “Nai” cachja me tséhë Mesias? ta cuitjin catsihindu me:

<sup>44</sup> Nina ne, cachja me cojo Nai naha cuitjin:

“Tinechin guehe ladu quixi naha,

hisca hya xi yějě ni xi sahmi ri condra ne, cuiyúju ngahan ngahma gobiernu riji.”

<sup>45</sup> Quihndě ne, sá xi suvá David chja me xi Nai rě me má me xi tsingatju Nina ne, ¿hacutjin má ne xi hacuaha tjě rě me má me vėhě?

<sup>46</sup> Ngajan camá xi ndastu mé cafayangui cha, hacuaha hisca hya ne, tsacjun cha cjuinenguise sa cha me.

## 23

*Cachjajyě Jesucristu cojo xutacjín tsėhě cha xi vicuya cjuachacun*

<sup>1</sup> Hya xi camá ne, cachja Jesús cojo xutacjín hacuaha cojo xuta ladu rě me cuitjin:

<sup>2</sup> —Cha xi vicuya cjuachacun cojo cha partidu fariseo ne, casatě rě cha xá rě ley xi casatě rě Moisés hatsě. <sup>3</sup> Vėhě xi meje rě xi nuhyun cjua rě cha hacuaha nihñuchuhun yějě ni xi vicuya cha; peru nihñuu sacuaha sahmi cha ta, ndaja chja cha jan peru hacjahi sahmi cha. <sup>4</sup> Cjua xi vicuya cha jemu chja sahmi chihin xuta ta tangun sacuaha ngu chaha xi hai vaniji tyja rě me, peru suva ni cha ne, visecuaain cha me hisca hitsě. <sup>5</sup> Yějě ni xi sahmi cha ne, sahmi cha ngatsě rě xi scuěě xuta cha, sahmi nga xuta cha. Vatjutaha cha chuva rě xujun xi chja ley xi setaha xten xuta, cojo tsjahya xi tsingaqui cha ntsacu tsjian rě cha. <sup>6</sup> Hacuaha jemu chuya rě cha hya xi satě rě cha cahndě xi matitjun tsėhě ngu ndava suhi o tsėhě yungun. <sup>7</sup> Hacuaha hora xi fi tsujyihya cha, jemu chuya rě cha xi cuatjin fi xuta chja me nina cojo cha ngajan ngajñi ndetsin, maestro chja xuta tsėhě cha.

<sup>8</sup> Peru ngayun ne, xi cuichjaain xuta tsujun Maestro ta ngu ni me xi Maestru nuju, hane ngajñi nuju ngayun ne, xingun má yun. <sup>9</sup> Hacuaha xuta ngasunhdě ne, canujuun tsėhě me xi Nahmi ta ngu ni me xi tacun me ngahnga ne, hacui Nahmi nuju. <sup>10</sup> Cuanitjin ne, xi cuichjaain xuta tsujun Nai ta ngu ni me xi Nai nuju, me vėhě ne, Cristu. <sup>11</sup> Hane ngu ngayun xi meje cumatitjun ngayun ne, sahmi me sacuaha ngu mosu rě xicjin. <sup>12</sup> Tsėhě xi yějě xuta xi sahmi yehe suvá me yojo rě me ne, cuechu nixtin xi Nina ne, tsinguijne me cjuatacun rě. Hane xuta xi tsinguijne suvá me cjuatacun rě me, hya ne, Nina ne, sahmi yehe rě me.

<sup>13</sup> Jemu chojyihy tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun!, ta vechjun tingotjo hisca visehen gobiernu xi sahmi Nina cojo sa xi cumaji cuisehen xuta. Tivisuun suvun, hacuaha tituun cahndě xi cuisehen xuta xi meje cuisehen me.

14 'Jemu chojyihî tsujun, ngayun cha xi vicuya cjuachacun cojo ngayun cha partidu fariseo. Jemu cjin tujun naxun yachjin cahan xi hisca ndava na tsajin. Hane hya xi nujunyumun ne jemu nduju hora nihnu, peru hacuicin nguñaja tacun nujun ta, vindachun ni. Vêhê xi hitsê sa jyê cuma castigu xi cumá nuju.

15 'Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! ta cuangun jingujyê ni ngasunhdê xi sacu ngu ni me xi cuisehen ladu nuju. Peru hya xi cavicuyun rê me, hitsê sa jyê castigu satê rê me xi cuma nuju.

16 'Jemu chojyihî tsujun, ¡xuta rcá yun xi meje ningacun ndiya! Nújun ta: "Sá xi tuhun cjua nuju hane cuinujun ta: Quixi, vêê yungun xi matitjun ne, sahmiî nguujyê xi nihnu chihin cjua nuju, peru sá xi tuhun cjua nuju cojo oro xi jiya yungun xi matitjun ne, vêhê sahmiî nguujyê xi tuhun xi canujun."

17 '¡Ngarca ni ngayun! ¡Rcá yun! ¿Jarê xi meje rê xi chjaanrcun? ¿Há oro jan? o sá tsajin ne, ¿há yungun xi matitjun? ta, ngatsê rê yungun ne, vêhê xi camanchacun oro xi hinchacahntsua. 18 Hacuaha nujun ta: "Sá xi tuhun cjua nuju hane cuinujun xi ngasuncun yungun cuma testigu ne, sahmiî nguujyê xi nihnu chihin cjua nuju, peru sá xi nujun ta cuatjoxcun ngasuncun jan cuma testigu ne, sehe sahmiî nguujyê xi tuhun xi canujun." 19 ¡Rcá yun! ¿Jarê xi meje rê xi chjaanrcun? ¿Há cuatjo jan? o sá tsajin ne, ¿há ngasuncun ta, tsêhê xi xcun vêhê ngajan camachacun cuatjo? 20 Vêhê xi yo xi cuisiajmi hane cuichja me xi vêê ngasuncun ne, hacuaha tichja me xi vêê yêjê xi hinchasun xcun; 21 hacuaha yo xi cuisiajmi hane cuichja me xi vêê yungun xi matitjun ne, hacuaha tichja me xi vêê Nina xi tacun me ngajan. 22 Hane yo xi cuisiajmi hane cuichja me xi vêê ngahnga ne, hacuaha tichja me xi vêê cahndê hiscan sahmiî Nina gobiernu hane hacuaha xi vêê Nina xi sahmi me.

23 'Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! Ngayun ne, handasa tuhun diezmu nuju hisca cojo nchurca cojo ruda cojo yêjê sa xcusun ndeya ne, peru nihñucuenduun xi nihñuchihin artículo rê ley xi hitsê sa meje rê Nina xi nihñuchuhun sacuaha xi chja cuitjin: nihnu hacutjin xi cjuaquixi cojo xingun, sacuaha xi mayuma nuju xingun, hane sacuaha xi ngu ni má cjua nuju; hitsê sa ndaja sa canihnu yêjê xcusun vihi, hane canihñucuendun tsêhê xcusun xi canihnu. 24 ¡Ngayun ne xuta rcá yun xi meje ningacun ndiya! Nihnu sacuaha sahmiî ngu xuta xi tsicaha me vinu rê me, sehe

cuetjuxin ngu chu xihí xí jiya ngajñi rë. Peru cuma tsinguijne jingu me ngu chu camellu.

<sup>25</sup> 'Jemu chojyihí tsujun, ngayun cha xí vicuya cjuachacun cojo ngayun cha partidu fariseo. ¡Jo xcun jo ntsuvun yun! Nihñu tyjahi táha ngaxtun ngu vasu cojo ngu tyuva, peru cahntsua ne, quitsë camahani rë cjuachëjë cojo cjuatacun xí nimuju yëjë ní xcusun. <sup>26</sup> Fariseo rcá, titjun nihñu tyjahi cahntsua vasu cojo tyuva jan ta tsëhë xí cuatjin ne, hacuaha cuma tyjahi táha ngaxtun.

<sup>27</sup> 'Jemu chojyihí tsujun, ngayun cha xí vicuya cjuachacun cojo ngayun cha partidu fariseo. ¡Jemu ndacha yun! Ngayun ne, tangun cun cojo ngu tsjun xí cahví rë xujñu, ta ndaja tsejen tsjun jan, peru cahntsua ne, quitsë rë cojo ninda rë nima cojo yëjë ní xí jehndu. <sup>28</sup> Cuanitjin cun ngayun ta xí vutsejen xuta yun, tsejen sacuaha xuta ndaja tyjahi yun, peru cahntsua xahasen nuju ne, quitsë rë cojo cjuandacha cojo cjuatsehen.

<sup>29</sup> 'Jemu chojyihí tsujun, ngayun cha xí vicuya cjuachacun cojo ngayun cha partidu fariseo. Ngayun ne, nindujun tsjun ndacun tsëhë yëjë ní nima profeta, hacuaha nihñu ndacun tsjun tsëhë nima xí tsajin xí cun rë me xcun Nina. <sup>30</sup> Hacuaha ngayun nújun ta: "Sá xí ngayin cavinechin nixtin hatsëë xí quicun xutachanga níji ne, cavisecuin rë me xí tsiquehen me profeta xí cuacun vë ta cumacjain níji." <sup>31</sup> Quihndë ne, cahyun ta cojo cjuá nuju vë, tuhun testigu condra nuju ta tsëhë xí ngayun ne hatuxa quihndi rë xutachanga nuju ngayun, hane me vëhë ne xí catsiquehen me profeta jan. <sup>32</sup> Quihndë ngayun ne, ¡tangun cuéchun chuva rë cjuatsehen xí casahmi xutachanga nuju!

<sup>33</sup> 'Sacuaha cun yë chacun cuatjin cun ngayun, ¡quihndi rë yë yun! ¿Hacutjin cumá cuetjuntjun tsëhë castigu xí má hasen rë nima? <sup>34</sup> Vëhë xí tsingátju sa nuju profeta cojo xuta xí quicun cjuatacun rë me cojo maestru ne, hane ngujo me ne, ngayun ne nicuhun me hacuaha cuetuhun me xcun cru. Ngujo nga me cujun rë me ngayun ngajan ndatsen yungun hacuaha tuhun rë me cjuañihí xí cuatju me sehe cuanga me ngu nandya ngu nandya. <sup>35</sup> Cojo chuva vëhë ne, chanujujyun cjuaveya rë yëjë ní xuta xí tyjahi cjuatacun rë me xí cahme nguehe ngasunhdë. Chanujujyun cjuaveya rë xutachanga naja Abel cojo hisca cjuaveya rë xutachanga naja Zacarías quihndi rë Berequías, me xí canicuhun tiña ngasunscun hiscan ndatsen rë ndava Nina. <sup>36</sup> Cuichjá quixë cojo nuju ta tsëhë cjuaveya rë yëjë ní me vë chanujujyun ngayujun ní xí nechun quihndë.

*Jemu choho camá rë Jesucristu ngatsë rë xuta Jerusalén*

<sup>37</sup> ¡Ngayun xuta Jerusalén, ngayun xi cojo ndyojo nicuhun profeta xi tsingatju Nina ngajñi nuju! ¡Jemu choho má ná tsujun! ¡Mé hitsë ndiya xi meje scávëvaha nuju sacuaha javëvaha ngu nisë quihndi rë chu xi cuincha chu ngahma tyjunga rë chu! Peru ngayun ne, mijí nuju. <sup>38</sup> Chutsujun ni, Nina ne, catsismicacun me ngayun. <sup>39</sup> Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi titsingatju me ngajñi naja!” —Cuatjin cachja Jesús.

## 24

### *Cachja Jesús xi cuetsun yungun*

<sup>1</sup> Hora xi tivetju Jesús tsëhë ndatsen yungun xi matitjun jan xi cjui xin me ne, ngajan cafehe xuta ladu rë me caveyanangui me hane catsingacun tsja me xi yungun jan ne, jemu ndajyihi. <sup>2</sup> Hya xi camá ne, cuitjin cachja Jesús tsëhë yungun jan:

—Sacuaha yëjë ni ndihya vihi xi chutsujun tsëhë yungun ne, cuichjá cojo nuju ta cuechú nixtin xi hisca ngu ndyojo ndacun xi cuicun vi ne, tsajin xinchasuncoo xicjin ta cjuë yëjë cuixujne. —Cuitjin cachja Jesús.

### *Hacutjin sacú cumachaya naja xi ha meje cuijnetaha nixtin vihi*

<sup>3</sup> Xi cafë cachja Jesús cuitjin ne, sehe cafehe me tiña rcu Ndetjún Olivu. Hane xi tacun suvá me, ngajan cafehe xuta ladu rë me, cavinenguise rë me cuitjin:

—¿Mé nújun? ¿Janihya cuetjucaa xcusun vëhë ni? ¿Hane hacutjin cuma sacú niji cjuaquixi xi ha tivechú nixtin xi nduvun ngayun tivechú hora xi cjuë nixtin rë ngasunhndë vi?

<sup>4</sup> Ngajan xi cachja Jesús cojo rë me cuitjin:

—Nechun cuidadu, cojo sa xi hacuiin cuma ndacha ngayun ta, <sup>5</sup> tsëhë xi jemu cjín xuta cuetjucaa me xi cuichja me xi hacui me xi catsingatju Nina me. “Ngahan Cristu”, cuichja me. Hane cuatjin jemu cjín xuta cumacjain rë me cjuandacha rë me xi cuacun vë. <sup>6</sup> Hacuaha hya xi cumachaya nuju cjua xi jemu yehe si tijima ngu nación o sá xi tjin cjuacjintacun xi jemu yehe si nduva ne, xicarcuun ta, hatuxa tjin xi titjun xcusun vëhë cuma. Peru hacuiin ha hya cuijnetaha nixtin vihi. <sup>7</sup> Hacuiin hya cuma ta, titjun ne, scaan xuta ngu nación cojo jingu sa nación. Hacuaha scaan xuta ngu nandya cojo ngu nga nandya. Hacuaha jemu cjín cahndë xi cuma cuechu jindya. Jemu cjín cahndë xi cjuani nangui. <sup>8</sup> Peru xi cuatjin cumá yëjë ni xcusun vihi ne, sehe ntsacu tivetsihin cjuañihi xi cuatju xuta.

<sup>9</sup> 'Sehe cjuaha nuju xuta, cjucojo nuju me xi cuatjun cjuañihi, xi tsiquehen me ngayun. Hacuaha jemu chohovëe xuta rë yëjë nangui yun ngatsë naha. <sup>10</sup> Hya xi cumá ne, cjín xuta tsismicacun me ladu naha, hane tsindeya me cjuatacun rë me. Sehe cojo cjuá ni cuiteña xicjin me. <sup>11</sup> Hacuaha jemu cjín profeta xi vindacha me xuta cuetjucaa me. Hane cuatjin jemu cjín xuta cumacjain rë me cjuandacha rë me. <sup>12</sup> Hacuaha cjuatsehen ne, jemu cumayehetaha. Vëhë xi hya ne, cumachuva cjuahmutacun xi tjin rë xuta. <sup>13</sup> Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. <sup>14</sup> Hane xuta ne, cjue me jingujyë ni ngasunhdë cuichja me cjuandajyihi vihi tsëhë gobiernu xi sahmi Nina, xi cumachaya rë xuta ngasunhdë. Hane hisca xi cuma chihin yëjë xcusun vëhë cuijnetaha nixtin vihi.

<sup>15</sup> 'Profeta Daniel ne, catsihindu me xcun xujun rë Nina tsëhë ngu xcusun tsehen xi tsinguetsun. Cuechún nixtin xi cuejña vëhë xu cahndë ximinchacun —xuta xi vutaya cjuá vi, catjahacuenda me cjuá—. Hya xi cuatjin tsejen ne, <sup>16</sup> hya ne, xuta xi siu yëjë nandya tsëhë distritu Judea ne, catanga me hane catangahma me hiscan ndetjún. <sup>17</sup> Hacuaha jarë me xi hinchasun me rcu ndava me ne, mé tsëhë me xi siu cahntsua ndihya ne, mijí rë xi cjuejaha me. <sup>18</sup> Hacuaha ha chuva vëhë ni ne, xuta xi siutaha me nguijña ne, mijí rë xi cuya cjuejaha me tsjanga rë me ndava me. <sup>19</sup> Jemu chojyihi tsëhë yëjë yachjin xi hinchahma quihndi rë cojo yëjë me xi tjin rë quihndi vaqui xi cojo me cuanga me nixtin hya! <sup>20</sup> Chjahyun rë Nina xi cjuañihi vëhë ne, hacuiin cuinduva nixtin chan hnchan o sá nixtin xi chjahájenda rë ta, <sup>21</sup> tsëhë xi cjuañihi jyë xi cuma ne, ngu cjuandya jyë xi cjëë camahani camá hisca ntsacu cavetsihin ngasunhdë. Hacuaha cuyaa in cuma nga. <sup>22</sup> Jemu jyë cjuañihi jan, sá tsajin xi ha camachuva nixtin rë cjuañihi vëhë ne, hisca ngu xuta ne, cuetjintjiin me. Peru ngatsë rë cjuahmutacun xi tjin rë Nina cojo xuta xi cavaxijin me xi cuma ladu rë me ne, casahmichuva me nixtin vëhë.

<sup>23</sup> 'Hya ne, sá xi cuichja yahnga me cojo nuju ta: "Cuajyihi Cristu nguehe", o sá "Cuajyihi me ngajan." Xi camacjaain nuju cjuá jan ta, <sup>24</sup> tsëhë xi nixtin hya ne, jemu cjín xuta cuetjucaa me xi cuichja me cuindacha me ta Cristu me o sá profeta me. Hacuaha jemu sahmi me cjuarcun tsëhë xi meje cuindacha me xuta, hisca cojo xuta xi cavaxijin Nina. <sup>25</sup> Quihndë ne cojo chaja sa xi cuechu nixtin vëhë ne, ngahan ne, ha cachjá cojo nuju. <sup>26</sup> Vëhë xi sá xi cuichja yahnga me cojo nuju ta: "Jemu xín tsëhë nandya tacun me", hacuiin cuangun cojo me. O sá xi cuichja me ta: "Ndihya cahnchun tacun me", camacjain nuju tsëhë me ta, <sup>27</sup> sacuaaha sahmi

hasen ndihichuhún xi ha tu ñahñu sahmi hasen rë jinguyjē ni ngahnga, hiscan ladu vetjucaa tsuhi hiscan ladu vetje tsuhi ne, cuatjin ha tu ñahñu scutsejen ná yējē ni xuta hya xi cuinduvá nga ngahan xi Quihndi rë Xuta Jain. <sup>28</sup> Cuatjin cuma nixtin hya sacuaha chja cjua ta hiscan jiña chu xi cahme ne, hacuaha ngajan matangun chu lote.

*Hya xi cuya nduva Quihndi rë Xuta Jain*

<sup>29</sup> Ngutjen xi camá cavatju cjuañihi jan ne, cuinduva nixtin xi cjuē ndavá rë tsuhi. Hacuaha sá ne, ha quihndē suaain ndavá rë. Hane niñú ne, cuixu tsēhē ngahnga. Hisca ngahñu xi tjin ngahnga ne, cjuiniyaya. <sup>30</sup> Hya xi camá ne, ngajan cuma tsejen seña tsēhē Quihndi rë Xuta Jain. Hane yējē xuta xi siu ngasunhdē ne, jindayava me. Sehe hya scuēē xuta ngahan, xi Quihndi rë Xuta Jain ngahan, xi cuinduvá ngajñi rë yufí cojo jemu jyē ngahñu, hisca seti hisca vatē jyihi ngahan xi cuinduva. <sup>31</sup> Hya ne, tsingátju ángel naha, hane xi ndaja hñu cuinuhya rë xi fane ngu tyjo, sehe cjuejaha rë yējē ni xuta naha xi cavaxejen, sahmitangun rë me tsēhē jinguyjē ni ladu ngasunhdē.

<sup>32</sup> Quihndē ne, ningatuhuntacún tsēhē ejemplu xi sua yaxujún: Hya xi cuetsihin cumá xcuen tsja rë tsēhē xi ha jemu camatiña cuetsihin cuetjusehen ne, ngayun ne, ha hyun ta ha jemu camatiña chan tsin. <sup>33</sup> Hacuaha chuva vēhē ni ne, hya xi chun xi cuetsihin cumá yējē xcusun xi cachjá cojo nuju vē ne, vēhē sua cumachaya nuju xi ha camatiña nixtin rë, hisca meje cumá. <sup>34</sup> Cuichjá cjuaquixi cojo nuju ta xuta xi siu nixtin vihi ne siu cuaha me hya xi cuetjucaa xcusun xi cachjá cojo nuju jan. <sup>35</sup> Ngahnga cojo nguehe ngasunhdē ne, hatuxa cjuē. Peru hisca ngu cjua naha ne, tsajin xi cuetjincaain.

<sup>36</sup> Sacuaha nixtin xi cuetjucaa cjuatacun vēhē ne, tsajin yo vēē rë. Hisca víin ángel xi siu ngahnga. Hisca hveen ngahan xi Quihndi rë Xuta Jain. Suva tutu ni Nina nahmi naja ne, me vēhē xi vēē me.

<sup>37</sup> Sacuaha casahmi xuta hya xi cavéjña xutachanga naja Noé ne, hacuanitjin ni sahmi xuta hya xi cuinduva Quihndi rë Xuta Jain. <sup>38</sup> Tsēhē xi hya ne, xi chaja sa casesuntē nandan ngasunhdē ne, jine tjihvi xuta, vixan me, tsinguixan me quihndi rë me. Cuatjin casahmi cuaha me hisca nixtin xi cavisehen Noé cahntsua barcu. <sup>39</sup> Hacuaha camachayiin rë me hisca xi casesuntē nandá quijicojo rë yējē ni me jan. Hacuaha cuanitjin ni sahmi xuta hya xi cuinduvá ngahan xi Quihndi rë Xuta Jain ngahan. <sup>40</sup> Jo cha ne, cuiyujutaha cha nguijña. Ngu cha ne, chjaháxin rë cha, hane cha xingu jan ne, cuejña cha. <sup>41</sup> Hacuaha jo nga yachjin ne, cuiyujutaha na coho

na. Ngu na ne, chjaháxin rē na, hane na xingu jan ne, cuejña na.

<sup>42</sup> Vēhē xi nechun cuidadu. Hacuaha ningascun rē cjuatacun nuju ta ngayun ne, hyúun janihya cjuehe Nai nuju. <sup>43</sup> Hacuaha meje rē xi cumachaya nuju cjuatacun vihi: sá xi nai rē ngu ndihya ha machaya rē me hora xi cuinduva cha chējē ndava me ne, suaain me cahndē xi scuxaha cha ndava me ne, sehe tsichējē cha. <sup>44</sup> Hacuanitjin ni meje rē xi ngayujun ni ngayun ne, tuhun chjinu yojo nuju ta, tsēhē xi hora xi ningatuuntacún xi cjuēhē ngahan xi Quihndi rē Xuta jain ngahan ne, hora vēhē cjuēhē.

### *Xuta xi vihndē cojo xi vihndiin tsēhē Nina*

<sup>45</sup> ¿Yo ngayun xi nihñu sacuaha sahmi ngu mosu hndixahan xi jemu quicun cacun xi sahmichihin yējē ni hacutjin xi meje rē nai rē? Ngu hndixahan xi cjuahaxa xi cjuahacuenda rē yējē sa hndixahan xi hora tjin sua xi sinē. <sup>46</sup> Jemu ndaja tsēhē ngu hndixahan jan xi tisahmi tutjin xi casuaxa rē nai rē. <sup>47</sup> Cuichjá cojo nuju cjuaquixi ta, nai rē hndixahan vēhē ne, suaxa me hndixahan vēhē xi hacuaha cjuahacuenda yējē sa xcusun xi tjin rē me. <sup>48</sup> Peru cuejña ne xi hndixahan vēhē ne, jemu choho xcusun rē me, tsingataha cacun cojo cjuatacun rē cuitjin: “Nai naha ne, tijima tafi sa xi cjuehe me.” Cuatjin tsingataha cacun. <sup>49</sup> Sehe cuetsihin cuaja rē hndixahan xi yahnga jan, hacuaha cuatjutaha sinē cuihi hisca cuma chihi. <sup>50</sup> Peru cuechú ngu nixtin xi tsajin tacunya hndixahan vēhē, ngu hora xi hisca hvíin ne, hya cjuehe nai rē. <sup>51</sup> Hane jemu jyē castigu sahmi me, sehe tsingatju me cuatju tangun cjuañihi cojo xuta xi jo xcun jo hntsua me. Ngajan ne, jemu squihnda me, hacuaha tsijanerii me nehñu me.

## 25

### *Ejemplu tsēhē tē na nixti xi quiji na cjuavixan*

<sup>1</sup> Hya xi cuechú nixtin xi sahmi Nina gobiernu ne, cumá sacuaha cavatju tē na nixti xi cafaha na ndihi tsēhē aceite, sehe quiji na xi cuejñaya na cha xi cuixan hora xi nduva cha. <sup>2</sup> Hya xi camá ne, hñu na jan ne, rcu taja na, hacuiin ndaja tsingatahacacun na. Peru hñu nga na jan ne, ndaja quicun na. <sup>3</sup> Cavejña xi na rcu taja ne, hora xi cafaha na ndihi ne, cafaain na aceite xi cuya cuincha na tsēhē. <sup>4</sup> Peru sacuaha na quicun jan ne, cafaha na ndihi ne, hacuaha xin cafaha na aceite. <sup>5</sup> Hane xi ma tafi xi nduva cha xi cuixan jan ne, cafaha rē na nijña ne, caviyujufē na. <sup>6</sup> Hya xi camá ne, sacuaha vasen nixten ne, canuhya rē xi jindaya xuta ta: “¡Nduva cha xi cuixan! Tangun tjengun cha xi cuanguncujun.” <sup>7</sup> Xi cuatjin canuhya rē ne, cavisatjenhnga na nixti jan ne, cavēhēchjine



na ndihi jan. <sup>8</sup> Hya xi camá ne, cachja na xi taja rcu cojo na quicun cuitjin: “Tuhun niji hitsë aceite nuju ta meje cjuë xi tsijin ne, coho ndihi niji.” <sup>9</sup> Peru cafayangui na quicun cuitjin: “Cumaji tihin nuju ta sá cuatjin ne, cuechutaain tsëhë xi cuma meje nuju hacuaha tsëhë xi cuma meje niji. Hitsë sa ndaja ne, tangun hiscan xi xteña ne, hiscan ngajan chuhun.” <sup>10</sup> Cuatjin camá xi hora xi quiji cavatsë na jan aceite ne, cafehe cha xi cuixan. Hane na xi siuya ne, cojo na cavisehen na ndava suhi. Sehe casechjahñu tingotjo ndihya. <sup>11</sup> Hya xi camá ne, cafehe na nixti xi quiji jan, hane cajindaya na tingotjo ndihya cuitjin: “Tatá, chuxuhun tingotjo tsijin.” <sup>12</sup> Peru me vëhë jan ne, cafayangui me cuitjin: “Hveen jani nduvun ngayun.”

<sup>13</sup> Vëhë xi nechun cuidadu, hacuaha ningascun rë cjuatacun nuju ta ngayun ne, hyúun mé hora, hyúun mé nixtin xi cumá.

### *Ejemplu tsëhë tujún xi casua nai rë hndixahan*

<sup>14</sup> Cuejña ne xi ngu xuta jan ne, quiji me ngu nangui cjin. Hane chaja sa xi cjue me ne, cajindaya me mosu hndixahan rë me casua me xi cuejñatsja cha xi tsëhë me. <sup>15</sup> Hora xi casua me ne, ngu cha, casua me cha hñu mil tujún, hane ngu nga cha ne jo mil, hane ngu nga cha ne ngu mil. Cuatjin casua me cha hatucutjin tsejen xi chutaha cha. Hya xi camá ne, cavetju me quiji me. <sup>16</sup> Ngajan camá xi cha xi cafahatsja cha hñu mil tujún ne, casahmi cha ngu negocio. Hane ngajan cavesun rë cha hñu cuatjin sa. <sup>17</sup> Hacuaha cha xi cafahatsja cha jo mil tujún ne, cuanitjin ne cavesun rë cha jo cuatjin sa. <sup>18</sup> Peru cha xi cafahatsja cha ngu mil tujún tsëhë nai rë cha ne, quiji cha cafahangui cha ngu ngojo nangui. Hane ngajan caveyanijihma cha tujún jan.

<sup>19</sup> Hya xi jercu cavatju nixtin xi quiji nai jan, cavuya cafehe me, cajindaya me cha xi sua cuenda cha tsëhë tujún jan. <sup>20</sup> Ngajan xi cha xi cafahatsja cha hñu mil tujún ne, yaha cha hñu mil sa. Hane cachja cha cojo me ta: “Tatá, hñu mil catuhun ná, hindë ne, cavesun ná hñu cuatjin sa.” <sup>21</sup> Ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsë rë xi jemu ndaja canihñi xa lihndi vëhë ne, hitsë sa quisun xa xi sua ri. Quihndë ne, tehe cjuasua xahasen riji cojo ná.” <sup>22</sup> Sehe cafehe cha xi cafahatsja cha jo mil tujún. Hane cachja cha cuitjin: “Tatá, jo mil catuhun ná, hindë nguehe tacun tsujun jo cuatjin sa xi cavesun ná.” <sup>23</sup> Ngajan cachja nai jan cuitjin: “Ndatjin. Ngaye ne, ngu hndixahan ndaja ngaye. Ngatsë rë xi jemu ndaja canihñi xa lihndi vëhë ne, hitsë sa quisun xa xi sua ri. Quihndë ne, tehe cjuasua xahasen riji cojo ná.”

<sup>24</sup> 'Hacuaha cafehe cha xi cafahatsja cha ngu mil tujún. Hane cuitjin cachja cha: "Tatá, ha machaya ná xi ngayun ne, jemu hñu cjuá nuju. Nangun xitjê handasa hacuiin ngayun xi canitjun. Ngayun ne, hacjahi sahmi xa ne, ngayun chjuhunntsun chji rë. <sup>25</sup> Vêhê xi tsácjun ngahan. Hane cêjê caveyaneje hma tujún nuju. Cuajyihî tujún nuju nguehe." <sup>26</sup> Ngajan xi nai rë cha ne, catsicuya me tsêhê cha cuitjin: "Ngaye ne, machjiriin ngaye. Ngaye ne, mosu hndixahan tsehen. Sá xi hye xi fanga handasa hacuiin ngahan xi catsitjê, hye xi hacjahi sahmi xa ne, peru ngahan fahántsa chji rë, <sup>27</sup> hitsê sa ndaja xi xcun bancun cahmi chani tujún xi casuári, cojo sa xi hya xi cjuêhê ne, cúa cjuahántsa tujún naha, peru cojo quihndi rë." <sup>28</sup> Sehe cachja me cojo me xi hinchacun jan cuitjin: "Chjuhuntuhun tujún xi yaha cha vë. Sehe tuhun rë cha xi tjin rë tē mil tujún ta, <sup>29</sup> me xi ha tjin rë ne, sua sa Nina me, hisca vesun tsêhê. Hane me xi tsajin cjín jan ne, cjuahataha Nina hitsê xi tjin rë me. <sup>30</sup> Hacuaha chandunxin hndixahan xi machjiriin hiscan jñu ngajan candatsen. Ngajan ne, jemu squihnda me hacuaha tsijanerii me nehñu me."

*Ejemplu tsêhê chu tsánga cojo chu tentsun*

<sup>31</sup> 'Hya xi cuya Quihndi rë Xuta Jain cuinduva me cojo hasen ndajyihî tsêhê Nina hacuaha cojo ángel rë Nina cuinduva me, cuejña me cahndê hñu hiscan tsichuva me xuta. <sup>32</sup> Hane ngajan xcun me ne, cumatangun xuta rë jinguyêjê ni ngasunhdê ne, sehe scuxijin me xuta sacuaha sahmi ngu cha xi faha cuenda rë chu hora xi vaxijin cha chu tsanga tsêhê ngajñi rë chu tentsun. <sup>33</sup> Vinchaxin cha chu tsánga taha quixi rë cha, hane vinchaxin cha chu tentsun taha xcun. <sup>34</sup> Hya xi cumá ne, me xi matitjun jan, cuichja me cojo xuta taha quixi ta: "Nduvun nechun, ngayun xi catsinchacun Nina Nahmi naha. Ngayun xi satê nuju cuisuhun gobiernu xi Nina cavêhêchjini me tsujun hisca ntsacu cavetsihin ngasunhdê. <sup>35</sup> Cuatjin satê nuju ta tsêhê xi hya xi vojo ná, canicjun ná. Hya xi xinda ná, catuhun ná nandá; xutaxín ngahan, peru catuhun cahndê cavitejñajenda ndya nuju. <sup>36</sup> Tsajin ná tsjian, peru catuhun ná tsjian xi mameje; hmu ná hane cafuhun cachusuhunyun ná; tejñaya ndavaya hane cafuhun cachutsujun ná." <sup>37</sup> Sehe xuta tyjahi jan, tsicuya me cjuá cuitjin: "Tatá, ¿janihya camachaya niji xi vojo nuju, hane canicjin nuju? ¿O sá xi xinda nuju, hane catihin nuju nandá? <sup>38</sup> ¿O janihya cachutsijin nuju nujuhunyun sacuaha xutaxín hane catihin cahndê nechunjendun ndya niji? ¿Janihya cahyin xi tsajin nuju tsjian hane catihin? <sup>39</sup> Hacuaha ¿janihya cahyin xi hmu nuju o nechunyun ndavaya xi canduvintjenguin nuju?" <sup>40</sup> Sehe cuichja me xi matitjun jan ta: "Cuichjá quixi cojo nuju

ta hya xi canihñu cjuandaja vë xi caviseacun rë tuyoni xuta yuma ladu naha ne, caviseacun ná ngahan.”

<sup>41</sup> Hya xi camá ne, cachja me xi matitjun jan cojo xuta xi siu ladu scun rë me cuitjin: “Tangunxun ngayun xi cuatjun castigu rë Nina ne, tangun cuechún xcun ndihi xi catsindaja Nina xi cuisehen xitsehen xi matitjun cojo ángel rë. Ndihi jan ne, tsajin nixtin tsajin nixten xi coho. <sup>42</sup> Cuatjin satë nuju ta tsëhë xi hya xi vojo ná, ha canicjuun ná; hya xi xinda ná, catuun ná nandá; xutaxín ngahan, peru catuun cahndë cavitejñajenda ndya nuju; <sup>43</sup> Tsajin ná tsjian, peru catuun ná tsjian xi mameje; hmu ná hane cafuun cachusuunyuun ná; tejñaya ndavaya hane cafuun chutsuun ná.” <sup>44</sup> Sehe cuinen-guise me cuitjin: “Tatá, ¿janihya camachaya niji xi vojo nuju, o sá xi xinda nuju? ¿O janihya canutsijin nuju nujuhunyun sacuaaha xutaxín, o xi tsajin nuju tsjian? Hacuaha ¿janihya cahyin xi hmu nuju o nechunyun ndavaya? ¿Janihya cahyin vë xi cavisecuiin nuju?” <sup>45</sup> Sehe cuichja me xi matitjun jan ta: “Cuichjá quixë cojo nuju ta tsëhë xi mijí nihñu cjuandaja vë xi cuiseacun rë tuyoni xuta yuma ladu naha ne, mijí cuiseacun ná ngahan.” <sup>46</sup> Sehe xuta jan ne, cuisehen me castigu xi nixtin nixten cumá, peru xuta xi tyjahi cjuataacun rë me ne, satë rë me cjuahñu xatsë xcun Nina.

## 26

### *Camachihin cjua hacutjin xi chjahá rë Jesucristu*

<sup>1</sup> Hya xi camá ne, xi cajnetaha cachja Jesús yëjë cjua cuatjin ne, sehe cachja me cojo xuta ladu rë me cuitjin:

<sup>2</sup> —Ha hyun xi chaja sa jo nixtin xi cuechú suhi tsëhë pascua ne hane ngahan xi Quihndi rë Xuta Jain ngahan ne, hatuxa hya cumá ngahan entregadu tsja xuta xi cuetaha ná xcun cru. —Cuatjin cachja me.

<sup>3</sup> Nixtin hya ne, yëjë nahmi xi matitjun cojo xuta changá rë xuta tjë rë Israel ne, casahmi me ngu junta ngajan ndihya jyë rë Caifás, me xi vitexa yëjë nahmi xi matitjun. <sup>4</sup> Ngajan xi caviyuju me cjuataacun rë me hacutjin xi cuma cuindacha me Jesús cojo sa xi cuma cjuahahma me me xi tsiquehen me me.

<sup>5</sup> Peru cachja me ta:

—Ndatjin xi cuinechanyan ne cuatju suhi, sehe chjahanhma cha, sá tu cumacjan rë xutacjín, hane cumá ngu suë jyë.

### *Cavitejnu ngu chjuun aceite rcu Jesucristu*

<sup>6</sup> Hya ne, Jesús ne, nandya Betania quitaha me. Tacun me ndava cha Simú, cha xi camandaja tsëhë chíhin vitaha xi casatë chuxin rë cha. <sup>7</sup> Hane ngajan camá xi cafehetjengui rë me ngu chjuun xi yaha na ngu frascu xi ndyojo camá,

hinja ngu aceite ndaja xi jercu hnga chji rë. Hya xi camá ne, cavitejnu na aceite jan rcu Jesús hora xi tijinë me niñu. <sup>8</sup> Peru xi cavutsejen cha ladu rë me xi cuatjin casahmi na jan ne, camacjan rë cha cachja cha cuitjin:

—¿Mé má tu mahya ni catsichaja na aceite vë? <sup>9</sup> Sá xi xteña ne ndaja sacú tujún rë. Hane tujún vëhë ne cuma cuisecoo rë xuta yuma. —Cuatjin cachjataha cha na.

<sup>10</sup> Peru xi camachaya rë Jesús xi cuatjin chja cha ne, cat-sicuya me cjua cuitjin:

—¿Mé má cuatjin tivichuncjun tsëhë na ta jemu vengui chji rë xcusun xi casahmi na cojo ná? <sup>11</sup> Xuta yuma ne, yëjë nu yëjë nixtin ne, siu me cojo nuju. Peru ngahan ne, hacuiin yëjë nu yëjë nixtin tejña cojo nuju. <sup>12</sup> Tsëhë xi xi cavitejnu ná na aceite jan ne cojo tjun ni ne cuëhëchjine na yojo naha xi seyaniji ngahan. <sup>13</sup> Cuichjáquixë cojo nuju ta tuyani ni tsëhë jingujyë ni ngasunhdë xi cuichja xuta cjua tsëhë Nina ne, hacuaaha cueyanangui me na vihi, cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

### *Judas casahmi cha compromisu xi cuiteña cha Jesús*

<sup>14</sup> Hya xi camá ne, ngu cha tsëhë ngajñi rë me xi tejó xi má ladu rë Jesús, cha xi hmí rë Judas Iscariote ne, quiji cavisiajmi cha cojo nahmi xi matitjun <sup>15</sup> cavinenguisse cha me cuitjin:

—¿Há cjín tujún tuhun ná sá xi sahme entregadu nuju Jesús?

Ngajan xi cavexqui me hane casua me cha cantë tujún tyava. <sup>16</sup> Hane ngajan cavejñaya cha ngu hora xi ndaja xi cuma sahmi cha entregadu Jesús cojo xuta xi cuacun jan.

### *Hacutjin cajinë Jesús tsëhë suhi rë Pascua*

<sup>17</sup> Hya xi camá ne, nixtin xi tjun tjun tsëhë suhi xi chinë pan xi tsajin san rë, cafehe xuta ladu rë Jesús xi tejo jan, cachja cha cojo me cuitjin:

—¿Jani meje nuju xi cuihinchjini xi xine nguixun tsëhë suhi?

<sup>18</sup> Sehe cafangui Jesús cuitjin:

—Tangun nandya Jerusalén. Hane xi cuechú ndava ngu cha xi cuacun jan ne, tinújun cojo rë cha cuitjin: “Chja maestru naja cuitjin: Meje cuechú hora naha, hindë ne, ndya nuju ne sínë niñu tsëhë pascua cojo xuta ladu naha.”

<sup>19</sup> Sehe quiji xuta ladu rë me ne, casahmi cha sacuaaha xi cavitexa Jesús cha, hane cavëhëndaja cha xi sinënguixun me tsëhë pascua.

<sup>20</sup> Hya xi quiji hora jan ne, tijinë me niñu cojo xuta ladu rë me xi tejó jan, <sup>21</sup> hane ngajñi hora xi tijinë me ne, cachja Jesús cuitjin:

—Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

<sup>22</sup> Ngajan xi jemu choho camá rë cha, cavetsihin cha cachja chuva ngu chuva ngu cha cojo rë me cuitjin:

—Nai, ¿há cumá cacun xi ngahan sahme?

<sup>23</sup> Hya xi camá ne, cafayangui Jesús cuitjin:

—Ngu cha xi ngu ni tyuva tsingúsehenquinda niñu naha cojo ne, cha vëhë xi sahmi ná entregadu. <sup>24</sup> Ngahan xi Quihndi rë Xuta Jain ngahan ne, hatuxa tjin ná xi cueya sacuatjin ha camá camahindu xcun xujun tsahan, peru jemu chojyihí tsëhë cha xi sahmi ná entregadu. Venguí sa chji rë xi catsiin cha.

<sup>25</sup> Sehe Judas, cha xi sahmi rë me entregadu cachja cha ta:

—Maestro, ¿há cumá cacun xi ngahan sahme?

Ngajan xi cafayangui Jesús tsëhë cha cuitjin:

—Juun, quixi.

<sup>26</sup> Hora xi tijinë me comida ne, cafaha me ngu niñutsju hacuaha casua me nacuechji rë Nina ne, sehe cavotohocja me niñutsju jan, casua rë me xi tejó jan ne, sehe cachja me cuitjin:

—Chjuhun xinu. Vihi ne, yojo naha vi.

<sup>27</sup> Hya xi camá ne, cafaha me ngu vasu ne, sehe casua me nacuechji rë Nina, sehe cachja me cuitjin:

—Jahun vihi sehe siuhun ngajñi ngayujun ni, <sup>28</sup> ta xan rë uva vihi ne, vihi jni naha xi cuetju ngatsë rë xuta sehe cuma chihin compromisu xi cuaxëtje rë xuta tsëhë jyë rë me.

<sup>29</sup> Hacuaha cuichjá cojo nuju ta quihndë cojo nixtin xi cjuiniji sa ne, ha quihndë cyaan cuëhë xan rë uva. Cuëhë, peru hisca hya xi cuëhë nga cojo nuju ngajan hiscan sahmi Nina gobiernu.

*Casua Jesucristu camachaya rë Pedru xi cuichja me xi hvín me yo Jesucristu*

<sup>30</sup> Xi cajnetaha cajinë me ne, casë me ngu tsëhë Nina. Sehe cavetju me quiji me Naxi Olivu. <sup>31</sup> Hane sehe ngajan cachja Jesús cojo xuta ladu rë me cuitjin:

—Ngayujun ni ngayun ne, nismutacun ná hacuaha cuma ndaya cjuatacun nuju quihndë nguixun vi ne, hane cuejña ná suva ta cumá sacuaha camahindu xcun xujun rë Nina xi chja xi: “Nina ne, tsiquehen me cha xi sahmi cuidadu rë chu tsánga, hane chu tsánga vë ne cuitsojo chu.” <sup>32</sup> Cuatjin cumá, peru hya xi cúa nga cjuahñu naha ne cjuë titjun tsujun hisca distritu Galilea.

<sup>33</sup> Pedru ne, cafayangui cha cuitjin:

—Ha ndasa ngayëjë cha xi cuicun vi cuejña suva cha ngayun, hatuxa tsajin nixtin xi cojo ngahan sahme cuatjin.

<sup>34</sup> Hya xi camá ne, cuitjin cachja Jesús cojo cha:

—Cuichjáquixë cojo ri ta tajñu ni xi chaja squihnda xahnda ne, ha jyan ndiya cuinoje xi hyiin yo ngahan. —Cuatjin cachja Jesús.

<sup>35</sup> Cachja Pedru cuitjin:

—Ha ndasa hisca cueya cojo nuju ne, peru cuichjaan xi hveen yo ngayun.

Hacuaha cuanitjin ni cachja cha xi yahnga.

*Casahmi Jesucristu oración rë me ngajan Getsemaní*

<sup>36</sup> Sehe quiji Jesús cojo cha xi tejó jan ne, cafehe me ngu cahndë xi hmí rë Getsemaní. Ngajan cachja Jesús cuitjin:

—Nechun ni nguehe. Cjuë nguvan hitsë ni cuisiajme cojo Nina. —Cuatjin cachja me.

<sup>37</sup> Hya xi camá ne, cavaxë me Pedru cojo jo cha quihndi rë Zebedeo xi quiji cojo me cha. Hane xi cjuí me ne, cavetsihin jemu camá va rë me, hacuaha jemu macjincacun me. <sup>38</sup> Sehe cachja me cojo cha cuitjin:

—Jercu choho camahani má rë xahasen naha, sacuaha xi vëhë ni tsiquehen ná. Nguehe nechuncun ngayun cojo ná.

<sup>39</sup> Sehe ngajan xi Jesús ne, quiji me hitsë nguvan. Hane ngajan cafañatsacjan me, cafehya rë me Nina cuitjin:

—Ngayun Nahmi naha, sá tjin sa ngu chuva rë ne, catisatiin ná cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan.

<sup>40</sup> Hya xi camá ne, cavuya cafehe me hiscan siu jyan xuta ladu rë me xi quijicojo me jan ne, casacutsja me xi siufë me. Ngajan xi cachja Jesús cojo Pedru cuitjin:

—Cahyun ni, ¿há camaji cavacun ngayun cojo ná hisca ngu hora ni? <sup>41</sup> Nechuncun ngayun, nihñu oración nuju, sátu chjaháchuva nuju cojo cjuatacun nuju. Xahasen nuju ne, ndaja meje rë xi nihñu, peru yojo nuju ne, chuvacacun.

<sup>42</sup> Hya xi camá ne, camá jo ndiya xi quiji me nguvan cafehya me Nina cuitjin:

—Nahmi naha, sá xi cumaji cuatju chuva rë xi satiin ná cjuañihi ne, catama sacuatjin xi meje nuju ngayun.

<sup>43</sup> Hya xi camá ne, cavuya nga cafehe me hiscan siu jyan xuta jan casacutsja me xi siufë me ta jemu hai nijña rë me.

<sup>44</sup> Hya xi camá ne, camá jyan ndiya xi quiji me nguvan ne hacuaha cojo vëhë nga ne, cafehya me Nina. <sup>45</sup> Sehe cavuya nga me cafehe me hiscan siu xuta jan ne, cachja Jesús cuitjin:

—¿Há tsjuñufun cahun? Chutsujun ne, ha cavechú hora xi ngahan Quihndi rë Xuta Jain ne, cjuaha ná xuta xi sahmi ná entregadu cojo xuta tsehen. <sup>46</sup> Tisatjunhngun, cuanguen chutsejen ta ha nduva cha xi sahmi ná entregadu.

*Cafaha xuta Jesucristu*

<sup>47</sup> Jínguyējē rē xi tichja cuaha Jesús ne, cafehe Judas, cha xi cojo jíyajñi ngajñi rē cha xi tejó xi catsuyihiya cojo me. Hacuaha jemu cjin xuta tivisecoo rē cha, xuta xi cavitexa nahmi xi matitjun cojo xuta changá xi quijijaha me Jesús. Hane yaha me quicha, yaha me ya. <sup>48</sup> Chaja sa xi cjuehe cha jan xi sahmi cha entregadu Jesús ne, cachja cha cojo xutacjin jan cuitjin:

—Cha xi cjuē cuitatsuha xi suá rē nina ne, cha vëhë xi hacui cha.

<sup>49</sup> Xi tu cavechu cha hiscan nduva Jesús ne, ngutjen quiji casahmitiña cha tsëhë me hacuaha casua cha me nina cachja cha cuitjin:

—Cuhndanu, maestro —chja cha.

Hane quiji cavitatsuha cha me. <sup>50</sup> Ngajan xi cachja Jesús cojo cha cuitjin:

—Tai, Nihñichihin xa vëhë xi candove.

Hya xi camá ne, quiji xuta jan ne, cafaha me Jesús. <sup>51</sup> Ngajan xi ngu cha xi secun cha cojo Jesús ne, cavaxë cha quichanduju rē cha, hane cavaja rē cha ngu cha mosu rē nahmi xi matitjun, hane cavatësun cha ngu ladu tyjavañuju.

<sup>52</sup> Ngajan xi cachja Jesús cojo cha cuitjin:

—Teyendeje quicha riji vë. Xuta xi tsicojo me quicha ne, hacuaha cojo quicha cueya me.

<sup>53</sup> ¿Há hyuun ta sá xi cjuehya rē Nahmi naha ne, jemu cjin mil ángel tsingatju me cuisecoo ná? <sup>54</sup> Peru sá xi cuatjin sahme ne, ¿hacutjin cumachihin cjua rē xujun rē Nina? ta cuitjin meje rē xi cumá.

<sup>55</sup> Hya xi cajnetaha cachja Jesús cojo xuta ladu rē me ne, sehe cachja me cojo xutacjin cuitjin:

—¿Há nduvun chjuhun ná sacuaha ngu xuta xi chëjë me, xi cuatjin nduvun cojo ya cojo quicha vë ni? Xi cavitejñaya cojo nuju nchunchujun ni ndatsen yungun jan ne, cavetuhunntsuun ná cachjuun ná. <sup>56</sup> Peru cuitjin tijima cojo sa xi cuetjucaa jain hacutjin camahindu xcun xujun rē Nina xi catsihindu profeta.

### *Quiji me cojo Jesús ndava nahmi xi matitjun*

<sup>57</sup> Hya xi camá ne, xi cafaha xuta jan Jesús ne, quijicojo me me ndava Caifás, nahmi xi matitjun tsëhë yëjë ni nahmi ta tsëhë xi ngajan ha camá tangun yëjë ni cha xi vicuya cjuachacun cojo yëjë ni xuta changá. <sup>58</sup> Pedru ne, hacuaha tjengui cha cjuí cha tu cjin tu cjin ni hacutjin cjuí xuta jan cojo Jesús hisca xi cavisehen cha ndatsen rē ndava nahmi xi matitjun jan. Hane ngajan cavëjña cha cojo cha nísë rē yungun cojo sa xi cumachaya rē cha mé cumá.

<sup>59</sup> Hane nahmi xi matitjun jan cojo yějě sa xuta xi matitjun ne, cavangui me xuta ndacha xi tsinguixi jyě rě Jesús, cojo sa xi cuma tsiquehen me me. <sup>60</sup> Peru tsajin mé jyě rě Jesús xi casacu rě me handasa jemu cjín má xuta ndacha xi cachja me. Hisca xi ha tisacuiyiin rě me hacutjin cuma, sehe cafehe jo cha ndacha xi cachja cha <sup>61</sup> cuitjin:

—Cha vi cuitjin cachja cha ta: “Ngahan ne, cuma tsinguétsun yungun xi matitjun vi xi casahmi xuta tséhě Nina, hane cahntsua xi jyan nixtin ne, sahme nga ngu.”

<sup>62</sup> Ngajan xi nahmi xi matitjun tséhě nahmi xi yahnga jan ne casecunvasen me, cavinenguise me Jesús cuitjin:

—¿Há chjayinnguini hisca ngu cjua? ¿Mé noje tséhě jyě xi vincha xuta jan?

<sup>63</sup> Hane Jesús ne, tu jyu ni casecun me. Sehe cachja nahmi xi matitjun jan cojo Jesús cuitjin:

—Cuitexa ri ngatsě rě xi macjain ri tséhě ngu ni Nina quicun xi hora xi cjuahataha ri ne cuinoje cjuaquixi. ¿Há ngaye xi Quihndi rě Nina? ¿Há ngaye xi Cristu?

<sup>64</sup> Ngajan cafayangui Jesús tséhě me ta:

—Sacuatjin nújun vė ne, cuatjin jain. Hacuaha cjuehe nixtin xi chutsujun ná xi tejña ladu quixi tséhě ngahñu rě Nina. Hacuaha chutsujun ná xi cuinduvajne ngajñi rě yufi tséhě ngahnga.

<sup>65</sup> Hane ngajan xi nahmi xi matitjun tséhě nahmi xi yahnga jan ne xi jemu camacjan rě me ne, hisca tsjian rě me cavicheya me. Hacuaha cuitjin cachja me:

—Tsixcuehyu cha Nina. Tsajin sa cjua testigu xi mameje. Ngayun ne, ha canuhyun hacutjin tsixcuehyu cha Nina.

<sup>66</sup> ¿Mé nújun quihndě?

Ngajan cafayangui me cuitjin:

—¡Meje rě xi cueya cha!

<sup>67</sup> Hya xi camá ne, ngu jo me cavetsihin me cavėhėnatya me Jesús hacuaha cavajaya me xcun. Yahnga nga me ne, cojo cahntsua tsja me cavaja me xcun Jesús. <sup>68</sup> Cachja me cuitjin:

—Tinoje, ngaye Cristu, ¿yo xi cavaja ri?

### *Cachja Pedru xi hvín me yo Jesucristu*

<sup>69</sup> Jinguyějě rě xi cuatjin tijima ne, Pedru ne, tacun me ndatsen ndihya. Hya xi camá ne canduva ngu na mosu hndixahan tséhě nahmi jan, cafehe cachja na cojo Pedru cuitjin:

—Ngaye ne, ladu rě Jesús tséhě distritu Galilea má ye.

<sup>70</sup> Peru xcun yějě me xi siu me ne, cafahahma me cachja me cuitjin:

—Hisca hveen mé xi noje.



<sup>71</sup> Hya xi camá ne, sehe cavetju me quiji me casecun me hiscan tu cuiseen ni tséhë ndatsen ndihya. Hane ngajan xi ngu nga na cachja na cojo xuta xi siu ta:

—Cha vihi ne, ladu rë Jesús nandya Nasarét má cha.

<sup>72</sup> Hya xi camá ne, ngu ndiya nga ne cafaahma me cuitjin:

—Vëë Nina xi hveen xuta jan.

<sup>73</sup> Hya xi cavatju ngu hora ne, sehe camatiña xuta xi hinchacun cojo Pedru jan cachja me cuitjin:

—Ha cjuaquixindaja ta ngaye ne, cojo ngaye nechin cojo cha xi cuajyihí vë, ta tséhë xi cjuaríi tsingacun xi xuta distritu vë ngaye.

<sup>74</sup> Ngajan xi cavetsihin nga Pedru cafaahma me cjuaquixi hisca cachja me xi catinduva ngu cjuacjintacun xi cuatju me sá xi tichja me ngu ndesu. Cuitjin cachja me:

—Vëë Nina jain xi hveen yo me xi nújun vë.

Hane hora vëhë ne, cajihnda ngu xahnda. <sup>75</sup> Hane Pedru ne, catsinguitsjen me cjuaríi cachja Jesús cojo rë me xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Hane xi cavetju me candatsen ne, cajihnda susu me.

## 27

### *Casahmi entregadu me Jesucristu xcun Pilatu*

<sup>1</sup> Hya xi camá nchujun ni ne, yëjë ni nahmi xi matitjun cojo yëjë xuta changá ne camatangun nga me xi sacuya rë me xcusun hacutjin cuma tsiquehen me Jesús. <sup>2</sup> Sehe catsihñu me Jesús ne, quijicani me xcun gobernador xi hmí rë Pilatu.

### *Cahme Judas*

<sup>3</sup> Hya xi camá ne, Judas ne, cha xi casahmi rë me entregadu, camachaya rë cha xi cueya Jesús. Ngajan xi choho camá rë cha hane catsindeya cha cjuatacun rë cha. Quiji cha catsicuya cha catë tujún tyava jan cojo nahmi xi matitjun cojo xuta changá. <sup>4</sup> Cuitjin cachja cha:

—Jemu tjin jyë naha ta tséhë xi casahme entregadu ngu me xi tsajin xi cun rë.

Peru cafayangui me cuitjin:

—¡Mé tsijin vë! Cjuacjintacun vë hatuxa tsiji sove.

<sup>5</sup> Hya xi camá ne, ngajan yungun xi matitjun ne, cacandi cha tujún tyava jan sehe cavatju cha quiji cha hiscan ngu cahndé xi cavityanguí cha yojo rë cha hisca xi camá cahme cha.

<sup>6</sup> Nahmi xi matitjun jan cafaha me tujún tyava jan peru cachja me cuitjin:

—Cumaji cuinchan tujún vi cahntsua caxa tujún rë yungun ta tséhë xi tujún vi ne, cavengui chji rë jni rë cha.

<sup>7</sup> Hya xi camá ne, cachuya rë me xi cuatsë me ngu xáhva xi chja xuta Nangui rë Cha Chjinetiji. Xáhva jan ne cumachji rëhë xi xinchaniji xutaxín xi cueya me nangui vë. <sup>8</sup> Ngatsë rë xi cuatjin casacu xahva jan ne, hisca nixtin quihndë ne cahndë vëhë ne yaha ñihi xi Cahndë Tsëhë Jni. <sup>9</sup> Xi cuatjin camá ne, camachihin cjua xi catsihindu profeta Jeremías xi cuitjin chja: “Cafaha me catë tujún tyava, xi cavejña chji rë cha xi cafehya xuta nangui Israel, <sup>10</sup> sehe casua me tujún jan xi cjuaha me nangui rë cha chjinetiji. Cuatjin casahmi me sacuaha cavitexa Nina.”

*Xcusun xi cavatju Jesús xcun Pilatu*

<sup>11</sup> Hya xi camá ne, Jesús ne secun me xcun gobernador. Ngajan cavinenguisse me Jesús cuitjin:

—¿Há ngaye xu matitjun ngaye tsëhë xuta tjë rë Israel?  
—Cuatjin cavinenguisse me.

Hane Jesús ne, cuitjin cafayangui me:

—Cuatjin sacuatjin nújun vë. —Cuatjin cafayangui me.

<sup>12</sup> Peru hora xi nahmi xi matitjun cojo xuta changá jan cavincha jyë me Jesús ne, ndastu mé cafayangui Jesús. <sup>13</sup> Ngajan xi cachja Pilatu cojo me cuitjin:

—¿Há nuhyiin cjua xi chja me? Jercu cjín jyë riji cavincha me.

<sup>14</sup> Peru Jesús ne ha quihndë cafayanguiin me hisca ngu cjua. Hane Pilatu ne, jemu quijircun camahani rë me.

*Camá entregadu Jesús xi cjue cueya me*

<sup>15</sup> Tjin ngu xcusun xi nu nu ni, hya xi cumá nixtin rë suhi jan ne, tsismi gobernador ngu presu xi xuta vaxijin me. <sup>16</sup> Nixtin hya ne, jiya ngu presu xi jemu tjin cjua tsëhë, Barrabás hmí rë cha. <sup>17</sup> Ngajan xi camá xi hya xi camatangun xutacjín ne, ngajan cavinenguisse Pilatu xuta cuitjin:

—¿Jarë cha xi meje nuju xi tsisme? ¿Há Barrabás ne? ¿Há Jesús xi Mesías xu?

<sup>18</sup> Cuatjin cachja me cojo xuta ta tsëhë xi ha vëë me xi ngatsë ni rë cjuaxin sahmi nahmi xi matitjun jan cojo Jesús, vëhë xi casahmi me entregadu xi meje rë me xi cueya.

<sup>19</sup> Hora xi tijimá vë, tacun Pilatu xcun silla hiscan vejña me hora xi vitexa me, ngajan xi chjuun rë me ne, catsingatju na cjua xi cuitjin chja: “Caninguisuunjñuu cjuacjintacun tsëhë cha vë xi tyahi cjuatacun rë cha, ta nguchjin ne ngajñi nijña naha jemu cjín xcusun xi chocun camá ná chini ngatsë rë cha.” Cuatjin fi cjua xi catsingatju na.

<sup>20</sup> Hya xi camá ne, nahmi xi matitjun cojo xuta changá jan jemu cachja me cojo sa xi cama cuinchahaxi me xuta xi cjuehya xuta Pilatu jan xi tsismi me Barrabás ne, tsiquehen me Jesús. <sup>21</sup> Ngajan cachja nga gobernador cuitjin:

—Tsëhë jo cha vë ne, ¿jarë cha xi meje nuju xi tsisme?

Ngajan cafayangui xutacjín jan cuitjin:

—Nismu Barrabás.

<sup>22</sup> Sehe cachja nga Pilatu cuitjin:

—Sá cuatjin ne, ¿mé xi sahme cojo Jesús xi Cristu xu?

Ngajan xi cafayangui yëjë xutacjín jan cuitjin:

—¡Tetuhun cha xcun cru!

<sup>23</sup> Ngajan xi cachja Pilatu cojo rë me ta:

—Peru ¿mé xi rcu jyë casahmi cha?

Peru xutacjín ne hitsë sa hñu cajindaya me cachja me cuitjin:

—¡Tetuhun cha xcun cru!

<sup>24</sup> Hya xi camachaya rë Pilatu xi sahmi cuendaain xuta xi chja me ta tu hitsë sa tijima ngu suë jyë ne, cafehya me nandá sehe cavane me tsja me xcun xutacjín jan. Sehe cachja me cuitjin:

—Quitjeen jyë tsëhë cjuaveya rë cha vihi ta, tsajin jyë rë cha. Vëhë ne, ha chaha nuju vëhë.

<sup>25</sup> Hya xi camá ne, yëjë xutacjín jan ne, ngu tangun ni cafayangui me cuitjin:

—Tsëhë cjuaveya rë cha vëhë ne, chanijijyin cojo quihndi niji. —Cuatjin cachja me.

<sup>26</sup> Hya xi camá ne, catsismi me Barrabás, peru casahmi me xi Jesús ne casehen rë me sehe casua Pilatu me xi cjue cueya me xcun cru.

<sup>27</sup> Hya xi camá ne cha sindadu xi vitexa gobernador ne, quiji cojo cha Jesús taha cahntsua ndava gobernador jan. Hane sehe casahmitangun sa cha yëjë sindadu cjín. <sup>28</sup> Hya xi camá ne, cavaxë cha tsjian rë Jesús, hane sehe catsicaja cha me ngu tsjian hani. <sup>29</sup> Hacuaha catsihya cha ngu corona nahyá sehe cavesun cha rcu Jesús hane cavisengui cha ngu bastón tsja me. Hya xi camá ne, cavixcuhnchi cha xcun me, catsixcuehyu cha me, cuitjin cachja cha:

—¡Viva! Me xi matitjun tsëhë xuta tjë rë Israel.

<sup>30</sup> Hacuaha cavëhënatya cha me, hacuaha cafaha cha bastón jan xi yaha tsja me hane cavaja cha rcu me. <sup>31</sup> Hya xi camá xi cuatjin catsixcuehyu cha me ne, cafaxin cha tsjian hani jan, catsicaja nga cha me tsjian rë me. Hya xi camá ne, sehe quijicojo cha me xi cuetaha cha me xcun cru.

### *Casetaha Jesucristu xcun cru*

<sup>32</sup> Hya xi cavetjun cjuicojo sindadu Jesús ne, cavechutaha cha ngu me xi hmí rë Simón tsëhë nandya Cirene. Sehe sindadu jan ne, casahmi cha ngu jyë xi cuaniji me cru jan.

<sup>33</sup> Hane xi cafehe cha cojo Jesús hiscan xi hmí rë Gólgota, cjua xi meje cuichja Naxi Nínda Rcuun. <sup>34</sup> Hya xi camá ne,

casua cha me xan rë uva xi tecjan rë nandá rë tyjungunsa xi cuihi Jesús. Peru xi cavutaha me hitsë ne, cahviin me.

<sup>35</sup> Ngajan xi sindadu jan ne, xi cavatju casetaha me xcun cru ne, sehe cafaha cha tsjian rë me hane cavaxë cha suerte tsëhë ne, jarë cha xi satë rë cha jima ngu tsjian. <sup>36</sup> Sehe ngajan ne cavejñataha cha cavutsejensun cha Jesús xcun cru. <sup>37</sup> Hacuaha camahindu ngujo cjua xi casetaha xcun cru ngatihin rcu Jesús sacuaaha xcusun rë me xi setaha xujun jyë rë xuta, hane cuitjin chja cjua jan: “Jesús, me xi Matitjun Tsëhë Xuta Israel.”

<sup>38</sup> Hacuaha cavityangui cha ngu chëjë ngu ngu ladu tjehen rë me, jima ngu cojo cru rë. <sup>39</sup> Hya xi camá ne, xuta xi cavatju jan ne, catsixcuehyu me Jesús ne, catsitjiya rcu me, hacuaha cuitjin cachja me:

<sup>40</sup> —Ngaye xi ha canoje xi cuma ninguetsin yungun xi matitjun, hane cahntsua xi jyan nixtin ne; cama nga canindeje ngu. Quihndë ne, sá cuatjin cuma nihñi ne, naxetje sove yojo riji. Sá xi Quihndi Jain rë Nina ngaye, titujni tsëhë cru vë.

<sup>41</sup> Ha chuva vëhë ni ne, nahmi xi matitjun ne cojo cha vicuya cjuachacun rë ley cojo xuta changá ne cachja me cuitjin:

<sup>42</sup> —Cavaxëtje xu cha xuta, peru quihndë ne, cumaji cuaxëtje suva cha yojo rë cha. Sá xi hacui jain cha xi Matitjun Tsëhë Xuta Israel ne, catitujne cha tsëhë cru chutsejen, cojo sa xi cumacjain naja tsëhë cha. <sup>43</sup> Macjain xu rë cha tsëhë Nina, quihndë ne cataxëtje Nina cha sá xi Nina meje rë me cha; ta cachja cha ta: “Quihndi rë Nina, ngahan.”

<sup>44</sup> Hacuaha cha chëjë xi cojo caxtyangui taha cru jan ne, cojo cha choho cachja cha tsëhë Jesús.

### *Xcusun xi camá hya xi cahme Jesucristu*

<sup>45</sup> Hane hora vëhë ne, camajñu jingujyë ni. Cavetsihin xi camanchisen ne, quiji cani rë hisca fane jyan. <sup>46</sup> Hya xi camá ne, jercu hñu camahani cachja Jesús cuitjin:

—Elí, Elí, ¿lama sabactani? -cjua vëhë meje cuichja ta: Ngayun Nina naha, mé má canismutacun ná.

<sup>47</sup> Hane ngujo xuta xi hinchacun jan ne, xi cajni rcu me hne jan hane cachja me cuitjin:

—Tijindaya me profeta Elías.

<sup>48</sup> Hya xi camá ne, ngutjen ni, cavanga ngu me, quiji catsicahnchi me ngu tsjian hinda cojo xan rë uva xi ha sán, sehe cavetaha me rcu ngu ya nduju, sehe cavetaha me hntsua Jesús xi cuihingi me. <sup>49</sup> Ngajan xi yahnga xuta ne, cachja me cuitjin:

—Caveni tuhun. Cuinechanyan hitsë ne, ¿há cuinduva jain Elías cuaxëtje me cha?

<sup>50</sup> Hane Jesús ne, hora vëhë ne, jercu cajindaya nga me hane cahme me. <sup>51</sup> Hacuaha hora vëhë ni ne, tsjian nduju xi tyjanguì cahntsua yungun xi matitjun jan ne, hisca rcu hisca ntsacu canduva catiyavasen. Hacuaha cafani nangui. Hacuaha cavacjan ndyojo. <sup>52</sup> Hacuaha hora vëhë ni ne, catuxaha tsjun rë nima, hane jemu cjin xuta xi tyjahi cjuatacun rë me xcun Nina ne, cavuya cjuahñu rë me. <sup>53</sup> Cavetjun xuta jan tsëhë tsjun. Hane hya xi ha cavuya cjuahñu rë Jesús ne, sehe cavisehen me nandya Jerusalén hane ngajan ne, cjin xuta ne, cavëë rë me.

<sup>54</sup> Hora xi cahme Jesús ne, cha capitán tsëhë cha sindadu cojo yahnga sindadu xi hinchacun me ngajan vutsejensun me Jesús ne, camachaya rë cha xi fani nangui cojo cjin xcusun sa xi cavatju camá. Hane jercu quijircun camaha ni rë cha. Hacuaha cachja cha cuitjin:

—Hacui jain me vihi xi Quihndi Jain rë Nina, me.

<sup>55</sup> Hacuaha ngajan ne, tsëhë cjin ne hinchacun cuaha cjin yachjin xi tivutsejen me. Yachjin jan ne quijitjengui me Jesús xi cuisecoo me Jesús, sahmi cuenda me. <sup>56</sup> Ngajñi yachjin jan ne, hinchajñi na xi cuicun vi: na María na Mágdala, hacuaha na María naa rë Jacobo cojo José, hacuaha cojo naa rë cha quihndi rë Zebedeo.

### *Caseya nima Jesucristu cahntsua tsjun*

<sup>57</sup> Hya xi cajne hora ne, ngu cha nchina xi hmí rë José, ngu xuta Arimatea cha xi hacuaha xuta ladu rë Jesús cha. <sup>58</sup> Cha vëhë quiji cha xcun Pilatu, cafehya cha cahndë sá xi cuma cjuahaxin cha nima Jesús. Hane Pilatu ne, casua me cha cahndë. <sup>59</sup> Ngajan xi cafachatsja cha nima jan ne, sehe catsitjengui rë cha tsjian tyjahi, sacuaha xcusun rë me. <sup>60</sup> Sehe caveya cha nima cahntsua ngu tsjun xatsë rë suva cha xi ha casahmi cha xi camá catjuhngui rë taha naxi. Sehe catsindefajne cha ngu ndyojo jyë xi cuechja rë tingotjo rë tsjun jan. Hya xi camá casahmi cha ne, quiji cha cojo xuta ra. <sup>61</sup> Peru na María na Mágdala cojo na María xi hacjahi ne, caviyujutaha na xcun tsjun.

### *Cha sindadu siu cuidadu cha tsjun*

<sup>62</sup> Hya xi cumá nchujun ni ne, hya nixtin xi cjuahajenda rë me ne, hya camatangun nahmi xi matitjun cojo cha partidu fariseo sehe cachja cha cojo Pilatu. <sup>63</sup> Cuitjin cachja cha tsëhë Jesús:

—Nai, ngayin ne vitsjen niji xi hya xi chaja sa cueya cha cachja cha ndacha vë cuitjin: “Cahntsua jyan nixtin ne, cuya cjuahñu naha.” <sup>64</sup> Ngatsë rë vëhë ne, meje rë xi nihñu cuendun xi sehñu ndaja tsjun rë cha hisca xi ha cavatju jyan nixtin

jan, cojo sa xi cumaji nduva cha ladu rë nima vë ne, cjuahaxin cha nima tsëhë tsjun jan, sehe cuichja cha xi cavuya cjuahñu rë nima. Cuatjin nihñu ta tsëhë xi sá xi cuatjin sahmi cha, hisca hitsë sa choho cuatjuun cumá.

<sup>65</sup> Ngajan xi cachja Pilatu cojo rë me cuitjin:

—Sacu nuju sindadu jan xi sahmi cuidadu rë tsjun, sehe tanguncujun ne, hacuaha ndaja techjunhñu tsjun vë hacutjin cuma xi nihñu.

<sup>66</sup> Sehe quiji me cojo sindadu jan, cavechjahñu me tsjun, cojo sa xi cumatsejen sa xi cuaxë cha nima, hacuaha caviyuju cha sindadu xi sahmi cuidadu rë.

## 28

### *Cavuya Jesucristu cjuahñu*

<sup>1</sup> Xi cavatju nixtin xi chjahájenda rë jan ne, xi tu casahasen ni tsëhë nixtin ngu tsëhë totje ne, na María na Mágdala jan cojo na María xi hacjahi ne, cavetju na quiji vutsejen na xcun tsjun rë nima Jesús. <sup>2</sup> Hya xi camá ne, jercu cafani nangui ta tsëhë xi canduvajne ngu ángel rë Nina tsëhë ngahnga. Hane ángel jan ne, quiji catsivahaxin ndyojo xi cavechja rë tingotjo rë tsjun jan, sehe cavejña xcun. <sup>3</sup> Ángel jan ne, sacuaha ndihi chuhun ne, cuatjin jyihi ángel. Hacuaha tsjian rë ne, jemu tu tyava camahani jyihi, sacuaha jyihi hnchan xi hmí rë nieve. <sup>4</sup> Xi camachaya rë me tsëhë ángel jan ne, jemu catsacjun sindadu xi siu cuidadu ngajan, hisca cafatsë hnchan cha hisca sacuaha cahme yojo ra cojo chircun. <sup>5</sup> Ngajan xi cachja ángel cojo yachjin xi siutaha jan cuitjin:

—Xicarcuun. Ha hvë xi Jesús vinchunsun me, me xi cave-taha xuta xcun cru. <sup>6</sup> Me vëhë ne, tsajin me nguehe ta cavuya me cjuahñu sacuaha cachja me. Nduvun chutsujun cahndë hiscan cafaña me. <sup>7</sup> Quihndë ne tangun sanii ne, tuhuncuendun rë xuta ladu rë me cuitjin: “Ha cavuya cjuahñu rë me; hane cjue titjun me tsujun Galilea. Hane ngajan sacu xingueen.” Hindë ne, vëhë cjua xi cuichjá cojo nuju.

<sup>8</sup> Hya xi camá ne, cavetju quiji yachjin jan. Jercu quijircun rë na peru hacuaha jercu ndama rë na. Cuatjin quiji na xi suacuenda na xuta ladu rë Jesús tsëhë cjua xi cachja ángel. <sup>9</sup> Hane hora xi tifi na ndiya ne, Jesús ne cavechutaha me na jan, casua me na nina. Sehe chjuun jan ne, cafehetiña na tsëhë Jesús, caticjaxcun na cafaha na ntsacu Jesús hane cafaharcun na me. <sup>10</sup> Hya xi camá ne, Jesús ne, cachja me cojo na cuitjin:

—Xicarcuun. Tangun tuhuncuendun rë hermano naja, tinújun cojo me xi cjue me distritu Galilea. Hane ngajan sacu xingueen.

*Cjua xi casua sindadu*

<sup>11</sup> Jínguyëjë rë xi quiji yachjin jan ne, ngujo cha sindadu jan cavisehen cha nandya Jerusalén, casuacuenda cha nahmi xi matitjun tsëhë xcusun xi camá. <sup>12</sup> Sehe nahmi jan ne, hya xi ha camátangun me cojo xuta changá hane cavisiajmi cjin me tsëhë mé xi sahmi me. Hane xi cama chihin cjua ne, jemu cjin camahani tujún casua me cha sindadu jan, <sup>13</sup> hacuaha cachja me cojo sindadu cuitjin:

—Vihi cjua xi cuinújun ni. Cuinújun ta xuta ladu rë me ne, nguixun ne, hora xi catsuñufun ne, cafehe me. Hane tahahma ne catsichëjë me nima. <sup>14</sup> Hane sá xi cumachaya rë gobernador tsëhë cjua jan ne, ngayin ne, cuanguin cuinújun cojo rë me cojo sa xi cuijnecacun me tsajin mé sahmi me cojo nuju.

<sup>15</sup> Cuatjin camá xi cafahatsja cha tujún jan, hane cachja cha sacuaha cavitéxa nahmi jan. Cjua vëhë ne, cavitsojo ngajñi rë xuta nangui Israel. Hane cuatjin chja cjua hisca nixtin quihndë.

*Jesús ne, casuaxa me xuta ladu rë me xi cjue cuichja me cjua rë Nina*

<sup>16</sup> Hya xi camá ne, xuta ladu rë Jesús xi má tengu me ne, quiji me distritu Galilea, hisca naxi xi cachja Jesús. <sup>17</sup> Hya xi camá ne, ngajan cavëë me Jesús ne, cafaharcun me me. Peru ngujo ni me macjaain rë me. <sup>18</sup> Ngajan xi camatiña Jesús tsëhë me, cachja me cojo me cuitjin:

—Ha cafahantsa ngahñu xi cumá sahme tu mé ni xcusun sá xi tsëhë ngahnga o sá xi tsëhë ngasunhndë. <sup>19</sup> Ngatsë rë ngahñu vëhë ne, tsingátju nuju ne, tangun jinguyëjë rë nandya ngasunhndë, cuinújun cojo xuta jan cojo sa xi cuisehen me ladu naha. Catiseyanangui ñihi rë Nina Nahmi, cojo ñihi naha, Quihndi rë Nina, cojo ñihi rë Hasen rë Nina hora xi xtenda me. <sup>20</sup> Hacuaha ticuyun rë me xi cuihndë me ne, sahmichihin me yëjë xcusun xi cavitéxa nuju ngahan. Hane xi cuatjin ne, hacuaha cuitejñacuaha cojo nuju yëjë ni hora hisca cuijnetaha nixtin rë ngasunhndë.

## Cjuandajyihî xi catsihindu San Marcos Tsëhë Jesucristu

*Juan ne, vitenda rë xuta ngajan ngu xín tsëhë nandya*

<sup>1</sup> Cuitjin cavetsihin cjua tsëhë Jesucristu, me xi Quihndi rë Nina Jain.

<sup>2</sup> Isaías ne, ngu xutachanga xi cama cafaha cjua rë Nina hacuaha cachja me cojo xuta hatsëë nixtin. Cuitjin catsihindu me, hacutjin cachja Nina cojo me:

Tsingátju titjun ngu cha xi cjuaha cjua naha, cojo sa xi scuxaha cha cjuatacun rë xuta, tsëhë xi cjeuhe ngaye.

<sup>3</sup> Hane hiscan jemu xín tsëhë nandya ne, ngajan cuejña cha. Hane cuitjin cuichja cha:

“Sacuatjin matyjahi ndiya hya xi nduva ngu xuta rcun ne, cuatjin nihñu tyjahi cjuatacun nuju tsëhë xi cuinduva me xi matitjun tsajan.” Cuatjin cuichja cha.

<sup>4</sup> Sacuatjin jain catsihindu Isaías ne, cuatjin jain camá ta cafehe cha xi catsingatju Nina, cha xi hmí rë Juan, ngajan hiscan jemu xín tsëhë nandya. Casua cha camachaya rë xuta ta meje rë xi tsindeya me cjuatacun rë me hacuaha xtenda me, cojo sa xi tsinchataha Nina me tsëhë jyë rë me. <sup>5</sup> Hane jercu cjín xuta quijitjengui me cha, xuta tsëhë distritu Judea cojo nandya Jerusalén. Hane cavitenda cha me xi cavijacun jyë rë cojo Nina ngajan ndajyë Jordán.

<sup>6</sup> Tsjian rë cha Juan jan ne, tsja rë chu camellu camá. Cojo ngu cinturón chuxin quitaha cahntsua cha. Xi camá niñu rë cha ne, chu nchahva. Cojo tsjen rë chu tusen cahvi cha.

<sup>7</sup> Cuitjin cachja cha:

—Canduvá ngahan titjun. Peru sehe cuinduva ngu me xi hitsë sa vechu cjuatacun rë xi cumá ná ngahan, xi hisca chuxinxhtë rë me cumaji tsinguissehercu sahme tyjahi. <sup>8</sup> Ngahan ne, tu cavitenda ni nuju. Peru me vëhë ne, cueya me Hasen rë Nina cahntsua xahasen nuju.

*Jesús ne, caxtenda me*

<sup>9</sup> Sacuaha nixtin vëhë ne, cavetju Jesús tsëhë nandya Nasaret, distritu Galilea. Quijitjengui me cha Juan xi cuitenda cha me. Hane cavitenda cha me ngajan ndajyë Jordán. <sup>10</sup> Xi camá caxtenda me ne, xi tu tivetju me tsëhë nandan jan ne, cavëë me xi ngahnga ne tituxaha, hacuaha Hasen rë Nina ne, nduvajne sacuaha tsejen ngu paloma, quiji cavisehen cahntsua xahasen rë me. <sup>11</sup> Hacuaha canuhya rë ngu cjua ngajan ngahnga xi chja cuitjin:



—Ngaye ne, quihndi naha ngaye. Jercu hmucacun ri. Jercu ndama ná ngatsë riji.

*Jesús ne, cafahachuva xitsehen me*

<sup>12</sup> Ngajan xi Jesús ne, ngutjen ni quiji me ngajan ngu xín ta tsëhë xi Hasen rë Nina ne, cavaxëxin rë me. <sup>13</sup> Casetaha me ngajan xín yachan nixtin. Hacuajtjin cojo Satanás quijitjengui rë me. Hane handasa jercu cavangui Satanás chuva rë xi choho sahmi Jesús ne, peru casahmi me. Hacuaha quiji ángel caviyujutaha xi cjuahacuenda rë me.

*Jesús ne, vetsihin me cojo xa rë me*

<sup>14</sup> Hacuaha camá nga ngu xcusun xi xuta xi matitjun ne, caveya me cha Juan ndavaya. Cavatju vëhë ne, sehe cavuya cafe nga Jesús distritu Galilea, cachja me cojo xuta cjua rë Nina. <sup>15</sup> Cuitjin cachja me:

—Camatiña nixtin xi Nina ne, cuitexa me ngasunhdë. Vëhë xi meje rë xi nindeyun cjuatacun nuju hacuaha cata-macjain nuju cjua xi tichjá cojo nuju.

*Jesús ne, cajindaya me ñuju cha xi tsuva rë chu ti xi cuma cha ladu rë me*

<sup>16</sup> Nixtin xi catsuyihiya me hya ne, cavatju me tjehen laguna tsëhë Galilea. Hora hya ne, cavëë me cha Simón cojo cha Andrés hntsë cha. Titsingatjenya cha nahya ngajñi laguna jan, tsëhë xi ha tuxa xa vëhë sahmi cha. <sup>17</sup> Hane ngajan xi cachja me cojo cha ta:

—Nduvun cuanguen cojo ná. Hane cuicuyá nuju xi nuvun xuta xi cuisehen me ladu naja ngojo rë xi chu ti nuvun. —Cuatjin cachja me.

<sup>18</sup> Hane hora vëhë ni caviyuju cha nahya jan ne, quiji cha cojo me. <sup>19</sup> Ha xcun xi ha cjuí Jesús cojo cha xi cuacun jan hitsë ni nguvan ne, cavëë me cha Jacobo cojo cha Juan hntsë cha, quihndi rë Zebedeo. Hinchá cha cahntsua barcu, tifuyataha cha nahya. <sup>20</sup> Hane hacuaha cajindaya me cha. Sehe caviyuju cha nahmi rë cha xi hmí Zebedeo cojo mosu rë me ngajan cahntsua barcu. Sehe quiji cha cojo Jesús.

*Ngu cha xi jiya rë ngu xitsehen*

<sup>21</sup> Hya xi camá ne, cafehe me cojo catsiñuju cha xi cuacun vëhë nandya Capernaum. Hane hya xi cavechu nixtin xi ch-jahájenda rë ne, quiji me yungun, cavicuya me xuta. <sup>22</sup> Hane xuta jan ne, quijircun rë me hacutjin vicuya Jesús ta, tsëhë xi tivicuya me sacuaha ngu xi matitjun jain, hacuiin sacuatjin maestru xi vicuya ley rë xuta tsëhë nangui Israel. <sup>23</sup> Hacuaha ha tu ñahñu canduva ngu cha xi jiya xitsehen cahntsua xahasen rë cha ngajan cahntsua yungun jan. <sup>24</sup> Hane cuitjin cajindaya cha:

—Ngayun ne, ¿mé cuenda nuju tsijin? ¿Há nduvun nicjun niji? Ngayun ne, Jesús tséhë nandya Nasaret ngayun. Hacuaha hvë xi ngayun xi tsajin jyë nuju ngayun xi catsingatju nuju Nina.

<sup>25</sup> Hane Jesús ne, cachja cjan me cojo xitsehen xi jiya xahasen rë cha jan. Cuitjin cachja me:

—Jyuu nechin. Hacuaha tetjixin tséhë cha vi.

<sup>26</sup> Xi tu cahmexcuen cha xi casahmi xitsehen ne, hisca cajindaya, hane cavetjuxin tséhë cha. <sup>27</sup> Yëjë ni xuta jan ne, jemu quijircun rë me, hisca cavisiajmi me cojo xicjin me cuitjin:

—¿Mé nga xcusun vihi ni? Ngu cjua xatsë xi vicuya me vihi, ta hisca xitsehen, hacuaha hndë tséhë me.

<sup>28</sup> Hacuaha marcu macjain canuhya rë tséhë me jinguyëjë ni ladu tséhë distritu Galilea.

*Jesús ne, sahmi me xi mandaja nahya rë Simón Pedru*

<sup>29</sup> Hya xi camá ne, cavetju me yungun jan, quiji me ndava cha Simón. Quiji me cojo cha Jacobo cojo cha Juan, hacuaha cojo cha Andrés hntsë cha Simón. <sup>30</sup> Hane nahya rë cha Simón ne, jiña na xi hmu rë na cojo chihinsuë. Hane ngutjen cachja cha cojo Jesús xi hmu rë na. <sup>31</sup> Ngajan xi quiji tiña Jesús hiscan jiña na, cafaha me tsja na, catsisatjen me na. Hane hora vëhë ni, casejyu suë xi má rë na. Hisca cafaha cuenda na xi sinë me cojo xicjin me.

*Jesús ne, sahmi me xi mandaja xutacjín xi hmu rë*

<sup>32</sup> Hane xi cavetje tsuhi ne, jemu cjín xuta quijicojo me xuta hmu rë hiscan tacun Jesús, hacuaha cojo me xi híncha xitsehen xahasen rë, <sup>33</sup> camatangun me cojo xuta nandya ngajan tingotjo ndihya. <sup>34</sup> Hane jemu cjín xuta hmu rë camandaja me xi casahmi Jesús, xuta xi má rë me tu mé ni chíhin xi má rë xuta. Hacuaha jemu cjín xitsehen cavaxëxin me tséhë xahasen rë xuta. Hane casuaain me cahndë xi cachja xitsehen ta tséhë xi ha vëë rë me. Hane ngutjen cuichja ta me vëhë xi catsingatju Nina me.

*Jesús ne, sua machaya rë xuta cjua rë Nina ngajan yungun*

<sup>35</sup> Xi camá nchujuni, jñu sa nguitajñu cavisatjenhnga me. Hane cavetju me ndihya quiji me ngu cahndë hiscan xin. Hane ngajan cavisiajmi me cojo Nina. <sup>36</sup> Ngajan xi cha Simón cojo cha xi yahnga jan ne, cavanguise cha Jesús. <sup>37</sup> Hane xi casacu rë cha me ne, sehe cachja cha cojo me ta:

—Jemu cjín xuta cafehetjengui nuju me. —Cuatjin chja cha.

<sup>38</sup> Ngajan xi cachja me cojo cha ta:

—Cuanguen sa nandya xi siu tahndee, cojo sa xi hacuaha cuichjá cojo xuta vëhë cjuarë Nina ta tsëhë xi xa vëhë canduvá. —Cuatjin cachja me.

<sup>39</sup> Hane sehe quiji sa me yungun xi siu yëjë ni nandya tsëhë Galilea. Cachja me cojo xuta cjuarë Nina, hacuaha cavaxëxin me xitsehen xi hinchaxahasen rë ngujo xuta xi siu nandya jan.

*Jesús ne, sahmi xi mandaja ngu cha xi marë chíhin xi vitaharë yojo naja*

<sup>40</sup> Hya xi catsujyihya me nandya xi cuacun vëhë, hya cachja ngu cha xi yaha rë ngu chíhin vitaha xi setaha chuxin naja. Hane cachjajyë cha cojo Jesús, hisca cavixcuhnchi chaxcun me, sehe cachja cha cuitjin:

—Sá xi nihñu favor ne, cuma naxunxun chíhin xi yaha ná.

<sup>41</sup> Jesús ne, camayuma rë me cha. Hane cavetahatsja me cha. Sehe cachja me cojo cha cuitjin:

—Joho. Ha camandaja ngaye. —Cuatjin cachja me.

<sup>42</sup> Hane ngutjen ni cavetjuxin chíhin jan ne, camandaja cha. <sup>43</sup> Hane sehe casua me cha cuidadu. Hane ngutjen ni catsingatju me cha, quiji cha. <sup>44</sup> Cuitjin cachja me:

—Ndaja cuidadu xi canujiin camahani xcusun vi cojo hisca ngu. Peru tihin ningacuin yojo riji cojo nahmi ngajan yungun. Hane tejñi ngu cjuatjo sacuatjin chja ley tsëhë Moisés ta camandaja ngaye, cojo sa xi xuta ne, cumacjain rë me. —Cuatjin cachja me cojo cha.

<sup>45</sup> Peru xi cavetju cha quiji cha ne, cavetsihin casua cha camachaya rë xuta. Jercu cachjatë cha tsëhë xcusun vëhë. Vëhë xi Jesús ne, ha quihndë cavisiin me nandya ta tsëhë xi ha ngutjen jercu tsë xuta. Hane ngajan ni ngujiña casetaha me. Peru xuta ne, yëjë ni ladu cavetju me, quijitjengui me Jesús.

## 2

*Jesús ne, sahmi me xi mandaja ngu cha xi cahme yojo rë*

<sup>1</sup> Hane cahntsua xi ngujo nixtin ne, cavuya quiji nga Jesús cojo cha ladu rë me ngajan nandya Capernaum. <sup>2</sup> Hane xi casacu cjuarë xi tacun ndihya me ne, jercu camatangun xuta, hisca tingotjo ndihya quitsë me. Hane sehe cachja Jesús cjuarë Nina. <sup>3</sup> Ngajan xi canduva ñuju cha hiscan tacun Jesús, yahahnga cha ngu cha xi cahme yojo rë. <sup>4</sup> Hane xi maji ficojo cha cha hisca hiscan tacun Jesús, tsëhë xi jemu quitsë xuta ne, cavuxaha cha rcu ndihya quixi rë hiscan tacun me. Sehe ngajan catsinguissehen cha cha hmu rë jan cojo ni nachan xi quisun cha. <sup>5</sup> Hya xi cavëë Jesús hacutjin xi macjain rë cha me ne, sehe cachja me cojo cha hmu rë jan ta:

—Jyë riji tsan ne, ha camanchataha. —Cuatjin cachja me.

<sup>6</sup> Hora vëhë ne, hacuaha tivisiñuju ngujo cha maestru tsëhë ley, hacuaha taha titsingatahacacun cha cuitjin: <sup>7</sup> “¿Mé má cuitjin chja cha xi cuijyihí vi?, ta Nina tsixcuehyu cha. Tsajin yo xi cuma tsinchataha jyë rë ngu xuta ta suva ni Nina má sahmi me.” <sup>8</sup> Jesús ne, ha hisca vëë me cojo cjuatacun rë me xi cuatjin tsingatahacacun cha xi cuacún vë, hane sehe cavinenguise me cuitjin:

—¿Mé má cuatjin ningatuhuntacun cjuatacun vëhë? <sup>9</sup> ¿Jarë xi hitsë sa tsaví xi cuichjá cojo cha hmu rë vi? ¿Há xi: “Jyë riji ne, ha camanchataha?” O há tsajin ne, ¿há xi: “Tisatjinhgue ne, chjaye nijña riji, hane tjihin?” <sup>10</sup> Hindë cojo sa xi cumachaya nuju xi Nina cavitexa me ngahan xi tsinchátaha jyë rë xuta nguehe ngasunhndë ne, nguehe chut-sujun hacutjin cuichjá cojo cha hmu rë vi.

Sehe cachja me cojo cha hmu rë cuitjin:

<sup>11</sup> —Tisatjinhgue tsan. Chjaye nijña riji ne, tjihin ndya riji. —Cuatjin cachja me.

<sup>12</sup> Ngajan xi cha hmu rë jan ne, ngutjen ni cavisatjehnga cha, cafaya cha nijña rë cha, sehe café cha xcun ni ngayëjë xuta. Vëhë xi ngayëjë ni xuta jan ne, jemu quijircun rë me. Hacuaha cachja me ta:

—Jemu cjuarcun jain Nina. Vëhë xi cuatjin camá casahmi me. Cjëë camahani chaan xcusun sacuaha vëhë. —Cuatjin cachja xuta.

*Jesús ne, jindaya me Leví xi má me xuta ladu rë Jesús*

<sup>13</sup> Ngu nixtin nga ne, cavatju Jesús tjehen laguna. Hane jemu cjín xuta quijitjengui rë me. Hane cavicuya me xuta jan.

<sup>14</sup> Hane hya xi cjuí cjuí me ne, cavechu me hisca tacun cha Leví, quihndi rë cha Alfeo. Tacun cha ndihya hiscan faha cha xi machjitje tsëhë xi xteña. Sehe cachja Jesús cojo cha cuitjin:

—Cuanguen cojo ná.

Hya xi camá ne, cavetju cha, quiji cha cojo me.

<sup>15</sup> Cuitjin camá nga ngu nixtin jan, tijinë Jesús niñu ndava cha Leví. Hacuaha jemu cjín sa cha xi faha tujúnsa cojo jingu sa cha tsehen tijinë cha cojo Jesús cojo cha ladu rë me, ta hacuaha jemu cjín xuta xi cuacún vë xi tjengui rë me. <sup>16</sup> Peru cha maestru tsëhë ley cojo cha tsëhë partido fariseo ne xi tu cavëë cha xi tijinë Jesús cojo cha xi cuacún jan ne, sehe cavinenguise cha cojo cha ladu rë me cuitjin:

—¿Mé má cuatjin tijinë Jesús cojo cha xi choho xcusun rë vë ni?

<sup>17</sup> Xi tu cahndë Jesús cjuá rë cha ne, sehe ngajan xi cachja me cojo cha ngu ejemplu cuitjin:

—Xuta xi hacuain hmu rë me ne, mijí rë me doctor. Me xi hmu ni rë me ne, me vëhë xi mameje rë me. Hacuaha ha

chuva vëhë ni canduvá ngahan. Canduvá cuanguë xuta xi choho cjuatacun rë, cuichjá cojo rë me cjua rë Nina. Peru hacuïn cojo me xi ha tyjahi cjuatacun rë. —Cuatjin cachja me.

*Vinenguise xuta tsëhë xun rë Nina*

<sup>18</sup> Camá xi cha ladu rë cha Juan cojo cha tsëhë partidu fariseo ne, nixtin hya ne siu cha xun tsëhë Nina. Hane cafehe ngujo cha xi cavinenguise rë Jesús cuitjin:

—¿Mé má cha ladu rë cha Juan cojo cha tsëhë partidu fariseo ne, tijinii cha quihndë ta, siu cha xun rë Nina, hane cha ladu nuju ne, faharcuïn cha cuatjin ni?

<sup>19</sup> Sehe catsicuya Jesús cjua cojo ngujo ejemplu cuitjin:

—Jinguyëjë rë xi cha xi cuixan ne, tacun cha cojo xuta rë cha ne, cumaji cuiyuju me xun rë Nina. <sup>20</sup> Peru cuinduva nixtin hya xi cha xi vixan ne, cojo cjuachan cjucojo condra rë cha cha. Hane hya cuiyuju xuta rë me xun rë Nina.

*Ejemplu tsëhë tsjian cojo chuxin xi xincha xan*

<sup>21</sup> Hacuaha cachja me cojo cha cuitjin:

—Tsajin yo xi fuyataha tsjian changá cojo ngu rquí tsjian xatsë ta tsëhë xi cjëe cjueyu. Cuatjin ta, sá xi cuatjin sahmi me ne, xi cjueyu tsjian xatsë jan ne, cuicheya rë tsjian xi changá jan hane sahmi jyë sa rë hiscan xi ntsun. <sup>22</sup> Hacuaha tsajin yo xi vincha xan xatsë cahntsua chuxin changá ta, sá xi cuatjin sahmi me ne xan jan ne, tsitsinga rë chuxin jan. Hane xan jan ne, chajan. Hacuaha cuetsun chuxin jan. Vëhë xi xan xatsë ne meje rë chuxin xi xatsë. Maji secjan jo xcusun.

*Cha ladu rë Jesús ne, fane cha trigu nixtin xi chjahájenda rë*

<sup>23</sup> Cuitjin camá nga ngu nixtin xi chjahájenda rë. Hora xi tivatju Jesús cojo cha ladu rë me hiscan tjin tjë trigu ne, cavetsihin cavotohosun cha tsë tsë trigu jan. <sup>24</sup> Sehe cha tsëhë partidu fariseo cavinenguise cha me cuitjin:

—¿Mé má cuatjin quihndë nixtin xi chjahájenda rë ne, sahmi cha ladu nuju xa xi chja ley xi cumaji nihña?

<sup>25</sup> Sehe Jesús ne, cafayangui me tsëhë cha cuitjin:

—¿Há cjëe camahani chutayun xujun hiscan chja tsëhë xcusun xi casahmi David hya xi tjin rë me cjuandya xi jemu vojo rë me cojo cha xi siutaha cojo me? <sup>26</sup> Hya xi Abiatar má me nahmi xi matitjun jan ne, hya cavisehen me ndava Nina. Hane David ne, cajnë me pan xi viyuju xcun Nina. Hacuaha casua me cajnë cha xi siu cojo me. Cuatjin casahmi me handasa xi chja ley ta suva ni nahmi tjin cahndë xi cuma sinë me pan xi cuacún vë. —Cuatjin cachja Jesús.

<sup>27</sup> Ngajan xi cachja me cojo cha ta:

—Xi má nuju ngayun ne, ¿há titjun cavejña Nina nixtin xi chjahájenda rë, sehe catsindaja me xuta xi cjuaharcun rë nixtin vëhë? ¡Hacuiin cuatjin camá! Nina ne, titjun catsindaja me xuta, hane xi camá ngascan ne, cavajña me nixtin xi cjuahajenda xuta. <sup>28</sup> Cuatjin ne, ngahan xi tsëhë Nina canduvá ne, hacuaha satë ná ngahan sacuaha nai rë xi cuichjá mé xi ndatjin xi cuma nixtin xi chjahájenda rë. —Cuatjin cachja Jesús.

### 3

*Jesús ne, sahmi me xi cama ndaja ngu cha xi quixinhñu ngu ladu tsja cha nixtin sabadu*

<sup>1</sup> Ngu nixtin nga xi quiji Jesús ngu yungun ne, ngajan tacun ngu xihin xi quixihñu ngu ladu tsja cha. <sup>2</sup> Hane cha tsëhë partidu fariseo ne, cojo sa xi cuma cuinchajyë cha Jesús ne, siu cha cuidadu, ¿há tsindaja Jesús hiscan hmu rë xihin jan nixtin xi chjahájenda rë? <sup>3</sup> Hane ngajan xi cachja Jesús cojo cha xi quixihñu tsja jan cuitjin:

—Xcun ni yëjë xuta vi ne, tisechin.

<sup>4</sup> Sehe cavinenguise me xuta xi siu me cuitjin:

—¿Mé xi sacu cahndë nixtin xi chjahájenda rë? ¿Há xi ndaja ne, o há xi ndajin, há xi naxentjen xuta o há xi niquen me?

Peru cafayinnguini me hisca hitsë. <sup>5</sup> Vëhë xi Jesús ne, cama cjan rë me. Hacuaha cama vacacun me ta, tsëhë xi sahmi yumahasen xuta. Xi tu cavutsejen Jesús yëjë ni xuta ne, sehe cachja me cojo xihin hmu rë jan cuitjin:

—Nixingun ntsun.

Xi tu catsixinga cha tsja cha ne, ha camandaja. <sup>6</sup> Ngajan xi cha tsëhë partidu fariseo ne, cavetju cha yungun. Quiji casahmitangun cha cjua cojo cha tsëhë partidu Herodes xi tsiquehen cha Jesús.

*Xutacjín xi camandaja me*

<sup>7</sup> Ngajan xi Jesús cojo cha ladu rë me ne, quiji nga me laguna. Hacuaha jemu cjín xuta tsëhë distritu Galilea qui-jitjengui me Jesús. <sup>8</sup> Hane xi camachaya rë xuta xcusun xi casahmi Jesús ne, canduva camaha sa xuta tsëhë cahndë xi cuicun vi: nandya Jerusalén cojo yëjë sa nandya tsëhë distritu Judea, cojo distritu Idumea, cojo ngunda vëhë tsëhë ndajyë Jordán cojo hisca tahndee rë nandya Tiro cojo nandya Sidón. <sup>9</sup> Sehe ngajan xi cachja me cojo cha ladu rë me ta meje rë xi cuejña cha ngu barcu tiña hiscan tacun me, ta jemu cuehnchun xuta me. <sup>10</sup> Hane tsëhë xi jemu cjín xuta camandaja me xi casahmi Jesús ne, vëhë xi yëjë ni me xi hmu rë catsëxti me ne, cojo sa xi ndastu satë tsja me Jesús. <sup>11</sup> Hane xi cavëë xitsehen xi hinchaxahasen rë xuta jan Jesús ne, quiji

caticja xuta jan hisca tacun Jesús. Sehe ña jindayatë xuta jan, ta xitsehen casahmi xi cachja me cuitjin:

—Ngayun xi Quihndi rë Nina ngayun. —Cuatjin cajindaya me.

<sup>12</sup> Ngajan xi Jesús ne, cavitexa me xitsehen xi tsajin yo cuichja cojo yo me.

*Jesús ne, vuxijin me tejó me xi cumá apóstol*

<sup>13</sup> Hya xi camá ne, camiji Jesús ngu naxi. Sehe catsingatju me cjua rë cha xi meje rë me. Hane quijitjengui cha me. <sup>14</sup> Hane cavaxijin me tejó cha xi cuisecoo rë me, hane hacuaha tsingatju me cha cjue cuicuya cha xuta cjua rë Nina, <sup>15</sup> hacuaha cuaxëxin cha xitsehen xi híncha xahasen rë xuta. <sup>16</sup> Cha xi tejó tsëhë cha ladu rë me cuitjin hmí ra: cha Simón ne, hacui cha xi cachja Jesús xi hmí rë Pedru, <sup>17</sup> cha Jacobo cojo cha Juan hntsë cha ne, xi quihndi rë Zebedeo, cha xi casuañihi me Boanergerne, ngu ñihi xcuehyu xi meje cuichja Jemu Xti Naja, <sup>18</sup> cha Andrés, cha Felipe, cha Bartolomé, cha Mateo, cha Tomás, cha Jacobo, quihndi rë Alfeo, cha Tadeo, cha Simón xi tsëhë partidü cananayu, <sup>19</sup> hane cha Judas tsëhë nandya Querieste, cha xi cuiteña rë Jesús cojo condra rë me.

*Jyë xi cumajin cumanchataha*

<sup>20</sup> Hya xi camá ne, cavuya quiji nga Jesús ndihya hiscan véjña me. Hacuanitjin nga camatangun xuta cjin. Hisca xi sinë Jesús niñu cojo cha ladu rë me maji. <sup>21</sup> Hya xi camachaya rë xuta rë me cjua vëhë ne, quiji me xi cuaxëxin rë me, tsëhë xi há sa má rë me, sca rë Jesús.

<sup>22</sup> Hane cha maestru tsëhë ley ne, canduva cha tsëhë Jerusalén. Sehe cavisiajmi cha cojo xicjin cha cuitjin:

—Jiya Satanás xahasen rë me. Hane ngatsë rë xitsehen xi matitjun vë ne, vëhë xi ma vaxëxin Jesús xitsehen. —Cuatjin cachja cha.

<sup>23</sup> Ngajan xi casahmi tangun Jesús cha xi cuacun vëhë ne, sehe cojo ngujo ejemplu cachja me cojo cha cuitjin:

—Jemu yuma hasen rë Satanás sá xi suva ni cuaxëxin xicjin. <sup>24</sup> Ha hyan ta sá xi xutaxa rë tsëhë ngu nandya scaan me ngajñi rë me ne, cjuicanii rë me. <sup>25</sup> Hacuaha sá xi xuta xi ngu ndava me ne, scaan me ngajñi rë me ne, ngajan chaja. <sup>26</sup> Ha cuanitjin rë Satanás ta sá xi scaan cojo xicjin ne, ha quihndë cumachjiriin xi matitjun ta, tsëhë xi ha quihndë cuihndiin xicjin tsëhë.

<sup>27</sup> Hacuanitjin ne, hisca ngu cha chëjë cumaji tu cuisehen ni cha ndava ngu xuta xi hñu ngahñu rë me xi tsichëjë cha tsëhë me. Cumaji sa xi hacuiin titjun tsihñu cha me ta cuatjin xi cuma tsichëjë cha tsëhë me.

<sup>28</sup> Cuichjá cojo nuju cjuaquixi ta tu mé ni jyě xi sahmi xuta hacuaha tu mé ni cjuaxi choho cuichja me ne, sacu rě me cjuaninchataha, sá xi cuijacun me jyě rě me cojo Nina. <sup>29</sup> Peru tu yo ni xi choho cuichja tsěhě Hasen rě Nina ne, tsajin ngu nixtin xi sacu rě cjuaninchataha ta jemu jyě jyě rě.

<sup>30</sup> Cuatjin cachja Jesús ta tsěhě xi cachja cha jan xi jiya xitsehen xahasen rě me.

*Naa rě Jesús cojo xicjin me*

<sup>31</sup> Hane cafehe naa rě me cojo hntsě me ne, ngajan ni ndatsen hinchacun me ne, catsingatju me cjuaxi meje cuisiajmi me cojo Jesús. <sup>32</sup> Věhě ta jemu cjin xuta siundee me Jesús ne, sehe cachja xuta cojo rě me cuitjin:

—Nutsujun ni. Ná nuju cojo tsuhun cojo tichjun ne, jindaya nuju me ngajan candatsen.

<sup>33</sup> Sehe cafayangui Jesús cuitjin:

—¿Yo xi má nuju xi ná naha cojo xingueen?

<sup>34</sup> Cavutsejen me xuta xi siundee rě me, sehe cachja me cuitjin:

—Ngayun xi nechun nguehe, ngayun xi sacuaha ná naha cojo xingueen <sup>35</sup> ta, tu yo ni xi sahmi sacuatjin chja Nina ne, věhě xi sacuaha ná naha sacuaha xingueen.

## 4

*Ejemplu tsěhě cha xi tsitjě*

<sup>1</sup> Ngu ndiya nga ne, cavetsihin cavicuya Jesús xuta tjehen laguna. Hane ngu cuatjin nga jercu tu catsě camahani xuta hiscan tacun me. Věhě xi cavisehen me ngu barcu cavějña me. Hane quijicojo rě me hitsě xcun nandá, ngajan cavějña. Hane yějě ni xutacjin jan ne, caviyuju me nangui quixí tjehen nandan. <sup>2</sup> Sehe cavicuya Jesús me jemu cjin cjuaxi. Cuitjin cachja me ngu ejemplu:

<sup>3</sup> —Cuejña ni xi ngu xihin ne, quiji catsitjě cha trigu. <sup>4</sup> Hane hora xi ticandi cha tjě rě ne, ngujo ne, cavixu ndiya. Hane canduva nisě ne, cajně chu. <sup>5</sup> Ngujo nga ne, cavixu hiscan xi jemu ndyojotě, hacuaha jemu chuva nihndě quisun. Hane jemu xati cavetju ta tsěhě xi hacuiin tjain nihndě quisun.

<sup>6</sup> Hane xi jemu suě camá ne, caxiya tsěhě xi jemu chuva tyjama rě. <sup>7</sup> Ngujo nga ne, cavixu ngajñi rě nahyá. Xi tu camayehe nahyá ne, casahmihndě rě xitjě, hane camayiin.

<sup>8</sup> Hane ngujo nga ne, cavixu hiscan ndajyihni nangui. Věhě ne, jemu ndaja camá, hisca yehe hnga camá ya rě. Ngujo ne jemu ndaja camá. Ngujo nga jan ne, hitsě sa ndaja camá. Hane xi yahnga jan ne, jercu vatjutaha ndaja camá. Cuatjin fi ejemplu tsěhě cha xi tsitjě trigu.



<sup>9</sup>Jarë ngayun xi meje nuju cuma nuju ne, ningatuhuntacun nduju mé vijne cjuá vë.

<sup>10</sup>Hya xi café xutacjín jan ne, ngajan xi me xi siundee cuaha jan cojo cha xi tejó jan ne, cavinenguise me tséhë cuentu jan.

<sup>11</sup>Sehe caféyangui Jesús cuitjin:

—Ngayun ne casua nuju Nina cahndë xi vijne rcun cjuatahahma tséhë gobiernu xi sahmi me. Peru me xi hacuiin ladu naja ne, cojo suva ejemplu tichjá cojo rë me, <sup>12</sup>cojo sa xi handasa cuihndë me ne, peru cuijnii rcu me ta, sá tu tsindeya me cjuatacun rë me ne, hacuaha cumanchataha me. —Cuatjin cachja Jesús.

*Jesús ne, chja me mé vijne ejemplu tséhë cha xi tsitjë*

<sup>13</sup>Sehe ngajan xi cachja Jesús cojo cha ladu rë me ta:

—Sá xi ha canuhyuun ejemplu vëhé ne, hacutjin cuinuhyun sa xi yahnga ni. Nguéhe cuichjá cojo nuju mé vijne ejemplu xi cachjá cojo nuju vë. <sup>14</sup>Cha xi tsitjë trigu ne, sacuaha ngu cha xi chja cjuá rë Nina cojo xuta. <sup>15</sup>Ngujo me xi vihndë cjuá vëhé ne, sacuaha tjë rë trigu xi cavixu ndiya ta cjuá ndajyihi xi vihndë me ne, ngutjen ni nduva Satanás ne, fahataha cjuá xi caseya cahntsua xahasen rë me. <sup>16</sup>Yahnga nga me xi vihndë cjuá vëhé ne, sacuaha tjë xi cavixu hiscan jemu ndyojotë ta hya xi vihndë me cjuá ndajyihi ne, ngutjen ni jemu cojo cjuasua macjain rë me cjuá. <sup>17</sup>Peru tséhë xi hacuiin nguñaja cacun me macjain rë me ne, vëhé xi seyaain cahntsua xahasen rë me hya xi má cjuandya, sacuaha cumá rë tjë xi jemu chuva tyjama rë ne ta, cain rë xi jyë nixtin. <sup>18</sup>Hane ngujo nga me xi vihndë cjuá vëhé ne, sacuaha tjë xi cavixu ngajñi nahyá. Vihndë me cjuá. <sup>19</sup>Peru tséhë xi jemu tjín rë me cjuandya hacuaha jercu meje rë me xi cuma nchina me, vëhé xi chuva cuenda sahmi me cjuá ndajyihi xi cavisiñuju me. Fë ne, tsajin mé vetjucaa. <sup>20</sup>Ngujo nga me xi vihndë cjuá ndajyihi vëhé ne sacuaha tjë xi camatjë hiscan ndajyihi nangui ta xi tu vihndë me cjuá vëhé ne, faha nguñajacacun me. Vëhé xi ngujo me ne, ndaja cuiyujuchihin cjuatacun rë me. Ngujo nga me ne, hitsë sa ndaja cuiyujuchihin cjuatacun rë me. Hane me xi yahnga jan ne, jercu tu ndaja camahani cuiyujuchihin cjuatacun rë.

*Ejemplu tséhë lámpara*

<sup>21</sup>Hacuaha cachja me cojo rë me cuitjin:

—Hya xi setaha rë candil ne, ¿jani cuejña? ¿Há ngahma caxa ne? o ¿há ngahma nachan? Hacuiin cuatjin nihñu ta, cuejña cahndë rë. <sup>22</sup>Sacuaha ndaja tsejen ndihi jan ne, hatuxa cuechu nixtin xi cuijne rcu xuta cjuá naha xi hacuiin ndaja vijne rcun me quihndë. <sup>23</sup>Jarë ngayun xi meje nuju

cumá nuju ne, ningatuhuntacunndujun mé vijne cjuá vë.  
<sup>24</sup> Hacuaha cachja sa me cojo xutacjín cuitjin:

—Ndaja tetuhunrcun xi tivisiñuju. Chuva xi tuhun ne, ha chuva vëhë sua nuju Nina. Hisca quisun sa sua nuju me. <sup>25</sup> Me xi ha tjin rë ne, sua sa Nina me, hane me xi tsajin cjín rë ne, cjuahataha Nina xi tjin rë me.

### *Ejemplu tsëhë tutjë xi majyë*

<sup>26</sup> Sehe cachja Jesús cojo xutacjín jan ngu ejemplu cuitjin:

—Xuta xi cuisehen me ladu rë Nina ne, ha tuxa cumá cjín me sacuaaha tjë tsëhë trigu xi tsitjë ngu xihin xcun nangui rë me. <sup>27</sup> Fañafë cha nguixun ne, visatjenhnga cha nguitajñu. Hane tjë ne, vetju, hacuaha mayehe xitjë. Peru xihin jan ne, hvíin hacutjin camá xi camayehe xitjë jan. <sup>28</sup> Nangui ne, ha tuxa má xitjë. Titjun ne, cuetju xca rë. Xi cuijin sa ne, cuetju tú chihndë rë. Hiscan xi cuijnetaha ne, jemu cjín tutjë rë cuetju. <sup>29</sup> Hane hya xi camacha tutjë rë ne, sehe tsingatju xihin jan mosu xi cjue cuatë ta tsëhë xi ha cavechu nixtin xi xti rë.

### *Ejemplu tsëhë tutjë rë mostasa*

<sup>30</sup> Sehe cachja Jesús cuitjin:

—Nguehe cuichjá cojo nuju ngu nga ejemplu tsëhë gu-biernu xi sahmi Nina. <sup>31</sup> Xuta xi cuisehen ladu rë Nina ne, cumacjín me sacuaaha majyë ngu ya mostasa. Tutjë rë ya vëhë ne, hitsë sa langa xi cumá rë yëjë ni tutjë xi tjin ngasunhndë. <sup>32</sup> Peru hya xi matjë ngu ne, sehe cuetju xca rë hacuaha hitsë sa jyë má xi cuma rë yëjë ni xca xi chine. Hane tsja rë ne, hacuaha yehe, hisca nisë ma sahmi chu ndava chu xcun tsja rë hiscan tjahnguen.

### *Mé tsëhë xi Jesús ne, sahmixa me cojo ejemplu*

<sup>33</sup> Jemu cjín ejemplu sacuaaha vëhë cachja Jesús hya xi tivicuya me xuta cjuá rë Nina, hatucutjin hora xi cama cave-taharcu xuta. Hane cojo xuta ne, cachja me suva ejemplu. <sup>34</sup> Peru hya xi suva siu cha ladu rë me ne, casua cuenda me cha mé vijne yëjë ejemplu jan.

### *Jesús ne, tsisejyu me tjo cojo tsindyu rë laguna*

<sup>35</sup> Xi quiji hora tsëhë nixtin vëhë ne, Jesús ne, cachja me cojo cha ladu rë me cuitjin:

—Cuanguen ngunda vëhë. —Cuitjin cachja me.

<sup>36</sup> Ngajan xi caviyuju ni me xutacjín jan ne, sehe cha ladu rë me ne, quiji cha cojo me tu cuanitjin ni. Hacuaha cojo sa barcu xi yahnga jan ne, quiji tangun cojo rë me. <sup>37</sup> Hora xi cjui barcu ne, canduva ngu tjo xi jercu tu hñu camahani. Hane tsindyu rë laguna jan ne, vixuya cahntsua barcu, hisca meje tsë rë barcu cojo nandá. <sup>38</sup> Hane Jesús ne, hisca cahunchun

barcu jan jiñafë me, tijiña me xcun tsjian sanercu me. Hya xi camá ne, catsingasca cha me, sehe cachja cha cojo me cuitjin:

—Maestro. Xati nihñutacun catasca nuju. ¿Há tsajin mé cuenda nuju ta, meje xtyusehen barcu cojo naja?

<sup>39</sup> Hane cavasca rë me ne, cachja me cojo tjo cojo laguna cuitjin:

—Jyuu nechun.

Xi tu cachja me cuatjin ne, casejyu yëjë ni. <sup>40</sup> Ngajan xi cachja me cojo rë cha cuitjin:

—¿Mé má cuatjin jemu rcun? ¿Hacujiyih ni xi hisca cjëë cumacjain ndaja nuju ngahan?

<sup>41</sup> Hya xi camá ne, jercu catsacjun camahani cha ladu rë me jan. Hane sehe ngajñi rë cha jan ne, cavisiajmi cha cuitjin:

—¿Yo me xi cuijyih vi? ta, hisca tjo hisca laguna hndë tsëhë me.

## 5

### *Cha tsëhë nandya Gadara xi jiya ra xitsehen*

<sup>1</sup> Hya xi camá ne, cafehe Jesús cojo cha ladu rë me ngunda vëhë tsëhë laguna, hiscan ladu rë xuta nandya Gadara.

<sup>2</sup> Hane xi cavetju me barcu jan, canduva tiña ngu xihin xi hinchaxitsehen xahasen rë, canduva cha tsëhë ngajñi rë tsjun ngajan tahndë. <sup>3</sup> Hacuaha ha ngajan tacun cahndë cha tahndë. Hacuaha tjihñu cha xi sejyu cha hisca cojo cadena.

<sup>4</sup> Jemu cjan rë cha, cjín ndiya camahñu tsja camahñu ntsacu cha cojo cadena, peru tu cavicheya ni cha. Vëhë xi tsajin yo xi cama casahmi cojo cha. <sup>5</sup> Catsujyihya cha nixtin nixten ngajan tahndë cojo ngajñi nguijña cha. Hane cajindayatëcjin ni cha, hacuaha cavanguihmucjin ni cha yojo rë cha cojo ndy-ojo. <sup>6</sup> Hane hora xi cavëë cha Jesús ne, cjin sa nduva cha ne, vanga cha quiji cavixcuhnchi cha xcun Jesús xi cjuaharcun cha me. <sup>7</sup> Ña cajindayatë cha cachja cha cuitjin:

—¿Mé cuenda nuju tsahan, Jesús, Quihndi rë Nina xi matitjun? Catamaniji rë Nina xi tuhundyun ná.

<sup>8</sup> Cuatjin cachja cha ta tsëhë xi ha tichja Jesús xi cuetjuxin xitsehen jan tsëhë xahasen rë cha. <sup>9</sup> Sehe cavinenguise me ñih rë cha. Hane cafayangui cha tsëhë me cuitjin:

—Ñih naha ne, Sindadu Cjín, tsëhë xi jemu cjín ngayin.

<sup>10</sup> Sehe jercu cafehya cha cojo Jesús xi hacuiin cjín camaha tsingatju me xitsehen jan tsëhë cahndë vëhë. <sup>11</sup> Jinguyëjë rë xi cuatjin tijima ne, ngajan tiñataha ne, tacun ngu cahndë hiscan chu chinga hinchataha chu tijinë chu. <sup>12</sup> Hane xitsehen jan ne, ña yuma chja cojo Jesús cachja cuitjin:

—Ningatjun niji hiscan siutaha chinga, xi cuisihin cah-ntsua xahasen rë chu.

<sup>13</sup> Hane Jesús ne, joho cachja me. Hane hora xi cavetju xitsehen xahasen rë xihin jan ne, quiji cavisehen cahntsua xahasen rë chinga jan. Sehe yëjë ni chinga jan, xi meje jo mil jan ne, cavanga chu quiji cavetje chu ngu ndetjun tsëhë rcu naxi hane ngajan cavixuya chu ngajñi laguna. Ngajan camiji rë chu, hane cahme chu.

<sup>14</sup> Hane cha xi titsicjén rë chinga jan ne, cavanga cha quiji cha. Casua cha camachaya rë xuta xi siutaha nguijña, cavechu hisca nandya cachja cha. Ngajan xi xuta xi cahndë cjua jan ne, quiji cavutsejen me mé xi camá jan. <sup>15</sup> Cafehe me hisca tacun Jesús, hane cavëë me cha xi jemu cjín xitsehen caxincha xahasen rë, tacun cha, yaja cha tsjian rë cha, hacuaha ha quihndë tsajin mé má rë cjuatacun rë cha. Hane xuta jan ne, jemu catsacjun me camá. <sup>16</sup> Hacuaha xuta xi cavëë hacutjin cavatju cha camá hacuaha hacutjin cavatju chinga camá ne, cachja me cojo xuta xi yahnga. <sup>17</sup> Sehe cavetsihin cachja me cojo Jesús xi catje me tsëhë ladu rë me xi cuicun vi.

<sup>18</sup> Hya xi camá ne, hora xi tivisehen Jesús barcu ne, jercu cafehya cha xi caxincha xitsehen xahasen rë jan xi cjue cha cojo me. <sup>19</sup> Peru Jesús ne casuaain me cahndë xi cjue cha. Hane cuitjin cachja me cojo cha:

—Tjihin ndya riji. Tjihin tjengui xuta riji, hane tinoje cojo rë me xi Nina ne, camayuma rë me ngaye. Hacuaha tinoje tsëhë cjuandaja xi casahmi me cojo ri.

<sup>20</sup> Ha xcun xi cafë cahndë cha cjua xi cachja Jesús ne, sehe cavetju cha quiji cha ladu hiscan xi hmí rë Të Nandya. Hane cavetsihin cha casuacuenda cha cjuandaja xi casahmi Jesús cojo cha. Sehe xuta xi siu cahndë jan ne, jemu quijircun rë me.

*Jesús ne, sahmi me xi mandaja na chjuun xi ma rë xahmajni ndiya ndava Jairo*

<sup>21</sup> Xi tu cavuya nga Jesús cojo barcu ladu vihi tsëhë laguna ne, jercu catsë nga xuta hiscan cafehe me tjeheh laguna. <sup>22</sup> Hacuaha cafehe ngu xutaxa rë yungun rë ngu nandya. Cha vëhë ne, Jairo hmí rë cha. Hya xi cavëë cha Jesús ne, quiji cavixuhnchi cha xcun me. <sup>23</sup> Sehe jercu cafehya cha favor cojo me. Cuatjin cachja cha:

—Quihndi naha ne, ha tu hora sa xi cueya na. Cuanguen ne, cuisanu ntsun na ne, cojo sa xi cumandaja na, hane cuejña sa na cjuahña.

<sup>24</sup> Xi tu cahndë Jesús cjua rë cha ne, sehe quiji me cojo cha. Hacuaha jemu cjín camahani xuta quiji me hacutjin quiji Jesús. Quiji hnchun hnchun me cojo me.

<sup>25</sup> Hane ngajñi rë xuta jan ne, jiyajñi ngu chjuun xi ha nduva tejó nu xi hmu rë na tsëhë chíhin xahmajni. <sup>26</sup> Hane jemu jyë cjuañihi cavatju na camá ta ha ndasa jemu cjín doctor catsirqui me na, tu mahya catsicjë na tujún rë na ta tsajin mé cavetjucaa. Tu hitsë sa jyë camá chíhin rë na. <sup>27</sup> Xi tu cahndë na cjua tsëhë xcusun xi casahmi Jesús ne, quiji tiña na taha ngaxtun me, cavetahatsja na tsjian rë me. <sup>28</sup> Cuatjin casahmi na ta catsingatahacacun na cuitjin: “Sá xi cuetaha ntsa ndastu tsjian rë me ne, cumandaja ngahan.” <sup>29</sup> Hane ngutjen ni caxiya jni xi vixu rë na. Hane hacuaha camachaya rë na ta camandaja na tsëhë chíhin xi má rë na. <sup>30</sup> Jesús ne, camachaya rë me xi tjin xa xi casahmi ngahñu rë me. Cavuya me taha ngaxtun me ne, cavutsejen me xuta jan ne, sehe cavinenguise me cuitjin:

—¿Yo xi casatëtsja tsjian naha?

<sup>31</sup> Sehe ngajan xi cha ladu rë me jan ne, cachja cha cojo me cuitjin:

—¿Hacutjin meje nuju xi cuinújin yo xi casahmi? ta ha chutsujun xutacjín xi ña tísatëtaha me ngayun ndya jan.

<sup>32</sup> Sehe cavutsejen nga me xuta tahndee rë me ne, ¿yo xi cuatjin casahmi? <sup>33</sup> Sehe chjuun xi casahmi jan ne ta ha vëë na hacutjin cavatju na camá ne, ña fatsë na xi catsacjun na camá. Sehe quiji cavixcuhnchi na xcun Jesús, hane cachja na yëjë ni hacutjin xi cjuaquixi. <sup>34</sup> Sehe ngajan xi Jesús ne, cachja me cojo na cuitjin:

—Ha camandaja ngayun ta camacjain nuju. Tjangun cojo cjuasua ta chíhin vë ne, ha quihndë cuyaaïn suaxti nuju.

<sup>35</sup> Jínguyëjë rë xi Jesús tichja cuaha me ne, canduva ngujo me tsëhë ndava xutaxa rë yungun jan. Hane cuitjin cachja me:

—Ha cahme quihndi nuju. Tahanndyaan sa rë maestru.

<sup>36</sup> Peru Jesús ne, handasa cahndë me cjua xi cachja me xi cafehe jan ne, sehe cachja me cojo xutaxa rë yungun jan ta:

—Xi camacjiantacun. Ningatuhuntacun ni xi cumandaja na. —Cuatjin cachja Jesús.

<sup>37</sup> Sehe casuaain me cahndë xi cjue yëjë xuta jan. Suva ni cha Pedru, cha Jacobo cojo cha Juan hntsë cha Jacobo, cha vëhë quiji cha cojo me. <sup>38</sup> Xi cafehe me ndava xutaxa rë yungun jan ne, ngajan siu xutacjín xi jihnda me jindaya me ngatsë rë cjuandusin. <sup>39</sup> Hane xi cavisehen Jesús ndihya ne, sehe cachja me cojo xuta jan cuitjin:

—¿Mé má cuatjin va má ngayun chjihndun? Na lihndi vë ne, hacuúin cahme na ta jíñafë na. —Cuatjin cachja me.

<sup>40</sup> Sehe ngajan xi xuta xi siu jan ne, tu vejnucjëë me tsëhë cjua xi cachja Jesús. Sehe ngajan xi Jesús ne, catsitëë me xuta

xi siu jan candatsen. Hane suva ni nahmi rë nima quihndi cojo naa rë cojo cha xi ticojo me cavisehen me cojo hiscan jiña. <sup>41</sup> Sehe cafaha me tsja nima quihndi jan ne, sehe cachja me cojo cuitjin:

—Talita cumi —cju a xi meje cuichja: Tichjá cojo ri, tsan, tísatjinhgue.

<sup>42</sup> Xi cafë cachja Jesús cuatjin ne, cavuya cjuahñu rë na lihndi jan hacuaha ngutjen ni cavisatjenhnga na catsujyihya na. Na lihndi jan ne, tejó nu tjin rë na. Hane me xi siu jan ne, jercu quijircun camahani rë me. <sup>43</sup> Hya xi camá ne, jemu cachja camahani Jesús cojo xuta rë na xi tsajin yo cuichja me cojo xcusun jan. Hacuaha cachja me cojo xuta rë na xi sua me xi sinë na.

## 6

### *Jesús ne, fi nga me Nazaret*

<sup>1</sup> Hya xi cavetju Jesús tsëhë Capernaum ne, cavuya cafe me cojo cha ladu rë me nandya Nasaret, hiscan xi camacha me. <sup>2</sup> Hya xi cavechu nixtin xi chjahájenda rë ne, cavetsihin cavicuya me xuta ngajan yungun. Hane xutacjín xi tivisiñuju cju a rë Jesús jan ne, jemu quijircun rë me. Sehe cachja me ngajñi rë me cuitjin:

—¿Jani cavutaya cha xi cuijyihí vi cju a xi tichja cha? Jemu tjin rë cha cjuatacun. Hacuaha jemu yehe cjuarcun sahmi cha. <sup>3</sup> Há hyan ngayaan xi cha vihi xi chjineya jan ni, cha xi quihndi rë na María. Hntsë cha ne, hacui cha Jacobo, cha José, cha Judas cojo cha Simón. Hacuaha nandya naja tacun ndava tichja cha.

Hane jemu xti rë xuta jan, tsëhë xi ha vëë me Jesús. <sup>4</sup> Vëhë xi Jesús ne, cachja me cojo xuta jan cuitjin:

—Xuta ne, ha tuxa faharcun me ngu xihin xi suacuenda cju a rë Nina. Suva ni xuta rë xihin jan cojo xuta xi tangun nangui rë cojo, me vëhë xi faharcuaain me xihin jan.

<sup>5</sup> Ngajan ne, hacuiin cjín cjuarcun casahmi me, tsëhë xi macjaain rë xuta me. Tu cavisanetsja ni me ngujo xuta hmu rë, hane camandaja xuta hmu rë jan. <sup>6</sup> Hane Jesús ne quijircun rë me ta, tsëhë xi xuta jan ne, cuatjin camacaain rë me. Hane sehe quiji catsujyihya Jesús nandya tahndee rë jan, cavicuya me xuta.

*Jesús ne, tsingatju me cha ladu rë me xi sua cha machaya rë xuta tsëhë gobiernu rë Nina*

<sup>7</sup> Sehe casahmitangun me cha xi tejó jan hane cavetsihin catsingatju me jo jo cha jima ngu ladu. Hacuaha casua me cha ngahñu xi cuma cuaxëxin cha xitsehen. <sup>8</sup> Hacuaha cachja me cojo yëjë ni cha xi tsajin mé xi cjuaha cha xi cjue cha. Suva

ni ngu ya xi cuisecoo rë cha. Hacuiin niñu ne, hacuiin morra, hacuiin xi tujún. <sup>9</sup> Chuxinxte ni catincha ntsacu cha. Hacuaha cuaain cha chingá. <sup>10</sup> Ngajan xi cachja me cojo yëjë ni cha cuitjin:

—Hya xi cjuhun ngu ndihya ne, xi cuisuhun ne, ha ngajan ni tinechun nguixun nguixun ni hisca xi cuetjun tsëhë nandya hiscan xi casatë nuju. <sup>11</sup> Tuyani ni xi tsingatiin nuju me hacuaha hisca cuisiniñjii me tsujun ne, tetjun tsëhë ngajan ne, titsunu chojo rë ntsacu. Vëhë cuma ngu seña tsëhë jyë rë me.

<sup>12</sup> Xi cajnetaha cachja Jesús cuatjin ne, sehe cavetju cha quiji cha hiscan xi casatë rë cha. Cachja cha cojo xuta xi tsindeya me cjuatacun rë me. <sup>13</sup> Hacuaha jemu cjin xitsehen cavaxëxin cha. Hane xuta hmu rë ne, aceite tsëhë tuxine xi hmí olivu catsufë cha xten me hane camandaja me jan.

### *Cjuaveya rë Juan Vitenda rë Xuta*

<sup>14</sup> Me xi matitjun xi hmí rë Herodes ne, cahndë me cjuatsëhë Jesús, tsëhë xi xuta ne, jercu cachja me tsëhë Jesús. Hane ngujo me ne, cuitjin cachja me:

—Nima Juan, cha xi cavitenda rë xuta ne, ha ndasa cahme cha, peru cavascaya rë cha. Vëhë xi ma sahmi cha cjuarcun.

<sup>15</sup> Hane ngujo nga me ne, cachja me ta Jesús ne, hacui rë Elías, ngu xutachanga xi casuacuenda cjuarë Nina hatsëe. Hane cachja sa yahnga me ta Jesús ne, hacui rë ngu profeta, sacuaha me xi casuacuenda xutachanga xi caviyuju titjun.

<sup>16</sup> Peru Herodes ne, hya xi cahndë me cjuarë vëhë ne, sehe cachja me ta:

—Nima Juan má me. Catsingátju catisun rë rcu cha, hane cavuya rë cjuahñu rë cha. —Cuatjin cachja Herodes.

<sup>17</sup> Herodes ne, ha catsingátju me cachjaha rë cha Juan xi cjue cha ndavaya. Cuatjin casahmi me ngatsë rë na Herodía. Na vëhë cafaha Herodes, camá chjuun rë me ha ndasa xi ha chjuun rë cha Felipe hntsëjñu me má na. <sup>18</sup> Hane ngatsë rë vëhë, cuitjin cachja cha Juan cojo rë me:

—Chja ley ta ndajintjin camahani xi chjahan chjuun rë xingueen. Vëhë xi ngayun ne, ndajintjin xi cuatjin canihñu. —Cuatjin cachja cha Juan.

<sup>19</sup> Ngajan xi na Herodía ne, caveyacacun na cavutsejen na cha Juan. Hane meje rë na xi cueya cha. Peru camaji ta tsëhë xi <sup>20</sup> Herodes ne, cafaharcun me cha, tsëhë xi vëe me ta Juan ne, ngu xihin xi tyahi cjuatacun rë cha, hane cavéjña cha tsëhë Nina. Hane vëhë xi casahmi me cha cuidadu. Hacuaha hya xi Herodes cavisiniñuju me cjuarë cha Juan ne, jercu cachuya rë me ha ndasa casecjan cjuatacun rë me.

<sup>21</sup> Peru casacu rë na Herodía cahndë tsëhë xi meje rë na hya

xi cavechu nixtin tsëhë suhi rë Herodes. Hya cachja Herodes cojo ngujo xutaxa rë ndihyavasen cojo me xi matitjun tsëhë sindadu, cojo sa ngujo xuta changá xi matitjun tsëhë distritu Galilea, xi cjue me ta casehenchjine ngu comida tsëhë suhi rë me. <sup>22</sup> Hane hora xi tijinë me ne, cavisehen na quihndi rë na Herodía, catë na. Hane jercu cachuya rë Herodes cojo me xi yahnga jan hacutjin catë na. Sehe ngajan xi Herodes, me xi matitjun jan ne, cachja me cojo na cuitjin:

—Tu mé ni xi meje ri ne, chjahye ná, hane suá ri. <sup>23</sup> Vëë Nina jain ta suá ri hisca vasentjin nandya xi siu ntsa. —Cuatjin cachja me.

<sup>24</sup> Xi tu cavetju na quiji na hiscan tacun naa rë na ne, cavinenguisse na cuitjin:

—¿Mé xi ndatjin cjuéhya rë me?

Sehe ngajan xi chja naa rë na ta:

—Chjaye rcu cha Juan, cha xi vitenda rë xuta. —Cuatjin cavinchangui naa rë na na.

<sup>25</sup> Xi tu cavuya cavisehen na hiscan tacun Herodes ne, ngajan xi cachja na cuitjin:

—Meje ná xi ngutjen ni ne, cahntsua ngu tyuva ne tuhun ná rcu cha Juan. —Cuatjin cachja na quihndi jan.

<sup>26</sup> Ngajan xi Herodes ne, jemu choho camá rë me peru tsëhë xi hisca Nina caveyanangui me xi casua me cjua rë me, hacuaha tsëhë xi yëjë ni amigu rë me cahndë me cjua jan, vëhë sahmi xi má sava rë me tsindeya me cjua rë me cojo na.

<sup>27</sup> Ngajan xi Herodes ne, ngutjen catsingatju me ngu sindadu hiscan jiya cha Juan. Hacuaha cavitexa me xi cuinduva cojo cha rcu cha Juan. Sehe ngajan xi cha sindadu jan ne, quiji cha ndavaya, cavatësun cha rcu cha Juan. <sup>28</sup> Sehe caveya cha cahntsua tyuva, quijicojo cha. Xi cafehe cha cojo ne, casua cha na quihndi rë na Herodía. Hane sehe casua na naa rë na. <sup>29</sup> Sehe hya xi cahndë cha ladu rë cha Juan tsëhë mé xi cavatju cha cama ne, sehe quiji cha cafaha cha nima caveyaniji cha.

*Jesús ne, tsicjen me hñu mil xihin*

<sup>30</sup> Hya xi cajnetaha catsujyihya cha apóstol xi catsingatju Jesús jan ne, cavuya camatangun nga cha cojo me. Sehe cachja cha hacutjin casahmi cha hacuaha hacutjin cavicuya cha. <sup>31</sup> Sehe ngajan xi Jesús ne, cachja me cojo cha cuitjin:

—Nduvun suvun ni ne, cuanguen hiscan xín, chjahanjeyan hitsë.

Cuatjin meje cjue cjuahajeya me ta tsëhë xi jemu cjín xuta xi cjui nduva me hiscan tacun Jesús. Hisca maxatiin jinë me niñu. <sup>32</sup> Sehe quiji me cojo cha ladu rë me cojo barcu ngajan hiscan xín. <sup>33</sup> Hane xuta jan ne, cavëë me xi cjui me cojo cha ladu rë me. Hacuaha vëë me xi hacui Jesús. Sehe xuta tsëhë



nandya tahndee jan ne, cavanga me quiji me taha vëhë. Hisca tjun sa me cafehe me, sehe cafehe Jesús cojo cha ladu rë me. <sup>34</sup> Xi tu cavetju Jesús tsëhë barcu jan ne, cavëë me xi jemu cjín xuta siu me. Hane camayuma rë me xuta jan ta tsëhë xi siu me sacuaaha chu tsánga xi tsajin yo xi cjuahacuenda rë chu. Sehe cavetsihin cavicuya me xuta jan, jemu cjín cjua cavicuya me. <sup>35</sup> Hya xi ha quiji hora jan ne, ngajan xi cachja cha ladu rë me cojo me ta:

—Nguehe ne jemu xín camahani. Hacuaha jemu quiji hora.

<sup>36</sup> Ninguijnutuhun cjua cojo xutacjín vi cojo sa xi catji me nandya xi siu tiñataha, hane catatsë me xi sinë me. —Cuatjin cachja cha.

<sup>37</sup> Hane cuitjin cafayangui Jesús:

—Tuhun ngayun xi sinë me.

Sehe ngajan xi cachja cha ladu rë me cuitjin:

—¿Hacutjin sacú niji xi sinë me xi cuarcu cjín me? Xi cuatjin cjín pan chihin ne, meje miji chji rë jo cientu mosu. —Cuatjin cachja cha.

<sup>38</sup> Sehe cachja Jesús cuitjin:

—Tangun chutsujun ¿há cjín pan tjin ngajñi nuju ngayujun ni?

Xi tu cavëë cha há cjín pan tjin ra ne, sehe cachja cha cojo me cuitjin:

—Hñú pan, cojo jo ti má.

<sup>39</sup> Sehe ngajan xi cachja Jesús cojo cha ta catichja cha cojo xuta, catiyuju me xcun ndiji, ngujo ngujo me ngu ngu cahndë. <sup>40</sup> Hane caviyuju me ngu cientu me ngu cahndë, o vasen cientu ngu cahndë hisca xi cafë yëjë me caviyujuchihin me. <sup>41</sup> Sehe Jesús ne, cafaha me xi hñu pan cojo jo ti jan, cavutsejenniji me ngahnga ne, casua me nacuechji rë Nina, sehe cavotoho langa me pan jan. Hane casua me cha ladu rë me xi sua cha sinë xuta. Hacuaha cojo catsijo ti jan cavatëcja Jesús xi sinë xuta. <sup>42</sup> Jercu caxuva pan cojo ti jan. Hane yëjë ni me cajinë me hacutjin xi cachuya rë xahasen rë me. <sup>43</sup> Xi cavatju cajinë xuta jan ne, sehe cafaya cha pan cojo ti xi cafiin jan ne, hane catsinguitsë cha tejó chajne cojo. <sup>44</sup> Me xi cajinë pan jan ne, hñu mil má me xi xihin. Hacuaha xin má yachjin cojo langa xi cajinë me.

*Jesús ne, fi ntsacu me xcun ndachacun*

<sup>45</sup> Ngajan xi Jesús ne, catsingatju me cha ladu rë me cojo barcu jan xi cjue titjun ni cha ngunda vëhë, hiscan nandya Betsaida, jinguyëjë rë xi tsinguijnetaha me cjua cojo xuta. <sup>46</sup> Hya xi camá catsinguijnetaha me cjua jan, sehe camiji me ngu ndetjún xi cuisiajmi me cojo Nina. <sup>47</sup> Hane hora xi camá nguixun ne, barcu jan ne, vasencja laguna cjui. Hane

Jesús ne, tacun suva cuaha me nangui quixí. <sup>48</sup> Hacuaha cavutsejen me ta jemu chja tivatju cha xi cjui cha cojo barcu, tséhë xi tjo ne, taha hiscan cjui cha ne, ngajan nduva. Hane xi tiña sahasen ne, camatiña Jesús tséhë cha, cjui me xcun nandan. Hane cuatjin cjui me sacuaha xi meje cuatjutaha me cha. <sup>49</sup> Xi tu cavëë cha xi cjui me xcun nandan ne, catsingatahacacun cha ta nima xi meje cuincharcun rë cha. Hane jercu cajindayatë cha, <sup>50</sup> tséhë xi catsacjun cha xi cavëë cha me. Hane ngutjen ni cachja Jesús cojo cha cuitjin:

—Xi carcuun.

<sup>51</sup> Hane sehe cavisehen Jesús barcu hiscan siu cha. Hora vëhë ne, casejyu tjo. Ngajan xi jemu quijircun camahani rë cha ta, <sup>52</sup> ha ndasa cavëë cha cjuarcun xi casahmi Jesús cojo pan jan ne, peru cajinii rcu cha, tséhë xi vechiin cjuatacun rë cha.

*Jesús ne, sahmi me xi mandaja xuta xi hmu rë tséhë nandya Genesaret*

<sup>53</sup> Xi quiji sa me cojo barcu ne, cafehe me tjehen laguna, tiña nandya xi hmí Genesaret. Hane ngajan catsihñu me barcu. <sup>54</sup> Hya xi cavetju Jesús tséhë barcu ne, cavëë xuta ta hacui Jesús. <sup>55</sup> Hane xuta jan ne, marcu macjain quiji me yëjë ni ladu tséhë nandya jan, xi quiji jaha me xuta hmu rë, caviyuju me xcun Jesús. <sup>56</sup> Hane tuyani ni xi quiji Jesús, há nandya langa ne, há nandya hñu, o há xi ranchun, caviyuju me xuta hmu rë hiscan ndetsin. Sehe cafehya me cojo Jesús xi ndastu satëtaha xuta hmu rë jan tsjian rë Jesús. Hane yëjë ni xuta hmu rë xi casatë tsjian rë Jesús ne, camandaja me.

## 7

*Jesús ne, chjataha me cha fariseo*

<sup>1</sup> Ngujo cha tséhë partidu fariseo cojo ngujo cha maestru tséhë ley ne canduva cha tséhë nandya Jerusalén quiji cha ngajan hiscan tacun Jesús, ngajan camatangun cha. <sup>2</sup> Xi cafehe cha ngajan ne, cavëë cha xi ngujo cha ladu rë Jesús ne tjin sa jyë rë tsja cha ne, tijinë cha niñu ta cavanii cha tsja cha. <sup>3</sup> Hane cachuyiin rë cha ta tséhë xi ngayëjë ni xuta nangui niji ne, sahmi ngujoyë xi cuane me tsja me sehe sinë me niñu. Yaha me xcusun rë xutachanga niji. <sup>4</sup> Hacuaha hisca sa xi fehe me xi fi me ndetsin ne, sá xi cjëë cuane me tsja me ne, sinii me niñu. Hacuaha jemu cjín sa xcusun rë xutachanga niji xi yaha me ta sacuaha xi ha tyjahi trasti ne, cuane nga me. Hacuaha cuanitjin sahmi me cojo nachan. <sup>5</sup> Ngajan xi cha tséhë partidu fariseo cojo cha maestru tséhë ley ne, cachja cha cojo Jesús cuitjin:

—¿Mé má cuatjin sahmiichiin cha ladu nuju ley rë xutachanga naja? ta, tsëhë xi vanii cha tsja cha xi jinë cha niñu.

<sup>6</sup> Ngajan xi cafayangui Jesús cuitjin:

—Ngayun ne, jo xcun jo ntsuvun yun. Jemu quixi cjua xi catsihindu Isaías tsujun xcun xujun rë me sacuatjin cachja Nina xi xuta ne, jemu ndacha me. Cuitjin fi cjua jan:

Xuta xi cuicun vi ne, ndaja chja me tsahan, peru xi cojo xahasen rë me ne, hisca tsinguitsjiin me ngahan.

<sup>7</sup> Tu mahya xi faharcun ná me ta

xi vicuya xicjin me ne, hacuiin cjua naha cuicuya me ta, tu cjua rë xuta.

<sup>8</sup> Cuanitjin ngayun ta nismutacun cjua rë Nina, hane hitsë sa tivetuhunrcun xcusun rë xutachanga naja.

<sup>9</sup> Cachja sa me cuitjin:

—Xi má nuju ne, jemu ndatjin casacuse nuju hacutjin vejñuxun cjua rë Nina cojo sa xi nihñuchuhun xcusun rë xutachanga naja. <sup>10</sup> Moisés ne, cuitjin catsihindu me hacutjin xi cachja Nina xi nihña ngayaan xuta rë me: “Chjuhunrcun ná nuju, chjuhunrcun nahmi nuju”, hacuaha: “Yo xi choho chja tsëhë xutacha rë ne, xuta ne tsiquehen rë.” <sup>11</sup> Peru ngayun ne, cjuatacun rë xutachanga naja vicuyun ta, nújun ta ngu cha ne cuma cuichja cha cojo xutacha rë cha cuitjin: “Ha quihndë cumaji cuisecoo nuju ta yëjë ni xcusun xi tjin ná ne, ha cavejñá tsja Nina.” <sup>12</sup> Hane xi cuatjin cuichja cha ne, ha quihndë sahmi nguujë xu xi cuisecoo cha xutacha rë cha. <sup>13</sup> Xi cuatjin ne, ha camachjiriin nuju cjua rë Nina ta, nihñu sacuaha xcusun rë xutachanga naja, hacuaha vicuyun rë jingu sa. Hacuaha cjin sa xcusun ndacha sacuaha vëhë nihñu. —Cuatjin cachja Jesús cojo maestru jan.

<sup>14</sup> Hacuaha cajindaya Jesús xuta xi cumatangun me. Hya xi camá ne cuitjin cachja me cojo:

—Ngayujun ngarcun ni ne, tinuhyun cjua xi cuichjá vi.

<sup>15</sup> Xcusun xi vixuya cahntsua xuta ne, hacuiin vëhë tsitsehen rë me ta, cjuatacun xi nduva rë me ne, vëhë tsitsehen rë me.

<sup>16</sup> Jarë ngayun xi meje nuju xi cumá nuju ne, tetuhunrcun.

<sup>17</sup> Xi cavatju cachja me vëhë ne, caviyuju xuta ngajan ne, sehe cavisehen me cojo cha ladu rë me cahntsua ndihya. Ngajan xi cha ladu rë me ne, cavinenguise cha me tsëhë cjua vëhë. <sup>18</sup> Ngajan xi cachja me cuitjin:

—¿Há hisca ngayun cajinii rcun cjua xi cachjá ni? Nguehe cuichjá cojo nuju mé vijne cjua vëhë. Cuma xinëë yëjë xcusun comida ta tsajin ngu xcusun xi jinë xuta xi cuma tsitsehen rë me <sup>19</sup> ta xi sinë me ne, hacuiin cahntsua xahasen rë me cjui ta cahntsua me. Fi ne vetjutaha ndatsen.

<sup>20</sup> Hacuaha cachja sa Jesús cuitjin:

—Cjuatacun xi nduva tsëhë xahasen rë xuta ne, vëhë tsitsehen rë me ta, <sup>21</sup> tsëhë xi xi nduva tsëhë xahasen rë me ne, cjuatacun tsehen, sacuaha yachjin xi viteña yojo rë, sacuaha jyë tsëhë xi sahmi me chjuunnahñu rë me jingu sa chjuun, cojo cjuachjêjê, cojo xi tsiquehen xicjin, <sup>22</sup> cojo xi jercu meje rë me cjuanchina, cojo xi sahmi me cjuatsehen, sahmi me cjuandacha, choho sahmi me, tjin rë me cjuaxin, sahmi me cjuachjataha, tjin rë me cjuaxihin, sahmi me cjuangarca. <sup>23</sup> Yêjê cjuatsehen xi cuacun vëhë ne, nduva tsëhë xahasen rë xuta, hane vëhë tsitsehen rë me.

*Ngu chjuun xi xutaxin má na ne, camacjain ran Jesús*

<sup>24</sup> Xi cavetju me tsëhë distritu Galilea, cafe me ladu tsëhë nandya Tiro cojo nandya Sidón. Xi cafehe me ngajan ne, cavisehen me cahntsua ngu ndihya, tsëhë xi mijí rë me xi scuëë xuta xi cafehe me. Peru camaji cavejñahma me. <sup>25</sup> Xi cafehe Jesús ngajan ne, ngutjen camachaya rë naa rë ngu na xi jiya xitsehen cahntsua xahasen rë na. Hane quiji na cavixcuhnchi na xcun Jesús xi cjuaharcun na me. <sup>26</sup> Na vëhë jan ne, xutaxin na, na ladu tsëhë distritu Sirofenisia, hacuiin na xuta tjê rë Israel. Hane cafehya na cojo Jesús xi cuaxê me xitsehen xi jiya cahntsua xahasen rë na quihndi rë na. <sup>27</sup> Hane xi cafayangui Jesús tsëhë na jan ne, cuitjin cachja me ngu ejemplu cojo rë na.

—Sechiye ni, catijnetaha catjinë nixti ta hacuiin ndatjin xi chjahatahan niñu tsëhë nixti hane sehe tahan rë naña.

<sup>28</sup> Ngajan xi naa rë na hmu rë jan ne, cuitjin cajnercu na xi tichja me tsëhë xuta tjê rë Israel cojo xutaxin. Hane cafayangui na cuitjin:

—Nai. Quixi xi nújun, peru naña xi siu ngahma maxë ne, sacu xi vixuhya hntsua nixti, sehe jinë chu.

<sup>29</sup> Hane sehe cachja Jesús cojo rë na cuitjin:

—Ndatjin xi canoje. Quihndê ta cuatjin ne, cuma cjuihin ta xitsehen xi caseya cahntsua xahasen rë na quihndi riji ne, ha cavetjuxin.

<sup>30</sup> Xi cavuya cafe na ndava na ne, quihndi rë na ne, ha jyuu jiña na hacuaha xitsehen xi caseya cahntsua xahasen rë na ne, ha cavetjuxin.

*Jesús ne, sahmi me xi mandaja ngu cha xi loho hacuaha lihmi cha*

<sup>31</sup> Sehe cavetju Jesús ladu tsëhë nandya Tiro, cavatju me nandya Sidón cojo ladu xi hmí Të Nandya, vëhë cafehe me laguna tsëhë Galilea. <sup>32</sup> Hane cafehecojo nga xuta ngu cha xi loho hacuaha lihmi cha. Hane cafehya xuta jan cojo Jesús xi cuetahatsja me cha, sehe cumandaja cha. <sup>33</sup> Ngajan xi Jesús ne cavaxëxin me cha tsëhë ngajñi rë xuta ne, sehe

caviyujutaha me rcu tsja me ngu ngu ladu ngojo tyjavañuju cha. Hane hacuaha cavêhênatya me rcu tsja me sehe cavetaha me neje cha. <sup>34</sup> Hya xi camá ne, cavutsejenniji me ngahnga hane cafêcacun me. Sehe cachja me cuitjin:

—¡Efata! —cjua xi meje cuichja: ¡Nuxuhunyun!

<sup>35</sup> Hane xi tu cachja me cuatjin ne, catuxaha tyjavañuju cha xi loho. Hacuaha hora vêhê ni ne, camá ndandaja cachja cha. <sup>36</sup> Sehe ngajan xi cachja Jesús cojo xuta xi tsajin yo cuichja cojo me xcusun vêhê. Peru xuta jan ne, hitsê sa jercu cachjatê me tsêhê xcusun xi casahmi Jesús. <sup>37</sup> Jercu quijircun camahani rê xuta. Cuitjin cachja me:

—Tu mé xcusun ni jercu ndaja sahmi Jesús. Xuta xi loho ne, vihndê sahmi me, hacuaha xuta xi lihmi ne, sahmi me xi ma chja.

## 8

*Jesús ne, tsicjen me ñuju mil xihin*

<sup>1</sup> Nixtin hya ne, hacuaha jercu cjín xuta siu me hisca tacun Jesús. Hane tsêhê xi tsajin camahani mé xi sinê me ngajan ne, vêhê xi Jesús ne, cajindaya me cha ladu rê me, sehe cachja me cojo cha cuitjin:

<sup>2</sup> —Jemu yuma má ná xutacjín vi ta ha quihndê jyan nixtin hinchataha me cojo naja, hane ha quihndê tsajin camahani mé xi sinê me. <sup>3</sup> Sá xi tsingátju me cjue me xi cjêê sinê me niñu ne, cjuaha rê me hinda ndiya. Ngujo xuta xi cuicun vi ne, jemu cjin canduva me. —Cuatjin cachja me.

<sup>4</sup> Sehe ngajan xi cha ladu rê me ne, cafayangui cha tsêhê me cuitjin:

—¿Jani cuma sacú naja xi sinê xuta vi ta nguehe ne, jemu xín camahani tsêhê nandya?

<sup>5</sup> Ngajan xi cavinenguise Jesús cojo cha cuitjin:

—¿Há cjín pan tjin nuju?

Ngajan xi chja cha ta:

—Yatu má.

<sup>6</sup> Ngajan xi Jesús ne, cavitexa me xutacjín jan xi cuiyuju me nangui. Xi cafê xuta caviyuju me nangui ne, sehe cafaha Jesús pan jan sehe casua me nacuechji rê Nina. Hane cavotoho langa me pan jan, casua me cha ladu rê me xi cuiyuju cha sinê xutacjín jan. Hane cuatjin casahmi cha. <sup>7</sup> Hacuaha tjin ra ngujo ti. Hane Jesús ne casua me nacuechji rê Nina tsêhê ti jan, hane sehe cachja me cojo cha ladu rê me xi sua cojo ti jan sinê xuta. <sup>8</sup> Xi camá cajiné xuta jan ne, jemu ndaja camá rê xahasen rê me. Hane xi cafaya cha ladu rê Jesús xi cavangui cajiné xuta jan ne, catsê yatu nisinya. <sup>9</sup> Xuta jan ne, sacuaha chuva rê ñuju mil má me. <sup>10</sup> Hane hisca xi

cajnetaha cjuandaja vëhë ne, sehe catsingatju Jesús xuta, cafe xuta ndava me. Hya xi camá ne, cavisehen me barcu cojo cha ladu rë me, hane cavuya me ngunda vihi taha ladu rë hiscan xi hmí rë Dalmanuta.

*Cha fariseo ne, fehya cha seña*

<sup>11</sup> Xi cafehe me ngajan ne, hacuaha cafehe cha tsëhë partidu fariseo. Hane cavetsihin cha cavisiajmi cha cojo Jesús ta meje cjuahachuva cha me. Cafehya cha cojo rë me xi tsingacun me ngu cjuarcun xi nduva ngahnga, cojo sa xi scuëë cha xi Nina catsingatju jain rë me. <sup>12</sup> Ngajan xi Jesús ne, cojo cjuachohotacun ne, cachja me cojo cha cuitjin:

—¿Mé má cuatjin chjahyun xi sahme ngu cjuarcun xi nduva ngahnga? Cuichjá quixë cojo nuju ta hisca ngu xcusun vëhë ne, sahmeë xi xcun cojo xcun.

<sup>13</sup> Ngajan xi caviyuju me cha xi cuacun jan ne, cavisehen me barcu cojo cha ladu rë me. Hane sehe cavuya quiiji me ngunda vëhë tsëhë laguna.

*Xcusun rë cha fariseo ne, visehetë cjuatacun rë xuta sacuaha sahmi san rë pan*

<sup>14</sup> Peru cha ladu rë me ne, cachaya rë cha xi cjuaha cha pan, hane cahntsua barcu ne, ngu tutu sa pan jiya ndaja. <sup>15</sup> Sehe ngajan xi chja Jesús cojo cha cuitjin:

—Nechun cuidadu cojo san rë pan tsëhë cha tsëhë partidu fariseo cojo cha ladu rë Herodes.

<sup>16</sup> Sehe ngajan xi cavisiajmicjín cha ngajñi rë cha cuitjin:

—¿Há tsëhë xi tsajin naja pan ne, há tsëhë vëhë xi cuatjin chja me?

<sup>17</sup> Xi camachaya rë Jesús xi veyanangui cha xi tsajin rë cha pan ne, cachja me cojo cha cuitjin:

—¿Mé má cuatjin nújun xi tsajin pan? ¿Há nuhyuun? ¿Há vijñü rcun? ¿Há jemu taja rcun? <sup>18</sup> Tjin nuju túxcun hacuaha tjin tyjavañuju. ¿Mé má matsijin nuju? hacuaha ¿mé má nuhyuun? ¿Há vitsjiin nuju? <sup>19</sup> Hya xi cavótoho langa hñú pan ngajñi rë xi hñú mil xuta, ¿há cjín chajne sa quitsë cachjayun tsëhë pan xi cavangui jan? —Cuatjin cavinenguisse me.

Ngajan xi cafayangui cha ladu rë me ta:

—Tejó.

<sup>20</sup> —Hane hya xi cavótoho langa yatu pan jan xi cajinë ñuju mil xuta, ¿ha cjín nisinya sa cavangui?

Ngajan xi cha ladu rë me ne, cuitjin cachja nga cha:

—Yatu.

<sup>21</sup> Ngajan xi cavinenguisse Jesús cojo cha cuitjin:

—¿Há cjëë camahani cuijne rcun cjuaxi cachjá tsëhë san rë pan?

*Jesús ne, sahmi xi cumatsejen rë ngu cha rcá ngajan nandya Betsaida*

<sup>22</sup> Hya xi camá ne, cavechu barcu tjeheh laguna. Hane xi cavitujne me barcu ne, cafehe me nandya xi hmí Betsaida. Xi cafehe me ngajan ne, cafehe nga xuta cojo ngu cha xi rcá. Hane jercu cachja xuta jan cojo Jesús xi cuetahatsja me cha, hane sehe cumatsejen rë cha. <sup>23</sup> Hya xi camá ne, cafaha me tsja cha hane quijicojo me cha ngajan tjeheh nandya. Xi cafehe me cojo cha ngajan ne, cavëhë natya me tuxcun cha hacuaha cavetahatsja me tuxcun cha, sehe cavinenguise me cha cuitjin:

—¿Há tsejen ri hitsë quihndë?

<sup>24</sup> Xi catsiquijin cha xcun cha cavutsejen cha ne, chja cha ta:  
—Vutsejen xuta. Peru sacuaha tsejen ya, cuatjin tsejen me xi cjui me.

<sup>25</sup> Ngajan xi Jesús ne, cavetahatsja nga me tuxcun cha. Sehe casahmi cha ngujyë cavutsejen ndaja cha, hane camandaja cha, camatsejen ndaja rë cha. Hane sehe catsingatju me cha cafe cha ndava cha. <sup>26</sup> Hacuaha cachja me cojo cha cuitjin:

—Xi cavisiiin ngajñi nandya xi cuinoje cojo xuta jan xcusun xi casahme cojo ri.

*Pedru ne, tsinguixi me xi Jesús ne, me vëhë xi Mesías me*

<sup>27</sup> Hya xi camá ne, cavetju nga Jesús tsëhë ngajan cojo cha ladu rë me ne, quiji me ngujo nandya xi siu tahndee rë nandya xi hmí Cesarea Felipe. Hane ndiya jiya me cojo cha ne, cavinenguise me cha cuitjin:

—¿Mé chja xuta, yo ngahan? —Cuatjin cachja me.

<sup>28</sup> Ngajan xi cafayangui cha ladu rë me cuitjin:

—Ngujo me ne, chja me ta ngayun xi cha Juan ngayun, cha xi cavitenda rë xuta. Ngujo nga me ne, chja me ta Elías. Hane ngujo nga me ne, chja me ta ngu profeta xi suacuenda cjua rë Nina. —Cuatjin cafayangui cha.

<sup>29</sup> Ngajan xi cachja nga Jesús cojo cha ta:

—Hane ngayun ne, ¿mé nújun? ¿Yo ngahan?

Ngajan xi cha Pedru ne, cuitjin cafayangui cha:

—Ngayun xi tjin cjua xi tsingatju nuju Nina. Ngayun xi Cristu.

<sup>30</sup> Ngajan xi Jesús ne, cavitexa me cha ta tsajin yo xi cuichja cha cojo tsëhë.

*Chja Jesucristu xi cueya me*

<sup>31</sup> Hya xi camá ne, cavetsihin cavicuya me cha tsëhë xi ha ndasa xi Cristu, Quihndi rë Xuta Jain má me ne, peru jemu cjín cjuañihi cuatju me cumá ta tsingatiin xuta changá me, hacuaha tsiquehen xuta changá jan me, peru xi cjuë jyan nixtin ne, cuya nga me cjuahñu. <sup>32</sup> Cjua vëhë ne cachja quixi

camahani me cojo cha. Ngajan xi cha Pedru ne, quiixixin cha cojo Jesús. Sehe cavetsihin cachja cha cojo me xi ¿mé má cuatjin chja me? <sup>33</sup> Ngajan xi cavuya Jesús cavutsejen me hiscan siu cha ladu rë me. Sehe cachja me cojo cha Pedru cuitjin:

—Tihinxin ngaye Satanás, tsëhë xi ningatiintacuin ngaye sacuaaha tsingatahacacun Nina ta, ningatehetacuin sacuaaha ngu xuta.

*Hacutjin xi meje rë xi nihña xa cojo cjuahñu naja*

<sup>34</sup> Ngajan xi Jesús ne, cajindaya me xutacjín jan cojo cha ladu rë me xi cuinduva me hiscan tacun Jesús, sehe cachja me cuitjin:

—Sá xi tjin yo xi meje cuisehen ladu naha ne, meje rë xi nichuvun cjuatacun nuju, hane hacuaaha tejñuhñu xahasen nuju xi cuanguncujun ndiya naha handasa xi cueyun xcun cru. <sup>35</sup> Yo ngayun xi mijí cuisuhun ladu naha tsëhë xi rcun xi cueyun ne, cahndë xi ndaja ne, nichujun xahasen nuju. Peru yo ngayun xi ngatsë naha o sá xi ngatsë rë cjua rë Nina cueyun ne, hacuiin nichujun xahasen nuju ta Nina ne, cuaxëtje me. <sup>36</sup> Mé ndaja cuma nuju xi sacu nuju yëjë xi tjin ngasunhndë, sá xi cueyun hane cuma nuju castigu, <sup>37</sup> ta sá xi cuaxintiin Nina xahasen nuju hya xi cueyun ne, ha quihndë tsajin rqui rë. <sup>38</sup> Yo ngayun xi ma sava nuju ngatsë naha o sá xi ngatsë rë cjua naha nguehe xcun xuta tsehen xi manguaaincacun cojo cjua rë Nina ne, hacuaaha cojo ngahan xi canduvá tsëhë Nina ne, cuma sava ná ngahan ngatsë nuju ngayun, hya xi cuinduvá cojo cjuandajyihî tsëhë nahmi naha ne, hacuaaha cojo ángel xi vejña tsëhë Nina cuinduvá cojo.

## 9

<sup>1</sup> Hacuaha cachja sa Jesús cuitjin:

—Cuichjá quixë cojo nuju ta tecjan yahnga xuta nguehe xi hisca xi scuëë me xi cuitexa jain Nina ne, sehe cueya me.

*Cavindeya xcusun rë Jesús*

<sup>2</sup> Xi cafë jyun nixtin jan ne, quiixixin Jesús ngu rcu naxi hnga cojo cha Pedru cojo cha Jacobo cojo cha Juan. Xi cafehe me cojo cha ngajan ne, cavëë cha xi cavindeya xcusun rë me. <sup>3</sup> Tsjian rë me ne, ña seti tsejen, tsëhë xi jercu tu tyava camahani, hisca xi ngu xuta cumaji cuane me xi cuatjin tyava.

<sup>4</sup> Hya xi camá ne, ha tu ñahñu camatsejen hasen rë Elías cojo hasen rë nima Moisés, tivisiajmi cojo Jesús. <sup>5</sup> Ngajan xi cachja cha Pedru cojo Jesús ta:

—Maestro, tu ma rë xi nguehe nechin cojo nuju ne, nihñi jyan puestu: ngu tsujun ne, cojo ngu ngu tsëhë Moisés cojo Elías.



<sup>6</sup> Cuatjin cachja cha Pedru ta, sacuinyiin rë cha mé sa cuichja cha ta tsëhë xi jercu catsacjun camahani cha camá. <sup>7</sup> Hora vëhë ne, canduva ngu yufí casahmi tjahnguen rë. Hane ngajñi rë yufí jan ne, canuhya rë ngujo cjua xi cachja cuitjin:

—Cha vihi xi quihndi naha cha. Jercu hmucacun cha. Tinuhyun xi chja cha.

<sup>8</sup> Xi tu cahndë cha ladu rë Jesús cjua vëhë ne, vutsejen nguehe vutsejen ngajan cha, hane suva sa Jesús tacun me xi cavëë cha.

<sup>9</sup> Xi tu tivitujne me tsëhë rcu naxi jan cojo cha ladu rë me xi quijicojo me jan ne, ngajan xi chja xu me cojo cha ta tsajin yo xi cuichja cha cojo xcusun xi cavëë cha. Xi cuatju cueya Quihndi rë Xuta Jain ne, cuya nga me cjuahñu, sehe hya cuichja cha. <sup>10</sup> Vëhë xi cavaha cha cjua jan cahntsua xahasen rë cha. Ngajñi rë ni cha cojo xicjin cha cavisiajmicjín cha ¿mé vijne cjua xi cuya nga me cjuahñu?

<sup>11</sup> Ngajan xi cavinenguisse cha cojo Jesús cuitjin:

—¿Mé má cuatjin chja maestru tsëhë ley xi titjun Elías cuinduva me, sehe cuinduva me xi cuaxëtje naja?

<sup>12-13</sup> Ngajan xi cafayangui Jesús cuitjin:

—Quixi xi Elías cuinduva me titjun ta, me vëhë cuiyujuchihin me yëjë ni xcusun. Peru ha canduva me, handasa hacuiin cojo ñihi rë me ta cojo ñihi rë cha Juan. Hane choho casahmi xuta cojo me sacuatjin chja xujun rë Nina. Hacuaha chja xujun xi cuacun vëhë ta handasa xi Quihndi rë Xuta Jain ngahan ne, hacuanitjin ne jemu jyë cjuahñi cuátju hacuaha tsitjungui xuta ngahan.

*Jesús ne, sahmi xi mandaja ngu cha nixti xi jiya ra xitsehen*

<sup>14</sup> Xi tu cavuya cafehe Jesús cojo cha xi quijicojo me hiscan siu yahnga cha ladu rë me xi tejó jan ne, cavëë me xi tjercu siu xuta jan cojo ngujo cha maestru tsëhë ley siu me visiajmi me cojo cha. <sup>15</sup> Xi tu cavëë xuta jan xi cafehe Jesús ne, jemu quijircun rë me, vanga sanii me quiji cachja me nina cojo Jesús. <sup>16</sup> Ngajan xi Jesús ne, cavinenguisse me cojo cha ladu rë me cuitjin:

—¿Mé xi visiajmu cojo xuta xi cuacun vë?

<sup>17</sup> Hane ngajan ngajñi rë xutacjín xi siu jan ne, cavetjufñi ngu me xi cachja me cuitjin:

—Maestro, canduvá cojo quihndi naha, tsëhë xi jiya xitsehen cahntsua xahasen rë cha. Hane tsëhë vëhë xi sahmi lihmi rë cha. <sup>18</sup> Hora xi faha xitsehen jan cha ne, ngutjen tsiticjahñu rë cha, hacuaha vaxë natyaxu hntsua cha, hisca tsijanerii nehñu cha jiña cha. Hane ngatsë rë vëhë ne, jemu jima ndaya cha. Hacuaha cachjá cojo cha ladu nuju xi cuaxëxin cha

xitsehen tsëhë quihndi naha. Peru camaji cavaxëxin cha. —Cuatjin cachja me.

<sup>19</sup> Ngajan xi Jesús ne, cachja me cojo xuta xi siu jan cuitjin:

—¿Mé camá nuju ngayun xi macjaain camahani nuju? ¿Há jyë sa nixtin meje rë xi cuitejña cojo nuju? Nduvun cojo cha ngeuhe. —Cuatjin cachja me.

<sup>20</sup> Hya xi camá ne, cafehe xuta cojo cha hiscan tacun Jesús. Xi tu cavëë xitsehen jan Jesús ne, marcu macjain catsiticja rë cha nixti jan. Hane xi caticja cha ne, cavuya cavindefa cha cafaña cha. Hacuaha cavetju natyaxu hntsua cha. <sup>21</sup> Ngajan xi Jesús ne, cavinenguise me cojo nahmi rë cha cuitjin:

—¿Há tsëë xi cuitjin má rë cha?

Ngajan xi chja nahmi rë cha ta:

—Hisca cjuaquihndi rë cha, cuatjin má rë cha. <sup>22</sup> Jiya hora xi faha xitsehen jan cha ne, tsingatjeya rë cha xcun ndacahi. Tjin nga ne, tsingatjenya rë cha ngajñi nandan, ta meje tsiquehen rë cha. Vëhë xi sá xi tsejen xi ha hyun mé nihñu cojo cha ne, catamayuma nuju ngahan cojo quihndi naha, hane tiseacun nihi.

<sup>23</sup> Ngajan xi cachja Jesús cojo nahmi rë cha ta:

—Há xa vë xi hvë. Sá xi macjain nuju ne, yëjë ni ne, cuma.

<sup>24</sup> Ngajan xi nahmi rë cha ne, ngutjen cachja me cuitjin:

—Tatá. Macjain ná. Peru tiseacun ná cojo sa xi cumacjain sa ná.

<sup>25</sup> Xi vutsejen Jesús xi jercu tijima tangun xuta ne, cacjan me cojo xitsehen jan. Cuitjin cachja me:

—Ngaye xitsehen loho lihmi, tetjixin tsëhë cha vi. Hacuaha ha quihndë cuyiin cuisihin cahntsua xahasen rë cha.

<sup>26</sup> Ngajan xi xitsehen jan ne, hisca cajindaya xi catsicuya catsindefa rë cha. Sehe cavetju quiji. Hane cha vëhë ne, jiña cahme cha. <sup>27</sup> Peru Jesús ne, cafaha me tsja cha catsisat-jenhnga me cha, hane casecun cha.

<sup>28</sup> Hya xi camá ne, quiji Jesús cojo cha ladu rë me, hane cavisehen me cahntsua ndihya. Xi cavisehen me jan ne, sehe ngajan xi chja cha cojo rë me cuitjin:

—¿Mé má ngayin xi camaji canaxinxin xitsehen jan tsëhë cahntsua xahasen rë cha vë?

<sup>29</sup> Ngajan xi cachja Jesús cojo cha cuitjin:

—Cuatjin camá nuju ta tsëhë xi xitsehen xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxenxen.

*Jesús ne, cachja me ta cueya me peru cuya me cjuahñu*

<sup>30</sup> Hya xi camá ne, sehe cavetju me quiji me taha distritu Galilea. Hacuaha mijí rë me xi cumachaya rë xuta jani

taha tsujyihya me ta, <sup>31</sup> tsëhë xi tivicuya me cha ladu rë me hacutjin cuatju me cumá. Cuitjin cavicuya me:

—Ha ndasa tsëhë Nina canduva Quihndi rë Xuta Jain ne, peru cjuaha xuta me ne, tsiquehen me me. Peru xi cjuë xi jyan nixtin ne, cuya nga me cjuahñu.

<sup>32</sup> Peru cha ladu rë me ne, vijnii rcu cha tsëhë xi cueya Jesús, hacuaha cuya me cjuahñu. Hacuaha tsacjun cha cuinenguise cha me cjua jan.

*¿Yo xi hitsë sa matitjun?*

<sup>33</sup> Hya xi camá ne, cafehe me nandya Capernaum. Hya xi cafehe me jan ne, cavisehen me cahntsua ndihya hisca cuiyuju me. Sehe ngajan xi cavinenguise me cojo cha ladu rë me mé xi cavisiajmi cha cojo xicjin cha ngajan ndiya. <sup>34</sup> Hane tu jyu ni caviyuju cha ta xi cavisiajmi cha ndiya jan ne, cuitjin cachja cha:

—¿Jarë ngayaan xi hitsë sa venguichji naja?

<sup>35</sup> Hya xi camá ne, quiji Jesús cavéjña me. Sehe ngajan xi cajindaya me yëjë tejó cha ladu rë me jan ne, sehe ngajan xi cachja me cojo cha cuitjin:

—Sá xi tjin ngu yun xi meje nuju xi cumatitjun ngayun ne, meje rë xi hacuiin jemu jyë nihñu yojo nuju hacuaha cuisekun xingun.

<sup>36</sup> Hya xi camá ne, cafaha me ngu lihndi, cavejña me cavasencja, hane sehe cavataha me. Hane ngajan xi cachja me cojo cha cuitjin:

<sup>37</sup> —Jarë ngayun xi ndaja nihñu cojo ngu lihndi sacuaha vihi xi ngatsë naha ne, sacuaha xi ngahan ndaja nihñu cojo ná. Hacuaha jarë ngayun xi ndaja nihñu cojo ná ne, hacuiin ngahan ni ta, hacuaha cojo Nahmi naha xi catsingatju ná me, cojo me vëhë ndaja nihñu cojo rë me.

*Me xi hacuiin condra naja ne, ladu naja má me*

<sup>38</sup> Ngajan xi cachja cha Juan cojo Jesús cuitjin:

—Maestro, cahyin ngu cha xi tijima tivaxëxin xitsehen tsëhë xahasen rë xuta, hane xi sahmi cha ne, cojo ñihi nuju veyanangui cha. Peru tsëhë xi hacuiin cha ladu naja cha ne, canújin cojo cha ta ha quihndë sahmi cha cuitjin.

<sup>39</sup> Ngajan xi Jesús ne, cachja me cuitjin:

—Xi cavichecjin tsëhë cha ta xuta xi cuma sahmi me cjuandaja vëhë, sacuaha xi ngahan jain cavitéxa rë me ne, cumaji xi ngutjen choho cuichja me tsahan. <sup>40</sup> Xuta xi hacuiin choho vëë naja me ne, chuya rë me tsajan. <sup>41</sup> Cuichjá quixë cojo nuju ta yo me xi sua ngu vasu nandá siuhun, tsëhë xi vëë me xi xuta ladu naha ngayun, hacuaha vëë me xi ngahan xi catsingatju ná Nina ne, me vëhë ne, sacu rë me ngu cjuandaja xi sua Nina.

*Cjuatsavi xi ticojo rë xi cuixuya ngayaan xcun ngu jyë*

<sup>42</sup> 'Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tsëhë xuta vëhë xi xtyangui ngu ndyojo natsi nguisin me sehe ningatjeya rë me ngajñi ndachacun. <sup>43</sup> Hane sá xi cjuatacun nuju meje rë xi nihñu ngu jyë cojo ntsun ne, vengui sa chji rë xi chandunxun ntsun ta, jemu sa ndaja tsujun xi cuma yoho yun xcun Nina, xi cumá rë xi cuechun xcun xitsehen cojo ntsun ngajñi rë ndihi jyë xi tsajin nixtin hvo. <sup>44</sup> Ngajan cuinechun, hiscan xi cjuiin nuju cjuañihi ta ndihi ne, tsajin nixtin xi hvo. <sup>45</sup> Sá xi cjuatacun nuju meje rë xi nihñu ngu jyë jani xi cuangun ne, vengui sa chji rë xi chandunxun ntsacun ta, jemu sa ndaja cuechun xcun Nina xi yoho yun xi cuma rë xi cuechun xcun xitsehen cojo ntsacun. <sup>46</sup> Ngajan xcun xitsehen vëhë ne, cjuiin nuju cjuañihi ta ndihi ne, tsajin nixtin hvo. <sup>47</sup> Hacuaha sá xi cjuatacun nuju meje rë xi chutsujun xcusun xi ndajintjin xi chutsujun ne, chuhunxun tuxcun jan chandunxun, ta tsëhë xi hitsë sa ndaja tsujun xi sacu nuju cahndë ngajan hiscan sahmi Nina gobiernu handasa cojo ngu ni tuxcun xi cuma rë xi cojo catsijo tuxcun cuechun xcun ndihi xi sahmi castigu rë nima. <sup>48</sup> Ngajan xcun xitsehen ne, ngajan cjuiin nuju cjuañihi ta ndihi ne, tsajin nixtin hvo.

<sup>49</sup> 'Hya xi tsichuva Nina ngayëjë ni xuta há ndaja há ndajin casahmi me ne, me xi tsajin mé casahmi ne, Nina ne, jemu chuya rë me. Hya xi Nina cjuahatsja me ngu cjuatjo xi tahan rë me ne, sá xi cojo naxa sehen ndaja ne, jemu chuya rë me.

<sup>50</sup> 'Naxa ne, jemu ndaja. Peru sá xi cjuë xtya rë ne, machjiriin. Cjuandaja rë Nina ne, hacuaha jemu ndaja. Vëhë xi chjuhun cjuandaja rë Nina, teyun cahntsua xahasen nuju, hacuaha ndaja tinechun cojo xingun.

## 10

*Jesús ne, fi nga me nandya Nasaret*

<sup>1</sup> Hya xi camá ne, cavetju Jesús tsëhë nandya Capernaum quiji me distritu Judea cojo ngunda ndajyë Jordán. Hacuaha jercu cjín nga xuta quiijtjengui rë me. Hane sacuaha xcusun xi ha sahmi Jesús ne, cavetsihin cavicuya nga me xuta jan. <sup>2</sup> Hya xi camá ne, ngujo cha tsëhë partidu fariseo ne, quiji cha hiscan tacun Jesús. Vinenguise cha me tsëhë xi ngu xihin, ¿há ndatjin xi tsismi chjuun rë? Cuatjin cachja cha ta tsëhë xi meje cjuahachuva cha me cojo cjuá rë me. <sup>3</sup> Ngajan xi cafayangui me tsëhë cha cuitjin:

—Moisés ne, xutachanga naja ne, ¿mé cavitexa naja me?

<sup>4</sup> Ngajan xi cafayangui cha tsëhë me cuitjin:

—Moisés ne, casua me cahndé xi ngu xihin ne, cuma cuejña cha ngu xujun tsja chjuun rē cha xi ha quihndē mijí rē cha na. Hane xi cuatjin ne, cuma tsismi cha na.

<sup>5</sup> Sehe ngajan xi Jesús ne, cachja me cojo cha cuitjin:

—Ngatsē rē cjuataja rē xahasen nuju ne, vēhē xi Moisés ne, casua me cahndé xi cuatjin nihñu. <sup>6</sup> Peru hya xi casahmi Nina ngasunhndē ne: “Casahmi me xi chjuun xi xihin xuta.” <sup>7</sup> “Vēhē xi ngu xihin ne, cuejña cha nahmi rē cha, hacuaha cuejña cha naa rē cha, <sup>8</sup> hane cumatangun cha cojo chjuun rē cha sacuaha ngu ni xahasen.” <sup>9</sup> Ha quihndē hacuiin jo ta sacuaha xi ngu ni xahasen. Hane tsēhē xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tsēhē xicjin me. —Cuatjin cachja Jesús.

<sup>10</sup> Ngajan xi hya xi Jesús tacun ndihya me cojo cha ladu rē me ne, cavinenguise nga cha me ngu ndiya tsēhē cjuavisiajmi vēhē. <sup>11</sup> Ngajan xi cachja me cojo cha cuitjin:

—Yo xi tsismi chjuun rē hane cuixan cojo ngu sa chjuun ne, jemu jyē jyē rē xi cuatjin sahmi. <sup>12</sup> Hacuaha sá xi ngu chjuun tsismi na xihin rē na hane cuixan na cojo ngu sa xihin ne, hacuaha jemu jyē jyē rē na.

### *Jesús ne, tsinchacun me langa*

<sup>13</sup> Jinguyējē rē xi tivisiajmi Jesús cojo cha ladu rē me ne, cavetsihin tjemu canduva xuta cojo quihndi rē me, xi cuisanetsja Jesús nixti jan cojo sa xi sacú rē cjuandaja rē me. Peru cha ladu rē Jesús jan ne, cacjan cha cojo xuta jan ta, xi má rē cha ladu rē me ne, mahyiin rē Jesús. <sup>14</sup> Hya xi cavēē Jesús xi cuatjin sahmi cha ladu rē me ne, camacjan rē me cojo cha. Ngajan xi cachja me cuitjin:

—Tuhun cahndé catinduva tjengui suva ná nixti. Xi canichuun cahndé xi cuma rē ta, xuta xi sahmi me yojo rē me sacuaha ngu quihndi ne, xuta vēhē xi sahmi me sacuatjin vitexa Nina. <sup>15</sup> Cuichjá cojo nuju cjuaquixi ta yo xi meje cuisehen gobiernu rē Nina ne, cuma cuisehen peru sacuaha ngu quihndi. Sá sahmi cuatjin ne, cumaji cuisehen.

<sup>16</sup> Ngajan xi Jesús ne, cavataha me nixti jan. Hane hora xi cavisanetsja me ne, cachja me cjuandaja rē me cojo.

### *Ngu cha nchina ne, chja cha cojo Jesús*

<sup>17</sup> Hya xi camá ne, cavetju me quiji me jingu sa cahndé. Hane ndiya cjui me ne, vanga ngu cha cafehe cha cavixcuh-nchi cha xcun me xi faharcun cha me. Sehe chja cha cojo me cuitjin:

—Ngayun maestro. Jemu ndaja ngayun. Nújun, ¿mé xi sahme xi cuma sacú ná cjuahñu xatsē? —Cuatjin cachja cha.

<sup>18</sup> Ngajan xi Jesús ne, cafayangui me tsēhē cha cuitjin:

—¿Mé má cuatjin noje xi ndaja ngahan? Tsajin xuta xi ndaja suva ni Nina xi ndaja me. <sup>19</sup> Ha hye cjua xi cavitexa Nina: “Xi caniquiin xuta. Xi canihñii chjuun nahñu riji jingu sa chjuun. Hacuiin mé chjehehmi tséhë xuta. Xi canujiin cjuandesu tséhë xuta. Xi cavindachiin rë xuta. Chjehercuin nahmi riji hacuaha chjehercuin ná riji.” Véhë cjua xi cavitexa Nina.

<sup>20</sup> Ngajan xi cachaja cha cojo Jesús ta:

—Maestro, yějë cjua véhë ne, hisca cjuanixti naha ne, ha cahndë.

<sup>21</sup> Xi cahndë Jesús cjua rë cha ne, jemu cachuya rë me tséhë cha. Ngajan xi chja me cojo cha ta:

—Machaja sa ri ngu xcusun. Tjihin ne, titeñi yějë xi tjin ri hane tujún xi sacu ri ne, tehe rë xuta yuma. Hane sehe ndovetjengui ná. Sá xi nihñi cuatjin ne, xi cjuehe xcun Nina ne, ngajan sacú ri cjuanchina xi ndajyihí.

<sup>22</sup> Xi cahndë cha cjua véhë ne, jemu choho camá rë cha. Va va má cacun cha, cavetju cha cafe cha ta, tséhë xi jemu nchina cha.

### *Jesús ne, chja me tséhë cjuanchina*

<sup>23</sup> Ngajan xi Jesús ne, vutsejen me yějë ni ladu hiscan siu cha ladu rë me ne, sehe cachja me cojo cha cuitjin:

—Jemu chja tséhë ngu xuta nchina xi cuisehen me ladu rë Nina.

<sup>24</sup> Ngajan xi cha ladu rë me ne, jemu quijircun rë cha xi cuatjin cachja me. Ngajan xi cachja nga Jesús cojo cha cuitjin:

—Compañeru, jercu chja tséhë xuta xi cuisehen me ladu rë Nina. <sup>25</sup> Sacuatjin rë naxin xi cumaji cuatju chu ngojo rë nindu ne, cuatjin rë xuta xi jemu meje rë me cjuanchina ta, cumaji cuisehen me ladu rë Nina.

<sup>26</sup> Xi cahndë cha ladu rë me cjua véhë ne, jemu quijircun camahani rë cha. Ngajan xi cachja cha ngajñi rë cha cojo xicjin cha:

—¿Peru yo ni xi cuma cuetjutje ni?

<sup>27</sup> Xi cavuya me vutsejen me hiscan siu cha ne, ngajan xi cachja me cuitjin:

—Yějë ni xi maji sahmi xuta ne, Nina ne, hatuxa ma sahmi me.

<sup>28</sup> Ngajan xi cavetsihin cachja cha Pedru cojo Jesús cuitjin:

—Chutsujun ni. Ngayin ne, canismitacuin yějë ni xcusun, hane cavisihin ladu nuju.

<sup>29</sup> Ngajan xi cachja Jesús ta:

—Cuichjá quixë cojo nuju ta, tu yo ni xi tsismicacun ndava, tsismicacun hntsë, tsismicacun tichja, tsismicacun naa rë o sá nahmi rë o sá quihndi rë, hacuaha tsismicacun nangui rë xitjë rë ngatsë naha cojo ngatsë rë cjua rë Nina ne, jinguyějë

rë xi ngasunhdë vihi tacun me ne, <sup>30</sup> sacú rë me ngu cientu sa quisun tsëhë ngu ngu xcusun xi catsismicacun me. Cjín ndava me sacú rë me. Cjín hntsë me sacú rë me. Cjín tichja me sacú rë me. Cjín naa rë me sacú rë me. Cjín quihndi rë me sacú rë me. Hacuaha cjín nangui rë xitjë rë me sacú rë me. Handasa cojo cjuañihi, peru sacú rë me. Hane hya xi cueya me ne, cuechú me cjuahñu xatsë xcun Nina. <sup>31</sup> Tsëhë xuta xi matitjun quihndë ne, jemu cjín me xi cumachjiriin hya xi cuinduva Nina ngasunhdë. Hane xuta xi hacuiin matitjun quihndë ne, hya ne, cumachji rë me xi cuma titjun me. —Cuatjin cachja me.

*Jesús ne, camá jyan ndiya xi chja me xi cueya me*

<sup>32</sup> Hya xi camá ne, hora xi jiya ndiya Jesús cjui me cojo cha ladu rë me nandya Jerusalén ne, titjun Jesús cjui me. Hane cha ladu rë me ne, jercu fircun ra, tsëhë xi tsacjuiin Jesús xi cjui me. Hane xuta xi tjengui cjui cojo me jan ne, hacuaha jemu tsacjun me má. Ngajan xi Jesús ne, cajindaya nga me cha ladu rë me xi tejó ni jan, sehe cavetsihin cachja me cojo cha xcusun xi ha tacun xati xi cuatju me cuma. <sup>33</sup> Cuitjin cachja me:

—Tinuhyun ni, tivanguen nandya Jerusalén. Hane ngajan ne, tjín yo me xi cuiteña ná ngajan cojo nahmi xi matitjun cojo cha maestru tsëhë ley. Cuatjin sahmi me ha ndasa xi ngahan xi Quihndi rë Xuta Jain. Hane xuta xi cuacun vë cuichja me xi cueya ngahan, hacuaha sua nga me ngahan cojo xuta rë jingu sa nandya. <sup>34</sup> Sehe tsixcuehyu me ngahan. Cuëhënatya me ngahan, cuaja me ngahan, hisca tsiquehen me ngahan. Peru xi cjuë jyan nixtin ne, cúa nga cjuahñu.

*Santiago cojo Juan ne, fehya me Jesús ngu cjuandaja*

<sup>35</sup> Xi cajnetaha cachja Jesús cuatjin ne, sehe quiiji cha Jacobo cojo cha Juan, quihndi rë Zebedeo, quiiji tjengui tiña cha Jesús. Ngajan xi chja cha cojo rë me cuitjin:

—Maestro. Nihñu favor ne, cjua xi chjahyin nuju ne, ningatuhun niji.

<sup>36</sup> Ngajan xi cachja me cojo cha cuitjin:

—¿Mé xi meje nuju xi sahme ni?

<sup>37</sup> Ngajan xi chja cha cojo rë me cuitjin:

—Tuhun cahndë xi ngu ngu ngayin ne, cuinechintihin ngu ngu ladu tjeheh nuju, hya xi nihñu gobiernu nuju.

<sup>38</sup> Ngajan xi cachja Jesús cojo cha cuitjin:

—Ngayun ne, hyuun mé xi chahyun. ¿Há scaa nuju cuatju cjuañihi xi cuátju ngahan ni?

<sup>39</sup> Ngajan xi cachja cha ta:

—Scaa niji.

Ngajan xi cachja nga Jesús cojo cha cuitjin:

—Cjuañihi xi cuatju ngahan cumá ne, hacuaha cojo ngayun cuatjun cumá. <sup>40</sup> Peru xi cuinechuntuhun ngu ngu ladu tjeheh naha ne, hacuiin ngahan cuichjá ta xcusun vëhë ne, sacu rë xuta xi cuichja Nina xi sacu rë me cahndë.

<sup>41</sup> Xi cahndë cha xi tē jan cjua xi cachja Jesús ne, cavetsihin camacjan rë cha cojo cha Jacobo cojo cha Juan. <sup>42</sup> Hya xi camá ne, cajindaya Jesús cha xi tē jan ne, cachja me cojo cha cuitjin:

—Ngayun ne, ha hyun ta xuta matitjun nguehe ngasunhndë jemu sahmi yehe me yojo rë me, ta jercu meje cuitexa me. <sup>43</sup> Peru hacuiin cojo ngayun cuatjin nihñu ngajñi nuju ta xi meje rë ne, jarë ngayun xi meje nuju xi cumatitjun ngayun ne, nihñu xa rë xingun sacuaha mosu. <sup>44</sup> Hane jarë ngayun xi meje nuju xi xingun ne, cjuaharcun me yun ne, nihñu xa rë xingun sacuaha mosu xi caxteña. <sup>45</sup> Hisca ngahan ne, Quihndi rë Xuta Jain má ngahan, peru hacuiin canduvá xi xuta cuisecoo ná me ta ngahan cuisecoo rë xuta. Hisca tsingatehen xi tsiquehen ná xuta, cojo sa xi cjín xuta cuaxëtje Nina me. —Cuatjin cachja Jesús.

*Jesús ne, sahmi me xi cuma scutsejen cha rcá xi hmí rë Bartimeo*

<sup>46</sup> Hya xi camá ne, cjui cjui me cojo cha ladu rë me ne, cavechu me nandya Jericó. Xi cavatju me tsëhë nandya vëhë cojo xutacjín xi ticojo me ne, cavechutaha me cha quihndi rë Timeu, cha xi hmí rë Bartimeo, ngu cha rcá, hane tifehya cha caridad tjeheh ndiya. <sup>47</sup> Xi cahndë cha rcá jan xi Jesús tsëhë nandya Nasaret hacui me xi nduva me, jercu cachja cha:

—Jesús, quihndindaicjin rë David, catamayuma nuju ngahan.

<sup>48</sup> Hane cavisiajmicjan xuta jan cojo cha ta, catisejyu cha. Peru hitsë sa hñu chja cha cuitjin:

—Quihndindaicjin rë David, catamayuma nuju ngahan.

<sup>49</sup> Ngajan xi casecunhñu Jesús. Sehe ngajan xi chja me cojo cha ladu rë me cuitjin:

—Chjindayun rë cha.

Hya xi camá ne, cha ladu rë me jan ne, cajindaya cha cha rcá jan, sehe cachja cha cojo cha cuitjin:

—Tehe cjuetacun xahasen riji quen. Tisatjinhngue ta, jindaya me ngaye.

<sup>50</sup> Cuatjin camá xi cafaha cha tsjanga rë cha catsingatjenxin cha. Sehe marcu macjain casecun cha. Sehe quijitjengui cha Jesús. <sup>51</sup> Hane xi cavechutaha cha me ne, ngajan xi cachja me cojo cha cuitjin:

—¿Mé xi meje ri xi sahmi cojo ri?

Ngajan xi cachja cha rcá jan ta:

—Maestro, xi meje ná ne, xi cuma tsejen ná.



<sup>52</sup> Ngajan xi cachja Jesús cojo cha cuitjin:

—Ndatjin. Cuma cjuihin ta, camandaja ye, tsëhë xi camacjain ri ngahan.

Hane ha hora vëhë ni ne, camatsejen rë cha. Hane quiji cha cojo rë me hacutjin cju me.

## 11

### *Tivisehen Jesús nandya Jerusalén*

<sup>1</sup> Hane xi camatiña me Jerusalén xi ha cjuaha me nandya Betfajé cojo Betania, quiji me ndetjun xi hmí rë Ndetjun Olivu, ngu ndetjún xi tiña tacun cojo nandya xi cuacun vëhë ne, catsingatju me jo cha ladu rë me quiji cha tixa. <sup>2</sup> Cuatjin cachja me cojo cha:

—Tangun nandya xi tsejen vë. Hane xi tu cjuhun tjeheh nandya ne, sacú nuju ngu burru xatsë xi hisca ngu cjëë cuijin rë chu, quitahahñu chu ngajan. Hane chundecjun chu, sehe nduvuncujun chu. <sup>3</sup> Sá xi yo xi cuichja cojo nuju ta: “¿Mé má cuatjin chundecjun chu ne?”, cuitjin tinújun: “Me xi matitjun tsijin meje rë me chu. Peru sehe tsicuya nga me chu.” —Cuatjin cachja Jesús cojo cha.

<sup>4</sup> Hya xi camá ne, quiji cha tixa xi cachja Jesús cojo cha. Xi tu cafehe cha ngajan ne, casacu rë cha ngu chu burru xatsë quitahahñu chu ngajan ndiya tiña tingotjo ndihya. Hane cavundecja cha chu.

<sup>5</sup> Hane ngujo cha xi hinchacun jan ne, cachja cha cojo cha ladu rë Jesús cuitjin:

—¿Mé má cuatjin cachundecjun chu burru vë?

<sup>6</sup> Ngajan xi cachja cha ladu rë Jesús hacutjin cachja me cojo cha. Sehe cha xi cuacun jan ne, casua cha cahndé quijicojo cha cha ladu rë Jesús chu burru jan. <sup>7</sup> Hane sehe quijicojo cha chu hiscan tacun Jesús. Hacuaha casua cha tsjian rë cha casesun ngaxtun chu sehe camiji me chu. <sup>8</sup> Hya xi camá ne, jemu cjin xuta xi cacandi me tsjian xcun rë me ndiya hacutjin cju me Jesús. Hane ngujo nga me ne quiji cavotohosun me xca xcuen ngajan nguiña, hane hacuaha cacandi me ndiya hacutjin cju me Jesús cojo sa xi tifaharcun me me.

<sup>9</sup> Hane yëjë me xi cju me titjun cojo yëjë me xi tjengui jan ne, cavetsihin jercu cajindaya me cachja me:

—Nacuechji rë Nina ta cafehe me xi catsingatju Nina.

<sup>10</sup> Catsinchacun me me xi cuitexa naja sacuaha cavitexa David xutachanga naja. Jemu catsinchacun Nina me xi nduva tsëhë xi Nina catsingatju rë me. —Cuatjin cajindaya xuta.

<sup>11</sup> Xi tu cavisehen me nandya Jerusalén ne, quiji me yungun xi matitjun. Xi tu cavutsejen nguehe cavutsejen ngajan me

ne, mé ta quiji hora ne, cavetju nga me cojo cha ladu rë me xi tejó jan ne, cavuya cafehe nga me nandya Betania.

<sup>12</sup> Xi camá nchujun jan ne, cavuya cavetju nga Jesús tsëhé nandya Betania. Hane ha jemu vojo rë me hora xi cavetju me. <sup>13</sup> Hya xi camá ne, tsëhé cjin ni cavëë me ngu yaxujun xi chine tú rë xi jemu ndaja tsejen yaha xca rë. Hane quiji me hiscan secun, sá sacu sinë me. Peru xi cafehe me ngajan ne, tsajin camahani mé xi casacu rë me, tsëhé xi hacuiin nixtin rë tuhaxi jan. <sup>14</sup> Ngajan xi cachja me cojo ya jan cuitjin:

—Quihndë tsajin nixtin xi cuaqui tú riji xi sinë xuta.  
Hane cha ladu rë me ne, cahndë cha cjua rë me.

*Cavaxë Jesús xuta xi sahmi ndatsin ngajan yungun xi matitjun*

<sup>15</sup> Hya xi camá ne, cafehe me nandya Jerusalén. Xi cafehe me ngajan ne, quiji me ndatsen yungun xi matitjun jan. Hane cavetsihin cavaxë me xuta xi sahmi ndetsin ngajan. Catsindefa me maxë rë xuta xi tsindeya tujún. Hacuaha cacandi me siya rë xuta xi viteña nisë tyava. <sup>16</sup> Hane casuaain me cahndë xi tjin mé xi cjuaha xuta xi cuatjuvasen me ndatsen yungun jan.

<sup>17</sup> Sehe cavetsihin cavicuya me xuta jan cuitjin:

—Ngayujun ni ne, ha hyun xi cuitjin cachja Nina xcun xujun rë me: “Ndya naha ne, ngu ndihya xi vinduva xuta tsëhé yëjë ni nandya cuisiajmi me cojo ná.” Peru ngayun ne, tinihñu ndava Nina vi sacuaha ndava chëjë. —Cuatjin cachja Jesús.

<sup>18</sup> Hya xi camá ne, xi cahndë nahmi xi matitjun cojo maestru tsëhé ley cjua jan ne, cavetsihin cavangui me chuva rë xi cuma tsiquehen me Jesús. Cuatjin meje rë me tsëhé cjuaxin xi tjin rë me, tsëhé xi yëjë xuta ne, jemu quijircun rë hacutjin cavicuya Jesús. <sup>19</sup> Xi quiji hora ne, cavetju nga Jesús tsëhé nandya jan cojo cha ladu rë me.

*Caxi ya xujun xi cama cjan rë Jesús cojo*

<sup>20</sup> Hane xi camá nchujun jan ne, cavuya cafe nga me nandya Jerusalén. Hane xi cavatju nga me hiscan secun ya xujun jan ne, cavëë me xi ya xujun jan ne, cafë caxi hisca rcu hisca ntsacu. <sup>21</sup> Ngajan xi cha Pedru ne, catsinguitsjen cha cjua xi cachja Jesús cojo ya jan nguñña ne, sehe ngajan xi cachja cha cojo Jesús cuitjin:

—Maestro. Chutsujun ta ya xujun xi canújuncjun cojo jan ne, cafë caxi.

<sup>22</sup> Ngajan xi cafayangui Jesús tsëhé cha cuitjin:

—Catamacjain nuju tsëhë Nina. <sup>23</sup> Cuichjá cojo nuju ngu cjuaquixi ta tu yo ni xi cuichja cojo naxi vëhë cuitjin: “Tihinxin tsëhë nguehe, tihin tisihin ngajñi ndachacun”, sá xi hacuïn majo cacun, sá xi macjain jain rë hacutjin xi cachja ne, cuatjin jain cuma. <sup>24</sup> Vëhë xi chjá cojo nuju ta yëjë ni xi chjahyun cojo Nina ne, ningatuhuntacun sacuaaha xi ha casacu nuju ta xi cuatjin ne, sacu jain nuju. <sup>25</sup> Hora xi chjahyun rë Nina ne, sá xi tjin yo xi choho cachja tsujun, o sá xi choho casahmi tsujun ne, ninchatuhun rë, cojo sa xi Nahmi naja xi tacun ngahnga ne, hacuaaha tsinchataha nuju me tsëhë jyë nuju ta, <sup>26</sup> sá xi ninchatuun rë me ne, Nahmi naja xi tacun ngahnga ne, hacuaaha tsinchataain nuju me. —Cuatjin cachja me.

*Finenguisen xuta ¿yo casuaxa rë Jesús?*

<sup>27</sup> Cjui cjui me ne, cafehe me nandya Jerusalén. Hane xi cafehe me jan ne, quiji me yungun xi matitjun. Hora xi tsujyihya me ndatsen yungun jan ne, nahmi xi matitjun cojo maestru tsëhë ley cojo sa xuta changá xi yahnga jan ne, cafehe tjengui me Jesús. <sup>28</sup> Hane cuitjin cavinenguisse me:

—¿Yo cavitexa ri xi cuatjin nihñi xcusun vë? ¿Yo casuaxa ri?

<sup>29</sup> Ngajan xi Jesús ne, cachja me cojo xuta jan cuitjin:

—Cjuinenguësë nuju ngu cju. Hane sá xi nicuyun tsahan ne, sehe cuichjá cojo nuju yo cavitexa ná xi sahme xcusun vëhë. <sup>30</sup> Ngayun mé nújun, ¿Yo xi cavitexa rë cha Juan xi cavitenda cha xuta? ¿Há Nina cavitexa me cha ne, há xuta cavitexa me cha? Tinújun cojo ná.

<sup>31</sup> Ngajan xi vetsihin visiajmi xuta jan ngajñi rë me cojo xicjin me cuitjin:

—Sá xi cuinújan xi Nina cavitexa me ne, cuichja me vihi cojo naja cuitjin: “Sá xi cuatjin ne, ¿mé má camacjaain nuju xi cachja cha ni?” <sup>32</sup> Peru ¿há cuma cuinújan xi xuta cavitexa me cha?

Cuatjin casacuinyiin rë xuta xi cuacun vë mé cju xi tsicuya me tsëhë Jesús ta, tsëhë xi tsacjun me xutacjín, tsëhë xi yëjë ni xuta jan ne, macjain rë me xi cha Juan ne, Nina cavitexa jain me cha xi suacuenda cha cju rë Nina. <sup>33</sup> Vëhë xi hya xi cafayangui me tsëhë Jesús ne, cachja me cuitjin:

—Hyiin.

Ngajan xi hacuaaha Jesús ne, cachja me ta:

—Sá xi cuatjin ne, ta mijí nicuyun cju tsahan ne, hacuaaha cuichjaain cojo nuju yo cavitexa ná xi sahme xcusun vihi.

## 12

*Ejemplu tsëhë cha mosu xi choho cjuatacun rë*

<sup>1</sup> Sehe cavetsihin cavicuya Jesús xuta jan ngujo cjuua, peru cojo suva ejemplu cachja me. Cuitjin cavetsihin me cjuua:

—Cuejña xi ngu xihin ne, catsitjē me nahñu rē uva ngu rquí nangui. Hacuaha casahmi me hnhcua xondyojo rē tahndee rē xitjē jan. Ha ngajan ne ne, cafanguiya me ngu ndyojotē hiscan cuaxē nandá rē tuhaxi jan. Hacuaha casahmi me ngu cahndē hiscan xi cavesun me ngu nachan ngahnga xi sesun xuta xi sahmi cuidadu xitjē rē me.

<sup>2</sup> Hya xi camá ne, casuatsja me cojo jingu sa xuta xi sahmi cha cuidadu rē, hane cjuaha me tsē tsē cojo rē cha. Sehe cavetju me quiji me ngu nanguicjin. <sup>3</sup> Xi cavechú nixtin tsēhē tutjē jan ne, catsingatju me xi tsēhē jan ngu mosu hiscan xi quitaha xitjē rē me, xi cjuahatsja cha tsēhē xi satē rē me. <sup>4</sup> Hya xi camá ne, xi cavechu cha mosu jan ne, cavaja xuta xi tacun tsja xitjē jan cha mosu jan. Hane catsicuya cha cha cafe cha. <sup>5</sup> Ngajan xi me xi tsēhē jan ne, cavuya catsingatju nga me ngu mosu quiji. Hane xi cavechu mosu vēhē ngajan ne, me xi siutaha jan ne, cavanguihu me rcu cha, hacuaha choho cachja me cojo cha. <sup>6</sup> Cafē ne, me xi tsēhē jan ne, cavuya catsingatju nga me ngu mosu. Peru mosu jan ne, catsiquehen me xi cuacun jan cha. Cafē vēhē ne, catsingatju camaha sa cha mosu. Hane ngujo mosu jan ne, tu cavaja ni cha. Hane ngujo nga ne, catsiquehen camahani cha.

<sup>7</sup> Quihndē me xi tsēhē cahndē jan ne, ngu ni quihndi tjin rē me ne, vēhē sa tacun. Handasa jemu hmucacun me cha ne, peru catsingatju me cha, tsēhē xi cuitjin catsingatahacacun me: “Quihndi naha vi ne, cjuaharcun me cha.” <sup>8</sup> Peru xi cafehe cha quihndi rē me ngajan ne, ngajan xi chja xuta xi sahmi cuidadu xitjē jan cojo xicjin me ta: “Cha vihi quihndi xi cjuahatsja cha cahndē vihi. Quihndē ne, niqen cha, cojo sa xi cumá tsajan nangui.” <sup>9</sup> Hya xi camá ne, cafaha me cha catsiquehen me cha, sehe catsingatjexin me cha tsēhē cahndē jan. Cuatjin casahmi me xi cuacun vē.

<sup>10</sup> Hindē ne, me xi tsēhē nangui jan ne, ¿mé sahmi me cojo xuta xi siutaha cuidadu rē xitjē jan? Hatuxa cjue me ne, tsiquehen me me, hane sua me cahndē jan cojo jingu sa xuta.

<sup>11</sup> Quihndē, ngayun ne, ha chutayuun cjuua tsēhē xujun rē Nina xi chja cuitjin:

Ndyojo xi chja cha chjinevexo xi machjiriin ne,  
ndyojo vēhē xi cachja Nina xi cuejña tjun tjun yuju rē xihndēnaña.

<sup>12</sup> Cuatjin casahmi Nina xi cumá hacuaha jemu chuya rē xahasen naja xi cuatjin camá.

<sup>13</sup> Hya xi camá ne, xuta changá xi cafehe tjengui rē Jesús jan ne, meje cjuaha me me, tsēhē xi camachaya rē me xi condra

rë me xi cachja Jesús. Ha ndasa meje cjuaha xuta changá jan Jesús ne, peru xi tsacjun me tsëhë xutacjín jan ne, ha quihndë tsajin mé casahmi me, hane cafe me.

*Cjuacjintacun tsëhë tujúnsa*

<sup>13</sup>Hya xi camá ne, xuta changá xi cuacun jan ne, catsingatju me ngujo cha tsëhë partidu fariseo cojo ngujo cha ladu rë Herodes xi cjuahangahma cha Jesús, cojo sa xi xuta changá jan ne, cuma cuinchajyë me me. Xi tu cafehe cha ne, ngajan xi cachja cha cojo rë me ta:

<sup>14</sup>—Maestro. Ngayin ne, hyin ta ngayun ne, quixi cjua tsujun. Ha tuxa cjuaquixi xi nújun ha ndasa xi cojo xuta nchina visiajmu o sá cojo xuta yuma. Tu yo ni ne tangun ni visiajmu cojo ta tsëhë xi ngayun ne, vicuyun ndiya rë Nina cojo cjuaquixi camahani. Quihndë ne, sacuahe ley rë Moisés ne, ¿há sua cahndë xi cuechjen tujúnsa naja cojo César, me xi matitjun, o há suaain cahndë? —Cuatjin cavinenguise cha.

<sup>15</sup>Peru Jesús ne, tsëhë xi ha vacun rë me xi jemu ndacha cha ne, cuitjin xu cachja me cojo cha:

—¿Mé má cuatjin meje chuhunchuvun ná? Nduvuncujun ngu tujún scutséjen.

<sup>16</sup>Hya xi camá ne, cha xi cuacun jan ne, canduvacojo cha ngu tujún tyava. Ngajan xi cachja me cojo cha cuitjin:

—¿Yo xcusun rë hacuaha yo ñihi rë xi quitahá xcun tujún vë? —Cuatjin cavinenguise Jesús.

Ngajan xi chja cha cojo rë me cuitjin:

—Tsëhë César. —Chja xu cha.

<sup>17</sup>Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rë César xi tsëhë me; hane tuhun rë Nina xi tsëhë me. —Cuatjin cachja Jesús.

Hya xi camá ne, jemu quijircun rë cha xi cuatjin ndaja cachja Jesús.

*Cjua chjinenguise hacutjin cumá xi cuya cjuahñu*

<sup>18</sup>Hacuaha canduva tjengui rë me ngujo cha tsëhë partidu saduceo, cha xi vicuya ngu cjuachacun xi chja xi hya xi cueyan ne, ha quihndë cuyaaín cjuahñu naja. Hane cuitjin cachja cha ngujo cjua cojo Jesús:

<sup>19</sup>—Maestro. Moisés ne, catsihindu me xcun xujun rë Nina xi sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuahe quihndi rë nima vëhë. <sup>20</sup>Quihndë ne, cuejña xi ngu ndihya ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane chjuun rë cha vëhë ne, casacuiin rë na hisca ngu quihndi cojo cha. <sup>21</sup>Hya xi camá

ne, hntsë nima vëhë, cha xi majo ne, cafaha cha na cahan vëhë camá chjuun rë cha na, peru hacuaha cahme cha hane casacuiin rë na quihndi. Hacuanitjin ni cafaha cha xi majyan jan na, <sup>22</sup> hisca xi cafë yëjë xi yatu cha cafaha cha na. Peru yëjë cha xi cuacun vëhë ne, cafë cha cahme cha chuva ngu chuva ngu cha. Hane na vëhë ne, casacuiin rë na hisca ngu quihndi cojo cha xi cuacun vëhë. Hiscan xi cajnetaha ne, hacuaha cahme na. <sup>23</sup> Quihndë ne, ¿mé nújun? Hya xi cuya yëjë nima cjuahñu ne, ¿jarë jain cha xi chjuun rë cha na xi cjuaquixi? ta yëjë xi yatu cha ne, cavixan cha cojo rë na. —Cuatjin cavinenguisse cha.

<sup>24</sup> Ngajan xi cachja Jesús cojo cha cuitjin:

—Ngayun ne, cuaaintjin xi nújun, tsëhë xi vijni rcun cjua xi chja xujun rë Nina, hacuaha hyuun xi Nina ne, jemu hñu cjuatacun rë me. <sup>25</sup> Hya xi cuya cjuahñu rë nima ne, ha quihndë hacuiin cuixan me hacuaha hacuiin tsinguixan me, ta tangun cumá sacuaha xi siu ángel ngahnga ne, cuatjin cuiyuju me. <sup>26</sup> Hacuaha quihndë xi tinújan tsëhë nima xi cuya cjuahñu rë ne, ngayun ne, sacuaha xi cjëë chutayun xujun xi catsihindu Moisés hacutjin cahndë me cjua rë Nina xi cavetju tsëhë cahntsua ngu ya lihndi xi seti. Cuitjin cachja Nina cojo me hya: “Ngahan xi Nina rë Abraham ngahan. Nina rë Isaac, hacuaha cojo Nina rë Jacobo má ngahan.” Cuatjin cachja Nina tsëhë xuta xi ha cahme me. <sup>27</sup> Peru Nina ne, hacuiin nina rë nima ta nina rë xuta xi quicun me. Hane sá xi quicun nima jan, ngajan tsejen xi cjuachacun xi nújun ne, quixiin.

*Artículo tsëhë ley xi hitsë sa venguichji rë*

<sup>28</sup> Hacuaha cafehe ngu cha maestru tsëhë ley hiscan tacun Jesús. Hane xi cahndë cha cjuavisiajmi rë me ne, xi ndaja cama catsicuya Jesús, ngajan xi cavinenguisse cha me cuitjin:

—Maestro, tsëhë yëjë ni cjua xi cavitexa Nina naja xcun xujun ley ne, ¿jarë artículo xi hitsë sa matitjun?

<sup>29</sup> Ngajan xi cafayangui Jesús cuitjin:

—Xi matitjun ne, cuitjin chja: “Ngayujun ni ngayun xuta ladu rë nangui Israel, Nina naja ne, ngu tu tu ni me. <sup>30</sup> Meje rë xi nihña hmutacun Nina, me xi matitjun tsajan, cojo ngayëjë ni cjuatacun naja, cojo ngayëjë ni xahasen naja, hacuaha cojo ngayëjë ni ngahñu naja.” <sup>31</sup> Hane xi má jo ne hacui vihi: “Meje rë xi nihña hmutacun xingueen sacuatjin hmutacun suvaan yojo naja.” Tsëhë yëjë ni artículo xi cavitexa Nina ne, jo ni cjuatacun vëhë xi matitjun. —Cuatjin cachja Jesús.

<sup>32</sup> Ngajan xi cachja cha maestru tsëhë ley cojo rë me cuitjin:

—Ndatjin canújun, maestro. Canújun cjuaquixi ta Nina naja ne, ngu tu tu ni me. <sup>33</sup> Hacuaha ndatjin canújun xi meje rë xi nihña hmutacun Nina cojo ngayëjë ni cjuatacun naja, cojo

ngayëjë ni ngahñu naja, hacuaha meje rë xi nihña hmutacun xingueen sacuaha nihña hmutacun yojo naja suvaan. Cjua vëhë ne, tjercu venguichji rë. Hisca vengui sa chji rë xi cuma rë yëjë ni cjuandaja cojo yëjë cjuatjo xi cjue xcun Nina.

<sup>34</sup> Xi tu cahndë Jesús ta ndatjin cafayangui cha maestru jan ne, ngajan xi cachja me cojo cha cuitjin:

—Ha jemu hitsë sa chaja xi cuisuhun ladu rë Nina.

Ha quihndë tsajin yo xi macacun sa cjuinenguise rë me ngu cjua.

*¿Yo tjë rë má me xi hmí rë Mesías?*

<sup>35</sup> Ngajan xi Jesús ne, hora xi tivicuya me xuta ngajan yungun xi matitjun ne, cachja me cojo xuta cuitjin:

—Maestru tsëhë ley ne, chja cha ta Cristu, me xi tsingatju Nina xi cumatitjun tsajan ne, tjë rë David má me. <sup>36</sup> Peru suva David ne, catsihindu me cjua xi cachja Hasen rë Nina cojo rë me cuitjin:

Nina ne, cachja me cojo Nai naha cuitjin:

“Tinechin ladu quixi naha

hiscan hya xi yëjë xi sahmi condra ne, cuiyuju ngahan ngahma gobiernu riji.”

<sup>37</sup> Ndatjin, sá xi cuatjin cachja David tsëhë me ne, ¿há cuma xi hisca tjë rë David má me ni, hacuaha matitjun nga me tsëhë David ni? —Cuatjin cachja Jesús.

Hane xutacjín ne, jemu cojo cjuasua cavisiñuju me cjua rë Jesús.

<sup>38</sup> Hacuaha cuatjin cachja nga me ngu ndiya xi tivicuya me xuta:

—Tjin nuju cuidadadu. Hacuian cojo ngayun nihñu sacuatjin sahmi cha maestru tsëhë ley. Cha xi cuacun vëhë ne, jemu meje tsuyihiya chacun cha hacuaha meje rë cha xi cuichja xuta nina cojo cha ngajñi ndetsin. <sup>39</sup> Hacuaha hora xi fi cha yungun ne, cjue cha cuiyuju cha ngu cahndë ndatjin hiscan viyuju xuta xi matitjun. Ha cuanitjin ni hiscan xi cjue sinë cha ngu ndava suhi ne, fi cha viyuju cha cahndë ndatjin hiscan viyuju xuta xi matitjun. <sup>40</sup> Hacuaha yachjin cahan ne, jemu cjín tujún vaxë cha na. Hisca ndava na tsajin. Hane hisca xi chjayuma cha ne, jemu nduju hora chja cha, peru hacuiin nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatjun cha, xi cuma rë jingu sa xuta.

*Tujún chjë rë na cahan*

<sup>41</sup> Sehe quiji cavéjña me tiña hiscan xi tacun caxa xi xincha tujún chjë rë Nina, vutsejen me hacutjin vincha xuta tujún. Hane jemu cjín xuta nchina quiji cavincha me chjë rë, jercu cjín tujún cavincha me. <sup>42</sup> Hya xi camá ne, cojo ngu na cahan xi jemu yuma camahani quiji cavincha na jo tujún sinë xi

jemu chuva chji rë cahntsua caxa jan. <sup>43</sup> Ngajan xi Jesús ne, casahmitangun me cha ladu rë me, sehe cachja me cojo cha cuitjin:

—Cuichjá cojo nuju cjuaquixi ta xuma chjuun cahan vihi ne, hitsë sa vengui chji rë tujún xi cavincha na, xi cumá rë tujún xi jemu cjín cavincha cha nchina jan ta, <sup>44</sup> tsëhë xi cha xi cuacun vëhë ne, xi vangui rë cha ne, vëhë xi cavincha cha. Hane ha ndaja na vëhë ne, cojo cjuayuma xi tacun na ne, tujún xi cavincha na jan ne, ha vëhë yëjë ni xi tjin rë na. —Cuatjin cachja Jesús.

## 13

*Jesús ne, chja me ta yungun xi matitjun ne, cuetsunya*

<sup>1</sup> Hya xi camá ne, hora xi tivetju Jesús tsëhë ndatsen yungun xi matitjun jan cojo cha ladu rë me ne, ngajan xi chja nga cha ladu rë me jan cojo rë me cuitjin:

—Maestro, chutsujun ndyojo xi texo yungun vihi ta tjercu tu ndacun camahani. Hacuaha ndihya tsëhë ne, jercu tu cun camahani.

<sup>2</sup> Ngajan xi chja Jesús cojo cha cuitjin:

—Sacuaha ndihya ndacun xi chutsujun ne, cuechu nixtin xi hisca xi ngu ndyojo vi ne, tsajin hinchasuncoo xicjin ta, cjuë yëjë cuixujne.

*Hacutjin cumá hya xi cjuë ngasunhndë*

<sup>3</sup> Cafë cachja me cuitjin ne, sehe cavetju me quiji me cojo cha ladu rë me, cafehe me tiña rcu Naxi Olivu, quixi rë tingotjo yungun xi matitjun jan. Hane xi quijixin me cojo cha Pedru cojo cha Jacobo cojo cha Juan cojo cha Andrés, sehe cavinenguise cha me cuitjin:

<sup>4</sup> —¿Janihya cuetjucaa xcusun vëhë xi canújun?

<sup>5</sup> Ngajan xi cachja Jesús cojo cha cuitjin:

—Nechun cuidadu cojo sa xi hacuiin cuma ndacha ngayun ta, <sup>6</sup> tsëhë xi jemu cjín xuta cjuehe me xi cuichja me cueyanangui me ñihi naha cuichja me xi hacui me xi Cristu me. Hane cuatjin jemu cjín xuta cumacjain rë me cjuandacha rë me xi cuacun vë.

<sup>7</sup> Hacuaha hya xi cumachaya nuju cjuaxi jemu yehe si tijima ne o sá xi tjin cjuacjintacun ta jemu yehe si nduva ne, hacuiin cumacjintacun ta ha tuxa cuatjin cuma. Peru hacuiin ha hya cjuë nixtin rë ngasunhndë vihi. <sup>8</sup> Xuta nandya scaan cojo xuta xi hacjahi. Ngu nación cojo ngu nga ne, scaan. Hacuaha cjín cahndë xi cjuani nangui. Hacuaha cjín cahndë ne, cuma jindya. Cuatjin cumá xi cuetsihin cjuañihi xi cuatju xuta.



<sup>9</sup> 'Nechun cuidadu ta, cuechu nixtin xi xuta nandya ne, cjue cani nuju me xcun xutaxa rē yungun ne, hacuaha cuaja nuju me. Hacuaha tjin nuju xi cuangun xcun xutaxa rē ndihyavasen cojo xcun gobernador ngatsē rē xi macjain nuju ngahan. Hane ngajan ninguixun yējē cjua hacutjin cavicuyá nuju. <sup>10</sup> Peru chaja sa xi cjuē ngasunhndē ne, meje rē xi cuichja xuta ladu naha cjua rē Nina jingujyē ni nandya tsēhē ngasunhndē. <sup>11</sup> Hora xi cjuí chani nuju xcun xutaxa rē ne, hacuiin cumacjintacun tsēhē cjua xi cuinújun jan ta, Hasen rē Nina ne, scuxaha cjuatacun nuju hora vēhē hacutjin cuinújun. Hacuaha vēhē ni cuinújun ta tsēhē xi hacuiin cjuatacun nuju xi cuinújun ta cjuatacun rē Nina xi sua nuju Hasen rē Nina. <sup>12</sup> Xuta nandya ne, cuinchajyē me hntsē me, cuinchajyē me xutacha rē me, hacuaha cuinchajyē me quihndi rē me, cojo sa xi xutaxa rē ne, cjuaha me xuta xi cuacun vē ne, tsiquehen me. <sup>13</sup> Hane yējē xuta ne, choho scuēē nuju me ngatsē naha. Peru jarē ngayun xi scaa nuju cojo cjuacjintacun vēhē hisca xi cueyun ne, cuechun xcun Nina. —Cuatjtin cachja Jesús.

### *Cjuacjintacun jyē xi cuma*

<sup>14</sup> 'Yo xi scutaya cjua xi sehe nduva vi ne, meje rē xi ndaja catetaharcun. Tjin xcusun xi tsinguetsun rē cahntsua yungun xi matitjun. Hane hya xi cjuehe ngu xcusun xi cuacun vē hiscan xi ndajintjin xi cjuehe ne, yējē ni xuta xi siu ladu tsēhē distritu Judea nixtin hya ne, ngutjen ni catangahma me hiscan ndetjun. <sup>15</sup> Hacuaha jarē me xi hinchasun rcu ndava xi cuitujne me, hacuiin cuijne me xi cuisehen me cahntsua ndihya cjuaha me mé tsēhē me xi cjuaha me. <sup>16</sup> Hacuaha yo xi hinchataha me nguijña ne, mijí rē xi cuya cjue me ndava me xi cjuejaha ndastu tsjanga rē. <sup>17</sup> Jemu chojyihí tsēhē yējē ni yachjin xi hinchahma quihndi rē cojo yējē me xi tjin rē quihndi vaqui ne nixtin hya. <sup>18</sup> Chjahyun rē Nina xi cjuañihi vēhē ne, hacuiin cuinduva nixtin chan hnchan ta, <sup>19</sup> cjuañihi xi cuma ne, ngu cjuañihi jyē xi cjēē camahani cumá hisca ntsacu cavetsihin ngasunhndē hacuaha cuyaaín cuatjtin cuma. <sup>20</sup> Sá xi jemu cjín nixtin cjuecani rē cjuañihi vēhē ne, hisca ngu xuta ne, cuetjintjiin me. Peru ngatsē rē cjuahmutacun xi tjin rē Nina cojo xuta xi cavaxijin me xi cumá me ladu rē me ne, sahmichuva me nixtin vēhē.

<sup>21</sup> 'Nixtin vēhē ne, sá xi yo xi cuichja cojo nuju xi ngajan o sá xi nguehe tacun me xi má Cristu, xi camacjaain nuju ta quixiin xi chja me. <sup>22</sup> Ngujo xuta vindacha ne, cuichja me ta: “Ngahan xi Cristu xi cumatitjun ngahan tsujun.” Ngujo nga me ne, cuichja me ta: “Ngahan xi chjá cjua rē Nina.” Peru vindacha ni me, quixiin cjua xi cuichja me. Hacuaha sahmi me xcusun sacuaha cjuarcun, tsēhē xi hisca cojo xuta

xi cavaxijin Nina meje cuindacha me. <sup>23</sup> Nechun cuidadu ta cojo chaja sa xi cuechu nixtin vëhë ne, ngahan ne, ha casua camachaya nuju xi cuatju vë.

*Xi cuya nga Jesús ne, cumatsejen hasen rë ngahñu rë me*

<sup>24</sup> Xi cuatjun nixtin tsëhë cjuañihi jan ne, cuinduva nixtin xi cjuë ndavá rë tsuhi. Sá ne, hacuaha ha quihndë suaain ndavá rë. <sup>25</sup> Hane niñu ne, cuixu tsëhë ngahnga. Hisca ngahñu xi yaha ngahnga ne, cjuiniyaya. <sup>26</sup> Xcun cjuacjintacun vëhë ne, scuëë xuta xi ngahan, Quihndi rë Xuta Jain, cuinduvá ngajñi rë yuffi cojo jemu jyë ngahñu hisca seti tsejen ngahan xi nduvá. <sup>27</sup> Hya ne, tsingátju ángel naha yëjë ni ladu tsëhë ngasunhndë, cjuejaha rë yëjë xuta naha xi cavaxejen, sahmi tangun rë hiscan tejña.

<sup>28</sup> Quihndë ne, cuetaharcun ngujo cjua tsëhë yaxujun xi chine tú rë. Hya xi cuetsihin cumá xcuen tsja rë yaxujun jan tsëhë xi cuetsihin cuetjusehen ne, ngayun ne ha hyun ta ha jemu camatiña chan tsi. <sup>29</sup> Hacuaha xi cjuhehe cjuañihi xi cachjá cojo nuju ne, vëhë sua cumachaya nuju ta ha tiña tacun xi cjuë ngasunhndë, hisca meje cumá. <sup>30</sup> Cuichjá cjuaquixi cojo nuju ta xuta xi siu quihndë ne, siu cuaha me hya xi cuetjucaa xcusun xi cachjá cojo nuju. <sup>31</sup> Cuechu nixtin xi cjuë nangui, cjuë ngahnga. Peru cjua naha ne, tsajin nixtin xi cjuë.

<sup>32</sup> Sacuaha nixtin xi cuetjucaa cjuatacun vëhë ne, tsajin yo vëë rë janihya cuetjucaa. Hisca hvíin ángel xi siu ngahnga. Hisca hveen ngahan xi Quihndi rë Nina. Suva ni Nina ngu tutu nahmi naja ne, me vëhë xi vëë me janihya cumá.

<sup>33</sup> Vëhë xi nechun cuidadu, hacuaha ningascun rë hitsë cjuatacun nuju ta, ngayun ne, hyuun janihya xi cjuhehe Nai nuju. Vëhë xi chjá cojo nuju ta ningascun rë hitsë cjuatacun nuju ta ngayun ne, hyuun janihya cúya, ¿há jñu ne?, ¿há ñahñu cjuëhë? <sup>34</sup> Ngahan ne, sacuaha ngu xuta xi cuetju cjue ngu nangui cjin. Chaja sa xi cuetjun me tsëhë ndava me, cuichja me cojo mosu rë me mé xa sahmi jimangu mosu. Hacuaha cuitexa ngu mosu xi cuahacuenda tingotjo ndava me. Cuatjin sahme. <sup>35</sup> Vëhë xi chjá cojo nuju ta ningascun rë hitsë cjuatacun nuju ta ngayun ne, hyuun janihya cúya, ¿há jñu ne, há nixten ne, há tiña sahasen, o sa sahasen camahani cúya? Sa xi ñahñu cjuëhë hane tsajin tjín chjine ngayun. <sup>36</sup> Cuidadu sá xi ngu ñahñu nduvá hane ngayun ne, tsajin tjín chine ngayun. <sup>37</sup> Xi chjá cojo nuju ne, ha cuanitjin ni chjá cojo yëjë ni xuta: Meje rë xi catitsingasca me hitsë cjuatacun rë me. —Cuatjin cachja Jesús.

## 14

*Me xi matitjun ne visiajmicjin me hacutjin cuma xi cjue Jesús ndavaya*

<sup>1</sup> Hya xi camá ne, casahmi chaja sa jo nixtin xi cuechu suhi tséhë pascua ne, sacuaaha xcusun niji ne, hya chini pan xi tsajin san rë. Ngajan xi nahmi xi matitjun jan cojo cha maestru tséhë ley ne, jemu tivangui me chuva rë xi cuindacha me Jesús, cojo sa xi cuma cjuaha me me tsiquehen me me.

<sup>2</sup> Peru cachja me cojo xicjin me cuitjin:

—Ndatjin xi cuinechanyan ne, cuatju suhi sehe chjahanhma cha, ta sá xi tsajin ne, tu cumacjan rë xutacjin hane cumá ngu suë jyë.

*Cavitejnu ngu chjuun aceite xi jemu ndaja jne rcu Jesús*

<sup>3</sup> Hya ne, Jesús ne, nandya Betania quitaha me. Tacun me ndava cha Simón, cha xi camandaja tséhë chíhin cjan rë xi cafaha rë chuxin yojo rë. Hora xi tacun me tijinë me niñu ne, cafehe ngu na xi yaha na ngu frascu ndyojo, hincha aceite tséhë nardo xi jercu hnga chjí rë. Hane xi cavotohosun na rcu frascu hiscan hincha aceite jan ne, sehe quiji cavitejnu na aceite jan rcun Jesús. <sup>4</sup> Ngujo me xi siu jan ne, camacjan rë me xi cuatjin casahmi na. Hane sehe cachja me ngajñi rë me cojo xicjin me cuitjin:

—¿Mé má cuatjin tu catsinguetsun na aceite vë? <sup>5</sup> Sá xi xteña vë, sacú tujún sacuaaha tujún xi sacu rë ngu mosu xi casahmi xa ngu nu, hane tujún vëhë ne, cuma cuisecoo rë xuta yuma. —Cuatjin cachjataha me na.

<sup>6</sup> Ngajan xi cachja Jesús cuitjin:

—Xi canujuun tséhë na. ¿Mé má cuatjin tivichuncjun tséhë na? ta, jemu venguichji rë xcusun xi casahmi na cojo ná.

<sup>7</sup> Xuta yuma ne, yëjë nu yëjë nixtin siu me ngajñi nuju. Peru ha ndaja ngahan ne, hacuiin jyë nixtin tejña cojo nuju. <sup>8</sup> Na vihi ne, casahmi na hacutjin xi chutaha na. Hane cojo chaja sa xi cueya ngahan ne, cavitejnu ná na aceite xi cuëhëchjine ni na yojo naha xi seyaniji ngahan. <sup>9</sup> Cuichjá quixë cojo nuju ta tuyani tséhë jingujyë ngasunhdë xi cuichja xuta cjua tséhë Nina ne, hacuaaha cueyanangui me na vihi cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

*Judas ne, viteña me Jesús*

<sup>10</sup> Hya xi camá ne, cha Judas tséhë nandya Queriote, cha ladu rë Jesús tséhë cha xi tejó jan ne, quiji cha xcun nahmi xi matitjun ne, cavëhë chihin cha cjua cojo rë me xi sahmi me entregadu cha Jesús cojo rë nahmi jan. <sup>11</sup> Hya xi cahndë

nahmi xi matitjun jan cjua rë Judas ne, jercu ndama camahani rë me. Hacuaha ngutjen ni cachja me ta, sua me cha tujún. Hane ngajan xi cha Judas jan ne, cavetsihin cavangui cha chuva rë hacutjin xi cuma sahmi entregadu cha Jesús.

### *Tisehen chjinë xi sinë me tsëhë pascua*

<sup>12</sup> Hya xi camá ne, nixtin tjun tjun tsëhë suhi xi chini pan xi tsajin san rë, nixtin xi hacuaha niquihin chu tsánga tsëhë suhi tsëhë pascua ne, hya ne, cha ladu rë Jesús ne, cavinenguise cha cojo rë me cuitjin:

—¿Jani hiscan xi meje nuju xi cuanguin cuihinchjini xi xinëë nguixun tsëhë suhi vi?

<sup>13</sup> Ngajan xi catsingatju me jo cha ladu rë me quiji cha tixa. Hane cuitjin cachja me cojo cha:

—Tangun nandya Jerusalén. Hane ngajan cuechuntuhun ngu cha xi nduva ne, quisun rcu cha ngu nisa nandá. Tangun cojo cha hacutjin cjui cha. <sup>14</sup> Hane ndihya xi cuisehen cha ne, tinújun cojo me xi nai rë ndihya jan cjua vihi: “Cuitjin chja maestru ta, ¿jarë cuarto hiscan xi sinë nguixun me cojo niji tsëhë pascua?” Cuatjin tinújun cojo me. <sup>15</sup> Hane me vëhë ne, cjue tsingacun nuju me ngu cuarto jyë ngajan ndihya ngahnga hiscan xi ha tjin chjine. Hane ngajan tuhunndujun xi xinëë.

<sup>16</sup> Hane ngajan xi cavetju cha xi cuacun jan quiji cha. Xi cafehe cha nandya Jerusalén ne, cuatjin camá tu tjin cachja Jesús cojo cha. Hane cavëhë ndaja cha xi sinë nguixun me cojo rë cha.

### *Pascua xi vijnetaha cajinë Jesús*

<sup>17</sup> Xi quiji hora jan ne, cafehe Jesús cojo yëjë tejó cha ladu rë me. Hane quiji me caviyuju me. <sup>18</sup> Sehe cavetsihin cajinë me. Hora xi tijinë me jan ne, ngajan xi cachja Jesús cuitjin:

—Nguehe cuichjá cojo nuju cjuaquixi ta ngu ngayun xi nechan tichine cojo nuju guehe ne, nihñu ná entregadu. —Cuatjin cachja me.

<sup>19</sup> Ngajan xi jemu choho camá rë cha, cavetsihin cha cachja cha chuva ngu chuva ngu cha, cuitjin cachja cha:

—Hacuiin ngahan.

<sup>20</sup> Ngajan xi cachja Jesús cuitjin:

—Ngajñi nuju xi tejó ngayun, ngajan jiyajñi ngu xi sahmi cuitjin. Ngu me xi ngu ni tyuva tsinguisehen quinda niñu naha cojo ne, me vëhë xi sahmi ná me entregadu. <sup>21</sup> Ngahan xi Quihndi rë Xuta Jain ne, hatuxa tjin xi cueyá ta, xujun rë Nina ne, cuatjin chja. Peru xuma cha xi cuiteña ná. Vengui sa chji rë sá xi catsiin camahani cha.

*Jesús ne, vindeya me xcusun rë pascua, cumá cena tsëhë Nai naja*

<sup>22</sup> Hora xi ha camatiña xi cuijnetaha sinë me niñu ne, cafaha Jesús ngu niñutsju, hane casua me nacuechji rë Nina, sehe cavotohocja me niñutsju jan. Hane sehe casua me ngu rquí ngu rquí niñu jan cha ladu rë me, hane cuitjin cachja me cojo cha:

—Juhun vihi ta, vihi ne, yojo naha. —Cuatjin cachja me.

<sup>23</sup> Hacuaha cafaha nga me ngu vasu xi hinchaxan rë uva, hane casua nga me nacuechji rë Nina. Hane sehe casua me tsë tsë cahvi cha jima ngu cha ladu rë me. <sup>24</sup> Hacuaha cachja me cojo cha cjua vihi:

—Vihi jni naha xi cuetju ná ngatsë rë xuta. Xcusun vihi ne, ngu compromisu xatsë xi sehe tivëhëchihin Nina cojo xuta cojo sa xi jni naha ne, vëhë cuaxëtje rë xuta. <sup>25</sup> Cuichjá quixë cojo nuju ta ha quihndë cueen xan rë uva nguehe ngasunhndë. Cuëhë, peru hisca hya xi nduva Nina cuitexa me ngasunhndë, hya cuëhë, peru hacuiin tangun cumá. —Cuatjin cachja Jesús cojo cha ladu rë me.

*Jesús ne, chja me ta Pedru cuichja me xi viin me yo xi Jesús*

<sup>26</sup> Xi cajnetaha cajinë me ne, casë me ngu tsëhë Nina. Sehe cavetju me quiji me Naxi Olivu. <sup>27</sup> Hane sehe ngajan xi chja me cojo cha ladu rë me cuitjin:

—Ngayujun ni ngayun cumanguaintacuun cojo ná ta cuma sacuaha camahindu xcun xujun rë Nina xi chja cuitjin: “Nina ne, tsiquehen me cha xi sahmi cuidadadu rë chu tsánga. Hane chu tsánga ne, cuitsojo chu.” <sup>28</sup> Cuatjin cumá, peru hya xi cúa nga cjuahñu naha ne, cjué titjun tsujun hiscan distritu Galilea.

<sup>29</sup> Ngajan xi cachja cha Pedru cojo Jesús cuitjin:

—Ha ndasa ngayëjë cha xi cuicun vi cuejña suva cha ngayun ne, peru ngahan ne, cuejña nuju suvun.

<sup>30</sup> Ngajan xi cachja Jesús cojo cha cuitjin:

—Cuichjá quixë cojo ri ta tajñu ni xi chaja sa squindaya xahnda ne, ha jyan ndiya cuinoje xi hyiin yo ngahan. —Cuatjin cachja me.

<sup>31</sup> Peru cha Pedru ne, cavuya cachja nga cha cjua vihi:

—Ha ndasa hisca cueya cojo nuju ne, peru cuichjaain xi hveen yo ngayun. —Cuatjin cachja cha.

Hacuaha cuanitjin ni cachja cha xi yahnga.

*Jemu chja vatju Jesús ngajan Getsemaní*

<sup>32</sup> Hya xi camá ne, cavetju me quiji me ngu cahndë xi hmí rë Getsemaní. Ngajan xi cachja me cojo cha ladu rë me cuitjin:

—Nechun ni nguehe ne, cjuë cuisiajme cojo Nina. —Cuatjin cachja me.

<sup>33</sup> Hya xi camá ne, cavaxë me cha Pedru cojo cha Jacobo cojo cha Juan, quiji me cojo cha. Ha xcun xi ha cjuí cjuí me jan ne, cavetsihin jemu casercun rë me, hacuaha macjincacun me. <sup>34</sup> Ngajan xi cachja me cojo cha cuitjin:

—Jercu choho má camahani rë xahasen naha. Xi má ná ne, cueya tsëhë. Nechun ni nguehe cuacun ngayun cojo ná. —Cuatjin cachja me.

### *Oración xi tjun*

<sup>35</sup> Sehe ngajan xi Jesús ne, quiji me hitsë ni nguvan. Hane ngajan cafañatsacjan me, cafehya rë me Nina sá xi tjín tu mé ni xi cumá cojo sa xi cuatjiin me cjuacjintacun xi cuatju me jan. <sup>36</sup> Hane cuitjin cafehya rë me Nina:

—Papá. Xi cumá nuju ngayun ne, yëjë ni xcusun ne, hacuiin chja cuma. Vëhë xi tiféhya nuju xi naxuntjun ná tsëhë cjuacjintacun xi cuátju cumá. Cuatjin meje ná, peru cjua xi cuinújun ne, cuatjin catama. —Cuatjin cafehya rë me Nina.

<sup>37</sup> Hya xi camá ne, cavuya cafehe nga me hiscan siu cha ladu rë me xi quijicojo me jan. Hane xi vutsejen me ne, siufë cha. Ngajan xi chja me cojo cha Pedru cuitjin:

—Simón, ¿mé má tsjuñife? ¿Há camaji cavacun ngayun cojo ná hisca ngu hora? <sup>38</sup> Nechun quicun, hacuaha chjahyun rë Nina cjuandaja rë me, cojo sa xi hacuiin chjaha chuva nuju cojo cjuatacun nuju. Xahasen nuju ne, ndaja meje rë xi nihñu, peru yojo nuju ne, chuva caa rë. —Cuatjin cachja me cojo cha.

### *Oración xi majo*

<sup>39</sup> Hya xi camá ne, quiji nga me ngu ndiya hitsë ni nguvan. Hane ha cjua vëhë nga ni cavuya cafehya rë me Nina. <sup>40</sup> Hya xi cavuya nga me ne, siufë nga cha ladu rë me xi jyan jan, tsëhë xi ha quihndë ticaain rë cha xi jemu nijña rë cha. Xi catsingasca Jesús cha ne, sacuiyiniin rë cha mé cuichja cha cojo me.

### *Oración xi má jyan*

<sup>41</sup> Xi cavuya me xi quiji me má jyan ndiya ne, cachja me cojo cha ladu rë me jan cuitjin:

—Ha tsjuñufun cuaha. Juun, peru ha camá. Ha cavechu hora xi ngahan, Quihndi rë Xuta Jain, cjuaha ná xuta tsehen ta, ha caxteña ngahan. <sup>42</sup> Tisatjunhngun, cuanguen chutsejen ta, ha nduva cha xi sahmi ná entregadu. —Cuatjin cachja me.

### *Cjuicojo cha Jesús ndavaya*

<sup>43</sup> Ha tu tichja cuaha Jesús cojo cha ladu rë me ne, cafehe cha Judas, cha xi cojo jiyajñi ngajñi rë cha xi tejó jan. Hacuaha jercu cjín xuta tivisecoo rë cha hora xi nduva cha. Yaha me quicha. Yaha me ya. Nahmi xi matitjun cojo cha maestru

tsëhë ley cojo xuta changá jan ne, me vëhë cavitexa me xutacjín jan xi quiji jaha me Jesús. <sup>44</sup> Chaja sa xi cjuehe cha Judas cojo xutacjín jan hiscan tacun Jesús ne, ha cachja cha cojo xuta jan cjua vihi:

—Cha xi cjuë cuitátsuha xi suá rë nina ne, cha vëhë xi hacui cha. Chjuhun cha, hacuaha nihñu cha, sehe tangun cojo cha. —Cuatjin cachja cha.

<sup>45</sup> Xi tu cavechu cha hiscan nduva Jesús cojo cha ladu rë me xi yahnga jan ne, ngutjen quiji casahmi tiña cha tsëhë me, hacuaha casua cha me nina cuitjin:

—Cuhndanu, Maestro. —Cuatjin cachja cha.

Cafë cachja cha cuitjin ne, sehe cavitatsuha cha Jesús. <sup>46</sup> Hya xi camá ne, quiji xuta jan ne, cafaha me Jesús.

<sup>47</sup> Ngajan xi ngu cha xi secun jan ne, cavaxë cha quicha nduju rë cha, hane cavaja rë cha ngu cha mosu rë nahmi xi matitjun ne, cavatësun cha ngu ladu tyjavañuju. <sup>48</sup> Ngajan xi cachja Jesús cuitjin:

—¿Mé má sacuaha vangun chjuhun xuta chëjë ne, cuatjin nduvun chjuhun ná? ta, quichuhun quicha quichuhun ya. <sup>49</sup> Ngahan ne, nchunchujun ni cavitejñaya yungun xi matitjun, cavicuyá rë xuta, hane ¿mé má cachjuun ná ngajan? Juun, peru cuatjin tijima cojo sa xi cuetjucaa jain hacutjin camahindu xcun xujun rë Nina.

<sup>50</sup> Hya xi camá ne, cha ladu rë Jesús ne, cavejña suva cha me, hane cafë yëjë cha cavanga cha.

### *Cha nixti xi cavanga hya xi cachjahá rë Jesús*

<sup>51</sup> Ngu sa cha jan yaja cha ngu tsjian tu të ni. Hane xi tu meje cjuaha xuta cha jan ne, tsjian ni rë cha cama cafaha me.

<sup>52</sup> Peru cha vëhë ne, cama cavanga cha tu quixti ni.

### *Ficojo cha Jesús xcun nahmi xi matitjun*

<sup>53</sup> Hya xi camá ne, quijicojo xuta jan Jesús xcun nahmi xi matitjun. Hane xi cafehe cha cojo Jesús jan ne, sehe camatangun yëjë ni nahmi xi matitjun cojo xuta changá cojo cha maestru tsëhë ley. <sup>54</sup> Ngajan xi cha Pedru ne, quijitjengui cha Jesús tu cjin tu cjin ni. Cafehe cha hiscan ndatsen ndava nahmi xi matitjun jan. Hane ngajan cavéjña cha cojo cha nísë tjeheh ndava ndihi, tsihasu rë cha yojo rë cha cojo cha nísë jan.

<sup>55</sup> Hane nahmi xi matitjun jan cojo yëjë sa xuta xi matitjun ne, cavangui me xuta xi tsinguixi jyë rë Jesús, cojo sa xi cuma tsiquehen me me. Peru tsajin mé jyë rë Jesús casacu rë me.

<sup>56</sup> Ha ndasa jemu cjín xuta xi cavinchajyë me Jesús ne, peru suva cjuandesu yëjë ni cjua xi cachja me ta, hacjahi chja ngu ne, hacjahi chja ngu. Hacuiin tangun má cjua rë me.

<sup>57</sup> Ngujo me ne, chja me ta cahndë me xi cuitjin cachja Jesús:  
<sup>58</sup> “Ngahan ne, tsinguétsun yungun xi matitjun xi casahmi xuta vë, hane cahntsua xi jyan nixtin ne, sahme nga ngu. Peru hacuiin cojo tsja xuta xi cuma hya.” Cuahaxutjin cahndë me xi cachja Jesús. <sup>59</sup> Hisca me xi cuacun jan ne, hacuaha hacuiin tangun camá cjua rë me.

<sup>60</sup> Ngajan xi nahmi xi matitjun tsëhë nahmi xi yahnga jan ne, casecunvasen me, hane sehe cavinenguise me Jesús cuitjin:

—¿Há chjayinnguini hisca xi ngu cjua tsëhë jyë riji xi vincha xuta xi cuicun vi? —Cuatjin cachja me.

<sup>61</sup> Hane Jesús ne, tu jyu ni casecun me. Hisca ngu cjua cafayanguiin me. Hya xi camá ne, cavinenguise nga nahmi xi matitjun jan ngu ndiya cojo Jesús cuitjin:

—¿Há ngaye xi Quihndi rë Nina naja? ¿Há ngaye xi catsingatju me xi cumá titjun tsijin?

<sup>62</sup> Ngajan xi cafayangui Jesús cuitjin:

—Juun, ngahan. Hacuaha cjuehe nixtin xi chutsujun ná xi tejña ladu quixi tsëhë Nina. Hacuaha chutsujun ná xi cuinduva ngajñi rë yufí, xi cúa nga tsëhë Nina.

<sup>63</sup> Hane ngajan xi nahmi xi matitjun jan ne, jemu camacjan rë me ne, hisca tsjian rë me cavicheya me. Hane cuitjin cachja me:

—¿Mé sa cjua xi mameje? <sup>64</sup> Ngayun ne, ha canuhyun hacutjin xi tsixcuehyu cha Nina. ¿Mé xi nújun quihndë?

Ngajan xi yëjë xuta jan ne, cachja me ta meje rë xi cueya Jesús.

<sup>65</sup> Hane cavetsihin ngujo me cavëhë natya me Jesús. Hane hacuaha cavatsa me xcun Jesús, sehe cavetsihin cavaja me. Sehe ngajan xi cachja me cuitjin:

—Tinoje yo xi cavaja ri.

Hya xi camá ne, cavetsihin xi cha nísë jan ne, jemu cavaja cha me.

### *Pedru ne, fahma me Nai naja*

<sup>66</sup> Jínguyëjë rë xi cuatjin tijima ne, cha Pedru ne, tacun cha ndatsen ndihya. Hya xi camá ne, hora vëhë canduva ngu na xi sahmi xa ndava nahmi xi matitjun jan. <sup>67</sup> Hane cavëë na xi tacun cha Pedru tsihasu rë cha yojo rë cha hiscan tacun ndava ndihi. Hane casecun na cafahacuenda na cha. Sehe ngajan xi cachja na cojo cha cuitjin:

—Ngayun ne, ladu rë Jesús tsëhë nandya Nasaret ngayun.

<sup>68</sup> Ngajan xi cachja cha Pedru cuitjin:

—Hisca hveen mé xi noje.

Hya xi camá ne, sehe cavetju cha quiiji cha casecun cha hiscan tu cuiseen ni tsëhë ndatsen ndihya. <sup>69</sup> Hane ngajan xi



na xi sahmi xa tsëhë nahmi jan ne, cafaacuenda nga na cha hiscan quiseacun cha. Hacuaha cavetsihin nga na cachja na cojo xuta xi hinchacun jan cuitjin:

—Cha vëhë ne, ladu rë Jesús má cha.

<sup>70</sup> Xi tu cahndë cha Pedru xi cuatjin cachja na jan ne, ngutjen cafayangui cha xi quixiin xi chja na. Xi cafë ngu hora lihndi ne, hacuaha cachja xuta xi hinchacun jan cojo cha cuitjin:

—Quixi jain xi ladu rë Jesús má ngaye ta distritu Galilea ne, ngajan nangui riji.

<sup>71</sup> Sehe ngajan xi hisca Nina caveyanangui cha Pedru ne, cachja cha xi hvín cha me, cuitjin cachja cha:

—Vëë Nina jain xi hveen yo me xi nújun vë.

<sup>72</sup> Hane hora vëhë ne, cajihnda xahnda. Hya xi camá ne, catsinguitsjen cha Pedru cjuá xi cachja Jesús cojo cha xi cachja me cuitjin: “Chaja sa xi squihndajo xahnda ne, ngaye ne, ha jyan ndiya cuinoje xi hyiin yo ngahan.” Hora xi catsinguitsjen cha cjuá vëhë ne, cajihnda cha.

## 15

### *Ficojo cha Jesús xcun Pilatu*

<sup>1</sup> Hya xi casahasen xi camá nchujun jan ne, camatangun nga nahmi xi matitjun cojo xuta changá cojo cha maestru tsëhë ley cojo yahnga sa xutaxa rë xi hinchajñi me. Sehe catsihñu me Jesús ne, sehe quijicani me xcun gobernador xi hmí rë Pilatu. <sup>2</sup> Xi cafehe me cojo Jesús xcun Pilatu ne, sehe cavinenguise Pilatu cojo Jesús cuitjin:

—¿Há ngaye xi matitjun ngaye tsëhë xuta nangui Israel?

Ngajan xi cafayangui Jesús cuitjin:

—Cuatjin sacuaha canújun vë.

<sup>3</sup> Hane ngajan xi nahmi xi matitjun jan ne, jemu cjín xcusun jyë xi cavincha me tsëhë Jesús. <sup>4</sup> Ngajan xi Pilatu ne, cavuya cavinenguise nga me Jesús cuitjin:

—¿Há chjayinnguün camahani? Jercu cjín jyë riji cavincha me.

<sup>5</sup> Peru Jesús ne, ha quihndë cafayinnguün camahani me. Hane Pilatu ne, jemu quijircun camahani rë me.

### *Hacuiin Jesús ta Barrabás mandaya*

<sup>6</sup> Suhi vëhë ne, Pilatu ne, ha tuxa xcusun rë me xi nu nu ni vëhëndaya me ngu presu xi meje rë xuta xi cumandaya.

<sup>7</sup> Ndavaya ne, jiya ngu presu xi hmí rë Barrabás cojo ngujo sa presu xi catsiquehen rë xuta tsëhë ngu si. <sup>8</sup> Hya xi camá ne, canduva xutacjín ne, cafehya me cojo Pilatu xi sahmi me vëhë sacuatjin xi ha xcusun rë me. <sup>9</sup> Ngajan xi cachja Pilatu cojo rë xuta jan cuitjin:

—¿Há meje nuju xi cuáxë cha xi matitjun tsujun?

<sup>10</sup> Cuatjin cachja Pilatu ta tsëhë xi ha vëë me xi ngatsë rë cjuaxin sahmi nahmi xi matitjun jan cojo Jesús, vëhë xi quijicani me Jesús ngajan. <sup>11</sup> Peru nahmi xi matitjun jan ne, quiji cavinchangui me xutacjín jan xi meje rë me xi cuichja xuta jan xi catëhëndaya Pilatu Barrabás. <sup>12</sup> Ngajan xi cavinenguise nga Pilatu cojo xutacjín jan cuitjin:

—¿Mé sahme cojo cha xi nújun xi matitjun tsujun ni?

<sup>13</sup> Ngajan xi xuta jan ne, cuitjin jercu cachja me:

—Tetuhun cha xcun cru.

<sup>14</sup> Ngajan xi cachja Pilatu cojo rë me cuitjin:

—Peru ¿mé xi choho casahmi cha?

Peru xuta jan ne, hitsë sa rcu cachja me cuitjin:

—Tetuhun cha xcun cru.

<sup>15</sup> Hya xi camá ne, ta meje rë Pilatu xi cumangucacun xuta ne, cavëhëndaya me Barrabás. Hane xi cavatju catsingatju me Jesús casehen rë ne, sehe cavuya casua nga me cojo cha sindadu xi cjue cuetaha cha me xcun cru.

*Jesús ne, quisun ngu corona tsëhë nahya rcu me*

<sup>16</sup> Hya xi camá ne, quijicojo cha Jesús taha cahntsua hnhua hiscan ndatsen ndava Pilatu. Hane sehe casahmi tangun sa cha yëjë sindadu cjín. <sup>17</sup> Hya xi camá ne, cavaxë cha tsjian rë Jesús, hane sehe catsicaja cha me ngu tsjian hani. Hacuaha catsihya cha ngu corona nahyá xi cavesun cha rcu me. <sup>18</sup> Sehe cavetsihin cavincha cha viva rë me xi tsixcuehyu cha me, sacuaaha xi macjain rë me xi me vëhë matitjun me tsëhë xuta tsëhë nangui Israel.

<sup>19</sup> Hya xi camá ne, sehe cavaja cha ngu rquí ya rcu me. Cavëhë natya cha me. Hacuaha cavixcuhnchi cha xcun me, sacuaaha xi faharcun cha me. <sup>20</sup> Hya xi cajnetaha catsixcuehyu cha me cuatjin ne, sehe cavaxë cha tsjian hani xi catsicaja cha me, hane sehe cavuya catsicaja nga cha me tsjian rë me xi tsëhë jain me. Hya xi camá ne, sehe quijicojo cha me xi cuetaha cha me xcun cru.

*Cavetaha cha Jesús xcun cru*

<sup>21</sup> Ndiya cjui cha cojo me ne, cavechutaha cha ngu xuta changá xi hmí rë Simón tsëhë nandya Cirene, nahmi rë cha Alejandro cojo cha Rufu. Nduva me xi quiji me nguijña. Hane xi cavechutaha cha me, casahmi cha me ngujoyë xi cuesuntyja me cru rë Jesús. Hya xi camá ne, cavesuntyja me, sehe quiji me cojo.

<sup>22</sup> Sehe cavechu yëjë xuta jan hiscan xi hmí rë Gólgota, cjua xi meje cuichja Naxi Nínda Rcuun. <sup>23</sup> Sehe xuta jan ne, tisua me xan rë uva xi tecjan rë nandá rë tyjungunsa xi cuihi Jesús, peru cahviin me. <sup>24</sup> Hya xi camá ne, cavetaha cha me xcun

cru. Hane tsjian rē me ne, cavincha rē cha ngu suerte ne, sehe cumatsejen mé xcusun tsjian rē me xi satē rē xingu xingu cha.

<sup>25</sup> Hya ne, chuva rē fane ñaja tsēhē nguitajñu. <sup>26</sup> Hane camahindu ngu letreru cojo jyē rē me xi chja cuitjin: “Me xi Matitjun tsēhē Xuta nangui Israel.” Sehe quiji casetaharcu cru. <sup>27</sup> Hacuaha cavityangui cha ngu chējē ngu ngu ladu rē tjeheh rē me, jimangu cojo cru rē. <sup>28</sup> Cuatjin cavetjucaa cjua xi camahindu xcun xujun rē Nina xi chja cuitjin: “Cuichja xuta ta me vihi ne, ngu xuta tsehen me.”

<sup>29</sup> Hya xi camá ne, xuta xi cavatju jan ne, xi catsixcuehyu me Jesús ne, catsiniya me rcu me, hacuaha cuitjin cachja me:

—Canoje xi cuma ninguetsin yungun xi matitjun, hane cahntsua xi jyan nixtin ne, cama nga canindeje sove. <sup>30</sup> Quihndē ne, sá cuatjin cuma nihñi ne, naxetje sove yojo riji, titujni tsēhē cru vē. —Cuatjin cachja xuta.

<sup>31</sup> Ha chuva vēhē ni, cavisiajmi nahmi xi matitjun cojo cha maestru tsēhē ley ne, ngajñi rē me cojo xicjin me xi tsixcuehyu me Jesús. Cuitjin chja me:

—Cavaxētje cha xuta, peru quihndē ne, maji vaxētje cha yojo rē cha. <sup>32</sup> Sá xi hacui jain cha xi catsingatju Nina xi cumatitjun tsajan ne, catitujne cha tsēhē cru chutsejen, cojo sa xi cumacjain naja tsēhē cha. —Cuatjin cachja me tsēhē Jesús.

Hacuaha cha chējē xi cojo xtyangui taha cru jan ne, cojo cha choho cachja cha tsēhē me.

<sup>33</sup> Xi camanchisen tsēhē nixtin vēhē ne, jingujyē ni ladu vēhē ne, camajñu. Jyan hora quijicani rē. <sup>34</sup> Xi cafē jyan hora vēhē ne, jercu cajindaya Jesús, cachja me hne rē me cuitjin:

—Eloí. Eloí, ¿lama sabactani? —cjua xi meje cuichja cuitjin: Ngayun, Nina naha, ¿mé má canismutacun ná?

<sup>35</sup> Hane ngujo xuta xi hinchacun jan ne, xi cavijniinrcu me hne rē Jesús ne, xi má rē xuta jan ne, nima Elías, ngu profeta tsēhē nixtin hatsēē, jindaya Jesús me.

<sup>36</sup> Hane sehe cavanga ngu me quiji catsicahnchi me ngu tsjian hinda cojo xan rē uva xi ha san. Sehe cavetaha me rcu ngu ya nduju, sehe cavetaha me hntsua Jesús xi cuihingui me. Hacuaha chja me cojo xicjin me cuitjin:

—Cuinechanyan hitsē ne, ¿há cuinduva jain Elías tsitujne me Jesús tsēhē cru?

<sup>37</sup> Peru Jesús ne, hora vēhē jercu cajindaya me, hane cahme me. <sup>38</sup> Hacuaha hora vēhē ni ne, tsjian nduju xi tyangui cahntsua yungun xi matitjun ne, hisca rcu hiscan ntsacu canduva catiyavasen. <sup>39</sup> Hya xi camá ne, ngu cha capitán tsēhē sindadu xi secun tiña cru hisca tyangui Jesús jan ne,

xi cavëë cha hacutjin xi cahme Jesús ne, ngajan xi chja cha cuitjin:

—Cjuaquixindaja xi me vihi xi Quihndi rë Nina me.

<sup>40</sup> Hacuaha hinchacun sa ngujo yachjin, vutsejen na tsëhë cjin ni. Ngajñi rë na xi cuacun vëhë ne, quiseacun na Salomé cojo na María tsëhë nandya Mágda cojo na María naa rë cha Jacobo lihndi cojo cha José. <sup>41</sup> Na yachjin xi cuacun vë ne, cojo na cavisecoo na catsindaja na xi cajnë Jesús cojo cha ladu rë me, hya xi catsujyihya me ngajan ladu tsëhë distritu Galilea. Hacuaha jercu cjin sa yachjin hinchacun na jan xi hacuaha cojo na quiji na ngajan nandya Jerusalén cojo Jesús.

*Jesús ne, caseya me tsjun rë me*

<sup>42</sup> Nixtin xi cahme Jesús ne, hacuaha hya vispra tsëhë nixtin xi chjahájenda rë. Hane xi quiji hora jan ne, <sup>43</sup> ngu xutaxa rë xi tjemu chjahanrcun rë, xi hmí rë José tsëhë nandya Arimatea, me xi hacuaha tacunya nixtin xi cjuehe Nina cuma titjun me tsëhë yëjë Israel, cavejñahñu me cjuatacun rë me sehe quiji me ndava Pilatu. Hane cafehya me cahndë cojo Pilatu xi cjuahaxin me nima Jesús. <sup>44</sup> Hya xi camá ne, Pilatu ne, quijircun rë me xi cuatjin cachja José xi ha cahme nima ta, tsëhë xi cjëë jyë hora xi casetaha Jesús xcun cru. Hane vëhë xi catsingatju me quiji chjaha rë cha capitán. Hane sehe cavinenguisse me cha sá xi quixi xi ha cahme jain Jesús. <sup>45</sup> Xi tu camachaya rë me cju tsëhë cha capitán jan xi ha cahme jain Jesús ne, sehe ngajan xi cachja me cojo José ta cuma cjue tsitujne me nima. <sup>46</sup> Ngajan xi José ne, vëhë ta cavatsë me ngu tsjiantë xatsë ne, sehe quiji catsitujne me nima Jesús tsëhë cru, sehe cavaxtë rë me tsjian jan. Hane sehe cavaha me nima quijicojo me hiscan tacun rë me ngu tsjun xi cafahanguitaha me cahntsua ngu naxi. Hane ngajan caveya me nima. Sehe catsindefajne me ngu ndyojo jyë xi cavechja rë tingotjo tsjun jan. <sup>47</sup> Hane na María tsëhë nandya Mágda cojo na María naa rë cha José ne, cavëë na hiscan caseya nima.

## 16

*Vuya nga Jesús cjuahñu*

<sup>1</sup> Xi camá nguixun tsëhë nixtin xi chjahájenda rë jan ne, na Salomé cojo na María tsëhë nandya Mágda cojo na María naa rë cha Jacobo ne, cavatsë na rqui xi ndaja jne xi cuitejnu na nima. <sup>2</sup> Xi casahasen domingu ne, hora xi tivetjucaa tsuhi ne, cavatju na yachjin jan quiji na hiscan tacun tsjun rë nima. <sup>3</sup> Hane ngajñi cjuí na jan ne, ngajan xi chja na cojo xicjin na cuitjin:

—¿Yo cuisecoo naja xi nindefajne ndyojo xi quitaha tingotjo rë tsjun jan?

<sup>4</sup> Peru xi tu cafehe na jan ne, ndyojo jyë xi quitaha tingotjo rë tsjun jan ne, ha quihndë tsajin quitaha cahndë rë ta ha xin jiña. <sup>5</sup> Xi cavisehen na cahntsua tsjun jan ne, cavëë na ngu cha xi tacun cha taha ladu quixi, yaja cha ngu tsjian tyava nduju. Hya xi camá ne, jemu catsacjun camahani na. <sup>6</sup> Ngajan xi cachja cha cojo rë na cuitjin:

—Xicarcuun. Ngahan ne, ha hvë xi Jesús tsëhë nandya Nasaret vinchunsun me, me xi cavetaha xuta xcun cru. Peru me vëhë ne, tsajin me nguehe ta cavuya cjuahñu rë me. Chutsujun cahndë hiscan xi cafaña xuta me. <sup>7</sup> Quihndë ne, tjangun sanii ne, tinújun cojo cha ladu rë me, cha Pedru ne cojo cha xi yahnga ta, Jesús ne, hisca tjun cuechutaha me yun ngajan distritu Galilea sacuahatjin xi ha cachja me cojo nuju.

<sup>8</sup> Xi tu cavetju na tsëhë tsjun jan ne, ña fatsë na xi jemu catsacjun na camá. Hane vanga sanii na cafe na. Hane hisca xi ngu cachjaain na cojo, tsëhë xi jemu catsacjun na camá.

*Jesús ne, ñahñu ni camatsejen me na María Magdalena*

<sup>9</sup> Jesús ne, xati camaha sa tsëhë nixtin domingu ne, hya cavuya cjuahñu rë me. Hya xi camá ne, tjun sa na María tsëhë nandya Mágdala cavëë na me, na xi cavaxë me yatu xitsehen xahasen rë hatsëë. <sup>10</sup> Hane na vëhë quiji quicun na xuta ladu rë me xi jemu jihnda tsëhë cjuachoho. <sup>11</sup> Hane xi cahndë me cjua ta Jesús tacun nga me cjuahñu hane na vëhë ne, cavëë na me, camacjaain rë xuta jan.

*Hya xi cavuya Jesús cjuahñu ne, jo cha ladu rë me cavëë cha me*

<sup>12</sup> Hya xi cavatju vëhë ne, jo cha ladu rë Jesús ne cjui cha ngujiña. Hane cojo Jesús cjui me cojo cha, peru ha ngu xcusun jyihí me. <sup>13</sup> Hane cha xi cuacun jan ne, xi tu cavëë cha xi hacui me ne, cavuya cha ne, quiji cachja cha cojo cha xi yahnga xi cavëë cha me. Peru hacuaha camacjaain rë cha xi yahnga jan.

*Jesús ne, casuaxa me cha apóstol*

<sup>14</sup> Ngu ndiya nga ne, cafehe nga me hiscan siu cha ladu rë me xi tengu jan, tijinë cha niñu. Hane cachjataha me yëjë ni cha ngatsë rë xi jemu taja rcu cha, tsëhë xi camacjaain rë cha tsëhë xuta xi cavëë rë me xi tacun nga me cjuahñu. <sup>15</sup> Cavatju cacjan me cojo cha ne, sehe ngajan cavetsihin cachja me cojo cha cuitjin:

—Tangún jingujyë ni ngasunhndë ne, tinújun cojo yëjë ni xuta cjua rë Nina. <sup>16</sup> Yo xi cumacjain rë cjua vëhë hacuaha xtenda ne, cuechu xcun Nina. Yo xi cumacjaain rë ne, cuechu me castigu xi sahmi Nina xi cueyun. <sup>17</sup> Hane xuta xi cumacjain rë me ne, sahmi me xcusun vihi xi cueyanangui me ñihi naha ne: cuma cuaxë me xitsehen xi hincha xahasen rë xuta; cuma cuichja me ngu ngu xcusun hne; <sup>18</sup> yë ne, sá

xi cjuahatsja me chu, o sá xi cuihi me ngu venenu ne, tsajin mé cumá rë me; hane tu cuetahatsja ni me xuta hmu rë ne, cumandaja xuta hmu rë jan.

*Jesús ne, cjuiniji me ngahnga*

<sup>19</sup> Xi cajnetaha cachja Jesús, me xi Nai naja, cojo cha ladu rë me cjua vëhë ne, quiji me ngahnga, cavéjña me ladu quixi tsëhë Nina. <sup>20</sup> Hane cha ladu rë me ne, cavetju cha quiji cha, cachja cha cjua rë Nina yëjë ni ladu. Hacuaha Nai naja ne, cavisecoo me cha. Hane ngatsë rë xcusun xi cavëë xuta xi casahmi cha jan ne, vëhë xi tsejen xi quixi cjua xi cachja cha.

## Cjuandajyihî Xi Catsihindu San Lucas Tsêhê Jesucristu

<sup>1</sup> Jemu cjin xuta xi ha catsihindu me cjua xi chja tsêhê yêjê xcusun xi sehe casahmi Nina ngajni naja ngayaan xuta ngasunhdê. <sup>2</sup> Meje tsihindu me cjua vêhê sacuatjin camahani casua camachaya naja me xi cavêëndaja cojo tuxcun hisca ntsacu cavetsihin sehe cafaxa me xi tsinguitsojo me cjua jan. <sup>3</sup> Hisca hatsêe ne, ngahan ne, hacuaha ha jemu ndaja cavinenguêsê yêjê ni hacutjin camá. Vêhê xi xi má ná ne, hacuaha ndatjin xi tsihindu chichihin nuju cjua tsêhê yêjê hacutjin camá, ngayun tatá Teófilo, <sup>4</sup> cojo sa xi sacúndaja nuju cjuaquixi tsêhê cjua xi ha camachaya nuju jan.

### *Cafehe cjua xi tsin Juan Vitenda rê Xuta*

<sup>5</sup> Nixtin hya xi Herodes cavitexa me yêjê ni xuta tjê rê Israel ne, cavéjña xu ngu nahmi xi hmí rê Zacarías, me xi má ladu rê Abías. Hane chjuun rê Zacarías ne, Elisabet hmí rê me, hacuaha tjê rê Aarón xu má me. <sup>6</sup> Hane Zacarías cojo Elisabet ne, tyjahi cjuatacun rê me xcun Nina ta, tsêhê xi tsajin xu jyê rê me xi tisahmichihin me yêjê ni sacuatjin cavitexa Nina. <sup>7</sup> Hane tsajin rê me quihndi ta, tsêhê xi Elisabet ne, hatuxa maji xu sacú rê me quihndi, hacuaha catsijo ni me ne, ha jemu changá xu me.

<sup>8</sup> Hya xi camá ne, cavechú nixtin xi casatê rê Zacarías cojo yêjê sa nahmi xi má ladu rê Abías xi sahmi xu me xá xcun Nina xi má me nahmi. <sup>9</sup> Hane sacuaha xcusun rê nahmi ne, catsintsavê xu me ngu suerte cojo sa xi cuma tsejen ne, jarê xu me xi satê rê xi cuisehen ndava Nina, cuaca tyjungunsa. Hya xi camá ne, casatê xu rê Zacarías. <sup>10</sup> Hane yêjê xutacjin jan ne, caviyuju xu me candatsen sahmi me oración rê me, hora xi tivaca xu Zacarías tyjungunsa cahntsua ndava Nina. <sup>11</sup> Hane hora xi tivaca me tyjungunsa jan ne, camatsejen xu ngu ángel secun taha ladu quixi tsêhê ngasuncun hiscan xi tí tyjungunsa. <sup>12</sup> Hane xi cavêê Zacarías ángel jan ne, jemu quijircun rê me hacuaha jemu catsacjun xu me camá. <sup>13</sup> Ngajan xi ángel jan ne, cuitjin xu cachja cojo rê me:

—Xicarcuiin ngaye Zacarías ta, cjua xi cachjahye ne, cahndê Nina. Vêhê xi na Elisabet chjuun riji ne, sacú rê na ngu quihndi, hane quihndi vêhê ne, Juan tehe ñihi rê. <sup>14</sup> Hane jemu cjue ri cjuasua hacuaha jemu ndaja cuma ri, hacuaha jemu cjin xuta xi jercu tjin rê me cjuasua xi catsin quihndi vêhê ta, <sup>15</sup> tsêhê xi jemu jyê hnga cuma cojo cjuatacun rê

ngajan xcun Nina. Hacuaha cuiin camahani xan hacuaha cuiin camahani nandá machihi. Hacuaha hisca hya xi caseya quihndi vë cahntsua naa rë ne, Hasen rë Nina quitsë rë xahasen rë. <sup>16</sup> Hacuaha quihndi vëhë sahmi xi jemu cjín xuta tjë rë Israel cuya nga me ndiya rë Nina rë me. <sup>17</sup> Quihndi vë ne, vëhë cuinduva titjun, sehe cuinduva Nina. Hane sacuatjin jyë hnga profeta Elías cojo cjuatacun rë me hatsëë nixtin ne, hacuanitjin ni jyë hnga cuma quihndi vëhë cojo cjuatacun rë, cojo sa xi quihndi vëhë ne, sahmi xi cuya cuma ndaja cacun nga yëjë ni nahmi rë nixti cojo nixti rë me, hacuaha sahmi xi yëjë xuta xi vihndiin me tsëhë Nina ne, cuma tangun cjuatacun rë me cojo cjuatacun rë xuta xi tyjahi cjuatacun rë me. Hane cuatjin chuva vëhë ne, cuëhëchjine quihndi vëhë xuta xi cuihndë me tsëhë Nina. —Cuahaxutjin cachja ángel.

<sup>18</sup> Sehe ngajan xi Zacarías ne, cuitjin xu cavinenguisse me ángel:

—¿Hacutjin sacú ná cjuaquixi xi cuatjin jain cuma ni? ta ngahan ne, ha jemu changá ngahan, hacuanitjin ni chjuun naha ta jemu changá na. —Cuahaxutjin cachja me.

<sup>19</sup> Sehe ngajan xi ángel jan ne, cuihixutjin cafayangui nga:

—Ngahan xi Gabriel ngahan; ngahan xi tejña ngajan xcun Nina. Hacuaha ngahan xi catsingatju ná Nina xi cuisiajme cojo ri hacuaha suá cumachaya ri cjuandajyihi vëhë. <sup>20</sup> Chutsijin ni, quihndë ta camacjaain ri tsëhë cjua xi cachjá cojo ri ne, cumaji cuinoje, tsëhë xi cuma lihmi ngaye hisca hya xi cuetjucaa cjua xi cachjá cojo ri. Cjua vëhë ne, hatuxa cuetjucaa hya xi cuechú nixtin rë. —Cuahaxutjin cafayangui ángel.

<sup>21</sup> Jinguyëjë rë ne, xutacjín jan ne, jercu siuya xu me Zacarías, hisca fircun rë me tsëhë xi cuatjin jercu vindeya rë Zacarías xi cavisehen xu me ndava Nina. <sup>22</sup> Hane hya xi cavetju me ne, maji xu chja me cojo xuta. Hane xuta jan ne, cavacun rë me ta Zacarías ne, tjin mé xi cavëë me. Hacuaha tu tisahmitsja ni me ta, tsëhë xi lihmi cuaha xu me. <sup>23</sup> Hya xi cavatju nixtin xi satë rë me xi sahmi me xá xi má me nahmi ne, cavuya cafe xu me ndava me.

<sup>24</sup> Hya xi camá ne, xi cavatju sa nixtin ne, casacu xu rë chjuun rë me quihndi, hane cahntsua hñú sá xi jiya quihndi rë Elisabet jan ne, cuatjin caseyama xu me ndava me. Hane cuitjin xu cachja suvá me: <sup>25</sup> “Cuitjin casahmi Nina cojo ná ngu cjuandaja, quihndë xi camayuma rë me ngahan hane cafahaxin me cjuasava xi má ná ngajñi rë xuta tsëhë xi sacuiin ná quihndi.” Cuahaxutjin cachja me.

*Cafehe cjua xi tsin Jesucristu*



<sup>26</sup> Xi ma jyun sá xi jiya xu quihndi rē Elisabet ne, catsingatju Nina ángel xi hmí rē Gabriel ngu nandya xi hmí rē Nasaret, tséhë distritu Galilea, <sup>27</sup> ndava ngu chjuun xungun xi hmí xu rē María. Hane María jan ne, tacunvasen cjuavixan rē me cojo ngu xihin xi hmí rē José, ngu me xi tjë rē David, ngu xutachanga xi camatitjun xu tséhë xuta tjë rē Israel. <sup>28</sup> Hane xi cavisehen ángel ndava María jan ne, sehe cachja xu cuitjin:

—Cuhndari, tsan. Nina ne, catsinchacun me ngaye, hacuaha tacun me cojo ri. Ngajñi rē yějë ni yachjin ne, ngaye xi jercu catsinchacun ri Nina. —Cuatjin xu cachja ángel.

<sup>29</sup> Xi cahndë xu María cjua xi cachja ángel jan ne, catsacjun me camá, sehe catsingataha cacun xu me mé xcusun nina xi casua ángel me. <sup>30</sup> Sehe ngajan xi ángel ne, cuitjin xu cachja cojo rē me:

—Xicarcuiin María ta Nina ne, jemu tjin rē me cjuandaja cojo ri. <sup>31</sup> Quihndë ne, sacú ri ngu quihndi, hane hacuaha cuechú nixtin xi tsin ri quihndi vëhë. Quihndi vëhë ne, tehe ñihi rē Jesús. <sup>32</sup> Hacuaha jemu jyë hnga cuma cojo cjuatacun rē, hacuaha Quihndi rē Nina xi Matitjun cjuahañihi. Hacuaha Nina sahmi me xi cuitexa quihndi vëhë sacuatjin cavitexa xutachanga rē, me xi hmí rē David. <sup>33</sup> Hane vëhë cuitexa rē xuta tjë rē Israel, hane gobiernu rē ne, tsajin nu tsajin nixtin cuijnetaha. —Cuatjin xu cachja ángel.

<sup>34</sup> Sehe ngajan xi María ne, cavinenguise xu me ángel cuitjin:

—¿Hacutjin cuma xcusun vi? ta ngahan ne, cjëë sacú xihin naha. —Cuatjin xu cachja me.

<sup>35</sup> Hane xi cafayangui ángel ne, cuitjin xu cachja:

—Hasen rē Nina xi Matitjun ne, cuinduva cuaxtë ri sacuaha ngu tjahnguen. Vëhë xi quihndi xi tsin ri ne, hatuxa tyjahi cojo cjuatacun rē, hacuaha Quihndi rē Nina Jain. <sup>36</sup> Hacuaha na Elisabet xinguin ne, handasa ha jemu changá na ne, hacuaha casacu rē na ngu quihndi. Ha quihndë jyun sá yaha na quihndi, na xi chja cjua xi hatuxa maji sacú rē quihndi. <sup>37</sup> Cuatjin camá ta, xi cuma rē Nina ne, tsajin camahani mé xi cumaji cuma. —Cuatjin xu cachja ángel.

<sup>38</sup> Ngajan xi María ne, cuitjin xu cafayangui me:

—Ngahan ne, sacuaha ngu hndixahan rē Nina ngahan. Catisahmi Nina cojo ná sacuatjin cjua xi canújun. —Cuatjin xu cachja me.

Ngaxtun vëhë ne, sehe cafe ángel.

### *Cavusehenya María Elisabet*

<sup>39</sup> Nixtin hya ne, cavetju xu María, ngu quixi ni quiji me ngu nandya ngajan nangui ndetjún tséhë distritu Judea. <sup>40</sup> Hane xi cafehe me ngajan ne, cavisehen xu me ndava Zacarías, sehe

cachja me nina cojo Elisabet. <sup>41</sup> Hane xi cahndë xu Elisabet xi cachja María nina ne, cafiniya xu quihndi xi jiya cahntsua Elisabet. Ngajan xi Elisabet ne, catsë rë xahasen rë me cojo Hasen rë Nina. <sup>42</sup> Hane sehe jercu hñu xu cachja me cjuva vihi cojo María:

—Ngajñi rë yëjë ni yachjin ne, ngaye xi jercu catsinchacun ri Nina, hacuaha catsinchacun me quihndi xi tsin ri. <sup>43</sup> ¡Mé má ngahan xi tu ngaye xi naa rë nai naha ngaye, ndove tichusihinye ná! <sup>44</sup> Xi tu cahndë xi canoje nina cojo ná ne, hora vëhë cafiniya quihndi xi jiya cahntsuá xi ndama rë. <sup>45</sup> Jemu ndaja tsiji xi macjain ri xi yëjë ni cjuva xi cachja Nina cojo ri ne, cuetjucaa jain. —Cuatjin xu cachja Elisabet.

<sup>46</sup> Sehe ngajan xi María ne, cuitjin xu cachja me: Ngahan ne, jercu sahme jyë sahme hnga Nina; <sup>47</sup> hacuaha jercu ndama ná tsëhë Nina, me xi vaxëtje ná. <sup>48</sup> Casahmicuenda Nina ngahan, ngahan xi sacuaha ngu hndixahan rë me ngahan ta, quihndë cojo nixtin xi cjui sa ne, cuichja yëjë xuta xi siu cojo xuta xi sehe tsin sa xi jemu ndaja tsahan;

<sup>49</sup> tsëhë xi Nina xi jemu jyë hnga me cojo ngahñu rë me ne, jemu vengui chji rë xcusun xi casahmi me cojo ná. ¡Jemu tyjahi me cojo cjuatacun rë me!

<sup>50</sup> Nina ne, hatuxa jemu tjin rë me cjuayumatacun cojo yëjë xuta xi faharcun rë me ha tucutjin cjin xuta tsetsin me jima ngundiya jima ngundiya.

<sup>51</sup> Nina ne, sahmi me hacutjin xi meje sahmi me cojo ngahñu jyë xi tjin rë me: tsinguitsojo me yëjë xuta xi jemu tjin rë cjuaxta cahntsua xahasen rë;

<sup>52</sup> tsinguijne me xuta xi matitjun tsëhë xcun xá rë, hacuaha sahmi yehe sahmi hnga me xuta yuma.

<sup>53</sup> Xuta xi machaja rë me ne, jemu yehe cjuandaja sua Nina me, peru xuta nchina ne, suvá tsja tiya me tsicuya Nina me cjue me.

<sup>54</sup> Nina ne, cuisecoo naja me ngayejen ni xuta tjë rë Israel, ngayaan xi tsëhë me ngayaan, hacuaha tsinguitsjen me xi cumayuma rë me ngayaan.

<sup>55</sup> Xi cuatjin ne, cuetjucaa jain sacuatjin xi ha cachja me cojo xutachanga naja Abraham, cojo yëjë sa tjë rë me.

Cuatjin xu cachja María.

<sup>56</sup> Hya xi camá ne, María jan ne, cavéjña xu me jyan sá ndava Elisabet, sehe cavuya cafe me nangui rë me hiscan tjin ndava me.

*Hacutjin camá hya xi catsin Juan Vitenda rë Xuta*

<sup>57</sup> Quihndë ne, cavechú nixtin xi tsin rë Elisabet quihndi, hane catsin rë me ngu quihndi xihin. <sup>58</sup> Xi camachaya rë yějë xuta xi siu tahndee ndava me cojo yějë xicjin Elisabet xi jercu camayuma rë Nina Elisabet ne, jercu ndaja camá rë me xingu xingu me cojo Elisabet. <sup>59</sup> Hya xi camá xu ne, xi cavetjucaa quihndi jan jyin nixtin ne, cafehe nga me xi siu tahndee ndava me jan cojo xicjin Elisabet xi cuma suhi tséhë xi xtí chuxin rë quihndi. Hane meje suañihi me quihndi jan Zacarías, tséhë xi cuatjin hmí rë nahmi rë. <sup>60</sup> Ngajan xi cachja xu naa rë quihndi jan cuitjin:

—Hajín ta quihndi vi ne, Juan cjuahañihi. —Cuatjin xu cachja me.

<sup>61</sup> Hane xuta jan ne, cuitjin xu cachja me:

—Peru ngayun ne, tsajin hisca ngu xingun xi cuatjin hmí rë. —Cuatjin xu cachja xuta jan.

<sup>62</sup> Ngajan xi xuta xi cuacun jan ne, tu casahmi tsjá xu ni me cojo nahmi rë quihndi xi cavinenguise me hacutjin meje rë nahmi rë quihndi xi cjuahañihi quihndi jan. <sup>63</sup> Ngajan xi Zacarías ne, cafehya xu me ngu pizarra, sehe ngajan catsihindu me cjua vihi: “Juan cjuahañihi.” Cuatjin xu catsihindu me. Hya xi camá ne, yějë ni me ne, jemu quijircun xu rë me. <sup>64</sup> Hane hora vëhë ni ne, camá xu cachja Zacarías, hane jemu ndaja cavaxëndaja me Nina. <sup>65</sup> Ngajan xi xuta xi siu tahndee ndava me jan ne, jemu catsacjun xu me camá, hane jingujyë ni ladu nangui ndetjún tséhë distritu Judea hiscan xi siu xuta ne, jercu cavisiajmi xu me tséhë cjuacjintacun vëhë. <sup>66</sup> Hane yějë xuta xi camachaya rë cjuacjintacun vëhë ne, jercu cjin catsingataha cacun me, hisca cachja xu me cuitjin:

—¡Cuechú nixtin xi quihndi vi ne, cuma ngu xihin xi jyë hnga cojo cjuatacun rë!

Cuatjin xu cachja xuta xi cuacun jan ta, tséhë xi quihndi vëhë ne, Nina yahangui jain me.

### *Cjua rë Nina xi cachja Zacarías*

<sup>67</sup> Zacarías, nahmi rë quihndi jan ne, ña catsë rë me cojo Hasen rë Nina, hane cachja xu me cuitjin cjua xi cafahatsja me tséhë Nina:

<sup>68</sup> ¡Tjemu ndaja Nina naja ngayaan xuta tjë rë Israel! tséhë xi cuinduva me cjuaha naja me xi cuma yaan xuta rë me.

<sup>69</sup> Nina sahmi me xi ngajñi rë tjë rë David, ngu xuta rë Nina ne, cuetjujñi ngu xihin xi cuaxëtje naja,

<sup>70</sup> sacuatjin xi ha cachja profeta xi cavejña me tséhë Nina, hya xi cachja me cojo xutachanga naja cjua rë Nina hatsëë nixtin.

<sup>71</sup> Hacuaha cachja Nina xi cuaxëtje naja me tséhë condra naja,

hacuaha cuaxëtje naja me tsëhë yëjë xuta xi choho vëë naja,  
 72 hacuaha cumayuma rë me tsëhë xutachanga naja  
 hacuaha tsinguitsjen me compromisu ximinchacun xi  
 casahmi me cojo xutachanga naja.  
 73 Nina ne, cachja me: “Ngahan suva hvë”, hya xi casahmi me  
 compromisu jan cojo xutachanga naja Abraham.  
 74 Hya xi casahmi me compromisu vëhë ne, cachja me xi  
 cuëhëndaya naja me tsëhë condra naja,  
 cojo sa xi ngayaan ne, hacuiin cojo chircun chjahanrcun me  
 ta  
 75 chjahanrcun me cojo ngu cjuatacun tyjahi, xi tsajin jyë naja  
 xcun me  
 hacutjin nixtin xi nechan xcun cjuahñu naja.  
 76 Ngaye tsan ne, hacuaha cuma ngaye ngu profeta tsëhë Nina  
 xi Matitjun ta,  
 tsëhë xi ngaye cuihintitjin, choxehe ndiya tsëhë Nina,  
 77 hacuaha tehe cumachaya rë xuta rë Nina xi cuaxëtje Nina  
 me,  
 cuma cuinújan ne, tsinchataha me tsëhë jyë rë  
 78 ngatsë rë ta tsëhë xi Nina ne, jemu tjin rë me cjuayumata-  
 cun cojo naja.  
 Hacuaha ngatsë rë cjuayumatacun vëhë ne, Nina tsingatju me  
 tsëhë ngahnga ngu xi sacuaha tsuhi,  
 79 cojo sa xi sua hasen rë ngajñi naja xi nechan cojo ngu  
 cjuacjintacun jyë xi hisca sacuinyiin naja hacutjin nax-  
 entjeen yojo naja,  
 ngayaan xi tjemu tsavi nechantahan tsëhë cjuaveya,  
 hacuaha cojo sa xi cjucojo naja  
 ndiya tsëhë cjuajeya.  
 Cuatjin cachja xu Zacarías.

80 Hya xi camá ne, quihndi jan ne, camajyë, hacuaha  
 cavejñahñu xu cjuatacun rë. Hane xi camá ngu xihin jyë ne,  
 quiji cavéjña xu ngajan ngu xín camahani tsëhë nandya, hisca  
 hya xi cavechú nixtin xi cavetsihin cachja cjua rë Nina cojo  
 xuta tjë rë Israel.

## 2

### *Hacutjin camá hya xi catsin Jesucristu*

1 Cuitjin xu camá nga ngunixtin hya xi Herodes vitexa me  
 xuta tjë rë Israel. Me xi matitjun camahani xi hmí rë César  
 Augusto ne, cavitexa xu me xi yëjë ni xuta xi siu ngahma gu-  
 biernu rë me ne, cjue me cuiyujutahaxujun me xi cuechjitje  
 me. 2 Hacuaha hya xi cuatjin tjuntjun caviyujutaha xujun  
 xuta ne, hya vitexa xuta Cirene ngajan distritu Siria. 3 Ngajan  
 xi yëjë ni xuta ne, quiji xu me caviyujutaha xujun me, jima  
 ngu me hiscan nanguí rë xutachanga rë me.

<sup>4</sup> Cuatjin camá xi José ne, cavetju xu me tséhë nandya Nasaret, distritu Galilea, quiji me distritu Judea, nangui rë xutachanga rë me David, hiscan xi hmí rë Belén, tséhë xi José ne, tjë rë David xu má me. <sup>5</sup> Quiji casetahaxujun tangun me cojo María, me xi tacunvasen cjuavixan rë me cojo. Hane María ne, jiya xu quihndi rë me hya xi quiji me. <sup>6</sup> Hya xi camá ne, jinguyëjê rë xi siutahá xu me ngajan ne, cavechú nixtin xi tsin xu quihndi rë me, <sup>7</sup> hane catsin rë me ngu quihndi xihin, xi quihndi tjun rë me. Hane xi cavatju catsin quihndi jan ne, sehe cafaha me cavaxtë me ngu tsjian, sehe cafaña xu me quihndi jan cahntsua hiscan jineyá chu ta, tséhë xi casacuiin xu cahndë cahntsua ndihya xi cuiyuju me, tséhë xi jemu quitsë camahani xuta.

*Cachja ángel cojo cha xi sahmi cuidadu rë chu*

<sup>8</sup> Ha taha ladu vëhë ni ne, siutahá ngujo cha nguixun ngajan nguijnã, xi sahmi cuidadu xu cha chu tsánga rë cha. <sup>9</sup> Hya xi camá ne, ha tu ñahñu camatsejen xu ngu ángel tséhë Nina hiscan xi siutahá cha, hane hora vëhë ni ne, hasen ndajyihí rë Nina ne, jercu casahmi hasen xu rë jinguyjê ni hiscan xi siutahá cha, hane jemu catsacjun camahani cha camá. <sup>10</sup> Ngajan xi cachja xu ángel cojo cha cuitjin:

—Xicarcuun ta, nguehe nduva tisuá cumachaya nuju ngu cjuandajyihí xi hisca yëjê xuta tjë rë Israel jercu ndaja cuma rë me <sup>11</sup> ta nguehe Belén, nangui rë xutachanga nuju David ne, quihndë catsin ngu quihndi xi cuaxëtje nuju, quihndi xi Nina catsingatju rë xi cumatitjun tsujun. <sup>12</sup> Hane cuitjin sacú nuju cjuaquixi tséhë cjua xi cachjá cojo nuju vë: xi cjuhun jan ne, cuechun hiscan xi chun ngu quihndi tixtë rë tsjian, jiña cahntsua hiscan jineyá chu. —Cuatjin xu cachja ángel.

<sup>13</sup> Hane ha tu ñahñu camatsejen sa jercu cjín camahani ángel xi nduva xu ngahnga, cafehe hiscan xi secun ángel xi cafehe titjún, tivaxëndaja rë Nina cojo cjua vihi:

<sup>14</sup> ¡Jemu jyë hnga Nina cojo Hasen rë me ngajan ngahnga!  
¡Hane nguehe nangui ne, cuisehen cjuajeya rë Nina cahntsua xahasen rë xuta xi chuya rë Nina tséhë!

Cuatjin xu cachja ángel cjín jan.

<sup>15</sup> Hya xi camá ne, hya xi cavuya quiji nga ángel jan ngahnga ne, cha xi sahmi cuidadu chu tsánga rë jan ne, cuitjin cachja cha cojo xicjin cha:

—¡Cjuanguen ni! Cjuanguen hisca nandya, cuanguen chutsejen xcusun xi camá vi, sacuatjin casua Nina camachaya naja. —Cuatjin xu cachja cha cojo xicjin cha.

<sup>16</sup> Hya xi camá ne, ngusun xu ni café cha, hane xi cafehe cha nandya ne, casacuse rë cha hiscan tacun María cojo José, cojo quihndi jan, jiña cahntsua hiscan jineyá chu. <sup>17</sup> Hya xi cavëë

xu cha quihndi jan ne, sehe cavetsihin casuacuenda cha yějě cjuaxi cachja ángel cojo rě cha tsěhě quihndi vėhě. <sup>18</sup> Hane xi cahndě xuta cjuaxi cachja cha xi cuacun jan cojo rě me ne, jemu quijircun xu rě me. <sup>19</sup> Peru María ne, cavetjo cavetjo ni me yějě ni cjuaxi vėhě cahntsua xahasen rě me, hacuaha jercu cjin xu catsingataha cacun me. <sup>20</sup> Hane xi cavuya quiji nga cha xi sahmi cuidadu chu rě jan ngajan nguijña ne, taha tisahmi jyě tisahmi hnga xu cha Nina hacuaha taha tivaxëndaja cha me tsěhě yějě cjuaxi cahndě cha cojo xcusun xi cavěě cha, sacuatjin cachja ángel cojo rě cha.

*Quiji caningacun rě Jesucristu cojo Nina ngajan Jerusalén*

<sup>21</sup> Xi cavechú xu jyin nixtin quihndi ne, hacuaha hatuxa hya cavechú nixtin xi xtí chuxin rě, hane cuatjin camá cojo quihndi. Hacuaha Jesús cafahañihi xu quihndi, ñihi xi ha cachja ángel hisca chaja sa xi seyahma quihndi cahntsua naa rě.

<sup>22-24</sup> Hya xi camá ne, xi cavechú xu nixtin xi cjue naa rě quihndi yungun xi matitjun cojo quihndi xi cuma tyjahi me xcun Nina tutjin chja ley rě Moisés ne, quiji José cojo María Jerusalén, quiji cani me ngu cjuatjo ta, tsěhě xi chja ley rě Nina ta meje rě xi cjue jo chu tucjin, o sá xi jo chu paloma chihndě. Hacuaha quijicojo xu me quihndi jan Jerusalén xi tsingacun me quihndi jan cojo Nina. Quitahá xujun xcun ley rě Nina xi yějě ni quihndi tjun xi xihin ne, hatuxa tsěhě Nina cuma.

<sup>25</sup> Cavějña xu ngu xihin xi hmí rě Simeón ngajan Jerusalén. Xihin vėhě ne, tyjahi xu me cojo cjuatacun rě me ngajan xcun Nina, hacuaha jemu faharcun me Nina. Hacuaha jemu meje xu rě me xi cjuehe xuta xi yaha cjuetacun jan xi cuma rě xuta tjě rě Israel. Hacuaha Hasen rě Nina ne, jiya cahntsua xahasen rě Simeón. <sup>26</sup> Hane Hasen rě Nina jan ne, casua xu camachaya rě me xi jinguyějě rě xi cjěě scuěě me xuta xi tsingatju Nina jan ne, hatuxa cueyaain xu me. <sup>27</sup> Hane quiji me yungun xi matitjun, tsěhě xi cuatjin cachja Hasen rě Nina cojo rě me. Hacuaha xutacha rě quihndi xi hmí rě Jesús jan ne, quijicojo xu me quihndi jan yungun vėhě, xi sahmichihin me sacuaha xcusun xi vitexa ley rě Moisés hacutjin cuatju quihndi cuma. <sup>28</sup> Hya xi camá ne, cafaha xu Simeón quihndi jan cavataha me, sehe hacuaha cavaxëndaja me Nina cojo cjuaxi vihi:

<sup>29</sup> Ngayun Nina naha, ngayun ne, ha cuma tuhun cahndě xi ngahan hndixahan nuju ne, cueya cojo cjuandaja cojo cjuajeya sacuatjin xi ha canújun.

<sup>30</sup> Cuma cueya ta, tsěhě xi quihndě ne, cahvė suva xuta xi caningatjun xi cuaxětje niji,

<sup>31</sup> me xi caningatjun xcun cojo xcun yějě ni xuta,  
<sup>32</sup> me xi cuinduva sacuaha ngu ndihi xi sua me cjuahasen xi  
 cuma rě xutaxín,  
 hacuaha cuinduva me xi sahmi yehe sahmi hnga niji me,  
 ngayin xuta nuju, xuta tjě rě Israel.

Cuatjin xu cachja Simeón.

<sup>33</sup> Hane xutacha rě quihndi jan ne, jemu quijircun xu rě  
 me tsěhě xi cuatjin cachja Simeón tsěhě quihndi jan. <sup>34</sup> Hane  
 Simeón ne, catsinchacun me me xi cuacun jan, sehe cachja xu  
 me cojo María naa rě quihndi jan cuitjin:

—Quihndi vihi ne, hacuaha sahmi xi jemu cjin xuta tjě rě  
 Israel chajá me, hacuaha sahmi xi jemu cjin xuta tjě rě Israel  
 cuetjutje me. Hacuaha quihndi vihi ne, sua cumachaya rě  
 xuta mé xi meje rě Nina, hacuaha jemu choho cuichja xuta  
 tsěhě quihndi. <sup>35</sup> Cuatjin cuma cojo sa xi ngajan sesunhngat-  
 sejen yějě hacutjin xi tsingataha cacun jemu cjin xuta cojo  
 cjuatacun rě me. Hacuaha ngayun ne, jercu cuma rě xahasen  
 nuju, sacuaha xi quicha casehen rě xahasen nuju. —Cuatjin  
 xu cachja Simeón.

<sup>36</sup> Hacuaha tacun xu ngu chjuun xi hmí rě Ana ngajan  
 yungun, quihndi rě Fanuel, tjě rě xutachanga xi hmí rě Aser.  
 Chjuun jan ne, profeta xu má me. Hacuaha jercu changá xu  
 me. Xi cavixan me ne, cavéjña me cojo xihin rě me yatu nu.  
<sup>37</sup> Ngaxtun vėhě ne, cavéjña cahan me. Hane xi casacu xicjin  
 xu me cojo xutacha rě Jesús ne, ñujuchan ñuju nu xu tjin rě me.  
 Hacuaha jemu quiji camaha xu ni me yungun xi matitjun.  
 Jemu cjin ndiya ne, cajinii xu me niñu xi faharcun me Nina.  
 Hacuaha jercu sahmi xu me oración rě me. Nixtin nixten  
 faharcun me Nina. <sup>38</sup> Hacuaha ha hora xi siu xu ni xutacha  
 rě Jesús ngajan yungun jan ne, cafehe Ana. Hane xi cavėė me  
 quihndi Jesús jan ne, casua xu me nacuechji rě Nina. Ngaxtun  
 vėhě ne, sehe cavetsihin cachja xu me tsěhě Jesús cojo yějě  
 xuta xi jemu meje rě xi cuechú nixtin xi cuaxětje Nina nandya  
 Jerusalén.

### *Cavuya me cojo Jesucristu nandya Nasaret*

<sup>39</sup> Xutacha rě Jesús ne, hya xi ha cafě casahmichihin xu me  
 yějě xcusun xi vitexa ley rě Nina ne, cavuya cafe me nangui rě  
 me, hiscan xi hmí Nasaret, distritu Galilea. <sup>40</sup> Quihndi jan ne,  
 camajyě hacuaha casacuhñu rě, hacuaha jercu cavechútáha  
 cjuatacun rě, hacuaha jercu cavisehen xu cjuandaja rě Nina  
 cahntsua xahasen rě.

### *Casetaha suvá Jesucristu ngajan yungun xi matitjun*

<sup>41</sup> Chuva nu chuva nu ne, xutacha rě Jesús ne, fi xu me  
 suhi tsěhě Pascua ngajan Jerusalén. <sup>42</sup> Hane hya xi Jesús  
 cavechú me tejó nu ne, sacuaha xcusun rě xuta cojo suhi

vêhê ne, quiji xu Jesús cojo xutacha rê me ngajan Jerusalén. <sup>43</sup> Xi cavatju suhi jan ne, xutacha rê Jesús ne, cavetju xu me tsêhê Jerusalén xi cuya cjue me nangui rê me. Peru Jesús ne, hisca camachayiin rê xutacha rê me ne, casetaha suvá xu me Jerusalén. <sup>44</sup> Xi má rê xutacha rê me ne, jiyajñi me ngajñi rê xutacjín tife me. Hane xi cafê ngu nixtin tife xutacha rê me ndiya ne, cavetsihin cavanguise xu me Jesús jan ngajñi rê xuta rê me cojo ngajñi rê yêjê xuta xi vinga rê me. <sup>45</sup> Hane xi casacuiin rê me Jesús jan ngajñi rê xutacjín jan ne, cavuya quiji xu me hisca Jerusalén, xi tivanguise me me.

<sup>46</sup> Hya xi camá ne, xi majyan nixtin jan ne, sehe casacu xu rê me Jesús ngajan yungun xi matitjun, tacun me ngajñi rê maestru xi vicuya cjuachacun, tivisiñuju me cjua rê maestru hacuaha tivinenguise xu rê me jingu sa cjuachacun. <sup>47</sup> Hane yêjê ni xuta xi tivisiñuju cjua rê Jesús jan ne, jercu fircun xu rê me, tsêhê xi cuarcu quicun cacun me hacuaha tsêhê xi jercu ndaja titsicuya me cjua tsêhê maestru jan. <sup>48</sup> Hane hya xi cavêê xu xutacha rê Jesús xi ngajan tacun me ne, tu quiji tsêhê me, sehe cachja naa rê me cuitjin:

—¿Mé má cuatjin canihñi cojo niji, tsan? Chutsijin ta cuajyihî ngahan cojo nahmi riji ne, cojo cjín cjuacjintacun niji ne, catujyihinyin cavinchinsin ri. —Cuatjin xu cachja me.

<sup>49</sup> Ngajan xi Jesús ne, cuitjin xu cachja me cojo xutacha rê me:

—¿Mé má cuatjin tu nguehe tu ngajan cavinchunsun ná ni? ¿Há hyúun ta hatuxa meje rê xi cuitejña ndava nahmi naha? —Cuatjin xu cachja Jesús.

<sup>50</sup> Peru xutacha rê Jesús ne, cajniî xu rcu me cjua xi cachja Jesús cojo rê me.

<sup>51</sup> Hya xi camá ne, cavuya cafe xu Jesús cojo xutacha rê me nangui rê me ngajan Nasaret. Hacuaha cahndê me tsêhê xutacha rê me hacutjin xi quiji sa nixtin rê me. Hane naa rê Jesús ne, cavetjo cavetjo xu ni me yêjê ni cjua vêhê cahntsua xahasen rê me. <sup>52</sup> Sacuaha Jesús ne, jima jyê xu me cojo yojo rê me, hacuaha jima jyê jima hnga me cojo cjuatacun rê me. Hacuaha tichuya sa xu rê Nina tsêhê me, hacuaha tichuya sa rê xuta tsêhê me.

### 3

#### *Cachja Juan Vitenda rê Xuta cjuandajyihî rê Nina*

<sup>1</sup> Cuitjin xu camá hya xi cafê tyjuhun nu jiya me xi matitjun camaha ni xi hmí rê Tiberio César xcun xá rê me xi vitexa me jingu ni ladu. Poncio Pilatu ne, me vêhê vitexa xu me distritu Judea, hane Herodes ne, me vêhê xu vitexa me distritu Galilea, hane hntsêjñu me xi hmí rê Felipe ne, me vêhê xu vitexa me distritu Iturea cojo distritu Traconite, hacuaha



Lisancias ne, me vëhë xu vitexa me distritu Abilinia. <sup>2</sup> Hane sacuaha nahmi xi matitjun xu ne, Anás cojo Caifás má me. Hane sacuaha nixtin vëhë ne, Juan quihndi rë Zacarías ne, hya xi quitahá me ngajan ngu xín tsëhë nandya ne, cafachatsja me cjuá xi catsingatju xu Nina. <sup>3</sup> Hane quiji catsujyihya me yëjë ni ladu tiña tsëhë ndajyë Jordán, tichja me xi meje rë xi tsindeya xu xuta cjuatacun rë me hacuaha xtenda me, cojo sa xi tsinchataha Nina xuta tsëhë jyë rë me. <sup>4</sup> Xi cuatjin xu casahmi Juan ne, casahmichihin me sacuatjin camahindu hatsëë nixtin xcun xujun xi chja cjuá rë profeta Isaías xi chja cuitjin:

Cuitjin jercu hñu cuichja ngu xuta ngajan hiscan jemu xín tsëhë nandya:

“Tuhunchjinu ndiya tsëhë Nai naja;  
ninguixun ndiya tsëhë me.

<sup>5</sup> Yëjë ni hiscan nangui cahntsua ne, tsëya rë,  
yëjë ni ndetjún cojo yëjë ni naxi ne, cuijnenangui,  
yëjë ni ndiya lahñi ne, cuma quixi,  
yëjë ni ndiya xi hacuain chihin ne, cuma chihin.

<sup>6</sup> Hane yëjë ni xuta ne, scuëë me hacutjin vaxëtje Nina xuta rë me.”

Cuatjin xu catsihindu Isaías cjuá xi jercu hñu cuichja xuta jan.

<sup>7</sup> Ngajan xi hya xi quiji xutacjín xi xtenda me ne, cuitjin xu cachja Juan cojo xuta:

—¿Ngayujun ni ngayun quihndi rë chu tsehen matsejen ne!, ¿yo cavinchangui nuju xi nihñu ngahñu xi cuetjuntjun tsëhë castigu xi hatuxa tsingatju Nina? <sup>8</sup> Sá xi meje jain cuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuatacun rë me. Xicanujuun cahntsua xahasen nuju cjuá víhi: “Ngayaan ne, tsajin mé cuma naja ta, tsëhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca ndyojo xi cuicun vi ne, cuma sahmi me tjë rë Abraham. <sup>9</sup> Chutsujun ta ngayun matsejen ne, tangun ngayun cojo yatjë xi ha quitaháchjine quicharcu tyjama rë xi cuetsihin xtí. Yëjë ni yatjë xi suaain tu xi ndaja matsejen ne, xtí rë, sehe cjue cueti. —Cuatjin xu cachja Juan.

<sup>10</sup> Ngajan xi xutacjín jan ne, cuitjin xu cavinenguisse rë me Juan:

—¿Hacutjin ndatjin nihñi xi cuma nihñi cjuandaja xi nújun vë ní? —Cuatjin xu cavinenguisse me.

<sup>11</sup> Hane xi cafayangui Juan ne, cuitjin xu cachja me:

—Jarë ngayun xi tjín nuju jo tsjian nuju ne, tuhun rë ngu yo xi tsajin rë. Jarë ngayun xi tjín xi chinu ne, ha chuva vëhë ni tuhun hitsë catjinë me xi tsajin xi sinë. —Cuatjin xu cachja me.

<sup>12</sup> Hacuaha canduva sa xu ngujo cha xi faha tujúnsa xi meje rē cha xi xtenda cha, hane cuitjin xu cavinenguisse cha:

—Tatá, ¿mé xi ndatjin nihñi ngayin? —Cuatjin xu cavinenguisse cha.

<sup>13</sup> Sehe ngajan xi Juan ne, cuitjin xu cachja me cojo cha:

—Hacuiin cjin sa tujún chjahyun rē xuta. Chjahyun rē me hacutjin xi casatēxa ni nuju. —Cuatjin xu cachja me.

<sup>14</sup> Hacuaha cavinenguisse nga ngujo sindadu me cuitjin:

—Hane ngayin ne, ¿mé xi ndatjin nihñi? —Cuatjin xu cavinenguisse cha.

Sehe cachja xu me cojo cha cuitjin:

—Xicanaxuun rē xuta tujún cojo cjuachan, o sá xi cojo ngu cjuandacha. Catamangutacún ni cojo tujún xi ha ma chji nuju. —Cuatjin xu cachja me.

<sup>15</sup> Xuta ne, jercu siuya camahani me mé xi cuma, hacuaha vinenguisse xu me cahntsua xahasen rē me cuitjin: “Hyaan sa xi Juan rē vi Xihin xi Tsingatju Nina xi cuaxētje naja me.” Cuatjin xu cavinenguisse me. <sup>16</sup> Sehe ngajan xi Juan ne, cuitjin xu cachja me cojo yējē xuta jan:

—Ngahan matsejen ne, cojo nandá ni tivitēnda nuju, peru sehe cuinduva me xi cueyá me Hasen rē Nina cahntsua xahasen nuju, hacuaha cuaha me sacuaha ngu ndihi xi tsityjahi rē cjuatacun nuju. Me vēhē ne, hitsē sa jyē hnga me cojo cjuatacun rē xi cumá ná ngahan, hisca cumaji tsinguissehercu sahme tyjahi chuxinxte rē me. <sup>17</sup> Me xi tsingatju Nina jan matsejen ne, sacuaha xi ha yahatsja me quicha xi tsinguitjen rē xtē rē trigu cojo sa xi cuma tyjahi ndaja trigu xi casechun rē tsēhē me, hacuaha cjuaya me trigu tyjahi xi cuinchandaja me, hane xtē rē jan matsejen ne, cuaca me xcun ngu ndihi xi tsajin nixtin hvo. —Cuatjin xu cachja Juan.

<sup>18</sup> Hacuaha hacuiin suvá xu ni cjua vēhē cachja Juan cojo xuta hya xi cachja me cjuandajyihi rē Nina ta cachja sa xu me jemu cjin cjua. <sup>19</sup> Herodes, me xi cavitexa ngajan distritu Galilea ne, hacuaha cachjataha xu Juan me ngatsē rē xi cafaha Herodes na Herodía, chjuun rē hntsējñu me, xi cumá chjuun rē me na. Hacuaha cachjataha sa xu Juan me tsēhē jingu sa xcusun tsehen xi casahmi me. <sup>20</sup> Peru xcun yējē cjuatsehen vēhē ne, cavetahacoo sa Herodes xcusun vihi: caveya xu me Juan ndavaya.

### *Caxtenda Jesucristu*

<sup>21</sup> Hane hya xi chaja sa xu cjue Juan ndavaya ne, ngu nixtin xi caxtenda yējē ni xuta ne, hacuaha cojo xu Jesús caxtenda me. Hane xi cavatju caxtenda me ne, hora xi tisahmi xu me oración rē me ne, ngahnga ne, catuxaha, <sup>22</sup> hane Hasen rē Nina ne, canduvajnetsejen casesun rcu me. Sacuajyihi ngu

paloma jyihi. Hacuaha hora vëhë ni ne, canuhya xu rë ngu cjua ngajan ngahnga xi cachja xu cuitjin: “Ngaye xi quihndi naha ngaye xi jemu hmú cáacun ri. Jemu ndama ná ngatsë riji.” Cuatjin xu cachja.

### *Xutachanga rë Jesucristu*

<sup>23</sup> Quihndë ne, Jesús ne, tjin xu rë me sacuaha cantë nu hya xi cavetsihin me cojo xá rë me. Hacuaha xi má xu rë xuta ne, quihndi rë José má me. Hane José ne, quihndi rë Elí. <sup>24</sup> Elí ne, quihndi rë Matat. Matat ne, quihndi rë Leví. Leví ne, quihndi rë Melqui. Melqui ne, quihndi rë Jana. Jana ne, quihndi rë José. <sup>25</sup> José ne, quihndi rë Matatías. Matatías ne, quihndi rë Amós. Amós ne, quihndi rë Nahum. Nahum ne, quihndi rë Esli. Esli ne, quihndi rë Nagai. <sup>26</sup> Nagai ne, quihndi rë Maat. Maat ne, quihndi rë Matatías. Matatías ne, quihndi rë Semei. Semei ne, quihndi rë José. José ne, quihndi rë Judá. <sup>27</sup> Judá ne, quihndi rë Joana. Joana ne, quihndi rë Resa. Resa ne, quihndi rë Zorobabel. Zorobabel ne, quihndi rë Salatiel. Salatiel ne, quihndi rë Neri. <sup>28</sup> Neri ne, quihndi rë Melqui. Melqui ne, quihndi rë Adi. Adi ne, quihndi rë Cosam. Cosam ne, quihndi rë Elmodam. Elmodam ne, quihndi rë Er. <sup>29</sup> Er ne, quihndi rë Jesús. Jesús ne, quihndi rë Eliezer. Eliezer ne, quihndi rë Jorim. Jorim ne, quihndi rë Matat. <sup>30</sup> Matat ne, quihndi rë Leví. Leví ne, quihndi rë Simeón. Simeón ne, quihndi rë Judá. Judá ne, quihndi rë José. José ne, quihndi rë Jonán. Jonán ne, quihndi rë Eliaquim. <sup>31</sup> Eliaquim ne, quihndi rë Melea. Melea ne, quihndi rë Mainán. Mainán ne, quihndi rë Matata. Matata ne, quihndi rë Natán. <sup>32</sup> Natán ne, quihndi rë David. David ne, quihndi rë Isaí. Isaí ne, quihndi rë Obed. Obed ne, quihndi rë Booz. Booz ne, quihndi rë Salmón. Salmón ne, quihndi rë Naasón. <sup>33</sup> Naasón ne, quihndi rë Aminadab. Aminadab ne, quihndi rë Aram. Aram ne, quihndi rë Esrom. Esrom ne, quihndi rë Fares. Fares ne, quihndi rë Judá. <sup>34</sup> Judá ne, quihndi rë Jacob. Jacob ne, quihndi rë Isaac. Isaac ne, quihndi rë Abraham. Abraham ne, quihndi rë Taré. Taré ne, quihndi rë Nacor. <sup>35</sup> Nacor ne, quihndi rë Serug. Serug ne, quihndi rë Ragau. Ragau ne, quihndi rë Peleg. Peleg ne, quihndi rë Heber. Heber ne, quihndi rë Sala. <sup>36</sup> Sala ne, quihndi rë Cainán. Cainán ne, quihndi rë Arfaxad. Arfaxad ne, quihndi rë Sem. Sem ne, quihndi rë Noé. Noé ne, quihndi rë Lamec. <sup>37</sup> Lamec ne, quihndi rë Matusalén. Matusalén ne, quihndi rë Enoc. Enoc ne, quihndi rë Jared. Jared ne, quihndi rë Mahalaleel. Mahalaleel ne, quihndi rë Cainán. <sup>38</sup> Cainán ne, quihndi rë Enós. Enós ne, quihndi rë Set. Set ne, quihndi rë Adán. Adán ne, me vëhë xi Nina casahmi rë me.

## 4

*Cafahachuva xitsehen Jesucristu*

<sup>1</sup> Hya xi camá ne, hya xi catsë rë Jesús cojo Hasen rë Nina hya xi caxtenda me ne, cavuya xu me tsëhë ndajyë Jordán xi cjue me ndava me, peru Hasen rë Nina ne, quiji nguehe quiji ngajan xu cojo rë me ngajan ngu xín tsëhë nandya <sup>2</sup> cahntsua yachan nixtin. Hacuaha yasen ni tifahachuva xitsehen xi matitjun me. Hacuaha Jesús ne, tsajin camaha xu ni mé xi cajiñë me cahntsua nixtin xi cuacun vëhë. Hane xi cavatju nixtin xi cuacun vë ne, jercu camavojo xu rë me. <sup>3</sup> Sehe ngajan xi xitsehen jan ne, cuitjin xu cachja cojo Jesús:

—Sá xi Quihndi jain rë Nina ngaye ne, tinoje cojo ndyojo vihi ne, catama niñu. —Cuatjin xu cachja xitsehen.

<sup>4</sup> Hane Jesús ne, cuitjin xu cafayangui me tsëhë xitsehen jan:

—Xcun xujun rë Nina ne, cuitjin camahindu: “Hacuiin suvá ngatsë rë niñu xi siu xuta cjuahñu.” —Cuatjin xu cafayangui Jesús.

<sup>5</sup> Hane xi quijicojo xitsehen me ngu ndetjún hnga ne, sehe nguhñusasa xu catsingacun ni xitsehen jan me jingujyë ni nandya tsëhë ngasunhdë. <sup>6</sup> Sehe cachja xu xitsehen cuitjin cojo rë me:

—Suá ri yëjë nandya xi cuacun vë cojo yëjë cjuanchina rë xi ngaye nihñi gobiernu. Cuma suá ri ta, tsëhë xi hatuxa ngahan cafahántsa, hane ha tu yo ni xi meje suá rë ne, suá rë. <sup>7</sup> Quihndë ne, sá xi cuindove cuiticjexcuin nguehe xi chjehercuin ná ne, cumá tsiji yëjë ni nandya vë. —Cuatjin xu cachja xitsehen.

<sup>8</sup> Sehe ngajan xi cafayangui xu Jesús cuitjin:

—Xcun xujun rë Nina ne, cuitjin camahindu: “Meje rë xi chjuhuncun Nina naja, hacuaha suvá ni me vëhë meje rë xi nihñu hacutjin xi meje rë me.” —Cuatjin xu cachja Jesús cjuavëhë.

<sup>9</sup> Hya xi camá ne, xitsehen jan ne, quijicojo xu rë Jesús ngajan Jerusalén, hane quijicani rë me hisca rcu cjin yungun xi matitjun. Sehe cachja xu cojo rë me cuitjin:

—Sá xi Quihndi jain rë Nina ngaye ne, ningatjin yojo riji ndyá hisca nanguí. <sup>10</sup> Ha hye ta tsajin mé cuma ri ta xcun xujun rë Nina ne, cuitjin chja:

Nina cuitexa me ángel rë me xi sahmi ri cuidadu.

<sup>11</sup> Cuahatsjá ri,

cojo sa xi hisca ntsacui ne, sacuinhmaain rë cojo ngu ndyojo. Cuatjin xu cachja xitsehen cjuavëhë.

<sup>12</sup> Hane Jesús ne, cuitjin xu cafayangui me tsëhë xitsehen:

—Xujun rë Nina ne, cuitjin chja: “Mijí rë xi chjuhunchuvun Nina naja.”

<sup>13</sup> Hya xi camá ne, xi cajnetaha cafachuva xitsehen jan Jesús ne, cavetjuxin xu tsëhë me hisca janihya cuya nga.

*Cavetsihin cavicuya Jesucristu xuta Galilea*

<sup>14</sup> Ngajan xi Jesús ne, cojo ngahñu rë Hasen rë Nina ne, quijinduju sa xu me xi cjue me ndava me ngajan distritu Galilea. Hane xi cafehe xu me jan ne, jercu cachja xuta tsëhë me ngajan Galilea cojo jinguyjë ni nandya xi siu tahndee rë.

<sup>15</sup> Hane quiji me yungun rë jimangu nandya tsëhë Galilea, cavicuya me xuta. Hane yëjë ni xuta jan ne, casahmi jyë casahmi hnga xu me Jesús.

*Tacun Jesucristu nandya Nasaret*

<sup>16</sup> Cavechú ngu nixtin xi quiji xu Jesús ngajan nandya Nasaret hiscan xi camacha me. Hane sacuaaha xcusun xi tjin rë me ne, nixtin xi chjahájenda rë ne, quiji xu me yungun. Sehe quiji casecunvasen me xi cuichjasun xu me xujun rë Nina. <sup>17</sup> Hya xi camá ne, casengui tsja me xujun xi hincha cjua rë Nina xi catsihindu profeta Isaías. Hane xi titsixinga xu me xujun jan ne, táha tivanguise me cahndë xi quitahá cjua xi meje rë me. Hane xi casacu rë me cahndë vëhë ne, sehe cavetsihin cachjasun xu me cjua vihi xcun xuta:

<sup>18</sup> Hasen rë Nina ne, jiya cahntsua xahasen naha, vëhë xi casuaxa ná Nina xi suá cumachaya rë xuta yuma cjuandajyihí rë me:

catsingatju ná me xi suá cumachaya rë xuta xi hincha ndavaya ta hatuxa cuma ndaya me, suá cumachaya rë xuta xi rcá me ta hatuxa cuya cuma tsejen nga rë me;

cuëhëndaya xuta xi jemu choho sahmi jingu sa xuta cojo rë me.

<sup>19</sup> Hacuaha suá cumachaya rë xuta xi cavechú nu xi jercu sahmi Nina cjuandaja cojo xuta rë me.

Cuatjin chja cjua rë xujun xi cachjasun Jesús.

<sup>20</sup> Hane xi cavuya catsijeyu nga Jesús xujun jan ne, sehe cavuya casua nga me me xi sahmi xá cahntsua yungun jan. Sehe cavéjña Jesús xi cuicuya rë me xuta. Hane yëjë ni xuta xi siu cahntsua yungun jan ne, jercu cavëhërcun me Jesús. <sup>21</sup> Sehe ngajan xi Jesús ne, cavetsihin cachja me cuitjin cojo xuta:

—Quihndë, jinguyjë rë xi cavinuhyun cjua xi camahindu xcun xujun rë Nina xi cavutaya jan ne, ngajan cavetjucaa cjua vëhë. —Cuatjin xu cachja Jesús.

<sup>22</sup> Yëjë ni xuta ne, jemu ndaja xu cachja me tsëhë Jesús, hacuaha hisca quijircun rë me tsëhë xi jemu ndaja camahani cjua xi cachja Jesús. Sehe cachja xuta jan cuitjin:

—¡Peru cha vihi xi quihndi rë cha José jan! —Cuatjin xu cachja me.

<sup>23</sup> Hane Jesús ne, cuitjin xu cachja me cojo xuta jan:

—Ngahan matsejen ne, ha hvë ta ngayun ne, cuinújun cojo ná cjuá vihi: “Doctor, nircun suvun rë yojo nuju.” Hacuaha cuinújun nga cuitjin: “Xcusun xi camachaya niji xi canihñu ngajan Capernaum matsejen ne, hacuaha nihñu xcusun vëhë nguehe xi nangui nuju.” <sup>24</sup> Cuichjá cojo nuju cjuaquixi ta hisca xi ngu profeta matsejen ne, hatuxa macjaain rë xuta nangui rë me tsëhë me. <sup>25</sup> Hacuaha ha cjuaquixi ta jemu cjin chjuun cahan xi caviyuju na nguehe Israel hya xi cavéjña profeta Elías hatsëë nixtin. Hacuaha nixtin vëhë matsejen ne, cavaain camahani tsi sacuaha jyan nu vasen, hane jercu jyë camahani jindya cavéjña jingujyë ni ladu. <sup>26</sup> Peru catsingatjiin Nina profeta Elías xi cjue cuisecoo me hisca ngu na cahan xi cuacun vë matsejen ta ngu ni na cahan xi hisca hacuiin na tjë rë Israel na catsingatju Nina profeta xi cuisecoo me na ngajan nandya Sarepta, ladu tsëhë nandya Sidón. <sup>27</sup> Hacuaha nguehe Israel matsejen ne, jemu cjin xuta xi yaha rë ngu chíhin vitaha xi setaha yojo naja caviyuju me hya xi cavéjña profeta Eliseo hatsëë nixtin. Peru hisca xi ngu me xi cuacun vë camandajin me matsejen ta ngu ni Naamán xi hisca hacuiin xuta tjë rë Israel ta xuta Siria me matsejen ne, me vëhë ni xi camandaja me. —Cuatjin xu cachja Jesús.

<sup>28</sup> Hane yëjë ni xuta xi siu xu cahntsua yungun jan ne, hya xi cahndë me cjuá xi cachja Jesús jan ne, jemu camacjan rë me.

<sup>29</sup> Hya xi camá ne, xi caxinchacun xuta jan ne, cavaxëxin xu me Jesús, quijicojo me me hisca ngajan ngu xín tsëhë nandya, ngu rcu ndetjún hnga hiscan xi cavéjña nandya rë me, xi meje tsingatjen me Jesús. <sup>30</sup> Peru Jesús ne, cavatju xu me ngajñi rë xuta jan quijixin me.

### *Cha xi jiya xitsehen xahasen rë*

<sup>31</sup> Hya xi camá ne, quiji xu Jesús Capernaum, ngu nandya tsëhë distritu Galilea. Hane nixtin xi chjahájenda rë ne, quiji xu me yungun cavicuya me xuta. <sup>32</sup> Hane yëjë xuta xi siu jan ne, jercu quijircun xu rë me tsëhë cjuá xi vicuya Jesús ta, tsëhë xi cjuá xi vicuya me ne, sacuaha cjuá xi chja ngu xi matitjun jain.

<sup>33</sup> Hacuaha cahntsua yungun jan ne, tacun xu ngu cha xi jiya xitsehen cahntsua xahasen rë cha. Hane xitsehen jan casahmi xi jercu cajindaya cha cachja cha cuitjin:

<sup>34</sup> —¡Ja! ¿Mé má cuatjin ninguisuhunjñu cojo niji ngayun Jesús, xuta Nasaret? ¿Há canduvun xi nicjun niji? Ngahan ne, ha hvë yo ngayun. Ngayun xi hatuxa vinechun tsëhë Nina ngayun. —Cuatjin xu casahmi xitsehen xi cachja cha.

<sup>35</sup> Hya xi camá ne, cuitjin xu cachja Jesús xi cavatëcja me cjua rë xitsehen xi jiya cahntsua xahasen rë cha:

—¡Jyuu nechin, hacuaha tetjixin tsëhë cha vë! —Cuatjin xu cachja Jesús.

Hya xi camá ne, catsiticja xu xitsehen jan cha ngajñi rë xuta, sehe cavetju quiji tsëhë xahasen rë cha, peru tsajin camahani mé cavanguihmu rë cha. <sup>36</sup> Hya xi camá ne, yëjë xuta jan ne, jercu quijircun rë me, hisca cachja xu me ngajñi rë me cojo xicjin me cuitjin:

—¿Mé nga xcusun cjua vihi xi cojo yëjë ni ngahñu vitexa rë hisca xitsehen, hacuaha vetjuxin ni? —Cuatjin xu cachja xuta ngajñi rë me cojo xicjin me.

<sup>37</sup> Hya xi camá ne, jingujyë ni ladu tahndee rë cahndë jan ne, cavitsojo xu cjua xi cachja xuta tsëhë Jesús.

### *Camandaja nahya rë Simón Pedru xi casahmi Jesucristu*

<sup>38</sup> Xi cavetju Jesús tsëhë yungun ne, quiji xu me ndava ngu me xi hmí rë Simón. Hane nahya rë Simón ne, jemu hmu xu rë me xi yaha rë me chíhinsuë. Hane yëjë xuta rë me ne, cafehya me cojo Jesús xi cuisecoo Jesús nahya rë Simón. <sup>39</sup> Hane xi quiji cavutsejenya xu Jesús xcun nahya rë Simón ne, cavatëcja me chíhinsuë xi má rë xuta changá vëhë, hane cavetjuxin xu chíhin jan tsëhë me. Hane hora vëhë ni ne, cavisatjenhnga nahya rë Simón cavetsihin cafahacuenda me cjuandaja xi sahmi me cojo yëjë ni me xi cafehe jan.

### *Jemu cjín xutahmu rë camandaja me xi casahmi Jesús*

<sup>40</sup> Hane hora xi tivetje tsuhi xu ne, yëjë ni xuta xi tjin rë me xutahmu rë tsëhë tu mé ni xcusun chíhin ne, quijicojo me xutahmu rë jan nixtin hya hiscan tacun Jesús. Hane xi cavisanetsja xu Jesús jima ngu xutahmu rë jan ne, camandaja me. <sup>41</sup> Hacuaha jemu cjín xu xuta xi siu jan cavetjuxin xitsehen xi hinchá rë me. Hane xi cavetju xitsehen jan quiji ne, jercu cachja camahani cuitjin:

—¡Ngayun xi Quihndi jain rë Nina ngayun! —Cuatjin xu cachja xitsehen jan.

Peru cavatëcja xu Jesús cjua xi tichja xitsehen jan, casuaain me cahndë xi cuichja xitsehen ta, tsëhë xi ha vëë xu xitsehen xi me vëhë xi catsingatju Nina me.

### *Catsuyihiya Jesucristu cojo cjuandajyihi rë Nina*

<sup>42</sup> Hane xi casahasen jan ne, cavetju xu Jesús quiji me ngajan ngu xín tsëhë nandya. Hane xutacjín jan ne, cuatjin quiji cavanguise xu me Jesús, hane xi cavechú me hiscan tacun Jesús ne, meje tsinguijnehai me Jesús cojo sa xi hacuiin cuetjuxin me tsëhë xuta jan. <sup>43</sup> Peru Jesús ne, cuitjin xu cachja me cojo xuta jan:

—Hacuaha sahmi ná nguŷyë xi cjuë jingu sa cahndë, suá cumachaya rë xuta cjuandajyihî tsëhë gobiernu xi sahmi Nina ta ngatsë rë vëhë xi catsingatju ná Nina. —Cuatjin xu cachja Jesús.

<sup>44</sup> Hane cuatjin xu catsujyihîya casua me camachaya rë xuta cjuandajyihî vëhë yëjë ni yungun tsëhë ladu vëhë.

## 5

### *Cjuarcun xi casahmi Jesucristu tsëhë chu ti*

<sup>1</sup> Cuitjin xu camá nga ngu nixtin jan. Jercu cjín camahani xuta quijitjengui me Jesús xi cuihndë me cjua rë Nina. Na cavehncun xu me Jesús xi secun me tjehen laguna Genesaret, xi hacuaha hmí rë laguna Galilea. <sup>2</sup> Hya xi camá ne, cavëë Jesús jo barcu ngajan tjehen rë laguna jan, hane cha xi tsëhë barcu jan ne, ha cavitujne xu cha tsëhë barcu, hane hinchá vane cha nahya rë cha. <sup>3</sup> Hane Jesús ne, quiŷi cavisehen xu me ngu barcu xi cavëë me jan. Barcu jan ne, tsëhë Simón. Sehe cachja me cojo Simón xi cjuecojo me hitsë barcu ngajñî nandá. Hya xi camá ne, quiŷi cavéjña me sehe cavicuya xu me xutacjín jan tsëhë ngajan ni cahntsua barcu. <sup>4</sup> Hane xi cajnetaha cavicuya me xuta jan ne, sehe ngajan xi cachja xu me cojo Simón cuitjin:

—Táangunvuhun sa cojo barcu vi hiscan nungun nandá, sehe ngajan ningatjunyun nahya xi chjuhun ti. —Cuatjin xu cachja me.

<sup>5</sup> Sehe ngajan xi cafayangui xu Simón tsëhë Jesús cuitjin:

—Tatá, cuaha nixten tinihñî xá vëhë ne, ndastu mé sacu niŷi. Peru sá xi cuatjin nújun ne, cuichjá cojo compañeru naha ne, ningatjinyin nahya. —Cuatjin cafayangui xu Simón.

<sup>6</sup> Hane xi casahmi me cuatjin ne, jercu tu cjín camaha xu ni ti cafaha me, ña meje xtiya nahya rë me. <sup>7</sup> Hya xi camá ne, casahmitsja xu me cojo xicjin me xi hinchá barcu xingu jan xi cjue cuisecoo xicjin me. Sehe quiŷi me xi cuacun jan. Hya xi camá ne, catsinguitsë me catsijô barcu cojo ti xi cafaha me jan. Hane xi jercu catsë barcu ne, ña meje xtyusehen. <sup>8</sup> Hane xi cavëë Simón Pedru xcusun xi camá jan ne, sehe quiŷi caticjaxcun me xcun Jesús, sehe cachja xu me cuitjin:

—Tatá. Táangunxun hitsë tsahan ta, ngahan ne, ngu xuta tsehen ngahan. —Cuatjin xu cachja Simón Pedru.

<sup>9</sup> Cuatjin cachja me ta, tsëhë xi jercu quiŷircun camahani rë me cojo compañeru rë me ngatsë rë ti xi jemu cjín camahani chu cafaha me. <sup>10</sup> Hacuanitjin xu ni quiŷircun rë yahnga compañeru rë Simón, me xi hmí rë Jacobo cojo Juan, me xi quihndi rë Zebedeo. Sehe ngajan xi Jesús ne, cuitjin xu cachja me cojo Simón:



—Xicarcuun ta quihndë cojo nixtin xi cjuiniji sa vi ne, ngayun cuangun nuvun xuta xi cuisehen me ladu naha ngojo rë xi nuvun chu ti. —Cuatjin xu cachja me.

<sup>11</sup> Hya xi camá ne, Simón cojo compaÑeru rë me ne, cavaxëxin xu me barcu jan tsëhë xcun nandá, caviyuju me nangui quixí. Sehe caviyuju me yëjë ni tsëhë me ne, sehe quiji me cojo Jesús.

*Casahmi Jesucristu xi camandaja cha xi yaha rë chíhin xi setaha yojo naja*

<sup>12</sup> Cuitjin camá nga xu hya xi casetaha Jesús ngu nandya jan. Cafehe xu ngu cha xi jingujyë ni yojo rë yaha rë ngu xcusun chíhin vitaha. Hane xi cavëë xu cha Jesús ne, quiji cha caticjaxcun cha xcun Jesús cafehya cha cjuandaja xi sahmi me cojo rë cha, cuitjin xu cachja cha:

—Tatá. Sá xi meje nuju ne, cuma chjuhunxun chíhin xi yaha ná. —Cuatjin xu cachja cha.

<sup>13</sup> Hane xi catsixinga xu Jesús tsja me cavetahatsja me cha ne, cachja me cuitjin:

—Meje ná. Catamandaja ngayun. —Cuatjin xu cachja me.

Hane chíhin jan ne, ngutjen xu ni cavetjuxin. <sup>14</sup> Sehe cavitexa me cha cuitjin:

—Tsajin camahani yo xi cuinújun cojo xcusun vihi. Nihñu sacuatjin cavitexa Moisés xutachanga naja hatsëë nixtin. Tángun ningacun yojo nuju cojo nahmi, sehe tángun chjuhun ngu cjuatjo xi tuhun rë Nina tsëhë xi camandaja ngayun. Cuatjin nihñu cojo sa xi cumatsejen xi camandaja jain ngayun. —Cuatjin xu cachja me.

<sup>15</sup> Peru handasa cuatjin xu cachja Jesús cojo cha ne, hitsë sa jercu cavitsojo cjua tsëhë xcusun xi casahmi me. Hya xi camá ne, jercu tu cjín camahani xuta quijitjengui xu me Jesús xi cuihndë me cjua rë Jesús hacuaha cumandaja me tsëhë chíhin xi ma rë me. <sup>16</sup> Peru Jesús ne, yasen xu ni cavaxëxin me yojo rë me fi me ngajan ngu xín camahani, sahmi me oración rë me cojo Nina.

*Casahmi Jesucristu xi camandaja cha xi cahme yojo rë*

<sup>17</sup> Cuitjin camá nga xu ngu nixtin hya xi tivicuya Jesús xuta. Hacuaha siu xu ngujo cha fariseo cojo ngujo cha xi vicuya cjuachacun xi canduva cha yëjë ni nandya tsëhë distritu Galilea cojo distritu Judea, cojo nandya Jerusalén. Hacuaha jercu yaha Jesús ngahñu rë Nina xi sahmi me xi cumandaja xuta hmu rë. <sup>18</sup> Hya xi camá xu ne, hora vëhë cafehe ngu cha xi cahme yojo rë, quichahahnga rë cha cojo nijña rë cha. Hane cha xi yahahnga rë cha ne, casahmi cha cjuandya xi cuisehen cha cahntsua ndihya xi cuejña cha cha hmu rë jan hiscan

tacun Jesús. <sup>19</sup> Peru xi casacuiin xu rë cha chuva rë hacutjin cuisehen cha ngatsë rë xuta xi jercu quitsë camahani me jan ne, camiji xu cha rcu ndihya, hane cafaixin cha tyjavanitja, sehe catsitujne cha cha hmu rë jan taha rcu ndihya cojo ni nijña rë cha, xi camá cavejña cha cha ngajñi rë xuta hiscan tacun Jesús. <sup>20</sup> Hane xi cavëë Jesús xi cuatjin mangucacun cha xi cuacun jan cojo rë me ne, sehe cachja xu me cuitjin cojo cha hmu rë jan:

—Jyë nuju tsan ne, ha camanchataha. —Cuatjin xu cachja me.

<sup>21</sup> Hya xi camá xu ne, cha xi vicuya cjuachacun cojo cha fariseo xi cuacun jan ne, cavetsihin catsingataha cacun cha cachja xu cha cuitjin cojo xicjin cha:

—¿Yo cha xi cuijiyihi vi xi tsixcuehyu cha Nina? ¡Hatuxa tsajin yo xi cuma tsinchataha jyë rë xuta ta suvá ni Nina xi cuma tsinchataha me! —Cuatjin xu cachja cha cojo xicjin cha.

<sup>22</sup> Peru tsëhë xi Jesús ne, ha vëë me mé xi titsingataha cacun cha xi cuacun jan ne, cachja xu me cojo cha cuitjin:

—¿Mé xi tiningatuhuntacún cojo cjuatacun nuju? <sup>23</sup> ¿Jarë cjua xi hitsë sa tsaviin xi cuichjá? ¿Há xi: “Jyë nuju ne, ha camanchataha?”, o ¿há xi: “Tisatjunhngun ne, tujuhunyun?”

<sup>24</sup> Peru nguehe suá cumachaya nuju xi ngahan xi Quihndi rë Xuta Jain ngahan ne, yahá xá xi tsinchátaha jyë rë xuta nguehe ngasunhdë.

Sehe ngajan xi cachja xu Jesús cojo cha hmu rë jan:

—Quihndë ne, ngayun tsan ne, tisatjunhngun, chjuhun nijña nuju vë ne, sehe tjangun ndya nuju. —Cuatjin xu cachja Jesús.

<sup>25</sup> Hya xi camá ne, ngutjen ni cavisatjenhnga xu cha ngajñi rë yëjë ni xuta, sehe cafaha cha nijña rë cha, cafe cha, taha sahmi jyë sahmi hnga cha Nina. <sup>26</sup> Hane yëjë ni xuta jan ne, jercu quijircun xu rë me, hacuaha cojo me casahmi jyë casahmi hnga xu me Nina, hisca catsacjun me camá. Hacuaha cachja xu me cuitjin:

—Quihndë cahyan xcusun xi tsajin nixtin xi hyan. —Cuatjin xu cachja me.

### *Cavaxijin Jesucristu Leví xi hacuaha hmí rë me Mateo*

<sup>27</sup> Hya xi camá xu ne, xi cavetju Jesús jan ne, cavechú me ngu cahndë hiscan xi tacun ngu me xi faha tujúnsa, me xi hmí rë Leví. Sehe cachja xu me cojo me cuitjin:

—Nduvun, cuanguen cona. —Cuatjin xu cachja me.

<sup>28</sup> Hya xi camá ne, Leví jan ne, caviyuju yëjë mé xcusun xi sahmixa me cojo jan ne, sehe cavetju xu me quiji me cojo Jesús.

<sup>29</sup> Hane xi cavatju vëhë ne, sehe casahmi xu me ngu suhi ngajan ndava me ngatsë rë Jesús. Hacuaaha jercu cjín camaha xu ni cha xi faha tujúnsa cojo jingu sa xuta tijinë me niñu cojo Jesús cojo Leví. <sup>30</sup> Hane cha fariseo cojo cha xi vicuya cjuachacun cavetsihin cachjataha xu cha xuta ladu rë Jesús cuitjin:

—¿Mé má cuatjin chinu hyun tangun cojo cha xi faha tujúnsa cojo ngujo sa cha xi hacuaaha cha tsehen cha? —Cuatjin xu cachjataha cha.

<sup>31</sup> Hane xi cafayangui Jesús tsëhë cha ne, cuitjin xu cachja me:

—Xuta xi hacuiin hmu rë me ne, mijí rë xi cjuahacuenda rë me doctor ta suvá ni xuta xi hmu rë me ne, me vëhë xi meje rë xi cjuahacuenda rë me doctor. <sup>32</sup> Hacuanitjin ná ngahan ta ngahan ne, hacuiin canduvá nguehe xi squindáyavaha rë xuta xi tsajin jyë rë me ta xi canduvá ne, xi squindáyavaha rë xuta tsehen. Cuichjá cojo rë me xi tsindeya me cjuatacun rë me. —Cuatjin xu cachja me.

*Mé tsëhë xi casahmii Jesucristu cojo xuta rë me xun rë me*

<sup>33</sup> Ngajan xi cha fariseo cojo cha xi vicuya cjuachacun ne, cachja xu cha cuitjin cojo Jesús:

—Yëjë xuta ladu rë Juan ne, yasen ni sahmi me xun rë me hacuaaha sahmi me oración rë me cojo Nina. Hacuanitjin ni yëjë xuta ladu rë cha fariseo. Peru xuta ladu nuju ne, jinë jihvi me. —Cuatjin xu cachja cha.

<sup>34</sup> Ngajan xi Jesús ne, cuitjin xu cachja me cojo cha:

—Cumaji xi xuta rë cha xi tivixan ne, sahmi me xun rë me jinguyëjë rë xi cha xi tivixan ne, tacun cha cojo rë me. <sup>35</sup> Peru cuechú nixtin xi cha xi tivixan chjaháxin rë cha tsëhë xuta rë cha ne, hya sahmi me xun rë me. —Cuatjin xu cachja Jesús.

<sup>36</sup> Hacuaaha cachja nga xu me ngu ejemplu vihi cojo cha xi cuacun jan:

—Tsajin yo xi cuicheya ngu rquí tsjian xatsë sehe cueyaco cojo ngu tsjian changá ta sá xi cuatjin sahmi me ne, tsjian xatsë jan ne, tsinguetsun me. Hacuaaha cumatanguaain ngu rquí tsjian xatsë cojo tsjian changá jan. <sup>37</sup> Hacuaaha tsajin yo xi cuincha xan xatsë cahntsua chuxin changá ta sá xi cuatjin sahmi ne, xan xatsë jan ne, tsitsinga rë chuxin jan. Hane cjuë cuixu xan, hacuaaha chuxin jan ne, cuetsun. <sup>38</sup> Xi meje rë ne, xan xatsë ne, xinha cahntsua chuxin xatsë. <sup>39</sup> Hacuaaha ngu xuta xi ha cahvi me xan changá ne, ha quihndë mijí cuihi me xan xatsë, tsëhë xi chja me ta xan changá ne, vëhë xi ndaja hyun. —Cuatjin xu cachja Jesús.

## 6

*Cavotoho xuta ladu rë Jesucristu trigu nixtin xi chjahájenda rë*

<sup>1</sup> Hacuaha cuitjin camá nga xu ngu nixtin xi chjahájenda rë. Hya xi tivatju xu Jesús cojo xuta ladu rë me hiscan tjin tjë trigu ne, cavotohosun xuta ladu rë me tsë tsë trigu jan, sehe catsufëtsja me, sehe cajnë me. <sup>2</sup> Sehe ngajan xi ngujo cha fariseo xi cojo cjui jan ne, cachjataha xu cha me cuitjin:

—¿Mé má cuatjin tisahmi xuta ladu nuju xá, handasa chja ley naja xi tsajin cahndë xi nihña xá nixtin xi chjahájenda rë? —Cuatjin xu cachja cha.

<sup>3</sup> Ngajan xi Jesús ne, cuitjin xu cafayangui me tsëhë cha:

—Ngayun ne, ha cachutayun xcusun xi casahmi xutachanga naja David hatsëë nixtin. Hya xi jercu camavojo rë me cojo xuta xi siu cojo me ne, <sup>4</sup> cavisehen me ndava Nina, hane cafaha me pan xi viyuju xcun Nina xi tsajin cahndë xi tu yo ni sinë ta suvá ni nahmi xi cuma sinë me. Peru me vëhë ne, cajnë me hacuaha casua me cajnë xuta xi siu cojo rë me.

<sup>5</sup> Hacuaha cachja sa Jesús cuitjin:

—Ngahan xi Quihndi rë Xuta Jain ngahan ne, ngahan xi vitëxa mé xi cuma nixtin xi chjahájenda rë. —Cuatjin xu cachja Jesús.

*Casahmi Jesucristu xi camandaja cha xi quixíhñu ngu tsja*

<sup>6</sup> Cuitjin camá nga xu ngu nixtin xi chjahájenda rë. Quiji Jesús yungun ne, cavicuya me. Hane tacun xu ngu cha cahntsua yungun jan xi quixíhñu tsja quixi cha. <sup>7</sup> Hane cha xi vicuya cjuachacun cojo cha fariseo xu ne, siu tifahachuva xu ni cha Jesús, ¿há sahmi me xi cumandaja xuta nixtin xi chjahájenda rë?, cojo sa xi cuma cuinchajyë cha me tsëhë xi sahmi me xá nixtin xi chjahájenda rë. <sup>8</sup> Peru Jesús ne, ha vëë me mé xi tsingataha cacun cha xi cuacun jan. Sehe cachja xu me cojo cha xi quixíhñu tsja jan cuitjin:

—Tisatjunhngun, hane tisechun nguehe cavasencja. —Cuatjin xu cachja Jesús.

Hane sehe cavisatjenhnga xu cha cavisekun cha. <sup>9</sup> Sehe ngajan xi cachja xu Jesús cojo cha xi cuacun jan cuitjin:

—Sahme nuju ngu cjuachjinenguise vihi: Nixtin xi chjahájenda rë ne, ¿mé xi sua cahndë ley xi nihña?, ¿há xi cjuandaja ne?, o ¿há xi cjuatsehen? ¿Há xi naxentjeen cjuahñu rë xingueen ne?, o ¿há xi nicjeen? —Cuatjin xu cachja Jesús.

<sup>10</sup> Xi cavutsejen Jesús xuta jingujyë ni tahndee rë me ne, sehe cachja xu me cojo cha xi hmu tsja jan cuitjin:

—Nixingun ntsun. —Cuatjin xu cachja me.

Hane cuatjin casahmi cha. Hane tsja cha ne, ha camandaja xu sacuatjin xi jyihí titjún. <sup>11</sup> Hya xi camá ne, cha xi cuacun

jan ne, jemu camacjan camaha xu ni rë cha, hisca cachja cha ngajñi rë cha cojo xicjin cha mé xi ndatjin sahmi xu cha cojo Jesús.

*Cavaxijin Jesucristu tejó me xi cuma apóstol*

<sup>12</sup> Hacuaha cuitjin camá nga xu ngu nixtin nixtin xi cuacun vë. Cavetju Jesús quiji xu me ngu ndetjún xi sahmi me oración, hane ngajan cavéjña me cuaha nixten sahmi me oración rë me cojo Nina. <sup>13</sup> Hane xi casahasen ne, cajindayavaha xu me xuta ladu rë me, hane ngajñi rë xuta xi cuacun vë ne, cavaxijinñi xu me tejó xihin. Hane me xi tejó vëhë ne, me vëhë xu xi cachja Jesús tsëhë me apóstol. <sup>14</sup> Me xi cuicun vi xi tejó me xi cavaxijin Jesús: Simón, me xi hacuaha casuañihi me me Pedru, cojo Andrés hntsë Simón, Jacobo cojo Juan, Felipe cojo Bartolomé, <sup>15</sup> Mateo cojo Tomás, Jacobo quihndi rë Alfeo cojo Simón, me xi tsëhë partidu zelota, <sup>16</sup> Judas xuta rë Jacobo cojo Judas Iscariote, me xi sahmi entregadu rë Jesús.

*Cafahacuenda Jesucristu jemu cjín xuta*

<sup>17</sup> Hane xi cavuya canduvajne xu Jesús tsëhë naxi jan cojo xuta ladu rë me jan ne, xi cafehe xu me ngu ngasun ne, ngajan caxinchacunhñu xu me cojo xuta jan. Hacuaha jercu cjín sa xuta ladu rë me xi siuya jan, siuya tangun cojo jemu cjín camaha xu ni xuta tsëhë nandya Jerusalén cojo tsëhë yëjë sa nación Israel, hisca cojo xu xuta xi nduva tsëhë nandya Tiro cojo Sidón, xi siu ladu tsëhë tjehen ndachacun. <sup>18</sup> Yahnga xu xuta xi cuacun vë ne, canduva me xi meje cuisñuju me cjua rë Jesús, hacuaha yahnga nga me ne, canduva me xi meje rë me xi cumandaja me tsëhë chíhin xi yaha rë me. Hacuaha me xi jemu tivatju cjuañihi xi hincha xitsehen cahntsua xahasen rë me ne, hacuaha camandaja xu me. <sup>19</sup> Yëjë ni xutacjín jan ne, cavanguise me chuva rë xi satëtsja me Jesús ta, tsëhë xi Jesús ne, jemu tjin rë me ngahñu rë Nina, hane ngahñu vëhë tisahmi xi mandaja xu yëjë xuta hmu rë.

*Xuta xi ndaja tsëhë cojo xuta xi chojyihí tsëhë*

<sup>20</sup> Ngajan xi ngaxtun vëhë xu ne, cavutsejen Jesús xuta ladu rë me, sehe cachja xu me cojo cuitjin:

—Jemu ndaja tsujun ngayun xi yumu matsejen ta, tsëhë xi ngayun matsejen ne, satë nuju gobiernu xi sahmi Nina.

<sup>21</sup> Jemu ndaja tsujun ngayun xi vojo nuju quihndë matsejen ta, tsëhë xi cuechú nixtin xi jemu chuya rë xahasen nuju.

Jemu ndaja tsujun ngayun xi tichjihndun quihndë matsejen ta, tsëhë xi cuechú nixtin xi cuéjnu.

<sup>22</sup> Hacuaha jemu ndaja tsujun ngayun hya xi choho scuëë nuju xuta, o hya xi cuaxëxin nuju me tsëhë ngajñi rë me, o hya xi choho cuichja me cojo nuju, o hya xi tsitjungui nuju

me, ngatsë rë xi tjin tangun cjuatacun nuju cojo ná ngahan xi Quihndi rë Xuta Jain ngahan. <sup>23</sup> Hisca chijhngun xi ndama nuju xi cuatjin tivatjun tijima nixtin hya matsejen ta, tsëhë xi jemu jyë ngu cjuandaja xi tacunya nuju ngajan ngahnga. Jemu ndaja tsujun matsejen ta, tsëhë xi cuanitjin ni choho casahmi xutachanga naja cojo profeta hatsëë nixtin, hane jemu cachuya rë Nina tsëhë profeta xi cuacun vë.

<sup>24</sup> 'Peru jemu chojyih tsujun ngayun xi nchina ngayun matsejen ta, tsëhë xi ha casacu nuju cjuetacun xi cuma nuju.

<sup>25</sup> 'Jemu chojyih tsujun ngayun xi ha jemu chuya rë xahasen nuju quihndë matsejen ta, tsëhë xi cuechú nixtin xi cuma vojo nuju.

'Jemu chojyih tsujun ngayun xi tivéjnu quihndë matsejen ta, tsëhë xi cuechú nixtin xi jercu chjihndun xi cuma va rë xahasen nuju.

<sup>26</sup> 'Hacuaha jemu chojyih tsujun ngayun hya xi ndaja cuichja yëjë xuta tsujun matsejen ta, tsëhë xi cuanitjin ni ndaja casahmi xutachanga naja cojo profeta ndacha hatsëë nixtin, hane profeta ndacha xi cuacun vë ne, cachuyiin rë Nina tsëhë me.

*Meje rë xi nihmu tacun condra naja*

<sup>27</sup> 'Peru ngayun xi tinuhyun xi chjá matsejen ne, cuichjá cojo nuju cuitjin: Nihmutacún xuta xi má condra nuju, ndaja nihñu cojo xuta xi choho vëë nuju me, <sup>28</sup> chjahyun rë Nina cjuandaja xi cuma rë xuta xi fehya rë me Nina cjuahngatacun xi cuatjun cuma. Ngajñi rë oración nuju matsejen ne, chjahyun rë Nina cjuandaja xi cuma rë xuta xi vangui nuju me si. <sup>29</sup> Yo xi vajaya ngu ladu tsa nuju matsejen ne, nicuyun sa ngu ladu catajaya. Yo xi fahatahá chingá nuju matsejen ne, xicanichuun rë hisca chingá ngahma nuju. <sup>30</sup> Yëjë ni xuta xi fehya nuju me mé xi fehya nuju me matsejen ne, tuhun rë me. Yo xi fahatahá mé xi fahatahá tsuhun matsejen ne, xicanujuun xi tsicuya nga me. <sup>31</sup> Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rë me.

<sup>32</sup> 'Tsajin yo sua nacuechji nuju tsëhë xi hmutacún xuta xi hmucacun nuju me matsejen ta, tsëhë xi hacuaha hisca xuta tsehen matsejen ne, hmucacun me xuta xi hmucacun rë me. <sup>33</sup> Hacuaha tsajin yo sua nacuechji nuju tsëhë xi ndaja nihñu cojo xuta xi ndaja sahmi me cojo nuju matsejen ta, tsëhë xi hacuaha hisca xuta tsehen matsejen ne, hacuanitjin ni sahmi me. <sup>34</sup> Hacuaha tsajin yo sua nacuechji nuju tsëhë xi tuhun vuxetaha xuta xi vetuhun tacún xi ngascan matsejen ne, sua me nuxetuhun matsejen ta, tsëhë xi hacuaha hisca xuta tsehen matsejen ne, sua me vuxetaha xicjin me, cojo sa

xi cuya cjuahatsja nga me chuva vëhë ni. <sup>35</sup> Cúya cuichjá nga cojo nuju, nihmutacún xuta xi má condra nuju. Ndaja nihñu, hacuaha tuhun tuxetaha rë, peru xicavetuun tacún xi cuya chjuhunntsun nga. Sá xi cuatjin nihñu matsejen ne, jemu jyë cjuandaja xi sua nuju Nina ngascan, hane cjuandaja xi nihñu ngayun matsejen ne, tangun cojo cjuandaja xi sahmi Nina matsejen ta, tsëhë xi me vëhë matsejen ne, hatuxa jemu ndaja me cojo xuta tsehen xi hisca nacuechji rë Nina suaain me. <sup>36</sup> Meje rë xi tjin nuju cjuayumatacun sacuatjin tjin rë Nina Nahmi naja cjuayumatacun.

*Mijí rë xi nichuvan jingu sa xuta cojo cjuatacun rë me*

<sup>37</sup> 'Hacuiin nichuvun jingu sa xuta cojo cjuatacun rë me, sehe hacuiin tsichuva Nina ngayun. Hacuiin ninguixun jyë rë jingu sa xuta, sehe hacuiin tsinguixi Nina jyë nuju. Ninchatuhun rë jingu sa xuta matsejen ne, sehe hacuaha tsinchataha nuju Nina. <sup>38</sup> Tuhun rë jingu sa xuta matsejen ne, sehe hacuaha sua nuju Nina. Sua nuju me chuva xi cjuaquixi, hisca tsuquihine me, hisca tsiniyaya me chuva rë, hacuaha hisca xotje rë chuva xi sua nuju me. Cuatjin nihñu matsejen ta, tsëhë xi chuva xi nichuvun matsejen ne, hacuaha chuva vëhë tsichuva Nina xi sua nuju me. —Cuatjin xu cachja Jesús cojo xuta ladu rë me.

<sup>39</sup> Hya xi camá ne, cachja sa xu me ngu ejemplu cuitjin:

—Ngu cha rcá matsejen ne, cumaji cjuecani cha ngu nga cha rcá matsejen ta, sá xi cuatjin matsejen ne, catsijo ni cha cuixuya cha xanga. <sup>40</sup> Ngu cha xi sehe tivutaya matsejen ne, hacuiin hitsë sa vengui chjí rë cha xi cuma rë maestru rë cha matsejen ta hya xi ha ndaja cavutaya cha yëjë ni matsejen ne, sehe ngajan xi cuechútáha cjuatacun rë cha sacuaha cjuatacun rë maestru rë cha.

<sup>41</sup> ¿Hacutjin má xi matsejen nuju xtë xi jiya tuxcun xingun, hane machayiin nuju tsëhë yasin xi jiya túxcun suvun ni? <sup>42</sup> ¿Hacutjin má xi cuma cuinújun cojo xingun xi meje naxun xtë xi jiya tuxcun me jinguyëjë rë xi suvun matsejen ne, matsijin nuju yasin xi jiya túxcun vë ni? Ngayun xuta ndacha, naxun titjun yasin xi jiya túxcun vë, sehe cumatsejenndaja nuju xtë xi jiya tuxcun xingun cojo sa xi cuma naxun.

*Tsejen mé xcusun xuta me ngatsë ni rë cjua xi chja me*

<sup>43</sup> 'Ha hyan matsejen ta tsajin hisca xi ngu yatjë xi ya ndaja xi sua tú xi ndajin, hacuaha tsajin hisca xi ngu ya xi ya machjiriin xi sua tú xi ndaja matsejen ta, <sup>44</sup> jima ngu ya ne, cuma tsejen sá xi ndaja o sá xi ndajin ngatsë rë tú xi sua. Hatuxa sacuiin naja tú xi hmí higo rcu ngu yanahyálatu, hacuaha sacuiin naja uva rcu ngu yanahyátindu. <sup>45</sup> Cuanitjin

ni rë xuta matsejen ta sacuaha xuta ndaja matsejen ne, tsëhë cjuandaja xi tetjo rë me cahntsua xahasen rë me cojo cahntsua cjuatacun rë me matsejen ne, tsëhë ngajan vetju cjuandaja. Peru xuta tsehen matsejen ne, tsëhë cjuatsehen xi tetjo rë me matsejen ne, tsëhë ngajan vetju cjuatsehen. Cuatjin matsejen ta, tsëhë xi yëjë ni xuta ne, cjua xi quitsë rë xahasen rë me cojo cjuatacun rë me matsejen ne, vëhë cjua xi vetju hntsua me.

### *Ejemplu tsëhë jo ndihya*

<sup>46</sup> Yasen ni nújun xi nai nuju ngahan, peru ¿mé má nihñuu sacuatjin xi chjá cojo nuju ni? <sup>47</sup> Yahnga ngayun xi nduvuntjengun ná hacuaha visiñuju cjua naha hacuaha nihñuu sacuatjin chjá cojo nuju matsejen ne, nguehe cuichjá cojo nuju yo xi tangun ngayun cojo: <sup>48</sup> tangun ngayun cojo ngu cha xi hya xi casahmi cha ngu ndihya matsejen ne, ndaja nungun cafangui cha, sehe ngajan cavejña cha xihndënaña rë hisca xcun ndyojohñu. Hane hya xi camajyë ndajyë hacuaha casesuntë nandá matsejen ne, jercu hñu catsivaha rë ndihya jan, peru hisca catsiniyaain rë, tsëhë xi jemu ndatjin casecun. <sup>49</sup> Peru yahnga nga ngayun xi visiñuju cjua naha peru nihñuu sacuatjin xi chjá matsejen ne, tangun ngayun cojo ngu cha xi casahmi ngu ndihya suvá xcun nangui ni, xi tsajin xihndënaña rë. Hane hya xi camá ne, xi camajyë ndajyë matsejen ne, catsivaha rë ndihya jan, hane ngutjen ni caticja. Hane cavetsun camahani ndihya vëhë. Cuatjin xu cajnetaha cavicuya Jesús.

## 7

*Casahmi Jesucristu xi camandaja hndixahan rë capitán xi vitexa me ngu cientu sindadu*

<sup>1</sup> Xi cajnetaha xu cachja Jesús yëjë ni cjua xi meje cuichja me cojo xuta ne, sehe cavuya quiji nga me nandya Capernaum. <sup>2</sup> Hane nandya jan ne, ngajan xu tacun ngu capitán xi tjin rë me ngu hndixahan xi cavatsë me xi jiñahmú, ha ña meje cueya camaha xu ni. Capitán jan ne, jemu hmucacun xu me hndixahan jan. <sup>3</sup> Hane xi camachaya xu rë capitán jan xi tacun Jesús ne, catsingatju xu me ngujo xuta changá rë xuta tjë rë Israel xi quiji cachja me cojo Jesús xi cjue sahmi me xi cumandaja hndixahan rë capitán jan. <sup>4</sup> Hane xi cafehe xuta changá jan hiscan tacun Jesús ne, nguñaja camahani cacun me cafehya me xi cjue xu Jesús. Cachja me cuitjin:

—Nihñu favor ne, tiseacun rë capitán hitsë ta, tsëhë xi jemu ndaja me. <sup>5</sup> Handasa hisca hacuiin tjë rë xutachanga naja me ne, peru jemu hmucacun me ngayaan xuta tjë rë Israel,



hacuaha casahmi me yungun niji cojo ngahñu rë suva me. —Cuatjin xu cachja xuta changá jan.

<sup>6</sup> Hya xi camá ne, quiji xu Jesús cojo rë me. Hane xi ha jima tiñataha me ne, sehe catsingatju xu capitán ngujo xuta ndaja rë me xi quijitjengui me Jesús. Hane xi cavechútáha xu me Jesús ngajan ndiya ne, cuitjin cachja me sacuatjin cachja capitán cojo rë me xi cuichja me cojo Jesús:

—Tatá. Xicatuhunndyuun yojo nuju. Ngahan ne, vechiin chuva rë xi ngayun cuinduvun ndya naha ta, tsëhë xi ngayun xi jemu jyë hnga ngayun cojo cjuatacun nuju. <sup>7</sup> Vëhë xi hacuaha tsingátaha cáacun xi jemu chúva ngahan cojo cjuatacun naha xi cjuë cuichjá cojo nuju. Quihndë ne, ndastu nihñu favor ne, tinújun xi cumandaja hndixahan naha. <sup>8</sup> Ngahan ne, hvë xi cuma nihñu xcusun vëhë ta, ngahan ne, hacuaha tjin xuta xi matitjun tsahan, hane hacuaha tjin ná sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi. Hacuaha hya xi chjá cojo ngu nga xi cuinduva ne, nduva. Hane hndixahan naha ne, xi chjá cojo xi sahmi mé xi meje ná ne, sahmi. —Cuatjin xu cachja xuta ndaja rë capitán jan cjua rë capitán cojo Jesús.

<sup>9</sup> Hane xi cahndë xu Jesús cjua vëhë ne, jemu quijircun rë me tsëhë capitán jan. Hane xi cavuya me cavutsejen me xutacjín xi tjengui rë me jan ne, cachja xu me cuitjin:

—Cuichjá cojo nuju ta, ngajñi naja ngayejen ni ngayaan xuta tjë rë Israel ne, cjëë scuëë ngu xuta xi cuatjin ndaja mangucacun me cojo ná. —Cuatjin xu cachja Jesús.

<sup>10</sup> Hane xi cavuya xu me xi quiji tixa jan ne, cavëë me xi ha camandaja cha hndixahan jan.

### *Casahmi Jesucristu xi cavuya ngu nima cjuahñu*

<sup>11</sup> Xi cavatju vëhë ne, quiji nga xu Jesús ngu nandya xi hmí rë Naín. Cavisecoo xuta ladu rë me me quiji me, cojo jingu sa xutacjín xi cojo me quiji me. <sup>12</sup> Hane xi tijima tiña xu me tsëhë tingotjo hnhua tsëhë nandya jan ne, cjui seyaniji xu ngu nima, ngu nima xi quihndi ngu tsëhë naa rë. Hacuaha naa rë nima jan ne, cahan xu me. Jercu cjín camahani xuta nandya visecoo me chjuun jan cjui me. <sup>13</sup> Hane xi cavëë xu Nai naja chjuun jan ne, camayuma rë me me. Sehe cachja me cojo chjuun jan cuitjin:

—Ha quihndë xicachjihnduun. —Cuatjin xu cachja me.

<sup>14</sup> Hane xi quiji tiña xu Jesús hiscan xi cjui me cojo nima jan ne, sehe quiji cavetahatsja xu me nachan xi quisun nima jan. Hane xuta xi yahahnga rë nima jan ne, caxinchacunhñu me. Sehe ngajan xi Jesús ne, cachja xu me cuitjin:

—Quihndë ne, ngayun tsan ne, tsatjunhngun. —Cuatjin xu cachja me.

<sup>15</sup> Hane nima jan ne, cavisatjenhnga xu cha cavéjña cha. Sehe cavetsihin cachja cha. Sehe cachja Jesús cojo naa rë cha jan xi cjuahatsja nga me quihndi rë me. <sup>16</sup> Hya xi camá xu ne, yëjë ni xuta jan ne, jemu catsacjun me camá. Hacuaha casahmi jyë casahmi hnga me Nina, cuitjin xu cachja me:

—Cavetjújñi ngajñi naja ngu profeta xi jercu vengui chji rë me, hacuaha casahmi Nina cjuandaja rë me cojo naja ngayaan xuta rë me. —Cuatjin xu casahmi jyë casahmi hnga me Nina.

<sup>17</sup> Hya xi camá ne, cavitsojo xu cjua vëhë tsëhë Jesús jingujyë ni ladu vëhë cojo jingujyë ni nación Israel.

*Cavinenguise Juan Jesucristu, ¿há me vëhë xi catsingatju Nina me?*

<sup>18</sup> Cuitjin xu camá nixtin xi cuacun vë. Xuta ladu rë Juan ne, casua me camachaya rë me yëjë xcusun xi casahmi Jesús. Sehe ngajan xi Juan ne, cajindaya xu me jo xuta ladu rë me jan ne, <sup>19</sup> sehe catsingatju me me xi cjue cjuinenguise xu me Nai naja sá xi me vëhë xi chja xujun rë Nina xi tsingatju Nina me, o sá xi meje rë xi cuiyujuya rë xi cuinduva nga ngu. <sup>20</sup> Hane xi cafehe xuta xi catsingatju Juan jan hiscan quitahá Jesús ne, cachja xu me cuitjin:

—Juan Vitenda rë Xuta ne, catsingatju niji me xi nduvin vinenguisin nuju ¿há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin xu cavinenguise xuta xi catsingatju Juan jan.

<sup>21</sup> Hane ha hora vëhë ni ne, Jesús ne, casahmi me xi jemu cjín xu xuta camandaja me tsëhë tu mé ni xcusun chíhin xi má rë me. Hacuaha jemu cjín sa xuta xi cavaxëxin Jesús xitsehen xi hincha cahntsua xahasen rë. Hacuaha jemu cjín sa xu xuta rcá xi casahmi Jesús xi camá camatsejen rë me. <sup>22</sup> Hya xi camá ne, xi catsicuya me cjua cojo xuta ladu rë Juan ne, cuitjin xu cachja me:

—Tjangun ne, sehe tinújun cojo Juan yëjë xcusun xi cahyun cojo yëjë cjua xi canuhyun. Tinújun ta xuta rcá ne, camá camatsejen rë me; xuta rengun ne, camá quiindaja me; xuta xi yaha rë chíhin vitaha xi setaha yojo naja ne, camandaja me; xuta xi loho me ne, camá cahndë me; nima ne, cavuya nga cjuahñu; xuta yuma ne, casacu camachaya rë me cjuandajyihí rë Nina. <sup>23</sup> Hacuaha jemu ndaja tsëhë tu yo ni xuta xi hacuiin tsismicacun me xi mangu cacun me cojo ná. —Cuatjin xu cachja Jesús.

<sup>24</sup> Hane hya xi cavuya cafe xu xuta ladu rë Juan jan ne, sehe cachja Jesús cojo xutacjín jan cuitjin tsëhë Juan:

—Hya xi cavetjun catsangun ngajan ngu xín tsëhë nandya catsanguntjengun Juan matsejen ne, ¿há caningatuhuntacún

xi cuechuntuhun ngu xihin xi hacuiin ngu ni cjuatacun rë me?, sacuatjin rë ngu ndeje xi fi nguehe fi ngajan rcu sacuatjin cjuí tjo. <sup>25</sup> O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihí camahani? Hacuiin cuatjin. Ha hyan matsejen ta xuta xi jercu tu ndacun camahani tsjian vaja me hacuaha hatuxa jemu cjuasua siu me matsejen ne, sacuiin naja me ngajan ngu xín camaha ni tsëhë nandya matsejen ta hiscan xi sacu naja me ne, ndava ngu xuta nchina. <sup>26</sup> Peru ngayun matsejen ne, catsangun cachutsujun ngu profeta. Hacuaha cjuaquixi xi vëhë cachutsujun. Peru profeta Juan vë matsejen ne, hitsë sa vengui chji rë me xi cuma rë yëjë sa profeta xi yahnga. <sup>27</sup> Hacuaha me vëhë xi cachja Nina tsëhë me xcun xujun rë me cuitjin:

Ngahan ne, tsingátju titjun ngu cha

xi scuxaha cjuatacun rë xuta tsëhë xi cjuehé ngaye.

Cuatjin cachja Nina cojo Quihndi rë me. <sup>28</sup> Cuichjá cojo nuju matsejen ta ngajñi rë yëjë xuta xi catsin me tsëhë naa rë me matsejen ne, tsajin ngu xi hitsë sa vengui chji rë xi cuma rë Juan. Peru hya xi cuetsihin Nina sahmi me gobiernu nguehe ngasunhdë matsejen ne, xuta xi chuva cuengui chji rë me quihndë matsejen ne, hitsë sa cuengui chji rë me nixtin hya, xi cuma rë xi ha vengui chji rë Juan quihndë.

<sup>29</sup> Hane hya xi yëjë ni xuta hisca cojo cha xi faha tujúnsa cahndë me cjuá xi cachja Juan matsejen ne, catsingatihin me xi cuitenda Juan me. Hane chuva vëhë matsejen ne, catsingacun me xi macjain rë me xi Nina matsejen ne, yëjë xcusun xi sahmi me matsejen ne, hatuxa cjuaquixindaja jain.

<sup>30</sup> Peru jemu cjin cha fariseo cojo cha vicuya cjuachacun matsejen ne, catsingatiin cha xi cuitenda Juan cha. Hane chuva vëhë matsejen ne, catsitjungui cha xcusun xi meje sahmi Nina xi cuma tsëhë cha.

<sup>31</sup> 'Ngayun xuta tjë rë Israel tsëhë nixtin vihi matsejen ne, ¿mé xi tangun ngayun cojo? <sup>32</sup> Tangun ngayun cojo langa xi siu ngajan ndetsin, xi jindaya xicjin cojo cjuá vihi: "Canijani tsujun ne, mijí xtun; casin va ne, mijí chjihndun." Cuatjin jindaya langa. <sup>33</sup> Cuatjin chjá cojo nuju matsejen ta, Juan xi vitenda nuju ngayun matsejen ne, jinii me niñu hacuaha hviin me xan, hane ngayun nújun ta jiya xitsehen xahasen rë me. <sup>34</sup> Hane ngahan xi Quihndi rë Xuta Jain matsejen ne, jínë hacuaha hvë, hane nújun xi ngahan matsejen ne, ngu cha cahntsuaníñu ngahan, ngu cha cahntsuxan ngahan, hacuaha ngu cha amigu rë cha xi faha tujúnsa cojo jingu sa xuta tsehen ngahan. <sup>35</sup> Peru xuta xi fitjengui me cjuatacun rë Nina matsejen ne, xuta xi cuacun vëhë xi tsingacun naja

me xi cjuatacun vëhë matsejen ne, ndaja jain. —Cuatjin xu catsinguijnetaha Jesús cjua rë me cojo xuta.

*Catsinchataha Jesucristu ngu chjuun tsehen*

<sup>36</sup> Ngu nixtin nga jan ne, cuitjin xu camá. Ngu cha fariseo ne, cachja xu cha cojo Jesús xi cjue sinë me cojo cha niñu ndava cha. Hane xi cavisehen me ndava cha fariseo jan ne, sehe quiji cafaha xu me cahndë rë me xcun maxë xi sinë me niñu. <sup>37</sup> Ngajan xi ngu chjuun tsehen tsëhë nandya vëhë ne, camachaya xu rë na xi Jesús ne, tacun me ndava ngu cha fariseo tijinë me niñu cojo cha ne, yaha xu na ngu frascu xi ndyojo camá, hinchu ngu xcusun aceite ndaja xi jercu hnga chji rë. <sup>38</sup> Quiji xu na secun na táha ntsacu me, jihnda na. Hane cojo ndatuxcun na ne, cavetsihin catsicahnchi xu na ntsacu me. Hane cojo tsjarcu na ne, cavujnu na, sehe cavitatsuha na. Hya xi camá xu ne, sehe cavitejnu na aceite. <sup>39</sup> Peru xi cavëë xu cha fariseo xi quijicojo rë me jan xi cuatjin casahmi na ne, catsingataha cacun cha cuitjin: “Cha xi cuijyih vihi ne, sá xi profeta jain cha ne, ha vëë cha mé xcusun chjuun na xi cuatjin satëtsja rë cha ta, tsëhë xi na vëhë ne, ngu chjuun tsehen na.” Cuatjin catsingataha cacun xu cha. <sup>40</sup> Sehe ngajan xi Jesús ne, catsicuya xu me cjua tsëhë cjuatacun xi catsingataha cacun cha fariseo jan, cuitjin xu cachja me:

—Simón, tjin ná ngujo cjua xi cuichjá cojo nuju. —Cuatjin xu cachja me.

Ngajan xi cha Simón jan ne, cuitjin xu cafayangui cha tsëhë me:

—Maestro, tinújun. —Cuatjin xu cachja cha.

<sup>41</sup> Hya xi camá xu ne, cachja Jesús cuitjin cojo cha ngu ejemplu:

—Cuejña ne xi jo cha jan ne, quitjen cha tujún tsëhë ngu cha nchina. Ngu cha ne, quitjen cha tujún tsëhë hñu cientu nixtin xi sahmi ngu mosu xá. Hane ngu nga cha ne, quitjen cha tujún tsëhë yachan të nixtin. <sup>42</sup> Hane xi tsajin rë cha xi cuacun vë tujún xi sahmingojo cha ne, cha nchina jan ne, catsinchataha cha catsijo cha. ¿Jarë cha xi cuicun vi xi hitsë sa tsihmu cacun cha cha nchina jan, xi má nuju? —Cuatjin xu cachja me.

<sup>43</sup> Sehe ngajan xi cafayangui xu cha Simón cuitjin:

—Xi má ná ne, cha xi hitsë sa cjín quitjen. —Cuatjin xu cachja cha Simón.

Sehe ngajan xi cachja xu Jesús cojo cha cuitjin:

—Jemu ndaja canichuvun cjua xi canújun. —Cuatjin xu cachja Jesús.

<sup>44</sup> Hane xi cavuya xu me cavutsejen me chjuun jan ne, sehe cachja nga me cojo cha Simón cuitjin:

—Chutsujun hacutjin casahmi chjuun vihi cojo ná. Ngayun ne, hora xi cavísehen ndya nuju ne, catuun nandá xi cjuengui ntsacú. Peru chjuun vihi ne, cojo ndatuxcun na catsicahnchi na ntsacú, hane cojo tsjarcu na ne, cavujnu na. <sup>45</sup> Hacuaha ngayun ne, cavitatsuun ná. Peru na vihi ne, hisca hora xi cavísehen ne, cjëë cuejñaxin na xi vitatsuha na ntsacú. <sup>46</sup> Ngayun ne, cavitejnuu aceite rcú. Peru chjuun vihi ne, cavitejnu na aceite ntsacú, aceite xi jemu ndaja jne camahani. <sup>47</sup> Vëhë xi cuichjá cojo nuju ta tsejen xi ha camanchataha na tsëhë jyë cjín xi tjin rë na ta, tsëhë xi jemu tjin rë na cjuahmutacun. Peru yo xi manchataha tsëhé hitsë jyë xi tjin rë ne, hacuaha chúva cjuahmutacun tjin rë. —Cuatjin xu cachja Jesús.

<sup>48</sup> Ngajan xi cachja xu Jesús cojo chjuun jan cuitjin:

—Jyë nuju ne, ha camanchataha. —Cuatjin xu cachja me.

<sup>49</sup> Hane xuta xi tijinë xu cojo rë me jan ne, cavetsihin cavinenguise me ngajñi rë me cojo xicjin me cuitjin:

—¿Yo rë cha xi cuijyihi vi xi hisca jyë rë xuta tsinchataha cha? —Cuatjin xu cachja me.

<sup>50</sup> Peru Jesús ne, cachja nga xu me cojo rë chjuun jan cuitjin:

—Ngayun ne, ha cavetjuntjun ta, tsëhë xi camangutacún cojo ná. Cuma cuangun cojo cjuasua. —Cuatjin xu cachja me.

## 8

### *Yachjin xi cafahacuenda rë Jesucristu*

<sup>1</sup> Cuitjin camá nga xu ngu nixtin. Jesús ne, titsujyihya xu me jemu cjín nandya cojo ranchun tisua me tijimachaya rë xuta cjuandajyihi xi chja tsëhë gobiernu xi sahmi Nina. Hacuaha cojo tejó xuta ladu rë me jan cavisecoo xu rë me.

<sup>2</sup> Hacuaha cojo sa ngujo yachjin xi cavetju xitsehen xi hinchaxahasen rë me hacuaha camandaja me tsëhë chíhin xi má rë me ne, cojo xu me quiji me. María, na xi hacuaha hmí rë na Mágdala, ngu chjuun xi cavetju yatu xitsehen xahasen rë, <sup>3</sup> cojo Juana, chjuun rë Chuza, ngu cha xi sahmixa ndava Herodes, me xi cavitexa ngajan distritu Galilea, cojo Susana cojo jemu cjín sa yachjin xi hacjahi. Yëjë ni yachjin xi cuacun vë ne, cojo xcusun xi tjin rë suvá me ne, cafahacuenda xu me Jesús cojo yëjë ni xuta xi ticojo me.

### *Ejemplu tsëhë cha xi catsitjë trigu*

<sup>4</sup> Cuitjin camá xu ngu ndiya nga. Hya xi jemu cjín xuta camatangun me xi canduva nguehe canduva ngajan me jingu sa nandya xi nduva tjengui xu me Jesús ne, cachja Jesús cojo xuta jan ngu ejemplu vihi:

<sup>5</sup> —Cuejñaa ne xi ngu cha xi tsitjë trigu matsejen ne, cavetju cha quiji cha xi tsitjë cha trigu. Hane jinguyëjë rë xi titsitjë cha

matsejen ne, ngujo matsejen ne, cavixu ndiya, hane canune rë. Hane xi canduva chu nisë matsejen ne, catsicjë chu cajinë chu. <sup>6</sup> Hane ngujo nga matsejen ne, cavixu hiscan xi jemu naxindya. Hane xi cavetsihin tijima yehe ne, caxintsen matsejen ta, tsëhë xi tsajin mé xcuen rë. <sup>7</sup> Hane ngujo nga matsejen ne, cavixu ngajñi nahyá. Hane xi camachatangun matsejen ne, nahyá jan matsejen ne, vëhë casahmi hndë rë catsixi rë. <sup>8</sup> Hane xi yahnga nga matsejen ne, cavixu hiscan nihndë ndaja. Hane xi camayehe matsejen ne, casua tutjë rë, ngu cientu sa cuatjin sacuatjin xi camatjë.

Xi cafë cachja me cjua vëhë ne, sehe jercu hñu xu cachja me cuitjin:

—Yo ngayun xi tjin nuju cjuasua xi cuinuhyun cjua naha ne, ndaja tinuhyun. —Cuatjin xu cachja me.

### *Mé má ejemplu cachja Jesucristu cojo xuta*

<sup>9</sup> Ngajan xi xuta ladu rë me jan ne, cavinenguise xu me mé meje cuichja ejemplu xi cachja Jesús jan. <sup>10</sup> Hane Jesús ne, cachja xu me cuitjin:

—Nina ne, casua me cahndë xi ngayun ne, cuijne rcun cjuatacun tsëhë gobiernu xi sahmi Nina, cjuatacun xi titjún ne, tsajin yo machaya rë. Peru yëjë sa me xi yahnga ne, tichjá cojo rë me cojo suvá ejemplu, cojo sa xi handasa cuihndë me cjua naha ne, peru cuijni rcu me.

### *Cachja Jesús mé vijne ejemplu tsëhë cha xi catsitjë trigu*

<sup>11</sup> Quihndë ne, nguehe cuichjá cojo nuju mé meje cuichja ejemplu vëhë. Trigu xi tsitjë ngu cha jan ne, vëhë xi sacuaha cjua rë Nina. <sup>12</sup> Hane hya xi vixu ngujo trigu ndiya ne, hacui sacuaha hya xi visiñuju xuta cjua rë Nina. Sehe vinduva Satanás ne, fahatahá cjua rë Nina tsëhë xahasen rë me, cojo sa xi cuetjintjin me ngatsë rë xi cumacjain rë me. <sup>13</sup> Hane hya xi vixu ngujo trigu hiscan xi jemu naxindya ne, hacui sacuaha hya xi vihndë xuta cjua rë Nina, hane fahatsja me cojo cjuasua. Peru trigu xi cuacun vë ne, jemu chúva tyjama rë vetju. Hacuanitjin ni vatju ngujo xuta má. Macjain rë me ngujo nixtin ni, peru hya xi vechú ngunixtin xi chjaháchuva rë me ne, fi ngaxtun me. <sup>14</sup> Hane hya xi vixu ngujo trigu ngajñi nahyá ne, hacui sacuaha hya xi vihndë xuta cjua rë Nina, peru ha xcun xi ha cjuinduju me cojo nixtin rë me ne, tsingataha cacun me tsëhë cjuacjintacun tsëhë cahntsua ndava me, tsingataha cacun me tsëhë cjuanchina, hacuaha tsingataha cacun me tsëhë cjuasua xi tjin ngasunhndë, hane vëhë suaain cahndë xi cumajyë cjua rë Nina cahntsua xahasen rë me, hacuaha sahmi me ngu cjuandaja xi tsingacun xi xuta rë Nina me. <sup>15</sup> Hane hya xi vixu yahnga trigu hiscan

nihndë ndaja ne, hacuaha hacui sacuaha hya xi vihndë xuta cjuã rë Nina cojo ngu xahasen ndaja, ngu xahasen tyjahi, hacuaha tsismicacuaain me. Hane cuatjin cojo jeya ne, caa rë me sahmi me cjuandaja.

*Ejemplu tsëhë ngu ndihi*

<sup>16</sup> 'Hacuaha tsajin hisca xi ngu xuta xi ha xcun xi ha cavetaha rë me ngu ndihi ne, sehe faha me veyahma me ngahma rë ngu tyucu o sá xi faha me vejña me ngahma nachan ta, hatuxa faha me vejña me cahndë rë, cojo sa xi yëjë xuta xi visehen me hiscan setí ndihi jan ne, scuëë me hasen rë. <sup>17</sup> Hacuanitjin ni chuva vëhë, yëjë cjuã rë Nina xi tivicyuá nuju suvun ni ngayun xuta ladu naha ne, handasa hinchahma yëjë cjuã vëhë quihndë ne, peru cuechú nixtin xi cuetjucaa tsejen, hacuaha cuicuyun rë yëjë xuta.

<sup>18</sup> Vëhë xi meje rë xi nihñu ngahñu xi ndaja cuisñuju cjuã rë Nina ta, tsëhë xi tu yo ni xi tjin rë cjuã vëhë ne, Nina ne, sua sa rë me. Hane tu yo ni xi tsajin rë cjuã vëhë ne, hitsë cjuã vëhë xi má rë xi tjin rë ne, chjahátahá rë. —Cuatjin xu cavicuya Jesús xuta ladu rë me.

*Naa rë Jesucristu cojo xicjin me*

<sup>19</sup> Ngajan xi naa rë Jesús cojo xicjin me ne, cafehetjengui xu me Jesús. Hane maji vechúta hacjin rë me ta, tsëhë xi jercu quitsë camaha xu ni xuta. <sup>20</sup> Hane tjin xu yo casua camachaya rë Jesús cuitjin:

—Naa nuju cojo nixti xingun ne, hinchacun me ngajan candatsen, xi nduvatjengui nuju me. —Cuatjin xu casacu camachaya rë me.

<sup>21</sup> Peru Jesús ne, cuitjin xu cafayangui me:

—Xuta xi vihndë me cjuã rë Nina hacuaha sahmi me sacuatjin chja cjuã vëhë ne, hacuaha tangun ni hmú cáacun me sacuatjin hmú cáacun naa naha cojo xingueen. —Cuatjin xu cafayangui me.

*Cavatëcja Jesucristu ngahñu rë tjo cojo cjuasca rë nandá*

<sup>22</sup> Cuitjin camá nga xu ngu nixtin jan. Cavisehen Jesús cahntsua ngu barcu cojo xuta ladu rë me, sehe cachja xu me cojo xuta jan cuitjin:

—Cuanguen ngunda vëhë. —Cuatjin xu cachja me.

Sehe quiji me. <sup>23</sup> Hane ngajñi cjuí xu barcu cojo rë me ne, Jesús ne, cafañafë xu me. Hya xi camá ne, canduva ngu tjo hñu xi jercu tu cjuachan camahani vanga xcun laguna jan. Hane barcu jan ne, jercu tivisehen xu nandá cahntsua, hane me xi cuacun jan ne, jemu tsavi camahani xi cuma rë me. <sup>24</sup> Hane xi quiji tiña xu me hiscan jiñafë Jesús ne, sehe catsingasca me me, cuitjin xu cachja me:

—¡Tatá, tatá! ¡Nguehe tifë ngayaan! —Cuatjin xu cachja xuta ladu rë Jesús jan.

Hane xi cavasca xu rë Jesús ne, cavatëcja me ngahñu rë tjo jan cojo cjuasca rë nandá jan. Sehe casejyu tjo casejyu nandá, jemu ndaja cavéjñajyuu jingujyë ni. <sup>25</sup> Sehe ngajan xi Jesús ne, cuitjin xu cachja me cojo xuta ladu rë me jan:

—¿Há manguaaintacún cojo ná ni? —Cuatjin xu cachja me.

Hane xi catsacjun xuta jan camá ne, jemu quijircun rë me. Sehe cachja xu me ngajñi rë me cojo xicjin me cuitjin:

—¡Mé xcusun xuta me vi xi hisca tjo hisca nandá vitexa me, hacuaha vihndë tséhë me ni! —Cuatjin xu cachja xuta ladu rë me jan.

*Cha Gadarena xi hincha xitsehen xahasen rë*

<sup>26</sup> Hya xi camá xu ne, cafehe me nandya Gadara, ngu nandya xi tacun ngunda vëhë tséhë laguna Galilea. <sup>27</sup> Hane xi cafehe xu Jesús nangui quixí cojo xuta ladu rë me ne, cavechútáha me ngu cha tséhë nandya vëhë xi hincha xitsehen xahasen rë cha. Cha vëhë ne, ha jemu tsëë xu xi vajin cha tsjian, hacuaha hacuiin cahntsua ndihya véjña cha ta ngajan tahndë véjña cha. <sup>28</sup> Xi cavëë xu cha Jesús ne, jercu cajindaya cha quiji caticjaxcun cha xcun me, hacuaha jercu hñu cachja cha cuitjin:

—¿Mé má cuatjin ninguisuhunjñu cojo ná ngayun Jesús, Quihndi rë Nina xi hatuxa jyë hnga cojo Hasen rë? Nihñu favor ne, xicatuun ná cjuañihi. —Cuatjin xu cachja cha.

<sup>29</sup> Cuatjin cachja cha ta, tséhë xi Jesús ne, ha cavitexa me xitsehen xi cuetjuxin tséhë cha. Ha jemu tsëë xu nduva nixtin xi visehen xitsehen xahasen rë cha. Hane xuta ne, tsihñu tsja tsihñu ntsacu me cha cojo cadena cojo sa xi ha quihndë cuetjiin cha cjue cha. Peru xi vicheya cha cadena ne, xitsehen ne, ficojo cjuachan rë cha ngajan ngu xín camahani tséhë nandya. Jemu cjín ndiya xu xi cavatju cha camá cuatjin.

<sup>30</sup> Ngajan xi Jesús ne, cuitjin xu cavinenguise me cha:

—¿Hacutjin hmí nuju? —Cuatjin xu cachja me.

Hane cha vëhë ne, cuitjin cafayangui cha:

—Sindadu Cjín. —Cuatjin xu cachja cha.

Cuatjin cachja cha ta, tséhë xi jemu cjín xitsehen cavisehen xahasen rë cha. <sup>31</sup> Hane ngajan xi xitsehen xi cuacun jan ne, jemu cafehya xu favor cojo Jesús xi hacuiin cuitexa me xi cjue ngajan nduchin. <sup>32</sup> Hane tiña ngajan ne, jemu cjín xu chinga hinchataha chu tijinë chu ngajan ngu ndetjún. Hane xitsehen jan ne, cafehya cojo Jesús xi sua me cahndë xi cuisehen xitsehen jan xahasen rë chinga. Hane casua xu me cahndë. <sup>33</sup> Hane xi cavetju xu xitsehen jan tséhë xahasen rë cha vëhë ne, quiji cavisehen xahasen rë chinga. Hya xi



camá xu ne, chinga jan ne, cavanga chu quijijne chu tsëhë rcu ndetjún, hane ngajan cavixuya xu chu ngajñi nandá tsëhë laguna, hane ngajan camiji rë chu nandá ne, ngajan café xu chu.

<sup>34</sup> Ngajan xi xi cavëë xu cha xi sahmi cuidadu rë chu chinga jan xcusun xi camá ne, cavanga cha quiji casua cha camachaya rë nandya cojo ranchun xcusun vëhë. <sup>35</sup> Hya xi camá ne, xuta jan ne, cavetju xu me quiji cavutsejen me xcusun xi camá jan. Hane xi cavechútáha me Jesús ne, hacuaha cavëë me cha xi cavetju xitsehen xahasen rë jan, yaja xu cha ngu tsjian, hacuaha ha cavéjña chihin cjuatacun rë cha, tacun cha tiña ntsacu Jesús. Hane xuta jan ne, jemu catsacjun me camá. <sup>36</sup> Hane xuta xi cavëë xu xcusun xi camá jan ne, casuacuenda me cojo xuta xi yahnga jan hacutjin camá xi camandaja cha xi caxincha xitsehen xahasen rë jan. <sup>37</sup> Hya xi camá ne, yëjë xuta tsëhë ladu tsëhë nandya Gadara ne, cafehya xu me cojo Jesús xi cuetjuxin Jesús tsëhë xuta xi cuacun jan ta, tsëhë xi jemu catsacjun camaha ni yëjë me camá. Hane ngajan xi Jesús cojo xuta ladu rë me ne, cavisehen xu me barcu sehe cavuya nga me ngunda vihi. <sup>38</sup> Hane chaja sa xi cjue Jesús ne, cha xi cavetju xitsehen xahasen rë jan ne, cafehya cha cojo rë me xi cjue cha cojo rë me. Peru Jesús ne, catsinguijnetaha xu me cjua cojo rë cha, cachja me cuitjin:

<sup>39</sup> —Tuyun tjangun ndya nuju ne, hacuaha tinújun cojo xuta tsëhë cjuandaja xi cuacun casahmi Nina cojo nuju. —Cuatjin xu cachja Jesús.

Ngajan xi xi cavuya cafehe xu cha nandya ne, sehe cavet-sihin catsujyihya casuacuenda cha xuta jingujyë ni ngajñi nandya yëjë ni cjuandaja xi cuacun casahmi Jesús cojo cha.

*Catsicuya Jesucristu cjuahñu rë quihndi rë Jairo hacuaha camandaja na xi casatëtsja tsjian rë Jesucristu*

<sup>40</sup> Hya xi cavuya Jesús ngunda vihi ne, yëjë ni xutacjín jan ne, jemu ndaja cafahtsja xu me Jesús ta, tsëhë xi hatuxa siuya me me. <sup>41</sup> Hane hora vëhë ne, canduva xu ngu me xi hmí rë Jairo, me xi má xutaxa rë yungun. Hane quiji caticjxcun xu me xcun Jesús. Hane cafehya me favor cojo Jesús xi cjue Jesús ndava me ta, <sup>42</sup> tsëhë xi me vëhë ne, tjin xu rë me ngu na lihndi xi quihndi ngu tsëhë me. Hane na lihndi vë ne, sacuaha tejó na nu. Hane meje cueya xu na.

Ngajan xi Jesús ne, quiji xu me. Hane ngajñi cjui me ne, jemu tivehnchun xu xuta me. <sup>43</sup> Hane ngu na jan ne, tjin rë tejó nu xi yaha rë na chíhin xahmajni. Hane café tujún rë na cavechji na xcun doctor. Peru tsajin xu yo camá cafahtsja chíhin xi má rë na. <sup>44</sup> Hane xi quiji tiña na táha ngaxtun Jesús

ne, quiji na casatëtsja na ntsacu tsjian rë me. Hya xi camá xu ne, ha tu ñahñu cavasen xi vanga rë na jni. <sup>45</sup> Ngajan xi Jesús ne, cachja xu me cuitjin:

—¿Yo xi casatëtsja ná? —Cuatjin xu cachja me.

Hane xi cachja yëjë xuta xi hacuiin me casatëtsja me ne, sehe cachja xu Pedru cuitjin:

—Tatá, xutacjin ne, tivehnhun nuju me, hacuaha hisca titsivaha nuju me. —Cuatjin xu cachja Pedru.

<sup>46</sup> Peru Jesús ne, cachja nga xu me cuitjin:

—Peru tjin yo xi casatëtsja ná ta ngahan ne, camachaya ná xi cavetju ná hitsë ngahñu. —Cuatjin xu cachja Jesús.

<sup>47</sup> Hane xi vutsejen na xi cumaji seyahma na ngajñi rë xuta ne, ña fatsë xu na quiji caticjaxcun na xcun Jesús. Sehe catsinguixi na xcun yëjë ni xuta mé má cuatjin quiji na casatëtsja na Jesús, cojo tsëhë xi ngutjen ni camandaja na.

<sup>48</sup> Sehe ngajan xi Jesús ne, cuitjin cachja xu me cojo rë na:

—Ngayun tsan ne, camandaja ngayun ta, tsëhë xi camangutacún cojo ná. Cuma cuangun cojo cjuasua. —Cuatjin xu cachja Jesús.

<sup>49</sup> Tu tichja cuaha xu Jesús cojo na xi camandaja jan ne, cafehe nga ngu me xi canduva me tsëhë ndava xutaxa rë yungun jan, hane cuitjin xu cachja me cojo xutaxa rë jan:

—Quihndi nuju ne, ha cahme na. Ha quihndë xicatuhundyuun rë maestru. —Cuatjin xu cachja me.

<sup>50</sup> Hane hya xi cahndë Jesús cjua vëhë ne, sehe cachja xu me cojo xutaxa rë jan cuitjin:

—Xicarcuun. Catamangutacún ni cojo ná ne, quihndi nuju ne, cumandaja na. —Cuatjin xu cachja me.

<sup>51</sup> Hya xi camá xu ne, xi cafehe Jesús ndava xutaxa rë yungun jan ne, casuaain me cahndë xi cojo jingu sa xuta cuisehen me. Suvá ni Jesús cojo Pedru cojo Juan cojo Jacobo cojo naa cojo nahmi rë nima lihndi jan cuisehen me cahntsua ndihya. <sup>52</sup> Hane yëjë ni xuta ne, hisca chja hisca jihnda xu me tsëhë nima jan. Ngajan xi Jesús ne, cuitjin xu cachja me cojo xuta jan:

—Ha quihndë xicachjihnduun. Na lihndi vë ne, hacuiin cahme na ta jiñafë na. —Cuatjin xu cachja me.

<sup>53</sup> Peru xuta jan ne, tu cavejnuçëë xu me Jesús ta, tsëhë xi vëndaja me xi cahme jain nima. <sup>54</sup> Hane xi cavisehen Jesús hiscan jiña nima lihndi jan ne, sehe quiji me cafaha me tsja, sehe ndaja hñu cachja xu me cuitjin:

—¡Tisatjinhngue, tsan! —Cuatjin xu cachja me.

<sup>55</sup> Hya xi camá xu ne, cavuya hasen rë nima, sehe ngutjen ni cavisatjenhnga na. Hane sehe cavitexa xu Jesús xi sua xuta rë na lihndi jan niñu sinë na. <sup>56</sup> Hya xi camá xu ne, xutacha

rë na lihndi jan ne, jemu quijircun rë me. Ngajan xi Jesús ne, cachja xu me cojo xutacha rë na lihndi jan xi tsajin camahani yo cuichja me cojo xcusun xi camá.

## 9

*Catsingatju Jesucristu tejó xuta ladu rë me xi cuichja cjuandajyihi rë Nina*

<sup>1</sup> Cavechú ngu nixtin xi casahmitangun xu Jesús xuta ladu rë me xi tejó jan ne, sehe casua rë me ngahñu hacuaha casua rë me xá xi me xi cuacun vëhë cuitexa xu me yëjë xitsehen hacuaha sahmi me xi xuta hmu rë ne, cuma ndaja xu me.

<sup>2</sup> Hya xi camá xu ne, sehe catsingatju Jesús me xi sua me cumachaya rë xuta tsëhë gobiernu xi sahmi Nina hacuaha sahmi xuta xi cuacun vë xi xuta hmu rë ne, cuma ndaja xu me. <sup>3</sup> Hane cuitjin xu cachja Jesús cojo rë me:

—Xi cuetjun cuangun ne, tsajin camahani mé xi chuhun, hacuiin bastón ne, hacuiin changa, hacuiin niñu, hacuiin tujún, hacuaha hacuiin jo tsjian ngahma chuhun jima ngu ngayun. <sup>4</sup> Hacuaha xi cjuhun ngu ndihya ne, ha ngajan ni tinechun nguixun nguixun ni, hisca xi cuetjunxun tsëhë nandya vëhë. <sup>5</sup> Hya xi xuta tsëhë ngu nandya cjuahatsjaain nuju me ne, xi cuetjun tsëhë nandya vëhë ne, titsunu chojo rë ntsacun cojo sa xi cuma tsejen xi xuta jan cún rë me. —Cuatjin xu cachja Jesús.

<sup>6</sup> Sehe ngajan xi cavetju xu xuta ladu rë Jesús jan, quiji catsujyihya me yëjë ni nandya tsëhë distritu Galilea, casua me camachaya rë xuta tsëhë cjuandajyihi xi chja tsëhë gobiernu xi sahmi Nina hacuaha casahmi me xi xuta hmu rë ne, camandaja xu me jingujyë ni ladu vëhë.

*Hvín xuta yo xi Jesucristu*

<sup>7</sup> Hane Herodes, me xi cavitexa ngajan distritu Galilea ne, camachaya xu rë me yëjë xá xi tisahmi Jesús cojo xuta ladu rë me. Hane ngu cachajá xu cjuatacun rë me ta, tsëhë xi ngujo xuta ne, chja me ta Jesús ne, hacui nima Juan Vitenda rë Xuta, hacuaha handasa cahme xu nima Juan vë ne, peru cavuya cjuahñu. <sup>8</sup> Ngujo nga me ne, chja me ta profeta Elías xi cavuya, hane yahnga nga me ne, chja xu me ta ngu nima profeta xi hacjahi, xi cavéjña hatsëë nixtin ne, handasa cahme ne, peru cavuya cjuahñu. <sup>9</sup> Peru Herodes ne, catsingataha cacun xu me cuitjin: “Nima Juan ne, ha cavitéxa xi catisun rcu. Peru quihndë ¿yo rë cha xi cuajyihi vë xi jemu cjín cju nuhya rë tsëhë cha?” Cuatjin xu catsingataha cacun me. Jemu casahmi xu me nguujyë xi scuëë me Jesús.

*Catsicjen Jesucristu hñú mil xihin*

<sup>10</sup> Hane xi cavuya xu apóstol tséhë hiscan xi quiji me jan ne, sehe casuacuenda xu me Jesús xcusun xi casahmi me. Ngajan xi Jesús ne, quijicojo xu me suvá ni apóstol jan ngu cahndë xín, tiña tséhë ngu nandya xi hmí Betsaida. <sup>11</sup> Peru xi camachaya rë xutacjín jan ne, quijitjengui xu me Jesús. Hane Jesús ne, jemu ndaja cafachatsja me xuta jan, hane sehe cachja me cojo xuta jan tséhë gobiernu xi sahmi Nina. Hane xuta xi meje rë xi cuma ndaja me ne, casahmi xu Jesús xi camandaja me.

<sup>12</sup> Hane xi quiji hora jan ne, xuta ladu rë Jesús xi tejó jan ne, quijivaha me xcun Jesús sehe cachja xu me cojo cuitjin:

—Tinújun cojo xutacjín vë ne, catji me nandya xi siu tiñataha o sá xi ranchun xi siu tiñataha, cojo sa xi cuanguise me cahndë xi cuiyuju me hacuaha cuanguise me xi sinë me ta, tséhë xi jemu xín tséhë nandya hiscan xi nechantahan vi. —Cuatjin xu cachja apóstol.

<sup>13</sup> Ngajan xi Jesús ne, cuitjin xu cachja me cojo apóstol jan:

—Ngayun tuhun xi sinë me. —Cuatjin xu cachja me.

Ngajan xi apóstol ne, cafayangui xu me cuitjin:

—Hñú tutu pan cojo jo ti tjín naja. ¿Há cuanguin chíhin niñu xi sinë yějë xuta xi cuicun vi ni? —Cuatjin xu cachja me.

<sup>14</sup> Cuatjin cachja me ta, tséhë xi ngajñi rë yějë xuta xi siutahá jan ne, sacuaha hñú mil má xuta xi xihin. Sehe ngajan xi cachja xu Jesús cojo xuta ladu rë me jan cuitjin:

—Tinújun cojo rë xuta vë ne, catiyuju me sacuaha yachantë me ngu ngu cahndë. —Cuatjin xu cachja me.

<sup>15</sup> Ngajan xi xuta ladu rë Jesús jan ne, cuatjin casahmi me, hane caviyuju xu yějë xuta. <sup>16</sup> Hya xi camá ne, cafaha xu Jesús hñú pan cojo jo ti jan ne, hane xi cavutsejenniji me ngahnga ne, casua me nacuechji rë Nina, sehe cavotoho langa me pan hacuaha cavatëlanga me ti jan, sehe casua xu me cojo xuta ladu rë me xi cjue sua rë me xutacjín jan. <sup>17</sup> Hane xuta ne, yějë ni me cajinë me hacutjin xi cachuya rë xahasen rë me. Hane xi cachjaya rë xi cavangui cajinë xuta jan ne, catsë xu tejó chajne.

### *Catsinguixi Pedru yo Jesucristu*

<sup>18</sup> Cuitjin camá nga ngundiya. Hya xi tisahmi xu Jesús oración rë me ne, xuta ladu rë me ne, hacuaha cojo me siu me cojo rë me. Sehe ngajan xi cavinenguise xu Jesús me cuitjin:

—¿Mé chja xutacjín jan ne, yo ngahan? —Cuatjin xu cachja me.

<sup>19</sup> Sehe ngajan xi cachja xu me cojo Jesús cuitjin:

—Yahnga me ne, chja me ta Juan Vitenda rë Xuta ngayun. Hane yahnga nga me ne, chja me ta profeta Elías ngayun. Hane me xi yahnga nga ne, chja me ta ngayun ne, ngu profeta

xi hacjahi, xi cavéjña hatsëë nixtin, xi handasa cahme ne, peru cavuya cjuahñu. —Cuatjin xu cachja xuta ladu rë Jesús.

<sup>20</sup> Sehe Jesús ne, cuitjin xu cavinenguise nga me:

—Hane ngayun ne, ¿mé nújun ni, yo ngahan? —Cuatjin xu cavinenguise Jesús.

Ngajan xi Pedru ne, cuitjin xu cafayangui me:

—Ngayun xi catsingatju nuju Nina xi cumatitjun ngayun tsijin. —Cuatjin xu cafayangui Pedru.

### *Cachja Jesucristu xi tsiquehen xuta me*

<sup>21</sup> Peru Jesús ne, cavitexa xu me xuta jan xi tsajin camahani yo xi cuichja cojo me cjuatacun jan. <sup>22</sup> Cuitjin xu cachja me:

—Ngahan xi Quihndi rë Xuta Jain ngahan ne, hachu meje rë xi jemu cjín cjuañihi cuátju cuma; xuta changá cojo nahmi xi matitjun tsëhë nahmi cojo cha xi vicuya cjuachacun ne, tsitjungui me ngahan, tsiquehen me ngahan. Peru xi ma jyan nixtin ne, tsicuya Nina ngahan cjuahñu. —Cuatjin xu cachja Jesús cojo xuta ladu rë me.

<sup>23</sup> Hane sehe cavuya cachja nga me cojo yëjë ni xuta jan cuitjin:

—Sá xi tjin yo xi meje rë xi cuma xuta ladu naha matsejen ne, ha quihndë mijí rë xi sahmi hacutjin xi meje rë suvá matsejen ta nchunchujun ni matsejen ne, catejñahñu xahasen rë xi cjuccojo ndiya naha, handasa hisca cueya xcun cru.

<sup>24</sup> Cuatjin matsejen ta, tsëhë xi yo xi meje cjuendujo cojo ngasunhdë rë cojo cjuatacun rë suvá matsejen ne, cuechintaain cjuahñu xatsë. Peru yo xi cuatju cjuañihi o hisca cueya ngatsë naha matsejen ne, vëhë xi cuechútáha cjuahñu xatsë. <sup>25</sup> ¿Mé machjirëhë rë yo xi sacú rë yëjë cjuanchina rë ngasunhdë sá xi cueya hacuaha cuma castigu? <sup>26</sup> Machjiriin matsejen ta, tsëhë xi yo xi ma sava rë ngatsë naha cojo ngatsë rë cjua naha matsejen ne, ngahan xi Quihndi rë Xuta Jain ngahan matsejen ne, hacuaha cuma sava ná tsëhë hya xi cuinduva cojo hasen ndajyihi naha hacuaha tsëhë Nahmi naha hacuaha tsëhë ángel xi vejña tsëhë me. <sup>27</sup> Nguehe cuichjá cojo nuju cjuaquixi matsejen ta tjin yahnga ngayun xi sechun nguehe xi cueyuun jinguyëjë rë xi cjëë chun gobiernu xi sahmi Nina. —Cuatjin xu cachja Jesús.

### *Ñahñu camatsejen nima Moisés cojo xutachanga xi hmí rë Elías visiajmi cojo Jesucristu*

<sup>28</sup> Cuitjin camá nga xu ngundiya hya xi cavatju sacuaha jyin nixtin xi cavicuya Jesús cjua vëhë. Quijicojo me Pedru cojo Juan cojo Jacobo quijiniji xu me ngu ndetjún xi sahmi me oración rë me. <sup>29</sup> Hora xi tisahmi xu Jesús oración rë me ne, xcun me ne, cavindeya xcusun rë. Hane tsjian rë me ne, jercu

tu tyava camahani camá, ña setí jyihi. <sup>30</sup> Hacuaha camatsejen xu jo xihin hinchacun visiajmi cojo rë me. Xihin jan ne, hacui xu nima profeta Moisés cojo profeta Elías. <sup>31</sup> Me xi cuacun vëhë ne, camatsejen me cojo ngu hasen ndajyihí, tivisiajmi xu me tsëhë cjuaveya xi hatuxa tjin rë xi cuechútáha Jesús ngajan Jerusalén. <sup>32</sup> Peru Pedru cojo jo sa me xi yahnga jan ne, ha siufë me, tsëhë xi jercu nijñá rë me. Peru xi cavascandaja xu rë me ne, cavëë me hacutjin jercu setí camahani tsejen hiscan secun Jesús, hacuaha cavëë xu me jo me jan hinchacuntangun me cojo Jesús. <sup>33</sup> Hya xi camá ne, hora xi tivetjuxin me xi cuacun vë tsëhë Jesús ne, sehe cachja xu Pedru cojo Jesús cuitjin:

—Tatá. Tu ma rë xi nguehe nechin ne, nihñi jyan puestu; ngu cuma tsujun ne, ngu cuma tsëhë Moisés, hane cojo ngu cuma tsëhë Elías. —Cuatjin xu cachja Pedru, peru hisca hvíin me mé xi chja me.

<sup>34</sup> Hane hora xi tichja xu Pedru cuatjin ne, canduva ngu yufí casahmi tjahnguen rë tsëhë me. Hane jemu catsacjun me camá xi caxinchavasen me tsëhë yufí jan. <sup>35</sup> Hya xi camá ne, canuhya xu rë ngujo cjua xi cavetju ngajñi yufí jan xi cachja cuitjin:

—Cha vihi xi Quihndi naha cha, cha xi ngahan cavejñá cáacun xi tsingátju. Tinuhyun cjua xi chja cha. —Cuatjin xu cachja cjua jan.

<sup>36</sup> Hane xi cavatju cachja cjua jan ne, Jesús ne, camasuvá sa me secun me. Hya xi camá xu ne, jyan xuta ladu rë Jesús jan ne, tu caviyujuyuu ni me. Hane nixtin hya ne, cachjaain camaha xu ni me cojo hisca ngu tsëhë xcusun xi cavëë me.

*Casahmi Jesucristu xi camandaja cha lihndi xi jiya xitsehen xahasen rë*

<sup>37</sup> Cuitjin camá nga xu camá nchujun hya xi canduvajne Jesús tsëhë ndetjún cojo jyan xuta ladu rë me jan. Tjercu cjín camahani xuta canduvatjengui xu rë me ndiya. <sup>38</sup> Hane ngajñi rë xutacjín jan ne, cavetjujñi ngu xihin xi jercu cajinda ya xu cachja cojo Jesús cuitjin:

—Maestro, nihñu favor ne, nduvun chutsujun cha lihndi naha ta ngu tutu má cha vi xi tacun ná cha. <sup>39</sup> Hane cuitjin sahmi ngu xitsehen cojo rë cha: faha rë cha, hane tu ñahñu jindaya, sehe vitsuneya rë cha, ña vetju natyaxu hntsua cha, hane hisca hya xi ndiya cjuë cha ne, sehe vetjuxin tsëhë cha.

<sup>40</sup> Xuta ladu nuju, caféhya rë me favor xi cuaxëxin me, peru camaji cavaxëxin me. —Cuatjin xu cachja xihin jan cojo Jesús.

<sup>41</sup> Sehe ngajan xi Jesús ne, cuitjin xu cafayangui me:

—Ngayujun ni ne, xuta xi macjaain rë ngayun hacuaha xuta xi cavetjuxin tsëhë ndiya ndajyihí ngayun. ¿Jani hisca

hya xi tjin ná xi cuitejña cojo nuju? ¿Jani hisca hya xi tjin ná xi scaa ná cojo nuju? Nduvuncujun quihndi nuju nguehe. —Cuatjin xu cafayangui me.

<sup>42</sup> Hane hora xi tijima tiña xu cha lihndi jan tséhë Jesús ne, xitsehen ne, catsiticja rë cha, hacuaha vitsuneya rë cha. Hya xi camá ne, cavatëcja Jesús tséhë xitsehen, hane casahmi me xi camandaja xu cha lihndi jan. Sehe casua me cha cojo nahmi rë cha. <sup>43</sup> Hane yëjë ni xuta jan ne, jemu quijircun camaha xu ni rë me xi cuatjin jyë hnga Nina cojo Hasen rë me.

*Cachja nga Jesucristu xi tsiquehen xuta me*

Hane jinguyëjë rë xi cuatjin tifircun rë xutacjín jan tséhë yëjë ni xcusun xi sahmi Jesús ne, cachja xu me cojo xuta ladu rë me cuitjin:

<sup>44</sup> —Ndaja tetuhunrcun cjua xi tichjá cojo nuju vi: Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta. —Cuatjin xu cachja me.

<sup>45</sup> Peru xuta ladu rë Jesús jan ne, cavijnii rcu me mé vijne cjua jan ta, tséhë xi casetsa xu rë cjuatacun rë me, cojo sa xi cuijnii rcu me. Hacuaha tsacjun xu me xi cjuinenguise me Jesús mé vijne cjua vëhë.

*Yo xi matitjun*

<sup>46</sup> Ngu nixtin jan ne, cavetsihin sacuaha xi meje scaanya xu xuta ladu rë Jesús ngajñi rë me yo xi hitsë sa matitjun. <sup>47</sup> Peru Jesús ne, xi ha vëë me hacutjin tsingataha cacun xuta ladu rë me jan ne, sehe cafaha me ngu lihndi caviseacun me ndaya rë me, <sup>48</sup> sehe cachja xu me cojo xuta ladu rë me jan cuitjin:

—Tu yo ni xi cjuahatsja rë lihndi vihi tséhë xi ladu naha má ne, hacuaha hora vëhë cjuahatsja ná ngahan. Hacuaha xi cuatjin cjuahatsja ná ngahan ne, hacuaha cjuahatsja rë Nina xi catsingatju ná. Hane tu yo ni xi má nuju xi ma tjengui tséhë ngajñi nuju ngayujun ni ne, vëhë xi matitjun xi má rë Nina. —Cuatjin xu cachja Jesús.

*Xuta xi hacuiin condra nuju má me ne, hatuxa favor nuju fi me*

<sup>49</sup> Ngajan xi Juan ne, cachja xu me cojo Jesús cuitjin:

—Tatá, cahyin ngu me xi tivaxëxin xitsehen sacuaha xi suvun catuhun rë me xá. Hane canújin cojo rë me xi ha quihndë sahmi me cuatjin ta, tséhë xi me vëhë ne, tsujyihintjenguiin me ngayun sacuatjin niji ngayin. —Cuatjin xu cachja me.

<sup>50</sup> Hane Jesús ne, cuitjin xu cafayangui me:

—Xicanujuun cojo rë me cuatjin ta, tséhë xi xuta xi hacuiin condra naja má me ne, hatuxa favor naja fi me. —Cuatjin xu cachja Jesús.

*Catsingatiin xuta distritu Samaria Jesucristu*

<sup>51</sup> Hya xi camá ne, xi tijima tiña xu nixtin xi cjueniji Jesús ngajan ngahnga ne, cavejñahñu me cjuatacun rë me xi cjue me ngajan Jerusalén. <sup>52</sup> Vëhë xi catsingatju titjun xu me jo xuta ladu rë me. Xi quiji me ne, cafehe me ngu nandya tsëhë xuta Samaria, xi cuanguise me cahndë xi cuejña Jesús cojo xuta ladu rë me. <sup>53</sup> Peru xuta jan ne, cafahtsjaain xu me Jesús ta, tsëhë xi Jesús ne, hatuxa tjin cacun me xi cjue me hisca Jerusalén. <sup>54</sup> Peru hya xi camachaya xu rë Jacobo cojo Juan, xuta ladu rë Jesús, cjua vëhë ne, cachja xu me cojo Jesús cuitjin:

—Tatá. ¿Há nihña sacuatjin casahmi profeta Elías hatsëe nixtin? ¿Há cuitexan xi cuinduva ndihi tsëhë ngahnga, tsicjé rë xuta xi cuicun vi? —Cuatjin xu cachja me.

<sup>55</sup> Ngajan xi Jesús ne, cavuya vutsejen me xuta ladu rë me jan ne, sehe cavatëcja xu me cjuatacun xi tsingataha cacun me xi cuacun jan, cuitjin cachja me:

—Ngayun ne, hyúun mé xcusun Hasen xi tsëhë nuju. <sup>56</sup> Ngahan xi Quihndi rë Xuta Jain ngahan ne, hacuiin canduvá xi tsicjé xuta ta xi canduvá ne, xi cuáxëtjé me. —Cuatjin xu cachja Jesús.

Sehe quiji xu me ngu nga nandya.

*Xuta xi camameje cjue cojo Jesucristu*

<sup>57</sup> Hane ndiya cjui Jesús cojo xuta ladu rë me ne, cachja xu ngu me jan cojo rë me cuitjin:

—Tatá. Tu yani ni xi cuangun ne, cjué cojo nuju. —Cuatjin xu cachja me.

<sup>58</sup> Sehe ngajan xi Jesús ne, cuitjin xu cachja me cojo xuta jan:

—Chu ninda ne, tjin nguijo hiscan viyuju chu, hane nisë xi vitjen chu ngahnga ne, tjin ndava chu, peru ngahan xi Quihndi rë Xuta Jain ngahan ne, hisca ndya naha tsajin. —Cuatjin xu cachja me.

<sup>59</sup> Cachja sa xu me cuitjin cojo ngu nga xuta jan:

—Nduvun, cuanguen cojo ná. —Cuatjin xu cachja me.

Peru xuta jan ne, cuitjin xu cachja me:

—Tatá. Tuhun ná cahndë, titjun cjué xi seyaniji nahmi naha. —Cuatjin xu cachja ngu nga xuta jan.

<sup>60</sup> Ngajan xi Jesús ne, cuitjin xu cachja me:

—Xuta xi sacuaaha xi cahme cjuatacun rë me xi sahmicien-daain me Nina ne, me vëhë catinchaniji me nima rë me. Peru ngayun ne, tángun tuhun cumachaya rë xuta tsëhë gobiernu xi sahmi Nina. —Cuatjin xu cachja me.

<sup>61</sup> Ngu nga xuta ne, cachja xu me cojo Jesús cuitjin:



—Tatá. Ngahan ne, hacuaha cjuě cojo nuju. Peru tuhun ná cahndě, cjuě tsingujnetaha cjua cojo xuta naha. —Cuatjin xu cachja xuta jan.

<sup>62</sup> Peru Jesús ne, cuitjin xu cachja me cojo xuta jan:

—Ngu xuta xi ha cavejña cacun me xi cjuetjengui me ndiya rē Nina sehe cumangu cumajo cacun me ħhá cjue, há cjuiin me ne?, tangun me cojo ngu cha xi ha cafaha cha ndetsihin latu xi cuetsihin cuacjan cha nangui peru tivutsejen sa cha taha ngaxtun cha. Sacuatjin machjiriin cha vihi xi cuacjan cha nangui ne, hacuanitjin ni machjiriin me vĕhĕ xi cuisecoo me Nina hiscan xi sahmi Nina gobiernu. —Cuatjin xu cachja Jesús.

## 10

*Catsingatju Jesucristu jyanchan tejó xuta ladu rē me xi cuichja cjuandajyihĭ rē Nina*

<sup>1</sup> Xi cavatju xu vĕhĕ ne, sehe casuaxa Nai naja jyanchan tejó sa xuta ladu rē me, sehe catsingatju titjun me chuva jo chuva jo xuta jan yĕjĕ ni nandya cojo yĕjĕ ni cahndě xi catsingataha cacun Jesús xi sehe cjue me. <sup>2</sup> Hane cuitjin xu cachja me cojo:

—Jemu tjin camahani xuta xi meje cuisĭñuju me cjua rē Nina, peru me xi sua cumachaya rē xuta ne, jemu chuva má me. Vĕhĕ xi meje rē xi chjahyun rē Nina favor xi tsingatju me me xi cjue sua cumachaya rē xuta cjua rē Nina. <sup>3</sup> Tāngun ni. Ngahan titsingátju nuju ngayun xuta jeya ngajñĭ rē xuta hnga cacun, sacuaha cjue ngu chu hnditsānga ngajñĭ rē chu cjan rē. <sup>4</sup> Xicachjuun tujún, xicachjuun changa, hacuaha xicachjuun chuxinxĕ. Xicavisiajmuu cojo xuta hora xi sacu xingun cojo rē me ndiya. <sup>5</sup> Hane tu jarĕ ni ndihya xi cuisuhun ne, titjun tinújun ngu nina cuitjin: “Nina sua nuju me cjuandaja cjuajeya.” Cuatjin tinújun. <sup>6</sup> Hane sá xi ndihya vĕhĕ tjin quihndi tsĕhĕ cjuajeya ne, hacuaha sacú rē me cjuajeya. Peru sá xi hacuĭin quihndi tsĕhĕ cjuajeya xi siu jan ne, sacuĭin rē me. <sup>7</sup> Hane xi cuisuhun ngu ndihya ne, ha ngajan ni tinechun, xinu siuhun cojo rē me mé xi sua me. Cuatjin nihñu ta, tsĕhĕ xi ngu xuta xi sahmi me xá ne, vechú chuva rē xi sacú chji rē me. Vĕhĕ xi mijĭ rē xi cuangun nguehe cuangun ngajan cuinechun. <sup>8</sup> Hane tu jarĕ ni nandya xi cuisuhun hiscan xi cjuahatsja nuju xuta ne, xinu xcusun xi sua me xinu, <sup>9</sup> hacuaha nihñu xi xutahmu rē tsĕhĕ nandya jan ne, cumandaja me, hacuaha cuitjin tinújun cojo yĕjĕ xuta: “Ha camatiña nixtin xi cuma nuju xi sahmi Nina gobiernu.” Cuatjin tinújun. <sup>10</sup> Hane tu jarĕ ni nandya xi cuisuhun hiscan xi cjuahatsjaain nuju xuta ne, xi chjuhun ndiya xi cuetjunxun tsĕhĕ nandya vĕhĕ ne, cuitjin tinújun cojo xuta: <sup>11</sup> “Hisca chojo

rë ngajñi nandya nuju xi cavaqui rë ntsacuin ne, cuitsuni cojo sa xi cuma tsejen xi ngayun cún nuju. Peru meje rë xi cuijne rcun xi ha camatiña nixtin xi sahmi Nina gobiernu.” Cuatjin tinújun. <sup>12</sup> Cuichjá cojo nuju ta hya xi cuechú nixtin xi tsichuva Nina xuta tséhë jyë rë me ne, hitsë sa jyë castigu cuatju xuta tséhë nandya xi fahatsjaain nuju, xi cuma rë xuta tséhë nandya Sodoma xi jercu tu casahmi camahani me cjuatsehen.

*Cjuachoho xi cuma rë ciudad xi camacjaain rë cjuar rë Jesús*

<sup>13</sup> ¡Jemu chojyihí tséhë xuta nandya Corazín! ¡Hacuaha jemu chojyihí tséhë xuta nandya Betsaida! Jemu chojyihí tséhë me ta, tséhë xi miji tsindeya me cjuatacun rë me, handasa cavëë me cjuarcun xi casahme ngajñi rë me. Xuta nandya Tiro cojo xuta nandya Sidón ne, hisca hacuiin xuta ladu rë Nina má me sacuatjin rë xuta Corazín cojo Betsaida. Peru sá xi xuta Tiro cojo Sidón cavëë me cjuarcun xi cuacun vë ne, ha catsindeya me cjuatacun rë me, hacuaha ha cavajá me tsjian xi sacuaha tsánaxá hacuaha caviyuju me ngajñi ndesu, sacuaha xcusun naja, cojo sa xi cuma tsejen xi jemu choho má jain rë me tséhë jyë rë me. <sup>14</sup> Véhë xi hya xi tsichuva Nina yëjë xuta tséhë jyë rë me ne, xuta nandya Tiro cojo xuta nandya Sidón ne, hitsë sa chúva castigu cuatju me cuma xi cuma rë xuta Corazín cojo xuta Betsaida. <sup>15</sup> Hane xuta nandya Capernaum ne, ¿há cjue me hisca ngahnga hiscan tacun Nina? ¡Hacuiin! Hatuxa cjue me nduchin, cahndë hiscan ma hasen rë nima castigu.

<sup>16</sup> Xuta xi cuihndë me tsujun ne, hacuaha tivihndë me tsahan. Hane xuta xi tsitjungui nuju me ne, hacuaha titsitjungui me ngahan. Hane xuta xi tsitjungui ná me ne, hacuaha titsitjungui me Nina xi catsingatju ná. Cuatjin xu cachja Jesús cojo xuta ladu rë me, sehe cavetju xuta ladu rë me jan quiji me.

*Cavuya xuta ladu rë Jesucristu xi jyanchan tejó*

<sup>17</sup> Hya xi camá ne, xi cavuya xu xuta ladu rë Jesús xi jyanchan tejó jan ne, jercu sua rë xahasen rë me. Hane cuitjin xu cachja me cojo Jesús:

—¡Tatá! ¡Xi veyinnanguin ñihi nuju hora xi tinihñí xá xi cavitexun niji ne, hisca xitsehen vihndë tsijin! —Cuatjin xu cachja xuta xi cuacun jan.

<sup>18</sup> Sehe ngajan xi Jesús ne, cuitjin xu cachja me cojo xuta jan:

—Jinguyëjë rë xi tivutsején ngahnga hiscan tacun Nina ne, cjanangu Satanás sacuaha camá ni ngu ndihichuhún. Hane cuatjin cahvë xi tichjahátáha rë gobiernu xi sahmi Satanás. <sup>19</sup> Chutsujun ni, ngahan casuá nuju chuva rë xi tsajin mé cuatjun cuma, handasa nunú chu yë o sá nunú chu naya o

sá xi suvá camahani Satanás choho meje sahmi cojo nuju. <sup>20</sup> Hacuini ndaja cuma nuju tséhë xi vihndë xitsehen tsujun ta xi meje rë ne, ndaja catama nuju tséhë xi ha quitaháxujun ñihi nuju ngajan ngahnga. —Cuatjin xu cachja Jesús cojo xuta ladu rë me jan.

### *Casahmi jyë casahmi hnga Jesucristu Nina*

<sup>21</sup> Hane ha hora vëhë ni ne, Hasen rë Nina casahmi xi jemu sua camahani camá rë xahasen rë Jesús, sehe cachja xu me cuitjin cojo Nina:

—Ngayun nahmi naha ne, sahmejyë sahme hnga nuju cojo Hasen nuju, ngayun xi Nai rë ngahnga cojo nangui ngayun, tséhë xi ngayun caveyúnhmu cjuatacun vëhë xi cuma rë xuta xi jemu vechú cjuatacun rë, hane catuhun camachaya rë xuta xi hvíin camahani. Ngayun nahmi naha, cuatjin canihñu ta, tséhë xi cuatjin xi cachuya nuju. —Cuatjin xu cachja Jesús cojo Nina.

<sup>22</sup> Hane xi cojo yëjë ni xuta ne, cuitjin xu cachja me:

—Yëjë ngarca ni matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin hisca xi ngu xi vëë yo xi Nahmi naha matsejen ta suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. —Cuatjin xu cachja me cojo yëjë xuta.

<sup>23</sup> Cavuya vutsejen nga me hiscan siu xuta ladu rë me ne, sehe cachja xu me cojo suvá ni me xi cuacun vëhë cuitjin:

—Jemu ndaja tsujun ngayujun ni xi tichutsujun xcusun xi tijima nixtin vihi. <sup>24</sup> Nguehe cuichjá cojo nuju ta jemu ndaja tsujun ta, tséhë xi hacuaha jemu cjín profeta hacuaha jemu cjín xuta xi matitjun xi caviyuju titjún ne, jemu meje scuëë me xcusun xi ngayun tichutsujun, peru casacuiin cavëë me. Hacuaha jemu meje cuisiniñuju me cjuá xi tivisiñuju ngayun, peru casacuiin cavisiniñuju me ta, tséhë xi cjëë cuma xcusun vëhë nixtin hya. —Cuatjin xu cachja Jesús cojo xuta ladu rë me.

### *Ejemplu tséhë cha Samaria xi casahmi cjuandaja*

<sup>25</sup> Ngundiya nga hya xi tacun xu Jesús cojo xuta ne, casecun ngu cha xi vicuya cjuachacun cavinenguise xu cha cuitjin xi cjuahachuva cha me:

—Maestro. ¿Mé ndatjin xi sahme cojo sa xi cuéchutáha cjuahñu xatsë xcun Nina? —Cuatjin xu cavinenguise cha me.

<sup>26</sup> Ngajan xi Jesús ne, cuitjin xu cachja me cojo cha:

—¿Hacutjin camahindu xcun ley rë Moisés? ¿Mé xi chutayun jan? —Cuatjin xu cachja me.

<sup>27</sup> Hane xi cafayangui cha ne, cuitjin xu cachja cha:

—“Meje rē xi nihmutacún Nina naja cojo nguñajatacún, cojo yějē xahasen nuju, cojo yějē ngahñu nuju, cojo yějē cjuatacun nuju, hacuaha cuatjin nihmutacún xingun sacuatjin hmutacún suvun yojo nuju.” —Cuatjin xu cachjasun cha cjua rē ley.

<sup>28</sup> Hane cuitjin xu cachja Jesús cojo cha:

—Cjuaquixi cjua xi canújun. Cuatjin nihñu, sehe cuechuntuhun cjuahñu xatsē. —Cuatjin xu cachja Jesús.

<sup>29</sup> Ngajan xi cha xi vicuya cjuachacun jan ne, xi meje tsingacun cha xi jemu quixi cha cojo cjuatacun rē cha ne, cuitjin xu cavinenguise cha cojo Jesús:

—¿Yo xi xingueen ni? —Cuatjin xu cachja cha.

<sup>30</sup> Hane ngajan xi Jesús ne, cojo ngu ejemplu cafayangui xu me tsēhē cha cuitjin:

—Cuejña ne xi ngu xuta jan ne, cavetju me tsēhē nandya Jerusalén ne, cjui me nandya Jericó. Hane ndiya cjui me ne, cavechútáha ngujo cha chējē me. Hane cafhatahá cha yějē tsēhē me xi yaha me, sehe cavaja cha me. Ña catsiquehenñaja cha me, hane sehe cavanga cha. <sup>31</sup> Hya xi camá ne, hora vėhē canduva ngu nahmi cavatju me ndiya vėhē, hane xi cavėē me xuma xuta xi casacuhmu rē jan ne, tjehen ndiya ladu xingu cavatju me quiji me. <sup>32</sup> Ha chuva vėhē ni ne, cafehe ngu sangrista cahndé vėhē. Hane xi cavėē cha xi jiña me xi casacuhmu rē jan ne, cavetahaxin cha hitsē ndiya rē cha sehe cavatju cha quiji cha. <sup>33</sup> Peru ngu cha tsēhē distritu Samaria xi quiji cha ndiya vėhē ne, cafehe cha hiscan jiña xutahmu rē jan. Hane xi cavėē cha me ne, jemu camayuma rē cha me. <sup>34</sup> Hane xi quijivaha cha xcun me ne, catsirqui cha me, cavitejnu cha aceite cojo xan hiscan casacuhmu rē me sehe catsitjinguia cha me tsjian. Hya xi camá ne, sehe catsiquijin cha me naxin rē cha, sehe quijicojo cha me ngu ndihya hiscan xi hatuxa ndihya viyuju xuta, hane ngajan casahmi cha me cuidadu. <sup>35</sup> Hane xi camá nchujun jan ne, cavaxē cha jo denario, tujún xi faha ngu mosu xi sahmixa jo nixtin, sehe casua cha me xi nai rē ndihya jan, sehe cachja cha cojo rē me cuitjin: “Nihñu cjuandaja ne, chjuhuncuendun xuma xutahmu rē vi. Hane xi quisun sa nicujun tsēhē xcun tujún xi suá nuju vi ne, xi cúa ne, sehe cuechjē tsujun.” Cuatjin cachja cha Samaria.

<sup>36</sup> Ngajan xi Jesús ne, xi cuatjin cajnetaha ejemplu xi cachja me ne, sehe cachja xu me cojo cha xi vicuya cjuachacun jan cuitjin:

—¿Jarē tsēhē catsijyan xuta xi cuacun vė xi má nuju xi cjuaquixi xi camá xicjin me xi cavanguihmu chējē jan? —Cuatjin xu cachja Jesús.

<sup>37</sup> Ngajan xi cha xi vicuya cjuachacun jan ne, cuitjin xu cafayangui cha tsëhë Jesús:

—Cha xi ngatsë rë cjuayuma ne, casahmi cjuandaja cojo me xi casacuhmu rë jan. —Cuatjin xu cachja cha.

Hane Jesús ne, cuitjin cachja nga xu me cojo cha:

—Quihndë xi cuangun ne, hacuaha cuatjin nihñu. —Cuatjin xu cachja Jesús.

### *Quiji Jesucristu ndava na Marta*

<sup>38</sup> Hane xi cjuí sa xu Jesús cojo xuta ladu rë me ne, xi cavisehen me ngu nandya jan ne, ngu na xi hmí rë Marta ne, cafahatsja na Jesús ndava na. <sup>39</sup> Na Marta jan ne, tjin ngu tíchja na xi hmí rë María. Hane na María jan ne, quiji xu na cavéjña na táha ntsacu Jesús, tivisiñuju na cjuá xi tivícuya me. <sup>40</sup> Peru na Marta ne, jemu cjin xcunya xá xi tisahmi na. Hane xi cavatju na hiscan tacun Jesús ne, cuitjin xu cachja na:

—Tatá. ¿Há marcuaain nuju xi na tichja ne, cavejñasuva ná na cojo xá xi tacunvasen tisahme? Tinújun cojo rë na, catisecoo na ngahan. —Cuatjin xu cachja na.

<sup>41</sup> Ngajan xi Jesús ne, cuitjin xu cafayangui me tsëhë na:

—Marta, jercu marcun nuju tsëhë jemu cjin xcusun. <sup>42</sup> Peru ngu xcusun ni xi sahmi ngujoyë. Na María ne, cavaxijin na xcusun xi ndaja vë, hane hacuiin chjahátahá rë tsëhë na. —Cuatjin xu cachja me.

## 11

### *Cavicuya Jesucristu hacutjin meje rë xi nihña oración*

<sup>1</sup> Cuitjin camá xu ngundiya hya xi tisahmi Jesús oración rë me ngu cahndë jan. Hane xi cajnetaha casahmi me oración rë me ne, ngu xuta ladu rë me jan ne, cuitjin xu cachja me cojo Jesús:

—Tatá. Ticuyun niji hacutjin nihñi oración niji, sacuatjin cavicuya Juan xuta ladu rë me. —Cuatjin xu cachja me.

<sup>2</sup> Ngajan xi Jesús ne, cuitjin xu cafayangui me:

—Hya xi nihñu oración ne, cuitjin tinújun:

Ngayun Nahmi niji, meje niji xi ngayijin ni xuta ngasunhndë chjihinrcuin nuju.

Meje niji xi cuinduvun nihñu niji gobiernu.

<sup>3</sup> Nchunchujun ni tuhun niñu xi xiní.

<sup>4</sup> Ninchatuhun niji tsëhë jyë xi jemu quitjin ta ngayin suvin ne, hacuaha tininchatihin rë yëjë ni xuta xi quitjen me jyë tsijin.

Xicatuun cahndë xi chjaháchuva niji cojo cjuatacun niji.

Cuatjin tinújun. —Cuatjin xu cachja Jesús cojo xuta ladu rë me.

<sup>5</sup> Hya xi camá ne, cachja nga xu Jesús ngu ejemplu cojo xuta ladu rë me. Cuitjin xu cachja me:

—Cuejña ne xi ngayun tjin nuju ngu xuta xi vinga nuju, hane vasen nixten cuangun ndava me, cuinújun cojo rë me cuitjin: “Amigu, nihñu favor tuhun jyan niñu scuxétaha ta, <sup>6</sup> tséhë xi ngu amigu naha cafehe ndya naha xi cjuí me ngu nanguí, hane tsajin ná mé xi suá sinë me.” Cuatjin cuinújun cojo rë me. <sup>7</sup> ¿Há cjuayangui me tsujun cuitjin tséhë hisca cahntsua ndihya?: “Xicatu hunndyuun ná ta tingotjo ndihya ne, ha tichjá, hacuaha quihndi naha ne, nguehe siufë cojo ná. Cumaji cuisátjenhnga suá nuju.” ¿Há cuatjin cjuayangui me tsujun? Hacuín cuatjin. <sup>8</sup> Cuichjá cojo nuju ta handasa amigu nuju me, peru hacuín ngatsë rë vëhé xi cuisatjenhnga me sua nuju me ta ngatsë rë xi ngajan cjuí ngajan nduva cuinújun ne, cuisatjenhnga me sua nuju me ha tucutjin xi chjahyun. <sup>9</sup> Hacuaha cuichjá cojo nuju cuitjin: Chjahyun rë Nina, hane sua nuju me. Tinchunsun, hane sacú nuju. Tinújun, hane Nina ne, sua me cahndë cuisuhun. <sup>10</sup> Cuatjin nihñu ta, yëjë ni xuta xi fehya me ne, fahatsja me, hane yo xi vanguise ne, sacú rë, hane yo xi chja ne, sacú cahndë visehen.

<sup>11</sup> Tsajin ngu nahmi xi, hya xi quihndi rë me cjuehya ngu niñu ne, cahndë rë xi sua me ngu niñu ne, sua me ngu ndyojo, o sá xi hya xi quihndi cjuehya ngu chu ti ne, cahndë rë xi sua me ngu chu ti ne, sua me ngu chu yë, <sup>12</sup> o sá xi hya xi quihndi cjuehya ngu chjoo ne, sua me ngu chu naya. <sup>13</sup> Ngayun xi tsehen cjuatacun nuju ne, ma tuhun rë quihndi nuju xcusun xi ndaja. Hitsë guan Nahmi naja xi tacun me ngahnga ta hitsë sa jercu meje sua me Hasen rë me cojo xuta xi cjuehya rë me. —Cuatjin xu cachja Jesús.

### *Cachja xuta xi Satanás casuaxa rë Jesucristu*

<sup>14</sup> Cavechú xu ngu nixtin xi cavaxëxin Jesús ngu xitsehen xi casahmi lihmi rë ngu cha jan. Hane hya xi cavetju xitsehen jan ne, cha lihmi jan ne, cavetsihin cachja cha. Hane xutacjín jan ne, jemu quijircun rë me. <sup>15</sup> Hya xi camá ne, ngujo xuta jan ne, cuitjin xu cachja me:

—Beelzebú, xitsehen xi matitjun ne, vëhé casua rë cha xá xi vaxëxin cha xitsehen. —Cuatjin xu cachja xuta jan.

<sup>16</sup> Hane ngujo nga xuta ne, xi meje cjuahachuva me Jesús ne, cafehya me me xi sahmi me ngu cjuarcun xi cuinduva ngajan ngahnga. <sup>17</sup> Peru Jesús ne, tséhë xi ha vëë me mé xi tsingataha cacun xuta xi cuacun jan ne, cuitjin xu cachja me:

—Hya xi xuta tséhë ngu nandya ticjan me ngajñi rë me cojo xicjin me ne, nandya vëhé ne, ha tivéjña xahva, hisca ndihya ne, tivixusun xcun xicjin. <sup>18</sup> Hacuanitjin ni sá xi Satanás scaan cojo xitsehen xi yahnga xi hacuaha Satanás má nai rë ne,

tsichajá ngahñu rë xi vëhë matitjun. Cuatjin chjá ta, tsëhë xi nújun xi Beelzebú casua ná xá xi vaxëxen xitsehen. <sup>19</sup> Peru sá xi Beelzebú casua ná xá xi vaxëxen xitsehen ne, hacuaha ha Beelzebú vëhë casua rë ngu ngu xuta ladu nuju xá xi hacuaha vaxëxin me xitsehen. Vëhë xi ha me vëhë ni cuichja me xi cuaaintjin xi nújun xi Beelzebú casua ná xá. <sup>20</sup> Peru sá xi Nina casua ná me xá xi vaxëxen xitsehen ne, ngajan matsejen xi gobiernu xi sahmi Nina ne, ha tivetsihin.

<sup>21</sup> 'Satanás ne, tangun cojo ngu cha xi jemu hñu ngahñu rë. Hya xi ha ndaja tjin chjine cha cojo quicha rë cha xi sahmi cuidadu cha ndava cha ne, yëjë xcusun xi tjin rë cha ne, hacuaha ha ndaja cuidadu tjin. <sup>22</sup> Peru ngahan ne, tangun ngahan cojo ngu me xi hitsë sa jemu hñu camahani ngahñu rë. Hya xi me xi hitsë sa hñu ngahñu rë scaan me cojo cha xi hñu ngahñu rë jan hacuaha tsinguijne me cha ne, cjuahatahá me quicha xi vetaha cacun cha xi cuaxëtje rë cha, hane sehe cuatëcja me yëjë xcusun xi tjin rë cha jan ngajñi rë me cojo xicjin me.

<sup>23</sup> Xuta xi fiin me favor naha ne, condra naha má me. Hane xuta xi visecuaain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta. —Cuatjin xu cachja Jesús.

### *Xitsehen xi vuya*

<sup>24</sup> Hya xi camá ne, Jesús ne, quiijinduju sa xu cachja me cuitjin:

—Hya xi vetjuxin xitsehen tsëhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nangui quixí camahani, vanguise cahndé hiscan xi cuejñajenda. Hane xi sacuiin rë cahndé hiscan cuejñajenda ne, cuitjin tsingataha cacun: “Cúya rë cjué ndya naha hiscan xi cavëtjuxen.” Cuatjin tsingataha cacun xitsehen jan. <sup>25</sup> Hane xi vuya fehe xitsehen jan cahntsua xahasen rë xuta jan ne, vutsejen xitsehen jan cahntsua xahasen jan sacuaha ngu ndihya xi caxtecha tyjahi tyjahi, hacuaha siundaja chichihin ngu tsë ngu xtí. <sup>26</sup> Xi vutsejen xitsehen jan xi cuatjin jyihi jan ne, sehe fi jaha sa rë yatu sa xitsehen xi hitsë sa tsehen xi cuma rë vëhë ne, sehe visehen nga viyujucahndé jan. Peru xi ma ngascan ne, hitsë sa chojyihí tsëhë xuta vëhë xi cuma rë titjún. —Cuatjin xu cachja Jesús.

### *Xuta xi ndaja jain tsëhë me*

<sup>27</sup> Peru jinguyëjë rë xi tichja xu Jesús cjua vëhë ne, ngu na xi jiyajñi ngajñi rë xutacjín jan ne, cajindaya na cachja xu na cuitjin:

—Jemu ndaja tsëhë chjuun xi catsin rë ngayun, hacuaha jemu ndaja tsëhë ndanisin xi cavacuntuhun. —Cuatjin xu cachja na.

<sup>28</sup> Peru Jesús ne, cuitjin xu cafayangui me tsëhë na:

—Quixi, peru hitsë sa ndaja tsëhë xuta xi visiñuju me cjua rë Nina hacuaha vihndë me tsëhë. —Cuatjin xu cafayangui Jesús.

*Cafehya xuta tsehen ngu seña xi sahmi Nina*

<sup>29</sup> Vëhë ta jima tangun camaha sa xutacjín jan ne, cavetsihin cachja xu Jesús cuitjin:

—Ngayujun ni ngayun xuta tjë rë Israel tsëhë nixtin vihi matsejen ne, hatuxa tsehen cjuatacun nuju. Tichjahyun ngu seña xi sahmi Nina, peru sacuiin nuju matsejen ta ngu ni seña xi sacú nuju matsejen ne, sacuaha seña xi catsingacun profeta Jonás hatsëë nixtin. <sup>30</sup> Sacuatjin rë profeta Jonás xi me vëhë camá me ngu seña xi cuma rë xuta nandya Nínive hatsëë nixtin matsejen ne, ha cuanitjin ni ná ngahan xi Quihndi rë Xuta Jain ngahan matsejen ta ngahan cuma ngahan seña xi cuma nuju ngayujun ni xi nechun nixtin vihi. <sup>31</sup> Hya xi cuechú nixtin xi tsichuva Nina xuta tsëhë jyë rë me matsejen ne, na xi cavitexa ngajan nangui Sabá hatsëë nixtin matsejen ne, cjue cuinchajyë nuju na ngayujun ni ngayun xuta tjë rë Israel xi nechun nixtin vihi. Cuatjin sahmi na matsejen ta, tsëhë xi jercu tu cjin camahani xi canduva na xi cuihndë na cjuatacun ndacun xi jercu tu ma camahani rë Salomón, me xi cavitexa rë xutachanga naja hatsëë nixtin. Peru ha tejña ngahan nguehe sacuaha ngu seña xi hitsë sa vengui chji rë xi cuma rë Salomón. <sup>32</sup> Hacuaha hya xi cuechú nixtin xi tsichuva Nina xuta tsëhë jyë rë me matsejen ne, yëjë xuta nandya Nínive matsejen ne, cjue cuinchajyë nuju me ngayujun ni ngayun xuta tjë rë Israel xi nechun nixtin vihi. Cuatjin sahmi me matsejen ta, tsëhë xi me xi cuacun vëhë matsejen ne, catsindeya me cjuatacun rë me hya xi casua profeta Jonás camachaya rë me cjua rë Nina. Peru ha tejña ngahan nguehe sacuaha ngu seña xi hitsë sa vengui chji rë xi cuma rë profeta Jonás. —Cuatjin xu cachja Jesús.

*Ndihi rë yojo naja*

<sup>33</sup> Hane xi quijinduju sa cachja me ne, cuitjin xu cachja me:

—Tsajin hisca xi ngu xuta xi ha xcun xi ha cavatju cavetaha rë me ngu ndihi matsejen ne, faha me veyahma me o sá xi faha me veyahma me ngahma ngu caxa matsejen ta faha me vejña me cahndë rë, cojo sa xi yëjë xuta xi visehen me hiscan setí ndihi jan matsejen ne, scuëë me hasen rë. <sup>34</sup> Tuxcuun matsejen ne, vëhë xi sacuaha ndihi rë yojo naja. Vëhë xi hya



xi tuxcuun ndacun matsejen ne, hatuxa ma hasen cahntsua yojo naja. Peru sá xi tuxcuun chocun matsejen ne, hacuaha ma jñu cahntsua yojo naja. <sup>35</sup> Ndandaja ningatuhuntacún matsejen ne, sacuaha hasen xi jiya cahntsua yojo nuju matsejen ne, ¿há hasen xi cjuaquixi jain?, o há tsajin ne, ¿há jñú? <sup>36</sup> Quihndé matsejen ne, sá xi jingujyë ni yojo nuju jiya hasen, hisca xi hitsé jñú tsajin rë matsejen ne, jingujyë ni yojo nuju matsejen ne, jiya hasen sacuaha hya xi sahmi hasen tsajan hasen rë ngu ndihi. —Cuatjin xu cachja Jesús.

*Cacjan Jesucristu cojo cha fariseo cojo cha xi vicuya cjuachacun*

<sup>37</sup> Hane xi cajnetaha xu cachja Jesús ne, ngu cha fariseo ne, cachja cha cojo Jesús xi cjue sinë me cojo cha niñu. Xi cavisehen Jesús ndihya ne, quiji xu me cafaha me cahndé rë me xcun maxë. <sup>38</sup> Peru xi cavëë xu cha fariseo xcusun rë Jesús ne, jemu quijircun rë cha tséhë xi hacuiin titjun cavane xu me tsja me sehe sinë me niñu sacuaha vitexa xcusun rë xutachanga rë me. <sup>39</sup> Ngajan xi Nai naja ne, cachja xu me cojo cha cuitjin:

—Ngayujun ni ngayun xuta fariseo ne, xcusun nuju xi nihñu tyjahi táha ngaxtun ni ngu vasu o sá xi ngu tyuva, peru cahntsua xahasen nuju ne, quitsë camahani rë cjuatsehen cojo cjuatacun xi nimuju yëjë ni xcusun. <sup>40</sup> Sca nuju ngayun. Catijne rcun ta ha me xi casahmi ni táha ngaxtun ne, hacuaha ha me vëhë ni casahmi me táha cahntsua. <sup>41</sup> Peru xi hincha cahntsua ne, vëhë tuhun sacuaha caridad. Sá xi cuatjin nihñu ne, yëjë ni xcusun ne, tyjahi xi cuma nuju.

<sup>42</sup> Peru jemu chojyihî tsujun ngayun xuta fariseo, tséhë xi ngayun ne, handasa nihñu cuidadu xi tuhun diezmu nuju hisca cojo nchurca cojo ruda cojo yëjë sa xcusun ndeya ne, peru nihñucuenduun xi nihñu hacutjin xi cjuaquixi cojo xingun, hacuaha nihñucuenduun xi nihmutacún Nina. Ngayun ne, meje rë xi ha canihñucuendun Nina, peru hacuaha hacuiin nichayun diezmu nuju vë.

<sup>43</sup> Hacuaha jemu chojyihî tsujun ngayun xuta fariseo, tséhë xi ngayun ne, jemu ndama nuju xi cuatjin satë nuju cahndé xi matitjun tséhë cahntsua yungun. Hacuaha jemu ndama nuju xi cuatjin fi chja xuta nina cojo nuju ngajan ngajñi ndetsin.

<sup>44</sup> Hacuaha jemu chojyihî tsujun ta, handasa matsijin ne, peru jemu chocun xahasen nuju. Vëhë xi tangun ngayun cojo tsjun xi hisca matsijin, hane xuta ne, hisca machayiin rë me cjuî nduva me sune me xcun. —Cuatjin xu cachja Jesús.

<sup>45</sup> Ngajan xi ngu cha xi vicuya cjuachacun ne, cachja xu cha cuitjin cojo Jesús:

—Maestro, hya xi nújun cjuua vëhë ne, hacuaha cojo ngayin choho nújun tsijin. —Cuatjin xu cachja cha.

<sup>46</sup> Hane Jesús ne, cuitjin xu cachja me:

—Hacuaha cojo ngayun cha xi vicuya cjuachacun, jemu chojyihi tsujun, tsëhë xi vicuyun rë xuta jemu cjín xcusun xi jemu chja camahani cuma sahmichihin me, hane suvun ne, visecuún rë me hisca hitsë.

<sup>47</sup> Jemu chojyihi tsujun ngayun ta, tsëhë xi ngayun ne, nin-dujun tsjun ndacun tsëhë yëjë ni nima profeta xi xutachanga nuju catsiquehen me hatsëë nixtin. <sup>48</sup> Ngayun suvun ningacun xi chuya nuju xcusun xi casahmi xutachanga nuju ta, tsëhë xi ngu ladu ne, me vëhë catsiquehen me profeta xi cuacun vë, hane ngu ladu nga ne, ngayun nindujun tsjun rë.

<sup>49</sup> Vëhë xi Nina, me xi jemu vechútaha cjuatacun rë me ne, cachja me cuitjin: “Tsingátju profeta cojo apóstol ngajñi rë xuta xi siu nixtin vihi, hane yahnga me xi cuacun vë ne, tsiquehen xuta me, hane yahnga me ne, sua xuta cjuañihi xi cuatju me xi cuacun vë.” Cuatjin cachja Nina. <sup>50</sup> Hane cojo chuva vëhë ne, xuta xi siu nixtin vihi ne, me vëhë cháha rë me tsëhë cjuaveya rë yëjë profeta xi cahme hisca ntsacu cavetsihin ngasunhdë, <sup>51</sup> vetsihin cojo hisca cjuaveya rë xutachanga naja Abel vijnetaha cojo hisca cjuaveya rë xutachanga naja Zacarías, me xi catsiquehen rë xuta tiña ngasuncun hiscan ndatsen rë ndava Nina. Cuichjá nga cojo nuju ta yëjë cjuaveya xi cuacun vë ne, cháha rë xuta xi siu nixtin vihi.

<sup>52</sup> Jemu chojyihi tsujun, ngayun cha vicuya cjuachacun ta, tsëhë xi cavejñuxun cjuatacun rë Nina. Canitjungun cjuatacun rë me, hacuaha hisca catuun cahndë xi sacú rë xuta xi meje rë me cjuatacun rë Nina jan. —Cuatjin xu cachja Jesús.

<sup>53</sup> Hane hya xi tivetju xu Jesús tsëhë cahndë hiscan cajinë me niñu jan ne, cha xi vicuya cjuachacun cojo cha fariseo jan ne, jemu cjan rë cha, jemu cjín cjuua cafahtaha xu cha me, <sup>54</sup> hacuaha jemu cavangui xu cha chuva rë hacutjin xi sacú rë cha ngu cjuua rë me xi cuaaintjin cuichja me.

## 12

### *Cjuandacha xi sahmi cha fariseo*

<sup>1</sup> Jinguyëjë rë xi tichja sa xu Jesús cojo cha xi cuacun jan ne, jercu jima tangun camahani xuta, ña vehnchun xicjin me. Sehe ngajan xi Jesús ne, cavetsihin cachja xu me tjutjun cojo xuta ladu rë me cuitjin:

—Xicaninguisuhunjñuu cojo cha fariseo xi cuacun vë ta, tsëhë xi cjuandacha xi sahmi cha ne, tangun cojo san rë pan xi hatuxa vitsojo ngajñi rë yëjë ni nahyu. <sup>2</sup> Yëjë ni xcusun

xi casetsanguí ne, cuechú nixtin xi chjaháxin rē xi titsanguí rē. Vēhē xi yējē ni xcusun xi hma ne, handasa sehmangui ne, peru cuechú nixtin xi cuetjucaa tsejen. <sup>3</sup> Yējē ni cjua xi má hiscan jñu ne, cuechú nixtin xi cuinuhya rē hiscan hasen. Vēhē xi yējē ni cjua xi má táha hma ne, cuechú nixtin xi cuinuhya rē táha tsejen.

*Yo xi meje rē xi rcún*

<sup>4</sup> Nguehe cuichjá cojo nuju, ngayujun ni. Xicarcuun xuta xi tsiquehen nuju me, hane ngaxtun vēhē ne, ha quihndē tsajin mé sa xi cuma sahmi me cojo nuju. <sup>5</sup> Peru nguehe cuichjá cojo nuju yo xi meje rē xi rcún. Meje rē xi Nina xi rcún me. Me xi ngaxtun xi ha catsiquehen nuju ne, tjin rē me cahndē xi tsingatjenja nuju me hiscan xi má hasen rē nima castigu. Cuichjá nga cojo nuju ta hatuxa me vēhē xi meje rē xi rcún me.

<sup>6</sup> 'Chutsujun ta hñú chu nisē langa ne, jemu xtengui chji rē chu. Peru Nina ne, tsichayaain me hisca xi ngu chu. <sup>7</sup> Hacuaha ngayun ne, hisca tsjarcun xqui tjin rē Nina. Vēhē xi xicarcuun ta, tsēhē xi jima ngu ngayun ne, hitsē sa jercu vengui chji nuju xi cuma rē xi jemu cjín chu nisē vē.

*Xuta xi tsinguixi me xi xuta ladu rē Jesucristu má me*

<sup>8</sup> Nguehe cuichjá cojo nuju ta yējē xuta xi tsinguixi me xcun xuta xi yahnga xi xuta ladu naha má me ne, hacuaha ngahan xi Quihndi rē Xuta Jain ngahan ne, tsinguixē xcun yējē ni ángel rē Nina xi xuta ladu naha má xuta xi cuacun vē. <sup>9</sup> Peru yējē xuta xi tsinguixi me xcun xuta xi yahnga xi hacuiin xuta ladu naha má me ne, hacuaha hacuanitjin ni tsinguixē ngahan xcun ángel rē Nina.

<sup>10</sup> 'Hacuaha yējē xuta xi choho chja me tsahan, ngahan xi Quihndi rē Xuta Jain ngahan ne, tsinchataha Nina me, sá xi cjuehya me cjuaninchataha. Peru yējē xuta xi choho chja me tsēhē Hasen rē Nina ne, tsajin cjuaninchataha xi cuma rē me.

<sup>11</sup> 'Hya xi xuta nandya cjuaha nuju me cjuecojo nuju me xcun xutaxa rē yungun o sá xi xcun xutaxa rē ndihyavasen ne, hacuiin cumacjintacún tsēhē chuva rē hacutjin xi chjayunngun o tsēhē xi cuinújun ta, <sup>12</sup> tsēhē xi ha hora vēhē ni ne, Hasen rē Nina cuichja cojo nuju mé cjua xi meje rē xi cuinújun. —Cuatjin xu cachja Jesús.

*Mijí rē xi jercu nimeje cjuanchina*

<sup>13</sup> Hya xi camá ne, ngu xuta tsēhē ngajñi rē xutacjín jan ne, cachja xu me cojo Jesús cuitjin:

—Maestro, tinújun cojo cha vēhē xingueen, catisua cha ngahan xcusun xi satē ná xi cavejña nahmi niji hya xi cahme me. —Cuatjin xu cachja me.

<sup>14</sup> Sehe ngajan xi Jesús ne, cuitjin xu cachja me:

—Peru ngahan ne, hacuiin xá naha xi ngahan cuátëcja xcusun xi satë nuju xingu xingu ngayun. —Cuatjin xu cachja Jesús cojo xuta jan.

<sup>15</sup> Sehe cachja nga xu me cojo xutacjín jan cuitjin:

—Nechun cuidadu, hacuiin jercu nimuju cjuanchina matsejen ta, tsëhë xi hacuiin ngatsë rë cjuanchina xi tjin naja matsejen ne, vëhë xi ndacun cjuahñu naja. —Cuatjin xu cachja me.

<sup>16</sup> Ngaxtun vëhë ne, sehe cachja xu Jesús ngu ejemplu cojo xuta cuitjin:

—Cuejña ne xi ngu cha nchina jan matsejen ne, jercu ndaja camá xitjë xcun nangui rë cha. <sup>17</sup> Hya xi camá ne, cuitjin catsingataha cacun cha: “¿Mé xi ndatjin sahme quihndë? Ha quihndë tsajin ná cahndë hiscan xinchandaja tutjë naha. <sup>18</sup> Ndatjin rë xi cuitjin sahme. Tsinguétsun ndihya hiscan hinchandaja tutjë naha, hane tsindaja xi hitsë sa yehe. Hane ngajan cuínchandaja yëjë tutjë naha cojo ngu tsë ngu xtí sa xi tjin ná. <sup>19</sup> Hane sehe cuichjá cojo xahasen naha cuitjin: Jercu cjín camahani xcusun hinchandaja ná quihndë, hacuaha jemu cjín nu cjuecani rë. Cuitejñajenda quihndë. Sínë cuëhë tsahan. Suá cjuasua xahasen naha.” Cuatjin catsingataha cacun cha nchina jan. <sup>20</sup> Ngajan xi Nina matsejen ne, cuitjin cachja me cojo cha: “Sca ri ngaye. Nguixun quihndë ne, cueye. Hane yëjë xcusun xi cavetje ne, tsajin mé sacú ri tsëhë.” Cuatjin cachja Nina. <sup>21</sup> Cuatjin rë xuta xi jercu vetjo cjuanchina xi cuma rë suvá me, peru xcun Nina matsejen ne, tsajin mé xi tjin rë me. —Cuatjin xu cachja Jesús ejemplu vëhë.

### *Sahmi cuidadu Nina xuta ladu rë me*

<sup>22</sup> Ngajan xi Jesús ne, cuitjin cachja xu me cojo xuta ladu rë me:

—Vëhë xi cuichjá cojo nuju ta: Hacuiin cumacjintacún tsëhë xcusun xi xinu xi sua nuju ngahñu. Hacuaha hacuiin cumacjintacún tsëhë tsjian xi chujun. <sup>23</sup> Hacuiin cumacjintacún ta, tsëhë xi hitsë sa vengui chji rë cjuahñu nuju xi cuma rë xi chinu. Hacuaha hitsë sa vengui chji rë yojo nuju xi cuma rë tsjian xi chujun. <sup>24</sup> Chutsujun chu chenda ta hacuiin tsitjë chu, hacuiin fanga chu, hacuaha tsajin rë chu ndyahnga hiscan cuinchandaja chu xi sinë chu. Peru Nina tsicjen me chu. Ngayun ne, hitsë sa jercu vengui chji nuju xi cuma rë chu nisë. <sup>25</sup> Hacuaha tsajin hisca xi ngu xuta xi cuma cuesuntaha me cjuahñu rë me hisca ngu hora ngatsë rë xi ma cjín cacun me. <sup>26</sup> Sá xi hitsë lihndi xcusun vëhë maji nihñu ne, ¿mé má jercu macjintacún tsëhë xcusun xi yahnga jan ni?

27 'Chutsujun naxu liriu ta tsihyaain nachjun hacuaha fahyaain tsjian. Peru ngahan cuichjá cojo nuju ta tsjian rë xutachanga naja Salomón ne, handasa jercu ndacun camahani, peru hitsë sa ndajyihi ngu naxu vëhë. 28 Sá xi cuatjin tsicaja Nina xca nguijña xi ngu nixtin ne siutahá nguijña, hane xitu ngu nixtin ne cueti ne, hitsë sa ngayun ta hatuxa tsicaja nuju me, ngayun xi cjëë cumangutacúnndujun cojo me. 29 Hacuian jercu nijendun rë xahasen nuju xi vinchunsun xi xinu xi siuhun ta, 30 tsëhë xi xcusun vëhë ne, yëjë xutaxín tsëhë jin-gujyë ni ngasunhndë ne, me vëhë xi vangui me xcusun vëhë. Peru ngayun ne, Nina Nahmi naja ne, ha vëë me xi hatuxa sahmi ngujyë xi sacú nuju xcusun vëhë. 31 Catamarcun nuju tsëhë gobiernu xi sahmi Nina, hane xcusun vëhë ne, quitahácoo sa sacú nuju.

### *Cjuanchina xi tacun ngahnga*

32 'Xicamacjiintacún ngayun xuta ladu naha xi jemu chúva má ngayun ta, tsëhë xi Nina Nahmi naja ne, ha cavejña cacun me xi cojo cjuandaja rë me ne, sua nuju me xá xi nihñu gobiernu hiscan xi sahmi me gobiernu. 33 Titeñu xcusun xi tjin nuju, hane tujún xi sacú nuju ne, tuhun rë xuta xi tsajin rë me, sacuaha tuhun ngu caridad. Nihñu ngujyë xi sacú nuju cjuanchina xi jercu cjuecani rë. Cuma cuinújan ne, ngu cjuanchina xi tsajin nixtin cjuë xi cuetjún ngajan ngahnga hiscan xi cha chëjë ne, maji ma tiña cha, hisca chu quixún ne, tsinguetsiin chu. 34 Cuatjin meje rë xi nihñu ta, tsëhë xi hiscan tetjo cjuanchina nuju ne, hacuaha ngajan quitahá cjuatacun nuju.

### *Meje rë xi tjinchjine ngayaan tsëhë xi cjuehe Nai naja*

35 'Tuhunchjinu yojo nuju, hacuaha catisetí ni ndihi nuju, tsëhë xi cjuehe Nai nuju. 36 Nihñu sacuatjin sahmi hndixahan xi viyujuya me nai rë me, hya xi nai rë me quiji ngu ndava suhi. Siuchjine ni me cojo sa xi hora xi cjuehe nai rë me ne, xi tu cuichja ne, ngutjen cjue scuxaha me tingotjo xi cuisehen nai rë me. 37 Jemu ndaja tsëhë yëjë hndixahan xi, hora xi cjuehe nai rë ne, sacútsja rë xi siu quicun. Nguehe cuichjá cojo nuju cjuaquixi ta, xi scuëë nai rë hndixahan jan xi cuatjin quicun hndixahan ne, cuëhëchjine me yojo rë me, sehe cjuecojo me hndixahan xcun maxë, sehe cuiyuju me xi sinë me. 38 Jemu ndaja tsëhë hndixahan xi sacútsja rë nai rë xi siu quicun, handasa nixten cjuehe me o sá hisca tiña sahasen cjuehe me. 39 Hacuaha meje rë xi cumachaya nuju cjuatacun vihi: sá xi nai rë ngu ndihya ha machaya rë me hora xi cuinduva cha chëjë ndava me ne, suaain me cahndë xi scuxaha cha ndava me, sehe tsichëjë cha. 40 Hacuianitjin ni

meje rë xi ngayujun ni ngayun ne, tuhunchjину yojo nuju ta, tsëhë xi hora xi ningatuuntacún xi cjuëhë ngahan xi Quihndi rë Xuta Jain ngahan ne, hora vëhë rë cjuëhë. —Cuatjin xu cachja Jesús.

*Xuta xi vihndë cojo xi vihndiin tsëhë Nina*

<sup>41</sup> Hya xi camá ne, Pedru ne, cuitjin xu cachja me cojo Nai naja:

—Tatá. Ejemplu xi canújun vë ne, ¿há suvin ni ngayin xuta ladu nuju meje rë xi cuetihinrcuin?, o há tsajin ne, ¿há cojo yëjë sa xuta xi yahnga cuetaharcu me? —Cuatjin xu cachja Pedru.

<sup>42</sup> Ngajan xi Nai naja ne, cuitjin xu cafayangui me:

—Ngayujun ni ne, meje rë xi nihñu sacuaha sahmi ngu hndixahan xi jemu quicun cacun xi sahmichihin yëjë ni hacutjin xi meje rë nai rë, ngu hndixahan xi cjuahaxa xi cjuahacuenda rë yëjë sa hndixahan xi hora tjin sua xi sinë.

<sup>43</sup> Jemu ndaja tsëhë ngu hndixahan xi, hora xi cjuehe nai rë ne, sacútsja me hndixahan jan xi tisahmi tutjin xi casuaxa rë nai rë. <sup>44</sup> Cuichjá cojo nuju cjuaquixi ta, nai rë hndixahan vëhë ne, suaxa me hndixahan vëhë xi hacuaha cjuahacuenda yëjë sa xcusun xi tjin rë me.

<sup>45</sup> Peru cuejña ne xi hndixahan vëhë ne, tsingataha cacun cojo cjuatacun rë cuitjin: “Nai naha ne, tijima tafi sa xi cjuehe me.” Cuatjin tsingataha cacun. Sehe cuetsihin cuaja rë hndixahan xi yahnga jan, hacuaha cuetsihin cuatjutaha sinë cuihi hisca cuma chihi.

<sup>46</sup> Peru cuechú ngu nixtin xi tsajin tacunya hndixahan vëhë, ngu hora xi hisca hvíin ne, hya cjuehe nai rë, hane jemu jyë castigu sahmi me. Sehe tsingatju me cuatjutangun cjuañihi cojo hndixahan xi yahnga xi casahmichiin tutjin xi casatëxa rë.

<sup>47</sup> Hndixahan xi ha ndaja vëë hacutjin xi meje rë nai rë hane cavihinchjini, hacuaha casahmi tutjin meje rë nai rë ne, jemu sehen camahani rë. <sup>48</sup> Peru hndixahan xi hvíin hacutjin xi meje rë nai rë hane casahmi xcusun xi vechú chuva rë xi cuma castigu ne, chúva sehen rë. Hane yëjë ni hndixahan xi jemu cjín xcusun xá casua nai rë xi sahmi ne, hacuaha cuatjin jercu cjín cjua chjahya rë hya xi sahmi entregadu cuenta rë.

*Sahmi Jesucristu xi sahmi condra xuta xicjin me*

<sup>49</sup> Ngahan ne, canduvá ne xi cuétaha rë sacuaha ngu ndihi ngasunhndë, ngu ndihi xi tsingacun mé cún cjuatacun rë xuta. Hacuaha jemu meje ná xi ha hisca ha casetaha rë.

<sup>50</sup> Ngahan ne, tjin ná xi cuátju ngu cjuañihi sacuatjin rë ngu xuta xi tjin rë me xi satë rë me nandá hya xi xtenda me.

Hacuaha jercu choho má ná hisca xi cuma chihin cjuacjintacun vëhë. <sup>51</sup> Xi má nuju ngayun ne, ¿há cjuajeya canduvácojo xi cuma rë xuta ngasunhndë? Hacuiin cuatjin. Ngahan ne, canduvá ne xi sahme xi sahmi condra xuta xicjin me. Cuatjin sahmi condra xicjin me ta, tsëhë xi ngujo me ne, cumangu cacun me cojo ná, hane ngujo nga me ne, cumanguaain cacun me cojo ná. <sup>52</sup> Xi cuetsihin nixtin vihi ne, hisca cojo xi cjuiniji sa ne, cuejña ne xi ngu ndihya ne, siu hñú xuta cojo xicjin me. Hane jyan me ne, sahmi condra me me xi jo jan. Hane me xi jo jan ne, sahmi condra me me xi jyan jan. <sup>53</sup> Nahmi ne, sahmi condra me cha quihndi rë me, hane cha quihndi rë me jan ne, sahmi condra cha nahmi rë cha. Naa ne, sahmi condra me na quihndi rë me, hane na quihndi rë me ne, sahmi condra na naa rë na. Nahya ne, sahmi condra me jahnda rë me, hane jahnda rë me ne, sahmi condra na nahya rë na. —Cuatjin xu cachja Jesús cojo xuta ladu rë me.

*Camamiji cuijne rcu xuta xcusun xi casahmi Jesucristu*

<sup>54</sup> Hya xi camá ne, cachja nga xu Jesús cojo xutacjín jan cuitjin:

—Nguehe nangui naja matsejen ne, hya xi chutsujun xi tivisecún ngu yuffi ngajan táha ladu vetje tsuhi matsejen ne, ngutjen nújun ta cuaha ngu tsi hñu, hane cuatjin jain má. <sup>55</sup> Hane hya xi vanga ngu tjo xi cjui táha ladu ngatihin matsejen ne, ngayun matsejen ne, nújun ta cuma suë, hane cuatjin jain má. <sup>56</sup> Jemu hyun mé vijne xcusun xi cún nangui cojo xcusun xi cún ngahnga. ¿Mé má nújun xi hyúun mé vijne xcusun xi tijima nixtin vihi ni? ¡Jemu ndacha ngayun!

*Meje xati rë xi cuichancjan si xi tacun ngajñi naja cojo Nina*

<sup>57</sup> Hane ngayun matsejen ne, ¿mé má nichuvuun suvun cojo cjuatacun nuju xcusun xi cjuaquixi ni? <sup>58</sup> Ndiya tivangun cojo xuta xi meje cuinchajyë nuju ngajan xcun xutaxa rë matsejen ne, nihñu ngahñu xi cuisuhun cjuandaja cojo me, cojo sa xi xticja si xi tacun ngajñi nuju cojo rë me matsejen ta, sá tsajin ne, cjuecojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane mayu jan matsejen ne, cjue cueyá nuju me ndavaya. <sup>59</sup> Hane cuichjá cojo nuju cjuaquixi matsejen ta hatuxa cuetjuun tsëhë ngajan jinguyëjë rë xi cjëë cuechjun yëjë ni tujún xi quitjun. —Cuatjin xu cachja Jesús.

## 13

*Sahmi ngujoyë xi nindeyan cjuatacun naja*

<sup>1</sup> Ha hora vëhë ni ne, cafehe xu ngujo xuta hiscan tacun Jesús. Hane cachja xu me cojo Jesús tsëhë ngujo xuta tsëhë

distritu Galilea xi cavitexa Pilatu xi cueya hya xi titsiquehen xuta xi cuacun vë chu rë me xi sua me cjuatjo cojo Nina.

<sup>2</sup> Ngajan xi Jesús ne, cuitjin xu cachja me cojo xuta xi cachja cojo rë me jan:

—Hane tsëhë xi cuatjin cahme ngujo xuta Galilea xi cuacun vë ne, ¿há vëhë xi má nuju xi hitsë sa tsehen me xi cuma rë yëjë sa me xi yahnga? <sup>3</sup> Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. <sup>4</sup> O há tsajin ne, xuta xi tyjuhunjyan xi cahme hya xi caticjane rë torre tsëhë Siloé jan ne, ¿há má nuju xi hitsë sa tsehen me xi cuma rë yëjë sa xuta xi caviyuju ngajan Jerusalén? <sup>5</sup> Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. —Cuatjin xu cachja Jesús.

*Ejemplu tsëhë ya xi cavaquiin tú rë*

<sup>6</sup> Sehe ngajan xi Jesús ne, cachja sa xu me ngu ejemplu cojo xuta jan, cojo sa xi sua me cumachaya rë xuta xi jemu chúva camá nixtin xi cuma tsindeya xuta cjuatacun rë me. Cuitjin cachja me:

—Cuejñaa ne xi ngu ya túhaxi jan ne, secun xcun nangui rë ngu cha jan. Hane xi canduva cha xi tsëhë jan, vanguise cha tú rë ne, casacuiin rë cha. <sup>7</sup> Sehe ngajan xi cachja cha cojo cha mosu rë cha cuitjin: “Ha tjin rë jyan nu xi vinduva vanguësë tú rë ya vi ne, sacuiin ná. Tiche. ¿Mé má tu cuenda cuisecun tsinguetsun rë nangui?” Cuatjin cachja cha xi tsëhë jan. <sup>8</sup> Ngajan xi cha mosu jan ne, cuitjin cafayangui cha: “Tatá. Tuhun rë cahndë catisecun ndastu ngu nu sa, hane cuacján nangui rë, hacuaha cuíncha rë abono. <sup>9</sup> Xi cuatjin ne, ¿há suaain tú rë nduva nga ngu nu? Hane sá xi hacuaha ni suaain tú rë ne, sehe cuichan.” Cuatjin cafayangui mosu jan. Cuatjin xu fi ejemplu xi cachja Jesús.

*Casahmi Jesucristu xi camandaja ngu chjuun nixtin xi chjahájenda rë*

<sup>10</sup> Ngu nixtin xi chjahájenda rë, hya xi tivicuya xu Jesús cahntsua ngu yungun jan ne, <sup>11</sup> ngajan tacun ngu chjuun xi ha cjui tyjuhunjyan nu xi camaticua na hane ha quihndë maji xu ma quixi nínda ngaxtun na. <sup>12</sup> Xi cavëë Jesús na ne, cajindaya xu me na, sehe cachja me cojo na cuitjin:

—Ngayun tsan ne, ha camandaya ngayun tsëhë xi cuatjin jyihi ngayun vë. —Cuatjin xu cachja Jesús.

<sup>13</sup> Hane ha hora vëhë ni cavisanetsja xu me na, hane ngutjen ni camaquixi nínda ngaxtun na. Hya xi camá ne, cahmi jyë cahmi hnga xu na Nina. <sup>14</sup> Peru presidente rë yungun jan ne, jemu camacjan xu rë me tsëhë xi cahmi



Jesús xi camandaja ngu chjuun nixtin xi chjahájenda rë. Vëhë xi cachja xu me cojo xutacjín jan cuitjin:

—Tjin naja jyun nixtin xi nihña xá. Vëhë xi meje rë xi ngajñi rë jyun nixtin vëhë matsejen ne, hya nduvun xi cumandaja ngayun, hacuïn xi tu nixtin xi chjahájenda rë matsejen ne, hya cuinduvun. —Cuatjin xu cachja presidente rë yungun jan.

<sup>15</sup> Peru Nai naja ne, cuitjin xu cachja me:

—¡Jercu choho ningatuhuntacún! Jima ngu ngayun matsejen ne, hatuxa vuhunndayun ndyaja vuhunndayun burru nuju tsëhë cahndé rë chu xi cuangun nicuhun chu nandá, handasa nixtin xi chjahájenda rë. <sup>16</sup> Hane na vihi xi xuta ladu rë Nina na hacuaha tjinñu rë Satanás na cahntsua tyjuhunjyan nu matsejen ne, ¿há ndaintjin xi sehenndaya na nixtin xi chjahájenda rë ni? —Cuatjin xu cachja Nai naja.

<sup>17</sup> Hane xi café xu cachja Jesús cjua vëhë ne, yëjë ni xuta xi má condra rë me ne, jemu camasava xu rë me. Peru yëjë sa xuta xi yahnga ne, jercu ndaja camá xu rë me tsëhë yëjë ni xcusun ndaja xi casahmi Jesús.

### *Ejemplu tsëhë tutjë lihndi*

<sup>18</sup> Hacuaha cachja sa xu Jesús ejemplu vihi:

—Gubiernu xi sahmi Nina ne, ¿mé xi tangun cojo?  
<sup>19</sup> Tangun cojo ngu tutjë xi jemu lihndi camahani. Hya xi ngu xuta tsitjë me tutjë vëhë xcun nangui rë me ne, cuetju, cuma ngu ya, hisca nisë xi vitjen chu ngahnga ne, sahmi chu ndava chu rcu. —Cuatjin xu cachja Jesús.

### *Ejemplu tsëhë san rë pan*

<sup>20</sup> Cavuya cachja nga xu Jesús cuitjin:

—Gubiernu xi sahmi Nina ne, ¿mé xi tangun cojo?  
<sup>21</sup> Tangun cojo san rë pan xi visecjan ngu chjuun ngajñi rë nahyu rë pan cojo sa xi sahmixa ngajñi rë yëjë ni nahyucjín jan. —Cuatjin xu cachja Jesús.

### *Ejemplu tsëhë tingotjo xcu*

<sup>22</sup> Ndiya cjui xu Jesús ngajan Jerusalén ne, cavatju xu me nandya cojo ranchun xi siu ndiya cjui me jan, hane cachja me cojo xuta cjua rë Nina. <sup>23</sup> Hya xi camá ne, cavinenguisse xu ngu me xi cavinenguisse rë Jesús cuitjin:

—Tatá. ¿Há jemu chúva xuta xi tivetjutje me? —Cuatjin xu cavinenguisse xuta jan.

Sehe ngajan xi Jesús ne, cachja xu me cojo xuta xi siu jan cuitjin:

<sup>24</sup> —Nihñu ngahñu xi cuma cuisuhun hiscan sahmi Nina gobiernu táha tingotjo xi xcu ta, tsëhë xi nguehe cuichjá cojo nuju ta cuechú nixtin xi jemu cjín xuta xi cuma meje cuisehen

me jan, peru cumaji. <sup>25</sup> Ta hya xi ngahan xi nai rë cahndë vëhë ngahan, cuinduva cuéchja tingotjo ne, ngayun ne, cuinechun candatsen, sehe cujanntsun tingotjo jan hacuaha cuitjin cuinújun: “Tatá. Chuxuhun tingotjo tsijin.” Cuatjin cuinújun. Hane xi cjuayanguë tsujun ne, cuitjin cuichjá: “Hveen jani canduvun ngayun.” Cuatjin cuichjá cojo nuju. <sup>26</sup> Hane ngayun ne, cuitjin cuinújun nga: “Cachini cahyin tangun cojo nuju, hacuaha nangui niji canujyuhunyun cavicyun cjua rë Nina.” Cuatjin cuinújun. <sup>27</sup> Hane cuitjin cuichjá nga cojo nuju: “Hveen jani nandya nuju. Tángunxun tsahan, ngayujun ni ngayun xuta sahmi cjuatsehen.” Cuatjin cuichjá. <sup>28</sup> Ngajan ni ne, jemu chjihndun hacuaha nijanurii nehñu, hya xi chutsujun Abraham cojo Isaac cojo Jacob, cojo yëjë profeta xi siu me ngajan hiscan xi sahmi Nina gobiernu, peru ngayun ne, caviyujú nuju candatsen. <sup>29</sup> Hane cuinduva xuta tséhë táha ladu vetjucaa tsuhi cojo táha ladu vetje tsuhi cojo yëjë sa ladu, cuinduva me sinë tangun me hiscan xi sahmi Nina gobiernu. <sup>30</sup> Nguehe cuichjá cojo nuju ta yahnga xuta xi tjengui me quihndë ne, me vëhë cuma titjun me, hane yahnga me xi titjun quihndë ne, me vëhë cuma tjengui me hya xi cuejña Nina gobiernu rë me jan. —Cuatjin xu cachja Jesús.

*Jemu choho camá rë Jesucristu ngatsë rë xuta Jerusalén*

<sup>31</sup> Ha hora vëhë ni ne, cafehe xu ngujo cha fariseo, hane cuitjin xu cachja cha cojo Jesús:

—Ndatjin xi tetjunxun tséhë nguehe ta, tséhë xi Herodes ne, meje tsiquehen nuju me. —Cuatjin xu cachja cha xi cuacun jan.

<sup>32</sup> Hane ngajan xi Jesús ne, cuitjin cafayangui xu me:

—Tángun ne tinújun cojo rë chu ninda vë cuitjin: “Chutsujun ni, quihndë cojo nchujun ni ne, cuáxëxen xitsehen hacuaha sahme xi cuma ndaja xuta hmu rë, hane nguini ne, tsinguijnetaha xá xi tisahme.” Cuatjin tinújun. <sup>33</sup> Peru hacuaha sahmi ná nguýë xi cjuë sa quihndë nchujun ni cojo nguini hisca xi cjuéhë hiscan xi tifë ta, tséhë xi profeta ngahan, hane ngu profeta ne, cumaji xi cueya jingusa nandya xi hacuiin nandya Jerusalén.

<sup>34</sup> ¡Ngayun xuta Jerusalén, ngayun xi cojo ndyojo nicuhun profeta xi tsingatju Nina ngajñi nuju! ¡Jemu choho má ná! ¡Mé hitsë ndiya xi meje scávëvaha nuju sacuaha javëvaha ngu nisë quihndi rë chu xi cuincha chu ngahma tyjunga rë chu, peru ngayun ne, mijí nuju! <sup>35</sup> Chutsujun ni, Nina ne, catsismicacun me ngayun. Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi titsingatju me ngajñi naja!” —Cuatjin xu cachja Jesús.

## 14

*Casahmi Jesucristu xi camandaja cha xi yaha rë chíhinsquee*

<sup>1</sup> Cuitjin camá xu ngu nixtin xi chjahájenda rë hya xi quiji cajinë Jesús niñu ndava ngu cha xi matitjun ngajñi rë cha fariseo. Xi cafehe Jesús jan ne, cha xi siu jan ne, siu tifa-hachuva xu ni cha Jesús. <sup>2</sup> Hacuaha hiscan tacun Jesús ne, ngajan xu tacun ngu cha xi yaha rë chíhinsquee. <sup>3</sup> Ngajan xi Jesús ne, cavinenguise xu rë me cha xi vicuya cjuachacun cojo cha fariseo cuitjin:

—¿Há tjin cahndë nixtin xi chjahájenda rë xi nihña xi cumandaja xuta, o há tsajin cahndé? —Cuatjin xu cavinenguise Jesús.

<sup>4</sup> Hane cha xi cuacun jan ne, tu caviyujujyuu xu ni cha. Hya xi camá ne, cafaha xu Jesús cha hmu rë jan, hane casahmi me xi camandaja cha, sehe catsingatju me cha cafe cha. <sup>5</sup> Sehe cavinenguise xu me cha xi siu jan cuitjin:

—¿Há tjin ngu ngayun xi nixtin xi chjahájenda rë ne, cuanguun marcu macjain naxun quihndi nuju o sá ndyaja nuju sá xi cjuinenguia ngu ndava nandá xi jemu nungun? —Cuatjin xu cavinenguise me.

<sup>6</sup> Hane cha xi cuacun jan ne, camaji cafayangui xu cha hisca xi ngu cjua xi meje rë Jesús.

*Meje rë xi ninguijne yojo naja*

<sup>7</sup> Hya xi camá ne, tsëhë xi vutsejen xu Jesús xi xuta xi cachjindaya rë tsëhë suhi jan ne, tivaxijin me cahndë xi matitjun ngajan xcun maxë ne, vëhë xi cachja xu me cojo xuta jan cuitjin:

<sup>8</sup> —Hya xi chjindaya nuju cuangun xinu ngu comida ne, xicachjuun cahndë xi matitjun ngajan xcun maxë ta sá tu hacuaha cachjindaya rë ngu me xi hitsë sa meje rë xi chjahárcun rë xi cuma nuju ngayun. <sup>9</sup> Hane cuinduva me xi cajindaya nuju catsijotjun ni ne, cuichja me cojo nuju cuitjin: “Tuhun rë me vihi cahndë nuju vë.” Cuatjin cuichja me cojo nuju. Ngajan xi ngayun ne, cojo jyë cjuasava ne, cuangun chjuhun cahndë xi ma tjengui. <sup>10</sup> Xi meje rë ne, hya xi cuatjin chjindaya nuju ne, tángun chjuhun cahndë xi ma tjengui, cojo sa xi hya xi cuinduva me xi cajindaya nuju ne, cuichja me cojo nuju cuitjin: “Ngayun ne, nduvun chjuhun ngu cahndë xi hitsë sa matitjun.” Cuatjin cuichja me. Ngajan xi ngayun ne, jercu sahmi jyë sahmi hnga nuju me ngajñi rë yëjë xuta xi siu jan. <sup>11</sup> Cuatjin cuma ta, tsëhë xi yëjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi yehe rë me.

<sup>12</sup> Hacuaha cachja nga xu Jesús cuitjin cojo me xi cajindaya rë me:

—Hya xi nihñu ngu suhi ne, xicachjindayuun rë amigu nuju, xicachjindayuun rë xingun, hacuaha xicachjindayuun rë xuta nchina xi siu tahndee ndya nuju, sá tu hacuaha squindaya nuju me xi cuangun ndava suhi rë me, hane cojo vëhë ni ne, ha camangojo cjuandaja nuju. <sup>13</sup> Cahndë rë vëhë ne, hya xi nihñu ngu suhi ne, chjindayun rë xuta yuma, chjindayun rë xuta xi yoho me, chjindayun rë xuta rengun, hacuaha chjindayun rë xuta rcá. <sup>14</sup> Sá xi cuatjin nihñu ne, jemu ndaja tsujun ta, tsëhë xi xuta xi cuacun vë ne, tsajin rë me mé cojo sahmingojo me cjuandaja nuju. Peru Nina sahmingojo me tsujun hya xi tsicuya me cjuahñu xuta xi tsajin jyë rë. —Cuatjin xu cachja Jesús.

### *Ejemplu tsëhë ngu suhi jyë*

<sup>15</sup> Hane xi cahndë xu ngu cha xi cojo tijinë jan cjua xi cachja Jesús ne, cuitjin xu cachja cha cojo rë me:

—¡Jemu ndaja tsëhë xuta xi sinë me niñu hiscan xi sahmi Nina gobiernu! —Cuatjin xu cachja cha.

<sup>16</sup> Ngajan xi Jesús ne, casuacuenda xu me cha ngu ejemplu vihi:

—Cuejña ne xi ngu cha jan ne, casahmi cha ngu suhi jyë, hacuaha jemu cjín xuta cajindaya rë cha me. <sup>17</sup> Xi casune hora xi sinë cha cojo xuta ne, sehe catsingatju cha hndixahan rë cha ndava xuta xi ha cachja cha cojo xi cuichja hndixahan jan cojo rë xuta cjua vihi: “¿Há cuangun xu ta, ha tjin chjine yëjë ni?” Cuatjin cachja hndixahan jan. <sup>18</sup> Hya xi camá ne, cavetsihin jima ngu me cachja me mé tsëhë xi cumaji cjue me. Hane me xi tjutjun ne, cuitjin cachja me cojo hndixahan jan: “Ngu rquí nangui cavátsë ne, sahmi ná ngu jyë xi cjuë scutséjen. Vëhë xi cumaji cjuë ndava suhi.” Cuatjin cachja me. <sup>19</sup> Hane ngu nga me ne, cuitjin cachja me: “Cavátsë hñú ninchin ndyaja, hane cjuë cjuaháchuva chu. Vëhë xi cumaji cjuë ndava suhi.” Cuatjin cachja me. <sup>20</sup> Hane ngu nga me ne, cuitjin cachja me: “Cumaji cjuë ta, tsëhë xi ngahan ne, ha cavíxan.” Cuatjin cachja me. <sup>21</sup> Hya xi camá ne, hndixahan jan ne, quiji cachja cojo nai rë cjua xi cachja xuta xi cuacun jan. Hane xi camacjan rë nai rë ndihya jan ne, cuitjin cachja cha cojo hndixahan rë cha: “Tetji ne, tihin sanii ngajan ndiyatë cojo ndiyahndë tsëhë ngajñi nandya ne, chjindaye rë xuta yuma cojo xuta yoho cojo xuta rcá cojo xuta rengun ne, ndovecueje me.” Cuatjin cachja cha. <sup>22</sup> Hane xi cavuya hndixahan jan ne, cuitjin cachja: “Tatá. Camá tutjin xi cavitexun ná, peru tjin sa cahndë.” Cuatjin cachja hndixahan jan. <sup>23</sup> Ngajan xi cachja nga nai rë hndixahan jan

cojo rë cuitjin: “Tihin nga hisca ndiya nguijña, hane nihñi rë xuta ngujoyë ndovecueje me, cojo sa xi catitsë rë ndya naha. <sup>24</sup>Nguehe cuichjá cojo ri ta hisca xi ngu me xi cajindáya rë tjun tjun ne, satiin rë me sinë me tsëhë suhi xi tisahme.” Cuatjin cachja nai rë hndixahan jan. —Vëhë cajnetaha xu ejemplu xi casuacuenda Jesús.

*Meje rë xi nihña cuenta há scaa naja cuiseen ladu rë Jesu-cristu*

<sup>25</sup>Ngajan xi hya xi quiji sa xu Jesús ndiya rë me xi cjui me Jerusalén ne, jemu cjin camahani xuta cjui me cojo rë me. Hane xi cavuya me cavutsejen me xutacjin jan ne, cuitjin xu cachja me:

<sup>26</sup>—Sá xi tjin ngu ngayun xi meje cuinduvuntjengun ná matsejen ne, meje rë xi hitsë sa nihmutacún ná ngahan xi cuma rë xi nihmutacún nahmi nuju, naa nuju, chjuun nuju, quihndi nuju, xingun, hisca cojo yojo nuju suvun. Sá tsajin ne, cumaji cuma ngayun ngu xuta ladu naha. <sup>27</sup>Jarë ngayun xi nduvuntjengun ná matsejen ne, sá xi cuejñuhñuun xahasen nuju xi cuanguncujun ndiya naha handasa hisca cueyun xcun cru matsejen ne, cumaji cuma ngayun ngu xuta ladu naha. <sup>28</sup>Ha hyan matsejen ta hya xi ngu xuta meje sahmi me ngu ndihya jyë ne, titjun sahmi me cuenta rë me, há chutaha tujún rë me hisca xi tsinguijnetaha me sahmi me ndihya. <sup>29</sup>Cuatjin sahmi me cuenta rë me matsejen ta sá tsajin ne, sá xi ngutjen sahmi me xihndënaña rë hane cumaji tsinguijnetaha me sahmi me ndihya matsejen ne, yëjë ni xuta xi scuëë me matsejen ne, jemu cuejnucëë me me. <sup>30</sup>Cuitjin cuichja me: “Cha xi cavetsihin casahmi ngu ndihya jyë vi ne, camaji catsinguijnetaha cha casahmi cha.” Cuatjin cuichja xuta. <sup>31</sup>Hacuaha ha hyan matsejen ta hya xi ngu me xi matitjun cjue sahmi me ngu si jyë cojo jingu sa me xi matitjun xi condra rë me matsejen ne, titjun tsingataha cacun ndaja me, ¿há scaa rë me cojo të mil xuta rë me xi sahmi me si cojo condra rë me xi ticojo can mil xuta rë? <sup>32</sup>Sá xi vutsejen me ta scaain rë me matsejen ne, jinguyëjë rë xi cjin sa nduva condra rë me matsejen ne, tsingatju me ngujo xuta xi tsinguijnehnchan cju. <sup>33</sup>Vëhë xi ngayujun ni matsejen ne, meje rë xi cuatjin titjun ndaja ningatuhuntacún ¿há scaa nuju, há scaain nuju? matsejen ta, tsëhë xi yëjë ni ngayun xi nismutacuun yëjë ni xcusun xi tjin nuju matsejen ne, cumaji cuma ngayun xuta ladu naha. Cuatjin xu cachja Jesús.

*Yo xi hacuiin ndaja tjengui rë Jesús ne, tangun cojo naxa xi fë xtya rë*

<sup>34</sup>Hacuaha cachja sa xu Jesús cojo xutacjin jan cuitjin:

—Ngayejen ni matsejen ne, ha hyan matsejen ta naxa matsejen ne, ndaja. Peru sá xi cjuë xtya rë matsejen ne, ¿hacutjin cuma xincha nga tutju rë ni? <sup>35</sup> Ha quihndë tsajin mé cumachjirëhë. Cumaji nicojonxan sacuaaha nihndë, hacuaaha cumaji nicojonxan sacuaaha abono. Chjahá rë cuixu candat-sen. Yo ngayun xi tjin nuju cjuasua xi cuinuhyun cjua naha matsejen ne, ndaja tinuhyun. —Cuatjin xu cachja Jesús.

## 15

### *Ejemplu tsëhë chu tsánga xi cachajá*

<sup>1</sup> Ngundiya jan ne, jemu cjín xu cha faha tujúnsa cojo xuta tsehen xi yahnga jan quiji casahmi tiña me tsëhë Jesús, xi meje cuisíñuju me cjua xi cuichja Jesús. <sup>2</sup> Hane cha fariseo cojo cha xi vicuya cjuachacun ne, cachjahma xu cha cojo xicjin cha cuitjin:

—Cha xi cuijyihí vi ne, tsingatihin cha visiajmi cha cojo xuta tsehen hacuaaha jinëtangun cha cojo me. —Cuatjin xu cachjahma cha.

<sup>3</sup> Sehe ngajan xi Jesús ne, cachja xu me ngu ejemplu cojo cha xi cuacun vë cuitjin:

<sup>4</sup> —Cuejña ne xi ngu ngayun tjin nuju ngu cientu chu tsánga. Hane sá xi chajá ngu chu tsujun ne, hatuxa cuiyujuntuhun chu xi ñujuchan tyjuhunñuju jan nguijña ne, sehe cuangun cuinchunsun ngu chu xi cachajá jan hisca xi sacú nuju chu. <sup>5</sup> Hane xi sacú nuju chu ne, chjuhun chu cuesuntuhun chu xi jercu ndama nuju. <sup>6</sup> Hane xi cjuhun ndya nuju ne, nihñutangun yëjë xuta xi vinga nuju cojo me xi siu tahndee ndya nuju, hane cuitjin cuinújun cojo rë me: “Cuinechan cojo ná cjuasua ta casacu ná chu tsánga naha xi cachajá.” Cuatjin cuinújun. <sup>7</sup> Nguehe cuichjá cojo nuju ta hacuaaha hitsë sa jyë cjuasua cuejña ngajan ngahnga ngatsë rë ngu xuta tsehen xi tsindeya me cjuatacun rë me xi cuma rë ngatsë rë ñujuchan tyjuhunñuju xuta ndaja xi tsajin mé má tsindeya me cjuatacun rë me. Cuatjin xu cachja Jesús.

### *Ejemplu tsëhë tujún quicha xi cachajá*

<sup>8</sup> Hya xi camá ne, cuitjin cachja nga xu Jesús ngu ejemplu:

—Cuejña ne xi ngu chjuun jan ne, tjin rë me të tujún quicha xi jercu hnga chji rë. Hane sá xi tsichajá me ngu ne, hatuxa cuetaha rë me ndihi, sehe cuitecha me ndihya sehe cuanguise chichihin me hisca xi sacú rë me. <sup>9</sup> Hane xi sacú rë me ne, sahmitangun me yëjë xuta xi vinga rë me cojo me xi siu tahndee ndava me ne, hane cuitjin cuichja me cojo rë me: “Cuinechan cojo ná cjuasua ta casacu ná tujún naha xi catsichajá.” Cuatjin cuichja me. <sup>10</sup> Nguehe cuichjá cojo nuju ta hacuaaha jemu jyë cjuasua cuiyuju ángel tsëhë Nina ngatsë

rë ngu xuta tsehen xi tsindeya me cjuatacun rë me. Cuatjin xu cachja Jesús.

*Ejemplu tsëhë cha xi catsismi cacun ndava nahmi rë*

<sup>11</sup> Hya xi camá ne, cuitjin cachja nga xu Jesús ngu ejemplu:

—Cuejña ne xi ngu me jan ne, tjin rë me jo quihndi. <sup>12</sup> Hane cavechú ngunixtin xi cha quihndi ngascan tsëhë me vihi ne, cachja cha cojo rë me cuitjin: “Papá, tsëhë yëjë ni xcusun xi satë ná hya xi cueyun ne, meje ná xi tuhun ná quihndë.” Cuatjin cachja cha. Sehe ngajan xi nahmi rë cha jan ne, cavatëcja me hacutjin xi satë rë xingu xingu quihndi rë me.

<sup>13</sup> Hane hacuiin tsëë ni jan ne, cha quihndi ngascan jan ne, xi casahmi tangun cha yëjë xcusun xi casatë rë cha jan ne, sehe cavetju cha quiji cha ngu nangui cjin. Hane xi cafehe cha jan ne, sehe cavetsihin cha tujyë catsicojo cha tujún rë cha, casahmi cha yëjë ni hacutjin xi ndama rë xahasen rë cha.

<sup>14</sup> Hane xi cafë catsicojo cha tujún jan ne, hya canduva ngu jindya jyë jinguyjë ni ladu vëhë. Hya cavetsihin camachaja rë cha. <sup>15</sup> Hya xi camá ne, cavetsihin casahmi cha xá sacuaaha mosu rë ngu me tsëhë nandya jan. Hane me vëhë catsingatju me cha xi cjue sahmi cuidadu cha chu chinga rë me ngajan ranchun.

<sup>16</sup> Hane tsëhë xi jemu vojo camahani rë cha ne, hisca meje sinë cha xi tijinë chu chinga jan, peru tsajin yo casua rë cha. <sup>17</sup> Hane hya xi catsingataha cacun ndaja cha ne, cuitjin catsingataha cacun cha: “Yëjë mosu rë nahmi naha ne, tsajin mé machaja rë xi sinë, hane ngahan ne, tivéya jindya nguehe xi vojo ná. <sup>18</sup> Jemu sa rë ndaja ne, cúa cjuë nga ndava nahmi naha, hane cuitjin cuichjá cojo rë me: Cahndeen tsëhë Nina hacuaaha cahndeen tsujun. <sup>19</sup> Ha quihndë vechiin chuva rë xi cuitejña cojo nuju sacuaaha quihndi nuju. Nihñucuendun sacuaaha xi mosu nuju ngahan quihndë xi cavúya.” Cuatjin catsingataha cacun cha. <sup>20</sup> Hya xi camá ne, sehe cavuya cafe cha nangui rë cha xi cjue cha ndava nahmi rë cha.

’Peru cjin sa cjui cha tsëhë ndava nahmi rë cha ne, cavëë nahmi rë cha xi nduva cha, hane jemu camayuma rë me cha. Sehe vanga me quijitjengui me cha, catsuvacja me cha hisca cavitatsuha me cha. <sup>21</sup> Sehe ngajan xi cavetsihin cachja cha cojo nahmi rë cha cuitjin: “Papá, cahndeen tsëhë Nina hacuaaha cahndeen tsujun. Ha quihndë vechiin chuva rë xi cuitejña cojo nuju sacuaaha quihndi nuju.” Cuatjin cavetsihin cachja cha. <sup>22</sup> Peru nahmi rë cha ne, cachja me cuitjin cojo ngujo hndixahan rë me: “Tángunsanii, tángun chjuhun ngu tsjian xi tsjian ndaja jan ne, sehe nduvun nicujún cha quihndi naha vi. Hacuaaha nduvuncujun ngu xtungun sehe teyun rcutsja cha, hacuaaha nduvuncujun chuxinxhtë xi cuinchun ntsacu cha. <sup>23</sup> Xi camá vëhë ne, sehe tángun chjuhun ngu

ndyaja xi ndaja hñu cacun chu cueya chu xinëë chu. Nihña ngu suhi, tahan cjuasua xahasen naja ta, <sup>24</sup> tsëhë xi cha quihndi naha vi ne, sacuaaha xi cahme cha hane sehe cavuya cha cjuahñu, sacuaaha xi cachajá cha hane sehe casacu nga cha.” Cuatjin cachja nahmi rë cha. Hya xi camá ne, sehe cavetsihin casahmi me suhi.

<sup>25</sup> Peru cha quihndi tjun rë me vihi ne, tsajin cha ta nguijña quiji cha. Hane xi camatiña cha tsëhë ndava cha xi cavuya cha xi quiji cha nguijña ne, cahndë cha xi fane tyjó ndava cha hacuaaha titë xuta. <sup>26</sup> Hya xi camá ne, sehe cajindaya cha ngu cha hndixahan rë nahmi rë cha, sehe cavinenguise cha mé jima jan. <sup>27</sup> Hane cha hndixahan jan ne, cuitjin cafayangui cha: “Cha tsuhun cavuya cha. Hane hacuaaha cavitexa nahmi nuju xi cahme ngu ndyaja xi ndaja hñu cacun xi cuma suhi, tsëhë xi cavuya cafachatsja nga me xingun cojo ngu cjuahñu ndajyihí.” Cuatjin cafayangui hndixahan jan. <sup>28</sup> Peru cha quihndi tjun jan ne, jemu camacjan rë cha, hisca ndihya miji cuisehen cha. Hane xi cavetju nahmi rë cha ne, jercu cjin cachja me cojo cha xi cuisehen cha ndihya. <sup>29</sup> Ngajan xi cha vëhë ne, cuitjin cafayangui cha tsëhë nahmi rë cha: “Chut-sujun ni, ngahan ne, ha jemu tsëë nduva nixtin xi tivisécoo nuju, hacuaaha tsajin ngu cjua xi cahndeen tsujun xi canújun. Peru ngahan ne, hisca ngu tentsun catuun chu xi cueya chu xi sahme ngu suhi cojo amigu naha. <sup>30</sup> Peru quihndë xi cafehe cha quihndi nuju vë xi tu ngajan quiji catsicjë cha cjuanchina nuju cojo yachjin tsehen jan ne, canicuhun ngu ndyaja hñu cacun xi xinu cojo cha.” Cuatjin cafayangui cha. <sup>31</sup> Hya xi camá ne, cuitjin cachja nga nahmi rë cha: “Ngaye tsan xi nchunchujun ni nechín cojo ná ne, yëjë ni xi tsahan ne, hacuaaha tsiji. <sup>32</sup> Ndatjin xi nihña ngu suhi cuitjin, cuinechan cjuasua ta, cha tsajan vi ne, sacuaaha xi cahme cha peru cavuya cha cjuahñu, sacuaaha xi cachajá cha peru casacu nga cha.” Cuatjin cachja nahmi rë cha. Vëhë xu ejemplu xi cachja Jesús cojo cha fariseo cojo cha xi vicuya cjuachacun.

## 16

*Ejemplu tsëhë cha xi matitjun tsëhë xa xi cuaaintjin casahmi*

<sup>1</sup> Hacuaaha cachja nga xu Jesús cojo xuta ladu rë me ngu ejemplu cuitjin:

—Cuejña ne xi cavéjña ngu xuta nchina xi hacuaaha tjín rë me ngu cha xi matitjun tsëhë yëjë ni xa rë me. Hane cha xi matitjun tsëhë xa jan ne, cavinchajyë ngu xi cavinchajyë rë cha cojo me xi tsëhë xa tsëhë xi jemu catsicojo cha tujún rë me xi matsijin mé casahmi cha cojo. <sup>2</sup> Hane xi cajindaya me xi tsëhë xa jan cha ne, sehe cachja me cojo cha cuitjin: “Ngaye



ne, cafahántsa ngu jyě riji. Quihndë ne, nihñi ná entregadu cuenta tsëhë xa xi tacun ntse ta, ngaye ne, ha quihndë cumaji cuihinnduju cojo xa xi nechintehe.” Cuatjin cachja me. <sup>3</sup>Sehe ngajan xi cha xi matitjun tsëhë xa jan ne, cuitjin catsingataha cacun cha: “¿Mé xi ndatjin sahme quihndë xi tivaxëxin ná nai naha tsëhë xa xi tejñataha? Ngahan ne, maji sahme xa xi hai. Hacuaha sava ná cjué cjuéhya caridad. <sup>4</sup>Haan, ha hvë mé xi sahme cojo sa xi cjuahatsja ná xuta ndava me hya xi cuétjuxen tsëhë xa xi tejñataha.” Cuatjin catsingataha cacun cha. <sup>5</sup>Hya xi camá ne, cajindaya cha chuva ngu chuva ngu xuta xi quitjen tsëhë nai rë cha. Hane cuitjin cachja cha cojo ngu me: “Ngayun ne, ¿hacutjin quitjun tsëhë nai naha?” Cuatjin cachja cha. <sup>6</sup>Sehe ngajan xi me xi quitjen jan ne, cuitjin cafayangui me: “Ngu cientu tonel tsëhë aceite.” Cuatjin cafayangui me. Hane cha xi matitjun tsëhë xa jan ne, cuitjin cachja cha cojo rë me: “Jahun xujun tsëhë cuenta nuju vi ne, tinechun sanií, nihñu sa ngu, hane tetuhun yachantë ni.” Cuatjin cachja cha. <sup>7</sup>Hya xi camá ne, cachja nga cha cojo ngu nga me cuitjin: “Ngayun ne, ¿há cjín quitjun tsëhë nai naha?” Cuatjin cachja cha. Hane cuitjin cafayangui me xi quitjen jan: “Ngu cientu xutsu trigu.” Cuatjin cafayangui me. Hane cha xi matitjun tsëhë xa jan ne, cuitjin cachja cha: “Jahun xujun tsëhë cuenta nuju vi ne, nihñu sa ngu, hane tetuhun ñujuchan ni.” Cuatjin cachja cha. <sup>8</sup>Ngajan xi xuta nchina xi nai rë xa jan ne, cavaxëndaja me cha tsehen xi matitjun tsëhë xa ngatsë rë xi jemu quicun cacun cha xi cuatjin casahmi cha. Hitsë sa quicun cacun xuta tsehen cojo ngasunhndë rë me, xi cuma rë xuta xi fitjengui me ndiya rë Nina.

<sup>9</sup>Nguehe cuichjá cojo nuju ngayun xuta ladu naha ta hacuaha meje rë xi chjuhun tujún nuju, handasa hatuxa tsehen ta tsëhë xi tsëhë ngasunhndë, hane nicujunxun, cojo sa xi cuinga rë xuta ngayun. Cuatjin nihñu cojo sa xi hya xi cuechú nixtin xi cueyun hacuaha ha quihndë cumachjiriin nuju tujún ne, cjuahatsja nuju Nina ngajan hiscan xi cuinechan cojo rë me yëjë nu yëjë nixtin.

<sup>10</sup>Yo xi tjin rë cjuaquixi xi ndaja sahmi ngu xa xi chúva ne, hacuaha hatuxa tjin rë cjuaquixi xi ndaja sahmi ngu xa xi jyë. Hacuaha yo xi vindacha hya xi sahmi ngu xa xi chúva ne, hacuaha hatuxa vindacha hya xi sahmi ngu xa xi jyë. <sup>11</sup>Vëhë xi ngayun ne, sá xi vindachun hya xi nicujunxun tujún tsehen xi tsëhë ngasunhndë ne, hatuxa cuejñaai Nina ntsun cjuanchina xi cjuaquixi, xi tsëhë me. <sup>12</sup>Hacuaha sa xi vindachun hya xi nicujunxun cjuanchina tsëhë jingu sa ne, Nina ne, hatuxa suaain nuju me cjuanchina xi cuma tsujun suvun.

<sup>13</sup> Tsajin ngu hndixahan xi ma fahacuenda xa tsëhë jo nai rë xa ta, tsëhë xi choho scuëë rë ngu nai rë hane tsihmu cacun nai rë xi majo jan. O sá tsajin ne, jemu cuetaha yojo rë cojo ngu nai rë, hane nai rë xi majo jan ne, hisca sahmicuendaain rë. Vëhë xi xi ngu ñahñu ni ne, maji nihñu hacutjin xi meje rë Nina cojo hacutjin meje rë cjuanchina tsehen xi tsëhë ngasunhdë. Cuatjin xu cachja Jesús cojo xuta ladu rë me.

<sup>14</sup> Cha fariseo, xi hacuaha jemu chuya rë cha tsëhë tujún ne, cahndë xu cha yëjë cjua xi cachja Jesús cojo xuta ladu rë me jan. Hane cavejnucëë cha Jesús. <sup>15</sup> Ngajan xi Jesús ne, cachja xu me cojo cha cuitjin:

—Ngayun xi nújun cojo xuta xi jemu ndaja xuta ngayun, peru Nina ne, vëë me cjuatacun xi jiya cahntsua xahasen nuju. Hane cjuatacun xi sahmi yehe sahmi hnga xuta ne, Nina ne, chuyiin camahani rë me tsëhë.

*Cumaji chjaháxin rë hisca ngu cjua tsëhë ley rë Nina*

<sup>16</sup> Hya xi chaja sa tsujyihya Juan Vitenda Xuta ne, yëjë xuta ne, casacu camachaya rë me cjua rë Nina ngatsë rë ley xi cavejña Nina tsja Moisés, cojo ngatsë rë profeta xi hacuaha cachja me cjua rë Nina. Hisca nixtin rë Juan ne, hisca quihndë ne, tisuá ngahan tijimachaya rë xuta cjuandajyihi xi chja xi Nina ne, sahmi me gobiernu. Hane yëjë ni xuta ne, meje cuisehen me hiscan sahmi Nina gobiernu, handasa cojo cjuachan.

<sup>17</sup> Ngahnga cojo nangui ne, hitsë sa chjaain cjuë xi cuma rë xi chjaháxin rë ngu cjua tsëhë ley rë Nina.

*Jyë rë xuta xi tsismi chjuun rë sehe cuixan cojo jingu sa chjuun*

<sup>18</sup> Ngu xuta xi tsismi me chjuun rë me sehe cuixan me cojo jingu sa chjuun ne, tangun me cojo ngu xi sahmi cjuatsehen cojo ngu chjuun xi hacuiin chjuun rë. Hacuaha yo xi cuixan cojo ngu chjuun xi xihin rë na ne, catsismi cha na ne, tangun cojo ngu xi sahmi cjuatsehen cojo ngu chjuun xi hacuiin chjuun rë.

*Ejemplu tsëhë cha nchina cojo cha yuma xi hmí rë Lázaro*

<sup>19</sup> Cuejña ne xi cavéjña ngu cha xi jemu nchina, xi jercu ndaja camahani tsjian vajá. Nchunchujun ni ne, jemu ndajyihi suhi sahmi cha. <sup>20</sup> Hacuaha cavéjña ngu xuma cha yuma xi hmí rë Lázaro, xi jingujyë ni yojo rë cha camatsë. Hane jiña cha ngajan tingotjo ndava cha nchina jan. <sup>21</sup> Hane hacuaha cojo cha yuma jan jemu meje sinë cha hitsë xi vangui jinë cha nchina jan. Hatuxa jemu choho vatju cha má, hisca vinduva naña chimajnu chu tsë xi yaja rë cha. <sup>22</sup> Hya xi camá ne, xi cahme xuma cha yuma jan ne, quijicojo ángel hasen rë cha

ngajan cahndě ndajyihi, cavéjña tangun cojo hasen rě nima Abraham. Hane cha nchina jan ne, hacuaha cahme cha, hane caseyaniji cha.

<sup>23</sup> Hane hya xi jiya hasen rě cha nchina jan cahndě hiscan xi fi hasen rě nima ne, jercu tivatju cjuañihi. Hane xi cavuya cavutsejenniji hasen rě cha ne, cavěë rě hasen rě nima Abraham tsěhě cjin ni, hacuaha cavěë rě hasen rě nima Lázaro, tacun tangun cojo hasen rě nima Abraham. <sup>24</sup> Hya xi camá ne, cajindaya hasen rě cha nchina jan tsěhě hasen rě nima Abraham, cuitjin cachja: “Tatá Abraham, catamayuma nuju ngahan ne, tinújun cojo cha Lázaro vë ne, catitsicahnchi cha rcutsja cha cojo nandá, sehe ningatjun cha catinduva catitsinguijnehnchan cha hitsě neje ta, tsěhě xi jercu má camahani ná cojo ndihi vi.” Cuatjin cachja hasen rě cha nchina jan. <sup>25</sup> Peru hasen rě nima Abraham ne, cuitjin cafayangui: “Ninguitsjin tsan ta xcun cjuahñu riji ne, jemu ndaja cavatji camá, hane xuma cha Lázaro vi ne, jemu choho cavatju cha camá. Peru quihndě ne, tisacu rě cha cjuetacun nguehe, hane ngaye ne, tivatji cjuañihi. <sup>26</sup> Hacuaha tjin sa ngu cjua xi cuichjá cojo ri: Nina ne, cavejña me ngu xanga jyë xi jiyavasen tsěhě hiscan xi nechintihin ngayin cojo tsěhě hiscan xi nechintehe ngaye, cojo sa xi yo ngayin xi meje cuátjin xi cuinduvun ndyá ne, cumaji, hacuaha yo ngayun xi meje cuatjun cuinduvun nguehe ne, hacuaha cumaji.” Cuatjin cafayangui hasen rě nima Abraham. <sup>27</sup> Sehe ngajan xi hasen rě cha nchina jan ne, cuitjin cachja: “Tatá, nihñu favor ne, ningatjun cha Lázaro ngajan ndava nahmi naha, <sup>28</sup> cojo sa xi sua cha cumachaya rě catsihñú xingueen xi siu jan, cojo sa xi hacuiin cojo cha cuechú cha cahndě vihi hiscan xi tacun cjuañihi xi tivatjin tijima.” Cuatjin cachja hasen rě cha nchina. <sup>29</sup> Hane hasen rě nima Abraham ne, cuitjin cachja: “Peru cha xi cuacun vë ne, cuma cuisñuju cha cjua xi ha catsihindu Moisés cojo cjua xi ha catsihindu profeta hatsěë nixtin. Věhě catetaharcu cha.” Cuatjin cachja hasen rě nima Abraham. <sup>30</sup> Ngajan xi hasen rě cha nchina jan ne, cuitjin cafayangui: “Tatá Abraham, cumaji xi cojo cjua vëhě ni. Peru sá xi yo cuetju tsěhě ngajñi rě nima xi cjue cuichja cojo cha ne, ngajan xi tsindeya cha cjuatacun rě cha.” Cuatjin cafayangui hasen rě cha nchina jan. <sup>31</sup> Peru hasen rě nima Abraham ne, cuitjin cachja: “Sá xi mijí cuihndě cha tsěhě cjua xi catsihindu Moisés cojo cjua xi catsihindu profeta ne, hacuanitjin ni cumacjaain rě cha, handasa ngu nima cuya cjuahñu, cjue cuichja cojo rě cha.” Cuatjin cachja hasen rě nima Abraham. Cuatjin xu fi cjua xi cachja Jesús cojo cha fariseo cojo xuta ladu rě me.

## 17

*Miji rë xi nihña xi tsismicacun ngu xuta ndiya rë Nina*

<sup>1</sup> Ngu nixtin jan ne, hacuaha cachja xu Jesús cojo xuta ladu rë me cuitjin:

—Hatuxa cuinduva xcusun xi meje sahmi xi nismetacuun ndiya rë Nina, peru jemu chojyihî tsëhë xuta xi nduvacojo xcusun vëhë. <sup>2</sup> Hitsë sa ndaja tsëhë xuta vëhë xi xtyanguî ngu ndyojo natsî nguîsin me sehe ningatjenya rë me ngajñî ndachacun, xi cuma rë xi sahmi me xi ngu xuta ladu naha tsismicacun me ndiya rë Nina.

<sup>3</sup> 'Nechun cuidadu tsëhë xcusun xi nihñu. Sá xi ngu xingun choho sahmi cojo nuju ne, tinújuntuhun rë. Hane sá xi tsindeya cjuatacun rë ne, ninchatuhun rë. <sup>4</sup> Hane sá xi hisca yatu ndiya choho sahmi cojo nuju ngu nixtin, hane hacuaha jima ngu ndiya vëhë cjue cuichja cojo nuju xi tsindeya cjuatacun rë ne, ninchatuhun rë. —Cuatjin xu cachja Jesús.

*Cuma cuinuhyan tsëhë Nai naja sá xi mangutacuun ndastu hitsë cojo rë me*

<sup>5</sup> Ngajan xi apóstol ne, cuitjin xu cachja me cojo Nai naja:

—Nihñu xi hitsë sa ndaja cumangu tacuín cojo nuju. —Cuatjin xu cachja me.

<sup>6</sup> Sehe ngajan xi Nai naja ne, cuitjin xu cafayangui me:

—Sá xi mangutacún cojo ná ndastu hitsë ne, hacuaha cuma cuinújun cojo ya vihi catjixin tsëhë cahndë hiscan secun, hane catji catiseacun ngajan ngajñî ndachacun, hane hacuaha cuihndë tsujun.

*Hacutjin meje rë xi sahmi hndixahan cojo nai rë*

<sup>7</sup> 'Cuejña ne xi ngu ngayun ne, tjin nuju ngu hndixahan xi vacjan nangui tsujun o sá xi sahmi cuidadu rë chu nuju. Hane xi cjuehe hndixahan vëhë xi quiji nguijña ne, ¿há cuinújun cojo cuitjin: “Ndove sanii ne, xini niñu”? <sup>8</sup> Jéya, hacuîin ta cuitjin cuinújun cojo: “Tehe chjini xi sínë, hacuaha tehe chjini yojo riji xi cuindove chani xi sínë xi cuëhë, hane xi cuijnetaha sínë ne, sehe xini sihi ngaye.” Cuatjin cuinújun. <sup>9</sup> Hacuaha tuun nacuechji rë hndixahan vëhë tsëhë xi casahmi yëjë ni hacutjin xi cavitexun rë. <sup>10</sup> Hacuanitjin nuju ngayun ta hya xi ha cafë canihñu yëjë ni hacutjin cavitexa nuju Nina ne, cuitjin meje rë xi ningatuhuntacún: “Ngahan ne, ngu hndixahan tujyë ni ngahan ta xi casahme ne, hacutjin xi casatëxa ná ne, vëhë ni xi casahme. Cuatjin meje rë xi ningatuhuntacún.” Vëhë xu cjua xi cachja Jesús cojo xuta ladu rë me.

*Casahmi Jesucristu xi camandaja të cha hmu rë*

<sup>11</sup> Hane hya xi tivatju xu Jesús vasencja tsëhë distritu Samaria cojo distritu Galilea xi cjuî me ngajan Jerusalén ne,

cuitjin camá. <sup>12</sup> Hora xi ha cuisehen me ngu nandya jan ne, nduvatjengui xu tē cha me, cha xi yaha rē ngu xcusun chíhin vitaha xi setaha yojo naja. Hane caxinchacunhñu xu cha hitsē jan, <sup>13</sup> hane tsēhē cjin ni cajindaya xu cha cachja cha cuitjin:

—¡Tatá Jesús! ¡Catamayuma nuju ngayin! ¡Nihñu xi cuman-daja ngayin! —Cuatjin xu cajindaya cha cachja cha.

<sup>14</sup> Hane xi cavēē Jesús cha ne, cuitjin xu cachja me:

—Tángun hiscan xi siu nahmi, ningacun rē me yojo nuju xi tsajin mé cún ngayun. —Cuatjin xu cachja me.

Hane ndiya cjui cha ne, camandaja xu cha. <sup>15</sup> Hya xi camá ne, xi cavēē xu ngu cha xi camandaja cha ne, cavuya quiijtjengui xu cha Jesús, jindaya cha chja cha xi tisahmi jyē tisahmi hnga xu cha Nina. <sup>16</sup> Hane xi cafehe xu cha hiscan secun Jesús ne, quiji caticjaxcun cha xcun me, xi tisua cha nacuechji rē me. Cha xi cuajyihi jan ne, cha Samaria cha. <sup>17</sup> Sehe ngajan xi Jesús ne, cuitjin xu cavinenguise me xuta ladu rē me:

—¿Hacuiin yējē tē cha xi cuicun vi xi camandaja cha ni? ¿Cha xi ñaja sa ne, jarē cha ne? <sup>18</sup> ¿Há suvá ni cha xi cuijyihi vi xi ngu xutaxín cha xi cavuya cha xi sahmi jyē sahmi hnga cha Nina ni?

<sup>19</sup> Sehe cachja xu me cojo cha xi camandaja jan cuitjin: —Tisatjunhngun, hane tjangun. Ngatsē rē xi camangutacún cojo ná ne, vēhē xi camandaja ngayun. —Cuatjin xu cachja Jesús.

### *Hacutjin cuma hya xi cuinduva Nina sahmi me gobiernu*

<sup>20</sup> Cuitjin xu camá nga ngundiya. Cha fariseo ne, cavinenguise cha Jesús janihya cuinduva Nina sahmi me gobiernu. Sehe ngajan xi Jesús ne, cuitjin xu cafayangui me tsēhē cha:

—Nina ne, hya xi cuinduva me sahmi me gobiernu ne, hacuiin titjun sua me cumachaya naja sehe cuinduva me. <sup>21</sup> Tsajin yo cuichja: “Cuajyihi Nina nguehe”, o sá: “Cuajyihi Nina ngajan”; ta Nina ne, ha tisahmi me gobiernu ngajñi nuju. —Cuatjin xu cachja me cojo cha fariseo.

<sup>22</sup> Hya xi camá ne, cuitjin xu cachja me cojo xuta ladu rē me:

—Cuechú nixtin xi jemu cuma meje chutsujun ná ndastu ngu hora, ngahan xi Quihndi rē Xuta jain ngahan, peru cumaji. <sup>23</sup> Yahnga me cuichja me cojo nuju: “Cuajyihi me nguehe”, o sá: “Cuajyihi me ngajan”; peru hacuiin cuangun cojo me, hacuiin cuanguntjengun me ta <sup>24</sup> sacuaaha sahmi hasen ndihichuhún xi ha tu ñahñu sahmi hasen rē jingujyē ni ngahnga, hisca nguehe hisca ngajan ne, cuatjin ha tu ñahñu scutsejen ná xuta tsēhē yējē ni ladu hya xi cuechú nixtin xi cuinduva nga ngahan xi Quihndi rē Xuta Jain ngahan. <sup>25</sup> Peru chaja sa xi cuechú nixtin vēhē ne, hatuxa meje rē xi

jemu cjin cjuañihi cuátju cuma, hacuaha xuta xi siu nixtin vihi ne, tsitjungui ná me. <sup>26</sup> Sacuatjin casahmi xuta nixtin hya xi cavéjña xutachanga naja Noé ne, hacuanitjin ni sahmi xuta hya xi ngahan cuinduva. <sup>27</sup> Nixtin rë Noé vë ne, jinë jihvi xuta, vixan me, tsinguixan me quihndi rë me. Cuatjin sahmi cuaha me hisca nixtin xi cavisehen Noé cahntsua barcu, hacuaha casesuntë nandá, hane ngajan café yějë xuta cahme me. <sup>28</sup> Hacuanitjin ni xcusun vëhë casahmi xuta nixtin hya xi cavéjña ngu xutachanga xi hmí rë Lot: jinë hvi me, vatsë me, viteña me, vincha me tjë, hacuaha sahmi me ndihya. <sup>29</sup> Peru nixtin xi cavetju Lot tsëhë nandya Sodoma ne, cavixu ndihi tsëhë ngahnga, hacuaha cavixu ndyojo xi yaha rë ndihi, sacuaha xi cavaha ngu tsihñu, hane ngajan café yějë xuta cahme me. <sup>30</sup> Hacuaha cuanitjin ni sahmi xuta hya xi cuinduva ngahan xi Quihndi rë Xuta Jain ngahan.

<sup>31</sup> Nixtin hya ne, xuta xi hinchasun me rcu ndava me ne, mé tsëhë me xi siu cahntsua ndihya ne, miji rë xi cuitujne me cjue jaha me. Hacuaha ha chuva vëhë ni ne, xuta xi siutahá me nguijña ne, miji rë xi cuya cjue me ndava me. <sup>32</sup> Ninguitsjun sacuaha xcusun xi cavatju nima chjuun rë Lot. <sup>33</sup> Yo xi meje cjuendujo cojo ngasunhdë rë cojo ngahñu rë suvá ne, cuechintaain cjuahñu xatsë; peru yo xi cuatju cjuañihi o hisca cueya ngatsë naha ne, vëhë xi cuechútáha cjuahñu xatsë.

<sup>34</sup> Nguehe cuichjá cojo nuju ta nguixun nixtin hya ne, jo xuta cuiyujufë tangun me ngu nachan. Ngu me ne, chjaháxin rë me, hane me xingu jan ne, cuejña me. <sup>35</sup> Hacuaha jo nga yachjin ne, cuiyujutahá na coho na. Ngu na ne, chjaháxin rë na, hane na xingu jan ne, cuejña na. <sup>36</sup> Hacuaha jo nga cha ne, cuiyujutahá cha nguijña. Ngu cha ne, chjaháxin rë cha, hane cha xingu jan ne, cuejña cha. —Cuatjin xu cachja Jesús.

<sup>37</sup> Hane xuta ladu rë me ne, cuitjin xu cavinenguise rë me: —¿Hane jani cuma xcusun vëhë ni, tatá? —Cuatjin xu cavinenguise me.

Sehe ngajan xi Jesús ne, cachja xu me ngu ejemplu cuitjin:

—Hisca jiña chu xi cahme ne, hacuaha ngajan matangun chu lote. —Cuatjin xu cachja Jesús.

## 18

### *Ejemplu tsëhë chjuun cahan cojo juez tsehen*

<sup>1</sup> Hacuaha cachja sa xu Jesús ngu ejemplu cojo xuta ladu rë me xi sua me cumachaya rë xi meje rë xi yasen ni ne, sahmi me oración rë me, miji rë xi sahmi chúva cacun me. <sup>2</sup> Cuitjin xu cachja me:

—Cuejña ne xi ngu nandya jan ne, tjin ngu juez xi tsacjuuin rë Nina hacuaha faharcuaain rë xuta. <sup>3</sup> Hacuaha nandya jan

ne, tacun ngu chjuun cahan. Hane nchunchujun ni quiji na xcun juez jan ne, cachja na cuitjin: “Meje ná xi nihñucundun jyě xi vincha xuta tsahan.” Cuatjin cachja na. <sup>4</sup> Peru juez jan ne, jemu jyě nixtin xi mijí sahmicuenda me tséhë na. Peru xi camá ngascan ne, cuitjin catsingataha cacun me: “Handasa tsacjuun Nina hacuaha faharcuun xuta ne, <sup>5</sup> peru ngatsë rë xi jemu tisuaxti na cahan vi ngahan ne, vëhë xi cjuahácuenda cjuacjintacun rë na, sá tsajin ne, jemu tsijenda na ngahan xi ngajan cjuí ngajan nduva na.” Cuatjin xu catsingataha cacun me.

<sup>6</sup> Sehe ngajan xi Nai naja ne, cachja sa xu me cuitjin:

—Chutsujun hacutjin chja juez tsehen vë. <sup>7</sup> Nina ne, ¿hacuiin hatuxa cjuahacuenda me cjuacjintacun rë xuta xi cavaxijin me, xi nguixun nguitajñu fehya rë me xi cjuahacuenda me tséhë? ¿Há jemu cuindeya cjuahacuenda me? <sup>8</sup> Nguehe cuichjá cojo nuju ta Nina ne, ngutjen ni cjuahacuenda me. Peru hya xi cuinduva nga ngahan xi Quihndi rë Xuta Jain ngahan ne, ¿há tjin xuta xi mangucacun cojo ná nguehe ngasunhdë? —Cuatjin xu cachja Nai naja.

*Ejemplu tséhë oración rë cha fariseo cojo oración rë cha faha tujúnsa*

<sup>9</sup> Hacuaha siu sa xu ngujo xuta xi tsingataha cacun suvá me xi tsajin jyě rë me xcun Nina hacuaha sahmi xta me cojo xuta xi yahnga. Hane xuta xi cuacun vë ne, cuitjin xu cachja Jesús ngu ejemplu cojo rë me:

<sup>10</sup> —Cuejña ne xi jo cha jan ne, quiji cha yungun xi matitjun xi sahmi cha oración rë cha. Ngu cha ne, cha fariseo cha, hane cha xingu ne, cha faha tujúnsa cha. <sup>11</sup> Cha fariseo jan ne, cavisekun cha casahmi cha oración rë cha cahntsua xahasen ni rë cha, cachja cha cuitjin: “Ngayun Nina, suá nacuechji nuju ta ngahan ne, hacuiin tangun ngahan cojo jingu sa cha xi ndacha cha, tsehen cha, tsindesu cha cojo jingu sa chjuun, hacuaha hisca tanguaain ngahan cojo cha faha tujúnsa vi. <sup>12</sup> Sahme xun naha jo ndiya xi ngu totje, hacuaha vátëcja të cahndë tséhë yëjë ni xi sacu ná, hane suá nuju ngu cahndë.” Cuatjin casahmi cha fariseo oración rë cha. <sup>13</sup> Peru cha faha tujúnsa ne, hitsë ni cjin secun cha, hacuaha hisca cavuyaaain cavutsejen cha ngahnga ta tu cavisanetsja ni cha rcu cha, cachja cha cuitjin: “Ngayun Nina, catamayuma nuju ngahan xi jemu tjin jyě naha.” Cuatjin cachja cha. <sup>14</sup> Cuichjá cojo nuju ta cha faha tujúnsa jan ne, xi tu cavuya cafe cha ndava cha ne, ha caffè jyě rë cha xcun Nina, peru cha fariseo jan ne, hacuiin cuatjin caffè jyě rë cha. Cuatjin camá ta, tséhë xi yëjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me

yojo rë me ne, Nina ne, sahmi jyë rë me. —Cuatjin xu cachja Jesús.

*Catsinchacun Jesucristu nixti*

<sup>15</sup> Hacuaha cjuicojo xu xuta nixti rë me hiscan tacun Jesús xi cuisanetsja me nixti jan. Peru hya xi cavëë xu xuta ladu rë Jesús xi cuatjin cjuu xuta cojo nixti rë me ne, cavatëcja xu me cjuatacun rë xuta jan. <sup>16</sup> Peru Jesús ne, cajindaya xu me nixti jan xi cjuetjengui rë me, sehe ngajan xi cachja xu me cojo xuta ladu rë me cuitjin:

—Tuhun rë nixti cahndë catinduva tjengui ná. Xicanichuun rë cahndë ta, tsëhë xi nixti xi cuacun ne, hatuxa visehen ngajan hiscan xi sahmi Nina gobiernu. <sup>17</sup> Cuichjá cojo nuju cjuaquixi ta suvá ni xuta xi tsingatihin me xi sahmi Nina me gobiernu sacuatjin tsingatihin nixti ne, me vëhë ni xi cuisehen me hiscan xi sahmi Nina gobiernu. —Cuatjin xu cachja Jesús.

*Jemu chja cuisehen xuta nchina ladu rë Nina*

<sup>18</sup> Ngu xuta xi matitjun ne, cavinenguise xu me Jesús cuitjin:

—Ngayun Maestro, jemu ndaja ngayun. ¿Mé xi meje rë xi sahme cojo sa xi sacú ná cjuahñu xatsë? —Cuatjin xu cachja me.

<sup>19</sup> Sehe ngajan xi Jesús ne, cuitjin xu cafayangui me:

—¿Mé má cuatjin nújun xi ndaja ngahan? Tsajin yo xi ndaja. Ngu ni Nina xi ndaja me. <sup>20</sup> Ngayun ne, ha hyun hacutjin chja ley rë Nina xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuün tsujun, xicanicuun xuta, xicanihñuu cjuachëjë, xicanujuun cjuandesu tsëhë xuta, chjuhuncun nahmi nuju hacuaha chjuhuncun na nuju.” —Cuatjin xu cachja Jesús cjuu rë ley rë Nina.

<sup>21</sup> Hane ngajan xi xuta xi matitjun jan ne, cuitjin xu cachja me cojo Jesús:

—Yëjë cjuu vëhë ne, ha cáhndë tsëhë hisca cjualihndi naha. —Cuatjin xu cachja me.

<sup>22</sup> Hane xi cahndë xu Jesús cjuu rë me ne, sehe cachja xu me cuitjin:

—Tjin sa ngu cjuu xi machaja nuju: yëjë ni xcusun xi tjin nuju ne, titeñu, hane sehe tichuncjun tujún rë ngajñi rë xuta yuma. Hane xi cuatjin nihñu ne, jemu jyë cjuanchina sacú nuju ngajan ngahnga. Hane xi cjuë cuichuncjun tujún vëhë ne, sehe nduvun tisecon ná. —Cuatjin xu cachja Jesús.

<sup>23</sup> Peru xi cahndë xu xuta xi matitjun jan cjuu xi cachja Jesús ne, jemu va camá cacun me, tsëhë xi jercu nchina camahani me. <sup>24</sup> Hane xi vutsejen xu Jesús xi jemu va camá cacun xuta xi matitjun jan ne, sehe cachja xu me cuitjin:



—Jemu chja xi ngu xuta xi tjin rë me cjuanchina cuisehen me hiscan sahmi Nina gobiernu. <sup>25</sup> Ha hitsë sa chjaain cuatju ngu chu camellu ngojo rë ngu nîndu xi cuma rë xi cuisehen ngu xuta nchina hiscan sahmi Nina gobiernu. —Cuatjin xu cachja Jesús.

<sup>26</sup> Ngajan xi xuta xi cahndë me cjua jan ne, cuitjin xu cachja me:

—Sá cuatjin ne, ¿yo xi cuma cuetjutje ni? —Cuatjin xu cachja me.

<sup>27</sup> Hane Jesús ne, cuitjin xu cafayangui me:

—Yëjë ni xi maji sahmi xuta ne, Nina ne, hatuxa ma sahmi me. —Cuatjin xu cafayangui Jesús.

<sup>28</sup> Ngajan xi Pedru ne, cuitjin xu cachja me cojo Jesús:

—Chutsujun ni. Ngayin ne, ha canismitacuín yëjë ni xcusun xi tjin niji, hane tivisequin nuju. —Cuatjin xu cachja Pedru.

<sup>29</sup> Hane Jesús ne, cuitjin xu cachja me:

—Cuichjá cojo nuju cjuaquixi ta yëjë xuta xi tsismicacun me ndava me, tsismicacun me chjuun rë me, tsismicacun me xicjin me, tsismicacun me xutacha rë me, tsismicacun me quihndi rë me, xi cjuetjengui me ndiya rë Nina ne, <sup>30</sup> hatuxa cjin sa cahndë sacú rë me xi cuma sacuaha ndava me, hacuaha hatuxa cjin sa xuta sacú rë me xi cuma sacuaha xuta rë me, quihndë xi siu me ngasunhdë vihi, hane hya xi cueya me ne, sacú rë me ngu cjuahñu xatsë. —Cuatjin xu cachja Jesús.

### *Camá jyan ndiya cachja Jesucristu xi cueya me*

<sup>31</sup> Hya xi camá xu ne, quijicojoxin Jesús tejó xuta ladu rë me, sehe cachja xu me cojo cuitjin:

—Quihndë ne, tivanguen Jerusalén. Hane xi cjuehen jan ne, cuetjucaa yëjë sacuatjin catsihindu profeta tsahan, ngahan xi Quihndi rë Xuta Jain ngahan. <sup>32</sup> Ngahan ne, cuma ngahan entregadu tsja xutaxín, cuejnucëë ná xuta, choho cuichja me tsahan, cuëhënatya ná me. <sup>33</sup> Hane xi cjuë cuaja ná me ne, sehe tsiquehen ná me. Peru xi ma jyan nixtin ne, cúa nga cjuahñu. —Cuatjin xu cachja Jesús.

<sup>34</sup> Peru xuta ladu rë me jan ne, hisca ngu xu cjua vëhë cajniie rcu me ta tjihma cjuatacun vëhë xi cuma rë me. Vëhë xi hvín xu me mé vijne cjua xi cachja Jesús jan.

### *Casahmi Jesucristu xi camatsejen nga rë ngu cha rcá ngajan Jericó*

<sup>35</sup> Hya xi camá ne, xi camatiña xu Jesús tsëhë nandya Jericó cojo xuta ladu rë me ne, ngajan tacun xu ngu cha rcá tjeheh ndiya, fehya cha caridad. <sup>36</sup> Hane xi cahndë cha xi jercu cjin xuta fane ntsacu me ne, sehe cavinenguise xu cha mé jima jan. <sup>37</sup> Hane tjin xu yo cachja cojo cha xi Jesús tsëhë nandya

Nasaret tivatju me cojo xuta ladu rë me. <sup>38</sup> Hane cha rcá jan ne, cuitjin xu cajindaya cha cachja cha:

—¡Ngayun Jesús, tjë rë David! Catamayuma nuju ngahan. —Cuatjin xu cachja cha.

<sup>39</sup> Hane xuta xi cjuí titjun jan ne, cavisiajmi cjan xu me cojo cha xi seyyu cha. Peru cha vëhë ne, hitsë sa jercu cajindaya xu cha cachja cha, cuitjin cachja cha:

—¡Ngayun tjë rë David! Catamayuma nuju ngahan. —Cuatjin xu cachja cha.

<sup>40</sup> Ngajan xi Jesús ne, xi casecunhñu xu me ne, sehe cavitexa me xi cuinduva cojo xuta cha rcá jan hiscan xi secun me. Hane xi camatiña cha tsëhë Jesús ne, sehe cavinenguise xu me cha cuitjin:

<sup>41</sup> —¿Mé xi meje nuju xi sahme cojo nuju ni? —Cuatjin xu cavinenguise me.

Sehe ngajan xi cha rcá jan ne, cuitjin xu cachja cha:

—Tatá. Meje ná xi cuma tsejen nga ná. —Cuatjin xu cachja cha.

<sup>42</sup> Hane Jesús ne, cuitjin xu cachja me cojo cha:

—Catamatsejen nga nuju. Ngayun ne, camandaja túxcun ta, tsëhë xi camangutacún cojo ná. —Cuatjin xu cachja Jesús.

<sup>43</sup> Hane ha hora vëhë ni ne, camatsejen nga xu rë cha. Sehe quiji xu cha cojo Jesús táha sahmi jyë sahmi hnga cha Nina. Hane xi cavëë yëjë xuta xcusun xi camá jan ne, jemu cavaxëndaja xu me Nina.

## 19

### *Jesucristu cojo cha Zaqueo*

<sup>1</sup> Hya xi camá ne, cavisehen xu Jesús nandya Jericó xi cuatju me vasencja nandya. <sup>2</sup> Hane ngajan tacun xu ngu cha xi hmí rë Zaqueo, ngu cha xi matitjun tsëhë cha faha tujúnsa, hacuaha jemu nchina cha. <sup>3</sup> Hane cha vëhë ne, jemu meje scuëë xu cha yo xi Jesús, peru camaji ta, tsëhë xi jercu cjin camahani xuta quitsë me, hacuaha cha vëhë ne, jemu patú xu cha. <sup>4</sup> Hane xi cavangatitjun cha ne, quiji camiji xu cha ngu ya jyë, cojo sa xi cuma scuëë cha Jesús ta, tsëhë xi hatuxa ngajan cuatju me. <sup>5</sup> Hane xi cafehe xu Jesús jan ne, sehe cavuya cavutsejenniji me rcu ya hiscan quisun cha ne, sehe cachja xu me cojo cha cuitjin:

—Zaqueo, nduvunjnu sanii ta, tsëhë xi sahmi ná ngu jyë xi ndya nuju cuitejña quihndë. —Cuatjin xu cachja me.

<sup>6</sup> Ngajan xi cha Zaqueo ne, marcu macjain xu cavitujne cha, cafahatsja cha Jesús cojo yëjë ni cjuasua, quijicojo cha me ndava cha. <sup>7</sup> Hane xi cavëë yëjë xuta xi cuatjin casahmi Jesús ne, sehe cachjahma xu me cojo xicjin me cuitjin:

—Quiji cavéjña me cojo ngu cha tsehen. —Cuatjin xu cachjama me.

<sup>8</sup> Hya xi camá ne, xi ha tacun Jesús ndava cha Zaqueo ne, cavisatjenhnga xu cha, sehe cachja xu cha cojo Nai naja cuitjin:

—Chutsujun ni, tatá. Vasantjin tséhë yëjë ni xcusun xi tjin ná ne, suá rë xuta yuma. Hane sá xi tjin yo xi cavaxé rë tujún cojo cjuandacha ne, ñuju cuatjin sacuatjin xi cafahá ne, tsicúya tséhë me. —Cuatjin xu cachja cha.

<sup>9</sup> Ngajan xi Jesús ne, cuitjin xu cachja me:

—Quihndë ta cuatjin ne, ngayujun ni tséhë ndihya vihi ne, cavetjuntjun ta, me xi cuijyihí vi ne, hacuaha cojo me má me xuta ladu rë Nina. <sup>10</sup> Hane ngahan xi Quihndi rë Xuta Jain ngahan ne, canduvá xi cuanguësë hacuaha cuaxëtjë xuta ladu rë Nina xi cachajá me tséhë ndiya rë Nina. —Cuatjin xu cachja Jesús.

*Ejemplu tséhë tujún xi casua nai rë hndixahan*

<sup>11</sup> Xi tu cajnetaha cavisinjuju xuta cjua vëhë ne, Jesús ne, cachja sa xu me ngu ejemplu cojo xuta jan ta, tséhë xi tiña siutahá me cojo nandya Jerusalén, hane má xu rë xuta ta ha hisca tacun xati xi cuinduva Nina sahmi me gobiernu.

<sup>12</sup> Hane cuitjin xu cachja me:

—Cuejña ne xi ngu xuta chacun jan ne, quiji me ngu nangui cjin, xi cjuahaxa me xi cumatitjun me tséhë estadu rë me, sehe cuya nga me. <sup>13</sup> Hane chaja sa xi cjue me ne, cajindaya me të hndixahan rë me, sehe casua rë me jima ngu hndixahan jan tujún. Sehe cachja me cojo cuitjin: “Nihñu xa cojo tujún vihi jinguyëjë rë xi cjuë sehe cúa.” Cuatjin cachja me. <sup>14</sup> Peru xuta tséhë estadu rë me ne, jemu choho vëë rë me. Vëhë xi hya xi ha quiji xuta chacun ja ne, catsingatju xuta estadu rë me jan ngujo cha xi cuichja cha cuitjin cojo xuta xi suaxa rë xuta chacun jan: “Mamijí niji xi me xi cuajyihí vë cumatitjun me tsijin.” Cuatjin cuichja cha. <sup>15</sup> Hya xi camá ne, xi cavuya xuta chacun jan xi cafë cafahatsja me xa ne, cavitexa me xi chjindaya rë cha hndixahan rë me xi casua rë me tujún jan, cojo sa xi sua cha cumachaya rë me há cjín cavesun rë cha jima ngu cha xi casahmi cha xa cojo tujún xi casua me cha. <sup>16</sup> Hane cha hndixahan xi canduva titjun ne, cuitjin cachja cha: “Tatá. Sacuatjin tujún xi catuhun ná ne, cavesun ná të cuatjin sa.” Cuatjin cachja cha. <sup>17</sup> Sehe ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsë rë xi jemu ndaja canihñi xa xi chúva vë ne, suá ri të nandya xi cumatitjun ngaye tséhë.” Cuatjin cachja me. <sup>18</sup> Hane xi canduva cha xi majo ne, cuitjin cachja cha: “Tatá. Sacuatjin tujún xi catuhun ná ne, cavesun ná hñú

cuatjin sa.” Cuatjin cachja cha. <sup>19</sup> Hane nai rë hndixahan jan ne, cuitjin cachja me: “Ngaye ne, cumatitjun ngaye tsëhë hñú nandya.” Cuatjin cachja me. <sup>20</sup> Hya xi camá ne, xi canduva nga ngu cha ne, cuitjin cachja cha: “Tatá. Cuajyihí tujún xi catuhun ná nguehe. Tujún vi ne, cavinchándaja cahntsua ngu pañutu ta, <sup>21</sup> tsëhë xi tsácjun nuju. Ta ngayun ne, jemu hñu cjua nuju. Tangun ngayun cojo ngu xuta xi fanga me handasa hacuiin me vëhë catsitjë me ta, tsëhë xi ngayun ne, hacjahi sahmi xa ne, ngayun chjuhunntsun chji rë.” Cuatjin cachja cha hndixahan vëhë. <sup>22</sup> Ngajan xi xuta chacun jan ne, cuitjin cachja me cojo hndixahan vëhë: “Ngaye, hndixahan tsehen ne, cojo cjua riji sove ni tsichúva ri. Ngaye xi noje xi hye xi jemu hñu cjua naha, hacuaha tangun ngahan cojo ngu xuta xi fanga me handasa hacuiin me catsitjë me, tsëhë xi ngahan ne, hacjahi sahmi xa ne, ngahan fahántsa chji rë. <sup>23</sup> Sá xi hye xi cuatjin ne, ¿mé má hacuiin xcun bancun cahmi chani tujún xi casuá ri, cojo sa xi hya xi cjuëhë ne, cúa cjuahántsa tujún naha, peru cojo quihndi rë ní?” Cuatjin cachja xuta chacun jan cojo hndixahan rë me. <sup>24</sup> Sehe cachja sa me cojo ngujo hndixahan rë me xi hinchacun jan cuitjin: “Chjuhuntuhan tujún xi yaha cha vë ne, sehe tuhun rë cha xi cavesun rë të cuatjin sa sacuatjin tujún xi casuá rë.” Cuatjin cachja xuta chacun jan. <sup>25</sup> Hane hndixahan jan ne, cuitjin cafayangui: “Tatá. ¡Peru cha vëhë ne, ha tjin rë cha të cuatjin sa!” Cuatjin cachja cha. <sup>26</sup> Ngajan xi xuta chacun jan ne, cuitjin cachja me: “Nguehe cuichjá cojo nuju ta yëjë xuta xi cavesun rë me xcun xi ha tjin rë me ne, suá sa rë me. Hane xuta xi tsajin mé cavesun rë me ne, hisca xi tjin rë me ne, cjuahátahá. <sup>27</sup> Hane sacuaha condra naha xi mijí rë xi ngahan cumatitjun ngahan tsëhë ne, tángun chjuhun, nduvuncujun nguehe, sehe nicuhun nguehe xcun.” Cuatjin cachja xu xuta chacun xcun ejemplu xi cachja Jesús.

### *Cafehe Jesucristu nandya Jerusalén*

<sup>28</sup> Hya xi camá xu ne, xi cavatju cachja Jesús cjua vëhë ne, sehe cavetju me quiji sa xu me xi cjuehe me Jerusalén. <sup>29</sup> Hane hya xi camatiña me tsëhë nandya Betfajé cojo nandya Betania, nandya xi siu tiña tsëhë ndetjún xi hmí rë Ndetjún Olivu ne, sehe catsingatju xu me jo xuta ladu rë me xi cjue tixa rë me, <sup>30</sup> hane cuitjin xu cachja me:

—Tángun nandya xi tsejen tacun vë. Hane xi cjuhun jan ne, ngajan cuechuntuhan ngu chu burru xatsë, xi hisca ngu cjëë cuijin rë chu, tjihñu chu. Hane chundecjun chu, nduvuncujun chu. <sup>31</sup> Hane sá xi yo cjuinenguise nuju mé má cuatjin chundecjun chu ne, sehe tinújun cuitjin: “Nai niji meje rë me chu.” Cuatjin tinújun. —Cuatjin xu cachja Jesús.

<sup>32</sup> Hane me xi casatëxa rë jan ne, quiji xu me, hane cavetju-caa jain sacuatjin cachja Jesús cojo rë me. <sup>33</sup> Hane jinguyëjë rë xi tivundecja me burru jan ne, nai rë chu ne, cuitjin xu cachja me:

—¿Mé má cuatjin chundecjun burru vë? —Cuatjin xu cachja me.

<sup>34</sup> Hane xuta ladu rë Jesús jan ne, cuitjin xu cafayangui me:

—Nai niji meje rë me chu. —Cuatjin xu cachja me.

<sup>35</sup> Sehe quijicojo xu me chu hiscan tacun Jesús. Hane caviyujusun me tsjian rë me ngaxtun chu, sehe catsiquijin xu me Jesús burru jan. <sup>36</sup> Hane xi cjui Jesús quisun me burru jan ne, táha ticandi xu xuta tsjian rë me hiscan cjui Jesús.

<sup>37</sup> Ngajan xi xi jima tiña xu Jesús cojo yëjë xutacjín jan nandya Jerusalén, hiscan xi cafaha rë xi ha cuitsingaxten ndiya tsëhë Ndetjún Olivu ne, yëjë ni xutacjín xi xuta ladu rë Jesús jan ne, jercu ndama xu rë me, hisca cavetsihin cajindaya me cachja me xi cavaxëndaja me Nina tsëhë yëjë ni cjuarcun xi cavëë me.

<sup>38</sup> Cuitjin xu cachja me:

—Jemu catsinchacun Nina me xi nduva vi xi cuma titjun tsajan, tsëhë xi Nina catsingatju rë me. Ngahnga ne, hatuxa jemu tjin cjuandaja cjuajeya, hacuaha Nina ne, hatuxa jyë hnga me cojo Hasen rë me. —Cuatjin xu cavaxëndaja xuta Nina.

<sup>39</sup> Hane ngujo cha fariseo xi hinchajñi ngajñi rë xutacjín jan ne, cachja xu cha cojo Jesús cuitjin:

—Maestro, tichuncun cjuaxi tichja xuta ladu nuju vë. —Cuatjin xu cachja cha.

<sup>40</sup> Hane xi cafayangui Jesús ne, cuitjin xu cachja me:

—Nguehe cuichjá cojo nuju ta sá xi xuta xi cuicun vi sejyu me ne, ndyojo vi cuetsihin squindaya cuichja nga. —Cuatjin xu cafayangui me.

<sup>41</sup> Hane xi camatiña sa xu Jesús tsëhë Jerusalén ne, xi cavëë me nandya jan ne, cajihnda xu me ngatsë rë. <sup>42</sup> Sehe cachja xu me sacuaha xi tichja me cojo xuta Jerusalén, cuitjin xu cachja me:

—¡Sá mé ni xi hacuaha cojo ngayun hyun cjuatacun xi yaha cjuandaja cjuajeya! Peru quihndë matsejen ne, cjuatacun vëhë matsejen ne, jiyahma xi cuma nuju. Vëhë xi hyúun. <sup>43</sup> Peru cuechú nixtin xi yëjë ni condra nuju matsejen ne, sahmi me ngujoyë xi cuma cuisehen me nandya nuju, xinchandee nuju me yëjë ni ladu xi cuinchahñu nuju me.

<sup>44</sup> Tsixujne me yëjë ni ndihya tsëhë nandya nuju, tsicanguiin me hisca ngu ndyojo xi tinecoo, hacuaha tsiquehen nuju me ngayujun ni xi nechun nandya nuju. Cuatjin cuatjun cuma matsejen ta, tsëhë xi ngayun matsejen ne, cajni rrun hya xi cafehe Nina xi cuaxëtje nuju me. Cuatjin xu cachja Jesús.

*Cavaxë Jesucristu xuta tsehen tsëhë ndatsen yungun*

<sup>45</sup> Hane xi cafehe me nandya Jerusalén ne, sehe quiji xu me yungun xi matitjun. Hane xi cavisehen me ndatsen yungun jan ne, cavetsihin cavaxë me xuta xi sahmi ndetsin jan. <sup>46</sup> Cuitjin xu cachja me:

—Cuitjin camahindu xcun xujun rë Nina sacuatjin xi cachja me: “Ndyá naha ne, vejña xa xi cjue xuta sahmi me oración rë me.” Cuatjin chja Nina. Peru ngayun ne, tiniñuxun cojo sacuaaha ngu cahndë hiscan xi matangun xuta chëjë. —Cuatjin xu cachja Jesús.

<sup>47</sup> Hya xi camá ne, nchunchujun xu ni quiji Jesús cavicuya me xuta ngajan ndatsen yungun xi matitjun. Hane yëjë ni nahmi xi matitjun cojo yëjë cha xi vicuya cjuachacun cojo yëjë sa xuta xi matitjun ne, jemu cavangui xu me chuva rë xi tsiquehen me Jesús, <sup>48</sup> peru casacuinyiin xu rë me mé sahmi me ta, tsëhë xi yëjë ni xuta ne, tivisiñuju xu me cjuá rë Jesús nguñaja cacun me.

## 20

*Cavinenguise xuta cojo Jesucristu yo cavitexa rë me*

<sup>1</sup> Cuitjin camá xu ngu nixtin hya xi tivicuya Jesús xuta hacuaha tisua me jimachaya rë cjuandajyihi rë Nina ngajan ndatsen yungun xi matitjun. Hacuaha camatangun xu nahmi xi matitjun cojo cha xi vicuya cjuachacun cojo xuta changá, <sup>2</sup> hane cuitjin xu cavinenguise me Jesús:

—Tinújun cojo niji ne, ¿yo cavitexa nuju xi cuatjin nihñu? ¿Yo casuaxa nuju? —Cuatjin xu cavinenguise me.

<sup>3</sup> Hane xi cafayangui Jesús ne, cuitjin xu cachja me:

—Hacuaha cjuinenguësë nuju ngu cjuá, hane chjayunngun tsahan: <sup>4</sup> ¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin xu cachja me.

<sup>5</sup> Sehe ngajan xi xuta xi cuacun jan ne, cavisiajmicjín me ngajñi rë me, cachja xu me cuitjin:

—Sá xi cuinújan xi Nina cavitexa me cha Juan vë ne, cjuinenguise naja me: “¿Mé má camacjaain naja cha?” <sup>6</sup> Hane sá xi cuinújan xi xuta cavitexa rë cha ne, yëjë ni xuta ne, tsiquehen naja me cojo ndyojo ta, tsëhë xi yëjë ni xuta ne, ha macjain rë me xi cha vëhë ne, profeta cha. —Cuatjin xu cavisiajmicjín me.

<sup>7</sup> Ngajan xi xuta xi cuacun jan ne, cachja me xi hvíin me.

<sup>8</sup> Sehe ngajan xi Jesús ne, cuitjin xu cachja me:

—Sá cuatjin ne, ngahan ne, hacuaha cuichjaan cojo nuju yo cavitexa ná xi cuitjin sahme. —Cuatjin xu cachja Jesús.

*Ejemplu tsëhë cha sahmixa xi jemu tsehen cha*

<sup>9</sup>Hya xi camá ne, cavetsihin cachja xu Jesús cojo yějē ni xuta jan ejemplu vihi:

—Cuejña ne xi ngu me jan matsejen ne, catsitjē me xcun nangui rē me xca rē uva. Sehe casua me ngujo cha sahmixa xi cjuahacuenda cha sehe cjuaha tsē tsē me cojo cha. Hya xi camá ne, sehe cavetju me quiji me ngu nangui jemu tsēē camahani. <sup>10</sup>Hane xi cavechú nixtin rē tutjē jan matsejen ne, sehe catsingatju me ngu mosu hndixahan rē me xi quiji cachja cha cojo cha xi fahacuenda xitjē jan xi sua cha hitsē tutjē xi satē rē me xi casacu rē cha xcun nangui rē me jan. Peru cha xi fahacuenda xitjē jan matsejen ne, tu cavaja cha cha hndixahan jan, sehe catsingatju cha cafe, ndastu mé casua rē cha. <sup>11</sup>Hya xi camá ne, cavuya catsingatju nga me ngu hndixahan rē me. Hndixahan vēhē matsejen ne, jemu cavaja rē cha, jemu choho cachja cha cojo, sehe catsingatju cha cafe, ndastu mé casua rē cha. <sup>12</sup>Hya xi camá ne, cavuya catsingatju nga me ngu hndixahan xi majyan. Hndixahan vēhē matsejen ne, jemu cavanguihmu rē cha, sehe cavaxēxin cha tsēhē ngajan.

<sup>13</sup>Ngajan xi nai rē xitjē jan matsejen ne, cuitjin catsingataha cacun me: “¿Mé xi ndatjin sahme quihndē? Ndatjin rē xi tsingátju quihndi naha xi jemu hmú cáacun. Cjuaharcun rē cha, xi quihndi naha.” Cuatjin catsingataha cacun me. <sup>14</sup>Peru xi cavēē cha xi fahacuenda xitjē jan cha vēhē matsejen ne, sehe cavisiajmicjín cha cojo xicjin cha cuitjin: “Cha vihi ne, quihndi rē me xi cuahatsja cha xitjē vi. Niquen cha, cojo sa xi tsajan cuma nangui vi.” Cuatjin cavisiajmicjín cha. <sup>15</sup>Hane xi cavaxēxin cha cha tsēhē nangui jan matsejen ne, sehe catsiquehen cha.

‘Xi má nuju matsejen ne, ¿mé sahmi nai rē xitjē jan cojo cha xi cuacun fahacuenda jan? <sup>16</sup>Cjue tsiquehen me cha, sehe sua me xitjē jan cjuahacuenda jingu sa cha sahmixa. —Cuatjin xu cachja Jesús.

Hane xi cahndē yějē xuta cjua vēhē ne, cachja xu me cuitjin:

—¡Catamamiji cacun Nina xi cuatjin cuma! —Cuatjin xu cachja me.

<sup>17</sup>Ngajan xi xi cavuya vutsejen Jesús xuta jan ne, cuitjin xu cachja me:

—¿Mé vijne xi cuitjin camahindu xcun xujun rē Nina?:

Ndyojo xi catsitjungui chjinevexo ne, vēhē ndyojo xi cavéjña tjun tjun yuju rē xihndēnaña.

Cuatjin camahindu. <sup>18</sup>Hya xi ngu xuta cjuinenguisun me xcun ndyojo vēhē matsejen ne, cuatēlanga rē me. Hane hya xi ndyojo vēhē cjuinenguisun rē ngu xuta matsejen ne, ña cuma tē me. —Cuatjin xu cachja Jesús.

19 Vêhê xi cha xi vicuya cjuachacun cojo nahmi xi matitjun ne, jemu cavangui xu me chuva rê hacutjin cuma xi cjuaha me Jesús hora vêhê ni, tsêhê xi vëe me xi ejemplu xi cachja Jesús ne, condra rê me chja. Peru tsêhê xi tsacjun xu me xuta ne, vêhê xi cafaain xu me Jesús ngutjen.

*Cjuacjintacun tsêhê tujúnsa*

20 Tu siu xu ni me cuidadu tsêhê cjua rê Jesús, hisca catsingatju xu me ngujo cha xi tsejen sacuaaha xuta ndaja, xi cuangui cha chuva rê xi cuaxê rê cha Jesús ngu cjua xi cuaaintjin, cojo sa xi cuma chjahá rê me cjuechani rê me xcun xutaxa rê ndihyavasen. 21 Hane cha xi cuacun jan ne, cuitjin xu cachja cha cojo Jesús.

—Maestro, ngayin ne, hyin ta ngayun ne, vicuyun rê xuta cojo cjuaquixi. Hacuaha tangun ni nújun cojo yêjê xuta ta, tsêhê xi ngayun ne, hatuxa vicuyun ndiya rê Nina cojo cjuaquixi. 22 Quihndê ne, sacuaaha ley rê Moisés ne, ¿há sua cahndê xi cuechjen tujúnsa naja cojo César, me xi matitjun, o há suaain cahndê? —Cuatjin xu cachja cha.

23 Peru Jesús ne, tsêhê xi ha vacun rê me xi jemu ndacha cha ne, cuitjin xu cachja me cojo cha:

24 —Ningacun ná ngu tujún. Quihndê ne, ¿yo xcusun rê hacuaaha yo ñihi rê xi quitahá xcun tujún vê? —Cuatjin xu cavinenguise Jesús.

Hane cha xi cuacun vë ne, cuitjin xu cafayangui cha:

—Tsêhê César. —Chja xu cha.

25 Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rê César xi tsêhê me, hane tuhun rê Nina xi tsêhê me. —Cuatjin xu cachja me.

26 Hane camaji cavaxê xu rê cha Jesús ngu cjua xi cuaaintjin xi cuihndê xuta. Hane xi quijircun xu rê cha tsêhê cjua xi cafayangui Jesús ne, tu caviyujuyuu xu ni cha.

*Cjuachjinenguise tsêhê xi cuya nima cjuahñu*

27 Hya xi camá ne, cafehe xu ngujo cha saduceo hiscan tacun Jesús. Cha xi cuicun vi ne, vicuya cha cjuachacun xi chja xi xuta xi cahme ne, cuyaain nga me cjuahñu. Ngajan xi cha xi cuacun cafehe jan ne, cachja xu cha cojo Jesús cuitjin:

28 —Maestro, Moisés ne, catsihindu me xcun xujun rê Nina xi sá xi ngu xihin cueya, hane tsajin rê chjuun rê hisca ngu quihndi ne, hntse nima vêhê ne, meje rê xi cjuaha rê chjuun cahan vêhê, cojo sa xi sacú rê na quihndi xi cuma sacuaaha quihndi rê nima vêhê. 29 Quihndê ne, cuejña xi ngu ndihya ne, siu yatu cha cojo hntse cha. Hane cha tjun ne, cafaha cha chjuun. Peru cahme cha, hane chjuun rê cha vêhê ne, casacuiin rê na hisca ngu quihndi cojo cha. 30 Hya xi camá



ne, hntsë nima vëhë, cha xi majo ne, cafaha cha na cahan vëhë camá chjuun rë cha na, peru hacuaha cahme cha hane casacuiin rë na quihndi. <sup>31</sup> Hacuanitjin ni cafaha cha xi majyan jan na hisca xi cafë yëjë xi yatu cha cafaha cha na. Peru yëjë cha xi cuacun vë ne, cafë cha cahme cha chuva ngu chuva ngu cha. Hane na vëhë ne, casacuiin rë na hisca ngu quihndi cojo cha xi cuacun vë. <sup>32</sup> Hiscan xi cajnetaha ne, na vëhë ne, hacuaha cahme na. <sup>33</sup> Quihndë ne, hya xi cuya yëjë nima cjuahñu ne, çjarë cha xi cuacun vë xi chjuun rë cha na xi cjuaquixi ta, tsëhë xi yëjë ni xi yatu cha ne, camá chjuun rë cha na? —Cuatjin xu cachja cha saduceo cojo Jesús.

<sup>34</sup> Sehe ngajan xi Jesús ne, cuitjin xu cachja me cojo cha:

—Xuta xi siu me ngasunhndë quihndë ne, tsinguixan me hacuaha vixan me. <sup>35</sup> Peru xuta xi vechú chuva rë xi cuya me cjuahñu xi ha cuatju cueya me hacuaha sacú rë me cjuahñu xatsë ne, cuixaain me hacuaha tsinguixaain me hya ta, <sup>36</sup> tsëhë xi ha quihndë cueyaain nga me, tsëhë xi tangun cuma me cojo ángel. Hacuaha cuma me quihndi rë Nina, tsëhë xi cuya me cjuahñu. <sup>37</sup> Hacuaha hya xi chutayan cjua xi cachja Moisés ngajan hiscan xi catí yanahyá xcuen ne, hya sacu machaya naja tsëhë xi nima ne, cuya cjuahñu ta, tsëhë xi cachja Moisés xi Nina naja ne, Nina rë Abraham, Nina rë Isaac, cojo Nina rë Jacob má me. <sup>38</sup> Peru Nina ne, hacuiin nina rë nima ta nina rë xuta xi quicun me ta, tsëhë xi xi cuma rë Nina ne, yëjë ni xuta ne, quicun me, handasa cahme yahnga me. —Cuatjin xu cachja Jesús.

<sup>39</sup> Ngajan xi ngujo cha vicuya cjuachacun ne, cuitjin xu cachja cha:

—Maestro, ndatjin cjua xi canújun.

<sup>40</sup> Cuatjin xu cachja cha ta, tsëhë xi tsacjun xu cha cjuinen-guise sa cha me.

*¿Yo tjë rë má me xi catsingatju Nina?*

<sup>41</sup> Sehe ngajan xi Jesús ne, cachja nga xu me cuitjin:

—¿Hacutjin má xi cuatjin chja xuta xi me xi tsingatju Nina ne, tjë rë David má me? <sup>42</sup> Ta suvá David ne, cachja me cuitjin xcun xujun tsëhë Salmo:

Nina ne, cachja me cojo Nai naha cuitjin:

“Tinechin nguehe ladu quixi naha,

<sup>43</sup> hisca hya xi yëjë ni xi sahmi ri condra ne, cuiyujú ngahan ngahma gobiernu riji.”

Cuatjin cachja David cjua xi cachja Nina. <sup>44</sup> Quihndë ne, sá xi suvá David chja me xi Nai rë me má me xi tsingatju Nina ne, çhacutjin má ne xi hacuaha tjë rë me ni? —Cuatjin xu cachja Jesús.

*Cachjajyë Jesucristu cojo xuta ladu rë me tsëhë cha vicuya cjuachacun*

<sup>45</sup> Jìnguyëjë rë xi tivisiñuju yëjë xuta jan ne, Jesús ne, cachja xu me cuitjin cojo xuta ladu rë me:

<sup>46</sup> —Xicaninguisuhunjñuu cojo cha xi vicuya cjuachacun, xi jemu ndama rë cha xi cuatjin vajá cha tsjian nduju, hora xi fi tsujyihya cha, jemu chuya rë cha xi cuatjin fi chja xuta nina cojo cha ngajan ngajñi ndetsin, hacuaha jemu chuya rë cha xi cuatjin satë rë cha cahndë xi matitjun tsëhë cahntsua yungun, o hiscan ngu ndava suhi. <sup>47</sup> Cha xi cuacun vë ne, hacuaha jemu cjin tujún vaxë cha yachjin cahan. Hisca xi chjayuma cha ne, hacuaha jemu nduju hora, peru hacuiin nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatju cha xi cuma rë jingusa xuta. —Cuatjin xu cachja Jesús.

## 21

*Tujún xi cavincha chjuun cahan cahntsua alcancía*

<sup>1</sup> Ngu nixtin jan ne, jìnguyëjë rë xi tivutsejen xu Jesús xi tivincha xuta nchina tujún cahntsua alcancía tsëhë cjuandaja rë me cojo Nina ne; <sup>2</sup> hacuaha cavëë xu me xi canduva ngu chjuun cahan xi jemu yuma, hane hacuaha cavincha na jo tujún langa cahntsua alcancía jan. <sup>3</sup> Sehe ngajan xi cachja xu Jesús cojo xuta ladu rë me cuitjin:

—Cuichjá cojo nuju cjuaquixi ta na cahan vë xi jemu yuma na ne, hitsë sa vengui chji rë tujún xi cavincha na xi cuma rë tujún xi jemu cjin cavincha yëjë xuta nchina xi cuacun vë ta, <sup>4</sup> tsëhë xi me xi cuacun vë ne, tsëhë cjuanchina xi tjin rë me ne, ngajan cavaxë me tujún xi cavincha me. Peru na vëhë ne, handasa jemu tjin rë na cjuachaja ne, hitsë lihndi tujún xi tjin rë na ne, cavincha na yëjë cahntsua alcancía. —Cuatjin xu cachja Jesús.

*Cachja Jesucristu xi cuetsun yungun*

<sup>5</sup> Ngu ndiya, hya xi ngujo xuta jan cachja xu me xi yungun xi matitjun ne, jemu ndacun ndyojo camá cojo, hacuaha jercu camaxcuen cojo tu mé ni xcusun cjuatjo xi casua xuta ne, cachja xu Jesús cuitjin:

<sup>6</sup> —Sacuaha xcusun xi chutsujun vi ne, cuechú nixtin xi hisca ngu ndyojo ndacun xi cuicun vi ne, tsajin hinchasuncoo xicjin ta cjuë yëjë cuixujne. —Cuatjin xu cachja Jesús.

*Hacutjin sacú cumachaya naja xi ha meje cuijnetaha nixtin vihi*

<sup>7</sup> Ngajan xi xuta jan ne, cavinenguise xu me cojo Jesús cuitjin:

—Maestro, hane ¿janihya cuetjucaa xcusun vëhë ni? ¿Hacutjin cuma sacú niji cjuaquixi xi xcusun vëhë ne, ha tivechú nixtin xi cuetjucaa ni? —Cuatjin xu cavinenguise me.

<sup>8</sup> Ngajan xi Jesús ne, cuitjin xu cachja me:

—Nechun cuidadu, cojo sa xi hacuiin cuma ndacha ngayun ta, tsëhë xi jemu cjín xuta cuetjucaa me xi cuichja me xi hacui me xi catsingatju Nina me, hacuaha cuichja me xi ha camatiña nixtin. Peru xicatsanguntjenguun me. <sup>9</sup> Hacuaha hya xi cuma chaya nuju cjuaxi jemu yehe si tijima ngu nación ne, o sá xi tjin cjuatacun xi jemu yehe si nduva ne, xircarcun ta, hatuxa tjin xi titjun xcusun vëhë cuma. Peru hacuiin ngutjen hya cuijnetaha nixtin vihi.

<sup>10</sup> Hacuaha quijinduju sa xu cachja me cuitjin:

—Scaan xuta tsëhë ngu nación cojo jingu sa nación, hacuaha scaan xuta tsëhë ngu nandya cojo ngu nga nandya. <sup>11</sup> Hacuaha jemu cjín cahndë xi cjuani nangui, jemu cjín cahndë xi cuatju chíhin vitaha, jemu cjín cahndë xi cuma jindya, hacuaha jemu yehe chircun cuma tsejen ngajan ngahnga xi sua cumachaya nuju mé xi cuma.

<sup>12</sup> Peru chaja sa xi cuma yëjë xcusun vëhë ne, xuta ne, tsuyihiyatjengui nuju me cojo cjuahngatacun. Cjuaha nuju me cjucojo nuju me xcun xutaxa rë yungun, hisca cuincha nuju me ndavaya. Cjucojo nuju me xcun xutaxa rë ndihyavasen, hisca xcun gobernador, ngatsë rë xi ladu naha má ngayun. <sup>13</sup> Xi cuatjin cuatjun cuma ne, vëhë sua nuju cahndë xi ninguijxun yëjë cjuaxi hacutjin cavicuyá nuju.

<sup>14</sup> Tejñungutacún xi hacuiin titjun jemu cjín ningatuhuntacún hacutjin chjayunngun tsëhë xutaxa rë ta, <sup>15</sup> tsëhë xi ngahan suá nuju cjuatacun xi cuinújun ngu cjuaxi condra nuju ne, cumaji tsitjungui me hacuaha cumaji cuichja me xi quixiin.

<sup>16</sup> Hacuaha hisca xutacha nuju, o sá xi xingun, o sá xi xuta nuju, o sá xi amigu nuju ne, cuinchajyë nuju me. Hacuaha tjin yahnga ngayun ne, hisca tsiquehen nuju me. <sup>17</sup> Yëjë ni xuta ne, choho scuëë nuju me, tsëhë xi ladu naha ngayun.

<sup>18</sup> Peru xicamacjiintacún ta tsajin camahani mé xi nichujun.

<sup>19</sup> Caticaa nuju ta, tsëhë xi cuatjin xi cuetjuntjun.

<sup>20</sup> Peru hya xi chun xi jemu cjín xuta nduvacjin cuetsihin xinchandee me nandya Jerusalén xi sahmi me ngu si jyë cojo nuju ne, vëhë sua machaya nuju xi camatiña nixtin xi nandya Jerusalén ne, cjuë tsinguetsun xuta nduvacjin vë. <sup>21</sup> Nixtin hya ne, ngayujun ni xi nechun yëjë nandya tsëhë distritu Judea ne, tiyun tángun hiscan ndetjún. Hacuaha ngayujun ni xi nechun nguehe nandya Jerusalén ne, tetjunxun. Hacuaha ngayujun ni xi nechun ranchun rë Jerusalén ne, xicatsanguun nandya xi naxuntjun yojo nuju. <sup>22</sup> Cuatjin meje

rë xi nihñu ta, tsëhë xi nixtin hya ne, sahmi Nina castigu nandya vihi, cojo sa xi xi cuatjin ne, cuetjucaa yëjë hacutjin camahindu xcun xujun rë Nina. <sup>23</sup> Jemu chojyihî tsëhë yëjë yachjin xi hinchahma quihndi rë me cojo yëjë me xi tjin rë quihndi vaqui nixtin hya ta, tsëhë xi cuatju ngu cjuandya jyë nación vihi, hacuaha cuatju xuta nguehe ngu castigu. <sup>24</sup> Hacuaha jemu cjín xuta nguehe cueya me cojo quicha, hacuaha jemu cjín xuta nguehe tsihñu xuta tsëhë jingu sa nación me sehe tsingatju me me yëjë ni nación. Hane xi cuatju vëhë ne, suvá xutaxín cjue nduva me sunesun me xcun nangui tsëhë nandya Jerusalén, hisca xi cjuë nixtin xi xuta xi cuacun vë cuitexa me nandya Jerusalén vi.

*Xcusun xi cuma hya xi cuinduva nga Jesucristu*

<sup>25</sup> Nixtin hya ne, hacuaha cuma tsejen cjuarcun xi cuma xcun tsuhi cojo sá cojo niñú. Hane nguehe ngasunhdë ne, jercu cjín tsingataha cacun xuta tsëhë yëjë ni nación, ña cuya sca me tsëhë xi jercu cjuane ndachacun, hacuaha jercu tsiquijin rë tsindyu rë. <sup>26</sup> Yëjë xuta ne, ña cuma ndaya cacun me xi tsacjun me, xi tsingataha cacun me tsëhë chircun xi cuma nguehe ngasunhdë ta, tsëhë xi hisca ngahñu xi yaja ngahnga ne, cjuiniyaya. <sup>27</sup> Sehe hya scuëë xuta ngahan, xi Quihndi rë Xuta Jain ngahan, xi cuinduva ngajñi rë yufí cojo jemu jyë ngahñu, hisca setí hisca vatë jyihî ngahan xi cuinduva. <sup>28</sup> Hya xi xcusun xi cuacun vë cuetsihin cuma ne, tisechun chutsujun ngahnga ta camatiña nixtin xi cuetjuntjun.

<sup>29</sup> Xi quijinduju sa cjuavisajmi rë Jesús ne, cachja xu me ngu ejemplu vihi:

—Quihndë ne, ningatuhuntacún tsëhë yaxujún o sá yahnga sa ya xi vixu xca rë. <sup>30</sup> Xi tu chun xi cuetjusehen ya xi cuacun vë ne, ha hyun ta ha camatiña chan tsi. <sup>31</sup> Hacuaha chuva vëhë ni ne, hya xi chun xi cuetsihin cuma yëjë xcusun xi cachjá cojo nuju vë ne, vëhë sua cumachaya nuju xi ha camatiña nixtin xi nduva Nina sahmi me gobiernu.

<sup>32</sup> Cuichjá cojo nuju cjuaquixi ta ngayujun ni xi nechun nixtin vihi ne, hacuiin ngayujun caveyun chaja sa xi cuatju yëjë xcusun xi cachjá cojo nuju jan. <sup>33</sup> Ngahnga cojo nguehe ngasunhdë ne, hatuxa cjuë. Peru hisca ngu cjua naha ne, tsajin xi cuetjincaain.

<sup>34</sup> Nechun cuidadu tsëhë xcusun xi nihñu. Xicatuun cahndë xi cjuatacun nuju ne, tsë rë cojo cjuatacun tsëhë cjuachihi, cojo cjuacjintacun tsëhë xcusun xi mameje nuju xcun ngasunhdë nuju, sá tu tsajin tjin chjine ngayun hya xi cuechú nixtin vëhë, <sup>35</sup> sacuatjin tsajin tjin chjine ngu chu hya xi finenguisun rë chu chen. Vëhë xi nechun cuidadu ta, tsëhë xi hatuxa cuechú nixtin vëhë, hya xi sahmi Nina gobiernu

yějě ni xuta jingujyě ni ngasunhdě. <sup>36</sup> Nechun cuidadu. Yasen ni chjahyun rě Nina xi cuechú chuva rě xi cuetjuntjun tsěhě yějě ni cjuacjintacun xi ha tu hora sa xi cuinduva. Hacuaha chjahyun rě Nina xi cuma cuetjunndujun hora xi cuisechun xcún xi cjuaháchuva nuju cojo cjuatacun nuju, ngahan xi Quihndi rě Xuta Jain ngahan. —Cuatjin xu cachja Jesús.

<sup>37</sup> Nguinixtin ne, ndatsen yungun xi matitjun xu véjña Jesús vicuya me xuta. Hane nguixun ne, vetju xu me fi véjña me ndetjún xi hmí rě Ndetjún Olivu. <sup>38</sup> Hane yějě ni xuta ne, tajñu tajñu xu ni fi me yungun jan xi cuisiniuju me cjuaxi vicuya Jesús.

## 22

### *Camachihin cjuaxi hacutjin xi chjahá rě Jesucristu*

<sup>1</sup> Hya xi camá xu ne, camatiña suhi tsěhě pan xi hacuiin cojo san rě pan má, suhi xi hmí rě Pascua. <sup>2</sup> Hane nahmi xi matitjun cojo cha vicuya cjuachacun ne, jemu tivangui xu me chuva rě hacutjin xi tsiquehen me Jesús. Peru táhahma xu tisahmi me xcusun vėhě ta, tsěhě xi tsacjun xu me xuta.

<sup>3</sup> Hya xi camá xu ne, Satanás ne, cavisehen xu cahntsua xahasen rě Judas, cha xi hacuaha hmí rě Iscariote, ngu cha ngajñi rě me xi tejó xi má ladu rě Jesús. <sup>4</sup> Ngajan xi Judas jan ne, quiji cavisiajmicjín xu cha cojo ngujo nahmi xi matitjun cojo ngujo cha mayu yungun hacutjin cuma xi cjuaha xuta xi cuacun vė Jesús. <sup>5</sup> Hane nahmi xi matitjun cojo mayu jan ne, jemu ndaja camá xu rě me, hisca caviyuju cacun me xi sua me cha tujún. <sup>6</sup> Hane Judas ne, cojo cjuatacun vėhě ne, camangu cacun cha, sehe ngajan xi cavangui xu cha ngu hora xi tsajin cjín xuta, xi sahmí cha entregadu Jesús cojo xuta xi cuacun jan.

### *Hacutjin cajině Jesucristu tsěhě suhi rě Pascua*

<sup>7</sup> Cavechú xu nixtin tsěhě suhi rě pan xi hacuiin cojo san rě pan má, nixtin hya xi meje rě xi cueya chu tsánga. <sup>8</sup> Sehe ngajan xi Jesús ne, catsingatju xu me Pedru cojo Juan ngu tixa, hane cuitjin xu cachja me:

—Tángun tuhunchjinu xi xiněnguixuun tsěhě suhi. —Cuatjin xu cachja me.

<sup>9</sup> Sehe ngajan xi me xi cuacun jan ne, cavinenguise xu me Jesús cuitjin:

—¿Hane jani meje nuju xi cuihinchjini ni? —Cuatjin xu cavinenguise me.

<sup>10</sup> Hane Jesús ne, cuitjin xu cachja me:

—Chutsujun ni, xi cjuhun tjehe nandya jan ne, ngajan cuechuntuhun ngu cha xi yaniji ngu nisa nandá, hane

tánguntjengun cha hisca xi cjuhun ndihya hiscan cjui cha, <sup>11</sup> sehe tinújun cojo nai rë ndihya jan cuitjin: “Cuitjin cjua xi catsingatju maestru tsujun: ¿Jarë cuarto xi tuhun, sehe ngajan sinë niñu tsëhë suhi cojo xuta ladu naha?” Cuatjin tinújun cojo rë me. <sup>12</sup> Hane me vëhë ne, tsingacun nuju me ngu cuarto jyë xi tacun ngahnga hiscan xi ha tjin chjine ndihya. Hane ngajan tuhunchjinu xi xinëë. —Cuatjin xu cachja Jesús.

<sup>13</sup> Hane xi quiji me xi jo jan ne, cavetjucaa jain yëjë cjua xi cachja Jesús cojo rë me. Hane ngajan cavëhëndaja xu me xi sinë nguixun Jesús cojo rë me tsëhë suhi.

<sup>14</sup> Hane xi cavechú hora ne, cafaha xu Jesús cahndë rë me xcun maxë cojo xingu xingu apóstol. <sup>15</sup> Hane sehe cachja xu me cojo apóstol jan cuitjin:

—Jemu meje sínë cojo nuju comida tsëhë suhi vihi chaja sa xi cjuehe cjuaveya naha ta, <sup>16</sup> tsëhë xi nguehe cuichjá cojo nuju ta ha quihndë tsajin nixtin xi cúa sínë nga comida tsëhë suhi vihi. Sínë nga, peru hisca hya xi cuinduva Nina sahmi me gobiernu ta, tsëhë xi cjuatacun xi vicuya naja suhi vihi ne, hya cuetjucaa jain. —Cuatjin xu cachja Jesús.

<sup>17</sup> Hane xi cafahatsja xu me ngu vasu ne, sehe casua me nacuechji rë Nina, sehe cachja xu me cuitjin:

—Juhun vihi ne, sehe siuhun tsë tsë cojo xingun ta, <sup>18</sup> hacuaha cuichjá nga cojo nuju ta quihndë cojo nixtin xi cjuiniji sa ne, ha quihndë cyaan cuëhë xan rë uva. Cuëhë, peru hisca hya xi cuinduva Nina sahmi me gobiernu. —Cuatjin xu cachja Jesús.

<sup>19</sup> Hane xi cafaha me ngu niñutsju hacuaha casua me nacuechji rë Nina ne, sehe cavotohocja xu me niñutsju jan. Hane xi casua rë me apóstol jan ne, sehe cachja xu me cuitjin:

—Vihi ne, yojo naha vi, xi tisuá xi cueya ngatsë nuju. Cuitjin nihñu xcusun vihi yasen ni, cojo sa xi ninguitsjun ná. —Cuatjin xu cachja Jesús.

<sup>20</sup> Hane xi cajnetaha cajinë nguixun me ne, hacuanitjin xu ni casahmi me cojo vasu. Hora xi casua rë me apóstol ne, cuitjin xu cachja me:

—Xan vihi ne, vihi jni naha xi cuetju ngatsë nuju. Cuatjin xi cuma chihin compromisu xatsë xi tisahmi Nina cojo xuta.

<sup>21</sup> Peru chutsujun ni, cha xi sahmi ná entregadu ne, nguehe tacun cha ngajñi naja. <sup>22</sup> Hane ngahan xi Quihndi rë Xuta Jain ngahan ne, hatuxa tjin ná xi cueya sacuatjin cavichaya Nina tsahan. Peru jemu chojyih tsëhë cha xi sahmi ná entregadu. —Cuatjin xu cachja Jesús.

<sup>23</sup> Ngajan xi yëjë xu apóstol jan ne, cavetsihin cavinenguisse xicjin me jarë me xi sahmi xcusun vëhë.

### *Yo xi hitsë sa matitjun*

<sup>24</sup> Hya xi camá xu ne, cavetsihin sacuaha xi meje scaanya me ngajñi rë me yo xi chja xuta xi hitsë sa matitjun. <sup>25</sup> Ngajan xi Jesús ne, cuitjin xu cachja me:

—Yëjë ni xuta xi matitjun nguehe ngasunhdë ne, jercu sahmi yehe me yojo rë me sacuaha xi me vëhë má me nai rë xuta. Hacuaha jercu meje rë me xi yëjë xuta ne, cuichja me xi jemu ndaja me xi matitjun vë. <sup>26</sup> Peru ngayun ne, mijí rë xi cuatjin nihñu ta xi meje rë ne, ngu xi matitjun tsëhë ngajñi nuju ne, catitsinguijne yojo rë sacuaha ngu xi chúva nu rë. Hane ngu xi vitexa tsëhë ngajñi nuju ne, hacuaha catitsinguijne yojo rë sacuaha ngu hndixahan. <sup>27</sup> ¿Yo xi hitsë sa matitjun ni? ¿Há ngu xi tijinë ne, o há tsajin ne, há ngu hndixahan xi cjuí caní comida? Xi tijinë ne, hatuxa vëhë xi hitsë sa matitjun. Peru ngahan ne, tejña ngajñi nuju sacuaha ngu hndixahan nuju.

<sup>28</sup> Ngayun ne, ngayun xi cacaa nuju cojo yëjë cjuañihi xi cavatjuun camá. <sup>29</sup> Vëhë xi sacuaha casuaxa ná Nahmi naha xi ngahan sahme gobiernu ne, cuatjin suáxa nuju xi nihñu gobiernu, <sup>30</sup> cojo sa xi ngayun ne, hacuaha xinu siuhun cojo ná ngajan hiscan sahme gobiernu. Hacuaha suáxa nuju xi nichuvun cjuatacun rë yëjë tejó tjë naja, ngayaan xi tjë rë xutachanga naja Israel ngayaan. —Cuatjin xu cachja Jesús.

### *Casua Jesucristu camachaya rë Pedru xi cuichja me xi hvín me yo Jesucristu*

<sup>31</sup> Hacuaha cachja sa xu Jesús cuitjin cojo Pedru xi hacuaha hmí rë me Simón:

—Chutsujun ni Simón. Satanás ne, casacu rë cahndë xi tsichuva cjuatacun nuju ngayujun ni. <sup>32</sup> Peru ngayun Simón ne, caféhya rë Nina ngatsë nuju, cojo sa xi hacuiin cumandaya tacún sacuatjin xi mangutacún cojo ná. Hane hya xi ngayun cuyun nga ndiya naha ne, tuhun ngahñu xingun. —Cuatjin xu cachja Jesús.

<sup>33</sup> Ngajan xi Pedru ne, cachja xu me cojo Jesús cuitjin:

—Tatá. Ngahan ne, tsingatehen cjuë ndavaya cojo nuju hisca tsingatehen cueya cojo nuju. —Cuatjin xu cachja Pedru.

<sup>34</sup> Ngajan xi Jesús ne, cuitjin xu cafayangui me tsëhë Pedru:

—Nguehe cuichjá cojo nuju, Pedru. Chaja sa xi squihnda ngu xahnda ne, ha jyan ndiya canújun xi hyúun yo ngahan. —Cuatjin xu cachja Jesús.

### *Camatiña hora xi chjahá rë Jesucristu*

<sup>35</sup> Hacuaha cachja me cojo xuta ladu rë me cuitjin:

—Hya xi catsingátju nuju xi cachjá cojo nuju xi chuun tujún, chuun changa hacuaha chuun chuxinxte ne, ¿há quixi xi tsajin mé camachaja nuju? —Cuatjin xu cachja Jesús.

Hane xuta ladu rë me jan ne, cuitjin xu cachja me:

—Juun, tsajin mé. —Cuatjin xu cachja me.

<sup>36</sup> Hane Jesús ne, cachja nga xu me cuitjin:

—Peru quihndë ne, jarë ngayun xi tjin nuju tujún, tjin nuju changa ne, chuhun, tángun cojo. Hane yo xi tsajin rë ngu quichandujú ne, catiteña tsjanga rë ne, sehe catatsë ngu quichandujú. <sup>37</sup> Cuatjin meje rë ta, tsëhë xi nguehe cuichjá cojo nuju ta hacutjin xi camahindu tsahan xcun xujun rë Nina ne, hatuxa tjin rë xi cuetjucaa, cjua xi chja cuitjin: “Cuichja xuta tsëhë me xi ngu xuta tsehen me.” Cuatjin camahindu. Hatuxa cuetjucaa sacuatjin camahindu. —Cuatjin xu cachja Jesús.

<sup>38</sup> Sehe ngajan xi xuta ladu rë Jesús jan ne, cuitjin xu cachja me:

—Chutsujun ni, tatá. Nguehe ne, ha siu jo quichandujú. —Cuatjin xu cachja me.

Sehe ngajan xi Jesús ne, cuitjin xu cafayangui me:

—Cojo vëhë ne, ha cuma. —Cuatjin xu cachja me.

### *Casahmi Jesucristu oración rë me ngajan Ndetjún Olivu*

<sup>39</sup> Hya xi camá ne, xi cavetju xu me tsëhë nandya Jerusalén ne, sacuatjin xi ha xcusun rë me ne, quiji xu me Ndetjún Olivu. Hacuaha cojo yëjë xuta ladu rë me quiji xu me cojo rë me. <sup>40</sup> Hane xi cafehe me jan ne, cachja xu me cojo xuta jan cuitjin:

—Chjahyun rë Nina xi hacuiin chjaháchuva nuju cojo cjuat-acun nuju. —Cuatjin xu cachja me.

<sup>41</sup> Hane xi quijixin me hitsë tsëhë xuta ladu rë me jan ne, sehe ngajan cavixcuhnchi xu me xi sahmi me oración rë me,

<sup>42</sup> cuitjin xu cachja me:

—Ngayun Nahmi naha, sá mé ni xi meje nuju ne, chjuhunxun cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan. —Cuatjin xu cachja me.

<sup>43</sup> Hya xi camá ne, cavëë xu me ngu ángel xi canduva tsëhë ngahnga, casua rë me ngahñu. <sup>44</sup> Hane xi jemu jima ndaya cacun xu me ne, hitsë sa jercu cafehya rë me Nina. Hacuaha ndasueya xi cavetju rë me ne, sacuaaha jni xu cún xi cavixu nangui.

<sup>45</sup> Hane xi cavisatjenhnga xu Jesús xi cajnetaha casahmi me oración rë me ne, xi cavuya quiji me hiscan siu xuta ladu rë me jan ne, casacutsja xu me xi siufë, ngatsë rë cjuachoho rë.

<sup>46</sup> Sehe ngajan xi Jesús ne, cuitjin xu cachja me cojo xuta jan:



—¿Mé má cuatjin tsjuñufun ni? Tisatjunhngun ne, nihñu oración nuju, sátu chjaháchuva nuju cojo cjuatacun nuju. —Cuatjin xu cachja Jesús.

### *Cafaha xuta Jesucristu*

<sup>47</sup> Jínguyëjë rë xi tichja cuaha xu Jesús ne, ha tu ñahñu jercu cjin xuta cafehe me. Hane cha xi hmí rë Judas, ngu cha ngajñi rë me xi tejó xi má ladu rë Jesús jan ne, titjun xu cha xcun xuta cjin jan cjuí cha. Hane xi cafehe cha jan ne, sehe quijitiña xu cha xi cuitatsuha cha Jesús xi sua cha me nina. <sup>48</sup> Ngajan xi Jesús ne, cuitjin xu cachja me cojo cha:

—Judas, ¿há cuatjin cuitatsuhun ná xi nihñu ná entregadu, ngahan xi Quihndi rë Xuta Jain ngahan? —Cuatjin xu cachja me.

<sup>49</sup> Hane xi cajne rcu xuta xi siu cojo Jesús xcusun xi cuma jan ne, sehe cachja xu me cuitjin:

—Tatá. ¿Há cuíjin rë me quicha? —Cuatjin xu cachja me.

<sup>50</sup> Hya xi camá xu ne, ngutjen cavaja ngu me jan cha hndixahan rë nahmi xi matitjun tsëhë yëjë ni nahmi, hane cavatësun xu me tyjavañuju quixi cha. <sup>51</sup> Hane ngajan xi Jesús ne, cuitjin xu cachja me:

—Camá ni. —Cuatjin xu cachja me.

Hane xi cavetahatsja xu me hiscan cati rë cha ne, camandaja xu cha casahmi Jesús. <sup>52</sup> Hane nahmi xi matitjun cojo cha mayu yungun xi matitjun cojo xutachanga, xi cafehe me xi cjuaha me Jesús ne, cachja xu Jesús cojo rë me cuitjin:

—¿Há nduvun chjuhun ná sacuaha ngu xuta xi chëjë me, xi cuatjin nduvun cojo ya cojo quicha vë ni? <sup>53</sup> Xi cavitejñaya cojo nuju nchunchujun ni ndatsen yungun jan ne, cave-tuhunntsuun ná. Peru quihndë cavechú hora xi casua Nina cahndë xi nihñu cojo ná tu mé ni xi meje nuju, cavechú hora xi Satanás cuitexa. —Cuatjin xu cachja Jesús.

### *Cachja Pedru xi hvín me yo Jesucristu*

<sup>54</sup> Hya xi camá xu ne, xi cafaha xuta jan Jesús ne, quijicojo me me ndava nahmi xi matitjun tsëhë yëjë ni nahmi. Pedru ne, hacuaha tjengui xu me cjuí me tu cjin tu cjin ni hacutjin cjuí xuta jan cojo Jesús. <sup>55</sup> Hane xi cafehe xu me jan ne, casahmi me ngu ndava ndihi ngajan ndatsen ndihya, sehe ngajan quiji me caviyuju tangun me. Hacuaha cojo xu Pedru quiji me cavéjña tangun me cojo xuta jan. <sup>56</sup> Hane xi cavëë xu na hndixahan rë nahmi jan Pedru, tacun me xcun ndihi jan ne, xi cavutsejenndaja na me ne, sehe cachja xu na cuitjin:

—Me xi cuijyihí vi ne, cojo me tacun me cojo me xi cuajyihí vë hya. —Cuatjin xu cachja na.

<sup>57</sup> Hane Pedru ne, cavitijaya me cachja xu me cuitjin:

—Hveen yo vë. —Cuatjin xu cachja me.

<sup>58</sup> Xi cavatju nga ngu hora lihndi ne, xi cavëë nga ngu cha Pedru ne, cachja xu cha cuitjin:

—Ngayun ne, hacuaha ladu rë me xi cuacun vë má ngayun.  
—Cuatjin xu cachja cha.

Ngajan xi Pedru ne, cuitjin xu cachja me:

—¡Jéya, hacuiin! —Cuatjin xu cachja me.

<sup>59</sup> Xi cavatju sacuaha ngu hora nga xu ne, cachja nga ngu cha xi tacun jan cuitjin:

—Ha cjuaquixindaja ta cha xi cuijyihí vi ne, cojo cha tacun cha cojo cha xi cuajyihí vë, tsëhë xi hacuaha cha Galilea cha.  
—Cuatjin xu cachja cha.

<sup>60</sup> Ngajan xi Pedru ne, cuitjin xu cafayangui me:

—Hveen mé xi nújun vë. —Cuatjin xu cachja me.

Hane ha tu tichja cuaha xu Pedru ne, ha tu ñahñu cajindaya ngu xahnda jan. <sup>61</sup> Ngajan xi Nai naja ne, cavuya vutsejen xu me Pedru. Hane Pedru ne, catsinguitsjen xu me cjuá xi cachja Nai naja cojo rë me, xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Cjuá vëhë xi catsinguitsjen xu Pedru.

<sup>62</sup> Hane xi cavetju xu me candatsen ne, cajihnda susu me.

### *Catsixcuehyu xuta Jesucristu*

<sup>63</sup> Hane cha xi siutahá sahmi cuidadu rë Jesús jan ne, titsixcuehyu xu cha me hacuaha tivaja cha me. <sup>64</sup> Hane xi cavetsa xu cha tuxcun me ne, sehe cavaja sa cha me, sehe cachja xu cha cuitjin:

—¡Tinoje! ¿Yo xi tivaja ri? —Cuatjin xu cachja cha.

<sup>65</sup> Hacuaha jemu cjin sa xu cjuá cachja cha xi choho chja cha tsëhë me.

### *Casahmicuenda xuta xi matitjun jyë rë Jesucristu*

<sup>66</sup> Hane xi camá nchujun jan ne, camatangun xu xuta changá tsëhë nandya jan cojo nahmi xi matitjun cojo cha xi vicuya cjuachacun. Sehe quiji chani xu rë Jesús xcun xuta xi cuacun jan xi chjahácuenda rë jyë rë me. <sup>67</sup> Hane xi cafehe Jesús jan ne, sehe cavinenguise xu xuta jan cuitjin:

—Sá xi ngaye xi catsingatju Nina ngaye ne, tinoje cojo niji.  
—Cuatjin xu cavinenguise xuta jan.

Sehe ngajan xi Jesús ne, cuitjin xu cafayangui me:

—Sá xi cuichjá cojo nuju ne, hatuxa cumacjaain nuju xi cuichjá. <sup>68</sup> Hacuaha sá xi cjuinenguësë nuju ngu cjuá ne, hatuxa chjayunguun tsahan. <sup>69</sup> Peru cuetsihin cojo quihndé ni ne, ngahan xi Quihndi rë Xuta Jain ngahan ne, cuitejña ladu quixi tsëhë Nina, me xi jemu hñu ngahñu rë. —Cuatjin xu cafayangui Jesús.

<sup>70</sup> Ngajan xi yějě ni xuta jan ne, cavinenguisse xu me Jesús cuitjin:

—¿Há ngaye xi Quihndi rě Nina ngaye ni? —Cuatjin xu cavinenguisse me.

Hane Jesús jan ne, cuitjin xu cafayangui me:

—Sacuatjin nújun vė ne, cuatjin jain. —Cuatjin xu cafayangui Jesús.

<sup>71</sup> Ngajan xi xuta xi cuacun jan ne, cuitjin xu cachja me cojo xicjin me:

—¿Mé sa nihña xuta xi tsinguixi me jyě rě cha? Ha canuhyaan suvaan xi hntsua cha cavetju xi cachja cha. —Cuatjin xu cachja xuta.

## 23

### *Cavisehen Jesucristu xcun Pilatu*

<sup>1</sup> Hya xi camá ne, cavisatjenhnga yějě xu xuta xi matitjun jan ne, sehe quijicojo me Jesús xcun Pilatu. <sup>2</sup> Hane cavetsihin xu cavinchajyě me cuitjin:

—Casacuntsin cha xi cuijyih vi tiviseccjan cha cjuatacun rě xuta. Hacuaha mijí rě cha xi cuechjin tujúnsa niji cojo César, me xi matitjun. Hacuaha chja sa cha ta hacui cha xi catsingatju Nina cha, hacuaha matitjun xu cha. —Cuatjin xu cachja me xi cavinchajyě me Jesús.

<sup>3</sup> Sehe ngajan xi Pilatu ne, cavinenguisse xu me Jesús cuitjin:

—¿Há ngaye xu matitjun ngaye tséhě xuta tjě rě Israel? —Cuatjin xu cavinenguisse Pilatu.

Hane Jesús ne, cuitjin xu cafayangui me:

—Cuatjin sacuatjin nújun vė. —Cuatjin xu cafayangui me.

<sup>4</sup> Ngajan xi Pilatu ne, cuitjin xu cachja me cojo nahmi xi matitjun cojo yějě xutacín jan:

—Sacuiin ná hisca ngu jyě rě cha xi cuijyih vi. —Cuatjin xu cachja Pilatu.

<sup>5</sup> Peru quijinduju sa xu cachja xuta xi matitjun jan cuitjin:

—Jemu tiviseccjan cha cjuatacun rě xuta ngatsě rě cjua xi tivicuya cha jinguyyě ni distritu Judea vi. Cavetsihin cha hisca ngajan distritu Galilea, hisca nguehe cafehe cha. —Cuatjin xu cachja me.

### *Cavisehen Jesucristu xcun Herodes*

<sup>6</sup> Hane xi cahndě Pilatu cjua vėhě ne, sehe cavinenguisse xu me xuta jan cuitjin:

—¿Há cha Galilea cha xi cuijyih vi ni? —Cuatjin xu cavinenguisse me.

<sup>7</sup> Hane xi casacu xu rě Pilatu cjuaquixi xi hiscan xi vitexa Herodes canduva Jesús ne, sehe catsingatju xu Pilatu me xcun Herodes, tséhě xi Herodes ne, hacuaha quitahá xu me

ngajan Jerusalén nixtin hya. <sup>8</sup> Hane hya xi cavëë Herodes Jesús ne, jemu ndaja camá xu rë me, tsëhë xi ha titjun sa ne, jemu meje scuëë me Jesús, tsëhë xi ha machaya rë me cju tsëhë Jesús, hacuaha meje scuëë xu me xi sahmi Jesús ngu cjuarcun. <sup>9</sup> Hane jercu cjin cjuachjinenguise casahmi xu me Jesús, peru Jesús ne, tsajin camahani mé xi cafayangui xu me. <sup>10</sup> Hane nahmi xi matitjun cojo cha xi vicuya cjuachacun ne, jemu tivincha xu me jyë rë Jesús. <sup>11</sup> Ngajan xi Herodes cojo sindadu rë me ne, jemu casahmixta xu me cojo Jesús, hacuaha catsixcuehyu me me. Hane xi catsicaja xu me Jesús ngu tsjian xi jemu ndajyih camahani ne, sehe cavuya catsingatju nga xu me Jesús xcun Pilatu. <sup>12</sup> Hane nixtin hya ne, Herodes cojo Pilatu ne, jemu cavinga xu rë me xicjin me, handasa titjún xu ne, maji vëë xicjin me.

*Camá entregadu Jesucristu xi cjue cueya me*

<sup>13</sup> Hya xi camá ne, xi casahmitangun xu Pilatu nahmi xi matitjun cojo xutaxa rë cojo xuta nandya ne, <sup>14</sup> sehe cachja xu me cojo cuitjin:

—Ngayujun ni matsejen ne, canduvuncujun cha xi cuijyih vi nguehe matsejen, tsëhë xi xi má nuju matsejen ne, tivisejan cha cjuatacun rë xuta. Peru quihndë matsejen ne, chutsujun ta, xcún ni matsejen ne, cafahátaha rë cha, peru casacuiin ná hisca xi ngu jyë rë cha sacuatjin jyë xi cavinchun. <sup>15</sup> Hacuanitjin ni Herodes matsejen ta, casacuiin rë me jyë rë cha, vëhë xi catsicuya nga me cha. Chutsujun ta tsajin camahani mé casahmi cha xi vechú chuva rë xi niqen cha. <sup>16</sup> Vëhë xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

<sup>17</sup> Hatuxa xcusun xu rë Pilatu xi tsismi me ngu presu xi xuta vaxijin me nu nu ni nixtin rë suhi. <sup>18</sup> Peru yëjë ni xuta xi matitjun jan ne, ngu tangun ni camá xu me cajindaya me cachja me cuitjin:

—¡Nicuhun cha vi ne, Barrabás nismu cha! —Cuatjin xu cajindaya me.

<sup>19</sup> Cha Barrabás ne, quiji cha ndavaya ngatsë rë xi casahmi xu cha ngu si cojo xutaxa rë, hacuaha catsiquehen xu cha. <sup>20</sup> Peru ngu ndiya nga cachja xu Pilatu cojo xuta xi matitjun jan, tsëhë xi Pilatu ne, meje tsismi me Jesús. <sup>21</sup> Peru xuta xi matitjun jan ne, cavuya cajindaya nga me cachja xu me cuitjin:

—¡Tetuhun cha, tetuhun cha xcun cru! —Cuatjin xu cajindaya me.

<sup>22</sup> Hane xi ma jyan ndiya ne, cavinenguise xu Pilatu xuta xi matitjun jan cuitjin:

—Peru ¿mé xi jemu choho casahmi cha ni? Tsajin camahani mé jyě rě cha casacu ná xi vechú chuva rě xi niqnen cha. Věhě xi cuitéxa sehen ni rě cha matsejen ne, sehe tsisme cha. —Cuatjin xu cachja Pilatu.

<sup>23</sup> Peru yějě ni xuta xi matitjun jan ne, quijinduju sa xu cajindaya me cafehya me xi setaha Jesús xcun cru. Věhě xi cajne cacun xu Pilatu, <sup>24</sup> hacuaha cavejña cacun xu me xi sahmi me hacutjin xi fehya xuta jan. <sup>25</sup> Hya xi camá ne, catsismi xu me cha xi cafehya xuta xi matitjun jan, ngu cha xi quiji ndavaya tsěhě xi casahmi xu si cojo xutaxa rě hacuaha catsiquehen xu cha. Peru Jesús ne, casua xu Pilatu me xi cjue cueya me, sacuatjin meje rě xuta xi matitjun jan.

### *Casetaha Jesucristu xcun cru*

<sup>26</sup> Hane xi cjuicojo sindadu Jesús ne, ngajan ndiya jan cavechútáha xu cha ngu me xi hmí rě Simón tsěhě nandya Cirene, xi nduva xu me quiji me nguijña. Hane cafaha xu sindadu jan me, catsicaniji xu cha me cru xi cjue me cojo hacutjin cjui Jesús.

<sup>27</sup> Hane jercu cjín camaha xu ni xuta quiji me cojo Jesús hacuaha jercu cjín xu yachjin xi hisca chja hisca jihnda na xi jemu choho má rě na ngatsě rě Jesús quiji xu na cojo me. <sup>28</sup> Hane xi cavuya Jesús cavutsejen me na ne, sehe cachja xu me cuitjin:

—Ngayun na quihndi nandya Jerusalén, xicachjihnduun ngatsě naha. Chjihndun ngatsě nuju suvun cojo ngatsě rě quihndi nuju ta, <sup>29</sup> cuechú nixtin xi cuichja xuta cuitjin: “Jemu ndaja tsěhě yachjin xi hatuxa maji sacu rě na quihndi; jemu ndaja tsěhě yachjin xi hisca ngu quihndi casacuiin rě na; hacuaha jemu ndaja tsěhě yachjin xi casacuiin quihndi catsicha na.” Cuatjin cuichja xuta. <sup>30</sup> Nixtin hya ne, hacuaha cuichja xuta cojo ndetjún cuitjin: “Tjinengunsun niji.” Hane naxi ne, cuitjin cuichja me cojo: “Tatsun niji.” Cuatjin cuichja me ta, <sup>31</sup> sá xi cuitjin choho tisahmi xuta vi cojo ná quihndě, ngahan xi tangun ngahan sacuaha ngu ya xcuen ne, hatuxa hitsě sa choho sahmi me cojo nuju nchujun ni nguini, ngayun xi tangun ngayun sacuaha ngu ya quixí. —Cuatjin xu cachja Jesús.

<sup>32</sup> Hacuaha cojo sa xu jo cha tsehen quijicojo sindadu jan cha, xi tsiquehen tangun cha cha cojo Jesús. <sup>33</sup> Hane xi cafehe cha cojo Jesús hiscan xi hmí rě Nínda Rcuun ne, ngajan cavetaha xu cha Jesús xcun cru hacuaha caviyujutaha sa cha catsijo cha tsehen jan xcun cru rě cha. Ngu cru xi quitahá ngu cha ne, casecun xu táha xcun tsěhě Jesús, hane ngu nga ne, táha quixí. <sup>34</sup> Ngajan xi Jesús ne, cachja xu me cuitjin:

—Ngayun Nahmi naha. Ninchatuhun rë xuta vi ta, hvíin me mé xi tisahmi me. —Cuatjin xu cachja Jesús.

Hane xi cuatëcja sindadu tsjian rë Jesús jan ne, cavaxë xu cha ngu suerte. <sup>35</sup> Hane xutacjín jan ne, caxinchacun xu me cavutsejen me xcusun xi tijima jan. Hacuaha xutaxa rë jan ne, cavejnucëë me Jesús, cuitjin xu cachja me:

—Cavaxëtje cha jingu sa xuta. Quihndë ne, cataxëtje suvá cha yojo rë cha, sá xi hacui jain cha xi cavaxijin Nina hacuaha catsingatju me. —Cuatjin xu cachja xutaxa rë.

<sup>36</sup> Hacuaha sindadu jan ne, catsixcuehyu xu cha Jesús. Quijitiña cha hiscan tyjanguí me xcun cru, hane meje sua xu cha xan yufa cuihi me, <sup>37</sup> sehe cachja xu cha cuitjin cojo rë me:

—Sá xi ngaye jain matitjun ngaye tsëhë xuta tjë rë Israel ne, naxetje sove yojo riji. —Cuatjin xu cachja cha.

<sup>38</sup> Hacuaha camahindu xu ngujo cjua rcu cru rë Jesús xi chja cuitjin: “Matitjun cha vihi tsëhë xuta tjë rë Israel.” Cuatjin xu camahindu. Jyan hne camahindu cjua xi cuacun vë: hne griego cojo latín cojo hebreo.

<sup>39</sup> Hane ngu cha tsehen xi cojo casetaha xcun cru jan ne, cuitjin xu choho cachja cha tsëhë Jesús:

—¿Hacuiin ngaye xi catsingatju ri Nina ni? ¡Naxetje sove yojo riji ne, hacuaha naxetje niji! —Cuatjin xu cachja cha.

<sup>40</sup> Hane xi cavatëcja xu cha xingu jan cjua rë cha xi choho chja tsëhë Jesús ne, cuitjin xu cachja cha:

—¿Há rcuiin Nina, quihndë xi tivatjun castigu sacuatjin tivatju me vëhë tijima? <sup>41</sup> Ngayaan ne, cojo cjuaquixi xi tivatjun tijima ta, ngatsë rë xcusun xi canihña ne, vëhë xi vechú chuva rë xi cuitjin tivatjun castigu. Peru me vihi ne, tsajin mé xi jemu choho casahmi me. —Cuatjin xu cachja cha.

<sup>42</sup> Sehe cachja xu cha cojo Jesús cuitjin:

—Jesús, ninguitsjun ná hya xi cuinduvun nihñu gobiernu. —Cuatjin xu cachja cha.

<sup>43</sup> Hane Jesús ne, cuitjin xu cafayangui me:

—Cuichjá cojo nuju cjuaquixi ta ha cojo quihndë ni ne, cuinechun cojo ná ngajan cahndë ndajyihi hiscan xi hmí rë Paraíso. —Cuatjin xu cafayangui Jesús.

### *Xcusun xi camá hya xi cahme Jesucristu*

<sup>44</sup> Hane hora vëhë ne, camajñu xu jingujyë ni. Cavetsihin xi camanchisen ne, quiji cani rë hisca fane jyan, <sup>45</sup> tsëhë xi tsuhi ne, ha quihndë casuaain xu ndavá rë. Hacuaha ngajan cahntsua yungun xi matitjun, tsjian xi vitechja rë tingotjo rë Ndava Nina ne, catiyavasen xu. <sup>46</sup> Hya xi camá ne, jercu hñu camaha xu ni cachja Jesús cuitjin:

—Ngayun Nahmi naha. Ntsun cuejñá hasen naha. —Cuatjin xu cachja me.

Hane xi cavatju cachja me cuatjin ne, cahme xu me.

<sup>47</sup> Hane ngu capitán xi secun tiña xu jan ne, xi cavëë cha xcusun xi camá jan ne, casahmi jyë casahmi hnga cha Nina, cachja xu cha cuitjin:

—Quixi jain xi cha xi cuijyihí vi ne, tsajin jyë rë cha. —Cuatjin xu cachja cha.

<sup>48</sup> Hane yëjë ni xutacjín xi camatangun me xi scutsejen xu me xcusun jan ne, xi cavatju cavëë me yëjë xcusun xi camá jan ne, cavuya me cafe xu me, ña yaha xu me rcu me ngatsë rë cjuachoho rë me. <sup>49</sup> Peru yëjë ni xuta xi cavinga xu rë Jesús cojo yëjë yachjin xi cavetju me tsëhë distritu Galilea cojo Jesús ne, tsëhë cjín ni hinchacun cuaha xu me tivutsejen me xcusun xi tivatju Jesús.

### *Caseya nima Jesucristu cahntsua tsjun*

<sup>50</sup> Hane tacun ngu xu me xi hmí rë José, ngu xuta nandya Arimatea, ngu nandya rë xuta tjë rë Israel. Me vëhë ngu xihin ndaja me hacuaha tsajin xu mé jyë rë me tjin. <sup>51</sup> Hacuaha cachuyiin xu rë me sacuatjin caviyuju xutaxa rë xi yahnga jan cjuatacun rë me cojo xcusun xi casahmi me. Hacuaha José jan ne, jemu meje xu rë me xi cuinduva Nina sahmi me gobiernu. <sup>52</sup> Ngajan xi me vëhë ne, quiji xu me xcun Pilatu, hane cafehya xu me nima Jesús. <sup>53</sup> Hane xi casacu cahndé ne, quiji catsitujne me, sehe cavaxtë xu me ngu tsjian. Hya xi camá ne, quiji caveya xu me cahntsua ngu tsjun xi catjuhngui rë taha naxi, hacuaha hisca ngu xu nima cjëë seyaniji. <sup>54</sup> Nixtin hya ne, vispra xu. Ha hisca meje cuechú xu hora xi cuisehen nixtin xi chjahájenda rë.

<sup>55</sup> Hane yachjin xi cojo xu me cavetjutangun me cojo Jesús ngajan Galilea ne, tjengui xu me quiji me cojo nima. Hane cavëë me tsjun hacuaha cavëë xu me hacutjin caseya nima. <sup>56</sup> Hane xi cavuya me ne, cavëhëchjine xu me rqui cojo aceite xi ndaja jne tsëhë nima.

Hane xi camá nchujun jan, xi cavechú xu nixtin xi chjahájenda rë ne, caviyujujuuu xu me, sacuatjin vitexa ley rë Moisés.

## 24

### *Cavuya Jesucristu cjuahña*

<sup>1</sup> Peru tu casahasen ni tsëhë nixtin ngu tsëhë totje ne, yachjin jan ne, cavuya quiji nga xu me xcun tsjun jan hacuaha cavaha xu me rqui xi ha cavëhëchjine me jan. <sup>2</sup> Hane xi cafehe me jan ne, cavëë xu me xi ndyojo xi cavechja rë tingotjo rë tsjun jan ne, ha canivahaxin rë. <sup>3</sup> Hane xi cavisehen me

cahntsua tsjun jan ne, cavëë xu me xi tsajin nima Nai naja Jesús. <sup>4</sup> Hane jinguyëjë rë xi sacuinyiin rë me mé sahmi me ne, ha tu ñahñu camatsejen xu jo ángel jan, xi jercu tu seti camaha xu ni tsjian rë. <sup>5</sup> Hane xi jemu catsacjun me camá ne, catsiquindi xu me xcun me. Sehe ngajan xi ángel jan ne, cuitjin xu cachja cojo rë me:

—¿Mé má ngajñi rë nima vinchunsun me xi quicun? <sup>6</sup> Me vëhë ne, tsajin me nguehe ta cavuya me cjuahñu. Ninguitsjun hacutjin cachja me cojo nuju hya xi tacun cuaha me ngajan Galilea, <sup>7</sup> hya xi cachja me xi me xi Quihndi rë Xuta Jain ne, hatuxa tjin xi cuma me entregadu tsja xuta tsehen, sehe cueya me xcun cru, hane xi cuma jyan nixtin ne, cuya nga me cjuahñu. —Cuatjin xu cachja ángel jan.

<sup>8</sup> Sehe ngajan xi yachjin jan ne, catsinguitsjen xu me cjua rë Jesús. <sup>9</sup> Hane xi cavuya me xi quiji me xcun tsjun jan ne, quiji casua xu me camachaya rë xuta ladu rë Jesús xi tengu jan cojo yëjë sa me xi yahnga tsëhë yëjë ni hacutjin cavatju me camá. <sup>10</sup> Quihndë ne, yachjin xi casua camachaya rë apóstol jan ne, hacui xu na María na Mágdala cojo na Juana cojo na María naa rë Jacobo cojo sa yachjin xi yahnga. <sup>11</sup> Peru apóstol jan ne, xi má xu rë me ne, suvá cjuangarca xi chja yachjin jan, vëhë xi camacjaain xu rë me.

<sup>12</sup> Peru Pedru ne, vangasanii xu me quiji me hiscan tacun tsjun jan. Hane xi cafehe me jan ne, catsiquindi xu me yojo rë me, sehe cavutsejenya xu me cahntsua tsjun jan ne, hane cavëë xu me suvá tsjian jan siu. Sehe cavuya cafe xu me. Jercu quijircun xu rë me tsëhë xcusun xi camá jan.

### *Ndiya Emaús*

<sup>13</sup> Hya xi camá ne, ha nixtin hya xu ni ne, jo cha ladu rë Jesús jan ne, cavetju xu cha quiji cha ngu nandya xi hmí rë Emaús, xi tacun sacuaaha chuva rë tengu kilómetro tsëhë Jerusalén. <sup>14</sup> Hane ndiya cjuí cha jan ne, cavisiajmi xu cha ngajñi rë cha tsëhë yëjë xcusun xi camá. <sup>15</sup> Hane jinguyëjë rë xi tivisiajmi cha jan ne, cavechútáha xu Jesús cha, hane quijitangun xu me cojo cha. <sup>16</sup> Peru handasa vutsejen cha me ne, casuaain xu Nina cahndë xi scuëë cha xi hacui me. <sup>17</sup> Sehe ngajan xi Jesús ne, cavinenguise xu me cha cuitjin:

—¿Mé cjua xi tivisiajmu xi táha tivangun? —Cuatjin xu cavinenguise me.

Hane cha xi cuacun jan ne, caxinchacunhñu xu cha, hacuaaha jemu va tjin cacun cha. <sup>18</sup> Hane ngu cha xi cuacun jan xi hmí rë Cleofas ne, cachja xu cha cojo Jesús cuitjin:

—¿Há ngu tu tu ngayun xi nechuntuhun nguehe Jerusalén xi cuatjin hyúun mé xi sehe cavatju camá ni? —Cuatjin xu cachja cha cojo Jesús.



19 Sehe ngajan xi Jesús ne, cuitjin xu cachja me cojo cha:

—¿Mé xcusun jan? —Cuatjin xu cachja me.

Hane cha xi cuacun jan ne, cuitjin xu cachja cha:

—Xcusun xi cavatju ngu me xi hmí rë Jesús camá, ngu me xi canduva tséhë nandya Nasaret. Me vëhë ne, xi camá rë Nina cojo xi camá rë yëjë ni xuta ne, ngu profeta me, xi jemu tjin rë me ngahñu xi casahmi me yëjë ni xcusun xi casahmi me, hacuaha xi cavicuya me yëjë ni cjua xi cavicuya me. 20 Hacuaha nahmi xi matitjun cojo xutaxa rë yungun naja ne, casahmi me entregadu me vëhë cojo xutaxa rë Roma xi cueya me. Hane cuaha jain tjin cavetaha me xcun cru. 21 Ngayin ne, ha cavetihin tacuín xi me vëhë xi cuaxëtje naja me ngayejen ni ngayaan xuta tjë rë Israel. Cojo yëjë sa ne, quihndë ne, ha camá jyan nixtin cavatju xcusun xi cuacun vë. 22 Hacuaha ngujo yachjin tséhë ladu niji ne, catsisca na cjuatacun niji, tséhë xi xati sa nguitajñu ne, quiji xu na xcun tsjun, 23 hane xi casacuiin rë na nima ne, cafehe cachja na cojo niji xi cavëë na sacuaha ángel ngajan, hane cachja cojo rë na xi me vëhë ne, tacun me cjuahñu. 24 Hya xi camá ne, ngujo cha xi siu cojo niji ne, quiji cha xcun tsjun jan, cavëë cha xi quixi jain cjua xi cachja na, peru me vëhë ne, cahviin cha me. —Cuatjin xu cachja cha cojo Jesús.

25 Sehe ngajan xi Jesús ne, cuitjin xu cachja me cojo cha:

—Ngayun yuma hasen, ngayun xi jemu tafi sehe macjain nuju yëjë cjua xi cachja profeta. 26 ¿Hacuiin hatuxa casahmi ngujoyë xi me xi catsingatju Nina ne, cuatjin cavatju me cjuañihi, sehe camajyë camahnga me cojo hasen ndajyihí rë me? —Cuatjin xu cachja Jesús.

27 Hane sehe ngajan xi Jesús ne, casuacuenda xu me cha mé vijne yëjë ni cjua xi camahindu tséhë me xcun yëjë ni xujun rë Nina, cavetsihin me cojo cjua xi catsihindu Moisés, hane cajnetaha me cojo hisca cjua xi catsihindu yëjë sa profeta.

28 Hya xi camá ne, xi camatiña xu cha cojo Jesús nandya hiscan cjuí cha jan ne, Jesús ne, casahmi xu me sacuaha xi cjuenduju sa me. 29 Peru cha xi cuacun jan ne, jercu cjín xu cachja cha cojo rë me cuitjin:

—Tinechun cojo niji ta quihndë ne, ha quiji hora hacuaha hisca meje cjuë nixtin. —Cuatjin xu cachja cha.

Ngajan xi Jesús ne, quiji xu me cojo cha, hane cavisehen me ndava cha xi cuejña me cojo cha. 30 Hane xi ha cafaha me cahndë rë me xcun maxë xi sinë me niñu cojo cha ne, sehe cafaha xu me ngu niñu, hane casua me nacuechji rë Nina, sehe cavatëlanga me, casua xu me cha. 31 Hane hora vëhë xu casua Nina cahndë xi camá cavëë cha xi hacui Jesús. Hya xi

camá ne, ha tu ñahñu cafëya xu me. <sup>32</sup> Hane sehe cachja xu cha ngajñi rë cha cojo xicjin cha cuitjin:

—Jercu ndaja camahani camá rë xahasen naja, hora xi tichja me cojo naja ngajan ndiya jan mé vjne cjuá xi hincha xcun xujun rë Nina! —Cuatjin xu cachja cha cojo xicjin cha.

<sup>33</sup> Hane hora vëhë ni ne, cavisatjenhnga xu cha tsëhë maxë jan, sehe cavuya quiji cha Jerusalén. Hane xi cafehe cha jan ne, casacutsja xu cha me xi tengu jan, tjintangun me cojo me xi yahnga sa. <sup>34</sup> Hane sehe cachja xu me cojo cha cuitjin:

—Quixi jain xi cavuya Nai naja cjuahñu, hacuaha cha Simón ne, cavëë cha me. —Cuatjin xu cachja me.

<sup>35</sup> Ngajan xi cha xi cuacun jan ne, casuacuenda xu cha hacutjin cavatju cha camá ngajan ndiya, hacuaha hacutjin camá cavëë cha xi hacui Jesús hya xi cavatëlanga me niñu.

*Cafehe Jesucristu hiscan tjin tangun xuta ladu rë me*

<sup>36</sup> Hane tu tichja cuaha xu cha xi cuacun jan cojo me vëhë cjuá jan ne, ha tu ñahñu cavëë xu yëjë me Jesús, secun me ngajñi rë me. Hane Jesús ne, cachja xu me nina cojo rë me cuitjin:

—Nina sua nuju me cjuandaja cjuajeya. —Cuatjin xu cachja me.

<sup>37</sup> Hane yëjë xuta ladu rë Jesús jan ne, jemu catsacjun camaha xu ni me camá tsëhë xi xi má rë me ne, tivutsejen me ngu hasen. <sup>38</sup> Ngajan xi Jesús ne, cachja xu me cuitjin:

—¿Mé má cuatjin jemu fircun nuju? Hacuaha ¿mé má cuatjin mangu majo tacún? <sup>39</sup> Chutsujun ntsa cojo ntsacú ta ngahan vi. Nduvun tetuhun ntsun ná, hacuaha chutsujun ná ta ngu hasen ne, tsajin yojo rë hacuaha tsajin nínda rë sacuatjin chutsujun ná ngahan cojo yojo cojo nínda naha. —Cuatjin xu cachja Jesús.

<sup>40</sup> Hane xi cavatju cachja me cjuá vëhë ne, sehe catsingacun xu me tsja me cojo ntsacu me. <sup>41</sup> Hane xuta ladu rë Jesús jan ne, hisca maji xu macjain rë me ngatsë rë xi jercu tu ndaja má camahani rë me hacuaha hisca fircun rë me. Ngajan xi Jesús ne, cavinenguise xu me xuta jan cuitjin:

—¿Há tjin nuju hitsë xi xinëë guehe? —Cuatjin xu cavinenguise me.

<sup>42</sup> Hane ngu me jan ne, casua xu me ngu rquí ti camatsju.

<sup>43</sup> Hane xi cafaha me ne, cajnë xu me xcun yëjë ni xuta.

<sup>44</sup> Sehe cachja xu me cuitjin:

—Yëjë xcusun xi cavátju camá ne, tsëhë vëhë cjuá xi cachjá cojo nuju hya xi tejña cuaha ngajñi nuju. Cachjá cojo nuju ta hatuxa meje rë xi cuetjucaa yëjë hacutjin camahindu tsahan xcun xujun xi catsihindu Moisés cojo xcun xujun xi

catsihindu profeta, cojo xcun xujun tsëhë Salmo. —Cuatjin xu cachja Jesús.

<sup>45</sup> Sehe ngajan xi Jesús ne, cavuxaha xu me cjuatacun rë xuta jan, cojo sa xi cuijnercu me cjua xi camahindu xcun xujun rë Nina. <sup>46</sup> Hacuaha cachja xu me cuitjin:

—Cuitjin camahindu xi me xi catsingatju Nina ne, hatuxa cuatju me cjuañihi, hane xi cjuë jyan nixtin xi cueya me ne, cuya nga me cjuahñu, <sup>47</sup> hacuaha sacú cumachaya rë yëjë ni xuta tsëhë ngasunhdë xi sá xi mangucacun me cojo me vëhë hacuaha tsindeya me cjuatacun rë me ne, tsinchataha Nina me tsëhë jyë rë me. Jerusalén vi ne, nguehe cuetsihin cuitsojo cjua vëhë. <sup>48</sup> Ngayun cuinújun cojo xuta cjua vihi ta ngayun xi cahyun hacutjin camá. <sup>49</sup> Chutsujun ni, ngahan tsingátju nuju Hasen xi ha cachja Nahmi naha xi sua nuju me. Peru ha tinechun ni nguehe nandya vihi hisca xi chjuhunntsun Hasen vëhë, xi cuinduva hisca ngahnga. —Cuatjin xu cachja Jesús.

### *Quiji Jesucristu ngahnga*

<sup>50</sup> Hya xi camá ne, cavaxëxin xu Jesús xuta ladu rë me tsëhë nandya Jerusalén, quijicojo me me hisca nandya Betania. Hane xi cafehe me jan ne, catsiquijin xu Jesús tsja me hane catsinchacun me xuta jan. <sup>51</sup> Hane ngajñi rë xi titsinchacun me xuta jan ne, cavetjuxin xu me quiji me ngahnga. <sup>52</sup> Hane xuta ladu rë Jesús jan ne, xi cavatju cafaharcun me Jesús ne, sehe cavuya nga xu me Jerusalén cojo jemu jyë cjuasua. <sup>53</sup> Hacuaha nchunchujun ni quiji xu me yungun xi matitjun, vaxëndaja me Nina.

## **Cjuandajyihî xi catsihindu San Juan Tsêhê Jesucristu**

<sup>1</sup> Ntsacu cavetsihin ngasunhndê ne, ha tacun ngu me xi hmî rê Cjua. Me vêhê ne, tacun me cojo Nina, hacuaha Nina me. <sup>2</sup> Me vêhê ne, hisca ntsacu cavetsihin ne, ha cuatjin tacun me cojo Nina. <sup>3</sup> Yêjê ni xi tjin ne, cojo me vêhê catsindaja Nina. Tsajin mé xi camandaja xi cuajin me vêhê camandaja. <sup>4</sup> Me vêhê xi hatuxa tjin rê me cjuahñu, hane cjuahñu vêhê ne, vêhê sua cjuahasen xi cuma rê xuta. <sup>5</sup> Hane cjuahasen vêhê ne, vitsojo ngajñi rê cjuatsehen sacuatjin sahmi hasen ngu ndihî ngajñi jñú, peru cjuatsehen ne, cacaain rê catsicjê rê cjuahasen jan.

<sup>6</sup> Cavéjña ngu me xi hmî rê Juan, xi Nina catsingatju rê. <sup>7</sup> Me vêhê ne, cavetjujñi me xi cuichja me cojo xuta hane tsinguixi me tsêhê cjuahasen jan, cojo sa xi ngatsê rê cjua xi cuichja me ne, cumacjain rê yêjê ni xuta. <sup>8</sup> Hacuîin me vêhê xi cjuahasen jan me ta me vêhê ne, cavetjujñi me cojo sa xi cuichja me tsêhê cjuahasen jan. <sup>9</sup> Cjuahasen xi cjuaquixi jan ne, xi visehen ngajñi rê cjuatacun rê yêjê xuta ne, sehe canduva nguêhe ngasunhndê.

<sup>10</sup> Me xi hmî rê Cjua jan ne, cavéjña me ngasunhndê. Hacuaha handasa cojo me xi catsindaja Nina ngasunhndê ne, peru xuta ne, hvîin me yo. <sup>11</sup> Canduva me ngasunhndê rê suvá me, peru xuta nanguî rê suvá me ne, cafhatsjaain rê me. <sup>12</sup> Peru ngu jo xuta nanguî rê me xi cafhatsja rê me hacuaha camangu cacun cojo rê me ne, me xi Cjua jan ne, casua me chuva rê xi cuma xuta xi cuacun jan quihndi rê Nina. <sup>13</sup> Xuta xi cuacun jan ne, hacuîin camá me quihndi rê Nina chuva rê xi meje rê ngu xihin ngu quihndi ta suvá Nina casahmi me xi camá xuta xi cuacun jan quihndi rê me.

<sup>14</sup> Me xi Cjua jan ne, camá me ngu xuta, hacuaha cavéjñacahndê me ngajñi niji. Hatuxa quitsê rê xahasen rê me cjuandaja, quitsê rê xahasen rê me cjuaquixi. Ngayin ne, cahyin hacutjin xi jemu jyê hnga me cojo hasen rê me. Jyê hnga me sacuatjin casahmi rê me Nahmi rê me. <sup>15</sup> Juan Vitenda rê Xuta ne, cachja me cojo xuta tsêhê me xi Cjua jan, cuitjin cachja me:

—Me vihi xi cachjá tsêhê, xi me xi sehe cuinduva ne, handasa ngahan canduvá titjun ne, peru me vêhê xi hitsê sa venguichji rê me xi cuma ná ngahan, tsêhê xi ha tacun me hya xi catsin ngahan.

<sup>16</sup> Tsëhë xi hatuxa jemu quitsë rë xahasen rë me cjuandaja ne, vëhë xi ngayejen ni ne, hacuaha jemu cachjahanntsán cjuandaja. <sup>17</sup> Ley rë Nina ne, nima Moisés casua naja me, peru cjuandaja cojo cjuaquixi ne, Jesucristu casua naja me. <sup>18</sup> Tsajin camahani yo xi cavëë rë Nina. Suvá ni Quihndi ngu rë Nina xi hacuaha nina me hacuaha tacun tangun me cojo Nina Nahmi naja ne, me vëhë casua me camachaya naja yo xi Nina.

*Cjua xi cachja Juan Vitenda rë Xuta*

<sup>19</sup> Cuitjin cachja Juan hya xi catsingatju xutaxa rë tsëhë nandya Jerusalén ngu jo nahmi cojo sacristán xi cjue cjuinenguise rë me Juan cuitjin:

—Ngayun ne, ¿yo ngayun? —Cuatjin cjuinenguise me.

<sup>20</sup> Hane hora xi cuatjin cavinenguise me ne, Juan ne, catsinguixi me, hacuiin cavetsangui me, cuitjin catsinguixi me:

—Hacuiin ngahan Xihin xi Tsingatju Nina. —Cuatjin cachja me.

<sup>21</sup> Ngajan xi cavinenguise nga nahmi xi cuacun jan cuitjin:

—¿Mé ni ni? ¿Há xutachanga naja Elías ngayun? —Cuatjin cavinenguise me.

Ngajan xi Juan ne, cuitjin cafayangui me:

—Hacuiin ngahan. —Cuatjin cafayangui me.

Ngajan xi cavinenguise nga nahmi xi cuacun jan cuitjin:

—¿Há ngayun profeta xi jemu nechanyan rë? —Cuatjin cavinenguise me.

Hane Juan ne, cuitjin cafayangui nga me:

—Jéya. —Cuatjin cafayangui nga me.

<sup>22</sup> Ngajan xi nahmi xi cuacun jan ne, cavinenguise nga me cuitjin:

—¿Yo ngayun ni? Tinújun cojo niji ne, cojo sa xi cuma nicuyin ngu cjua tsëhë me xi catsingatju niji. ¿Mé nújun tsujun suvun? —Cuatjin cachja me.

<sup>23</sup> Ngajan xi Juan ne, cuitjin cafayangui me:

—Ngahan ne, xuta xi jercu hñu chjá gñehe hiscan jemu xín tsëhë nandya, xi catitsinguixi xuta ndiya tsëhë Nai naja, sacuatjin cachja profeta Isaías hatsëë nixtin. —Cuatjin cafayangui me.

<sup>24</sup> Quihndë ne, xuta xi cuacun catsingatju cha partidu fariseo xi cuichja me cojo Juan ne, <sup>25</sup> cuitjin cavinenguise me:

—¿Mé má cuatjin vitendun xuta sa xi hacuiin ngayun xi Tsingatju Nina ngayun, hacuiin ngayun xi profeta Elías ngayun, hacuiin ngayun xi profeta xi jemu nechanyan rë ngayun ni? —Cuatjin cavinenguise me.

<sup>26</sup> Ngajan xi Juan ne, cuitjin cafayangui me:

—Ngahan ne, cojo nandá tiviténda nuju, peru ngajñi nuju secun ngu me xi hyúun yo. <sup>27</sup> Ngahan ne, canduvá titjun, sehe

canduva me vëhë, peru hisca tsajin mé cumachjirëhë ngahan xi cuma rë me. —Cuatjin cafayangui Juan.

<sup>28</sup> Xcusun vëhë ne, camá ngajan ngu cahndë hiscan xi hmí Betania, ngunda vëhë tsëhë ndajyë Jordán, hiscan tivitenda Juan xuta.

*Jesucristu sacuaaha chu tsánga xi sua Nina*

<sup>29</sup> Xi camá nchujun jan ne, cavëë Juan xi nduva Jesús hiscan secun me. Hane cuitjin cachja Juan cojo xuta:

—¡Chutsujun ni! Cuajyihi me xi sacuaaha chu tsánga xi sua Nina xi tsicjë jyë rë xuta. <sup>30</sup> Me vëhë xi cachjá cojo nuju xi me xi sehe cuinduva. Handasa ngahan canduvá titjun ne, peru me vëhë xi hitsë sa venguichji rë me xi cuma ná ngahan, tsëhë xi ha tacun me hya xi catsin ngahan. <sup>31</sup> Ngahan suva ne, hveen yo me. Peru cojo sa xi ngayaan xuta tjë rë Israel cumachaya naja yo me ne, vëhë xi cuitjin tiviténda xuta. —Cuatjin cachja Juan.

<sup>32</sup> Hacuaha cachja Juan cuitjin tsëhë Jesús:

—Ngahan ne, cahvë Hasen rë Nina xi canduvajne tsëhë ngahnga sacuaaha ngu paloma, quiji casesun rcu me. <sup>33</sup> Ngahan suva ne, hveen yo me, peru me xi cavitexa ná xi cuiténda xuta cojo nandá ne, cuitjin cachja me cojo ná: “Me xi che xi cuinduvajne Hasen naha cjue sesun rcu ne, me vëhë xi cuitenda me xuta cojo Hasen naha.” Cuatjin cachja Nina cojo ná. <sup>34</sup> Ngahan ne cahvë hacuaaha cachjá cojo xuta xi me vëhë xi Quihndi rë Nina me. —Cuatjin cachja Juan.

*Me xi tjun tjun camá xuta ladu rë Jesucristu*

<sup>35</sup> Xi camá nchujun nga jan ne, secun Juan cojo jo xuta ladu rë me. <sup>36</sup> Hane xi cavëë Juan Jesús xi tivatju me jan ne, cachja me cuitjin:

—¡Chutsujun ni! Cuajyihi me xi sacuaaha chu tsánga xi sua Nina. —Cuatjin cachja me.

<sup>37</sup> Xi cahndë jo xuta ladu rë Juan cjua jan ne, quiijtjengui me Jesús. <sup>38</sup> Xi cavuya Jesús cavutsejen me xi cjuijtjengui xuta jan me ne, sehe cavinenguise Jesús me cuitjin:

—¿Mé meje nuju ngayun? —Cuatjin cavinenguise me.

Ngajan xi xuta jan ne, cuitjin cafayangui me:

—Maestro, ¿jani nechun? —Cuatjin cavinenguise me.

<sup>39</sup> Ngajan xi Jesús ne, cuitjin cachja me cojo jo xuta jan:

—Nduvun chutsujun. —Cuatjin cachja me.

Hane xi quiji vutsejen xuta jan ne, sehe cavëë me hiscan véjña Jesús. Sacuaaha chuva rë fane ñuju hora vëhë. Hane caviyuju me ngajan cojo Jesús nixtin hya.

<sup>40</sup> Ngu xuta ladu rë Juan xi cahndë sacuatjin cachja me hacuaaha quiijtjengui rë Jesús ne, hacui Andrés, me xi hntsë

Simón Pedru. <sup>41</sup> Me vëhë titjun quiji jaha me hntsë me Simón, hane xi casacu rë me ne, cuitjin cachja me cojo:

—¿Cahyin Mesías! —Cuatjin cachja me. (Mesías ne, hacui cjua xi meje cuichja: Me xi Tsingatju Nina.)

<sup>42</sup> Hya xi camá ne, Andrés ne, quiijicojo me Simón xicjin me ngajan hiscan tacun Jesús. Hane xi cafehe me jan ne, cavutsejenya Jesús xcun Simón ne, sehe cachja me cuitjin cojo rë me:

—Ngayun ne, Simón hmí nuju, peru chjuhunñuhu Cefas. —Cuatjin cachja Jesús. (Ñihi xi Cefas ne, tangun vijne cojo ñihi xi Pedru ta catsijo ni ne, ndyojo, meje cuichja.)

*Cavaxijin Jesucristu Felipe cojo Natanael*

<sup>43</sup> Hane xi camá nchujun jan ne, cavejña cacun Jesús xi cjue me ngu nandya tsëhë distritu Galilea. Chaja sa xi cjue me ne, cavechútáha me Felipe, hane cachja me cojo cuitjin:

—Nduvun, cuanguen cojo ná. —Cuatjin cachja me.

<sup>44</sup> Felipe ne, Betsaida nangui rë me, hiscan nangui rë Andrés cojo Pedru. <sup>45</sup> Hya xi camá ne, Felipe ne, quiji jaha me Natanael, hane xi casacu rë me ne, cachja me cuitjin:

—Cahyin ngu xuta Nasaret xi hmí rë Jesús, quihndi rë José. Me vëhë xi catsihindu Moisés cojo jingu sa profeta tsëhë, ngajan xcun xujun rë Nina. —Cuatjin cachja Felipe cojo Natanael.

<sup>46</sup> Ngajan xi Natanael ne, cavinenguisse me cojo Felipe cuitjin:

—¡Ja! ¿Há cuma cuetjújñi ngajan Nasaret ngu xuta xi jemu venguichji rë ni? —Cuatjin cavinenguisse Natanael.

Ngajan xi cafayangui Felipe cuitjin:

—Ndove chutsijin ni. —Cuatjin cafayangui me.

<sup>47</sup> Hane xi cavëë Jesús xi camatiña Natanael ne, sehe cachja me cuitjin tsëhë:

—Chutsujun ni, cuajyihi ngu me xi xuta tjë rë Israel xi cjuaquixi jain, ngu me xi tsajin cjuandacha cahntsua xahasen rë. —Cuatjin cachja Jesús tsëhë Natanael.

<sup>48</sup> Ngajan xi Natanael ne, cuitjin cavinenguisse me Jesús:

—¿Hacutjin má xi cuatjin hyun yo ngahan ni? —Cuatjin cavinenguisse Natanael.

Ngajan xi Jesús ne, cuitjin cafayangui me:

—Chaja sa xi cuichja Felipe cojo nuju ne, ngahan ne, ha cahvë nuju hya xi sechun ngahma yaxujun jan. —Cuatjin cafayangui Jesús.

<sup>49</sup> Hane Natanael ne, cuitjin cachja me:

—Maestro, Ngayun xi Quihndi rë Nina ngayun, ngayun xi matitjun ngayun tsajan ngayaan xuta tjë rë Israel. —Cuatjin cachja Natanael.

<sup>50</sup> Ngajan xi Jesús ne, cachja me cuitjin:

—Ngayun ne, camangu tacún cojo ná, tsèhë xi cachjá xi cahvë nuju hya xi nechun ngahma ya higo jan. Peru sehe chutsujun sa xcusun xi cuetjucaa xi hitsë sa venguichji rë.

<sup>51</sup> Hacuaha cachja sa Jesús cjuá vihi:

—Cuichjá cojo nuju cjuaquixi ta ngayujun ni ne, cuechú nixtin xi chutsujun xi ngahnga ne, sacuaha xi tixaha, hacuaha ángel rë Nina ne, sacuaha xi cjuijne cjuiniji hiscan tejña ngahan xi Quihndi rë Xuta Jain ngahan. —Cuatjin cachja Jesús.

## 2

### *Cjuavixan xi camá ngajan Caná*

<sup>1</sup> Hane xi cavatju jyan nixtin ne, camá ngu cjuavixan ngajan Caná, distritu Galilea. Naa rë Jesús ne, ngajan quitahá me ndava suhi. <sup>2</sup> Hacuaha Jesús cojo xuta ladu rë me ne, hacuaha camá me invitar xi cjue me ndava suhi, hane quiiji me. <sup>3</sup> Hya xi camá ne, cafë xan xi tsèhë suhi jan. Sehe ngajan xi naa rë Jesús ne, cuitjin cachja me cojo Jesús:

—Ha quihndë tsajin rë me xan nguehe. —Cuatjin cachja me.

<sup>4</sup> Ngajan xi Jesús ne, cuitjin cafayangui me:

—Hacuiin cuenda naha xi ngahan nújun cojo ná. Cjëë cuechú hora xi sahme mé xi sahme. —Cuatjin cafayangui Jesús.

<sup>5</sup> Ngajan xi naa rë Jesús ne, cuitjin cachja me cojo cha xi vincha xan jan:

—Tu mé ni xi cuichja cha cojo nuju ne, cuatjin nihñu. —Cuatjin cachja naa rë Jesús.

<sup>6</sup> Quihndë ne, siu ngajan jyun tiji xi ndyojo camá, xi xincha nandá xi vitejnu xuta tjë rë Israel hitsë tu mé ni xcusun xi sahmixa me cojo, sacuatjin xi ha xcusun rë yungun rë me. Jima ngu tiji jan ne, xincha sacuaha yachantë o sa jyanchantë litru nandá. <sup>7</sup> Ngajan xi cachja Jesús cojo cha xi vincha xan cuitjin:

—Ninguitsun rë tiji xi cuacun vë cojo nandá. —Cuatjin cachja me.

Ngajan xi cha xi cuacun jan ne, catsinguitsë camahani rë cha tiji jan cojo nandá.

<sup>8</sup> Hya xi camá ne, sehe cachja nga Jesús cuitjin cojo cha:

—Quihndë ne, chjuhun hitsë xi cavinchun tiji vë ne, tángun chanu rë xutacha. —Cuatjin cachja me.

Hane cuatjin casahmi cha xi cuacun jan. <sup>9</sup> Hya xi camá ne, cavutaha xutacha jan nandá xi camá xan jan. Me vëhë ne, hisca hvíin me jani canduva xan jan, peru cha xi vincha xan



xi cafaha quijicojo jan ne, vëë cha. Ngajan xi xutacha jan ne, cajindaya me cha xutavixan jan ne, <sup>10</sup>sehe cachja me cojo cha cuitjin:

—Xcusun naja ne, titjun xan xi ndajyihi taan hvi xuta, hane ha xcun xi ha cjín cahvi me ne, sehe taan rë me xan xi ha va jyihi. Peru ngaye ne, hisca ndicumaha ni titehe xan xi ndajyihi. —Cuatjin cachja xutacha jan.

<sup>11</sup> Cjuarcun xi tjun tjun casahmi Jesús vë ne, casahmi me ngajan Caná, distritu Galilea. Cuatjin catsingacun me xi jemu jyë hnga me cojo hasen rë me. Hane xuta ladu rë me ne, camangu cacun me cojo rë me.

<sup>12</sup> Xi cavatju vëhë ne, cavetju me quijijne me nandya Capernaum. Quiji me cojo naa rë me cojo xicjin me cojo xuta ladu rë me. Hane ngajan caviyujutaha me ngujo nixtin.

*Cavaxë Jesucristu xuta xi sahmi ndetsin ndatsen yungun*

<sup>13</sup> Cavechú nixtin xi camatiña suhi xi hmí rë Pascua, ngu suhi xi sahmi xuta tjë rë Israel. Ngajan xi Jesús ne, quijiniji me ngajan nandya Jerusalén. <sup>14</sup> Hane xi cafehe me jan ne, quiji me yungun xi matitjun. Ngajan cavëë me xuta xi tiviteña chu ndyaja cojo chu tsánga cojo chu nisëtyava, hacuaha cavëë me xuta xi siu titsindeya tujún tsëhë xuta cojo tujún rë yungun. <sup>15</sup> Hane xi cavëë Jesús xi cuatjin tisahmi xuta jan ne, cafaha me ngu nahñu xi jiña ne, casahmi me ngu cuarta, sehe catsicanga me yëjë ni chu xteña, sa ndyaja sa tsánga. Hacuaha cacandi me tujún rë xuta xi tsindeya tujún, hacuaha catsindefa me maxë xi xinchasun tujún jan. <sup>16</sup> Hane xuta xi tiviteña chu nisëtyava jan ne, cuitjin cachja Jesús cojo rë me:

—Tángxunxun cojo chu xi cuicun vi. Xicanihñuu ndava Nahmi naha sacuaha ngu ndetsin. —Cuatjin cachja Jesús.

<sup>17</sup> Ngajan xi xuta ladu rë Jesús jan ne, catsinguitsjen me xi camahindu xcun xujun rë Nina cuitjin: “Ngayun Nina naha, xi jemu hmú cáacun camahani ndya nuju ne, ña sca má rë xahasen naha.” Cuatjin camáhindu.

<sup>18</sup> Ngajan xi xutaxa rë yungun jan ne, cuitjin cachja me:

—Quihndë ne, ¡jarë ngu cjuarcun xi nihñu cojo sa xi cumachaya niji xi tjin jain nuju chuva rë xi cuatjin nihñu!  
—Cuatjin cachja me.

<sup>19</sup> Ngajan xi Jesús ne, cuitjin cafayangui me:

—Ninguetsun yungun vihi ne, cahntsua xi jyan nixtin ne, ngahan sahme ndaja nga. —Cuatjin cafayangui Jesús.

<sup>20</sup> Hane xutaxa rë yungun xi matitjun ne, cuitjin cachja nga me:

—Yachan jyun nu quiji cani rë xi camandaja yungun naja vi. Hane sehe ngayun nujún ne, ¡cahntsua xi jyan nixtin ne,

cuyun nindujun nga ni! —Cuatjin cachja xutaxa rë yungun jan.

<sup>21</sup> Peru Jesús ne, hya xi cachja me tsëhë yungun jan ne, tsëhë yojo rë suvá me xi cachja me. <sup>22</sup> Vëhë xi hya xi cavuya Jesús cjuahñu ne, xuta ladu rë me ne, catsinguitsjen me xi cuatjin cachja Jesús, hane camacjain rë me cjuá xi chja xujun rë Nina hacuaha camacjain rë me cjuá xi cachja Jesús jan.

*Vëë Jesucristu xahasen rë yëjë ni xuta*

<sup>23</sup> Jingujëjë rë xi cuatjin quitahá Jesús ngajan Jerusalén nixtin rë suhi tsëhë Pascua ne, jemu cjin xuta camangu cacun me cojo rë me, xi cavëë me cjuarcun xi Jesús tisahmi me. <sup>24</sup> Peru suvá Jesús ne, camanguaain cacun me cojo xuta xi cuacun jan ta, tsëhë xi ha vëë me xahasen rë yëjë me xi cuacun vë. <sup>25</sup> Hacuaha cuatjin camanguaain cacun me cojo xuta jan ta, tsëhë xi hacuain sahmi nguýjë xi tjin yo xi cuichja cojo rë me tsëhë xuta ta, tsëhë xi ha vëë me mé cjuá xi hincha cahntsua xahasen rë xuta.

### 3

*Cjuavisiajmi rë Jesucristu cojo Nicodemo*

<sup>1</sup> Cavéjña ngu xuta fariseo xi hmí rë Nicodemo. Me vëhë ne, ngu xuta matitjun me tsëhë ngajñi rë xuta tjë rë Israel. <sup>2</sup> Ngundiya jan ne, nguixun quiji cavisiajmi me cojo Jesús, hane cuitjin cachja me:

—Maestro, ngayin ne, hyin ta ngayun ne, ngu maestru xi Nina catsingatju rë. Cuatjin hyin ta, tsëhë xi tsajin yo xi cuma sahmi cjuarcun xi nihñu ngayun sa xi hacuain Nina visecoo rë. —Cuatjin cachja Nicodemo cojo Jesús.

<sup>3</sup> Ngajan xi Jesús ne, cuitjin cafayangui me:

—Cuichjá cojo nuju cjuaquixi ta sa xi ngu xuta tsiin me ngu ndiya nga ne, cumaji cuisehen me hiscan sahmi Nina gobiernu. —Cuatjin cafayangui Jesús.

<sup>4</sup> Hane Nicodemo ne, cavinenguise me Jesús cuitjin:

—¿Peru hacutjin cuma xi ngu xihin xi ha changá ne, cuya tsin nga ni? ¿Há cuma cuisehen nga cahntsua naa rë sehe tsin nga ngu ndiya? —Cuatjin cavinenguise Nicodemo.

<sup>5</sup> Ngajan xi Jesús ne, cuitjin cafayangui me:

—Cuichjá cojo nuju cjuaquixi ta hatuxa sahmi nguýjë xi cuisehen xuta ngu cjuahñu xatsë ngatsë rë nandá cojo ngatsë rë Hasen rë Nina ta, ha chuva rë vëhë ni xi cuma cuisehen me hiscan sahmi Nina gobiernu. <sup>6</sup> Hya xi ngu xuta tsin me ngatsë rë xutacha rë me ne, sacu rë me cjuahñu xi tsëhë ngasunhdë. Peru hya xi tsin me ngatsë rë Hasen rë Nina ne, sacu rë me cjuahñu xatsë xi tsëhë Nina. <sup>7</sup> Hacuain cjuercun nuju xi cuatjin cachjá cojo nuju xi mameje rë xi tsin nga ngayun

ngu ndiya. <sup>8</sup> Tjo ne, hatuxa vanga hiscan meje rë, peru suva machaya naja xi vanga ta nuhya rë xi fane vanga, ta matsijin hiscan nduva o hiscan vechú. Hane xuta xi tsin me ngatsë rë Hasen rë Nina ne, tjin rë me sacuaha tjo jan, ta tsin me ngu ndiya nga, peru matsijin hacutjin. —Cuatjin cafayangui Jesús.

<sup>9</sup> Ngajan xi Nicodemo ne, cuitjin cavinenguise me cojo Jesús:

—Peru ¿hacutjin cuma sacuatjin nújun vë ni?

<sup>10</sup> Hane Jesús ne, cuitjin cafayangui me:

—¿Hacutjin nga ne xi ngayun ne, maestru má ngayun tsëhë xuta tjë rë Israel, hane sehe hyúun mé vijne cjua xi cachjá cojo nuju vë ni? <sup>11</sup> Cuichjá cojo nuju cjuaquixi ta ngayin ne, nújin cjua xi hyin hacuaha nújin tsëhë xcusun xi cachutsijín, peru cjua xi nújin cojo nuju ne, mijí chjuhunntsun. <sup>12</sup> Sa xi camacjaain nuju hya xi cachjá cojo nuju cjua tsëhë xcusun tsëhë ngasunhndë ne, ¿hacutjin cumacjain nuju sa xi cuichjá cojo nuju cjua tsëhë xcusun tsëhë ngahnga ni?

<sup>13</sup> Tsajin hisca ngu xuta xi quiji cavutsejen me hacutjin jyihi ngahnga sehe cavuya me xi sua cuenda nuju me. Suvá ni me xi ha tsëhë ngajan canduva me ne, me vëhë xi cuma sua cuenda nuju me, suvá ni me xi Quihndi rë Xuta Jain.

<sup>14</sup> Chuva rë xi casahmi Moisés hatsëë nixtin xi cavunihnga me ngu quicha xcusun rë chu yë taha rë ngu ya ngajan ngu xín camahani jan ne, ha chuva vëhë ni ne, me xi Quihndi rë Xuta Jain ne, meje rë xi tjunihnga rë me taha rë ngu ya. <sup>15</sup> Cuatjin meje rë, cojo sa xi yëjë ni xuta xi cumangu cacun me cojo rë me vëhë ne, sacú rë me cjuahñu xatsë. —Cuatjin cafayangui Jesús tsëhë Nicodemo.

### *Cjuahmutacun rë Nina cojo xuta*

<sup>16</sup> —Tsëhë xi jemu catsihmu cacun Nina xuta ne, hisca casua me Quihndi ngu rë me, cojo sa xi yëjë ni xuta xi cumangu cacun me cojo me vëhë ne, hacuiin cjue hasen rë me xcun cjuañihi ta sacú rë me cjuahñu xatsë xcun Nina. <sup>17</sup> Nina ne, catsingatju me Quihndi rë me nguehe ngasunhndë, peru hacuiin xi cjuahachuva rë xuta ngasunhndë ta xi cuaxëtje rë xuta.

<sup>18</sup> Xuta xi mangucacun cojo Quihndi rë Nina ne, hacuiin chjaháchuva rë me. Peru me xi hacuiin mangucacun cojo Quihndi rë Nina ne, ha cachjaháchuva rë me ta, tsëhë xi hacuiin mangucacun me cojo me xi Quihndi ngu rë Nina. <sup>19</sup> Hane cuitjin fahachuva Nina xuta ngasunhndë: Nina ne, ha catsingatju me Quihndi rë me ngasunhndë sacuaha ngu ndihi xi sua hasen rë. Peru xuta ne, hitsë sa cachuya rë me tsëhë jñu xi cuma rë hasen ta, tsëhë xi xcusun xi casahmi me ne, suvá cjuatsehen. <sup>20</sup> Yëjë ni xuta xi sahmi xcusun tsehen

ne, hatuxa chuyiin rë me tsëhë hasen, hisca sahmitiñaai me hiscan xi hasen, sa tu sesunhnga xcusun xi sahmi me. <sup>21</sup> Peru xuta xi ndiya rë cjuaquixi xcusun xi sahmi me ne, sahmitiña me hiscan xi hasen, cojo sa xi sesunhnga xi xcusun xi sahmi me ne, vëhë xcusun xi meje rë Nina.

### *Chja Juan Vitenda rë Xuta tsëhë Jesús*

<sup>22</sup> Hya xi camá ne, quiji Jesús cojo xuta ladu rë me ngajan nguijnã tsëhë distritu Judea. Hane ngajan caviyujutahã cojo me xuta xi cuacun vë. Hane cavitenda me xuta. <sup>23</sup> Hacuaha ha nixtin hya ni ne, Juan Vitenda rë Xuta ne, tivitenda me xuta ngajan hiscan xi hmí rë Enón, tiña tsëhë Salim. Ngajan quitahã me ta, tsëhë xi ngajan ne, jemu yehe nandá tjin. Hane hacuaha quiji xuta caxtenda me. <sup>24</sup> Nixtin hya ne, cjëe cjue Juan jan ndavaya.

<sup>25</sup> Quihndë ne, ngujo xuta ladu rë Juan ne, cavetsihin ticjanjo cjua rë me cojo ngu xutaxa rë yungun tsëhë xcusun changá rë me xi ma tyjahi me xcun Nina. <sup>26</sup> Hya xi camá ne, quiji cachja me cojo Juan cuitjin:

—Maestro, ¿Há vitsjen nuju me xi casetaha cojo nuju ngunda vëhë tsëhë ndajyë Jordán, me xi canújun cojo niji tsëhë jan? ¡Chutsujun ta hacuaha cojo me vëhë tivitenda me, hane yëjë ni xuta cjujtjengui rë me! —Cuatjin cachja xuta xi cuacun jan.

<sup>27</sup> Ngajan xi Juan ne, cuitjin cafayangui me:

—Tsajin mé xi sacú cjuahatsja ngu xuta sa xi Nina suaain rë me. <sup>28</sup> Ngayun suvun ne, ha canuhyun xi cachjá xi hacuiin ngahan Xihin xi Tsingatju Nina ta ngahan ne, cha xi catsingatju titjun Nina, sehe catsingatju Nina me vëhë. <sup>29</sup> Chutsujun ta na xutavixan ne, tsëhë cha xutavixan na. Peru ngu cha amigu ndaja rë cha xutavixan xi secun tivisiñuju cjua rë cha xutavixan jan ne, jercu ndama rë cha tsëhë cjua rë cha vëhë. Vëhë xi ngahan xi sacuaha cha amigu rë cha xutavixan vë ne, jercu tu ndaja camahani má ná. <sup>30</sup> Me vëhë ne, meje rë xi quihndë nga nchujun cuma jyë cuma hnga sa me cojo xa rë me, peru ngahan ne, hacuiin cuatjin ta xi meje rë ne, cuijnetaha xa naha. —Cuatjin cafayangui Juan.

### *Me xi nduva tsëhë ngahnga*

<sup>31</sup> Me xi nduva tsëhë ngahnga ne, me vëhë xi hitsë sa jemu vengui chji rë me xi cuma rë yëjë xuta. Ngayaan xi tsëhë ngasunhndë ngayaan ne, ha xuta ngasunhndë ni ngayaan, hacuaha suvá cjuatacun rë ngasunhndë xi visiajme. Me xi nduva tsëhë ngahnga ne, me vëhë xi hitsë sa jemu vengui chji rë me xi cuma rë yëjë xuta. <sup>32</sup> Me vëhë ne, sua me machaya naja tsëhë xcusun xi cavëë me cojo tsëhë cjua xi cahndë me,

peru xuta ne, fahatsjaain me cjua xi chja me vëhë. <sup>33</sup> Peru ngujo xuta ne, fahatsja me cjua rë me vëhë, hane cuatjin maquixi xi Nina ne, quixi jain me cojo cjua rë me. <sup>34</sup> Me xi Nina catsingatju rë ne, cjua rë Nina chja me ta, tsëhë xi Nina ne, hacuiin chuva hitsë sua me Hasen rë me. <sup>35</sup> Nina Nahmi naja ne, jemu hmu cacun me Quihndi Ngu rë me, hacuaha yëjë ni xcusun ne, cavejña me tsja Quihndi rë me jan. <sup>36</sup> Xuta xi mangucacun me cojo Quihndi rë Nina jan ne, tjin rë me cjuahñu xatsë. Peru xuta xi vihndiin me tsëhë Quihndi rë me jan ne, sacuiin rë me cjuahñu xatsë ta castigu rë Nina cuatju me cuma.

## 4

### *Cjuavisiajmi rë Jesús cojo na samaritana*

<sup>1</sup> Quihndë ne, cha fariseo ne, camachaya rë cha xi Jesús ne, hitsë sa cjín jima xuta ladu rë me xi cuma rë xuta ladu rë Juan, hacuaha hitsë sa cjín xuta tivitenda me xi cuma rë xuta xi tivitenda Juan. <sup>2</sup> Peru suvá Jesús ne, cavitendaain me ta xuta ladu rë me ne, me vëhë xi cavitenda me xuta. <sup>3</sup> Hane xi camachaya rë Jesús xi cuatjin camachaya rë cha fariseo xi cuacun vë ne, cavetjuxin me tsëhë distritu Judea. Hane cavuya quiji nga me ngu nandya tsëhë distritu Galilea.

<sup>4</sup> Hane ndiya xi cjuí me jan ne, tjin xi cuatju me ngujo nandya tsëhë distritu Samaria.

<sup>5</sup> Hya xi camá ne, cafehe me ngu nandya tsëhë distritu Samaria xi hmí rë Sicar, ngu nandya xi tacun tiña tsëhë nangui xi casua Jacob quihndi rë me José jemu hatsëë camahani. <sup>6</sup> Hane cahndë vëhë ne, tacun ngu ndava nandá xi casahmi Jacob. Hane tsëhë xi jemu cafenda rë Jesús tsëhë ndiya xi nduva me ne, quiji me cavéjña me hiscan ndava nandá jan. Sacuaha chuva rë nchisen xi cafehe me jan.

<sup>7</sup> Hora vëhë ne, canduva ngu na samaritana, canduva jaha na nandá. Hane cuitjin cachja Jesús cojo rë na:

—Tuhun hitsë nandá cuëhë. —Cuatjin cachja me.

<sup>8</sup> Hora vëhë ne, tsajin xuta ladu rë Jesús ta nandya quiji me xi cuatsë me xi sinë me cojo Jesús. <sup>9</sup> Ngajan xi na samaritana jan ne, cuitjin cachja na cojo Jesús:

—Ngayun xi xuta tjë rë Israel ngayun ne, ¿hacutjin má xi tichjahyun ná nandá, ngahan xi na samaritana ngahan ni? —(Cuatjin cachja na ta, tsëhë xi xuta tjë rë Israel ne, hatuxa tsinguisihinjñii me cojo xuta samaritana.) <sup>10</sup> Ngajan xi Jesús ne, cuitjin cafayangui me tsëhë na:

—Sa xi ngayun hyun cjuatjo xi Nina sua me hacuaha hyun yo ngahan xi tifehya nuju nandá ne, ngahan cachjahyun

ná nandá, hane ngahan casuá nuju nandá xi sua cjuahñu.  
—Cuatjin cafayangui Jesús.

<sup>11</sup> Hane na vèhë ne, cuitjin cachja na:

—Tatá, peru ndava nandá vi ne, jemu nungun, hane tsajin quichuhun mé xi naxun cojo nandá. ¿Jani naxun nandá xi sua cjuahñu vè ni? <sup>12</sup> Xutachanga naja Jacob casua niji me ndava nandá vi. Hacuaha cojo me cojo quihndi rë me cojo chu rë me cahvi me nandá tsëhë ndava nandá vihi. ¡Ja! Peru ¿há hitsë sa matitjun ngayun xi cuma rë me vèhë ni? —Cuatjin cachja na.

<sup>13</sup> Hane xi cafayangui Jesús ne, cuitjin cachja me cojo rë na:

—Yëjë ni xuta xi hvi me nandá vihi ne, cuma xinda nga rë me. <sup>14</sup> Peru xuta xi cuihi me nandá xi suá ngahan ne, hatuxa ha quihndë tsajin nu tsajin nixtin xi cuya cumaxinda nga rë me ta nandá xi suá ngahan ne, cuma sacuaha ngu nandá xi ña vangatë xi sua rë me cjuahñu xatsë. —Cuatjin cachja me.

<sup>15</sup> Ngajan xi na vèhë ne, cuitjin cachja na cojo Jesús:

—Tatá, tuhun ná hitsë nandá xi nújun vë, cojo sa xi cumaxindaain ná hacuaha ha quihndë cuinduvaan jaha nandá. —Cuatjin cachja na.

<sup>16</sup> Hane Jesús ne, cuitjin cachja me cojo rë na:

—Tángun chjuhun xihin nuju, sehe nduvuncujun me nguehe. —Cuatjin cachja me.

<sup>17</sup> Ngajan xi na vèhë ne, cuitjin cafayangui na:

—Tsajin xihin naha. —Cuatjin cafayangui na.

Hane cuitjin cachja Jesús cojo rë na:

—Ndaja nújun xi tsajin xihin nuju ta <sup>18</sup> hñú cha xi cavinechuncujun, hane cha xi nechuncujun quihndë ne, hacuiin xihin nuju cha. Canújun cjuaquixi. —Cuatjin cachja Jesús cojo rë na.

<sup>19</sup> Ngajan xi na vèhë ne, cuitjin cafayangui na:

—Tatá. Xi má ná ne, ngayun ne, ngu profeta ngayun.

<sup>20</sup> Xutachanga niji ne, nguehe ndetjún vihi canduva cafaharcun me Nina. Hane ngayujun ni xuta nangui rë Israel ne, nújun ta Jerusalén ne, ngajan tacun cahndë xi meje rë xi cjue chjahárcun rë Nina. —Cuatjin cafayangui na.

<sup>21</sup> Ngajan xi cachja Jesús cojo rë na cju vihi:

—Ngayun chjuun, catamacjain nuju cju xi cuichjá vi: cuechú nixtin xi hacuiin ndetjún vihi hacuiin Jerusalén chjuhuncun Nina Nahmi naja. <sup>22</sup> Ngayun xuta samaritano ne, chjuhuncun Nina, peru hyúun me xi ndandaja. Ngayin ne, ha hyinndijin Nina ta, tsëhë xi me xi cuaxëtje rë xuta ne, cuetjujñi me ngajñi niji ngayin xuta nangui Israel. <sup>23</sup> Cuechú nixtin o ha hisca cavechú nixtin xi xuta xi cjuaquixi xi faharcun me Nina Nahmi naja ne, Hasen rë Nina cuisecoo rë me xi cjuaharcun me Nina cojo cjuaquixi. Ha cjuaquixi ta xuta

xi cuatjin sahmi me ne, me vëhë xi meje rë Nina Nahmi naja xi cjuaharcun rë me. <sup>24</sup> Nina ne, Hasen me. Hane xuta xi faharcun rë me ne, hatuxa meje rë xi Hasen rë Nina cuisecoo rë me xi cjuaharcun me Nina cojo cjuaquixi. —Cuatjin cachja Jesús.

<sup>25</sup> Hane chjuun jan ne, cuitjin cachja na cojo Jesús:

—Ngahan ne, ha hvë xi cuinduva Me xi Tsingatju Nina, me xi hmí rë Cristu. Hane hya xi cuinduva me vëhë ne, suacuenda naja me yëjë ni cjuatacun. —Cuatjin cachja na.

<sup>26</sup> Ngajan xi Jesús ne, cuitjin cachja me cojo rë na:

—Ngahan xi tichjá cojo nuju vi ne, ha ngahan xi nújun vë. —Cuatjin cachja me.

<sup>27</sup> Hane hora vëhë cavuya xuta ladu rë Jesús xi quiiji jaha me comida. Hane jemu quijircun rë me xi cavëë me xi visiajmi Jesús cojo rë ngu chjuun. Peru hisca ngu me xi cuacun vë cavinenguisiin me cuitjin: “¿Mé xi meje nuju?” o “¿mé xi visiajmu cojo rë na?” Cuatjin camá. <sup>28</sup> Chjuun jan ne, cavejña na nisa rë na, sehe cavuya quiiji na nandya, hane cuitjin cachja na cojo xuta:

<sup>29</sup> —Nduvun cuanguen chutsejen ngu me xi cachja cojo ná yëjë xcusun xi casahme. ¿Hacuiin hacui me vëhë xi Tsingatju Nina? —Cuatjin cachja na.

<sup>30</sup> Hya xi camá ne, cavetju xuta quiiji me cojo rë na hiscan quitahá Jesús. <sup>31</sup> Jinguyëjë rë ne, xuta ladu rë Jesús jan ne, cuitjin cachja me:

—Maestro, xinu niñu. —Cuatjin cachja me.

<sup>32</sup> Peru Jesús ne, cuitjin cafayangui me:

—Ngahan ne, ha tjin xi sínë xi ngayun ne, hyúun mé jan. —Cuatjin cafayangui me.

<sup>33</sup> Ngajan xi xuta ladu rë Jesús jan ne, cuitjin cavinenguisse xicjin me xingu xingu me:

—¿Há cuma cacun sa xi tjin yo xi cafehe cani xi cajinë me? —Cuatjin cavinenguisse xicjin me.

<sup>34</sup> Hane Jesús ne, cuitjin cachja me cojo xuta ladu rë me jan:

—Jemu chuya rë xahasen naja xi chinë niñu. Peru ngahan ne, hitsë sa chuya rë xahasen naha xi sahme sacuatjin meje rë me xi catsingatju ná, hacuaha hitsë sa chuya rë xahasen naha xi tsinguíjnetaha xa xi casua ná me. <sup>35</sup> Chja ngu cjua ta: “Chaja sa ñuju sá, sehe tjunihnga rë xitjë.” Peru ngahan cuichjá cojo nuju ta chutsujun xuta ta, tsëhë xi tangun me cojo xitjë xi ha camacha, ha cuma tjunihnga rë. <sup>36</sup> Me xi tivunihnga xitjë ne, ha tifaha me chji rë me, cuma cuinújan ne, tisahmi tangun me xuta xi sacú rë xuta xi cuacun vë cjuahña xatsë. Cuatjin tijima cojo sa xi tangun cuiyujusua me xi vincha tjë cojo me xi vunihnga xitjë. <sup>37</sup> Quixi cjua xi chja xi: “Hacjahi cha xi vincha

tjē ne, hacjahi cha xi vunihnga xitjē.”<sup>38</sup> Ngahan catsingátju nuju chunihngun xitjē hiscan xi hacuiin ngayun canihñu xa. Jíngusa me casahmi me xa, hane ngayun cavisuhunjñu ngajñi rē xa rē me. —Cuatjin cachja Jesús cojo xuta ladu rē me.

<sup>39</sup>Jemu cjín xuta samaritano tsēhē nandya jan camangu cacun me cojo Jesús, ngatsē rē cjua xi cachja chjuun jan cuitjin: “Cachja me cojo ná yējē xcusun xi casahme.”<sup>40</sup> Ngajan xi hya xi cafehe xuta samaritano ngajan hiscan quitahá Jesús ne, cachja xuta jan cojo rē me xi cjue cuejña me cojo rē me. Hane Jesús ne, quiji cavéjña me jo nixtin cojo xuta xi cuacun jan.<sup>41</sup> Hane jemu cjín sa xuta xi camangu cacun me ngatsē rē cjua rē suvá Jesús.<sup>42</sup> Hane chjuun jan ne, cuitjin cachja xuta jan cojo rē na:

—Ha quihndē hacuiin ngatsē rē cjua riji xi mangutacuín ta, tsēhē xi suvin canuhyin cjua rē me, hane ngayin ne, hyin ta cjuaquixindaja xi me vihi xi cuaxētje me xuta. —Cuatjin cachja xuta jan.

*Camandaja quihndi rē ngu xutaxa rē casahmi Jesús*

<sup>43</sup>Xi cavatju jo nixtin jan ne, cavetju Jesús cojo xuta ladu rē me, quiji me ngu nandya tsēhē distritu Galilea.<sup>44</sup> Ta suvá Jesús cachja me xi quixi xi xuta ne, faharcuaain me profeta xi tsēhē nangui rē me.<sup>45</sup> Vēhē xi hya xi tivatju Jesús ngujo nandya tsēhē distritu Galilea ne, ndaja cafachatsja xuta me ta, tsēhē xi hacuaha cojo xuta jan quiji me suhi ngajan Jerusalén, hane ngajan cavēē me yējē xcusun xi casahmi Jesús nixtin rē suhi jan.

<sup>46</sup>Hya xi camá ne, cavuya cafehe me Caná, ngu nandya tsēhē distritu Galilea, hiscan xi casahmi me xi nandá ne, cavuya camá xan rē uva. Hane ngajan nandya Capernaum ne, cavéjña ngu xutaxa rē xi hmu rē cha quihndi rē me.<sup>47</sup> Hane xi camachaya rē me xi cafehe Jesús ngajan Caná ne, cavetju me quijitjengui me Jesús. Hane xi cafehe me jan ne, cafehya me favor cojo Jesús xi cjue Jesús cojo rē me nangui rē me xi sahmi Jesús xi cumandaja quihndi rē me ta ha tu hora sa xi cueya.<sup>48</sup> Ngajan xi Jesús ne, cachja me cuitjin cojo xutaxa rē jan:

—¡Ngayujun ni ngayun ne, sa xi chuun cjuarcun ne, cuman-guaain camahani tacún cojo ná! —Cuatjin cachja Jesús.

<sup>49</sup>Ngajan xi xutaxa rē jan ne, cuitjin cafayangui me:

—Tatá, cuanguen sanii, chaja sa xi cueya quihndi naha. —Cuatjin cafayangui me.

<sup>50</sup>Hane Jesús ne, cuitjin cachja me:

—Cuma cuangun ta, quihndi nuju ne, jimandaja cha. —Cuatjin cachja Jesús.



Hya xi camá ne, xutaxa rë jan ne, camacjain rë me cjua xi cachja Jesús, hane cavetju me quiji me. <sup>51</sup> Hane ndiya cjuí me ne, cavechútáha me ngujo cha mosu hndixahan rë me, hane cachja cha cojo rë me xi cha quihndi rë me ne, tijmandaja cha. <sup>52</sup> Ngajan xi xutaxa rë jan ne, cavinenguisse me cojo cha hndixahan rë me jan mé hora cavetsihin camandaja cha hmu rë jan. Hane cha hndixahan rë me jan ne, cuitjin cachja cha:

—Ngujña fane ngu cavetjuxin chíhinsuë xi sahmi cojo cha.  
—Cuatjin cachja cha.

<sup>53</sup> Hane nahmi rë quihndi jan ne, ha vëë me ta hora vëhë xi cachja Jesús cojo rë me xi quihndi rë me ne, tijmandaja cha. Cuatjin camá xi xutaxa rë jan cojo yëjë xuta rë me ne, camangu cacun me cojo Jesús.

<sup>54</sup> Cuatjin camá xi, hya xi cavetju Jesús tsëhë ladu rë distritu Judea hane cafehe me Caná, distritu Galilea ne, casahmi me cjuarcun xi majo xi casahmi me ngajan.

## 5

### *Ndava nandá xi hmí rë Betesda*

<sup>1</sup> Xi cavatju nixtin xi cuacun vë ne, quiji Jesús ngajan Jerusalén xi cjue me suhi xi cuma ngajan yungun xi matitjun.

<sup>2</sup> Quihndë ne, ngajan Jerusalén ne, tiña tingotjo Chu Tsánga ne, ngajan tacun ngu ndava nandá xi tjin rë hñú cahndë ngahma ndihya. Hane ndava nandá vëhë ne, xi hne hebreo ne, Betesda hmí rë. <sup>3</sup> Cahndë jan ne, jemu cjín xuta siuhmu me. Siu xuta rcá, siu xuta rengun, siu xuta xi quixihñu yojo rë xi tacunya rë me xi cuiniya nandan <sup>4</sup> ta jiya hora jiya hora ne, finiya nandan ta ngu ángel ne, vijne tsiniya nandan jan. Sehe cha xi tjun cuisehen ne, marqui rë tsëhë chíhin xi má rë.

<sup>5</sup> Hane ngajñi rë xuta hmu rë xi cuacun jan ne, jiña ngu cha xi ha tjin rë can tyjuhunjyan nu xi hmu rë cha. <sup>6</sup> Hane xi cavëë Jesús xi cuatjin jiña cha hacuaha ha vëë me xi ha jemu tsëë hmu rë cha ne, cavinenguisse me cha cuitjin:

—¿Há meje nuju xi cuma ndaja ngayun? —Cuatjin cavinenguisse Jesús.

<sup>7</sup> Hane cha hmu rë jan ne, cuitjin cafayangui cha:

—Tatá, tsajin yo xi tsinguissehen ná ndava nandá hora xi finiya nandá. Jínguyëjë rë xi tifë tiña ne, hacjahi me xi ha cavisehen. —Cuatjin cafayangui cha.

<sup>8</sup> Ngajan xi Jesús ne, cuitjin cachja me cojo cha:

—Tisatjunhngun, chjuhun nijña nuju, sehe tujuhunyun.  
—Cuatjin cachja Jesús.

<sup>9</sup> Cha vëhë ne, ha tu ñahñu camandaja cha, cafaha cha nijña rë cha, cavetsihin catsujyihya cha.

Nixtin vëhë ne, nixtin xi chjahájenda rë. <sup>10</sup> Ngajan xi xutaxa rë yungun ne, cachja me cojo cha xi camandaja jan cuitjin:

—Quihndë ne, nixtin xi chjahájenda rë. Ndajintjin xi cuatjin quichehe nijña riji. —Cuatjin cachja me.

<sup>11</sup> Hane cha xi camandaja jan ne, cuitjin cafayangui cha:

—Me xi casahmi xi camandaja ngahan ne, me vëhë cachja me cojo ná xi cjuahá nijña naha sehe tsujyëhëya. —Cuatjin cachja cha.

<sup>12</sup> Ngajan xi xutaxa rë jan ne, cavinenguisse nga me cuitjin:

—¿Hane yo xi cachja cojo ri xi chjehe nijña riji ne, sehe tujyihye? —Cuatjin cavinenguisse me.

<sup>13</sup> Peru cha xi camandaja jan ne, hvín cha yo ta, tsëhë xi Jesús ne, cavetjuxin me tsëhë cahndë vëhë, tsëhë xi jemu xutacjín quitsë me.

<sup>14</sup> Hane xi cavatju vëhë ne, cavechútáha Jesús cha ngajan yungun xi matitjun, hane cachja me cojo cha cuitjin:

—Chutsujun ni, camandaja ngayun. Quihndë ne, xi-cavinechunyuun sa ndiya rë cjuatsehen, sa tu choho sa cuatjun cuma. —Cuatjin cachja Jesús cojo cha.

<sup>15</sup> Sehe cavetju cha quiji cachja cha cojo xutaxa rë ta me xi casahmi xi camandaja cha ne, Jesús. <sup>16</sup> Vëhë xi xutaxa rë jan ne, tsujyihyatjengui me Jesús cojo cjuahngatacun ta, tsëhë xi casahmi Jesús xcusun vëhë nixtin xi chjahájenda rë. <sup>17</sup> Ngajan xi Jesús ne, cuitjin cachja me cojo xutaxa rë jan:

—Nahmi naha ne, hisca quihndë tisahmi me xa, hacuaha ngahan ne, tisahme xa. —Cuatjin cachja Jesús.

<sup>18</sup> Ngatsë rë cjua vëhë ne, xutaxa rë jan ne, hitsë sa cavangui me chuva rë xi tsiquehen me Jesús. Cuatjin casahmi xutaxa rë ta, tsëhë xi hacuün suvá ni cafaharcuaain Jesús nixtin xi chjahájenda rë ta hacuaha cachja me xi Nahmi rë me ne, Nina. Hane xi cuatjin cachja Jesús ne, tsingacun me xi tangun me cojo Nina.

### *Xa xi tjin rë Quihndi rë Nina*

<sup>19</sup> Ngajan xi Jesús ne, cuitjin cachja me cojo xutaxa rë xi cuacun jan:

—Cuichjá cojo nuju cjuaquixi ta ngahan xi Quihndi rë Nina ngahan ne, tsajin mé xi cuma sahme xi cojo cjuatacun naha suva ta xi vutsején xi sahmi Nahmi naha ne, vëhë xi sahme. Xcusun xi sahmi me vëhë ne, hacuaha xcusun vëhë sahme ngahan Quihndi rë me. <sup>20</sup> Nahmi naha ne, hmu cacun ná me, ngahan Quihndi rë me, hacuaha tsingacun ná me yëjë xcusun xi sahmi me. Hane xcusun xi sehe tsingacun ná me ne, hisca yehe sa xi cuma rë xcusun xi casahme xi camandaja cha hmu rë jan. Cuatjin cuma cojo sa xi ngayun ne, cjuercun nuju. <sup>21</sup> Sacuatjin faha Nahmi naha nima sehe sua nga rë

me cjuahñu ne, hacuanitjin ni ngahan Quihndi rë me ta suá rë cjuahñu yo xi meje suá rë. <sup>22</sup> Nahmi naha ne, tsajin yo tsichuva me cojo cjuatacun rë ta ntsa ngahan cavejña me yëjë xa vëhë, <sup>23</sup> cojo sa xi yëjë ni xuta ne, cjuaharcun me ngahan sacuatjin faharcun me Nahmi naha. Yo xi cjuaharcuaain ná ngahan ne, faharcuaain rë Nahmi naha, me xi catsingatju ná.

<sup>24</sup> Cuichjá cojo nuju cjuaquixi ta xuta xi vihndë me cjua xi chjá hacuaha mangucacun me cojo rë Nina, me xi catsingatju ná ne, tjin rë me cjuahñu xatsë. Hacuaha cumachuvaain me cojo cjuatacun rë me ta sacuaha xi ha cahme me hacuaha ha casacu rë me cjuahñu xatsë. <sup>25</sup> Cuichjá cojo nuju cjuaquixi ta cuechú nixtin o ha hisca cavechú nixtin xi xuta xi hndiin tsëhë Nina sacuaha nima ne, cuihndë me xta naha, ngahan xi Quihndi rë Nina ngahan. Hane me xi cuihndë tsahan ne, sacú rë me cjuahñu xatsë. <sup>26</sup> Cjuahñu xi tjin rë Nina ne, tsajin yo casua rë me, ta nduva tsëhë cjuandaja rë suva me. Hane hacuanitjin ná ngahan, ta casua ná cahndë xi hacuaha tjin ná cjuahñu tsëhë cjuandaja rë suvá. <sup>27</sup> Hacuaha casua ná me xa xi tsichúva xuta cojo jyë rë me ta, tsëhë xi ngahan ne, Quihndi rë Xuta Jain ngahan. <sup>28</sup> Hacuiin cjuercun nuju tsëhë cjua naha. Cuechú nixtin xi yëjë ni nima xi hincha cahntsua tsjun rë ne, cuihndë xta naha, <sup>29</sup> sehe cuetju tsëhë tsjun rë. Hane nima xi ndaja xcusun casahmi xcun cjuahñu rë ne, sacú rë cjuahñu xatsë. Hane nima xi choho xcusun casahmi ne, cuatju castigu. <sup>30</sup> Ngahan ne, hatuxa tsajin mé xi sahme xi cojo cjuatacun naha suva ta, sacuatjin cjua xi víhndë xi chja Nahmi naha ne, cuatjin tsichúva xuta cojo cjuatacun rë me. Hane hatuxa quixi ngahan cojo cjuatacun naha ta, tsëhë xi sahme hacutjin xi meje ná suva ta sacuatjin xi meje rë Nahmi naha, me xi catsingatju ná ne, cuatjin xi sahme. —Cuatjin cachja Jesús.

### *Hacutjin cumachaya naja yo xi Jesucristu*

<sup>31</sup> Cjuinduju sa tichja Jesús cojo xutaxa rë yungun cuitjin:

—Sa xi ngahan cuichjá favor naha suva ne, cuinújun ta quixiin cjua xi chjá. <sup>32</sup> Peru tjin sa ngu xi tichja favor naha, hane hvë ta cjua xi chja me vëhë tsahan ne, cjuaquixi. <sup>33</sup> Ngayun ne, caningatjun xuta quiji cavinenguisse rë me Juan ngu cjua, hane Juan ne, catsicuya me cjua xi cjuaquixi. <sup>34</sup> Peru ngahan ne, me xi tichja me favor naha hacuiin xuta me, peru cjua xi tichjá vi ne, tichjá cojo sa xi ngayun ne, cuetjuntjun. <sup>35</sup> Juan vë ne, sacuaha ngu ndihi xi setí xi sua hasen rë camá me. Hane ngayun ne, cachuya nuju tsëhë xi cavinechun sua ngujo nixtin ngajñi rë cjuahasen rë Juan. <sup>36</sup> Peru ngahan ne, tjin xcusun xi hitsë sa ndaja tsingacun yo ngahan xi cuma rë cjua xi cachja Juan tsahan. Xa xi casua

Nahmi naha ngahan xi sahmechehen ne, cuma cuinújan ne, xa xi ha tisahme ne, suvá xa vëhë tsingacun xi Nahmi naha catsingatju ná me. <sup>37</sup> Hacuaha Nahmi naha, me xi catsingatju ná ne, chja me favor naha. Ngayun ne, hisca xta rë me cjëë cuinuhyun, hacuaha cjëë chun hacutjin jyihi me. <sup>38</sup> Hisca cjua rë me ne, tsajin tetjo ngajñi rë cjuatacun nuju ta, tsëhë xi ngahan xi catsingatju ná me vëhë ne, manguaain tacún cojo ná. <sup>39</sup> Ngayun ne, jemu chutayun xujun rë Nina ta, tsëhë xi ningatuhun tacún ta xi cuatjin chutayun ne, sacú nuju cjuahñu xatsë. Hane xujun vëhë ne, vëhë xi chja favor naha. <sup>40</sup> Hane ngayun ne, mijí cuisuhun ladu naha xi sacú nuju cjuahñu xatsë.

<sup>41</sup> 'Ngahan ne, hacuiin sahmi ngujoyë xi xuta sahmi jyë sahmi hnga ná me. <sup>42</sup> Hacuaha ngahan ne, ha hvë xcusun nuju ta tsajin cjuahmutacun rë Nina jiya cahntsua xahasen nuju. <sup>43</sup> Ngahan ne, canduvá ta, tsëhë xi Nahmi naha casuaxa ná me, peru ngayun ne, mijí chjuhunnstun ná. Hane sa xi jingu sa xuta cuinduva me cojo cjuatacun rë suvá me ne, ha hvë ta me vëhë ne, hatuxa chjuhunnstun me. <sup>44</sup> Tsajin nixtin xi cumangu tacún cojo ná ngahan jinguyëjë rë xi tivinchun chuva rë xi ngajñi nuju cojo xingun ni ne, sahmi yehe sahmi hnga nuju me hane vinchunsuun xi Nina xi ngu tu tu ni ne, me vëhë sahmi yehe sahmi hnga nuju me. <sup>45</sup> Xicaningatuun tacún xi ngahan cuíncha jyë nuju xcun Nahmi naha ta xutachanga naja Moisés, me xi jemu vetuhun tacun ne, me vëhë xi cuíncha jyë nuju me. <sup>46</sup> Sa xi camacjain nuju cjua xi catsihindu Moisés ne, hacuaha camacjain nuju cjua naha ta Moisés vë catsihindu me tsahan. <sup>47</sup> Peru sa xi macjaain nuju cjua xi catsihindu Moisés ne, ¿hacutjin cumacjain nuju cjua xi chjá ngahan ni?

## 6

### *Catsicjen Jesucristu hñú mil xihin*

<sup>1</sup> Xi cavatju yëjë xcusun vëhë ne, cavetju Jesús quiji me ngunda vëhë tsëhë laguna Galilea, xi hacuaha hmí rë laguna Tiberias. <sup>2</sup> Hane jemu xutacjín camahani xi quijitjengui me Jesús ta, tsëhë xi cavëë me cjuarcun xi casahmi Jesús cojo xuta hmu rë. <sup>3</sup> Hane Jesús ne, quijiniji me ngu ndetjún, hane ngajan cavéjña me cojo xuta ladu rë me. <sup>4</sup> Hane Pascua, suhi xi sahmi xuta tjë rë Israel ne, hacuaha ha camatiña. <sup>5</sup> Hane xi vutsejen Jesús xi jemu xuta cjín nduvatjengui rë me ne, sehe cachja me cojo Felipe cuitjin:

—¿Jani cuanguen chaan niñu xi sinë xuta xi cuacun vë?  
—Cuatjin cachja Jesús.

<sup>6</sup> Cuatjin cachja me xi cjuahachuva me Felipe ta, tsëhë xi Jesús ne, ha vëë me mé xi sahmi me. <sup>7</sup> Ngajan xi Felipe ne, cuitjin cafayangui me:

—Sa xi chaan niñu cojo tujún xi chji rë xuta jo cientu nixtin ne, hisca chutaain xi sacú tsë tsë sinë jima ngu xuta vë. —Cuatjin cafayangui Felipe.

<sup>8</sup> Ngajan xi ngu xuta ladu rë Jesús, Andrés hntsë Simón Pedru ne, cuitjin cachja me cojo Jesús:

<sup>9</sup> —Nguehe secun ngu cha lihndi xi yaha hñú niñu cojo jo chu ti. Peru ¿mé chutaha vë xi sinë xuta xi cuarcumu cjín me? —Cuatjin cachja Andrés.

<sup>10</sup> Ngajan xi Jesús ne, cuitjin cachja me:

—Tinújun cojo xuta vë ne, catiyuju me. —Cuatjin cachja me.

Quihndë ne, ngajan cahndë vëhë ne, jemu jyë cahndë tjin ndiji. Hya xi camá ne, ngajan caviyuju sacuaaha hñú mil xihin.

<sup>11</sup> Ngajan xi Jesús ne, cafaha me niñu jan, hane, xi cafë casua me nacuechji rë Nina ne, sehe cavatëcja me niñu jan ngajñi rë xuta xi siu jan. Hacuanitjin ni casahmi me cojo chu ti jan. Casua me ha tucutjin xi meje sinë xuta jan. <sup>12</sup> Hane hya xi ha catsë rë xuta xi cajinë me ne, sehe cachja Jesús cojo xuta ladu rë me jan cuitjin:

—Quihndë ne, chjayun yëjë xi cavángui vë ne, cojo sa xi hacuain chajá hisca hitsë. —Cuatjin cachja Jesús.

<sup>13</sup> Hane xi cafaya xuta ladu rë Jesús yëjë ni xi cavángui tsëhë hñú niñu xi cajinë yëjë xutacjín jan ne, catsinguitsë me tejó chajne. <sup>14</sup> Hane xi cavëë xuta cjuarcun xi casahmi Jesús jan ne, cuitjin cachja me:

—Cjuaquixi xi me vihi profeta xi cuinduva ngasunhndë. —Cuatjin cachja xuta jan.

<sup>15</sup> Peru Jesús ne, ha vëë me xi ha tu hora sa xi cjuaha xuta me cojo ngu jyë camahani xi suaxa rë me xi cuma titjun me. Vëhë xi Jesús ne, cavetjuxin nga me, quiji suvá ni me hisca rcu ndetjún.

### *Quiji ntsacu Jesucristu xcun nandá*

<sup>16</sup> Quihndë ne, xi quiji hora jan ne, quiijjne xuta ladu rë Jesús tjehen laguna. <sup>17</sup> Hane xi cavisehen me ngu barcu ne, cavuya canduva nga me ngunda vihi tsëhë laguna xi cjue me nandya Capernaum. Hya xi camá ne, camajñu, peru Jesús ne, cjëë cjuetjengui me xuta ladu rë me jan. <sup>18</sup> Hane hora vëhë ne, xi jercu tu hñu camahani tivanga tjo ne, sacuaaha xi sexu nandá tsëhë laguna jan. <sup>19</sup> Ha xcun xi ha quiji me xi cuacun jan cojo barcu sacuaaha hñú o sa jyun kilómetro xcun nandá jan ne, cavëë me xi nduva ntsacu Jesús xcun nandá, tisahmitiña me tsëhë barcu. Hane xuta ladu rë me jan ne,

catsacjun me camá. <sup>20</sup> Peru Jesús ne, cachja me cuitjin cojo xuta ladu rë me jan:

—Ngahan vi. Xicarcuun. —Cuatjin cachja me.

<sup>21</sup> Ngajan xi xuta ladu rë Jesús jan ne, cojo yëjë ni cjuasua ne, cafahatsja me Jesús cahntsua barcu. Hane ha tu ñahñu cafehe barcu cojo rë me nangui quixí, cahndë hiscan cjuí me.

### *Cavanguise xuta Jesús*

<sup>22</sup> Hane xi camá nchujun jan ne, xutacjín xi caviyuju ngunda vëhë tsëhë laguna jan ne, catsinguitsjen me xi ngujña ne, ngu tu tu barcu tacun jan. Hacuaha vëë me xi Jesús ne, quijiin me cojo xuta ladu rë me barcu vëhë ta suvá ni xuta ladu rë Jesús quiji me. <sup>23</sup> Peru ngujo barcu xi canduva tsëhë nandya Tiberías ne, cafehe tiña hiscan xi cajinë xutacjín jan niñu hora xi café casua Nai naja nacuechji rë Nina. <sup>24</sup> Hane xi cavëë xutacjín jan xi hacuiin Jesús hacuiin xuta ladu rë me siu cuaha me jan ne, sehe cavisehen me barcu xi sehe cafehe jan, quiji me nandya Capernaum xi cuanguise me Jesús.

### *Jesucristu ne, sacuaha niñu xi sua cjuahñu me*

<sup>25</sup> Hane xi casacu rë xuta xi cuacun jan Jesús ngunda vihi tsëhë laguna jan ne, cavinenguise me cuitjin:

—Maestro, ¿janihya canduvun nguehe ni? —Cuatjin cavinenguise xuta xi cuacun jan.

<sup>26</sup> Ngajan xi Jesús ne, cuitjin cafayangui me:

—Cuichjá cojo nuju cjuaquixi ta ngayujun ni ngayun ne, nduvuntjengun ná, peru hacuiin ngatsë rë xi cahyun cjuarcun xi casahme ta ngatsë rë xi cachinu niñu jan hisca xi catsë nuju. <sup>27</sup> Nihñu ngatsë rë xichine, peru hacuiin xichine xi vetsun ta xichine xi hacuiin vetsun hacuaha hisca sua cjuahñu xatsë. Vëhë xichine xi suá nuju ngahan xi Quihndi rë Xuta Jain ngahan, ngahan xi sahme cjuarcun cojo sa xi cumatsejen xi cjuaquixi jain xi Nina Nahmi naha catsingatju ná me. —Cuatjin cafayangui Jesús.

<sup>28</sup> Ngajan xi xuta xi cuacun jan ne, cuitjin cavinenguise me cojo Jesús:

—¿Hacutjin ndatjin nihñi, cojo sa xi nihñi hacutjin xi chuya rë Nina? —Cuatjin cavinenguise xuta jan.

<sup>29</sup> Hane Jesús ne, cuitjin cafayangui me:

—Cuitjin meje rë Nina xi nihñu: catamangu tacún cojo ná, ngahan xi catsingatju ná me. —Cuatjin cafayangui Jesús.

<sup>30</sup> Ngajan xi xuta jan ne, cuitjin cavinenguise me Jesús:

—¿Mé cjuarcun nihñu xi sacú chutsijín, cojo sa xi cumangu tacún cojo nuju? ¿Mé xi nihñu? <sup>31</sup> Yëjë ni xutachanga naja ne, cajinë me niñu xi camá cojo scuan maná ngajan ngu xín camahani tsëhë nandya, sacuatjin camahindu xcun xujun

rë Nina xi chja cuitjin: “Nina ne, tsëhë ngahnga catsingatju me niñu xi cajinë xuta.” Cuatjin camahindu. —Vëhë cjua xi cavinenguise xuta xi cuacun jan Jesús.

<sup>32</sup> Ngajan xi Jesús ne, cuitjin cachja me cojo xuta jan:

—Cuichjá cojo nuju cjuaquixi ta hacuiin Moisés xi casua me niñu xi nduva tsëhë ngahnga ta Nahmi naha xi sua nuju me niñu jain xi nduva tsëhë ngahnga. <sup>33</sup> Niñu xi sua Nina ne, vëhë niñu xi nduvajne tsëhë ngahnga hacuaha sua rë xuta cjuahñu. —Cuatjin cachja Jesús.

<sup>34</sup> Hane xuta xi cuacun jan ne, cuitjin cafehya me cojo Jesús:

—Tatá, tuhun niji niñu vëhë nchunchujun ni. —Cuatjin cafehya xuta jan.

<sup>35</sup> Ngajan xi Jesús ne, cuitjin cachja me:

—Ngahan xi sacuaha niñu jan xi sua cjuahñu ngahan. Xuta xi cuisehen me ladu naha xi mangucacun me cojo ná ne, ña tsë rë xahasen rë me cjuandaja, sacuaha xi ha quihndë cumavajin rë me cumaxindaain rë me ngundiya nga. <sup>36</sup> Ngahan ne, ha cachjá cojo nuju ta ha tichutsujun xcusun xi sahme peru manguaain tacún cojo ná. <sup>37</sup> Yëjë ni xuta xi Nahmi naha casua ná me ne, cuinduvatjengui ná me. Hane me xi cuinduvatjengui ná ne, hatuxa tsitjungueen me ta, <sup>38</sup> tsëhë xi ngahan ne, xi canduvajne tsëhë ngahnga ne, hacuiin xi sahme sacuatjin xi meje ná ta sacuatjin xi meje rë me xi catsingatju ná. <sup>39</sup> Hane me xi catsingatju ná vë ne, meje rë me xi hisca ngu xuta tsëhë yëjë ni me xi casua ná me ne, tsichajan me ta tsicúya me cjuahñu nixtin xi chjaháchuva rë sa nima sa xuta cojo cjuatacun rë. <sup>40</sup> Hacuaha Nahmi naha ne, meje rë me xi yëjë ni xuta xi vijnercu me yo ngahan xi Quihndi rë Nina ngahan hacuaha cumangu cacun me cojo ná ne, sacú rë me cjuahñu xatsë. Hane ngahan tsicúya me cjuahñu nixtin xi tsichuva Nina sa nima sa xuta. —Cuatjin cachja Jesús.

<sup>41</sup> Vëhë xi xutaxa rë yungun xi cuacun jan ne, cavetsihin cavisiajmihma me tsëhë Jesús ta, tsëhë xi cachja Jesús ta: “Ngahan sacuaha niñu xi nduvajne tsëhë ngahnga ngahan.”

<sup>42</sup> Cuitjin cavisiajmihma me:

—¿Hacuiin cha Jesús vihi, xi quihndi rë José? ¿Hacuiin ha hyan nahmi rë cha hacuaha ha hyan naa rë cha? ¿Hacutjin má xi quihndë ne, chja cha xi tsëhë ngahnga canduvajne cha ni? —Cuatjin cavisiajmihma me.

<sup>43</sup> Ngajan xi Jesús ne, cuitjin cachja me cojo xutaxa rë jan:

—Camá ni cuinújunhmú cojo xingun xingu xingu ngayun.

<sup>44</sup> Xuta xi cuma cuisehen me ladu naha ne, suvá ni xuta xi cuisecoo Nahmi naha, me xi catsingatju ná. Me vëhë xi cuma cuisehen me, hane ngahan tsicúya me cjuahñu nixtin xi tsichuva Nina sa nima sa xuta. <sup>45</sup> Cuitjin camahindu xcun

xujun rē Nina xi catsihindu profeta: “Suvá Nina scuxaha me cjuatacun rē yějē ni xuta.” Cuatjin camahindu. Hane xuta xi vetaharcu cjuarē Nina hacuaha Nina vuxaha me cjuatacun rē ne, visehen me ladu naha.

<sup>46</sup> Hacuini xi ha tjin yo xi cavutsejen rē Nahmi naha ta suva ni ngahan xi tsēhē Nina canduva ne, ngahan xi cahvē Nahmi naha. <sup>47</sup> Cuichjá cojo nuju cjuaquixi ta yo xi mangucacun cojo ná ne, tjin rē cjuahñu xatsē. <sup>48</sup> Ngahan xi sacuaha niñu xi sua cjuahñu ngahan. <sup>49</sup> Yějē ni xutachanga nuju ne, cajinē me niñu xi camá cojo scuan maná ngajan ngu xín camahani tsēhē nandya, peru cavechú nixtin xi cahme me. <sup>50</sup> Peru niñu xi nduvajne tsēhē ngahnga xi chjá ngahan tsēhē ne, sa xi yo sinē niñu vėhē ne, cueyaain. <sup>51</sup> Ngahan xi quicun ngahan ne, ngahan xi sacuaha niñu xi canduvajne tsēhē ngahnga jan ngahan. Sa xi ngu xuta sinē me niñu vėhē ne, handasa cueya me ne, peru hasen rē me ne, cjue xcun Nina. Niñu xi suá ngahan vė ne, hacui yojo naha xi suá cojo sa xi xuta ngasunhdē ne, sacú rē me cjuahñu xatsē. —Cuatjin cachja Jesús cojo xutaxa rē.

<sup>52</sup> Hya xi camá ne, xutaxa rē jan ne, cavetsihin cavisiajmicjan me tsēhē Jesús ngajñi rē me cojo xicjin me, cuitjin cachja me:

—¿Hacutjin cuma sua cha xi cuajyihí vė yojo rē cha xi xinēē ni? —Cuatjin cachja xutaxa rē jan.

<sup>53</sup> Hane Jesús ne, cuitjin cachja me cojo xuta xi cuacun jan: —Cuichjá cojo nuju cjuaquixi ta sa xi ngayun xinuu yojo naha ngahan xi Quihndi rē Xuta Jain ngahan hacuaha siuun jni naha ne, tsajin nuju cjuahñu xi cjuaquixi. <sup>54</sup> Xuta xi jinē me yojo naha hacuaha hvi me jni naha ne, tjin rē me cjuahñu xatsē, hacuaha ngahan tsicúya me cjuahñu nixtin xi tsichuva Nina sa nima sa xuta. <sup>55</sup> Cuatjin cuma ta, tsēhē xi yojo naha ne, vėhē comida xi cjuaquixi, hane jni naha ne, vėhē nandá xi cjuaquixi. <sup>56</sup> Me xi jinē yojo naha hacuaha hvi me jni naha ne, visehen me yojo naja, hacuaha ngahan ne, visehen yojo rē. <sup>57</sup> Nahmi naha, me xi hatuxa tjin rē cjuahñu ne, catsingatju ná me, hane ngatsē rē me vėhē xi tejña cjuahñu ngahan. Ha chuva vėhē ni ne, xuta xi jinē ná ne, cuejña me cjuahñu ngatsē naha. <sup>58</sup> Cuatjin sahmi niñu xi canduvajne tsēhē ngahnga. Hacuini tangun cojo niñu xi cajinē xutachanga nuju ta cavechú nixtin xi cahme me. Ha ndaja xuta xi sinē me niñu xi chjá ngahan ne, handasa cueya me ne, peru hasen rē me ne, cjue xcun Nina. <sup>59</sup> —Cuatjin cachja Jesús hya xi cavicuya me xuta ngu yungun ngajan nandya Capernaum.

*Cjuarē xi sua machaya naja tsēhē cjuahñu xatsē*



<sup>60</sup> Hya xi camá ne, jemu cjin xuta ladu rë Jesús xi cuitjin cachja me hya xi cahndë me cjuajjan:

—¡Jemu choho visiajmi me! ¡Scaain naja cojo cjuajjehë!  
—Cuatjin cachja me.

<sup>61</sup> Peru Jesús ne, ha vëë me cojo cjuatacun rë me xi cuatjin visiajmihma xuta ladu rë me xi cuacun jan. Vëhë xi cachja me cuitjin:

—Sa xi meje cuetjunxun tsëhë ndiya naha ngatsë rë cjuajjehë xi cachjaj cojo nuju vë ne, <sup>62</sup> ¿mé ningatuhun tacún sa xi chutsujun xi cújaj cjuëneje nga ngahnga hiscan xi cavitejña titjun, ngahan xi Quihndi rë Xuta Jain ngahan? <sup>63</sup> Hasen rë Nina ne, vëhë xi sua cjuahñu. Peru ngu xuta ngasunhndë ne, hatuxa cumaji sahmi me cuatjin. Yëjë ni cjuajjehë xi ngahan cachjaj cojo nuju ne, vëhë sua machaya nuju tsëhë Hasen rë Nina cojo tsëhë cjuahñu xi sua. <sup>64</sup> Peru tjin yahnga ngayun xi manguaain tacún cojo ná. —Cuatjin cachja Jesús ta, tsëhë xi hisca ntsacu cavetsihin ne, ha vëë me yo xuta xi cumanguaain cacun cojo rë me hacuaha ha vëë me yo xi sahmi rë me entregadu.

<sup>65</sup> Hacuaha cachja sa me cuitjin:

—Vëhë xi cuatjin cachjaj cojo nuju xi xuta xi cuma cuisehen me ladu naha ne, suvá ni xuta xi cuichja Nahmi naha xi cuisehen. —Cuatjin cachja Jesús.

<sup>66</sup> Ngatsë rë vëhë xi jemu cjin xuta ladu rë Jesús ne, quiji ngaxtun me, hacuaha ha quihndë catsujiin me cojo Jesús.

<sup>67</sup> Ngajan xi Jesús ne, cavinenguisse me xuta ladu rë me xi tejó jan cuitjin:

—¿Hacuiin cojo ngayun meje cuangunxun? —Cuatjin cavinenguisse me.

<sup>68</sup> Hane Simón Pedru ne, cuitjin cafayangui me:

—Ngayun nai naha, ¿yo cuanguintjenguin?, ta ngayun ne, tjin nuju cjuajjehë xi sua machaya niji tsëhë cjuahñu xatsë.

<sup>69</sup> Hacuaha ngayin ne, mangutacún cojo nuju hacuaha hyin xi tsëhë jain Nina ngayun. —Cuatjin cafayangui Simón Pedru.

<sup>70</sup> Ngajan xi Jesús ne, cuitjin cachja me:

—Handasa ngahan suva cavaxejen nuju ngayujun ni xi tejó ngayun, peru ngajñi nuju ne, jiyajñi ngu xi ha jiya xitsehen xahasen rë. —Cuatjin cachja Jesús.

<sup>71</sup> Jesús ne, tichja me tsëhë ngu cha tsëhë ngajñi rë xi tejó xuta ladu rë me, ngu cha xi hmí rë Judas, quihndi rë Simón Iscariote. Cuatjin cachja me ta, tsëhë xi cha vëhë sahmi cha me entregadu cojo condra rë me.

## 7

*Jesucristu cojo xicjin me*

<sup>1</sup> Xi cavatju vëhë ne, catsujyihya Jesús ngujo nandya tsëhë distritu Galilea. Mijí tsujyihya me nandya xi siu ladu tsëhë distritu Judea ta, tsëhë xi xutaxa rë yungun ne, tivanguise me Jesús xi tsiquehen me. <sup>2</sup> Quihndë ne, ha camatiña suhi tsëhë Ndihya Tsjian, suhi xi sahmi xuta tjë rë Israel. <sup>3</sup> Ngajan xi me xi xicjin Jesús jan ne, cuitjin cachja me cojo Jesús:

—Tihin ngajan distritu Judea, cojo sa xi hacuaha cojo xuta ladu riji xi siu jan ne, scuëë me xcusun xi nihñi ta <sup>4</sup> tsëhë xi ngu cha xi meje rë xi cumachaya rë xuta xcusun xi sahmi cha ne, hacuiin táha hma sahmi cha. Ngaye ta cuatjin jemu nihñi cjuandaja ne, ningacuin rë yëjë xuta cjuandaja vëhë. —Cuatjin cachja xicjin Jesús cojo rë me ta, <sup>5</sup> tsëhë xi me xi cuacun vë ne, camanguaain cacun me cojo Jesús.

<sup>6</sup> Ngajan xi Jesús ne, cuitjin cafayangui me:

—Cjëë cuechú nixtin xi sahme mé xi sahme. Peru ngayun ne, tu mé ni nixtin ne, ndatjin xi cuma nuju. <sup>7</sup> Ngayun ne, cumaji choho scuëë nuju xuta, peru ngahan ne, choho vëë ná me ta, tsëhë xi ngahan ne, chjá cjuaquixi xi xcusun xi sahmi me ne, hatuxa tsehen. <sup>8</sup> Tángun ni ngayun ta ngahan ne, cjuen suhi vëhë. Cjuen ta cjëë cuetjucaa nixtin xi sahme mé xi sahme. —Cuatjin cafayangui Jesús.

<sup>9</sup> Xi cavatju cachja me cojo xicjin me cjua vëhë ne, cavéjña ni me nangui rë me.

### *Quiji Jesucristu suhi tsëhë Ndihya Tsjian*

<sup>10</sup> Hane xi cavatju quiji xicjin Jesús suhi jan ne, hacuaha cojo Jesús quiji me. Peru hacuiin táha tsejen ta sacuaha xi táha hma quiji me. <sup>11</sup> Hya xi camá ne, xutaxa rë yungun jan ne, cavanguise me Jesús hiscan jima suhi jan. Cuitjin cavinenguise me:

—¿Jani tacun cha vëhë? —Cuatjin cavinenguise me.

<sup>12</sup> Hane xutacjín jan ne, jercu visiajmihma me ngajñi rë me tsëhë Jesús. Ngujo me ne, cuitjin cachja me:

—Ngu xuta ndaja me. —Cuatjin cachja me.

Peru ngujo nga xuta ne, cuitjin cachja me:

—¡Éya, vindacha cha xutacjín! —Cuatjin cachja me.

<sup>13</sup> Peru tsajin hisca ngu xuta xi cachjatë me tsëhë Jesús ta, tsëhë xi tsacjun me xutaxa rë yungun.

<sup>14</sup> Quihndë ne, hya xi camavasen tijima suhi jan ne, quiji Jesús yungun xi matitjun, sehe cavetsihin cavicuya me xuta cjua rë Nina. <sup>15</sup> Hane xutaxa rë yungun jan ne, quijircun rë me xi cuatjin jemu ndaja chja Jesús. Cuitjin cachja me ngajñi rë me cojo xicjin me:

—¿Hacutjin má xi cuarcu vechú cjuatacun rë cha vë xi hisca hacuiin cavutaya cha? —Cuatjin cachja me.

16 Ngajan xi Jesús ne, cuitjin cachja me cojo xutaxa rë xi cuacun jan:

—Cjua xi vicuyá rë xuta ne, hacuiin cjua naha suva ta cjua rë me xi catsingatju ná. 17 Sa xi ngu xuta meje sahmi me sacuatjin xi meje rë me xi catsingatju ná ne, ngajan sacú cumachaya rë me tsëhë cjua xi vicuyá, ¿há xi tsëhë Nina ne? o ¿há xi nduva tsëhë cjuatacun naha suva? 18 Xuta xi chja me cjua xi nduva tsëhë cjuatacun rë suvá me ne, meje sahmi jyë sahmi hnga suvá me yojo rë me. Peru xuta xi meje sahmi jyë sahmi hnga me me xi catsingatju rë me ne, me vëhë ne, quixi me cojo cjua rë me hacuaha tsajin cjuatsehen cahntsua xahasen rë me.

19 Moisés ne, casua nuju me ley rë Nina, peru hisca ngu ngayun nihñuchuun sacuatjin chja ley vëhë. ¡Tsëhë vëhë rë xi meje nicuhun ná! —Cuatjin cachja Jesús.

20 Ngajan xi xutacjín jan ne, cuitjin cafayangui me:

—¿Yo xitsehen xi cachja cojo nuju? ta nguehe ne, tsajin yo xi meje tsiquehen nuju. —Cuatjin cafayangui xutacjín jan.

21 Hane xi cafayangui Jesús ne, cuitjin cachja me:

—Ngayujun ni ngayun ne, quijircun nuju ngatsë rë ngu xcusun xi casahme nixtin xi chjahájenda rë. 22 Peru suvá Moisés hacuaha cavejña me xcusun xi xtí chuxin rë quihndi xihin. (Xi cjuaquixi ne, hacuiin Moisés ta xutachanga nuju xi cavejña me xcusun vëhë.) Hane vëhë xi ngayun ne, vichun chuxin rë quihndi xihin handasa nixtin xi chjahájenda rë.

23 Sa xi vichun chuxin rë quihndi xihin nixtin xi chjahájenda rë cojo sa xi nihñuchuhun sacuatjin cjua xi chja ley rë Moisés ne, ¿mé má cuatjin ma cjan nuju cojo ná xi casahme xi camandaja camahani ngu xuta nixtin xi chjahájenda rë ni?

24 Ha quihndë hacuiin tujyë nichuvun ná ta nichuvun ná cojo ngu cjuatacun xi cjuaquixi. —Cuatjin cachja Jesús.

*¿Jani hiscan canduva Jesucristu?*

25 Ngajan xi ngujo xuta nandya Jerusalén ne, cuitjin cachja me ngajñi rë me:

—¿Hacuiin me vihi xi vinchise rë xi cueya ni? 26 Peru chutsujun ta cuajyih me secun me tichja tichja me cojo xuta, hane ndastu ngu cjua chja xutaxa rë cojo rë me. ¡Hyaan sa xi vëëndaja xutaxa rë xi me vihi xi catsingatju jain Nina me! 27 Me vihi ne, ha hyan jani canduva me, peru hya xi cuinduva me xi Nina tsingatju rë ne, tsajin yo vëë jani cuetju me cuinduva me. —Cuatjin cachja xuta xi cuacun jan.

28 Ngajan xi Jesús ne, xi quijinduju sa cavicuya me xuta ngajan yungun xi matitjun ne, jercu hñu cachja me cuitjin:

—¿Há quixi xi hyun ná hacuaha hyun jani canduva? Peru ngahan ne, hacuiin cjuatacun naha suva xi canduva. Me

xi catsingatju ná ne, hatuxa quixi me cojo cjuá rë me, peru ngayun ne, hyúun me. <sup>29</sup> Ngahan ne, hvë me ta, tsëhë xi hiscan tacun me ne, ngajan canduvá. Hacuaha me vëhë catsingatju ná me. —Cuatjin cachja Jesús.

<sup>30</sup> Tsëhë xi cuatjin cachja Jesús cjuá vëhë ne, vëhë xi meje cjuaha xuta xi cuacun jan me. Peru tsajin yo xi cavetahatsja rë me ta, tsëhë xi cjëë cuetjucaa nixtin xi cuatjin cuma. <sup>31</sup> Hane jemu cjin xuta ngajni rë xutacjin jan ne, camangu cacun me cojo Jesús. Cuitjin cachja me:

—Hya xi cuinduva me xi Nina tsingatju rë ne, ¿há hitsë sa cjin cjuarcun sahmi me xi cuma rë cjuarcun xi casahmi me vihi? —Cuatjin cachja xuta xi cuacun jan.

### *Catsingatju xutaxa rë yungun cha xi cjuaha rë Jesucristu*

<sup>32</sup> Hane ngujo cha fariseo ne, cahndë cha xi visiajmihma xutacjin jan ngajni rë me cojo xicjin me cjuá vëhë. Ngajan xi yëjë ni nahmi xi matitjun cojo cha fariseo jan ne, catsingatju me mayu cojo nisë rë cha xi chjahá rë Jesús. <sup>33</sup> Hane Jesús ne, cuitjin cachja me:

—Ngujo nixtin sa xi cuitejña cojo nuju, sehe cúa cjuë nga hiscan tacun me xi catsingatju ná. <sup>34</sup> Ngayun ne, cuinchunsun ná, peru sacuiin nuju ngahan ta, tsëhë xi hiscan xi cuitejña ne, cumaji cuangun. —Cuatjin cachja Jesús.

<sup>35</sup> Ngajan xi xutaxa rë jan ne, cavinenguise xicjin me cuitjin:

—¿Jani cjue cha xi cuijyihí vi xi sacuiin naja cha? ¿Há cjue cha ngu nanguí cjin, cjue tjengui cha xuta naja xi cavitsojo ngajni rë xutaxín hane ngajan cuicuya cha xutaxín jan ni? <sup>36</sup> ¿Mé vijne cjuá xi chja cha xi cuinchaseen cha ne, sacuiin naja cha, tsëhë xi hiscan cuejña cha ne, cumaji cuanguen? —Cuatjin cavinenguise xicjin xutaxa rë jan.

### *Nandá xi sua cjuahñu*

<sup>37</sup> Quihndë ne, nixtin xi cajnetaha suhi jan ne, vëhë nixtin jyë tsëhë suhi jan. Hane casecun Jesús cachjahñu me cojo xuta cuitjin:

—Sa xi tjin yo xi xinda rë ne, catinduva tjengui ná catihi. <sup>38</sup> Xuta xi mangucacun me cojo ná ne, cuatju me sacuatjin chja xujun rë Nina xi chja cuitjin: “Cuetju tsëhë xahasen rë me sacuaha nandá xi ña vangatë xi sua rë me cjuahñu xatsë.” —Cuatjin cachjahñu Jesús.

<sup>39</sup> Xi cuatjin cachja Jesús ne, cachja me tsëhë Hasen rë Nina xi sehe sacú rë xuta xi mangucacun me cojo Jesús. Cuatjin cachja Jesús ta, tsëhë xi Nina ne, cjëë sua me Hasen rë me, tsëhë xi Jesús ne, cjëë cuma jyë cuma hnga me cojo Hasen rë me.

*Hacuiin ngu ni cjuatacun catsingataha cacun xutacjín*

40 Hane xi cahndë xutacjín jan cjua vëhë ne, ngujo me ne, cuitjin cachja me:

—Me vëhë ne, cjuaquixi xi me vëhë profeta xi jemu nechanyan rë. —Cuatjin cachja ngujo me.

41 Hane ngujo nga me ne, cuitjin cachja me:

—Me vëhë xi Tsingatju Nina. —Cuatjin cachja me.

Peru ngujo nga me ne, cachja me cuitjin:

—¡Peru Me xi Tsingatju Nina ne, hacuiin ngajñi rë xuta Galilea cuetjujñi me! 42 ¡Ha hyan xi xujun rë Nina ne, chja ta Me xi Tsingatju Nina ne, cuinduva me tsëhë tjë rë xutachanga naja David, ngajan Belén hiscan nangui rë David! —Cuatjin cachja me xi cuacun jan.

43 Cuatjin camá xi ngatsë rë Jesús ne, hacuiin ngu ni cjuatacun catsingataha cacun xutacjín jan. 44 Vëhë xi ngujo xuta jan ne, meje cjuaha me Jesús cjuecojo me ndavaya. Peru tsajin yo xi cavetahatsja rë me.

*Camanguaain cacun xutaxa rë cojo Jesucristu*

45 Hya xi camá ne, mayu cojo nisë rë cha ne, cavuya quiji nga cha xcun nahmi xi matitjun cojo xcun cha fariseo xi cuacun jan, hane xutaxa rë xi cuacun jan ne, cuitjin cachja me cojo mayu jan:

—¿Mé má canduvuun cojo cha? —Cuatjin cachja me.

46 Ngajan xi cha mayu cojo nisë rë cha jan ne, cuitjin cafayangui cha:

—¡Cjëë camahani cuinuhyin xi chja ngu xuta sacuatjin chja me vëhë! —Cuatjin cafayangui cha.

47 Hane cha fariseo jan ne, cuitjin cachja cha cojo cha xi cuacun jan:

—¡Tu ma rë sa xi cojo ngayun camandacha ngayun!

48 ¡Ngayun ne, hyun ta hisca ngu xutaxa rë, hisca xi ngu xuta fariseo ne, cjëë cumangu cacun me cojo cha xi cuajyihí vë!

49 Peru xutacjín xi cuacun hisca hvíin hacutjin chja ley rë Moisés ne, ¡mijí rë Nina me! —Cuatjin cachja cha fariseo jan.

50 Ngajan xi ngu cha fariseo xi hmí rë Nicodemo, cha xi quiji tjengui rë Jesús hatsëë ne, cuitjin cachja cha cojo cha xi cuacun vëhë:

51 —Chja ley naja ta cumaji nihña castigu ngu xuta xi cjëë cuinuhyan mé cuichja me hacuaha sacú naja cjuaquixi mé casahmi me. —Cuatjin cachja cha Nicodemo.

52 Ngajan xi cha fariseo xi cuacun jan ne, cuitjin cafayangui cha:

—¿Hacuaha cojo ngayun má ngayun xuta rë distritu rë Galilea ni? Chutayun xujun rë Nina ne, sehe ngajan sacú

cumachaya nuju ta ngajan Galilea ne, cuetjinjñii hisca ngu profeta. —Cuatjin cafayangui cha fariseo xi cuacun jan.

*Chjuun xi cachjahá rë xcun cjuatsehen xi tisahmi*

<sup>53</sup> Hya xi camá ne, jima ngu xuta jan cafe me ndava me.

## 8

<sup>1</sup> Peru Jesús ne, cavetju me quiji me ndetjún Olivu. <sup>2</sup> Hane xi casahasen camá nchujun jan ne, cavuya quiji nga Jesús ndatsen yungun xi matitjun. Hane yějě xuta jan ne, casah-mitiña me tséhě Jesús. Hane xi quiji cavějña Jesús ne, sehe cavetsihin cavicuya me xuta jan. <sup>3</sup> Ngajan xi ngujo cha vicuya cjuachacun cojo ngujo cha fariseo ne, cafehecojo cha ngu chjuun xi cachjahá rë na xcun cjuatsehen xi tisahmi na cojo ngu xihin xi hacuiin xihin rë na. Hane cha xi cuacun jan ne, quiji caviseacun cha na ngajñi rë xuta hiscan tacun Jesús, <sup>4</sup> sehe cachja cha cojo Jesús cuitjin:

—Maestro, chjuun vihi ne, cachjahá rë na xcun cjuatsehen xi tisahmi na cojo ngu xihin xi hacuiin xihin rë na. <sup>5</sup> Quihndě ne, xcun ley xi cavejña naja Moisés ne, cavitexa me xi tu yo ni xuta xi sahmi xcusun vėhě ne, cueya me cojo ndyojo. Ngayun ne, ¿mé xi cuinújun? <sup>6</sup> —Cuatjin cavinenguisse cha xi cuacun vėhě, xi tifahachuva cha Jesús, cojo sa xi sacú rë cha chuva rë xi cuinchajyě cha me.

Ngajan xi Jesús ne, catsiquindi me yojo rë me, sehe cavetsihin catsihindu me nangui cojo rcutsja me. <sup>7</sup> Hane tséhě xi cjuinduju sa tivinenguisse cha xi cuacun jan Jesús ne, catsinguixi me yojo rë me, sehe cachja me cojo cha cuitjin:

—Tu jarě ni ngayun xi tsajin jyě nuju ne, ngayun tjun tjun tetuhun rë na ndyojo. —Cuatjin cachja Jesús.

<sup>8</sup> Hane sehe catsiquindi nga me yojo rë me, hane catsihindu sa me nangui. <sup>9</sup> Hane xi cahndě cha xi cuacun jan xi cuatjin cachja Jesús ne, ta vėě me xi hacuiin tyjahi cjuatacun rë me, chuva ngu chuva ngu cha cavetju cha cafe cha. Cavetsihin cavetju tjun tjun cha xi hitsě sa changá. Hane camá suvá sa Jesús, cojo chjuun xi secun ngajñi rë xutacjín jan. <sup>10</sup> Hane xi catsinguixi me yojo rë me ne, cavinenguisse me chjuun jan cuitjin:

—Ngayun chjuun, ¿jarě me ne? ¿Há tsajin yo xi casahmi nuju castigu? —Cuatjin cavinenguisse Jesús.

<sup>11</sup> Ngajan xi chjuun jan ne, cuitjin cafayangui na:

—Tsajin yo, tatá. —Cuatjin cafayangui na.

Ngajan xi Jesús ne, cuitjin cachja me:

—Ngahan ne, hacuaha sahme nuju castigu. Cuma cuangun, peru ha quihndě xicanihñuu sa cjuatsehen. —Cuatjin cachja Jesús.

*Jesucristu ne, sacuaaha hasen xi cuma rë xuta*

<sup>12</sup> Hya xi camá ne, cachja nga Jesús cojo xutacjín jan cuitjin: —Ngahan ne, sacuaaha hasen xi cuma rë xuta ngasunhdë ngahan. Xuta xi cuisehen me ladu naha ne, hatuxa cuiyijin me ngajñi jñú ta ngajñi hasen xi sua cjuahñu xatsë cuiyuju me. —Cuatjin cachja Jesús.

<sup>13</sup> Ngajan xi cha fariseo xi cuacun jan ne, cuitjin cachja cha cojo Jesús:

—Ngayun ne, tinújun favor nuju suvun. Vëhë xi cjua xi nújun ne, tsajin rë cjuaquixi. —Cuatjin cachja cha.

<sup>14</sup> Hane xi cafayangui Jesús ne, cuitjin cachja me:

—Handasa chjá favor naha suva ne, cjua xi chjá ne, cjuaquixi ta, tsëhë xi ngahan ne, hvë jani canduva hacuaha hvë jani cúa cjuë nga. Peru ngayun ne, hyúun jani canduva hacuaha hyúun jani cúa cjuë nga. <sup>15</sup> Ngayun ne, xi nichuvun xuta cojo cjuatacun rë me ne, chuva xi tsingatahacacun xuta ngasunhdë ne, cuatjin ningatuhuntacún. Ngahan ne, titsichuvaan hisca ngu xuta cojo cjuatacun rë me. <sup>16</sup> Peru sa xi tsichúva ngu xuta ne, hatuxa cjuaquixi cjua xi cuichjá ta, tsëhë xi hacuiin suva sahme ta ngahan cojo me xi catsingatju ná nihñi tangun. <sup>17</sup> Xcun ley xi vitexa nuju ne, hacuaha camahindu xi hya xi jo xuta sua me cjuaquixi rë me xcun xutaxa rë hane ngu tangun ni cjua chja me ne, cjuaquixi cjua xi chja me. <sup>18</sup> Ngahan xi chjá favor naha suva, hane Nahmi naha xi catsingatju ná me ne, hacuaha cojo me chja me favor naha. —Cuatjin cafayangui Jesús.

<sup>19</sup> Ngajan xi cha fariseo jan ne, cuitjin cavinenguisse cha Jesús:

—¿Jani tacun nahmi nuju ni? —Cuatjin cavinenguisse cha.

Hane Jesús ne, cuitjin cafayangui me:

—Hacuiin ngahan hyun ná ne, hacuiin Nahmi naha hyun me. Sa xi ngahan hyun ná ne, hacuaha hyun Nahmi naha. —Cuatjin cafayangui Jesús.

<sup>20</sup> Cjua vëhë ne, cachja Jesús hya xi tivicuya me xuta ngajan yungun xi matitjun, ngu ndihya hiscan xi siu alcancía. Peru hisca ngu xuta cafaain rë me, tsëhë xi cjëë cuetjucaa nixtin xi cuatjin cuma.

*“Cumaji cuangun hiscan xi cjuë”, chja Jesucristu*

<sup>21</sup> Hya xi camá ne, quiijinduju sa cachja Jesús cojo xuta cuitjin:

—Ngahan ne, cuétju cjuë, hane ngayun ne, cuinchunsun ná. Peru ngatsë rë cjuatsehen xi cún ngayun ne, cuechuun xcun Nina hya xi cueyun. Hiscan xi cjuë ne, ngayun ne, cumaji cuangun. —Cuatjin cachja Jesús.

<sup>22</sup> Ngajan xi xutaxa rë xi cuacun jan ne, cuitjin cachja me ngajñi rë me cojo xicjin me:

—Tu ma rë sa xi cjue tsiquehen suvá me yojo rë me xi cuatjin chja me xi hiscan cjue me ne, cumaji cuanguen. —Cuatjin cachja xutaxa rë xi cuacun jan.

<sup>23</sup> Ngajan xi Jesús ne, cuitjin cachja me cojo me xi cuacun vë:

—Ngayun ne, tsëhë nguehe nangui ngayun. Ngahan ne, tsëhë ngahnga ngahan. Ngayun ne, tsëhë ngasunhndë vihi ngayun. Ngahan ne, hacuiin tsëhë ngasunhndë vihi ngahan.

<sup>24</sup> Vëhë xi cuatjin cachjá cojo nuju xi ngatsë rë cjuatsehen xi cún ngayun ne, cuechuun xcun Nina hya xi cueyun. Sa xi macjaain nuju xi Ngahan Vi, hmí ná ne, ngatsë rë cjuatsehen xi cún ngayun ne, cuechuun xcun Nina hya xi cueyun. —Cuatjin cachja Jesús.

<sup>25</sup> Ngajan xi xuta xi cuacun jan ne, cavinenguise me Jesús cuitjin:

—¿Yo ngayun ni? —Cuatjin cavinenguise me.

Hane Jesús ne, cuitjin cachja me:

—¡Sacuatjin cachjá cojo nuju hisca ntsacu cavetsihin!

<sup>26</sup> Jemu tjin ná cjua xi cuichjá tsujun, hacuaha jemu tjin xi cjuaháchuva tsujun. Peru me xi catsingatju ná ne, quixi jain me cojo cjua rë me, hane ngahan ne, cjua xi cáhndë xi cachja me ne, cjua vëhë xi chjá nguehe ngasunhndë. —Cuatjin cachja Jesús.

<sup>27</sup> Peru xutaxa rë xi cuacun jan ne, cajñii rcu me xi Jesús ne, tsëhë Nina Nahmi naja xi tichja me. <sup>28</sup> Vëhë xi Jesús ne, cuitjin cachja me:

—Hya xi ngayun chjunihngun ná ngahan xi Quihndi rë Xuta Jain ngahan ne, hya cuijne rcun xi Ngahan Vi hmí ná. Hane ngahan ne, hatuxa tsajin mé xi sahme xi cojo cjuatacun naha suva ta sacuaha cjua xi cachja Nahmi naha cojo ná ne, cjua vëhë xi chjá. <sup>29</sup> Hacuaha me xi catsingatju ná ne, tacun me cojo ná, cavejñaai ná me xi suva ta, tsëhë xi ngahan ne, hatuxa sahme tutjin xi chuya rë me. —Cuatjin cachja Jesús.

<sup>30</sup> Hane xi cachja Jesús cjua vëhë ne, jemu cjín xuta camangu cacun me cojo rë me.

### *Cuëhëndaya naja cjuaquixi*

<sup>31</sup> Ngajan xi Jesús ne, cachja me cuitjin cojo xutaxa rë yungun xi camacjain rë tsëhë cjua rë me:

—Sa xi ngayun cuangun nduju xi quitahá rcun cjua naha ne, quixi xi ha camá ngayun xuta ladu naha. <sup>32</sup> Hacuaha cuijne rcun xi hmí rë cjuaquixi, hane cjuaquixi jan ne, cuëhëndaya nuju. —Cuatjin cachja Jesús.



<sup>33</sup> Ngajan xi xutaxa rë xi cuacun jan ne, cuitjin cafayangui me:

—Peru ngayaan ne, tjë rë xutachanga naja Abraham má ngayaan, hane cjëë camahani cuma ngayaan mosu hndixahan rë xuta. ¿Mé má nújun xi cumandaya ngayin? —Cuatjin cafayangui me.

<sup>34</sup> Hane Jesús ne, cuitjin cafayangui me:

—Cuichjá cojo nuju cjuaquixi ta yëjë ni xuta xi hinchá me ndiya rë cjuatsehen ne, hatuxa tjinñu me cojo cjuatsehen sacuatjin tjinñu ngu mosu hndixahan cojo nai rë. <sup>35</sup> Ngu mosu hndixahan ne, hacuiin hatuxa cuiyujuchandë ngajñi xuta xi ndava, peru ngu quihndi xi cjuaquixi ne, hatuxa tsëhë xuta xi ndava. <sup>36</sup> Vëhë xi sa xi Quihndi rë Nina cuëhëndaya nuju ne, cumandaya jain ngayun cojo cjuaquixi. <sup>37</sup> Ngahan ne, hacuaha hvë xi tjë rë Abraham má ngayun. Peru ngayun ne, tivinchun chuva rë xi nicuhun ná, tsëhë xi tuun cahndë xi cuisehen cjua naha cahntsua xahasen nuju. <sup>38</sup> Ngahan ne, xcusun xi cahvë hiscan tacun Nahmi naha ne, tsëhë vëhë xi tichjá. Peru ngayun ne, sacuatjin canuhyun xi cachja nahmi nuju ne, cuatjin tinihñu. —Cuatjin cafayangui Jesús.

<sup>39</sup> Ngajan xi xutaxa rë xi cuacun jan ne, cuitjin cachja me:

—Nahmi niji ne, hacui xutachanga naja Abraham. —Cuatjin cachja me.

Ngajan xi Jesús ne, cuitjin cachja me:

—Sa xi quixi xi quihndi rë Abraham má ngayun ne, sacuatjin casahmi Abraham ne, hacuaha cuatjin nihñu. <sup>40</sup> Ngahan ne, cachjá cojo nuju cjuaquixi xi cáhndë xi cachja Nina, peru quihndë ne, tivinchun chuva rë xi nicuhun ná. Xutachanga naja Abraham ne, casahmii me cuatjin. <sup>41</sup> Ngayun ne, sacuatjin casahmi nahmi nuju ne, hacuanitjin ni tinihñu. —Cuatjin cachja Jesús.

Ngajan xi xutaxa rë xi cuacun jan ne, cachja me cuitjin:

—Ngayin ne, hacuiin quihndi xca ngayin. Nina ne, ngu ni me vëhë xi Nahmi niji. —Cuatjin cachja xutaxa rë xi cuacun jan.

<sup>42</sup> Hane Jesús ne, cuitjin cachja me:

—Sa xi quixi xi Nahmi nuju Nina ne, hacuaha canihñu hmu tacún ná ta, tsëhë xi ngahan ne, Nina catsingatju ná me, hane quihndë ne, nguehe tejña. Ngahan ne, hacuiin cjuatacun naha suva xi canduvá ta me vëhë catsingatju ná me. <sup>43</sup> ¿Mé má vijñii rcun cjua xi chjá? Cuatjin vijñii rcun ta, tsëhë xi caain nuju visiñuju cjua naha. <sup>44</sup> Ngayun ne, quihndi rë nahmi nuju Satanás ngayun, hane xcusun xi meje rë nahmi nuju ne, xcusun vëhë xi meje nihñu. Xitsehen xi matitjun vë ne, hiscantsacu cavetsihin ne, hatuxa tsiquehen vë xuta. Hatuxa tsajin jiya vë ngajñi rë cjuaquixi ta, tsëhë xi tsajin cjuaquixi ngajñi

rë cjuatacun rë. Hya xi chja xitsehen vë cjuandacha ne, chja sacuatjin xcusun rë suvá ta, tsëhë xi hatuxa ndacha, hacuaha nahmi rë yëjë ni cjuandacha. <sup>45</sup> Peru ngahan ne, tsëhë xi chjá cjuaquixi ne, vëhë xi macjaain nuju ngahan. <sup>46</sup> ¿Jarë ngayun xi cuma ninguixun xi ngahan ne, tjin jyë naha? Sa xi chjá xi cjuaquixi ne, ¿mé má macjaain nuju ngahan? <sup>47</sup> Me xi tsëhë jain Nina ne, vetaharcu me cjua rë Nina. Ngayun ne, tsëhë xi hacuiin tsëhë Nina ngayun ne, vëhë xi mijí cuetuhuncun cjua rë me. —Cuatjin cachja Jesús.

*Ngahan Vi hmí rë Jesucristu hisca chaja sa xi tsin Abraham*

<sup>48</sup> Hane xutaxa rë xi cuacun jan ne, cuitjin cachja me cojo Jesús:

—¡Hatuxa cjuaquixi xi nújin hya xi nújin xi ngayun ne, ngu xuta samaritano ngayun hacuaha jiya xitsehen xahasen nuju! —Cuatjin cachja xutaxa rë jan.

<sup>49</sup> Ngajan xi Jesús ne, cuitjin cafayangui me:

—Tsajin xitsehen xahasen naha. Ngahan ne, fahárcun Nahmi naha, hane ngayun ne, choho nújun tsahan. <sup>50</sup> Hacuaha mijí sahme jyë sahme hnga suva yojo naha. Tjin ngu me xi meje sahmi jyë sahmi hnga ná, hane me vëhë ne, tsichuva naja me cojo cjuatacun naja. <sup>51</sup> Cuichjá cojo nuju cjuaquixi ta xuta xi cuihndë me tsëhë cjua naha ne, hatuxa tsajin nu tsajin nixtin xi cueya me. —Cuatjin cafayangui Jesús.

<sup>52</sup> Hane xutaxa rë xi cuacun jan ne, cuitjin cachja me cojo Jesús:

—Quihndë matsejenndaja xi jiya jain xitsehen xahasen nuju. Xutachanga naja Abraham ne, cahme me, hacuaha yëjë profeta ne, cahme me, hane sehe ngayun nújun xi xuta xi cuihndë me tsëhë cjua nuju ne, hatuxa tsajin nu tsajin nixtin xi cueya me. <sup>53</sup> ¡Ja!, peru ¿há hitsë sa matitjun ngayun xi cuma rë xutachanga naja Abraham, me xi cahme ni? ¡Hacuaha cahme yëjë profeta! ¡Ngayun tinihñu yojo nuju sacuaha xi jemu matitjun ngayun! —Cuatjin cachja xutaxa rë jan.

<sup>54</sup> Hane Jesús ne, cuitjin cafayangui me:

—Sa xi sahme jyë sahme hnga suva yojo naha ne, cjua xi cuichjá tsahan ne, cuenguiin camahani chji rë. Peru Nahmi naha, me xi nújun xi Nina nuju ne, me vëhë xi sahmi jyë sahmi hnga ná me. <sup>55</sup> Ngayun ne, hyúun me, peru ngahan ne, hvë me. Sa xi ngahan cuichjá xi hveen me ne, tangun ndacha ngahan cojo nuju ngayun. Peru ngahan ne, hvë me, hacuaha víhndë tsëhë cjua rë me. <sup>56</sup> Xutachanga naja Abraham ne, jemu ndaja camá rë me xi satë rë me xi scuëë me nixtin xi cuinduva ngahan. Hane cavëë jain me, hacuaha jemu sua camá rë me. —Cuatjin cafayangui Jesús.

<sup>57</sup> Ngajan xi xutaxa rë xi cuacun jan ne, cuitjin catsixcuehyu me Jesús:

—Hisca cjëë yachantë nu tjin nuju. ¿Há cahyun xutachanga naja Abraham ni? —Cuatjin cachja me.

<sup>58</sup> Hane Jesús ne, cuitjin cachja me:

—Cuichjá cojo nuju cjuaquixi ta hisca chaja sa xi tsin xutachanga naja Abraham ne, ngahan ne, Ngahan Vi hmí ná. —Cuatjin cachja Jesús.

<sup>59</sup> Vëhë xi xutaxa rë yungun xi cuacun jan ne, cafaha me ndyojo xi cuetaha me Jesús xi meje tsiquehen me. Peru Jesús ne, cavetjuhmá me tsëhë yungun xi matitjun jan.

## 9

### *Camandaja ngu cha rcá casahmi Jesús*

<sup>1</sup> Hya xi camá ne, xi cavatju Jesús ngu cahndë jan ne, cavëë me ngu cha rcá xi ha cuatjin rcá cha hisca hya xi catsin cha.

<sup>2</sup> Hane xuta ladu rë me jan ne, cuitjin cavinenguisse me:

—Maestro, ¿yo casahmi cjuatsehen xi cuatjin rcá cha xi catsin cha? ¿Há suvá cha vihi ne?, o há tsajin ne, ¿há xutacha rë cha? —Cuatjin cavinenguisse me.

<sup>3</sup> Ngajan xi Jesús ne, cuitjin cafayangui me:

—Hacuiin cha vihi ne, hacuiin xutacha rë cha casahmi me cjuatsehen ta cuatjin camá cojo sa xi ngatsë rë cjuandaja xi sahmi Nina cojo cha vihi ne, cumatsejen xa xi sahmi Nina.

<sup>4</sup> Meje rë xi nihña xa rë me xi catsingatju ná jinguyëjë rë xi hasen sa ta cuechú hora xi cumajñu, hane tsajin yo xi cuma sahmi xa. <sup>5</sup> Jinguyëjë rë xi tejña nguehe ngasunhndë ne, sacuaha hasen xi cuma rë xuta ngasunhndë ngahan. —Cuatjin cafayangui Jesús.

<sup>6</sup> Xi cavatju cachja Jesús cjuavëhë ne, sehe cacandi me natya rë me nangui, hane casahmi me hitsë ndasi, sehe catsufë me tuxcun cha rcá jan. <sup>7</sup> Sehe cachja me cojo cha cuitjin:

—Tángun tinchacjun ngajan nda Siloé. —Cuatjin cachja Jesús. (Siloé ne, meje cuichja Caningatjun rë.)

Hya xi camá ne, quiji cha cavinchacjan cha. Xi tu cavuya cafe cha ndava cha ne, ha tsejen rë cha. <sup>8</sup> Ngajan xi xuta xi siu tahndee ndava cha cojo me xi cavëë rë cha xi casahmi cha caridad ne, cavinenguisse xicjin me cuitjin:

—¿Hacuiin cha vëhë xi véjña sahmi caridad jan ni? —Cuatjin cavinenguisse me xi cuacun jan.

<sup>9</sup> Ngujo me jan ne, cuitjin cachja me:

—Juun, hacui cha vë. —Cuatjin cachja me.

Hane ngujo nga me ne, cuitjin cachja me:

—Cuatjin tsejen, peru hacuiin cha. —Cuatjin cachja me.

Hane suvá cha ne, cuitjin cachja cha:

—Ngahan vi. —Cuatjin cachja cha.

<sup>10</sup> Ngajan xi xuta xi cuacun jan ne, cavinenguisse me cha cuitjin:

—¿Hacutjin camá xi camandaja túxcun ngayun? —Cuatjin cachja me.

<sup>11</sup> Ngajan xi cha vëhë ne, cuitjin cafayangui cha:

—Me xi hmí rë Jesús ne, casahmi me hitsë ndasi, sehe catsufë me túxcun, sehe cachja me cojo ná xi cjuë cuínchacjan nda Siloé. Hane xi cëjë cavincháçjan jan ne, camatsejen ná. —Cuatjin cafayangui cha.

<sup>12</sup> Cavinenguisse nga me cha cuitjin:

—¿Jani tacun me ní? —Cuatjin cavinenguisse me.

Hane cha vëhë ne, cuitjin cachja cha:

—Hveen. —Cuatjin cachja cha.

*Fahatáha cha fariseo cha xi camandaja tuxcun*

<sup>13</sup> Ngajan xi xuta xi cuacun jan ne, quijicojo me cha xi sehe camatsejen rë jan hiscan xi siu cha fariseo. <sup>14</sup> Quihndë ne, nixtin xi casahmi Jesús ndasi hane casahmi me xi camandaja tuxcun cha rcá jan ne, nixtin xi chjahájenda rë. <sup>15</sup> Ngajan xi cha fariseo xi cuacun jan ne, hacuaha cavinenguisse cha cha xi camandaja tuxcun jan hacutjin camá xi camatsejen rë cha. Hane cuitjin cafayangui cha:

—Ndasi catsufë me túxcun, sehe cëjë cavincháçjan, hane cama camatsejen ná. —Cuatjin cafayangui cha.

<sup>16</sup> Hane ngujo cha fariseo xi cuacun jan ne, cuitjin cachja cha:

—Me vëhë ne, tsejen xi hacuiin Nina catsingatju rë me, tsëhë xi faharcuaain me nixtin xi chjahájenda rë. —Cuatjin cachja cha.

Peru ngujo nga cha ne, cuitjin cachja cha:

—Cumaji sahmi me cjuarcun xi cuacun vëhë sa xi ngu cha tsehen me. —Cuatjin cachja cha.

Hacuiin ngu tangun ni camá cjua rë cha. <sup>17</sup> Hane ngajan xi cavuya cachja nga cha cojo cha xi camandaja tuxcun jan cuitjin:

—Quihndë ta casahmi me xi camandaja tuxcuin ne, ¿mé noje tsëhë me? —Cuatjin cachja cha.

Hane cha xi camandaja tuxcun jan ne, cuitjin cafayangui cha:

—Ngu profeta me. —Cuatjin cafayangui cha.

<sup>18</sup> Peru xutaxa rë yungun jan ne, macjaain rë me xi titjun ne, rcá cha hane quihndë ne, tsejen rë cha. Hisca xi cajindaya me xutacha rë cha xi camandaja tuxcun jan ne, <sup>19</sup> sehe cafahatáha rë me cuitjin:

—¿Há cha vihi xi quihndi nuju, cha xi nújun xi ha cuatjin rcá hisca hya xi catsin? ¿Hacutjin camá xi quihndë ne, tsejen rë cha? —Cuatjin cafahatáha me.

<sup>20</sup> Ngajan xi xutacha rë cha ne, cuitjin cafayangui me:

—Hyin xi cha vihi xi quihndi niji cha, hacuaha ha cuatjin rcá cha hisca hya xi catsin cha. <sup>21</sup> Peru hyíín hacutjin camá xi quihndë ne, tsejen rë cha. Hacuaha hyíín yo xi casahmi xi camandaja tuxcun cha. Chjinengunsun rë cha ta ha jiya nu rë cha. Suvá cha sua nuju cha cjuaquixi rë cha. —Cuatjin cafayangui me.

<sup>22</sup> Cuatjin cachja xutacha rë cha ta, tsëhë xi tsacjun me xutaxa rë jan ta, xutaxa rë xi cuacun jan ne, ha casahmi tangun me cjua xi yo xi cuichja xi Nina catsingatju me Jesús ne, tsichohotje rë me yungun. <sup>23</sup> Vëhë xi xutacha rë cha ne, cachja me: “Ha jiya nu rë cha ne, chjinengunsun rë cha.”

<sup>24</sup> Vëhë xi cajindaya nga xutaxa rë majo ndiya cha xi camandaja tuxcun jan, hane sehe cachja me cojo cha cuitjin:

—“Vëë Nina”, noje xi cuatjin camá. Ngayin ne, hyin xi me xi casahmi xi camandaja tuxcuin ne, ngu cha tsehen me. —Cuatjin cachja xutaxa rë jan.

<sup>25</sup> Ngajan xi cha vëhë ne, cuitjin cafayangui cha:

—Ngahan ne, hveen sa xi ngu cha tsehen me. Ngu xcusun ni xi hvë ne, titjun ne, rcá ngahan, peru quihndë ne, tsejen ná. —Cuatjin cafayangui cha.

<sup>26</sup> Hane xutaxa rë jan ne, cavinenguisse me cha cuitjin:

—¿Mé casahmi me cojo ri? ¿Hacutjin casahmi me xi camandaja tuxcuin? —Cuatjin cavinenguisse me.

<sup>27</sup> Hane cha vëhë ne, cuitjin cafayangui cha:

—Ha cachjá cojo nuju ne, mijí cuetuhuncun. ¿Mé má meje cuisñuju nga ngundiya? ¿Há cojo ngayun meje cuisuhun ladu rë me? —Cuatjin cafayangui cha.

<sup>28</sup> Hane xutaxa rë jan ne, cacjan me cojo cha, cuitjin cachja me:

—¡Ngaye xi ladu rë cha vëhë má ngaye! ¡Ngayin ne, ladu rë Moisés má ngayin! <sup>29</sup> Ngayin ne, hyin xi Moisés ne, cachja me cjua xi casua Nina me, peru cha vëhë ne, hisca hyíín jani cavetju cha canduva cha. —Cuatjin cachja me.

<sup>30</sup> Ngajan xi cha vëhë ne, cuitjin cafayangui cha:

—¡Jemu sihya xi ngayun ne, hyúun jani cavetju me canduva me, handasa casahmi me xi camandaja túxcun ngahan! <sup>31</sup> Ha hyan ta Nina ne, fahacuendaain me cjua xi chja xuta tsehen. Peru sa xi ngu xuta faharcun me Nina hacuaha sahmi me hacutjin xi meje rë Nina ne, me vëhë ne, fahacuenda Nina cjua xi chja me. <sup>32</sup> Cjëë camahani cuinuhya rë xi ngu xuta sahmi me xi mandaja tuxcun ngu xuta xi rcá me hisca hya

xi catsin me. <sup>33</sup> Sa xi hacuiin Nina catsingatju rë me vëhë ne, tsajin camahani mé xi cuma sahmi me. —Cuatjin cafayangui cha.

<sup>34</sup> Ngajan xi xutaxa rë jan ne, cuitjin cachja me:

—¡Ngaye ne, ngajñi rë cjuatsehen camahani catsin ngaye!  
¡Machjiriin camahani ngaye xi cuicoye niji! —Cuatjin cachja me.

Sehe cavaxë me cha candatsen.

### *Xuta xi jñu tsëhë me*

<sup>35</sup> Hya xi camá ne, camachaya rë Jesús xi cavaxë xutaxa rë yungun cha xi camandaja tuxcun jan candatsen. Hane xi casacu xicjin Jesús cojo cha ne, cachja me cojo cha cuitjin:

—¿Há mangutacún ngayun cojo me xi Quihndi rë Xuta Jain?  
—Cuatjin cachja me.

<sup>36</sup> Hane cha vëhë ne, cuitjin cafayangui cha:

—Tatá, tinújun cojo ná yo me vë ne, cojo sa xi cumangu cáacun cojo rë me. —Cuatjin cafayangui cha.

<sup>37</sup> Ngajan xi Jesús ne, cuitjin cachja me cojo cha:

—Ngayun ne, ha cahyun me ta, ngahan xi tichjá cojo nuju vi ne, ha ngahan xi Quihndi rë Xuta Jain ngahan. —Cuatjin cachja me.

<sup>38</sup> Hane cha vëhë ne, cuitjin cachja cha:

—Mangucáacun, Tatá. —Cuatjin cachja cha, sehe cafaharcun cha me.

<sup>39</sup> Ngajan xi Jesús ne, cuitjin cachja me:

—Canduvá ngahan ngasunhdë vi ne, xi tsichúva xuta cojo cjuatacun rë me, sehe ngajan xi xuta xi cjëë ndaja cuijne rcu me cjua rë Nina ne, cuijnercundaja me, hane xuta xi cuenda chja me xi jemu ndaja vijne rcu me cjua rë Nina ne, cumajñu tsëhë me. —Cuatjin cachja Jesús.

<sup>40</sup> Hane ngujo cha fariseo xi hinchacun tiña hiscan secun Jesús ne, cahndë cha cjua vëhë, hane cuitjin cachja cha:

—¿Peru hacuiin cojo ngayin jñu tsijin? —Cuatjin cachja cha.

<sup>41</sup> Ngajan xi Jesús ne, cuitjin cachja me:

—Sa xi jñu tsujun ne, tsajin jyë nuju. Peru quihndë xi nújun xi hacuiin jñu tsujun ne, ngajan matsejen xi tjin jyë nuju. —Cuatjin cachja Jesús.

## 10

### *Ejemplu tsëhë paxtu rë chu tsánga*

<sup>1</sup> Ngajan xi Jesús ne, cachja sa me cuitjin:

—Cuichjá cojo nuju cjuaquixi ta xuta xi visiin me táha tingotjo hnchua rë chu tsánga ta tu táha xín mijisun me hnchua ne, me vëhë ne, chëjë me hacuaha fahatahá cjuachan me.

<sup>2</sup> Peru me xi visehen táha tingotjo hnchua ne, me vëhë xi paxtu rë chu tsánga. <sup>3</sup> Cha xi quitahá cuidadu rë tingotjo hnchua ne,

vuxaha cha tingotjo tsëhë me vëhë. Chu tsánga ne, vihndë chu xta rë me, hane jindaya me chu xi tsëhë me, jimangu chu cojo ñihi rë chu, sehe vaxë me chu. <sup>4</sup> Hane hya xi ha cavaxë me yëjë chu xi tsëhë me ne, sehe cjui titjun me, hane chu tsánga ne, fitjengui chu me, tsëhë xi vëë chu xta rë me. <sup>5</sup> Peru jingu sa xuta ne, hatuxa cjuiin tjenguiin chu me ta tu cuanga chu tsëhë me, tsëhë xi hvíin chu xta rë jingu sa xuta jan.

<sup>6</sup> Cuatjin cachja Jesús ejemplu vëhë cojo xuta xi cuacun vë, peru cajni rcu me mé vijne cjuia xi cachja Jesús.

*Sacuaha paxtu rë chu xi ndaja sahmi cuidadu rë chu má Jesucristu*

<sup>7</sup> Jesús ne, cachja sa me cojo xutaxa rë xi cuacun jan cuitjin: —Cuichjá cojo nuju cjuaquixi ta ngahan ne, sacuaha tingotjo xi vatju chu tsánga ngahan. <sup>8</sup> Yëjë ni cha xi cavetjuñi ngajñi rë xuta xi meje cumatitjun cha hya xi chaja sa cjuëhë ngahan ne, sacuaha cha chëjë cha, cha fahatahá cjuachan cha. Peru xuta ladu rë Nina ne, casahmicuendaain me cha, sacuatjin rë chu tsánga xi fitjenguiin chu jingu sa xuta. <sup>9</sup> Ngahan ne, sacuaha tingotjo ngahan. Sa xi ngu xuta cuisehen me táha tingotjo jan ne, cuetjutje me. Hacuaha tsajin mé cumacjín cacun me cuetju cuisehen me jan, hane tsajin mé cuma chaja rë me. <sup>10</sup> Cha chëjë ne, xi vinduva cha ne, suvá ni xi tsichëjë cha, tsiquehen cha, hacuaha tsinguetsun cha. Peru ngahan ne, canduvá cojo sa xi sacú rë xuta cjuahñu xatsë, hacuaha jercu sacú camahani rë me cjuahñu vëhë.

<sup>11</sup> 'Ngahan ne, sacuaha paxtu rë chu xi jemu ndaja fahácuenda chu tsánga. Paxtu ndaja jan ne, hisca sua me yojo rë me xi cueya me ngatsë rë chu tsánga. <sup>12</sup> Ngu mosu xi hacuiin paxtu rë chu má cha, hacuiin tsëhë cha chu tsánga ne, xi scuëë cha xi nduva tiña chu lobo ne, viyujutahá ni cha chu tsánga jan, hane vanga cha. Hane chu lobo jan ne, faha chu ngujo chu tsánga, sehe tsicangacojo chu chu xi yahnga jan tu nguehe tu ngajan. <sup>13</sup> Cuatjin sahmi cha ta, tsëhë xi mosu ni má cha, hane marcuaain rë cha tsëhë chu tsánga. <sup>14-15</sup> Ngahan ne, sacuaha paxtu ndaja jan ngahan. Sacuatjin vëë ná Nahmi naha hane ngahan ne, hvë Nahmi naha ne, ha chuva vëhë ni ne, ngahan ne, hvë chu tsahan hane chu tsahan ne, vëë chu ngahan. Hacuaha suá yojo naha xi cueya ngatsë rë chu. <sup>16</sup> Tjin sa ná chu tsánga xi hacuiin tsëhë hnchua vihi chu. Chu xi cuacun vë ne, hacuaha meje rë xi sahme chu cuidadu. Xi cuihndë chu xta naha ne, cuinduvatjengui chu ngahan, hane cuma tangun chu cojo chu xi ha tisahme cuidadu, hacuaha ngu ni ngahan xi paxtu rë chu.

<sup>17</sup> 'Ngahan ne, hmu cacun ná Nahmi naha, tsëhë xi suá yojo naha xi cueya, hane sehe sahme xi cúya nga cjuahñu. <sup>18</sup> Tsajin

yo xi cjuahatahá cjuahñu naha ta ngahan ne, cojo cjuatacun naha suva suá yojo naha xi cueya. Tjin ná chuva rë xi suá yojo naha, hacuaha tjin ná chuva rë xi sahme xi cúa nga cjuahñu. Cuatjin cavitexa ná Nahmi naha xi sahme. —Cuatjin cachja Jesús.

<sup>19</sup> Hya xi camá ne, ngu ndiya nga hacuiin ngu tangun ni camá nga cjua rë xutaxa rë jan ngatsë rë cjua vëhë. <sup>20</sup> Hane jemu cjin me xi cuacun jan ne, cuitjin cachja me:

—¡Jiya xitsehen xahasen rë cha, vëhë xi sca rë cha! ¡Venguiin chji rë xi cuatjin visiñuju cjua rë cha! —Cuatjin cachja me.

<sup>21</sup> Peru yahnga nga me ne, cuitjin cachja me:

—Cjua vëhë ne, hacuiin cjua rë ngu xuta xi jiya xitsehen xahasen rë me. ¿Ngu xitsehen ne, cumaji sahmi xi cumandaja tuxcun ngu xuta xi rcá me? —Cuatjin cachja yahnga me jan.

### *Tsitjungui xutaxa rë yungun Jesucristu*

<sup>22</sup> Quihndë ne, hya xi cavechú nixtin rë chan hnchan ne, camá suhi rë yungun xi matitjun ngajan Jerusalén. <sup>23</sup> Hane Jesús ne, tsujihiya me ndatsen yungun xi matitjun, ngajan Ngahma Ndihya tsëhë Salomón. <sup>24</sup> Hane xutaxa rë yungun jan ne, quiji caxinchacunndee me Jesús, sehe cachja me cojo me cuitjin:

—¿Jani hisca hya tuhun niji cjuaquixi? Sa xi ngayun jain xi tsingatju Nina ngayun ne, tinúnquixun cojo niji. —Cuatjin cachja xutaxa rë jan.

<sup>25</sup> Ngajan xi Jesús ne, cuitjin cafayangui me:

—Ha cachjá cojo nuju, peru macjaain nuju. Xcusun xi tisahme sacuatjin tivitexa ná Nahmi naha ne, xcusun vëhë ni tsingacun yo ngahan. Peru ngayun ne, macjaain nuju, <sup>26</sup> tsëhë xi hacuiin xuta ladu naha má ngayun. <sup>27</sup> Xuta xi ladu naha má me ne, tangun me sacuaha chu tsánga. Me xi cuacun vë ne, vëe me xta naha, hacuaha ngahan ne, hvë me, hane fitjengui ná me. <sup>28</sup> Ngahan ne, suá rë me cjuahñu xatsë, hane hatuxa tsajin nu tsajin nixtin xi cjue hasen rë me xcun cjuañihi, hacuaha tsajin yo cuaxëxin rë me xi siu ntsa me. <sup>29</sup> Xuta xi cuacun casua ná Nahmi naha ne, hitsë sa venguichji rë me xi cuma rë yëjë sa xcusun. Hacuaha tsajin yo cuma cuaxëxin rë me xi siu tsja Nahmi naja me. <sup>30</sup> Ngahan cojo Nahmi naja ne, ngu ni xahasen niji, ngu ni cjuatacun niji, ngu ni hasen niji. —Cuatjin cafayangui Jesús.

<sup>31</sup> Ngajan xi xutaxa rë xi cuacun jan ne, cafaha nga me ndyojo xi cuetaha me Jesús xi tsiquehen me me. <sup>32</sup> Hane Jesús ne, cuitjin cachja me:

—Ngahan ne, jemu cjin xcusun ndaja casahme ngajñi nuju sacuatjin cavitexa ná Nahmi naja. Hane ¿jarë xcusun vëhë tsëhë xi cuetahun ná ndyojo ni? —Cuatjin cachja Jesús.



<sup>33</sup> Ngajan xi xutaxa rē jan ne, cuitjin cafayangui me:

—Hacuiin tsēhē ngu xcusun ndaja xi canihñi xi cuetihin ri ndyojo ta ngatsē rē xi nixcuehyi Nina, ngatsē rē xi handasa ngu xuta ni ngaye ne, peru noje xi tangun ngaye cojo Nina. —Cuatjin cafayangui me.

<sup>34</sup> Ngajan xi Jesús ne, cuitjin cachja me:

—Ley rē Moisés xi vitexa nuju ne, ha ndaja hyun xi camahindu cjua vihi xi cachja Nina: “Ngayujun ni ne, nina ngayun.” Cuatjin camahindu. <sup>35</sup> Ngayejen ni ne, ha hyan ta cjua xi chja xcun xujun rē Nina ne, hatuxa cjuaquixi jain. Hane Nina ne, cachja me nina tsēhē xuta xi cuacun cafahatsja cjua rē me. <sup>36</sup> Quihndē ta Nina cavaxijin ná me hacuaha catsingatju ná me ngehe ngasunhndē ne, ¿hacutjin má xi nújun xi ngahan ne, choho chjá, tsēhē xi cachjá xi Quihndi rē Nina ngahan ni? <sup>37</sup> Sa xi ngahan tisahmee xcusun xi cavitexa Nahmi naha xi sahme ne, xicamacjaain nuju ngahan. <sup>38</sup> Peru sa xi tisahme ne, handasa cumacjaain nuju ngahan ne, ndastu tsēhē xcusun xi sahme ne, catamacjaain nuju, cojo sa xi cuijne rcun ngundiyaxa ni xi Nahmi naja ne, jiya me xahasen naha, hane ngahan ne, tejñaya xahasen rē me. —Cuatjin cachja Jesús.

<sup>39</sup> Ngajan xi casahmi nga xutaxa rē jan cjuandya xi cjuaha me Jesús, peru Jesús ne, cavetjutje me tsēhē xuta jan quiji me.

<sup>40</sup> Hya xi camá ne, cavetju Jesús quiji nga me ngunda vēhē tsēhē Ndajyē Jordán, ngajan hiscan xi casetaha Juan cavitenda me xuta ntsacu cavetsihin. Hane ngajan casetaha me. <sup>41</sup> Hane jemu cjín xuta quijitjengui me Jesús. Hane cuitjin cachja xingu xingu me cojo xicjin me:

—Juan ne, handasa casahmii me cjuarcun, peru yējē ni cjua xi cachja me tsēhē me vihi ne, cjuaquixi jain.

<sup>42</sup> Hane jemu cjín xuta camangu cacun me cojo Jesús ngajan cahndē vēhē.

## 11

### *Cjuaveya rē Lázaro*

<sup>1</sup> Tacun ngu cha hmu rē xi hmí rē Lázaro, ngu cha Betania, nangui rē na María cojo na Marta tíchja na. <sup>2</sup> Na María vēhē ne, na vēhē xi cavitejnu na ntsacu Nai naja ngu xcusun aceite xi jemu ndaja jne camahani hacuaha jercu hnga chji rē, sehe catsixiya na cojo tsjarcu na. Na vēhē xi hmu rē cha Lázaro hntsē na. <sup>3</sup> Ngajan xi catsijo na vēhē ne, catsingatju na cjua vihi tsēhē Jesús:

—Tatá, chutsujun ni, cha xi jemu vinga nuju jan ne, jemu hmu rē cha. —Vēhē cjua xi catsingatju na.

<sup>4</sup> Hane xi cahndē Jesús cjua vēhē ne, cuitjin cachja me:

—Chíhin vëhë ne, cuetjincaain cjuaveya rë cha Lázaro cojo ta xi cuetjucaa ne, cuma jyë cuma hnga Nina cojo Hasen rë me, cojo sa xi Quihndi rë Nina ne, hacuaha cuma jyë cuma hnga me cojo Hasen rë me ngatsë rë chíhin vëhë. —Cuatjin cachja Jesús.

<sup>5</sup> Quihndë ne, Jesús ne, jemu vinga rë me na Marta cojo tichja na cojo cha Lázaro. <sup>6</sup> Peru xi camachaya rë Jesús xi hmu rë cha ne, casetaha me jo nixtin sa hiscan xi ha quitahá me jan. <sup>7</sup> Xi cavatju vëhë ne, sehe cachja me cojo xuta ladu rë me jan cuitjin:

—Cuyan cuanguen nga ngu cahndë tsëhë distritu Judea. —Cuatjin cachja me.

<sup>8</sup> Ngajan xi xuta ladu rë me jan ne, cuitjin cachja me:

—Maestro, xutaxa rë yungun jan ne, ¡sehe tiña nixtin xi casahmi me cjuandya xi tsiquehen nuju me cojo ndyojo! ¡Xi meje rë ne, cuanguun ngajan! —Cuatjin cachja me.

<sup>9</sup> Hane Jesús ne, cuitjin cafayangui me:

—¿Hacuiin tejó hora tjin rë xi ngu nixtin ni? Quihndë xi cjëë cuechú hora xi cuichja Nina xi cueya ngahan ne, tsajin mé cuma ná, sacuatjin xtenguin naja xi ngu nixtin tsëhë xi tsejen naja hasen rë tsuhi. <sup>10</sup> Peru xi cuechú hora xi cuichja Nina xi cueya ngahan ne, cueya, sacuatjin xtengui naja xi nixten tsëhë xi tsajin hasen xi cuma naja.

<sup>11</sup> Cuatjin cafayangui Jesús cjua vëhë, hane sehe cachja sa me cuitjin:

—Cha amigu naja, cha Lázaro ne, cafañafë cha. Peru cjuë ngahan tsingásca rë cha. —Cuatjin cachja Jesús.

<sup>12</sup> Ngajan xi xuta ladu rë me jan ne, cuitjin cachja me:

—Tatá, sa xi cafañafë jain cha ne, vëhë tsejen xi cumandaja cha. —Cuatjin cachja xuta ladu rë me jan.

<sup>13</sup> Quihndë ne, cjua xi cachja Jesús vë ne, tsëhë cjuaveya rë cha Lázaro. Peru xi má rë xuta ladu rë me jan ne, tichja me tsëhë nijná ni rë cha. <sup>14</sup> Ngajan xi Jesús ne, cachja quixi me cuitjin:

—Cha Lázaro ne, cahme cha. <sup>15</sup> Hane ngahan ne, jemu ndama ná xi hacuiin ngajan tejña hora vëhë ta, xi chutsujun hacutjin cuma ne, cumangu tacún cojo ná. Peru cuanguen tjenguen nima. —Cuatjin cachja Jesús.

<sup>16</sup> Ngajan xi Tomás, me xi chja me tsëhë cha Lihma ne, cuitjin cachja me cojo xuta ladu rë Jesús xi yahnga jan:

—Hacuaha cuanguen ngayaan, cojo sa xi cueyan tangun cojo rë me. —Cuatjin cachja Tomás.

Sehe cavetju yëjë me quiji me cojo Jesús.

*Sua Jesús cjuahñu hacuaha tsicuya me nima cjuahñu*

<sup>17</sup> Hya xi camá ne, xi cafehe me ngajan Betania ne, camachaya rë Jesús xi ha tjin rë ñuju nixtin xi jiyaniji nima Lázaro. <sup>18</sup> Betania jan ne, sacuaaha chuva rë jyan kilómetro tacun tséhë Jerusalén. <sup>19</sup> Hane jemu cjín xuta quiji tjengui me na Marta cojo na María xi sua me na cjuetacun tséhë cjuaveya rë hntsé na. <sup>20</sup> Hane xi camachaya rë na Marta xi nduva Jesús ne, cavetju na quiji cafachatsja na me. Peru na María ne, cavéjña ni na ndava na. <sup>21</sup> Hya xi camá ne, xi casacu xicjin na Marta cojo Jesús ne, cuitjin cachja na cojo rë me:

—Tatá, sa ngayun nechun nguehe ne, cahmii nima xingueen. <sup>22</sup> Peru hvë ta hisca quihndë ne, tu mé ni xi chjahyun rë Nina ne, sua nuju me. —Cuatjin cachja na.

<sup>23</sup> Ngajan xi Jesús ne, cuitjin cachja me cojo rë na:

—Nima xingun ne, cuya cjuahñu. —Cuatjin cachja Jesús.

<sup>24</sup> Hane na Marta ne, cuitjin cachja na:

—Hvë ta cuya nima xingueen cjuahñu hya xi hacuaaha yëjë nima cuya cjuahñu, nixtin xi tsichuva Nina sa nima sa xuta. —Cuatjin cachja na.

<sup>25</sup> Ngajan xi Jesús ne, cuitjin cachja me cojo rë na:

—Ngahan xi suá cjuahñu hacuaaha tsicúya nima cjuahñu. Xuta xi mangucacun me cojo ná ne, ha ndasa cueya me ne, peru cuya me cjuahñu. <sup>26</sup> Hane yëjë xuta xi tjin rë me cjuahñu xatsë hacuaaha mangucacun me cojo ná ne, hatuxa tsajin nu tsajin nixtin xi cjue hasen rë me xcun cjuañihi. ¿Há macjain nuju cjua vëhë? —Cuatjin cachja Jesús.

<sup>27</sup> Ngajan xi na vëhë ne, cuitjin cafayangui na:

—Juun, macjain ná, Tatá. Macjain ná xi ngayun xi catsingatju nuju Nina, ngayun xi Quihndi rë Nina ngayun. Hacuaaha ngayun xi jemu cavinechinyin nuju xi cuinduvun ngasunhdë. —Cuatjin cafayangui na Marta.

*Jihnda Jesucristu xcun tsjun rë nima Lázaro*

<sup>28</sup> Xi cafë cachja na Marta cuatjin ne, sehe cavuya na quiji jaha na na María tíchja na. Hane xi cafehe na jan ne, sehe cajindayahma na na María, cuitjin cachja na:

—Cafehe maestru, hane jindaya me ngaye. —Cuatjin cachja na.

<sup>29</sup> Xi tu cahndë na María cjua vëhë ne, marcu macjain cavisatjen na quiji tjengui na Jesús. <sup>30</sup> Quihndë ne, cjëë sa cuisehen Jesús nandya ta secun cuaha me cahndë hiscan cavechútaha na Marta me. <sup>31</sup> Hane xuta xi siu cojo na María ndava na xi tisua me na cjuetacun ne, xi cavëë me xi marcu macjain cavisatjen na quiji na ne, quiji tjengui me na. Xi má rë me ne, xcun tsjun cjuí na, cojo sa xi ngajan squihnda na.

<sup>32</sup> Hane xi cafehe na María hiscan secun Jesús ne, xi cavëë na me ne, quiji caticjaxcun na xcun me, sehe cachja na cuitjin:

—Tatá, sa xi ngayun nechun nguehe ne, cahmii nima xingueen. —Cuatjin cachja na.

<sup>33</sup> Hane xi cavëë Jesús xi cuatjin jihnda na hacuaha jihnda yëjë xuta xi ticojo na jan ne, camandya cacun me, jemu choho camahani camá rë xahasen rë me. <sup>34</sup> Hane cuitjin cavinenguise me:

—¿Jani tacun tsjun xi caveyun nima? —Cuatjin cavinenguise me.

Hane xuta jan ne, cuitjin cafayangui me:

—Tatá, nduvun chutsujun. —Cuatjin cafayangui me.

<sup>35</sup> Hane cajihnda Jesús. <sup>36</sup> Ngajan xi xuta jan ne, cuitjin cachja me ngajñi rë me:

—Chutsujun ni hacutjin catsihmu cacun me nima. —Cuatjin cachja me.

<sup>37</sup> Peru ngujo me ne, cuitjin cachja me:

—Me vihi xi casahmi me xi camandaja tuxcun cha rcá jan ne, ¿há camaji casahmi me xi cahmii nima vëhë? —Cuatjin cachja ngujo xuta jan.

*Cavuya nima Lázaro cjuahñu*

<sup>38</sup> Ngajan xi Jesús ne, ngu ndiya nga jemu camandya cacun me. Sehe quiji me xcun tsjun. Tsjun jan ne, ngu ngujo, hane tingotjo rë ne, titsa ngu ndyojo. <sup>39</sup> Ngajan xi Jesús ne, cuitjin cachja me:

—Chjuhunxun ndyojo vë. —Cuatjin cachja me.

Ngajan xi na Marta, tichja nima ne, cuitjin cachja na:

—Tatá, ha choho jne vë ta, ha tjin rë ñuju nixtin. —Cuatjin cachja na.

<sup>40</sup> Hane Jesús ne, cuitjin cachja me cojo rë na:

—Ha cachjá cojo nuju ta sa xi cumacjain nuju cjua naha ne, ngayun ne, chutsujun hacutjin jyë hnga Nina cojo Hasen rë me. —Cuatjin cachja Jesús.

<sup>41</sup> Hya xi camá ne, cachjaháxin rë ndyojo jan. Hane hora vëhë cavutsejenniji Jesús ngahnga, sehe cachja me cuitjin:

—Ngayun Nahmi naha, suá nacuechji nuju ta canihñucundun cjua xi cachjá cojo nuju. <sup>42</sup> Hacuaha ha hvë ta ngayun ne, hatuxa nihñucundun cjua naha. Vëhë xi hacuiin ngujoyë xi cuichjá cojo nuju cjua vihi, peru ngatsë rë xuta xi hinchacunndee vi ne, vëhë xi cuitjin tichjá, cojo sa xi cumacjain rë me xi ngayun caningatjun ná. —Cuatjin cachja Jesús.

<sup>43</sup> Hane xi cajnetaha cachja me cuatjin ne, sehe ña cajindaya me cachja me cuitjin:

—¡Lázaro, tetjun! —Cuatjin cachja me.

<sup>44</sup> Hya xi camá ne, cavetju Lázaro tsëhë tsjun jan, tjinguiya tsjian ntsacu me, tjinguiya tsjian tsja me, hacuaha tjihñu xcun

me cojo ngu pañutu. Hane Jesús ne, cuitjin cachja me cojo xuta jan:

—Chundecjun tsjian vë sehe cumandaya me. —Cuatjin cachja Jesús.

### *Meje cjuaha xutaxa rë yungun Jesucristu*

<sup>45</sup> Quihndë ne, jemu cjín xuta quiji cavusehenya rë na María hacuaha cavëë me hacutjin casahmi Jesús. Hane xuta xi cuacun jan ne, camangu cacun me cojo Jesús. <sup>46</sup> Peru ngujo xuta ne, quiji cachja me cojo cha fariseo hacutjin casahmi Jesús. <sup>47</sup> Ngajan xi yëjë nahmi xi matitjun cojo cha fariseo xi cuacun jan ne, casahmi me ngu junta. Hane xcun junta jan ne, cuitjin cachja me:

—¿Mé ndatjin nihña? ta cha xi cuajyihí vë ne, jemu tisahmi cha cjuarcun. <sup>48</sup> Sa xi tsajin mé xi nihña ne, yëjë xuta ne, cumangu cacun me cojo cha. Hane vëhë xi xutaxa rë Roma ne, cuma cjan rë me, hane cjuahatahá me yungun xi matitjun naja hacuaha cjuahatahá me gobiernu xi tinihña. —Cuatjin cachja me xi cuacun jan.

<sup>49</sup> Peru ngu me xi cuacun jan xi hmí rë Caifás, me xi hacuaha má nahmi xi matitjun tsëhë yëjë nahmi nu vëhë ne, cachja me cuitjin:

—Ngayun ne, hyúun camahani. <sup>50</sup> Vijnii rcun xi ndaja tsujun xi ngu xihin ni cueya ngatsë rë yëjë ni xuta, hane hacuiin yëjë xuta cueya me. —Cuatjin cachja Caifás.

<sup>51</sup> Peru me vëhë ne, hacuiin cachja me cojo cjuatacun rë suvá me ta, ngatsë rë xi má me nahmi xi matitjun nu vëhë ne, cachja me cjuaxi casua Nina me xi Jesús cueya me ngatsë rë xuta. <sup>52</sup> Peru hacuiin ngatsë rë suvá ni xuta tjë rë Israel ta hacuaha cueya me cojo sa xi sahmi tangun me yëjë quihndi rë Nina xi tinguitsojo, sehe cuma yëjë me sacuaha ngu ni xcusun xuta.

<sup>53</sup> Ngajan xi hisca nixtin xi cachja Caifás cuatjin ne, nahmi xi matitjun cojo cha fariseo xi cuacun jan ne, caviyuju me cjuatacun rë me xi tsiquehen me Jesús. <sup>54</sup> Vëhë xi Jesús ne, catsujyihyaaintë me nandya xi siu ladu rë distritu Judea ta cavetjuxin me tsëhë ngajan, quiji me ngu nandya xi hmí rë Efraín, tiña hiscan xi faha rë xi ha jemu xín camahani tsëhë nandya. Hane ngajan casetaha me cojo xuta ladu rë me.

<sup>55</sup> Quihndë ne, ha camatiña suhi tsëhë Pascua. Hane jemu cjín xuta quiji me Jerusalén chaja sa nixtin rë suhi jan xi cuma tyjahi me sacuatjin xi ha xcusun rë xutachanga. <sup>56</sup> Jemu siu me cuidadu há cjuehe Jesús suhi jan. Hane jinguyëjë rë xi hinchacun me yungun xi matitjun jan ne, vinenguise xicjin me xingu xingu me cuitjin:

—¿Mé xi má nuju? ¿Há cuinduvaain me suhi? —Cuatjin cavinenguisse xicjin me. <sup>57</sup> Quihndë ne, nahmi xi matitjun cojo cha fariseo xi cuacun jan ne, ha cavitexa me xi yo xi vëë hiscan tacun Jesús ne, sua cumachaya rë me, cojo sa xi chjahá rë Jesús.

## 12

### *Xtejnu aceite ntsacu Jesucristu*

<sup>1</sup> Jyun nixtin chaja sa xi cuechú suhi tsëhë Pascua ne, cavuya quiji Jesús ngajan Betania, hiscan xi tacun cha Lázaro, cha xi catsicuya Jesús cjuahñu hya xi cahme cha. <sup>2</sup> Hane ngajan casehenndaja ngu comida xi sinë me. Na Marta tivincha na comida, peru cha Lázaro ne, cojo cha tijinë cha cojo Jesús cojo me xi yahnga sa. <sup>3</sup> Hane na María ne, cafaha na ngu frascu xi hincha jo cuarto aceite nardo xi jemu ndaja jne hacuaha jemu hnga chji rë, quiji cavitejnu na ntsacu Jesús, sehe catsixiya na cojo tsjarcu na. Hane cahntsua ndihya jan ne, ña catsë rë cojo xta rë aceite jan. <sup>4</sup> Ngajan xi Judas Iscariote, ngu cha ladu rë Jesús, cha xi sahmi rë me entregadu ne, cuitjin cachja cha:

<sup>5</sup> —¿Mé má cuatjin casahmi na? Aceite vë ne, cuma xteña hane sacú chji rë jyan cientu nixtin xa xi sahmi ngu xuta, hane tujún vëhë ne, tahan rë xuta yuma. —Cuatjin cachja cha.

<sup>6</sup> Peru Judas ne, hacuiin tsëhë xi marcun rë cha tsëhë xuta yuma xi cuatjin cachja cha ta tsëhë xi chëjë cha, hacuaha cha vëhë tjin tsja cha tsá xi hincha yëjë tujún, hane jiya hora ne, tsichëjë cha tsë tsë. <sup>7</sup> Ngajan xi Jesús ne, cuitjin cachja me:

—Xicanújiin cojo rë na. Catetjo na xi tjin rë na hisca hya xi seyaniji ngahan. <sup>8</sup> Xuta yuma ne, yëjë nu yëjë nixtin ne, siu me cojo nuju, peru ngahan ne, hacuiin yëjë nu yëjë nixtin tejña cojo nuju. —Cuatjin cachja Jesús.

### *Meje tsiquehen xutaxa rë yungun cha Lázaro*

<sup>9</sup> Hya xi camá ne, jemu xutacjin tsëhë nandya xi siu distritu Judea ne, camachaya rë me xi Jesús ne, Betania quitahá me. Ngajan xi quiji xuta ngajan, hacuiin tsëhë xi meje scuëë ni me Jesús ta hacuaha tsëhë xi meje scuëë me cha Lázaro, cha xi catsicuya Jesús cjuahñu. <sup>10</sup> Hane nahmi xi matitjun jan ne, caviyuju cacun me xi hacuaha cojo cha Lázaro tsiquehen me cha, <sup>11</sup> tsëhë xi ngatsë rë cha vëhë ne, jemu cjín xuta titsitjungui me nahmi jan, hane tijimangu cacun me cojo Jesús.

### *Cafehe Jesucristu nandya Jerusalén*

<sup>12</sup> Xi camá nchujun jan ne, xutacjin xi cafehe suhi jan ne, camachaya rë me xi Jesús ne, hacuaha nduva me Jerusalén.

<sup>13</sup> Hane cafaha me xca jne, sehe cavetju me quijitjengui me Jesús hiscan nduva me. Hane hisca jindaya me cachja me cuitjin:

—¡Jemu ndaja Nina! ¡Jemu catsinchacun Nina me xi nduva vi tséhë xi Nina catsingatju rë me, me xi cumatitjun tsajan ngayaan xuta tjë rë Israel! —Cuatjin cajindaya me cachja me.

<sup>14</sup> Hane xi casacu rë Jesús ngu burru chihndë ne, sehe camiji me chu, sacuatjin camahindu tséhë me xcun xujun rë Nina hiscan xi chja cuitjin:

<sup>15</sup> ¡Xicarcuun ngayun xuta Jerusalén; chutsujun ni, me xi matitjun tsujun ne, nduva me quisun me ngu burru chihndë!

<sup>16</sup> Hya xi cuatjin camá ne, xuta ladu rë Jesús ne, cajni rcu me. Peru hya xi Jesús cama jyë cama hnga me cojo Hasen rë me ne, hya xi cavuya cjuahñu rë me hya catsinguitsjen xuta xi cuacun jan xi cuatjin camahindu tséhë Jesús hane cuatjin jain cavatju me camá.

<sup>17</sup> Xuta xi siu cojo Jesús hya xi cajindaya me cha Lázaro xi cuetju cha tséhë tsjun hacuaha catsicuya me cha cjuahñu ne, casua me camachaya rë jingu sa xuta hacutjin camá. <sup>18</sup> Véhë xi xutacjín jan ne, cavetju me quijitjengui me Jesús, tséhë xi camachaya rë me xi casahmi Jesús cjuarcun véhë. <sup>19</sup> Véhë xi cha fariseo ne, cachja cha ngajñi rë cha cojo xicjin cha cuitjin:

—Cahyun ni ne, tsajin mé xi cuma nihña. Chutsujun ta yëjë ni xuta ne, tjengui rë cha. —Cuatjin cachja cha.

### *Meje scutsejen ngujo xutaxín Jesucristu*

<sup>20</sup> Quihndë ne, ngajñi rë xuta xi quiji me suhi xi cjuaharcun me Nina ne, hinchajñi ngujo xutaxín. <sup>21</sup> Hane me xi cuacun véhë ne, quijitjengui me Felipe, xuta Betsaida, ngu nandya tséhë distritu Galilea, hane cuitjin cachja me:

—Tatá, ngayin ne, meje cuisiajmí cojo Jesús. —Cuatjin cachja me.

<sup>22</sup> Ngajan xi Felipe ne, quiji cachja me cojo Andrés, sehe catsijo ni me quiji casua me camachaya rë Jesús. <sup>23</sup> Ngajan xi Jesús ne, cuitjin cachja me cojo rë me:

—Cavechú hora xi ngahan xi Quihndi rë Xuta Jain ngahan ne, cuma jyë cuma hnga ngahan cojo hasen naha. <sup>24</sup> Cuichjá cojo nuju cjuaquixi ta ngu tú rë trigu xi cjuinengui nangui ne, sa xi cueyaain ne, ha ngu tu tu ni má yëjë nu yëjë nixtin. Peru sa xi cueya ne, jemu cjín tjë sua. <sup>25</sup> Xuta xi vangui me suvá ni xi ndaja cjuahñu rë me nguehe ngasunhdë ne, titsichajá me cjuandaja xi sua Nina me cjuahñu xatsë. Peru xuta xi marcuaain rë me tséhë suvá ni xi ndaja cjuahñu rë me nguehe ngasunhdë ne, hatuxa sacú rë me cjuandaja xi sua Nina me cjuahñu xatsë. <sup>26</sup> Xuta xi meje cuisehen me ladu naha ne,

catinduva tjengui ná me. Hane hiscan xi cuitejña ngahan ne, hacuaha ngajan cuejña me xi má ladu naha. Xuta xi má me ladu naha ne, sahmi jyë sahmi hnga Nina Nahmi naja me. —Cuatjin cachja Jesús.

*Chja Jesucristu tsëhë cjuaveya rë me*

<sup>27</sup> Cachja sa Jesús cuitjin:

—Quihndë ne, jemu macjín cáacun. Peru ¿mé cuichjá ni? ¿Há cuichjá cuitjin: “Ngayun Nahmi naha, naxuntjun ná tsëhë xcusun xi cuátju cuma quihndë?” Peru cuichjaan cuatjin ta, tsëhë xi hatuxa canduvá xi cuatjin cuátju cuma. <sup>28</sup> Ngayun Nahmi naha, tuhun cumachaya rë xuta hacutjin jyë hnga ngayun cojo Hasen nuju. —Cuatjin cachja Jesús.

Ngajan xi canuhya rë ngu xta xi canduva ngajan ngahnga xi cachja cuitjin:

—Ha casuá camachaya rë me, hacuaha cúya suá nga cumachaya rë me. —Cuatjin cachja xta jan.

<sup>29</sup> Hane ngujo xuta xi hinchacun jan xi cahndë me xta jan ne, cachja me ta chuhun xi catsingá. Hane ngujo nga me ne, cachja me xi ngu ángel cachja cojo Jesús. <sup>30</sup> Ngajan xi Jesús ne, cuitjin cachja me cojo xuta jan:

—Hacuiin xi cuihndë ngahan xi cachja xta vëhë ta xi cuin-uhyun ngayun. <sup>31</sup> Cavechú nixtin xi cuma chuva xuta cojo cjuatacun rë me. Cavechú nixtin xi cjuahatahá Nina gu-biernu xi tisahmi Satanás. <sup>32</sup> Hane ngahan ne, hya xi tjuni-hnga ná tsëhë nangui ne, sahme xi xuta ne, cuisehen me ladu naha. —Cuatjin cachja Jesús.

<sup>33</sup> Xi cuatjin cachja Jesús ne, casua me camachaya rë xuta mé chuva rë cueya me. <sup>34</sup> Ngajan xi xuta jan ne, cuitjin cafayangui me tsëhë Jesús:

—Ngayin ne, hyin xi chja ley ta me xi Nina tsingatju rë ne, tsajin nixtin xi cueya me. ¿Hacutjin má xi nújun ngayun xi me xi Quihndi rë Xuta Jain ne, tjunihnga rë me? ¿Yo me xi Quihndi rë Xuta Jain vë ni? —Cuatjin cafayangui xuta jan.

<sup>35</sup> Ngajan xi Jesús ne, cuitjin cachja me cojo xuta jan:

—Ha tu chúva sa nixtin xi ngahan xi sacuaha hasen ngahan ne, tejña ngajñi nuju. Tángun xcun sa cojo ndiya xi ha tivangun jinguyëjë rë xi tacun sa hasen ngajñi nuju, sa tu cuechútáha nuju jñú. Xuta xi cjuí me ngajñi jñú ne, hvíin me jani cjuí me. <sup>36</sup> Vëhë xi jinguyëjë rë xi tejña ngajñi nuju ne, catamangu tacún cojo ná, cojo sa xi tsë rë xahasen nuju cojo cjuahasen naha. —Cuatjin cachja Jesús.

*Jemu cjín xuta xi camanguaain cacun me cojo Jesucristu*

Hane xi cavatju cachja Jesús cjuá vëhë ne, cavetju me quijihma me tsëhë xuta jan.



<sup>37</sup> Handasa cavëë xuta xi jemu cjín cjuarcun casahmi Jesús ne, peru camanguaain cacun me cojo rë me. <sup>38</sup> Cuatjin camá xi cavetjucaa cjua rë profeta Isaías xi camahindu xcun xujun rë Nina hiscan xi chja cuitjin:

Ngayun Nina niji, tsajin yo camacjain rë cjua xi canújin; Tsajin yo cajne rcu hacutjin xi hñu ngahñu rë Nina.

Cuatjin cachja profeta Isaías. <sup>39</sup> Vëhë xi xuta jan ne, camaji camangu cacun me cojo Jesús ta, tsëhë xi hacuaha cachja nga profeta Isaías cuitjin:

<sup>40</sup> Sacuaha ngu xuta xi tsihñu me xcun ngu nga xuta cojo sa xi cumatsijin rë me ne, cuatjin casahmi jñu Nina tsëhë cjuatacun rë xuta, cojo sa xi cuijnii rcu me hacuaha cuyaaïn me ladu rë Nina xi sahmi Nina xi cuman-daja me.

<sup>41</sup> Cuatjin cachja Isaías cjua vëhë ta, tsëhë xi cavëë me hacutjin jyë hnga Jesús cojo hasen rë me hane cuatjin cachja me tsëhë Jesús.

<sup>42</sup> Handasa cuatjin casahmi Nina ne, jemu cjín xutaxa rë camangu cacun me cojo Jesús. Peru tsëhë xi tsacjun me cha fariseo ne, catsinguixiin me ngajñi rë xuta, sa tu cuma-chohotje rë me yungun. <sup>43</sup> Xutaxa rë xi cuacun vë ne, hitsë sa meje rë me xi sahmi yehe sahmi hnga xuta me, xi cuma rë xi sahmi yehe sahmi hnga Nina me.

*Cjua rë Jesucristu tsichuva rë xuta cojo cjuatacun rë me*

<sup>44</sup> Ngu ndiya nga jan ne, jemu hñu cachja Jesús cuitjin:

—Xuta xi mangucacun me cojo ná ne, hacuiin suva ni mangucacun me cojo ná ta hacuaha mangucacun me cojo Nina Nahmi naja, me xi catsingatju ná. <sup>45</sup> Hane xuta xi vijne rcu me yo ngahan ne, hacuaha vijne rcu me yo me xi catsingatju ná. <sup>46</sup> Ngahan xi sacuaha hasen xi cuma rë xuta ngahan ne, canduvá nguehe ngasunhndë, cojo sa xi yëjë xuta xi mangucacun me cojo ná ne, cjuë xi jñu tsëhë cjuatacun rë me. <sup>47</sup> Hane sa xi ngu xuta vetaha rcu me cjua xi chjá peru faharcuaain me ne, ngahan ne, tsichuvaan me cojo cjuatacun rë me ta, tsëhë xi ngahan ne, hacuiin canduvá xi tsichúva xuta cojo cjuatacun rë me ta canduvá xi cuáxëtje me. <sup>48</sup> Xuta xi tsitjungui ná me hacuaha fahatsjaain me cjua naha ne, ha tjin yo xi tsichuva rë me. Cjua xi cachjá ne, cjua vëhë xi tsichuva rë me nixtin xi tsichuva Nina sa nima sa xuta. <sup>49</sup> Ngahan ne, cjua xi cachjá ne, hacuiin cachjá cojo cjuatacun naha suva ta Nina Nahmi naja, me xi catsingatju ná ne, suvá me cavitexa ná me hacutjin meje rë xi cuichjá. <sup>50</sup> Hane hvë ta cjua xi vitexa me vëhë ne, sua naja cjuahñu xatsë. Vëhë xi cjua xi chjá ne, suvá cjua xi cavitexa Nina Nahmi naja.

## 13

*Vane Jesucristu ntsacu xuta ladu rë me*

<sup>1</sup> Quihndë ne, cavechú nixtin xi chaja sa ngu nixtin xi cuma suhi tsëhë Pascua. Hane Jesús ne, ha vëë me xi cavechú hora xi cуетju me tsëhë ngasunhndë vihi, cjue tjengui me Nina Nahmi naja. Hatuxa catsihmu cacun me xuta ladu rë me xi siu ngasunhndë vihi, hacuaha hacuanitjin ni catsihmu cacun me hisca xi cahme me.

<sup>2</sup> Jesús cojo xuta ladu rë me ne, tijinë nguixun me. Hane cha Judas, quihndi rë Simón Iscariote ne, ha casahmi Satanás xi cuejña cacun cha xi sahmi entregadu cha Jesús. <sup>3</sup> Peru Jesús ne, ha vëë me xi ha cavejña Nina yëjë xcusun tsja me. Hacuaha ha vëë me xi hiscan tacun Nina canduva me, hane hacuaha ngajan ni cuya cjue nga me. <sup>4</sup> Hya xi camá ne, cavejña Jesús xi tijinë me jan ne, cavisatjenhnga me, sehe cavaxë me chingá rë me cavejñaxin me, hane cafaha me ngu toalla cavityanguitaha me. <sup>5</sup> Sehe cafaha me nandá cojo nisu, hane cavetsihin cavane me ntsacu xuta ladu rë me hacuaha catsixiya me cojo toalla xi tyjanguitaha rë me jan.

<sup>6</sup> Hane xi cafehe me xcun Simón Pedru ne, cachja Pedru cuitjin:

—Tatá, ¿há xi ngayun cuanu ntsacú? —Cuatjin cachja Pedru.

<sup>7</sup> Ngajan xi Jesús ne, cuitjin cafayangui me:

—Xcusun xi tisahme vi ne, vijni rcun quihndë, peru ngascan ne, hya cuijne rcun. —Cuatjin cafayangui Jesús.

<sup>8</sup> Hane Pedru ne, cuitjin cachja me:

—¡Hatuxa tsajin nu tsajin nixtin xi ngayun cuanu ntsacú! —Cuatjin cachja me.

Ngajan xi Jesús ne, cuitjin cafayangui me:

—Sa xi cuánee ntsacun ne, hacuiin xuta ladu naha ngayun. —Cuatjin cafayangui Jesús.

<sup>9</sup> Ngajan xi Simón Pedru ne, cuitjin cachja me cojo Jesús:

—Tatá, sa cuatjin ne, ¡hacuiin suvá ni ntsacú ta hacuaha cojo ntsa cojo rcú tanu! —Cuatjin cachja me.

<sup>10</sup> Ngajan xi Jesús ne, cuitjin cafayangui me tsëhë Pedru:

—Xuta xi ha cavinduya me ne, suvá ni ntsacu me meje rë xi cjuengui ta, tsëhë xi ha tyjahi me. Ngayujun ni ne, ha tyjahi ngayun. Peru ngu ngayun ne, hacuiin cuatjin. —Cuatjin cafayangui Jesús.

<sup>11</sup> Tsëhë xi ha vëë Jesús yo xi sahmi rë me entregadu, vëhë xi cachja me xi: “Hacuiin ngayujun xi tyjahi ngayun.”

<sup>12</sup> Hane xi cavatju cavane Jesús ntsacu xuta ladu rë me ne, sehe cavuya cavajá me chingá rë me, sehe quiji cafaha nga

me cahndě rě me xcun maxě. Hane sehe cachja me cojo xuta ladu rě me cuitjin:

—¿Há vijne rcun xcusun xi casahme cojo nuju vë?  
<sup>13</sup> Ngayun ne, maestru niji hacuaha nai niji nújun tsahan. Hane ndatjin xi cuatjin nújun ta, tséhě xi cuatjin jain.  
<sup>14</sup> Quihndě ne, quihndě ta ngahan xi nai nuju hacuaha maestru nuju ngahan cavane ntsacun ne, hacuaha meje rě xi cuatjin cuanu ntsacu xingun xingu xingu ngayun. <sup>15</sup> Ngahan ne, cavejñá nuju ngu ejemplu vë, cojo sa xi sacuaha xcusun xi casahme cojo nuju vë ne, hacuaha cuatjin nihñu. <sup>16</sup> Cuichjá cojo nuju cjuaquixi ta ngu mosu hndixahan ne, hacuiin hitsě sa venguichji rě xi cuma rě nai rě, hacuaha ngu xi ningatjun rě ne, hacuiin hitsě sa matitjun xi cuma rě me xi catsingatju rě. <sup>17</sup> Quihndě ta ha vijne rcun cjua vëhě ne, jemu ndaja tsujun sa xi nihñu cuatjin.

<sup>18</sup> Peru ngahan ne, hacuiin tichjá tsujun ngayujun ni ta ngahan ne, ha hvě yo xi cavaxejen. Peru meje rě xi cuetjucaa cjua xi camahindu xcun xujun rě Nina xi chja cuitjin: “Cha xi cajině tangun cojo ná ne, camá cha condra naha.” Cuatjin camahindu. <sup>19</sup> Tichjá cojo nuju cjua vëhě quihndě chaja sa xi cuetjucaa, cojo sa xi hya xi cuetjucaa ne, ngayun ne, cumacjain nuju xi Ngahan Vi hmí ná. <sup>20</sup> Cuichjá cojo nuju cjuaquixi ta xuta xi cjuahatsja me tu yo ni xi tsingátju ne, tangun sacuaha xi cjuahatsja ná me ngahan suva. Hane xuta xi cjuahatsja ná me ne, tangun sacuaha xi cjuahatsja me Nahmi naha xi catsingatju ná me. —Cuatjin cachja Jesús cojo xuta ladu rě me.

*Chja Jesucristu xi Judas sahmi rě me entregadu xcun xutaxa rě yungun*

<sup>21</sup> Xi cavatju cachja Jesús cuatjin ne, jemu camandya cacun me, hane cuitjin cachja me:

—Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

<sup>22</sup> Hane xuta ladu rě Jesús xi cuacun jan ne, cavutsejenya me xcun xicjin me xingu xingu me. Hvíin camahani me yo tséhě xi cuatjin cachja Jesús. <sup>23</sup> Hane ngu cha ladu rě Jesús xi jemu vinga rě me ne, tjehen rě Jesús ne, ngajan tijině cha niñu. <sup>24</sup> Vëhě xi Simón Pedru ne, casahmi rcu me cojo cha vëhě, sehe cachja me cuitjin:

—Chjinengunsun rě me yo tséhě xi chja me. —Cuatjin cachja Pedru.

<sup>25</sup> Hane xi catsicuya cha vëhě xcun cha tiña xcun Jesús ne, sehe cavinenguisse cha me cuitjin:

—Tatá, ¿yo xi nújun vë? —Cuatjin cavinenguisse cha.

<sup>26</sup> Ngajan xi Jesús ne, cuitjin cafayangui me:

—Cha xi suá rë ngu rquí niñu vi hora xi cjuë tsingúisehen quinda ne, cha vëhë xi hacui cha. —Cuatjin cafayangui me.

Hane hora xi camá catsingúisehen quinda me niñu jan ne, sehe casua me cha Judas, quihndi rë Simón Iscariote. <sup>27</sup> Hane xi cavatju cafaha Judas ngu rquí niñu jan ne, hora vëhë cavisehen Satanás xahasen rë cha. Ngajan xi Jesús ne, cuitjin cachja me cojo cha:

—Xcusun xi nihñu ne, nihñu ni ngu ndiya xa. —Cuatjin cachja Jesús cojo cha.

<sup>28</sup> Peru hisca ngu me xi tijinë niñu jan hvín me mé má cuatjin cachja Jesús cojo cha. <sup>29</sup> Yahnga me ne, catsingataha cacun me xi tsëhë xi Judas yaha cha tsá tujún ne, vëhë xi cachja Jesús cojo cha xi cjue cuatsë cha xi mameje tsëhë suhi o sa xi sua cha tsë tsë xuta yuma.

<sup>30</sup> Hane xi cavatju cafaha cha ngu rquí niñu jan ne, ngutjen ni cavetju cha quiji cha. Hora vëhë ne, ha camajñu.

### *Cjua xatsë xi cavitexa Jesucristu*

<sup>31</sup> Ngajan xi, xi cavetju Judas quiji cha ne, sehe cachja Jesús cuitjin:

—Ngahan xi Quihndi rë Xuta Jain Ngahan ne, quihndë cuet-sihin cuma jyë cuma hnga ngahan cojo hasen naha, hacuaha ngahan tsingácun hacutjin jemu jyë hnga Nina cojo hasen rë me. <sup>32</sup> Hane sa xi ngahan tsingácun hacutjin jemu jyë hnga Nina cojo Hasen rë me ne, Nina ne, hacuaha tsingacun me hacutjin jemu jyë hnga ngahan cojo hasen naha. Hane ngutjen ni sahmi me cuatjin. <sup>33</sup> Jemu chúva sa nixtin xi cuitejña cojo nuju, tsan. Ngayun ne, cuinchunsun ná, peru quihndë cuichjá cojo nuju sacuatjin cachjá cojo xutaxa rë yungun xi hiscan xi cjué ne, cumaji cuangun. <sup>34</sup> Nguehe cuitéxa nuju ngu cjua xatsë cuitjin: “Meje rë xi nihñu hmu tacún xingun xingu xingu ngayun. Sacuatjin casahme hmu cákun nuju ngahan, cuatjin meje rë xi nihñu hmu tacún xingun.” <sup>35</sup> Hane xi cuatjin tjin cjuahmutacun ngajñi nuju cojo xingun ne, ngajan cumachaya rë yëjë xuta ta ngayun ne, xuta ladu naha má ngayun. —Cuatjin cachja Jesús.

### *Chja Jesucristu xi cuichja Pedru xi hvín me yo Jesucristu*

<sup>36</sup> Ngajan xi Simón Pedru ne, cuitjin cavinenguise me:

—Tatá, ¿jani cuangun ni? —Cuatjin cavinenguise me.

Ngajan xi Jesús ne, cuitjin cafayangui me:

—Hiscan xi cjué ne, quihndë ne, cumaji cuanguntjengun ná. Peru xi cuma ngascan ne, cuanguntjengun ná. —Cuatjin cafayangui Jesús.

<sup>37</sup> Hane Pedru ne, cuitjin cachja me cojo Jesús:

—Tatá, tsajin mé má cumaji cjuě tjěnguě nuju quihndě. Hisca yojo naha suá ngatsě nuju. —Cuatjin cachja Pedru.

<sup>38</sup> Ngajan xi Jesús ne, cuitjin cafayangui me:

—¿Há xi tuhun yojo nuju ngatsě naha? Cuichjá cojo nuju cjuaquixi ta chaja sa xi squihnda xahnda ne, ngayun ne, ha jyan ndiya cuinújun xi hyúun yo ngahan. —Cuatjin cafayangui Jesús.

## 14

*Sacuaha ndiya xi cjuí xcun Nina má Jesucristu*

<sup>1</sup> Quijinduju sa cachja Jesús cojo xuta ladu rě me cuitjin:

—Xicamandyaain tacún. Catamangu tacún sa cojo Nina, hacuaha catamangu tacún sa cojo ná. <sup>2</sup> Ngajan ngahnga hiscan tacun Nahmi naha ne, jemu cjín cahndě tjin xi cuiyuju yějě xuta ladu rě me. Sa xi hacuiin cuatjin ne, ngahan ne, ha cachjá cojo nuju. Peru xicamacjiin tacún ta cjuě cuěhëndaja cahndě xi cuma nuju. <sup>3</sup> Hane hya xi ha cějě cavěhëndaja cahndě xi cuma nuju ne, sehe cúya nga, hane cjuěcojo nuju, cojo sa xi hiscan xi cuitejña ne, hacuaha ngajan cuinechun. <sup>4</sup> Hacuaha hiscan xi cjuě ne, ngayun ne, ha hyun ndiya. —Cuatjin cachja Jesús.

<sup>5</sup> Hane Tomás ne, cuitjin cachja me cojo Jesús:

—Tatá, hyín jani cuangun. ¿Hacutjin má xi nújun xi ha hyin ndiya ni? —Cuatjin cachja me.

<sup>6</sup> Hane Jesús ne, cuitjin cafayangui me tsěhě Tomás:

—Ngahan ne, sacuaha ndiya xi cjuí xcun Nina ngahan. Ngahan ne, hatuxa tjin ná cjuaquixi rě Nina, hatuxa tjin ná cjuahñu. Suvá ni xuta xi visehen me ladu naha ne, me vėhě ni xi cuma cuechú me xcun Nina Nahmi naja. <sup>7</sup> Ngatsě rě xi ha hyun ná ne, vėhě xi hatuxa chun Nahmi naha. Quihndě ne, hyun me, hacuaha ha cachutsujun me. —Cuatjin cafayangui Jesús.

<sup>8</sup> Ngajan xi Felipe ne, cuitjin cachja me cojo Jesús:

—Tatá, ningacun niji Nina Nahmi naja, hane cojo vėhě cumangu tacún. —Cuatjin cachja Felipe.

<sup>9</sup> Ngajan xi Jesús ne, cuitjin cachja me:

—Ngahan ne, ha jemu jyě nixtin tejña cojo nuju, hane ¿há hyúun ná ni, Felipe? Xuta xi ha cavěě ná me ne, ha cavěě me Nina Nahmi naja. ¿Hacutjin má xi nújun xi tsingácun nuju Nina Nahmi naja ni? <sup>10</sup> ¿Há macjaain nuju xi ngahan ne, tejñaya xahasen rě Nina Nahmi naja, hane me vėhě ne, jiya me xahasen naha? Cjua xi chjá cojo nuju ne, hacuiin chjá cojo cjuatacun naha suva. Nina Nahmi naja xi jiya me xahasen naha ne, me vėhě sahmi me xa rě me. <sup>11</sup> Catamacjain nuju xi ngahan ne, tejñaya xahasen rě Nina Nahmi naja hacuaha me

vêhê ne, jiya me xahasen naha. O sa xi macjaain nuju cjua naha ne, catamacjain nuju ngahan ndastu ngatsê rê cjuarcun xi casahme. <sup>12</sup> Cuichjá cojo nuju cjuaquixi ta xuta xi mangu-cacun me cojo ná ne, cjuarcun xi sahme ngahan ne, hacuaha cojo me sahmi me. Ha hisca yehe sa cjuarcun sahmi me ta, ngahan ne, cjuê tjënguê Nina Nahmi naja. <sup>13</sup> Hane tu mé ni xi chjahyun rê Nina ngatsê rê xi ladu naha ngayun ne, vêhê sahme, cojo sa xi cuma jyê cuma hnga Nina Nahmi naja cojo Hasen rê me ngatsê rê xcusun xi sahme, ngahan xi Quihndi rê me ngahan. <sup>14</sup> Sa xi chjahyun ná ngu cjuandaja ngatsê rê xi ladu naha ngayun ne, ngahan ne, sahme. —Cuatjin cachja Jesús cojo xuta ladu rê me.

*Chja Jesucristu xi cuinduva Hasen rê Nina*

<sup>15</sup> Quijinduju sa cachja Jesús cuitjin:

—Sa xi ngayun nihñu hmu tacún ná ne, hacuaha cuin-uhyun sacuatjin vitéxa nuju, <sup>16</sup> hane ngahan cuichjá cojo Nina Nahmi naja, hane tsingatju me ngu nga xi cuisecoo nuju, xi cuejña cahndê cojo nuju yêjê nu yêjê nixtin. <sup>17</sup> Hane vêhê ne, vêhê Hasen xi hatuxa tjin rê cjuaquixi rê Nina. Xuta xi marcuaain rê me tsêhê Nina ne, cumaji xi cuisehen Hasen vêhê xahasen rê me ta, tsêhê xi tsijin rê me Hasen vêhê hacuaha hvíin me Hasen vêhê. Peru ngayun ne, hyun Hasen vêhê ta, tsêhê xi tacun cahndê cojo nuju hacuaha cuisehen xahasen nuju.

<sup>18</sup> 'Ngahan ne, hacuiin cuiyuju nuju suvun ta cúa nga cuitejñacahndê cojo nuju. <sup>19</sup> Ha tu hitsê sa ne, ha quihndê scuiin ná xuta. Peru ngayun ne, chun ná. Hane tsêhê xi ngahan ne, hatuxa tjin ná cjuahñu ne, vêhê xi ngayun ne, hatuxa sacú nuju cjuahñu xatsê. <sup>20</sup> Nixtin hya ne, cuijne rcun xi ngahan ne, tejñaya xahasen rê Nahmi naha, hane ngayun ne, nechunyun xahasen naha, hane ngahan ne, tejñaya xahasen nuju.

<sup>21</sup> 'Xuta xi tivihndê sacuatjin vitéxa ne, me vêhê xi hmu cacun ná me. Hane xuta xi cuatjin hmu cacun ná me ne, hacuaha sahmi hmu cacun Nahmi naha me. Ngahan ne, hacuaha sahme hmú cáacun me, hacuaha suá cumachaya rê me yo ngahan. —Cuatjin cachja Jesús.

<sup>22</sup> Judas, me xi hacuiin cha Judas Iscariote jan ne, cavinenguise me cuitjin:

—Tatá, ¿hacutjin má xi tuhun cumachaya niji yo ngayun, hane hacuiin cojo yêjê sa xuta ni? —Cuatjin cavinenguise me.

<sup>23</sup> Ngajan xi Jesús ne, cuitjin cafayangui me:

—Xuta xi hmu cacun ná me ne, hacuaha cuihndê me tsêhê cjua naha. Hane sahmi hmu cacun Nahmi naha me, hacuaha cuinduvin cuinechinyincahndin xahasen rê me. <sup>24</sup> Xuta xi

hacuiin hmu cacun ná me ne, vihndiin me tséhë cjuua naha. Cjuua xi tinuhyun vi ne, hacuiin cjuua naha suva ta cjuua rë Nina Nahmi naja, me xi catsingatju ná.

<sup>25</sup> 'Jemu cjin cjuua tichjá cojo nuju jinguyëjë rë xi tejña sa cojo nuju. <sup>26</sup> Peru Hasen rë Nina xi tsingatju Nina Nahmi naja xi cuejña cahndë naha ne, vëhë cuisecoo nuju, tsinguixi cojo nuju yëjë sa cjuua xi machaja, hacuaha tsinguitsjen nuju tséhë yëjë cjuua xi ha cachjá cojo nuju.

<sup>27</sup> 'Cjuandaja cjuajeya cuejña nuju. Cjuandaja cjuajeya naha suá nuju. Peru hacuiin sacuatjin sua xuta ngasunhdë suá nuju. Xicamandyaaïn tacún, xicamacjiïn tacún. <sup>28</sup> Ha canuhyun xi cachjá cojo nuju ta cjuë peru cúa nga cuinduva tjënguë nuju. Sa xi ndaja jain hmu tacún ná ne, hacuaha ndama nuju xi cjuë tjënguë Nina Nahmi naja ta, Nina Nahmi naja ne, hitsë sa venguichji rë me xi cuma ná ngahan. <sup>29</sup> Ha cachjá cojo nuju quihndë, chaja sa xi cuetjucaa cjuua vëhë, cojo sa xi hya xi cuetjucaa ne, ngayun ne, cumacjain nuju. <sup>30</sup> Ha quihndë cuichjaan sa cojo nuju cjin cjuua ta, ha nduva Satanás, xi matitjun tséhë ngasunhdë. Peru ngahan ne, tsajin mé xi cuma sahmi cojo ná. <sup>31</sup> Ngahan ne, sahme sacuatjin cavitexa Nina Nahmi naja, cojo sa xi yëjë xuta ne, cumachaya rë me xi hmú cákun Nina Nahmi naja.

'Nduvun ne, cuanguenxeen tséhë nguehe. —Cuatjin cachja Jesús.

## 15

*Chja Jesucristu xi sacuaha nahñu naa rë xca rë uva má me*

<sup>1</sup> Hacuaha cachja sa Jesús cuitjin:

—Ngahan ne, sacuaha nahñu naa cjuaquixi rë xca rë uva ngahan, hane Nahmi naha ne, sacuaha me xi tsicha xcatjë vëhë me. <sup>2</sup> Jima ngu nahñu tsja rë xi vaquiïn tú rë ne, vatë me. Hane jima ngu nahñu tsja rë xi vaquí tú rë ne, vatëjñi me tsja langa rë, cojo sa xi cjin sa tú rë cuaquí. <sup>3</sup> Hacuanitjin ni nuju ngayun xi sacuaha nahñu tsja rë jan ngayun ta, cjuua xi cachjá cojo nuju ne, ha catsityjahi rë cjuatacun nuju. <sup>4</sup> Nihñutangun sa cjuatacun nuju cojo ná, hane ngahan ne, sahmetangun cjuatacun naha cojo nuju. Ha hyan ta nahñu tsja rë ne, cumaji sua tú rë sa xi tsajin quitahácoo cojo nahñu naa rë. Hacuanitjin ni nuju ngayun ta cumaji ninguitsujun cjuandaja rë Nina sa xi tsajin tjin tangun cjuatacun nuju cojo ná.

<sup>5</sup> 'Ngahan ne, sacuaha nahñu naa rë xca rë uva ngahan, hane ngayun ne, sacuaha nahñu tsja rë. Xuta xi tjin tangun cjuatacun rë me cojo ná hacuaha tjin tangun cjuatacun naha cojo rë me ne, me vëhë ne, jercu tsinguitsojo me cjuandaja rë Nina. Vëhë xi sa xi tsajin tjin tangun cjuatacun nuju cojo ná

ne, cumaji camahani ninguitsujun cjuandaja rë Nina. <sup>6</sup> Xuta xi tsajin tjin tangun cjuatacun rë me cojo ná ne, cuatju me cuma sacuatjin vatju nahñu tsja rë xca rë uva xi tijñi jan má: chandi rë, sehe xi; sehe chjaya rë cjue cueti. <sup>7</sup> Sa xi nihñu tangun sa cjuatacun nuju cojo ná hacuaha cuiyujucahndë sa cjua naha ngajñi rë cjuatacun nuju ne, chjahyun tu mé ni xi meje nuju, hane sacú nuju. <sup>8</sup> Nahmi naha ne, ma jyë ma hnga me cojo Hasen rë me hya xi ningacun xi xuta ladu naha jain má ngayun xi ninguitsujun cjuandaja rë me. <sup>9</sup> Sacuatjin hmu cacun ná Nahmi naja ne, hacuaha cuanitjin hmú cáacun nuju. Xicanichayuun cjuahmutacun naha. <sup>10</sup> Sa xi vinuhyun tsëhë cjua xi vitéxa nuju ne, ngayun ne, hatuxa nichayuun cjuahmutacun naha, sacuatjin ná ngahan xi cavíhndë tsëhë cjua xi cavitexa ná Nahmi naha hacuaha tsichayaan cjuahmutacun rë me.

<sup>11</sup> 'Cuatjin chjá cojo nuju, cojo sa xi cjuasua xi tjin ná ne, cuejña cahntsua xahasen nuju, sehe jercu tu ndaja camahani cuma nuju. <sup>12</sup> Vihi cjua xi vitéxa nuju: nihñu hmu tacún xingun xingu xingu ngayun, sacuatjin sahme hmú cáacun nuju ngahan. <sup>13</sup> Tsajin yo xi hitsë sa jyë cjuahmutacun tjin rë xi cuma rë ngu xuta xi sua me yojo rë me ngatsë rë amigu rë me. <sup>14</sup> Hane ngayun ne, amigu naha má ngayun, sa xi nihñu sacuatjin xi vitéxa nuju. <sup>15</sup> Ha quihndë cuichjaan xi hndixahan naha ngayun ta, tsëhë xi ngu mosu hndixahan ne, hvíin mé xi sahmi nai rë. Ngayun ne, amigu naha chjá tsujun ta, tsëhë xi yëjë cjua xi cáhndë xi cachja Nahmi naha ne, casuá camachaya nuju. <sup>16</sup> Hacuuiin ngayun canaxujun ná ta ngahan cavaxejen nuju. Hacuaha casuáxa nuju xi cuangun ninguitsujun cjuandaja rë Nina. Hane cjuandaja vëhë ne, tsajin nu tsajin nixtin xi cjuë. Xi cuatjin nihñu ne, tu mé ni xi chjahyun rë Nina Nahmi naja ngatsë rë xi xuta ladu naha má ngayun ne, sua nuju me. <sup>17</sup> Vihi cjua xi vitéxa nuju: nihñu hmu tacún xingun xingu xingu ngayun. —Cuatjin cachja Jesús.

*Choho vëë xuta Jesucristu cojo xuta ladu rë me*

<sup>18</sup> Quijinduju sa cachja Jesús cuitjin:

—Sa xi choho vëë nuju xuta xi marcuaain rë tsëhë Nina ne, suá cumachaya nuju ta chaja sa xi choho scuëë nuju me ne, ngahan ne, ha choho vëë ná me. <sup>19</sup> Sa xi hacuaha xuta xi marcuaain rë tsëhë Nina má ngayun ne, xuta xi cuacun vë ne, sahmi hmu cacun nuju me ta, ngayun ne, ladu rë me ngayun. Peru tsëhë xi ngayun ne, hacuiin xuta xi marcuaain rë tsëhë Nina má ngayun ta ngahan cavaxejen nuju xi cuetjunixun tsëhë xuta xi cuacun vë, vëhë xi choho vëë nuju me. <sup>20</sup> Ninguitsujun cjua xi cachjá cojo nuju hya xi cachjá



cojo nuju cuitjin: “Ngu mosu hndixahan ne, hacuiin hitsë sa venguichji rë xi cuma rë nai rë.” Sa xi catsuyihiya tjengui ná xuta cojo cjuahngatacun ne, hacuaha tsuyihiyatjengui nuju me cojo cjuahngatacun. Sa xi cahndë me tsëhë cjua naha ne, hacuaha cuihndë me tsëhë cjua nuju ngayun. <sup>21</sup> Yëjë xcusun vëhë sahmi xuta xi cuacun vë cojo nuju ngatsë naha ta, tsëhë xi hvíin me Nina, me xi catsingatju ná. <sup>22</sup> Tsajin mé jyë quitjen xuta xi cuacun vë sa xi canduvaan cachjá cojo rë me. Peru quihndë ne, sacuiinyiin rë me mé xi cuichja me xi cuaxëtje me yojo rë me. <sup>23</sup> Xuta xi choho vëë ná ngahan ne, hacuaha cojo Nahmi naha choho vëë me. <sup>24</sup> Tsajin mé jyë quitjen xuta xi cuacun vë sa xi casahmee ngajñi rë me cjuarcun xi tsajin sa ngu xuta xi ha casahmi me. Peru quihndë ne, ha cavëë me cjuarcun xi casahme, hane choho vëë ná me cojo Nahmi naha. <sup>25</sup> Peru cuatjin camá cojo sa xi cuetjucaa cjua xi camahindu xcun xujun rë Nina xi chja xuta xi cuacun vë xi jemu vihndë me tsëhë, cjua xi chja cuitjin: “Choho cavëë ná me, handasa vechiin chuva rë.” Cuatjin chja cjua jan.

<sup>26</sup> Cuinduva Hasen rë Nina, xi hatuxa tjin rë cjuaquixi rë Nina, hane cuisecoo nuju. Ngahan tsingátju nuju Hasen vëhë xi cuetju hiscan tacun Nina Nahmi naja, hane xi cjuehe ne, cuichja tsahan. <sup>27</sup> Hacuaha ngayun ne, cuinújun tsahan cojo xuta, tsëhë xi ngayun ne, ha nechun cojo ná hisca ntsacu cavetsihin.

## 16

<sup>1</sup> Cuatjin tichjá cojo nuju, cojo sa xi hacuiin cuetjunxun tsëhë ndiya naha. <sup>2</sup> Cuechú nixtin xi cumachohotje nuju yungun. Cuechú nixtin xi xuta xi tsiquehen nuju me ne, tsingataha cacun me xi jemu ndaja faharcun me Nina xi cuatjin sahmi me. <sup>3</sup> Cuatjin sahmi me ta, tsëhë xi hvíin me Nina Nahmi naja, hacuaha vijñii rcu me yo ngahan. <sup>4</sup> Cachjá cojo nuju cjua vëhë, cojo sa xi hya xi cuechú hora xi cuetjucaa ne, ninguitsjun xi cuatjin cachjá cojo nuju. —Cuatjin cachja Jesús.

### *Hacutjin sahmi Hasen rë Nina*

Quijinduju sa cachja Jesús cuitjin:

—Cachjaan cojo nuju cjua vëhë ntsacu cavetsihin ta, tsëhë xi ngahan ne, tejña cuaha cojo nuju. <sup>5</sup> Peru quihndë ne, cjuëtjenguë me xi catsingatju ná, hane hisca ngu ngayun ne, chjinengunsuun ná jani cjuë. <sup>6</sup> Hane tsëhë xi cuatjin cachjá cojo nuju cjua vëhë ne, ña catsë rë xahasen nuju cjuachoho. <sup>7</sup> Peru ngahan ne, cuichjá cojo nuju cjuaquixi ta tsujun ndaja xi cjuë ta, sa xi cjueen ne, Hasen xi cuisecoo nuju jan ne, hatuxa cuinduvaain. Peru sa xi cjuë ne, tsingátju

nuju Hasen rë Nina vë. <sup>8</sup> Hane hya xi Hasen vëhë cuinduva ne, vëhë tsinguixi xi hacuiin cuatjin xi tsingataha cacun xuta tsëhë cjuatsehen, hacuiin cuatjin xi tsingataha cacun me tsëhë cjuandaja, hacuiin cuatjin xi tsingataha cacun me tsëhë chuva rë xi cjuahachuva Nina xuta cojo cjuatacun rë me. <sup>9</sup> Hacuiin cuatjin xi tsingataha cacun xuta tsëhë cjuatsehen ta, tsëhë xi manguaain cacun me cojo ná. <sup>10</sup> Hacuiin cuatjin xi tsingataha cacun xuta tsëhë cjuandaja ta, tsëhë xi ngahan ne, cjuéjtjenguë Nina Nahmi naja hane ngayun ne, ha quihndë chuun ná. <sup>11</sup> Hacuiin cuatjin xi tsingataha cacun xuta tsëhë xi cjuahachuva Nina xuta cojo cjuatacun rë me ta, tsëhë xi Satanás, xi matitjun tsëhë ngasunhndë vihi ne, ha catsichuva Nina cojo cjuatacun rë.

<sup>12</sup> Jemu tjin sa ná cjuaxi cuichjá cojo nuju, peru ngayun ne, scaain nuju cuinuhyun quihndë. <sup>13</sup> Peru hya xi cuinduva Hasen xi hatuxa tjin rë cjuaquixi rë Nina ne, vëhë cuinchandiyandaja nuju ndiya rë cjuaquixi. Hacuiin cojo cjuatacun rë suvá xi cuichja ta sacuatjin cjuaxi chja Nina cojo ne, cjuaxi vëhë cuichja. Hacuaha vëhë cuichja cojo nuju hacutjin cuma nixtin nduva. <sup>14</sup> Hasen vëhë ne, vëhë sahmi jyë sahmi hnga ná cojo cjuatacun naha ta, tsëhë xi vëhë cjuaha xi tsahan sehe sua cumachaya nuju tsahan. <sup>15</sup> Yëjë ni xi tsëhë Nina Nahmi naja ne, hacuaha tsahan. Vëhë xi cachjá xi Hasen jan ne, cjuaha xi tsahan sehe sua cumachaya nuju tsahan. —Cuatjin cachja Jesús.

### *Cuya cjuasua cjuachoho rë xuta ladu rë Jesús*

<sup>16</sup> Hacuaha cachja sa Jesús cuitjin:

—Ha tu hitsë sa ne, ha quihndë chuun ná, hane ha tu hitsë nga sa ne, chun ná. —Cuatjin cachja Jesús.

<sup>17</sup> Ngajan xi ngujo xuta ladu rë Jesús jan ne, cuitjin cachja me cojo xicjin me:

—¿Mé vijne cjuaxi cuatjin chja me cojo naja? Chja me xi: “Ha tu hitsë sa ne, chuun ná, hane ha tu hitsë nga sa ne, chun ná”, hacuaha chja sa me xi: “Tsëhë xi cjuéjtjenguë Nina Nahmi naja”. <sup>18</sup> ¿Mé vijne cjuaxi “ha tu hitsë sa”? Vijnii rcuun mé xi chja me. —Cuatjin cachja me cojo xicjin me.

<sup>19</sup> Jesús ne, ha vëë me xi meje cjuinenguise xuta xi cuacun jan me tsëhë cjuaxi vëhë, vëhë xi Jesús ne, cachja me cojo rë xuta jan cuitjin:

—¿Há tichjinengunsun xingun tsëhë xi cachjá xi ha tu hitsë sa ne, chuun ná hane ha tu hitsë nga sa ne, chun ná? <sup>20</sup> Cuichjá cojo nuju cjuaquixi ta ngayun ne, chjihndun hacuaha chjihndunsun, peru xuta xi marcuaain rë me tsëhë Nina ne, jercu ndaja cuma rë me. Ngayun ne, jemu choho cuma nuju, peru cjuachoho nuju ne, cuya sua. <sup>21</sup> Hya xi ngu chjuun tsin rë me

quihndi ne, jemu tjin rë me cjuachoho ta, tsëhë xi cavechú hora xi cuatju me cjuañihi. Peru hya xi cavatju catsin quihndi ne, ha quihndë vitsjiin rë me tsëhë cjuañihi jan, ngatsë rë cjuasua rë me xi catsin ngu quihndi. <sup>22</sup> Cuatjin nuju ngayun ta quihndë ne, tjin nuju cjuachoho. Peru ngahan ne, cúa scuëë nga nuju, hane ngayun ne, jemu ndaja cuma rë xahasen nuju, hane cjuasua nuju jan ne, tsajin yo cuma cjuahatahá. <sup>23</sup> Hane nixtin hya ne, chjinengunsuun ná hisca ngu cju.

<sup>1</sup> Cuichjá cojo nuju cjuaquixi ta tu mé ni xi chjahyun rë Nina Nahmi naja ne, sua nuju me tsëhë xi ladu naha má ngayun. <sup>24</sup> Hisca quihndë ne, cjëë chjahyun ná ngu cjuandaja tsëhë xi ladu naha má ngayun. Chjahyun ne, sehe sacú nuju, cojo sa xi xahasen nuju ne, tsë rë cjuasua. —Cuatjin cachja Jesús.

*Caca rë Jesucristu catsinguijne me cjuatsehen rë ngasunhdë*

<sup>25</sup> Quijinduju sa cachja Jesús cuitjin:

—Ngahan ne, cojo ejemplu cachjá cojo nuju. Peru cuechú nixtin xi ha quihndë hacuiin cojo ejemplu cuichjá cojo nuju ta cuichjáquixë cojo nuju tsëhë Nina Nahmi naja. <sup>26</sup> Nixtin hya ne, hatuxa chjahyun cjuandaja tsëhë xi ladu naha má ngayun. Hane chjaan cojo nuju xi cuichjá ngatsë nuju cojo Nina Nahmi naja ta, <sup>27</sup> suvá Nina Nahmi naja ne, jemu meje rë me ngayun, tsëhë xi ngayun ne, hacuaha jemu meje nuju ngahan hacuaha macjain nuju xi ngahan ne, Nina catsingatju ná me. <sup>28</sup> Ngahan ne, hiscan tacun Nina cavétju canduvá nguehe ngasunhdë. Quihndë ne, cuétju tsëhë ngasunhdë, cúa cjuétjenguë Nina Nahmi naja. —Cuatjin cachja Jesús.

<sup>29</sup> Ngajan xi xuta ladu rë Jesús ne, cuitjin cachja me:

—Chutsujun ni. Quihndë ne, hacuiin cojo ejemplu tinújun ta tinújunquixun. <sup>30</sup> Quihndë ne, hyin ta ngayun ne, hyun yëjë ni cjuatacun, hacuaha hacuiin sahmi ngujoyë xi cjuinenguise nuju xuta ngu cju cojo sa xi cumachaya nuju mé xi tsingataha cacun xuta jan. Ngatsë rë vëhë xi macjain niji xi Nina catsingatju nuju me. —Cuatjin cachja xuta ladu rë Jesús.

<sup>31</sup> Ngajan xi Jesús ne, cuitjin cafayangui me:

—¿Há macjain jain nuju quihndë? <sup>32</sup> Chutsujun ni. Cuechú hora o ha hisca cavechú xi cuitsojo ngayun, jima ngu ngayun cojo ndya nuju, hane cuejñu ná suva. Peru ngahan ne, hacuiin suva tejña ta Nina Nahmi naja tacun me cojo ná. <sup>33</sup> Cuatjin chjá cojo nuju cojo sa xi sacú nuju cjuandaja cjuajeya ngatsë rë xi tjin tangun cjuatacun nuju cojo ná. Nguehe ngasunhdë ne, vatjun cjuañihi. Peru tuhun cjuasua xahasen nuju ta, ngahan ne, hacuaha caca ná catsinguijne cjuatsehen rë ngasunhdë. —Cuatjin cachja Jesús cojo xuta ladu rë me jan.

## 17

*Fehya Jesucristu cjuandaja xi cuma rë xuta ladu rë me*

<sup>1</sup> Xi cavatju cachja Jesús cuatjin ne, sehe cavutsejenniji me ngahnga, hane cachja me cuitjin:

—Ngayun Nahmi naha, ha cavechú hora. Nihñu jyë nihñu hnga ná cojo Hasen naha ngahan xi Quihndi nuju ngahan, cojo sa xi ngahan ne, hacuaha sahme jyë sahme hnga nuju cojo Hasen nuju. <sup>2</sup> Ngayun catuhunxun ná xi matitjun ngahan tsëhë yëjë xuta, cojo sa xi yëjë me xi catuhun ná ne, suá rë me cjuahñu xatsë. <sup>3</sup> Hane cuitjin xi sacú rë me cjuahñu xatsë, xi vëë me ngayun, ngayun xi ngu ni ngayun xi Nina xi cjuaquixi ngayun, hacuaha xi vëë ná me, ngahan xi Jesucristu ngahan, ngahan xi ngayun caningatjun ná. <sup>4</sup> Ngahan ne, casahme jyë casahme hnga nuju nguehe ngasunhndë ta, catsinguíjnetaha xa xi catuhun ná xi sahme. <sup>5</sup> Quihndë ne, nihñu jyë nihñu hnga ná cojo Hasen naha ndyá hiscan nechun, ngayun Nahmi naha. Tuhun ná Hasen ndajyihi xi hatjin ná hya xi nechun tangun cojo nuju hisca hya xi chaja sa cuejña ngasunhndë.

<sup>6</sup> 'Ngahan ne, casuá camachaya rë xuta xi catuhun ná nguehe ngasunhndë yo ngayun. Me xi cuacun vë ne, tsujun me, peru catuhun ná me. Hane cahndë me tsëhë cjua nuju. <sup>7</sup> Ha vëë me quihndë xi yëjë ni xcusun xi catuhun ná ne, ngayun caningatjun. <sup>8</sup> Cuatjin vëë me ta, tsëhë xi yëjë ni cjua xi catuhun ná ne, hacuaha casuá rë me. Hane me xi cuacun vë ne, cafahtsja me cjua vëhë, hacuaha vëëndaja me xi hiscan nechun cavétju canduvá nguehe, hacuaha macjain rë me xi ngayun caningatjun ná.

<sup>9</sup> 'Ngahan ne, tichjá cojo nuju ngatsë rë me xi cuacun vë. Tichjaan ngatsë rë xuta xi marcuaain rë tsujun ta tichjá ngatsë rë me xi catuhun ná, tsëhë xi tsujun me. <sup>10</sup> Yëjë ni xi tsahan ne, hacuaha tsujun, hane xi tsujun ne, hacuaha tsahan. Hane ngahan ne, cama jyë cama hnga ngahan cojo Hasen naha ngatsë rë xi tjin tangun cjuatacun rë me xi cuacun vë cojo ná. <sup>11</sup> Ha quihndë cuitejña sa nguehe ngasunhndë. Me xi cuacun vë ne, siu me ngasunhndë, peru ngahan ne, cuinduvatjënguë nuju. Ngayun Nahmi naha, ngayun xi hatuxa tyjahi cjuatacun nuju ne, nihñu me cuidadu cojo ngahñu nuju, ngahñu xi catuhun ná, cojo sa xi tjin tangun cjuatacun rë me cojo xicjin me, sacuatjin naja ngayaan. <sup>12</sup> Hya xi tejña cojo rë me ne, casahme cuidadu me cojo ngahñu nuju xi catuhun ná. Casahme cuidadu me, hane hisca ngu me cachajin me. Suvá ni cha xi hatuxa chajá ne, cha vëhë xi cachajá cha, cojo sa xi cuetjucaa cjua xi camahindu xcun xujun nuju. <sup>13</sup> Peru quihndë ne, cuinduvatjënguë nuju. Hane tichjá cjua vihi

nguehe ngasunhdë, cojo sa xi xuta ladu naha ne, tsë rë xahasen rë me cojo cjuasua xi quitsë rë xahasen naha suva. <sup>14</sup> Ngahan ne, casuá camachaya rë me cjua nuju. Hane xuta ngasunhdë xi marcuaain rë tsujun ne, choho vëë rë me, tsëhë xi hacuiin tsëhë ngasunhdë má me, sacuatjin ná ngahan xi hacuiin tsëhë ngasunhdë má ngahan. <sup>15</sup> Cjuehyaan nuju xi naxunxun me tsëhë ngasunhdë ta tiféhya nuju xi nihñu me cuidadu tsëhë Satanás. <sup>16</sup> Xuta ladu naha jan ne, hacuiin tsëhë ngasunhdë má me, sacuatjin ná ngahan xi hacuiin tsëhë ngasunhdë má ngahan. <sup>17</sup> Nihñu tsujun jain me cojo cjua xi hatuxa cjuaquixi. Cjua nuju ne, vëhë xi hmí rë cjuaquixi. <sup>18</sup> Sacuatjin caningatjun ná ngahan ngajñi rë xuta xi marcuaain rë tsujun ne, hacuaha cuatjin catsingátju xuta ladu naha ngajñi rë xuta xi cuacun vë. <sup>19</sup> Hane ngatsë rë xuta ladu naha ne, suá nuju yojo naha, cojo sa xi me xi cuacun vë ne, hacuaha tsujun jain cuma me cojo cjuaquixi.

<sup>20</sup> 'Quihndë ne, hacuiin ngatsë rë suvá ni xuta ladu naha vi xi tichjá cojo nuju ta hacuaha cojo ngatsë rë me xi sehe cumangu cacun cojo ná xi cuihndë me cjua xi chja xuta ladu naha tsahan. <sup>21</sup> Ngahan ne, xi meje ná ne, xi yëjë ni me xi cuacun vë ne, cuma tangun cjuatacun rë me cojo xicjin me. Sacuatjin nuju ngayun, Nahmi naha, xi nechunyun xahasen naha hane ngahan ne, tejñaya xahasen nuju ne, meje ná xi me xi cuacun vë ne, hacuaha hinchá me xahasen naja, cojo sa xi xuta ngasunhdë ne, cumacjain rë me xi ngayun caningatjun ná. <sup>22</sup> Ngahan ne, casahme yehe casahme hnga me cojo cjuatacun rë me sacuatjin canihñu jyë canihñu hnga ná ngahan cojo cjuatacun naha, cojo sa xi cuma tangun cjuatacun rë me cojo xicjin me, sacuatjin tjin tangun cjuatacun naja ngayaan cojo xingueen. <sup>23</sup> Meje ná xi ngahan ne, cuitejñaya xahasen rë me, sacuatjin nechunyun xahasen naha. Meje ná xi cuma tangun camahani cjuatacun rë me cojo xicjin me, cojo sa xi xuta ngasunhdë ne, cuijne rcu me xi ngayun caningatjun ná, hacuaha xi nihñu hmu tacún me sacuatjin nihñu hmu tacún ná ngahan.

<sup>24</sup> 'Ngayun, Nahmi naha, xuta xi catuhun me xi cuma me ladu naha ne, meje ná xi hiscan xi cuitejña ne, hacuaha ngajan cuiyuju me cojo ná, cojo sa xi scutsejen me hacutjin jyë hnga ngahan cojo hasen ndajyihi naha xi ngayun catuhun ná, tsëhë xi canihñu hmu tacún ná hisca chaja sa xi cuejña ngasunhdë. <sup>25</sup> Ngayun Nahmi naha, ngayun xi quixi ngayun cojo cjuatacun nuju, xuta ngasunhdë ne, hviiin nuju me, peru ngahan ne, hvë nuju, hane xuta ladu naha vi ne, vëë me xi ngayun caningatjun ná. <sup>26</sup> Ngahan casuá camachaya rë me yo ngayun, hane suá sa cumachaya rë me, cojo sa xi

cjuahmutacun xi tjin nuju cojo ná ne, cuejña cahntsua xahasen rë me hacuaha ngahan ne, cuitejña cahntsua xahasen rë me. —Cuatjin cafehya Jesús cjuandaja cojo Nina.

## 18

### *Hacutjin camá xi cachjahá rë Jesucristu*

<sup>1</sup> Hya xi camá ne, xi cavatju cachja Jesús cjua vëhë ne, sehe cavetju me quiji me cojo xuta ladu rë me ngunda vëhë tsëhë caniña Cedrón. Hane ngajan cavisehen Jesús cojo xuta ladu rë me ngu ngajñi yatjë xi tjin jan. <sup>2</sup> Quihndë ne, cha Judas, cha xi sahmi rë entregadu Jesús ne, hacuaha vëe cha cahndë vëhë ta, jemu quiji Jesús cahndë vëhë camatangun me cojo xuta ladu rë me. <sup>3</sup> Ngajan xi cha Judas ne, quijicojo cha ngujo sindadu cojo cha mayu cojo cha nisë rë cha, cha xi catsingatju nahmi xi matitjun cojo cha fariseo. Quiji cha xi cuacun jan ngajan cojo ndihi cojo quicha. <sup>4</sup> Hane Jesús ne, tsëhë xi ha vëe me yëjë xcusun xi cuatju me cuma ne, quijivaha me xcun cha xi cuacun jan, sehe cavinenguisse me cha cuitjin:

—¿Yo xi meje nuju? —Cuatjin cavinenguisse me.

<sup>5</sup> Ngajan xi cha xi cuacun jan ne, cuitjin cafayangui cha:

—Xuta Nasaret xi hmí rë Jesús. —Cuatjin cafayangui cha.

Hane Jesús ne, cuitjin cachja me:

—Ngahan xi nújun vë. —Cuatjin cachja me.

Quihndë ne, Judas, cha xi sahmi rë me entregadu ne, cojo cha secun cha cojo cha xi cuacun vë. <sup>6</sup> Hane hya xi cachja Jesús xi: “Ngahan xi nújun vë” ne, quijingaxtun yëjë cha xi cuacun jan, hane caticja cha. <sup>7</sup> Ngajan xi Jesús ne, cavinenguisse nga me cha cuitjin:

—¿Yo xi meje nuju? —Cuatjin cavinenguisse me.

Hane cha xi cuacun jan ne, cuitjin cachja nga cha:

—Xuta Nasaret xi hmí rë Jesús. —Cuatjin cachja cha.

<sup>8</sup> Hane Jesús ne, cuitjin cafayangui me:

—Ha cachjá cojo nuju ta ngahan xi nújun vë. Sa xi ngahan meje nuju ngahan ne, tuhun cahndë catje me xi cuicun vi. —Cuatjin cafayangui me.

<sup>9</sup> Cuatjin cachja Jesús cjua vëhë cojo sa xi cuetjucaa cjua xi ha cachja me cuitjin: “Xuta xi catuhun ná me ne, hisca ngu me catsichajan me.” <sup>10</sup> Ngajan xi Simón Pedru ne, cavaxë me quichandujú xi yaha me, hane cavatësun me tyjavañuju quixi mosu hndixahan rë nahmi xi matitjun jan, cha xi hmí rë Malco. <sup>11</sup> Ngajan xi Jesús ne, cuitjin cachja me cojo Pedru:

—Teyunndujun quicha nuju vë. Hatuxa tsingatehen xi cuátju cjuañihi sacuatjin xi meje rë Nina Nahmi naja. —Cuatjin cachja Jesús.

*Nahmi xi matitjun ne, sahmi cuenda me jyë rë Jesús*

<sup>12</sup> Hya xi camá ne, cha sindadu cojo capitán rë cha, cojo mayu cojo cha nisë rë cha, cha xi catsingatju xutaxa rë yungun jan ne, cafaha cha Jesús, catsihñu cha me, <sup>13</sup> sehe quiji caní cha me titjun xcun Anás. Anás vë ne, nahmichahya rë Caifás má me. Hane nu vëhë ne, nahmi xi matitjun tsëhë yëjë ni nahmi má Caifás. <sup>14</sup> Quihndë ne, Caifás vë ne, me vëhë xi cavinchangui me xutaxa rë xi ndaja tsëhë xutaxa rë xi ngu xihin ni cueya gatsë rë yëjë ni xuta.

*Chja Pedru xi hacuiin ladu rë Jesucristu má me*

<sup>15</sup> Quihndë ne, Simón Pedru cojo ngu sa cha ladu rë Jesús jan ne, tjengui me quiji me cojo Jesús. Hane cha ladu rë Jesús xingu jan ne, tsëhë xi vëë nahmi xi matitjun jan cha ne, cojo cha cavisehen cha cojo Jesús cahntsua hnchua ndatsen ndava nahmi xi matitjun jan. <sup>16</sup> Peru Pedru ne, casecun ni me ngajan candatsen tingotjo hnchua jan. Ngajan xi cha ladu rë Jesús xi vëë nahmi jan ne, cavetju nga cha quiji cachja cha cojo na xi quitahá cuidadu rë tingotjo hnchua jan. Hane sehe catsingusehen cha Pedru cahntsua hnchua. <sup>17</sup> Hane na xi sahmi cuidadu tingotjo hnchua jan ne, cuitjin cavinenguisse rë na Pedru:

—¿Hacuiin cojo ngayun má ngayun ladu rë me xi cuajyihí vë? —Cuatjin cavinenguisse na.

Hane Pedru ne, cuitjin cafayangui me:

—Jéya, hacuiin. —Cuatjin cafayangui me.

<sup>18</sup> Hane mosu rë nahmi jan cojo cha sindadu jan ne, cavejña cha ngu ndava ndihi, tsëhë xi jemu hnchan. Sehe hinchacun cha tijima hasu rë cha jan. Hacuaha cojo Pedru secun me jan, jima hasu rë me.

*Fahatáha nahmi xi matitjun jan Jesucristu*

<sup>19</sup> Hane xi cafehe cha xi cuacun jan cojo Jesús jan ne, sehe cavetsihin cafahatáha nahmi xi matitjun jan me tsëhë xuta ladu rë me cojo tsëhë cjuachacun rë me. <sup>20</sup> Hane Jesús ne, cuitjin cafayangui me:

—Ngahan ne, xcun cojo xcun cachjá cojo yëjë ni xuta, hacuaha cavicuyá rë me ngajan yungun langa o sa xi ngajan yungun xi matitjun, hiscan xi matangun ngayejen ni xuta tjë rë Israel. Tsajin mé xi cachjá xi táhahma. <sup>21</sup> Hane ¿mé má ngahan chjuhuntuhan ná ni? Chjuhuntuhan rë me xi cahndë cjua naha. Chjinengunsun rë me mé xi cachjá cojo rë me. Me xi cuacun vë ne, vëë me cjua xi cachjá. —Cuatjin cafayangui Jesús.

<sup>22</sup> Hane xi cuatjin cachja Jesús cjua vëhë ne, ngu cha mayu xi secun tiña jan ne, cavajaya cha ngu xcun Jesús, sehe cachja cha cuitjin cojo rë me:

—¿Há cuatjin chjayengui tsëhë nahmi xi matitjun? —Cuatjin cachja cha.

<sup>23</sup> Ngajan xi Jesús ne, cuitjin cafayangui me tsëhë cha:

—Sa xi choho cachjá ne, tinújun cojo yëjë xuta mé xi choho cachjá. Peru sa xi ndaja cachjá ne, ¿mé má cuatjin vujun ná ni? —Cuatjin cafayangui me.

<sup>24</sup> Ngajan xi Anás ne, hacuanitjin ni tjihñu cuaha Jesús ne, catsingatju me Jesús xcun nahmi xi matitjun tsëhë yëjë ni nahmi.

*Chja nga Pedru xi hacuiin ladu rë Jesucristu má me*

<sup>25</sup> Jinguyëjë rë xi tichjahátáha rë Jesús jan ne, Pedru ne, secun me xcun ndihi tijima hasu rë me. Hane cachjahátáha rë me cuitjin:

—¿Hacuiin cojo ngayun má ngayun ladu rë me vëhë? —Cuatjin cachjahátáha rë me.

Hane Pedru ne, cavetsangui me, cuitjin cachja me:

—Jéya, hacuiin. —Cuatjin cachja me.

<sup>26</sup> Ngajan xi ngu mosu rë nahmi xi matitjun jan, cha xi xicjin rë cha xi cavatësun Pedru tyjavañuju jan ne, cuitjin cachja cha cojo Pedru:

—¿Há cahveen nuju cojo rë me ngajñi yatjë jan ni? —Cuatjin cachja cha.

<sup>27</sup> Cavetsangui nga Pedru ngu ndiya. Hane ha hora vëhë ni ne, cajiñda xahnda.

*Fahatáha Pilatu Jesucristu*

<sup>28</sup> Ngajan xi xuta matitjun tsëhë xuta tjë rë Israel jan ne, cavaxë me Jesús tsëhë ndava Caifás, hane quijicojo me ndihya jyë hiscan tacun Pilatu, xutaxa rë xi matitjun. Nguitajñu xati hora vëhë. Hane xuta xi quijicojo rë Jesús jan ne, cavisiiin me cahntsua ndihya jyë jan, ngatsë rë xcusun rë me xi ma chocun yojo rë me xcun Nina hya xi visehen me ndava xutaxín. Hane sa xi cuatjin cuma chocun yojo rë me ne, cumaji sinë nguixun me comida suhi tsëhë Pascua. <sup>29</sup> Vëhë xi cavetju Pilatu quijitjengui rë me candatsen. Hane cuitjin cavinenguisse me:

—¿Mé jyë vinchun tsëhë cha xi cuijyihí vi? —Cuatjin cavinenguisse Pilatu.

<sup>30</sup> Hane xuta xi cuacun jan ne, cuitjin cafayangui me:

—Sa xi hacuiin choho tisahmi cha ne, canduvinchanii nuju cha. —Cuatjin cafayangui me.

<sup>31</sup> Hane Pilatu ne, cuitjin cachja me:

—Chjuhun cha ne, chjuhunchuvun suvun cha cojo jyë rë cha sacuatjin chja ley nuju. —Cuatjin cachja Pilatu.

Ngajan xi xutaxa rë yungun xi cuacun jan ne, cuitjin cachja me:



—Ley nuju ngayun ne, chja ta ngayin ne, cumaji niquihin xuta. —Cuatjin cachja xuta xi cuacun jan.

<sup>32</sup> Cuatjin camá cojo sa xi cuetjucaa cjua xi cachja Jesús hya xi cachja me mé chuva rë cueya me.

<sup>33</sup> Ngajan xi Pilatu ne, cavuya cavisehen nga me ndihya. Hane cajindaya me Jesús, sehe cavinenguisse me cuitjin:

—¿Há ngaye xu matitjun ngaye tsëhë xuta tjë rë Israel? —Cuatjin cavinenguisse me.

<sup>34</sup> Hane Jesús ne, cuitjin cafayangui me:

—¿Há cojo cjuatacun nuju suvun chjinengunsun ná cjua vëhë?, o há tsajin ne, ¿há tjin yo cachja cojo nuju tsahan? —Cuatjin cafayangui me.

<sup>35</sup> Ngajan xi Pilatu ne, cuitjin cafayangui me:

—¡Peru ngahan ne, hacuiin xuta Israel ngahan! Suvá xuta nangui riji cojo nahmi xi matitjun casahmi ri me entregadu cojo ná. ¿Mé canihñi? —Cuatjin cafayangui Pilatu.

<sup>36</sup> Ngajan xi Jesús ne, cuitjin cafayangui me:

—Xa naha xi sahme gobiernu ne, hacuiin ngasunhdë vihi cafaántsa. Sa xi ngasunhdë vihi cafaántsa xa xi sahme gobiernu ne, xuta ladu naha ne, scaan me cojo sa xi cumaji cuma ngahan entregadu tsja xutaxa rë yungun. Peru xa naha xi sahme gobiernu ne, hacuiin nguehe cafaántsa. —Cuatjin cafayangui Jesús.

<sup>37</sup> Hane Pilatu ne, cuitjin cachja me cojo Jesús:

—¿Ngajan xi ngaye xi matitjun ngaye ni? —Cuatjin cachja me.

Hane Jesús ne, cuitjin cafayangui me:

—Cuatjin sacuatjin nújun vë. Ngahan ne, canduvá nguehe ngasunhdë hacuaha catsin ngahan cojo sa xi cuichjá cojo xuta cjua xi cjuaquixi. Yëjë xuta xi marcun rë me tsëhë cjuaquixi ne, hatuxa vetaharcu me cjua naha. —Cuatjin cafayangui Jesús.

<sup>38</sup> Hane Pilatu ne, cuitjin cachja me:

—¿Mé xi hmí rë cjuaquixi ni? —Cuatjin cachja Pilatu.

*Chja xutaxa rë yungun xi meje rë xi cueya Jesucristu.*

Hane xi cafë cachja Pilatu cjua vëhë ne, sehe cavetju nga me quiji cachja me cojo xutaxa rë yungun, cuitjin cachja me:

—Sacuiin ná hisca ngu jyë rë cha xi cuajyihí vë. <sup>39</sup> Peru ngayun ne, tjin nuju ngu xcusun xi tsisme ngu presu nixtin rë suhi rë Pascua. ¿Há meje nuju xi tsisme me xi matitjun tsujun? —Cuatjin cachja me.

<sup>40</sup> Hane xuta xi cuacun jan ne, cajindaya me cachja me cuitjin:

—¡Hacuiin cha vëhë ta Barrabás nismu cha! —Cuatjin cajindaya me cachja me.

Quihndë ne, Barrabás jan ne, ngu cha fahataha cjuachan cha.

## 19

<sup>1</sup> Ngajan xi Pilatu ne, catsingatju me Jesús casehen rë me. <sup>2</sup> Hane cha sindadu xi cuacun jan ne, xi camá catsihya cha ngu corona nahyá ne, sehe cavesun cha rcu Jesús, hacuaha catsi-  
caja cha me ngu tsjian moradu. <sup>3</sup> Hya xi camá ne, quijivaha cha jima ngu cha xcun me, sehe cavetsihin cavincha cha viva rë me xi tsixcuehyu cha me sacuaha xi me vëhë matitjun me tsëhë xuta tjë rë Israel. Hacuaha cavajaya cha xcun me.

<sup>4</sup> Hya xi camá ne, Pilatu ne, cavetju nga me candatsen, hane cuitjin cachja me cojo xuta xi cuacun jan:

—Chutsujun ni, cuáxë cha nguehe, cojo sa xi cumachaya nuju ta sacuiin ná hisca ngu jyë rë cha. —Cuatjin cachja Pilatu.

<sup>5</sup> Ngajan xi Jesús ne, cavetju me candatsen, quisun rcu me corona nahyá hacuaha yaja me tsjian moradu jan. Sehe cachja Pilatu cojo xuta cuitjin:

—Chutsujun ni, cuajyihí cha nguehe. —Cuatjin cachja me.

<sup>6</sup> Hane hya xi cavëë nahmi xi cuacun matitjun jan cojo cha mayu cojo nisë rë cha Jesús ne, cajindaya cha cachja cha cuitjin:

—¡Tetuhun cha xcun cru! ¡Tetuhun cha xcun cru! —Cuatjin cajindaya cha cachja cha.

Ngajan xi Pilatu ne, cuitjin cachja me:

—¡Chjuhun suvun cha, tetuhun cha xcun cru ta, ngahan ne, sacuiin ná hisca ngu jyë rë cha! —Cuatjin cachja Pilatu.

<sup>7</sup> Ngajan xi xutaxa rë xi cuacun jan ne, cuitjin cachja me:

—Ngayin ne, tjin ngu ley xi vitexa niji, hane sacuatjin chja ley vëhë ne, vechú chuva rë xi cueya cha ta, tsëhë xi cachja suvá cha xi Quihndi rë Nina cha. —Cuatjin cachja xutaxa rë jan.

<sup>8</sup> Hane xi cahndë Pilatu cjua vëhë ne, hitsë sa catsacjun me camá. <sup>9</sup> Sehe cavuya cavisehen nga me cahntsua ndihya, hane sehe cafahatáha me Jesús cuitjin:

—Ngayun ne, ¿jani canduvun? —Cuatjin cafahatáha me Jesús.

Peru Jesús ne, cafayanguiin me tsëhë Pilatu. <sup>10</sup> Ngajan xi Pilatu ne, cuitjin cavinenguise me cojo Jesús:

—¿Há chayunnguun tsahan? ¿Há hyúun ta ngahan ne, cuma tsisme nuju hacuaha cuma cuitéxa xi setaha ngayun xcun cru? —Cuatjin cavinenguise Pilatu.

<sup>11</sup> Hane Jesús ne, cuitjin cafayangui me:

—Ngayun ne, cuma nihñu cojo ná cuatjin, peru suvá ni ngatsë rë xi Nina casua nuju me cahndë. Vëhë xi me xi

casahmi ná entregadu cojo nuju ne, hitsë sa jyë jyë rë me xi cuma nuju ngayun. —Cuatjin cafayangui Jesús.

<sup>12</sup> Xi cahndë Pilatu cjua vëhë ne, cavangui me chuva rë xi tsismi me Jesús. Peru xutacjín jan ne, cajindaya me cachja me cuitjin:

—Sa xi nismu cha xi cuajyihi vë ne, hacuiin amigu rë César, me xi matitjun camahani, má ngayun. Ngu xuta xi chja suvá me xi matitjun me ne, hatuxa condra rë César má me. —Cuatjin cajindaya me cachja me.

<sup>13</sup> Hane xi cahndë Pilatu cjua vëhë ne, sehe cavaxë nga me Jesús candatsen, sehe quiji me cavéjña me hiscan sahmi cuenda me jyë rë xuta, cahndë hiscan hmí rë Texondaja rë, hane xi hne hebreo ne, Gabata hmí rë. <sup>14</sup> Hora vëhë ne, sacuaha nchisen tsëhë nixtin vispra rë suhi tsëhë Pascua. Ngajan xi Pilatu ne, cuitjin cachja me cojo xuta:

—¡Chutsujun ni, cuajyihi me xi matitjun tsujun nguehe! —Cuatjin cachja me.

<sup>15</sup> Hane xuta jan ne, cuitjin cajindaya me cachja me:

—¡Naxunxun cha, naxunxun cha tsëhë nguehe! ¡Tetuhun cha xcun cru! —Cuatjin cajindaya me cachja me.

Ngajan xi Pilatu ne, cuitjin cavinenguisse me:

—¿Há cuétaha me xi matitjun tsujun xcun cru ni? —Cuatjin cavinenguisse me.

Ngajan xi nahmi xi cuacun matitjun jan ne, cuitjin cafayangui me:

—¡Ngu ni César, me vëhë xi matitjun me tsijin! —Cuatjin cafayangui me.

<sup>16</sup> Ngajan xi Pilatu ne, cajne cacun me. Hane casahmi me entregadu Jesús xi cjue setaha me xcun cru xi cueya me. Sehe cafhatsja xuta xi cuacun jan me.

### *Setaha Jesucristu xcun cru*

<sup>17</sup> Hya xi camá ne, quisuntyja suvá Jesús cru, cavetju me quiji me cojo xuta cahndë hiscan xi hmí rë Nínda Rcuun, hane xi hne hebreo ne, Gólgota hmí rë. <sup>18</sup> Hane ngajan casetaha me xcun cru. Hacuaha cojo sa jo cha caviyujutaha cha xcun cru rë cha, ngu ngu cha ngu ngu ladu tjehe rë me. Hane Jesús ne, cavasen caseya me. <sup>19</sup> Hacuaha catsihindu Pilatu ngujo cjua xi casetaha rcu cru rë Jesús, cuitjin camahindu: “Jesús, Xuta Nasaret, Xi Matitjun Tsëhë Xuta Israel.” <sup>20</sup> Cjua vëhë ne, jemu cjín xuta cavutaya me, tsëhë xi cahndë hiscan casetaha Jesús xcun cru ne, tiña tacun nandya. Camahindu cjua vëhë cojo hne hebreo cojo latín cojo griego. <sup>21</sup> Ngajan xi nahmi xi matitjun tsëhë xuta tjë rë Israel jan ne, cuitjin cachja me cojo Pilatu:

—Ndajintjin xi cuatjin canihindun “Xi Matitjun Tsëhë Xuta Israel” ta, xi ndatjin ne, “Cachja Cha: Ngahan Matitjun Ngahan Tsëhë Xuta Israel.” —Cuatjin cachja me.

<sup>22</sup> Hane Pilatu ne, cuitjin cafayangui me:

—Ha catsihindu cjua xi meje tsihindu. —Cuatjin cafayangui me.

<sup>23</sup> Ngajan xi sindadu jan ne, xi cavatju cavetaha cha Jesús xcun cru ne, sehe cafaha cha tsjian xcun rë me cojo yëjë sa xi tsë xi xtí xi sahmixa cojo me, cavatëcja cha ngajñi catsiñuju cha. Hacuaaha cafaha cha tsjian ngahma rë me. Quihndë ne, tsjian vëhë ne, hacuiin casehencoo ta tsjian tu të ni. <sup>24</sup> Ngajan xi cha sindadu jan ne, cachja cha cojo xicjin cha cuitjin:

—Tsjian vëhë ne, hacuiin cuichan ta naxeen suerte tsëhë ne, jarë ngayaan xi satë naja. —Cuatjin cachja cha.

Cuatjin camá cojo sa xi cuetjucaa cjua xi camahindu xcun xujun rë Nina xi chja cuitjin:

Cavatëcja cha tsjian naha ngajñi rë cha, hacuaaha cavaxë cha suerte ngatsë rë tsjian naha.

Cuatjin casahmi cha sindadu jan.

<sup>25</sup> Quihndë ne, tiña cru rë Jesús jan ne, secun naa rë me, cojo tichja naa rë me, cojo na María chjuun rë Cleofas, cojo na María na Mágdala. <sup>26</sup> Hane xi cavëë Jesús naa rë me cojo cha ladu rë me xi jemu vinga rë me jan xi secun tangun cha cojo naa rë me ne, sehe cachja me cuitjin cojo naa rë me:

—Ngayun chjuun, cuajyih quihndi nuju ndyá.

<sup>27</sup> Hane cha ladu rë me jan ne, cuitjin cachja me cojo rë cha: —Cuajyih naa nuju ndyá. —Cuatjin cachja Jesús.

Ha nixtin hya ni ne, quiijicojo cha ladu rë Jesús jan naa rë me ndava cha, ngajan cavëjñacahndë me.

### *Cjuaveya rë Jesucristu*

<sup>28</sup> Hane xi camá ngascan ne, Jesús ne, ha vëë me xi camachihin yëjë xa xi cachja Nina xi sahmi me. Hane cojo sa xi cuetjucaa cjua xi camahindu xcun xujun rë Nina ne, cuitjin cachja me:

—Jemu xinda ná. —Cuatjin cachja me.

<sup>29</sup> Quihndë ne, tacun jan ngu hiscan jemu hincha xan yufa. Ngajan xi sindadu jan ne, catsicahnchi cha ngu tsjian hinda cojo xan jan ne, sehe catsitjinguia cha rcu ngu ya nduju, sehe catsiquijin cha cavetaha cha hntsua Jesús. <sup>30</sup> Hane xi camá cahvi Jesús xan jan ne, sehe cachja me cuitjin:

—Camachihin quihndë. —Cuatjin cachja Jesús.

Hane xi catsiquindi me rcu me ne, hora vëhë cahme me.

*Cavitengui cha sindadu quicha ngu ladu ntsacu ndanisin rë Jesucristu*

<sup>31</sup> Hya xi camá ne, xutaxa rë yungun ne, cafehya me favor cojo Pilatu xi cuitexa me ne, xtotoho ntsacu me xi caviyujutaha xcun cru rë jan, sehe chjaháxin rë nima. Cuatjin cafehya me ta, tsëhë xi nixtin hya ne, vispra tsëhë suhi, hane mijí rë me xi cuiyujutaha nima xcun cru rë hisca cuma nchujun, tsëhë xi, xi cuma nchujun jan ne, nixtin chjahájenda rë hacuaha jemu nixtin jyë. <sup>32</sup> Ngajan xi sindadu jan ne, quiji cavotoho cha ntsacu catsijo ni cha xi hacuaha cojo caviyujutaha xcun cru rë cojo Jesús. <sup>33</sup> Peru xi cafehe cha xcun cru rë Jesús ne, xi cavëë cha xi ha cahme me ne, cavotaain cha ntsacu me. <sup>34</sup> Peru ngu cha sindadu jan ne, quiji cavitengui cha quicha ngu ladu ntsacu ndanisin rë Jesús, hane ngutjen ni cavetju jni cojo nandá. <sup>35</sup> Cha xi cavëë ne, chja cha tsëhë xcusun vëhë, cojo sa xi ngayujun ni ngayun ne, cumacjain nuju. Cjua xi chja cha ne, cjuaquixi, hacuaha cha vëhë ne, vëë cha ta cjuaquixi cjua xi chja cha. <sup>36</sup> Cuatjin camá xcusun vëhë, cojo sa xi cuetjucaa cjua xi chja xujun rë Nina xi chja cuitjin: “Hisca ngu nínda rë me xtotaain.” <sup>37</sup> Hacuaha chja nga ngu cahndë xujun rë Nina cuitjin: “Scuëë xuta me xi caxtengui rë quicha.” Cuatjin chja xujun rë Nina.

### *Seyaniji Jesucristu*

<sup>38</sup> Xi cavatju xcusun vëhë ne, José, ngu xuta Arimatea ne, cafehya me cahndë cojo Pilatu xi cjuahaxin me nima Jesús. José jan ne, hacuaha xuta ladu rë Jesús má me, handasa catsingacuiin me xi xcun cojo xcun, tsëhë xi tsacjun me xutaxa rë yungun. Hane Pilatu ne, casua me cahndë. Hya xi camá ne, quiji cafahaxin José nima. <sup>39</sup> Nicodemo, me xi quiji cavisiajmi cojo Jesús ngu nguixun jan ne, hacuaha cojo me quiji me cojo José. Yaha me sacuaha cantë kilu aceite xi jemu ndaja jne xi cuëhëchjine me yojo rë nima jan. <sup>40</sup> Ngajan xi, xi cafaha me nima jan ne, sehe cavitejnu rë me aceite hacuaha catsitjingu rë me tsjian, sacuatjin xcusun rë xuta tjë rë Israel hya xi vinchaniji me nima rë me. <sup>41</sup> Quihndë ne, tiña hiscan cavetaha xuta Jesús xcun cru xi catsiquehen me ne, tjin ngu ngajñi yatjë. Hane ngajñi yatjë jan ne, tacun ngu tsjun xatsë, xi hisca ngu nima cjëë seya. <sup>42</sup> Ngajan ni caveya me nima Jesús, tsëhë xi ngajan xi tiña, hacuaha ha vispra tsëhë suhi nixtin hya.

## 20

### *Tsjun tiya*

<sup>1</sup> Quihndë ne, nixtin xi tjun tjun tsëhë totje jan ne, na María na Mágdala jan ne, nguitajñu jñu sa ne, cavetju na quiji na xcun tsjun rë nima Jesús. Hane xi cafehe na jan ne, cavëë na xi ndyojo xi quitahá tingotjo rë tsjun jan ne, cachjaháxin rë.

<sup>2</sup> Ngajan xi vangasanii na quiji na hiscan tacun Simón Pedru cojo cha ladu rë Jesús xingu jan, cha xi jemu vinga rë Jesús. Hane xi cafehe na jan ne, cuitjin cachja na:

—Cavaxë me nima Nai naja tsëhë tsjun rë, hane hyaan jani quiji chani rë. —Cuatjin cachja na.

<sup>3</sup> Ngajan xi Pedru cojo cha xingu jan ne, cavetjusanii me, quiji me xcun tsjun jan. <sup>4</sup> Vanga me catsijo me quiji me, peru cha xingu jan ne, hitsë sa hñu cavanga cha xi cuma rë Pedru, hane tjun cha vëhë cafehe cha xcun tsjun. <sup>5</sup> Hane xi cafehe cha jan ne, catsiquindi cha yojo rë cha, hane cavëë cha tsjian xi cavitjingui rë nima Jesús, siu jan. Peru cavisiin cha. <sup>6</sup> Hane xi cafehe Simón Pedru xi camá ngascan ne, cavisehen me cahntsua tsjun jan. Hane cavëë me tsjian jan siu, <sup>7</sup> hane pañutu xi camahñu rcu nima jan ne, hacuiin tacun tangun cojo tsjian jan ta tjeyu ne, xín tacun. <sup>8</sup> Ngajan xi cha ladu rë Jesús xi cafehe titjun xcun tsjun jan ne, hacuaha cavisehen cha. Hane cavëë cha hacuaha camacjain rë cha. <sup>9</sup> Nixtin hya ne, cjëë sa cuijne rcu cha xi chja xujun rë Nina xi nima Jesús ne, meje rë xi cuya me cjuahñu. <sup>10</sup> Hya xi camá ne, xuta ladu rë Jesús jan ne, cavuya cafe me.

### *Cavëë na María na Mágdala Jesucristu*

<sup>11</sup> Hane na María ne, hacuaha cavuya quiji nga na xcun tsjun jan, hane ngajan casecun na tingotjo cajihnda na. Hane táha tijihnda na ne, catsiquindi na yojo rë na, cavutsejenya na cahntsua tsjun jan. <sup>12</sup> Hane cavëë na jo ángel xi tyava tsjian rë, siu hiscan cafaña nima; ngu ne, táha hiscan cafaña rcu nima hane xingu ne, táha hiscan caviyuju ntsacu. <sup>13</sup> Ngajan xi ángel jan ne, cuitjin cavinenguise rë na:

—Ngaye chjuun, ¿mé má chjihnde? —Cuatjin cavinenguise ángel jan na.

Hane na vëhë ne, cuitjin cachja na:

—Cavaxë me maestru naha ne, hveen jani quiji chani rë. —Cuatjin cachja na.

<sup>14</sup> Hane xi cavatju cachja na cjua vëhë ne, sehe cavuya na táha ngaxtun na, hane cavëë na Jesús secun me jan. Peru hvíin na xi hacui Jesús. <sup>15</sup> Ngajan xi Jesús ne, cuitjin cachja me:

—Ngaye chjuun, ¿mé má cuatjin chjihnde? ¿Yo xi vinchise? —Cuatjin cachja me.

Hane xi má rë na vëhë ne, cha xi sahmi cuidadu yatjë jan xi cachja. Vëhë xi cachja na cuitjin:

—Tatá, sa xi ngayun canaxun nima ne, tinújun jani catsangun chanu, sehe cjuë jaha. —Cuatjin cachja na.

<sup>16</sup> Ngajan xi Jesús ne, cuitjin cachja me cojo rë na:

—¡María! —Cuatjin cachja me.

Hane xi cavuya na ne, sehe cachja na hne hebreo cuitjin:

—¡Rabuni! —Cuatjin cachja na cjua xi meje cuichja Maestro.

<sup>17</sup> Ngajan xi Jesús ne, cuitjin cachja me cojo rë na:

—Ha quihndë xicachunhñuu sa ná ta cjëë cjuëneje cjuëtjenguë Nina Nahmi naja. Peru tánguntjengun xuta ladu naha xi yahnga, hane cuitjin tinújun cojo rë me: “Cjuëneje, cjuëtjenguë Nahmi naha, me xi hacuaha Nahmi nuju, me xi Nina naha hacuaha Nina nuju ngayujun ni.” Cuatjin tinújun. —Cuatjin cachja Jesús.

<sup>18</sup> Ngajan xi na María na Mágdala jan ne, quiji cachja na cojo xuta ladu rë Jesús cuitjin:

—¡Cahvë maestru naja! —Cuatjin cachja na.

Hacuaha cachja na cjua xi cachja Jesús cojo rë na.

### *Cavëë xuta ladu rë Jesucristu me*

<sup>19</sup> Hane xi camajñu ndaja tsëhë nixtin tjun tjun tsëhë totje jan ne, tjin tangun xuta ladu rë Jesús jan. Hane tichjáhñu tingotjo ndihya siu me, tsëhë xi tsacjun me xutaxa rë yungun jan. Hya xi camá ne, cafehetsejen Jesús casecun me ngajñi rë xuta ladu rë me, hane cuitjin cachja me:

—Cjuandaja cjuajeya catejña cojo nuju. —Cuatjin cachja me.

<sup>20</sup> Hane xi cavatju cachja me cjua vëhë ne, sehe catsingacun me tsja me hacuaha catsingacun me ngu ladu ntsacundanisín rë me. Ngajan xi xuta ladu rë me jan ne, jemu ndaja camá rë me hora xi cavëë me maestru naja. <sup>21</sup> Hane cachja nga Jesús cojo rë me xi cuacun jan cuitjin:

—Cjuandaja cjuajeya catejña cojo nuju. Sacuatjin catsingatju ná Nina Nahmi naja ne, hacuaha cuatjin tsingátju nuju ngayun. —Cuatjin cachja Jesús.

<sup>22</sup> Hane xi cavatju cachja me cjua vëhë ne, sehe cachimatjo me xuta jan, sehe cachja me cuitjin:

—Chjuhunntsun Hasen rë Nina cahntsua xahasen nuju.

<sup>23</sup> Xuta xi ninchatuhun jyë rë me ne, ha camanchataha. Hane xuta xi ninchatuun jyë rë ne, ha camanchataain. —Cuatjin cachja Jesús.

### *Cavëë Tomás Jesucristu*

<sup>24</sup> Tomás, me xi chja me tsëhë Cha Lihma, ngu xuta ladu rë Jesús ngajñi rë me xi tejó jan ne, cuajin me tacun me hya xi cafehe Jesús hiscan xi tjin tangun xuta ladu rë me xi yahnga jan. <sup>25</sup> Ngajan xi xuta ladu rë Jesús xi yahnga jan ne, cuitjin cachja me cojo Tomás:

—Cahyin Nai naja. —Cuatjin cachja me.

Peru Tomás ne, cuitjin cachja me:

—Sa xi scueen hiscan cavanguihmu rë xin tsja me hacuaha tsinguseen rcuntsa hiscan cavisehen xin jan hacuaha cuetahanntsaan ngu ladu ntsacu ndanisin rë me ne, cumacjain camahani ná. —Cuatjin cachja Tomás.

<sup>26</sup> Xi cavatju jyin nixtin jan ne, tjin tangun nga xuta ladu rë Jesús cahntsua ndihya, hacuaha cojo Tomás tacun me cojo me xi cuacun vë. Hane cafehe nga Jesús casecun me ngajñi rë me xi cuacun vë, ha ndasa tichjá tingotjo ndihya. Hane sehe cachja Jesús cuitjin:

—Cjuandaja cjuajeya catejña cojo nuju.

<sup>27</sup> Sehe cachja me cojo Tomás cuitjin: —Jarë rcuntsun. Chutsujun ntsa ne. Hacuaha jarë ntsun. Ninguisuhun ngu ladu ntsacu ndanisin naha. Tejñuxun xi cuatjin macjain nuju. Catamacjain nuju. —Cuatjin cachja Jesús.

<sup>28</sup> Ngajan xi Tomás ne, cuitjin cafayangui me tsëhë Jesús:

—¡Ngayun Nai naha! ¡Ngayun Nina naha! —Cuatjin cafayangui me.

<sup>29</sup> Hane Jesús ne, cuitjin cachja me:

—¿Há macjain nuju ngatsë rë xi tichutsujun ná? Ndatjin, peru jemu ndaja tsëhë me xi macjain rë, ha ndasa vutsijin ná me. —Cuatjin cachja Jesús.

### *Cuitjin titsihindu Juan cojo sa xi cumacjain rë xuta*

<sup>30</sup> Quihndë ne, jemu cjín sa cjuarcun casahmi Jesús xcun xuta ladu rë me xi camahindiin xcun xujun vihi. <sup>31</sup> Peru cjuarcun vihi ne, camahindu cojo sa xi ngayujun ni ngayun ne, cumacjain nuju xi Jesús ne, hacui me xi Catsingatju Nina, hacuaha hacui Quihndi rë Nina me. Hacuaha camahindu cojo sa xi, xi cuatjin cumacjain nuju ne, sacú nuju cjuahñu xatsë ngatsë rë xi ladu rë me má ngayun.

## 21

### *Cavëë yatu xuta ladu rë Jesucristu me*

<sup>1</sup> Xi camá ngascan ne, cavetjucaatsejen nga Jesús ngajñi rë xuta ladu rë me ngajan tjehen laguna Tiberias, xi hacuaha hmí rë laguna Galilea. Hane cuitjin camá. <sup>2</sup> Siu tangun me xi cuicun vi: Simón Pedru, cojo Tomás, me xi chja me tsëhë Cha Lihma, cojo Natanael, xuta Caná, ngu nandya tsëhë distritu Galilea, cojo quihndi rë Zebedeo, cojo jo sa xuta ladu rë Jesús jan. <sup>3</sup> Hane Simón Pedru ne, cuitjin cachja me cojo xicjin me:

—Ngahan ne, cjuë cúaxë chu ti. —Cuatjin cachja me.

Hane me xi yahnga jan ne, cuitjin cachja me:

—Hacuaha cuanguin ngayin cojo nuju. —Cuatjin cachja me.



Sehe cavetju me quiji me cojo xicjin me, cafaha me barcu, quiji me xcun nandá. Peru nguixun hya ne, casacuiin camahani rë me chu ti. <sup>4</sup> Hane hora xi tisahten jan ne, cavëë me Jesús secun me tjehe laguna jan, peru hvíin me xi hacui Jesús. <sup>5</sup> Ngajan xi Jesús ne, cuitjin cajindaya me cavinenguise rë me me xi cuacun jan:

—¿Há sacuiin nuju chu ti, tsan? —Cuatjin cavinenguise Jesús.

Hane me xi cuacun jan ne, cuitjin cajindaya me cafayangui me:

—¡Sacuiin niji chu! —Cuatjin cafayangui me.

<sup>6</sup> Ngajan xi Jesús ne, cuitjin cajindaya me cachja nga me cojo rë me:

—¡Ningatjunyun nahya vë táha ladu quixi tsëhë barcu ne, sehe sacú nuju chu! —Cuatjin cachja me.

Hane xi catsingatjenya xuta ladu rë me jan nahya táha ladu quixi ne, caain rë me cavaxë me nahya jan, ngatsë rë ti xi jemu cjin chu hinchu. <sup>7</sup> Ngajan xi cha ladu rë Jesús xi jemu vinga rë Jesús jan ne, cuitjin cachja cha cojo Pedru:

—¡Nai naja vë! —Cuatjin cachja cha.

Ngajan xi Simón Pedru ne, xi cahndë me cjuja xi hacui Nai naja ne, cavajásanii me tsjian rë me, tsëhë xi quixti me xi sahmi me xa jan. Hane sehe catsingatjenya me yojo rë me ngajñi nandá xi cjuetjengui me Jesús tjehe laguna jan. <sup>8</sup> Peru xuta ladu rë Jesús xi yahnga jan ne, quijitjengui me Jesús cojo barcu jan, táha javë me nahya, ña quitsë rë cojo chu ti. Hacuiin cjin hinchu me tsëhë tjehe nandá ta sacuaaha ngu cientu metru ni cjin. <sup>9</sup> Hane xi cafehe me tjehe nandá jan ne, sehe cavetju me barcu, hane ngajan cavëë me ngu ndava ndihi tacun, quisun ngu ti xcun ndixuhi, hacuaaha cavëë me niñu. <sup>10</sup> Ngajan xi Jesús ne, cuitjin cachja me cojo me xi cuacun vë:

—Tuhun ngujo chu ti xi sehe canaxun vë. —Cuatjin cachja Jesús.

<sup>11</sup> Sehe quiji Simón Pedru cajavë me nahya jan cavaxë me nangui quixí, quitsë rë cojo suvá ti yehe, sacuaaha ngu cientu cojo yachan tejyan má chu. Hane handasa cuatjin cjin chu ti hinchu chu nahya jan ne, catiyaain. <sup>12</sup> Ngajan xi Jesús ne, cuitjin cachja me cojo xuta ladu rë me jan:

—Nduvun xinu tajñu. —Cuatjin cachja me.

Peru hisca ngu xuta ladu rë me cavetjiin cacun me cavinenguise me cuitjin: “Yo ngayun”, tsëhë xi ha vëë me xi hacui Nai naja. <sup>13</sup> Ngajan xi Jesús ne, cafaha me niñu jan, casua me xuta ladu rë me. Hacuaaha cuanitjin ni casua me chu ti jan.

<sup>14</sup> Vihi majyan ndiya xi cavetjucaatsejen Jesús ngajñi rë xuta ladu rë me, quihndë xi cavuya nga me cjuahñu.

*Visiajmi Jesucristu cojo Simón Pedru*

<sup>15</sup> Hane xi cajnetaha cajiñe tajñu me ne, sehe cavinenguisse Jesús Simón Pedru cuitjin:

—Ngayun Simón, quihndi rë Jonás, ¿há hitsë sa hmu tacún ná ngayun xi cuma rë me xi cuicun vi? —Cuatjin cavinenguisse me.

Hane Pedru ne, cuitjin cafayangui me tsëhë Jesús:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

<sup>16</sup> Cavinenguisse nga Jesús Pedru majo ndiya cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguisse Jesús.

Hane Pedru ne, cuitjin cafayangui me:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

<sup>17</sup> Cavinenguisse nga Jesús xi majyan ndiya Simón Pedru cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguisse Jesús.

Ngajan xi Pedru ne, choho camá rë me xi cuatjin cavinenguisse Jesús me xi majyan ndiya sa xi hmu cacun me Jesús, hane cuitjin cachja me:

—Tatá, ngayun ne, yëjë ni ne, hyun. Ngayun ne, hyun ta hmú cáacun nuju. —Cuatjin cachja Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. <sup>18</sup> Hacuaha cuichjá cojo nuju cjuaquixi ta hya xi chúva sa nixtin nuju ne, cachujun suvun tsjian nuju sehe catsangun hiscan xi meje cuangun. Peru hya xi cuma changá ngayun ne, nicujun tyja nuju, hane hacjahi xuta tsihñu me cahntsua nuju, sehe cjucojo nuju me hiscan xi mijí cuangun. —Cuatjin cachja Jesús cojo Pedru.

<sup>19</sup> Xi cuatjin cachja Jesús ne, casua me camachaya rë Pedru mé chuva rë cueya Pedru, hacuaha casua me camachaya rë me xi sahmi jyë sahmi hnga me Nina xi cuatjin cueya me. Xi cavatju cachja Jesús cjua vëhë ne, sehe cachja me cuitjin cojo Pedru:

—Nduvun cuanguen cojo ná. —Cuatjin cachja Jesús.

*Xuta ladu rë Jesús xi jemu vinga rë me jan*

<sup>20</sup> Xi cavuya cavutsejen Pedru táha ngaxtun me ne, cavëë me xi tjengui cha xi jemu vinga rë Jesús jan nduva cha, cha xi quijavaha tiña xcun Jesús hya xi tijinë me comida jan hacuaha cavinenguise cha me cjua vihi: “Tatá, ¿yo xi sahmi nuju entregadu ni?” <sup>21</sup> Hane xi cavëë Pedru cha vëhë ne, cavinenguise me cuitjin cojo Jesús:

—Tatá, hane me vëhë ne, ¿mé cuatju me cuma ni? —Cuatjin cavinenguise Pedru.

<sup>22</sup> Ngajan xi Jesús ne, cuitjin cachja me cojo Pedru:

—Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni? Ngayun ne, nduvun cuanguen cojo ná. —Cuatjin cachja Jesús.

<sup>23</sup> Hane cavitsojo ngajñi rë xuta ladu rë Jesús cjua xi cha xi jemu vinga rë Jesús jan ne, cueyaain cha. Peru Jesús ne, hacuiin cachja me cojo Pedru xi cueyaain cha vëhë ta xi cachja me ne, cjua vihi: “Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni?” Vëhë cjua xi cachja me.

<sup>24</sup> Cha xi cuajyihí jemu vinga rë Jesús jan ne, cha vëhë xi cachja cha cjua vëhë hacuaha cha vëhë catsihindu cha. Hacuaha ngayin xi tinihindin ngujo cjua vihi ne, hyin ta cjuaquixi cjua xi cachja cha.

<sup>25</sup> Hacuaha jemu cjín sa xcusun xi casahmi Jesús. Peru sa xi cumahindu yëjë ni xcusun vëhë chuva ngu chuva ngu ne, xi má ná ne, chutaain cahndé setjo yëjë ni libru xi cumahindu, handasa jingujyë ni ngasunhndë.

## Hacutjin Casahmi Apóstol

<sup>1</sup> Ngayun Teófilo, xcun xujun naha xi catsihindu nuju tjun tjun ne, cachjá cojo nuju yějē ni hacutjin cavetsihin casahmi xu Jesús cojo hacutjin cavetsihin cavicuya me. Cavétsehen hisca ntsacu cuetsihin ne, <sup>2</sup> catsinguíjnetaha hisca hya xi quiji me ngahnga. Hya xi chaja sa cjue me ngahnga ne, cachja xu me cojo apóstol xi ha cavaxijin me xi camá ladu rē me jan, hacutjin sahmi. Hacuaha cojo ngahñu rē Hasen rē Nina xi cachja xu me. <sup>3</sup> Hya xi ha cavatju nixtin xi cahme me ne, cavuya cafehetjengui nga me apóstol jan, casua me camachaya xu rē ta quixi jain xi tacun quicun nga me. Hane ngajñi rē xi yachan nixtin ne, cavēē apóstol jan Jesús, hacuaha cachja sa Jesús cojo me ngujo cjua tsēhē hacutjin cuma hya xi cuinduva Nina sahmi me gobiernu.

<sup>4</sup> Hane xi tacun Jesús cojo apóstol jan ngajan Jerusalén ne, cavitexa xu me me cuitjin:

—Hacuiin cuetjunxun tsēhē nandya vi ta nechunyun rē cjuandaja xi sua nuju Nahmi naha, sacuatjin xi ha cachjá cojo nuju. <sup>5</sup> Cuatjin nihñu ta, xuta ne, handasa cojo nandá cavitenda Juan me, peru ngayun ne, xtenda ngayun cojo Hasen rē Nina cahntsua xi ngujo sa nixtin. —Cuatjin cavitexa me.

### *Quiji Jesús ngahnga*

<sup>6</sup> Hya xi camá ne, ngu nixtin xi siu tangun xu apóstol cojo Jesús ne, cavinenguise me Jesús cuitjin:

—Tatá, ¿há cavechú nixtin xi tuhun cahndē xi xutaxa rē nangui naja ne, cuya cuitexa nga me nguehe nangui naja cojo jingu sa nangui, sacuatjin xi cavitexa me hatsēē ni? —Cuatjin cavinenguise me.

<sup>7</sup> Ngajan xi cafayangui xu Jesús cuitjin:

—Satiin nuju ngayun xi cumachaya nuju jarē nixtin xi Nina cavejña cacun me cojo cjuatacun rē suvá me xi cuma yějē ni xcusun vēhē. <sup>8</sup> Peru hya xi cuinduva Hasen rē Nina cuisehen cahntsua xahasen nuju ne, hya sacú sa nuju ngahñu, sehe cuinújun cjua naha cojo xuta nguehe nandya Jerusalén, cojo yějē ni nandya distritu Judea cojo Samaria, hisca cojo yějē sa nangui xi siu ngasunhdē. —Cuatjin xu cafayangui me.

<sup>9</sup> Xi cafē cachja xu Jesús cjua vēhē ne, tivutsejen ni apóstol ne, cavetsihin quiji me ngahnga. Sehe cavisehen me ngajñi rē yufí, ha quihndē camatsijin sa me. <sup>10</sup> Ha tu tivutsejen cuaha xu apóstol ngahnga hacutjin cjuí Jesús ne, xi tu camachaya rē

me ne, hinchacun jo xihin xi tyava tsjian rë hiscan siu me.

<sup>11</sup> Hane cuitjin cavinenguise xu xihin jan me:

—Ngayun, cha Galilea. ¿Mé má cuatjin chutsujun ngahnga? Jesús, me xi quiji ngahnga vë ne, cuatjin tutjin xi cahyun xi quiji me ne, tjin ngu nixtin ne, ha cuanitjin ni cuya nga me. —Cuatjin cachja xu xihin jan.

*Catuxijin rë me xi cuisehen ngojo rë nima Judas*

<sup>12</sup> Hya xi camá xu ne, apóstol jan ne, cavetjuxin me tsëhë ndetjún xi hmí ndetjún Ya Olivu, hane cavuya quiji nga me Jerusalén, xi tacun sacuaaha ngu mil metru tsëhë ndetjún vëhë.

<sup>13</sup> Hya xi cafehe me ngajan ne, quiji me ndihya hiscan xi viyuju me, hane quijiniji me pisu ngahnga. Me xi cuicun xu vi xi viyuju me ngajan: Pedru, Jacobo, Juan, Andrés, Felipe, Tomás, Bartolomé, Mateo, Jacobo xi quihndi rë Alfeo, Simón xi tsëhë partidu zelota, cojo Judas xi xuta rë Jacobo. <sup>14</sup> Yëjë ni me xi cuacun jan, cojo yëjë ni me xi xicjin Jesús, cojo María naa rë me, cojo yachjin xi yahnga ne, nchunchujun ni camatangun me xi sahmi me oración rë me.

<sup>15</sup> Ngu ndiya hya xi camatangun xu sacuaaha chuva rë ngu cientu cojo can xuta xi cuacun ladu rë Jesús ne, casecunvasen Pedru ne, sehe cachja me cojo xuta jan cjua vihi:

<sup>16</sup> —Ngayujun ngarcun ni ngayun xuta ladu rë Jesús. Cavetjucaa jain cjua xi catsihindu xutachanga naja David xcun xujun rë Nina hatsëë. Hatuxa cuatjin camameje rë xi cuma ta, tsëhë xi chaja sa xi cuma matsejen ne, Hasen rë Nina ne, ha casua camachaya rë xutachanga naja jan hacutjin sahmi nima Judas, nima xi cavisecoo rë xuta xi cafaha rë Jesús, catsihñu rë me. <sup>17</sup> Nima Judas jan matsejen ne, hacuaaha camá ladu rë Jesús sacuaaha ngayaan matsejen ta, tsëhë xi cavaxijin Jesús nima xi cuisecoo rë me xcun xa rë Nina xi sahmi me. —Cuahaxutjin cachja Pedru.

<sup>18</sup> 'Nima Judas jan ne, cavatsë xu ngu rquí nangui cojo tujún xi cafaha tsëhë xcusun tsehen xi casahmi xi casahmi rë entregadu Jesús. Hane ha xcun nangui xi cavatsë xu nima jan ne, caticja xcun, hane catsingá xu cahntsua nima, hisca cavetju yëjë ni ntsehen rë. <sup>19</sup> Sacuatjin camá xu xi cahme nima ne, yëjë cjua vëhë ne, cavechútáha rë yëjë xuta ngajan Jerusalén. Vëhë xi xuta ngajan ne, casuañihi xu rë me cahndë jan Acéldama, ñihi xi meje cuichja xi hne rë me ne, Cahndë Tsëhë Jni.

<sup>20</sup> Hacuaha quiijinduju sa cachja Pedru cuitjin:

—Hacuaha xcun xujun tsëhë Salmo matsejen ne, cuitjin camahindu:

Catejña cuatjin ndava cha,  
hacuaha hisca ngu cuiyijin jan.

Hacuaha camahindu sa cuitjin:  
 Xa rë cha ne, catjaha jingu sa xuta.  
 Cuatjin camahindu matsejen.

<sup>21</sup> Vëhë xi meje rë xi cuinchise rë ngu cha xi cuma tangun cojo niji matsejen, ngu cha xi ha cuatjin cavisecoo niji yëjë ni nixtin xi canujyihinyin cojo Nai naja Jesús, <sup>22</sup> hisca nixtin xi cavitenda Juan me cojo hisca nixtin xi quiji me ngahnga. Cha vëhë matsejen ne, cuma tangun cha cojo niji, xi tsinguixi cha hacutjin camá xi cavuya Jesús cjuahñu. —Cuatjin cachja Pedru.

<sup>23</sup> Hya xi cajnetaha cachja Pedru cuatjin ne, catuxijin xu rë jo xihin: José cojo Matías. José jan ne, hacuaha hacui me xi hmí rë Barsabás cojo Justo. <sup>24</sup> Sehe cafehya rë me Nina cuitjin:

—Ngayun Nai niji, ngayun xi hyun cjuatacun rë ngayëjë ni xuta ne, tsëhë jo cha xi cuicun vihi ne, naxujun jarë cha xi chuya nuju ngayun <sup>25</sup> xi cuisehen cha xa sacuaha apóstol cahndë rë nima Judas ta, tsëhë xi nima vëhë ne, cavéjña tiya cahndë rë xi quiji hiscan xi casatë rë. —Cuatjin cafehya rë me Nina.

<sup>26</sup> Xi cajnetaha cachja apóstol cuatjin ne, sehe cavaxë xu me ngu suerte, hane Matías casatë rë me. Ngajan xi Matías ne, camatangun me cojo tengu apóstol jan.

## 2

### *Hya xi canduva Hasen rë Nina*

<sup>1</sup> Hya xi camá ne, xi cavechú nixtin tsëhë suhi xi hmí Pentecostés ne, ngu cahndë ni camatangun xu yëjë ni xuta ladu rë Jesús. <sup>2</sup> Xi siu tangun me jan ne, ha tu ñahñu cahndë xu me xi jercu cafane ngajan ngahnga, sacuaha nuhya rë xi fane vanga tjo xi jemu hñu camahani. Sehe yëjë ni xuta jan ne, cahndë xu me xi canduva cafane hisca cahntsua ndihya hiscan siu me. <sup>3</sup> Hacuaha cavëë xu me ndihi xi langa sacuaha neje xuta, hane cavitsojo quiji casatë xu rë jima ngu jima ngu me. <sup>4</sup> Hya xi camá ne, catsë xu rë Hasen rë Nina xahasen rë jima ngu me jan, hacuaha cavetsihin cachja xu me jima ngu me cjuandaja rë Nina ne, cachja xu me jingu sa hne xi maji rë me, tucutjin xi Hasen jan casahmi xi camá cachja me.

<sup>5</sup> Ngajan Jerusalén ne, siu xuta tjë rë Israel xi faharcun jain me Nina, canduva me tsëhë yëjë ni nangui xi tjin ngasunhdë.

<sup>6</sup> Hane hya xi canuhya rë xi cuatjin jercu fane ne, jercu xutacjín camatangun xu me xi quiji cavutsejen me mé xi camá. Hane xutacjín jan ne, jemu quijircun xu rë me, tsëhë xi hora xi tichja xuta ladu rë Jesús ne, xuta jan ne, hne ni rë suva me cahndë me jima ngu me xi cuacun jan. <sup>7</sup> Ngajan xi cachja xu me cojo xicjin me cuitjin:

—¿Mé nga vihi ni? ¡Yëjë ni me xi tichja vi ne, xuta distritu Galilea me! <sup>8</sup> ¿Hacutjin má xi jima ngu ngayaan ne, tinuhyan hne naja suvaan ta, <sup>9</sup> tsëhë xi jemu cjín nangui canduvan? Ngujo ngayaan ne, xuta Partia ngayaan. Ngujo nga ngayaan ne, xuta Media ngayaan. Cojo sa xuta Elam, xuta Mesopotamia, xuta Judea, xuta Capadocia, xuta Ponto, xuta Asia, <sup>10</sup> xuta Frigia, xuta Panfilia, xuta Egipto, xuta ladu Libia, tiñataha nandya xi hmí Cirene, xuta Roma, <sup>11</sup> xuta Creta, xuta Arabia. Ngayaan xuta ngu nangui xi macjain naja Nina rë xuta tjë rë Israel ne, jemu cjín ngayaan xi nechanyanjñe nguehe ngajñi rë xuta tjë rë Israel. Hacuaha ngayejen ngarca ni tinuhyan xi tichja me hne naja. Tichja me tsëhë cjuandaja xi jercu casahmi Nina. —Cuatjin xu cachja xuta xi cuacun jan.

<sup>12</sup> Hane tsëhë xi cuatjin camacjínacun me xi jemu quijircun camahani rë me ne, cavinenguise xicjin xu me cuitjin:

—¿Mé rë meje cuichja xcusun vi? —Cuatjin cavinenguise me.

<sup>13</sup> Peru yahnga me ne, catsixcuehyu me xuta ladu rë Jesús, hane cachja xu me ta chihi xuta jan.

### *Cjua xi cachja Pedru*

<sup>14</sup> Hya xi camá ne, caxinchacun yëjë tengu apóstol jan ne, sehe cachja xu Pedru cojo xutacjín jan cuitjin:

—Ngayujun ngarcun ni ngayun xuta tjë rë Israel xi nechun nguehe Jerusalén matsejen ne, tinuhyun ngujo cjua xi cuichjá cojo nuju vi, cojo sa xi cumachaya nuju. <sup>15</sup> Ngayujun ni matsejen ne, nújun ta me xi cuicun vi ne, chihi me. Peru quixiin xi nújun ta ndicumaha ni ne, sehe fane ñaja tsëhë nguitajñu. <sup>16</sup> Peru xcusun xi sehe cavatju camá nguehe matsejen ne, cavetjucaa cjua xi cachja xutachanga naja profeta Joel hatsëë nixtin, hya xi catsihindu me cjua xi casua Nina. Cuitjin catsihindu me:

<sup>17</sup> Cjua xi cuicun vi xi chja Nina cojo naja:

Hya xi cuma tiña nixtin xi cjuë ngasunhndë ne,

hya tsingátju Hasen naha xi cuisehen xahasen rë xuta jingujyë ni ngasunhndë;

hane quihndi nuju, sa chjuun sa xihin ne, suacuenda me cjua naha,

hacuaha cha nixti nuju cojo xuta changá nuju ne,

cuichja chini cojo rë me tsëhë cjuatacun naha.

<sup>18</sup> Hacuaha nixtin hya ne, tsingátju Hasen naha xi cuisehen xahasen rë me xi sahmi cjuatacun naha, sa chjuun, sa xihin,

hane me vëhë ne, suácuenda me cjua naha.

<sup>19</sup> Hya sahme xcusun cjuarcun vihi ngajan ngahnga, cojo nguehe nangui xi chutsujun:

cuáxëcaa jni, cojo ndihi, cojo nihndi cjin.

<sup>20</sup> Tsuhi ne, cuma jma;

sá ne, cuma hani sacuaha jni.

Cuatjin cuma hya xi chaja sa xi cuechú nixtin xi ngahan xi  
Nina ngahan ne, tsichúva yějē ni xuta cojo cjuatacun rē  
me;

ngu nixtin jyē ngu nixtin ndajyihni nixtin vëhë.

<sup>21</sup> Hane nixtin hya ne, yějē ni xuta xi cjuehya ná me cjuandaja  
naha ngahan xi Nina ngahan ne,

cuetjutje me.

Cuatjin catsihindu profeta Joel cjua xi cachja Nina.

<sup>22</sup> Cjuinduju sa tichja Pedru cjua vihi:

—Quihndē matsejen ne, tinuhyun cjua xi cuichjá cojo nuju,  
ngayujun ngarcun ni xuta tjē rē Israel. Jesús, me Nasaret mat-  
sejen ne, camachaya naja xi Nina catsingatju rē me matsejen  
ta, tséhē xi jemu cjin xcusun cjuarcun casahmi me ngajñi naja  
sacuatjin xi ha ndaja hyun. Camá casahmi me cjuarcun jan  
matsejen ta, ngatsē rē xi Nina casua rē me cahndē xi cuatjin  
casahmi me. <sup>23</sup> Nina matsejen ne, ha vëe me yějē ni xcusun.

Vëhë xi cojo tjun sa ne, ha catsingataha cacun me ta Jesús  
vë ne, cuma me entregadu cojo xuta tsehen. Cuatjin cavejña  
Nina cjuatacun rē me hisca chaja sa xi cuetjucaa xcusun  
vëhë. Sacuaha xi ngayun canicuhun Jesús ta, ngatsē nuju  
xi cavetaha xuta tsehen me xcun cru. <sup>24</sup> Peru cavëhëndaya

Nina me tséhē cjuaveya, catsicuya me me cjuahñu ta, tséhē xi  
hatuxa camaji xi cavëjña me ngahma gobiernu rē cjuaveya.

<sup>25</sup> Xutachanga naja David matsejen ne, catsihindu me tséhē  
Jesús cuitjin:

Cahvë Nina xi cjui titjun me tsahan yějē ni nixtin;

ticojo ná me, cojo sa xi tsajin mé cuma ná.

<sup>26</sup> Vëhë xi xahasen naha ne, jemu sua rē, hacuaha ntsuva ne,  
suvá cjuandaja chjá.

Hacuaha vëhë xi ngahan ne, vetahá cáacun Nina.

<sup>27</sup> Cuatjin sahme ta, tséhē xi ngayun Nina ne, hacuiin nismu-  
tacun hasen naha xi cuejña ngajan Hades hiscan siu  
nima,

hacuaha hatuxa tuun cahndē xi cjuehndu yojo naha, ngahan  
xi hatuxa tjënguë nuju cojo yějē xahasen naha.

<sup>28</sup> Ngayun ne, catuhun camachaya ná ndiya xi cuéchu hiscan  
sacú ná cjuahñu ndajyihni.

Hacuaha ninguitsun rē xahasen naha cjuasua xi cuécutaha  
nuju hiscan nechun.

Cuatjin catsihindu David.

<sup>29</sup> Hacuaha cachja sa Pedru cuitjin:



—Ngayujun ngarcun ni matsejen ne, nguehe cuichjáquixë cojo nuju matsejen ta, xutachanga naja David ne, cahme me, hacuaha caseyaniji me hatsëë nixtin. Hane tsjun rë me ne, tacun cuaha hisca quihndë hiscan xi cavéjña. <sup>30</sup> Peru xi chaja sa xi cueya David jan matsejen ne, ngu profeta me, hacuaha ha vëë me xi ha cachja Nina cojo rë me cuitjin: Ngahan suva hvë xi ngu xuta tjë riji ne, cuitexa rë xuta, sacuatjin tivitexe ngaye. Cuatjin cachja Nina cojo David. <sup>31</sup> Vëhë xi camachaya rë David xcusun xi sahmi Nina ngascan. Ha vëë me xi cuya nga cjuahñu me xi tsingatju Nina, hane vëhë xi cachja me ta hacuaha hacuiin cuejña me vëhë ngajan Hades ngajñi rë nima, hacuaha hacuiin cjuehndu yojo rë me. <sup>32</sup> Hane ngayijin ni matsejen ne, cahyin suvin xi Jesús, me xi catsingatju Nina vë ne, catsicuya Nina me cjuahñu. <sup>33</sup> Hane quihndë matsejen ne, ha catsiquijin Nina me xi cavechú me ngahnga hiscan véjña suvá Nina. Hacuaha cafachatsja me Hasen rë Nina sacuatjin xi cachja Nina Nahmi rë me xi sua rë me. Vëhë xi Jesús matsejen ne, tisahmi me xcusun xi tijima nguehe ngajñi niji. <sup>34</sup> Xi tsejen ne, cachjaain David tsëhë suvá me ta, tsëhë xi hacuiin quiji me ngahnga sacuatjin quiji Jesús matsejen ta, catsihindu sa me cuitjin:

Nina ne, cachja me cojo Nai naha cuitjin:

“Tinechin nguehe, ladu quixi naha,

<sup>35</sup> hisca hya xi yëjë ni xi sahmi ri condra ne, cuiyujú ngahan ngahma gobiernu riji.”

Cuatjin catsihindu David hatsëë nixtin.

<sup>36</sup> Vëhë xi ngayujun ni xuta nangui Israel matsejen ne, ndaja catijne rcun cjua xi chjá cojo nuju vi: Jesús vë, me xi ngayun catuhun xi cahme xcun cru matsejen ne, Nina casahmi me xi me vëhë ne, camá me Nai naja hacuaha catsingatju Nina me xi cuaxëtje naja me. —Cuahaxutjin cachja Pedru cojo xutacjín jan.

<sup>37</sup> Xi cahndë xutacjín jan cjua vëhë ne, jemu choho camá rë me. Ngajan xi cavinenguise me Pedru cojo apóstol xi yahnga jan cuitjin:

—Xi má nuju ngayun ne, ¿mé xi ndatjin nihñi? —Cuatjin cavinenguise xuta jan.

<sup>38</sup> Ngajan xi cachja xu Pedru cojo rë me cuitjin:

—Nindegun cjuatacun nuju. Hacuaha jima ngu ngayun ne, catixtenda ngayun, ngatsë rë xi camangu tacún cojo Jesucristu, sehe ngajan xi tsinchataha nuju Nina tsëhë jyë nuju. Xi cuatjin ne, hacuaha sahmi me cjuandaja xi sua nuju me Hasen rë me. <sup>39</sup> Cjuandaja vëhë ne, ha cachja Nina xi sua nuju me ngayun cojo quihndi nuju, hisca cojo yëjë xuta tjë nuju.

Nina naja ne, sua me cjuandaja vëhë xi cuma rë yëjë ni xuta xi cuaxijin me. —Cuahaxutjin cachja Pedru.

<sup>40</sup> Hacuaha jemu cjin sa cjua cachja me cuitjin, hacutjin meje rë xi sahmi xuta jan:

—Naxunxun yojo nuju tsëhë xuta tsehen xi siu quihndë.  
—Cuatjin cachja xu me.

<sup>41</sup> Ngajan xi xuta xi cachuya rë me cjua xi cachja Pedru ne, caxtenda me. Hane cuatjin xi nixtin vëhë xu ne, sacuaha jyan mil xuta xi cavisehen me ladu rë Jesús. <sup>42</sup> Casua me yojo rë me cojo cjua xi tivicuya apóstol jan, hacuaha nguñaja cacun xu me xi ma tangun me cojo yëjë sa xuta ladu rë Jesús. Nchunchujun ni ne, camatangun me cojo xicjin me xi sahmi me oración, cojo xi sinë tangun me niñu.

*Cjuandaja xi caviyuju xuta ladu rë Jesucristu cojo xicjin me*

<sup>43</sup> Jemu cjin xcusun xu cjuarcun casahmi apóstol ngatsë rë ngahñu xi casua Nina me, hane vëhë xi yëjë ni xuta xi hacuiin ladu rë Jesús ne, jemu tsacjun me. <sup>44</sup> Peru yëjë ni xuta ladu rë Jesús ne, camatangun xu cjuatacun rë me, hacuaha yëjë ni xcusun xi tsëhë jima ngu xu me ne, hacuaha camá tsëhë yëjë ni me xi yahnga jan. <sup>45</sup> Caviteña xu me xcusun xi tjin rë me ne, sehe cavatëcja xu me tujún ngajñi rë yëjë ni me xi casahmi chaja rë. <sup>46</sup> Nchunchujun xu ni ne, camatangun me nguñaja cacun me ngajan yungun xi matitjun xi cjuaharcun me Nina. Hacuaha xi cajnë xu me niñu ndava me cojo xicjin me ne, jemu cojo cjuasua, cojo cjuandaja cojo cjuajeya. <sup>47</sup> Hacuaha jemu cavaxëndaja me Nina. Hane yëjë xuta xi yahnga jan ne, xi cavëë xu me xcusun rë xuta ladu rë Jesús jan ne, cachja xu me ta xuta ndaja me xi cuacun vë. Hacuaha nchunchujun ni ne, tivaxëtje Nai naja ngujo ngujo sa xuta. Vëhë xi nchunchujun ni ne, jima cjin sa xuta yungun jan.

### 3

*Casahmi Pedru cojo Juan xi camandaja ngu cha xi maji fi*

<sup>1</sup> Ngu nixtin jan ne, Pedru cojo Juan ne, quijiniji tangun xu me yungun xi matitjun chuva rë fane jyan, hora xi fi chjayuma xuta. <sup>2</sup> Hane ngu cha xi maji fi, tsëhë xi tsehen ntsacu cha hisca hya xi catsin cha ne, hacuaha hora vëhë cjuicojo xuta rë cha cha yungun. Nchunchujun ni quiiji chani rë cha ngajan tingotjo hnhua xondyojo rë yungun xi hmí Tingotjo Ndajyihi, xi sahmi cha caridad tsëhë xuta xi visehen ndatsen yungun jan. <sup>3</sup> Hane xi cavëë cha hmu rë jan xi camatiña Pedru cojo Juan hiscan tacun cha xi cuisehen me ndatsen yungun jan ne, cafehya xu cha me cjuandaja rë me. <sup>4</sup> Ngajan xi cavutsejenndaja me cha. Hane Pedru ne, cuitjin cachja me cojo cha:

—Chutsijin niji hitsë —Chja xu me.

<sup>5</sup> Hane cavutsejen cha me ta, xi má rë cha ne, tjin mé xi sua me cha. <sup>6</sup> Ngajan xi cavuya cachja nga Pedru cojo rë cha cuitjin:

—Tsajin camahani ná tujún. Peru xi tjin ná, tsan ne, suá ri. Jesucristu, me Nasaret ne, casua ná me ngahñu, hane vëhë xi chjá cojo ri ta, tisechin, hane tujyihye. —Cuatjin cachja xu me cojo cha.

<sup>7</sup> Sehe cafaha me tsja quixi cha hmu rë jan hane catsisat-jenhnga xu me cha. Hane ngutjen ni casacuhñu rë ntsacu cha cojo ndyojo naxa rë cha. <sup>8</sup> Xi tu cafaha Pedru tsja cha ne, cacaahnga cha, hacuaha casecun cha. Sehe cavetsihin catsujyihya cha. Hacuaha cavisehen cha yungun xi matitjun cojo me xi cuacun jan, cjui cha, hisca chijihnga cha, taha tivaxëndaja cha Nina. <sup>9</sup> Yëjë ni xuta xi siu ndatsen yungun jan ne, cavëë me xi cjui cha, hacuaha cahndë me xi tivaxëndaja cha Nina. <sup>10</sup> Hane jemu quijircun rë xuta jan tsëhë xcusun xi cavatju cha camá ta, tsëhë xi ha vëë me xi ha hacui cha vëhë xi véjña cha sahmi cha caridad ngajan tingotjo yungun xi hmí Tingotjo Ndajyih.

*Cjua xi cachja Pedru cojo xuta ngajan yungun xi matitjun*

<sup>11</sup> Cha xi camandaja xu jan ne, mijí cjuexin cha tsëhë Pedru cojo Juan. Hane tsëhë xi jemu quijircun rë xuta ne, cavanga me quiji me hiscan siu me xi cuacun jan, camatangun me ngajan ngu ngahma ndihya tsëhë yungun, cahndë xi hmí Tsëhë Salomón. <sup>12</sup> Xi cavëë xu Pedru xi cuatjin camatangun xuta ne, cuitjin cachja me:

—Ngayujun ngarcun ni xuta tjë rë Israel matsejen ne, ¿mé má cuatjin fircun nuju tsëhë cha xi cuijyih vi? ¿Mé má cuatjin jercu chutsujun niji sacuaha xi ngatsë rë cjuatacun niji suvin o ngatsë rë xi jemu ndaja chjihinrcuin Nina ne, vëhë xi camá canihñi xi camandaja cha? ¡Jéya! Hacuiin cuatjin. <sup>13</sup> Nina rë Abraham cojo Isaac cojo Jacob, Nina rë xutachanga naja matsejen ne, casahmi jyë casahmi hnga me Jesús, me xi casahmi xa rë Nina. Hane ngatsë rë me cama cjuarcun vi. Peru ngayun matsejen ne, catuhun Jesús cojo xutaxa rë. Hane ngajan xcun gobernador Pilatu matsejen ne, hora xi meje tsismi me Jesús ne, catuun cahndë. <sup>14</sup> Jesús jan ne, hatuxa tjengui me Nina cojo yëjë xahasen rë me, hatuxa cjuaquixi xi sahmi me. Peru ngayun matsejen ne, canitjungun me. Hane cahndë rë xi chjahyun rë Pilatu xi tsismi me Jesús matsejen ne, cachjahyun rë me xi tsismi me ngu cha tsiquehen. <sup>15</sup> Hane Jesús, me xi sua cjuahñu naja ne, ngayun catuhun me xi cahme me. Peru Nina matsejen ne, catsicuya me Jesús jan cjuahñu. Hane ngayin ne, hisca cahyin me quihndë xi tacun nga me cjuahñu. <sup>16</sup> Cha xi

cuijihi tichutsujun vi ne, ha hyun yo cha. Casacu rē ntsacu cha ngahñu ta, tsēhē xi ngayin matsejen ne, mangutacuín cojo Jesús. Hacuaha ngatsē rē xi cuatjin mangutacuín cojo Jesús ne, vēhē casahmi xi camandaja cha sacuahatjin xi cahyun ngayujun ni.

<sup>17</sup> 'Quihndē ne, ha hvē ta ngayujun ni cojo yējē xutaxa rē yungun naja matsejen ne, hya xi catuhun Jesús xi cahme me ne, hyúun yo xi canihñu cojo. <sup>18</sup> Peru Nina matsejen ne, cuatjin casahmi me xi cavetjucaa cjuaxi cachja yējē ni profeta cojo xutachanga naja hatsēē nixtin hya xi cachja profeta jan, tsēhē cjuañihi xi cuatju ngu me xi tsingatju naja Nina nchujun ni nguini. <sup>19</sup> Vēhē xi meje rē xi nindeyun cjuatacun nuju, tisuhun ndiya rē Nina, cojo sa xi Nina matsejen ne, cjuahaxin me yējē ni jyē nuju. <sup>20</sup> Xi cuatjin nihñu ne, Nina ne, sua me cahndē xi cjuahajenda hitsē xahasen naja. Hacuaha xi cuatjin ne, tsingatju nga naja me Jesús ta, tsēhē xi ha me vēhē xi cachja Nina hisca hatsēē xi cjuaha me xa xi cuaxētje naja me. <sup>21</sup> Peru Jesús jan ne, meje rē xi cuejña sa me ngajan ngahnga hisca xi Nina ne, cuya sahmi ndaja nga me yējē ni xcusun, sacuatjin xi ha cachja profeta rē me, hya xi cachja me cojo xutachanga naja cjuaxi rē Nina hatsēē nixtin. <sup>22</sup> Xutachanga naja Moisés matsejen ne, cuitjin cachja me ngu cjuaxi catsingatju Nina tsēhē me hatsēē: "Nina ne, sahmi me xi cuetjujñi ngajñi nuju ngu xi cuma profeta sacuaha ngahan. Tetuhunrcun yējē cjuaxi cuichja me cojo nuju ta, <sup>23</sup> sa xi yo xi cuetaharcuaain cjuaxi rē profeta jan ne, hatuxa cueya, ha quihndē cuejñaai ngajñi naja ngayaan xuta rē Nina." Cuahaxutjin cachja Pedru cjuaxi rē Moisés.

<sup>24</sup> Sehe cachja sa Pedru cojo xuta cuitjin:

—Hacuahanitjin yējē profeta, xi cavetsihin cojo xutachanga naja Samuel cojo xi canduvaniji sa ne, jemu cachja me tsēhē xcusun xi camá nixtin xi nechan vi. <sup>25</sup> Cjuandaja xi cachja Nina xi sua me xutachanga naja nchujun ni nguini ne, vēhē cjuandaja xi tisua naja me quihndē. Hacuaha compromisu xi casahmi me cojo xutachanga naja matsejen ne, tisahmichihin me cojo naja quihndē. Nina ne, casahmi me compromisu jan nixtin xi cachja me cojo xutachanga naja Abraham cuitjin: "Ngatsē rē ngu xuta tjē riji ne, ngahan ne, tsinchácun yējē ni xuta ngasunhndē." Cuatjin cachja Nina cojo Abraham. <sup>26</sup> Sehe ngajan xi Nina matsejen ne, hya xi cavaxijin me Jesús xi cjuaha xa rē me ne, tjun tjun ngayaan xuta tjē rē Israel catsingatju naja Nina me. Cuatjin xi tsinchacun naja me xi cuetjunxeen jima ngu ngayaan tsēhē ndiya tsehen xi tivanguen. —Cuahaxutjin cachja Pedru cojo xuta.

## 4

*Casua Pedru cojo Juan cjuahñu rë me*

<sup>1</sup> Hya xi camá ne, Pedru cojo Juan ne, tichja cuaha sa me cojo xutacjín jan, hora xi cafehe xu ngujo nahmi. Hacuaha cha mayu rë yungun xi matitjun cojo ngujo sa cha saduceo ne, cafehe xu cha cojo nahmi xi cuacun jan. <sup>2</sup> Hane jemu xti má rë yëjë me ta, tsëhë xi tivicuya apóstol jan xuta, tichja me xi ngatsë rë xi catsicuya Nina Jesús cjuahñu ne, vëhë xi machaya naja xi cuechú nixtin ne, tsicuya nga Nina yëjë ni nima cjuahñu. <sup>3</sup> Hya xi camá ne, cachjaha rë Pedru cojo Juan. Peru tsëhë xi ha quiji xu hora ne, tu caxincha ni me ndavaya. <sup>4</sup> Peru jemu cjín xuta xi cahndë cjua rë apóstol jan ne, camacjain xu rë me. Vëhë xi yëjë xuta xihin xi macjain rë ne, sacuaaha hñú mil xu camá me, cojo me xi hatsëë camacjain rë cojo me xi sehe camacjain rë.

<sup>5</sup> Xi camá nchujun jan ne, ngujo xutaxa rë yungun cojo ngujo xuta changá cojo ngujo cha xi vicuya cjuachacun ne, camatangun xu me ngajan Jerusalén. <sup>6</sup> Camatangun me cojo Anás, me xi matitjun tsëhë yëjë ni nahmi, cojo Caifás, cojo Juan, cojo Alejandro, cojo yëjë sa me xi xuta rë me xi matitjun tsëhë nahmi jan. <sup>7</sup> Hya xi camá xu ne, catsingatju me quiji chjahá rë Pedru cojo Juan, caviyuju me me cavasencja jan ne, sehe cavinenguisse me me cuitjin:

—¿Hacutjin canihñu xi camá camandaja cha hmu rë jan? ¿Yo casua nuju chuva rë xi cuatjin canihñu? —Cuatjin cavinenguisse me.

<sup>8</sup> Ngajan xi Pedru ne, cojo ngahñu rë Hasen rë Nina xi quitsë rë xahasen rë me ne, cuitjin cafayangui xu me:

—Ngayun xi má ngayun xutaxa rë tsajan, ngayun xi má ngayun xuta changá naja matsejen ne, <sup>9</sup> quihndë xi meje cumachaya nuju hacutjin canihñi ngu cjuandaja xi camandaja ngu cha hmu rë. <sup>10</sup> Nguehe cuinújin cojo nuju cojo sa xi cumachaya rë yëjë ni xuta tjë rë Israel ta cha hmu rë vi ne, nguehe secun cha xcun ngayujun ni matsejen ta, tsëhë xi camandaja cha ngatsë rë ngahñu rë Jesucristu, me xi tsëhë nandya Nasaret. Ngayun ne, catuhun me xi cahme me xcun cru, peru Nina matsejen ne, catsicuya rë me cjuahñu. <sup>11</sup> Me vëhë xi canitjungun ta, tsëhë xi xi má nuju matsejen ne, machjiriin camahani Jesucristu. Canitjungun me sacuaaha tsitjungui chjinevexo ngu ndyojo xi chuyiin rë me tsëhë. Peru quihndë matsejen ne, camatitjun me tsajan ngayejen ni, sacuaaha ndyojo ngahñu rë ndihya. <sup>12</sup> Tsajin sa yo xi cuaxëtje naja. Tsajin sa ngu xuta nguehe ngasunhndë xi catsingatju Nina xi cuma cuaxëtje naja. —Cuahaxutjin cachja Pedru.

<sup>13</sup> Hya xi camá xu ne, cavëë xuta xi cuacun jan xi Pedru cojo Juan ne, tsacjuuin camahani me xi sua me cjuaquixi rë me, hacuaha cavacun rë xuta jan xi Pedru cojo Juan ne, xuta yuma me, xi hisca cavutayaain me cjuachacun. Ngajan xi xuta jan ne, jemu quijircun rë me. Hacuaha ha vëë me xi Pedru cojo Juan ne, hacui me xi catsujyihya cojo Jesús. <sup>14</sup> Hane tsëhë xi cha xi camandaja jan ne, ngajan secun tangun xu cha cojo Pedru cojo Juan ne, vëhë xi sacuinyiin rë xuta xi cuacun jan hacutjin cuma xi cuichja me condra tsëhë Pedru cojo Juan. <sup>15</sup> Hya xi camá ne, cavaxë me Pedru cojo Juan cojo cha xi camandaja jan candatsen. Sehe cavisiajmicjín sa me cojo xicjin me. <sup>16</sup> Cuitjin cachja me:

—¿Mé xi ndatjin nihña cojo cha xi cuacun vë? Yëjë ni xuta nandya ne, ha camachaya rë me tsëhë cjuarcun jyë xi casahmi cha. Hane cumaji cuinújan xi quixiin. <sup>17</sup> Peru cojo sa xi hacuiin cuitsojo sa cjuacjintacun vihi ngajñi rë xuta nandya ne, cuinchanrcun rë cha. Cuinújan cojo rë cha ta ha quihndë cuichjaain sa cha tsëhë nima vëhë cojo xuta. —Cuahaxutjin cavisiajmicjín xuta xi cuacun jan cojo xicjin me.

<sup>18</sup> Hya xi camá ne, cajindaya nga xuta xi cuacun jan Pedru cojo Juan, sehe cachja xu me cojo me xi ha quihndë cuyaaain cuichja me tsëhë Jesús cojo xuta. <sup>19</sup> Peru Pedru cojo Juan ne, cuitjin cafayangui me:

—Xi má nuju suvun ne, ¿jarë xi hitsë sa chuya rë Nina? ¿Há xi cuinuhyin tsujun ne?, o há tsajin ne, ¿há xi cuinuhyin tsëhë me? <sup>20</sup> Peru ngayin matsejen ne, hatuxa cumajin nisejyin xi cuinújin cjuandaja xi canuhyin cojo xcusun xi cahyin. —Cuatjin xu cafayangui me.

<sup>21</sup> Hya xi camá ne, xuta xi cuacun jan ne, cavincharcun sa xu me Pedru cojo Juan, sehe cavëhëndaya xu me. Casacuinyiin rë me hacutjin sahmi me castigu me ta, tsëhë xi yëjë ni xuta tichja me xi jemu jyë hnga Nina cojo Hasen rë me, ngatsë rë cjuarcun xi cuatjin camá jan. <sup>22</sup> Cha xi camandaja ngatsë rë cjuarcun jan ne, ha vatju yachan nu xu tjin rë cha.

### *Cafehya sa xuta ladu rë Jesús ngahñu cojo Nina*

<sup>23</sup> Hya xi camá ne, xi tu camandaya Pedru cojo Juan ne, quijitjengui sa xu me xuta xi yahnga xi hacuaha ladu rë Jesús, sehe casuacuenda me yëjë cjua xi cachja xuta xi cuacun jan cojo rë me. <sup>24</sup> Hya xi cahndë me xi yahnga jan cjua xi cachja Pedru cojo Juan ne, ngu tangun ni cachja me xi cafehya rë me Nina cuitjin:

—Ngayun Nai niji. Ngayun xi canihñu ngahnga, canihñu nangui, canihñu ndachacun, hacuaha canihñu yëjë ni xcusun xi siu jan ne, <sup>25</sup> cojo Hasen nuju ne, cachuxuhun cjuatacun rë

xutachanga niji David, me xi casahmi xa nuju. Hane me vëhë ne, cuitjin cachja me cjuua xi catuhun rë me:

¿Má rcu hngacacun xuta?

¿Mé má cuatjin tsingatahacacun me ngu cjuatacun tsehen xi tsajin mé machjirëhë?

<sup>26</sup> Me xi matitjun tsëhë jingu sa nangui, cojo xutaxa rë jingu sa nandya ne,

matangun me xi sahmi me condra Nina hacuaha sahmi me condra me xi tsingatju Nina xi cuaxëtje naja.

Cuatjin cachja xutachanga niji David.

<sup>27</sup> Hacuaha cavetjucaa jain cjuua vëhë ta, tsëhë xi ha nguehe nandya vihi ne, cuatjin camatangun Herodes cojo Poncio Pilatu cojo xutaxín cojo xuta tjë rë Israel. Camatangun me xi cuacun vëhë xi sahmi condra me Jesús, me xi hatuxa sahmi xa nuju cojo yëjë xahasen rë, me xi ngayun caningatjun ngasunhdë. <sup>28</sup> Cuatjin casahmi me yëjë hacutjin xi ha cavejñu cjuatacun nuju hatsëë xi cuma ta, tsëhë xi cuatjin meje nuju ngayun. <sup>29</sup> Quihndë ne, ngayun xi Nai niji ngayun ne, chjuhuncuendun cjuua xi cachja xuta xi cuacun vë hacutjin xi choho sahmi me cojo niji. Hane ngayin xi má ngayin mosu hndixahan nuju ne, tuhun niji hitsë ngahñu xi rcuiin camahani xi cuinújin cjuua nuju cojo xuta. <sup>30</sup> Hacuaha cojo ngahñu nuju ne, nihñu xi cuma ndaja xuta hmu rë, hacuaha nihñu hitsë cjuarcun xi cueyinnanguin ñihi rë Jesús, me xi hatuxa sahmi xa nuju cojo yëjë xahasen rë. —Cuatjin xu cafehya rë me Nina.

<sup>31</sup> Hane xi cajnetaha casahmi xuta ladu rë Jesús jan oración ne, cafani nangui ngajan hiscan tjin tangun xu me. Hane cojo Hasen rë Nina ne, catsë rë xahasen rë yëjë ni me, sehe cavetsihin cachja me nguñaja cacun me cjuua rë Nina cojo xuta.

### *Casahmi tangun me yëjë xcusun xi tjin rë me*

<sup>32</sup> Quihndë ne, ngayëjë ni me xi cuatjin camangu cacun me cojo Jesús ne, ngu cjuatacun ni rë me, ngu xahasen xu ni rë me. Hacuaha hisca ngu me cachjaain me xi yëjë ni xi tjin rë me ne, tsëhë suvá me ta xi tsëhë me ne, hacuaha tsëhë xu yëjë xicjin me. <sup>33</sup> Hane cojo ngahñu jyë xi casua Nina apóstol xi cuacun jan ne, cuatjin quijinduju me casua me camachaya rë xuta hacutjin catsicuya Nina Nai naja Jesús cjuahñu. Hane jercu casua Nina cjuandaja rë me cojo yëjë xuta ladu rë me. <sup>34</sup> Hacuaha ngajñi rë me xi cuacun jan ne, tsajin xu hisca ngu me xi tjin rë cjuachaja ta, tsëhë xi yëjë me xi nai rë ngu rquí nangui o sa xi ngu ndihya ne, viteña me, sehe fi caní me chji rë jan <sup>35</sup> tsja apóstol. Sehe ngajan xi apóstol xi cuacun jan ne, vatëcja xu me ngajñi rë yëjë xuta, ha tucutjin cjuachaja xi tjin rë xuta jan. <sup>36</sup> Hacuaha cuatjin casahmi ngu cha xi

hmí rë José, ngu cha xi casuañihi apóstol ngu ñihi xi ma jo xi hmí Bernabé, ñihi xi meje cuichja cuitjin: Ngu Cha Xi Sua Cjuetacun. Cha vëhë ne, tjë rë Leví má cha, peru catsin xu cha ngajan ngu nangui hiscan xi hmí rë Chipre. <sup>37</sup> Hane cha vëhë ne, caviteña cha ngu rquí nangui xi tjin rë cha, sehe quiji cani cha chji rë, cafhatsja apóstol.

## 5

### *Cha Ananías cojo na Safira*

<sup>1</sup> Peru ngu nga cha xi hmí rë Ananías cojo na Safira chjuun rë cha ne, hacuaha caviteña xu cha ngu rquí nangui. <sup>2</sup> Peru cafhaxin suvá cha hitsë tujún jan, sehe quiji cani cha hitsë tujún xi cavangui jan tsja apóstol, sacuaha xi ha vëhë yëjë ni chji rë nangui jan. Hane na chjuun rë cha jan ne, hacuaha vëë xu na xi cuatjin casahmi cha. <sup>3</sup> Ngajan xi cachjataha xu Pedru cha cuitjin:

—¿Mé má cuatjin caningatihin xi catsë Satanás xahasen riji, ngaye Ananías? ¡Xitsehen vëhë casahmi xi cachjehexin sove hitsë tujún tsëhë chji rë nangui xi caviteñi! ¡Xitsehen vëhë casahmi xi meje cuindache rë Hasen rë Nina! <sup>4</sup> Xi chaja sa cuiteñi nangui jan ne, ha hye ta tsiji. Hacuaha ngu ndiya xi ha caviteñi ne, hacuaha hye ta tujún rë ne, tsiji. ¿Mé má cuatjin caningatehetacuin xi nihñi ngu cjuatacun tsehen vi ni? Hacuiin ngayin ni xuta xi meje cuindache niji ta hisca cojo Nina meje cuindache rë me. —Cuatjin cachja Pedru.

<sup>5</sup> Xi tu cahndë cha Ananías cjua jan ne, caticja cha, hane cahme xu cha. Hane yëjë xuta xi camachaya rë cjuacjintacun jan ne, jemu catsacjun camaha xu ni me camá. <sup>6</sup> Ngajan xi ngujo cha ne, cavaxtë cha nima ngu tsjian ne, sehe cafa cha quiji caveyaniji cha.

<sup>7</sup> Hya xi camá ne, xi cavatju sacuaha chuva rë jyan hora xi cahme nima jan ne, cafehe xu chjuun rë nima ngajan hiscan siu apóstol jan. Peru cjëë cumachaya rë na hacutjin xi cavatju nima xihin rë na camá. <sup>8</sup> Ngajan xi cavinenguise xu Pedru na cuitjin:

—Tinoje cojo ná. ¿Há caviteñu nangui sacuatjin chji vihi?

—Juun. Chji vëhë caviteñi. —Cuahaxutjin cachja na.

<sup>9</sup> Sehe ngajan xi cavinenguise nga xu Pedru na cuitjin:

—¿Mé má cuatjin sacuaha catsingataha cacun nima xihin riji ne, cuatjin caningatehetacuin xi meje cuindachun Hasen rë Nina? Chutsijin ta cuacun cha xi quiji caveyaniji rë nima xihin riji nduva cha jan. Quihndë ne, hacuaha cojo ngaye cuatjin cuatji cuma. —Cuatjin cachja Pedru.

<sup>10</sup> Ha hora vëhë ni ne, caticja xu na hiscan secun Pedru, hane cahme na. Xi tu cavisehen nga cha xi cuacun jan ne,



ha cahme xu na xi tu cavëë cha. Sehe ngajan xi cafaha cha nima jan, quiji caveyaniji cha tjeheñ rë hiscan caseyaniji nima xihin rë. <sup>11</sup> Hya xi camá ne, yëjë xuta rë yungun cojo yëjë sa xuta xi camachaya xu rë cjuacjintacun jan ne, jemu catsacjun camahani me camá.

### *Casahmi apóstol cjuarcun*

<sup>12</sup> Hacuaha apóstol xi cuacun jan ne, jemu cjín cjuarcun xi casahmi xu me ngajñi rë xuta nandya. Hane ngajan ndatsen yungun xi matitjun, hiscan ngahma Ndihya Tsëhë Salomón ne, ngajan xu ma tangun yëjë xuta ladu rë Jesús. <sup>13</sup> Peru xuta xi hacuñin ladu rë Jesús me ne, hisca vetjiin cacun me xi cuma tiña me ngajan, handasa yëjë xuta jemu ndaja chja me tsëhë xuta ladu rë Jesús jan. <sup>14</sup> Peru hacuaha jemu cjín sa xuta sa chjuun sa xihin me ne, jimangu cacun xu me cojo Jesús, hacuaha jima tangun me cojo xuta ladu rë Jesús. <sup>15</sup> Hacuaha jemu cjín xuta ne, vaxë me xuta hmu rë, viyuju me me xcun nijña ngajan ndiyatë, cojo sa xi hora xi cuatju xu Pedru ne, ndastu tjahnguen rë me satë rë xuta hmu rë xi cuacun jan, hane cumandaja me. <sup>16</sup> Hacuaha jemu cjín camaha xu ni xuta nandya tahndee rë Jerusalén ne, ficojo me xuta hmu rë hacuaha cojo me xi hinchá xitsehen xahasen rë, ngajan Jerusalén. Hane camandaja ngayëjë xu ni me.

### *Cavatju apóstol cjuañihi*

<sup>17</sup> Hya xi camá ne, nahmi xi matitjun tsëhë yëjë ni nahmi, cojo yëjë sa xuta saduceo xi tjin tangun cojo rë me ne, jercu camaxín camaha xu ni rë me. <sup>18</sup> Vëhë xi cachjaha rë apóstol, caxincha me ndavaya. <sup>19</sup> Peru hya xi camanguixun ne, ngu ángel tsëhë Nina quiji cavuxaha xu tingotjo ndavaya, sehe cavaxë rë apóstol xi cuacun jan. Hya xi cavetju me ne, cachja ángel jan cojo rë me cuitjin:

<sup>20</sup> —Tángun yungun xi matitjun ne, tuhuncuendun rë xuta yëjë ni cjuá tsëhë ndiya xatsë xi tisua nuju Nina. —Cuatjin cachja ángel jan.

<sup>21</sup> Ngajan xi apóstol jan ne, casahmi me sacuatjin cachja ángel. Vëhë xi, xi casahasen xi camá nchujun ne, quiji xu me yungun xi matitjun. Hane xi cafehe me ndatsen yungun jan ne, cavetsihin casuacuenda me xuta cjuá tsëhë ndiya xatsë jan.

Hacuaha sacuaha hora vëhë ne, nahmi xi matitjun cojo xuta xi tjin tangun cojo rë me ne, casahmi tangun xu me yëjë xuta changá tsëhë xuta tjë rë Israel xi cuma ngu junta jyë. Sehe catsingatju me ngujo cha nísë xi cjue cuaxë xu cha apóstol tsëhë ndavaya, cjucojo cha me hiscan tijima junta. <sup>22</sup> Peru xi cafehe cha ngajan ndavaya jan ne, casacuiin xu rë

cha me. Ngajan xi cavuya quiji casuacuenda cha xuta changá jan cuitjin:

<sup>23</sup> —Xi caphin tingotjo ndavaya jan ne, nda ndaja tichjáhnũ, hacuaha cha xi sahmi cuidadu jan ne, hinchacun cha tingotjo jan. Peru xi catuxaha tingotjo ne, tsajin yo casacu niji xi hinchacahntsua. —Cuatjin casuacuenda cha.

<sup>24</sup> Ngajan xi cha mayu yungun cojo yějě nahmi xi matitjun ne, hya xi cahndě xu me cjua vėhě ne, jemu cavinenguisse xicjin me tsėhě xcusun xi camá jan. <sup>25</sup> Hane ha hora vėhě ni ne, cafehe xu ngu cha xi cachja cojo rě me cuitjin:

—Nijyun tacún. Ngu xa xi nduva ngahan ne, cha xi cuacun cavinchun ndavaya jan ne, hinchatahá cha ndatsen yungun, tichja cha cojo xuta. —Cuatjin cachja cha xi cafehe jan.

<sup>26</sup> Sehe ngajan xi cha mayu yungun jan ne, quiji cha cojo cha nísě, quijijaha xu cha apóstol xi cuacun jan. Hane xi cafaha cha me ne, quijicojo cha me hiscan tijima junta, peru hacuicun cojo cjuachan ta, tsėhě xi jemu tsacjun xu cha xuta nandya, sá tu cuetaha me cha ndyojo. <sup>27</sup> Hya xi cafehecojo cha me jan ne, sehe caviyuju cha me xcun nahmi cojo xuta changá xi cuacun jan. Ngajan xi nahmi xi matitjun ne, cachja xu me cojo rě me cuitjin:

<sup>28</sup> —Ha canújin cojo nuju ta ha quihndě cuyuun cuinújun tsėhě nima vėhě cojo xuta. Peru quihndě ne, caninguitsujun sa cjuachacun nuju jingujyě nandya Jerusalén, hacuaha meje ningatjunsun jyě tsėhě cjuaveya rě nima vėhě ngaxtin ngayin.

<sup>29</sup> Ngajan xi Pedru cojo apóstol xi yahnga xu jan ne, cuitjin cafayangui me:

—Meje rě xi cuinuhyan tsėhě Nina cahndě rě xi cuinuhyan tsėhě xuta. <sup>30</sup> Ngayun matsejen ne, catuhun Jesús xi catyangui me xcun ngu cru, hane ngajan cahme me. Peru Nina rě xutachanga naja matsejen ne, catsicuya me Jesús cjuahnũ. <sup>31</sup> Hane Jesús vė matsejen ne, casahmi jyě casahmi hnga Nina me, hacuaha cavejña me Jesús ladu quixi tsėhě me, xi cumatitjun Jesús tsajan hacuaha cuaxětje naja me. Cuatjin casahmi Nina, cojo sa xi ngayaan xuta tjě rě Israel matsejen ne, nindeyan cjuatacun naja hacuaha tsinchataha naja me tsėhě jyě naja. <sup>32</sup> Ngayin matsejen ne, cahyin xcusun vėhě, vėhě xi titihín jimachaya rě xuta. Hacuaha Hasen rě Nina matsejen ne, cuatjin tisua jimachaya rě xuta tsėhě xcusun xi camá jan. Hane Nina ne, casua me Hasen rě me cojo xuta xi vihndě tsėhě me. —Cuatjin cafayangui apóstol jan.

<sup>33</sup> Ngajan xi yějě me xi cuacun tisahmi xu junta jan ne, hya xi cahndě me cjua xi cachja apóstol jan ne, jercu camacjan camahani rě me. Hisca meje tsiquehen xu me apóstol jan. <sup>34</sup> Peru ngajñi rě xuta xi sahmi junta jan ne, jiyajñi ngu me

xi vicuya cjuachacun xi hmí rë Gamaliel, ngu xuta fariseo. Hane yëjë ni xuta ne, jemu faharcun xu me me. Gamaliel jan ne, casecunvasen me, sehe cavitexa me xi cuetjuxin apóstol ngu hora lihndi candatsen. <sup>35</sup> Sehe cachja xu me cojo xuta xi tisahmi junta jan cuitjin:

—Ngayujun ngarcun ni xuta tjë rë Israel matsejen ne, nechun cuidadu sa xi mé meje nihñu cojo cha xi cuacun vë. <sup>36</sup> Ninguitsjun ta hatsëë nixtin matsejen ne, cavetjújñi nima cha Teudas ngajñi rë xuta. Jercu cachja nima xi jemu cha venguichji rë cha, hane sacuaha ñuju cientu xihin cavisehen ladu rë nima. Hya xi camá ne, catsiquehen xuta nima, hane yëjë ni xuta ladu rë nima jan ne, cavitsojo me, hane ngajan cafë cjuandya xi casahmi me. <sup>37</sup> Hane xi camá ngascan ne, sacuaha nixtin xi camá censu matsejen ne, hacuaha cavetjújñi nima Judas, cha Galilea. Cavindacha nima xuta, hane jemu cavisehen me ladu rë nima. Peru nima vëhë matsejen ne, hacuanitjin ni cahme. Hane yëjë ni xuta ladu rë nima jan ne, cafë me cavitsojo me. <sup>38</sup> Vëhë xi nguehe cuichjá cojo nuju ta mijí rë xi nihñu cjuahngatacun cojo cha xi cuacun vë. Mijí rë xi chasen cha ta, sa xi suvá cjuatacun ni rë xuta xi tijima matsejen ne, cjuëya suvá vë. <sup>39</sup> Peru sa xi cjuatacun rë Nina xi tijima ne, cumaji cuichancjan cjuatacun rë cha. Ndaja cuidadu, sá tu cuechú nixtin xi cumachaya naja ne, Nina tichicjaan cojo rë me. —Cuatjin cachja Gamaliel.

Hya xi cajnetaha cachja Gamaliel cuatjin ne, yëjë ni xuta xi tisahmi junta jan ne, cajne cacun me. <sup>40</sup> Ngajan xi cajindaya nga me apóstol jan, sehe cavitexa me casehen rë. Hya xi camá ne, cachja xu me cojo rë apóstol xi ha quihndë cuyaaïn cuichja me tsëhë Jesús cojo xuta, sehe cavëhëndaya xuta jan me. <sup>41</sup> Ngajan xi apóstol jan ne, cavetjuxin xu me tsëhë hiscan jima junta jan. Hane jemu ndama camahani rë me xi cavechú chuva rë xi choho cavatju me camá ngatsë rë Jesús. <sup>42</sup> Peru nchunchujun ni ne, ngajan ndatsen yungun cojo ndava xuta ne, casejyïin xu xi casua me camachaya rë xuta cjuandajyihî xi chja xi Jesús ne, hacui me xi catsingatju Nina.

## 6

### *Catuxijin rë yatu cha xi cuisecoo rë apóstol*

<sup>1</sup> Hya xi camá ne, xi quiji sa nixtin ne, camacjín sa xuta ladu rë Jesús. Hane ngajñi rë me xi cuacun vëhë ne, me xi visiajmi hne griego ne, cavetsihin cavinchajyë xu me me xi visiajmi hne rë xuta tjë rë Israel. Jyë xi cavincha xu me ne, yachjin cahan tsëhë ngajñi rë me ne, ndajin xu má cuando me nchunchujun ni hora xi ticja xcusun xi satë rë me xingu xingu me xi tjin rë cjuachaja. <sup>2</sup> Ngajan xi apóstol xi tejó jan

ne, cajindayavaha me yějē sa xuta ladu rē Jesús, sehe cachja xu ngu apóstol jan cuitjin:

—Ndajintjin xi tu fē tu vetsihin vejñixin cjua rē Nina ngatsē rē xi chjihincuendin cjuacjintacun xi ma cuenda nchunchu-jun ni. <sup>3</sup> Vēhē xi ngayujun ni ne, naxujun ngajñi nuju yatu xihin xi tsajin mé cún mé má hacuaha quitsē rē xahasen rē cojo Hasen rē Nina hacuaha vechútaha cjuatacun rē. Sehe tahan rē xa xi cjuahacuenda cjuacjintacun vēhē. <sup>4</sup> Xi cuatjin ne, ngayin ne, tihín yojo niji cojo xa xi nihñi oración hacuaha tihín cumachaya rē xuta cjua rē Nina. —Cuatjin cachja apóstol jan.

<sup>5</sup> Hane jemu cachuya xu rē yějē xuta xi cuacun jan cjua xi cachja apóstol jan. Sehe ngajan xi cavaxijin xu me yatu xihin xi cuicun vi: Esteban, ngu xihin xi jemu mangucacun cojo Jesús hacuaha quitsē rē xahasen rē cojo Hasen rē Nina; Felipe; Prócoro; Nicanor; Timón; Parmenas; cojo Nicolás, ngu xutaxín xi hacuiin xuta tjē rē Israel, peru camacjain rē me Nina rē xuta tjē rē Israel. Nicolás jan ne, canduva me ngu nandya xi hmí rē Antioquía. <sup>6</sup> Hya xi camá xu ne, quijicojo xuta jan xihin xi cavaxijin me jan xcun apóstol. Sehe apóstol jan ne, casahmi me oración, sehe cavisanetsja xu me xihin xi cuacun jan xi suaxa rē me.

<sup>7</sup> Xi quiji sa nixtin ne, xuta Jerusalén ne, jemu jima chaya sa xu rē me cjua rē Nina, hacuaha jercu jima cjín sa xuta ladu rē Jesús ngajan Jerusalén. Hisca nahmi ne, jemu cjín me xi jimangu cacun xu me cojo cjuandajyihi xi chja tsēhē Jesús.

### *Caxinchajyē rē Esteban*

<sup>8</sup> Nixtin hya ne, Esteban, ngu xihin xi hacuaha cojo cavaxijin xuta jan ne, quitsē rē xahasen rē me cjuandaja rē Nina, hacuaha quitsē rē me ngahñu rē Nina. Vēhē xi jemu tisahmi xu me cjuarcun ngajñi rē xuta. <sup>9</sup> Peru ngujo cha tsēhē yungun xi hmí rē Yungun Rē Hndixahan Xi Ha Ndaya Tjin ne, cojo xu cha ma tangun cha cojo cha nandya Cirene, cha nandya Alejandría, cha estadu Cilicia, cojo cha estadu Asia, xi cuisiajmi cha. Cavechú ngu nixtin xi camatangun xu cha xi cuacun vē cojo Esteban ne, cavetsihin cafachataha cha me. <sup>10</sup> Peru ngatsē rē xi Hasen rē Nina jemu casua rē me cjuatacun xi cuisiajmi me cojo cha ne, cacaain xu rē cha casahmi condra cha cjua rē me. <sup>11</sup> Hya xi camá ne, cavanguisehma xu cha ngujo cha xi cuichja cjuandesu cuitjin:

—Canuhyin xi choho cachja cha xi cuajyihi vē tsēhē Moisés hacuaha choho cachja cha tsēhē Nina. —Cuatjin cuichja cha.

<sup>12</sup> Hane xi cachja cha cjuandesu vēhē ne, casahmi cha xi yějē xuta cojo xuta changá cojo cha xi vicuya cjuachacun ne, jemu camaxti xu rē me. Ngajan xi cachjahá rē Esteban, quiji

chani rë me xcun yëjë xuta xi matitjun. Sehe casahmi me xi matitjun jan ngu junta. <sup>13</sup> Ngajan xi cha xi cuacun jan ne, cuitjin cachja xu cha cjuandesu hora xi cavinchajyë cha Esteban:

—Cha xi cuijyihí vi ne, sejiin cha xi choho chja cha tsëhé yungun rë Nina xi matitjun vi. Sejiin cha xi choho chja cha tsëhé ley rë yungun naja. <sup>14</sup> Hacuaha canuhyin xi cachja cha xi Jesús, cha Nasaret vé ne, tsinguetsun cha yungun naja vi hacuaha tsindeya cha xcusun xi cavejña xutachanga naja Moisés hatsëë hacutjin nihña. —Cuatjin cavinchajyë cha me.

<sup>15</sup> Ngajan xi yëjë xuta xi siu xu xcun junta jan ne, cavut-sejenndaja me Esteban. Hane cavëë me xi xcun Esteban ne, tangun jyihí xu cojo xcun ngu ángel.

## 7

### *Casua Esteban cjuaquixi rë me*

<sup>1</sup> Hya xi camá ne, nahmi xi matitjun xu jan ne, cavinenguisse me Esteban cuitjin:

—¿Há quixi cjuá xi chja cha xi cuacun vé? —Cuatjin xu cachja me.

<sup>2</sup> Hane Esteban ne, cuitjin xu cavetsihin casua me cjuaquixi rë me:

—Ngayujun ni quihndi nandya, ngayujun ni xuta changá matsejen ne, tisiñuju cjuá xi cuichjá cojo nuju vi. Nina naja, xi jemu jyë hnga camahani me cojo hasen rë me matsejen ne, cajnetsejen me cachja me cojo xutachanga naja Abraham, hya xi tacun cuaha Abraham táha ladu tsëhé nangui Mesopotamia, hya xi chaja sa cjue setaha cahndë me ngajan Harán. <sup>3</sup> Hane cachja Nina cojo rë me cuitjin: “Nismitacuín nangui riji. Nismitacuín xuta riji. Hane tihin ngajan ngu nangui cjin, tuyani ni hiscan xi ngahan tsingácun rí.” Cuatjin cachja Nina. <sup>4</sup> Ngajan xi Abraham matsejen ne, cavetju me tsëhé nangui rë me, nangui xi hmí Mesopotamia, hiscan xi caviyuju xuta nangui rë me, xuta Caldea. Cavetju me quiji casetahacahndë me ngajan nandya Harán. Hane xi cavatju cahme nahmi rë me ne, Nina casahmi me xi cavetju nga Abraham tsëhé Harán, canduva casetahacahndë me nguehe nangui hiscan xi nechan quihndë. <sup>5</sup> Peru xi ngutjen ni ne, casuaain Nina me hisca hitsë nangui vihi xi cuma tsëhé me ta xi cachja me ne, hisca xi cuma ngascan ne, sehe sua me nangui vihi xi cuma tsëhé Abraham, cojo yëjë sa xuta tjë rë me xi cuinduva ngascan. Hya xi cachja Nina cojo rë me cuatjin ne, cjëë sacú rë chjuun rë Abraham quihndi. <sup>6</sup> Hacuaha cachja sa Nina cojo Abraham cuitjin: “Cuechú nixtin xi xuta tjë riji ne, cjue cuiyujutaha me ngu nangui cjin.

Hane xuta xi nangui rē jan ne, sahmi me mosu hndixahan rē me xuta xi cuacun tjē riji vë, hacuaha jemu choho sahmi me cojo rē me. Ñuju cientu nu xi cuatjin sahmi me xcusun vëhë. <sup>7</sup> Peru cuechú nixtin xi ngahan ne, sahme castigu xuta xi nangui rē jan. Hane xi cuatju xcusun vëhë ne, sehe cuetju xuta tjē riji ne, cuya cuinduva nga me nguehe cahndë vihi, hane nguehe cjuaharcun cjuahajeya ná me.” Cuatjin cachja Nina cojo Abraham. <sup>8</sup> Hane cojo sa xi cuma tsejen xi camangu cacun Abraham cojo compromisu xi casahmi Nina cojo rē me matsejen ne, cavejña Nina ngu xcusun xi xtí chuxin naja ngayaan xi xihin ngayaan. Ngajan xi hya xi cavechú jyin nixtin xi catsin Isaac, quihndi rē Abraham ne, cavatë me chuxin rē quihndi jan sacuatjin xi cachja Nina. Hane hacuanitjin ni casahmi Isaac cojo quihndi rē me Jacob. Hacuaha Jacob ne, cuatjin casahmi me cojo yëjë tejó quihndi rē me xi xutachanga naja.

<sup>9</sup> Hane xi camá ngascan matsejen ne, cavechú ngu nixtin xi xutachanga naja xi quihndi rē Jacob jan ne, jemu casahmi xín cacun me cojo hntsë me xi hmí rē José. Vëhë xi caviteña me José. Hane quijicojo xuta xi cavatsë rē José jan me hisca nangui Egipto. Peru Nina ne, cavisecoo me José jan, <sup>10</sup> hacuaha cavaxëtje Nina me tsëhë yëjë cjuacjintacun xi cavatju me camá. Jemu casua Nina me cjuatacun, hacuaha jemu casua me me cjuandaja. Vëhë xi me xi matitjun tsëhë yëjë ni nación Egipto ne, jemu cachuya rē me tsëhë José jan. Vëhë xi me xi matitjun jan ne, casua me José xa xi cuitexa me jingujyë ni nación jan hacuaha cjuahacuenda me yëjë cjuacjintacun xi tjin ndava me xi matitjun jan.

<sup>11</sup> Hya xi camá ne, jercu camajindya camahani jingujyë ni ladu tsëhë Egipto cojo Canaán. Jercu jyë camahani ngu cjuañihi xi cavatju xuma xutachanga naja camá. Casacuiin rē me mé xi sinë me. <sup>12</sup> Peru hya xi camachaya rē xutachanga naja Jacob xi jemu tjin xichinë ngajan Egipto matsejen ne, ngajan catsingatju me quihndi rē me ngu ndiya titjun xi cjue cuatsë me xichinë. <sup>13</sup> Hane hya xi ma jo ndiya quiji quihndi rē Jacob ngajan Egipto ne, cachja quixi José cojo hntsë me cuitjin: “Ngahan xi tsuhun ná.” Cuatjin cachja me. Hacuaha nixtin hya ne, me xi matitjun tsëhë Egipto matsejen ne, camachaya rē me yo tjē rē má José. <sup>14</sup> Sehe ngajan xi José ne, catsingatju me hntsë me jan xi cjue jaha me Jacob, nahmi rē me, cojo yëjë sa xuta rē me. Xi yëjë xuta xi cuacun vëhë ne, jyanchan tyjuhun xuta má me. <sup>15</sup> Ngajan xi Jacob cojo xuta rē me matsejen ne, quiji caviyujutaha cahndë me ngajan Egipto. Hane xi camachangá me ne, ngajan cahme me. Hacuaha yëjë sa xutachanga naja xi cuacun jan ne, hacuaha ngajan

cahme me. <sup>16</sup> Xi camá ngascan ne, quiji chani rë yojo rë nima Jacob ngajan nandya Siquem. Ngajan caseyaniji nima tsjun xi cavatsë Abraham hatsëë, hya xi caviteña xuta rë ngu cha xi hmí rë Hamor, ngajan Siquem.

<sup>17</sup> Hya xi camá ne, xi camatiña nixtin xi cuetjucaa sacuaha cjua xi ha cachja Nina cojo Abraham matsejen ne, yëjë xutachanga naja xi siutaha cahndë ngajan nangui Egipto ne, ha jercu cjín camahani camá me. <sup>18</sup> Sehe cavisehen nga ngu me xi xatsë xi camatitjun me ngajan nangui Egipto jan. Hane me vëhë ne, hvíin me hacutjin casahmi nima José hatsëë. <sup>19</sup> Hacuaha me vëhë ne, jemu cavindacha me xutachanga naja. Jemu choho casahmi me cojo rë me ta casahmi me ngujyë xi xutachanga jan ne, cuaxë me quihndinda rë me, cuiyuju me candatsen cojo sa xi cueya. Hane cuatjin xi ha quihndë hacuiin cuma cjín sa me. <sup>20</sup> Ngajñi rë cjuacjintacun vëhë matsejen ne, hya catsin Moisés, ngu quihndi xi jemu ndajyihí camahani. Hane quihndi jan ne, ndava nahmi rë camacha sacuaha chuva rë jyan sá. <sup>21</sup> Peru hya xi cavaxë me quihndi jan xi cueya ne, na quihndi rë me xi matitjun jan ne, cafaha na quihndi jan, hane catsicha na sacuaha quihndi rë suvá na. <sup>22</sup> Hane xi quiji sa nixtin ne, cavetsihin cavutaya Moisés yëjë ni cjuahasen xi tjin rë xuta Egipto, sehe ngajan xi camá me ngu xihin xi jercu vengui chji rë xi chja me cojo xi sahmi me.

<sup>23</sup> Hya xi cavechú Moisés yachan nu matsejen ne, catsingataha cacun me xi cjue scusehenya me xuta tjë rë Israel, xuta xi tangun xutachanga rë me cojo. <sup>24</sup> Hya xi camá ne, cavëë Moisés xi ngu cha Egipto ne, tisahmi cha cjuahngatacun cojo ngu cha tjë rë Israel. Ngajan xi Moisés ne, cavisecoo me cha xi choho tivatju tijima jan. Catsiquehen me cha Egipto jan, hane cuatjin casahmingojo me. <sup>25</sup> Xi má rë Moisés matsejen ne, cuijnercu yëjë xuta tjë rë Israel xi Nina tsingatju me Moisés xi cuaxëtje me xuta jan. Peru cajnií rcu me. <sup>26</sup> Xi camá nchujun jan ne, cavechútaha me jo cha tjë rë Israel xi ticjan cha cojo xicjin cha. Hane meje cuatëcja me si xi tisahmi cha. Vëhë xi cachja me cojo cha cuitjin: “¿Mé má cuatjin nihñu cjuahngatacun cojo xingun? ta ngayun ne, tangun xutachanga nuju.” Cuatjin xu cachja Moisés. <sup>27</sup> Peru cha xi tisahmi cjuahngatacun cojo cha xingu jan ne, catsivaha cha Moisés, sehe cachja cha cojo me cuitjin: “¿Yo casuaxa nuju xi nduvun vitexun niji hacuaha nduvun nichuvun jyë niji? <sup>28</sup> ¿Há meje nicuhun ná ngahan sacuatjin canicuhun cha Egipto ngujña?” Cuatjin cachja cha. <sup>29</sup> Hane xi cuatjin cachja cha cojo Moisés ne, catsacjun me camá. Vëhë xi quiji cavanga me hiscan ngu nangui cjín xi hmí rë Madián, ngajan

casetahacahndë me. Hane xi quiji nixtin matsejen ne, camá me nahmi rë jo quihndi xihin.

<sup>30</sup> 'Hane hya xi cafë nga yachan nu xi casetaha Moisés ngajan ne, cavechú ngu nixtin xi cavëë me sacuaha ngu ángel ngajñi rë ndihi tsëhë ngu ya lihndi xi seti ngajan ngu xín camahani tsëhë nandya, tiña Naxi Sinaí. <sup>31</sup> Hane jemu quijircun rë Moisés xi cavëë me xcusun jan. Hane xi quijitiña sa me xi scutsejenndaja me matsejen ne, cahndë me cjua rë Nina xi cachja cuitjin: <sup>32</sup> "Ngahan xi Nina rë xutachanga riji ngahan, Nina rë Abraham cojo Isaac cojo Jacob." Cuatjin cachja cjua rë Nina jan. Ngajan xi Moisés ne, cavetsihin ña cafatsë me xi catsacjun me camá; ha hisca quihndë cavetjiin cacun me xi scutsejen sa me. <sup>33</sup> Sehe cachja nga Nina cojo rë me cuitjin: "Naxe chuxinxhtë riji ta cahndë hiscan sechin ne, catsinchácun. <sup>34</sup> Hacuaha nguehe cuichjá cojo ri ta ngahan ne, ha cahvë hacutjin choho tisahmi xuta Egipto cojo xuta ladu naha, hacuaha ha cahndë hacutjin tifë cacun xuta ladu naha xi choho tivatju me tijima. Vëhë xi ngahan ne, canduvajne xi cuaxëtjë me. Quihndë ne, ndove ta tsingátju ri ngajan Egipto." Cuatjin cachja Nina cojo Moisés.

<sup>35</sup> 'Moisés vë ne, hacui me xi catsitjungui xuta hya xi cachja xuta cuitjin: "¿Yo casuaxa nuju xi nduvun vitexun niji, hacuaha nduvun nichuvun jyë niji?", chja me. Hacuaha hacui me xi Nina catsingatju rë xi cuma titjun hacuaha cuëhëndaya rë xuta. Hane sacuaha ángel xi camatsejen ngajñi ndihi rë ya lihndi jan ne, cavisecoo rë Moisés xi cuatjin casahmi me. <sup>36</sup> Hacuaha hacui me xi cavaxë rë xutachanga naja tsëhë nangui Egipto. Jemu casahmi me cjuarcun ngajan Egipto, cojo ngajan ndachacun Hani, cojo ngajan ngu xín camahani tsëhë nandya. Cahntsua yachan nu xi cuatjin casahmi me. <sup>37</sup> Moisés vë ne, hacui me xi cachja cojo xutachanga naja cuitjin: "Nina ne, cuya tsingatju nga nuju me ngu profeta xi cuetjuñi ngajñi nuju. Tsingatju nuju Nina profeta vëhë sacuatjin catsingatju ná me ngahan." Cuatjin cachja Moisés. <sup>38</sup> Hacuaha ha hacui ni me xi casetaha cojo xutachanga naja, hya xi caviyujutaha me ngajan ngu xín camahani tsëhë nandya. Hacui me xi cachja ángel cojo rë ngajan Naxi Sinaí. Hacuaha hacui me xi cafahatsja cjua rë Nina xi sacú rë xutachanga naja hacuaha hisca cojo xi sacú naja ngayaan quihndë.

<sup>39</sup> 'Peru xutachanga naja xi cuacun jan ne, mijí cuihndë me tsëhë Moisés. Catsitjungui me Moisés, hisca cavuya catsinguitsjen nga me nangui Egipto cahntsua xahasen rë me. <sup>40</sup> Ngajan xi cachja me cjua vihi cojo xutachanga naja Aarón, hntsë Moisés: "Nindujun sa nina xi scuxaha ndiya tsajan



ta, cha Moisés vë, cha xi cavaxë naja tsëhë naciòn Egipto ne, hyaan mé camá rë cha xi vuyaaïn cha.” Cuatjin cachja xuta jan. <sup>41</sup> Ngajan xi nixtin hya ne, catsindaja xuta jan ngu nina rë me xi xcusun rë ngu hndindyaja. Hya xi camá ne, catsiquehen me ngujo chu, sehe quiji caviyuju me chu xcun nina jan. Hacuaha casahmi me suhi tsëhë nina xi catsindaja suvá me jan. <sup>42</sup> Vëhë xi Nina naja ne, catsismi cacun me xutachanga jan, cojo sa xi cjuaharcun xuta jan niñú xi siutaha ngahnga, sacuatjin catsihindu profeta xcun xujun rë Nina cjua xi cachja Nina hya xi cachja me cuitjin:

Ngayujun ngarcun ni xuta tjë rë Israel matsejen ne,  
hya xi canicuhun chu sacuaha cjuatjo xi tuhun ná ngahan  
cahntsua yachan nu xi cavinechuntuhun ngajan ngu  
xín camahani tsëhë nandya matsejen ne,  
hacuiin ngahan xi cuatjin cachjuhunrcun ná ta ngayun ne, ha  
canindujun suvun nina xi chjuhunrcun.

<sup>43</sup> Ndava nina nuju xi hmí Moloc

cojo niñú rë nina nuju xi hmí Refán, jo vëhë xi cachuhunhn-  
gun catsanguncujun xi má nina nuju.

Vëhë xi ngahan sahme xi cjuecojo cjuachan nuju xuta cjin sa  
tsëhë hiscan xi hmí Babilonia.

Cuatjin catsihindu profeta cjua xi cachja Nina.

<sup>44</sup> Hya xi caviyujutaha xutachanga naja hatsëë ngajan ngu xín camahani tsëhë nandya matsejen ne, cavejña rë me ngu ndihya tsjian hiscan camá acuerdu cojo Nina. Hane vëhë xi vëë me xi cavejña Nina cojo rë me. Ndava Nina jan matsejen ne, camandaja tutjin xi cachja Nina cojo Moisés, camandaja sacuatjin xcusun xi catsingacun Nina Moisés. <sup>45</sup> Hane hya xi cafachatsja xutachanga naja ndava Nina jan ne, hacuaha cuatjin quijicojo me ha tuyani ni xi quiji caviyujutaha nga me. Hane xi camá ngascan ne, cavechú nixtin xi cafehecojo Josué xutachanga naja nguehe nangui naja vi, nangui xi Nina cavisecoo rë xutachanga naja xi cavaxëxin me xuta xi nangui rë. Hacuaha nixtin hya xi camá cuatjin ne, hacuaha cafehecojo me ndava Nina jan. Cuatjin camá sa hisca hya xi cavechú nixtin rë xutachanga naja David. <sup>46</sup> Hane David jan matsejen ne, jemu cachuya rë Nina tsëhë me. Ngajan xi cafehya David cahndé cojo Nina xi tsindaja me ngu ndihya hiscan cuejña Nina. <sup>47</sup> Hane hisca xi camá ngascan ne, xutachanga naja Salomón catsindaja me ndava Nina. <sup>48</sup> Peru Nina xi matitjun matsejen ne, hacuiin vejñacahndë me ngu ndihya xi tsindaja xuta ta ¿há vitsjiin nuju hacutjin cachja ngu profeta xi cachja me cjua rë Nina cuitjin?:

<sup>49</sup> Ngahnga ne, sacuaha ngu silla ndajyihí hiscan xi vitejña,

hane nangui ne, sacuaaha ngu yatë hiscan xi visane ntsacu, chja Nina.

Tsajin yo cuma tsindaja ngu ndihya hiscan xi cuitejñacahndë, Tsajin ngu cahndë xi cuacun vë xi cuma cjuahájenda.

<sup>50</sup> Ngahan catsindaja yëjë ni xcusun xi tjín ngasunhndë. Cuatjin cachja profeta jan cjua rë Nina.

<sup>51</sup> Ngayujun ni ne, jercu taja camahani rcun. Xahasen nuju cojo cjuatacun nuju ne, tangun cojo xutaxín xi hatuxa macjaain rë Nina. Hatuxa nihñu condra Hasen rë Nina. Tangun camahani ngayun cojo xutachanga naja. <sup>52</sup> Hacuaha xutachanga naja ne, jercu catsujyihya tjengui me yëjë profeta cojo cjuahngatacun. Hisca catsiquehen me profeta xi casua camachaya rë me xi sehe cuinduva ngu me xi hatuxa tyjahi jain cojo cjuatacun rë. Hane quihndë xi cafehe jain me ne, ngayun canihñu me entregadu, ngayun catuhun me xi catsiquehen xuta me. <sup>53</sup> Ngayun xi casua ángel xutachanga nuju ley rë Nina ne, hisca nuhyuun tsëhë ley vëhë. —Cuatjin casua Esteban cjuaquixi rë me xcun yëjë xuta xi matitjun ngajan xcun junta.

### *Cojo ndyojo catsiquehen xuta Esteban*

<sup>54</sup> Ngajan xi yëjë xuta xi matitjun xi cuacun tisahmi junta jan ne, hya xi cahndë me cjua xi cachja Esteban jan ne, hisca catsijanerii me nehñu me xi jercu tu camacjan camahani rë me. <sup>55</sup> Peru Esteban ne, quitsë rë xahasen rë me cojo Hasen rë Nina. Hane xi cavutsejenniji me ngahnga ne, cavëë me hasen ndajyihí rë Nina xi jercu seti camahani. Hacuaha cavëë me Jesús, secun me cojo Nina. <sup>56</sup> Ngajan xi cachja Esteban cuitjin:

—Chutsujun ni. Ngahan ne, xi tivutsején ngahnga vë ne, tsejen xi tixaha sacuaaha tingotjo rë, hacuaha tsejen xi me xi Quihndi rë Xuta Jain ne, secun me cojo Nina. —Cuatjin cachja Esteban.

<sup>57</sup> Peru me xi cuacun jan ne, cavetsihin cajindayatë me hacuaha cavahahñu me tyjavañuju me, tsëhë xi mijí sa cuihndë me xi tichja Esteban. Sehe ngutjen ni ne, ngu tangun ni cavanga me quiji cavehnchun me Esteban xi cafaha me me. <sup>58</sup> Sehe cavaxëxin me me ngajan tjehe nandya, sehe cavitexa me ngujo cha xi cavetsihin cavetaha cha ndyojo Esteban. Cha xi cuacun casahmi jan ne, cavaxë cha tsjian xcun rë cha, caviyuju cha hiscan xi secun ngu cha xi hmí rë Saulo, xi casahmi cha cuidadadu. <sup>59</sup> Jinguyëjë rë xi tísatë rë Esteban ndyojo xi tivetaha cha xi cuacun jan ne, cafehya me cjuandaja cojo Jesús cuitjin:

—Jesús, ngayun Nai naha, chjuhunntsun hasen naha. —Cuatjin cachja me.

<sup>60</sup> Hya xi camá ne, cavixcuhnchi me, hane sehe jercu cajindaya me, cachja me cjua vihi:

—¡Ngayun Nai naha, ninchatuhun rë xuta xi cuicun vi tsëhë cjuatsehen xi tisahmi me cojo ná! —Cuatjin cajindaya me cachja me.

Xi cafë cachja me cjua vëhë ne, cahme me.

## 8

*Catsujyihya tjengui Saulo xuta ladu rë Jesús cojo cjuahngatacun*

<sup>1</sup> Hane Saulo ne, hacuaha cachuya rë me xi cuatjin catiquehen cha xi cuacun jan Esteban.

Ha nixtin hya ni ne, cavetsihin catsujyihya tjengui xuta xi matitjun jan yëjë xuta ladu rë Jesús cojo cjuahngatacun ngajan Jerusalén. Hya xi camá ne, yëjë xuta ladu rë Jesús jan ne, cafë cavitsojo me táha ladu tsëhë distritu Judea cojo distritu Samaria. Suvá sa apóstol xi tsajin cavitsojo xu me.

<sup>2</sup> Hane ngujo cha xi faharcun jain rë Nina ne, cavinchaniji cha nima Esteban, hacuaha jemu cajihnda xu cha tsëhë nima.

<sup>3</sup> Peru Saulo ne, cavetsihin catsujyihya tjengui me xuta ladu rë Jesús cojo cjuahngatacun. Quiji cavisehen xu me ndava xuta xi cuacun jan, cajuvëjne me cavaxë me sa chjuun sa xihin, quijicani me ndavaya. Vëhë xi cuatjin cavitsojo xuta jan.

*Sacu machaya rë xuta Samaria cjuandajyihi xi chja tsëhë Jesucristu*

<sup>4</sup> Quihndë ne, xuta xi cavitsojo tsëhë Jerusalén jan ne, catsujyihya casua xu me camachaya rë xuta cjuandajyihi xi chja tsëhë Jesucristu. <sup>5</sup> Hane Felipe ne, quiji xu me ngu nandya táha distritu Samaria, hane ngajan casua me camachaya rë xuta ta ha cafehe me xi catsingatju Nina xi cuaxëtje naja. <sup>6</sup> Hane xi cavisinuju xuta cjua xi cachja Felipe cojo xi cavutsejen me cjuarcun xi casahmi me ne, jemu ndaja cavetaharcu me cjua xi cachja Felipe jan. <sup>7</sup> Jemu cjín xuta xi hinchaxitsehen xahasen rë me ne, camandaja xu me. Hisca cajindaya xitsehen jan hora xi cavetjuxin. Hacuaha jemu cjín xuta xi cahme yojo rë me cojo cjín sa xuta xi rengun me ne, camandaja xu me. <sup>8</sup> Vëhë xi xuta nandya vëhë ne, jercu ndaja camá xu rë me.

<sup>9</sup> Peru ngu cha xi hmí rë Simón ne, ha quitahá cha ngajan, tisahmi xu cha cjuasurqui. Hane yëjë xuta distritu Samaria ne, jemu quijircun rë me xi casahmi cha. Hacuaha cachja xu suvá cha xi jemu jyë hnga cha cojo cjuatacun rë cha. <sup>10</sup> Yëjë xuta Samaria jan, sa quihndi sa changá me ne, jemu ndaja

cavetaharcu xu me tsëhë cha Simón jan. Hisca cachja xu me tsëhë cha cuitjin:

—Cha vihi ne, hacui cha xi tjin rë ngahñu rë Nina, ngahñu xi hmí rë ngahñu jyë. —Cuatjin cachja xuta jan.

<sup>11</sup> Vëhë xi jemu ndaja cavetaharcu xu xuta tsëhë cha ta, tsëhë xi ha jemu jyë nixtin xi casahmi cha xi quijircun rë xuta tsëhë cjuasurqui xi casahmi cha.

<sup>12</sup> Peru hya xi camacjain rë xuta tsëhë Felipe, hya xi casua me camachaya rë xuta tsëhë cjuandajyihi xi chja xi cuinduva Nina sahmi me gobiernu hacuaha cojo cjuandajyihi xi chja tsëhë Jesucristu ne, caxtenda xu me, sa chjuun sa xihin me. <sup>13</sup> Hacuaha hisca cha Simón jan ne, camacjain xu rë cha tsëhë Felipe. Hane xi cavatju caxtenda cha ne, sehe catsihñu cha yojo rë cha cojo Felipe. Hane xi cavutsejen cha yëjë cjuarcun yehe xi jima ne, jemu quijircun rë cha.

<sup>14</sup> Hya xi camachaya rë apóstol xi siu ngajan Jerusalén xi xuta Samaria ne, camacjain xu rë me cjuar rë Nina ne, catsingatju me Pedru cojo Juan quiijtjengui rë xuta jan. <sup>15</sup> Hya xi cafehe jo apóstol jan ngajan ne, casahmi xu me oración tsëhë xuta jan cojo sa xi sacú rë me Hasen rë Nina. <sup>16</sup> Cuatjin casahmi me ta, tsëhë xi hisca xi ngu xuta jan ne, cjëë cuinduva xu Hasen rë Nina cuisehen xahasen rë me. Suvá ni ñihi rë Nai naja Jesús caseyananguí hora xi caxtenda me. <sup>17</sup> Ngajan xi Pedru cojo Juan ne, cavisanetsja me xuta Samaria jan, sehe cavisehen xu Hasen rë Nina cahntsua xahasen rë me.

<sup>18</sup> Xi cavëë cha Simón xi casacu rë xuta jan Hasen rë Nina ngatsë rë xi cavisanetsja apóstol jan me ne, meje sua xu cha me tujún, <sup>19</sup> hacuaha cuitjin cachja xu cha cojo rë me:

—Tuhun ná cjuatacun vëhë, cojo sa xi tu yo ni xi cuisanentsa ne, sacú rë Hasen rë Nina. —Cuatjin cachja cha.

<sup>20</sup> Ngajan xi Pedru ne, cuitjin cafayangui xu me:

—¡Tujún riji ne, catjë tangun cojo ri! ta, tsëhë xi caningatehetacuín xi cjuandaja rë Nina ne, cuma chaha rë cojo tujún. <sup>21</sup> Ngaye ne, satiín camahani ri xa vëhë ta, tsëhë xi hacuiín tyjahi xahasen riji xcun Nina. <sup>22</sup> Nindeye cjuatacun riji. Tejñixin cjuatsehen riji vë. Hacuaha chjahye rë Nina cjuandaja rë me, há tsinchataain me ngaye tsëhë cjuatacun xi jiya ngajñi rë cjuatacun riji. <sup>23</sup> Ngahan ne, vacun ná xi ngaye ne, cuma ngaye ngu xuta xi ngundiyaxa ni tsihñu me yojo rë me cojo cjuatsehen. —Cuatjin cafayangui Pedru.

<sup>24</sup> Ngajan xi cha Simón ne, cuitjin cafehya xu cha:

—Nihñu favor ne, chjahyun rë Nina ngatsë naha cojo sa xi hisca xi ngu cjuar xi canújun vë ne, cuatjuun cuma. —Cuatjin cafehya cha.

<sup>25</sup> Hya xi camá ne, Pedru cojo Juan ne, xi cavatju cachja xu me cojo xuta Samaria jan cjua xi chja tséhë Nai naja ne, cavuya quiji nga me ngajan Jerusalén. Peru yějë ni nandya xi vatju me hacutjin cjuí me jingunduju ni ndiya ngajan distritu Samaria ne, ha cuatjin cachja sa me cjuandajyihí jan cojo xuta.

*Felipe cojo ngu xutaxa rë nación Etiópia*

<sup>26</sup> Camá nga ngu nixtin xi ngu ángel tséhë Nina ne, cachja cojo Felipe ngajan Jerusalén cuitjin:

—Tihinjni ndiya Gaza. —Cuatjin cachja ángel.

Ndiya vëhë ne, vatju ngajan ngu xín camahani tséhë nandya. <sup>27</sup> Ngajan xi cavetju xu Felipe, quiji me. Hane ndiya cjuí me ne, cavechútaha xu me ngu xutaxa rë nación Etiópia, ngu xihin xindë xi fahacuenda yějë cjuanchina rë na xi matitjun tséhë yějë xuta Etiópia jan. Xihin jan ne, quiji me ngajan Jerusalén xi cjuaharcun me Nina. <sup>28</sup> Hane xi cavuya tife me nangui rë me ne, jiya me carreta rë me cjue me, táha tivutaya me xujun rë Nina xi catsihindu profeta Isaías. <sup>29</sup> Ngajan xi cachja xu Hasen rë Nina cojo Felipe cuitjin:

—Tihinvehe hiscan cjuí carreta xi cuajyihí vë, nihñitanguin cojo. —Cuatjin cachja Hasen rë Nina.

<sup>30</sup> Ngajan xi cuatjin casahmi Felipe. Xi tu camatiña me hiscan cjuí carreta jan ne, cahndë xu me xi cjua rë xujun xi catsihindu profeta Isaías ne, vëhë tivutaya me xi jiya carreta jan. Sehe cavinenguisse Felipe me cuitjin:

—¿Há vijnercun cjua xi tichutayun vë? —Cuatjin cavinenguisse Felipe.

<sup>31</sup> Ngajan xi cuitjin cafayangui xu me:

—Ngahan ne, vijniircú ta, tséhë xi tsajin yo cuicuya ná. —Cuatjin cafayangui me.

Sehe ngajan xi cachja xu me cojo Felipe xi cuisehen cuejñatangun xu me cojo rë me. <sup>32</sup> Tivutaya me xujun rë Nina hiscan xi chja cuitjin:

Sacuaha ficojo xuta ngu chu tsánga xi tsiquehen me chu ne, cuatjin cjucojo xuta me;

hacuaha sacuaha jindayaain ngu hnditsánga hora xi secun chu xcun me xi cuejnu rë chu ne,

cuatjin tsajin camahani mé xi cuichja me hora xi secun me xcun me xi cjuahataha rë me.

<sup>33</sup> Sahmichuva xuta me, hacuaha tsichoho xuta cjuandaja xi cuma rë me;

Tsajin cuichja xuta tséhë quihndi rë me ta, casacuiin rë me tséhë xi cjuahñu xi casacu rë me ngeuhe ngasunhndë ne, quijicanií rë me.

Vëhë cjua rë Nina xi tivutaya xihin jan.

<sup>34</sup> Hya xi camá ne, sehe cafinenguise me cojo Felipe cuitjin:  
—Xi má nuju ne, ¿yo tséhë xi cuatjin chja profeta vë? ¿Há tséhë suvá me ne?, o há tsajin ne, ¿há tséhë jingu sa xuta?  
—Cuatjin cafinenguise me.

<sup>35</sup> Ngajan xi Felipe ne, cavetsihin me cojo cjua rë Nina xi tivutaya xihin jan, hane casua xu me camachaya rë xihin jan yëjë ni cjuandajyihi xi chja tséhë Jesús. <sup>36</sup> Xi cjui me ndiya ne, cavechú xu me hiscan jiya ngu nandá. Ngajan xi chja xihin jan cojo Felipe cuitjin:

—Chutsujun ni. Nguehe jiya ngu nandá. ¿Há cumaji xtenda ngahan? —Cuatjin cachja xihin jan.

<sup>37</sup> Ngajan xi cachja xu Felipe cojo rë me cuitjin:

—Sa xi nguñaja xahasen nuju xi macjain nuju ne, cuma.  
—Cuatjin cachja Felipe.

Hane xihin xi cuajyihi jan ne, cuitjin cafayangui me:

—Macjain ná xi Jesucristu ne, hacui jain me xi Quihndi rë Nina me. —Cuatjin cafayangui me.

<sup>38</sup> Hya xi camá ne, cachja xu xihin jan cojo cha xi ficojo carreta xi secunhñu cha cojo, hane sehe cavitujne me cojo Felipe, sehe quiji catsijo me xcun nandá, hane caxtenda xu xihin jan. <sup>39</sup> Xi cavetju me tséhë nandá ne, Hasen rë Nina ne, ngutjen quijicojo xu rë Felipe. Hane xihin jan ne, ha quihndë cavuyaain cavëë rë Felipe ta, cavuya cafaha me ndiya rë me cafe me cojo cjuasua. <sup>40</sup> Hya xi camá ne, cavechú Felipe nandya Azoto. Hane xi cavetju me ngajan ne, jima ngu nandya xi cavatju me ne, ha cuatjin casua me camachaya rë xuta cjuandajyihi xi chja tséhë Jesucristu hisca xi cafehe me nandya Cesarea.

## 9

### *Hacutjin camá xi cavisehen Saulo ladu rë Jesús*

<sup>1</sup> Jinguyëjë rë xi cuatjin tijima ne, Saulo ne, hacuaha ni cjuinduju sa me vincharcun me xuta ladu rë Nai naja ta tsiquehen me. Quiji me xcun nahmi xi matitjun ne, <sup>2</sup> cafehya me ngu carta cojo sa xi cumacjain rë tséhë me xutaxa rë yungun ngajan nandya Damasco. Hane cojo xujun jan sa xi sacú rë me xuta Damasco xi tjengui ndiya rë Jesús, sa chjuun sa xihin ne, tsihñu me cjuecojo me ngajan Jerusalén. <sup>3</sup> Hya xi camá ne, cavetju me quiji me. Hane xi tijima tiña me Damasco ne, ha tu ñahñu canduva ngu ndihi tséhë ngahnga casahmi hasen rë hiscan cjui me. <sup>4</sup> Hane xi caticja me ne, cahndë me ngu cjua xi cachja cojo rë me cuitjin:

—Saulo, Saulo, ¿mé má cuatjin nujihiye tjengui ná cojo cjuahngatacun? —Cuatjin cachja.

<sup>5</sup> Ngajan xi Saulo ne, cuitjin cafayangui me:

—¿Yo ngayun, Tatá? —Cuatjin cafayangui me.

Ngajan xi cjua jan ne, cuitjin cafayangui tsëhë me:

—Ngahan xi Jesús ngahan, xi tinuyjihiye tjengui ná cojo cjuahngatacun. <sup>6</sup> Tisatjinhngue ne, tisihin nandya Damasco, hane ngajan sacú ri cjua mé xi meje rë xi nihñi. —Cuatjin cachja cjua jan.

<sup>7</sup> Ngajan xi xuta xi cjuicojo Saulo jan ne, caxinchacun lihmi ni me ngajan. Cahndë me cjua jan, peru tsajin yo xi cavëë me. <sup>8</sup> Hya xi camá ne, cavisatjenhnga Saulo, hane xi cavuxaha me tuxcun me ne, matsijin camahani rë me. Sehe ngajan xi cavaha xuta jan tsja me ne, quijicojo me me hisca nandya Damasco. <sup>9</sup> Jyan nixtin cavéjña me jan xi matsijin rë me, hacuaha tsajin mé cajinë me, tsajin mé cahvi me.

<sup>10</sup> Hane ngajan Damasco ne, ngajan tacun ngu xuta ladu rë Jesús xi hmí rë Ananías. Ha tu ñahñu cavëë me Nai naja ne, cachja cojo rë me cuitjin:

—¿Há nechin, Ananías? —Cuatjin cachja Nai naja.

Ngajan xi Ananías ne, cuitjin cafayangui me:

—Juun, tejña, Nai naha. —Cuatjin cafayangui me.

<sup>11</sup> Ngajan xi Nai naja ne, cuitjin cachja me cojo Ananías:

—Tihin ndiya xi hmí rë Taha Quixi. Hane ndava cha Judas ne, ngajan chjinenguise ngu cha Tarso xi hmí rë Saulo. Cha vëhë ne, tisahmi cha oración rë cha, <sup>12</sup> hane sacuaha xi ngajñi nijñá rë cha ne, cavëë cha ngu xihin xi hmí rë Ananías xi cavisehen hiscan tacun cha, hane cavisanetsja rë cha xi cuma tsejen nga rë cha. —Cuatjin cachja Nai naja.

<sup>13</sup> Ngajan xi Ananías ne, cuitjin cafayangui me:

—Ngayun Nai naha, jemu cjín xuta chja me hacutjin xi jemu choho casahmi cha xi cuajyihi vë cojo xuta ladu nuju ngajan Jerusalén. <sup>14</sup> Quihndë ne, hacuaha hisca nahmi xi matitjun catsingatju rë cha nguehe xi cjuaha cha xuta xi fehya nuju me cjuandaja nuju. —Cuatjin cafayangui me.

<sup>15</sup> Peru Nai naja ne, cuitjin cachja nga me cojo rë me:

—Tihin ta, cha xi cuajyihi vë ne, ngahan cavaxejen cha xi cjue sua cha cumachaya rë xutaxín, cojo xuta xi vitexa, cojo xuta tjë rë Israel, cuichja cha yo ngahan. <sup>16</sup> Ngahan tsingácun rë cha há cjín cjuacjintacun xi meje rë xi cuatju cha cuma ngatsë naha. —Cuatjin cachja Nai naja.

<sup>17</sup> Hya xi camá ne, cavetju Ananías quiji me ndava Judas. Hane xi cavisehen me ndava Judas ne, cavisanetsja me Saulo, cuitjin cachja me:

—Ngayun Saulo, Nai naja Jesús, me xi cahyun ndiya nduvun jan ne, catsingatju ná me, cojo sa xi ngayun ne, cuma tsejen nga nuju hacuaha tsë nuju cojo Hasen rë Nina. —Cuatjin cachja me.

18 Hane ha hora vëhë ni ne, cavixu tsëhë tuxcun Saulo ngu xcusun sacua ha tujún rë ti, hane camatsejen nga rë me. Hya xi camá ne, caxtenda me. 19 Hane xi cajinë me niñu ne, casacuhñu rë me.

*Sua Saulo machaya rë xuta tsëhë Jesús*

Hya xi camá ne, cavéjña Saulo ngujo nixtin ngajan Damasco cojo xuta ladu rë Jesús. 20 Quiji me yëjë ni yungun, casua me camachaya rë xuta xi Jesús ne, hacui me xi Quihndi rë Nina, xi Mesías. 21 Hane yëjë xuta xi cavisiñuju cjua jan ne, jemu quijircun rë me, cuitjin cachja me cojo xicjin me:

—¡Peru me vihi xi jemu casahmi cjuahngatacun cojo xuta xi veyanangui ñihi vëhë ngajan Jerusalén! ¡Hacuaha ha xa vëhë canduva me nguehe, xi cjuaha me xuta xi cuacun vë, cjuecojo me xcun nahmi xi matitjun! —Cuatjin cachja xuta jan.

22 Peru Saulo ne, hitsë sa casacuhñu rë me xi tichja me cojo xuta, hisca quijircun rë xuta tjë rë Israel casahmi me ta, tsëhë xi tsejen xi cjuaquixi xi chja me xi Jesús ne, me vëhë jain xi catsingatju Nina.

*Vetjutje Saulo tsëhë xuta tjë rë Israel*

23 Hane xi ha jemu cavatju nixtin jan ne, casahmichihin xuta tjë rë Israel cjua xi tsiquehen me Saulo. 24 Peru cjua vëhë ne, casacu camachaya rë Saulo. Xuta xi cuacun jan ne, nixtin nixten jemu casahmi me cuidadu tingotjo hnhua rë nandya jan cojo sa xi cuma tsiquehen me Saulo. 25 Peru xuta ladu rë Saulo ne, nguixun quiji catsitujne me Saulo taha ngaxtun hnhua cojo nahñu jiya me cahntsua ngu nisinya. Cuatjin camá, sehe cavetjutje me.

*Hacutjin cavatju Saulo ngajan Jerusalén*

26 Hya xi camá ne, xi cafehe Saulo ngajan Jerusalén ne, meje cjue sahmitangun me cojo xuta ladu rë Jesús. Peru yëjë ni xuta xi cuacun jan ne, jemu tsacjun me Saulo. Macjaain rë me xi hacuaha xuta ladu rë Jesús camá me. 27 Ngajan xi Bernabé ne, quijicojo me Saulo xcun apóstol, hane ngajan casuacuenda me hacutjin xi ngajan ndiya ne, cavëë Saulo Nai naja, hacuaha cachja Nai naja cojo rë me. Hacuaha casuacuenda Bernabé apóstol jan hacutjin tsacjuiin Saulo xi cachja me tsëhë Jesús. 28 Cuatjin camá xi cjui nduva me catsuyihiya tangun me ngajan Jerusalén cojo xuta ladu rë Jesús. Hatuxa tsacjuiin me chja me tsëhë Jesús. 29 Hacuaha jercu cavisiajmi me cojo xuta xi visiajmi hne griego. Peru xuta xi cuacun jan ne, casahmi me ngujoyë xi tsiquehen me Saulo. 30 Peru hya xi camachaya rë xuta ladu rë Jesús cjua vëhë ne, quijicojo me Saulo nandya Cesarea, hane ngajan catsingatju me me quiji me nandya Tarso.



<sup>31</sup> Cuatjin camá xi yějē xuta ladu rē Jesús ngajan estadu Judea, cojo Galilea cojo Samaria ne, cafē rē me cjuacjintacun hacuaha camajyē sa cjuandaja rē Nina ngajñi rē me. Hane xi cuatjin quijinduju me cafarharcun me Nai naja hacuaha xi cuatjin cavisecoo rē me Hasen rē Nina ne, camacjín sa xuta ladu rē Jesús.

### *Camandaja Eneas*

<sup>32</sup> Pedru ne, catsujyihya me jingu ni ladu. Hya xi camá ne, quiji cavusehenya me xuta ladu rē Nina xi siu ngajan Lida. <sup>33</sup> Hane ngajan cavechútaha me ngu xihin xi hmí rē Eneas, xi ha tjin rē jyin nu xi jiña xi cahme yojo rē. <sup>34</sup> Ngajan xi Pedru ne, cuitjin cachja me cojo xihin jan:

—Ngayun Eneas, Jesucristu tisahmi me xi cumandaja ngayun. Tisatjunhngun, chjayun nijña nuju vë. —Cuatjin cachja Pedru.

Hane ngutjen ni cavisatjenhnga xihin jan. <sup>35</sup> Hane yějē ni xuta xi siu ngajan Lida cojo xuta xi siu ngajan Sarón cavëë me Eneas hane hacuaha cavisehen me ladu rē Nai naja.

### *Cavuya Dorcas cjuahñu*

<sup>36</sup> Ngajan nandya Jope ne, cavéjña ngu chjuun ladu rē Jesús xi hmí rē Tabita. Hane xi hne griego ne, Dorcas hmí rē me. Chjuun vëhë ne, jemu sahmi me cjuandaja, hacuaha jemu visecoo me xuta xi tjin rē cjuachaja. <sup>37</sup> Hya xi camá ne, nixtin xi quitahá Pedru ngajan nandya Lida ne, chjuun vëhë ne, camahmu rē me, hane cahme me. Hane xuta jan ne, catsinduya me nima. Hane xi cafē catsinduya me ne, sehe quiji catsijaña me cahntsua ndihya ngahnga. <sup>38</sup> Vëhë ta nandya Lida ne, tiña tacun tsëhë nandya Jope. Hane hya xi camachaya rē xuta ladu rē Jesús ngajan Jope xi Pedru ne, quitahá me ngajan Lida ne, catsingatju me jo xihin quijijaha rē Pedru, cuitjin cachja me:

—Nihñu cjuandaja ne, cuanguen cojo niji ngajan Jope marcu macjain.

<sup>39</sup> Ngajan xi Pedru ne, cavetju me quiji me cojo xihin jan. Xi tu cafehe me ngajan ndava nima ne, quijicojo me me ndihya ngahnga hiscan jiña nima. Hane jemu cjín yachjin cahan ne, quiji caxinchacun me xcun Pedru, hisca chja hisca jihnda me titsingacun me tsjian xi casahmi nima Dorcas hya xi tacun nima cjuahñu. <sup>40</sup> Ngajan xi Pedru ne, cachja me cojo yějē xuta xi cuetju xuta candatsen. Hane xi cafē xuta cavetju me candatsen ne, sehe cavixcuhnchi Pedru, casahmi me oración rē me. Hane xi cavuya cavutsejen me nima ne, sehe cachja me cuitjin:

—Tabita, tísatjunhngun. —Cuatjin cachja me. Hane chjuun jan ne, cavuxaha tuxcun. Hane xi cavëë rë Pedru ne, cavísatjenhnga cavéjña. <sup>41</sup> Hane xi casua Pedru ngu tsja me chjuun jan ne, catsísatjenhnga me. Xi tu cajindaya me xuta ladu rë Jesús cojo chjuun cahan jan ne, sehe catsingacun me chjuun jan xi tacun quícun nga. <sup>42</sup> Hane cjua vëhë ne, casacu camachaya rë xuta jinguyë ni Jope. Hane jemu cjín me xi camangu cacun me cojo Nai naja. <sup>43</sup> Ngajan xi Pedru ne, jemu cjín nixtin casetaha me ngajan Jope, cavéjña me ndava cha Simón, ngu cha vechjanchuxin.

## 10

### *Jindaya Cornelio Pedru*

<sup>1</sup> Ngajan nandya Cesarea ne, cavéjña ngu xihin xi hmí rë Cornelio. Capitán má me tsëhë sindadu tsëhë nangui Italia. <sup>2</sup> Me vëhë ne, jemu ndaja faharcun me Nina cojo yëjë xuta xi siu ndava me, hacuaha jemu sua me cjuandaja cojo xuta tjë rë Israel, hacuaha yëjë ni hora fehya rë me Nina cjuandaja rë me. <sup>3</sup> Ngu nixtin jan sacuaha chuva rë fane jyan tsëhë nguixtin ne, cavëëndaja me xi cafehe ngu ángel rë Nina cachja cojo rë me cuitjin:

—Cornelio. —Cuatjin cachja.

<sup>4</sup> Hane xi cavutsejenndaja sa me ángel jan ne, jemu catsacjun me camá, sehe cachja me cuitjin:

—¿Mé jan, Tatá? —Cuatjin cachja me.

Ngajan xi ángel jan ne, cuitjin cafayangui:

—Ngatsë rë oración riji cojo ngatsë rë cjuandaja xi jemu tehe ne, Nina ne, hacuaha tsinguitsjen me ngaye. <sup>5</sup> Quihndë ne, ningatji ngujo xihin ngajan Jope, chjindaye rë cha Simón, cha xi hacuaha hmí rë Pedru. <sup>6</sup> Cha Simón vëhë ne, ngajan tacun cha ndava ngu cha vechjanchuxin, xi hacuaha hmí rë Simón, cha xi tacun ndava tiña ndachacun. —Cuatjin cafayangui ángel jan.

<sup>7</sup> Hane xi cavatju cafe ángel xi cachja cojo rë me jan ne, sehe cajindaya me jo mosu hndixahan rë me cojo ngu sindadu xi sahmixa ndava me hacuaha faharcun rë Nina. <sup>8</sup> Hane xi café casuacuenda me yëjë ni cjuacjintacun rë me ne, sehe catsingatju me cjue ngajan Jope.

<sup>9</sup> Hane xi camá nchujun xi ha jima tiña cha xi cuacun jan nandya Jope ne, sacuaha chuva rë nchisen ne, sehe camiji Pedru ngajan xcun ndihya xi sahmi me oración. <sup>10</sup> Hya xi camá ne, camavojo rë me, meje sinë me hitsë tu mé ni xi sinë me. Hane jinguyëjë rë xi tisehenchjine xi sinë me ne, sacuaha xi canduva cachja ngu chini cojo rë me. <sup>11</sup> Tivutsejen me xi ngahnga ne, catuxaha, hane nduvajne sacuaha ngu tsjian

yyë, quichahahñu rë catsiñuju yuju rë xi nduvajne nangui. <sup>12</sup> Cahntsua tsjian jan ne, ngajan hinchá yëjë xcusun chu xi tsuyihiya nangui cojo chu xi vitjen ngahnga xi tsavi xi sinë xuta nangui Israel. <sup>13</sup> Hya xi camá ne, Pedru ne, cahndë me ngu cjua xi cachja cojo rë me cuitjin:

—Pedru, tísatjinhngue. Niquihin ngu chu ne, sehe xini chu.  
—Cuatjin cachja cjua jan.

<sup>14</sup> Hane Pedru ne, cuitjin cachja me:

—Cumaji, Tatá, ta ngahan ne, cjëë camahani sínë ngu xcusun xi tsavi vë. —Cuatjin cachja me.

<sup>15</sup> Peru xi ma jo ndiya ne, cuitjin cachja nga cjua jan cojo rë me:

—Xi ha Nina cachja me xi hacuüin tsavi ne, xi canujiin ngaye xi tsavi. —Cuatjin cachja cjua jan.

<sup>16</sup> Jyan ndiya camá xcusun vëhë. Hya xi camá ne, ngutjen ni cavuya quiji nga tsjian jan ngahnga. <sup>17</sup> Hane jinguyëjë rë xi titsingataha cacun Pedru mé vijne xcusun xi cavëë me jan ne, tivinenguise cha xi catsingatju Cornelio jan jani xi ndava Simón. Hane xi cafehe cha jan ne, caxinchacun ni cha tingotjo, <sup>18</sup> sehe cafinenguise cha há ngajan tacun Simón xi hacuaha hmí rë Pedru. <sup>19</sup> Hane jinguyëjë rë xi titsingataha cacun Pedru tsëhë xcusun xi cavëë me jan ne, cuitjin cachja Hasen rë Nina cojo rë me:

—Chutsijin ni. Hinchacun jo jyan cha xi tivanguise ri. <sup>20</sup> Tihinjni ne, tihin cojo cha. Xicamacjiin tacuin ta cha xi cuacun vë ne, ngahan catsingatju cha. —Cuatjin cachja Hasen rë Nina. <sup>21</sup> Hane xi quijijne Pedru hiscan hinchacun cha xi cuacun jan ne, cuitjin cachja me:

—Ngahan xi vinchunsun ná. ¿Mé xa canduvun? —Cuatjin cachja Pedru.

<sup>22</sup> Ngajan xi cha xi cuacun jan ne, cuitjin cachja cha:

—Ngu capitán xi hmí Cornelio catsingatju niji me xi canduvin nguehe. Me vëhë ne, ngu xihin ndaja me, hacuaha jemu faharcun me Nina. Yëjë ni xuta tjë rë Israel ne, ndaja chja me tsëhë Cornelio. Ngu ángel rë Nina cachja cojo rë me xi squindaya me ngayun xi cuangun ndava me cojo sa xi cuisñuju me cjua xi cuinújun cojo rë me. —Cuatjin cachja cha xi cuacun jan.

<sup>23</sup> Hya xi camá ne, cachja me cojo cha xi cuisehen cha cahntsua ndihya, hacuaha casua me cahndë xi cuiyuju cha ngajan. Hane xi camá nchujun jan ne, cavetju me quiji me cojo cha, hacuaha cojo sa ngujo xuta ladu rë Jesús xi siu ngajan Jope quiji me cojo rë me.

<sup>24</sup> Hane xi camá nchujun nga jan ne, cafehe me nandya Cesarea. Cornelio ne, ha casahmitangun me xuta rë me cojo

amigu ndaja rë me, siuya me Pedru. <sup>25</sup> Hane xi ha cuisehen Pedru jan ne, cavechútaha Cornelio me. Cornelio ne, quiji cafañatsacjan me xcun Pedru xi cafaharcun me. <sup>26</sup> Peru Pedru ne, catsisatjenhnga me Cornelio, hacuaha cachja me cojo cuitjin:

—Tisatjunhngun ta ngahan ne, hacuaha ngu xuta ni ngahan. —Cuatjin cachja me.

<sup>27</sup> Hane taha visiajmi me cojo Cornelio ne, cavisehen me ndihya, ngajan cavëë me xi jemu cjín xuta tjin tangun me jan. <sup>28</sup> Sehe ngajan xi cachja Pedru cojo rë xuta jan cuitjin:

—Ngayun ne, ha ndaja hyun xi ngu xuta tjë rë Israel ne, sacuiin cahndë xi tsihñu me yojo rë me cojo xutaxín, hacuaha sacuiin cahndë xi cuisehen me ndava. Peru ngahan ne, casua Nina camachaya ná xi mijí rë xi cuichjá xi tsavi cojo ngu xcusun xuta. <sup>29</sup> Vëhë xi xi tu quiji chjahá ná ne, ngutjen canduvá ni, hisca ngu cjua cachjaan. Quihndë ne, meje ná cumachaya ná mé nihñu ná xi cachjindayun ná. —Cuatjin cachja Pedru.

<sup>30</sup> Ngajan xi Cornelio ne, cuitjin cachja me:

—Cuyatje fane jyan, sacuaha hora vihi ne, tisahme oración naha nguehe ndya naha. Hane ha tu ñahñu cahvë ngu xihin, secun xcun, yaja ngu tsjian xi jemu tu seti camahani, <sup>31</sup> hane cuitjin cachja cojo ná: “Cornelio, Nina ne, cahndë me oración riji, hacuaha ngatsë rë cjuandaja xi jemu tehe ne, Nina ne, hacuaha tsinguitsjen me ngaye. <sup>32</sup> Quihndë ne, ningatji cjua ngajan Jope, hane chjindaye rë cha Simón, cha xi hacuaha hmí rë Pedru. Cha vëhë ne, tacun cha ndava cha Simón, ngu cha vechjanchuxin, xi tacun cha tiña ndachacun.” Cuatjin cachja xihin jan cojo ná. <sup>33</sup> Vëhë xi marcu macjain catsingátju cjua nuju, hane jemu ndatjin canihñu xi canduvun. Vëhë xi quihndë ne, ha tjin tangun ngayin ngayijin ni nguehe xcun Nina xi cuisñiji yëjë cjua xi casua nuju Nina xi cuinújun cojo niji. —Cuatjin cachja Cornelio.

*Cjuandajyihí xi cachja Pedru ndava Cornelio*

<sup>34</sup> Ngajan xi Pedru ne, cuitjin cachja me:

—Ngahan vutsején ne, Nina ne, hatuxa quixi jain me cojo cjuatacun rë me xi tsichuva me yëjë ni xuta cojo cjuatacun rë ta <sup>35</sup> yëjë ni nación ne, tu jarë ni xuta xi faharcun me Nina hacuaha sahmi me cjuandaja ne, jemu chuya rë Nina tsëhë me. <sup>36</sup> Nina ne, catsingatju me cjuandajyihí rë me tsijin, ngayin xuta tjë rë Israel; casua me camachaya niji xi ngatsë rë Jesucristu ne, sacú niji cjuandaja cjuajeya. Me vëhë xi Nai rë yëjë ni xuta. <sup>37</sup> Ngayun ne, ha machaya nuju tsëhë xcusun xi camá jingujyë ni nación Judea. Cavetsihin hisca distritu Galilea, hya xi cavatju cachja nima Juan xi meje rë xi xtenda

xuta. <sup>38</sup> Hacuaha ha hyun xi Jesús, xuta Nasaret ne, Nina ne, catsinguitsë rë me cojo Hasen rë me hacuaha cojo ngahñu rë me. Jesús vë ne, catsujyihya casahmi me cjuandaja hacuaha casahmi me xi camandaja yëjë xuta xi jemu tisuaxti Satanás. Cuatjin casahmi me ta, tsëhë xi Nina ne, hacuaha tacun cojo rë me. <sup>39</sup> Ngayin tihín machaya rë xuta tsëhë yëjë xcusun xi cahyin xi casahmi me ngajan Jerusalén, cojo jingujyë ni nación Judea. Xi cavetaha xuta tjë rë Israel jan me xcun ngu cru ne, catsiquehen xuta jan me. <sup>40</sup> Me vëhë ne, Nina catsicuya rë me cjuahñu xi ma jyan nixtin, hacuaha casua Nina cahndë xi cavuya camatsejen nga me. <sup>41</sup> Peru hacuiin ngajñi rë yëjë xuta camatsejen me ta súvá ni ngajñi rë me xi Nina cavaxijin rë cojo tjun sa, cuma cuinújan ne, ngajñi niji ngayin, xi cachini cahyin tangun cojo rë me hya xi cavatju cavuya me cjuahñu. <sup>42</sup> Hacuaha me vëhë cavitexa niji me xi tihín cumachaya rë xuta xi me vëhë xi casuaxa Nina me xi tsichuva me xuta cojo cjuatacun rë, sa siu quicun me o sa cahme me. <sup>43</sup> Yëjë ni profeta ne, cachja me ta yëjë ni xuta xi cumangu cacun cojo Jesús ne, sacú rë me cjuaninchataha tsëhë jyë rë me, xi cuatjin mangucacun me. —Cuatjin cachja Pedru.

#### *Casacu rë xutaxín Hasen rë Nina*

<sup>44</sup> Hora xi tichja cuaha Pedru cjua vëhë ne, canduva Hasen rë Nina cavisehen xahasen rë yëjë xuta xi tivisiñuju cjua xi tichja Pedru jan. <sup>45</sup> Hane xuta ladu rë Jesús xi tjë rë Israel xi cojo me canduva me cojo Pedru ne, jemu quijircun rë me xi cojo xutaxín casua Nina Hasen rë me xi cuma rë me. <sup>46</sup> Cuatjin quijircun rë me ta, tsëhë xi cahndë me xi xutaxín jan ne, tichja me ngujo hne xi hisca hvíin xutaxín vë xi tisahmi jyë tisahmi hnga me Nina. <sup>47</sup> Ngajan xi Pedru ne, cuitjin cachja me:

—Cumaji nichoon गयाan nandá xi xtenda xuta, ta me xi cuicun vi ne, hacuaha casacu rë Hasen rë Nina sacuatjin casacu naja गयाan. —Cuatjin cachja Pedru.

<sup>48</sup> Sehe cavitexa me xi caxtenda xuta xi cuacun vë xi cavisehen me ladu rë Jesucristu. Ngajan xi xuta jan ne, cafehya sa rë me Pedru xi cuejña sa me ngujo nixtin cojo rë me.

## 11

*Sua Pedru machaya rë xuta rë yungun Jerusalén hacutjin camá ndava Cornelio*

<sup>1</sup> Quihndë ne, apóstol cojo xuta ladu rë Jesús xi siu jingujyë ni Judea ne, camachaya rë me cjua xi cojo xutaxín cafhatsja me cjua rë Nina. <sup>2</sup> Hane hya xi cavuya quiji Pedru ngajan Jerusalén ne, xuta ladu rë Jesús xi tjë rë Israel ne, cacjan me cojo, <sup>3</sup> cuitjin cachja me:

—¿Mé má cuatjin catsangun ndava xuta xi hacuiin tjë rë Israel hacuaha hisca cachinu niñu cojo rë me? —Cuatjin cachja me.

<sup>4</sup> Ngajan xi Pedru ne, cavetsihin casuacuenda chichihin me cuitjin:

<sup>5</sup> —Ngahan ne, tisahme oración naha hya xi tejñataha Jope. Hane sacuaha xi cachja ni chini cojo ná xi cahvë ngu xcusun sacuaha ngu tsjian jyë, quichahahñu rë catsiñuju yuju rë xi nduvajne nangui, camatiña tsahan. <sup>6</sup> Hane xi cavutsejénndaja cahntsua ne, cahvë chu xi tsujyihya nangui, chu xi cjaain rë cojo chu xi cjan rë, cojo chu xi vitjen ngahnga hincha chu cahntsua. <sup>7</sup> Hacuaha cahndë ngu cjua xi cachja cojo ná cuitjin: “Pedru, tísatjinhngue. Niquihin ngu chu ne, sehe xini chu.” Cuatjin cachja cjua jan. <sup>8</sup> Ngajan xi ngahan ne, cuitjin cachjá: “Cumaji, Tatá, ta ngahan ne, cjëë camahani cuíncha ntsuva ngu xcusun xi tsavi vë.” <sup>9</sup> Ngajan xi cjua xi nduva ngahnga jan ne, cachja nga cojo ná ma jo ndiya cuitjin: “Xi ha Nina cachja me xi hacuiin tsavi ne, xi canujiin ngaye xi tsavi.” Cuatjin cachja cjua jan cojo ná. <sup>10</sup> Jyan ndiya camá xcusun vëhë. Hya xi camá ne, sehe cavuya cachjuvë nga rë tsjian jan, quiji yëjë hisca ngahnga. <sup>11</sup> Hya xi camá ne, ha tu ñahñu cafehe jyan xihin ndihya hiscan xi tejña. Hisca nandya Cesarea casatëxa rë xihin jan xi canduvatjengui ná. <sup>12</sup> Hane Hasen rë Nina cachja cojo ná xi cumacjiin cáacun xi cjuë cojo xihin xi cuacun jan. Hya xi camá ne, cëjë cojo rë, hacuaha cavisecoo ná jyun xuta ladu naja xi cuicun vi xi catsanguin. Hane xi cafihin jan ne, cavisihin ndava Cornelio. <sup>13</sup> Hane me vëhë ne, casuacuenda niji me hacutjin xi cavëë me ngu ángel cahntsua ndava me, cuitjin cachja cojo rë me: “Ningatji cjua ngajan Jope, chjindaye rë cha Simón, cha xi hacuaha hmí rë Pedru. <sup>14</sup> Hane cha vëhë cuichja cha cojo ri ngujo cjua hacutjin cuma xi cuetjitje ngaye cojo yëjë ni xuta xi siu ndya rihi.” Cuatjin cachja ángel jan. <sup>15</sup> Hane xi cavetsehen cachjá cjua rë Nina cojo rë me ne, cavisehen Hasen rë Nina cahntsua xahasen rë me sacuatjin cavisehen cahntsua xahasen naja ntsacu cavetsihin, ngayaan xuta tjë rë Israel. <sup>16</sup> Ngajan xi ngahan ne, catsinguítsjen cjua rë Nai naja xi cachja me cuitjin: “Juan ne, cojo nandá cavitenda me, peru ngayun ne, cojo Hasen rë Nina xtenda ngayun.” Cuatjin cachja me. <sup>17</sup> Vëhë xi hya xi suvá Nina casua rë me cjuandaja xicjin xi casua naja me ngayaan hya xi camangu tacuun cojo Nai naja Jesucristu ne, hatuxa camaji cavátëcja xcusun xi Nina casahmi me. —Cuatjin casuacuenda Pedru.

<sup>18</sup> Xi cahndë me xi cuacun jan xi cuatjin cachja Pedru ne, cajnehnchan cjuatacun rë me, sehe cavetsihin casahmi jyë

casahmi hnga me Nina, cuitjin cachja me:

—Xi matsejen ne, cojo xutaxín casua Nina cahndě xi tsindeya me cjuatacun rě me cuisehen me ndiya rě Nina cojo sa xi sacú rě me cjuahñu xatsě.

*Xuta rě yungun Antioquía*

<sup>19</sup> Quihndě ne, xuta ladu rě Jesús xi cavitsojo me ngatsě rě cjuañihi xi camá hya xi cahme Esteban ne, cavechú me hiscan nangui xi hmí rě Fenicia. Ngujo nga me cavechú me nandya Chipre, ngu cahndě xi vetjucaa tsěhě ndachacun. Hane me xi yahnga ne, cavechú me nandya Antioquía xi cavanga me. Hane casuaain me camachaya rě xutaxín cjuandajyihi xi chja tsěhě Jesucristu ta suvá ni xuta tjě rě Israel casua me camachaya rě. <sup>20</sup> Peru tjin yahnga xuta ladu rě Jesús xi canduva me tsěhě Chipre cojo Cirene. Xi cafehe me nandya Antioquía ne, cachja me cojo xuta xi chja hne Griego, casua me camachaya rě xuta cjuandajyihi xi chja tsěhě Nai naja Jesús. <sup>21</sup> Hane Nina ne, jemu casua rě me ngahñu. Hacuaha jemu cjín xuta camacjain rě me, hane cavisehen me ladu rě Nai naja.

<sup>22</sup> Hane xuta ladu rě Jesús xi siu ngajan Jerusalén ne, hya xi camachaya rě me xcusun vėhě ne, catsingatju me Bernabé xi cjuetjengui me xuta ngajan Antioquía. <sup>23</sup> Hane xi cafehe me jan ne, xi cavěě me hacutjin tisahmi Nina cjuandaja cojo xuta xi cuacun vė ne, jemu ndaja camá rě me. Sehe ngajan xi cachja me cojo yějě xuta jan xi catjinduju me cojo yějě xahasen rě me ndiya rě Nai naja. <sup>24</sup> Cuatjin casahmi me ta, tsěhě xi me vėhě ne, ngu xihin ndaja me, ña quitsě rě me Hasen rě Nina, hacuaha jercu mangucacun me cojo Nina. Nixtin hya ne, jemu camacjín sa xuta ladu rě Nai naja.

<sup>25</sup> Hya xi camá ne, cavetju Bernabé quiji me ngajan Tarso, cavanguise me Saulo. <sup>26</sup> Hane xi casacu rě me Saulo ne, cavuya quijicojo me me ngajan Antioquía. Caviyuju catsijo me ngajan ngu nu jingu, casahmitangun me cojo xuta rě yungun jan. Jemu cjín xuta cavicuya rě me cjua rě Nina. Hacuaha ngajan Antioquía xi tjuntjun cachja xuta tsěhě yějě xuta ladu rě Jesús xi xuta rě Cristu xi meje cuichja cjua vė cristiano.

<sup>27</sup> Nixtin hya ne, cafehe ngujo profeta ngajan Antioquía xi canduva me tsěhě Jerusalén. <sup>28</sup> Ngajan xi cavetjujñi ngu me ngajñi rě profeta xi cuacun vė, ngu me xi hmí rě Agabo, hane cachja me cjua xi Hasen rě Nina casua rě me xi ha tu hitsě sa ne, cuinduva ngu jindya jyě jingujyě ni ngasunhndě. Jindya vė ne, cavetjucaa jain hya xi Claudio matitjun camahani me. <sup>29</sup> Ngajan xi xuta ladu rě Jesús ngajan Antioquía ne, caviyuju me cjuatacun rě me jima ngu me xi cuisecoo me ha tucutjin

xi chutaha me hane tsingatju me tséhë xuta ladu rë Jesús xi siu ngajan Judea. <sup>30</sup> Hya xi camá ne, cuatjin casahmi me. Catsingatju me cjuandaja vëhë, cavaha Bernabé cojo Saulo xi sua me tsja xuta changá xi siu ngajan Judea.

## 12

### *Cjuañihi xi cavatju xuta rë yungun*

<sup>1</sup> Hane ngajñi rë nixtin xi cuacun vë ne, Herodes, me xi matitjun ne, cavitexa me cachjahá rë ngujo xuta rë yungun xi sahmi me cojo cjuahngatacun. <sup>2</sup> Hacuaha cavitexa me xi cueya Jacobo, hntsë Juan, cojo quicha. <sup>3</sup> Xi vutsejen me xi cachuya rë xuta tjë rë Israel xcusun vëhë ne, hacuaha cavitexa me cachjahá rë Pedru, nixtin rë suhi rë pan xi tsajin san rë. <sup>4</sup> Sehe caveya me ndavaya, hacuaha cavitexa me tyjuhunngu sindadu xi cjue sahmi rë me cuidadu nixtin nixten chuva ñuju chuva ñuju sindadu jima ngu ndiya. Xi catsingataha cacun me ne, xi cuatju suhi tséhë Pascua ne, sehe cuaxë me xcun yëjë ni xuta. <sup>5</sup> Cuatjin camá xi Pedru ne, casetjo me ndavaya. Peru xuta rë yungun ne, cafehya me cojo nguñaja xahasen rë me cjuandaja rë Nina xi cuma rë Pedru.

### *Cavaxëtje Nina Pedru tséhë ndavaya*

<sup>6</sup> Ngu nguixun chaja sa xi cuitexa Herodes xi cuetju Pedru xi cumacuenda jyë rë me ne, Pedru ne, jiñafë me, tjinñu me cojo jo cadena ngajñi rë jo sindadu. Hacuaha siu sa jo sindadu tingotjo ndavaya xi sahmi cuidadu. <sup>7</sup> Hya xi camá ne, cafehe ngu ángel tséhë Nina, hane jercu camahasen cahntsua ndavaya. Hane xi quiji cavëhëtsja ángel jan ndanisin rë Pedru ne, catsisatjenhnga rë me, sehe cachja cojo rë me cuitjin:

—Tisatjinhngue sanii. —Cuatjin cachja.

Hane hora vëhë ne, cavixuhndu cadena xi tjinñu tsja me.

<sup>8</sup> Sehe ngajan xi ángel ne, cachja nga cojo rë me cuitjin:

—Cheje tsjian riji, hacuaha tinche chuxinxte riji. —Cuatjin cachja.

Hane Pedru ne, cuatjin casahmi me. Cachja nga ángel cuitjin:

—Cheje tsjanga riji, hane ndove hacutjin cjuë. —Cuatjin cachja ángel jan.

<sup>9</sup> Hane xi cavetju me ne, quiji me hacutjin quiji ángel. Peru hvíin me xi xcusun xi tisahmi ángel jan ne, cjuaquixi ta xi má rë me ne, chini tichja cojo rë me. <sup>10</sup> Hane xi cavatjutaha me ngu cavatjutaha me jo sindadu ne, sehe cafehe me tingotjo quicha xi cuétjuun xi cuanguen ngajñi nandya. Tingotjo vëhë ne, catuxaha suvá. Xi cavetju me ne, sehe quiji me. Hane xi cafehe me hiscan xi faha rë ngu nga ndiya ne, ha tu ñahñu quijixin ángel tséhë me.



<sup>11</sup> Sehe ngajan xi cajnercu Pedru xi cjuaquixi xcusun xi camá, hane cachja me cuitjin ngajñi rë suvá me:

—Quihndë ne, hvë jain xi Nina ne, catsingatju me ángel rë me, hane cavaxëtje ná me tsëhë Herodes, hacuaha cavaxëtje ná me tsëhë yëjë xcusun xi meje sahmi xuta tjë rë Israel cojo ná. —Cuatjin cachja me ngajñi rë suvá me.

<sup>12</sup> Hane xi tu catsingataha cacun me cuatjin ne, sehe quiji me ndava María naa rë Juan, me xi hacuaha hmí rë Marcos. Ngajan ne, jercu tjin tangun xuta xi tisahmi me oración.

<sup>13</sup> Hane xi cafehe me jan ne, catsijane me tingotjo. Hane sehe canduvavaha ngu na hndixahan xi hmí rë Rode xi cjuinenguisse na yo xi titsijane. <sup>14</sup> Hane xi camachaya rë na xi xta rë Pedru xi tichja ne, tsëhë xi jercu ndaja camá rë na ne, hisca cavuxaain na tingotjo ta marcu macjain cavuya na quiji cachja na cojo me xi yahnga jan xi Pedru ne, secun me tingotjo taha candatsen. <sup>15</sup> Peru me xi cuacun jan ne, cuitjin cachja me cojo rë na:

—Sca ri ngaye. —Cuatjin cachja me.

Peru na vëhë ne, cachja sa na xi hatuxa cjuaquixi xi hacui me. Hane me xi cuacun vë ne, cachja me cuitjin:

—¿Hacuiin ángel xi sahmi rë me cuidadu? —Cuatjin cachja me.

<sup>16</sup> Hane Pedru ne, quijinduju sa me titsijane me tingotjo jan. Hane xi cavuxaha me tingotjo jan ne, cavëë me xi hacui jain Pedru, hane jemu quijircun rë me. <sup>17</sup> Ngajan xi Pedru ne, casahmitsja me cojo rë me xi cuiyujuyuu me, sehe cavetsihin casua cuenda me hacutjin camá xi Nai naja ne, cavaxë rë me ndavaya. Sehe ngajan xi cachja me cuitjin:

—Tuhun cumachaya rë Jacobo cojo sa xuta ladu rë Jesús xi yahnga tsëhë xcusun xi camá vi. —Cuatjin cachja me.

Hya xi camá ne, sehe cavetju me quiji me jingu sa cahndë.

<sup>18</sup> Hane xi casahasen jan ne, ngu cjuandya jyë casahmi sindadu jan, tsëhë xi hvíin cha mé hacutjin camá rë Pedru.

<sup>19</sup> Hane Herodes ne, cavitexa me quiji cavinchise rë Pedru, peru casacuiin me. Hane vëhë xi cafahataha rë me sindadu xi casahmi cuidadu jan, sehe cavitexa me cachjaha rë sehe cueya cha. Hya xi camá ne, cavetju Herodes cavuya quiji me ngajan Cesarea, cavejña me.

### *Cjuaveya rë Herodes*

<sup>20</sup> Quihndë ne, Herodes me xi matitjun ne, jemu cjan rë me cojo xuta nandya Tiro cojo nandya Sidón. Ngajan xi xuta xi cuacun vë ne, camatangun me, sehe quijitjengui me Herodes. Xi tjun tjun ne, camá casahmi me xi cavinga rë Blasto me. Blasto ne, me vëhë xi fahacuenda me ndava Herodes. Hya xi camá ne, xuta xi cuacun jan ne, cafehya rë me Herodes

xi cuijnetaha si ngajñi rë me cojo me vëhë. Cuatjin cafehya me xi cuacun vë ta, tsëhë xi nangui rë Herodes ne, ngajan vinduva xichinë tsëhë nandya Tiro cojo Sidón. <sup>21</sup> Cavechú nixtin xi cavejña Herodes xi cuichja me cojo xuta xi cuacun jan ne, sehe cavaja me tsjian tsëhë xi matitjun me, sehe quiji me cavéjña me cahndë rë me xi cuichja me cojo xuta. <sup>22</sup> Hane xi cajnetaha cachja Herodes ne, ngajan xi xuta ne, cuitjin cajindaya me cachja me:

—¡Cjua vëhë ne, cjua rë ngu nina, hacuiin cjua rë ngu xuta! —Cuatjin cajindaya me cachja me. <sup>23</sup> Ha hora vëhë ni ne, ngu ángel tsëhë Nina ne, casahmi xi cafaha rë Herodes ngu chíhin, tsëhë xi hacuiin casahmi jyë casahmi hnga me Nina. Hya xi camá ne, cajnë rë me chundu, hane cahme me.

<sup>24</sup> Peru cjua rë Nina ne, quijinduju sa cavitsojo.

<sup>25</sup> Ngajan xi Bernabé cojo Saulo ne, casahmichihin me cjuandaja rë xuta yuma sehe cavuya me tsëhë Jerusalén. Hacuaha canduvacojo me Juan, xi hacuaha hmí rë me Marcos.

## 13

### *Casuaxa Nina Bernabé cojo Saulo*

<sup>1</sup> Quihndë ne, ngajñi rë xuta rë yungun xi tacun ngajan Antioquía ne, hinchajñi me xi má profeta hacuaha hinchajñi me xi vicuya cjuachacun. Cuitjin hmí rë xuta xi cuacun vë: Bernabé, Simeón, me xi cachja xuta tsëhë Nchava Jma, Lucio, ngu xuta Cirene, Manaén, me xi camacha tangun cojo Herodes, me xi matitjun, hacuaha cojo Saulo. <sup>2</sup> Hane jinguyëjë rë xi tisahmi me xi cuacun vë xa rë Nina hacuaha tisahmi me xun rë me ne, Hasen rë Nina ne, cuitjin cachja cojo rë me:

—Tuhunxun rë Bernabé cojo Saulo, cojo sa xi sahmi me xa xi ha casuáxa rë me.

<sup>3</sup> Ngajan xi casahmi me xi cuacun jan xun rë me, hacuaha casahmi me oración rë me ne, sehe cavisanetsja me Bernabé cojo Saulo hane chuva vëhë cafaha me xa rë Nina. Hya xi camá ne, sehe catsinguijnetaha me cjua cojo xicjin me.

### *Quiji apóstol ngajan Chipre*

<sup>4</sup> Ngajan xi Bernabé cojo Saulo ne, quiji me sacuatjin cachja Hasen rë Nina cojo rë me. Cavetju me quiji me nandya Seleucia. Hane xi cafehe me ngajan ne, cavisehen me ngu barcu, sehe quiji me Chipre, ngu rquí nangui xi vetjucaa xcun ndachacun. <sup>5</sup> Hane xi cafehe me Salamina, ngu nandya tsëhë Chipre ne, casua me camachaya rë xuta cjua rë Nina ngajan yungun rë xuta tjë rë Israel. Hacuaha cavisecoo Juan Marcos me xi quiji me jan.

<sup>6</sup> Hane xi quiji me jingujyë ni ladu vëhë ne, cavechú me hisca nandya Pafos. Hane ngajan cavechútaha me ngu cha surqui xi hmí rë Barjesús. Cha vëhë ne, ngu profeta ndacha cha, hacuaha tjë rë Israel cha. <sup>7</sup> Hane tangun tsujyihya cha cojo me xi matitjun xi hmí rë Sergio Paulo, ngu me xi jemu vechú cjuatacun rë. Me vëhë ne, cajindaya me Bernabé cojo Saulo tsëhë xi meje cuihndë me cjua rë Nina. <sup>8</sup> Peru cha surqui jan ne, xi hacuaha hmí rë Elimas xi hne griego ne, casahmi condra cha me xi cuacun vë, tsëhë xi mijí rë cha xi me xi matitjun jan ne, cumangucacun me cojo Jesucristu. <sup>9</sup> Peru Saulo, me xi hacuaha hmí rë Pablo ne, catsë rë me cojo Hasen rë Nina. Cavutsejenndaja me cha surqui jan ne, sehe cachja me cojo cha cuitjin:

<sup>10</sup> —iNgaye xindesu, ngaye cha ndacha, ngaye quihndi rë xitsehen, ngaye condra rë yëjë ni cjuandaja ne! ¿Hatuxa cuihinnduju sa ninguet sin ndiya ndajyihi rë Nina? <sup>11</sup> Quihndë chutsijin ta Nina ne, sahmi ri me castigu. Cuma rcá ngaye, cumatsijin ri ndavá rë tsuhi ngujo nixtin. —Cuatjin cachja me.

Hane ngutjen ni camá rë cha sacuaha xi canduva ngu yufi xi cavetsa rë tuxcun cha, hane cama rcá cha. Hane cjui nguehe cjui ngajan cha vanguisetsja cha yo xi cuaha tsja cha. <sup>12</sup> Ngajan xi me xi matitjun jan ne, xi cavëë me xcusun xi camá ne, camacjain rë me cjuachacun xi chja tsëhë Nina ta, tsëhë xi jemu quijircun rë me tsëhë cjuachacun vëhë.

### *Quiji apóstol ngajan Antioquía, distritu Pisidia*

<sup>13</sup> Hya xi camá ne, xi cavetju Pablo cojo me xi siutaha cojo me ngajan Pafos ne, sehe cavisehen me ngu barcu, quiji me nandya Perge, ngajan distritu Panfilia. Hane ngajan cavetjuxin Juan Marcos tsëhë me, hane cavuya nga me Jerusalén. <sup>14</sup> Hane Pablo cojo Bernabé ne, cavetju me tsëhë Perge, hane cafehe me Antioquía, ngajan distritu Pisidia. Hane xi cavechú nixtin xi chjahájenda rë ne, quiji me cavisehen me yungun ne, quiji me caviyuju me. <sup>15</sup> Hane xi cavatju cachutaya rë ngujo cjua xi catsihindu Moisés cojo ngujo cjua xi catsihindu profeta ne, xutaxa rë yungun jan ne, catsingatju me cjua tsëhë Pablo cojo Bernabé, hane cuitjin cachja me:

—Ngayun ne, sa xi tjin mé cjuandajyihi xi meje cuinújun cojo xuta ne, cuma cuinújun. —Cuatjin cachja me.

<sup>16</sup> Hane xi casecun Pablo ne, casahmitsja me cojo xuta sehe cachja me cuitjin:

—Ngayujun ngarcun ni xuta tjë rë Israel cojo sa ngayujun ni xi hacuaha chjuhuncun Nina ne, tisiñuju cjua xi cuichjá cojo nuju. <sup>17</sup> Nina naja ngayaan tjë rë Israel ne, cavaxijin me xutachanga naja, hane tsëhë me vëhë casahmi cjín sa Nina

xuta. Sehe tséhë me casahmi me ngu nación xi hñu vetju cjua rë hya xi caviyujutaha me ngajan nación Egipto. Hane cojo ngahñu xi tjin rë Nina ne, cavaxë me xuta xi cuacun vë tséhë ngajan. <sup>18</sup> Hane Nina ne, caca rë me cojo xuta xi cuacun vë, hya xi catsuyihiya me ngajan ngu xín tséhë nandya sacuaha yachan nu. <sup>19</sup> Hane xi cavatju catsinguetsun Nina yatu nación ngajan nangui Canaán ne, sehe casua me xutachanga naja jan xi cuma tséhë me <sup>20</sup> sacuaha ñuju cientu vasen nu. Hane xi cavatju vëhë ne, sehe cavaxijin me xuta xi camá me juez, hisca nixtin xi cavéjña profeta Samuel. <sup>21</sup> Hya xi cavatju vëhë ne, cafehya xutachanga naja jan ngu me xi cumatitjun tséhë me. Cuatjin camá xi Nina ne, casuaxa me xutachanga naja Saúl, quihndi rë Cis, ngu xihin tjë rë Benjamín, xi cumatitjun me cahntsua yachan nu. <sup>22</sup> Hane xi cafaxin Nina me vëhë xi matitjun me ne, cavejña me xutachanga naja David xi cuma titjun me. Cuitjin cachja Nina tséhë David: “Ngahan vutsején ne, cha David, quihndi rë cha Isaí ne, cha vëhë ngu cha xi jemu chuya ná tséhë, ngu cha xi sahmi yëjë hacutjin xi meje ná.” Cuatjin cachja Nina. <sup>23</sup> Ngu xuta tjë rë xutachanga naja David, me vëhë ne, xi hacui Jesús, me xi catsingatju Nina xi cuaxëtje naja ngayaan xuta tjë rë Israel, sacuatjin xi ha cachja me. <sup>24</sup> Hane xi chaja sa xi cjuehe Jesús ne, nima Juan ne, cachja me cojo yëjë xuta tjë rë Israel xi meje rë xi tsindeya me cjuatacun rë me, hacuaha xtenda me. <sup>25</sup> Quihndë ne, hya xi ha camatiña nixtin xi cueya nima Juan ne, cuitjin cachja me: “Hacuiin ngahan xi tsingatju Nina, xi nechunyun rë ta ngaxtun ne, nduva ngu me xi hitsë sa vechu cjuatacun rë xi hisca cumajin tsinguissehercu sahme tyjahi chuxinxte rë.” Cuatjin cachja nima Juan.

<sup>26</sup> Ngajejen ngarca ni ngayaan xuta tjë rë xutachanga naja Abraham cojo sa ngayujun ni xi hacuaha chjuhuncun Nina ne, ngayaan catsingatju naja Nina cjuandajyihi vihi xi chja hacutjin cuetjuntjeen. <sup>27</sup> Yëjë xuta xi siu ngajan Jerusalén cojo xutaxa rë jan ne, hvín me xi Jesús ne, hacui me xi catsingatju Nina, hacuaha cajni rcu me cjua rë yëjë ni profeta xi chutaya rë yëjë ni nixtin xi nixtin chjahájenda rë. Vëhë xi hya xi catsicanijiyë xuta xi cuacun vë Jesús ne, casahmi me xi cavetjucaa cjua xi cachja profeta vë. <sup>28</sup> Hane handasa casacuiin rë me jyë xi vechú chuva rë xi cueya Jesús ne, peru cafehya rë me Pilatu xi cuitexa me xi cueya Jesús. <sup>29</sup> Hane xi cajnetaha casahmi me yëjë xcusun sacuatjin camahindu tséhë Jesús ne, sehe catsitujne me tséhë cru, sehe caseyaniji cahntsua ngu tsjun. <sup>30</sup> Peru Nina catsicuya rë me cjuahñu. <sup>31</sup> Hya xi camá ne, jemu cjin nixtin xi camatsejen me ngajñi rë xuta xi cavetju tangun me cojo ngajan Galilea hane hacuaha

quiji tangun me cojo ngajan Jerusalén. Quihndë ne, xuta xi cuacun vë ne, tisua me jimachaya rë xuta tsëhë Jesús.

<sup>32</sup> Hane ngayin ne, hacuaha titihín jimachaya nuju ta cjuandajyihî xi ha cachja Nina cojo xutachanga naja ne, <sup>33</sup> cjua vëhë Nina casahmi me xi cavetjucaa ngajñi naja ngayaan tjë rë xutachanga naja hya xi catsicuya me Jesús cjuahñu. Hacuaha cuitjin camahindu xcun Salmo xi ma jo: “Ngaye xi quihndi naha ngaye; quihndë ngahan suá ri cjuahñu.” Cuatjin cachja Nina xcun Salmo vëhë. <sup>34</sup> Hacuaha Nina ne, ha cachja me xi tsicuya me Jesús cjuahñu, hacuaha yojo rë Jesús ne, hacuiin cjuehndu, cuitjin cachja me xcun xujun rë me: “Hatuxa suá ri ximinchacun naha, sacuatjin xi ha cachjá xi suá rë David.” Cuatjin cachja Nina. <sup>35</sup> Hacuaha catsihindu sa David xcun ngu nga Salmo cuitjin: “Tuun cahndë xi cjuehndu yojo rë me, xi hatuxa tjengui nuju cojo yëjë xahasen rë me.” Cuatjin camahindu. <sup>36</sup> Peru David ne, xcun xi ha cavatju casahmi me sacuatjin meje rë Nina ne, cahme me, caseyaniji tangun me cojo nima xutachanga rë me, hacuaha cafehndu yojo rë me. <sup>37</sup> Peru Jesús, me xi Nina catsicuya rë cjuahñu ne, cafehndiin yojo rë me. <sup>38</sup> Vëhë xi ngayujun ngarcun ni ne, meje rë xi cuijnercun xi ngatsë rë me vëhë ne, tisacu jimachaya nuju xi tjin cjuaninchataha tsëhë jyë nuju, <sup>39</sup> hacuaha ngatsë ni rë me vëhë ne, yëjë ni xuta xi mangucacun cojo rë me ne, tsicjë Nina yëjë jyë rë me ta xcun ley rë Moisés ne, sacuiin rë cjuaninchataha. <sup>40</sup> Vëhë xi meje rë xi cuinechun cuidadu, sá tu cuatjun cuma sacuatjin xi catsihindu profeta xcun xujun rë Nina hatsëë nixtin, cuitjin catsihindu me:

<sup>41</sup> Chutsujun ni, ngayun xi macjaain nuju ne, catjircun nuju, sehe tjangun ta jinguyëjë rë xi nechun ne, sahme ngu chircun xi hisca cumacjaain nuju sa xi yo cuichja cojo nuju. Cuatjin catsihindu profeta. Hacuaha cojo cjua vëhë ne, catsinguijnetaha Pablo cachja me.

<sup>42</sup> Hane hora xi tivetju Pablo cojo Bernabé tsëhë yungun jan ne, cachja xuta cojo me xi cuetjucaa totje nga ne, meje rë me xi cuya cuichja nga Pablo tsëhë cjuacjintacun vëhë. <sup>43</sup> Hane hya xi cavetju xuta tsëhë yungun ne, jemu cjín xuta tjë rë Israel hacuaha jemu cjín xutaxín xi hacuaha faharcun me Nina ne, quiji me cojo Pablo cojo Bernabé. Hane Pablo cojo Bernabé ne, cachja me cojo xuta xi cuacun jan xi catjinduju sa me cojo ndiya rë cjuandaja rë Nina.

<sup>44</sup> Hane xi cavetjucaa nga totje nixtin xi chjahájenda rë ne, ha ña meje yëjë ni xuta nandya camatangun me xi cuisifñuju me cjua rë Nina. <sup>45</sup> Peru hya xi cavëë yahnga xuta tjë rë

Israel xutacjín jan ne, catsë rë xahasen rë me cojo cjuachini, hacuaha cachja me condra tsëhë cjua xi cachja Pablo, hisca choho cachja me tsëhë me. <sup>46</sup> Ngajan xi Pablo cojo Bernabé ne, cachja me cojo xuta tjë rë Israel jan cuitjin:

—Hatuxa ngayun titjun camameje rë xi canújin cojo nuju cjua rë Nina. Peru quihndë ta nitjungun hacuaha xi má nuju ne, machjiriin ngayun xi cojo ngayun satë nuju cjuahñu xatsë ne, cuanguin tihín cumachaya rë xutaxín cjuandajyihi vëhë. <sup>47</sup> Cuatjin nihñi ta, tsëhë xi cuitjin cavitexa niji Nina:

Ngahan tsingátju ri sacuaha ngu ndihi xi tehe cjuahasen xi cuma rë xutaxín, cojo sa xi ngatsë rë cjuandajyihi xi cuinoje ne, cuetjutje xuta jingujyë ni, hisca hiscan vijnetaha ngasunhndë. Cuatjin cavitexa niji Nina. —Cuatjin catsacjuiin Pablo cojo Bernabé, cachja me.

<sup>48</sup> Hane xi cahndë xutaxín jan cjua vëhë ne, jemu ndaja camá rë me, hacuaha casahmi jyë casahmi hnga me cjua rë Nina. Hane yëjë ni xuta xi cavaxijin Nina xi sacú rë cjuahñu xatsë ne, camacjain rë me cjuandajyihi vëhë.

<sup>49</sup> Hya xi camá ne, jercu cavitsojo cjuandajyihi xi chja tsëhë Nai naja jingujyë ni ladu vëhë. <sup>50</sup> Peru xuta tjë rë Israel jan ne, cavisiajmi me cojo ngujo yachjin nchina tsëhë yungun jan, cojo ngujo xuta xi matitjun tsëhë nandya jan, sehe cavetsihin casua me ngu cjuañihi xi cuma rë Pablo cojo Bernabé, sehe cavaxëxin me tsëhë nangui rë me. <sup>51</sup> Peru Pablo cojo Bernabé ne, cavitsune me chojo rë ntsacu me, xi sua me machaya rë xuta xi cuacun jan xi vutsejen me me sacuaha xutaxín xi hvíin cjua rë Nina. Sehe cavetju me quiji me nandya Iconio. <sup>52</sup> Hane xuta ladu rë Jesús ne, quitsë rë me cjuasua hacuaha quitsë rë me tsëhë Hasen rë Nina.

## 14

### *Quiji apóstol ngajan Iconio*

<sup>1</sup> Hya xi camá ne, Pablo cojo Bernabé ne, quiji tangun me yungun rë xuta tjë rë Israel ngajan nandya Iconio. Hane xi cachja me cojo xuta ne, jercu cjín camahani xuta tjë rë Israel cojo xutaxín camacjain rë me cjua jan. <sup>2</sup> Peru xuta tjë rë Israel xi ha mijí cumacjain rë ne, cachja me cojo xutaxín, catsinguetsun me cjuatacun rë me xi cuacun vë condra tsëhë apóstol xi cuacun jan. <sup>3</sup> Peru jemu jyë nixtin caviyujutaha me hacuaha hacuiin catsacjun me xi cachja me tsëhë Nai naja. Hane Nai naja ne, casua me cahndë xi casahmi apóstol cjuarcun, cojo sa xi cumatsejen xi quixi cjua xi chja me tsëhë cjuandaja rë Nai naja. <sup>4</sup> Peru xuta nandya jan ne, hacuiin tangun camá cjuatacun rë me ta ngujo me ne, cachuya rë me

tsëhë xuta tjë rë Israel, peru yahnga nga me ne, cachuya rë me tsëhë apóstol jan. <sup>5</sup> Hya xi camá ne, xutaxín cojo xuta tjë rë Israel cojo xutaxa rë jan ne, caviyujucacun me xi choho sahmi me cojo apóstol xi cuacun jan hacuaha tsiquehen me cojo ndyojo. <sup>6</sup> Peru apóstol jan ne, camachaya rë me cjua jan, hane cavanga me quiji me ngajan nandya Litra cojo nandya Derbe, ngajan distritu Licaonia, cojo ngujo sa cahndë tahndee jan. <sup>7</sup> Hane yëjë cahndë hacutjin catsuyihiya me ne, cachja me cojo xuta cjuandajyihi xi chja tsëhë Jesucristu.

*Meje tsiquehen xuta Pablo ngajan Litra*

<sup>8</sup> Cavéjña ngu cha ngajan nandya Litra, ngu cha xi tsajin rë ngahñu ntsacu, tsëhë xi tsehen hisca hya xi catsin cha. Maji camahani fi cha. <sup>9</sup> Tacun cha tivisiñuju cha cjua xi tichja Pablo. Ngajan xi xi cavutsejenndaja Pablo cha ne, cavacun rë me xi mangucacun cha xi hatuxa cumandaja cha, <sup>10</sup> sehe ngajan xi cachja me cojo cha cuitjin:

—Tisechunquixun. —Cuatjin cachja me.

Hya xi camá ne, hisca cacaahnga cha xi casecun cha, sehe cavetsihin quiji ntsacu cha.

<sup>11</sup> Ngajan xi xutacjín jan ne, xi cavëë me xcusun xi casahmi Pablo ne, cavetsihin cajindaya me cachja me hne rë me, xi hmí rë hne Licaonia, cuitjin cachja me:

—¡Me xi cuicun vi ne, nina me vi, xi canduva me tsëhë ngahnga, canduvatjengui naja me, tu xi tsejen me sacuaha xuta! —Cuatjin cachja me.

<sup>12</sup> Bernabé ne, xi má rë xuta jan ne, nina Zeus me, hane Pablo ne, nina Hermes me, tsëhë xi me vëhë xi hitsë sa jercu cachja me. <sup>13</sup> Ngajan xi nahmi tsëhë nina Zeus jan, me xi tacun yungun rë tjeheh nandya ni ne, canduvacojo me chu ndyaja hacuaha canduvacojo me naxu ngajan hiscan tingotjo tsëhë nandya. Hane nahmi cojo xutacjín jan ne, meje tsiquehen me ndyaja jan hacuaha sua me naxu jan xi cjuaharcun me Pablo cojo Bernabé. <sup>14</sup> Hya xi apóstol Bernabé cojo Pablo camachaya rë me hacutjin tisahmi xuta jan ne, cajavë me tsjian rë me cavicheya me, ta cuatjin xcusun rë xuta tjë rë Israel hya xi cjan rë me. Sehe cavanga me quiji me ngajñi rë xutacjín jan, cajindaya me cachja me cuitjin:

<sup>15</sup> —Ngayujun ni ne, ¿mé má cuitjin tinihñu? Ngayin ne, hacuaha xuta ni ngayin sacuatjin nuju ngayun. Canújin cojo nuju ngu cjuandajyihi xi quichihin, cojo sa xi cuejñuxun xcusun xi machjiriin vi, hacuaha cojo sa xi cuisuhun ndiya rë ngu Nina xi quicun, me xi casahmi ngahnga cojo nangui cojo ndachacun, cojo yëjë ni xi tjin jan. <sup>16</sup> Nina ne, casua me cahndë xi, nixtin xi cavatju ne, xuta tsëhë yëjë ni nación ne, casahmi me hacutjin xi ha xcusun rë suvá me. <sup>17</sup> Peru

tsëhë xi casahmi me cjuandaja ne, casua me camachaya nuju xi me vëhë xi Nina me; catsingatju me tsi tsëhë ngahnga xi cuma nuju, hacuaha casua nuju me nixtin rë tutjë nuju, casua me xi chinu, hacuaha catsinguitsë me xahasen nuju cjuasua. —Cuatjin cajindaya me cachja me.

<sup>18</sup> Handasa cachja me cuatjin ne, peru ha tu hitsë sa ne, camaji cavatëcja me xi tsiquehen xutacjín jan chu xi sua me cjuatjo cojo apóstol jan sacuaha nina rë me.

<sup>19</sup> Hya xi camá ne, canduva ngujo xuta tjë rë Israel tsëhë nandya Antioquía cojo nandya Iconio. Hane catsinguetsun me cjuatacun rë xutacjín jan, sehe cavetaha me ndyojo Pablo hane cajavëjne me cavaxë me ngajan xín tsëhë nandya, tsëhë xi xi má rë me ne, ha cahme Pablo. <sup>20</sup> Peru xi tu catsëxtin xuta ladu rë Jesús jan hiscan jiña Pablo ne, cavisatjenhnga me quiji me cavisehen nga me nandya. Hane xi camá nchujun jan ne, cavetju me quiji me cojo Bernabé ngajan nandya Derbe.

*Cavuya Pablo cojo Bernabé ngajan Antioquía, distritu Siria*

<sup>21</sup> Hane xi cafehe me jan ne, casua me camachaya rë xuta cjuandajyihî xi chja tsëhë Jesucristu. Hane jemu cjín xuta xi cavisehen me ladu rë Jesús. Hya xi camá ne, cavuya nga me Listra cojo Iconio cojo Antioquía, distritu Pisidia. <sup>22</sup> Caviyujuhñu me cjuatacun rë xuta ladu rë Jesús, hacuaha cachja me cojo rë me xi catjinduju me xi mangucacun me cojo Jesús. Hacuaha cachja sa me cojo rë me cuitjin:

—Meje rë xi jemu cjín cjuañihî cuatjuun cuma sehe cuiseen hiscan sahmi Nina gobiernu. —Cuatjin cachja me.

<sup>23</sup> Hacuaha casuaxa rë me ngujo xuta changá jima ngu yungun jan, xi cjuahacuenda me xuta rë yungun. Hane xi cavatju casahmi me oración hacuaha casahmi me xun rë me ne, sehe caviyuju me xuta rë yëjë yungun jan tsja Nai naja, me xi camangucacun xuta jan cojo. <sup>24</sup> Hya xi camá ne, cavuya cavatju nga me distritu Pisidia, sehe cafehe me nandya Perge, distritu Panfilia. <sup>25</sup> Hane xi cafë cachja me cojo xuta jan cjuandajyihî ne, sehe cavetju me quiji me nandya Atalia. Hane xi cavetju me ngajan ne, sehe cavisehen me barcu cavuya quiji me Antioquía, <sup>26</sup> nandya hiscan xi caviyuju xuta me ngahma cjuandaja rë Nina xi sahmi me xa xi sehe cajnetaha casahmi me jan. <sup>27</sup> Hane xi cafehe Pablo cojo Bernabé jan ne, sehe casahmitangun me yëjë xuta rë yungun, casuacuenda me yëjë hacutjin xi casahmi Nina, nixtin xi quiji casahmi me xa rë Nina. Hacuaha casuacuenda me xi Nina ne, cavuxaha me ndiya xi cumangucacun xutaxín cojo Jesús. <sup>28</sup> Hane hacuiin hitsë nixtin caviyujutaha me jan cojo xuta ladu rë Jesús.



## 15

*Junta xi camá ngajan Jerusalén*

<sup>1</sup> Hya xi camá ne, ngujo me xi xuta tjë rë Israel ne, cavetju tsëhë Judea hane cafehe me Antioquía, cachja me cojo yahnga xuta ladu rë Jesús cuitjin:

—Sa xi xtiin rë chuxin nuju sacuaha xcusun xi cavejña Moisés ne, cumaji cuetjuntjun. —Cuatjin cachja me.

<sup>2</sup> Ngajan xi Pablo cojo Bernabé ne, hacuiin hitsë casecjan cjua rë me cojo xuta xi cachja cuatjin jan. Vëhë xi xuta rë yungun jan ne, casuaxa me Pablo cojo Bernabé cojo ngujo sa me xi cjue me xcun apóstol cojo xcun xuta changá rë Jerusalén, xi ha vëë me cjua rë Nina xi cuinenguise me tsëhë cjuacjintacun xi casuandya rë me ngajan.

<sup>3</sup> Ngajan xi xuta xi cuacun cavitexa xuta rë yungun jan ne, cavatju me distritu Fenicia cojo distritu Samaria. Hane cuatjin tisuacuenda me hacutjin xi xutaxín ne, hacuaha cavisehen me ndiya rë Jesús. Hane yëjë xuta ladu rë Jesús xi cavisijñuju cjua jan ne, jemu ndaja camá rë me.

<sup>4</sup> Hane xi cafehe me Jerusalén ne, jemu ndaja cafahtsja xuta rë yungun jan me. Hacuaha jemu ndaja cafahtsja apóstol cojo xuta changá jan me. Hya xi camá ne, sehe casuacuenda me yëjë hacutjin xi casahmi Nina, nixtin xi quiji casahmi me xa rë Nina. <sup>5</sup> Peru ngujo xuta fariseo xi hacuaha camá me ladu rë Jesús ne, cavetjujñi me cachja me cuitjin:

—Xutaxín xi visehen ladu rë Jesús ne, meje rë xi xtí chuxin rë me hacuaha cuinújan cojo rë me xi sahmi me yëjë sacuatjin chja ley rë Moisés. —Cuatjin cachja me.

<sup>6</sup> Hya xi camá ne, camatangun apóstol cojo xuta changá xi cjuahacuenda me cjuacjintacun vëhë. <sup>7</sup> Hane ha xcun xi ha jemu cavisiajmicjín me ngajñi rë me ne, sehe ngajan xi cavetjujñi Pedru, cachja me cuitjin:

—Ngayujun ngarcun ni matsejen ne, ngayun ne, ha hyun ta hisca nixtin titjun ne, ngahan cavaxijin ná Nina ngajñi nuju cojo sa xi ngatsë naha ne, cumachaya rë xutaxín cjuandajyihí xi chja tsëhë Jesucristu hane cumacjain rë me. <sup>8</sup> Hane Nina, me xi vëë yëjë cjuatacun rë xuta matsejen ne, catsingacun me xi cachuya rë me tsëhë xutaxín, hya xi casua me Hasen rë me xi cuma rë xuta xi cuacun vë, sacuatjin casua naja me ngayaan. <sup>9</sup> Tangun ni casahmi Nina cojo rë me sacuatjin casahmi Nina cojo naja ngayaan, xi catsityjahi me cjuatacun rë xuta xi cuacun vë ta, tsëhë xi camangucacun me cojo Nina. <sup>10</sup> Quihndë ta cuatjin ne, ¿mé má cuatjin meje chjuhunchuvun rë Nina cojo chuva rë ley rë Moisés, xi cuatjin tivitexun rë xuta ladu rë Jesús xi cuacun jan xi sahmichihin

me ngu xcusun xi hisca xutachanga naja cacaain rë me casahmichihin me hacuaha hisca ngayaan matsejen ne, cacaain naja canihñachehen? <sup>11</sup> Peru hacuiin cuatjin ta ngayaan ne, macjain naja xi cuetjuntjeen ngatsë rë cjuandaja rë Nai naja Jesús sacuatjin rë me xi cuacun vëhë. —Cuatjin cachja Pedru.

<sup>12</sup> Ngajan xi xutacjín jan ne, ngu caviyujuyuu me cavisifñuju me cjua xi cachja Bernabé cojo Pablo hora xi casuacuenda me hacutjin casahmi Nina cjuarcun ngajñi rë xa xi casahmi me ngajan nangui rë xutaxín. <sup>13</sup> Hane hora xi cajnetaha cachja Bernabé cojo Pablo cjua vëhë ne, sehe cachja Jacobo cuitjin:

—Ngayujun ngarcun ni matsejen ne, tinuhyun cjua xi cuichjá cojo nuju. <sup>14</sup> Sehe cajnetaha casuacuenda Simón hacutjin camá xi tjuntjun catsingacun Nina xi hacuaha meje rë me xutaxín, hya xi cavaxijin me ngujo xutaxín jan xi cuma xuta ladu rë me. <sup>15</sup> Cjua rë Nina xi catsihindu profeta hatsëë nixtin matsejen ne, tjin tangun cjuatacun rë cojo cjua xi café cachja Simón. Cuitjin camahindu:

<sup>16</sup> Xi cuatju xcusun vëhë ne, cúa nga, hane sahme xatsë ndava David xi cavetsun; cúa sahmendaja nga xi cavixujne, tsindaja nga ngundiya,

<sup>17</sup> cojo sa xi xuta xi yahnga ne, sahmi me ngahñu xi cuisehen me ladu naha, cuma cuinújan ne, yëjë xutaxín xi ngahan cavaxejen xi cuma tsahan me.

<sup>18</sup> Cuatjin chja Nina, me xi ha casua cjua vëhë hatsëë nixtin. Cuatjin camahindu.

<sup>19</sup> Vëhë xi xi má ná ngahan matsejen ne, mijí rë xi tahan xti rë xutaxín xi visehen ladu rë Nina. <sup>20</sup> Xi meje rë xi nihña ne, xi nihinduun rë me xi sinii me xichinë xi caviyuju xcun nina ndyojo, sahmii me cjuatsehen xi sahmi xuta cojo ngu xi hacuiin chjuun rë hacuiin xihin rë me, sinii me yojo rë chu xi caxinchahndu rë xi cahme, hacuaha sinii me jni.

<sup>21</sup> Cuatjin meje rë ta, tsëhë xi hisca jemu nu tsëë jan hisca quihndë ne, jima ngu nandya ngajñi xuta tjë rë Israel ne, tjin me xi sua machaya rë xuta cjua tsëhë ley rë Moisés. Ley vëhë ne, chutaya rë yëjë ni yungun jima ngu nixtin xi nixtin chjahájenda rë. —Cuatjin cachja Jacobo.

*Xujun xi catsingatju apóstol tsëhë xutaxín*

<sup>22</sup> Ngajan xi apóstol cojo xuta changá cojo yëjë sa xuta rë yungun ne, caviyujucacun me xi tuxijin rë ngujo xihin ngajñi rë me xi tsingatju me ngajan Antioquía, cjue tangun cojo Pablo cojo Bernabé. Me xi cuicun vi xi catuxijin rë: Judas, me xi hacuaha hmí rë Bársabas, cojo Silas, jo xihin xi jemu chjaharcun rë ngajñi rë xuta ladu rë Jesús. <sup>23</sup> Sehe ngajan

xi catsihindu me ngu xujun catsingatju me cojo me xi jo xi cuacun vë. Cuitjin chja xujun jan:

“Ngayin xuta ladu rë Jesús, apóstol cojo xuta changá ne, ningatjin ngu nina niji tsujun ngayujun ni ngayun xuta ladu rë Jesús xi hacuiin xuta tjë rë Israel ngayun, xi nechun nandya Antioquía cojo distritu Siria cojo distritu Cilicia. <sup>24</sup> Ngayin ne, camachaya niji xi cavetju ngujo xihin ngajñi niji xi cafehe ndya casuaxti nuju cojo cjua rë hacuaha cavisecjan cjuatacun nuju. Me xi cuacun vë ne, ngayin ne, cavitexiin rë me xi quiji me. <sup>25</sup> Vëhë xi ngu tangun ni camá cjua niji hane cavejñi tacuín xi tuxijin rë xihin xi ningatjin xi nduvatjengui nuju, cuinduvatangun cojo Bernabé cojo Pablo, me xi jemu vinga niji. <sup>26</sup> Me xi cuacun vë ne, casua me yojo rë me xi caviyujutaha tsavi me xi sahmi me xa rë Nai naja Jesucristu. <sup>27</sup> Cuatjin xi Judas cojo Silas ne, ningatjin nuju me. Hane me vëhë ne, cuichja me cojo nuju cjua hntsua me, cjua xi ningatjin nuju vi. <sup>28</sup> Ngayin ne, ngu tangun ni camá cjua niji cojo Hasen rë Nina xi cuitexin nuju xi nihñu suvá ni xcusun xi hitsë sa sahmi ngu jyë vi: <sup>29</sup> xicachinuu xichinë xi caviyuju xcun nina ndyojo, xicachinuu jni, xicachinuu yojo rë chu xi caxinchahndu rë xi cahme, xicanihñuu cjuatsehen xi sahmi xuta cojo ngu xi hacuiin chjuun rë hacuiin xihin rë. Sa xi nihñuu yëjë xcusun vëhë ne, ndatjin nihñu. Vëhë ni cjua xi nújin cojo nuju.” Cuatjin chja xujun jan.

<sup>30</sup> Hya xi camá ne, cavetju me xi cuacun jan quiji me Antioquía. Hane xi cafehe me jan ne, casahmitangun me yëjë ni xuta rë yungun, sehe casua me xujun xi yaha me. <sup>31</sup> Hane xi cavutaya xuta ladu rë Jesús xujun jan ne, jemu ndaja camá rë me tsëhë cjua jan. <sup>32</sup> Hane Judas cojo Silas jan ne, tsëhë xi tjin rë me chuva xi cuichja me cjua xi cafachatsja me tsëhë Nina ne, jercu cachja me cojo xuta jan, hacuaha jemu casua rë me cjuetacun. <sup>33</sup> Hane xi ha caviyujutaha me ngujo nixtin jan ne, xuta rë yungun jan ne, catsingatju me cafe nga cojo yëjë ni cjuandaja cjuajeya ngajan hiscan xi cavetju me. <sup>34</sup> Hane Silas, xi má rë me ne, hitsë sa ndaja xi ngaja caviyujutaha me. <sup>35</sup> Peru Pablo cojo Bernabé ne, caviyujutaha sa me ngajan Antioquía, cavicuya me cjuachacun rë cjua rë Nina, hacuaha casua me camachaya rë xuta cjuandajyihi xi chja tsëhë Nai naja. Hacuaha jemu cjín sa xuta xi cuatjin casahmi me.

### *Catsismi xicjin Pablo cojo Bernabé*

<sup>36</sup> Hya xi camá ne, xi cavatju ngujo nixtin ne, Pablo ne, cuitjin cachja me cojo Bernabé:

—Cuyan cuanguen tjenguen nga xuta ladu rë Jesús yëjë ni nandya hiscan xi ha catahan camachaya rë me cjuandajyihi

xi chja tséhë Nai naja, cuanguen chutsejen ne, hacutjin tivatju me tijima.

<sup>37</sup> Hane Bernabé ne, meje cjuecojo me Juan, me xi hacuaha hmí rë Marcos. <sup>38</sup> Peru Pablo ne, mijí cjuecojo me, tséhë xi Marcos ne, catsismicacun me xicjin me hane cavetjuxín me tséhë Pablo cojo Bernabé ngajan Panflia, quijiinndujain me cojo xa. <sup>39</sup> Hane cojo cjuatacun vëhé ne, cavetjucaa ngu si ngajñi rë Pablo cojo Bernabé. Cuatjin camá xi cavetjuxin me tséhë xicjin me. Hya xi camá ne, Bernabé ne, quijicojo me Marcos jan ne, cavisehen me ngu barcu, hane quiji me Chipre. <sup>40</sup> Peru Pablo ne, cavaxijin me Silas xi cjuecojo me. Hane xuta ladu rë Jesús ne, caviyuju me me xi cuacun jan ngahma cjuandaja rë Nai naja. Hya xi camá ne, cavetju Pablo cojo Silas, <sup>41</sup> quiji me yëjë ni nandya tséhë distritu Siria cojo Cilicia, casua rë me ngahñu xuta rë yungun jan.

## 16

### *Cavetsihin catsujyihya Timoteo cojo Pablo*

<sup>1</sup> Hane xi cavatju vëhé ne, cafehe me nandya Derbe cojo Listra. Ngajan ne, tacun ngu xuta ladu rë Jesús xi hmí rë Timoteo, quihndi rë ngu chjuun xuta tjë rë Israel xi hacuaha cavisehen me ndiya rë Jesucristu. Nahmi rë Timoteo jan ne, xutaxín me. <sup>2</sup> Xuta ladu rë Jesús ngajan nandya Listra cojo Iconio ne, jemu ndaja chja me tséhë Timoteo vë. <sup>3</sup> Pablo ne, meje rë me xi cjue Timoteo cojo rë me. Vëhé xi quijicojo me Timoteo hiscan xi ti chuxin rë xuta tjë rë Israel. Cuatjin casahmi me ngatsë rë xi nandya xi cuacun vëhé ne, siu xuta jan, hane yëjë xuta xi cuacun jan ne, vëë me xi nahmi rë Timoteo ne, ngu xutaxín me. <sup>4</sup> Ngajan xi cavetju Pablo cojo Silas cojo Timoteo, quiji me. Hane jima ngu nandya xi tivatju me ne, casua me camachaya rë xuta tséhë cjua xi caviyuju apóstol cojo xuta changá ngajan Jerusalén, cojo sa xi xuta ne, cuihndë me tséhë cjua vëhé. <sup>5</sup> Cuatjin camá xi xuta tséhë yëjë yungun jan ne, casacuhñu rë me xi mangucacun me cojo Jesús. Hane nchunchujun ni ne, cuatjin jima cjin sa me.

### *Cachja nijñá cojo Pablo*

<sup>6</sup> Hya xi camá ne, cavatju me distritu Frigia cojo distritu Galacia ta, tséhë xi Hasen rë Nina ne, casuaain cahndë xi cuichja me cojo xuta cjua rë Nina ngajan distritu Asia. <sup>7</sup> Hane xi cafehe me tiña distritu Misia ne, meje cjue me distritu Bitinia, peru Hasen rë Jesús ne, casuaain cahndë. <sup>8</sup> Cuatjin camá xi cavatjutaha me Misia, hane quiji me nandya Troas. <sup>9</sup> Hane ngu nguixun xi siutaha me ngajan ne, cachja ngu nijñá cojo rë Pablo. Cavëë me ngu xihin tséhë distritu Macedonia xi secun tichja cojo rë me cuitjin: “Nduvun guehe Macedonia

ne, cuiseacun nihi.” Cuatjin cachja nijná jan. <sup>10</sup> Cuatjin camá xi xi tu cachja nijná cojo Pablo cuatjin ne, ngutjen ni cavinchin chuva rë hacutjin cuma xi cuanguin Macedonia ta, tsëhë xi xi má nihi ne, Nina cajindaya nihi me xi cuanguin cuinújin cojo xuta jan cjuandajyihí xi chja tsëhë Jesús.

### *Cavisehen na Lidia ladu tsëhë Jesucristu*

<sup>11</sup> Hya xi camá ne, xi cavetjin nandya Troas ne, cachjihin ngu barcu sehe catsanguin ngu quixi rë nandya Samotracia. Hane xi camá nchujun jan ne, catsanguin nandya Neápolis. <sup>12</sup> Hane tsëhë ngajan ne, catsanguin nandya Filipos, ngu nandya xi hitsë sa matitjun tsëhë ngu cahndë tsëhë distritu Macedonia. Jemu cjín xuta Roma siu me jan. Hane cavinechintihin nandya vëhë ngujo nixtin. <sup>13</sup> Hane xi cavechú nixtin xi nixtin chjahájenda rë ne, cavetjin tingotjo hnhua tsëhë nandya jan hiscan jiya ndajyë. Xi má nihi ne, ngajan tjin ngu cahndë xi má oración. Hane cavinechin ngajan, canújin cjua rë Nina cojo yachjin xi camatangun me jan. <sup>14</sup> Hane ngu chjuun xi cahndë cjua xi cachja Pablo ne, Lidia hmí rë na, ngu na tsëhë nandya Tiatira, viteña na tsjian moradu. Na vëhë ne, hacuaha faharcun na Nina, hane Nai naja ne, cavuxaha me cjuatacun rë na xi ndaja cavetaharcu na cjua xi cachja Pablo. <sup>15</sup> Hane hya xi caxtenda na cojo yëjë xuta rë na ne, cachja na cojo nihi cuitjin:

—Quihndë ta ha hyun xi ngahan ne, camangucácun cojo Nai naja ne, nduvun ndya naha, hane ngajan cuinechun.  
—Cuatjin jemu cjín cachja na cojo nihi, vëhë xi catsanguin.

### *Quiji Pablo cojo Silas ndavaya ngajan Filipos*

<sup>16</sup> Cavechú ngu nixtin hya xi tivanguin cahndë hiscan xi má oración ne, cavechútaha nihi ngu na hndixahan rë xuta, xi jiya xitsehen xahasen rë. Hane nai rë na hndixahan jan ne, jemu cjín tujún sacú rë me, tsëhë xi chja na cojo xuta mé xi cuatju me cuma. <sup>17</sup> Na vëhë ne, catsujyihiya tjengui na ngayin cojo Pablo, jindaya na chja na cuitjin:

—Xuta xi cuicun vi ne, mosu rë Nina xi matitjun má me, hacuaha sua me machaya nuju cjua hacutjin cuetjuntjun.  
—Cuatjin cajindaya na cachja na.

<sup>18</sup> Jemu cjín nixtin xi cuatjin casahmi na. Hya xi camá ne, tsëhë xi jemu camaxti rë Pablo ne, cavuya me cavutsejen me na, sehe cachja me cojo xitsehen jan cuitjin:

—Tsëhë xi Jesucristu casuaxa ná me ne, ¡tetjixin tsëhë na!  
¡Vëhë xi chjá cojo ri! —Cuatjin cachja Pablo.

Hane hora vëhë ni ne, cavetjuxin xitsehen jan.

<sup>19</sup> Hya xi camá ne, xi vutsejen nai rë na hndixahan jan xi ha quihndë tsajin cjuetacun xi sacú sa rë me tujún ne, cafaha me

Pablo cojo Silas, cajavějne me quijicani me ngajan hiscan ma tangun xutaxa rë ngajan hiscan má ndetsin. <sup>20</sup> Hane xi cafehe me ngajan xcun xutaxa rë ne, cuitjin cavinchajyë me:

—Cha xi cuicun tjë rë Israel vi ne, jemu tivisecjan cha cjuatacun rë xuta nangui naja. <sup>21</sup> Meje rë cha xi nihña xcusun rë xutachanga rë cha, peru ngayaan xuta Roma ne, ndajintjin xi cuanguentjengueen xcusun xi cuacun vë.

<sup>22</sup> Hane hacuaha cojo xutacjín jan, cavetsihin cavinchajyë me Pablo cojo Silas. Ngajan xi xutaxa rë ne, cavaxëhndu me tsjian rë me xi cuacun jan, sehe cavitexa me xi sehen rë.

<sup>23</sup> Hane ha xcun xi ha jercu cavaja rë me ne, sehe cavincha me ndavaya. Hacuaha cachja me cojo cha xi sahmi cuidadu ndavaya xi ndaja cuidadu cuma me xi cuacun jan. <sup>24</sup> Hane hya xi cafhatsja mayu cjua vëhë ne, quiji cavinchahñu cha me cahntsua ndavayajñu, hacuaha cavinchanguihñu cha ntsacu me ngojo xi casehenchjine tsëhë jo ya xi sahmi rë me castigu hacuaha hitsë sa cjuaquixi jiya me.

<sup>25</sup> Hane sacuaha chuva rë vasen nixten ne, Pablo cojo Silas ne, tisahmi me oración hacuaha tisë me tsëhë Nina. Hane presu xi yahnga jan ne, tu tivisiñuju ni me. <sup>26</sup> Hane ha tu ñahñu jercu cafani nangui, hisca xihndënaña rë ndavaya jan vitsuneya rë. Hacuaha yëjë ni tingotjo ndavaya jan ne, ngutjen ni catuxaha, hane cadena xi tjinhñu xingu xingu presu ne, cavixuhndu. <sup>27</sup> Hya xi camá ne, cavaasca rë cha xi sahmi cuidadu ndavaya jan. Hane xi cavëë cha xi tixaha yëjë tingotjo tsëhë ndavaya jan ne, cavaxë cha quicha rë cha hane ha tu hitsë sa ne, catsiquehen cha yojo rë cha ta, tsëhë xi xi má rë cha ne, yëjë presu ne, cavanga. <sup>28</sup> Peru Pablo ne, jercu cajindaya me cachja me cuitjin:

—Xicanihñuu cuatjin ta ngayijin ni nechinyin nguehe. —Cuatjin cachja Pablo.

<sup>29</sup> Ngajan xi cha xi sahmi cuidadu jan ne, cafehya cha ngu ndihi, sehe vangasanii cha quiji cha cahntsua ndavaya, ña fatsë cha xi tsacjun cha, quiji cafañatsacjan cha xcun Pablo cojo Silas xi faharcun cha me. <sup>30</sup> Hane xi cavaxë cha me tsëhë ndavayajñu jan ne, sehe cafinenguise cha cuitjin:

—Tatá, ¿mé xi meje rë xi sahme, cojo sa xi cuétjtjëtj? —Cuatjin cafinenguise cha.

<sup>31</sup> Hane me xi cuacun jan ne, cuitjin cachja me:

—Catamangu tacún cojo Nai niji Jesús, sehe cuetjuntjun ngayun cojo yëjë xuta xi siu ndya nuju. —Cuatjin cachja me.

<sup>32</sup> Sehe ngajan xi cha vëhë ne, cajindaya cha yëjë xuta xi siu ndava cha, hane Pablo cojo Silas ne, casua me camachaya rë cha cjua rë Nina cojo yëjë xuta xi cajindaya rë cha jan. <sup>33</sup> Ha hora vëhë ni tsëhë nixten vëhë ne, cafaha cha me ne, cavane

cha hiscan casacuhmu rë me. Hya xi camá ne, ngutjen ni caxtenda cha cojo yëjë xuta rë cha jan. <sup>34</sup> Sehe quijiniji cha cojo Pablo cojo Silas ndava cha, hane casua cha niñu cajinë me. Hacuaaha jercu ndaja camá rë cha cojo yëjë xuta xi siu ndava cha, tsëhë xi camangucacun cha cojo Nina.

<sup>35</sup> Hya xi camá ne, xi casahasen jan ne, catsingatju xutaxa rë jan nísë, quiji cachja cojo cha xi sahmi cuidadu ndavaya jan cuitjin:

—Naxun xu cha xi caxincha ndavaya nguchjin jan. —Cuatjin cachja cha.

<sup>36</sup> Ngajan xi cha xi sahmi cuidadu ndavaya jan ne, quiji cachja cha cojo Pablo cjua vihi:

—Catsingatju xutaxa rë cjua xi cuáxë xu nuju. Vëhë xi cuma cuetjun ne, cuangun cojo cjuandaja cjuajeya. —Cuatjin cachja cha.

<sup>37</sup> Peru Pablo ne, cuitjin cachja me cojo cha xi cuacun jan:

—Xutaxa rë ne, cavitexa me casehen niji xcun yëjë ni xuta, handasa cjëë cjuahacuenda me jyë niji, ngayin xi xuta Roma ngayin. Sehe cavinchaniji me ndavaya. ¿Há taha hma meje cuaxë niji me quihndë? ¡Cumaji xi cuatjin! Catinduva suvá me cataxë niji me. —Cuatjin cachja Pablo.

<sup>38</sup> Hane cha nísë jan ne, catsicuya cha cjua cojo xutaxa rë cuatjin. Hane xi camachaya rë xutaxa rë xi xuta Roma má me xi cuacun jan ne, catsacjun me camá. <sup>39</sup> Ngajan xi xutaxa rë ne, quiji cachja me cojo Pablo cojo Silas xi tsijyëcacun me xi cuatjin camá. Sehe cavaxë me me, sehe cafehya rë me xi sahmi me cjuandaja ne, cuetjuxin me tsëhë nandya jan.

<sup>40</sup> Hane xi cavetju Pablo cojo Silas tsëhë ndavaya ne, cavuya quijitjengui me na Lidia. Hane xi cavëë me yëjë xuta ladu rë Jesús jan ne, sehe cachja me cojo xuta jan xi catjinduju me cojo ndiya rë Jesús, sehe cavetju Pablo cojo Silas quiji me.

## 17

### *Cafehe Pablo ngajan nandya Tesalónica*

<sup>1</sup> Hya xi camá ne, Pablo cojo Silas jan ne, cavatju me nandya Anfípolis cojo nandya Apolonia, sehe cafehe me nandya Tesalónica, hiscan xi tacun ngu yungun rë xuta tjë rë Israel.

<sup>2</sup> Hane sacuatjin xi ha xcusun rë Pablo ne, ngajan quijitjengui me xuta tjë rë Israel jan nixtin xi chjahájenda rë. Hane jyan nixtin, tsëhë jyan totje ne, Pablo ne, cavicuya me xuta cjua rë Nina. <sup>3</sup> Casua me camachaya rë xuta xi chja cjua rë Nina xi Me xi Tsingatju Nina ne, hatuxa tjin xi cueya me sehe cuya nga me cjuahñu. Hacuaaha cachja Pablo cuitjin:

—Jesús, me xi tisuá jimachaya nuju tsëhë ne, me vëhë xi catsingatju Nina. —Cuatjin cachja me.

<sup>4</sup> Ngajan xi ngujo xuta xi cuacun jan ne, camacjain rë me, hane cavisehen me ladu rë Pablo cojo Silas. Hane ngajñi rë me xi cuacun camacjain rë vë ne, hacuaha jemu cjín xutaxín xi faharcun rë Nina hinchajñi me cojo hacuiin hitsë yachjin xi matitjun jan hinchajñi me. <sup>5</sup> Ngajan xi ngujo xuta tjë rë Israel xi camacjaain rë jan ne, camachini me. Hane hora xi camá casahmitangun me ne, jemu cjín xuta tsehen xi tujyë tsuyihiya jan ne, cavetsihin casahmi me ngu suë jyë ngajñi nandya xi cjue jaha me Pablo cojo Silas. Quiji me ndava Jasón xi vanguise me me xi cuacun vë xi cuaxë me xcun xutacjín jan. <sup>6</sup> Hane xi casacuiin rë me Pablo cojo Silas ngajan ne, cajavëjne me Jasón cojo ngujo sa xuta ladu rë Jesús, quijicojo me xcun xutaxa rë, jindaya me cachja me, cavincha me jyë cuitjin:

—Cha xi cuacun jemu casuaxti jingujyë ni ngasunhdë ne, hacuaha cojo ngeuhe cafehe cha. <sup>7</sup> Hane cha Jasón vi ne, cafahatsja cha cha xi cuacun jan ngajan ndava cha. Hane yëjë cha xi cuacun vë ne, tisahmi cha condra ley rë emperador Romano xi hmí rë César, me xi matitjun camahani, ha chja cha xi tjin sa ngu me xi matitjun xi hmí rë Jesús. —Cuatjin cavinchajyë xutacjín jan me xi cuacun jan xcun xutaxa rë.

<sup>8</sup> Ngajan xi xutacjín cojo xutaxa rë jan ne, xi cahndë me cjua jan ne, jemu camacjíncacun me. <sup>9</sup> Hane ha xcun xi cavechji Jasón cojo xuta xi yahnga jan tujún cojo xutaxa rë ne, sehe catsismi xutaxa rë jan me.

### *Cafehe Pablo cojo Silas ngajan nandya Berea*

<sup>10</sup> Ngajan xi xuta ladu rë Jesús ne, xi tu camá nguixun jan ne, catsingatju me Pablo cojo Silas ngajan nandya Berea. Hane xi cafehe me ngajan ne, quiji me yungun rë xuta tjë rë Israel. <sup>11</sup> Hane xuta jan ne, hitsë sa tixaha cjuatacun rë me xi cuma rë xuta xi siu ngajan Tesalónica. Hane me xi cuacun jan ne, cafahatsja me cjua rë Nina cojo nguñaja xahasen rë me. Hacuaha nchunchujun ni ne, cavutaya me xujun rë Nina, cojo sa xi sacú rë me cjuaquixi tsëhé cjua xi cachja Pablo. <sup>12</sup> Cuatjin camá xi jemu cjín xuta jan camacjain rë me. Ngajñi rë xuta jan ne, hacuaha hacuiin hitsë xutaxín nchina sa chjuun sa xihin me hinchajñi me jan. <sup>13</sup> Peru hya xi camachaya rë xuta tjë rë Israel ngajan Tesalónica xi cojo nandya Berea tisua Pablo jimachaya rë xuta cjua rë Nina ne, hacuaha quiji xuta xi cuacun jan casua me cjuacjintacun xutacjín xi siu jan. <sup>14</sup> Ngajan xi xuta ladu rë Jesús xi siu jan ne, catsingatju me Pablo hisca ndachacun. Peru Silas cojo Timoteo ne, caxinchataha ni me ngajan. <sup>15</sup> Hane xuta xi quijicani rë Pablo jan ne, quijicojo me me hisca nandya Atenas. Xi tu cafehe me ngajan ne, cachja Pablo cojo xuta xi quijicani rë me jan ne, catji catichja me cojo Silas cojo



Timoteo ne, marcu macjain catjijtjengui me Pablo. Hya xi camá ne, sehe cafe xuta xi cuacun jan.

*Cafehe Pablo ngajan nandya Atenas*

<sup>16</sup> Jinguyëjë rë xi tacunya Pablo Silas cojo Timoteo ngajan Atenas ne, jemu camaxti rë xahasen rë me, tsëhë xi tivutsejen me nandya jan xi ña quitsë rë cojo nina ndyojo. <sup>17</sup> Vëhë xi Pablo ne, cachja me cojo xuta tjë rë Israel cojo xutaxín xi faharcun rë Nina ngajan yungun. Hane ngajan ndetsin ne, nchunchujun ni cachja sa me cojo xuta xi fehe jan. <sup>18</sup> Hacuaha cojo maestru xi tjengui cjuatacun xi hmí epicúreo cojo ngujo sa maestru xi tjengui cjuatacun xi hmí estóico cavisiajmi me cojo Pablo. Hane ngujo me ne, cachja me cuitjin:

—Cha machjiriin xi cuajyihí vë ne, jtsajin camahani mé vengui chji rë cjua xi chja cha! —Cuatjin cachja maestru xi cuacun jan.

Ngujo nga me ne, cuitjin cachja me:

—Cha xi cuajyihí vë ne, tisua cha jimachaya naja tsëhë nina rë jingu sa xuta.

Cuatjin cachja ngujo nga me ta, tsëhë xi Pablo ne, tisua me jimachaya rë xuta cjuandajyihí xi chja tsëhë Jesús cojo tsëhë hacutjin cavuya me cjuahñu. <sup>19</sup> Ngajan xi xuta jan ne, quijicojo me Pablo ngajan Areópago, cahndë hiscan matangun me xi sahmi me junta, sehe cachja me cojo me cuitjin:

—Tinújun cojo niji mé cjuachacun xatsë xi quichuhun ta <sup>20</sup> jemu ha ngu xcusun cjua xi canuhyin xi canújun. Vëhë xi meje cumachaya niji mé vijne cjua vëhë.

Cuatjin cachja xuta Atenas jan ta, <sup>21</sup> tsëhë xi yëjë xuta xi cuacun vë cojo xuta ngu nangui xi siu cahndë jan ne, hatuxa chuya rë me xi cuisñuju me ngu cjua xatsë hacuaha jemu nduju cuichja me cojo xicjin me.

<sup>22</sup> Hya xi camá ne, sehe casecunvasen Pablo cahndë vëhë, sehe cachja me cuitjin:

—Ngayujun ngarcun ni xuta Atenas matsejen ne, vutsején jinguyë ni ne, ngayun ne, hacuaha jemu chjuhuncun nina nuju. <sup>23</sup> Ta jinguyëjë rë xi catsujyëhëya ngajñi nandya nuju hacuaha tivutsején yëjë cahndë hiscan chjuhuncun nina nuju ne, cavécutaha ngu yungun lihndi hiscan xi camahindu ngujo cjua xi chja cuitjin: “Tsëhë ngu nina xi hyaan me.” Cuatjin camahindu. Vëhë xi nina xi chjuhuncun xi hisca hyuun ne, me vëhë xi nduva tisua jimachaya nuju tsëhë me. <sup>24</sup> Nina xi casahmi ngasunhndë cojo yëjë xi tjin xcun, me xi nai rë ngahnga cojo nangui ne, hacuiin véjñacahndë me yungun xi sahmi xuta. <sup>25</sup> Hacuaha me vëhë ne, tsajin mé xi ma chaja rë me xi ngayaan xuta cuma tahan rë me ta, me vëhë

xi sua naja me cjuahñu, sua me xta naja, hacuaha sua naja me yějě ni xi mameje naja.

<sup>26</sup> Hane tjě rě xi ngu ni xuta ne, casahmi Nina yějě xcusun xuta, xi cuiyuju me jingujyě ni ngasunhdě. Hacuaha Nina cachja me janihya xi cumatitjun jimangu xcusun xuta hacuaha jani hiscan xi cuiyuju me. <sup>27</sup> Cuatjin casahmi Nina cojo sa xi ngayaan xuta ne, cuinchaseen me, hane xi cuatjin cuinchaseen me ne, hyaan sa xi sacú naja me, handasa hacuiin cjin tacun Nina xi cuma naja xingu xingu ngayaan. <sup>28</sup> Sacuatjin chja ngu cjua xi chja cuitjin: “Nina ne, sua naja me cjuahñu, sahmi me xi ma finiya ngayaan, hacuaha sua naja me xi nechan cojo cjuahñu naja.” Cuatjin chja cjua. Hacuaha yahnga xuta tsěhě ngajñi nuju xi tsihindu me cjua xi jemu ndaja fi ne, cuitjin catsihindu me: “Ngayaan ne, tjě rě Nina ngayaan.” Cuatjin catsihindu me. <sup>29</sup> Quihdě ta quihndi rě nina ngayaan ne, mijí rě xi cuma tacuun xi Nina ne, tangun me cojo nina oro o sa xi nina quicha tyava, o sa xi nina ndyojo, xi xuta casahmi me cojo cjuatacun rě suvá me. <sup>30</sup> Nina ne, catsingatjuhnga me nixtin xi xuta ne, hvíin me. Peru quihndě ne, Nina ne, tivitexa me xi yějě ni xuta tsěhě jingujyě ni ladu ne, tsindeya me cjuatacun rě me ta, <sup>31</sup> tsěhě xi Nina ne, ha cavejña me ngu nixtin xi tsichuva me xuta tsěhě ngasunhdě cojo cjuaquixi tu cutjin jyě rě ne, cuatjin sahmi me cojo. Hacuaha ha cavaxijin me ngu xuta xi sahmi xa vėhě. Hacuaha ha hyan xi cjuaquixi xi cuatjin cuma, tsěhě xi Nina catsicuya me cjuahñu xuta vėhě. —Cuatjin cachja Pablo.

<sup>32</sup> Hane hya xi cahndě xuta jan cjua xi ngu nima ne, cavuya cjuahñu ne, ngujo me ne, catsixcuehyu me cjua jan, peru ngujo nga me ne, cuitjin cachja me:

—Cuisiñiji xi cuinújun nga ngundiya cjua vėhě. —Cuatjin cachja ngujo me jan.

<sup>33</sup> Ngajan xi Pablo ne, cavetju me tsěhě ngajñi rě xuta jan.

<sup>34</sup> Hane ngujo xuta ne, cavisehen me ladu rě Pablo sehe camacjain rě me cjua jan. Hane ngajñi rě me xi cuacun vė ne, jiyajñi me xi hmí rě Dionisio, ngu xutaxa rě tsěhě nandya, hacuaha cojo sa ngu chjuun xi hmí rě Dámaris jiyajñi me jan, cojo ngujo sa me.

## 18

### *Cafehe Pablo ngajan nandya Corinto*

<sup>1</sup> Hya xi camá ne, hya xi cavatju xcusun vėhě ne, cavetju Pablo tsěhě nandya Atenas, hane quiji me nandya Corinto.

<sup>2</sup> Hane xi cafehe Pablo ngajan ne, cavechútaha me ngu xihin tjě rě Israel xi hmí rě Aquila. Aquila jan ne, tsěhě distritu Ponto má me, peru hacuaha sehe cafehe me Corinto cojo

chjuun rë me xi hmí rë Priscila, xi quiji caviyujucahndë me ngajan nación Italia. Cavetjuxin me tsëhë Italia ta, tsëhë xi me xi matitjun jan, me xi hmí rë Claudio ne, cavitexa me xi yëjë ni xuta tjë rë Israel ne, hatuxa cuetjuxin me tsëhë nandya Roma. Hane Pablo ne, quijitjengui me Aquila. <sup>3</sup>Hane tsëhë xi ha ngu xcusun ni xa xi sahmi catsijo ni me ne, cavejñatangun me cojo me xi cuacun vë, hacuaha tangun casahmi me xa. Xa xi sahmi me ne, xi tsindaja me ndihya tsjian. <sup>4</sup>Ngajan xi Pablo ne, cachja me cjua rë Nina ngajan yungun rë xuta tjë rë Israel jima ngu nixtin xi chjahájenda rë ta, tsëhë xi meje rë me xi sa xuta tjë rë Israel o sa xi xutaxín ne, cumacjain rë me cjua vëhë.

<sup>5</sup>Hane xi cafehe Silas cojo Timoteo xi cavetju me tsëhë distritu Macedonia ne, Pablo ne, cavetsihin xi nchunchujun ni tichja me cojo xuta cjua rë Nina, tichja me cojo xuta tjë rë Israel xi Jesús ne, me vëhë xi catsingatju Nina. <sup>6</sup>Peru hya xi casahmi xuta xi cuacun jan condra Pablo hacuaha choho cachja me tsëhë me ne, cavitsune Pablo chojo rë tsjian rë me sacuaha xi tivaxë me xuta xi mijí cuihndë cjua rë Nina, sehe cachja me cojo xuta jan cuitjin:

—Ngayun suvun cún nuju tsëhë xcusun xi cuátju cuma. Hacuiin ngahan cún ná. Quihndë cojo nixtin xi cjui sa ne, cjuë cuichjá cojo xutaxín cjua rë Nina. —Cuatjin cachja me.

<sup>7</sup>Hane xi cavetjuxín me tsëhë xuta xi cuacun vë ne, quiji me ndava ngu me xi hmí rë Ticio Justo, ngu xutaxín xi hacuaha faharcun me Nina. Ndava me vëhë ne, ngu ndaya ni rë yungun rë xuta tjë rë Israel jan tacun. <sup>8</sup>Hane Crispo, me xi xutaxa rë yungun jan ne, camangucacun me cojo Nai naja Jesucristu, hacuaha cojo yëjë sa me xi siu ndava me camangucacun me. Hacuaha jemu cjín xuta Corinto ne, xi cahndë me cjua ndajyihi rë Nina jan ne, camacjain rë me sehe caxtenda me. <sup>9</sup>Hane ngu nguixun jan ne, ngajñi nijña rë Pablo ne, cachja Nai naja cojo rë me cuitjin:

—Xicarcuiin. Tinoje sa. Xicanisejyiin cjua xi noje. <sup>10</sup>Cuatjin nihñi ta, tsëhë xi ngahan ne, tejña cojo ri, hane tsajin yo xi cuma choho sahmi cojo ri ta ngahan ne, jemu tjin ná xuta ladu naha nguehe nandya vihi. —Cuatjin cachja Nai naja.

<sup>11</sup>Hane cavéjña Pablo ngajan ngu nu vasen, xi vicuya rë me xuta cjua rë Nina.

<sup>12</sup>Peru hya xi Galión matitjun me tsëhë distritu Acaya ne, camatangun xuta tjë rë Israel jan ne, cafaha me Pablo, quijicani me xcun xutaxa rë, <sup>13</sup>cuitjin cachja me:

—Cha xi cuijyihi vi ne, tsujyihiya cha tichja cha cojo xuta xi hacjahi xcusun meje rë xi nihña xi chjahanrcun Nina. Peru

xcusun vëhë ne, condra tsëhë ley naja. —Cuatjin cachja xuta jan.

<sup>14</sup>Hane ha tu hora sa xi cuichja Pablo ne, cachja Galión cojo xuta xi cuacun jan cuitjin:

—Ngayun xuta tjë rë Israel, sa xi ngu cjuatsehen o sa xi ngu jyë jyë xi casahmi cha ne, tjin ná chuva rë xi scaa ná cojo nuju.

<sup>15</sup>Peru xi tsëhë ngu cjuachacun cojo tsëhë ñihi rë ngu xuta cojo tsëhë ley nuju suvun ne, ndyá chutsujun suvun hacutjin cuma chihin ta, tsëhë xi ngahan ne, hatuxa sahmeцуendaan cjuacjintacun xi cuacun vë. —Cuatjin cachja Galión.

<sup>16</sup>Ngajan xi Galión ne, catsicanga cojo me xuta tjë rë Israel jan tsëhë ndihyavasen. <sup>17</sup>Ngajan xi yëjë xuta jan ne, cafaha me Sóstenes, me xi matitjun tsëhë yungun rë xuta tjë rë Israel, cavaja rë me ngajan ndatsen ndihyavasen. Peru Galión ne, casahmicuendaan camahani me yëjë ni cjuacjintacun vëhë.

### *Cavuya nga Pablo nandya Antioquia*

<sup>18</sup>Peru hya xi ha jemu cavatju nixtin xi quitaha Pablo ngajan Corinto ne, catsinguijnetaha me cjua cojo xuta ladu rë Jesús, sehe cafaha me ngu barcu xi cjue me ngajan distritu Siria. Priscila cojo Aquila ne, hacuaha cojo me quiji me cojo Pablo. Hane xi cafehe me nandya Cencrea ne, ngajan casejnu rë rcu Pablo ta, tsëhë xi casahmichihin me ngu cjua cojo Nina.

<sup>19</sup>Hane xi cavatju vëhë ne, sehe quiji me nandya Efeso. Hane Pablo ne, ngajan caviyujutaha me Priscila cojo Aquila. Hya xi camá ne, Pablo ne, quiji me yungun, cachja me cojo xuta tjë rë Israel jan cjua rë Nina. <sup>20</sup>Hane xi cafehya xuta me xi setaha sa me ngujo nixtin ngajan ne, catsingatiin me. <sup>21</sup>Hya xi camá ne, catsinguijnetaha me cjua cojo xuta jan, cuitjin cachja me:

—Sa xi Nina meje rë me ne, cúa nga, nduvatjënguë nuju. —Cuatjin cachja me.

Ngajan xi cafaha me ngu barcu xi cavetju me tsëhë Efeso.

### *Quiji nga Pablo cavusehenhya me xuta rë yungun*

<sup>22</sup>Hane xi cafehe me Cesarea ne, ngajan cavetju me quiji me Jerusalén xi sua me ngu nina xuta rë yungun ngajan. Hya xi camá ne, sehe cavuya cafehe me nandya Antioquia.

<sup>23</sup>Hane xi ha casetaha me ngujo nixtin jan ne, sehe cavetju nga me quiji me yëjë ni nandya tsëhë distritu Galacia cojo distritu Frigia, casua rë me ngahñu yëjë ni xuta ladu rë Jesús.

### *Quiji Apolos nandya Efeso cojo nandya Corinto*

<sup>24</sup>Ngajan nandya Efeso ne, cafehe ngu xuta tjë rë Israel xi hmí rë Apolos. Nangui rë me ne, Alejandría. Jemu ndaja tsichihin me cjua xi chja me, hacuaha jemu vëë me tsëhë cjua rë xujun rë Nina. <sup>25</sup>Me vëhë ne, tjin yo xi casuacuenda rë me tsëhë ndiya rë Nai naja. Cojo nguñaja xahasen rë me

ne, chichihin ni casua me camachaya rë xuta cjuandajyihî xi chja tsëhë Jesús. Peru hvín me mé vijne xi xtenda xuta sacuatjin tixtenda xuta ladu rë Jesús ta xi vëë me ne, suvá ni mé vijne xi xtenda xuta sacuatjin cavitenda Juan Vitenda rë Xuta. <sup>26</sup> Apolos vë ne, hacuîin cojo chircun rë me cuetsihin cuichja me cojo xuta cjua rë Nina ngajan yungun rë xuta tjë rë Israel. Hane xi cahndë Priscila cojo Aquila sacuatjin cachja Apolos ne, cavaxëxin me ne, sehe casuacuenda ndaja sa me tsëhë ndiya rë Nina. <sup>27</sup> Hya xi camá ne, catsingatahacacun Apolos xi cjue me ngajan distritu Acaya. Hane xuta ladu rë Jesús jan ne, cachuya rë me hacuaha catsihindu me ngu xujun tsëhë xuta ladu rë Jesús ngajan, cachja me cojo xuta jan xi ndaja cjuahatsja me Apolos. Hane xi cafehe me jan ne, jemu cavisecoo me xuta xi cojo cjuandaja rë Nina ne, ha camangucacun me cojo Jesús. <sup>28</sup> Hane xcun ni yëjë xuta ne, jercu catsitjungui me cjua rë xuta tjë rë Israel. Jemu cjin cahndë tsëhë xujun rë Nina xi cachja me cojo xuta, xi tsingacun me xuta xi Jesús ne, me vëhë xi catsingatju Nina me.

## 19

### *Cafehe Pablo nandya Efeso*

<sup>1</sup> Cuitjin camá jinguyëjë rë xi quitahá cuaha Apolos ngajan Corinto. Xi cavatju catsujyihîya Pablo taha ladu ngatihin ne, cafehe me nandya Efeso, hane ngajan cavechútaha me ngujo xuta ladu rë Jesús. <sup>2</sup> Hane cuitjin cachja me cojo xuta jan:

—¿Há cavisehen Hasen rë Nina cahntsua xahasen nuju hya xi camangutacún cojo Jesús? —Cuatjin cachja me.

Hane xuta jan ne, cuitjin cafayangui me:

—Hisca camachayiîni niji cjua xi tjin xi hmí rë Hasen rë Nina. —Cuatjin cafayangui me.

<sup>3</sup> Ngajan xi Pablo ne, cuitjin cachja nga me:

—¿Hacutjin caxtenda ngayun ni? —Cuatjin cachja me.

Hane xuta jan ne, cuitjin cafayangui me:

—Caxtenda ngayin sacuatjin cavitenda nima Juan. —Cuatjin cafayangui me.

<sup>4</sup> Ngajan xi Pablo ne, cuitjin cachja nga me:

—Juan vë ne, cavitenda me xuta hya xi xuta jan ne, catsindeya me cjuatacun rë me, hacuaha cachja me cojo xuta jan xi catamangucacun me cojo me xi sehe cjuehe, me xi hacui Jesús. —Cuatjin cachja nga Pablo.

<sup>5</sup> Xi cahndë xuta jan cjua vëhë ne, caxtenda me xi cumatangun cjuatacun rë me cojo Nai naja Jesús. <sup>6</sup> Hane xi cavisanetsja Pablo xuta jan ne, canduva Hasen rë Nina, cavisehen cahntsua xahasen rë xuta, hane cachja me hne xi hisca hvín

me, hacuaha cachja me cjua xi casua Nina me. <sup>7</sup> Hane má sacuaha tejó xihin me xi yějē me.

<sup>8</sup> Hya xi camá ne, quiji Pablo yungun rē xuta tjē rē Israel, cachja me cojo xuta. Hane cahntsua jyan sá ne, cuatjin fi me yungun, hane hacuiin cojo chircun rē me chja me cojo xuta tséhē gobiernu xi sahmi Nina. <sup>9</sup> Peru ngujo xuta jan ne, casahmitaja rcu me, hane camacjaain rē me, hane choho cachja me tséhē ndiya rē Jesús xcun yějē ni xuta. Véhē xi Pablo ne, cavetjuxin me tséhē xuta jan, hacuaha quijicojo me xuta ladu rē Jesús. Cavetsihin me nchunchujun ni cachja me cojo xuta ngajan scuela rē ngu me xi hmí rē Tirano. <sup>10</sup> Cuatjin casahmi me cahntsua jo nu, véhē xi yějē xuta xi siu ngajan Asia ne, camachaya rē me tséhē cjua rē Nai naja, sa xuta tjē rē Israel ne, o sa xutaxín.

### *Yatu quihndi rē Sceva*

<sup>11</sup> Jemu jyē cjuarcun casahmi Nina ngajñi rē xa xi casahmi Pablo. <sup>12</sup> Hisca tsjian xi sahmixa cojo Pablo ne, quijicojo xuta casua rē me xuta hmu rē, hane chíhin rē me ne, cavetjuxin, hisca xitsehen xi hincha xahasen rē yahnga me ne, hacuaha cavetjuxin.

<sup>13</sup> Peru ngujo cha tjē rē Israel xi tsujyihya vaxëxin cha xitsehen xi hincha xahasen rē xuta ne, hacuaha camameje cueyanangui cha ñihi rē Nai naja Jesús hora xi tivaxëxin cha xitsehen, hane cuitjin cachja cha:

—Tséhē xi Jesús casuaxa ná me, me xi chja Pablo tséhē ne, tivitéxa nuju xi cuetjunxun. —Cuatjin cachja cha.

<sup>14</sup> Cha xi cuatjin sahmi vë ne, hacui yatu cha quihndi rē ngu nahmi xi hmí rē Sceva, ngu nahmi xi matitjun tséhē xuta tjē rē Israel.

<sup>15</sup> Hane ngu ndiya xi cuatjin cachja cha ne, cuitjin cafayangui xitsehen jan:

—Jesús ne, hvë me véhē. Hacuaha hvë Pablo. Peru ngayun ne, ¿yo ngayun? —Cuatjin cafayangui xitsehen jan.

<sup>16</sup> Hya xi camá ne, me xi hincha xitsehen xahasen rē jan ne, cacaataha me cha, hane caca rē me catsinguijne me yějē yatu cha, tséhē xi jemu hñu ngahñu rē me. Cuatjin camá xi jemu casacuhmu rē cha xi cuacun jan, hane cavanga cha tu quixti ni tséhē ndihya hiscan siu cha jan. <sup>17</sup> Xcusun xi camá vë ne, camachaya rē yějē xuta nandya Efeso, sa xuta tjē rē Israel ne, o sa xutaxín. Hane ngayëjë ni me ne, jemu catsacjun me camá, hane camá jyë camá hnga Nai naja Jesús.

<sup>18</sup> Hane jemu cjín xuta xi ha cavisehen me ladu rē Jesús ne, fitjengui me Pablo vijacun me tséhē cjuasurqui xi sahmi me. <sup>19</sup> Hya xi camá ne, jemu cjín xuta xi sahmi cjuasurqui ne, quijicojo me xujun rē me jan, cavaca me ngajan xcun yějē ni

xuta. Hane xi casahmi me cuenta chji rë yëjë xujun rë me jan ne, jemu jyë camahani tujún cavetju chji rë. <sup>20</sup> Cuatjin camá xi cjua rë Nai naja ne, jercu cavitsojo sa hacuaha casacuhñu sa rë.

### *Suë jyë xi camá ngajan Efeso*

<sup>21</sup> Hane xi cavatju camá yëjë xcusun vëhë ne, cavejñacacun Pablo xi cjue me Jerusalén, cuatju me yëjë nandya tséhë distritu Macedonia cojo yëjë nandya tséhë distritu Acaya. Hacuaha cachja me cuitjin:

—Xi cuatju cjué Jerusalén ne, hacuaha tjin ná xi cjué hisca nandya Roma. —Cuatjin cachja me.

<sup>22</sup> Ngajan xi catsingatju me jo xuta xi visecoo rë me jan, Timoteo cojo Erasto, ngajan distritu Macedonia. Peru me vëhë ne, casetaha sa me ngajan distritu Asia.

<sup>23</sup> Ngu nixtin xi quitahá me jan ne, cavechú ngu cjuandya jyë tséhë ndiya rë Jesús. <sup>24</sup> Ngu xihin xi hmí rë Demetrio ne, sahmi me yungun langa cojo suvá quicha tyava, xcusun rë yungun rë nina Diana. Hane xuta xi sahmi xa rë Demetrio ne, jemu casacu rë me tujún tséhë xa vëhë. <sup>25</sup> Ngajan xi Demetrio ne, casahmi tangun me yëjë xuta xi sahmi xa rë me cojo jingu sa xuta xi sahmi me xa vëhë ni ne, sehe cachja me cuitjin:

—Ngayujun ni ne, ha hyun ta tséhë xa vihi ne, sacu naja yëjë tujún xi tjin naja. <sup>26</sup> Ngayun ne, chutsujun hacuaha machaya nuju cjua xi hacuiin suvá ni nguehe ta cojo jingujyë ni distritu Asia ne, tsuyihiya cha Pablo vë, sahmi cha xi vijnecacun xuta cjín hacuaha tsismicacun me nina naja ta, tséhë xi chja cha xi nina xi nindajan cojo ntsan ne, hacuiin nina jain me. <sup>27</sup> Jemu tsavi ta hacuiin suvá ni xa naja chajá ta cojo yungun rë nina naja Diana ne, cuechú hora xi cuenguiin chji rë, hacuaha hisca suvá nina naja ne, chajá me xi jyë hnga me cojo cjuatacun rë me ta me vëhë ne, yëjë ni xuta tséhë jingujyë ni distritu Asia cojo xuta tséhë jingujyë ni ngasunhdë ne, jemu faharcun rë me. —Cuatjin cachja me.

<sup>28</sup> Xi cahndë xuta cjua jan ne, jemu camacjan camahani rë me, sehe cajindaya me cachja me cuitjin:

—Jemu jyë hnga nina Diana naja. —Cuatjin cajindaya me cachja me.

<sup>29</sup> Jingujyë ni ngajñi nandya ne, jemu jyë suë cavejña. Ngajan xi xuta jan ne, vanga me cjui cuma tangun me ngajan ndatsen ndihyavasen, taha tijuvëhya me Gayo cojo Aristarco, jo me tséhë distritu Macedonia, me xi visecoo rë Pablo. <sup>30</sup> Ngajan xi Pablo ne, meje cuisehenjñi me ngajñi rë xuta cjín jan, peru xuta ladu rë Jesús ne, casuaain me cahndë. <sup>31</sup> Hacuaha ngujo xutaxa rë xi vinga rë Pablo ne, catsingatju me cjua tséhë Pablo xi cjuiin me ngajan ndatsen ndihyavasen.

<sup>32</sup> Ngujo xutacjín jan ne, jindaya me chja me cuitjin, ngujo nga me ne, jindaya me chja me cuatjin ta, tséhë xi yějë ni xuta ne, jemu camasuë rë cjuatacun rë me. Jercu cjín me xi hisca hvíin me mé má cuatjin quiji camatangun me jan. <sup>33</sup> Peru ngujo xutacjín jan ne, casuacuenda me Alejandro mé tséhë xi cuatjin tijima, hya xi catsivaha xuta tjë rë Israel me xi secun me xcun. Ngajan xi Alejandro ne, casahmi tsja me cojo xutacjín jan xi seyyu me cojo sa xi cuma cuichja Alejandro ngatsë rë xuta tjë rë Israel. <sup>34</sup> Peru xi cavëë xutacjín jan xi Alejandro ne, xuta tjë rë Israel má me ne, ngu tangun ni cajindaya me, vatju sa jo hora cachja me cuitjin:

—Jemu jyë hnga nina Diana naja! —Cuatjin cajindaya me cachja me.

<sup>35</sup> Hya xi camá ne, xi camá catsinguejyu secretariu xutacjín jan ne, sehe cachja me cuitjin:

—Ngayujun ngarcun ni ngayun xuta nandya matsejen ne, ha hyun ta tsajin hisca ngu xuta xi hvíin me xi nguehe Efeso tacun yungun rë nina Diana hacuaha nguehe tacun suvá nina xi cjanengui nguehe xi canduva ngahnga. <sup>36</sup> Tséhë xi tsajin yo xi cuma cuichja xi hacuiin cuatjin ne, vëhë xi meje rë xi catisejyu ni ngayun, tsajin mé xi nihñu sa xi cjëë ningatuhuntacúnndujun. <sup>37</sup> Cha xi cuicun canduvuncujun nguehe ne, tsajin mé xi choho casahmi cha cojo yungun naja, hacuaha tsajin mé xi choho chja cha tséhë nina naja. <sup>38</sup> Peru sa xi Demetrio cojo xuta xi sahmi xa rë me tjin yo xi sahmi si me cojo ne, tacun ndihyavasen, hacuaha tjin xutaxa rë. Ngajan catinchajyë xicjin me, jima ngu me. <sup>39</sup> Hane sa xi tjin sa mé xi meje nuju ne, nixtin xi satë rë junta xi sehe cuma ne, hya cuma chihin. <sup>40</sup> Sacuaha xcusun xi tijima vi ne, cuma tsingatahacacun me xi matitjun xi ngayaan ne, tinihña ngu si jyë condra tséhë gobiernu. Ta sa xi cjuinenguisse naja me mé má cuatjin canihña ne, sacuiin naja chuva rë hacutjin cuinújan mé má cuitjin tinihña ngu suë jyë vi.

<sup>41</sup> Cuatjin cachja secretariu, sehe catsinguijnetaha me cjua cojo xutacjín ne, sehe cafe xingu xingu me.

## 20

### *Quiji Pablo distritu Macedonia cojo distritu Acaya*

<sup>1</sup> Hya xi camá ne, xi cavatju suë jyë jan ne, cajindaya Pablo xuta ladu rë Jesús, casua rë me cjuetacun. Sehe catsinguijnetaha me cjua, sehe cavetju quiji me distritu Macedonia.

<sup>2</sup> Hane jima ngu nandya xi cavatju me xi cafehe me Macedonia ne, hacuaha jercu cachja me cojo xuta ladu rë Jesús hacuaha casua rë me cjuetacun. Hane xi cavatju me yějë nandya vëhë ne, cafehe me distritu Acaya. <sup>3</sup> Hane ngajan



casetaha me jyan sá. Hane hya xi ha cjuaha me barcu xi cjue me distritu Siria ne, casacu camachaya rë me xi xuta tjë rë Israel ne, caviyuju me xi tsiquehen rë me. Vëhë xi catsingatahacacun me xi hitsë sa ndatjin cuya cjue ntsacu me xi táha ladu tsëhë Macedonia. <sup>4</sup> Hane cojo me xi cuicun vihi quiji me cojo rë me: Sópater, ngu xuta Berea xi quihndi rë Pirro; cojo Aristarco cojo Segundo, jo xuta Tesalónica; cojo Gayo, ngu xuta Derbe; cojo Timoteo; cojo Tíquico cojo Trófimo, jo xuta tsëhë distritu Asia. <sup>5</sup> Me xi cuacun vë ne, camatitjun me quiji me, hane ngajan caviyujuya nihi me nandya Troas. <sup>6</sup> Peru ngayin ne, xi cavatju suhi tsëhë pan xi tsajin san rë ne, sehe cachjihin barcu xi cavetjin tsëhë Filipos, hane xi café hñú nixtin ne, sehe cavechintihin me ngajan Troas. Hane ngajan cavinechintihin yatu nixtin.

### *Quitahá Pablo ngajan nandya Troas*

<sup>7</sup> Ngajan xi nixtin ngu tsëhë totje ne, camatangun ngayin xi xinitanguin niñu ngayijin ni. Hane Pablo ne, cachja me cojo xuta. Hane tsëhë xi cuetju me cjue me xi cuma nchujun jan ne, quijinduju cachja me hisca cavechú vasen nixten. <sup>8</sup> Jemu cjin ndihi seti ngajan ndihya ngahnga hiscan camatangun ngayin. <sup>9</sup> Hane ngu cha xi hmí rë Eútico ne, tacun cha xcun ventana. Hane xi quijinduju sa cachja Pablo ne, jemu camanijñá rë cha. Hane tsëhë xi cacaain rë cha nijñá ne, cafañafë tjain camahani cha, hane cjanengui cha hisca xi má jyan pisu ndihya jan. Hane xi quiji catjunihnga rë cha ne, ha cahme cha. <sup>10</sup> Hane xi quijijne Pablo hiscan jiña nima ne, catsiquindi me yojo rë me sehe catsuvacja me nima. Hacuaha cachja me cuitjin:

—Xicamacjiin tacún ta, quicun cha vi. —Cuatjin cachja Pablo.

<sup>11</sup> Ngajan xi Pablo ne, cavuya quijiniji me, sehe cajinë me niñu. Sehe cavisiajmi camaha sa me hisca xi casahasen, sehe cavetju me quiji me. <sup>12</sup> Hacuaha quicun cha xi cjanengui jan, cafecojo xuta cha. Hane jercu casacu rë me cjuetacun xi quicun cha.

### *Quiji Pablo nandya Mileto*

<sup>13</sup> Ngayin ne, camatitjun ngayin catsanguin cavisihin barcu, hane sehe catsanguin nandya Aso, cojo sa xi chjihin-ntsin Pablo cahntsua barcu ngajan ta, tsëhë xi ha cuatjin camachihin cjuata, tsëhë xi me vëhë ne, meje cjue ntsacu me. <sup>14</sup> Hane xi casacu xinguin cojo rë me ngajan Aso ne, cavisehen me barcu, sehe catsanguin tangun Mitilene. <sup>15</sup> Hane xi cavetjin ngajan ne, xi camá nchujun ne, cavatjin quixi rë Quío. Hane xi camá nchujun nga ne, cafihin Samos. Hane

camá nchujun nga ne, cafihin nandya Mileto, <sup>16</sup> tsëhë xi Pablo ne, cavejñacacun me xi cuátjincjin tsëhë nandya Efeso, cojo sa xi hacuiin cuma tafi me ngajan distritu Asia, tsëhë xi me vëhë ne, jemu meje xati rë me cojo sa xi xati cuechú me ngajan Jerusalén, hane ngajan tsingatju me suhi Pentecostés.

*Catsinguijnetaha Pablo cjuua cojo xuta changá rë yungun Efeso*

<sup>17</sup> Hane jinguyëjë rë xi quitahá Pablo ngajan Mileto ne, catsingatju me quiji chjahá rë xuta changá rë yungun ngajan Efeso. <sup>18</sup> Hane xi cafehe xuta changá jan xcun Pablo ne, cuitjin cachja Pablo cojo rë me:

—Ngayun ne, ha hyunndujun hacutjin cavitejñataha cojo nuju yëjë ni nixtin hisca hya xi sehe tu cafëhë nguehe distritu Asia. <sup>19</sup> Ha hyun hacutjin casahme xa rë Nai naja: catsinguijne yojo naha, hisca cajíhnda, hacuaha jemu cjín cjuañihi cavátju camá ta, tsëhë xi xuta tjë rë Israel ne, jemu choho meje sahmi me cojo ná. <sup>20</sup> Ngayun ne, ha hyun hacutjin xi cachjá yëjë cojo nuju yëjë cjuua xi ndaja xi cuma nuju. Hacuaha ha hyun hacutjin casuá camachaya nuju cjuachacun hya xi camatangun ngayun ngayujun ni, hacuaha cëjë ndya nuju jima ngu ngayun, cachjá cojo nuju. <sup>21</sup> Cachjá cojo xuta tjë rë Israel hacuaha cachjá cojo xutaxín xi meje rë xi tsindeya me cjuatacun rë me hacuaha cuisehen me ladu rë Nina hacuaha meje rë xi cumangucacun me cojo Nai naja Jesús. <sup>22</sup> Quihndë ne, ngahan ne, tifé Jerusalén sacuatjin cavitexa ná Hasen rë Nina. Hveen mé xi cuátju cuma jan. <sup>23</sup> Peru Hasen rë Nina ne, yëjë ni nandya xi vátju ne, chja cojo ná xi hatuxa cjuë ndavaya hacuaha jemu cuátju cjuañihi. <sup>24</sup> Xi má ná ne, tangun ni xi tejña cjuahñu o sa xi cueya. Xi meje ná ne, xi tsinguijnetaha xa xi casua ná Nai naja Jesús, xa xi suá cumachaya rë xuta cjuandajyihí xi chja tsëhë cjuandaja rë Nina.

<sup>25</sup> Quihndë ne, ha hvë ta ha quihndë cuyuun chun ná, ngayujun ni xi casuá camachaya nuju tsëhë gobiernu xi sahmi Nina. <sup>26</sup> Vëhë xi nguehe cuichjá cojo nuju ta, sa xi tjin ngu ngayun xi cuechuun xcun Nina ne, hacuiin ngahan quitjen jyë ta, <sup>27</sup> tsëhë xi ngahan ne, casuácuenda chichihin nuju yëjë hacutjin xi cavejña Nina cjuatacun rë me. <sup>28</sup> Nechun cuidadu, hacuaha nihñucuidadun yëjë xuta ladu rë Jesús, xi suvá Hasen rë Nina casuaxa nuju xi cuma titjun ngayun tsëhë sacuaha obispos, cojo sa xi ngayun nihñu cuidadu xuta rë yungun rë Nina. Me xi cuacun vë ne, casacu rë Nina me cojo jni rë Quihndi rë suvá me hya xi cahme me. <sup>29</sup> Hya xi ha cavatju cavétjuxen tsujun ne, ngahan hvë ta cuinduva xuta, xi meje tsinguetsun me cjuatacun rë yëjë xuta ladu rë Jesús, sacuatjin tsiquehen chu lobo cjan rë chu tsángá.

<sup>30</sup> Hacuaha ngajñi nuju suvun ne, cuetjuñi xuta xi cuichja me cjuandacha, cojo sa xi cuaxëxin me xuta ladu rë Jesús xi cuma ladu rë me. <sup>31</sup> Nechun cuidadu. Hacuaha ninguitsjun ta, cahntsua jyan nu ne, nguixun nguitajñu cavicuyá nuju jima ngu ngayun. Jiya hora ne, hisca cajihnda.

<sup>32</sup> Quihndë ne, nguehe cuiyujú nuju tsja Nai naja, cojo sa xi sahmi nuju me cuidadu cojo cjuandaja rë me. Me vëhë xi ma sahmi me xi cuma yehe sa cjuatacun nuju, hacuaha sua tangun nuju me cjuahñu xatsë cojo yëjë sa xuta xi cavaxijin me. <sup>33</sup> Ngahan ne, hacuiin catsihmucacun tujún o sa tsjian rë jingu sa xuta. <sup>34</sup> Ngayun ne, hyun ta ngahan ne, casahmexa cojo ntsa vi xi casacu cjuachaja naha cojo me xi cavisecoo ná. <sup>35</sup> Ngajñi rë yëjë ni xcusun xi casahme ne, ngahan ne, catsingácun nuju xi, xi cuatjin hñu nihña xa ne, meje rë xi cuisecoon rë xuta xi jemu tjin rë cjuachaja. Hacuaha meje rë xi ninguitsjen cjua rë Nai naja Jesús, hya xi cachja me cuitjin: “Hitsë sa sua má naja xi tahan, xi cuma rë xi chjahanntsan.” Cuatjin cachja Nai naja.

<sup>36</sup> Hane xi cafë cachja Pablo cuatjin ne, sehe cavixcuhnchi me, casahmi me oración cojo yëjë xuta jan. <sup>37</sup> Yëjë ni me jemu cajihnda me, quiji me catsuvacja me Pablo, hisca cavitatsuha me. <sup>38</sup> Cjua xi hitsë sa casua rë me cjuachoho ne, cjua xi cachja Pablo xi ha quihndë cuyaaïn scuëë xuta jan me. Sehe quiji me cojo Pablo hiscan cavisehen Pablo barcu.

## 21

### *Quiji Pablo ngajan Jerusalén*

<sup>1</sup> Hya xi camá ne, xi cavejñi xuta jan ne, sehe ngu quixi ni quiji barcu cojo niji ne, cafihin Cos. Hane xi camá nchujun jan ne, cafihin Rodas. Hane xi cavetjin ngajan ne, cafihin Pátara. <sup>2</sup> Hane xi casacu niji ngu barcu xi cjue distritu Fenicia ne, cavisihin sehe catsanguin. <sup>3</sup> Hane xi cachutsijin Chipre ne, cavatjin taha ladu quixi tsëhë jan, catsanguin nduju xi cafihin quixi rë distritu Siria, sehe cafihin nandya Tiro ta, tsëhë xi ngajan cuitujne chaha xi hincha cahntsua barcu. <sup>4</sup> Hane xi casacu xinguin cojo xuta ladu rë Jesús jan ne, cavinechintihin ngajan yatu nixtin. Hane ngujo profeta xi siu ngajan Tiro ne, tjin mé cachja Hasen rë Nina cojo rë me, sehe cachja profeta jan cojo Pablo xi cjuiin me Jerusalén. <sup>5</sup> Xi cavechú nixtin xi cuetjin jan ne, sehe cavetjin catsanguin. Hane yëjë xuta jan, cojo chjuun rë me cojo quihndi rë me ne, quiji cani niji me hisca tjeheh ndachacun, hiscan fë nandya. Sehe ngajan cavixcuhnchin, sehe canihñi oración. <sup>6</sup> Hane xi caninguijnitihin cjua cojo rë me ne, sehe cavisihin barcu, hane me vëhë ne, cavuya cafe me ndava me xingu xingu me.

<sup>7</sup> Hane ngayin ne, catsanguin cojo barcu xi cavétjin tséhë Tiro, hane cafihin Tolemaida. Hane xi catsanguin catihin rë xuta ladu rë Jesús nina ne, ngajan cavinechin cojo rë me ngu nixtin. <sup>8</sup> Hane xi camá nchujun jan ne, cavetjin catsanguin, hane cafihin Cesarea. Sehe catsanguin ndava Felipe, me xi sua machaya rë xuta cjuandajyihí xi chja tséhë Jesús. Me vëhë ne, ngu me tséhë me xi ma yatu xi cavaxiji me xi visecoo rë apóstol. Hane ngajan cavinechin cojo rë me. <sup>9</sup> Me vëhë ne, tjin rë me ñuju na nixti quihndi rë me, xi má na profeta. <sup>10</sup> Hane jinguyëjë rë xi nechintihin ngajan ngujo nixtin ne, cafehe ngu profeta xi canduva tséhë Judea, ngu me xi hmí rë Agabo. <sup>11</sup> Hane xi cafehetjengui niji me ne, quiji me cafaha me cinturón rë Pablo, sehe catsihñu me tsja me cojo ntsacu me cinturón jan, sehe cachja me cuitjin:

—Cuitjin chja Hasen rë Nina: “Xihin xi tséhë cinturón vi ne, cuitjin tsihñu xuta tjë rë Israel me ngajan Jerusalén, hacuaha sahmi me entregadu xihin vëhë tsja xutaxín.” —Cuatjin cachja profeta jan cjua rë Nina.

<sup>12</sup> Xi canuhyin cjua vëhë ne, ngayin cojo xuta xi siu jan ne, canújin cojo Pablo xi cjuin me Jerusalén. <sup>13</sup> Ngajan xi Pablo ne, cuitjin cafayangui me:

—¿Mé má cuatjin chjihndun? ¿Mé má cuatjin nihñuchuvun cjuatacun naha? Ngahan ne, ha tjin chjine ngahan, hacuiin suvá ni xi cjuë ndavaya ta hacuaha hisca cueya ngajan Jerusalén ngatsë rë xi ladu rë Nai naja Jesús ngahan. —Cuatjin cafayangui Pablo tsijin.

<sup>14</sup> Hane xi catsingatiin me cjua xi canújin ne, ha quihndë canujiin sa cjua vëhë ta cuitjin canújin:

—Catama sacuatjin Nai naja meje rë me. —Cuatjin canújin.

<sup>15</sup> Xi cavatju nixtin xi cuacun vë ne, sehe cavihinchjini tsijin, sehe catsanguin Jerusalén. <sup>16</sup> Hacuaha cojo ngujo xuta ladu rë Jesús ngajan Cesarea quiji me cojo niji. Me xi cuacun vë quijicojo niji me hiscan xi cuinechin, ndava ngu xuta Chipre xi siutaha me Jerusalén, xi hmí rë Mnasón. Me vëhë ne, ha jemu hatsëë camahani xi xuta ladu rë Jesús má me.

### *Quiji Pablo xi cuisiajmi me cojo Jacobo*

<sup>17</sup> Xi cafihin ngajan Jerusalén ne, xuta ladu rë Jesús jan ne, cafahatsja niji me cojo yëjë ni cjuasua. <sup>18</sup> Hane xi camá nchujun jan ne, Pablo ne, quiji me cojo niji xi cuisiajmi me cojo Jacobo. Hacuaha ha tjin tangun yëjë xuta changá rë yungun jan. <sup>19</sup> Hane xi cavatju cachja Pablo nina cojo rë me ne, sehe casuacuenda chichihin me yëjë ni xcusun xi casahmi Nina ngajñi rë xa rë Nina xi casahmi Pablo ngajñi rë xutaxín. <sup>20</sup> Hane xi cavatju cahndë xuta jan cjua xi cachja Pablo ne,

casahmi jyë casahmi hnga me Nina, sehe cachja me cojo Pablo cuitjin:

—Ngayun ne, ha hyun xi ngajñi rë xuta tjë rë Israel ne, chuva mil xuta tjin me xi cavisehen me ndiya rë Jesús. Hacuaha yëjë ni me ne, jemu ndaja faharcun me ley rë Moisés. <sup>21</sup> Hacuaha xuta xi cuacun vë ne, casacu camachaya rë me xi ngayun ne, nújun cojo yëjë xuta tjë rë Israel xi siu ngajan nangui rë xutaxín xi meje rë xi tsismicacun me ley rë Moisés, hacuaha mijí rë xi cuatë me chuxin rë quihndinda xi xihin, ha quihndë mijí rë xi cjuetjengui sa me xcusun changá naja. <sup>22</sup> ¿Mé xi cuma ni? Hatuxa jyihi ni ne, sacú cumachaya rë me xi cafuhun. <sup>23</sup> Vëhë xi quihndë ne, nihñu tutjin xi cuinújin cojo nuju. Nguehe ngajñi niji ne, siu ñuju xihin xi casahmichihin me ngu cjua cojo Nina. <sup>24</sup> Chjuhun cha vihi ne, tangun cojo cha yungun xi matitjun, cojo sa xi ngajan cuma tyjahi cha tangun cojo ngayun tsëhë xcusun xi tsavi xi cojo Nina sacuatjin xi ha xcusun naja. Hacuaha techjun tsëhë cha, cojo sa xi cuma sejnu rë rcu cha. Hane xi cuatjin nihñu ne, yëjë ni xuta ne, cumachaya rë me xi yëjë cjua xi camachaya rë me tsujun ne, quixiin ta ngayun ne, hacuaha ha tuxa nihñuchuhun sacuatjin chja ley rë Moisés. <sup>25</sup> Hane sacuaha xutaxín xi cojo cavisehen ladu rë Jesús ne, ha caningatjin ngu xujun tsëhë me, hane xujun vëhë ne, chja xi meje rë xi sinii me xichinë xi caviyuju xcun ninandyoyo, sinii me jni, sinii me yojo rë chu xi caxinchahndu rë xi cahme, sahmi me cjuatsehen xi sahmi xuta cojo ngu xi hacuiin chjuun rë hacuiin xihin rë. —Cuatjin cachja xuta changá jan cojo Pablo.

<sup>26</sup> Hane xi camá nchujun jan ne, sehe quijicojo Pablo cha xi cuacun jan, sehe catsityjahi tangun me yojo rë me cojo cha, sacuatjin xi ha xcusun rë xuta tjë rë Israel. Sehe ngajan xi Pablo cojo cha xi cuacun jan ne, cavisehen me yungun xi matitjun, xi cuichja me há cjín sa nixtin xi cuijnetaha xi cuma tyjahi camahani me, hane hacuaha cjue cjuatjo xcun Nina ngatsë rë jima ngu me.

### *Cafaha sindadu Pablo ngajan yungun xi matitjun*

<sup>27</sup> Hya xi camá ne, xi ha meje cuechú xi cuma yatu nixtin jan ne, xuta tjë rë Israel xi canduva tsëhë distritu Asia jan ne, cavëë me Pablo ngajan cahntsua yungun xi matitjun tsëhë xi nchunchujun ni quiji me yungun tsëhë nixtin jan. Catsisüë me cjuatacun rë xutacjín jan, sehe quiji cafaha me Pablo, <sup>28</sup> hisca cajindaya me cachja me cuitjin:

—¡Ngayujun ni ngayun xuta tjë rë Israel, nduvun tisecuun niji! ¡Cha vihi xi tsujyihya chja cha condra naja ngayaan xuta rë Nina, cojo condra rë ley xi vitexa naja, cojo condra tsëhë cahndë vihi! Cuatjin tsujyihya chja cha cojo yëjë xuta

jingujyë ni. Hacuaha catsinguetsun cha cahndë rë Nina vi, tsëhë xi canduvacojo cha xutaxín nguehe cahntsua yungun xi matitjun vi.

Cuatjin cajindaya me cachja me ta, <sup>29</sup> tsëhë xi titjun ne, ha cavëë me Pablo cojo ngu xutaxín xi hmí rë Trófimo ngajan ngajñi nandya, hane xi má rë me ne, quijicojo Pablo me cahntsua yungun.

<sup>30</sup> Hane yëjë xuta nandya ne, camasuë rë cjuatacun rë me. Hane vanga me quiji camatangun me yungun xi matitjun hiscan secun Pablo, sehe cafaha me cajavëjne me, cavaxë me tsëhë yungun jan. Sehe ngutjen ni casechja yëjë tingotjo jan. <sup>31</sup> Hane jinguyëjë rë xi tisahmi xutacjín jan cjuandya xi tsiquehen me Pablo ne, quiji cjua rë capitán tsëhë sindadu xi yëjë xuta Jerusalén ne, tjemu jyë suë tisahmi me. <sup>32</sup> Ngajan xi capitán jan ne, ngutjen ni quijijne me cojo sindadu rë me hiscan xi hinchataha xutacjín jan. Hane xi cavëë xutacjín jan sindadu cojo capitán rë cha ne, sehe casejyu me xi tivaja rë me Pablo. <sup>33</sup> Hane xi quiji tiña capitán jan ne, sehe cafaha me Pablo. Sehe cavitexa me xi cumahñu Pablo cojo jo cadena. Hya xi camá ne, sehe cavinenguisse capitán jan cojo xuta jan yo xuta Pablo jan, hacuaha mé casahmi me. <sup>34</sup> Hane ngujo xuta jan ne, hisca jindaya me chja me cuitjin, ngujo nga me ne, hisca jindaya me chja me cuatjin. Peru tsëhë xi casacuiin rë capitán jan cjuaquixi ngatsë rë suë jyë xi tijima jan ne, cavitexa me xi cjuecojo sindadu Pablo ngajan hiscan hinchá sindadu. <sup>35</sup> Hane xi cafehe sindadu cojo Pablo hiscan ndë rë ne, hisca cavahahnga cha Pablo ngatsë rë cjuahngatacun xi sahmi xutacjín jan ta, <sup>36</sup> tsëhë xi tjengui me cjui me jindaya me chja me cuitjin:

—¡Nicuhun cha! —Cuatjin chja me.

*Sua Pablo cjuaquixi rë me xcun xutacjín*

<sup>37</sup> Hya xi ha tsinguissehen sindadu jan Pablo cahntsua ndihya ne, cachja Pablo cuitjin cojo capitán:

—¿Há tuun cahndë cuichjá cojo nuju ngujo cjua? —Cuatjin cachja Pablo.

Ngajan xi capitán jan ne, cuitjin cachja me:

—¡Han, peru ma noje griego! <sup>38</sup> Hane ngajan xi hacuiin ngaye cha Egipto xi sehe tiña nixtin cavunihnga ngu si jyë hacuaha quijicojo rë ñuju mil cha tsiquehen ngajan ngu xín tsëhë nandya jan ni. —Cuatjin cachja capitán jan.

<sup>39</sup> Ngajan xi Pablo ne, cuitjin cachja me:

—Ngahan ne, ngu cha tjë rë xuta Israel ngahan. Nangui naha ne, ngu nandya xi hacuaha jemu vengui chji rë xi hmí rë Tarso, tsëhë distritu Cilicia. Nihñu favor ne, tuhun cahndë cuichjá cojo xuta xi cuicun vi. —Cuatjin cachja Pablo.

40 Hane xi casua capitán jan cahndé xi cuichja Pablo ne, hora xi secun Pablo hiscan ndé jan ne, casahmitsja me cojo xuta xi sejyu me hitsé. Hane hora xi café xuta caviyujuyuu me ne, ngajan xi Pablo ne, cachja me cojo xuta jan hne hebreo, cuitjin cachja me:

## 22

1 —Ngayujun ngarcun ni xi hacuaha xingueen nuju ne, nihñu favor ne, tisiñuju hacutjin suá cjuaquixi naha quihndé xcun ngayujun ni. —Cuatjin cavetsihin cachja me.

2 Hane xi cahndé xutacjín jan xi hne hebreo cachja Pablo cojo rē me ne, hitsé sa jercu caviyujuyuu me. Sehe cachja sa Pablo cuitjin:

3—Ngahan ne, ngu cha tjē rē Israel ngahan. Hacuaha catsin ngahan ngajan nandya Tarso tsēhē distritu Cilicia. Peru xi camacha ne, nguehe Jerusalén. Hane maestru Gamaliel cavicuya ná me sacuatjin camahani chja ley rē xutachanga naja. Hatuxa jemu ndaja fahárcun Nina, sacuatjin tiniñu ngayujun ni quihndé. 4 Ngahan ne, cojo cjuahngatacun ne, catsujyēhēya tjēnguē xuta xi tjengui ndiya xatsē vihi. Hisca cavitéxa xi cueya me. Cafahá me cējēcojo me ndavaya, sa chjuun sa xihin me. 5 Hisca nahmi xi matitjun cojo yējē xuta changá rē yungun ne, cuma sua me cjuaquixi rē me tsēhē cjua vihi ta, tsēhē xi hacuaha me xi cuacun vēhē casua ná me xujun xi suá rē xuta naja ngajan Damasco. Vēhē xi cējē ngajan xi cjuahá xuta xi tjengui ndiya xatsē vihi, hane tsíhñu me cuinduva cojo me nguehe Jerusalén, cojo sa xi cuma me castigu.

### *Cachja Pablo hacutjin camá xi cavisehen me ladu rē Jesús*

6 Hya xi camá ne, hora xi ha tijima tiña gayin xi tivanguin Damasco, sacuaha chuva rē nchisen ne, ha tu ñahñu canduva ngu ndihi jyē tsēhē ngahnga casahmi hasen rē hiscan tifē.

7 Ña catícja, hane cahndé ngu cjua xi cachja cojo ná cuitjin: “Saulo, Saulo, ¿mé má cuatjin nujihiye tjengui ná cojo cjuahngatacun?” Cuatjin cachja cjua jan. 8 Ngajan xi ngahan ne, cuitjin cafayanguē: “¿Yo ngayun, Tatá?” Cuatjin cafayanguē. Sehe cachja nga cjua jan cojo ná cuitjin: “Ngahan xi Jesús tsēhē nandya Nasaret ngahan, xi tinujihiye tjengui ná cojo cjuahngatacun.” Cuatjin cachja nga cjua jan cojo ná. 9 Yējē xuta xi cavisecoo ná xi tivanguin ne, cavēē me ndihi jyē jan, peru cahndiin me cjua xi cachja cojo ná jan. 10 Sehe ngajan xi ngahan ne, cachjá cuitjin: “¿Mé xi meje rē xi sahme, Tatá?” Cuatjin cachjá. Hane Nai naja ne, cuitjin cachja me cojo ná: “Tisatjinhgue ne, tisihin Damasco. Hane ngajan cumachaya ri yējē xcusun xi meje rē Nina xi nihñi.” Cuatjin cachja Nai

naja cojo ná. <sup>11</sup> Peru tsèhë hasen jyë xi cavisehen túxcun jan ne, camatsijin ná. Ngajan xi xuta xi tivisecoo ná xi tivanguin ne, cavaha me ntsa, sehe camá cafèhë Damasco.

<sup>12</sup> 'Hya xi camá ne, ngu xihin xi hmí rë Ananías, xi jemu faharcun rë Nina hacuaha sahmi yëjë sacuatjin chja ley xi vitexa naja ne, ndaja chja yëjë xuta tjë rë Israel xi siu jan tsèhë. <sup>13</sup> Hane cafehetjengui ná me hiscan tejña, hane cachja me cojo ná cuitjin: “Ngayun Saulo, catamatsejen nga nuju ngundiya.” Cuatjin cachja me. Hane ha hora vèhë ni ne, camatsejen nga ná hane cahvë me. <sup>14</sup> Hya xi camá ne, sehe cachja me cojo ná cuitjin: “Nina rë xutachanga naja ne, cojo tjun sa ne, casuaxa nuju me xi cumachaya nuju mé xi meje rë me, hacuaha chun me xi hatuxa tyjahi cojo cjuatacun rë, hacuaha cuinuhyun cjua xi chja me cojo nuju. <sup>15</sup> Cuatjin camá ta, tsèhë xi Nina meje rë me xi ngayun tuhun cumachaya rë yëjë xuta tsèhë me, cojo tsèhë xcusun xi cahyun cojo tsèhë cjua xi canuhyun. <sup>16</sup> Quihndë ne, ¿mé nechunyun rë ni? Tángun ni catixtenda ngayun, chjindayun rë Jesús cahntsua xahasen nuju, cojo sa xi cjuë jyë nuju.” Cuatjin cachja Ananías cojo ná.

*Cachja Pablo hacutjin camá xi quiji cachja me cjua rë Nina cojo xutaxín*

<sup>17</sup> Hane xi cavatju vèhë ne, cavúya nga Jerusalén. Hane ngu ndiya hya xi tejñaya yungun xi matitjun tisahme oración naha ne, sacuaha xi camá ná xi cachja ngu chini cojo ná. <sup>18</sup> Cahvë Nina, hane cachja me cojo ná cuitjin: “Xati nihñi tacuin ne, tetjixin tsèhë Jerusalén ta, tsèhë xi xuta nguehe ne, cumacjaain rë me cjua xi noje tsahan.” Cuatjin cachja Nina. <sup>19</sup> Hane ngahan ne, cuitjin cachjá: “Ngayun Nina naha, xuta nguehe ne, vëë me xi ngahan ne, catsujyèhëya yungun jingujyë ni, cafahá xuta xi tjengui me ndiya nuju, cavajá rë me, hacuaha cavinchá me ndavaya. <sup>20</sup> Hane hora xi titsiquehen xuta Esteban, me xi cachja cjua nuju ne, hacuaha cojo ngahan sécun jan, tichuya ná, hacuaha hisca ngahan tisahme cuidadu tsjian rë cha xi titsiquehen rë Esteban jan.” Cuatjin cachjá. <sup>21</sup> Sehe ngajan xi Nina ne, cuitjin cachja me cojo ná: “Tihin ta, ngahan tsingátju ri hisca nangui cjin, cuihin cuinoje cojo xutaxín cjua naha.” Chja Nina cojo ná. —Cuatjin cachja Pablo.

*Cavitexa capitán xi sehen rë Pablo*

<sup>22</sup> Hisca ngajan ni cacaa rë xutacjín cavisiñuju me cjua xi cachja Pablo, sehe cavetsihin me cajindayataha me cachja me cuitjin:

—¡Nicuhun cha xi cuajyihí vë ta ha quihndë vechiin chuya rë xi cuejña sa cha cjuahñu! —Cuatjin cajindaya me cachja me.



<sup>23</sup> Jínguyëjë rë xi cuatjin jercu tijindayataha xuta, titsiniya me tsjian rë me, hacuaha titsicjin me nihndë scuan ne, <sup>24</sup> capitán jan ne, cavitexa me xi cjue chani rë Pablo cahntsua hiscan híncha sindadu. Hacuaha cavitexa me xi chjahátaha rë Pablo táha sehen rë me, cojo sa xi sacú cjuaquixi mé má cuatjin jindayataha xuta Pablo. <sup>25</sup> Hane hya xi ha camahñu me xi sehen rë me ne, sehe cachja me cuitjin cojo sindadu xi secun jan:

—¿Há chja ley xi cuma sehen rë ngu xuta Roma jinguyëjë rë xi cjëë cuma cuenda jyë rë me? —Cuatjin cachja me.

<sup>26</sup> Hane xi cahndë sindadu cjua vëhë ne, quiji cachja me cojo capitán cuitjin:

—¿Há hyun mé xi nihñu ni? Cha vëhë ne, cha Roma cha. —Cuatjin cachja sindadu jan.

<sup>27</sup> Ngajan xi capitán jan ne, quiijtjengui me Pablo, sehe cachja me cuitjin:

—Tinoje cojo ná ne, ¿há xuta Roma jain ngaye? —Cuatjin cachja me.

Ngajan xi Pablo ne, cuitjin cafayangui me:

—Juun. —Cuatjin cafayangui me.

<sup>28</sup> Ngajan xi capitán jan ne, cuitjin cachja me:

—Ngahan ne, jemu jyë tujún cavechjë xi camá ngahan xuta Roma. —Cuatjin cachja me.

Ngajan xi Pablo ne, cuitjin cachja me:

—Peru ngahan ne, xuta Roma ngahan hisca xi catsin ngahan. —Cuatjin cachja me.

<sup>29</sup> Hya xi camá ne, sindadu xi cjuahataha rë Pablo jan ne, ngutjen quijixin cha tsëhë Pablo. Hacuaha capitán jan ne, jemu catsacjun me camá xi cuatjin catsihñu me Pablo tsëhë xi camachaya rë me xi Pablo ne, xuta Roma me.

*Cavisehen Pablo xi cuma cuenda jyë rë me xcun me xi matitjun tsëhë xuta tjë rë Israel*

<sup>30</sup> Hane xi camá nchujun jan ne, tsëhë xi meje cumachaya rë capitán jan cjuaquixi mé má cuatjin cavinchajyë xuta tjë rë Israel Pablo ne, cavitexa me quiji casehenndaya Pablo, hacuaha cavitexa me xi cumatangun yëjë nahmi xi matitjun cojo yëjë sa xuta xi matitjun. Hane xi cafehecojo sindadu Pablo jan ne, sehe quijicani capitán me xcun yëjë xuta xi matitjun jan.

## 23

<sup>1</sup> Ngajan xi Pablo ne, xi cavutsejenya me xcun yëjë xuta xi matitjun jan ne, sehe cachja me cuitjin:

—Ngayujun ni ne, nguehe cuichjá cojo nuju ta ngahan ne, hisca ntsacu cavetsihin hisca quihndë ne, hatuxa tyjahi cjuatacun naha xcun Nina. —Cuatjin cachja me.

<sup>2</sup> Hane Ananías, nahmi xi matitjun jan ne, cavitexa me xi xuta xi hinchacun hiscan secun Pablo xi cuajaya me hntsua Pablo. <sup>3</sup> Ngajan xi Pablo ne, cachja me cuitjin:

—¡Nina cuaja nuju me, ngayun xuta ndacha! ¡Nechun ndyá xi chjuhunchuvun ná cojo ley rë Moisés, sehe vitexun xi cuajaya xuta ntsuva, handasa chja ley xi ndajintjin xi cuatjin nihñu! —Cuatjin cachja me.

<sup>4</sup> Hane xuta xi hinchacun hiscan secun Pablo jan ne, cuitjin cachja me:

—Haján, ¿há cuatjin choho noje cojo nahmi xi matitjun xi Nina casuaxa rë? —Cuatjin cachja me.

<sup>5</sup> Sehe ngajan xi Pablo ne, cuitjin cafayangui me:

—Haan, peru ngahan ne, hveen xi me vëhë xi nahmi xi matitjun me ta, ngahan ne, ha hvë xi xcun xujun rë Nina ne, cuitjin camahindu: “Mijí rë xi choho cuinújun cojo me xi matitjun tsujun.” —Cuatjin cachja Pablo cjuaxi camahindu xcun xujun rë Nina.

<sup>6</sup> Hane ha vëë Pablo xi ngujo xuta xi matitjun jan ne, xuta saduceo me, hane ngujo nga me ne, xuta fariseo me. Vëhë xi cachjahñu me xcun junta cuitjin:

—Ngayujun ni ne, nguehe cuichjá cojo nuju ta ngahan ne, xuta fariseo ngahan, hacuaha quihndi rë xuta fariseo. Ngatsë rë xi vetahácacun xi nima ne, cuya cjuahñu ne, vëhë xi tichjahachuva ná. —Cuatjin cachjahñu Pablo.

<sup>7</sup> Hane xi cachja Pablo cuatjin ne, cavetsihin cacjan xuta fariseo cojo xuta saduceo, hane hacuiin tangun camá me cojo cjuatacun rë me. <sup>8</sup> Xuta fariseo ne, chja me ta nima ne, cuya cjuahñu, hacuaha chja sa me xi tjin ángel hacuaha tjin hasen naja. Peru xuta saduceo ne, chja me ta quixiin. <sup>9</sup> Hya xi camá ne, cavisatjenhnga ngu suë jyë. Ngajan xi cavetjújñi ngujo cha xi vicuya cjuachacun xi hacuaha fariseo cha ne, cachja cha cuitjin:

—Sacuiin niji hisca ngu jyë rë cha xi cuijyihí vi. ¿Há ngayaan hyan sa xi ngu ángel o sa xi ngu hasen cachja cojo rë cha? —Cuatjin cachja cha.

<sup>10</sup> Hane hya xi suë xi tacun jan camajyë sa ne, jemu cat-sacjun capitán jan tsëhë xi tsiquehen xuta Pablo. Hane vëhë xi cavitexa me sindadu xi cjuejne, cuaxëxín cha Pablo tsëhë ngajñi rë xuta jan, cjuecojo cha me cahntsua hiscan hincha sindadu.

<sup>11</sup> Hane xi camá nguixun nchujun jan ne, quijitjengui Nai naja Pablo, cuitjin cachja me cojo rë me:

—Tejñi hñu xahasen riji ta, tsëhë xi sacuatjin canoje ngatsë naha nguehe Jerusalén ne, hacuaha cuatjin tjin ri xi cuinoje ngajan Roma. —Cuatjin cachja Nai naja.

*Casahmichihin xuta cjua xi tsiquehen me Pablo*

<sup>12</sup> Hane xi camá nchujun nga jan ne, ngujo xuta tjë rë Israel jan ne, casahmitangun me cjua xi hacuiin sinë hacuiin cuihi me jinguyëjë rë xi cjëë tsiquehen me Pablo. <sup>13</sup> Quisun sa xi yachan xuta xi cuatjin caviyujucacun me. <sup>14</sup> Hya xi camá ne, quiji me xcun yëjë nahmi xi matitjun cojo xuta changá jan, hane cachja me cojo me cuitjin:

—Ngayin ne, canihñitanguín cjua xi xinii siín jinguyëjë rë xi cjëë niquihin cha Pablo. <sup>15</sup> Quihndë ne, ngayun cojo sa me xi yahnga xi matitjun ne, tuhun cumachaya rë capitán ne, cataxë me cha Pablo, catinduvacojo me cha xcun junta xi cuma, sacuaha xi meje sa nuju cjuaquixi tsëhë jyë rë cha. Hane ngayin ne, ha tjin chjine ngayin xi niquihin cha chaja sa xi cjuehe cha xcun junta. —Cuatjin cachja xuta jan.

<sup>16</sup> Peru cha quihndi rë na tichja Pablo ne, xi camachaya rë cha tsëhë cjuandacha jan ne, quiji cha hiscan hinchu sindadu hane casuacuenda cha Pablo tsëhë cjua xi camachaya rë cha. <sup>17</sup> Sehe ngajan xi Pablo ne, cajindaya me ngu cha xi matitjun tsëhë sindadu, sehe cachja me cojo cha cuitjin:

—Tángun cojo cha vihi xingueen xcun capitán tsëhë xi tjin cjua xi cuichja cha cojo rë me. —Cuatjin cachja Pablo.

<sup>18</sup> Ngajan xi sindadu jan ne, quijicojo cha cha xicjin Pablo jan xcun capitán, sehe cachja cha cuitjin:

—Cha Pablo xi jiya ndavaya jan ne, cajindaya cha ngahan, sehe cachja cha cojo ná xi cuinduva cojo cha vihi nguehe ta, tsëhë xi tjin xu cjua xi cuichja cha cojo nuju. —Cuatjin cachja cha sindadu jan.

<sup>19</sup> Ngajan xi capitán jan ne, cafaha me tsja cha xicjin Pablo ne, sehe quijixin me cojo cha ngu ladu sehe ngajan cafinguisse me cha cuitjin:

—¿Mé cjua xi cuinoje cojo ná? —Cuatjin cafinguisse me.

<sup>20</sup> Hane cha xicjin Pablo jan ne, cuitjin cachja cha:

—Ngujo xuta tjë rë Israel ne, casahmitangun me cjua xi cuichja me cojo nuju xi cuanguncujun tsini naha xcun me xi matitjun tsëhë me, sacuaha xi tjin sa cjua xi meje cjuinguisse rë me. <sup>21</sup> Peru xicamacjaain nuju cjua rë me ta, vatju sa yachan xuta xi hinchaya rë me ngajan ndiya, xi casahmichihin me cjua xi sinii cuiin me jinguyëjë rë xi cjëë tsiquehen me tsini naha. Ndicumaha ni ne, siuya me xi cuinújun xi ndatjin. —Cuatjin cachja cha xicjin Pablo.

<sup>22</sup> Ngajan xi capitán jan ne, cuitjin cachja me cojo rë cha:

—Tjihin ne, tsajin yo xi cuinoje cojo xi catehe camachaya ná cjua vihi. —Cuatjin cachja me.

*Quiji chani rë Pablo xcun Félix, me xi matitjun*

<sup>23</sup> Hya xi camá ne, capitán jan ne, cajindaya me jo sindadu rë me, sehe cachja me cojo cha cuitjin:

—Tuhunchjinu jo cientu sindadu cojo jyanchan tē cha xi miji naxin cojo jo cientu sa cha xi vaha lanza ne, cojo sa xi fane ñaja tsēhē nguixun ne, cuetju cha, cjue cha hisca nandya Cesarea. <sup>24</sup> Hacuaha tuhunchjinu ngujo naxin xi cuijin Pablo, xi cuangun chanu me xcun Félix, me xi matitjun. —Cuatjin cachja capitán.

<sup>25</sup> Sehe catsihindu me ngu xujun xi chja cuitjin:

<sup>26</sup> “Ngahan, Claudio Lisias ne, tsingátju ngu nina naha tsujun, ngayun Félix, ngayun xi matitjun ngayun tsahan. <sup>27</sup> Cha xi cuijyihí vi ne, cafaha xuta Israel cha. Hitsē sa ne, catsiquehen me cha. Hane xi camachaya ná xi cha Roma cha ne, cējē cojo sindadu naha, cavaxētjē cha. <sup>28</sup> Hane tsēhē xi meje cumachaya ná mé má cuatjin vinchajyē xuta cha ne, cējēcojo cha xcun xutaxa rē yungun cojo xcun xuta changá rē xuta Israel. <sup>29</sup> Hane ngahan ne, camachaya ná ta vinchajyē me cha, tsēhē xi faharcuaain cha ley rē suvá me. Peru jyē xi vincha me tsēhē cha ne, vechiin chuva rē xi cueya cha o sa cjue cha ndavaya. <sup>30</sup> Hane xi camachaya ná xi casahmichihin xuta cjua xi tsiquehen me cha ne, ngutjen ni catsingátju cha xcun ngayun, hacuaha cavitéxa rē xuta xi vinchajyē rē cha cuinduva me ndyá cuichja me cojo nuju mé má cuatjin vinchajyē me cha.” Cuatjin chja xujun jan.

<sup>31</sup> Hya xi camá ne, cafaha sindadu jan Pablo, quijicojo cha me nguixun hya nandya Antípatris, sacuatjin cjua xi cachja capitán cojo cha. <sup>32</sup> Hane xi camá nchujun jan ne, cavuya sindadu xi fi ntsacu jan ngajan Jerusalén, hane cha xi hinchasun naxin jan ne, quiji sa cha cojo Pablo. <sup>33</sup> Hane xi cafehe cha cojo rē me Cesarea ne, casahmi entregadu cha xujun xi yaha cha, hacuaha casahmi entregadu cha Pablo tsja me xi matitjun. <sup>34</sup> Hya xi camá ne, xi cafē cavutaya me xujun jan ne, sehe cavinenguise me jani distritu rē Pablo. Hane xi camachaya rē me xi Pablo ne, distritu Cilicia distritu rē me ne, <sup>35</sup> cuitjin cachja me:

—Hya xi cjuehe xuta xi vincha me jyē riji ne, hya cuíhndē cjua riji. —Cuatjin cachja me.

Sehe cavitexa me xi setjo Pablo ngajan ngu cahndē tsēhē ndihya jyē xi casahmi Herodes, hiscan xi má ndava me xi matitjun.

## 24

### *Cavinchajyë xuta tjë rë Israel Pablo*

<sup>1</sup> Hane xi cavatju hñú nixtin jan ne, cafehe nahmi xi matitjun xi hmí rë Ananías ngajan Cesarea, cojo ngujo xuta changá cojo ngu me xi cuichjatje ngatsë rë xuta xi cuacun vë, ngu me xi hmí rë Tértulo. Me xi cuacun vë ne, quiji cavinchajyë me Pablo xcun me xi matitjun. <sup>2</sup> Hane xi cachjindaya rë Pablo ne, cavetsihin cavinchajyë Tértulo me, cuitjin cachja me:

—Ngatsë nuju ngayun ne, jemu tjin cjuandaja cjuajeya ngajñi niji. Hacuaha tsëhë xi jemu ndaja chjuhuncuendun yëjë ni nandya niji ne, vëhë xi cjui xcun nandya. <sup>3</sup> Jemu tihín camahani nacuechji nuju, ngayun Félix, tsëhë yëjë cjuandaja xi tihñu vë. <sup>4</sup> Cojo sa xi ha quihndë suaan sa nuju cjuandya ne, nihñu favor ne, nihñujyun tacún cojo niji ne, tisiñuju hitsë ngujo cjuaxi cuinújin. <sup>5</sup> Cha xi cuijiyihi vi ne, jemu cjuaxti camahani cha. Jingujyë ni ngasunhndë ne, titsujyihya tivunihnga cha si ngajñi niji ngayijin ni xuta tjë rë Israel. Hacuaha cha vihi ngu cha xi matitjun ngajñi rë xuta ladu rë cha Nasaret. <sup>6</sup> Hisca cahntsua yungun xi matitjun meje sahmi cha ngu xcusun xi ndajin tjin xi nihña, vëhë xi cachjihin cha. Ngayin ne, meje chjihinchuvin cha sacuatjin vitexa ley niji, <sup>7</sup> peru cafehe capitán Lisias ne, cafahatahá me cha, hacuaha cavitexa niji me xi ngayin xi vinchin jyë rë cha ne, cuinduvín hisca nguehe xcun ngayun. <sup>8</sup> Hora xi chjuhuntuhun rë cha ne, ngayun suvun ni sacú nuju cjuaquixi tsëhë yëjë ni jyë xi vinchin tsëhë cha. —Cuatjin cavinchajyë Tértulo.

<sup>9</sup> Yëjë xuta tjë rë Israel xi cojo siu jan ne, hacuaha cachja me xi cuatjin jain.

### *Casua Pablo cjuaquixi rë me xcun Félix*

<sup>10</sup> Hane hora xi casahmitsja me xi matitjun cojo Pablo xi cuichja me ne, Pablo ne, cuitjin cachja me:

—Ngayun ne, ha hvë xi jemu tsëë chjuhunchuvun xuta nación naha tsëhë jyë rë me. Vëhë xi ngahan ne, cojo yëjë ni cjuasua ne, suá cjuaquixi naha cojo nuju. <sup>11</sup> Sa xi chjingen-gunsun suvun ne, cuma sacú nuju cjuaquixi ta ngahan ne, sehe tjin rë tejó nixtin xi cëjë Jerusalén xi cjuahárcun Nina. <sup>12</sup> Peru casacuintsjaain ná me xi tivisiajmeccjen o sa tisuá suë rë cjuatacun rë xuta, sa cahntsua yungun xi matitjun, sa cahntsua tu jarë ni yungun langa, o sa jingujyë ni ngajñi nandya. <sup>13</sup> Hacuaha hisca cumaji tsinguixi me xi cjuaquixi jain tsëhë jyë xi vinchá me tsahan quihndë. <sup>14</sup> Peru ngu nga ne, nguehe cuichjá cojo nuju cjuaquixi ta ngahan ne, hatuxa fahárcun jain Nina rë xutachanga naha, sacuatjin faharcun xuta xi hincha ndyá xi chja me xi cuicun vihi xi ngu ndiya

ndacha. Hacuaha macjain ná yějē ni cjuā tsēhē ley rē Moisés cojo yějē cjuā xi catsihindu profeta. <sup>15</sup> Hacuaha vétahacácun Nina sacuatjin vetahacacun me xi cuicun vi xi nima ne, cuya cjuahñu, sa tyjahi o sa xi hacuiin tyjahi cjuatacun rē. <sup>16</sup> Vēhē xi ngahan ne, yějē ni hora ne, sahme nguujyē xi tyjahi cjuatacun naha xi cuma rē Nina cojo xi cuma rē xuta.

<sup>17</sup> Hane xi ha jemu cavatju nixtin ne, cavúya candu-vatjēnguē xuta naha, yahá tujún xi cuisécoo rē me hacuaha suá cjuatjo xi cjue xcun Nina. <sup>18</sup> Hane xi cuatjin canduva ne, me xi cuicun vi ne, cavēē ná me ngajan yungun xi matitjun, tyjahi ngahan sacuatjin xi ha xcusun ni. Hacuaha hacuiin jemu cjin xuta siu me cojo ná hacuaha tsajin ngu suē jyē xi tijima. <sup>19</sup> Peru siu ngujo xuta tjē rē Israel xi canduva me tsēhē distritu Asia. Me xi cuacun vē xi sa tjin mé jyē meje cuincha me tsahan ne, catinduva catincha me jyē naha nguehe xcun ngayun. <sup>20</sup> O sa tsajin ne, suvá me xi cuicun vi catichja me mé cjuatsehen naha casacu rē me, hya xi cavisécun xcun xutaxa rē yungun ni. <sup>21</sup> Ngu tu tu ni cjuā xi cajindáya cachjá hya xi sécun ngajñi rē me ne, cuitjin cachjá: “Ngatsē rē xi macjain ná xi nima ne, cuya cjuahñu ne, vēhē xi tichjahachuva ná quihndē xcun ngayun.” Cuatjin cachjá. —Cjuā vēhē xi cachja Pablo xcun Félix, me xi matitjun.

<sup>22</sup> Hya xi camá ne, tsēhē xi ha vēē ndaja Félix cjuā tsēhē Ndiya Xatsē ne, xi cuejñavasen me cjuacjintacun vēhē ne, cuitjin cachja me:

—Hya xi cjuehe Capitán Lisias ne, sehe sahmechehen cjuacjintacun nuju vi. —Cuatjin cachja me. <sup>23</sup> Hane sehe cavitexa me sindadu rē me xi cuetjo cha Pablo, peru sahmi cha cjuandaja ne, hacuiin cuitijaya rē cha xuta rē Pablo xi cjue cjuahacuenda rē me.

### *Cavisiajmi Pablo cojo Félix cojo Drusila*

<sup>24</sup> Hane xi cavatju ngujo nixtin ne, cavuya cafehe Félix, xi quiji me ngu nangui. Cafehe me cojo Drusila, chjuun rē me, ngu chjuun xuta tjē rē Israel. Hya xi camá ne, catsingatju me quiji chjahá rē Pablo, sehe cavisijñuju me cjuā xi cachja Pablo tsēhē hacutjin xi cumangutacuun cojo Jesucristu. <sup>25</sup> Jinguyējē rē xi tichja Pablo tsēhē ngu cjuatacun tyjahi, tsēhē ngu xahasen tyjahi, cojo tsēhē nixtin xi tsichuva Nina xuta tsēhē jyē rē me ne, Félix ne, catsacjun me camá, sehe cachja me cojo Pablo cuitjin:

—Quihndē ne, cuma cjuihin. Hane hya xi cumahya ná ne, sehe squindáya nga ri. —Cuatjin cachja me.

<sup>26</sup> Peru hacuaha tsingatahacacun me sa xi sua Pablo me tujún. Vēhē xi jemu cjin ndiya cajindaya me Pablo, cavisiajmi me cojo.

<sup>27</sup> Xi cavatju jo nu ne, cavetju Félix tséhë xcun xa rë me, hane cavisehen nga ngu cahndë rë me, ngu me xi hmí rë Porcio Festo. Peru tséhë xi Félix ne, meje sahmi me cjuandaja cojo xuta tjë rë Israel ne, caseya cuaha Pablo ndavaya.

## 25

### *Cafehya Pablo xi cuma me consina tsja César*

<sup>1</sup> Hya xi camá ne, cafehe Festo xi cjuahaxa me ngajan Cesarea. Hane xi cafë jyan nixtin ne, cavetju me quiji me Jerusalén. <sup>2</sup> Hane xi cafehe Festo ngajan Jerusalén ne, nahmi xi matitjun cojo me xi matitjun tséhë ngajñi rë xuta tjë rë Israel ne, casua me camachaya rë Festo tséhë jyë xi vincha me tséhë Pablo. <sup>3</sup> Hane cafehya me favor xi tsingatju Festo cjue chjahá rë Pablo xi cjue me ngajan Jerusalén. Cuatjin meje rë me xi cuma ta, tséhë xi ha cavisiajmichihin me xi tsiquehen me Pablo ngajan ndiya. <sup>4</sup> Ngajan xi Festo ne, cachja me ta Pablo ne, tacunñihi me ngajan Cesarea, hacuaha suvá Festo ne, ha cjue xati me ngajan. <sup>5</sup> Hacuaha cachja sa me cuitjin:

—Catji xutaxa rë yungun nuju cojo ná, hane sa xi tjin mé jyë rë cha ne, ngajan catincha me jyë rë cha cojo ná. —Cuatjin cachja me.

<sup>6</sup> Hya xi camá ne, cavejña sa Festo ngajan Jerusalén sacuaha jyin o sa të nixtin, sehe cafe me Cesarea. Hane camá nchujun tséhë nixtin xi cafehe me jan ne, quiji me cavéjña me xcun xa rë me, sehe cavitexa me cjue chjahá rë Pablo. <sup>7</sup> Hane xi cafehe Pablo ne, quiji caxinchacunndee xuta tjë rë Israel xi canduva tséhë Jerusalén jan tjehen rë me, hane jemu cjín xcusun jyë rë Pablo xi cavincha me, peru hisca camaji catsinguixi me xi cjuaquixi jain. <sup>8</sup> Hane Pablo ne, xi casua me cjuaquixi rë me ne, cuitjin cachja me:

—Tsajin camahani mé jyë xi casahme, hacuiin condra rë ley niji ngayin xuta tjë rë Israel ne, hacuiin condra rë yungun xi matitjun tsijin ne, hacuiin condra rë César, me xi matitjun tsajan. —Cuatjin cachja Pablo.

<sup>9</sup> Hane xi meje sahmi Festo cjuandaja cojo xuta tjë rë Israel ne, cuitjin cafinenguise me Pablo:

—¿Há meje cuihin Jerusalén, cojo sa xi ngajan tsichúva ri cojo jyë riji vi? —Cuatjin cafinenguise me.

<sup>10</sup> Ngajan xi Pablo ne, cuitjin cafayangui me:

—Ha ndihyavasen rë César, me xi matitjun camahani, sécun, hane ha nguehe xi meje rë xi chjahachuva ná cojo jyë naha. Xuta tjë rë Israel ne, tsajin camahani mé xi choho sahme cojo rë me. Ngayun ne, ha ndaja hyun. <sup>11</sup> Sa xi tsejen ta casahme ngu xcusun xi vechú chuva rë xi cueya ne, tsingatehen xi cueya. Peru sa xi tsajin cjuaquixi tséhë hisca ngu jyë xi vincha

me tsahan ne, tsajin yo xi cuma sahmi ná entregadu tsja xuta xi cuacun vë. Ngahan ne, féhya nuju xi nihñu ná consina tsja César, me xi matitjun camahani. —Cuatjin cafayangui me.

<sup>12</sup> Ngajan xi Festo ne, xi cavisiajmicjín me cojo yějē me xi visecoo rē me ne, sehe cachja me cuitjin cojo Pablo:

—Cachjahye xi sahme ri consina tsja César ne, tsja César tsingátju ri. —Cuatjin cachja Festo.

### *Cavisehen Pablo xcun Agripa*

<sup>13</sup> Hane xi cavatju ngujo nixtin jan ne, ngu me xi matitjun tséhē jingu sa distritu, me xi hmí Agripa ne, cafehe me Cesarea cojo Berenice na xicjin me, xi sua me ngu nina Festo.

<sup>14</sup> Hane tséhē xi caviyuju me ngujo nixtin jan ne, cachja Festo cojo rē me tséhē cjuacjintacun xi tacun tsja me tséhē Pablo. Cuitjin cachja me:

—Nguehe ne, tacunñihi ngu cha xi cavejñavasen Félix cjuacjintacun rē. <sup>15</sup> Hya xi cējē Jerusalén ne, nahmi xi matitjun cojo xuta changá tséhē xuta tjē rē Israel ne, casua me camachaya ná tséhē cha vëhē, hacuaha cafehya me xi cuichjá xi cuma cha castigu. <sup>16</sup> Peru ngahan ne, cachjá cojo rē me ta ngayin xuta Roma ne, tsajin niji xcusun xi nihñi castigu ngu xuta xi hincha jyé rē me jinguyējē rē xi cjēē cuisehen me xcun cojo xcun cojo me xi vincha jyé rē me, hacuaha sacú rē me cahndé xi sua me cjuaquixi rē me tséhē jyé xi hincha tséhē me. <sup>17</sup> Hane hya xi cafehe yějē xuta xi cuacun vë nuehe ne, catsichajan hora ta xi tu camá nchujun jan ne, cējē ndihyavasen ne, catsingatju quiji chjahá rē cha. <sup>18</sup> Hane xi caxinchacun xuta xi cuacun jan cachja me ne, hisca ngu jyé jyé sacuatjin tsingátaha cáacun ne, cavinchaain me tséhē cha ta, <sup>19</sup> suvá ni cjua tséhē xcusun rē yungun rē me xi casahmichiin xu cha, cojo cjua tséhē ngu nima xi hmí rē Jesús, xi chja cha ta tacun quicun. <sup>20</sup> Peru ngahan ne, casacuinyiin ná hacutjin sacú ná cjuaquixi tséhē cjuacjintacun vëhē ne, cavinenguësē rē cha sa xi meje cjue cha Jerusalén hane ngajan chjahachuva rē cha tséhē cjuacjintacun xi yaha rē cha. <sup>21</sup> Peru tséhē xi cafehya cha xi seyañihi sa cha hisca xi suvá me xi matitjun camahani tsichuva me cjuacjintacun rē cha ne, cavitéxa xi quiji caseyañihi sa cha hisca hya xi cuma tsingátju cha tsja me. —Cuatjin cachja Festo.

<sup>22</sup> Ngajan xi Agripa ne, cuitjin cachja me cojo Festo:

—Ngahan ne, hacuaha catsingátahacácun xi cuisñujú cjua rē cha xi cuajyihí vë. —Cuatjin cachja me.

Hane Festo ne, cuitjin cafayangui me:

—Sa cuatjin ne, nchujun ni cuisñuju cjua rē cha. —Cuatjin cafayangui me.



<sup>23</sup> Hane xi camá nchujun jan ne, ngu cjuandya jyë tjin xi cafehe Agripa cojo Berenice. Hane quiji cavisehentangun me ndihyavasen cojo yëjë capitán cojo yëjë xuta xi matitjun tsëhë nandya jan. Sehe cavitexa Festo quiji chjahá rë Pablo. <sup>24</sup> Hane xi cafehe Pablo ne, sehe cachja Festo cuitjin:

—Ngayun Agripa, cojo ngayujun ni xi tjin tangun ngayaan nguehe ne, nguehe tacun cha vihi xi yëjë xuta tjë rë Israel ne, cavinchajyë me cha cojo ná ngajan Jerusalén, hacuaha cavinchajyë me cha hisca nguehe. Jindaya me chja me ta ha quihndë mijí rë xi cuejña sa cha cjuahñu. <sup>25</sup> Peru ngahan ne, casacuiin ná hisca ngu xcusun xi casahmi cha xi vechú chuva rë xi cueya cha. Hane xi cafehya suvá cha xi cuma cha consina tsja me xi matitjun camahani ne, cavejñá cáacun xi tsingátju cha. <sup>26</sup> Peru tsajin ngu cjua xi cuma tsihindu rë nai naha, ¿há vihi ne, há vëhë casahmi cha? Vëhë xi cavitéxa xi cuisehen cha xcun ngayun, Agripa, cojo sa xi cjuë chjahantahan rë cha ne, sacú ná cjua xi tsihindu. <sup>27</sup> Xi má ná ne, tsajin ná cjuatacun sa xi tsingátju ngu presu hacuaha cuichjaan mé jyë xi caxincha tsëhë. —Cuatjin cachja Festo.

## 26

### *Casua Pablo cjuaquixi rë me xcun Agripa*

<sup>1</sup> Hya xi camá ne, cuitjin cachja Agripa cojo Pablo:

—Quihndë ne, tjin cahndë xi cuinoje ngatsë riji. —Cuatjin cachja me.

Ngajan xi Pablo ne, catsiquijin me tsja me, sehe casua me cjuaquixi rë me cuitjin:

<sup>2</sup> —Agripa, ngayun xi matitjun ngayun ne, jemu ndaja tsahan xi xcun ngayun suá cjuaquixi naha quihndë tsëhë yëjë jyë xi vinda xuta tjë rë Israel tsahan. <sup>3</sup> Jemu ndaja tsahan ta, tsëhë xi ngayun ne, ha hyun yëjë xcusun naja cojo cjuacjintacun naja ngayaan xuta tjë rë Israel. Vëhë xi nihñu cjuandaja ne, nihñu jyë tacún xi cuisñuju ngujo cjua naha.

### *Xcusun changá rë Pablo*

<sup>4</sup> Quihndë ne, yëjë xuta tjë rë Israel ne, vëë me hacutjin xcusun naha hisca cjua lihndi naha, hya xi cavitejña nangui naha cojo hya xi cavitejña Jerusalén. <sup>5</sup> Hacuaha, sa xi meje cuichja me cojo nuju ne, cuma cuichja me ta ha vëë me xi ngahan ne, hatuxa xuta fariseo ngahan, xuta xi chinchihin tjengui me ndiya rë Nina naja. <sup>6</sup> Quihndë ne, nguehe sécun tichjaháchuva ná cojo cjuatacun naha ngatsë rë xi vétahacácun cjua xi cachja Nina cojo xutachanga naja. <sup>7</sup> Ngayejen ni xi tjë rë tejó xutachanga naja ne, vetahantacun xi cuechuntahan cjua vëhë. Vëhë xi cojo yëjë ni xahasen naja ne, chjahanrcun Nina nixtin nixten. Hane tsëhë xi vetahacácun cjua vëhë ne,

vêhë xi vinchajyë ná xuta tjë rë Israel. <sup>8</sup> Ngayujun ni ne, ¿mé má macjaain nuju xi Nina ne, tsicuya me nima cjuahñu?

*Pablo ne, catsujyihya tjengui me cojo cjuahngatacun xuta ladu rë Nina*

<sup>9</sup> Titjun ne, ngahan ne, catsingátahacácun xi jemu cjín xcusun meje rë xi sahme condra tsëhë Jesús, xuta Nasaret. <sup>10</sup> Hane cuatjin casahme ngajan Jerusalén. Ngahan ne, jemu cjín xuta ladu rë Nina cavinchá me ndavaya ta, tsëhë xi nahmi xi matitjun casuaxa ná me xi cuatjin casahme. Hane hya xi cavitexa xutaxa rë xi cueya xuta ladu rë Nina xi cuacun jan ne, cojo ngahan cachjá xi ndatjin. <sup>11</sup> Jemu cjín ndiya cëjë yëjë yungun naja, cavitéxa xi cuma xuta castigu, hacuaha jemu casahme ngahñu xi choho cuichja me tsëhë Jesús. Tjemu camacjan ná cojo rë me, hacuaha catsujyëhëya tjënguë me cojo cjuahngatacun hisca cojo jingu sa nandya rë xutaxín.

*Cachja nga Pablo hacutjin camá xi cavisehen me ladu rë Jesús*

<sup>12</sup> Ngayun Agripa, ngu nixtin jan ne, tifë Damasco xi sahme cjuahngatacun jan, yahá xa xi ha casua ná nahmi xi matitjun. <sup>13</sup> Hane ndiya jan ne, sacuaha chuva rë nchisen ne, cahvë ngu ndihi xi canduva ngahnga, xi hitsë sa hñu ndavá rë xi cuma rë ndavá rë tsuhi, xi cavaja rë hasen rë jingundee ni hiscan tifë cojo me xi tifë cojo. <sup>14</sup> Hane xi ha caticjin ngayijin ni ne, ngahan ne, cahndë ngu cjuá xi cachja cojo ná hne hebreo, cuitjin cachja: “Saulo, Saulo, ¿mé má cuatjin nujihiye tjengui ná cojo cjuahngatacun? Sacuahatjin tjin rë chu ndyaja tjin ri, ta chu vë ne, tsun chu nahñu quicha nahya ne, vanguihmu suva chu yojo ru hya xi vêhë hñu chu yojo ru xi vihndiin chu. Hane cuanitjin ni tjin ri, ye.” Cuatjin cachja cjuá jan. <sup>15</sup> Ngajan xi ngahan ne, cuitjin cavinenguësë: “¿Yo ngayun, Tatá?” Cuatjin cavinenguësë. Hane Nai naja ne, cuitjin cafayangui me: “Ngahan ne, Jesús ngahan, xi nujihiye tjengui ná cojo cjuahngatacun. <sup>16</sup> Tisatjinhngue, tisechin ta, tsëhë xi canduvá tjënguë ri cojo sa xi suáxa ri xi cuisecuee ná hacuaha cuinoje cojo xuta xi cuitjin cahye ná, hacuaha cuinoje cojo xuta hacutjin camá hya xi ha canduvá tjënguë nga ri ngujo ndiya. <sup>17</sup> Ngahan cuáxëtjë ri tsëhë xuta tjë rë Israel. Hacuaha cuáxëtjë ri tsëhë xutaxín. Tsingátju ri ngajñi rë xuta xi cuacun vë, <sup>18</sup> cojo sa xi choxehe cjuatacun rë me, sehe cuetjuxin me tsëhë cjuatsehen, hane cuisehen me ndiya rë cjuandaja, cuetjuxin me tsëhë ladu rë Satanás hane cuisehen me ladu rë Nina. Choxehe cjuatacun rë me, sehe sacú rë me cjuaninchataha tsëhë jyë rë me, hacuaha

cuissehen me ladu rë xuta xi ha camá tsëhë Nina me ngatsë rë xi camanguacacun me cojo ná.” Cuatjin cafayangui Nai naja.

*Cachja Pablo tsëhë xa xi sahmi me*

<sup>19</sup> Ngayun Agripa, ngahan ne, hatuxa cahndë tsëhë cjuaxi cachja Jesús hya xi canduvatjengui ná me xi canduva me tsëhë ngahnga. <sup>20</sup> Tjun tjun ne, cachjá cojo xuta ngajan Damasco, sehe cachjá cojo xuta ngajan Jerusalén cojo jingujyë ni nación Israel, hisca cojo xutaxín. Cachjá cojo rë me xi tsindeya me cjuatacun rë me hacuaha cuisehen me ladu rë Nina. Hacuaha cachjá cojo rë me xi catisahmi me cjuandaja xi tsingacun xi catsindeya jain me cjuatacun rë me. <sup>21</sup> Ngatsë rë vëhë xi cafaha ná xuta tjë rë Israel ngajan yungun xi matitjun hisca casahmi me cjuandya xi tsiquehen ná me. <sup>22</sup> Peru Nina ne, visecoo ná me, vëhë xi tifëxcun hisca quihndë, tichjá cojo xuta sa quihndi sa changá me. Tichjá suvá cjuaxi cachja profeta cojo cjuaxi cachja Moisés tsëhë yëjë xcusun xi sehe cuetjucaa. <sup>23</sup> Cachja me xi cuacun vë xi Cristu ne, Me xi Tsingatju Nina ne, tjin rë me xi cueya me, hacuaha tjin rë me xi tjun tjun me cuya me cjuahñu, sehe sua me cumachaya rë xuta tjë rë Israel cojo xutaxín tsëhë xi cuaxëtje Nina xuta xi cuacun vë. —Cuatjin cachja Pablo.

*Pablo ne, meje rë me xi cjuijnecacun Agripa ne, cumacjain rë me xi cavuya cjuahñu rë Jesús*

<sup>24</sup> Hane xi cuatjin cachja Pablo xi vaxëtje me yojo rë me ne, cavisehenjñi Festo cojo cjuaxi rë me, cachjahñu me cuitjin:

—¡Sca ri, Pablo! ¡Tsëhë xi jercu chutaye ne, vëhë sahmi sca rë cjuatacun riji! —Cuatjin cachja Festo.

<sup>25</sup> Ngajan xi Pablo ne, cuitjin cafayangui me:

—Hacuiin sca ná, ngayun Festo. Ngahan ne, tichjá cjuaxi cjuaquixi. <sup>26</sup> Agripa, me xi matitjun vë ne, hacuaha ndaja vë me cjuaxi vihi. Vëhë xi tsacjuun xi chjá cojo rë me. Xi má ná ne, tsajin ngu cjuaxi cuicun vi xi hvíin me ta, tsëhë xi xcusun vihi ne, hacuiin ngu cahncun camá. <sup>27</sup> Ngayun Agripa, ¿há macjain nuju cjuaxi catsihindu profeta? Ha hvë ta macjain nuju. —Cuatjin cafayangui Pablo.

<sup>28</sup> Ngajan xi Agripa ne, cuitjin cachja me cojo Pablo:

—Cojo hitsë cjuaxi canoje vë ne, meje ri xi cuisehen ladu rë Cristu. —Cuatjin cachja me.

<sup>29</sup> Hane Pablo ne, cuitjin cafayangui me:

—Nina meje rë me xi há hitsë o há cjín cjuaxi cuichjá ne, hacuiin suvun ni ta cojo yëjë me xi tivisiñuju cjuaxi tichjá quihndë ne, cuma me sacuaha ngahan, peru hacuiin cojo cadena vihi. —Cuatjin cafayangui me.

<sup>30</sup> Hya xi camá ne, cavisatjenhnga Agripa, me xi matitjun, cojo Festo, hacuaha cojo sa Berenice cojo yějē me xi caviyujutangun me cojo, cavisatjenhnga me. <sup>31</sup> Sehe quijixin me, cachja me cojo xingu xingu me cuitjin:

—Cha xi cuajyihi vë ne, tsajin mé sahmi cha xi vechú chuva rë xi cueya cha o sa xi cjue cha ndavaya. —Cuatjin cachja me.

<sup>32</sup> Sehe ngajan xi Agripa ne, cachja me cojo Festo cuitjin:

—Cha xi cuajyihi vë ne, sá tsajin xi cafehya cha xi cuma cha consina xcun me xi matitjun camahani ne, cuma nismi rë cha. —Cuatjin cachja me.

## 27

### *Cavetju Pablo xi cjue me Roma*

<sup>1</sup> Hane hya xi cavechú nixtin xi caveññacacun me xi matitjun jan xi cuanguin ngajan Italia ne, Pablo cojo yahnga sa presu jan ne, camá me entregadu tsja ngu capitán xi hmí rë Julio, capitán tséhë sindadu rë me xi matitjun camahani. <sup>2</sup> Hane xi cavisihin ngu barcu xi cavetju tséhë nandya Andramitio xi cjue jingunduju ni ndaya tséhë distritu Asia ne, sehe quiji barcu cojo niji. Hacuaha quiji cha Aristarco cojo niji, ngu cha Tesalónica tséhë distritu Macedonia. <sup>3</sup> Hane xi camá nchujun jan ne, cafehe barcu cojo niji nandya Sidón. Hane Julio ne, casahmi me cjuandaja cojo Pablo, casua me cahndë xi cjue Pablo ndava amigu rë me xi cjuahacuenda amigu jan xcusun xi ma chaja rë Pablo. <sup>4</sup> Hane xi quiji barcu cojo niji tséhë ngajan ne, cavatjin jingunduju ni taha ngaxtun Chipre, ngu rquí nangui xi vetjucaa xcun ndachacun, tséhë xi tjo ne, casuaain cahndë xi ngu quixi ni cjue barcu cojo niji. <sup>5</sup> Hane xi cavatjin xcun ndachacun quixi rë distritu Cilicia cojo distritu Panfilia ne, cafihin nandya Mira, ngajan distritu Licia. <sup>6</sup> Hane ngajan casacu rë capitán ngu barcu tséhë Alejandría xi cjue Italia. Sehe catsingusehen niji me barcu vëhë.

<sup>7</sup> Hane xi catsanguin tafi tafi ngujo nixtin sa ne, cojo jemu jyë cjuandya ne, cafihin quixi rë nandya Gnido. Hane tséhë xi casuaain tjo cahndë xi ngu quixi ni quiji barcu cojo niji ne, cavatjin taha ngaxtun Creta, quixi rë Salmón. <sup>8</sup> Handasa jemu chja cavatjin camá, peru quiji barcu cojo niji tafi tafi hisca xi cafihin ngu cahndë xi hmí rë Cahndë Ndajyihi, tiña nandya Lasea.

<sup>9</sup> Jemu tivatju nixtin, hacuaha jemu tsavi xi cjue barcu xcun nandá, tséhë xi camatiña chan hnchan. Vëhë xi Pablo ne, cachja me cojo xuta jan cuitjin:

<sup>10</sup> —Ngayujun ni ne, nguehe cuichjá cojo nuju ta vutsején ne, xi tivanguen vi ne, jemu tsavi, jemu jyë nichajan tséhë

chaha cojo tséhë barcu, hacuaha hisca tjin yahnga ngayaan xi chajá yaan. —Cuatjin cachja me.

<sup>11</sup> Peru capitán jan ne, hitsë sa casahmicuenda me cjua xi cachja cha xi cjuicojo barcu jan xi cuma rë cjua xi cachja Pablo. <sup>12</sup> Hane tséhë xi cahndë xi tacun barcu jan ne, machjiriin xi ngajan cuejña barcu nixtin rë chan hnchan, vëhë xi hitsë sa cjín xuta xi cachja me xi cuetjuxin ni barcu cojo rë me tséhë ngajan tuxa ma sa xi cuma cuechú me hisca Fenice, ngu nandya ngajan Creta, xi ndatjin cahndë tacun, hane ngajan cuma cuiyuju me yëjë nixtin rë chan hnchan.

*Tjo hñu xi cavanga ngajan xcun ndachacun*

<sup>13</sup> Hya xi camá ne, cavetsihin cavanga ngu tjo jeya jeya ni xi canduva táha ladu xi ndatjin. Sehe ngajan xi xi má rë me ne, cuma sahmi me sacuatjin xi ha catsingatahacacun me. Vëhë xi cavetju me quiji me, ndaya ndaya rë Creta. <sup>14</sup> Peru sehe tu hitsë cjui barcu jan ne, canduva ngu tjo hñu ladu xi choho tjin, <sup>15</sup> catsivaha rë barcu. Hane tséhë xi maji fi barcu taha hiscan nduva tjo ne, catihin cahndë quiji barcu hacutjin xi cjui tjo. <sup>16</sup> Hane xi cavatjin taha ngaxtun ngu rqúí lihndi nangui quixí xi hmí rë Claudia hiscan xi yiin cjuachan vanga tjo ne, cojo chja ne, peru camá cachjihin barcu lihndi xi tjengui jan, <sup>17</sup> sehe cachjuvinniji caveyín cahntsua barcu jyë. Sehe ngajan xi cha xi cjuicojo barcu jan ne, camá catsihñuhñu cha barcu jyë. Hane tséhë xi tsacjun me xi cjuecojo tjo jan barcu ngu cahndë chojyihí hiscan xi jemu tsavi xi cjue barcu ne, catsitujne me tsjian xi faha rë tjo, casua me cahndë quiji barcu hacutjin cjui tjo. <sup>18</sup> Peru tséhë xi quijinduju sa cavanga tjo hñu jan ne, xi camá nchujun jan ne, cavetsihin cacandiya me chaha xi hinchá barcu jan ngajñi ndachacun. <sup>19</sup> Hane xi camá nguini, cojo tsja ni me, cafaha me yëjë ni xcusun xi tséhë barcu jan, cavetsihin cacandiya me ngajñi ndachacun. <sup>20</sup> Hane xi ha jemu cjín nixtin xi cahyiin tsuhi cahyiin niñu hacuaha tjo jan ne, cjuinduju sa tivanga jercu tu hñu camahani ne, ngajan cafë cjuetacun xi cuetjintjin.

<sup>21</sup> Hane tséhë xi ha jemu cjín nixtin xi cjëë sinë xuta jan niñu ne, cavetjujñi Pablo ngajñi rë me, cachja me cuitjin:

—Ngayujun ni ne, nguehe cuichjá cojo nuju ta hitsë sa ndatjin sa xi cavetuhun rcun cjua xi cachjá cojo nuju hane cavetjuun ni tséhë Creta. Tsajin mé cjuañihí xi cuitjin cuatjun cuma hacuaha tsajin mé xi cuitjin nichajan. <sup>22</sup> Quihndë ne, tuhun cjuetacun xahasen nuju ta hisca xi ngu ngayun ne, chajin ngayun. Xi chajá ne, barcu. <sup>23</sup> Hvë xi cuatjin cuma ta, nguchjin ne, cafehe ngu ángel rë Nina xi Nai naha hacuaha xi fahárcun. <sup>24</sup> Hane cachja cojo ná cuitjin: “Xi carcuin Pablo. Hatuxa tjin ri xi cuechi xcun César, me xi matitjun camahani.

Hacuaha Nina ne, sahmi me cjuandaja cojo ri xi cuetjutje yějě xuta xi cjui cojo ri.” Cuatjin cachja ángel cojo ná. <sup>25</sup> Věhě xi tuhun cjuetacun xahasen nuju ngayujun ni ta, tsěhě xi ngahan ne, mangucácun cojo Nina, hane hatuxa cuatjin cuma sacuatjin cachja ángel cojo ná. <sup>26</sup> Peru tjin rě xi scandi naja tjo jan xcun ngu rquí nangui quixí. —Cuatjin cachja Pablo.

<sup>27</sup> Xi cavatju teñuju nguixun xi cuatjin cjui nguehe cjui ngajan tjo cojo barcu xi nechinyin xcun ndachacun xi hmí rě Adriático ne, sacuaaha chuva rě vassen nixten ne, catsingata-hacacun cha xi cjuicojo barcu jan xi ha jima tiña barcu tsěhě nangui quixí. <sup>28</sup> Hane catsichuva cha hacutjin nungun nandá hiscan quisun barcu, hane casacuse rě cha xi can tyjuhun ngu metru nungun nandá jan. Hane xi quiji sa barcu hitsě ni nguvan ne, catsichuva nga cha nandá, hane can yatu metru nungun nandá jan. <sup>29</sup> Hane tsěhě xi tsacjun cha xi satěcoo barcu jan cojo ngu naxi ne, cacandiya cha ñuju quicha hai xi machjirěhě xi cuiyujuhñu barcu ngajñi nandá xi tsuvahñu rě, hacuaha jercu cafehya rě cha Nina xi sahasen sanii. <sup>30</sup> Hya xi camá ne, yahnga cha xi cjuicojo barcu jan ne, meje cuetjuxin cha tsěhě barcu xi cuetjutje cha. Věhě xi catsitujne cha barcu lihndi jan xcun ndachacun, sacuaaha xi meje scandiya sa cha quicha ngajñi nandá taha xcun barcu. <sup>31</sup> Sehe ngajan xi Pablo ne, cachja me cojo capitán cojo sindadu xi yahnga jan cuitjin:

—Sa xi cuiyijin cha xi cuacun vė cahntsua barcu jyě ne, ngayun ne, cumaji cuetjuntjun. —Cuatjin cachja me.

<sup>32</sup> Ngajan xi sindadu jan ne, cavatě cha nahñu xi yaha rě barcu lihndi jan, sehe catsismi cha.

<sup>33</sup> Hya xi ha tiña sahasen ne, cachja Pablo cojo yějě xuta jan xi sině me niñu, cuitjin cachja me:

—Ha quihndě teñuju nixtin xi nechunyun rě mé xi cuatjuun cuma hacuaha hisca hitsě niñu cjěě xinu. <sup>34</sup> Věhě xi tichjá cojo nuju ta, xinu niñu. Xi cuatjin ne, scaa nuju cuetjuntjun ta hisca ngu ngayun ne, chajin hisca ngu tsjarcun. —Cuatjin cachja Pablo.

<sup>35</sup> Hane xi cafě cachja me cuatjin ne, cafaha me niñu ne, sehe casua me nacuechji rě Nina xcun yějě ni xuta jan. Hane xi cavatěcja me niñu jan ne, sehe cavetsihin cajině me. <sup>36</sup> Hya xi camá ne, yějě ni xuta jan ne, casacu rě me cjuetacun, hane hacuaha cojo me cajině me niñu. <sup>37</sup> Ngayijin ni xi nechinyin barcu jan ne, jo cientu cojo jyanchan tyjuhun ngu má ngayin. <sup>38</sup> Hane hya xi ha ndaja camá rě xahasen rě me xi cajině me niñu jan ne, cacandiya me trigu jan ngajñi ndachacun xi cuma nguinja sa barcu.

*Cavetsun barcu casahmi tjo*

<sup>39</sup> Hane xi casahasen ne, cavëë me ngu cahndë hiscan xi hvíin me jani jan. Peru hacuaha cavëë me ngu cahnchun xi jemu jyë tsumi jiña tjeheh rë. Hane caviyujucacun me xi sahmi me cjuandya xi barcu ne, ngajan cuechú. <sup>40</sup> Hya xi camá ne, cavatë me nahñu xi yaha rë quicha hai jan, sehe caxincha ni ngajan ngajñi nandá. Hacuaha cavëhëndaya me ya xi veyaquixi rë barcu hacutjin cjue. Hane xi catsiquijin me tsjian xi faha rë tjo jan ne, sehe cavetsihin quiji barcu jan quixi rë tsumi jan. <sup>41</sup> Peru xi cafehe barcu ngu cahndë hiscan tacun ngu naxi ngahma nandá ne, ngajan casatë. Hane taha xcun barcu jan ne, ngajan casetahahñu, ha quihndë camaji quiji. Peru taha ngaxtun barcu jan ne, jercu tivetsun tsëhë tsindyu rë nandá xi vaja rë.

<sup>42</sup> Hane sindadu jan ne, catsingatahacacun cha xi tsiquehen cha presu, sá tu cuatë presu jan nandá ne, cuanga. <sup>43</sup> Peru capitán jan ne, tsëhë xi meje cuaxëtje me Pablo ne, casuaain me cahndë xi sahmi sindadu jan hacutjin xi meje rë cha. Hya xi camá ne, cavitexa me yëjë ni xuta xi ma vatë nandá ne, tjun tjun me caticandiya me yojo rë me ngajñi nandá, catji me quixi rë tsumi jan. <sup>44</sup> Hane me xi yahnga xi maji vatë nandá jan ne, catjaha me ngu rquí yatë o sa ngu ya tsëhë barcu jan. Cuatjin camá xi ngayijin ni ne, cafhin nangui quixí, hacuaha cavetjintjin.

## 28

### *Cafehe Pablo ngajan Malta*

<sup>1</sup> Hane xi ha cavatju cavetjintjin ne, sehe casacu camachaya niji xi ngu rquí nangui xi vetjucaa xcun ndachacun jan ne, Malta hmí rë. <sup>2</sup> Hane xuta xi nangui rë jan ne, hacuiin hitsë cjuandaja casahmi me cojo niji. Cavejña me ngu ndava ndihi jyë ne, sehe cajindaya niji me ngayijin ni, tsëhë xi hacuaha cavetsihin cavaha tsi hane jemu hnchan. <sup>3</sup> Hane xi cafaha Pablo ngu tyjá chaquin quiji caviyujusun me xcun ndihi jan ne, tsëhë suë rë ndihi jan ne, vanga ngu yë cavetju chu ngajñi rë chaquin xi caviyujusun me jan, hane cafaha chu tsja me, hane catsismii chu ngutjen. <sup>4</sup> Hane xi cavëë xuta xi nangui rë jan xi tyjanguitaha cuaha yë jan tsja Pablo ne, sehe cachja me cojo xicjin me cuitjin:

—Ngu cha tsiquehen jain rë cha vi, vëhë xi handasa cavetjutje cha tsëhë ndachacun ne, peru nina ne, suaain me cahndë xi cuejña sa cha cjuahñu. —Cuatjin cachja xuta jan.

<sup>5</sup> Hane xi cavitsune Pablo tsja me ne, cjanenguiya chu ngajñi ndihi jan. Peru me vëhë ne, tsajin mé camá rë me xi cafaha chu me. <sup>6</sup> Xuta jan ne, xi má rë me ne, cuijin squee Pablo o sa xi tu ñahñu ne, cueya me. Peru xi ha jemu jyë hora

vutsejen xuta jan xi tsajin mé má rë Pablo ne, catsindeya me cjua rë me, hane sehe cavetsihin cachja me xi Pablo ne, ngu nina me.

<sup>7</sup> Hane tiña tsëhë cahndë jan ne, siutahá nangui rë me xi matitjun tsëhë nangui xi vetjucaa xcun ndachacun jan, me xi hmí rë Publio. Me vëhë cafahtsja niji me, hacuaha casahmi me cjuandaja xi casua niji me cahndë ndava me xi cavinechin jan jyan nixtin. <sup>8</sup> Hya xi camá ne, nahmi rë Publio jan ne, jiña me xi hmu rë me tsëhë chíhin suë cojo chíhin jni. Hane Pablo ne, quiji vutsejen me me, hane cafehya rë me Nina ngatsë rë xuta hmu rë jan. Hane xi cavisanetsja Pablo me ne, camandaja me. <sup>9</sup> Xi cavatju vëhë ne, hacuaha canduva tjengui yëjë sa xuta hmu rë tsëhë nangui vëhë Pablo ne, camandaja me. <sup>10</sup> Xuta jan ne, jemu casahmi me cjuandaja cojo niji, hane xi cavetjin catsanguin nga cojo barcu ne, casua me hacutjin xcusun xi machaja niji.

### *Cafehe Pablo ngajan Roma*

<sup>11</sup> Xi cavatju jyan sá ne, cavetjin catsanguin cojo ngu barcu xi cavéjña jan yëjë nixtin tsëhë chan hnchan. Barcu jan ne, nandya Alejandría canduva, hacuaha Nina Lihma hmí rë. <sup>12</sup> Hane xi catsanguin sa hitsë ne, cafihin nandya Siracusa, hane ngajan cuinechin jyan nixtin. <sup>13</sup> Hane xi cavetjin ngajan ne, quiji nduju sa barcu cojo niji ne, cafihin nandya Regio. Hane xi cafë ngu nixtin xi nechintihin jan ne, cavetsihin cavanga ngu tjo xi ndatjin cjuí, sehe quiji nga barcu cojo niji, hane xi camá nchujun ne, cafihin nandya Puteoli. <sup>14</sup> Hane xi cafihin jan ne, cavechintihin ngujo xuta ladu rë Jesús, hane cachja me xi cuinechintihin ngu totje cojo rë me jan. Hane ha cuatjin chuva vëhë ne, cavetjin Cesarea hane cafihin hisca Roma. <sup>15</sup> Hane xuta ladu rë Jesús xi siu ngajan Roma ne, xi camachaya rë me xi ha jima tiña ngayin ne, canduvatjengui niji me ndiya. Ngujo me ne, cafehe me hisca hiscan hmí rë Ndetsin Apio. Hane ngujo nga me ne, cafehe me hiscan hmí rë Jyan Cantina. Hane xi cavëë Pablo xuta jan ne, casua me nacuechji rë Nina, hacuaha casacu rë me cjuetacun. <sup>16</sup> Hane xi cafihin Roma ne, xutaxa rë jan ne, casua me cahndë xi cjuiin Pablo ndavaya hane cjue me ndava ngu xuta cuejña me, peru cojo ngu sindadu xi sahmi cuidadu xi hacuiin cuanga me.

### *Catsinguijnetaha Pablo cjua cojo xuta changá rë yungun*

<sup>17</sup> Hya xi camá ne, xi cafë jyan nixtin quitahá Pablo jan ne, casahmi tangun me xuta xi matitjun tsëhë ngajñi rë xuta tjë rë Israel. Hane xi camatangun xuta jan ne, sehe cachja Pablo cojo rë me cuitjin:



—Ngayujun ni ngayun xuta tjë rë Israel matsejen ne, nguehe cuichjá cojo nuju ta handasa tsajin mé casahme condra yëjë xuta naja o condra rë xcusun rë xutachanga naja ne, peru cafaha ná me, casahmi ná me entregadu tsja xutaxa rë Roma ngajan Jerusalén. <sup>18</sup> Hane xi cafhataha ná xutaxa rë jan ne, meje tsismi ná me, tsëhë xi tsajin jyë naha xi vechú chuva rë xi cueya. <sup>19</sup> Peru xi cachja xutaxa rë yungun naja xi ndajintjin xi cuma ndaya ngahan ne, casahmi ná ngujoyë xi caféhya xi cuma ngahan consina tsja César, me xi matitjun camahani. Cuatjin casahme, handasa tsajin mé jyë meje cuíncha tsëhë xuta naja. <sup>20</sup> Ngatsë rë cjuacjintacun vëhë ne, vëhë xi cachjá xi cuinduvun tjengun ná, cojo sa xi cuichjá cojo ngu ngujo cjua ta, tsëhë xi ngatsë rë me xi vetahantacun ngayejen ni ngayaan xuta tjë rë Israel ne, vëhë xi cuitjin tijnhñu ngahan vi. —Cuatjin cachja Pablo.

<sup>21</sup> Ngajan xi xuta xi cuacun jan ne, cuitjin cafayangui me:

—Peru ngayin ne, hisca ngu xujun xi chja condra nuju xi nduva tsëhë Jerusalén ne, cjëë chjihinntsin. Hacuaha tsajin hisca ngu xuta naja xi nduva me tsëhë ngajan xi choho chja me tsujun cojo niji. <sup>22</sup> Quihndë ne, meje cuisinji hacutjin fi cjuatacun nuju ta, tsëhë xi sacuaha cjuatacun vihi ne, hyin ta jingujyë ni ne, choho chja xuta tsëhë. —Cuatjin cafayangui xuta xi cuacun jan.

<sup>23</sup> Hya xi camá ne, cavejña xuta xi cuacun jan ngu nixtin xi cuya nga me. Hane xi cavuya me ne, hitsë sa jercu cjín me xi cafehe me hiscan tacun Pablo. Ngajan xi Pablo ne, cuaha nixtin cachja me cojo xuta jan tsëhë gobiernu xi sahmi Nina. Hacuaha casahmi Pablo ngahñu xi cumacjain rë yëjë xuta jan xi Jesús ne, me vëhë xi catsingatju Nina me, sacuatjin chja xujun rë Nina xi catsihindu Moisés cojo xi catsihindu profeta hatsëë nixtin. <sup>24</sup> Ngujo me ne, camacjain rë me cjua xi cachja Pablo, peru ngujo nga me ne, camacjaain rë me. <sup>25</sup> Hane tsëhë xi hacuín tangun camá cjuatacun rë me ne, cavetju me cafe me. Peru chaja sa xi cjue me ne, Pablo ne, cachja me cuitjin:

—Jemu quixi cjua rë Hasen rë Nina xi cachja profeta Isaías cojo xutachanga naja, cjua xi cachja cuitjin:

<sup>26</sup> Tihin tjengui xuta naha hane tinoje cojo rë me xi hatuxa cuihndë me, peru cuijni rcu me hisca hitsë. Hatuxa scuëë me, peru hvín me mé jan.

<sup>27</sup> Cuatjin cuma ta, tsëhë xi cjuatacun rë me ne, tichjá, tyjavañuju me cojo tuxcun me ne, cavechja me, sá tu scuëë me cojo tuxcun me hane cuihndë me cojo tyjavañuju me hacuaha cuijne rcu me cojo cjuatacun rë me, sehe cuya me ladu naha xi cuaxëtjë me.

Cuatjin cachja cjua jan. <sup>28</sup> Sa xi mijí cuisiniñuju ngayun sacuatjin camamiji cuisiniñuju xutachanga naja xi cuacun jan ne, nguehe suá cumachaya nuju ta Nina ne, cjua xi cuaxëtje me xuta ne, quihndë catsingatju me cjua vëhë tsëhë xutaxín. Me xi cuacun vë ne, cuisiniñuju me. —Cuatjin cachja Pablo.

<sup>29</sup> Hya xi camá ne, xuta tjë rë Israel xi cahndë me cjua rë Pablo ne, quiji cavetju me, tichja cjin me cojo xicjin. <sup>30</sup> Ngajan xi Pablo ne, jo nu jingu cavéjña me ndihya xi cafehya me cojo renta jan. Hane ngajan cafachatsja me xuta xi quiji tjengui rë me, <sup>31</sup> casua me camachaya rë xuta tsëhë gobiernu xi sahmi Nina, hacuaha cavicuya rë me xuta cjua xi chja tsëhë Nai naja Jesucristu. Hisca ngu quijiin cavatëcja tsëhë me xi cuatjin casahmi me.

## Xujun xi catsingatju San Pablo xi cafahatsja xuta Roma

<sup>1</sup> Ngahan, Pablo ne, visécoo rë Jesucristu sacuaha ngu mosu hndixahan rë me, hacuaha Nina cavaxijin ná me xi cuma ngahan apóstol, casuaxa ná me xi suá cumachaya rë xuta cjuandajyihi rë me. <sup>2</sup> Hane ha jemu hatsëë casahmi Nina xi profeta rë me ne, tsihindu me cjuandajyihi vë xcun xujun rë Nina. <sup>3-4</sup> Cjuandajyihi vë ne, hacui cjua xi sua machaya naja tsëhë Quihndi rë Nina, Nai naja Jesucristu. Hya xi catsin Jesucristu, sacuaha ngu xuta tjë rë David, catsin me. Peru Hasen rë Nina ne, jemu ndaja casua camachaya naja xi hatuxa Quihndi rë Nina me ta catsingacun naja hya xi cavuya me cjuahñu hya xi cavatju cahme me. <sup>5</sup> Hane ngatsë rë Jesucristu ne, casacu niji cjuandaja rë Nina xi camá ngayin apóstol, cojo sa xi cuisecuin rë xuta yëjë ni nangui, sehe cumangucacun me cojo Nina hacuaha cuihndë me tsëhë Nina. Hane xi cuatjin ne, cuma jyë cuma hnga Jesucristu. <sup>6</sup> Hacuaha cojo ngayujun ni xi xuta nanguixin ngayun ne, cavaxijin nuju Nina xi camá tsëhë Jesucristu ngayun.

<sup>7</sup> Ngahan ne, titsihíndu nuju ngayujun ni xi nechun ngajan nandya Roma, ngayujun ni xi hmucacun nuju Nina, ngayujun ni xi cavaxijin nuju me xi camá ngayun xuta rë me. Nina Nahmi naja cojo Nai naja Jesucristu ne, catisua nuju me cjuandaja cjuajeya.

### *Pablo ne, meje cjue me nandya Roma*

<sup>8</sup> Quihndë ne, hora xi sahme oración naha cojo Jesucristu ne, suá nacuechji rë Nina naha ngatsë nuju ngayujun ni ta jingu ni ladu ne, jimachaya rë xuta hacutjin xi mangutacún cojo Jesucristu. <sup>9</sup> Ngahan ne, nguñaja xahasen naha sahme xa rë Nina xi suá cumachaya rë xuta cjuandajyihi xi chja tsëhë Quihndi rë Nina. Hane vëë Nina jain xi hatuxa veyanangë nuju, <sup>10</sup> yëjë ni hora xi sahme oración naha. Féhya rë Nina xi sua me cahndë xi cuechú hora cuechú nixtin xi cuma cjuëtjengë nuju, sa xi cuatjin meje rë me. <sup>11</sup> Hatuxa meje cjuëtjengë nuju, cojo sa xi suá nuju ngu cjuandaja rë Nina. Sehe ngayun ne, hitsë sa ndaja cumangutacun cojo Jesucristu. <sup>12</sup> Cuma cuinújan ne, meje cjuëtjengë nuju, cojo sa xi tahan cjuasua xahasen naja xingu xingu ngayaan, ngatsë rë xi ndaja mangutacun xingu xingu ngayaan cojo Jesucristu.

<sup>13</sup> Ngayujun ni ne, meje ná xi cumachaya nuju ta jemu cjin ndiya cavejña cjuatacun naha xi cjuëtjengë nuju, peru hisca quihndë ne, camaji. Meje ná xi ngujo xuta nangui nuju

ne, cuisehen me ndiya rë Jesucristu ngatsë rë xi ngahan suá cumachaya rë me cjua xi yahá, sacuatjin xi ha camá jingu sa nangui. <sup>14</sup> Xi má na ne, hatuxa sahmi ná ngu jyë xi cuichjá cjua jan cojo yëjë ni xuta; sa xuta rcun, sa xuta yuma; o sa xuta vechu cjuatacun rë, sa xuta yuma hasen. <sup>15</sup> Vëhë xi hacuaha jemu meje cjuëtjengë nuju ngajan Roma, suá cumachaya rë xuta nangui nuju cjuandajyihî xi chja tsëhë Jesucristu.

*Cjuandajyihî xi sua Pablo cachaya rë xuta*

<sup>16</sup> Ngahan ne, ma savaain ná tsëhë cjuandajyihî xi chja tsëhë Jesucristu ta, tsëhë xi cjua vëhë ne, sua machaya rë xuta ta vaxëtje Nina yëjë ni xuta xi mangucacun cojo Jesucristu. Tjun tjun xuta Israel cuaxëtje me, peru hacuaha cuaxëtje me xutaxín. <sup>17</sup> Cjuandajyihî vëhë ne, sua machaya naja ta Nina ne, tsicjë me jyë xi quitjen, peru suvá ni hya xi mangutacun cojo Jesucristu. Hacuaha cuatjin chja ngu cjua xi camahindu xcun xujun rë Nina: “Xuta xi tsajin jyë rë me ngatsë rë xi mangucacun me cojo Nina ne, sacú rë me cjuahñu xatsë.” Cuatjin camahindu.

*Jyë xi tjin rë xuta ngasunhndë*

<sup>18</sup> Nina xi tacun me ngahnga ne, sua me machaya naja hacutjin jemu cjan rë me ngatsë rë xi faharcuain xuta me, cojo ngatsë rë yëjë ni cjuatsehen xi sahmi xuta. Hacuaha cojo cjuatsehen xi sahmi xuta jan ne, vetsa me cjua xi cjuaquixi. <sup>19</sup> Cjuatacun xi cuma cumachaya naja tsëhë Nina ne, hatuxa vëë xuta xi cuacun tsehen jan ta, tsëhë xi Nina ne, ha casua me camachaya rë xuta cjuatacun vëhë. <sup>20</sup> Nina ne, matsijin me; peru hisca nixtin xi catsindaja me ngasunhndë cojo hisca nixtin quihndë ne, matsejen ta hacui jain me xi Nina me hacuaha tjin rë me ngahñu xi tsajin nuju tsajin nixtin cjuë. Cuatjin ma vijne rcu tu yo ni xuta hya xi vutsejen me yëjë ni xcusun xi catsindaja Nina. Vëhë xi xuta xi cuacun tsehen jan ne, sacuiyiin rë me mé xi cuichja me hya xi sua me cjuaquixi rë me xcun Nina. <sup>21</sup> Handasa vëë xuta xi tacun jain Nina ne, peru casahmijyiin casahmihngaain me Nina, hacuaha hisca casuaain me nacuechji rë Nina. Vëhë xi camachjiriin cjuatacun rë me. Hacuaha cjuatacun yuma hasen rë me ne, camajñu tsëhë. <sup>22</sup> Chja suvá me xi jemu vechu cjuatacun rë me, peru ngajñi rë xi chja me cuatjin ne, hitsë sa ngarca cavuya me cojo cjuatacun rë me. <sup>23</sup> Hacuaha catsitjungui me Nina xi hatuxa jyë hnga me cojo cjua rë me, Nina xi hatuxa hmii me. Sehe cavetsihin cafaharcun xuta xi cuacun jan tu mé ni nina ndyojo xi catsindaja suvá me. Cafaharcun me xcusun rë xuta xi hatuxa hme me, cojo xcusun rë chu nisë, cojo xcusun rë chu yë, cojo jingu sa xcusun rë chu xi yahnga.

<sup>24</sup> Vêhë xi Nina ne, catsismicacun me xuta xi cuacun tsehen jan, cojo sa xi sahmi xuta cjuatsehen xi fehya rê xahasen tsehen xi tjin rê me. Hane casahmi xuta jan cjuatsehen cojo yojo rê me ngajñi rê me cojo xicjin me. <sup>25</sup> Catsitjungui me Nina xi cjuaquixi. Cafaharcun me nina ndyojo xi nina ndacha ni. Hacuaha cahndê rê xi cjuaharcun me Nina, cafaharcun me hacuaha casahmi cuidadu rê xcusun xi Nina casahmi me, Peru mameje jain xi chjaharcun rê Nina yějê ni nu yějê ni nixtin. Cuatjin jain.

<sup>26</sup> Vêhë xi Nina ne, catsismicacun me xuta xi cuacun tsehen jan, cojo sa xi cuma tsehen sa xahasen rê me. Hisca yachjin ne, catsitjungui ne xcusun xi ndatjin xi sacú xihin rê ne, hane casahmi na xcusun xi cuaaintjin. <sup>27</sup> Hacuaaintjin ni casahmi cha xi xihin; catsitjungui cha xcusun xi ndatjin xi sacu chjuun rê cha, hane jercu cavetju suê cha xi cuatjin meje sahmi cha cjuatsehen ngajñi rê cha cojo xicjin cha. Xihin cojo xihin cha casahmi cha cjuasava jan, hacuaha casacu rê cha jima ngu cha castigu xi cavangui xcusun tsehen xi casahmi cha jan.

<sup>28</sup> Xi má rê xuta xi cuacun tsehen jan ne, machjiriin xi tsinguitsjen me nina. Vêhë xi Nina ne, catsismicacun me xuta jan, cojo sa xi hatuxa cumachjiriin cjuatacun rê me, hacuaha sahmi me xcusun xi ndajintjin xi nihña. <sup>29</sup> Quitsê rê xahasen rê me cojo yějê ni cjuatsehen xi fehya xahasen rê me sacuaha xcusun vi: jemu choho tsingatahacacun me; ña quitsê rê xahasen rê me cojo cjuaxin; meje tsiquehen xicjin me; jemu meje scaanya me tu mé ni xcusun; jemu ndacha me; jemu tsehen me; jemu ndesu me; <sup>30</sup> choho chja me tsêhë xicjin me; choho vëë me Nina; jemu hnga cacun me; jemu xta me; vaxëndaja suvá me yojo rê me; tsindajaya me cjuatsehen; vihndiin me tsêhë xutacha rê me; <sup>31</sup> machjiriin cjuatacun rê me; sahmiichiin me ngu cjuaxi chja me; tsajin rê me cjuahmutacun; tsajin rê me cjuayumatacun. <sup>32</sup> Nina ne, cavitexa me xi yějê ni xuta xi cuatjin sahmi xcusun tsehen vë ne, hatuxa vechú chuva rê xi cueya me. Hane xuta xi cuacun tsehen jan ne, handasa ha vëë me xi cuatjin cavitexa Nina, peru sahmicuendaain me ta finduju me cojo cjuatsehen jan, hisca ndama rê me tsêhë xuta xi yahnga xi cuatjin sahmi.

## 2

*Nina ne, tsichuva me xuta cojo cjuatacun rê me hacutjin xi cjuaquixi*

<sup>1</sup> Tu yo ni ngayun xi nichuvun jingu sa xuta cojo cjuatacun rê me ne, sacuiyiin nuju mé xi cuinújun hya xi tuhun cjuaquixi nuju xcun Nina ta, tsêhë xi hora xi nichuvun xuta ne, cjuachojyihî xi sahmi ni me ne, ha xcusun vêhë ni nihña.

<sup>2</sup> Ha hyan ta xuta xi cuatjin sahmi xcusun tsehen vëhë ne, hya xi tsichuva Nina me cojo cjuatacun rë me ne, tsichuva me hacutjin xi cjuaquixi. <sup>3</sup> Peru ngayun xi nichuvun xuta xi cuatjin sahmi xcusun tsehen vëhë ne, ¿há má nuju xi cuatjuhnga ngayun xi tsichuvaain nuju Nina xi cojo ngayun nihñu xcusun tsehen vëhë? <sup>4</sup> O há tsajin ne, ¿há cuendaain nuju tsëhë cjuandaja xi sua nuju Nina? ¿Há cuendaain nuju xi Nina ne, jemu jyë cacun me cojo nuju? ¿Há hyuun xi cuatjin sahmi Nina cjuandaja cojo nuju, cojo sa xi nindeyun cjuatacun nuju? <sup>5</sup> Peru ngayun ne, jemu taja rcun, hatuxa mijí nindeyun cjuatacun nuju. Xi cuatjin nihñu ne, tiniñu xi jima cjan sa rë Nina cojo nuju, hisca xi cuechú nixtin xi Nina ne, jemu cuma cjan rë me hacuaha sua me cumachaya nuju hacutjin tsichuva nuju me cojo cjuaquixi. <sup>6</sup> Nina ne cuechji me xingu xingu xuta tu cutjin xcusun xi casahmi xuta jan. <sup>7</sup> Xuta xi scaa rë me sahmi me cjuandaja ngatsë rë xi meje rë me xi cuma yehe cuma hnga me, hacuaha meje rë me xi chuya rë Nina tsëhë me. Meje rë me xi cuechiin nixtin xi cueya me ne, me vëhë xi sua Nina me cjuahñu xatsë. <sup>8</sup> Peru xuta xi meje rë me xi suvá ni me xi ndaja tsëhë me, hacuaha vihndiin me tsëhë cjuaquixi ta suvá cjuatsehen yëjë ni xi sahmi me ne, me vëhë xi jemu cuma cjan camahani rë Nina cojo rë me. <sup>9</sup> Yëjë ni xuta xi sahmi cjuatsehen ne, sacú rë me cjuañihi, hisca sacuiin rë me chuya rë hacutjin cuaxëtje me yojo rë me. Tjun tjun xuta Israel cuatju me cuma cuatjin, peru hacuaha cojo xutaxín cuatjin cuatju me cuma. <sup>10</sup> Peru yëjë ni xuta xi sahmi cjuandaja ne, me vëhë xi jemu cuma yehe cuma hnga me, hacuaha jemu chuya rë Nina tsëhë me, hacuaha jemu sacú rë me cjuajeya. Me vëhë xi má xuta tjë rë Israel ne, tjun tjun cuatju me cuma cuatjin, peru hacuaha cojo xutaxín cuatju me cuma.

<sup>11</sup> Ta Nina ne, hatuxa quixi jain me cojo cjuatacun rë me xi tsichuva me yëjë ni xuta cojo cjuatacun rë. <sup>12</sup> Yëjë xuta xi tsajin rë me ley rë Moisés hacuaha sahmi me cjuatsehen ne, hacuiin ley vëhë vitexa mé castigu xi cuma me; peru hatuxa cuetjintjiin me. Hane yëjë xuta xi tjin rë me ley jan hacuaha sahmi me cjuatsehen ne, tsichuva Nina me tu cutjin xi vitexa ley vëhë. <sup>13</sup> Xuta xi tu visiñuju ni sacuatjin chja ley ne, hacuiin me vëhë xi tsajin jyë quitjen me xcun Nina ta xuta xi sahmi sacuatjin chja ley jan ne, me vëhë xi cuichja Nina ta tsajin jyë quitjen me. <sup>14</sup> Xutaxín xi tsajin rë me ley rë Moisés jan ne, hya xi sahmi me sacuatjin chja ley vëhë cojo cjuatacun rë suvá ni me ne, ngajan ma tsejen xi sacuaha xi me vëhë má me ley rë suvá ni me. <sup>15</sup> Xcusun xi sahmi me tsingacun naja xi cjua xi vitexa ley ne, ha hinchca cahntsua cjuatacun rë me. Ha

vëe suvá me cojo cjuatacun rë me mé xi ndaja, mé xi ndajin. Vëhë xi vinchajyë cjuatacun rë me me, o sa tsajin ne, chjatje cjuatacun rë me ngatsë rë me. <sup>16</sup> Ngajan xi hatuxa cuechji Nina xuta nixtin hya xi Nina tsingatju nga me Jesucristu xi tsichuva me cjua xi hinchahma rë xuta. Hacuaha cuatjin chjá hya xi suá machaya rë xuta cjuandajyihí xi chja tsëhë Jesucristu.

*Xuta tjë rë Israel xi faharcun me ley ne, vëhë sua machaya rë me xi xuta jyë me*

<sup>17</sup> Quihndë ne, ngayun xi nújun xi xuta tjë rë Israel ngayun ne, jemu vetuhuntacun ley rë Moisés. Jemu naxunndujun yojo nuju ngatsë rë xi Nina xi cjuaquixi ne, me vëhë xi nina nuju me. <sup>18</sup> Ha hyun hacutjin xi meje rë Nina xi nihñu; hacuaha ngatsë rë xi cachutayun ley ne, chuya nuju tsëhë cjuandaja. <sup>19</sup> Xi má nuju ne, jemu ndaja ninguixun cjuatacun rë xutaxín xi hvíin me Nina; jemu ndaja chuxuhun cjuatacun rë xutaxín xi tsajin hinchá me ndiya rë Nina. <sup>20</sup> Xi má nuju ngayun ne, sacuaha maestru rë xutaxín xi hvíin camahani me má ngayun. Cuatjin ningatuhuntacun ta, tsëhë xi tjin nuju ley rë Moisés jan xi yaha cjuatacun xi cjuaquixi. <sup>21</sup> Ngayun xi vicuyun rë jingu sa ne, ¿há vicuyuun suvun rë yojo nuju ní? Ngayun xi chuyiin nuju tsëhë nina ndyojo ne, ¿há nichujun cjuanchina rë yungun rë ní? <sup>22</sup> Ngayun xi nújun xi ndajintjin xi nindesun cojo rë ngu chjuun, o cojo ngu xihin xi hacuiin tsajan ne, ¿há cuatjin nihñu suvun ní? Ngayun xi chuyiin nuju tsëhë nina ndyojo ne, ¿há nichujun cjuanchina rë yungun rë ní? <sup>23</sup> Ngayun xi jemu naxunndujun yojo nuju xi tjin nuju ley rë Moisés ne, ¿há choho chja xuta tsëhë Nina ngatsë rë xi nihñuchuun cjua xi vitexa ley vë ní? <sup>24</sup> Hacuaha cuatjin camahindu xcun xujun rë Nina: “Xutaxín ne, choho chja me tsëhë Nina, ngatsë rë xcusun nuju ngayun xuta tjë rë Israel.” Cuatjin chja xujun.

<sup>25</sup> Sa xi nihñuchuhun jain sacuatjin vitexa ley ne, cumachji rëhë nuju xi cati chuxin nuju ngatsë rë xi ngu xuta rë Nina ngayun; peru sa xi nihñuchuun sacuatjin vitexa ley ne, ngayun ne, tangun ngayun sacuaha xi cjëë xtí chuxin nuju. <sup>26</sup> Vëhë xi xutaxín xi vatiin me chuxin rë me ne, sa xi sahmi me cjuandaja sacuatjin vitexa ley ne, tangun chuya rë Nina tsëhë me sacuaha xi ngu xuta xi cati chuxin rë me. <sup>27</sup> Hane xutaxín xi sahmi me sacuatjin vitexa ley ne, handasa hatuxa vatiin me chuxin rë me, peru cuatjutaha nuju me, ngayun xi nihñuchuun sacuatjin chja ley handasa tjin nuju ley jan hacuaha cati chuxin nuju. <sup>28</sup> ¿Yo xi má ngu xuta tjë rë Israel xi cjuaquixi? Hacuuiin ngu xuta xi suvá ní xi sahmi me sacuaha xcusun rë xuta jan, hacuiin ngu xuta xi suvá ní xi cati rë

chuxin rë ta, <sup>29</sup>ngu xuta xi yaha cjuatacun rë xuta tjë rë Israel, ngu xuta xi cjuë me cojo ngasunhdë rë me sacuaha xi cati chuxin rë me, me vëhë xi ngu xuta tjë rë Israel xi cjuaquixi. Hane tsajin rë ley ngahñu xi cuma sahmi cuatjin cahntsua xahasen naja ta suvá Hasen rë Nina xi cuma sahmi cuatjin. Xi cuatjin nihña ne, hacuiin xuta xi cuaxëndaja me tsajan ta Nina ne, me vëhë xi chuya rë me tsajan.

### 3

<sup>1</sup>Sa quixi cuatjin ne, cuma cuinenguisen ta, ¿mé vengui chji rë xi xuta tjë rë Israel má ngayaan? ¿Mé vengui chji rë xi cuatjin cati chuxin naja? <sup>2</sup>Peru jemu vengui camahani chji rë. Titjun ne, vengui chji rë ta, tsëhë xi Nina ne, casuatsja naja me cjua rë me. <sup>3</sup>Peru sa xi ngujo xuta tjë rë Israel catsismicacun me Nina ne, ¿mé xi cuma? ¿Há vëhë ni sahmi xi tsismicacun Nina ngayaan xuta rë me? <sup>4</sup>¡Jéya! Meje rë xi cuinújan xi Nina ne, hatuxa sahmicihin me yëjë ni cjua xi chja me. Sahmi me handasa yëjë ni xuta ne, jemu ndacha me. Xcun xujun rë Nina ne, cuitjin camahindu:

Ngayun, Nina naha ne, tsëhë yëjë ni cjua xi nújun ne, tsajin camahani mé jyë quitjin, hacuaha hatuxa scaa rë cjua nuju cjue xcun tsëhë cjua rë xuta xi tsichuva nuju me cojo cjuatacun nuju.

Cuatjin camahindu.

<sup>5</sup>Sa xi ngatsë rë cjuatsehen xi nihña ne, vëhë tsingacun jain xi Nina ne, tsajin camahani jyë quitjen me ne, ¿mé cumá cuinújan? ¿Há cuinújan xi Nina ne, hacuaha jyë quitjen me ta sahmi naja me castigu? (Tichjá cojo nuju sacuaha cjuatacun rë ngu xutajyë.) <sup>6</sup>¡Jéya! quixiin vë ta, sa xi jyë quitjen Nina ne, sehe cumaji tsichuva me xuta ngasunhdë cojo cjuatacun rë me.

<sup>7</sup>Cuejña xi cuichja sa ngu xuta cuitjin: Sa xi hitsë sa cuaxëndaja Nina cojo cjuaquixi rë me hya xi sahmi jain me sacuatjin chja me hacuaha hitsë sa ndaja tsejen xi jyë hnga Nina cojo Hasen rë me ngatsë rë cjuandacha naha ne, ¿mé má sehe cuatjin tsichuva ná me sacuaha ngu xuta tsehen? <sup>8</sup>O sa tsajin ne, cuejña xi cuichja sa ngu xuta cuitjin: Cuanguen nihña cjuatsehen, cojo sa xi cuma cuetjucaa sa cjuandaja. Hisca tjin yahnga xuta xi choho chja me tsijin ta chja me xi cjuatacun vëhë vicuyin, peru quixiin vë. Xuta xi cuacun vë ne, hatuxa satë rë me castigu xi vitexa jyë rë me.

<sup>9</sup>Sa cuatjin ne, ¿há hitsë sa vengui chji naja ngayaan xuta tjë rë Israel xi cuma rë xutaxín? ¡Jéya! Ha sehe cachjá ta ngayejen ni, sa xuta tjë rë Israel o sa xutaxín ne, ha nechan ngayejen ni ngajñi rë cjuatsehen. <sup>10</sup>Cuatjin camahindu xcun xujun rë Nina hiscan xi chja cuitjin:



Tsajin xuta xi tsajin jyë quitjen, hisca ngu me tsajin me;

<sup>11</sup> tsajin yo xi vijne rcu, tsajin yo xi vanguisse ndiya rë Nina.

<sup>12</sup> Yëjë ni xuta ne, cavetjuxin me tsëhë ndiya rë Nina, yëjë ni me ne, camachjiriin me.

Tsajin yo xi ndaja sahmi me. Ndastu ngu ni me tsajin me.

<sup>13</sup> Cahntsua hntsua me ne, chojyihî sacuaaha ngu tsjun xi catuxaha;

neje me ne, suvá cjuandacha visiajmi,

chuxin hntsua me ne, xan rë chu yë hîncha ngahma rë;

<sup>14</sup> hntsua me ne, suvá cjuahngatacun quitsë rë.

<sup>15</sup> Cojo ntsacu me ne, ngu hñu sasa cjue tsiquehen xicjin me;

<sup>16</sup> Ndiya xi hîncha me ne, suvá xi tsinguetsun ni me cjuatacun rë xuta, hacuaha sua me xuta cjuachoho.

<sup>17</sup> Hviin camahani me ndiya tsëhë cjuajeya.

<sup>18</sup> Tsajin ngu hora xi tsingatahacacun me xi tsacjun me Nina.

Cuatjin chja xujun rë Nina.

<sup>19</sup> Ha hyan ta yëjë ni cjuaxi chja ley rë Nina ne, chja cojo xuta xi siu ngahma rë ley vëhë. Cuatjin xi tsajin yo cuma cuichja xi tsajin mé jyë quitjen. Hacuaha cuatjin xi yëjë ni xuta ngasunhdë vi ne, tsichuva Nina me cojo cjuatacun rë me. <sup>20</sup> Nina ne, cuichjaain me tsëhë ngu xuta xi tsajin jyë rë me ngatsë rë xi casahmichihin me sacuatjin chja ley ta, ley ne, sua machaya naja xi ngayejen ne ne, xuta tsehen ngayaan.

*Nina ne, tsicjë me jyë naja sa xi mangutacun cojo rë me*

<sup>21</sup> Peru Nina ne, casua me camachaya naja hacutjin tsicjë me jyë naja. Hane hacuiin ngatsë rë ley xi cuatjin sahmi me. Cjuatacun rë Nina vë ne, hisca hatsëë camahindu xcun xujun rë me. <sup>22</sup> Cjuatacun vëhë ne, cuitjin fi: Nina ne, tsicjë me jyë rë xuta xi mangucacun cojo Jesucristu. Cuatjin sahmi Nina cojo yëjë ni xuta xi cuatjin mangucacun me cojo Jesucristu ta Nina ne, tangun ni vutsejen me xutaxín cojo xuta tjë rë Israel. <sup>23</sup> Yëjë ni xuta ne, sahmi me cjuatsehen, hacuaha chaja camaha sa xi cuechutaha me sacuatjin jyë hnga Nina cojo Hasen rë me. <sup>24</sup> Peru cojo cjuandaja rë Nina ne, tu cjuatjo ni tsicjë me jyë rë xuta, ngatsë rë xi Jesucristu ne, cavechjitje me jyë xi quitjen xuta. <sup>25</sup> Nina ne, catsingatju me Jesucristu xi cueya me xi cuechjitje me jyë rë yëjë ni xuta xi cumangucacun cojo rë me. Cuatjin casahmi Nina, cojo sa xi sua me cumachaya naja xi me vëhë ne, jemu tyjahi me cojo cjuatacun rë me hya xi jemu catsijyëcacun me cojo xuta xi caviyuju titjun hacuaha catsingatu hnga me jyë rë xuta xi cuacun vë. <sup>26</sup> Hacuanitjin ni sua me machaya naja xi jemu tyjahi me cojo cjuatacun rë me quihndë xi titsicjë me jyë xi quitjen xuta xi mangucacun cojo Jesús.

<sup>27</sup> Xi cuatjin ne, ¿há cuma naxenndajan yojo naja? ¡Jéya, cumaji! Nina ne, hacuiin tsicjé me jyé naja ngatsé rë xcusun xi nihña ta suvá ngatsé rë xi mangutacun cojo Jesucristu. Véhë xi choho nuhya rë sa xi naxenndajan yojo naja. <sup>28</sup> Véhë xi tsejen xi meje rë xi ningatahantacun cuitjin: Nina tsicjé me jyé rë ngu xuta ngatsé rë xi mangucacun xuta jan cojo Jesucristu, hacuiin ngatsé rë ngu ley xi vihndé me.

<sup>29</sup> Nina ne, ¿há cuma xi suvá ni xuta tjé rë Israel xi Nina rë me má me? ¿O há cojo xutaxín má me Nina tséhë? Juun, cojo me. <sup>30</sup> Ngu ni Nina xi tacun me. Hane me véhë tsicjé me jyé rë xuta tjé rë Israel ngatsé rë xi mangucacun xuta jan cojo Jesucristu, hacuaha tsicjé me jyé rë xutaxín xi vatiin me chuxin rë me ngatsé rë xi mangucacun xutaxín cojo Jesucristu. <sup>31</sup> Quihndé xi tinújan xi jemu vengui chjí rë xi mangutacun cojo Jesucristu ne, ¿há tinguetsun ngahñu rë ley xi cavitexa Nina? ¡Jéya! Ha hyan ta ley rë Nina ne, hatuxa vengui chjí rë.

## 4

### *Hacutjin camá xi café jyé rë Abraham*

<sup>1</sup> Sa cuatjin ne, ¿mé cuinújan tséhë xutachanga naja Abraham? ¿Mé xi casacu rë me xi caviyuju me nguehe ngasunhndé? <sup>2</sup> Sa xi cachja Nina ta tsajin jyé rë Abraham ngatsé rë cjuandaja xi casahmi Abraham ne, tjin rë Abraham chuva rë xi cuaxëndaja suvá me yojo rë me. Peru cumaji sahmi me cuatjin xcun Nina ta, <sup>3</sup> xujun rë Nina ne, chja cuitjin: “Abraham ne, camangucacun me cojo cjua xi cachja Nina cojo rë me, hane ngatsé rë véhë xi catsicjé Nina jyé rë me.” Cuatjin chja xujun rë Nina. <sup>4</sup> Ngu xuta xi casahmi me ngu xa naja ne, chjí rë me ne, hacuiin catahan rë me sacuaha ngu cjuandaja xi nihña cojo rë me ta catahan rë me tséhë xi quitjen tséhë xa xi casahmi me tsajan. <sup>5</sup> Peru sacuaha ngu xuta xi hacuiin vihi hacuiin véhë sahmi me xi meje rë me xi chuya rë Nina tséhë me ta tu mangucacun ni me cojo Nina, Nina tsicjé jyé rë xuta tsehen jan. Ngatsé rë xi cuatjin mangucacun xuta jan ne, hatuxa tsicjé Nina jyé rë me. <sup>6</sup> Xutachanga naja David ne, hacuaha cachja me hatsëë nixtin tséhë cjuasua xi tjin rë ngu xuta xi Nina tsicjé jyé rë me, hane tsimii sahmi rë há ndaja há ndajin casahmi xuta jan. <sup>7</sup> Cuitjin cachja David: Jemu ndaja tséhë ngu xuta xi catsinchataha Nina jyé rë me, hacuaha xi cafachacuendaain Nina cjuatsehen xi casahmi me.

<sup>8</sup> Jemu ndaja tséhë ngu xuta xi hatuxa tsicjé Nai naja jyé rë me.

Cuatjin cachja David.

<sup>9</sup> Cjuandaja vëhë ne, ¿há suvá cuma tsëhë xuta xi cati chuxin rë? ¡Jéya! ta, hacuaha cojo xuta xi vatiin me chuxin rë cuma ta, tsëhë xi ha cachjá ta Nina catsicjë me jyë rë Abraham ngatsë rë xi camangucacun Abraham cojo Nina. <sup>10</sup> ¿Janihya catsicjë Nina jyë rë Abraham? ¿Há cachja me cjuaja jan hya xi cavatju cati chuxin rë me ne?, o há tsajin ne, ¿há hya xi cjëë xtí chuxin rë me? Hacuuiin hya xi ha cati chuxin rë me ta cachja me hya xi chaja sa xtí. <sup>11</sup> Hisca xi camá ngascan ne, sehe cati chuxin rë Abraham sacuaha ngu sellu xi casetaha rë me xi tsejen xi Nina ne, catsicjë me jyë rë Abraham ngatsë rë xi ha camangucacun me cojo Nina. Cuatjin xi Abraham ne, camatitjun me sacuaha nahmi tsëhë yëjë xuta xi cjuë jyë rë me ngatsë rë xi cumangucacun me cojo Nina handasa hacuiin xtí chuxin rë me. <sup>12</sup> Hacuaha Abraham ne, camatitjun me sacuaha nahmi tsëhë yëjë ni xuta xi xtí chuxin rë me hane hacuaha cumangucacun me cojo Nina, ta xuta jan ne, vetjungi cjuatacun rë xutachanga naja Abraham hya xi chaja sa xtí chuxin rë me.

<sup>13</sup> Nina ne, cachja me cojo Abraham ta yëjë ngasunhndë ne, cuma tsëhë me cojo xuta xi nduva tjë rë me. Peru hacuiin ngatsë rë xi casahmi Abraham sacuatjin vitexa ley xi cuatjin cachja Nina cojo rë me ta cachja me cuatjin ngatsë rë xi camangucacun me cojo Nina. Vëhë xi Nina ne, catsicjë me jyë rë Abraham. <sup>14</sup> Cuatjin chjá ta, sa xi suvá xuta xi sahmi sacuatjin chja ley cuma satë rë me cjuandaja xi cachja Nina jan ne, venguuiin chjí rë xi mangutacun cojo Nina, hacuaha machjiriin cjuaja xi cachja Nina jan. <sup>15</sup> Cachjá xi hacuiin ngatsë rë ley xi cuatjin cachja Nina cojo Abraham ta, tsëhë xi hiscan xi sahmixa ley rë Nina ne, ngajan xi cuma xuta castigu. Peru hiscan xi tsajin ley ne, hacuaha tsajin yo xi vinchajyé rë xuta ta casahmichiin me cjuaja xi vitexa ley.

<sup>16</sup> Vëhë xi cavejña ngu cacun Nina xi sahmichihin me cjuaja rë me cojo xuta xi cumangucacun cojo rë me, cojo sa xi tsejen ta suvá ngatsë rë cjuandaja rë Nina xi cuatjin sahmichihin me cjuaja rë me cojo xuta. Ngajan xi tjin cjuaquixi xi sahmichihin jain Nina cjuaja rë me cojo yëjë xuta xi nduva tjë rë Abraham, hacuiin tu suvá cojo xuta xi tjin rë me ley ta hacuaha cojo xuta xi mangucacun me cojo Nina, sacuatjin casahmi Abraham. Cuatjin xi Abraham ne, camatitjun me tsajan sacuaha nahmi naja ngayejen ni ngayaan ngajan xcun Nina. <sup>17</sup> Nina ne, me vëhë xi camangucacun Abraham cojo me, me vëhë xi sua cjuahña rë nima, me vëhë xi handasa chaja sa tsindaja me ngu xcusun ne, chja me tsëhë xcusun vëhë sacuaha xi ha catsindaja me. Camahindu xcun xujun rë Nina hiscan xi cachja me cojo Abraham cuitjin: “Cavejña ri ne, xi cuma

titjun ngaye sacuaha nahmi tsëhë jemu cjin xuta.” Cuatjin camahindu.

<sup>18</sup> Peru Abraham ne, handasa matsijin hacutjin cuma sah-michihin Nina cjua xi cachja me cojo rë me ne, camanguacun me cojo cjua jan, cavetaha cacun me Nina. Cuatjin xi camatitjun me tsëhë jemu cjin xuta, sacuatjin xi ha cachja Nina cojo rë me hya xi cachja me ta: “Cuitjin cjin cuma xuta xi tjë riji.” Cuatjin cachja Nina. <sup>19</sup> Hane hacuiin quiji ngaxtun Abraham xi mangucacun me cojo Nina handasa xi ha ngu cientu nu tjin rë me, hacuaha ha vëë me xi jemu changá camahani camá me cojo chjuun rë me xi sacú rë me quihndi. <sup>20</sup> Peru hacuiin quiji ngaxtun me xi mangucacun me cojo cjua xi cachja Nina cojo rë me ta hitsë sa ndaja camanguacun me. Hacuaha casahmi jyë casahmi hnga me Nina <sup>21</sup> ta, xi tsingatahacacun me ne, hatuxa tjin rë Nina chuva rë xi sahmi chihin me yëjë ni cjua xi cachja me xi sahmi me. <sup>22</sup> Vëhë xi Nina ne, catsicjë me jyë rë Abraham.

<sup>23</sup> Quihndë ne, hacuiin suvá tsëhë Abraham xi cuatjin camahindu xi catsicjë Nina jyë rë me ta <sup>24</sup> hacuaha cojo tsajan ngayaan, xi sehe tsicjë Nina jyë naja, ngayaan xi mangutacun cojo Nina, me xi catsicuya Nai naja Jesucristu cjuahñu. <sup>25</sup> Cahme me ngatsë rë cjuatsehen xi nihña, hacuaha cavuya me cjuahñu cojo sa xi cuma cjuë jyë naja.

## 5

### *Cavetjuntjen tsëhë jyë naja*

<sup>1</sup> Quihndë ne, tsëhë xi catsicjë Nina jyë naja ngatsë rë xi camangutacun cojo rë me ne, vëhë xi ngayaan ne, ha hindë tsajin sa cjuachan cojo Nina ngatsë rë xi cavaxëtje naja Nai naja Jesucristu. <sup>2</sup> Hacuaha ngatsë rë xi camangutacun cojo rë me ne, vëhë xi casacu naja cjuandaja rë me. Hacuaha jemu sua rë xahasen naja cojo ngu cjuetacun xi cuechú nixtin xi cuechuntahan hitsë sacuatjin jyë hnga Nina cojo Hasen rë me. <sup>3</sup> Hane hacuiin suvá ngatsë rë cjuetacun vëhë ni ta hacuaha ma sua rë xahasen naja ngatsë rë cjuañihi xi vatjun ta, tsëhë xi ha hyan ta cjuañihi ne, vëhë vicuya naja hacutjin scaa naja tu mé ni cjuacjintacun. <sup>4</sup> Hane xi scaa naja ne, vëhë sahmi xi chuya rë Nina tsajan, hane xi chuya rë Nina tsajan ne, vëhë sahmi xi cuetahan tacun Nina. <sup>5</sup> Hane xi cuatjin cuetahan tacun Nina ne, tsajin nixtin cuetju sava ngayaan ta, tsëhë xi Hasen rë Nina xi casua naja me ne, jemu caveya cjuahmutacun rë Nina cahntsua xahasen naja.

<sup>6</sup> Hya xi tsajin mé camá canihña suvaan xi naxentjen yojo naja ne, hya cahme Jesucristu xi cuaxëtje me ngayaan xuta tsehen. Cahme me nixtin xi cachja Nina xi cueya me. <sup>7</sup> Tsajin

cjuaquixi xi ngu xuta sua me yojo rë me xi cueya me ngatsë rë ngu me xi tsajin jyë rë. Hisca ngu xuta ndaja jain ne, hyan sa xi sacu yo xi cuetjucacun xi sua yojo rë xi cueya ngatsë rë me. <sup>8</sup> Peru Nina ne, casua me camachaya naja cjuahmutacun xi tjin rë me cojo naja hya xi Jesucristu casua me yojo rë me xi cahme me ngatsë naja, handasa xuta tsehen ngayaan. <sup>9</sup> Hane quihndë xi cafë jyë naja ngatsë rë cjuaveya rë Jesucristu ne, ngajan xi hacuaha tjin cjuaquixi xi ngatsë rë me ne, cuetjuntjen tsëhë castigu. <sup>10</sup> Hya xi condra rë Nina má ngayaan ne, hya camá xutandaja rë me ngayaan ngatsë rë cjuaveya rë Quihndi rë me. Hane quihndë xi camá xutandaja rë me ngayaan ne, tjin cjuaquixi xi ngayaan ne, cuetjuntjen ngatsë rë xi tacun quicun nga me quihndë. <sup>11</sup> Hacuaha jemu sua ma rë xahasen naja ngatsë rë cjuahmutacun rë Nina, cojo ngatsë rë Nai naja Jesucristu, me xi quihndë casahmi xi camá xutandaja rë Nina ngayaan.

*Hacutjin casahmi Adán cojo hacutjin casahmi Jesucristu*

<sup>12</sup> Ntsacu cavetsihin ne, cavisehen xi hmí cjuatsehen cahntsua cjuatacun rë xuta nguehe ngasunhndë vihi ngatsë rë ngu xuta xi hmí rë Adán. Hane ngatsë rë cjuatsehen ne, cavisehen xi hmí cjuaveya nguehe ngasunhndë. Cuetjin xi yëjë ni xuta ngasunhndë ne, hatuxa hme me ta, tsëhë xi yëjë ni me ne, sahmi me cjuatsehen. <sup>13</sup> Chaja sa xi sua Nina Moisés ley rë me ne, ha hinchajñi cjuatsehen ngajñi rë cjuatacun rë xuta ngasunhndë. Peru sahmicuendaain me cjuatsehen xi má hiscan xi tsajin ngu ley. <sup>14</sup> Peru yëjë ni xuta xi caviyuju me ngasunhndë hisca nixtin rë Adán hisca nixtin rë Moisés ne, cahme me. Hisca xuta xi hacuiin tangun cjuatsehen xi casahmi me cojo cjuatsehen xi casahmi Adán ne, hacuaha cojo me cahme me. Hane Adán ne, tjin ngu xcusun hacutjin matangun me cojo Cristu, me xi sehe cuinduva me ta, ngatsë rë Adán ne, cavisehen ngu xcusun nguehe ngasunhndë, hacuaha ngatsë rë Jesucristu, me xi camangascan canduva ne, cavisehen ngu nga xcusun ngasunhndë.

<sup>15</sup> Peru cjuandaja xi sua Nina ne, hacuiin tangun cojo cjuatsehen xi casahmi Adán. Ngatsë rë cjuatsehen xi casahmi ngu ni xuta vëhë ne, jemu cjín xuta cahme me. Peru cjuandaja rë Nina cojo cjuandaja xi tisua naja ngu ni xuta xi hmí Jesucristu ne, hitsë sa vengui chjí rë hacuaha jemu ndaja cama rë tsëhë jemu cjín xuta. <sup>16</sup> Cuichjá nga ngu ndiya ta hacuiin tangun cavetju tsëhë cjuandaja vëhë cojo tsëhë cjuatsehen xi casahmi ngu ni Adán. Hya xi Adán casahmi me cjuatsehen vëhë ne, sehe cachja Nina xi sacuaha castigu ne, cuechú nixtin xi cueya Adán. Peru quihndë ne handasa xi jemu cjín cjuatsehen sahmi xuta ne, Nina ne, hacuaha sahmi me

cjuandaja xi tsicjê me jyê rë xuta. <sup>17</sup> Ngatsë rë cjuatsehen xi casahmi ngu ni xuta ne, hatuxa cuma rë xuta cjuaveya. Cuanitjin hitsë sa ndaja ta, ngatsë rë ngu ni Jesucristu ne, xuta xi jemu tisacu rë me cjuandaja rë Nina xi tsicjê Nina jyê rë me tu cjuatjo ni ne, hatuxa sacú rë me cjuahñu xatsë.

<sup>18</sup> Vêhë xi sacuatjin xi cavetjucaa castigu xi cuma rë yějê ni xuta ngatsë rë ngu cjuatsehen jan ne, hacuanitjin ni cuetjucaa xi cjuê jyê rë yějê ni xuta, hacuaha sacú rë me cjuahñu xatsë, ngatsë rë ngu ni cjuandaja jan. <sup>19</sup> Hacuaha sacuatjin xi jemu cjín xuta camatsehen cjuatacun rë me ngatsë rë xi ngu ni xuta cahndiin me tsêhë Nina ne, hacuanitjin ni jemu cjín xuta cuma me xuta xi tsajin jyê rë ngatsë rë xi ngu ni me xi cahndë me tsêhë Nina.

<sup>20</sup> Cavejña Nina ley hane ngajan xi cama cjín sa cjuatsehen xi sahmi xuta. Peru hiscan xi camacjín sa cjuatsehen ne, ngajan xi cjín sa camatsejen cjuandaja rë Nina. <sup>21</sup> Sacuatjin xi hatuxa casahmi xuta cjuatsehen hane cahme me ne, hacuanitjin ni hatuxa sacú rë xuta cjuandaja rë Nina, hane cjuê jyê rë me, sehe sacú rë me cjuahñu xatsë, ngatsë rë Nai naja Jesucristu.

## 6

*Sacuaha xi caveyan xi cuma rë cjuatsehen hane quicun ngayaan xi cuma rë Nina*

<sup>1</sup> Xi cuatjin ne, ¿há quixi sa xi cuinújan xi ndatjin xi nihña sa cjuatsehen cojo sa xi vetjutsejen sa cjuandaja rë Nina?

<sup>2</sup> ¡Jéya, ndajintjin! Ngayaan ne, sacuaha xi caveyan xi cuma rë cjuatsehen. Hane xi ha cavetjuxen tsêhë cjuatsehen ne, ha quihndë cumaji camahani cuinechan sa ngajñi rë cjuatsehen.

<sup>3</sup> ¿Há hyuun ta ngayejen ni ne, hya xi caxtenda ngayaan xi cumatangun ngayaan cojo Jesucristu ne, hacuini tu xi cuma tangun ni ngayaan cojo rë me ta hacuaha cojo xi cuma tangun ngayaan cojo cjuaveya rë me? <sup>4</sup> Ngajan xi sacuaha xi caxinchaniji tangun ngayaan cojo Jesucristu hya xi caxtenda ngayaan, cojo sa xi cuma tsejen xi camatangun ngayaan cojo cjuaveya rë me. Cuatjin caxinchaniji ngayaan cojo sa xi sacuatjin xi cavuya Jesucristu cjuahñu ngatsë rë Nahmi naja xi jemu jyê hnga me cojo Hasen rë me ne, hacuanitjin ni ngayaan ta sacú naja cjuahñu xatsë xi tivanguen cojo ngasunhndë naja.

<sup>5</sup> Sa xi camatangun ngayaan cojo ngu cjuaveya sacuaha cjuaveya rë Jesucristu ne, hacuaha cama tangun ngayaan cojo ngu cjuahñu sacuaha cjuahñu xatsë rë me. <sup>6</sup> Hacuaha hyan ta ngayaan ne, sacuaha xi casetaha tangun ngayaan cojo Jesucristu xcun cru, cojo sa xi cjuê cuetsun yojo tsehen

naja, hane cuatjin xi ha quihndë hacuiin cuanguen nduju sa ndiya rë cjuatsehen. <sup>7</sup> Ta yo xi ha cahme ne, ha camandaya tsëhë cjuatsehen. <sup>8</sup> Sa xi cuatjin caveyan cojo Jesucristu ne, vetahantacun xi hacuaha cuatjin cuinechan cjuahñu cojo rë me. <sup>9</sup> Hacuaha hyan ta Jesucristu ne, quihndë xi ha cavuya me cjuahñu ne, ha quihndë cuyaain cueya nga me ngu ndiya. Cjuaveya ne, ha quihndë vitexaain rë me. <sup>10</sup> Xi cahme me ne, ngu ndiya ni cahme me xi cuma rë cjuatsehen; peru quihndë xi tacun nga me cjuahñu ne, tacun me xi cuma rë Nina. <sup>11</sup> Cuatjin nuju ngayun ne, nihñucueundun ni xi caveyun camahani xi cuma rë cjuatsehen, nihñucueundun xi nechun cjuahñu xi cuma rë Nina xi tjin tangun cjuatacun nuju cojo Jesucristu.

<sup>12</sup> Vëhë xi ngayun ne, xicatuun sa cahndë xi cjuatsehen cuitexa nuju; xicanihñuu sa yëjë ni hacutjin meje rë yojo jyë nuju. <sup>13</sup> Xicatuun sa yojo nuju cojo cjuatsehen ta tuhun yojo nuju cojo Nina, sacuaha nima xi cavuya cjuahñu ngayun. Yojo nuju ne, mijí rë xi sahmi xa rë cjuatsehen ta meje rë xi sahmi xa rë cjuandaja. <sup>14</sup> Sacuaha cjuatsehen ne, ha quihndë vitexaain nuju ta, tsëhë xi hacuiin ley tivitexa nuju ta cjuandaja rë Nina ne, vëhë tivitexa nuju.

*Yo meje rë xi tahan yojo naja cojo*

<sup>15</sup> Sa cuatjin ne, ¿mé xi ndatjin nihña? ¿Há nihña sa cjuatsehen tsëhë xi hacuiin ley tivitexa naja ta cjuandaja rë Nina tivitexa naja? ¡jéya, hacuiin cuatjin! <sup>16</sup> Ngayun ne, ha ndaja hyun ta sa xi tuhun yojo nuju cojo cjuatsehen xi cuinuhyun tsëhë yëjë ni hacutjin vitexa nuju cjuatsehen ne, hatuxa tjihñu ngayun cojo cjuatsehen jan, hacuaha sacú nuju cjuaveya. Peru sa xi tuhun yojo nuju cojo Nina xi cuinuhyun tsëhë me ne, hatuxa tjihñu ngayun cojo Nina, hacuaha nujuhunyun ndiya rë cjuandaja. <sup>17</sup> Titjun ne, hatuxa tjihñu ngayun cojo cjuatsehen. Peru nacuechji rë Nina ta quihndë ne, ha canuhyun cojo ngu ñaja xahasen nuju tsëhë cjuachacun xi casahmi Nina xi camachaya nuju. <sup>18</sup> Hane xi ha camandaya ngayun tsëhë cjuatsehen ne, catuhun yojo nuju cojo ndiya rë cjuandaja. <sup>19</sup> Tichjá cojo nuju cojo cjuaxi chjaain cuijne rcun, ngatsë rë xi hvë xi jemu chja cuijne rcun cjuatacun xi tichjá cojo nuju. Titjun ne, catuhun yojo nuju cojo cjuatsehen, cojo sa xi suvá cjuatsehen yëjë ni xi nihñu. Peru quihndë ne, cuatjin meje rë xi tuhun yojo nuju cojo ndiya rë cjuandaja cojo sa xi cuma cjuë jyë nuju xcun Nina.

<sup>20</sup> Hya xi tjihñu ngayun cojo cjuatsehen ne, ndaya tjin ngayun xi cuma rë ndiya rë cjuandaja. <sup>21</sup> Peru ¿mé ndajyihí casacu nuju hya? Tsajin, ta quihndë ne, tu ma sava nuju xi ninguitsjun xcusun xi canihñu ta, tsëhë xi hya xi cuatjin

nihña ne, suvá cjuaveya sacu naja. <sup>22</sup> Peru quihndë ne, camandaya ngayun tsëhë cjuatsehen hacuaha catuhun yojo nuju cojo Nina. Vëhë xi tisacu nuju ngu cjuatacun tyjahi xi tsajin cun rë, tisacu nuju ngu xahasen tyjahi, hacuaha hya xi cuijnetaha ne, sacú nuju ngu cjuahñu xatsë. <sup>23</sup> Sacuaha chjí xi sacu naja tsëhë cjuatsehen ne, hacui cjuaveya. Peru cjuandaja xi Nina sua naja me, tu cjuatjo ni sacu naja hya xi tjin tangun cjuatacun naja cojo Nai naja Jesucristu. Hane sacu naja cjuahñu xatsë.

## 7

### *Xcusun xi vicuya naja ley rë cjuavixan*

<sup>1</sup> Ngayujun ni matsejen ne, ha hyun xi hmí rë ley. Vëhë xi ha hyun xi ley ne, vitexa naja jinguyëjë rë xi nechan cjuahñu. <sup>2</sup> Sacuaha ngu chjuun xi cavixan na cojo xihin rë na ne, chja ley rë Moisés ta sacuaha xi tjihñu na cojo cha jinguyëjë rë xi tacun cha cjuahñu. Peru sa xi xihin rë na cueya cha ne, na vëhë ne, ha ndaya tjin na tsëhë cjuavixan xi camá na cojo xihin rë na jan. <sup>3</sup> Vëhë xi sa xi tacun cuaha xihin rë na, hane na vëhë ne, cjuaha na jingu sa xihin ne, jemu jyë jyë rë na. Peru sa xi cueya xihin rë na jan ne, ndaya tjin na tsëhë cjuavixan xi camá na, hacuaha tsajin mé jyë rë na sa xi cuixan nga na ngu ndiya cojo jingu sa xihin.

<sup>4</sup> Cuanitjin nuju ngayun, sacuaha xi caveyun xi cuma rë ley ngatsë rë Jesucristu cojo sa xi cuma ndaya ngayun tsëhë ley, hane cuma tsëhë jingu sa me ngayun. Me vëhë ne, hacui Jesucristu, me xi cavuya cjuahñu. Cuatjin cavuya me cjuahñu cojo sa xi cuma nihña cjuandaja xi meje rë Nina. <sup>5</sup> Titjun hya xi cavinechan cojo yojo jyë naja ne, ley ne, catsingasca rë cjuatsehen ngajñi rë cjuatacun naja cojo sa xi nihña cjuatsehen. Hane ngatsë rë cjuatsehen xi canihña ne, vëhë xi cuechuntahan cjuaveya. <sup>6</sup> Peru quihndë ne, sacuaha xi caveyan xi cuma rë xcusun xi catsihñu naja, sehe ndaya tjin ngayaan tsëhë ley. Cuatjin xi ha quihndë hacuiin tjihñu ngayaan cojo ley changá vëhë ta, tjihñu ngayaan cojo cjuaxatsë tsëhë Hasen rë Nina.

### *Cjuatsehen xi hinchá ngajñi yojo naja*

<sup>7</sup> Tsëhë xi quixi cuatjin ne, ¿há cuinújan xi jemu tsehen ley rë Moisés jan? ¡Jéya, hacuiin cuatjin! Peru hveen mé xi hmí rë cjuatsehen hisca xi camachaya ná cjuarë ley jan. Hya ne hveen xi ndajin tjin xi tsimeje xcusun xi tjin rë jingu sa xuta, hveen hisca xi camachaya ná cjuarë ley xi chja cuitjin: “Xicanimiji xcusun xi tjin rë jingu sa xuta.” <sup>8</sup> Ngajan xi ngatsë rë xi camachaya ná cjuarë ley jan ne, cjuatsehen ne, catsingasca rë cjuatacun naha, hane casahmi xi ngahan



ne, jemu catsimeje xcusun xi tjin rë jingu sa xuta. Suva hya xi cjëë cumachaya ná cjua rë ley ne, hya xi tsajin mé casahmi cjuatsehen cojo ná. <sup>9</sup> Titjun xi hveen xi hmí ley ne, sacuaha xi jemu ndajyihi tejña. Peru hya xi camachaya ná tsëhë cjua rë ley jan ne, cavascaya rë cjuatsehen ngajñi rë cjuatacun naha, <sup>10</sup> hane sacuaha xi cavéya ngahan. Hane cjua rë ley vëhë ne, cahndë rë xi cavisecoo ná xi sacú ná ngu cjuahñu xatsë ne, sacuaha xi catsiquehen ná. <sup>11</sup> Cuatjin camá ta, tsëhë xi ngatsë rë xi camachaya ná cjua rë ley jan ne, cjuatsehen ne, cavindacha ná. Hane cojo cjua rë ley jan ne, casacu ná cjuaquixi xi xín cavitejña tsëhë Nina.

<sup>12</sup> Ngajan xi yëjë ni cjua xi vitexa ley jan ne, hatuxa cjua rë Nina, hatuxa cjuaquixi, hatuxa cjuandaja. <sup>13</sup> Xi cuatjin ne, ley xi ndaja jan ne, ¿há cuma xi vëhë catsiquehen ná? ¿Há cuma xi vëhë cavaxëxin ná tsëhë Nina? ¡Jéya, hacuiin cuatjin cama! Cjuatsehen ne, cojo sa xi cumatsejen xi tsehen jain ne, casahmi xa cojo ngu xcusun ndaja cojo sa xi tsiquehen ná. Cuma cuinújan ne, hya xi machaya naja cjua rë ley jan ne, ngajan ma tsejen xi jemu tsehen camahani cjuatsehen.

<sup>14</sup> Ha hyan ta ley rë Moisés jan ne, tsëhë Nina vë. Peru ngahan xi tsëhë ngasunhndë ngahan ne, sacuaha xi caxteña ngahan xi cuihndë tsëhë cjuatsehen. <sup>15</sup> Hisca vijniircú xcusun xi sahme. Sahmee xcusun xi meje sahme ta sahme xcusun xi chuyiin camahani ná. <sup>16</sup> Quihndë xi sahme xcusun xi mijí sahme ne, ha ngajan ma tsejen ta ha hvë ta ley ne, jemu ndaja. <sup>17</sup> Peru xi cuatjin ne, hacuiin ngahan xi sahme cuatjin ta cjuatsehen xi hinchá ngajñi yojo naha ne, vëhë xi sahmi cuatjin. <sup>18</sup> Ha hvë ta sacuaha ngajñi yojo jyé naha vi ne, tsajin camahani hinchá rë cjuandaja. Jemu meje sahme cjuandaja, peru maji. <sup>19</sup> Sahmee cjuandaja xi meje sahme ta tu cjuatsehen xi mijí sahme ne, vëhë sahme. <sup>20</sup> Peru quihndë xi sahme xcusun xi mijí sahme ne, ha ngajan ma tsejen ta hacuiin ngahan xi sahme cuatjin ta, cjuatsehen xi hinchá ngajñi yojo naha ne, vëhë xi sahmi cuatjin.

<sup>21</sup> Ngajan xi ngahan ne, hatuxa cuitjin vátju má: hya xi meje sahme ngu cjuandaja ne, hya vutsején ta tjin mé xi sahmi xi ma sahme cjuatsehen. <sup>22</sup> Ngahan cojo cjuatacun naha ne, jemu chuya ná ley rë Nina. <sup>23</sup> Peru vutsején ta ngajñi yojo jyé naha ne, jiya sa ngu ley xi hacjahi. Hane ley xi hacjahi jan ne, sacuaha xi ticjan cojo ley xi jiya ngajñi cjuatacun naha. Hacuaha ley xi hacjahi jan ne, hacui ley rë cjuatsehen xi hinchá ngajñi yojo naha. Hane vutsején ta ley jan ne, sacuaha xi titsihñu ná. <sup>24</sup> ¡Jemu choho camahani má ná ngahan! ¿Yo xi cuaxëtje ná tsëhë yojo jyé naha vi ni? ta, ngatsë rë yojo naha vi ne, sacú ná cjuaveya. <sup>25</sup> Suá nacuechji rë Nina ngatsë rë Nai

naja Jesucristu ta me vëhë cuaxëtje ná me. Ngajan xi ngahan ne, ngu ladu ne, tjihñu cjuatacun naha cojo ley rë Nina, peru ngu ladu nga ne, tjihñu yojo naha cojo ley rë cjuatsehen.

## 8

### *Hacutjin meje rë xi tjenguen ndiya rë Nina*

<sup>1</sup> Quihndë ne, tsajin camahani castigu xi cuma naja ngayaan xi tjin tangun cjuatacun naja cojo Jesucristu ta, <sup>2</sup> tsëhë xi quihndë xi tjenguen ndiya rë Nina xi sua naja cjuahñu xatsë ngatsë rë xa xi casahmi Jesucristu ne, vëhë xi ha tjin ndaya ngayaan tsëhë ndiya rë cjuatsehen xi sua naja cjuaveya. <sup>3</sup> Xcusun xi camaji casahmi ley rë Moisés ngatsë rë xi caain rë xutajyë sahmi chihin me sacuatjin chja ley ne, Nina ne, camá casahmi me. Nina catsingatju me Quihndi rë me xi cuma me ngu xuta sacuatjin ngayaan xutajyë. Catsingatju Nina Quihndi rë me jan xi tsicjë me cjuatsehen. Vëhë xi quihndi jan xi hmí rë Jesucristu ne, cahme me sacuaaha castigu ngatsë rë yëjë ni cjuatsehen xi sahmi xuta jyë. <sup>4</sup> Cuatjin casahmi Nina cojo sa xi cuma nihña sacuatjin vitexa ley ta ngayaan ne, hacuiin tjenguen ndiya hacutjin xi meje rë yojo jyë naja ta tjenguen ndiya hacutjin xi meje rë Hasen rë Nina.

<sup>5</sup> Xuta xi tjengui me ndiya hacutjin xi meje rë yojo jyë rë me ne, sahmi tangun me cjuatacun rë me cojo xcusun xi meje rë yojo jyë rë me. Peru xuta xi tjengui me ndiya rë Hasen rë Nina ne, sahmi tangun me cjuatacun rë me cojo Hasen rë Nina. <sup>6</sup> Xuta xi tsiniya cacun me hacutjin xi meje rë yojo jyë rë me ne, hatuxa sacú rë me ngu cjuaveya ta tsajin jiya Hasen rë Nina cahntsua xahasen rë me, cuechiin me xcun Nina. Peru xuta xi tsiniya cacun me hacutjin meje rë Hasen rë Nina ne, hatuxa sacú rë me ngu cjuahñu xatsë cojo ngu cjuajeya ta ha jiya Hasen jan xahasen rë me hacuaaha cuechú me xcun Nina. <sup>7</sup> Ngajan xi xuta xi tsiniya cacun me hacutjin xi meje rë yojo jyë rë me ne, hatuxa choho vëë me Nina ta, tsëhë xi miji cuihndë me tsëhë cjuaxi vitexa Nina. Hisca maji vihndë me tsëhë cjuaxi vitexa Nina. <sup>8</sup> Xuta xi tjengui me ndiya hacutjin xi meje rë yojo jyë rë me ne, maji sahmi me sacuatjin chuya rë Nina.

<sup>9</sup> Peru ngayun ne, hacuiin tjengun ndiya hacutjin xi meje rë yojo jyë nuju ta tjengun ndiya rë Hasen rë Nina, sa xi jiya Hasen rë Nina cahntsua cjuatacun nuju. Peru sa xi ngu xuta tsajin rë me Hasen rë Jesucristu ne, xuta vëhë ne, hacuiin tsëhë Jesucristu me. <sup>10</sup> Peru sa xi jiya Hasen xi sua Jesucristu ngajñi rë cjuatacun nuju ne, yojo nuju ne, sacuaaha xi cahme ngatsë rë cjuatsehen, peru hasen nuju ne, sacú rë

ngu cjuahñu xatsë ngatsë rë xi Nina ne, tsicjë me jyë nuju. <sup>11</sup> Ha hyan ta Nina ne, catsicuya me Jesús cjuahñu. Hane sa xi jiya Hasen rë Nina ngajñi rë cjuatacun nuju ne, vëhë sahmi xi sua sa Nina cjuahñu rë yojo jyë nuju xi hatuxa hme.

<sup>12</sup> Vëhë xi ngayaan ne, tjin xcusun xi hatuxa meje rë xi nihña, peru mijí rë xi nihña sacuatjin vitexa yojo jyë naja ta <sup>13</sup> ngu xuta xi tisahmi me sacuatjin vitexa yojo jyë rë me ne, hatuxa cueya me. Peru ngu xuta xi cojo ngahñu xi sua Hasen rë Nina me ne, titsitjungui me xcusun xi meje rë yojo rë me ne, hatuxa sacú rë me ngu cjuahñu xatsë.

<sup>14</sup> Yëjë ni xuta xi vihndë me tsëhë Hasen rë Nina ne, me vëhë xi cjuaquixi xi quihndi rë Nina me. <sup>15</sup> Hasen xi casacu nuju ne, hacuiin ngu hasen xi tsihñu nuju cojo sa xi rcun nga cuma ngu ndiya ta, hasen vëhë ne, hacui ngu xi sahmi xi cjuaquixi xi cuma ngayun quihndi rë Nina. Hya xi nujan “¡Papá!” Nina Nahmi naja ne, <sup>16</sup> hya tichja Hasen rë Nina cojo hasen naja xi ngayaan ne, ha quihndi rë Nina ngayaan. <sup>17</sup> Hane tsëhë xi quihndi rë Nina ngayaan ne, vëhë xi hatuxa cuechú nixtin xi satë naja cjuandaja rë me. Hacuaha cojo ngayaan satë naja tsëhë cjuandaja xi satë rë Jesucristu ta, tsëhë xi quihndë ne, tivatjun cjuañihi sacuatjin cavatju Jesucristu. Vëhë xi hya xi cuma ngascan ne, hacuaha cojo ngayaan cuma yehe cuma hnga ngayaan cojo cjuatacun naja sacuatjin cama jyë cama hnga Jesucristu cojo Hasen rë me.

<sup>18</sup> Xi má ná ngahan ne, tsimii sahmi rë xi tivatjun ngayaan cjuañihi quihndë ta, tsëhë xi cjuandaja rë Nina xi sacú naja xi cuma ngascan ne, jercu tu ndaja camahani. <sup>19</sup> Yëjë ni xcusun xi casahmi Nina nguehe ngasunhndë ne, jemu siuya xi meje xati scuëë hacutjin cún hacutjin má cuma ngayaan quihndi rë Nina. <sup>20</sup> Ta ngasunhndë ne, tu mahya xi siu yëjë ni xi siu. Peru hacuiin hatuxa xcusun xi cacún vë camameje rë xi cuatjin camá ta Nina ne, cuatjin meje rë me xi cuma. Peru tjin ngu cjuetacun. <sup>21</sup> Cuechú nixtin xi yëjë ni xi casahmi Nina nguehe ngasunhndë ne, hisca cojo vëhë cuma ndaya ne, ha quihndë hacuiin hatuxa cjuehndu sa ta cuma ndaya sacuatjin cuma ndaya yëjë ni quihndi rë Nina. Hacuaha sacú rë cjuandaja sacuatjin sacú rë quihndi rë Nina cjuandaja. <sup>22</sup> Ha hyan ta hisca quihndë nixtin vihi ne, yëjë ni xi casahmi Nina ngasunhndë vi ne, sacuaha xi tivitsine sacuaha xi vitsine ngu chjuun xi meje tsin rë na quihndi. <sup>23</sup> Hane hacuiin suvá ni ngasunhndë xi cuatjin tivitsine ta hacuaha cojo ngayaan ne, tivitsine. Ha tjin naja Hasen rë Nina sacuaha hitsë tsëhë yëjë ni xi sacú naja xi cuma ngascan. Peru vitsine ta, tsëhë xi jemu meje naja xi Nina sahmi naja me quihndi rë me xi cjuaquixi hya xi cuaxëtje me yojo jyë naja. <sup>24</sup> Ngayaan ne, cavetjuntjen

cojo sa xi cuetahan tacun Nina. Peru sa xi ha tjin naja ngu xcusun ne, ha quihndë hacuiin cuetahan tacun xi sehe sacú naja xcusun xi ha tjin naja jan. <sup>25</sup> Peru hya xi vetahan tacun xi sacú naja ngu xcusun xi cjëë sacú naja ne, jemu jyë tacun xi nechayan rë.

<sup>26</sup> Hacuaha ha chuva vëhë ni ne, Hasen rë Nina ne, visecoo naja, ngayaan xi caain naja nihña cjuandaja. Hisca hyaan jarë cjuandaja rë Nina xi ndatjin xi chjahyan. Peru suvá Hasen rë Nina ne, chjatje ngatsë naja cojo cjuatacun xi hisca cumaji cuinújan cojo cjua naja. Vëhë xi sacuaha xi tu fëtacun ni. <sup>27</sup> Hane Nina, me xi vëë yëjë ni xi hinchu cjuatacun naja ne, hacuaha vëë me cjuatacun rë Hasen rë me jan ta, tsëhë xi Hasen rë me jan ne, hatuxa chjatje ngatsë rë xuta ladu rë Nina sacuatjin meje rë Nina xi cuma.

*Nina sahmi me xi cuetjunndajan ngayaan*

<sup>28</sup> Ha hyan ta yëjë ni xcusun xi má nguehe ngasunhdë vi ne, sahmi Nina xi ndaja tsëhë xuta xi hmucacun me Nina, xuta xi cavaxijin Nina sacuatjin xi meje rë me. <sup>29</sup> Hisca ntsacu cavetsihin ne, ha tjin chjinë rë Nina cjuatacun rë yo xi meje rë me xi cuma xuta ladu rë me, hacuaha hisca hya cavejña ngu cacun me xi cuma xuta xi cuacun jan sacuaha Jesucristu Quihndi rë me. Cuatjin meje rë Nina cojo sa xi cuma titjun Jesucristu ngajñi rë jemu cjín xuta xi cuma sacuaha xicjin me. <sup>30</sup> Hacuaha xuta xi cuacun cavejña ngu cacun Nina jan ne, me vëhë xi cavaxijin Nina me; hacuaha xuta xi cuacun catsicjë Nina jyë rë jan ne, me vëhë xi casahmi yehe casahmi hnga Nina me cojo cjuatacun rë me.

<sup>31</sup> Quihndë ne, nguehe cuichjá sa ngu cjua cojo nuju. Tsëhë xi Nina tacun me ngatsë naja ne, tsajin camahani yo xi cuma sahmi naja condra. <sup>32</sup> Nina ne, catsichuvaain naja me Quihndi rë suvá me ta casua me Quihndi rë me xi cahme ngatsë naja ngayejen ni. Hane vëhë xi hacuaha hatuxa sua naja me yëjë sa xcusun xi ndaja. <sup>33</sup> Tsajin yo xi cuinchajyë naja, ngayaan xi Nina cavaxijin naja me ta, Nina ne, me vëhë xi tsicjë me jyë naja. <sup>34</sup> Vëhë xi tsajin camahani yo xi ma cjan rë xi ngayaan cún naja. Tsajin ta, Jesucristu ne, me vëhë xi ha cahme me hacuaha ha cavuya me cjuahñu, hane me vëhë xi jemu casahmi jyë casahmi hnga Nina me cojo Hasen rë me ngajan hiscan tacun me cojo rë Nina. Hacuaha me vëhë xi tichjatje me ngatsë naja. <sup>35</sup> Ngajan xi tsajin camahani mé xcusun xi cuaxëxin naja tsëhë cjuahmutacun rë Jesucristu, handasa cuatjun cjuañihi, handasa sacuiyiin hacutjin naxentjen yojo naja, handasa yo tsujyihya tjengui naja cojo cjuahngatacun, handasa cuma jindya nangui naja, handasa cumachaja naja tsjian naja, handasa cuinechantahan tsavi

xi mé xi cuma naja, handasa tsiquehen naja xuta. Hatuxa tsajin mé xcusun xi cuacun vë xi cuma cuaxëxin naja tsëhë cjuahmutacun rë Jesucristu. <sup>36</sup> Hacuaha camahindu ngujo cjua xcun xujun rë Nina xi chja cuitjin:

Yëjë ni hora ne, titsiquehen niji xuta ngu jo ngayin ngatsë rë xi ladu nuju ngayin;

xi má rë xuta ne, ngayin ne, sacuaha chu tsánga xi cjue cueya chu ngayin.

Cuatjin camahindu. Sacuatjin camahindu tsëhë xuma xuta xi cuacun jan ne, hacuaha cuatjin tivatjun tijima. <sup>37</sup> Peru caa naja yëjë ni cjuacjintacun vëhë, hisca vetjun ndaja sa ta, tsëhë xi Jesucristu ne, visecoo naja me, tsëhë xi hmucacun naja me. <sup>38</sup> Hane ngahan ne, camangucácun ta tsajin mé xcusun xi cuma cuaxëxin naja tsëhë cjuahmutacun rë Nina: sa cjuaveya sa cjuahñu, sa ángel sa xuta xi ma titjun, sa cjuacjintacun xi tivatjun tijima, sa cjuacjintacun xi sehe nduva, sa xutacjín xi choho vëë naja sa chircun, <sup>39</sup> sa ngajan ngahnga nduva, sa nguehe nangui nduva, o sa tu mé ni xcusun xi yahnga xi casahmi Nina ne, cumaji cuaxëxin naja tsëhë cjuahmutacun xi tjin rë Nina cojo naja ngatsë rë xi tjin tangun cjuatacun naja cojo Nai naja Jesucristu.

## 9

### *Nina cavaxijin me xuta Israel*

<sup>1</sup> Quihndë ne, sacuaha ngahan xi tsëhë Jesucristu ngahan ne, nguehe cuichjá cjuaquixi, hacuiin vindácha nuju. Hane tsëhë xi jiya Hasen rë Nina ngajñi rë cjuatacun naha ne, vëhë xi hvë cojo cjuatacun naha ta cjua xi chjá ne, cjuaquixi hya xi chjá xi <sup>2</sup> jercu tu choho camahani má ná, jemu jyë cjuava xi jiya cahntsua xahasen naha. <sup>3</sup> Hisca má cáacun ne, cjuéhya rë Nina xi cuaxëxin ná me tsëhë Jesucristu sa xi cojo cjuatacun vëhë ne, yëjë ni xuta xi tangun xutachanga naha cojo ne, cuma sacú rë me cjuandaja rë Nina. <sup>4</sup> Xuta xi cuacun vë ne, xuta Israel me. Me vëhë xi camá me quihndi rë Nina, camachaya rë me hacutjin jemu jyë hnga Nina cojo Hasen rë me, camachihin ngu jo compromisu rë Nina cojo rë me, casacu rë me ley rë Nina, camachaya rë me hacutjin meje rë xi chjaharcun rë Nina, casacu rë me cjua rë Nina hacutjin sua Nina me cjuandaja. <sup>5</sup> Me vëhë xi canduva me tjë rë xutachanga niji, hacuaha tjë rë me vëhë ne, canduva Jesucristu sacuaha ngu xuta. Hane Jesucristu jan ne, me vëhë xi Nina me tsëhë jingujyë ni ngasunhndë, hacuaha chjaharcun rë me yëjë nu yëjë nixtin. Cuatjin jain.

<sup>6</sup> Hacuuiin chjá xi cavetjincaain cjua xi cachja Nina cojo xuta Israel. Ha hyun ta xuta xi canduva tjë rë xutachanga xi hmí

rë Israel ne, hacuiin yějë me xi xuta ladu rë Israel xi cjuaquixi me. <sup>7</sup> Hacuaha xuta xi canduva tjë rë Abraham ne, hacuiin yějë me xi ladu rë Abraham me xi cjuaquixi, ta cuitjin cachja Nina cojo Abraham: “Suvá tjë rë quihndi riji Isaac ne, vëhë ni xuta xi cuma tjë riji xi cjuaquixi.” Cuatjin cachja Nina. <sup>8</sup> Cuma cuinújan ne, hacuiin yějë ni xuta xi canduva tjë rë Abraham xi jni xi yojo rë me xi cuma quihndi rë Nina ta, suvá xuta xi tsin me sacuatjin cachja Nina cojo Abraham ne, me vëhë xi cuichja Nina xi tjë rë Abraham xi cjuaquixi. <sup>9</sup> Cuitjin cachja Nina cojo Abraham hatsëe: “Nixtin xi cuejñá xi cúa nga ne, hya tsin rë na Sara ngu quihndi xihin.” Cuatjin cachja Nina.

<sup>10</sup> Hacuaha hacuiin vëhë ni má yějë cjua vë ta sacuaha catsijo quihndi rë Rebeca ne, ngu ni nahmi rë, me xi xutachanga niji xi hmí Isaac. <sup>11-12</sup> Hane hisca hya xi cjëë tsin quihndi xi cuacun jan, hacuaha cjëë sahmi xi ndaja xi ndajin ne, hya cachja Nina cojo Rebeca cuitjin: “Quihndi riji xi ngascan ne, cuma titjun tsëhë quihndi tjun.” Cuatjin cachja Nina. Cuatjin camá cojo sa xi cuma tsejen xi Nina ne, tjin rë me chuva rë xi cuaxijin suvá me tu yo ni xi meje rë me, hacuaha tsimii sahmi rë tu mé ni xcusun xi casahmi xuta jan. <sup>13</sup> Hacuaha camahindu xcun xujun rë Nina cuitjin: “Cha Jacob ne, catsíhmucacun cha, peru cha Esaú ne, choho cahvë cha.” Cuatjin camahindu.

<sup>14</sup> Xi cuatjin ne, ¿há cuinújan xi Nina ne, cuaaintjin xi sahmi me? ¡Jéya, hacuiin! ta <sup>15</sup> Nina ne cuitjin cachja me cojo Moisés: “Ngahan ne, sahme cjuandaja cojo yo xi meje sahme cjuandaja cojo, hacuaha cumayuma ná yo xi meje cuma yuma ná.” <sup>16</sup> Vëhë xi xuta xi sacu rë cjuandaja rë Nina ne, hacuiin xuta xi jemu meje rë, hacuiin xuta xi jemu sahmi vihi sahmi vëhë ta suvá Nina vaxijin me yo xi sua me cjuandaja rë me. <sup>17</sup> Xcun xujun rë Nina ne, chja Nina cojo me xi ma titjun tsëhë xuta Egipto cuitjin: “Ngahan ne, casahme xi camatitjun ngaye cojo sa xi cuatjin tsingácun rë xuta ngahñu naha, hacuaha cojo sa xi xuta tsëhë yějë ni ladu ne, cumachaya rë me yo ngahan.” Cuatjin cachja Nina. <sup>18</sup> Ngajan xi Nina ne, sahmi me cjuandaja cojo yo xi meje sahmi me cjuandaja cojo, hacuaha sahmi me xi mijí cuijne rcu yo xi meje rë me xi cuijni rcu.

<sup>19</sup> Peru ngu ngayun ne, cuinújun cojo ná cuitjin: “Sa cuatjin ne, ¿mé má chaha rë xuta sahmi Nina? ta, tsëhë xi tsajin yo xi catsingatiin rë xcusun xi meje rë Nina xi cuma.” Cuatjin cuinújun. <sup>20</sup> Peru ngayun xi ngu xutajyë ni ngayun ne, ¿yo ngayun xi cuatjin meje cuinújun cojo Nina? Sacuaha ngu xcusun xi casahmi xuta ne, ¿há cuichja cojo xuta xi casahmi jan cuitjin: “¿Mé má cuitjin jyihi canihñu ná?” Cuatjin cuichja. <sup>21</sup> Sacuaha ngu cha chjinetiji ne, hatuxa tjin rë cha xa xi

cjuaha cha ngu xtin ndasi ne, tsindaja cha jo tiji. Ngu tiji jan ne, jemu ndajyihi ngu xa xi satë rë, hane tiji xingu jan ne, ngu xa xi chojyihi satë rë.

<sup>22</sup> Nina ne, tsëhë xi meje sua me cumachaya rë xuta hacutjin xi jemu cuma cjan rë me hacuaha jemu hñu ngahñu rë me ne, vëhë xi cojo yëjë cjuajeya xi tjin rë me ne, cacaa rë me cojo xuta xi hatuxa cuma cjan rë me cojo, xuta xi cavaxijin me xi hatuxa tsicjë me. <sup>23</sup> Cuatjin casahmi jyë cacun Nina, cojo sa xi sua me cumachaya rë xuta hacutjin xi jemu tjin rë me cjuandaja cojo xuta xi hatuxa sua me cjuandaja rë me, xuta xi caviyuju chjine Nina cojo tjun sa, cojo sa xi sacú rë xuta jan cjuandaja rë me. <sup>24</sup> Hane xuta xi cuacun vëhë ne, hacui ngayaan xi cavaxijin naja Nina. Hacuïn suvá ngajñi rë xuta Israel cavaxijin me ta hacuaha cojo ngajñi rë xutaxín cavaxijin me. <sup>25</sup> Sacuaha cjuarë Nina xi catsihindu profeta Oseas ne, cuitjin chja:

Xuta xi hacuïn xuta ladu naha me ne, cuechú nixtin xi sahme xuta ladu naha me;

hacuaha cojo na xi hacuïn tsíhmucacun ne, cuechú nixtin xi jemu tsíhmucacun na.

Cuatjin chja cjuarë Nina.

<sup>26</sup> Hacuaha cachja nga Oseas cuitjin:

Ngu cahndë jan ne, cuitjin cachja Nina cojo xuta: “Ngayujun ni ne, hacuïn xuta ladu naha ngayun.” Cuatjin cachja Nina.

Hane handasa cuatjin cachja Nina, peru cuechú nixtin xi ngajan ne, cuma xuta xi cuacun jan quihndi rë Nina quicun.

Cuatjin cachja profeta Oseas.

<sup>27</sup> Hacuaha cachja profeta Isaías tsëhë xuta tjë rë Israel cuitjin: “Handasa sacuatjin cjín tsumi tsëhë ndachacun cuatjin cjín cuma xuta tjë rë Israel ne, peru jemu chuva me xi cuetjutje me ta, <sup>28</sup> Nina ne, hatuxa sahmi me castigu nguehe ngasunhdë, hane xi cuechú nixtin vëhë ne, ngutjen ni sahmi me yëjë ni hacutjin xi cavejña me xi sahmi me.” Cuatjin cachja profeta Isaías. <sup>29</sup> Hacuaha hatsëë ne, cachja nga Isaías cuitjin: Nina, me xi hatuxa matitjun tsëhë yëjë ni xi tjin, sa ngahnga sa ngasunhdë ne, sa xi casuaain naja me xuta xi cuma tjë naja ne,

tangun ni cafë ngayaan sacuatjin cafë camahani xuta nandya Sodoma cojo xuta nandya Gomorra.

Cuatjin cachja Isaías.

*Catsitjungui xuta tjë rë Israel ndiya rë Nina*

<sup>30</sup> Xi cuatjin ne, cuma cuinújan xi Nina ne, catsicjë me jyë rë xutaxín ngatsë rë xi camangucacun xutaxín jan cojo

Jesucristu, handasa hatsëe ne, hisca cuendaain rë xutaxín jan hacutjin sahmi Nina cojo jyë rë me. <sup>31</sup> Peru xuta tjë rë Israel ne, handasa jemu casahmi me ngahñu xi meje rë me xi tsicjë Nina jyë rë me ne, peru catsicjiin Nina jyë rë me. <sup>32</sup> ¿Mé má cuatjin catsicjiin Nina jyë rë me? Catsicjiin Nina jyë rë me ta, tsëhë xi xuta tjë rë Israel xi cuacun jan ne, meje rë me xi tsicjë Nina jyë rë me ngatsë rë xcusun xi casahmi me xcun ngasunhdë rë me. Peru tsëhë xi mijí cumangucacun me cojo Jesucristu ne, vëhë xi sacuaha xi caxtenguiya rë me “ndyojo xi xtenguiya rë xuta”. <sup>33</sup> Cjua vëhë ne, sacuaha cjua xi cachja Nina xcun xujun rë me xi chja cuitjin:

“Ngahan vejñávasen ngu xihin ngajan ndetjún Sión, hane xihin jan ne, sacuaha ngu ndyojo xi xtenguiya rë xuta; peru xuta xi cumangucacun cojo xihin jan ne, tsajin nu tsajin nixtin xi cuetju sava me.”

## 10

<sup>1</sup> Ngayujun ni matsejen ne, cuichjá cojo nuju ta xahasen naha ne, jemu meje rë xi xuta tjë rë Israel ne, cuetjutje me tsëhë jyë rë me. Hacuaha cuatjin féhya rë Nina. <sup>2</sup> Cuma cuichjá cojo nuju ta xuta tjë rë Israel ne, hacuaha jercu tsiniya cacun me xi meje rë me Nina. Peru hacuiin ndaja vijnercu me hacutjin chuya rë Nina. <sup>3</sup> Hvín me hacutjin tsicjë Nina jyë rë xuta. Peru jemu meje tsicjë suvá me jyë rë me. Vëhë xi casuaain me yojo rë me cojo ndiya rë Nina, cojo sa xi Nina tsicjë me jyë rë me. <sup>4</sup> Jesucristu ne, me vëhë xi casahmichihin me yëjë ni cjua xi vitexa ley rë Moisés, cojo sa xi yëjë ni xuta xi cumangucacun me cojo Jesucristu ne, cjuë jyë rë me.

<sup>5</sup> Moisés jan ne, hatsëe catsihindu me cjua vihi tsëhë xuta xi meje rë me xi cjuë jyë rë me ngatsë rë xi sahmi me hacutjin vitexa ley rë Moisés. Cuitjin catsihindu me: “Xuta xi sahmi me sacuatjin vitexa ley ne, sacú rë me cjuahñu xatsë ngatsë rë xi cuatjin sahmi me.” Cuatjin catsihindu Moisés. <sup>6</sup> Peru hacuaha cuitjin cachja nga Moisés tsëhë xuta xi cjuë jyë rë me ngatsë rë xi mangucacun me cojo Nina: “Mijí rë xi ningatehetacuín cuitjin: ¿Yo xi cjueniji hisca ngahnga?” —sacuaha xi cuinduvajne cojo Jesucristu—; <sup>7</sup> o ¿Yo xi cjuejne cahntsua nduchin? —sacuaha xi cuinduvaniji cojo Jesucristu xi jiya me ngajñi rë nima. <sup>8</sup> ¿Hacutjin chja Moisés xcun cjua rë Nina ni? Cuitjin chja: “Cjua rë Nina ne, ha jemu tiña tacun xi cuma nuju; ha hinchá ntsuvun xi cuinújun, hacuaha ha hinchá cahntsua xahasen nuju.” Cuatjin cachja Moisés. Cjua rë Nina jan ne, hacui cjua tsëhë hacutjin meje rë xi cumangutacun cojo Jesucristu, vëhë cjua xi titihín jimachaya rë xuta. <sup>9</sup> Sa xi ninguíxun cojo ntsuvun xi Jesucristu ne, Nina



me, Nai nuju me, hacuaha sa xi cojo xahasen nuju macjain nuju xi catsicuya Nina Jesucristu cjuahñu ne, cuétjuntjun tséhë jyë nuju. <sup>10</sup> Cuatjin cuma ta, tséhë xi macjain naja cojo xahasen naja, sehe tsicjë Nina jyë naja, hacuaha ninguxen cojo ntsuvan hacutjin macjain naja, sehe cuaxëtje naja Nina.

<sup>11</sup> Cuatjin ta, cjua rë Nina ne, cuitjin chja: “Yëjë xuta xi mangucacun cojo Nina ne, hatuxa cuetjin savaain me.” Cuatjin chja xujun rë Nina. <sup>12</sup> Nina ne, tangun ni vutsejen me xuta tjë rë Israel cojo xutaxín ta me xi Nai naja ne, hacui ni me xi Nai rë yëjë ni xuta. Me vëhë xi jemu sua me cjuandaja rë me xi cuma rë yëjë xuta xi fehya rë me. <sup>13</sup> Hisca xujun rë Nina ne, cuitjin chja: “Yëjë xuta xi fehya me Nai naja cjuandaja ne, cuetjutje me.” Cuatjin chja xujun rë Nina. <sup>14</sup> Tjin rë yo xi cuichja cojo ná cuitjin: “Peru ¿hacutjin cuma cjuehya xuta cjuandaja rë ngu xi hisca cjëë cumangucacun me cojo ni? Hane ¿hacutjin cumangucacun me cojo ngu xi hisca cjëë cumachaya rë me yo ni? Hane ¿hacutjin cumachaya rë me yo jan, sa xi tsajin yo sua cumachaya rë me ni? <sup>15</sup> Hane ¿hacutjin cuma cjue sua me cumachaya rë xuta yo jan, sa xi cjëë tsingatju Nina me ni?” Cuatjin cuichja. Xujun rë Nina ne, cuitjin chja: “Jemu ndatjin camahani hya xi fehe ngu me xi nduvacojo ngu cjuandajyihí.”

<sup>16</sup> Peru chjá ngahan ta hacuiin yëjë xuta cavihndë me tséhë cjuandajyihí jan. Hacuaha cuatjin chja profeta Isaías xcun xujun rë Nina: “Ngayun, Nai niji, jemu chúva me xi camangucacun cojo cjua niji.” Cuatjin chja Isaías. <sup>17</sup> Ngajan xi cumangutacun hya xi ha camachaya naja ngu cjua, hane cumachaya naja hya xi yo cuinduva sua cumachaya naja ngu cjua xi chja hacutjin casahmi Cristu.

<sup>18</sup> Peru ¿há cjëë cumachaya rë xuta? chjá han. ¡Jéya, hatuxa camachaya rë me! Chja nga xujun rë Nina cuitjin:

Jingujyë ni ngasunhndë ne, quiji cjua rë me, hisca hiscan vijnetaha ngasunhndë cavechu cjua rë me.

Cuatjin chja. <sup>19</sup> Cúya cuichjá nga ngu ndiya: Xuta tjë rë Israel ne, ¿há hvíin me ni? ¡Jéya! hatuxa vëë me ta, tséhë xi catsihindu Moisés cjua xi cachja Nina cuitjin:

Ngahan ne, sahme xi jemu nihñu cjuaxín ngatsë rë xi sahme cjuandaja cojo xutaxín;

tsicján nuju ngatsë rë xi sahme cjuandaja cojo xuta xi hvíin me yo ngahan.

Cuatjin catsihindu Moisés cjua rë Nina. <sup>20</sup> Hacuaha catsacjuiin Isaías hya xi catsihindu me cuitjin:

Xuta xi hacuiin cavanguise ná me ne, me vëhë casacu rë me ngahan;

hacuaha xuta xi cuendaain rë me tsahan ne, me vëhë xi casuá camachaya rë me yo ngahan.

Cuatjin cachja Isaías. <sup>21</sup> Peru catsihindu Isaías cjuá xi cachja Nina tsëhë xuta Israel cuitjin: “Yëjë nixtin tsahan, xuta xi catsitjungui ná me.” Cuatjin catsihindu Isaías cjuá rë Nina.

## 11

### *Nina ne, cavaxijin me ngu jo xuta Israel*

<sup>1</sup> Quihndë ne, tsëhë xi cuatjin catsitjungui xuta Israel ndiya rë Nina ne, cuinengësë nuju ngu cjuá: ¿há catsitjungui Nina xuta rë me ni? ¡yéya, hacuiin cuatjin! Ta ngahan ne, hacuaha ngu xuta Israel ngahan, tjë rë Abraham ngahan, hacuaha tjë rë Benjamín ngahan. <sup>2</sup> Hisca ntsacu cavetsihin ne, ha vëë Nina yo xi meje rë me xi cuma xuta ladu rë me, hacuaha tsitjunguiin me xuta xi cuacun vë quihndë. ¿Há vitsijiin nuju hacutjin chja xcun xujun rë Nina hiscan xi catsihindu profeta Elías cjuá xi cachjajyë me cojo Nina tsëhë xuta Israel? Cuitjin cachja Elías: <sup>3</sup> “Ngayun, Nai naha, ha catsiquehen xuta profeta nuju hacuaha ha catsinguetsun me cahndë hiscan xi cjue cjuatjo xi cuma nuju. Ha tu suva sa tejña, peru hacuaha hisca cojo ngahan tivanguise ná me xi tsiquehen ná me.” Cuatjin cachja Elías. <sup>4</sup> Peru ¿hacutjin catsicuya Nina cjuá cojo Elías? Cachja Nina: “Ngahan ne, ha cavaxëxen yatu mil xuta, hane xuta xi cuacun jan ne, cjëë cjue cuixcuhnchi me xcun nina ndyoyo xi hmí Baal.” Cuatjin cachja Nina cojo Elías. <sup>5</sup> Hacuanitjin ni quihndë ta handasa jemu camachuva me peru tjin sa me xi híncha ndiya rë Nina ta, tsëhë xi cavaxijin Nina xuta jan ngatsë rë cjuandaja rë Nina cojo rë me. <sup>6</sup> Peru camá ngatsë rë cjuandaja ni rë Nina cojo rë xuta xi cuacun vë, hacuiin ngatsë rë xcusun xi casahmi xuta jan. Ta sa xi cavaxijin Nina me ngatsë rë xcusun xi casahmi me ne, cjuandaja rë Nina ne, sacuaha xi venguiin chjí rë.

<sup>7</sup> Ngajan xi cuma cuinújan xi hacuiin yëjë xuta Israel xi casacu rë me xi vanguisse me ta ngujo ni xuta Israel xi cavaxijin Nina ne, me vëhë ni casacu rë me. Hane me xi yahnga jan ne, Nina casahmi me xi mijí cuijnercu me. <sup>8</sup> Camá sacuatjin camahindu xcun xujun rë Nina hiscan xi chja cuitjin: “Nina ne, casua me xuta xi cuacun vë ngu cjuatacun sacuaha cjuatacun rë ngu cha chihi. Vetaain rcu me hacuaha vijnii rcu me. Hisca quihndë ne, cuatjin cún me.” Cuatjin camahindu.

<sup>9</sup> Hacuaha hatsëë cachja David cuitjin cojo Nina:

Meje ná xi yëjë ni cjuandaja xi tuhun rë xuta ne, catuya sacuaha ngu chen, sacuaha ngu changa, sacuaha ngu xcusun xi xtenguiya rë me, sacuaha ngu castigu xi vangui suvá me.

<sup>10</sup> Meje ná xi catama rcá me, cojo sa xi cumatsijin rë me; hacuaha catindi ngaxtun me, cojo sa xi tsajin nu tsajin nixtin xi cuma quixi ngaxtun me. Cuatjin cachja David.

*Tivetjutje xutaxín*

<sup>11</sup> Quihndë ne, cuinengësë nuju ngu cjua vi: Hya xi cavetjuxin xuta tjë rë Israel tsëhë ndiya rë Nina ne, ¿há ngu ndiya xa ni cachaja camahani me? ¡Jéya, hacuiin cuatjin! ta ngatsë rë cjuatsehen rë xuta tjë rë Israel xi cuacun jan ne, casua Nina cahndë xi cuetjutje xutaxín, cojo sa xi xuta tjë rë Israel ne, sahmi me cjuachini. <sup>12</sup> Ngajan xi ngatsë rë cjuatsehen rë xuta tjë rë Israel jan ne, jemu casacu rë xuta ngasunhndë cjuandaja rë Nina. Ngatsë rë xi cachaja xuta tjë rë Israel ndiya rë Nina ne, jemu casacu rë xutaxín cjuandaja rë Nina. Peru sa xi cuatjin camá ne, hya xi sacú nga rë xuta tjë rë Israel ndiya rë Nina ne, jercu sacú sa rë xuta ngasunhndë cjuandaja rë Nina.

<sup>13</sup> Quihndë ne, ngayun xi xutaxín ngayun ne, nguehe cuichjá sa cojo nuju ngu jo cjua matsejen. Ngahan ne, casuaxa ná Nina xi cjuë suá cumachaya rë xutaxín cjua rë Nina. Vëhë xi jemu sahme nguñajacacun xa naha, <sup>14</sup> cojo sa xi cuma chini xuta xi tjë rë xutachanga naha cojo nuju. Hane xi cuatjin ne, cuisécoo rë xi cuetjutje ngu jo me. <sup>15</sup> Ngatsë rë xi catsitjungui Nina xuta tjë rë Israel ne, vëhë cavuxaha ndiya xi cuma xticja si xi tacun ngajñi rë Nina cojo xutaxín. Ngajan xi hya xi cjuahatsja nga Nina xuta tjë rë Israel jan ne, jercu ndajyihí camahani ngu cjuandaja xi cuetjucaa ta, sacuaha xi ngu nima cuya cjuahñu.

<sup>16</sup> Sa xi chjahan ngu rquí nahyu hane cuinújan ta nahyu vëhë ne, cuma tsëhë Nina, hacuaha cojo yëjë ni nahyu xi vaqui jan ne, hacuaha tsëhë Nina. Hacuaha sa xi cuinújan xi tyjama rë ngu ya ne, cuma tsëhë Nina, hacuaha hisca cojo tsja rë ya jan ne, hacuaha tsëhë Nina.

<sup>17</sup> Hacuaha sa xi xtisun ngujo tsja rë ngu ya olivu ndaja hane cuinduva tsja rë ngu ya olivu nguijña setahacoo cojo ya olivu ndaja jan ne, sehe xi cuatjin cuma ne, tsja rë ya olivu nguijña jan ne, hacuaha sacú rë cjuahñu rë tyjama rë ya olivu ndaja jan. Ngayun xi xutaxín ngayun ne, sacuaha tsja rë ya olivu nguijña má ngayun, xi casacu nuju cjuandaja rë Nina cahndë rë xuta tjë rë Israel xi sacuaha tsja rë ya olivu ndaja má me. <sup>18</sup> Peru mijí rë xi nihñu yehe yojo nuju hane choho cuinújun tsëhë xuta Israel ta, sa xi meje nihñu cuatjin ne, ninguitsjun ta hacuiin tsja rë ya xi tsuvangui rë tyjama rë ta tyjama ne, vëhë tsuvangui rë tsja rë ya.

19 Cuma cuinújun cojo ná cuitjin: “Peru catsitjungui Nina ngu jo xuta tjë rë Israel cojo sa xi ngahan ne, cuma tsëhë Nina ngahan.” 20 Cuatjin cuma cuinújun hane cjuaquixi cjua vëhë. Ngatsë rë xi camanguaaincacun me cojo Jesucristu ne, vëhë xi catsitjungui Nina me. Hane ngayun ne, ngatsë ni rë xi camangutacun cojo Jesucristu ne, vëhë xi casacu nuju cahndé vë. Peru mijí rë xi nihñu jyë yojo nuju ta xi meje rë ne, rcun cuma hitsë. 21 Cuatjin meje rë ta, tsëhë xi Nina ne, sa xi catsinchataain me xuta tjë rë Israel xi hatuxa xuta ladu rë me ne, hacuaha tsinchataain nuju me. 22 Cahyun ni ne, Nina ne, jemu ndaja me peru hacuaha jemu cjan rë me. Ngu ladu ne, jemu cjan rë me cojo xuta xi cavetjuxin me tsëhë ndiya rë Nina. Hane ngu ladu nga ne, jemu ndaja Nina cojo nuju, sa xi cuangunxcun cojo cjuandaja rë me. Peru sa tsajin ne, cojo ngayun tsitjungui nuju me. 23 Hane xuta tjë rë Israel xi cuacun jan ne, sa xi cuiyujuxín me xi manguaaincacun me cojo Nina ne, sacú nga rë me cahndé rë me ta Nina ne, hatuxa cuma sua nga me cahndé vëhë. 24 Ngayun xi xutaxín ngayun, hacuain xuta ladu rë Nina ngayun titjun ne, peru Nina casahmi me ngayun xuta ladu rë me. Hane xi cuatjin sahmi me ne, hitsë sa chjaain sahmi me xi xuta tjë rë Israel ne, cuma nga me xuta ladu rë Nina ta, tsëhë xi xuta tjë rë Israel ne, hatuxa xuta ladu rë Nina me titjun.

### *Cuetjutje xuta tjë rë Israel*

25 Ngayujun ni ne, meje ná xi cumachaya nuju ngu cjua xi sehe casua Nina, cjuatahahma xi cjëë cumachaya naja. Meje ná xi cumachaya nuju cojo sa xi hacuain nihñu yehe yojo nuju. Cjua xi cuichjá cojo nuju ne, cuitjin fi: jemu cjín xuta tjë rë Israel ne, vijnií rcu me cjua rë Nina. Cuatjin cuijnii rcu me hisca hya xi yëjë xutaxín xi cavaxijin Nina ne, cuisehen me ndiya rë Nina. 26 Sehe yëjë xuta tjë rë Israel ne, cuetjutje me tsëhë jyë rë me sacuatjin camahindu xcun xujun rë Nina:

Ngajñi rë xuta tjë rë Israel ne, cuetjújñi ngu me xi cuaxëtje rë xuta,  
hane cuaxëxín me xcusun rë xuta xi tjë rë Jacob xi fahar-  
cuaain rë Nina.

27 Hatuxa sahmechehen compromisu naha cojo xuta, hya xi cjuaháxen cjuatsehen rë me.

Cuatjin cachja Nina.

28 Ngu ladu ne, tsëhë xi catsitjungui xuta tjë rë Israel cjuandajyihí xi chja tsëhë Jesucristu ne, vëhë xi choho vëë Nina me, cojo sa xi ngayun xi xutaxín ngayun ne, satë nuju cjuandajyihí vëhë. Peru ngu ladu nga ne, tsëhë xi ha cavaxijin Nina me ne, vëhë xi Nina ne, hmucacun me xuta Israel jan, ngatsë rë xutachanga rë me. 29 Cuatjin ta tsëhë xi hya xi

vaxijin Nina ngu xuta cojo hya xi sua rë me cjuandaja ne, hatuxa sehe tsindeyaain Nina cjuatacun rë me. <sup>30</sup> Ngayun xi má yun xutaxín, titjun ne, canuhyun tsëhë Nina. Peru quihndë ne, camayuma rë Nina ngayun ngatsë rë xi xuta tjë rë Israel ne, hacuaha vihndiin me tsëhë Nina. <sup>31</sup> Hacuanitjin rë xuta tjë rë Israel jan ta quihndë ne, hacuaha vihndiin me tsëhë Nina, cojo sa xi sacú rë me cjuayumatacun rë Nina ngatsë rë xi ngayun ne, casacu nuju cjuayumatacun rë Nina. <sup>32</sup> Nina ne, catsismicacun me yëjë ni xuta, cojo sa xi cuihndiin xuta tsëhë me, hane cojo sa xi hacuaha cumayuma rë me ngayëjë ni xuta.

<sup>33</sup> Nina ne, jercu jyihi cjuanchina xi tjin rë me, jercu jyihi cjuatacun xi vechutaha me, jercu vëë me. Maji vijnercun hacutjin tsingatahacacun me. Maji vijnercun hacutjin sahmi Nina. <sup>34</sup> Sacuatjin chja xujun rë Nina ne: “Tsajin yo vëë cjuatacun rë Nina. Tsajin yo camá catsinguixi rë Nina cojo cjuatacun rë me. <sup>35</sup> Tsajin yo xi cojo tjun sa ne, casua rë Nina ngu cjuatjo, cojo sa xi Nina ne, hatuxa sahmi ngojo me cjuatjo rë xuta jan.” Cuatjin chja xujun rë Nina. <sup>36</sup> Yëjë ni xcusun xi tjin ne, Nina catsingatahacacun me sehe catsindaja me ta, tsëhë xi meje rë me xcusun xi cuacun vë. Meje rë xi nihña jyë nihña hnga Nina yëjë ni nu yëjë ni nixtin. Cuatjin jain.

## 12

### *Hacutjin meje rë xi cuiyuju xuta ladu rë Jesucristu*

<sup>1</sup> Ngayujun ni ne, ngatsë rë yëjë ni xi sehe cachjá cojo nuju ne, vëhë xi meje ná xi ngundiyaxa ni tuhun yojo nuju cojo Nina sacuaha ngu cjuatjo, peru ngu cjuatjo xi quicun, ngu cjuatjo xi hatuxa tsëhë Nina, ngu cjuatjo xi chuya rë me. Cuatjin nihña ta, tsëhë xi Nina ne, jemu tjin rë me cjuayumatacun, hacuaha hatuxa ndatjin xi cuatjin chjahanrcun Nina. <sup>2</sup> Mijí rë xi cuangun tjengun ndiya rë xuta ngasunhndë vi ta cahndë rë vëhë ne, yëjë ni hora ne, tuhun cahndë xi Nina ne, tsindeya me ngayun xi sua nuju me ngu cjuatacun xatsë. Xi cuatjin ne, sacú nuju cjuaquixi mé xi meje rë Nina xi nihña, mé xi ndaja, mé xi chuya rë Nina, mé xi cjuaquixi.

<sup>3</sup> Nina ne, casuaxa ná me xi cuichjá cojo xuta. Hane vëhë xi chjá cojo nuju ngayujun ni ta, mijí rë xi jemu nihña yehe yojo nuju ta meje rë xi ningatuhuntacun hacutjin xi cjuaquixi, tu cutjin cjuandaja xi casua nuju Nina xi camá camangutacun jima ngu ngayun cojo Jesucristu. <sup>4</sup> Ha hyun ta yojo rë ngu xuta ne, tjin tsja, tjin ntsacu, tjin nguisin, tjin jingu sa xcusun tsëhë, peru hacuiin tangun xa xi sahmi yëjë xcusun xi cuacun vë. <sup>5</sup> Hacuanitjin naja ngayaan, handasa cjín má ngayaan ne, peru sacuaha ngu ni yojo má ngayaan hya xi tjin

tangun cjuatacun naja cojo Jesucristu. Ngu ngu ngayaan ne, sacuaha ntsan má ngayaan ne, ngu ngu ngayaan ne, sacuaha ntsacu má ngayaan, ngu ngu ngayaan ne, sacuaha nguisen má ngayaan, peru ngu ni yojo má ngayaan.

<sup>6</sup> Vêhê xi xa xi casacu naja jima ngu ngayaan ne, hacuiin tangun ta tu tjin cjuandaja xi casua naja Nina ne, hacuanitjin ni xa xi satê naja. Sa xi casua nuju Nina xa xi cuinújun cjuatacun rê me cojo xuta ne, tinújun, peru sacuatjin cojo ngahñu xi tjin nuju xi mangutacún cojo Jesucristu ne, cuatjin tinújun. <sup>7</sup> Sa xi casua nuju Nina xa xi cuisecun rê jingusa xingueen ne, tisecun rê me. O sa xi casua nuju Nina xa xi cuicuyun cjuatacun rê me ne, ticuyun. <sup>8</sup> Sa xi casua nuju Nina xa xi tuhun rê jingu sa xingueen ngu ndiya ndajiyihi ne, cuatjin nihñu. Sa xi casua nuju Nina xa xi cuisecun rê jingu sa xingueen cojo tujún xi ma chaja rê me ne, tisecun rê me cojo ngu xahasen tyjahi, cojo ngu cjuatacun tyjahi. Sa xi casua nuju Nina xa xi chjuhunntsun ngu xa xi satê nuju ne, nihñu xa jan nguñajatacun. Sa xi casua nuju Nina xa xi chjuhuncuendun xuma xingueen xi mé má rê me o mé cjuacjintacun xi tivatju me tijima ne, sehe chjuhuncuendun me cojo cjuasua.

<sup>9</sup> Mijí rê xi jo xcun jo ntsuvun xi nihmutacún xingu xingu xingueen. Catamachohotacun cojo ndiya rê cjuatsehen, hane tuhun yojo nuju cojo ndiya rê cjuandaja. <sup>10</sup> Nihmutacun xingun sacuatjin nihñu hmu tacún tsuhun jain. Hacuaha chjuhuncun xingun sacuaha xi me vêhê xi hitsê sa ma titjun me tsujun. <sup>11</sup> Chjuhuncuendun nguñajatacun cuidadu nuju, hacuiin nihñu tsêhê. Meje rê xi sacuaha xi quisechun ngayun xi tisecun nihñu xa rê Nai naja.

<sup>12</sup> Tuhun cjuasua xahasen nuju ngatsê rê xi Nina vetuhun tacun me. Caticaa nuju yêjê ni cjuañihi xi vatjun má. Hacuaha yêjê ni hora ne, nihñu oración nuju cojo Nina.

<sup>13</sup> Tisecun rê xuta ladu rê Nina hya xi tjin rê me cjuachaja. Hacuaha cojo cjuandaja chjuhunntsun xuta ngu nangui hya xi fehe me ndya nuju.

<sup>14</sup> Chjahyun cjuandaja rê Nina xi cuma rê xuta xi tsujiyihyatjengui nuju me cojo cjuahngatacun. Hacuiin chjahyun ngu cjuaxti xi cuma rê me ta ngu cjuandaja chjahyun.

<sup>15</sup> Tuhun cjuasua xahasen nuju cojo xuta xi sua rê me, hane xuta xi jihnda me ne, hacuaha chjihndun cojo rê me. Xi cuatjin nihñu ne, tsejen xi hmutacún jain me.

<sup>16</sup> Nihñu tangun cjuatacun nuju cojo xingun xingu xingu ngayun. Hacuiin nihñu yehe yojo nuju ta xi meje rê ne, nihñu tangun cojo, handasa xuta xi yuma cjuatacun rê. Hacuaha hacuiin nihñu sacuaha xi jercu vechutaha cjuatacun nuju.

<sup>17</sup> Mijí rë xi nicuyun ngu cjuachan xi casahmi xuta cojo nuju ta xi meje rë ne, nihñu ngujoyë xi nihñu cjuandaja xcun yëjë ni xuta. <sup>18</sup> Sa xi cuma ne, nihñu ngujoyë hisca hiscan vechu cjuatacun nuju, cojo sa xi cuma cuinechun ngu cjuandaja ngu cjuajeya cojo yëjë ni xuta. <sup>19</sup> Cuichjá cojo nuju sacuaha xi quihndi naha ngayun: xicanihñundujun suvun ngu cjuahn-gatacun xi sahmi xuta cojo nuju ta tuhun cahndë xi Nina ne, cuma cjan rë me cojo xuta xi casahmi jan. Ta Nina ne, cachja me xcun xujun rë me cuitjin: “Ngahan satë ná xi sahme ngojo cojo xuta tsehen; hatuxa ngahan sahme ngojo.” Cuatjin chja Nai naja. <sup>20</sup> Nihñu sacuatjin chja xujun rë Nina xi chja cuitjin: “Xuta xi choho vëë ri me ne, sa xi vojo rë me ne, tehe xi sinë me; hacuaha sa xi xinda rë me ne, tehe xi cuihi me; sa xi cuatjin nihñi cjuandaja vëhë ne, nihñi xi cuma sava rë me.” Cuatjin chja xcun xujun rë Nina. <sup>21</sup> Xicatuun cahndë xi cjuatsehen ne, tsinguetsun rë cjuatacun nuju. Cahndë rë vëhë ne, cojo cjuandaja xi nihñu ne, ningquetsun cjuatsehen.

## 13

### *Hacutjin cuinuhyan tsëhë xutaxa rë*

<sup>1</sup> Meje rë xi ngayejen ni ne, cuinuhyan tsëhë xutaxa rë ta, tsëhë xi tsajin xutaxa rë xi viyuju me sa xi suaain Nina cahndë cuiyuju me. Hane xutaxa rë xi siu ne, cuatjin siu me ta, tsëhë xi casuaxa Nina me. <sup>2</sup> Vëhë xi xuta xi sahmi condra me xutaxa rë ne, sahmi me condra cjua xi Nina cavitexa me. Hacuaha xuta xi cuatjin sahmi condra ne, sacú rë me ngu castigu. <sup>3</sup> Xuta xi sahmi cjuandaja ne, hacuiin tsacjun me xutaxa rë ta xuta xi sahmi cjuatsehen ne, me vëhë xi tsacjun me. ¿Há meje nuju xi tsajin mé rcun xutaxa rë? Nihñu cjuandaja, sehe xutaxa rë ne, cuaxëndaja me ngayun. <sup>4</sup> Cuatjin sahmi xutaxa rë ta, tsëhë xi casuaxa Nina me xi cuisecoo nuju me. Peru sa xi nihñu cjuatsehen ne, meje rë xi rcun xutaxa rë ta, tsëhë xi hacuiin tu mahya xi yaha me xa xi sahmi me castigu ta, tsëhë xi casuaxa Nina me xi sahmi me castigu xuta xi hatuxa sahmi cjuatsehen. <sup>5</sup> Vëhë xi meje rë xi cuinuhyan tsëhë xutaxa rë, hacuiin suvá ni ngatsë rë castigu xi cuatjun cuma ta hacuaha cojo ngatsë rë xi cojo cjuatacun naja ne, ha hyan ta ndatjin xi cuatjin nuhyan tsëhë me.

<sup>6</sup> Hacuaha vëhë xi vechjun tujúnsa nuju ta, tsëhë xi hatuxa Nina caviyuju rë me xi fahacuenda me cjuacjintacun vë. <sup>7</sup> Tuhun rë jima ngu xutaxa rë xi satë rë me. Me xi faha tujúnsa ne, techjun cojo rë me; me xi faha tujún tsëhë xi xteña ne, hacuaha techjun cojo rë me. Cuatjin tinuhyun tsëhë me xi satë rë xi cuinuhyan tsëhë, hacuanitjin chjuhuncun me xi satë rë xi chjahanrcun.

*Cjuahmutacun ne, vëhë sahmichihin sacuatjin vitexa ley rë Nina*

<sup>8</sup> Mijí rë xi yëjë ni nixtin quitjun tsëhë xuta, ta ngu ni xcusun xi hatuxa quitjen ne, xi nihña hmu tacun xingueen. Cuatjin ta, yo xi sahmi hmu cacun rë xuta ne, ha cojo vëhë ni ne, sahmichihin sacuatjin chja ley rë Moisés. <sup>9</sup> Ley vëhë ne, cuitjin chja: “Xicanindesuun cojo rë ngu chjuun o cojo rë ngu xihin xi hacuiin tsujun, xicanicuun xuta, xicanihñuu cjuachëjë, xicanimuju ngu xcusun xi hacuiin tsujun.” Cjua vëhë cojo yëjë sa cjua xi chja ley jan ne, cuitjin vijne: “Meje rë xi nihñu hmu tacún xuta sacuatjin nihñu hmu tacún suvun yojo nuju.” <sup>10</sup> Cuatjin chja ley ta, ngu xuta xi tjin rë me cjuahmutacun ne, hacuiin choho sahmi me cojo xuta. Vëhë xi hya xi nihña hmu tacun xuta ne, ha nihñachehen sacuatjin chja ley xi cavitexa Nina.

<sup>11</sup> Cuatjin meje rë xi nihñu ta, tsëhë xi ha hyun ta ha cavechú nixtin xi ningascun rë cjuatacun nuju ta, tsëhë xi nixtin xi cuetjutjen tsëhë jyë naja ne, hacuiin cjin sa tacun, sacuatjin hya xi sehe tu camangutacun cojo cjua xi chja tsëhë Jesucristu. <sup>12</sup> Sacuaha xi nixten ne, ha tivatju, hane meje sahasen. Vëhë xi meje rë xi cuejñaxen xcusun xi má nixten, hane cuetseen nihña xcusun xi má nguixtin. <sup>13</sup> Meje rë xi cuetseen nihña cjuandaja, sacuatjin meje rë xi nihña hya xi tujyehenyan nguixtin. Mijí rë xi nihña cjuachihi, mijí rë xi va má ngayaan nechan sacuaha xi cheen hya xi tinihña ngu suhi, mijí rë xi nihña cjuachini, mijí rë xi nihña cjuatsehen cojo jingu sa yachjin, o sa xi hisca cojo jingu sa xihin, mijí rë xi chicjanyan tu mé ni xcusun, mijí rë xi nihña cjuaxintacun. <sup>14</sup> Peru nihñu tangun cjuatacun nuju cojo Nai naja Jesucristu, hane ha quihndë mijí rë xi ningatuhuntacun xi nihñu yëjë ni hacutjin fehya yojo jyë nuju.

## 14

*Mijí rë xi cuinújantahan xingueen*

<sup>1</sup> Sacuaha ngu xuta ladu rë Jesucristu xi cjëë ndaja cuijn-ercu me yëjë ni cjuachacun xi macjain naja ne, tuhun cahndë xi cuisehen me ladu nuju, peru hacuiin xi chicjun cojo me ngajñi rë cjuavisiajmi nuju cojo rë me. <sup>2</sup> Cuichjá cojo nuju ngu cjua. Yahnga xuta xi ndaja vijne rcu me cjuachacun naja ne, jinë me tu mé ni xcusun comida. Peru yahnga me xi cjëë ndaja cuijne rcu me ne, ndeya ni jinë me. <sup>3</sup> Peru xuta xi jinë me yëjë ni xcusun ne, mijí rë xi sahmi xta me cojo xuta xi jini yëjë ni xcusun. Hacuaha xuta xi jini me yëjë ni xcusun ne, mijí rë xi cuichjataha me xuta xi jinë yëjë ni xcusun ta, tsëhë xi ha cafahatsja Nina xuta jan. <sup>4</sup> Cuma cuinújin: ¿mé



cuenda nuju ngayun xi nújuntuhun rë mosu rë jingu sa xuta ni? Nai rë mosu jan ne, me vëhë cuichja me há ndaja há ndajin xa casahmi mosu rë me. Hane xuta ladu rë Nai naja jan ne, hatuxa cuetju ndaja me ta, tsëhë xi Nai naja ne, ma sahmi me xi cuetju ndaja xuta ladu rë me.

<sup>5</sup> Cuichjá nga cojo nuju ngu cjua. Yahnga xuta ne, tjin ni nixtin xi jemu faharcun me. Hane yahnga me ne, tangun yëjë ni nixtin xi cuma rë me. Meje rë xi jima ngu xuta ne, catamangucacun me cojo cjuatacun rë suvá me hacutjin meje sahmi me. <sup>6</sup> Me xi faharcun nixtin jan ne, hacuaha faharcun me Nai naja xi faharcun me nixtin hya. Hane me xi jinë yëjë ni xcusun comida ne, faharcun me Nai naja xi cuatjin jinë me ta, tsëhë xi sua me nacuechji rë Nina. Hane me xi jinii yëjë xcusun comida ne, hacuaha faharcun me Nai naja xi cuatjin jinii me ta hacuaha sua me nacuechji rë Nina.

<sup>7</sup> Hisca ngu ngayaan ne, hacuiin nechan cjuahñu ngatsë rë cjuatacun naja suvaan, hacuaha hacuiin cueyan ngatsë rë cjuatacun naja suvaan ta, <sup>8</sup> sa xi nechan cjuahñu ne, nechan ngatsë rë Nai naja, o sa xi cueyan ne, cueyan ngatsë rë Nai naja. Vëhë xi hatuxa tsëhë Nai naja ngayaan ne, sa xi cuinechan cjuahñu o sa xi cueyan. <sup>9</sup> Jesucristu ne, cahme me sehe cavuya nga me cjuahñu cojo sa xi cuma me Nai rë nima cojo Nai rë xuta xi siu quicun me.

<sup>10</sup> Vëhë xi tsajin mé tsëhë xi cuatjin nújantahan rë xingueen, tsajin mé tsëhë xi cuatjin nihña xta cojo xingueen ta, tsëhë xi ngayejen ni ne, hatuxa tjin xi cuechun xcun Nina ne, xi tsichuva me ngayaan cojo cjuatacun naja. <sup>11</sup> Cuitjin camahindu xcun xujun rë Nina cjua xi cachja me:

Tu tjin xi cjuaquixi xi tejña ngahan ne,  
 hacuanitjin ni tjin cjuaquixi cuechú nixtin xi yëjë ni xuta ne,  
 cuinduva cuixcuhnchi me xcun,  
 hacuaha yëjë ni xuta ne, cuichja me ta ngahan xi Nina ngahan.  
 Cuatjin cachja Nina.

<sup>12</sup> Ngajan xi jima ngu jima ngu ngayaan ne, taancuendan rë Nina xcusun xi canihña.

*Mijí rë xi tahan cahndë xi cjuinenguia xingueen ngajñi rë cjuatsehen*

<sup>13</sup> Vëhë xi ha quihndë mijí rë xi nichuvan xingueen cojo cjuatacun rë. Xi meje rë ne, xi cuejñangutacun xi tsajin nixtin xi nihña ngu xcusun xi sahmi xi cjuinenguia xingueen ngajñi rë cjuatsehen. <sup>14</sup> Ngahan ne, tjin tangun cjuatacun naha cojo Nai naja Jesús. Hane ha hvë, hacuaha camangucacun ta tsajin hisca ngu xcusun comida xi hatuxa tsavi xi xinëë. Peru sa xi ngu xuta tsingatahacacun me xi tsavi vihi o tsavi vëhë xi

xinëë ne, xi cuma rë suvá me vëhë xi tsavi. <sup>15</sup> Sa xi cuetsun cjuatacun rë xingun ngatsë rë ngu xcusun xi scuëë me xi xinu ne, ha quihndë tsajin nechunyun ndiya rë cjuahmutacun. Mijí rë xi ninguetsun cjuatacun rë xingun ngatsë rë ngu xcusun xi chinu ta, Jesucristu ne, cahme me ngatsë rë me vëhë. <sup>16</sup> Vëhë xi xicatuun cahndë xi choho cuichja xuta tsëhë xcusun xi ndaja xi nihña ta, <sup>17</sup> tsëhë xi hya xi nechan ngahma gobiernu rë Nina ne, cuendaain rë tsëhë tu mé ni xcusun xi chinë o sa xi hyun. Xi sahmi ngujoyë ne, xi tjín naja ngu xahasen tyjahi, ngu cjuajeya, ngu cjuasua xi sua naja Hasen rë Nina. <sup>18</sup> Xuta xi cuatjin sahmi me xa rë Jesucristu chuya vëhë ne, hatuxa chuya rë Nina tsëhë me, hacuaha ndaja cuichja xuta tsëhë me.

<sup>19</sup> Vëhë xi cuanguen tjenguen ndiya rë cjuajeya, hacuaha cuisecoon xingueen cojo sa xi cuma jyë sa cjuandaja rë Nina cahntsua xahasen naja xingu xingu ngayaan. <sup>20</sup> Cjuandaja xi casahmi Nina cojo xingueen ne, mijí rë xi ninguetsun ngayaan ngatsë rë xcusun xi chinë. Xi cjuaquixi ne, yëjë ni xcusun comida ne, ndatjin xi xinë. Peru ndajintjin xi xinëë ngu xcusun sa xi vëhë sahmi xi cuixuya ngu xingueen ngajñi rë cjuatsehen. <sup>21</sup> Xi ndatjin ne, hacuiin xinë yojo, hacuiin siuhun xan, hacuiin nihña tu mé ni xcusun xi sahmi xi cuixuya ngu xingueen ngajñi rë cjuatsehen. <sup>22</sup> Cjua xi ha macjain nuju ne, catamacjain sa nuju, peru tetjún cjua jan cahntsua cjuatacun nuju suvun cojo sa xi suvá ni Nina vëë me. Jemu ndaja tsëhë xuta xi cjuatacun rë me ne, vinchaainjyë rë me tsëhë cjua xi macjain rë me. <sup>23</sup> Peru sacuaha ngu xuta xi mangu majo cacun me tsëhë ngu xcusun xi cajinë me ne, quitjen me jyë xi cuatjin cajinë me ta, tsëhë xi hacuiin ngatsë rë xi mangucacun me cojo Jesucristu ne, vëhë xi cajinë me ta mangu majo cacun me xi cajinë me. Hya xi hacuiin ngatsë rë xi mangutacun cojo Jesucristu xi nihña ngu xcusun xi nihña ne, hatuxa quitjen jyë.

## 15

### *Meje rë xi nihña xcusun xi chuya rë xingueen*

<sup>1</sup> Sacuaha ngayaan xi ndaja vijne rcun cjuatacun xi macjain naja ne, meje rë xi niyentacun, meje rë xi cuisecoon rë xingueen xi cjëë ndaja cuijne rcu me yëjë ni cjuachacun vëhë. Mijí rë xi nihña sa xcusun xi chuya naja suvaan ni. <sup>2</sup> Jima ngu ngayaan ne, meje rë xi nihña xcusun xi chuya rë xingueen, cojo sa xi hacuaha cojo me ndaja tsëhë me, cojo sa xi cuma jyë sa cjuandaja rë Nina cahntsua xahasen rë me. <sup>3</sup> Hisca Jesucristu ne, hacuiin casahmi me tu cutjin xi cachuya rë suvá me, sacuatjin cjua xi camahindu xcun xujun rë Nina

hiscan xi cachja ngu xuta cojo Nina cuitjin: “Cjua xi cachja xuta xi choho cachja tsujun ne, ngahan choho cachja me tsahan.” Cuatjin camahindu. <sup>4</sup>Yějě ni cjua xi camahindu xcun xujun rě Nina hatsěe nixtin ne, cuatjin camahindu cojo sa xi sacú naja cjuatacun. Hacuaha camahindu cojo sa xi scaa naja hacuaha sacú naja cjuetacun, sehe hitsě sa ndaja cuetahan tacun Nina. <sup>5</sup>Nina xi sahmi xi caa naja, Nina xi sua naja cjuetacun ne, catisua nuju me ngu cjuatacun xi cumatangun cjuatacun nuju cojo xingun xi tjengun ndiya rě Jesucristu. <sup>6</sup>Catisua nuju Nina cjuatacun vėhė, cojo sa xi ngayujun ni ne, ngu tangun cuma cjuatacun nuju xi nihñu jyě nihñu hnga Nina Nahmi rě Nai naja Jesucristu.

<sup>7</sup>Vėhė xi meje rě xi hatuxa chjuhunntsun xingun xingu xingu ngayun sacuatjin cafahatsja naja Jesucristu, cojo sa xi cuma jyě cuma hnga Nina cojo Hasen rě me. <sup>8</sup>Chjá cojo nuju ta Jesucristu ne, canduva me xi cuisecoo me ngayun xuta tjě rě Israel. Hane cuatjin sahmicihin Jesucristu cjua xi cachja Nina cojo xutachanga niji. Canduva me xi tsingacun niji me xi Nina ne, hatuxa quixi me cojo cjua xi chja me. <sup>9</sup>Hacuaha canduva me cojo sa xi xutaxín ne, sahmi jyě sahmi hnga me Nina ngatsě rě cjuandaja rě Nina. Camahindu xcun xujun rě Nina cuitjin:

Ngahan ne, sahme jyě sahme hnga nuju ngajñi rě xutaxín,  
hacuaha hisca sě tsujun.

Cuatjin camahindu.

<sup>10</sup>Hacuaha chja nga ngu cahndě cuitjin:

Ngayun xi xutaxín ngayun ne, hacuaha tuhun cjuasua xa-  
hasen nuju cojo xuta rě Nina.

Cuatjin chja.

<sup>11</sup>Hacuaha chja nga cuitjin:

Ngayun xi xutaxín ngayun, nihñu jyě nihñu hnga Nina.

Ngayejen ni xuta ngasunhdě ne, meje rě xi nihña jyě nihña  
hnga Nina.

Cuatjin chja.

<sup>12</sup>Hacuaha catsihindu Isaías xcun xujun rě Nina cuitjin:

Cuetjucun ngu xuta, tjě rě Isaí,

hane cuma titjun me tsėhė yějě ni xutaxín.

Hane xutaxín jan ne, cuetahacacun me xuta jan.

Cuatjin catsihindu Isaías.

<sup>13</sup>Nina, me xi sahmi xi ma vetahantacun Nina ne, catisua nuju me cjuasua cojo cjuajeya, ngayujun xi tjin ngu tacún cojo rě Jesucristu, cojo sa xi Hasen rě Nina ne, sua nuju ngahñu xi ndaja cuetuhun tacún Nina.

*Sua Pablo machaya rě xuta hacutjin sahmi me xa*

<sup>14</sup> Ngayujun ni matsejen ne, ha hvě cojo cjuatacun naha ta ngayun ne, quitsē rē xahasen nuju cojo cjuandaja, ha jemu vechú cjuatacun nuju, hacuaha ma ninguixun cjuatacun rē xingun xingu xingu ngayun. <sup>15</sup> Ngahan ne, cavetjucácun catsihindu nuju ngu jo cjua vėhė ta, tsėhė xi mijí ná xi chaya nuju cjua jan. Cuatjin catsihindu nuju ngatsė rē cjuandaja xi casua ná Nina, <sup>16</sup> xi sahme xa rē Jesucristu ngajñi rē xutaxín. Tisahme xa sacuaha ngu nahmi, xi tisuá jimachaya rē xutaxín cjuandajyihi xi catsingatju Nina. Cuatjin sahme cojo sa xi cuma suá rē Nina ngu cjuatjo xi chuya rē me. Cjuatjo vėhė ne, hacui xutaxín, xi ha Hasen rē Nina cavaxėxin rē me xi cuma tjajahi cjuatacun rē me xcun Nina.

<sup>17</sup> Vėhė xi ngahan, xi tjin tangun cjuatacun naha cojo Jesucristu ne, ma vaxėndaja hitsė yojo naha tsėhė xa rē Nina xi tisahme. <sup>18</sup> Vetjiincácun xi cuichjá cojo nuju tu mé ni cjua ta, suvá ni cjua tsėhė hacutjin cjuatacun xi casua ná Jesucristu xi cachjá cojo xi casahme, cojo sa xi xutaxín ne, cavihndė me tsėhė Nina. <sup>19</sup> Cuatjin camá ta, tsėhė xi cojo Hasen rē Nina ne, jemu camá cjuarcun. Cuatjin xi ngahan ne, ha chichihin casuá camachaya rē xuta cjuandajyihi xi chja tsėhė Jesucristu, cavėtsehen hisca Jerusalén ne, cavėchu hisca hiscan ladu xi hmí Iliria. <sup>20</sup> Hatuxa casahme ngahñu xi casuá camachaya rē xuta cjuandajyihi jan hiscan xi cjė camahani cumachaya rē xuta yo xi Jesucristu, cojo sa xi hacuiin hiscan xi tacunvasen xa xi jingu sa casahmi ne, ngajan cjuė sahmejė. <sup>21</sup> Casahme sacuatjin camahindu xcun xujun rē Nina hiscan xi chja cuitjin:

Xuta xi cjė cumachaya rē me tsėhė me ne, cumachaya rē me; hacuaha xuta xi cjė cuihndė me ne, cuijnercu me. Cuatjin camahindu.

### *Vejnã Pablo xi cjue me Roma*

<sup>22</sup> Ngatsė rē vėhė xi casacuiin camahani ná cahndė xi cjuė tjėngė nuju. <sup>23</sup> Peru quihndė xi cajnetaha xa xi sahme ladu vihi, hacuaha jemu hatsėė xi meje cjuė tjėngė nuju ne, <sup>24</sup> meje scusehenya nuju xi cuátju nangui nuju hya xi cjuė ngajan nación xi hmí España. Hane nixtin xi cuitejñataha hitsė cojo nuju ne, meje ná xi cuiseacun ná hitsė xi cjuė hisca España. <sup>25</sup> Peru ndicumaha ni ne, cjuė nandya Jerusalén, xi cuisėcoo rē xuta ladu rē Nina jan ta, <sup>26</sup> tsėhė xi xuta ladu rē Nina ngajan estadu Macedonia cojo xuta ladu rē Nina nguehe estadu Acaya ne, ndaja catsingatahacacun me xi tsingatju me ngu cjuandaja xi cuma rē xuta yuma xi siu ngajñi rē xuta ladu rē Nina ngajan Jerusalén. <sup>27</sup> Ndatjin xi cuatjin catsingatahacacun xuta xi cuacun vė ta, tsėhė xi sacuaha xi quitjen me tsėhė xuta nangui Israel. Tsėhė xi xutaxín ne,

casatë rë me cjuandajyihi xi casua Nina camachaya rë xuta tjë rë Israel, vëhë xi hacuaha satë rë me xi cuisecoo me xuta nangui Israel tsë tsë tujún xi tjin rë me. <sup>28</sup> Ngajan xi hya xi ha casahmechehen cjuacjintacun vëhë hacuaha ha casahme entregadu tujún jan ne, <sup>29</sup> sehe cuétju cjuë España. Hane xi cuátju nangui nuju ne, cjuë scusehenya nuju. Hacuaha hvë ta jemu sua naja Jesucristu cjuandaja rë me hya xi cjuë tjëngë nuju.

<sup>30</sup> Ngayujun ni matsejen ne, ngatsë rë xi tjin tangun cjuat-acun nuju cojo Nai naja Jesucristu hacuaha ngatsë rë cjuah-mutacun xi sua nuju Hasen rë Nina ne, vëhë xi féhya nuju xi nihñu tangun cjuatacun nuju cojo ná, hane chjahyun rë Nina cjuandaja rë me xi cuma ná. <sup>31</sup> Cuatjin nihñu ngatsë naha, cojo sa xi cuaxëtje ná Nina tsëhë xuta xi vihndiin me tsëhë Nina ngajan Judea. Hacuaha chjahyun rë Nina cjuandaja xi cuma ná cojo sa xi hya xi cjuëcane tujún ngajan Jerusalén ne, chuya rë xuta ladu rë Nina xi cuatjin sahme. <sup>32</sup> Cuatjin chjahyun rë Nina cojo sa xi, sa meje rë me ne, cuma cjuëtjëngë nuju cojo cjuasua hacuaha cuitejñajenda hitsë cojo nuju xi cuéchutaha nuju. <sup>33</sup> Nina, me xi sua naja cjuandaja cjuajeya ne, catsicoo nuju me ngayujun ni. Cuatjin jain.

## 16

### *Tsingatju Pablo nina rë me*

<sup>1</sup> Nguehe cuichjá cojo nuju ta na Febe xingueen ne, jemu xuta ndaja na. Casatë rë na xa xi visecoo na xuta ladu rë Jesucristu xi ma tangun me nguehe nandya Cencrea. <sup>2</sup> Vëhë xi chjá cojo nuju ta, chjuhunntsun na sacuatjin xi meje rë xi nihña ngayaan xi ladu rë Nina ngayaan. Chjuhunntsun na ta, tsëhë xi na vëhë ne, hacuaha tjin tangun cjuatacun rë na cojo Nai naja. Hacuaha tiseacun rë na tu mé ni xcusun xi cuma meje rë na ta, tsëhë xi na vëhë ne, jemu cjín xingueen xi cavisecoo na. Hacuaha hisca ngahan ne, jemu cavisecoo na ngahan.

<sup>3</sup> Tuhun nina naha na Priscila cojo cha Aquila xihin rë na. Xuta xi cuacun vë ne, jemu sahmi me xa rë Jesucristu sacuatjin sahme ngahan, <sup>4</sup> hacuaha hisca caviyujutaha tsavi me yojo rë me xi cavaxëtje ná me. Vëhë xi jemu suá nacuechji rë Nina. Hacuaha hacuiin ngahan suva ni ta cojo yëjë xutaxín xi matangun me tsëhë xi camá me ladu rë Jesucristu ne, hacuaha sua me nacuechji rë Nina. <sup>5</sup> Hacuaha tuhun nina naha yëjë xuta ladu rë Jesucristu xi matangun me ndava na Priscila cojo cha Aquila. Hacuaha ngu cha xi jemu vinga ná ne, cha Epeneto ne, tuhun rë cha nina naha. Cha vëhë xi tjun tjun camangucacun cha cojo Jesucristu ngajan estadu Asia.

<sup>6</sup> Hacuaha tuhun nina naha na María, na xi jemu cavisecoo nuju jan. <sup>7</sup> Hacuaha tuhun nina naha Andrónico cojo Junias xingueen, me xi cavitejñaya tangun cojo ndavaya jan. Me vëhë ne, jemu jyë hnga me cojo cjuatacun rë me ngajñi rë yëjë ni apóstol, hacuaha hitsë sa tjun me cavisehen me ladu rë Jesucristu xi cuma ná ngahan. <sup>8</sup> Tuhun nina naha cha Amplias, cha xi jemu vinga ná, tsëhë xi tjin tangun cjuatacun niji cojo Nai naja. <sup>9</sup> Tuhun nina naha cha Urbano, cha xi jemu sahmi xa rë Jesucristu sacuatjin tiniña ngayaan. Hacuaha tuhun nina naha cha Estaquis, cha xi jemu vinga ná jan. <sup>10</sup> Tuhun nina naha cha Apeles, cha xi suvá tsejen xi jemu ndaja tjin tangun cjuatacun rë cojo Jesucristu. Hacuaha tuhun nina naha yëjë ni xuta rë cha Aristóbulo.

<sup>11</sup> Tuhun nina naha cha Herodián xingueen. Tuhun nina naha yëjë xuta rë Narciso, me xi hacuaha tjin tangun cjuatacun rë cojo Nai naja. <sup>12</sup> Tuhun nina naha na Trifena cojo na Trifosa, na xi jemu sahmi xa rë Nai naja. Tuhun nina naha na Pérsida, na xi jemu vinga naja jan. Na vëhë ne, hacuaha jemu casahmi na xa rë Nai naja. <sup>13</sup> Tuhun nina naha cha Rufo, cha xi cavaxijin Nina xi tjin tangun cjuatacun rë cojo Nai naja. Hacuaha tuhun ngu nina naha cojo naa rë cha ta, me vëhë ne, sacuaha naa naha me. <sup>14</sup> Tuhun nina naha cha Asíncrito, cha Flegonte, cha Hermas, cha Patrobas, cha Hermes, hacuaha cojo sa yëjë xingueen xi siu me cojo cha xi cuacun vë. <sup>15</sup> Tuhun nina naha cha Filólogo, na Julia, cha Nereo cojo na tichja cha, cha Olimpas, hacuaha cojo sa yëjë xuta ladu rë Nina xi siu me cojo me xi cuacun vë.

<sup>16</sup> Tuhun rë xingun nina, cojo cjuandaja cojo cjuahmutacun cuitatsuhun xingun, sacuatjin xcusun naja. Yëjë xuta ladu rë Jesucristu ne, hacuaha tsingatju me nina nuju.

### *Ngu nga conseju xi sua Pablo*

<sup>17</sup> Ngayujun ni ne, cuichjá cojo nuju ta meje rë xi chuhuncuendun yo xuta xi sahmi xi chicjun cojo xingun, yo xuta xi sahmi xi cjuinenguia ngu xingueen ngajñi rë cjuatsehen ta, tsëhë xi xcusun xi sahmi me ne, sahmi condra rë cjuachacun xi ha cachutayun. Naxunxun yojo nuju tsëhë xuta xi cuacun vë ta, <sup>18</sup> tsëhë xi vihndiin me tsëhë Nai naja Jesucristu ta xi meje ni rë xahasen rë suvá me ne, vëhë ni xi vihndë me tsëhë. Hane cojo cjuahaxi xi visiajmi me ne, vindacha me xuta xi hvín ndiya rë cjuatsehen. <sup>19</sup> Yëjë ni xuta ne, ha machaya rë me cjuat tsëhë hacutjin xi ngayujun ni ne, jemu ndaja nuhyun tsëhë Nai naja. Vëhë xi jemu ndama ná. Jemu meje ná xi cuechutaha sa cjuatacun nuju, peru xi nihñu cjuandaja. Hane cjuatsehen ne, meje ná xi sacuaha xi hyuun ndiya rë. <sup>20</sup> Hane cuechú nixtin xi Nina, me xi sua naja cjuandaja cjuajeya ne,

ngutjen cuatëcja me cjuatsehen xi sahmi Satanás ngajñi nuju. Cjuandaja rë Nai naja Jesús ne, catisehen cahntsua xahasen nuju.

*Jingusa me tsingatju me nina rë me*

<sup>21</sup> Cha Timoteo, cha xi sahmi tangun cojo ná xa rë Jesucristu ne, tsingatju cha nina nuju. Cojo cha Lucio, cha Jasón, cojo cha Sosípater xingueen ne, hacuaha tsingatju cha nina nuju.

<sup>22</sup> Ngahan, Tercio, xi titsihindu cju rë Pablo xcun xujun vihi ne, hacuaha tsingátju nina nuju ngayujun ni xi tjin tangun cjuatacun nuju cojo Nai naja.

<sup>23</sup> Cha Gayo, cha xi casua ndava xi tejña ngahan ne, hacuaha sua cha ndava cha xi ma tangun yějë ni xuta ladu rë Jesucristu ne, tsingatju cha nina nuju. Cha Erasto, cha xi má tesorero tséhë nandya vihi ne, tsingatju cha nina nuju. Cha Cuarto xingueen ne, hacuaha tsingatju cha nina nuju.

*Pablo ne, vaxëndaja me Nina*

<sup>24</sup> Cjuandaja rë Nai naja Jesucristu ne, catama tsujun ngayujun ni. Cuatjin jain. <sup>25</sup> Tahan nacuechji rë Nina ta, Nina ne, ma sahmi me xi viyuju cahndë cjuatacun nuju cojo cjuandajyihi xi chja tséhë Jesucristu, cjuandajyihi xi ngahan cojo jingu sa apóstol ne, tihín machaya rë xuta. Cjuandajyihi vëhë ne, hacui ngu cju xi jiyahma hisca hya xi cjëë cumandaja ngasunhdë. <sup>26</sup> Peru hisca quihndë casua Nina camachaya naja cjuandajyihi jan, quihndë xi casahmi me xi profeta ne, camá catsihindu cju rë me. Hane Nina xi tsajin nu tsajin nixtin cjuë me ne, ngatsë rë xi cuatjin cavitexa me ne, vëhë xi camachaya rë xuta tséhë yějë ni nación yějë ni ladu cjuandajyihi vëhë, cojo sa xi yějë ni xuta ne, cumangucacun me hacuaha cuihdë me tséhë Nina.

<sup>27</sup> Ngu ni Nina xi vëë yějë ni cjuatacun ne, nihña jyë nihña hnga me yějë nu yějë nixtin ngatsë rë Jesucristu. Cuatjin jain.

## Carta xi tjuntjun catsihindu San Pablo xi cafahatsja xuta nandya Corinto

<sup>1</sup> Ngahan Pablo ne, casuaxa ná Jesucristu xi má ngahan apóstol tséhë me, tséhë xi cuatjin xi meje rë Nina. Hane ngahan cojo cha Sóstenes xingueen ne, <sup>2</sup> ningatjin ngu xujun vi tsujun, ngayujun ni xuta Corinto xi hacuaha xuta ladu rë Nina ngayun, ngayun xi cavaxijin Nina ngayun, tséhë xi tjin tyjahi cjuatacun nuju cojo Jesucristu. Hacuaha ningatjin xujun vihi tséhë yějë xuta xi faharcun me Nai naja Jesucristu jinguyjë ni cahndé. Jesucristu jan ne, Nai rë xuta xi cuacun vëhë me, hacuaha Nai naja गयाan me. <sup>3</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya.

### *Ximinchacun xi casua Jesucristu*

<sup>4</sup> Yasen ni suá nacuechji rë Nina ngatsë nuju ngayujun ni cojo ngatsë rë cjuandaja rë Nina xi casua nuju me quihndë xi tjin tangun cjuatacun nuju cojo Jesucristu. <sup>5</sup> Suá nacuechji rë Nina ta, quihndë xi tjin tangun cjuatacun nuju cojo Jesucristu ne, casua nuju Nina yějë ni. Casua nuju me chuva rë hacutjin ndaja cuinújun hacuaha ndaja cuijnercun cjua rë me. <sup>6</sup> Cjuandajyihí xi chja tséhë Jesucristu ne, jemu ndaja cavisehen cahntsua xahasen nuju. <sup>7</sup> Vëhë xi ngayun ne, tsajin ngu cjuandaja rë Nina xi machaja nuju, jinguyějë rë xi cuinechunyun rë nixtin xi cumatsejen nga Nai naja Jesucristu. <sup>8</sup> Cuisecoo nuju Nina xi cuejñu hñu cjuatacun nuju jinguyějë rë xi nechun cjuahñu, cojo sa xi ngayun ne, tsajin mé jyë tjin nuju nixtin hya xi cuya nga Nai naja Jesucristu. <sup>9</sup> Nina ne, hatuxa sahmichihin me yějë cjua xi chja me, hacuaha me vëhë xi cavaxijin nuju me xi nihñu tangun cjuatacun nuju cojo Quihndi rë me, Nai naja Jesucristu.

### *Hacuiin ngu tangun ni siu cjuatacun rë xuta rë yungun*

<sup>10</sup> Ngatsë rë xi casuaxa ná Nai naja Jesucristu ne, cuichjá cojo nuju ta meje ná xi ngu tangun ni cjua cuinújun ngayujun ni, hacuiin xi cuisecjun cjua nuju. Nihñu tangun cjuatacun nuju cojo xingun. <sup>11</sup> Cuatjin chjá cojo nuju ta, tséhë xi xuta rë Cloé ne, casua me camachaya ná xi tjin si ngajñi nuju cojo xingun. <sup>12</sup> Cuma cuinújan ne, ngujo ngayun ne, nújun cuitjin: “Ladu rë Pablo ngayin”; hane ngujo nga ngayun ne: “Ladu rë Apolos ngayin”; hane ngujo nga ngayun ne: “Ladu rë Pedru ngayin”; hane ngujo nga ngayun ne: “Ladu



rë Cristu ngayin.” Cuatjin nújin. <sup>13</sup> Peru ¿há tjin jo jyan Cristu? ¿Há Pablo casetaha me xcun cru ngatsë nuju? ¿Há tsajin ne, há caxtenda ngayun xi ladu rë Pablo cuma ngayun? ¡Hacuiin cuatjin! <sup>14</sup> Hisca suá nacuechji rë Nina ta hisca ngu ngayun ne, cavitendaan nuju, suvá ni cha Crispo cojo cha Gayo xi caviténda cha. <sup>15</sup> Xi cuatjin camá ne, tsajin yo xi cuichja xi caxtenda ngayun xi cuma ngayun xuta ladu naha. <sup>16</sup> Haan, hacuaha caviténda sa xuta rë Estéfanos. Peru hveen há tjin sa xi caviténda. <sup>17</sup> Cuatjin casahme ta, tséhë xi hacuiin catsingatju ná Jesucristu xi cuiténda xuta ta catsingatju ná me xi suá cumachaya rë xuta cjuandajyihi xi chja tséhë me. Hacuaha hacuiin catsingatju ná me xi cuichjá sacuaha chja ngu xuta xi jemu ndaja nuhya rë, hane cuahacuenda xuta cjua naha cahndë rë xi cuahacuenda me ngahñu rë cjuaveya rë Jesucristu ngajan xcun cru.

*Tjin rë Jesucristu ngahñu rë Nina hacuaha tjin rë me cjuatacun rë Nina*

<sup>18</sup> Cuatjin mijí rë xi chjahátahá rë ngahñu rë cjua rë cjuaveya rë Jesucristu xcun cru ta, tséhë xi cjua vëhë ne, handasa ngu cjuaveya cjuangarca xi má rë xuta xi tivetjintjiin me, peru xi cuma naja ngayaan xi tivetjuntjeen ne, cjua vëhë ne, tjin rë ngahñu rë Nina. <sup>19</sup> Cuitjin camahindu xcun xujun rë Nina cjua xi cachja Nina:

Tsinguétsun cjuatacun rë xuta xi jemu vechú cjuatacun rë, hacuaha cjuatacun rë xuta xi jemu ndaja vijnercu me ne, tsinguejñu rë.

Cuatjin camahindu.

<sup>20</sup> ¿Jarë cha xi jemu vechú cjuatacun rë? ¿Jarë cha xi vicuya cjuachacun? Hacuaha ¿jarë cha xi jemu ndaja ma visiajmi nixtin vihi? ¡Nina ne, catsicuya me suvá cjuangarca cjuatacun xi jemu vëë xuta ngasunhndë vi! <sup>21</sup> Nina ta vechutaha jain cjuatacun rë me ne, cavejña ngu cacun me xi xuta ngasunhndë ne, cumaji sacúse rë me cojo suva ni cjuatacun rë me yo xi Nina. Cahndë rë vëhë ne, Nina ne, camameje cuaxëtje me xuta xi mangu cacun cojo rë me ngatsë rë cjuandajyihi xi nújin, handasa xi má rë xuta ne, ngu cjuangarca cjuandajyihi vëhë.

<sup>22</sup> Xuta tjë rë Israel ne, meje rë me xi sahmi Nina cjuarcun, hane xutaxín ne, vanguise me xi jemu cuechú cjuatacun rë me. <sup>23</sup> Peru ngayin ne, tihin machaya rë xuta cjua tséhë me xi catsingatju Nina, me xi cahme xi casetaha xcun cru. Ngu ladu ne, cjua vëhë sahmi xi xuta tjë rë Israel ne, sahmi condra me Nina. Hane ngu ladu nga ne, cjua vëhë ne, ngu cjuangarca xi má rë xutaxín. <sup>24</sup> Peru xi cuma rë xuta xi Nina cavaxijin rë me, sa xuta tjë rë Israel o sa xutaxín ne,

me xi Nina catsingatju rë jan ne, tjin rë me ngahñu rë Nina hacuaha tjin rë me cjuatacun rë Nina. <sup>25</sup> Hya xi machaya rë yahnga xuta yëjë xcusun xi choho cavatju Jesucristu camá ne, tsingataha cacun me xi Nina ne, jemu ngarca me hacuaha jemu ndaya cacun me. Peru hacuiin cuatjin ta, xcusun xi cuacun vë ne, tsingacun naja xi Nina ne, hitsë sa jercu vechú cjuatacun rë me xi cuma rë xuta xi jercu vechú cjuatacun rë, hacuaha hitsë sa jercu tjin rë me ngahñu xi cuma rë xuta xi jercu tjin rë ngahñu.

<sup>26</sup> Ngayujun ni ngayun ne, ha hyun ta Nina cavaxijin nuju me handasa hacuiin cjín ngayun xi vechú cjuatacun nuju, hacuiin cjín ngayun xi jercu tjin nuju ngahñu, hacuaha hacuiin cjín ngayun xi nchina ngayun. <sup>27</sup> Peru Nina ne, cavaxijin me xuta ngasunhdë xi ngarca, cojo sa xi tsisava me xuta xi jercu vechú cjuatacun rë. Hane cavaxijin me xuta ngasunhdë xi ndaya cacun, cojo sa xi tsisava me xuta xi jercu hñu ngahñu rë. <sup>28</sup> Hacuaha Nina ne, cavaxijin me xuta ngasunhdë xi yuma, xuta xi maxta tsëhë, xuta xi venguiin chji rë, cojo sa xi tsinguetsun Nina cjuatacun rë xuta xi jemu vengui chji rë xi má rë xuta ngasunhdë. <sup>29</sup> Xi cuatjin ne, yëjë xuta ne, cumaji cuaxëndaja me yojo rë me xcun Nina. <sup>30</sup> Hane ha suvá Nina casahmi tangun me cjuatacun nuju cojo Jesucristu. Hacuaha Nina vuxaha me cjuatacun naja, xi mangutacun cojo Jesucristu. Hacuaha ngatsë rë Jesucristu ne, fë jyë naja xcun Nina, tsëhë Nina má ngayaan, hacuaha vetjuntjeen. <sup>31</sup> Cuatjin jain má cojo sa xi nihña sacuatjin quitaha xcun xujun rë Nina hiscan xi chja cuitjin: “Sa xi yo xi meje cuaxëndaja yojo rë ne, cataxëndaja yojo rë, peru xi tsëhë Nai naja.”

## 2

### *Chuva rë xi cachja Pablo cjuarë Nina*

<sup>1</sup> Peru ngayujun ni ne, hya xi cëjë nangui nuju ne, cachjaan cojo nuju cjuarë Nina sacuaha xi jemu ma chjá o sa sacuaha xi jemu vechú cjuatacun naha. <sup>2</sup> Cuatjin casahme ta, tsëhë xi cavejñá cjuatacun naha xi ngu ni Jesucristu xi cahme me xcun cru tsingátaha cacún tsëhë me, jinguyëjë rë xi cuitejñataha cojo nuju. <sup>3</sup> Hacuaha hya xi cavitejñataha cojo nuju ne, jemu ndaya cacún, hisca fatsë ngahan xi tsácjun. <sup>4</sup> Hacuaha hya xi cachjá cojo nuju cjuarë Nina ne, hacuiin jemu cjuarë yehe casahmexa cojo xi meje sahme xi cuijne tacún ta cajne tacún ngatsë rë ngahñu xi tjin rë Hasen rë Nina. <sup>5</sup> Cuatjin camá cojo sa xi cumangu tacún cojo Nina, peru hacuiin ngatsë rë cjuatacun rë xuta ta ngatsë rë ngahñu xi tjin rë Nina.

### *Cjuatacun rë Nina xi jercu vechú*

<sup>6</sup> Peru cojo xuta xi vechútaha cjuatacun rë me xi mangu-cacun me cojo Jesucristu ne, nújin cjuatacun xi jemu vengui chjí rë. Peru cjuatacun vëhë ne, hacuiin cjuatacun tsëhë xuta ngasunhndë vihi hacuaha hacuiin cjuatacun tsëhë xuta xi vitexa nguehe ngasunhndë vihi, me xi titsinguetsun Nina cjuatacun rë. <sup>7</sup> Cjuatacun vëhë ne, vëhë cjuatacun rë Nina xi jiyahma titjun. Peru Nina ne, hisca chaja sa xi cuejña ngasunhndë ne, ha tjin chjine rë me cjuatacun vëhë xi ndaja tsajan. <sup>8</sup> Hisca xi ngu xuta xi vitexa quihndë nixtin vihi ne, vijniircu me cjuatacun vëhë. Sa xi cajnercu me ne, hacuaha catsiquiin me Nai naja, me xi jemu jyë hnga camahani me cojo Hasen rë me. <sup>9</sup> Peru tivetjucaa sacuatjtin camahindu xcun xujun rë Nina hiscan xi chja cuitjin:

Xcusun xi cjëë camahani scuëë xuta, hisca cjëë camahani cuihndë me cjua tsëhë, hacuaha hisca cjëë camahani tsingatahacacun me tsëhë ne,

vëhë xcusun xi cavëhëchjine Nina xi cuma rë xuta xi hmu cacun rë me.

Cuatjtin camahindu. <sup>10</sup> Xcusun vëhë ne, ngayin casua Hasen rë Nina camachaya niji. Hasen rë Nina jan ne, vëë yëjë ngarca ni, hisca cjuatacun rë Nina xi hitsë sa hma jiya.

<sup>11</sup> Ngajñi rë yëjë xuta ne, tsajin yo xi ma vëë cjuatacun rë ngu xuta ta suvá ni hasen rë me xi jiya ngajñi yojo rë me ne, vëhë xi vëë. Ha chuva vëhë ni ne, tsajin yo xi vëë cjuatacun rë Nina ta suvá ni Hasen rë Nina ne, vëhë xi vëë. <sup>12</sup> Ngayaan ne, hacuiin cachjahanntsán ngu hasen tsëhë ngasunhndë ta cachjahanntsán Hasen xi catsingatju Nina, cojo sa xi cumachaya naja yëjë ni cjuandaja xi Nina casua naja me.

<sup>13</sup> Nújan tsëhë cjuandaja vëhë, peru hacuiin cojo cjua yehe xi nduva tsëhë cjuatacun rë xuta ngasunhndë ta cojo cjua xi nduva tsëhë Hasen rë Nina. Hane cuatjtin xi tahan cjuatacun rë Nina machaya rë xuta xi tjin rë me Hasen rë Nina.

<sup>14</sup> Xuta xi tsajin rë me Hasen rë Nina ne, maji fahatsja me cjuandaja xi sua Hasen rë Nina ta xi má rë me xi cuacun vë ne, suvá cjuangarca cjuandaja xi cuacun vë, hacuaha maji vijnercu me cjuandaja xi cuacun vë, tsëhë xi suvá Hasen rë Nina sahmi xi vijnercuun. <sup>15</sup> Xuta xi tjin rë me Hasen rë Nina ne, ma tsichuva me yëjë ngarca ni, peru me xi cuacun vëhë ne, tsajin yo xi ma tsichuva rë me. <sup>16</sup> Cuitjin camahindu xcun xujun rë Nina: “¿Yo xi vëë cjuatacun rë Nina? ¿Yo xi cuicuya rë?” Cuatjtin camahindu. Peru ngayaan ne, tjin naja cjuatacun rë Jesucristu.

## 3

*Xuta sahmixa rē Nina*

<sup>1</sup> Ngayujun ni ne, camaji cachjá cojo nuju sacuaaha chjá cojo xuta xi ha tjin rē me Hasen rē Nina ta, tjin ná xi cachjá cojo nuju sacuaaha chjá cojo xuta ngasunhdē, sacuaaha xuta xi sehe cavisehen ladu rē Jesucristu. <sup>2</sup> Sacuaaha xi casuá nuju lechi xi siuhun. Hacuuiñ niñu casuá xi xinu ta, tsēhē xi nixtin hya ne, tangun ngayun cojo quihndi chihndē xi cjēē cuma sinē niñu. Hacuanitjin ni cjēē cuma chjuhunntsun yējē cjua rē Nina hisca quihndē, <sup>3</sup> tsēhē xi xuta ngasunhdē sa má ngayun. Cuatjin chjá cojo nuju ta jinguyējē rē xi tjin sa cjuachini hacuaaha tjin sa si ngajñi nuju ne, xuta ngasunhdē cuaha sa má ngayun, hacuaaha tivanguntjengun sa ndiya rē xuta ngasunhdē. <sup>4</sup> Hya xi ngu ngayun nújun: “Ngahan ne, ladu rē Pablo ngahan”, hane ngu nga ngayun ne, nújun: “Ngahan ne, ladu rē Apolos ngahan” ne, ngajan matsejen xi xuta ngasunhdē cuaha má ngayun.

<sup>5</sup> Xi matsejen ne, ¿mé má Apolos ne, mé má Pablo ni? Ngayin ne, xuta sahmixa rē Nina ni ngayin, xi canújin cojo nuju cjua rē Nina xi camacjain nuju. Jima ngu ngayin ne, canihñi xa xi casua niji Nai naja. <sup>6</sup> Sacuaaha xi ngahan catsítjē, hane Apolos cavitejnu me nandá, peru Nina casahmi me xi camayehe xitjē. <sup>7</sup> Ngajan xi, xi matsejen ne, cha xi tsitjē cojo cha xi vitejnu nandá ne, hacuiñ jemu vengui chji rē cha ta me xi vengui jain chji rē ne, Nina, me xi sahmi xi ma yehe xitjē. <sup>8</sup> Cha xi tsitjē cojo cha xi vitejnu nandá ne, tangun ni vengui chji rē cha. Jimangu cha ne, cjuahatsja cha chji rē cha, sacuatjin xa xi casahmi jimangu cha. <sup>9</sup> Ngayin ne, tangun tiniñi xa rē Nina, hane ngayun ne, sacuaaha nangui rē Nina xi tijimaxa cojo má ngayun.

Hacuaha ngayun ne, sacuaaha ngu ndihya xi Nina tsindaja me má ngayun. <sup>10</sup> Ngahan ne, tsēhē cjuandaja xi casua ná Nina ne, casahme sacuaaha ngu chjine vexo ne, cavejña ngu xihndēnaña, peru xcun xihndēnaña xi casahme jan ne, jingu sa xuta canduva casahmi me ngu ndihya. Peru jima ngu xuta xi sahmi me ndihya xcun xihndēnaña vēhē ne, meje rē xi tjin rē me cuidadu hacutjin xi sahmi me ta, <sup>11</sup> tsēhē xi tsajin sa cjín xihndēnaña xi tjin ta ngu tu tu ni má. Hane xihndēnaña xi ha tacun vē ne, hacui Jesucristu. <sup>12</sup> Quihndē ne, xi nihña xa rē Nina ne, cuejña xi yahnga xuta sahmixa me cojo oro, o sa quicha tyava, o sa ndyojo xi jercu vengui chji rē. Hane yahnga nga me ne, sacuaaha sahmixa me cojo ya, o sa cojo ndiji, o sa cojo xca ni. <sup>13</sup> Peru nixtin hya xi tsichuva naja Nina ne, hya cuma cumatsejen xcusun rē xa xi casahmi jima ngu xuta xi cuacun vē. Nixtin hya ne, cuejña Nina ngu ndihi xi

tsichuva xa xi casahmi jima ngu me, cojo sa xi cumatsejen mé xcusun xa vëhë. <sup>14</sup> Sa xi xa xi casahmi ngu xuta scaa rë cojo suë rë ndihi vëhë ne, sacú rë me ngu cjuandaja rë xi sua Nina. <sup>15</sup> Peru sa xi xa xi casahmi ngu xuta jan cjuëya cojo suë rë ndihi vëhë ne, tsichajá me yëjë, peru me vëhë ne, cuetjutje me sacuaha ngu xi vetjutje tsëhë ngu ndihi.

<sup>16</sup> Ngayujun ni ne, ha ndaja hyun xi sacuaha yungun rë Nina má ngayun, ta Hasen rë Nina ne, hacuaha tacuncahndë cahntsua xahasen nuju. <sup>17</sup> Sa xi yo xi tsinguetsun yungun rë Nina, Nina ne, hacuaha jercu sahmi me castigu xuta jan, tsëhë xi yungun rë Nina ne, hatuxa tsëhë Nina. Hane ngayun ne, hacuaha yungun rë Nina má ngayun.

<sup>18</sup> Xicavindachuun suvun rë yojo nuju. Sa xi tjin ngu ngayun xi ningatuhun tacún xi jemu vechú cjuatacun nuju sacuaha cjuatacun rë xuta ngasunhndë vihi ne, nihñuendun chjuhunxun cjuatacun vëhë sacuaha xi vechiin cjuatacun nuju. Hane xi cuatjin nihñu ne, sehe cuechú tuhun cojo cjuaquixi ngu cjuatacun nuju. <sup>19</sup> Cuatjin meje rë ta, tsëhë xi cjuatacun rë xuta ngasunhndë vihi ne, xi cuma rë Nina ne, suvá cjuangarca. Hisca camahindu xcun xujun rë Nina cuitjin: “Nina ne, sahmi me xi xuta xi jemu vechú cjuatacun rë me vetju sava me xcun cjuandacha xi sahmi me.” <sup>20</sup> Hacuaha camahindu nga cuitjin: “Nina ne, vëë me xi cjuatacun rë xuta xi jemu vechú cjuatacun rë ne, tu mahya.” <sup>21</sup> Vëhë xi hisca ngu ngayaan ne, mijí rë xi naxenndajan cjuatacun rë xuta ngasunhndë ta, tsëhë xi yëjë ngarca ni ne, tsujun: <sup>22</sup> há xi Pablo, há xi Apolos, há xi Pedru, há ngasunhndë, há cjuahñu, há cjuaveya, há xi nixtin quihndë, há xi nixtin nduva ne, ta yëjë ngarca ni ne, tsujun vë. <sup>23</sup> Hane ngayun ne, tsëhë Jesucristu ngayun, hane Jesucristu ne, tsëhë Nina me.

## 4

### *Xa rë apóstol*

<sup>1</sup> Meje rë xi nihñuendun xi ngayin ne, xuta sahmi xa rë Jesucristu má ngayin, hacuaha cachjihinntsín xa xi tihin cumachaya rë xuta tsëhë cjuatahahma xi sehe tisua Nina jimachaya naja. <sup>2</sup> Hacuaha jemu sahmi ngu yëjë xi ngu xuta xi tjin tsjá me xa ne, tsejen tsëhë me xi cuma cumangu tacuun cojo rë me. <sup>3</sup> Xi cuma ná ngahan ne, tsajin mé sahmi rë sa xi chjuhunchuvun ná cojo cjuatacun naha, o sa xi cjuahachuva ná xuta ngasunhndë. Hisca ngahan suva ne, fahachuvaan cjuatacun naha. <sup>4</sup> Xi má ná ne, tsajin jyë naha. Peru hacuiin ngatsë rë vëhë xi hatuxa tsajin jyë naha. Nai naja ne, me vëhë xi tsichuva ná me. <sup>5</sup> Vëhë xi mijí rë xi yo chjuhunchuvun, xi

chaja sa cuechú nixtin xi cuinduva Nai naja ta, tséhë xi me vëhë cuaxëcaatsejen me yëjë ni cjua xi tsajin yo vëë. Hacuaha cuaxëcaatsejen me yëjë cjuatacun rë xuta. Nixtin hya ne, cuaxëndaja Nina jima ngu xuta sacuatjtin vechú chuva rë tséhë jima ngu me.

<sup>6</sup> Ngayujun ni ne, cachjá cojo nuju yëjë cjua vëhë tsahan suva cojo tséhë Apolos, cojo sa xi ndaja tsujun, cojo sa xi cuijnercun mé meje cuichja cjua xi chja cuitjin: “Nihñuchuhun sacuatjtin chja cjua xi camahindu.” Cuatjtin chja cjua. Cuatjtin meje rë cojo sa xi hacuiin nihñu yehe yojo nuju ngatsë rë ngu xi tjengun cjua rë, hane me xi yahnga ne, nitjungun me. <sup>7</sup> ¿Yo casahmi xi hitsë sa vengui chji nuju ngayun xi cuma rë me xi yahnga? Hacuaha ¿mé tjin nuju xi hacuiin Nina casua nuju me? Sa xi Nina casua nuju me ne, ¿mé má naxunndujun yojo nuju sacuaaha xi tsajin yo xi casua nuju ni?

<sup>8</sup> ¡Sacuaaha xi ngayun ne, má nuju xi ha tjin nuju yëjë xi meje rë xahasen nuju, ha jemu nchina camá ngayun! Ha xuta xi matitjun camá ngayun xi má nuju. Hacuaha quihndë tsajin mé xi machaja nuju xi cumatihin nuju. Jemu ndatjtin sa xi matitjun jain ngayun, cojo sa xi ngayin ne, hacuaaha cojo ngayin cumatitjun tangun ngayin cojo nuju. <sup>9</sup> Xi má ná ngahan ne, casahmi Nina xi venguiin chji niji ngayin xi má ngayin apóstol, sacuaaha xuta xi cjue cueya me ngatsë rë jyë rë me. Tivutsejen yëjë ni xuta cojo yëjë ni ángel hacutjtin tivatjtin tijima. <sup>10</sup> Ngatsë rë xi tjenguin rë Jesucristu ne, má rë xuta sacuaaha xi jemu ngarca ngayin. Peru ngayun ne, xi má nuju ne, jemu quicun tacún ngatsë rë xi tjengun rë Jesucristu. Ngayin ne, jemu ndaya tacún, peru ngayun ne, jemu hñu ngahñu nuju. Ngayun ne, chjahárcun nuju, hane ngayin ne, chjaharcuaain niji. <sup>11</sup> Hisca quihndë sa ne, jindya niji tséhë xi xini xi sihin, hacuiin ndaja tsjian chjín, choho sahmi xuta cojo niji, hacuaaha tu nujyihinsin ni. <sup>12</sup> Nihñi xa xi hai. Hora xi choho chja xuta cojo niji ne, ndaja nújin cojo rë me. Hora xi tsujyihya tjengui niji me cojo cjuahngatacun ne, caa niji cojo xcusun xi sahmi me. Tsajin mé nihñi cojo rë me. <sup>13</sup> Hora xi choho chja xuta tsijin ne, nindijin cjua cojo rë me. Camá ngayin sacuaaha xtë xi tjin ngasunhdë. Hitsë sa chuva vengui chji niji xi cuma rë yëjë ni xcusun xi tjin. Hisca quihndë ne, cuanitjin vatjin má.

<sup>14</sup> Xi titsihindu nuju cuitjin ne, hacuiin xi tsisava nuju ta xi suá nuju conseju sacuaaha quihndi naha suva xi jemu hmú cacún. <sup>15</sup> Handasa tjin nuju të mil xuta xi vicuya nuju cjua xi chja tséhë Jesucristu ne, peru nahmi nuju ne, ngu ni ngahan, tséhë xi hya xi casuá camachaya nuju cjuandajyihí xi chja tséhë Jesucristu hacuaaha cavisuhun ladu rë me ne, hya camá

ngahan sacuaha nahmi nuju. <sup>16</sup> Vêhê xi ngayujun ni ne, meje nã xi nihñu sacuatjin sahme ngahan.

<sup>17</sup> Ngatsë rê vêhê ne, titsingátju nuju cha Timoteo, cha vêhê xi sacuaha quihndi naha xi jemu hmú cacún hacuaha jemu ndaja sahmi chihin me xa tsêhê Nai naja. Me vêhê sahmi me xi cuitsjen nuju hacutjin tifê cojo ndiya rê Jesucristu, sacuatjin vicuyá rê xuta rê yêjê ni yungun jingujyê ni.

<sup>18</sup> Quihndê ne, yahnga ngayun ne, canihñu yehe yojo nuju xi cuatjin caningatuhun tacún xi cjueen cjuê scútsejen nuju. <sup>19</sup> Peru ngahan ne, cuinduva xati scútsejen nuju, sa Nai naja meje rê me. Hane hya cumachaya ná hacuiin sacuatjin xi visiajmi xuta xi cuacun casahmi yehe yojo rê jan ta sacuatjin ngahñu xi tjin rê me. <sup>20</sup> Cuatjin sahme ta sacuaha gobiernu xi sahmi Nina ne, hacuiin cojo suvá cjuã ni rê me xi sahmi me ta cojo ngahñu xi tjin rê me. <sup>21</sup> ¿Hacutjin meje nuju xi nduva scútsejen nuju, há xi cojo ngu castigu ne, o há tsajin ne, há cojo ngu cjuahmutacun, cojo cjuandaja cjuajeya?

## 5

### *Cjuatsehen xi casahmi ngu cha xuta rê yungun*

<sup>1</sup> Tjin cjuã xi ngajñi nuju ngayujun ni ne, jiyajñi ngu cjuatsehen xi hisca xutaxín sa ne, sahmi me. Chja cjuã ta ngu ngayun ne, cachjuhun chjuun rê nahmi nuju, camá chjuun nuju. <sup>2</sup> ¡Hane ngayujun ni ne, jercu naxunndujun yojo nuju! Cahndé rê vêhê ne, meje rê xi choho cuma nuju. Cha xi cuatjin sahmi xcusun vêhê ne, catetjuxin cha tsujun. <sup>3</sup> Handasa tsajin ngahan tejña cojo nuju ndyá ne, peru cjuatacun naha ne, sacuaha xi ndyá tacun cojo nuju. Hane sacuaha xi tejña cojo nuju ne, ngahan ne, ngatsë rê xi sahme xa rê Nai naja Jesús ne, chjá cojo nuju ta meje rê xi cuma castigu cha xi cuatjin sahmi xcusun vêhê. <sup>4</sup> Hya xi cuma tangun ngayun, hacuaha cjuatacun naha ne, sacuaha xi tacun cojo nuju ne, cojo ngahñu xi sua naja Nai naja Jesús ne, <sup>5</sup> nihñu entregadu cha xi cuajyihî vê cojo Satanás, cojo sa xi cueya cha. Cuatjin nihñu, cojo sa xi cuetjutje hasen rê cha nixtin hya xi cuya nga Nai naja.

<sup>6</sup> Ndajin tjin xi cuatjin nihñu yehe yojo nuju. Ha hyun cjuã xi chja cuitjin: “Hitsë lihndi ni san rê pan ne, caa rê tsisatjen rê yêjê nahyu.” Cuatjin chja cjuã. <sup>7</sup> Meje rê xi chjuhunxun cjuatsehen vêhê, xi sahmi sacuaha san rê pan, cojo sa xi cuma tyjahi cjuatacun nuju, sacuaha nahyu xi tsajin san rê. Hacuaha hvê ta hatuxa tyjahi cjuatacun nuju ta, tsêhê xi Jesucristu ne, me xi sacuaha chu tsánga tsêhê suhi rê Pascua naja ne, ha cahme me. <sup>8</sup> Vêhê xi meje rê xi nihña suhi, peru hacuiin cojo san rê pan xi changá, cuma cuinújan ne, hacuiin

cojo cjuatsehen ta, cojo nahyu xi tsajin san rë, cuma cuinújan ne, cojo cjuandaja cojo cjuaquixi.

<sup>9</sup> Catsihindu nuju xcun xujun xi ha catsingátju nuju ta mijí rë xi nihñu tangun cojo xuta xi sahmi cjuatsehen cojo ngu chjuun o sa cojo ngu xihin. <sup>10</sup> Xi cachjá cojo nuju cuatjin ne, hacuiin meje cuichja xi meje rë xi cuetjunxun camahani tsëhë xuta ngasunhndë xi hinchá ndiya rë cjuatsehen vëhë, o sa tjenguitaha me xi hacuiin tsëhë, o sa ndacha, o sa faharcun me nina ndyojo. Sa xi cuatjin nihñu ne, meje rë xi cuetjun camahani tsëhë ngasunhndë. <sup>11</sup> Xi vijne cjua xi catsihindu nuju vë ne, xi hacuiin nihñu tangun cojo ngu xuta xi chja me xi ladu rë Jesús má me hane sahmi me cjuatsehen cojo ngu chjuun o sa cojo ngu xihin, o sa tjenguitaha me xi hacuiin tsëhë me, o sa faharcun me nina ndyojo, o sa ndesu me, o sa cha chihi me, o sa xi ndacha me. Ngu xuta rë yungun xi cuatjin xcusun rë ne, hisca mijí rë xi xinu niñu cojo rë me. <sup>12-13</sup> Satiin ná ngahan xi tsichúva xuta xi hacuiin xuta rë yungun má me. Nina ne, me vëhë xi tsichuva rë me. Peru ngayun ne, meje rë xi nichuvun xuta xi xuta rë yungun me. Vëhë xi hacuaha meje rë xi naxunxun cha tsehen vë tsëhë ngajñi nuju.

## 6

*Vinchajyë yahnga xuta ladu rë Jesús xicjin me ngajñi rë me*

<sup>1</sup> Hya xi tjin ngu ngayun xi tjin ngu jyë xi meje cuinchun tsëhë xingun ne, ¿mé má cuatjin vetju tacún xi xcun xuta xi hisca sahmicuendaain me Nina vangun chjahyun xi cumacuenda tsujun, cahndë xi cuangun xcun xuta xi ladu rë Nina me? <sup>2</sup> ¿Há hyuun xi cuechú nixtin xi ngayaan xuta ladu rë Nina nichuvan xuta ngasunhndë cojo cjuatacun rë me? Hane sa xi ngayun cuatjin nichuvun xuta ngasunhndë ne, ¿há maji nichuvun ngu jyë lihndi quihndë ni? <sup>3</sup> ¿Há hyuun xi ngayaan nichuvan ángel cojo cjuatacun rë ni? ¿Hitsë guan cjuacjintacun rë ngasunhndë vihi! <sup>4</sup> Vëhë xi sa tjin ngu jyë xicjin vëhë xi meje cuinchun ne, ¿há cuangun cuejñu jyë vëhë xcun ngu xutaxín xi faharcuaain me xcusun rë yungun? <sup>5</sup> Nguehe cuichjá cojo nuju ngujo cjua cuitjin, cojo sa xi cuma sava nuju: ¿há tsajin ndastu ngu xuta xi vechú hitsë cjuatacun rë me xi cuma sahmi cuenda me tu mé ni si xi nihñu cojo xingun? <sup>6</sup> Peru ngu ngayun xuta ladu rë Jesús ne, vinchun jyë rë jingu sa xuta ladu rë Jesús, ¿hane hisca vanguncujun jyë vëhë xcun xuta xi sahmicuendaain me Nina!

<sup>7</sup> Xi cuatjin vinchun jyë rë xingun xingu xingu ngayun ne, ngajan matsejen xi ngayun canichujún. Hitsë sa ndaja xi ningatuhun xi cumandacha ngayun. Hitsë sa ndaja xi



ningatuhun xi cjue chëjë tsujun. <sup>8</sup> Cahndë rë xi cuatjin ningatuhun ne, tu ngayun vindachun hacuaha nichujun tsëhë xingun ngajñi nuju ngayun xuta rë yungun.

<sup>9</sup> ¿Há hyuun ta xuta tsehen ne, cumaji cuisehen me hiscan sahmi Nina gobiernu? Ha quihndë xicatuun cahndë xi cuma ndacha sa ngayun ta, yëjë xcusun xuta xi cuicun vi ne, cumaji cuisehen me hiscan sahmi Nina gobiernu: xuta xi sahmi me cjuatsehen cojo chjuun o sa cojo xihin xi hacuiin tsëhë me, xuta xi faharcun me nina ndyojo, cha xi chuya rë ngu xihin, <sup>10</sup> xuta xi chëjë me, xuta xi tjenguitaha me xi hacuiin tsëhë me, xuta xi hatuxa xuta chihi me, xuta xi ndesu me, xuta xi ndacha me, yëjë xcusun xuta xi cuacun vë ne, cumaji cuisehen me hiscan sahmi Nina gobiernu. <sup>11</sup> Yahnga ngayun ne, cuatjin cún ngayun titjun. Peru fahaxin me jyë nuju, camá tyjahi cjuatacun nuju, cafë jyë nuju. Cuatjin camá cojo nuju ngatsë rë Nai naja Jesucristu cojo ngatsë rë Hasen rë Nina naja.

*Meje rë xi cojo yojo naja nihña jyë nihña hnga Nina*

<sup>12</sup> Yahnga ngayun ne, nújun cuitjin: “Cuma nihña yëjë ni xcusun.” Cuatjin nújun. Cuma, peru hacuiin yëjë xcusun xi ndaja tsajan. “Cuma nihña yëjë ni xcusun”, peru ngahan ne, suaan cahndë xi scaa rë suhi rë tu mé ni xcusun cojo ná. <sup>13</sup> Yahnga nga ngayun ne, nújun cuitjin: “Casahmi Nina xi hatuxa matangun xi chinë cojo cahntsuan, hacuaha cahntsuan ne, hatuxa ma tangun cojo xi chinë.” Cuatjin nújun. Quixi jain, peru cuechú nixtin xi tsicjë Nina catsijo xcusun vëhë. Peru hacuiin casahmi Nina xi hatuxa matangun yojo naja cojo cjuatsehen ta casahmi me xi hatuxa matangun cojo Nai naja, hacuaha hatuxa matangun Nai naja cojo yojo naja. <sup>14</sup> Nina ne, catsicuya me Nai naja cjuahñu, hacuaha cojo ngahñu rë suvá me ne, hacuanitjin ni tsicuya naja me ngayaan cjuahñu.

<sup>15</sup> ¿Há hyuun ta yojo nuju ne, tjin tangun cojo Jesucristu? Quihndë ne, yojo naja xi tjin tangun cojo Jesucristu ne, ¿há nihña tangun cojo ngu na viteña yojo rë ni? ¡jéya! ¡Cata-mamiji rë Nina! <sup>16</sup> Hacuaha ¿há hyuun ta ngu xuta xi sahmi cjuatsehen cojo ngu na xi viteña yojo rë ne, sacuaha xi ngu yojo ni rë me cojo rë na? Cuatjin ma ta chja xujun rë Nina cuitjin: “Catsijo me ne, cuma ngu yojo ni rë me cojo xicjin me.” Cuatjin chja xujun rë Nina. <sup>17</sup> Peru ngu xuta xi sahmi tangun me cjuatacun rë me cojo Nai naja ne, cuma ngu cjuatacun ni rë cojo rë me.

<sup>18</sup> Naxunxun yojo nuju tsëhë cjuatsehen xi sahmi ngu xuta cojo ngu chjuun o sa cojo ngu xihin xi hacuiin tsëhë me. Yëjë sa cjuatsehen xi sahmi ngu xuta ne, hacuiin cojo yojo rë me

sahmi me. Peru xuta xi sahmi cjuatsehen cojo ngu chjuun o sa ngu xihin xi hacuiin tséhë ne, cojo yojo rë me sahmi me cjuatsehen vëhë. <sup>19</sup> ¿Há hyuun ta yojo nuju ne, sacuaha ngu yungun rë Hasen rë Nina xi caveya Nina cahntsua xahasen nuju? Ngayun ne, hacuiin tsujun suvun yojo nuju ta, <sup>20</sup> tséhë xi ngayun ne, cojo chji cachaha nuju. Vëhë xi meje rë xi cojo yojo nuju nihñu jyë nihñu hnga Nina.

## 7

### *Cjuacjintacun tséhë cjuavixan*

<sup>1</sup> Quihndë ne, ngeuehe tsicúya cjuua tsujun tséhë cjuua xi canihindun ná.

Ndatjin xi cuixaaín xuta. <sup>2</sup> Peru ngatsë rë cjuatsehen ne, catisacu chjuun rë jima ngu xihin, hacuaha jima ngu chjuun ne, catisacu xihin rë na. <sup>3</sup> Sa chjuun sa xihin me ne, catisahmi chihin me sacuatjin mameje rë cjuavixan xi casahmi me. <sup>4</sup> Sacuaha chjuun ne, hacuiin na vëhë vitexa na yojo rë na ta xihin rë na vitexa cha. Hacuanitjin ni xihin ta hacuiin cha vëhë vitexa cha yojo rë cha ta chjuun rë cha vitexa na. <sup>5</sup> Mijí rë xi nichuhun rë xingun yojo nuju sa chjuun sa xihin ngayun. Cuma nihñu cuatjin, peru sa xi catsijo ni ngayun canihñu tangun cjuua xi cuejñuxun ngujo nixtin, tséhë xi meje nuju xi ngujo nixtin vëhë ne, nihñu oración nuju cojo Nina. Hane xi cuatju vëhë ne, sehe tuyun nihñuchuhun sacuatjin mameje rë cjuavixan xi canihñu, sá tu ngatsë rë xi scaain nuju ne, sahmi Satanás ngahñu xi nihñu cjuatsehen.

<sup>6</sup> Cuatjin cachjá cojo nuju cojo sa xi hacuiin chja cuatjun, cachjaan sacuaha xi hatuxa vitéxa nuju. <sup>7</sup> Xi má ná ngahan ne, ndatjin sa xi yëjë ni xuta ne, scaa rë me sacuaha ngahan. Peru jima ngu xuta ne, casacu rë me jima ngu xcusun cjuandaja xi casua Nina me: ngu me ne, casacu rë me xcusun vihi, ngu nga me ne, casacu rë me xcusun vëhë.

<sup>8</sup> Quihndë ne, ngu ngu ngayun xi cjëë sacú chjuun nuju, cjëë sacú xihin nuju, hacuaha cojo ngayun xi cahan ngayun ne, cuichjá cojo nuju ta ndatjin xi cuinechun suvun sacuaha ngahan. <sup>9</sup> Peru sa xi scaain nuju ne, tixun. Hitsë sa ndaja xi cuixun xi cuma rë xi nicjun suvun yojo nuju cjuandya rë xihin.

<sup>10</sup> Hane ngu ngu ngayun xi cavixun ne, cuichjá cojo nuju ta ngu chjuun ne, mijí rë xi tsismi na xihin rë na. <sup>11</sup> Hane sa xi tacun xín na ne, catejña suvá na, o sa tsajin ne, catisehen nga na cjuandaja cojo xihin rë na. Hacuaha ngu xihin ne, mijí rë xi tsismi cha chjuun rë cha. Hacuiin ngahan xi chjá cuatjin ta Nai naja chja me.

<sup>12</sup> Quihndë ne, hacuiin Nai naja cuichja me ta ngahan cuichjá cojo nuju ngayujun ni xi cjëë cuichjá cojo nuju. Sa xi cachjuhun ngu chjuun xi manguaain cacun na cojo Nai naja, hane tsingatihin na cuejña sa na cojo nuju ne, xicanismuu na. <sup>13</sup> O sa xi cachjuhun ngu xihin xi manguaain cacun cha cojo Nai naja, hane tsingatihin cha cuejña sa cha cojo nuju ne, xi canismuu xihin nuju vë. <sup>14</sup> Cuatjin nihñu ta, xihin nuju xi manguaain cacun cojo Nai naja jan ne, ngatsë nuju ngayun ne, hacuaha cojo cha cumá cha ladu rë Nina. Hacuanitjin ni chjuun nuju xi manguaain cacun cojo Nai naja jan ne, ngatsë nuju ngayun xi ladu rë Jesús ne, hacuaha cojo na cumá na ladu rë Nina. Sa xi hacuiin cuatjin ne, quihndi nuju ne, hacuiin ladu rë Nina má. Peru xi cjuaquixi ne, quihndi nuju ne, ladu rë Nina má. <sup>15</sup> Peru sa chjuun sa xihin xi manguaain cacun cojo Nai naja ne, sa xi meje tsismi nuju ne, catitsismi nuju. Sa xi cuatjin cuatjun cuma ne, ngayun xi ladu rë Jesús ngayun ne, ha ndaya tjin ngayun tsëhë cjuavixan. Cuatjin meje rë xi nihñu ta, tsëhë xi Nina cajindaya nuju me xi cuangun ndiya rë cjuandaja cjuajeya. <sup>16</sup> Tsajin yo vëë rë há cuma naxuntjun chjuun nuju o sa xihin nuju.

*Chja Pablo hacutjin meje rë xi cjue xuta cojo ngasunhndë rë me*

<sup>17</sup> Meje rë xi ngayujun ni ne, nihñu xa xi casua Nina xi nihñu jima ngu ngayun, hacuaha ha sacuanitjin ni cún ngayun hya xi cavaxijin nuju Nina ne, hacuanitjin ni tángun nduju cojo. Cuatjin chjá cojo xuta tsëhë yëjë ni yungun. <sup>18</sup> Sa xi ha cati rë chuxin nuju hya xi cavaxijin nuju Nina ne, xicavinchuun chuva rë xi nindeyun xcusun vëhë. O sa xi cjëë xti rë chuxin nuju hya xi cavaxijin nuju Nina ne, xicanihñuu. <sup>19</sup> Xi xti rë chuxin naja o sa xtiin rë ne, tsajin mé vengui chjí rë ta xi vengui chjí rë ne, xi cuinuhyan cjua xi vitexa Nina. <sup>20</sup> Ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo. <sup>21</sup> Sa xi ngu mosu hndixahan ngayun nixtin hya ne, xicamacjiin tacún. Peru sa xi cuma cuetjuntjun tsëhë xi má ngayun mosu hndixahan ne, naxuntjun yojo nuju ta, <sup>22</sup> tsëhë xi ngu mosu hndixahan xi Nai naja vaxijin me ne, ndaya tjin xi cuma rë Nai naja. Hacuanitjin ni ngu xuta xi hacuiin mosu hndixahan me peru Nai naja cavaxijin rë me ne, mosu hndixahan rë Jesucristu má me. <sup>23</sup> Cojo chjí cavatsë nuju Nina. Vëhë xi mijí rë xi mosu hndixahan rë xuta cuma ngayun. <sup>24</sup> Ngayujun ni ne, ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo, xi tjin tangun cjuatacun nuju cojo Nina.

*Chja Pablo tsëhë xuta xi tsajin chjuun tsajin xihin rë me*

<sup>25</sup> Quihndë ne, sacuaaha tsëhë xuta xi cjëë cjuaha me chjuun cjëë cjuaha me xihin ne, tsajin ngu cjuaxi cavitexa ná Nai naja xi cuichjá cojo nuju. Peru cuichjá cojo nuju sacuatjin tsingátaha cacún, tsëhë xi ngatsë rë cjuandaja xi casua ná Nai naja ne, cuma cumangu tacún cojo ná. <sup>26</sup> Xi má ná ne, ngatsë rë cjuandya xi tjin naja quihndë ne, ngu xihin ne, ndatjin xi cuejña ni cha chuva xi ha tacun cha. <sup>27</sup> Sa xi ha tjin chjuun nuju ne, xicanismuu ná. Hane sa xi tsajin chjuun nuju ne, xicachjuun chjuun. <sup>28</sup> Peru sa xi cuixun ne, tsajin mé jyë nuju tjin, hacuaaha sa xi ngu na nixti cuixan na ne, tsajin mé jyë rë na tjin. Peru sa xi ngayun cuixun ne, hatuxa tjin nuju cjuacjintacun nchunchujun ni cahntsua ndya nuju, hane vëhë ngu cjuacjintacun xi mijí ná xi cuatjun cuma.

<sup>29</sup> Peru meje cuichjá cojo nuju ngayujun ni ta ha jemu camachúva nixtin. Vëhë xi hacuiin jercu nicjun yojo nuju tsëhë cjuandya rë ngeuehe ngasunhndë ta xuta xi tjin chjuun rë me ne, catisahmi cuenda me sacuaaha xi tsajin chjuun rë me; <sup>30</sup> xuta xi jihnda me ne, catisahmi cuenda me sacuaaha xi hacuiin jihnda me; xuta xi jemu tjin rë me cjuasua ne, catisahmi cuenda me sacuaaha xi hacuiin jemu tjin rë me cjuasua; xuta xi vatsë me ne, catisahmi cuenda me sacuaaha xi hacuiin tsëhë me xi cavatsë me; <sup>31</sup> hane xuta xi jemu sahmixa cojo yëjë ni xcusun xi tjin ngasunhndë ne, hacuiin cuatjutaha sahmixa me cojo. Cuatjin meje rë xi tsingataha cacun xuta ta, tsëhë xi ngasunhndë xi chutsejen vi ne, hatuxa cjuë.

<sup>32</sup> Ngahan ne, meje ná xi ngayun ne, tsajin nuju mé cjuandya. Xuta xi tsajin chjuun rë me ne, marcun rë me tsëhë xa rë Nai naja ta, tsëhë xi meje sahmi me hacutjin xi chuya rë Nai naja. <sup>33</sup> Peru xuta xi tjin chjuun rë me ne, marcun rë me tsëhë cjuandya rë ngasunhndë ta, tsëhë xi meje sahmi me hacutjin xi chuya rë chjuun rë me. <sup>34</sup> Hane xi cuatjin sahmi me ne, ma jo cjuatacun rë me. Hane ngu chjuun xi tsajin xihin rë o sa xi ngu chjuun xungun ne, marcun rë na tsëhë xa rë Nai naja, cojo sa xi cuma tsëhë Nina na cojo yojo rë na cojo hasen rë na. Peru na xi cavixan ne, marcun rë na tsëhë xa rë ngasunhndë ta, tsëhë xi meje sahmi na hacutjin xi chuya rë xihin rë na.

<sup>35</sup> Cachjá cuatjin cojo nuju, peru hacuiin xi cuátëcja cjuatacun nuju ta xi ndaja tsujun. Meje ná xi cuanguncujun ngu ndiya rë cjuandaja. Hacuaaha meje ná xi tuhun yojo nuju ngundiyaxa ni xi nihñu xa rë Nai naja.

<sup>36</sup> Peru sa xi ngu xuta tsingataha cacun me xi cuaaintjin xi sahmi me xi cjëë cuixan me cojo rë na xi tacunvasen cjuavixan rë me cojo, hane na vëhë ne, ha cavechú nixtin rë na xi cuma cuixan na, hacuaaha sa xi ha tuxa meje rë xi cuixan

na ne, catisahmi me mé xi meje sahmi me. Catixan me cojo rē na ta, tsajin mé jyē rē me xi cuatjin sahmi me. <sup>37</sup> Peru ngu sa xuta xi hacuiin sahmi ngu jyē xi cuixan me hacuaha ma vëhëhñu me yojo rē me ne, sa xi ha cavejña cacun me xi cuixaain me ne, ndaja sahmi me xi cuixaain me. <sup>38</sup> Vëhë xi me xi vixan cojo rē na xi tacunvasen cjuavixan rē me cojo ne, ndaja sahmi me. Hane me xi vixaain ne, hitsē sa ndaja sahmi me.

<sup>39</sup> Ngu chjuun ne, tsajin ndaya tjin na tsëhë xihin rē na jinguyëjē rē xi tacun cha cjuahñu. Peru sa xi cueya xihin rē na ne, ha ndaya tjin na xi cuixan na cojo tu yo ni xi meje rē na, ndastu xi ladu rē Nai naja má cha. <sup>40</sup> Peru xi má ná ne, hitsē sa ndaja cuma rē xahasen rē na sa xi cuejña cuanitjin ni na. Hane tsingátaha cacún xi ngahan ne, hacuaha cojo ngahan jiya Hasen rē Nina cahntsua xahasen naha.

## 8

### *Xichinë xi viyuju xcun nina ndyojo*

<sup>1</sup> Quihndë ne, nguehe cuichjá cojo nuju tsëhë xichinë xi viyuju xcun nina ndyojo. Ha hyan ta ngayejen ni ne, tjin cjuatacun xi hyan. Hya xi jemu cjín cjuatacun xi hyan ne, nihña yehe yojo naja suvaan, peru hya xi tjin naja cjuahmutacun ne, nihña yehe xingueen. <sup>2</sup> Sa xi ngu xuta tsingataha cacun me xi ndaja vëë me ngu cjuatacun ne, cjëë sa cuijnercu me sacuatjin xi meje rē. <sup>3</sup> Peru sa xi ngu xuta hmu cacun me Nina ne, me vëhë ne, vëë Nina me.

<sup>4</sup> Quihndë ne, sacuaha cjuatacun tsëhë xichinë xi viyuju xcun nina ndyojo ne, ha hyan ta tsajin camahani mé vengui chjí rē nina ndyojo jinguyë ni ngasunhndë, hacuaha ha hyan ta ngu tutu ni Nina xi tacun me. <sup>5</sup> Handasa xi jemu tjin xi hmí rē nina, sa ngahnga sa nangui ne, hacuaha handasa jemu cjín nina xi cuacun vë hacuaha jemu cjín nai vihi nai vëhë tjin ne, <sup>6</sup> peru xi cuma naja ngayaan ne, ngu tutu ni Nina xi tacun me, me xi Nahmi naja. Me vëhë xi casahmi me ngayëjē ni, hacuaha ngayaan ne, nechan nguehe ngasunhndë xi nihña tutjin xi meje rē me. Hacuaha ngu tutu ni Nai naja Jesucristu xi tacun me, me xi hacuaha cojo casahmi Nina jinguyëjē ni. Hacuaha ngayaan ne, nechan nguehe ngasunhndë ngatsë rē xi cuatjin meje rē Jesucristu.

<sup>7</sup> Peru hacuiin yëjē xuta vëë me cjuatacun vëhë. Yahnga xuta ne, ngatsë rē xi cuatjin xcusun rē me hatsëë ne, vutsejen me xichinë vëhë sacuaha ngu cjuatjo xi tsëhë cuaha nina ndyojo. Hane hya xi jinë me ne, jemu choho má cacun me, tsëhë xi, xi má rē me ne, jemu tsavi. <sup>8</sup> Peru xcusun xi chinë ne, visecuaain naja xi chuya rē Nina tsajan. Sa xi xinë ngu

xcusun ne, tsajin mé nichajan, hacuaha sa xi xinëë ne, tsajin mé ndaja sacú naja. <sup>9</sup> Nechun cuidado, ngayun xi vijne rcun xi tsajin mé sahmi rë xi xinë ngu xcusun xi caviyuju xcun nina ndyojo. Nechun cuidado, sá tu cuechú nixtin xi ngu xuta ladu rë Jesús xi cjëë ndaja cuijnercu cjuachacun rë Nina ne, tsismi cacun me ndiya rë Nina ngatsë rë xcusun xi nihñu. <sup>10</sup> Cuatjin nechun cuidado ta, tsëhë xi ngayun xi vijnercun ne, sa xi yo scuëë nuju xi tichinu niñu yungun rë nina ndyojo ne, me vëhë ne, ngatsë rë xi cjëë ndaja cuijnercu cjuatacun rë me ne, cojo me cuetju cacun me sinë me xi chinu xi caviyuju xcun nina ndyojo. <sup>11</sup> Xi cuatjin cuma ne, xuta ladu rë Jesús xi cjëë cuijnercu ndaja jan ne, chajá me ngatsë rë cjuatacun nuju xi cuatjin nihñu, handasa Jesucristu cahme me ngatsë rë xuta vëhë. <sup>12</sup> Vëhë xi, xi cuatjin ningquetsun cjuatacun rë xuta xi cuacun cjëë cuijnercu ndaja me ne, hacuiin suvá ni me xi cuacun vëhë xi choho nihñu cojo rë me ta hacuaha cojo Jesucristu. <sup>13</sup> Vëhë xi sa xi xichinë sahmi xi tsismi cacun ngu xuta ladu rë Jesús ndiya rë Nina ne, tsajin nu tsajin nixtin xi cúa sínë sa vëhë, cojo sa xi sahmeë xi tsismi cacun ngu xuta ladu rë Jesús jan ndiya rë Nina.

## 9

### *Xcusun xi vechú chuva rë xi sahmi ngu apóstol*

<sup>1</sup> Ngahan ne, ngu apóstol ngahan, hane vechú chuva rë xi sahme yëjë ni xcusun xi sahmi ngu apóstol, tsëhë xi ngahan ne, cahvë Nai naja Jesús. Ngayun ne, camá ngayun ladu rë Nai naja, ngatsë rë xi cëjë casahme xa rë me ngajñi nuju. <sup>2</sup> Handasa mijí cumacjain rë yahnga xuta xi apóstol má ngahan ne, peru ngayun ne, macjain nuju ta, tsëhë xi tsejen xi apóstol ngahan ngatsë rë xi ngayun ne, cavisuhun ladu rë Nai naja ngatsë rë cjua xi cachjá cojo nuju.

<sup>3</sup> Cuitjin tsicúya cjua vihi tsëhë xuta xi sahmi chuva ná me ndyá ngajñi nuju: <sup>4</sup> Tjin ná chuva rë xi tuhun xi xini xi sihin. <sup>5</sup> Tjin ná chuva rë xi chjihín chjuun xi cuma chjuun niji, sacuatjin rë apóstol xi yahnga cojo xicjin Nai naja cojo Pedru. <sup>6</sup> ¿Há Bernabé cojo ngahan tutu ni xi meje rë xi nihñi xa sehe sacú xi xini xi sihin? <sup>7</sup> Ngu xuta xi má me sindadu ne, ¿há tujún rë suvá me tsicojo me xi sahmi me xa vëhë? Ngu xuta xi sahmi me xitjë ne, ¿há jinii me xitjë xi vunihnga me jan? Ngu xuta xi sahmi cuidado chu tsánga ne, ¿há hviin me lechi rë chu? <sup>8</sup> Ngahan ne, hacuiin suvá cjuatacun rë xuta xi tichjá ta ley rë Moisés ne, hacuaha cuatjin chja. <sup>9</sup> Xcun ley rë Moisés ne, cuitjin camahindu: “Ngu ndyaja xi visecoo nuju ne, hacuiin nichaan xi sinë chu ta, hacuaha tjin ru chuva rë xi sinë chu tsëhë xa xi sahmi chu.” Cjua vëhë ne, hacuiin

meje cuichja xi vityangui cacun Nina tsëhë chu ndyaja ta<sup>10</sup> xi vityangui cacun me ne, tsijin ngayin. Cjua vëhë ne, camahindu ngatsë niji ngayin. Xuta xi vacjan me nangui cojo xuta xi vechjunne me tutjê ne, hya xi sahmi me xa vëhë ne, meje rë xi cuetaha cacun me xi sacú rë me hitsë tutjê vëhë.<sup>11</sup> Ngayin canitjin cjua rë Nina cahntsua xahasen nuju xingu xingu ngayun. Vëhë xi hacuiin choho tjin sa xi tuhun niji hitsë cjuachaja niji.<sup>12</sup> Sa xi vechú chuva rë xi tuhun cjuachaja rë jingu sa apóstol ne, ¡hitsë sa guan ngayin!

Peru ngayin ne, cjëë camahani mé xi chjahyin nuju. Cahndë rë vëhë ne, cacaa niji cojo jemu cjín cjuacjintacun, cojo sa xi hacuiin nihñi xi tjin yo xi tsitjungui cjuandajyihi xi chja tsëhë Jesucristu.<sup>13</sup> Ngayun ne, ha hyun ta nahmi xi sahmi me xa cahntsua yungun xi matitjun ne, hacuaha ngajan vaxë me cjuachaja rë me. Cuma cuinújan ne, nahmi xi sahmi me cojo chu xi sua xuta cjuatjo ngajan ngasunscun ne, hacuaha ngajan faha me xi jinë me.<sup>14</sup> Ha chuva vëhë ni ne, cavitexa Nai naja xi me xi sua machaya rë xuta tsëhë cjuandajyihi xi chja tsëhë Jesús ne, ha xcun xa vëhë ne, ngajan cuaxë me cjuachaja rë me.

<sup>15</sup> Peru ngahan ne, cjëë camahani mé xi cjuéhya rë xuta rë yungun. Hane cjua xi titsihindu nuju vi ne, hacuiin tsëhë xi féhya nuju cjuachaja naha. Xi má ná ne, hitsë sa ndaja tsahan xi cueya, xi cuma rë xi chjahátahá rë cjuasua naha xi sahme xa rë Nina tu cjuatjo.<sup>16</sup> Xi suá machaya rë xuta cjuandajyihi xi chja tsëhë Jesucristu ne, tsajin mé má vaxëndaja suva yojo naha ta, hatuxa tjin ná xi sahme cuatjin. Jemu chojyihi tsahan sa xi suan cumachaya rë xuta cjuandajyihi vëhë.<sup>17</sup> Vëhë xi, sa xi ngatsë rë xi meje ná suva xi cuatjin suá machaya rë xuta cjuandajyihi vëhë ne, ha tjin chjí naha. O sa xi sahme handasa mijí ná ne, peru Nina casua ná me xa vëhë.<sup>18</sup> Peru ¿jarë xi chjí naha ni? Chjí naha ne, xi tu cjuatjo ni suá machaya rë xuta cjuandajyihi xi chja tsëhë Jesucristu. Vëhë xi chjí naha, vëhë xi sua rë xahasen naha cjuasua. Cuma cuinújan xi handasa xi tjin ná chuva rë ne, cjëë camahani cjuéhya rë xuta rë yungun xi sua me cjuachaja naha xi sahme xa rë Nai naja.

<sup>19</sup> Ngahan ne, ha ndaya tjin ngahan. Hacuiin mosu hndixahan rë xuta má ngahan. Peru sahme sacuaha xi mosu hndixahan rë yëjë ni xuta má ngahan, cojo sa xi cjín sa xuta cuisécoo rë me xi cuisehen me ladu rë Jesucristu.<sup>20</sup> Hya xi tejñayajñe ngajñi rë xuta tjë rë Israel ne, sahme sacuaha sahmi xuta xi cuacun vë, cojo sa xi cjín sa xuta tjë rë Israel cuisécoo rë me xi cuisehen me ladu rë Jesucristu. Hya xi tejñayajñe ngajñi rë xuta xi tjengui me ley rë Moisés ne, sahme sacuaha sahmi xuta xi cuacun vë, handasa hacuiin ngahma

gubiernu rë ley vëhë tejña. Cuatjin sahme, cojo sa xi cjin sa xuta xi tjengui ley vë cuisécoo rë me xi cuisehen me ladu rë Jesucristu. <sup>21</sup> Hya xi tejñayajñe ngajñi rë xuta xi faharcuaain ley rë Moisés ne, sahme sacuaaha sahmi xuta xi cuacun vë, handasa fahárcun ngahan ley rë Nina, tsëhë xi tejña ngahma gubiernu rë ley rë Jesucristu. Cuatjin sahme, cojo sa xi cjin sa xuta xi faharcuaain ley rë Moisés vë cuisécoo rë me xi cuisehen me ladu rë Jesucristu. <sup>22</sup> Hya xi tejñayajñe ngajñi rë xuta xi cjëë ndaja cuijnercu me cjuachacun rë Nina ne, sahme sacuaaha sahmi xuta xi cuacun vë, cojo sa xi cjin sa xuta xi cjëë ndaja cuijnercu me cjuachacun rë Nina cuisécoo rë me xi ndaja cuisehen me ladu rë Jesucristu. Cuma cuinújan ne, sahme sacuaaha sahmi yëjë ni xuta, cojo sa xi sacú ná chuva rë xi cuma cuáxëtjê ngujo me. <sup>23</sup> Cuatjin sahme yëjë xcusun vëhë ngatsë rë cjuandajyihi xi chja tsëhë Jesucristu, cojo sa xi hacuaaha cojo ngahan satë ná.

<sup>24</sup> Ngayaan ne, ha hyan ta cha xi vincha carrera ne, yëjë ni cha sahmi cha ngahñu, peru ngu ni cha caa rë cha xi fehe titjun cha, hane cha vëhë xi fahatsja cha cjuatjo rë. Ha chuva vëhë ni meje rë xi ngayujun ni ne, nihñu ngahñu, cojo sa xi hacuaaha sua nuju Nina ngu premiu xi cuma ngascan. <sup>25</sup> Quihndë ne, cha xi cuatjin vincha carrera ne, hya xi vëhëchjine cha yojo rë cha ne, hatuxa jemu viyuju cha cuidadu tsëhë yëjë ni xcusun xi choho sahmi cojo cha. Cuatjin sahmi cha, cojo sa xi sacú rë cha ngu premiu xi ficanii rë. Peru ngayaan xi ladu rë Jesucristu ngayaan ne, cuatjin nihña, cojo sa xi Nina ne, sua naja me ngu premiu xi tsajin nixtin vetsun. <sup>26</sup> Vëhë xi ngahan ne, hacuiin tujyë vánga, hacuiin tujyë sahme ta <sup>27</sup> jemu tsijénda rë yojo naha, hacuaaha sahme rë ngujoyë xi sahmi hacutjin xi meje ná. Cuatjin sahme, sá tu ha xcun xi ha casuá camachaya rë xuta cjuandajyihi xi chja tsëhë Jesucristu ne, ngahan suva tsichajá.

## 10

### *Mijí rë xi chjahanrcun nina ndyojo*

<sup>1</sup> Ngayujun ni ne, meje ná xi hacuiin nichayun xcusun xi cavatju xutachanga naja xi caviyuju nixtin rë Moisés. Ngayëjë ni me xi cuacun vë ne, quiji me sacuatjin quiji yufí, hacuaaha yëjë ni me cavatjucja me ndachacun Hani. <sup>2</sup> Hane xi casahmi me cuatjin ne, cuatjin camá xi yëjë ni me cavisehen me ladu rë Moisés. <sup>3</sup> Hacuaaha yëjë ni me cajnë me niñu xi casua Nina. <sup>4</sup> Hacuaaha yëjë ni me cahvi me nandá xi casua Nina. Cahvi me nandá xi cavetju rë naxi xi casua Nina xi cjue cojo rë me. Hane naxi vëhë ne, hacui Jesucristu. <sup>5</sup> Peru jemu cjin xuta xi



cuacun vë xi cachuyiin rë Nina tsëhë me. Vëhë xi ngajan ngu cahndë xín camahani cahme nguehe cahme ngajan me.

<sup>6</sup> Cuatjin camá yëjë xcusun vëhë sacuahaha ngu ejemplu xi cuma naja, cojo sa xi hacuiin cumameje naja cjuatsehen, sacuatjin camameje rë me xi cuacun vëhë. <sup>7</sup> Hacuaha mijí rë xi chjuhunrcun nina ndyojo sacuatjin casahmi ngujo me xi cuacun vëhë. Cuitjin camahindu xcun xujun rë Nina: “Caviyuju xuta cajinë cahvi me, sehe cavisatjenhnga me quiji casua me cjuasua xahasen rë me.” Cuatjin camahindu. <sup>8</sup> Mijí rë xi nihña cjuatsehen cojo ngu chjuun o sa cojo ngu xihin sacuatjin casahmi ngujo me xi cuacun vëhë. Hane ha nixtin vëhë ni ne, cahme can jyan mil me. <sup>9</sup> Hacuaha mijí rë xi chjahanchuvan Nai naja sacuatjin casahmi ngujo me xi cuacun vëhë, hane cahme me xi cafaha chu yë me. <sup>10</sup> Hacuaha mijí rë xi choho cuisiajmuhmu tsëhë Nina sacuatjin casahmi ngujo me xi cuacun vëhë, hane catsiquehen rë me ángel xi hatuxa tsiquehen naja.

<sup>11</sup> Yëjë xcusun vëhë ne, cavatju me xi cuacun vëhë camá sacuahaha ejemplu xi cuma naja. Hacuaha camahindu cjua vëhë cojo sa xi sua naja conseju, ngayaan xi nechan quihndë xi ha meje cuijnetaha ngasunhndë. <sup>12</sup> Vëhë xi xuta xi má rë me xi jemu hñu siu cjuatacun rë me xi mangucacun me cojo Nina ne, catiyuju me cuidadu, sá tu chajá me tsëhë ndiya rë Nina. <sup>13</sup> Ngayun ne, hya xi chjaháchuva nuju ne, chjaháchuva nuju sacuahaha chjaháchuva rë yëjë xuta. Peru Nina ne, hatuxa cuma cumangu tacuun cojo rë me ta, tsëhë xi me vëhë ne, suaain me cahndë xi chjaháchuva nuju cojo ngu chuva rë xi scaain nuju cojo. Hya xi chjaháchuva nuju ne, me vëhë sua me chuva rë hacutjin cuetjuntjun, cojo sa xi scaa nuju hisca xi cuetjuntjun.

<sup>14</sup> Vëhë xi ngayujun ni ne, xicavisuhunjñuu cojo xuta xi faharcun me nina ndyojo. <sup>15</sup> Cuitjin tichjá cojo nuju, tsëhë xi jemu xuta quicun cacun ngayun. Nichuvun suvun cjua xi chjá cojo nuju. <sup>16</sup> Ngayaan ne, hya xi hyuun xi hinchu copa rë Nai naja ne, jemu ndaja tsajan. Nihña tangun cjuatacun naja cojo Jesucristu xi ninguitsjen hacutjin cavanga jni rë me hya xi cahme me. Hane hya xi chinë pan xi chotooncjan ne, nihña tangun cjuatacun naja cojo Jesucristu xi ninguitsjen hacutjin cavatju me camá xcun cru. <sup>17</sup> Sacuatjin rë pan xi ngu ni má handasa jemu cjín rquí xtotoho ne, hacuanitjin naja ngayaan ta tjin tangun cjuatacun naja cojo xingueen, handasa jemu cjín má ngayaan. Cuatjin ta, tsëhë ngu ni pan ne, chinë ngayejen ni hacuahaha ngu ni má ngayaan.

<sup>18</sup> Ningatuhun tacún hitsë tsëhë xuta tjë rë Israel. Xuta xi vejña me chu xi cahme sacuahaha cjuatjo xcun Nina ne, sahmi tangun me cjuatacun rë me cojo Nina. <sup>19</sup> Xi chjá cuatjin ne,

¿há chjá xi nina ndyojo ne, jemu vengui chjí rë? ¿Há chjá xi yojo xi cavejña xcun nina ndyojo ne, jemu vengui chjí rë? <sup>20</sup> Hacuïin ta, yojo xi vejña me ne, xcun xitsehen vejña me, hacuïin xcun Nina. Quihndë ne, mijí ná xi ngayun ne, nihñu tangun cjuatacun nuju cojo xitsehen. <sup>21</sup> Ngayujun ni ne, cumaji siuhun xi xincha copa rë Nai naja hane hacuaha siuhun xi xincha copa rë xitsehen. Hacuaha cumaji xinu xi viyuju xcun Nina hane hacuaha xinu xi viyuju xcun xitsehen. <sup>22</sup> ¿Há ndatjin xi nihña xi cuma chini Nai naja? ¿Há hitsë sa hñu ngayaan xi cuma rë me? ¡Hacuïin!

*Hacuïin yějë xcusun xi ndaja tsajan xi nihña*

<sup>23</sup> Yahnga ngayun ne, nújun cuitjin: “Cuma nihña yějë ni xcusun.” Cuatjin nújun. Cuma, peru hacuïin yějë xcusun xi ndaja tsajan. “Cuma nihña yějë ni xcusun”, peru hacuïin yějë xcusun xi cuisecoo naja xi cuanguen nduju cojo cjua rë Nina. <sup>24</sup> Mijí rë xi jima ngu ngayaan nihña ngahñu xi ndaja tsajan suvaan ta xi meje rë ne, nihña ngahñu xi ndaja tséhë xingueen.

<sup>25</sup> Xinu tu mé ni hiscan xi xteña yojo. Xicachjinengunsuun vihi vëhë tséhë yojo jan ngatsë rë xi chuyiin rë cjuatacun nuju tséhë yojo xi cavejña xcun nina ndyojo. <sup>26</sup> Cuatjin nihñu ta, xcun xujun rë Nina ne, cuitjin camahindu: “Ngasunhndë cojo yějë ni xi tjín ngasunhndë ne, tséhë Nina.” Cuatjin camahindu.

<sup>27</sup> Sa xi ngu xuta xi manguaain cacun cojo Jesucristu cuichja me xi cuangun xinu niñu ndava me ne, tángun. Hacuaha xinu tu mé ni xcusun xi cuiyuju me xi xinu. Xicachjinengunsuun vihi vëhë tséhë xi caviyuju me jan ngatsë rë xi chuyiin rë cjuatacun nuju tséhë yojo xi caviyuju xcun nina ndyojo. <sup>28-29</sup> Peru sa xi yo sua cumachaya nuju xi yojo jan ne, cavejña xcun ngasuncun ne, xicachinuu yojo jan ngatsë rë me xi casua camachaya nuju hacuaha ngatsë rë xi chuyiin rë cjuatacun rë me tséhë yojo xi viyuju xcun nina ndyojo. Hacuïin ngatsë rë xi chuyiin nuju suvun.

Peru tjín yahnga xuta xi cuma cjuinenguise me cuitjin: “¿Mé má chjaháchuva rë xcusun xi ngahan cuma sahme ngatsë rë xi chuyiin rë cjuatacu rë jingu sa xuta tséhë? <sup>30</sup> Sa xi suá nacuechji rë Nina tséhë xcusun xi jínë ne, ¿mé má choho chja me tsahan ngatsë rë xi cuatjin jínë ni?” Cuatjin cjuinenguise me.

<sup>31</sup> Vëhë xi, sa xi xinu o sa xi siuhun o sa xi tu mé ni xcusun xi nihñu ne, meje rë xi nihñu yějë cojo sa xi nihñu jyë nihñu hnga Nina. <sup>32</sup> Mijí rë xi nicjun rë xuta, há xi xuta tjë rë Israel ne, o há xi xutaxín ne, o há xi xuta rë yungun rë Nina. <sup>33</sup> Hya xi sahme tu mé ni xcusun ne, sahme ngahñu xi chuya rë yějë

xuta tsahan. Sahmee ngahñu xi ndaja tsahan suva ta sahme ngahñu xi ndaja tsëhë jemu cjin xuta, cojo sa xi cuetjutje me.

## 11

<sup>1</sup> Vëhë xi ngayujun ni ne, meje rë xi nihñu sacuatjin sahme ngahan, sacuaaha ngahan xi sahme sacuatjin casahmi Jesucristu.

*¿Há meje rë xi cuetsan rcuun hya xi chjahanrcun Nina?*

<sup>2</sup> Ngayujun ni ne, ngahan ne, vaxëndaja nuju ta, tsëhë xi yëjë ni hora ne, vitsjen nuju ngahan, hacuaha tivangun nduju cojo yëjë xcusun xi casuá camachaya nuju. <sup>3</sup> Peru meje ná xi cumachaya nuju ta me xi matitjun tsëhë jima ngu xihin ne, hacui Jesucristu, hane xi matitjun tsëhë ngu chjuun ne, hacui xihin rë na, hane xi matitjun tsëhë Jesucristu ne, hacui Nina. <sup>4</sup> Sa xi ngu xihin titsa rcu cha hora xi sahmi cha oración rë cha o sa hora xi chja cha cjuarë Nina cojo xuta ne, jemu choho sahmi cha cojo Jesucristu, me xi matitjun tsëhë cha. <sup>5</sup> Hane sa xi ngu chjuun tsajin titsa rcu na hora xi sahmi na oración rë na o sa hora xi chja na cjuarë Nina cojo xuta ne, jemu choho sahmi na cojo xihin rë na, cha xi matitjun tsëhë na. Ha tangun ni sacuaaha xi casejnu rë rcu na. <sup>6</sup> Sa xi ngu chjuun vetsaain na rcu na ne, hacuaha catisejnu rë. Peru sa xi sava tsejen xi xtisun rë tsjarcu na o sejnu rë ne, catetsa na rcu na. <sup>7</sup> Xuta xi xihin ne, mijí rë xi titsa rcu me ta, me vëhë ne, matitjun me sacuatjin matitjun Nina hacuaha tsingacun me hacutjin jyë hnga Nina cojo Hasen rë me. Peru yachjin ne, tsingacun na hacutjin yehe hnga xuta xi xihin cojo cjuatacun rë me. <sup>8</sup> Cuatjin ta hya xi casahmi Nina xuta ne, titjun casahmi me ngu xihin, sehe cafaha me ngu rquí ninda rë xihin jan casahmi me ngu chjuun. <sup>9</sup> Hacuaha xuta xi xihin ne, hacuiin catsindaja Nina me ngatsë rë yachjin ta yachjin ne, catsindaja Nina ngatsë rë xuta xi xihin. <sup>10</sup> Vëhë xi ngatsë rë xi tivutsejen ángel ne, yachjin ne, meje rë xi cuetsa na rcu na, cojo sa xi tsingacun na xi ngahma gobiernu rë xihin ran siu na. <sup>11</sup> Ngayejen ni ngayaan xuta ladu rë Jesucristu ne, hacuiin suvá ni chjuun o sa xi suvá ni xihin xi vengui chjí rë me ta catsijo xcusun ni ngayaan vengui chjí naja. <sup>12</sup> Quixi xi cafaha Nina ngu rquí ninda rë xihin xi casahmi me chjuun xi tjun tjun casahmi me. Peru quihndë ne, ngayaan xihin ne, hacuaha tsin ngayaan tsëhë yachjin. Peru Nina casahmi me ngayëjë ngarca.

<sup>13</sup> Ngayujun ni ne, ha hyun ta ngu chjuun ne, ndajin tjun xi cuetsaain na rcu na hya xi sahmi na oración rë na cojo Nina. <sup>14</sup> Suvá tsejen xi jemu cjuasava xi cuma rë ngu xihin sa xi nduju tsjarcu cha. <sup>15</sup> Peru yachjin ne, ndaja tsejen na xi

nduju tsjarcu na ta, tsëhë xi Nina casua me xi cuetsa rë rcu na. <sup>16</sup> Peru sa xi yo meje cuichja xi ndajin tjin xcusun vëhë ne, catamachaya rë ta ngayin cojo ngayujun ni xuta rë yungun ne, ha vëhë ni xcusun naja.

*Cuaain tjin xi má hya xi má suhi rë Comida tsëhë Nai naja ngajan Corinto*

<sup>17</sup> Nguehe tsihindu nuju ngujo cjua. Vaxeenndajan nuju ta, tsëhë xi hya xi matangun ngayun xi chjuhuncun Nina ne, cahndë rë xi ndaja cuetjucaa tsujun ne, tu chohotjin vetju. <sup>18</sup> Xi tjutjun ne, fehe cjua tsahan xi hya xi cuatjin matangun ngayun ne, hacuiin ngu tangun ni má cjuatacun nuju. Hane ngahan ne, macjain ná hitsë. <sup>19</sup> Xi má nuju ne, ¡hatuxa meje rë xi cuatjin cuma, cojo sa xi cuma tsejen yo xi tsëhë jain Nina! <sup>20</sup> Hya xi matangun ngayun ne, hacuiin comida rë Nai naja xi chinu ta, <sup>21</sup> hora xi chinu niñu ne, jima ngu ngayun vangun titjun chjuhun comida nuju suvun xinu. Hane ngujo ngayun ne, hisca vojo sa nuju. Hane ngujo nga ngayun ne, hisca camachuhun. <sup>22</sup> ¡Sacuaha xi tsajin ndya nuju xinu siuhun! O sa tsajin ne, sacuaha xi nihñuchuvun xuta ladu rë Nina hacuaha chandunsavun xuma me xi tsajin rë. ¿Mé cuichjá cojo nuju ni? ¿Há cuáxëndaja nuju? ¡Xi cuatjin nihñu ne, cumaji!

*Comida tsëhë Nai naja*

<sup>23</sup> Cjua xi casuá camachaya nuju ne, hacui cjua xi cafhántsa tsëhë Nai naja xi chja cuitjin: Nguixun xi camá entregadu Nai naja Jesús ne, tacun me cojo tejó xuta ladu rë me xi sinë nguixun me tsëhë suhi Pascua. Hane hora vëhë ne, cafaha me ngu pan. <sup>24</sup> Hane xi cafë casua me nacuechji rë Nina ne, cavotohocja me pan jan, sehe cachja me cuitjin: “Vihi ne, yojo naha xi cueya ngatsë nuju. Cuitjin nihñu xcusun vihi yasen ni, cojo sa xi ninguitsjun ná.” Cuatjin cachja Jesús. <sup>25</sup> Hane xi cajnetaha cajinë nguixun me ne, hacuanitjin ni cafaha me copa, sehe cachja me cuitjin: “Xan vihi ne, vihi jni naha xi sahmichihin rë compromisu xatsë xi tisahmi Nina cojo xuta. Cuitjin nihñu xcusun vihi jima ngu ndiya xi siuhun cuitjin, cojo sa xi ninguitsjun ná.” Cuatjin cachja me. <sup>26</sup> Vëhë xi jima ngu ndiya xi tichinu pan vëhë hacuaha tjihyún xi hincha copa vëhë ne, tininguitsjun tsëhë cjuaveya rë Nai naja. Hane cuanitjin cjin ni cumá hisca hya xi cuinduva nga me.

*Hacutjin meje rë xi xinëe xi hmí rë Comida tsëhë Nai naja*

<sup>27</sup> Ngajan xi tu yo ni xi tujyë jinë pan vëhë o sa xi hví xan vëhë xcun Comida tsëhë Nai naja ne, quitjen jyë xi tsixcuehyu yojo rë Nai naja, quitjen jyë xi tsixcuehyu jni rë me. <sup>28</sup> Vëhë xi meje rë xi jima ngu ngayaan ne, nichuvan suvaan cjuatacun

naja, sehe xinē pan jan hacuaha siuhun xan jan ta, <sup>29</sup> tsēhē xi yo xi tsinguitsjiin yojo rē Nai naja hora xi sinē cuihi xcusun vēhē ne, sacú rē ngu castigu xi cuatjin tujyē jinē hvi. <sup>30</sup> Vēhē xi jemu cjín xuta tsēhē ngajñi nuju ne, ndaya tjin cacun me hacuaha hmu rē me; yahnga nga me ne, hisca cahme me. <sup>31</sup> Peru sa xi ngayaan ndaja nichuvan suvaan cjuatacun naja ne, Nai naja ne, hacuaha sahmi naja me castigu. <sup>32</sup> Peru sa xi Nai naja sahmi naja me castigu ne, cuatjin sahmi me cojo sa xi cueyaquixi naja me ndiya hane hacuiin tangun cuma ngayaan castigu cojo xuta tsehen.

<sup>33</sup> Vēhē xi ngayujun ni ne, hya xi cumatangun ngayun xi xinu niñu ne, tinechunyun xingun xingu xingu ngayun. <sup>34</sup> Sa xi tjin yahnga ngayun xi jemu vojo nuju ne, cojo tjun ni xinu ngajan ndya nuju, cojo sa xi hacuiin sahmi nuju Nina castigu xi cuatjin vinechunyuun xingun. Quihndē ne, sacuaaha cjuacjintacun xi yahnga ne, hya xi cuinduvatjēngē nuju ne, hya sahmechehen.

## 12

### *Cjuatjo xi sua Nina ngayaan*

<sup>1</sup> Ngayujun ni ne, meje ná xi cuijnercun sacuaaha tsēhē cjuatjo xi cuacun sua naja Nina.

<sup>2</sup> Ngayun ne, ndaja hyun xi hya xi cjēē cuisuhun ladu rē Nina ne, tujyē caningatuhun cachjuhunrcun nina ndyojo xi hatuxa tsajin cjuahñu rē. <sup>3</sup> Vēhē xi meje ná xi cuijnercun xi ngu xuta xi tichja me ngu cjua xi casua Hasen rē Nina me ne, hatuxa cuichjaain me cjua vihi: “¡Jesús ne, catji me cojo xitsehen!” Hacuaaha suvá ni xuta xi jiya Hasen rē Nina cahntsua cjuatacun rē me xi cuma cuichja me cjua vihi: “¡Jesús ne, Nai naha me!”

<sup>4</sup> Quihndē ne, jemu cjín xcusun cjuatjo xi tjin, peru suvá ni Hasen rē Nina xi sua naja yējē cjuatjo vēhē. <sup>5</sup> Hacuaaha jemu cjín xcusun xa rē Nina xi tjin, peru suvá ni Nai naja xi suaxa naja me. <sup>6</sup> Hacuaaha hacuiin ngu chihin xcusun xa xi Nina sahmi me xcun cjuahñu naja, peru ngu ni Nina sahmi me vēhē ngajñi jima ngu jima ngu ngayaan. <sup>7</sup> Nina sahmi me xi ma tsejen xi jiya Hasen rē me cahntsua xahasen naja xingu xingu ngayaan, cojo sa xi ndaja tsajan ngajñi naja ngayejen ni. <sup>8</sup> Ngu xuta ne, jemu vechú cjuatacun rē me hya xi chja me ngu cjua xi sua Hasen rē Nina me. Hane ngu nga xuta ne, jemu ndaja vijnercu me hya xi chja me ngu cjua xi sua Hasen rē Nina me. <sup>9</sup> Hane ngu nga xuta ne, ha Hasen vēhē ni ne, sahmi xi ndaja mangucacun me cojo Nina. Hane ngu nga xuta ne, ha Hasen vēhē ni sahmi xi ma sahmi me xi mandaja xuta hmu rē. <sup>10</sup> Hane ngu nga xuta ne, fahatsja me cjuatacun xi sahmi

me cjuarcun, hane ngu nga xuta ne, fahatsja me cjuatacun xi cuichja me ngu cjua xi sua Nina me. Ngu nga me ne, fahatsja me cjuatacun xi cuijnercu me mé xcusun hasen catsingatju ngu cjuatacun xi cafahatsja ngu xuta, ¿há hasen ndaja?, o ¿há hasen tsehen? Ngu nga xuta ne, fahatsja me cjuatacun xi cuichja me ngujo xcusun hne xi hvíin me. Hane ngu nga me ne, fahatsja me cjuatacun xi sua me machaya naja mé vijne xi cuacun vèhë. <sup>11</sup> Ngu tu tu ni Hasen rë Nina xi sahmi yëjë cjuandaja vèhë, hacuaha hacui ni Hasen rë Nina xi sua naja jima ngu ngayaan hacutjin xi chuya rë.

*Sacuaha ngu ni yojo má ngayejen ni*

<sup>12</sup> Ha hyan ta yojo rë ngu xuta ne, tjin tsja, tjin ntsacu, tjin nguisin, tjin jingusa cahndë tséhë. Peru yëjë ni cahndë vèhë ne, má ngu ni yojo rë xuta. Hacuaha cuanitjin rë Jesucristu. <sup>13</sup> Hacuaha cuanitjin naja ngayaan ta ngayejen ni ne, hya xi caxtenda ngayaan, handasa xuta ladu rë Nina o sa xutaxín, handasa mosu hndixahan o sa xuta xi ndaya tjin má ngayaan ne, peru camá ngayaan sacuaha ngu ni yojo ngatsë rë ngu tu tu ni Hasen rë Nina. Hacuaha ngayejen ni ne, ngu tu tu ni Hasen rë Nina xi cavisehen cahntsua xahasen naja.

<sup>14</sup> Cuatjin ta yojo rë ngu xuta ne, hacuiin ngu cahndë ni tjin rë ta jemu cjín cahndë tjin rë. <sup>15</sup> Ntsacun ne, cuma cuichja cuitjin: “Ngatsë rë xi hacuiin ntsun má ngahan ne, vèhë xi hacuiin tséhë yojo nuju má ngahan.” Cuatjin cuichja. Peru handasa cuatjin cuichja ne, hacuiin vèhë sahmi xi hacuiin tséhë yojo naja má. <sup>16</sup> Hacuaha tyjavañujú nga ne, cuma cuichja cuitjin: “Ngatsë rë xi hacuiin túxcun má ngahan ne, vèhë xi hacuiin tséhë yojo nuju má ngahan.” Cuatjin cuichja. Peru handasa cuatjin cuichja ne, hacuiin vèhë sahmi xi hacuiin tséhë yojo naja má. <sup>17</sup> Sa xi suvá tuxcun má yëjë yojo naja ne, ¿hacutjin cuinuhyan? O sa xi suvá tyjavañujú má yëjë yojo naja ne, ¿hacutjin cuijnë naja? <sup>18</sup> Peru Nina ne, caviyujutahá me jima ngu cahndë tséhë yojo naja tucutjin ni xi cachuya rë me. <sup>19</sup> Sa xi yëjë ni yojo naja má ngu ni ntsan o sa xi ngu ni tuxcun ne, vèhë ne, hisca hacuiin yojo naja hmí rë. <sup>20</sup> Cuatjin xi jemu cjín cahndë xi cuacun vèhë xi má ngu ni yojo naja.

<sup>21</sup> Quihndë ne, tuxcun ne, cumaji cuichja xi mamijí rë ntsan, o sa rcuun ne, cumaji cuichja xi mamijí rë ntsacun ta, <sup>22</sup> xi cjuaquixi ne, cahndë tséhë yojo naja xi má naja xi hitsë sa tsavi ne, vèhë cahndë xi hitsë sa mameje. <sup>23</sup> Hane cahndë tséhë yojo naja xi hitsë sa chjaharcuaain rë ne, vèhë cahndë xi hitsë sa ndaja nicaja rë. Hane cahndë tséhë yojo naja xi má naja xi mijí rë xi ningacun rë ne, vèhë cahndë xi hitsë sa ndaja cuidadu má. <sup>24</sup> Peru hacuiin sahmi ngujoyë nihña cuatjin cojo

cahdě tsěhě yojo naja xi ma ningacun rě. Nina ne, hya xi catsindaja me yojo naja ne, casahmi me xi hitsě sa chjahárcun rě cahndě xi hitsě sa tsavi. <sup>25</sup> Cuatjin casahmi Nina yojo naja, cojo sa xi ngu chihin ni sahmixa yějě yojo naja, hacuaha yějě ni cahndě tsěhě yojo naja ne, ngu tangun ni marcun rě tsěhě xicjin. <sup>26</sup> Hane sa xi ngu cahndě tsěhě yojo naja choho vatju má ne, hacuaha cojo sa yějě cahndě tsěhě yojo naja choho má rě. O sa xi ngu cahndě tsěhě yojo naja vaxëndaja xuta ne, hacuaha cojo yějě sa cahndě tsěhě yojo naja ndamá rě.

<sup>27</sup> Quihndě ne, ngayejen ni xuta ladu rě Nina ne, sacuaha yojo rě Jesucristu má ngayaan, hane jima ngu ngayaan ne, má ngayaan sacuaha ngu cahndě tsěhě yojo rě me. <sup>28</sup> Hane ngajñi naja ngayaan xuta ladu rě Nina ne, tjuntjun ne, caviyuju me apóstol; xi ma jo ne, caviyuju me profeta; xi ma jyan ne, caviyuju me xuta xi vicuya cjuar rě me; hane xi cjui sa ne, caviyuju me xuta xi ma sahmi cjuarcun, cojo xuta xi ma sahmi xi mandaja xuta hmu rě, xuta xi visecoo me jingu sa xuta, xuta xi vitexa naja, xuta xi ma chja me ngu hne xi hvín me mé vijne. <sup>29</sup> Tsěhě cjuatjo vihi ne, hacuiin yějě vihi satě naja jimangu yaan ta, ¿há ngayejen ni má ngayaan apóstol ni? ¿Há ngayejen ni má ngayaan profeta ni? ¿Há ngayejen ni vicuyan cjuar rě Nina ni? ¿Há ngayejen ni ma nihña cjuarcun ni? <sup>30</sup> ¿Há ngayejen ni ma nihña xi mandaja xuta hmu rě ni? ¿Há ngayejen ni ma nújan hne xi hisca núhyaan mé vijne ni? ¿Há ngayejen ni ma tahan machaya rě xuta mé vijne hne vėhě ni? <sup>31</sup> Vėhě xi meje rě xi ngayun ne, catamameje nuju cjuatjo rě Nina xi hitsě sa vengui chji rě.

Quihndě ne, tsingácun nuju ngu ndiya xi hitsě sa jercu ndaja.

## 13

### *Mé vijne xi tjin naja cjuahmutacun*

<sup>1</sup> Ngahan ne, sa xi cuichjá yějě hne rě xuta hacuaha cuichjá hne rě ángel, peru tsajin ná cjuahmutacun ne, tangun ngahan cojo ngu quicha xi choho fane o sa ngu quicha xi hmí platillu xi jercu fane camahani. <sup>2</sup> Sa xi cuichjá ngu cjuar rě Nina, sa xi vijnercú yějě cjuar rě Nina xi tjihma, sa xi hvě yějě cjuatacun, hacuaha sa xi ma tsiniya ngu naxi ngatsě rě xi jercu ndaja mangucacún cojo Nina, peru tsajin ná cjuahmutacun ne, tsajin mé vengui chjí naha. <sup>3</sup> Sa xi suá rě xuta yuma yějě xi tjin ná, hacuaha hisca suá yojo naha xi cueti, peru tsajin ná cjuahmutacun ne, tsajin mé machjirėhě ná xi cuatjin sahme.

<sup>4</sup> Hya xi tjin naja cjuahmutacun ne, hacuaha jyě tacun, ndaja ngayaan, hacuiin chini ngayaan, hacuiin xta ngayaan, hacuiin nihña yehe suvaan yojo naja, <sup>5</sup> hacuiin xcuahya

ngayaan, hacuiin meje naja xi suvaan ni ndaja tsajan, hacuiin ma cjan naja, hacuiin veyantacun cjuatsehen xi sahmi xuta cojo naja. <sup>6</sup> Xi tjin naja cjuahmutacun ne, tsajin mé ndama naja tséhë cjuatsehen ta xi ndama naja ne, tséhë cjuaquixi. <sup>7</sup> Xi tjin naja cjuahmutacun ne, ngajñi rë tu mé ni cjuacjintacun ne, hatuxa jyë tacuun, hatuxa mangu tacuun, hatuxa vetahan tacun, hatuxa caa naja.

<sup>8</sup> Cjuahmutacun ne, tsajin nixtin xi cjuë. Peru cuechú nixtin xi ha quihndë suaain sa Nina cjua xi cuichja profeta, ha quihndë cuichjaain sa xuta hne xi vijni rcu me, hacuaha ha quihndë suaain sa Nina cjuatacun xi ndaja cuijnercu ngu xuta cjua rë me. <sup>9</sup> Cuatjin cuma ta cjua rë Nina ne, sehe hitsë xi vijnercuun, hacuaha sehe hitsë cjua rë Nina xi chja profeta. <sup>10</sup> Peru hya xi cjuhe me xi vëë chichihin yëjë cjua rë Nina ne, hya cjuë xi tsë tsë ni hyan.

<sup>11</sup> Hya xi lihndi ngahan ne, cavisiajme sacuaha visiajmi langa, catsingátaha cacún sacuaha tsingataha cacun langa, hacuaha cjuatacun naha ne, sacuaha cjuatacun rë langa. Peru xi camachangá ngahan ne, cavejñáxen xcusun rë langa. <sup>12</sup> Quihndë ne, sehe hitsë vijnercuun cjua rë Nina sacuaha tsejen naja hya xi chutsejenyan ni ngu speju xi hacuiin ndaja tsejen. Peru cuechú nixtin xi chutsejen xcun cojo xcun. Quihndë ne, sehe hitsë xi vijnercú. Peru cuechú nixtin xi chichihin ni cuijnercú, sacuatjin vëë ndaja ná Nina. <sup>13</sup> Quihndë ne, tjin jyan xcusun xi nihña xi tsajin nixtin xi cjuë. Tjun ne, xi mangu tacuun cojo Nina. Xi má jo ne, xi vetahan tacun Nina. Xi má jyan ne, xi tjin naja cjuahmutacun. Peru xi hitsë sa matitjun ngajñi rë xi catsijyan vëhë ne, xi tjin naja cjuahmutacun.

## 14

### *Hne xi hyaan mé vijne*

<sup>1</sup> Quihndë ne, nihñu ngahñu xi tjin nuju cjuahmutacun. Hacuaha catamameje nuju xi sua nuju Nina cjuatjo rë me. Peru hitsë sa chjahyun rë me cjuatacun xi cuinújun cojo xuta ngu cjua xi sua nuju me ta, <sup>2</sup> xuta xi chja me ngu hne xi hvín me mé vijne ne, hacuiin chja me cojo xuta ta suvá ni Nina chja me cojo ta, tséhë xi tsajin yo vijnercu. Hasen rë me sahmi xi chja me cjua xi tsajin yo vëë. <sup>3</sup> Peru me xi chja cjua xi casua Nina me ne, chja me cojo xuta, cojo sa xi cuisecoo me xuta hacuaha sua rë me cjuetacun. <sup>4</sup> Xuta xi chja me ngu hne xi hvín me mé vijne ne, visecoo suvá rë me yojo rë me. Peru xuta xi chja me ngu cjua xi casua Nina me ne, visecoo rë yëjë xuta rë yungun.

<sup>5</sup> Ngayujun ni ne, meje ná xi cuma cuinújun hne xi vijni-ircun, peru hitsë sa meje ná xi chjuhunntsun cjuatacun xi



cuinújun cojo xuta ngu cjua xi sua nuju Nina ta xuta xi chja me cojo xuta ngu cjua xi sua Nina me ne, hitsë sa matitjun me xi cuma rë me xi chja hne xi vijniircuun. Peru sa xi cuma cuichja me cojo naja mé vijne hne vëhë ne, ndatjin ta cuisecoo naja ngayejen ni xuta rë yungun xi cuatjin sahmi me. <sup>6</sup> Vëhë xi hya xi cjuëtjengë nuju ne, venguin chjí rë xi cuichjá cojo nuju ngu hne xi vijniircun. Xi vengui chjí rë ne, hacui xi suá cumachaya nuju ngu cjua xi casua ná Nina, o sa xi cuichjá cojo nuju ngu cjuatacun xi sua Nina, o sa xi cuicuyá nuju ngu cjua rë Nina o ngu cjuachacun.

<sup>7</sup> Cuma cuinújan ne, sa xi ngu tyjo o sa ngu arpa hacuiin ndaja fane ne, hisca hyaan mé pieza fane. <sup>8</sup> Hacuaha sa xi ngu tyjo rë sindadu hacuiin ndaja sua xta rë ne, tsajin yo cuëhëchjine rë xi cjue xcun si. <sup>9</sup> Hacuanitjin nuju ngayun ta sa xi cojo ntsuvun nújun ngu cjua xi nuhyaain rë ne, tsajin yo xi cuijnercu cjua vëhë ta sacuaha xi ngajñi tjo ni nújun. <sup>10</sup> Nguehe ngasunhndë ne, hisca hyaan há cjín xcusun hne tjin, hane yëjë ni ne, tjin mé vijne. <sup>11</sup> Peru sa xi vihndeen ngu hne ne, sacuaha ngu xuta ngu nangui ngahan xi cuma rë xuta xi tichja cojo ná jan, hacuaha me vëhë ne, sacuaha xuta ngu nangui me xi cuma ná ngahan. <sup>12</sup> Vëhë xi quihndë ta ngayujun ni jemu meje nuju cjuatjo rë Nina ne, nihñu ngahñu xi sacú nuju ngu cjuatjo xi visecoo rë yëjë sa xuta rë yungun.

<sup>13</sup> Vëhë xi xuta xi chja me ngu hne xi hvíin me mé vijne ne, catjehya rë me Nina cojo sa xi cuma suacuenda me mé vijne. <sup>14</sup> Sa xi sahme oración naha cojo ngu hne xi vijniircú ne, hasen naha ne, sahmixa, peru cjuatacun naha ne, sahmixaain. <sup>15</sup> ¿Hacutjin sahme ni? Sahme oración naha cojo hasen naha, hacuaha sahme oración naha cojo cjuatacun naha. Së cojo hasen naha, hacuaha së cojo cjuatacun naha. <sup>16</sup> Sa xi ngayun nihñuu cuatjin ne, hya xi tuhun nacuechji rë Nina cojo hasen nuju ne, cumaji cuichja xuta xi yahnga sa: “Cuatjin jain” ta, tsëhë xi cjua xi nújun ne, vijniircu me. <sup>17</sup> Handasa jemu ndaja tuhun nacuechji rë Nina, peru xuta xi yahnga ne, visecuaain camahani rë me. <sup>18</sup> Súa nacuechji rë Nina ta hitsë sa chjá ngahan hne xi vijniircú xi cuma nuju ngayujun ni. <sup>19</sup> Peru hya xi ma tangun ngahan cojo xuta ngajan yungun ne, hitsë sa chuya ná xi cuichjá ndastu hñú cjua cojo cjuatacun naha cojo sa xi cuicuyá rë xuta, xi cuma rë xi cuichjá të mil cjua cojo ngu hne xi vijniircu me.

<sup>20</sup> Ngayujun ni ne, ha quihndë xicaningatuun tacún sa sacuatjin tsingataha cacun quihndi. Sacuatjin rë ngu quihndi xi hisca hvíin mé xi hmí rë cjuatsehen ne, cuatjin meje rë xi hacuaha hyuun. Peru xi cojo cjuatacun nuju ne, meje rë xi ningatuhun tacún sacuaha tsingataha cacun ngu xuta

changá. <sup>21</sup> Xcun xujun rë Nina ne, camahindu cjua xi cachja me cuitjin: “Ngahan ne, tsingátju xuta ngu nangui xi chja jingu sa hne, hane hne rë me cuichja me cjua naha cojo yějě xuta ladu naha. Peru handasa cuatjin sahme ne, cuetaharcuaain me cjua naha, chja Nina.” Cuatjin camahindu. <sup>22</sup> Věhě xi cjuatjo xi casua naja Nina xi ma nújan hne xi hisca hyaan mé vijne ne, hacuiin ngatsě rë xuta xi ha mangu cacun cojo Nina xi casua me ta ngatsě rë xuta xi tsitjungui cjua rë me. Hane cjuatjo xi ma nújan ngu cjua xi sua naja Nina ne, hacuiin ngatsě rë xuta xi tsitjungui cjua rë me xi casua me ta ngatsě rë xuta xi ha mangu cacun me cojo rë me. <sup>23</sup> Věhě xi hya xi matangun ngayujun ni ngayun xuta rë yungun, sa xi ngayujun ni nújun ngu hne xi hisca hyuun mé vijne hane cjuehe ngujo cha xi hvín cjua rë Nina hacuaha hisca manguaain cacun cha cojo me ne, ¿hácuiin tsingataha cacun cha xi sca nuju ni? <sup>24</sup> Peru sa xi ngayujun ni ngayun nújun ngu cjua xi sua nuju Nina hane cjuehe ngu cha xi manguaain cacun cojo Nina hacuaha hisca hvín cha cjua rë me ne, xi vihndě cha yějě cjua věhě ne, cuijnercu cha xi jemu tjin jyě rë cha, suvá ni cha tsichuva cha cjuatacun rë cha, <sup>25</sup> hacuaha cjua xi hinchahma ngajñi rë cjuatacun rë cha ne, cuitsjen rë cha. Ngajan xi cjue cuiticjaxcun cha, cjuaharcun cha Nina. Hacuaha tsinguixi cha xi tacun jain Nina nguehe ngajñi nuju.

*Meje rë xi ndandaja nihña yějě ni*

<sup>26</sup> Ngayujun ni ne, cuitjin vijne cjua xi titsihíndu nuju. Hya xi matangun ngayujun ni ne, ngu ngayun ne, sun tsěhě Nina, ngu nga ngayun ne, vicuyun ngu cjua rë Nina, ngu nga ngayun ne, nújun ngu cjua xi casua nuju Nina, ngu nga ngayun ne, nújun ngu hne xi hisca hyuun mé vijne, hane ngu nga ngayun ne, nújun mé vijne cjua rë hne jan. Xi meje rë ne, yějě ni xcusun xi nihñu vě ne, cuatjin nihñu cojo sa xi cuisecuun xingun ngajñi nuju. <sup>27</sup> Sa xi tjin xuta xi cuichja me hne xi vijniircun ne, catichja jo o sa xi jyan ni me, hacuaha chuva ngu me catichja me. Hane meje rë xi cuinújun ngu ngayun mé vijne cjua xi cachja xuta xi cuacun jan. <sup>28</sup> Peru sa xi tsajin ngu ngayun xi cuma nihñu cuatjin ngajan yungun ne, catiyujujyuu ni xuta xi cuacun vě. Catichja suvá ni me cahntsua xhasen rë me, o sa suvá ni Nina catichja me cojo me. <sup>29</sup> Hacuanitjin ni sa xi tjin xuta xi cjuahahtsja me ngu cjua tsěhě Nina ne, jo jyan ni me catichja me, hane yějě sa ngayun ne, nichuvun cjua věhě. <sup>30</sup> Sa xi ngu ngayun xi nechun ndyá chjuhunnstun ngu cjua tsěhě Nina ne, catisejyu me xi titjun tichja jan. <sup>31</sup> Xi cuatjin ne, ngayujun ni cuma cuinújun chuva ngu chuva ngu ngayun ngu cjua xi chjuhunnstun tsěhě Nina, cojo sa xi hacuaha cojo yějě sa ngayun ne, cumachaya nuju

hacuaha sacú nuju cjuetacun. <sup>32</sup> Xuta xi chja me ngu cjua xi fahatsja me tséhë Nina ne, cjua vëhë cuitexa me cjuatacun rë suvá me ta, <sup>33</sup> tséhë xi Nina ne, chuyiin rë me xi tujyë nihña ta xi chuya rë me ne, ngu cjuandaja cjuajeya.

Sacuatjin xcusun xi nihña ngayejen ni xuta ladu rë Nina ne, <sup>34</sup> yachjin ne, mijí rë xi cojo na cuichja na hya xi tjin tangun ngayaan yungun ta, tséhë xi tsajin cahndé xi cuichja na. Xi meje rë ne, catiyuju na ngahma gobiernu rë xihin rë na, sacuatjin vitexa ley rë Nina. <sup>35</sup> Sa xi tjin ngu cjua xi meje cumachaya rë na ne, ndava na catinenguise na xihin rë suvá na ta, tséhë xi jemu cjuasava xi ngu chjuun cuichja na hya xi tjin tangun ngayaan ngajan yungun.

<sup>36</sup> ¿Há tjtutjun ngayun canújun cjua rë Nina cojo xuta? ¿Há suvun ni catsingatju nuju Nina cjua vëhë ni? <sup>37</sup> Sa xi tjin ngu xuta xi má rë me xi profeta me o sa quitsë rë xahasen rë me cojo Hasen rë Nina ne, catijnercu me ta cjua xi titsihindu nuju vi ne, Nai naja vitexa me. <sup>38</sup> Peru sa xi mijí sahmicuenda me cjua naha ne, hacuaha xicanihñucuenduun cjua rë me.

<sup>39</sup> Vëhë xi ngayujun ni ne, catamameje nuju xi cuma ngayun profeta, hacuaha xicanichuun rë xuta cahndé xi cuichja me hne xi vijniircu me. <sup>40</sup> Xi meje rë ne, yëjë ni xcusun xi nihñu ne, ndandaja nihñu hacuaha chichihin ni nihñu yëjë.

## 15

### *Cjuandajyihi xi chja tséhë xi cavuya Jesucristu cjuahñu*

<sup>1</sup> Ngayujun ni ne, meje tsinguitsjen nuju tséhë cjuandajyihi xi casuá camachaya nuju, cjuandajyihi xi chja tséhë Jesucristu. Cachjuhunntsun cjuandajyihi vëhë, hacuaha ndaja sa tijimangu tacún cojo. <sup>2</sup> Hane ngatsë rë cjuandajyihi vëhë ne, tivetjuntjun tséhë jyë nuju, sa xi nismutacuun cjuandajyihi vëhë. Cuatjin tivetjuntjun sa xi hacuiin tu mahya camangu tacún cojo.

<sup>3</sup> Ngahan ne, casuá camachaya nuju cjua xi matitjun xi cafhántsa. Cachjá ta Jesucristu ne, cahme me cojo sa xi tsicjé me jyë naja, sacuatjin camahindu xcun xujun rë Nina. <sup>4</sup> Hacuaha cachjá cojo nuju ta caseyaniji me hane xi ma jyan nixtin ne, cavuya nga me cjuahñu, sacuatjin camahindu xcun xujun rë Nina. <sup>5</sup> Hacuaha cachjá cojo nuju ta cavëë Pedru Jesucristu, sehe cavëë yëjë tejó apóstol jan me. <sup>6</sup> Sehe ngu tangun ni cavëë nga vatju sa hñú cientu xuta ladu rë me me. Hane handasa cahme yahnga me ne, peru jemu cjín me xi siu quicun sa hisca quihndé. <sup>7</sup> Sehe cavëë Jacobo me, sehe cavëë nga yëjë apóstol me.

<sup>8</sup> Hane xi camá ngascan xi cavuya cjuahñu rë me ne, ngahan cahvë me. Ngahan xi sacuaha ngu quihndi xi cavatjutaha

tsëhë nixtin rë, sehe catsin. <sup>9</sup> Cuatjin chjá ta, tsëhë xi ngahan ne, hitsë sa chúva vengui chji naha xi cuma rë apóstol xi yahnga. Ngahan ne, hisca vechiin chuva rë xi apóstol cuichja xuta tsahan ta, tsëhë xi jemu jyë cjuañihi casuá rë xuta ladu rë Nina titjun. <sup>10</sup> Peru ngatsë rë cjuandaja rë Nina ne, ngahan ne, apóstol má ngahan. Hane cjuandaja xi casahmi me cojo ná ne, hacuiin tu mahya ta hitsë sa hñu casahme xa xi cuma rë yějë sa apóstol. Peru hacuiin suva casahme ta cjuandaja rë Nina cavisecoo ná. <sup>11</sup> Quihndë ne, cuendaain rë ¿há ngahan? o ¿há me vëhë ne?, peru cjuandajyihí vëhë xi catihin camachaya nuju, hacuaha cjuá vëhë xi camangu tacún cojo.

*Cjuandajyihí xi chja tsëhë xi cuya nima cjuahñu*

<sup>12</sup> Quihndë ne, quihndë ta tihin machaya rë xuta xi Jesucristu ne, cahme me sehe cavuya nga me cjuahñu ne, ¿hacutjin má xi nújun yahnga ngayun xi nima ne, vuyaaín nga cjuahñu ní? <sup>13</sup> Sa xi vuyaaín nima cjuahñu ne, ngajan xi Jesucristu ne, hacuaha cavuyaaín nga me cjuahñu. <sup>14</sup> Hane sa xi cavuyaaín Jesucristu cjuahñu ne, ngajan xi tu mahya xi cuatjin tihin machaya rë xuta, hacuaha ngayun ne, tu mahya xi cuatjin mangu tacún. <sup>15</sup> Sa xi cuatjin ne, ngajan xi hacuiin cuatjin cjuá xi nújin tsëhë Nina ta, tsëhë xi nújin xi Nina ne, catsicuya me Jesucristu cjuahñu. Peru quixiin xi catsicuya Nina Jesucristu cjuahñu sa xi hatuxa vuyaaín nima cjuahñu. <sup>16</sup> Sa xi hatuxa tsicuyaaín Nina nima cjuahñu ne, ngajan xi hacuaha catsicuyaaín me Jesucristu cjuahñu. <sup>17</sup> Hane sa xi catsicuyaaín me Jesucristu cjuahñu ne, ngajan xi tsajin mé vengui chji rë xi cuatjin mangu tacún cojo rë me, hacuaha cjëë camahani cjuë jyë nuju. <sup>18</sup> Hacuaha nima xi camangu cacun cojo Jesucristu ne, hacuaha cachajá me. <sup>19</sup> Sa xi suvá ni quihndë xi nechan cjuahñu machjirëhë xi cuitjin vetahan tacun Jesucristu ne, hitsë sa jemu chojyihí tsajan xi cuma rë yějë sa xuta.

<sup>20</sup> Peru xi cjuaquixi ne, Jesucristu ne, Nina catsicuya rë me cjuahñu. Tsëhë yějë nima xi cahme ne, me vëhë tjtjun me cavuya me cjuahñu. <sup>21</sup> Sacuatjin xi ngatsë rë ngu xihin cavisehen cjuaveya ngasunhndë ne, hacuanitjin ni ngatsë rë ngu xihin ne, cavisehen cjuatacun xi nima ne, cuya cjuahñu. <sup>22</sup> Ngatsë rë xi tjë rë Adán má xuta ne, vëhë xi yějë ni me ne, hme me. Hacuanitjin ni ngatsë rë xi sahmitangun xuta cjuatacun rë me cojo Jesucristu ne, vëhë xi yějë ni me xi cuacun vë sacú rë me cjuahñu xatsë. <sup>23</sup> Peru cuatjin sacú rë jima ngu me hacutjin xi satë rë me: tjtjun ne, Jesucristu; ngaxtun vëhë ne, hya xi cuya nga Jesucristu ne, xuta xi ladu rë me ne, tsicuya me cjuahñu, sacú rë me cjuahñu xatsë. <sup>24</sup> Ngaxtun vëhë nga ne, tsicjë Jesucristu yějë xutaxa rë xi jemu tsehen,

hacuaha tsicjê me yějê xitsehen. Hane xi matjengucjin ne, sahmi me entregadu cojo Nina Nahmi naja gobiernu xi sahmi me. Hane hya cuijnetaha ngasunhdê. <sup>25</sup> Cuatjin cuma ta meje rê xi Jesucristu ne, sahmi me gobiernu hisca hya xi cuiyuju Nina ngahma gobiernu rê Jesucristu yějê ni xi sahmi rê me condra. <sup>26</sup> Hane xi cuatju tsicjê Nina yějê sa xi sahmi rê Jesucristu condra ne, sehe tsicjê me cjuaveya ta, tsêhê xi hatuxa yějê ngarca ni caviyuju Nina ngahma gobiernu rê Jesucristu. <sup>27</sup> Chja xujun rê Nina xi caviyuju me yějê ngarca ni ngahma gobiernu rê Jesucristu. Peru ha suvá tsejen xi hacuiin cojo Nina, me xi caviyuju yějê ngarca ni jan, cavéjña me. <sup>28</sup> Peru hya xi ha yějê ngarca ni cuiyuju ngahma gobiernu rê Jesucristu, me xi Quihndi rê Nina ne, hya cuejñá suvá Jesucristu yojo rê me ngahma gobiernu rê Nina, me xi caviyuju yějê ngarca ni ngahma gobiernu rê Jesucristu. Cuatjin cuma, cojo sa xi Nina ne, cuma titjun camahani me tsêhê yějê ngarca ni.

<sup>29</sup> Quihndê ne, sacuaha xuta xi cuatjin xtenda me ngatsê rê nima ne, ¿mé machjirêhê? Sa xi hatuxa vuyaain nima cjuahñu sacuatjin chja yahnga xuta ne, ¿mé má cuatjin xtenda xuta ngatsê rê nima? <sup>30</sup> Hane sacuaha ngayin ne, ¿mé má yějê ni hora nechintihin tsavi? <sup>31</sup> Nina vêe me xi hacuaha ngahan ne, ngu nixtin ngu nixtin ne, tejñataha tsavi tsêhê cjuaveya. Ngayujun ni ne, jemu vaxëndaja nuju ngatsê rê xi tjin tangun cjuatacun naja cojo Nai naja Jesucristu. <sup>32</sup> Sa xi ngahan cavitejñataha tsavi nguehe Efeso sacuaha ngu xuta xi hacuiin ladu rê Nina má me ne, ¿mé ndaja tsahan ni? Sa xi hatuxa vuyaain nima cjuahñu ne, sacuatjin chja cjua ne: “Jemu sa ndaja xi xinêe siuun ta, nchujun ni nguini ne, cueyan!” <sup>33</sup> Ha quihndê xicatuun cahndê xi cumandacha sa ngayun ta, tjin ngu cjua xi chja cuitjin: “Xi nihña tangun cojo xuta tsehen ne, vêhê tsinguetsun rê xcusun ndaja xi nihña.” <sup>34</sup> Catuya nga catejña chihin cjuatacun nuju, hacuaha ha quihndê xicanihñuu sa cjuatsehen. Tjin yahnga ngayun ne, hisca hyuun Nina. Cuatjin chjá cojo nuju cojo sa xi cuma sava nuju.

*Xcusun yojo xi sacú rê nima hya xi cuya cjuahñu*

<sup>35</sup> Peru tjin rê yahnga ngayun xi chjinengunsun cuitjin: “¿Hacutjin nga cuya nima cjuahñu? ¿Mé xcusun yojo rê me xi cuya?” Cuatjin chjinengunsun. <sup>36</sup> ¡Ngarca, xan! Hya xi nitjen ngu tutjê ne, titjun cueya sehe cuetju. <sup>37</sup> Xcusun xi nitjen ne, hacuiin xcusun xi sehe cuma jyê jan, ta ngu tutjê ni xi nitjen, sacuaha ngu trigu o sa tu mé sa xcusun tutjê. <sup>38</sup> Peru Nina sua me xcusun rê hacutjin jyihi xi cachuya rê me. Jima ngu tutjê ne, sua rê me xcusun rê xi tsêhê suvá. <sup>39</sup> Yojo ne, hacuiin ngu

xcusun ni tjin ta hacjahi xcusun yojo rë xuta, hacjahi xcusun yojo rë chu, hacjahi xcusun yojo rë chu nisë, hacuaha hacjahi xcusun yojo rë chu ti. <sup>40</sup> Tjin hasen xi tjin ngajan ngahnga hacuaha tjin hasen rë yëjë xi tjin nguehe nangui. Peru hacjahi tsejen xcusun xi tjin ngajan ngahnga hacuaha hacjahi tsejen yëjë xi tjin nguehe nangui. <sup>41</sup> Hacjahi hasen ndajyihi rë tsuhi, hacjahi hasen ndajyihi rë sá, hacuaha hacjahi hasen ndajyihi rë niñú. Hisca ngajñi rë niñú ne, hacjahi hacjahi hasen rë jima ngu.

<sup>42</sup> Hacuaha cuatjin cuma hya xi nima cuya cjuahñu. Hya xi seyaniji nima jan ne, hatuxa fë fehndu yojo rë. Peru hya xi nima cuya nga cjuahñu ne, tsajin nu tsajin nixtin xi cjuehndu yojo rë. <sup>43</sup> Hya xi seyaniji ne, tsajin camahani mé ndajyihi, peru hya xi cuya nga cjuahñu ne, jercu ndajyihi camahani. Hya xi seyaniji ne, tsajin camahani ngahñu rë, peru hya xi cuya nga cjuahñu ne, jemu hñu camahani ngahñu rë. <sup>44</sup> Hya xi seyaniji ne, seyaniji ngu yojo naja xi hatuxa tsëhë cjuahñu xi tjin nguehe ngasunhdë vihi, peru hya xi cuya nga cjuahñu ne, cuya ngu yojo naja xi hatuxa tsëhë cjuahñu xi tjin ngajan ngahnga. Quihndë ta tjin yojo naja xi tsëhë cjuahñu xi tjin nguehe ngasunhdë ne, ngajan xi hatuxa tjin yojo naja xi tsëhë cjuahñu xi tjin ngajan ngahnga.

<sup>45</sup> Hacuaha cuatjin camahindu xcun xujun rë Nina hiscan chja cuitjin: “Adán, xihin xi tjutjun camá ne, casua Nina me cjuahñu.” Peru Jesucristu, me xi canduva camá ngascan ne, me vëhë Hasen xi sua cjuahñu. <sup>46</sup> Hacuian titjun sacu naja cjuahñu xi tsëhë ngahnga ta tsëhë ngasunhdë titjun sacu naja, sehe sacu naja cjuahñu xatsë xi tsëhë ngahnga. <sup>47</sup> Xihin xi tjutjun camá jan ne, cojo nihndë camá. Vëhë xi tsëhë ngasunhdë má. Peru Jesucristu, xihin xi majo jan ne, canduva me tsëhë ngahnga. <sup>48</sup> Yëjë xuta xi tsëhë ngasunhdë me ne, hatuxa tangun me cojo xihin xi nihndë camá jan. Hane yëjë xuta xi tsëhë ngahnga me ne, hatuxa tangun me cojo xihin xi canduva tsëhë ngahnga. <sup>49</sup> Sacuatjin xi camá ngayaan sacuaha xihin xi nihndë camá jan ne, hacuanitjin cuma ngayaan sacuaha xihin xi canduva tsëhë ngahnga jan.

<sup>50</sup> Ngayujun ni ne, nguehe cuichjá cojo nuju ta yojo naja xi yojo cojo jni camá ne, cumaji cuisehen hiscan sahmi Nina gobiernu. Hacuaha ngu xcusun xi hatuxa fehndu ne, cumaji cuisehen hiscan tsajin camahani mé xi fehndu. <sup>51</sup> Chutsujun ni. Nguehe cuichjá cojo nuju ngu cjuatacun xi jiyahma titjun: Hacuian ngayejen ngayaan cueyan. Peru ngayejen ni sacú yojo xatsë naja <sup>52</sup> ngu marcu macjain ni, sacuaha xi ngu cuechjan ngu chuxahan ni tuxcun, hya xi cjuane sacuaha ngu tyjo xi meje cuijnetaha fane ta, cjuane sacuaha ngu tyjo,

sehe cuya nima cjuahñu cojo yojo xatsë rë xi tsajin nu tsajin nixtin cjuehndu. Hane ngayaan ne, hacuaha sacú naja yojo xatsë naja. <sup>53</sup> Cuatjin cuma ta, yojo naja vi xi hatuxa fehndu ne, meje rë xi cuya ngu yojo xi hatuxa fehndiin. Yojo naja vi xi hatuxa hme ne, meje rë xi cuya ngu yojo xi hatuxa hmii. <sup>54</sup> Hane hya xi cuatjin cuma ne, hya cuetjucaa cjua xi camahindu xcun xujun rë Nina xi chja cuitjin: “Cjuaveya ne, cjuë camahani. Cjuahñu xatsë xi fehndiin ne, vëhë scaa rë cuetjundaja. <sup>55</sup> ¡Cjuaveya ne, ha quihndë tsajin camahani rë ngahñu! ¡Cjuaveya ne, ha quihndë tsajin camahani mé cjuahngatacun xi cuma sahmi cojo naja!” <sup>56</sup> Cjuaveya ne, sahmi cjuahngatacun cojo xuta ngatsë rë cjuatsehen, hacuaha cjuatsehen ne, tjin rë ngahñu ngatsë rë ley rë Moisés. <sup>57</sup> Peru nacuechji rë Nina, me xi sahmi xi vetjunndajan ngatsë rë yëjë ni xi casahmi Nai naja Jesucristu.

<sup>58</sup> Vëhë xi ngayujun ni ne, ngayun xi jemu hmú cacún nuju ne, tejñuhñu xahasen nuju, xicavetjunxuun tsëhë ndiya rë Nina. Yëjë ni nixtin ne, tángun nduju camaha sa nihñu xa xi casua nuju Nai naja. Ha hyun ta yëjë xa xi nihñu ne, hacuini tu mahya, xi cuatjin tjin tangun cjuatacun nuju cojo Nai naja.

## 16

### *Cuma tangun tujún xi cjue Jerusalén*

<sup>1</sup> Quihndë ne, sacuaha tujún xi jima tangun xi cjue cuisecoo rë xuta ladu rë Jesucristu, me xi jemu choho tivatju tijima ngajan Jerusalén ne, sacuatjin cachjá cojo xuta rë yungun ngajan distritu Galacia ne, cuatjin nihñu. <sup>2</sup> Jima ngu domingu ne, meje rë xi ngayujun ni ne, tejñuxun tsë tsë tujún xi nihñu ganar tsëhë xa xi nihñu. Tetjún ne, cojo sa xi hya xi cjuëhë ndyá ne, mijí rë xi chjahya nga rë tujún. <sup>3</sup> Hane hya xi cjuëhë ndyá ne, yo xuta xi cuinújun xi cjue ne, tsihindu ngahan xujun xi cuaha me, sehe tsingátju me cjuecani me cjuatjo nuju ngajan Jerusalén. <sup>4</sup> Hane sa xi tsejen ta ndatjin xi ngahan cjuë ne, cuma cjue me cojo ná.

### *Sua Pablo machaya rë xuta Corinto xi cjuetjengui me me*

<sup>5</sup> Cuechú nixtin xi cjuëtjengë nuju, peru hya xi ha cavátju distritu Macedonia, tsëhë xi hatuxa tjin ná xi cuátju ngajan. <sup>6</sup> Cuma rë cuitejñataha cojo nuju ngujo nixtin, o sa xi yëjë nixtin rë chan hnchan. Hane xi cuatjin ha cavitejñataha cojo nuju hitsë ne, cuma cuisecuun ná hitsë xi cjuë sa hiscan xi cjuë. <sup>7</sup> Cuatjin tsingátaha cacún ta, tsëhë xi mijí ná xi nduva scútsejen nuju xi tu ñaja cuátju ni ta xi vetahá cáacun ne, xi cuitejñataha cojo nuju jyë nixtin, sa xi sua Nai naja cahndë.

<sup>8</sup> Peru cuitejñataha nguehe Efeso hisca xi cuechú suhi tsëhë Pentecostés ta, <sup>9</sup> tsëhë xi jemu casacu ná cahndë xi sahme xa xi ndatjin cuetjucaa, handasa hacuaha jemu tjin xuta xi sahmi ná me condra.

<sup>10</sup> Quihndë ne, sa xi cjue scusehenya nuju Timoteo ne, nihñu xi hacuiin cumacjín cacun me xi cuejña me ngajñi nuju ta, tsëhë xi sahmi me xa rë Nai naja sacuatjin sahme ngahan. <sup>11</sup> Vëhë xi hisca ngu yun ne, mijí rë xi nihñuchuvun me. Tisecuun rë me xi cjue sa me cojo cjuandaja cjuajeya, cojo sa xi cuma cuinduvatjengui ná me ta, tsëhë xi nguehe tejñaya rë me cojo sa ngujo xuta ladu rë Nai naja xi nduva cojo me.

<sup>12</sup> Quihndë ne, sacuaha Apolos ne, jemu cachjá cojo rë me xi cjue me cojo ngujo sa xuta ladu rë Nai naja jan, cjuetjengui nuju me, peru mijí cjue me xi ngutjen. Peru cjue me nixtin hya xi sua rë me chuva rë.

### *Cjua xi vijnetaha*

<sup>13</sup> Nechun cuidadu. Ndaja sa catamangu tacún cojo cjuachacun xi macjain naja. Tiyujunhñu cjuatacun nuju hacuaha tuhun ngahñu xahasen nuju. <sup>14</sup> Yëjë ni xi nihñu ne, nihñu cojo cjuahmutacun.

<sup>15</sup> Ngayujun ni ne, ha hyun ta yëjë me xi siu ndava Estéfanas ne, me xi cuacun vë tjutjun cavisehen me ladu rë Jesucristu ndyá Acaya, hacuaha casua suvá me yojo rë me xi cuisecoo me xuta ladu rë Jesucristu. <sup>16</sup> Meje ná xi ngayujun ni ne, tinuhyun tsëhë xuta xi cuatjin sahmi, hacuaha tinuhyun tsëhë xuta xi visecoo me xcun xa rë me xi cuacun vëhë.

<sup>17</sup> Jemu ndama ná xi cafehe Estéfanas nguehe, cojo Fortunato cojo Acaico. Handasa tsajin ngayujun ni nguehe, <sup>18</sup> peru ndastu me xi jyan vi ne, casua ná me cjuetacun, sacuatjin casua nuju me ngayun cjuetacun. Xuta xi cuatjin sahmi ne, meje rë xi chjuhuncun me.

<sup>19</sup> Xuta tsëhë yëjë ni yungun nguehe distritu Asia ne, tsingatju me ngu nina rë me tsujun ngayujun ni. Aquila cojo Priscila, cojo yëjë sa xuta ladu rë Jesucristu xi ma tangun me ndava me vëhë ne, hacuaha tsingatju me ngu nina rë me tsujun ngayujun ni xi hacuaha tjin tangun cjuatacun nuju cojo Jesucristu. <sup>20</sup> Yëjë ni xuta ladu rë Jesucristu nguehe ne, tsingatju me ngu nina rë me tsujun. Tuhun rë xingun nina, cojo cjuandaja cojo cjuahmutacun chutatsuhun xingun, sacuatjin xcusun naja.

<sup>21</sup> Suva ngahan, Pablo, tsihindu nuju ngu cjua vihi, xi tisuá nuju ngu nina.

<sup>22</sup> Sa xi ngajñi nuju tjin ngu me xi hmaai cacun me Nai naja ne, catisatiin rë me cjuandaja rë Nai naja. ¡Ngayun Nai naja, nduvun!



<sup>23</sup> Nai naja Jesucristu catisua nuju me cjuandaja rë me.  
<sup>24</sup> Ngahan ne, hacuaha tsingátju cjuahmutacun naha xi cuma nuju ngayujun ni, ngatsë rë xi tjin tangun cjuatacun naja cojo Jesucristu.

## Carta xi majo catsingatju San Pablo xi cafahatsja xuta nandya Corinto

<sup>1</sup> Ngahan Pablo ne, casuaxa ná Jesucristu xi má ngahan apóstol tséhë me, tséhë xi cuatjin xi meje rë Nina. Hane ngahan cojo cha Timoteo xingueen ne, ningatjin ngu xujun vi tsujun, ngayujun ni xuta Corinto xi xuta ladu rë Nina ngayun. Hacuaha ningatjin xujun vi xi scutaya yëjë sa xuta ladu rë Nina jingujyë ni estadu Acaya vë. <sup>2</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya.

### *Vaxëndaja Pablo Nina ngajñi rë cjuañihi*

<sup>3</sup> Nina Nahmi rë Nai naja Jesucristu ne, jemu tjin rë me cjuandaja. Me vëhë ne, hatuxa tjin rë me cjuayumatacun cojo niji hacuaha hatuxa sua niji me cjuetacun. <sup>4</sup> Sua niji me cjuetacun ngajñi rë yëjë ni cjuañihi xi vatjin má, cojo sa xi ngayin ne, hacuaha cuatjin cuma tihín rë xuta xi yahnga cjuetacun vëhë ngajñi rë yëjë cjuañihi xi vatju me má. <sup>5</sup> Chuva rë xi vatjin cjuañihi sacuatjin xi cavatju Jesucristu camá ne, hacuaha cuatjin sua niji me cjuetacun. <sup>6</sup> Hya xi cuatjin vatjin cjuañihi ne, hatuxa cuatjin má cojo sa xi ngayun ne, sacú nuju cjuetacun hacuaha cuetjuntjun tséhë jyë nuju. Hacuaha hya xi cuatjin sacu niji cjuetacun ne, cuatjin má cojo sa xi hacuaha cojo ngayun ne, sacú nuju cjuetacun. Hane sacú nuju cjuetacun vëhë ngatsë rë xi hacuaha caa nuju cojo cjuañihi sacuaha cjuañihi xi vatjin má. <sup>7</sup> Ngayin ne, jemu vetihin tacuin nuju ta, tséhë xi hyin ta sacuatjin xi tivatjun cjuañihi ne, hacuaha tisacu nuju cjuetacun.

<sup>8</sup> Ngayujun ni ne, meje niji xi cumachaya nuju cjuacjintacun xi cavatjin camá ngajan estadu Asia. Jemu jyë camahani cjuañihi xi cavatjin camá, hisca ngahñu sa tsajin niji xi scaa niji cojo cjuañihi vëhë; quihndë tsajin niji cjuetacun xi cojo cjuahñu cuijnitihin. <sup>9</sup> Peru ngayin ne, hisca hatsëë camangu tacuin cojo cjuaveya niji. Cuatjin camá cojo sa xi hacuiin cuetihin tacuin cjuatacun niji suvin ta cuetihin tacuin Nina, me xi tsicuya cjuahñu rë nima. <sup>10</sup> Nina ne, cavaxëtje niji me tséhë cjuacjintacun jyë xi meje tsiquehen niji jan, hacuaha cuaxëtje sa niji me. Cavetihin tacuin Nina xi cuatjin cuaxëtje sa niji me, <sup>11</sup> tséhë xi ngayun ne, hacuaha tivisecuun niji xi tichjahyun rë Nina ngatsë niji. Hane xi cjín xuta sahmi me cuatjin ne, hacuaha jemu cjín cuma ngayun xi tuhun nacuechji rë Nina tséhë cjuandaja xi sua niji me.

*Chja Pablo mé má cjëë cjue me Corinto*

<sup>12</sup> Ngayin ne, nihñi yehe yojo niji ngatsë rë xi ha hyin cojo cjuatacun niji ta tyjahi xahasen niji hacuaha nechin nguñaja tacuin xi tivanguin cojo ngasunhdë niji. Peru hacuiin cojo cjuatacun niji suvin xi cuatjin cun ngayin ta cojo cjuandaja rë Nina. Hacuaha hatuxa cuatjin cun ngayin hya xi nechin ngajñi nuju. <sup>13-14</sup> Sacuaha cjua xi nihindin nuju ne, suvá cjua xi ma chutayun hacuaha vijnercun. Ha vijnercun hitsë, peru meje niji xi ndaja sa cuijnercun cjuetacun vihi: Cuma nihñu yehe yojo nuju ngatsë niji sacuatjin xi cuma nihñi yehe yojo niji ngatsë nuju, hya xi cuya nga Nai naja Jesucristu.

<sup>15</sup> Xi cuatjin catsingátaha cáacun ne, cavejñá xi cjuë scusehenya nuju titjun, cojo sa xi jo ndiya sacú nuju cjuandaja. <sup>16</sup> Meje cuátju nangui nuju hya xi canduvá nguehe estadu Macedonia. Hane xi cuijnetaha cjuacjintacun naha nguehe Macedonia ne, hacuaha meje cúa scusehenya nga nuju ngu ndiya. Sehe ngajan xi ngayun ne, cuma cuisecun ná cojo sa xi cuma cjuë ngajan distritu Judea. <sup>17</sup> Xi cuatjin cavejñá cjuatacun naha sehe casahmee ne, ¿há tsajin rë cjuaquixi cjua naha, má nuju? ¿Há má nuju ngayun ne, hya xi vejñá xi sahme ngu xcusun xi sahme ne, tangun han cojo ngu xuta ngasunhdë xi xcun cojo xcun ne, chja me ta cuma, hane xi taha ngaxtun ne, chja me ta cumaji? ¡Jéya, hacuiin cuatjin! <sup>18</sup> Nina, me xi hatuxa cjuaquixi ne, vëë me ta hacuiin jo ma tacuin xi nújin cojo nuju. <sup>19</sup> Sacuaha Jesucristu, Quihndi rë Nina, me xi catihin camachaya nuju cjua rë, cojo cha Silvanu cojo cha Timoteo ne, hacuiin jo tjín cacun me ta, yëjë ni cjua xi cachja me ne, hatuxa cjuaquixi. <sup>20</sup> Hane Jesucristu vë ne, me vëhë xi sahmi chihin me yëjë ni cjua xi ha cachja Nina xi cuma. Vëhë xi hora xi chjahanrcun Nina xi nújanyuman cojo Jesucristu ne, nújan “Amén” (O sa tsajin ne, nújan “Cuatjin jain.”) <sup>21</sup> Nina ne, hacui me xi sahmi xi viyujucahdë cjuatacun naja xi macjain naja Jesucristu. Hacui ni me xi cavaxijin me ngayaan. <sup>22</sup> Sacuaha xi cavisane me sellu rë me ngayaan; caveya me Hasen rë me cahntsua xahasen naja cojo sa xi ngutjen tsejen ta quixi jain xi, hya xi cuma ngascan ne, sua jain naja me yëjë ni xi ha cachja me.

<sup>23</sup> Quihndë ne, quejen cavusehenya nuju sacuatjin xi ha cachjá cojo nuju ngatsë rë xi mijí tsisava nuju xi cuichjátaha nuju. Sa xi quixiin xi chjá ne, catitsingatju Nina cjuaveya xi cuma ná. <sup>24</sup> Hacuiin xi meje cuitexin nuju jarë ngu cjua xi hatuxa meje rë xi cumacjain nuju ta, tsëhë xi ngayun ne, ha siucahdë cjuatacun nuju cojo cjuachacun xi macjain naja. Ta ngayin ne, tivisecuiin nuju cojo sa xi cuma sua sa rë xahasen nuju.

## 2

<sup>1</sup> Hya xi camá ne, cavejñá cjuatacun naha xi hacuiin ngutjen cjuë scusehenya nuju sá tu choho cuma rë xahasen nuju ngatsë rë cjua xi cuichjá cojo nuju. <sup>2</sup> Cuatjin cavejñá cjuatacun naha ta, ngayun tiniññu xi ma sua rë xahasen naha. Vëhë xi sa xi sahme xi cuma va rë xahasen nuju ne, ndajin tjin ta, xi cuatjin sahme ne, sahme xi cuma va rë xahasen rë xuta xi tisahmi xi ma sua rë xahasen naha. <sup>3</sup> Vëhë xi cuatjin catsihindu nuju nixtin hya, cojo sa xi hya xi cuinduva ndyá ne, hacuiin cuma va rë xahasen naha ngatsë nuju ta, xi meje rë ne, tuhun rë xahasen naha cjuasua. Hacuaha mangu cáacun cojo nuju ngayujun ni. Mangu cáacun xi tu mé ni xi sahmi xi jemu sua ma rë xahasen naha ne, hacuaha vëhë ni ne, sahmi xi jemu sua ma rë xahasen nuju. <sup>4</sup> Hya xi catsihindu nuju cjua vëhë ne, jemu choho ma ná, jercu cjín catsingátaha cáacun ngatsë nuju, hisca jercu cajíhnda; mijí ná xi cuma va tacún ta xi meje ná ne, xi cumachaya nuju ta cjuahmutacun xi tjin ná cojo nuju ne, jemu jyë camahani.

### *Ma manchataha me xi cavinchachoho*

<sup>5</sup> Quihndë ne, sacuaha ngu xuta xi cavinchachoho vë ne, hacuiin ngahan ni choho camá ná ta, ngayujun ni ne, hacuaha choho camá nuju hitsë. “Hitsë ni” chjá ta, mijí cuátjutaha xi tichjátaha nuju. <sup>6</sup> Quihndë xi cjín ngayun canújuntuhun rë xuta jan ne, cojo vëhë ni ne, ha cuma. <sup>7</sup> Cahndë rë xi cuinújuntuhun sa rë me ne, ninchatuhun rë me, tuhun rë me cjuetacun, sá tu scaain rë me cojo cjuachoho jyë vëhë. <sup>8</sup> Vëhë xi chjá cojo nuju ta tuhun nga catamachaya rë me tsëhë cjuahmutacun xi tjin nuju cojo me. <sup>9</sup> Vëhë jain xi cuatjin catsihindu nuju ta, tsëhë xi meje cjuaháchuva nuju ne, há tjin ngu tacún xi nihñu yëjë ni hacutjin chjá cojo nuju. <sup>10</sup> Quihndë ne, yo xi ninchatuhun rë tsëhë ngu jyë xi sahmi ne, ngahan ne, hacuaha tsinchátaha rë ta, tu mé ni xi catsinchátaha ne, vëë Jesucristu ta ngatsë nuju ngayun ne, vëhë xi cuatjin catsinchátaha, <sup>11</sup> cojo sa xi cumaji sahmi Satanás xi meje sahmi cojo naja. Ngayaan ne, ha ndaja hyan hacutjin meje sahmi xitsehen vë cojo naja.

### *Cjuacjintacun rë Pablo ngajan nandya Troas*

<sup>12</sup> Hya xi camá ne, cëjë ngajan Troas xi cuichjá cojo xuta cjuandajyihi xi chja tsëhë Nai naja Jesucristu. Hane xi cafëhë ngajan ne, vutsején ne, jemu casacu ná cahndë xi cuichjá cojo xuta cjuandajyihi jan. <sup>13</sup> Peru hacuiin ndaja má cáacun xi casacuiin ná cha Titu xingueen sacuatjin xi catsingátaha cáacun. Vëhë xi catsinguíjnetaha cjua cojo xuta jan sehe cavëtju canduvá nguehe estadu Macedonia.

### *Tsinguitsojo Pablo cjuarë Nina*

<sup>14</sup> Peru nacuechji rë Nina ta hatuxa sahmi me xi caa niji vetjintjin ngatsë rë xi tjin tangun cjuatacun niji cojo Jesucristu. Chuva vëhë xi Nina ne, sahmi me xi cumachaya rë xuta cjuatacun rë me jingujyë ni. <sup>15</sup> Ta ngayin ne, sacuaha xta rë tyjungunsa ngayin xi tisua Jesucristu xi cuma rë Nina. Xta ndajyihî vëhë ne, vitsojo vechutaha rë yëjë ni xuta, sa xuta xi tivetjutje me tsëhë jyë rë me o sa xuta xi tivetjintjiin me. <sup>16</sup> Xi vutsejen niji xuta xi cuacun tivetjintjiin jan ne, sacu rë me cjuaquixi ta quixi jain xi cuechiin me xcun Nina. Peru xi vutsejen niji xuta xi cuacun tivetjutje jan ne, sacu rë me cjuaquixi xi quixi jain xi cuechu me xcun Nina. Ngayin ne, cumaji nihñi cojo cjuatacun niji suvin xa vë xi sacu rë xuta cjuaquixi jan. <sup>17</sup> Ngayin ne, hacuiin tiviteñi cjuarë Nina sacuatjin jemu cjín xuta tisahmi me ta ngayin ne, nechin nguñaja tacuin xi nújin cojo xuta cjuarë vëhë. Nina casua niji me xa hacuaha vutsejen me xa xi nihñi. Hacuaha tinihñi xa vëhë ta tsëhë xi tjin tangun cjuatacun niji cojo Jesucristu.

## 3

### *Compromisu xatsë xi casahmi Nina*

<sup>1</sup> ¿Há má nuju xi tinaxinndijin suvin nga yojo niji xi cuatjin nújin? O há tsajin ne, ¿há mameje rë xi tihín nuju o sa xi chjahyin nuju ngu carta xi chja ngatsë niji, sacuatjin sahmi yahnga xuta? <sup>2</sup> ¡jéya! mamijí rë ta, ngayun xi má ngayun sacuaha carta niji, sacuaha ngu carta xi camahindu cahntsua xahasen niji, ngu carta xi cuma scutsejen yëjë ni xuta ne, hacuaha cuma scutaya me. <sup>3</sup> Hane suvá tsejen xi Jesucristu catsihindu me carta jan, hane ngayin ne, tu canihñi entregadu ni. Hacuiin cojo tinta camahindu ta cojo Hasen rë Nina xi quicun me. Hacuaha hacuiin xcun ndyojo tã camahindu ta cahntsua xahasen rë xuta.

<sup>4</sup> Cuatjin nújin cojo nuju ta, tsëhë xi mangu tacuin cojo Nina ngatsë rë Jesucristu. <sup>5</sup> Hacuiin cjuatacun niji suvin, hacuiin ngahñu niji suvin xi ma nihñi mé xi nihñi ta Nina casua niji me cjuatacun, Nina casua niji me ngahñu. <sup>6</sup> Me vëhë casahmi me xi machjirëhë rë me ngayin xi tihín cumachaya rë xuta compromisu xatsë xi sehe tivetsihin tisahmi Nina cojo xuta, hane compromisu xatsë vëhë ne, hacuiin ngu ley xi cuinuhyan tsëhë ta ngu ndiya ndajyihî xi tsingacun naja Hasen rë Nina xi cuanguenjojon. Cuatjin casahmi Nina ta tsëhë xi xuta xi cumaji sahmichihin me yëjë ni cjuarë vitexa ley ne, sacú rë me ngu castigu xi cuetsun cjuatacun rë me hacuaha tsajin nu tsajin nixtin xi cuechu me xcun Nina. Peru

xuta xi tjengui me Hasen rë Nina ne, sacú rë me ngu cjuahñu ndajyihí, hacuaha cuechu me xcun Nina.

<sup>7</sup> Ngayujun ni ne, ha hyun ta sacuaha ley rë Nina xi cat-sihindu Moisés ne, catiya xcun ndyojo tē hya xi camahindu, hacuaha xuta xi maji sahmi me yējē hacutjin vitexa ley jan ne, cumaji cuechu me xcun Nina. Hane sacuaha xa xi casahmi Moisés hya xi casua me camachaya rë xuta cjuar rë ley jan ne, hacuaha ha hyun xi jercu vengui chji rë ta, tsēhē xi camatsejen ngu hasen ndajyihí xi hisca camaji cavutsejenndaja xuta Israel xcun Moisés ta jercu tu seti camahani jyihí xcun me. Peru hasen ndajyihí vēhē ne, tafi tafi ne, cafēya suvá. <sup>8</sup> Hacuaha ha hyun ta ngayin ne, titihín tijimachaya rë xuta cjuar tsēhē hacutjin sua naja Nina Hasen rë me. Quihndē ne, sa xi cuatjin jemu cavengui chjī rë xa xi casahmi Moisés jan ne, hitsē sa jercu vengui chjī rë xa xi tinihñi ngayin. <sup>9</sup> Cuma cuinújan ne, sa xi jemu cavengui chjī rë xa xi casahmi Moisés, hya xi casua me ley xi chja xi sacú naja ngu castigu sa xi hacuiin nihña chehen cjuar rë ne, hitsē sa jemu vengui chjī rë xa xi tinihñi ngayin, quihndē xi tinújin cojo xuta xi cuma sacú naja ngu xahasen tyjahi, ngu cjuatacun tyjahi. <sup>10</sup> Cuma cuinújan ne, sacuaha xa rë Nina xi casahmi Moisés xi jemu ndajyihí titjun ne, quihndē ne, sacuaha xi ha quihndē tsajin mé ndajyihí tsēhē ta, xa rë Nina xi tinihñi ne, jercu tu ndajyihí camahani. <sup>11</sup> Sa xi jercu ndajyihí ngu xcusun xi hacuiin cuejña tsēē ne, hitsē sa ndajyihí ngu xi cuejña tsēē.

<sup>12</sup> Ngatsē rë xi cuatjin vetihin tacuin Nina ne, vēhē xi ngayin ne, rcuiin camahani xi nújin cojo xuta. <sup>13</sup> Hacuiin nihñi sacuatjin casahmi Moisés, hya xi cavetsa me xcun me cojo ngu tsjian cojo sa xi xuta tjē rë Israel ne, scuiin me hacutjin tifēya suvá hasen ndajyihí xi jyihí xcun Moisés jan. <sup>14</sup> Peru xuta jan ne, camajñu tsēhē cjuatacun rë me. Hisca quihndē nixtin vihi ne, hya xi visiñuju me cjuar rë ley changa vēhē ne, maji vijnercu me cjuar rë, sacuaha xi titsa rë cjuatacun rë me cojo tsjian jan. Hisca hya xi cumacjain rë me Jesucristu ne, hya sacuaha xi cuetjuxin tsjian jan, hya cuma cuijnercu me. <sup>15</sup> Peru hisca quihndē ne, hya xi visiñuju me cjuar xi catsihindu Moisés ne, sacuaha xi tsjian jan vechja rë cjuatacun rë me, hane maji vijnercu me. <sup>16</sup> Peru hya xi ngu xuta cuisehen me ndiya rë Nai naja ne, sacuaha tsjian jan ne, cjuexin tsēhē me, hane cuma cuijnercu me. <sup>17</sup> Nai naja ne, hacui me xi Hasen rë Nina, hane hiscan xi tacun Hasen rë Nai naja ne, tsajin mé xi vechja rë cjuatacun naja. <sup>18</sup> Vēhē xi ngayejen ngarcun ni ne, tsajin titsa rë cjuatacun naja cojo tsjian vēhē, hacuaha xi vutsejen xuta ngayaan ne, ma vutsejen me cjuandaja rë Nai naja sacuaha tsejen mé xi tsejen xcun ngu speju. Hane ngayaan

ne, jima tiña jima tiña sa cjuatacun naja cojo cjuatacun rë Nai naja ta, tsëhë xi jima ngu ndiya ne, tisacu sa naja cjuandaja rë me. Nai naja ne, suvá hasen me, hane hacui me xi cuatjin tisahmi.

## 4

<sup>1</sup> Nina casahmi me cjuandaja cojo niji, hane casua me xa vëhë xi nihñi. Vëhë xi hatuxa hacuiin machuva tacuin. <sup>2</sup> Ngayin ne, cavejñi tacuin xi nihñi yëjë ni xi ticojo rë cjuasava xi tahahma má; hacuiin vindachin, hacuiin nindeyin cjua rë Nina ta, suvá cjuaquixi yëjë ni xi nújin cojo xuta. Cuatjin nihñi cojo sa xi scuëë yëjë ni xuta ta cuatjin jain xi nújin. Hacuaha vëë Nina xi cuatjin nújin. <sup>3</sup> Hane sa xi vijniircu xuta cjuandajyihî xi chja tsëhë Jesucristu xi titihín cumachaya rë me ne, peru suvá xuta xi tivetjintjiin me ne, me vëhë xi cuatjin vijniircu me. <sup>4</sup> Xitsehen xi matitjun xi tacun nixtin vihi ne, cavetsa cjuatacun rë xuta xi cuacun macjaain rë Nina xi cjuaquixi, cojo sa xi cuisiiin rë me cjuahasen rë cjuandajyihî xi chja hacutjin xi jyë hnga Jesucristu cojo cjuatacun rë me. Hya xi machaya naja tsëhë Jesucristu ne, hacuaha hyan hacutjin jemu ndaja camahani Nina. <sup>5</sup> Ngayin ne, hacuiin nújin cojo xuta xi nai nuju ngayin ta xi nújin ne, Jesucristu xi Nai naja me; hane ngayin ne, tivisecuin nuju sacuaha ngu mosu hndixahan nuju ta, tsëhë xi cuatjin cavitexa niji Jesucristu. <sup>6</sup> Hane ntsacu cavetsihin ne, cachja Nina ta ngajñi rë jñu ne, cuma hasen. Hane hacui ni me xi caveya me cjuahasen ngajñi rë cjuatacun niji, cojo sa xi ngayin ne, tihín cumachaya rë xuta, cuijnercu me hacutjin jemu ndaja camahani Nina. Hane hya xi machaya naja tsëhë Jesucristu ne, hacuaha hyan hacutjin jemu ndaja camahani Nina.

### *Cjuahñu xatsë xi sua Nina*

<sup>7</sup> Cjuahasen xi casua niji Nina jan ne, quichihin ngajñi rë cjuatacun niji, sacuatjin xi jiya cjuanchina cahntsua ngu tiji xi nihndë ni camá. Cuatjin casahmi Nina cojo sa xi matsejen xi jemu hñu camahani ngahñu xi sua niji Nina. Hacuiin cojo ngahñu niji suvin xi caa niji nihñi yëjë ni xi tinihñi ta Nina ne, me vëhë xi casua niji me ngahñu; hacuaha jemu ndaja camahani ngahñu xi sua niji me. <sup>8</sup> Ha tu yani ni xi vanguin ne, jemu yehe cjuacjintacun vatjin má, peru sacuya niji chuva rë hacutjin xi naxintjin yojo niji; hisca hyiin mé xi ndatjin nihñi. Peru nihñichuviin cjuatacun niji; <sup>9</sup> jemu suaxti niji xuta hacuaha choho sahmi me cojo niji, peru Nina ne, tsismicacuaain niji me; vaja niji xuta, hisca viticjin, peru hacuiin tsisquehen niji me. <sup>10</sup> Xi nujiyhinyin cojo cjua rë Nina ne, hatuxa meje tsisquehen niji xuta, sacuatjin catsisquehen me

Jesucristu. Cuatjin tijima ne, cojo sa xi xuta ne, xi scutsejen me hacutjin ticaa niji ne, cumachaya rë me ta quixi jain xi tisacu niji cjuahñu sacuaha cjuahñu rë Jesucristu. <sup>11</sup> Ngayin xi quicun ngayin ne, tjin xuta xi jemu meje tsiquehen niji me ngatsë rë xi quichihin cjuandajyihî xi chja tsëhë Jesús. Cuatjin tijima ne, cojo sa xi cuma tsejen xi yojo jyë niji vi xi hatuxa cueya ne, hacuaha tisacu rë cjuahñu sacuaha cjuahñu rë Jesús. <sup>12</sup> Ngajan xi ngayin ne, tisacu niji cjuaveya; peru ngayun ne, tisacu nuju cjuahñu xatsë.

<sup>13</sup> Tjin hiscan xi chja xcun xujun rë Nina cuitjin: “Camacjain ná, vëhë xi cachjá”; hane ngayin ne, tangun macjain niji cojo me xi cuatjin catsihindu cjuajan. Vëhë xi hacuanitjin ni nújin ngayin: “Macjain niji, vëhë xi nújin.” <sup>14</sup> Hacuaha hyin ta Nina, me xi catsicuya cjuahñu rë Nai naja Jesús hya xi cahme me ne, hacuaha cuechu nixtin xi cuatjin tsicuya me cjuahñu niji, hane sahmi tangun me ngayin ngajan hiscan tacun Jesús. Hacuaha cuatjin sahmi me cojo nuju. <sup>15</sup> Yëjë ni xcusun xi tivatjin tijima ne, ngayun ndaja tsujun ta, xi cuma cjín sa ngayun xi sacu nuju cjuandaja rë Nina ne, ha cuatjin cjín sa cuma ngayun xi tuhun nacuechji rë me. Hane cuatjin cuma tsejen xi Nina ne, jemu ndaja camahani me.

<sup>16</sup> Vëhë xi hatuxa nihñichuviin cjuatacun niji. Handasa tivetsun hitsë tivetsun hitsë yojo niji xi jima changa ngayin ne, peru cjuatacun niji ne, jima xatsë ngu nixtin ngu nixtin. <sup>17</sup> Hane cjuacjintacun xi tivatjin tijima nguehe ngasunhndë ne, sacuaha xi hacuiin yehe camahani ta, tsëhë xi hya xi ha cacaa niji ne, hya sacú niji cjuandaja, sacú rë xahasen niji ngu cjuasua xi jemu ndajyihî camahani, hacuaha tsajin nixtin xi cjuë. <sup>18</sup> Ngayin ne, hacuiin tivetihin rcuin yëjë ni xi tsejen ta xi vetihin rcuin ne, xi cjëë cuma tsejen. Cuatjin nihñi ta, tsëhë xi yëjë ni xi tsejen ne, cuechu nixtin xi cjuë, peru xi cjëë cuma tsejen ne, tsajin nu tsajin nixtin cjuë.

## 5

<sup>1</sup> Hacuaha nihñichuviin cjuatacun niji ta, tsëhë xi ha hyin ta sa xi cueya yojo niji sacuatjin vetsun ngu ndihya yuma ne, sacú niji ngu xcusun yojo xatsë ngajan ngahnga xi tsajin nu tsajin nixtin cueya, sacuaha ngu ndihya ndajyihî xi suvá Nina casahmi me xi cuma niji. <sup>2</sup> Vëhë xi ngayin ne, hisca fë tacuin ta, tsëhë xi jercu meje chjihinntsin sacuaha yojo xatsë niji xi sua Nina jan, <sup>3</sup> cojo sa xi chijin yojo xatsë vëhë sacuatjin chajá rë ngu tsjian. Xi cuatjin ne, cuechiin ngu nixtin xi siu suvá hasen niji xi tsajin yojo niji. <sup>4</sup> Ngayin xi nechin cojo yojo jyë niji vi ne, hisca fë tacuin ngatsë rë xi jercu meje niji yojo xatsë xi sehe sacú niji. Hacuiin meje niji xi cueyin ta xi meje



niji ne, yojo xatsë niji. Cuatjin meje niji cojo sa xi yojo jyë xi hatuxa cueya ne, cjuëya; hane suvá cjuahñu xatsë vëhë cuejña. <sup>5</sup> Quihndë ne, me xi cuatjin cavejña cjuatacun rë xi cuitjin cun cuma ngayin ne, hacui Nina. Hacuaha me vëhë xi caveya me Hasen rë me cahntsua xahasen niji, cojo sa xi ngutjen tsejen ta quixi jain xi, hya xi cuma ngascan ne, sua jain niji me yojo xatsë vëhë.

<sup>6</sup> Vëhë xi hatuxa tihín ngahñu xahasen niji. Hyin ta jin-guyëjë rë xi nechinchahndin cojo yojo jyë niji vi ne, sacuaha xi nechintihin ngu nangui ta, tsëhë xi cjëë cuechin hiscan xi cuinechinchahndin cojo Nai naja. <sup>7</sup> Ngayin ne, mangu tacuin cojo Nai naja xi tivanguin cojo ngasunhndë niji, handasa matsijin me. <sup>8</sup> Cuyin cuinújin cojo nuju ta ngayin ne, titihín ngahñu xahasen niji. Hacuaha xi má niji ne, hitsë sa ndatjin xi cuetjinxin tsëhë yojo jyë niji, hane cjuanguin cuinechinchahndin cojo Nai naja. <sup>9</sup> Vëhë xi sa xi cuinechintihin sa nguehe ngasunhndë, o sa xi cuinechinchahndin cojo Nai naja ne, jemu meje nihñi yëjë ni hacutjin chuya rë me ta, <sup>10</sup> tsëhë xi ngayejen ni ne, cuechu nixtin xi cuma tsejen xi cun xi má ngayaan hya xi cuechuun xcun Jesucristu, xi cjuahacuenda me xcusun xi canihña, cojo sa xi jima ngu ngayaan ne, sacú naja xi satë naja ha tucutjin xcusun xi canihña xi cavinechan ngasunhndë, há ndaja ne, há ndajin.

### *Cjuandajyihí xi sahmi tangun cjuatacun naja cojo Nina*

<sup>11</sup> Ngayin ne, ha hyin mé vijne xi rcuin Nina. Vëhë xi meje nihñi xi cuijne cacun xuta. Nina ne, ha vëë me xi cun xi má ngayin. Hacuaha cojo ngayun ne, vetihin tacuin xi cumachaya nuju xi cun xi má ngayin. <sup>12</sup> Hacuini tivétsihin tinihñi yehe suvin nga yojo niji ta tu titihín cumachaya nuju hacutjin cuma naxunndujun niji, cojo sa xi cuma nicuyun cjuá tsëhë xuta xi chuya rë me tsëhë xcusun xi jyihí ngu cha, hane sahmicuendaain me cjuatacun rë cha. <sup>13</sup> Chja yahnga xuta ta sca niji, hane yahnga me ne, jemu xta ngayin; peru há sca niji o há xta ngayin ne, peru nihñi yëjë ni ngatsë rë xi tsëhë Nina ngayin, hacuaha ngatsë rë xi meje cuisecuin nuju. <sup>14</sup> Cuatjin nihñi ta tsëhë xi cjuahmutacun xi tjin rë Jesucristu cojo niji ne, vëhë xi vitexa niji. Cuitjin ningatihin tacuin: ngu ni Jesucristu xi cahme me ngatsë rë jyë naja ngayejen ni, vëhë xi ngayejen ni ne, sacuaha xi ha caveyan xi cuma rë jyë xi cuacun vë. <sup>15</sup> Jesucristu ne, cahme me ngatsë naja ngayejen ni ne, cojo sa xi ngayaan xi casacu naja cjuahñu xatsë ne, hacuini nihñacuendan suvá ni yojo naja ta hacuaha nihñacuendan tsëhë me vëhë, me xi cahme hacuaha cavuya me cjuahñu ngatsë naja.

16 Vêhê xi ha quihndê hacuiin nutsijin xuta sacuatjin vutsejen ngu xuta xicjin me cojo cjuatacun rê ngasunhndê. Hatsêe ne, cuatjin canutsijin Jesucristu, peru quihndê ne, hacuiin cuatjin nutsijin me. 17 Yêjê xuta xi tjin tangun cjuatacun rê me cojo cjuatacun rê Jesucristu ne, ngu xuta xatsê camá me. Xcusun changá xi tjin rê me ne, cafê, ha cama xatsê. 18 Nina ne, me vêhê xi tisahmi me yêjê cjuatacun xatsê vêhê. Ngayin xi condra rê Nina camá ngayin hatsêe ne, casahmi me xi camatangun cjuatacun niji cojo cjuatacun rê me ngatsê rê cjuacjintacun xi cavatju Jesucristu. Hacuaha casua niji me xa xi tihín cumachaya rê xuta hacutjin tisahmi tangun me cjuatacun rê xuta cojo cjuatacun rê me. 19 Cojo cjuacjintacun xi cavatju Jesucristu camá ne, cavetsihin casahmi Nina xi cuma tangun cjuatacun rê xuta cojo rê me, cavetsihin caphacuendaain me tsêhê cjuatsehen xi casahmi xuta, hacuaha cavetsihin casua niji me cjuandajyihi xi tinújin cojo xuta xi Nina ne, meje rê me xi cuma tangun cjuatacun naja cojo rê me. 20 Vêhê xi ngayin ne, cuatjin nújin cojo xuta cjuá rê Jesucristu ta, Jesucristu casua niji me xa xi cuatjin nújin, sacuaha xi tichja suvá Nina cojo xuta ngajñi rê cjuá xi nújin. Vêhê xi sacuatjin xi vitexa niji Jesucristu ne, chjahyin rê xuta xi catisahmi tangun me cjuatacun rê me cojo Nina. 21 Jesucristu ne, tsajin mé jyê rê me xi tjin, peru ngatsê naja ngayaan ne, Nina casahmi me xi Jesucristu ne, sacuaha xi jercu tjin camahani jyê rê me. Cuatjin casahmi Nina cojo sa xi ngayaan xi tjin tangun cjuatacun naja cojo Jesucristu ne, hacuaha jemu tyahí camahani cuma cjuatacun naja sacuatjin tyahí cjuatacun rê Nina.

## 6

1 Hane xi tinihñi tangun xa cojo Nina ne, hacuaha nújin cojo nuju ta, mijí rê xi tu mahya xi casacu nuju cjuandaja rê Nina.

2 Cachja Nina cuitjin xcun xujun rê me:

Ngu hora ndajyihi ne, cahndê cjuá xi canoje cojo ná;

ngu nixtin xi vetjutje xuta ne, cavisécoo ri.

Quihndê ne, ha cavechu ngu hora ndajyihi vêhê, sacuatjin cachja Nina; ha cavechu ngu nixtin xi tivetjutje xuta.

3 Ngayin ne, nihñi camahani xcusun xi sahmi xi secjan cjuatacun rê xuta, sá tu choho cuichja xuta tsêhê xa xi tinihñi.

4 Yêjê xcusun xi tivatjin tijima xcun xa xi tinihñi ne, tsingacun rê xuta ta ngayin ne, tiviseuiin jain rê Nina cojo xa xi meje rê me xi nihñi. Jemu cjín cjuacjintacun xi cacaa niji: tjin hora ne, jemu cavatjin cjuañihi, tjin hora ne, cavatjin ngu cjuandya jyê, tjin hora ne, casacuinyiín niji hacutjin naxintjin yojo niji.

5 Tjin hora ne, cavaja niji xuta, tjin hora ne, cavincha niji me

ndavaya, tjin hora ne, choho casahmi xutacjín cojo niji, tjin hora ne, jemu chja xa canihñi, tjin hora ne, camaji catsjuñifin, tjin hora ne, hisca casacuiin mé xi xiní. <sup>6</sup> Hacuaha tsejen xi tivisecuiin jain rē Nina ngatsē rē xi tyjahi xahasen niji, vechu cjuatacun niji, jemu jyē tacuin, jemu nihñi cjuandaja, jiya Hasen rē Nina cahntsua xahasen niji, nguñaja tacuin xi hmu tacuin xinguin, <sup>7</sup> hacuaha suvá cjuaquixi tjin rē cjuatacun niji, Nina ne, sua niji me ngahñu. Hatuxa cjuaquixi cjua xi nújin, há xi titihín jimachaya rē xuta cjua rē Nina, o há xi tinaxintjin yojo niji tsēhē xuta xi choho chja tsijin. <sup>8</sup> Yahnga xuta ne, faharcun me ngayin, yahnga me ne, faharcuaain me ngayin. Yahnga xuta ne, ndaja chja me tsijin, yahnga me ne, choho chja me tsijin. Xi má rē ngujo xuta ne, jemu ndacha ngayin, handasa quixi ngayin cojo ngasunhndē niji xi tivanguin cuijin. <sup>9</sup> Yahnga xuta ne, hisca hviin me yo ngayin, peru yahnga me ne, vēē me ngayin. Ngayin ne, sacuaha xi ha tiveyin, peru cjēē cueyin ta nechincuihin cjuahñu. Sahmi xuta ngayin castigu, peru hacuiin tsiquehen niji me. <sup>10</sup> Sacuaha xi jemu choho má rē xahasen niji, peru xahasen niji ne, hatuxa jemu sua rē. Sacuaha xi jemu yumi ngayin, peru jemu nihñi nchina xuta cojo cjua rē Nina. Sacuaha xi tsajin camahani mé xi tjin niji, peru ha tsijin yējē ni xi tjin ngasunhndē.

<sup>11</sup> Ngayun xuta Corinto ne, ha canújin cojo nuju yējē ni hacutjin ningatihin tacuin, hacuaha jemu hmu tacuin nuju. <sup>12</sup> Ngayin ne, hacuiin camachuva cjuahmutacun xi tjin niji cojo nuju ta ngayun xi camachuva cjuahmutacun xi jiya cahntsua xahasen nuju. <sup>13</sup> Vēhē xi chjá cojo nuju sacuaha xi quihndi naha ngayun, catamajyē sa cjuahmutacun xi tjin nuju sacuaha cjuahmutacun xi tjin niji cojo nuju.

### *Yungun rē Nina xi quicun me ngayaan*

<sup>14</sup> Peru mijí rē xi nihñu tangun cojo xuta xi macjaain rē me cjua rē Jesucristu sacuatjin ma hñu jo chu ndyaja xi tangun cjue chu. Sacuaha cjuandaja ne, matanguaain camahani cojo cjuatsehen. Hacuaha cumaji cuma jñu hiscan xi jemu hasen. <sup>15</sup> Cumaji camahani cumatangun cjuatacun rē Jesucristu cojo cjuatacun rē Satanás. Hacuaha cumaji camahani cumatangun cjuatacun rē ngu xuta xi macjain rē me cjua rē Jesucristu cojo cjuatacun rē ngu xuta xi macjaain rē me cjua rē Jesucristu. <sup>16</sup> Sacuaha yungun rē Nina xi cjuaquixi ne, cumaji cuiyuju nina xi tsindaja xuta. Hane ngayaan ne, sacuaha yungun rē Nina xi quicun me ngayaan ta, tsēhē xi suvá Nina cachja me cuitjin:

Ngahan ne, cuitejñacahndē cahntsua xahasen rē me, hacuaha tsujyēhēya ngajñi rē me;

hane ngahan cuma nina rë me ngahan,  
hacuaha me xi cuacun vëhë ne, cuma me xuta naha.

<sup>17</sup> Hacuaha cachja sa Nina cuitjin:

Vëhë xi tetjuxun tsëhë xuta xi cuacun faharcun me nina xi  
mandaja, hacuaha nechunxun tsëhë me;

mijí rë xi nicujun sa xcusun xi chjá cojo nuju xi tsavi.

Xi cuatjin nihñu ne, cuitejña ngatsë nuju

<sup>18</sup> hacuaha ngahan ne, cuma ngahan nahmi nuju,

hane ngayujun ni ne, hacuaha cuma ngayun quihndi naha,  
chja Nai naja, me xi ma sahmi yëjë ni xcusun.

## 7

<sup>1</sup> Quihndë ngayujun ni tsan ne, tsëhë xi cuatjin cachja Nina  
xi sahmi me cojo naja ne, meje rë xi cuiyujunxen yëjë ni  
cjuatsehen xi meje rë yojo naja o sa xi ningatahan tacun.  
Hane xi rcun ngayaan Nina ne, meje rë xi nihña ngahñu xi  
cuma tyjahi xahasen naja, cuma tyjahi cjuatacun naja.

### *Cavindeya cjuatacun rë xuta Corinto*

<sup>2</sup> Nuxuhun xahasen nuju xi cuma niji. Hisca ngu ngayun  
ne, hacuiin choho canihñi cojo nuju; hisca ngu ngayun ne,  
hacuiin caninguetsin cjuatacun nuju; hisca ngu ngayun ne,  
hacuiin cavindachin nuju. <sup>3</sup> Hacuiin titsicaneje jyë nuju xi  
cuatjin chjá cojo nuju. Ha cachjá cojo nuju ta hatuxa jemu  
vinga niji ngayun, hisca tihín yojo niji ngatsë nuju sa xi cuatjin  
meje rë. <sup>4</sup> Jemu camangu cacun cojo nuju, hacuaha hya xi  
visiajme cojo xuta ne, jemu vaxëndaja nuju.

Jemu casacu ná cjuetacun. Jemu sua ma rë xahasen naha  
ngajñi rë yëjë cjuañihi xi cavatjin camá.

<sup>5</sup> Hisca nixtin xi cafihin nguehe estadu Macedonia hisca  
quihndë ne, cjëë cjuahajenda xahasen niji, ta yëjë ni nixtin  
vihi ne, jercu cjín cjuañihi tivatjin tijima. Ticjan xuta cojo niji,  
hacuaha jemu macjín tacuin. <sup>6</sup> Peru Nina xi sua cjuetacun  
xuta yuma ne, hacuaha cuatjin casua niji me cjuetacun hya xi  
cafehe cha Tito. <sup>7</sup> Hacuiin tsëhë xi cafehe ni cha xi casacu niji  
cjuetacun ta, hacuaha ngatsë rë cjuaxi cachja cha hacutjin xi  
casacu rë cha cjuetacun ngajñi nuju. Cachja cha cojo niji ta  
jemu meje nuju xi sacú xingueen. Hacuaha casuacuenda niji  
cha tsëhë cjuachoho xi tjin nuju. Hacuaha cachja cha ta jemu  
meje nihñu xcusun xi chuya ná. Vëhë xi hitsë sa camasua rë  
xahasen naha quihndë.

<sup>8</sup> Hacuiin choho ma ná xi cuatjin catsihindu nuju xujun  
vëhë, handasa choho camá nuju ngatsë rë cjuaxi cachjá  
cojo nuju. Choho camá ná hitsë ta, tsëhë xi cahvë ta cjuaxi  
naha jan ne, casua nuju cjuachoho ndastu ngu hora. <sup>9</sup> Peru  
quihndë ne, jemu ndama ná, hacuiin ngatsë rë xi choho camá

nuju ta ngatsë rë xi sacuaha cjuachoho xi camá nuju ne, vëhë casahmi xi canindeyun cjuatacun nuju. Hacuaha hya xi choho camá nuju ne, canihñu hacutjin chuya rë Nina, vëhë xi tsajin mé xi choho cavatjun camá ngatsë rë cjua xi canihindin nuju. <sup>10</sup> Hya xi nihñachehen hacutjin chuya rë Nina hora xi choho ma naja ne, vëhë sahmi xi nindeyan cjuatacun naja cojo sa xi cuetjuntjen tsëhë jyë naja. Hane xi cuatjin sahmi ngu xuta ne, tsajin yo xi chuyiin rë. Peru hya xi tu choho má naja hora xi vatjun ngu cjuachoho sacuatjin sahmi xuta ngasunhdë ne, vëhë sahmi xi cueyan. <sup>11</sup> Chutsujun hacutjin canihñu hya xi canihñu hacutjin chuya rë Nina ngajñi rë cjuachoho xi cavatjun camá: jemu nguñaja tacún; jemu ndaja catuhun cjuaquixi nuju; hisca camacjan nuju; hisca carcun camá; canújun ta jemu meje chun ná ngu ndiya nga; jemu meje nihñu xcusun xi chuya ná; ngutjen canihñu castigu xuta xi choho casahmi me. Cuatjin camatsejen xi tyjahi jain cjuatacun nuju hacuaha tyjahi jain xahasen nuju. <sup>12</sup> Vëhë xi hya xi cuatjin catsihindu nuju xujun vëhë ne, hacuiin ngatsë rë xuta xi cavangui jyë, hacuiin ngatsë rë xuta xi choho cavatju me camá ta xi cuatjin catsihindu nuju ne, ngatsë rë xi meje ná xi cuma tsejen hacutjin xi meje nihñu xcusun xi chuya niji ta, tsëhë xi hyun ta cuatjin xi meje rë Nina. <sup>13</sup> Hane hacuaha ngatsë rë vëhë xi ngayin ne, casacu niji cjuetacun.

Peru hacuiin suvá cjuetacun vëhë ni xi casacu niji ta hacuaha jemu ndaja camá rë xahasen niji ngatsë rë cjuasua xi tjin rë cha Tito. Cuatjin tjin rë cha cjuasua ta, tsëhë xi ngayujun ni ne, catuhun rë cha cjuandaja cjuajeya. <sup>14</sup> Jemu cavaxëndaja nuju hya xi cachjá cojo cha Tito, hane hacuiin cavétju sava ngahan xi camá ngascan. Hatuxa cjuaquixi yëjë ni cjua xi canújin cojo nuju. Hacuanitjin ni cjua xi canújin tsujun cojo cha Tito ta hacuaha cavetjucaa cjuaquixi. <sup>15</sup> Hacuaha jemu hmu cacun nuju cha, xi tsinguitsjen cha hacutjin canihñu yëjë hacutjin xi cachja cha cojo nuju, cojo hacutjin jemu ndaja cachjuhuncun cha hya xi cachjuhun-ntsun cha. <sup>16</sup> Jemu ndama ná ta tsëhë xi hvë ta ngayun ne, mangu tacún cojo ná.

## 8

### *Cjuatjo xi cjue Jerusalén*

<sup>1</sup> Ngayujun ni ne, nguehe tihín cumachaya nuju hacutjin casua Nina cjuandaja rë me cojo xuta xi matangun me yëjë ni yungun xi siu taha ladu tsëhë estadu Macedonia vi. <sup>2</sup> Xuta xi cuicun vi ne, handasa jercu cavatju me cjuañihi, peru jemu sua ma rë xahasen rë me. Handasa jemu yuma camahani me ne, peru jemu jyë cjuatjo xi cavisecoo me. <sup>3</sup> Cahvë xi casua

me tucutjin xi camá casua me, hisca quisun sa casua me. Hacuaha cjuatacun rē suvá me <sup>4</sup>xi cafehya me xi tihín cahndē xi cojo me sahmi me cjuandaja xi cuisecoo me xuta ladu rē Jesucristu ngajan Jerusalén. <sup>5</sup>Hitsē sa ndaja casahmi me xi cuma rē sacuatjin caningatihin tacuin ngayin. Titjun ne, casua me yojo rē me cojo Nai naja ne, sehe casua me yojo rē me cojo niji ngayin, sacuatjin meje rē Nina. <sup>6</sup>Vēhē xi canújin cojo cha Tito xi, sacuatjin xi ha cavetsihin casahmi tangun cha ngu cjuatjo vēhē ngajñi nuju hatsēē ne, quihndē ne, hacuanitjin ni catitsinguijnetaha cha hiscan xi cavejñavasen. <sup>7</sup>Ngayujun ni ne, jemu tjin ngu tacún cojo Jesucristu; jemu ndaja nújun cjua rē Nina; jemu vechu cjuatacun nuju; jemu nguñaja tacún xi meje cuisecun; jemu tjin nuju cjuahmutacun cojo niji. Sacuatjin tivangun xcun cojo yējē ni cjuatacun vēhē ne, hacuaha meje niji xi cuanitjin ni cuangun xcun cojo ngu cjuandaja vi xi cuisecun rē xuta yuma.

<sup>8</sup>Hacuiin tivitéxa nuju xi cuitjin tichjá cojo nuju ta, tu titsingácun ni nuju hacutjin sahmi nguñaja cacun xuta Macedonia, cojo sa xi cuma tsejen há nechun nguñaja tacún jain cojo cjuahmutacun xi tjin nuju. <sup>9</sup>Ha ndaja hyun hacutjin casahmi Nai naja Jesucristu cjuandaja. Handasa jemu tjin rē me cjuanchina peru catsiyuma me yojo rē me ngatsē rē xi hmu cacun nuju me, cojo sa xi ngatsē rē xi camayuma me ne, ngayun xi cuisuhun ladu rē me ne, sacú nuju cjuanchina xi sua Nina.

<sup>10</sup>Nguehe cuichjá cojo nuju hacutjin xi tsingátaha cáacun. Ngayun xi hatuxa meje cuisecun hacuaha hisca cuyanu cavetsuhun cavisecun ne, <sup>11</sup>quihndē ne, meje rē xi ninguijnutuhun cjuandaja vēhē. Tuhun hitsē xi tjin nuju sacuatjin canihñu titjún xi cojo cjuasua catuhun. <sup>12</sup>Sa xi ngu ngayaan meje jain tahan ngu cjuatjo ngu cjuandaja ne, cuma tahan tucutjin xi tjin naja xi tahan ta, vēhē xi chuya rē Nina. Nina ne, fehyaain me hisca cojo xi tsajin naja.

<sup>13</sup>Hacuiin meje rē xi ngayun ne, hisca cuma chaja nuju ngatsē rē xi cuisecun rē jingu sa xuta. Xi meje rē ne, tangun ni cuatjun gayejen ni. <sup>14</sup>Ngayun xi cjín tjin nuju quihndē ne, cuma cuisecun rē me xi tsajin rē, cojo sa xi hya xi ngayun tsajin nuju ne, me xi cuacun vē ne, cuma cuisecoo nuju me. Cuatjin xi tangun cuatjun ngayun cuma cojo rē me. <sup>15</sup>Cuitjin chja ngu cjua xcun xujun rē Nina: “Xuta xi cjín cafaya me ne, cavanguiin rē me; hane xuta xi chuva cafaya me ne, camachajin rē me.”

### *Cha Tito cojo xicjin cha*

<sup>16</sup>Suá nacuechji rē Nina xi cavuxaha me cjuatacun rē cha Tito cojo sa xi cuma meje cuisecoo nuju cha sacuatjin xi meje

ná ngahan. <sup>17</sup> Hya xi cachjá cojo rë cha xi cjuetjengui nuju cha ne, jemu cachuya rë cha cjua jan. Hane tsëhë xi jemu tjïn rë cha cjuasua xi sahmi cha tu mé ni xi satëxa rë cha ne, vëhë xi cojo cjuatacun rë suvá ni cha ne, cjuetjengui nuju cha. <sup>18</sup> Hacuaha ningatjin sa ngu cha ladu naja cojo cha Tito. Xuta xi matangun me yëjë ni yungun ne, jemu vaxëndaja me cha xi cuajyihí vë, xi jemu ndaja xa sahmi cha xi tsinguitsojo cha cjuandajyihí xi chja tsëhë Jesucristu. <sup>19</sup> Hacuaha xuta xi cuacun jan ne, casua me cha xa xi cuisecoo niji cha xi cuanguin chani ngu cjuandaja vihi ngajan Jerusalén. Cuitjin tinihñi cjuandaja vihi cojo sa xi cuma tsejen ta Nai naja ne, jemu jyë hnga me cojo cjuatacun rë me hacuaha cojo sa xi cuma tsejen ta nguñaja tacuin xi visecuin xinguin. <sup>20</sup> Jemu nechin cuidado, sá tu yo choho cuichja tsijin tsëhë cjuatjo rë xuta vi xi tacun ntsin. <sup>21</sup> Meje nihñi cjuandaja, hacuain suvá xcun Nina ni ta hacuaha cojo xcun xuta.

<sup>22</sup> Hacuaha cojo cha xi cuacun jan ne, ningatjin sa ngu cha ladu naja. Jemu cjïn xcusun casahmi cha xi camatsejen xi jemu nguñaja cacun cha. Quihndë ne, hitsë sa nguñaja cacun cha xi meje cjue cha ta, tsëhë xi jemu camangu cacun cha cojo nuju. <sup>23</sup> Sacuaha cha Tito ne, jemu visecoo ná cha xi cuatjin visecuin nuju. Sacuaha cha ladu naja xi cuacun vë ne, xuta rë yungun catsingatju me cha hacuaha sahmi jyë sahmi hnga cha Jesucristu. <sup>24</sup> Vëhë xi meje ná ngahan xi tuhun cumachaya rë cha xi cuacun vë cjuahmutacun xi tjïn nuju, cojo sa xi yëjë ni xuta rë yungun cumachaya rë me ta quixi jain cjua xi nújin xi cuatjin naxinndijin nuju.

## 9

### *Cjuatjo xi cjue Jerusalén*

<sup>1</sup> Quihndë ne, hacuain hatuxa meje rë xi tsihindu nuju hacutjin tijima tsëhë cjuatjo xi cjue cuisecoo rë xuta ladu rë Jesucristu ngajan Jerusalén ta, <sup>2</sup> tsëhë xi ha hvë ta jemu meje cuisecun rë xuta xi cuacun vë. Vëhë xi ha cachjá cojo xuta nguehe Macedonia xi ngayun xuta Acaya ne, hisca cuyanu cavetsuhun canihñu tangun tujún. Hane tsëhë xi jemu nguñaja tacún xi cuatjin canihñu ne, vëhë casahmi xi jemu cjïn xuta Macedonia xi hacuaha caviyujungu cacun me xi cuisecoo me. <sup>3</sup> Vëhë xi tsingátju nuju ngujo cha ladu naja xi ha cachjá cojo nuju jan, sá tu cuetjicaain yëjë ni cjua xi cachjá tsujun tsëhë cjuacjintacun vëhë. Meje ná xi tjïn chjine ngayun sacuatjin xi ha cachjá tsujun, <sup>4</sup> tuxa má sa xi cojo ngujo xuta Macedonia cuinduva me cojo ná ndyá, hane tsajin tjïn chjine ngayun ne, jemu cuixu sava ngayin, hisca cojo ngayun cuixu sava ngayun ta, tsëhë xi cuatjin camangu tacuin cojo nuju.

<sup>5</sup> Vêhë xi catsingátaha cáacun xi casahmi ná nguujyë xi caféhya cha xi cuacun vë xi cjuetjengui cha ngayun cojo chaja sa, cuisecoo nuju cha xi ninguiñunñuju tujún xi canújun jan. Xi cuatjin tjin chjine cjuandaja nuju vë ne, ngajan cuma tsejen xi hacuiin nguujyë canihñi nuju ta cojo cjuasua nuju xi canihñu.

<sup>6</sup> Ha hyun ta yo xi chuva tjë cuincha ne, hacuaha chuva tutjë sacú rë; hane yo xi cjín tjë cuincha ne, hacuaha cjín tutjë sacú rë. Hacuanitjin ni ngayun cojo cjuatjo nuju. <sup>7</sup> Jima ngu ngayun ne, meje rë xi tuhun hacutjin xi cavejñu tacún xi tuhun, peru hacuiin taha choho ma tacún, hacuiin cojo nguujyë. Cuatjin nihñu ta ngu xuta xi cojo cjuasua sua me ne, xuta vëhë xi jemu chuya rë Nina tsëhë me. <sup>8</sup> Nina ne, cuma sua nuju me yëjë ni cjuandaja rë me, cojo sa xi tsajin nixtin xi cuma chaja nuju; hisca cuangui sa nuju, cojo sa xi cjín xcusun cjuandaja cuma nihñu. <sup>9</sup> Xcun xujun rë Nina ne, cuitjin chja: Xuta ndaja jan ne, chuva cjín sua me xuta yuma.

Hane cjuandaja xi sahmi me vëhë ne, tsajin nu tsajin nixtin xi chaya rë Nina.

<sup>10</sup> Nina, me xi sua tjë xi nitjen cojo niñu xi chinë ne, hacuaha sua nuju me yëjë ni tjë xi mameje nuju, hacuaha me vëhë sahmi me xi cuma cjín sa tutjë xi sacu nuju. Hacuaha sahmi me xi cuma yehe sa yëjë ni cjuandaja xi nihñu. <sup>11</sup> Cuatjin sahmi Nina xi jemu ndaja cuatjun cuma, cojo sa xi yehe cjuandaja cuma nihñu. Hane xi nihñi entregadu cjuandaja nuju jan cojo xuta yuma ne, sua me nacuechji rë Nina. <sup>12</sup> Xi cuitjin cuanguinchani ngu cjuandaja nuju vë ne, hacuiin suvá xi nicjen cjuachaja xi tjin rë xuta ladu rë Jesucristu ta, hacuaha nihña xi jemu cjín xuta ne, sua me nacuechji rë Nina.

<sup>13</sup> Xi cuitjin nihñi ngu cjuandaja vë ne, ngajan cuma tsejen xi ngayun ne, tiniñu jain sacuatjin xi nújun xi macjain nuju cjuandajyihí xi chja tsëhë Jesucristu. Hacuaha cuma tsejen ta jemu ndaja tivisecon rë xuta Jerusalén, hacuaha jemu ndaja visecon rë yëjë ni xuta yuma xi ladu rë Jesucristu. Vëhë xi ngahan cojo yëjë ni me xi visecoo ná ne, jemu nihñi jyë Nina. <sup>14</sup> Hacuaha xuta ladu rë Jesucristu ngajan Jerusalén ne, sahmi me oración rë me cojo Nina ngatsë nuju, hacuaha jemu cuinga rë me ngayun xi cumachaya rë me tsëhë cjuandaja xi jemu casua nuju Nina. <sup>15</sup> Nacuechji rë Nina xi casua naja me ngu cjuandaja ngu cjuatjo xi hisca hayaan hacutjin cuinújan xi venguichji rë.

## 10

*Vaxëtje Pablo xa xi casua Nina me*

<sup>1</sup> Ngahan Pablo ne, nguehe cuichjá cojo nuju cojo cjuandaja cjuajeya rë Jesucristu. Chja yahnga xuta ta ngahan



ne, hya xi tejñataha tangun cojo nuju ne, jemu jeya ngahan; peru hya xi cjin tejñataha tsujun ne, jemu hñu cjua naha cojo nuju. <sup>2</sup> Ndatjin, peru nguehe cjuéhya nuju ngu cjuandaja: xicanihñuu xcusun xi sahmi xi sahme hñu cjua naha hya xi cjuétjengë nuju. Ha hvë ta cuma sahme hñu cjua naha cojo xuta xi chja cojo nuju xi ngayin ne, suvá cjuatacun rë xuta ngasunhdë xi quichihin. <sup>3</sup> Quixi jain xi xuta ngasunhdë ngayin, peru hacuiin sí rcuin sacuatjin sí rcu xuta ngasunhdë. <sup>4</sup> Hacuiin chicjin cojo quicha ta Nina ne, sua niji me ngahñu xi caa niji ninguetsinyin cjuatacun rë xuta xi tsitjungui me Nina; xi visiajmí ngayin cojo xuta xi cuacun jan ne, ngutjen tsejen ta machjiriin cjuatacun rë me. <sup>5</sup> Ninguetsinyin cjuaxin xi sahmi xi maji vijnercu me yo xi Nina, hacuaha ninguíxin cjuatacun rë xuta cojo sa xi tsingataha cacun me sacuatjin meje rë Jesucristu. <sup>6</sup> Hane hya xi cuechu nixtin xi ngayun ne, jemu ndaja camahani cuinuhyun tsëhë Nina ne, ha tjin ngu tacuin xi nihñi castigu yëjë ni me xi vihndiin tsëhë Nina.

<sup>7</sup> Ngayun ne, tiningatuhun tacún sacuaha tsingataha cacun xuta ngasunhdë. Sa xi tjin yahnga xuta xi tsingataha cacun me xi ladu rë Jesucristu me ne, ndatjin; peru hacuaha catitsingataha cacun me xi, sacuatjin xi ladu rë Jesucristu me ne, ngayin ne, hacuaha cojo ngayin ladu rë Jesucristu ngayin. <sup>8</sup> Handasa cuátjutaha hitsë xi cuichjá cojo nuju sacuaha tsëhë xa xi casua niji Nai naja ne, peru hacuiin cuma sava ná. Nai naja casua niji me xa vëhë, cojo sa xi cuisecuin nuju xi cuangunndujun xi mangu tacún cojo cjua rë Nina, hacuiin xi ninguetsin cjuatacun nuju. <sup>9</sup> Hacuaha mijí ná xi ningatuhun tacún xi meje cuinchárcun nuju cojo yëjë cjua xi tsihindu nuju. <sup>10</sup> Cuinújun ngu ngayun ta jemu hñu cjua naha xi tsihindu nuju, peru hya xi tejñataha cojo nuju ne, jemu yuma hasen ngahan, hacuaha hisca chuyiin nuju chuva rë xi visiajme. <sup>11</sup> Peru cuidadu xi cuatjin nújun ta, chuva rë xi nújin cojo nuju xcun xujun xi nihindin nuju quihndë xi xín nechintihin tsujun ne, ha chuva vëhë ni nihñi hya xi cuéchintihin nuju.

<sup>12</sup> Ngayin ne, vetjiin tacuin xi cuinújin xi tangun ngayin cojo ngujo me xi vaxëndaja suvá me yojo rë me. Xi cuatjin tsichuva me cjuatacun rë me ngajñi rë suvá me ne, jemu ngarca me. <sup>13</sup> Ngayin ne, cuinujiin xi jemu ndaja canihñi ngu xa xi hisca canihñi. Ha tucutjin xa xi canihñi ne, ha vëhë ni xi cuinújin. Nina ne, me vëhë xi vitexa niji me jani hiscan cuechin xi nihñi xa, hacuaha me vëhë cavitexa niji me xi catsanguin hisca ngajan nangui nuju. <sup>14</sup> Vëhë xi hya xi ndaja nújin tsujun ne, hacuiin sacuaha xi vatjintihin rë xa xi casua niji Nina ta, tjun tjun ngayin cafihin nangui nuju

cojo cjuandajyihi xi chja tsëhë Jesucristu. <sup>15</sup> Hacuaha hacuiin naxinndijin yojo niji tsëhë ngu xa xi casahmi jingu sa xuta. Peru vetihin tacuin xi sacuatjin xi cuangun xcun xi hitsë sa ndaja cumacjain nuju Jesucristu ne, hacuaha hitsë sa jyë xa cuma nihñi ngajñi nuju. <sup>16</sup> Ngajan xi cuma cuanguin tihín cumachaya rë xuta cjuandajyihi tsëhë Jesucristu hisca ngajan sa tsëhë nangui nuju. Xi cuatjin ne, tsajin yo cuichja xi ngayin ne, naxinndijin yojo niji tsëhë ngu xa xi jingu sa xuta casahmi me.

<sup>17</sup> Yo xi meje cuaxëndaja rë tu yo ni ne, cataxëndaja me Nai naja, sacuatjin chja xujun rë Nina. <sup>18</sup> Cuatjin ta, xi naxenndajan suvaan yojo naja ne, machjiriin camahani. Xi machjirëhë ne, xi Nai naja cuaxëndaja naja me.

## 11

### *Chja Pablo tsëhë apóstol ndacha*

<sup>1</sup> Nijyun tacún. Caticaa nuju ndastu ngujo cjuasca xi cuichjá cojo nuju. Handasa hacuiin sca ná peru cuichjá cjuasca ta, <sup>2</sup> tsëhë xi jemu chini ngahan tsujun. Nina ne, casua ná me cjuatacun xi cuatjin chini ngahan ta, tsëhë xi ngayujun ni ne, sacuaha ngu quihndi naha xi chjuun xi casuá xi cuixan cojo ngu ni xihin. Cuatjin nuju ngayun. Hane xihin jan ne, hacui Jesucristu. <sup>3</sup> Hatsëë ne, chu yë cavindacha chu na Eva cojo cjuatacun tsehen rë chu. Hane hacuaha jemu macjín cáacun tsujun ta sá tu cuatjin ningatuhun cumandacha ngayun, hane ha quihndë hacuiin nguñaja tacún cuangunndujun cojo ndiya rë Jesucristu xi tivanguncujun. <sup>4</sup> Hya xi fehe ngu cha xi sua cumachaya nuju ngu cjua xi chja tsëhë Jesús xi hacuiin tangun cojo cjua xi cachjá cojo nuju ntsacu cavetsihin ne, ¿mé má cha vëhë xi jemu ndaja caa nuju cojo cjua rë cha? O sa xi chjuhunntsun ngu cjuatacun xi hacjahi, xi hacuiin tangun cojo cjuatacun xi cachjuhunntsun ntsacu cavetsihin ne, ¿mé má cjuatacun vëhë xi jemu ndaja caa nuju cojo? O sa xi fehe ngu cjuandajyihi xi hacjahi, xi hacuiin tangun cojo cjuandajyihi xi cachjuhunntsun ntsacu cavetsihin ne, ¿mé má cjua vëhë xi jemu caa nuju cojo?

<sup>5</sup> Quihndë ne, guehe cuetsehen cuichjá cojo nuju cjuasca. Caticaa nuju hitsë ta, tsëhë xi xi má ná ngahan ne, hacuiin tjëngë ngahan xi cuma rë cha xi cuacun nújun xi apóstol yehe cha. <sup>6</sup> Handasa cjëë scutaya hacutjin xi jemu ndaja cuma cuichjá cojo xuta, peru jemu cavutaya cjuatacun rë Nina. Hane ngajñi rë yëjë ni xcusun xi canihñi, ngajñi rë yëjë ni cjua xi canújin ne, cahyun suvun hacutjin vechu cjuatacun niji.

<sup>7</sup> Catsinguijne suva yojo naha cojo sa xi ngayun ne, cuma yehe cuma hnga ngayun cojo cjuatacun nuju. Hane xi casuá

camachaya nuju cjuandajyihí xí chja tsëhë Nina ne, cafaan camahani chjí tsujun. ¿Mé jyë quítjen xí cuatjin casahme? <sup>8</sup>Ngahan ne, cafaá tujún tsëhë xuta xí matangun yungun xí yahnga. Me vëhë cavechji ná me cojo sa xí cuma cuisécoo nuju ngayun. <sup>9</sup>Hora xí camachaja ná hya xí cavitejñataha cojo nuju ne, hisca ngu ngayun ne, casuandyaan nuju xí cuisecun ná ta, ngujo cha xingueen xí canduva cha tsëhë Macedonia ne, cha vëhë casua ná cha mé xí casahmi chaja ná. Hatuxa cavitejña cuidadu xí tsajin camahani mé cjuandya xí suá nuju, hacuaha ha cuanitjin ni sahme nchujunni nguini. <sup>10</sup>Jiya cjuaquixi rë Jesucristu cahntsua xahasen naha. Hatuxa cuichjá sa cojo xuta ngajan yëjë ladu tsëhë estadu Acaya hacutjin casuandyaan camahani nuju. <sup>11</sup>¿Mé má cuatjin cuichjá sa? ¿Há tsëhë xí mijí ná ngayun? Vëë Nina ta jercu meje ná ngayun.

<sup>12</sup>Peru sacuatjin xcusun xí ha sahme ne, ha cuatjin cjuënduju sa sahme, cojo sa xí tsinguétsun cjua rë cha xí cuacun vanguise chuva rë xí cuichja cha xí xa xí sahmi cha ne, tangun cojo xa xí nihñi. <sup>13</sup>Cha vëhë ne, hacuiin apóstol xí cjuaquixi cha. Tu vindacha ni cha xí chja cha xí apóstol tsëhë Jesucristu má cha. <sup>14</sup>Peru hacuiin fircun ná xí cuatjin ma vindacha cha ta, hisca Satanás ne, ma vindacha naja xí sahmi yojo rë sacuaha ngu xí catsingatju Nina. <sup>15</sup>Vëhë xí cojo cha xí cuacun sahmi xa rë xitsehen vë ne, hacuiin chja ma sahmi cha xí cuma cha sacuaha cha xí sahmi cjuaquixi jain. Peru cha xí cuacun vë ne, ha cuatjin cjuë cha sacuatjin meje rë xcusun xí sahmi cha.

### *Cjuañihi xí vatju apóstol Pablo*

<sup>16</sup>Cuichjá nga cojo nuju ngu ndiya ta, xicaningatuun tacún xí sca ná. O sa tsajin ne, handasa sacuaha xí sca ná má nuju ne, peru tuhun cahndë xí hacuaha cojo ngahan ne, cuaxëndaja hitsë yojo naha sacuatjin sahmi cha xí vaxëndaja yojo rë vë. <sup>17</sup>Xí cuitjin vaxëndaja yojo naha ne, hacuiin tichjá sacuatjin chja Nai naja ta tichjá sacuaha xí sca ná. <sup>18</sup>Jemu cjín xuta xí vaxëndaja me yojo rë me ngatsë rë xcusun xí cun xí má suvá me hacuaha xí vatju suvá me má, vëhë xí hacuaha cojo ngahan ne, cuatjin cuaxëndaja hitsë yojo naha. <sup>19</sup>Xí má nuju ngayun ne, jemu quicuntacun. Peru jemu ndaja caa nuju cojo cjua rë xuta sca rë. <sup>20</sup>Jemu caa nuju tu yo ni xí vitexa nuju hacuaha xí mosu rë ngayun, sacuaha xí matitjun me tsujun; tu yo ni xí sahmi jyë sahmi hnga suvá yojo rë, tu yo ni xí sahmi chuva nuju. <sup>21</sup>Peru savaain camahani ná xí cuichjá cojo nuju xí ngayin ne, sacuaha xí jemu yuma hasen ngayin xí cuatjin nihñi cojo nuju.

Peru sacuatjin vetju cacun cha xí cuacun jan xí vaxëndaja cha yojo rë cha ne, hacuaha ngahan ne, cuatjin vetju cáacun

xi cuaxëndaja yojo naha. Peru sacuaha xi sca ná xi cuitjin tichjá cojo nuju. <sup>22</sup> ¿Há ma chja cha hne hebreo? Ngahan ne, hacuaha ma chjá. ¿Há xuta tjë rë Israel cha? Ngahan ne, hacuaha xuta tjë rë Israel ngahan. ¿Há tjë rë Abraham cha? Ngahan ne, hacuaha tjë rë Abraham ngahan. <sup>23</sup> ¿Há sahmi cha xa rë Jesucristu? Sacuaha xi jercu sca ná xi cuitjin chjá, peru ngahan ne, hitsë sa ndaja sahme xa rë Jesucristu. Hitsë sa jercu casahme xa xi cuma rë cha xi cuacun vë. Hitsë sa cjín ndiya cëjë ndavaya. Hitsë sa cjín ndiya casehen ná. Jemu cjín ndiya xi hitsë sa ne, caveya ngahan. <sup>24</sup> Xutaxa rë xuta Judea ne, hñú ndiya casahmi ná me castigu xi cavaja ná me can tyjuhun ñuju can tyjuhun ñuju cuarta xi ngu ngundiya. <sup>25</sup> Jyan ndiya ne, ya cavaja ná xuta; ngundiya ne, cavetaha ná me ndyojo; jyan ndiya nga ne, quijingahma barcu xi cjuicojo ná; ngundiya tsëhë jyan ndiya vëhë ne, cavitejñaya ngu nixtin cojo ngu nixten ngajñi ndachacun. <sup>26</sup> Jercu fë camahani ngu nangui; hane xi cuatjin tsujyëhëya ne, hacuaha jemu tsavi xi vátju ndajyë, jemu tsavi tsëhë cha chëjë, jemu tsavi cojo cjuahngatacun xi sahmi xuta nangui naha, hacuaha tsavi cojo cjuahngatacun xi sahmi xutaxín; jemu cojo tsavi xi teññataha ngu nandya; jemu cojo tsavi xi teññataha ngu nguijná; jemu tsavi xi vátju ndachacun; jemu tsavi xi tsujyëhëya cojo cha ndacha xi chja cha xi cha ladu naja cha. <sup>27</sup> Jemu chja camahani xa xi casahme hacuaha jemu chja cavátju camá; jemu cjín ndiya xi hisca camaji cafañafë; tjin hora ne, jemu vojo ná, jemu xinda ná; jemu cjín ndiya xi cajinëë niñu; tjin hora xi jemu hnchan ná, hacuaha camachaja tsjian naha.

<sup>28</sup> Hane tsëhë yëjë ni cjuacjintacun xi cuacun vëhë ne, nchu nchujunni ne, sesuntaha sa ngu: jemu vityanguë cáacun tsëhë xuta xi ma tangun me yëjë ni yungun, hacutjin tivatju me tijima. <sup>29</sup> Sa xi choho vatju ngu xingueen má ne, ngahan ne, hacuaha choho ma ná. Sa xi yo sahmi xi cjuinenguia ngu xingueen ngajñi rë cjuatsehen ne, hacuaha ngahan ne, jemu cuma cjan camahani ná. <sup>30</sup> Sa xi meje rë xi cuaxëndaja yojo naha ne, cuichjá cojo nuju hacutjin yuma hasen ngahan. <sup>31</sup> Nina Nahmi rë Nai naja Jesús ne, me vëhë xi hatuxa jyë hnga me yëjë nu yëjë nixtin ne, me vëhë xi vëë jain me ta hacuiin tivindácha xi cuitjin tichjá cojo nuju. <sup>32</sup> Ngundiya hya xi cavitejñataha ngajan nandya Damasco hiscan vitexa Aretas ne, ngu xutaxa rë xi catsingatju Aretas ne, caviyujutaha me sindadu tingotjo rë nandya jan xi cjuaha cha ngahan cjucojo ná cha. <sup>33</sup> Peru ngujo xingueen ne, quiicojo ná me xcun ngu ventana tsëhë taha xihndë tsëhë hnchua rë nandya jan, caveya ná me cahntsua ngu changa jyë, sehe catsitujne ná me taha candatsen. Cuatjin camá xi cavétjutjë tsëhë gobernador

jan.

## 12

### *Chja nijña cojo Pablo*

<sup>1</sup> Tjin ná xi cuaxëndaja sa yojo naha. Hacuaha handasa tsajin mé machjirêhê xi cuitjin sahme ne, peru nguehe cuichjá cojo nuju hacutjin casahmi Nai naja xi cuichja nijñá cojo ná ngu jo ndiya. <sup>2-3</sup> Ngahan ne, hvê ngu xihin xi ma ladu rê Jesucristu, hane camateñuju nu jan ne, quijicojo rê cha hisca hiscan majyan ngahnga hisca hiscan tacun Nina. (Xihin xi quijicojo rê ne, hacui Pablo.) Hveen ne, ¿há xi cojo yojo rê cha quiji cha? ne, o ¿há xi hasen ni rê cha xi quiji? ta, suvá Nina ni vëë me hacutjin camá. Mé ta cha xi cuajyihî vë ne, <sup>4</sup> quijicojo rê cha ngajan ngahnga ngu cahndê ndajyihî xi hmí paraíso, hane ngajan cahndê cha cjua xi hisca sacuiin chuva rê hacutjin cuichja nga cha cojo xuta, hacuaha hisca sacuiin cahndê xi cuya cuichja nga cha cjua jan cojo xuta. <sup>5</sup> Cuaxëndaja xcusun xi casahmi Nina cojo rê cha vëhê, peru hacuiin cuaxëndaja yojo naha suva; sa xi cuichjá tsahan ne, cuichjá hacutjin xi yuma hasen ngahan. <sup>6</sup> Sa xi meje cuaxëndaja sa yojo naha ne, hacuiin sca ná ta, tsêhê xi suvá cjuaquixi xi cuichjá. Peru ha quihndê sahme sa cuatjin ta, tsêhê xi mijí ná xi ngatsê rê cjua vëhê ne, tsingataha cacun ngu xuta xi jemu ngu cha machjirêhê ngahan. Xi meje ná ne, xi catutsejen xuta jan xcusun xi sahme hacuaha catisiñuju me cjua xi chjá, sehe tsingataha cacun me ne, há machjirêhê ne, o há machjiriin ngahan.

<sup>7</sup> Hacuaha cojo sa xi hacuiin cuátjutaha xi ndaja tsingátaha cáacun tsahan suva ngatsê rê cjuandaja xi casahmi Nina cojo ná xi cuatjin cachja nijñá cojo ná ne, vëhê xi casua me cahndê xi Satanás ne, suandya ná sacuatjin suandya naja ngu nahyá xi maji naxenxen, cojo sa xi hacuiin cuátjutaha xi ndaja tsingátaha cáacun tsahan suva. <sup>8</sup> Jyan ndiya caféhya rê Nai naja xi cuetjuxin cjuandya jan; <sup>9</sup> peru cachja me cojo ná cuitjin: “Cjuandaja xi suá ri ne, vëhê yêjê ni xi mameje ri ta, tsêhê xi hiscan xi yuma hasen xuta ne, ngajan xi ma visehen ngahñu naha.” Cuatjin cachja me. Vëhê xi hisca nguñaja cáacun xi vaxëndaja yojo naha ngatsê rê xi yuma hasen ngahan, cojo sa xi ngahñu rê Jesucristu ne, cuma cuisehen ngajñi rê cjuatacun naha. <sup>10</sup> Vëhê xi hisca ndama ná xi jeya ngahan, ndama ná hya xi choho chja xuta tsahan, ndama ná xi vátju ngu cjuandya jyê, ndama ná hya xi vátju cjuañihî, ndama ná hya xi sacuiyiin ná hacutjin cuaxêjtê yojo naha. Jemu ndama ná xi cuatjin vátju má cjuacjintacun vëhê ngatsê rê Jesucristu

ta, tsëhë xi hya xi jemu yuma hasen ngahan ne, hya jemu sacu ná ngahñu rë Nina.

*Cjín tsingataha cacun Pablo tsëhë xuta rë yungun Corinto*

<sup>11</sup> Ngahan ne, sacuaaha xi sca ná, peru ngayun quitjun jyë xi cuitjin tichjá cojo nuju. Xi meje rë ne, ngayun ndaja cuinújun tsahan ta, tsëhë xi handasa chja yahnga xuta ta tsajin mé venguichji ná, peru cumaji cuatjutaha ná cha xi nújun xi apóstol yehe vë. <sup>12</sup> Xcusun xi casahme ngajñi nuju ne, casua machaya nuju ta ngu apóstol xi cjuaquixi ngahan. Jemu cacaa ná cojo nuju xi cuatjin cavisécoo nuju hya. Ngayun ne, jemu quijircun nuju hisca carcun xi cahyun cjuarcun xi casahme. <sup>13</sup> Tangun casahme ngajñi nuju cojo xi casahme ngajñi rë yëjë xuta rë yungun xi yahnga, cuenda xi casuandyaan nuju xi cuisecun ná tsëhë gastu naha. Sa xi cuaintjin xi casahme cojo nuju xi má nuju ne, nijyun tacún cojo ná.

*Chja Pablo xi cjue me má jyan ndiya nandya Corinto*

<sup>14</sup> Quihndë ne, cuma jyan ndiya xi cjuëtjängë nuju ne, hacuaaha suandyaan camahani nuju ta, hacuiin xcusun xi tjin nuju xi meje ná ta suvun xi meje ná ngayun. Mijí rë xi nixti cuetjo tujún xi cuisecoo rë xutacha rë ta xutacha rë cuetjo me tujún xi cuisecoo rë nixti rë me. <sup>15</sup> Ngahan ne, cojo yëjë ni cjuasua tsicój tujún naha ngatsë nuju, hisca tsicjë ngahñu naha ngatsë nuju. Xi má ná ne, tucutjin xi hitsë sa vinga ná ngayun ne, ngayun ne, hitsë sa chuva vinga nuju ngahan.

<sup>16</sup> Cuichja yahnga xuta tsahan ne: “Jéya. Hacuiin casuandya naja cha tsëhë gastu rë cha, peru tsëhë xi jemu quicun cacun cha ne, jemu cavindacha naja cha.” Cuatjin cuichja yahnga xuta tsahan. <sup>17</sup> ¿Há cavindácha nuju xi catsingátju nuju ngujo cha xi quijitjengui nuju cojo cjua naha? <sup>18</sup> Cachjá cojo cha Tito xi cjuetjengui nuju cha, hacuaaha catsingátju sa ngu cha xingueen cojo cha Tito. ¿Há cavindacha nuju cha Tito vë? Jéya. Ha ndaja hyun ta cha vëhë ne, hya xi quitaha cha cojo nuju ne, tangun cjuatacun rë cha cojo cjuatacun naha, hacuaaha tangun xcusun xi casahmi cha cojo xcusun xi ha casahme ngahan.

<sup>19</sup> Ngu ngu ngayun ne, ningatuhun tacún xi cojo nuju ngayun titihín cjuaquixi niji. Peru hacuiin cuatjin ta, xcun Nina ne, cuitjin tinújin ngatsë rë xi tjin tangun cjuatacun niji cojo Jesucristu. Peru yëjë ni cjua xi tinújin ne, tinújin ngatsë nuju ngayujun ni, tsan, cojo sa xi cuma yehe sa cjuatacun rë Nina xi tjin nuju. <sup>20</sup> Jemu macjín cáacun, sá nihñuu tutjin xi meje ná, hacuaaha sá sahme tutjin xi meje nuju, hya xi cjuëhë nangui nuju. Jemu macjín cáacun, sá tacun si ngajñi nuju, sá tjin cjuachini ngajñi nuju, sá cjan nuju

cojo xingun, sá hnga tacún, sá tjin cjuandesu ngajñi nuju, sá tjin cjuachjataha ngajñi nuju, sá tjin cjuaxta ngajñi nuju, sá tuyjé tinihñu. <sup>21</sup> Jemu macjín cáacun sá sahmi chuva Nina ngahan ngajñi nuju hya xi cjuéhé nga ngundiya nangui nuju; hacuaha jemu macjín cáacun, sa choho cuma rē xahasen naha ngatsē rē ngu ngu ngayun xi mijí nindeyun cjuatacun nuju hacuaha hacuiin caviyujunxun cjuatsehen xi nihñu, hacuaha cjuatsehen xi sahmi xuta cojo ngu xi hacuiin chjuun rē me, hacuiin xihin rē me.

## 13

### *Conseju xi sua Pablo*

<sup>1</sup> Quihndē ne, cuma jyan ndiya xi cjuétjēngē nuju. Sacuatjin camahindu xcun xujun rē Nina xi jo o sa xi jyan xuta sua me cjuaquixi rē me tséhē ngu cha xi caxincha jyé rē ne, sehe cuma chihin cjuajan, há cuma cha castigu o há xi cumaji cha castigu. <sup>2</sup> Hya xi cavitejñataha cojo nuju xi ma jo ndiya ne, cachjåtaha rē xuta xi casahmi cjuatsehen; hane quihndē xi xín tejñataha ne, cúa cuichjá nga cuatjin cojo nuju ngayujun ni xi cjēē cuichjá cojo nuju ta, hya xi cuinduva nga ngundiya ne, ha quihndē tsajin yo cuetjutje tséhē castigu xi fehya jyé rē. <sup>3</sup> Cuatjin sahme ta, tséhē xi ngayun ne, tivinchunsun chuva rē xi meje cumachaya nuju há cjuaquixi xi Jesucristu ne, sua ná me cjuaxi chjá cojo nuju. Me véhé ne, hya xi tsichuva nuju me ne, hacuiin jemu yuma hasen me ta jemu hñu ngahñu rē me, jemu hñu cjuatacun rē me ngajñi nuju. <sup>4</sup> Cjuaquixi xi jemu yuma hasen me hya xi catsiquehen xuta me xcun cru; peru tjin rē me ngahñu rē Nina quihndē xi tacun nga me cjuahñu. Hacuaha ngayin ne, xi tjin tangun cjuatacun niji cojo rē me ne, jemu yuma hasen ngayin. Peru cuinechin cjuahñu cojo rē me cojo ngahñu rē Nina cojo sa xi cuma cuisecuin nuju.

<sup>5</sup> Chjuhunchuvun suvun ni yojo nuju, ¿há nechunyun jain ndiya rē Jesucristu? Nichuvun suvun ni yojo nuju. Ngayun ne, hatuxa machaya nuju suvun xi Jesucristu ne, jiya me cahntsua xahasen nuju, jiya me ngajñi rē cjuatacun nuju. Sa xi tsajin ne, cuetjun ndesu ngayun. <sup>6</sup> Hacuaha vetahá cáacun ta ngayun ne, cumachaya nuju ta ngayin ne, hacuiin ndacha ngayin. <sup>7</sup> Tichjahyin rē Nina cojo sa xi ngayun ne, hacuiin nihñu cjuatsehen. Cuatjin chjahyin, peru hacuiin ngatsē rē xi meje niji xi cuichja xuta ta jemu ndaja xa canihñi ta, xi meje niji ne, xi nihñu cjuandaja, handasa cuichja xuta xi ngayin ne, sacuaha xuta ndacha ngayin. <sup>8</sup> Ngayin ne, tsajin mé venguichji rē xi nihñi xcusun xi hacuiin cjuaquixi ta xi venguichji rē xi nihñi ne, xcusun xi cjuaquixi. <sup>9</sup> Jemu ndama niji hya xi jemu yuma hasen ngayin hane ngayun ne,

jemu hñu cjuatacun nuju. Hacuaha chjahyin rë Nina xi xcun ngasunhdë nuju ne, cuiyujuchihin cjuatacun nuju, cuma tyjahi xahasen nuju. <sup>10</sup> Vëhë xi cuatjin titsihindu nuju cjua vëhë xcun xujun vihi quihndë xi chaja sa cjuëtjëngë nuju, cojo sa xi hya xi cjuëhë ngajan ne, hacuiin jemu hñu cjua naha cojo nuju ta Nai naja ne, casua ná me xa xi cuisécoo nuju, hacuiin xi tsinguétsun cjuatacun nuju.

*Tsinguijnetaha Pablo cjua*

<sup>11</sup> Quihndë ne, ngayujun ni ne, catama sua rë xahasen nuju; tiyujunchun cjuatacun nuju; tuhun cjuetacun xahasen nuju; nihñu tangun cjuatacun nuju cojo xingun; tinechun cojo cjuandaja cojo cjuajeya; hacuaha xicamacjiin tacún ta Nina xi sua cjuahmutacun sua cjuajeya ne, cuisecoo nuju me. <sup>12</sup> Tuhun rë xingun nina, cojo cjuandaja cojo cjuahmutacun chutatsuhun xingun, sacuatjin xcusun naja. <sup>13</sup> Yëjë xuta ladu rë Jesucristu ne, tsingatju me ngu nina tsujun. <sup>14</sup> Jesucristu, Nai naja ne, catisua nuju me cjuandaja rë me; Nina ne, catisua nuju me cjuahmutacun rë me; hane Hasen rë Nina ne, catisecoo nuju ngayujun ni.



## **Carta xi catsingatju San Pablo xi cafahatsja xuta ladu rë Jesucristu ngajan distritu Galacia**

<sup>1</sup> Ngahan Pablo ne, má ngahan apóstol, hacuiin ngatsë rë xi xuta catsingatju ná me o sa xi cavetahaxa ná me ta ngatsë rë xi cavetahaxa ná Jesucristu cojo Nina Nahmi naja, me xi catsicuya nga rë Jesucristu cjuahñu tsëhë ngajñi rë nima. <sup>2</sup> Ngahan cojo yëjë sa xuta ladu naja xi siu cojo ná nguehe ne, ningatjin nuju carta vihi, ngayujun ni xuta ladu rë Nina xi tsëhë yëjë ni nandya ngajan distritu Galacia. <sup>3</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya. <sup>4</sup> Jesucristu ne, casua me yojo rë me xi cueya me ngatsë rë yëjë ni jyë naja, cojo sa xi cuëhëndaya naja me tsëhë nixtin tsehen vihi, sacuatjin meje rë Nina Nahmi naja. <sup>5</sup> Catamajyë catamahnga Nina cojo Hasen rë me yëjë ni nu yëjë ni nixtin. Cuatjin jain.

*Ngu ni má cjuandajyihî xi chja tsëhë Jesucristu*

<sup>6</sup> Jercu fircun ná xi ngayujun ni ne, jercu xati tinihñu cjin tsëhë Nina, me xi cajindaya nuju cojo cjuandaja rë Cristu, hane tinihñu tiña tsëhë ngu nga cjuachacun. <sup>7</sup> Xi cjuaquixi ne, tsajin sa ngu cjuachacun ndajyihî xi hacjahi xi cuaxëtje naja. Peru tjin yahnga me xi tisuandya nuju hacuaha meje tsindeya me cjuandajyihî xi chja tsëhë Jesucristu. <sup>8</sup> Peru sa xi tjin ngu me xi sua cumachaya nuju ngu cjuandajyihî xi tanguaain cojo xi ha catihín camachaya nuju ne, ¡catji me cojo nai rë me! Cuatjin catama, handasa ngahan suva o sa xi ngu ángel tsëhë ngahnga cuichja cjua jan. <sup>9</sup> Sacuatjin canújin cojo nuju titjun ne, hacuanitjin ni cúa cuichjá cojo nuju quihndë cjua vihi: Sa xi tjin ngu me xi tisua tijimachaya nuju ngu cjuandajyihî xi tanguaain cojo xi ha camacjain nuju ne, ¡catji me cojo nai rë me!

<sup>10</sup> Ngahan ne, tsajin jercu meje ná xi chuya rë xuta tsahan ta xi meje ná ne, xi Nina chuya rë me tsahan. Sa xi meje sa ná xi xuta chuya rë me tsahan sacuatjin camameje ná hatsëë ne, hacuaha hacuiin mosu hndixahan rë Cristu ngahan.

*Hacutjin camá xi camá Pablo apóstol*

<sup>11</sup> Nguehe cuichjá cojo nuju ngayujun ni xi cjuandajyihî xi suá machaya rë xuta ne, hacuiin cjuatacun rë xuta. <sup>12</sup> Hacuiin xuta casua ná me cjuandajyihî vë, hacuaha hacuiin xuta cavicuya ná me ta Jesucristu ne, me vëhë xi casua me camachaya ná.

<sup>13</sup> Ngayujun ni ne, ha camachaya nuju hacutjin xi casahme hatsëë, hya xi jemu cavétaha yojo naha cjuachacun rë xuta tjë rë Israel. Camachaya nuju tsëhë hacutjin jercu tisuá rë xuta ladu rë Nina cjuañihi nixtin hya hacuaha jercu tisahme ngahñu xi tsicjëya me. <sup>14</sup> Hane ngahan ne, tsëhë yëjë xuta xi hacuaha tjë rë Israel xi tangun nu naha cojo ne, cavátjutaha rë xi casahmechehen yëjë ni xcusun rë xuta naha ta, tsëhë xi jercu tu cavétaha camahani yojo naha cojo xcusun rë xutachanga naha. <sup>15</sup> Peru Nina ne, cavaxijin ná me chaja sa xi tsin ngahan, hane cojo cjuandaja rë me ne, casuaxa ná me. Hya xi Nina cavejña ngu cacun me <sup>16</sup> xi tsingacun me ngahan Quihndi rë me, cojo sa xi suá cumachaya rë xutaxín tsëhë cjuandajyihi tsëhë me ne, hya tsajin yo xuta xi cëjë cavinengësë rë, <sup>17</sup> hacuaha cejen ngajan Jerusalén xi cjuëtjëngë me xi ha má apóstol chaja sa xi cuma ngahan apóstol. Cahndé rë vëhë ne, ngutjen cëjëxen ngajan distritu Arabia, sehe cavúya nga nandya Damasco.

<sup>18</sup> Hya xi camá ne, xi cavatju jyan nu ne, cëjë ngajan Jerusalén, cëjëtjëngë Pedru, hane cavitejñataha cojo rë me tyjuhun nixtin. <sup>19</sup> Peru cahveen apóstol xi yahnga ta ngu ni Jacobo, xicjin Nai naja, xi cahvë. <sup>20</sup> Cjua xi tichjá cojo nuju ne, vëë Nina ta hacuiin vindácha.

<sup>21</sup> Hya xi camá ne, cëjë distritu Siria cojo distritu Cilicia. <sup>22</sup> Hane xuta ladu rë Cristu ngajan distritu Judea ne, hisca cjëë sa scuëë me ngahan. <sup>23</sup> Sehe tu vihndë me cjua vihi: “Cha xi jercu casua naja cjuañihi hatsëë ne, quihndë ne, tisua cha tijimachaya rë xuta tsëhë cjuachacun xi jercu casahmi cha ngahñu xi tsicjëya cha.” Cuatjin vihndë me. <sup>24</sup> Hane casahmi jyë casahmi hnga me Nina cojo Hasen rë me ngatsë naha.

## 2

### *Quiji tjengui Pablo apóstol xi yahnga*

<sup>1</sup> Hya xi camá ne, xi cavatju teñuju nu ne, cavúya ngahan nga ngu ndiya ngajan Jerusalén. Hacuaha Bernabé ne, quijitangun me cojo ná. Hacuaha cëjëcojo cha Tito. <sup>2</sup> Cëjë ta cuatjin cachja Nina. Hane xcun ngu junta xi camá cojo suvá xuta matitjun ne, cachjá cojo rë me hacutjin fi cjuandajyihi xi suá machaya rë xutaxín. Cuatjin casahme, tsëhë xi mijí ná xi xa xi tisahme o xi ha casahme ne, tu mahya ni. <sup>3</sup> Peru hisca cha Tito xi quitahátangun cha cojo ná ne, handasa xutaxín má cha ne, camaji cha ngu jyë xi xtí chuxin rë cha. <sup>4</sup> Ngujo cha ndacha xi chja cha xi ladu rë Jesucristu má cha ne, cavisehen tahahma cha ngajñi niji xi scutsejen cha hacutjin xcusun niji xi tjin ndaya ngayin ngatsë rë xi tjin tangun cjuatacun niji cojo Jesucristu. Meje rë cha xi cuetihin nga yojo niji cojo ley rë

Moisés. <sup>5</sup> Peru ngayin ne, caningatiin rë cha hisca hitsë, cojo sa xi cjuandajyihi xi hatuxa cjuaquixi ne, chajin xi cuma nuju.

<sup>6</sup> Peru me xi chjahárcun rë sacuaaha xuta xi matitjun jan ne, (cuatjin chjá ta xa xi quitahá me jan ne, hisca cuendaain ná ta, Nina ne, texta ni vutsejen naja me ngayejen ni), me xi cuacun matitjun jan ne, cavesintaain me hisca ngu cju tséhë cjuandajyihi xi chjá cojo xuta, tséhë xi ha tjin chihin.

<sup>7</sup> Hacuaha cajnercu me xi Nina casua ná me xa xi cuichjá cjuandajyihi cojo xutaxín, sacuahatjin rë Pedru xi casatë rë me xi cuichja me cojo xuta tjë rë Israel. <sup>8</sup> Nina ne, me xi catsingatju rë Pedru xi cuma me apóstol ngajñi rë xuta tjë rë Israel ne, hacuaha hacui ni me xi catsingatju ná xi cuma ngahan apóstol ngajñi rë xutaxín.

<sup>9</sup> Hane Jacobo cojo Pedru cojo Juan, me xi chjahárcun rë sacuaaha xuta xi matitjun ne, hya xi cuatjin cajnercu me xi Nina casua ná me cjuandaja jan ne, cafaha me ntsin, ngahan cojo Bernabé, hane cuatjin catsingacun me xi ngayin ne, tiniñitangun cojo rë me xa rë Nina. Hane camangu tacuín xi ngayin ne, nihñi xa ngajñi rë xutaxín, hane me xi cuacun jan ne, sahmi me xa ngajñi rë xuta tjë rë Israel. <sup>10</sup> Ngu tu tu ni xi cafehya niji me ne, xi cuisecuin ngajñi rë cjuachaja rë xuta yuma xi hinchajñi ngajñi me. Sacuatjin xcusun vëhë ne, hatuxa jercu vejñá xi sahme.

### *Cachjataha Pablo Pedru ngajan Antioquía*

<sup>11</sup> Peru hya xi quiji Pedru ngajan nandya Antioquía ne, cachjátáha rë me xcun cojo xcun ta, tséhë xi suvá tsejen xi cuaain tjin xi tisahmi me. <sup>12</sup> Chaja sa xi cjuehe ngujo cha xi catsingatju Jacobo ne, tijinë tangun Pedru niñu cojo xutaxín xi ladu naja. Peru tu ngu cafehe cha xi cuacun jan ne, cavetsihin cavejñaxin me xi jinë tangun me cojo xutaxín xi cuacun jan ta, tséhë xi tsacjun me yahnga xuta tjë rë Israel xi ladu naja xi meje rë xi xtí chuxin rë yëjë ni xuta xi visehen ladu rë Nina. <sup>13</sup> Hacuaha yëjë sa xuta tjë rë Israel xi siu ngajan ne, cavetsihin casahmi jo xcun jo hntsua me sacuatjin rë Pedru, hane hisca cojo Bernabé camatangun me cojo me xi cuacun jan cojo xcusun xi casahmi me. <sup>14</sup> Peru hya xi cahvë xi xcusun xi tisahmi me ne, matanguaain cojo cjuaquixi xi vicuya naja cjuandajyihi ne, xcun yëjë ni xuta jan ne, cuitjin cachjá cojo rë Pedru: “Ngayun xi ngu xuta tjë rë Israel má ngayun ne, sa xi nihñu sacuaaha sahmi xutaxín, hacuiin sacuaaha sahmi xuta tjë rë Israel ne, ¿hacutjin meje nihñu ngu yëjë xi xutaxín jan ne, sahmi me sacuaaha nihña ngayaan xuta tjë rë Israel?”

*Xi mangu tacuun cojo Jesucristu ne, vetjuntje xuta, sa xuta tjë rë Israel o sa xutaxín*

<sup>15</sup> Ngayaan ne, hatuxa xuta tjë rë Israel má ngayaan, hacuiin xuta tsehen má ngayaan. <sup>16</sup> Handasa cuatjin ne, ha hyan xi ngu xuta ne, tsicjiin Nina jyë rë me ngatsë rë xi vihndë me tséhë ley rë Moisés ta suvá ni ngatsë rë xi mangu cacun me cojo Jesucristu. Hane cojo ngayaan ne, hacuaha camangu tacun cojo Jesucristu, cojo sa xi tsicjë Nina jyë naja ngatsë rë xi mangu tacun cojo rë Cristu, hacuiin ngatsë rë xi canuhyaan tséhë ley jan ta, tséhë xi tsajin camahani yo xi cjuë jyë rë ngatsë rë xi vihndë tséhë ley rë Moisés jan.

<sup>17</sup> Hya xi canihña tangun cjuatacun naja cojo Cristu cojo sa xi cjuë jyë naja ne, sa xi hya camatsejen xi hacuaha ngayaan xuta tsehen yaan ne, ¿há vëhë vijne xi Cristu ne, casahmi me xi caxincha ngayaan ndiya rë cjuatsehen? ¡yéya, hacuiin cuatjin vijne! <sup>18</sup> Sa xi cúa tsindaja nga xcusun xi ha catsinguétsun ne, ngajan matsejen xi xuta tsehen má ngahan. <sup>19</sup> Ngahan ne, xi cuma rë ley rë Moisés ne, sacuaha xi cavéya, sacuaha xi suvá ley jan catsiquehen ná. Cuatjin camá cojo sa xi cuma ngahan tséhë Nina. Sacuaha xi casetaha tangun ngahan xcun cru cojo Cristu. <sup>20</sup> Ngajan xi sacuaha xi ha quihndë hacuiin cjuahñu naha xi tjin ná ta sacuaha cjuahñu rë Cristu. Peru quihndë xi tjin ná cjuahñu cojo yojo naha ne, mangu cacún cojo Quihndi rë Nina, me xi catsihmu cacun ná hacuaha casua me yojo rë me xi cueya ngatsë naha. <sup>21</sup> Hacuiin tsitjungë cjuandaja rë Nina. Sa xi cuma cjuë jyë rë xuta ngatsë rë xi vihndë me tséhë ley rë Moisés ne, ha tu mahya ni cahme Cristu.

### 3

#### *¿Há cojo ley o há cojo Jesucristu mangutacuun?*

<sup>1</sup> Ngayujun ni xuta Galacia ne, ¡jercu yuma hasen yun! ¿Há tjin yo cafehya cacun tsujun xi cuatjin ningatuhuntacún? Jercu tu ndaja camachaya nuju hacutjin xi cahme Jesucristu xcun cru. <sup>2</sup> Ngu tu tu ni cjua xi meje cuinengësë nuju ne: ¿Há cachjuhunntsun Hasen rë Nina ngatsë rë xi canihñu sacuatjin vitexa ley jan, o sa tsajin ne, há ngatsë rë xi camacjain nuju cjuandajyihí xi cavisiñuju? <sup>3</sup> ¿Há tuxa yuma hasen ngayun? Quihndë xi cavetsuhun cojo Hasen rë Nina ne, ¿há meje nihñuchuhun cojo ngahñu nuju suvun ní? <sup>4</sup> ¿Há tu mahya ni xi cuatjin cjín xcusun cavatjun ní? ¡Hatuxa hacuiin tu mahya! <sup>5</sup> Hya xi Nina sua nuju me Hasen rë me hacuaha sahmi me cjuarcun ngajñi nuju ne, ¿mé má cuatjin casahmi me? Hacuiin ngatsë rë xi nihñu sacuatjin vitexa ley ta, ngatsë rë xi macjain nuju cjuandajyihí xi visiñuju.

#### *Compromisu rë Nina cojo Abraham*

<sup>6</sup> Xcun xujun rë Nina ne, cuitjin camahindu: “Abraham ne, camangu cacun me cojo cjuá xi cachja Nina cojo rë me, hane ngatsë rë vëhë xi catsicjë Nina jyë rë me.” Cuatjin camahindu. <sup>7</sup> Ngajan xi meje rë xi cuijnercun xi xuta xi mangu cacun me cojo Nina ne, me vëhë jain xi quihndi rë Abraham me. <sup>8</sup> Xujun rë Nina jan ne, ha tjun sa vëë xi tsicjë Nina jyë rë xutaxín ngatsë rë xi cumangu cacun xutaxín jan cojo rë me. Vëhë xi xcun xujun rë Nina ne, camahindu cjuá xi cuitjin cachja Nina cojo Abraham: “Ngatsë riji ngaye ne, cumanchacuntihin yëjë ni xuta ngasunhdë.” <sup>9</sup> Ngajan xi yëjë ni xuta xi mangu cacun me cojo Nina ne, cumanchacun tangun me cojo Abraham, me xi hacuaha camangu cacun.

<sup>10</sup> Yëjë ni xuta xi mangu cacun me cojo ley rë Moisés ne, hatuxa cuatju me castigu, tsëhë xi xcun xujun rë Nina ne, cuitjin camahindu: “Nina ne, sahmi rë me castigu yëjë ni xuta xi vihndiin me tsëhë yëjë ni cjuá xi camahindu xcun xujun rë ley rë Moisés.” Cuatjin camahindu. <sup>11</sup> Ngajan xi suvá tsejen xi xcun Nina ne, cjuiin jyë rë hisca xi ngu xuta ngatsë rë xi cahndë me tsëhë ley jan, tsëhë xi xcun xujun rë Nina ne, cuitjin camahindu: “Xuta xi tsajin jyë rë me ngatsë rë xi mangu cacun me cojo Nina ne, sacú rë me cjuahñu xatsë.” Cuatjin camahindu. <sup>12</sup> Peru ley rë Moisés jan ne, cuendaain camahani rë xi mangu tacun cojo Nina ta, xcun xujun rë Nina ne, cuitjin camahindu: “Xuta xi sahmi me sacuatjin vitexa ley ne, sacú rë me cjuahñu xatsë sa xi sahmi chihin me ley jan.” Cuatjin camahindu.

<sup>13</sup> Cristu ne, cavëhëndaya naja me tsëhë castigu xi vitexa ley jan, hya xi cavatju me castigu jan ngatsë naja. Camahindu nga cuitjin xcun xujun rë Nina: “Yëjë nima xi xtyangui tsëhë ngu ya ne, hatuxa cuatju me castigu rë Nina cuma.” Cuatjin camahindu. <sup>14</sup> Cristu ne, cuatjin cavëhëndaya naja me, cojo sa xi cjuaninchacuntihin xi cachja Nina xi sua me Abraham ne, hacuaha satë rë xutaxín ngatsë rë Jesucristu, hacuaha cojo sa xi ngatsë rë xi mangu tacun cojo Jesucristu ne, sacú naja Hasen rë Nina xi cachja Nina xi sua me.

*¿Há ley o cjuá xi cachja Nina mangutacun?*

<sup>15</sup> Ngayujun ni ne, cuichjá cojo nuju ngu ejemplu xi ha ndaja hyan. Hya xi ha camachihin xujun tsëhë ngu compromisu ne, tsajin yo xi tsicjëya rë o sa cuesuntaha sa rë ngu cjuá. <sup>16</sup> Nina ne, cachja me cojo Abraham xi sua me cjuandaja rë me xi cuma rë Abraham cojo tjë rë me. Chjaain xujun rë Nina xi “yëjë tjë rë”, sacuaha xi jercu cjín xuta tichja tsëhë ta xi chja ne, “cojo tjë riji”, sacuaha xi ngu ni xuta tichja tsëhë. Hane tjë vëhë ne, hacui Cristu. <sup>17</sup> Xi meje cuichjá ne, Nina ne, casahmi me ngu compromisu cojo Abraham titjun. Vëhë xi

ley rë Moisés, xi cavejña Nina xi cavatju ñuju cientu cojo cantë nu ne, maji tsicjëya rë compromisu jan, maji tsinguetsun rë cjua xi cachja Nina jan. <sup>18</sup> Sa xi sacú naja cjuandaja xi sua Nina ngatsë rë xi vinuhyan tsëhë ley rë Moisés ne, ngajan xi hacuiin ngatsë ni rë xi cuatjin cachja Nina xi sacú naja. Peru Nina ne, casua me cjuandaja jan Abraham ngatsë ni rë xi cuatjin cachja me titjun.

*Mé ngatsë rë xi tjin ley rë Moisés*

<sup>19</sup> Sa xi cuatjin ne, ¿mé machjirëhë ley rë Moisés? Xi camá ngascan ni, Nina casua me ley jan, cojo sa xi cumatsejen xi xuta ne, hatuxa vihndiin me cjua xi vitexa Nina. Ley jan ne, cavitexa hisca xi cafehe tjë rë Abraham jan, me xi cachja Nina xi sacú rë cjuandaja. Hacuaha ley jan ne, casahmi entregadu ángel tsja Moisés, me xi cavéjña vasentjin ngajñi rë Nina cojo xuta. <sup>20</sup> Peru hindë ne, tsëhë cjua rë Nina ne, mamijí sa ngu me xi véjña vasentjin, ta ngu tu tu ni me ne, tifahacuenda me.

<sup>21</sup> ¿Há vëhë vijne xi ley rë Moisés ne, sahmi rë condra cjua xi cachja Nina jan ni? ¡Jéya, hacuiin cuatjin! ta, sa xi ley jan camá casua naja cjuahñu xatsë ne, ha cafë jyë naja ngatsë rë xi canuhyan tsëhë ley jan. <sup>22</sup> Peru xujun rë Nina ne, chja xi cjuatsehen vitexa rë yëjë ngarca ni, cojo sa xi xuta xi mangu cacun me cojo Jesucristu ne, cuma cjuahatsja me cjuandaja xi cachja Nina xi sua me.

<sup>23</sup> Peru chaja sa xi nduva nixtin xi camá camangu tacun cojo Jesucristu ne, ley jan ne, cavinchahñu naja sacuaha xi ndavaya cavinechanyaan, hisca nixtin xi casacu camachaya naja xi fë jyë naja ngatsë rë xi mangu tacuun cojo Jesucristu. <sup>24</sup> Cuatjin xi ley ne, cavitexa naja hisca xi canduva Cristu cojo sa xi cjuë jyë naja ngatsë rë xi mangu tacuun cojo Jesucristu. <sup>25</sup> Peru quihndë xi ha cafehe nixtin xi mangu tacuun cojo Jesucristu ne, ha quihndë vitexaain sa naja ley rë Moisés jan. <sup>26</sup> Cuatjin ta, tsëhë xi quihndë xi tjin tangun cjuatacun nuju cojo Jesucristu ne, ngayujun ni ne, quihndi rë Nina má ngayun ngatsë rë xi mangu tacún cojo rë me. <sup>27</sup> Ngayujun ni xi caxtenda ngayun xi nihñutangun cjuatacun nuju cojo Cristu ne, hacuaha cavisehen nuju cjuatacun rë me jan sacuaha xi cachujun ngu tsjian xatsë. <sup>28</sup> Ngajan xi cuendaain rë sa xi xuta tjë rë Israel o sa xi xutaxín ngayun, cuendaain rë sa xi xuta caxteña o sa xi xuta tjin ndaya ngayun, cuendaain rë sa xi chjuun o sa xi xihin ngayun ta, tsëhë xi ngayujun ni ne, xi tjin tangun cjuatacun nuju cojo Jesucristu ne, ngu tangun ni cún yun xi cuma rë Nina. <sup>29</sup> Hane sa xi tsëhë Cristu má yun ne, ngajan xi hacuaha tjë rë Abraham má yun, hane satë nuju cjuandaja xi cachja Nina xi sua me.

## 4

<sup>1</sup> Cuma cuinújan ne, sacuaha cha xi cjuahatsja cjuanchina rē xutacha rē ne, nguyējē rē xi chúva nu rē cha ne, tangun cha cojo ngu mosu xi cachahá rē, handasa cjuaquixindaja xi cha vēhē má cha nai rē yējē ni cjuanchina jan. <sup>2</sup> Tjin xuta xi sahmi rē cha cuidadu hacuaha fahacuenda me cjuacjintacun rē cha, hisca nixtin xi cachja nahmi rē cha xi cuatjin cuma cojo cha. <sup>3</sup> Cuanitjin ni naja ngayaan ta, hya xi cjualanga naja ne, hatuxa cavinuhyan tsēhē xitsehen xi vitexa rē ngasunhndē, sacuaha xi má ngayaan hndixahan xi cachahá rē. <sup>4</sup> Peru hya xi cavechútáha rē nixtin rē ne, Nina ne, catsingatju me Quihndi rē me, xi catsin sacuaha tsin ngayaan xuta ngasunhndē, hacuaha ley rē Moisés cavitexa rē jan. <sup>5</sup> Cuatjin catsingatju me, cojo sa xi Quihndi rē me jan ne, cuēhēndaya naja ngayejen ni xi cavitexa naja ley jan, hacuaha cojo sa xi cuma ngayaan quihndi rē Nina. <sup>6</sup> Cojo sa xi cumatsejen xi quihndi rē Nina má ngayun ne, Nina ne, caveya me Hasen rē Quihndi rē me cahntsua cjuatacun naja. Hane Hasen jan ne, cuitjin chja cojo Nina: “¡Papá, Nahmi naha!” <sup>7</sup> Vēhē xi ngayun ne, hindē hacuiin má ngayun mosu hndixahan xi caxteña ta quihndi rē Nina. Hane xi cuatjin quihndi rē me ngayun ne, Nina ne, sua nuju me yējē ni xi satē rē quihndi rē me.

*Macjincacun Pablo tsēhē xuta Galacia*

<sup>8</sup> Hatsēē nixtin ne, hya xi chaja sa cumachaya nuju yo xi Nina ne, jemu cavetuhun yojo nuju cojo jemu cjín xcusun nina xi hatuxa hacuiin nina. <sup>9</sup> Peru quihndē xi ha camachaya nuju yo xi Nina ne, o cuma cuinújan ne, quihndē xi Nina ne, vutsejen nuju me cojo cjuandaja ne, ¿hacutjin nga meje cuyun cuisuhun cojo cjuahasen xi chúva ngahñu rē hacuaha yuma cojo cjuatacun rē ni? ¿Hacutjin nga meje cuetuhun yojo nuju cojo cjuahasen xi cuacun jan ni? <sup>10</sup> Jercu nihñu suhi. Tjin nixtin xi jercu chjuhuncun, tjin suhi xi nihñu chuva sá o sa xi chuva nu. <sup>11</sup> Macjín cacún, sá tu xa xi casahme ngajñi nuju ne, tu mahya ni camá.

<sup>12</sup> Ngayujun ni ne, cjuéhya nuju favor ne, catama ngayun sacuaha ngahan ta, tsēhē xi ngahan ne, ha camá ngahan sacuaha ngayun. Tsajin mé xi choho canihñu cojo ná. <sup>13</sup> Hacuaha hyun xi titjun ne, casuá camachaya nuju tsēhē cjuandajyihí xi chja tsēhē Jesucristu ngatsē rē ngu chíhin xi yaha ná. <sup>14</sup> Peru handasa casuándya nuju cojo chíhin naha jan ne, ngayun ne, tsajin canitjungun ná hacuaha tsajin canihñuchuvun ná. Cahndē rē vēhē ne, cachjuhunntsun ná sacuaha xi ngu ángel xi catsingatju Nina má ngahan, o sacuaha xi suvá Jesucristu má ngahan. <sup>15</sup> ¿Mé camá cojo cjuandaja xi tjin nuju hatsēē ni? Ngahan ne, tsinguixē xi

ngayun ne, hisca canaxun túxcun tuhun ná nixtin hya, sa xi camá canaxun. <sup>16</sup> ¿Há camá ngahan condra nuju ngatsë rë xi cachjá cojo nuju cjuaquixi?

<sup>17</sup> Tjin xuta xi jercu meje cuisecoo nuju me, peru hacuiin cojo cjuandaja ta xi meje rë me ne, xi cuaxëxin nuju mé tsahan, cojo sa xi ngayun ne, ninguisuhunjñurcun cojo rë me. <sup>18</sup> Jercu ndatjin xi meje cuisecoon rë xingueen, hya xi cojo cjuandaja. Peru meje rë xi yëjë ni nixtin cuatjin nihña, hacuiin suvá ni hya xi tejñataha cojo nuju. <sup>19</sup> Ngayujun ni tsan, jercu jyë cjuahmu xi tivátju nga tijima ngatsë nuju, sacuaaha vatju ngu chjuun xi tsin quihndi rë me. Hacuaha cuatjin cjuëndujú cojo cjuahmu vihi hisca xi cumatsejen xi jiya të Cristu ngajñi cjuatacun nuju hacuaaha cuitexa me cjuatacun nuju tsëhë yëjë ni xcusun xi nihña. <sup>20</sup> Jercu meje cuitejña cojo nuju ndicumaha ni, cojo sa xi cuma tsindéya cjuavisiajmi naha cojo nuju ta, tsëhë xi jercu vityangë cacún tsujun.

### *Ejemplu tsëhë Agar cojo Sara*

<sup>21</sup> Ngayujun ni xi meje nuju xi ley rë Moisés cuitexa nuju ne, tinújun cojo ná, ¿há cjëë cuinuhyun cjuá rë ley jan?

<sup>22</sup> Camahindu xi Abraham ne, jo xu camá quihndi rë me: ngu ne, tsëhë na mosu hndixahan xi sahmi xa rë chjuun rë me, hane xingu jan ne, tsëhë chjuun rë suvá me, na xi hacuiin hndixahan ta hatuxa xuta ndaya tjin. <sup>23</sup> Quihndi rë na mosu hndixahan jan ne, catsin sacuaaha tsin yëjë ni langa; peru quihndi rë na ndaya jan ne, camá tsëhë cjuarcun rë Nina.

<sup>24</sup> Cjuá xi cuicun vi ne, sacuaaha ngu ejemplu: jo chjuun jan ne, sacuaaha jo compromisu má na. Ngu na ne, Agar hmí rë na, hane yëjë ni quihndi rë na ne, hatuxa hndixahan cachahá rë. Hane chjuun jan ne, sacuaaha compromisu xi casahmi Nina cojo Moisés ngajan Naxi Sinaí. <sup>25</sup> Na Agar, na xi sacuaaha Naxi Sinaí ngajan Arabia ne, sacuaaha ngu ejemplu tsëhë nandya Jerusalén xi tacun quihndë. Hane yëjë ni xuta tsëhë Jerusalén vëhë ne, sacuaaha hndixahan cachahá rë má me. <sup>26</sup> Peru yëjë ni xuta tsëhë Jerusalén xi tacun ngahnga ne, hatuxa ndaya tjin me. Hane ngayaan ne, quihndi rë nandya Jerusalén vëhë má ngayaan. <sup>27</sup> Cuitjin chja xujun rë Nina:

Catamasua ri ngaye chjuun xi maji sacú ri quihndi;

chjindaye cjuasua, ngaye xi cjëë cuatji cjuahmu xi tsin ri quihndi.

Tsëhë xi ngaye xi cavixin cojo ra, hitsë sa cjín cuma ye cojo quihndi riji

xi cuma ran xi fi vejña na cojo cha.

<sup>28</sup> Ngayujun ni ne, hacuaaha quihndi rë Nina má ngayun, sacuatjin rë Isaac, ngatsë rë xi cuatjin cachja Nina. <sup>29</sup> Nixtin



hya ne, cha xi catsin sacuaaha tsin yějē ni langa ne, catsujyi-hiya tjengui cha cojo cjuahngatacun cha xi catsin ngatsē rē Hasen rē Nina. Quihndē ne, ha cuanitjin ni tijima. <sup>30</sup> Peru ¿mé chja xujun rē Nina? Cuitjin chja: “Naxendihye na mosu hndixahan jan cojo quihndi rē na ta, tséhē xi quihndi rē na hndixahan jan ne, hatuxa cumaji sacu tangun rē cjuanchina rē nahmi rē cojo quihndi rē na xi ndaya tjin.” Cuatjin chja xujun rē Nina. <sup>31</sup> Véhē xi ngayejen ni ne, hacuiin quihndi rē na mosu hndixahan má ngayaan ta quihndi rē na xi ndaya tjin.

## 5

### *Meje rē xi cuanguenndujun xi tjin ndaya ngayaan*

<sup>1</sup> Cristu ne, cavéhēndaya naja me, cojo sa xi ndaya tjin ngayaan. Véhē xi tiyujunhñu cjuatacun nuju, xicaninguisunjñuu rcun nga cojo ngu xcusun xi sahmi xi cuyun nga ngayun sacuaaha hndixahan.

<sup>2</sup> Nutsujun ni. Ngahan Pablo ne, cuichjá cojo nuju ta, sa xi xtí chuxin nuju sacuatjin xcusun rē xuta tjē rē Israel ne, Cristu ne, cumachjiriin nuju me. <sup>3</sup> Cúya cuichjá cojo nuju ta yějē ni xihin xi cuatjin xtí chuxin rē ne, hatuxa tjin rē xi sahmi yějē ni hacutjin chja ley rē Moisés. <sup>4</sup> Ngayun xi meje nuju xi cjuē jyē nuju ngatsē rē xi vinuhyun tséhē ley rē Moisés ne, hindē tsajin tjin tangun cjuatacun nuju cojo Cristu, hacuaaha jemu cjin nechun tséhē cjuandaja rē Nina. <sup>5</sup> Peru ngayin ne, jercu vetihin tacuín xi tsicjē Nina jyē niji. Hacuaha jercu nechinyin xi cuatjin sahmi Nina ta, tséhē xi Hasen rē Nina ne, visecoo niji xi mangu tacuín cojo Jesucristu. <sup>6</sup> Hya xi tjin tangun cjuatacun naja cojo Jesucristu ne, venguin chji rē sa cati rē o sa xi catiin rē chuxin naja. Xi vengui chji rē ne, xi mangu tacuun cojo Jesucristu, hane ngatsē rē véhē ne, xi hacuaaha tjin naja cjuahmutacun.

<sup>7</sup> Ngayun ne, ha jercu ndaja titsangun titjun. ¿Yo xi casuandya nuju xi mijí cuangunndujun xi cuinuhyun tséhē cjuaquixi rē Nina? <sup>8</sup> Nina xi tsingatju me cjua nuju ne, hacuiin me véhē xi cuatjin casuandya nuju. <sup>9</sup> Ha hyan cjua xi chja cuitjin: “Hitsē lihndi ni san rē pan ne, caa rē tsisatjen rē yějē nahyu.” Cuatjin chja cjua. <sup>10</sup> Macjiin cacún tsujun ta, ngatsē rē xi tjin tangun cjuatacun naja cojo Nai naja ne, xi má ná ne, ningatuhun tacún sacuatjin tsingátaha cacún ngahan. Hane tu yo ni xi tisuandya nuju ne, cuatju castigu cuma.

<sup>11</sup> Sacuaaha ngahan ne, sa xi quixi xi tichjá sa cojo xuta xi sahmi nguhyē xi xtí chuxin naja ne, ¿mé tséhē xi yahnga me ne, tsujyihyatjengui sa ná me cojo cjuahngatacun? Sa xi quixi xi cuatjin sahme sa ne, ngajan xi hya xi chjá cojo xuta

tsëhë hacutjin cahme Jesucristu xcun cru ne, tsajin cjuandya xi cuma rë yahnga xuta xi cuacun jan. <sup>12</sup> Jercu ndatjin sa xi xuta jan xi cuatjin tisuandya nuju me ne, catatëxin suvá me yojo rë me ngu ndiya xa ni!

<sup>13</sup> Sacuaha ngayujun ni ne, catsingatju Nina cjua nuju, cojo sa xi cumandaya ngayun. Peru hacuiin tu cuaain rë xi cavëhëndaya nuju Nina xi ningatuhun rë cjuatacun nuju yëjë ni xcusun tsehen xi vitexa nuju. Cahndë rë vëhë ne, tiseacun xingun ngatsë rë cjuahmutacun xi tjin ngajñi nuju. <sup>14</sup> Cuatjin nihñu ta, yëjë ni cjua xi vitexa ley rë Moisés ne, cumachihin hya xi nihña ngu ni cjua vihi: “Meje rë xi nihmu tacún xingun sacuatjin nihmu tacún suvun yojo nuju.” <sup>15</sup> Peru sa xi choho nihñu cojo xingun sacuatjin sahmi chu xi cjan rë xi jinëxcuen xicjin chu ne, nechun cuidadu, sá tu nicjuyun cjuandaja xi tjin ngajñi nuju.

*Hacutjin sahmi Hasen rë Nina, hacuaha hacutjin sahmi cjuatacun tsehen naja*

<sup>16</sup> Nutsujun ni. Tuhun cahndë xi Hasen rë Nina ne, cuitexa rë cjuatacun nuju. Hane xi cuatjin ne, hatuxa nihñuu yëjë ni xi fehya cjuatacun tsehen nuju. <sup>17</sup> Cjuatacun tsehen naja ne, sahmi condra cojo Hasen rë Nina, hacuaha Hasen rë Nina ne, sahmi condra cojo cjuatacun tsehen naja. Catsijo ni vihi ne, sahmi condra cojo xicjin. Ngajan xi ngayujun ni ne, maji nihñu tu mé ni xcusun xi meje nihñu. <sup>18</sup> Sa xi Hasen rë Nina vitexa rë cjuatacun nuju ne, ngajan xi cuitexaain nuju ley rë Moisés.

<sup>19</sup> Quihndë ne, ha ndaja ni hyan xcusun tsehen xi nihña hya xi vitexa naja cjuatacun tsehen naja. Nihña cjuatsehen xi sahmi ngu xuta cojo ngu xi hacuiin chjuun rë me, hacuiin xihin rë me, o sa xi ngajñi ni xihin me, o ngajñi ni chjuun me, o tu mé sa xcusun cjuatsehen jan. <sup>20</sup> Chjahanrcun nina ndyojo, hacuaha nihña cjuasurqui. Choho hyaan xingueen, nihña si ngajñi naja cojo xingueen, hacuaha tjin naja cjuachini. Jercu ma cjan naja, jercu hnga tacun, jercu chicjan cojo xingueen, ngujo yaan ne, naxenxeen yojo naja tsëhë xingueen. <sup>21</sup> Jercu tjin naja cjuaxin, jercu xuta chihi má ngayaan, jercu maxti nuju ngayaan hya xi nihñu ngu suhi, cojo jercu cjin sa xcusun vëhë xi nihña. Cojo tjun sa ne, cuichjá cojo nuju sacuatjin xi ha cachjá cojo nuju ta xuta xi sahmi me sacuahatjin rë xcusun vëhë ne, satiin rë me xi cuisehen me hiscan xi sahmi Nina gobiernu.

<sup>22</sup> Peru hya xi Hasen rë Nina vincha cjuandaja ngajñi rë cjuatacun naja ne, jercu tjin naja cjuahmutacun, tjin naja cjuasua, tjin naja cjuajeya, yehe tacun, tjin naja cjuandaja, cuma cumangu cacun xuta cojo naja, <sup>23</sup> jeya ngayaan, caa

naja xi hacuiin ningatehen rë cjuatacun tsehen naja cojo xcusun xi fehya xi nihña. Sacuaha yějë ni cjuandaja vëhë ne, tsajin camahani ley xi vitexa xi cumaji nihña. <sup>24</sup> Hane yějë ni xuta ladu rë Jesucristu ne, ha caviyujuxin me cjuatacun tsehen rë me cojo yějë ni xcusun tsehen xi fehya rë me xi sahmi me. <sup>25</sup> Sa xi Hasen rë Nina casua naja cjuahñu xatsë ne, meje rë xi hacuaha ningatehen xi Hasen jan cuitexa rë cjuatacun naja.

<sup>26</sup> Mijí rë xi xta ngayaan, mijí rë xi si rcun, mijí rë xi tjin naja cjuaxin cojo xingueen.

## 6

### *Meje rë xi cuisecoon xingueen*

<sup>1</sup> Ngayujun ni ne, sa xi yo sacutsja rë ngu xuta xi tisahmi me cjuatsehen ne, ngayun xi ningatuhun xi vitexa Hasen rë Nina cjuatacun nuju ne, meje rë xi cuisecun rë me xi cuya ndaja me, peru tisecon rë me cojo yějë ni cjuandaja cjuajeya. Hacuaha meje rë xi tjin nuju cuidadu, sá tu cojo ngayun cuinengunyun ngajñi rë cjuatsehen. <sup>2</sup> Tisecon xingun cojo sa xi scaa nuju cojo cjuacjintacun xi quichuhun xingu xingu ngayun. Hane xi cuatjin nihñu ne, ngajan xi machihin ley xi cavicuya naja Cristu. <sup>3</sup> Sa xi yo sahmi jyë yojo rë handasa tsajin mé vechú ne, vindacha suvá yojo rë. <sup>4</sup> Xingu xingu ngayaan ne, meje rë xi nichuvan suvaan yojo naja cojo xcusun naja. Xi cuatjin nihña ne, cumasua naja cojo xcusun ndaja xi canihña suvaan, hisca sahmi nguyjë xi nutsejen xcusun xi sahmi xingueen. <sup>5</sup> Xingu xingu ngayaan ne, tjin naja xi chaan cjuacjintacun naja suvaan.

<sup>6</sup> Xuta xi vutaya cjuandajyihí xi chja tsëhë Jesucristu ne, hacuaha meje rë xi cuisecoo me xuta xi tivicuya rë me jan cojo yějë ni xcusun ndaja xi tjin rë me.

<sup>7</sup> Xicavindachuun suvun rë yojo nuju ta Nina ne, cumaji cumandacha me. Xcusun xi nitjen ne, ha vëhë ni sacú naja. <sup>8</sup> Xuta xi fi tjengui me ndiya rë cjuatacun tsehen xi fehya yojo rë me ne, cuechú nixtin xi sacú chjí rë me xi yojo rë me jan ne, cjuehndu. Peru xuta xi fi tjengui me ndiya rë Hasen rë Nina ne, cuechú nixtin xi sacú chjí rë me xi Hasen rë Nina ne, sua rë me cjuahñu xatsë. <sup>9</sup> Sacuaha ngayaan ne, mijí rë xi nihñachuvan ngajñi rë yějë ni cjuandaja xi tinihña ta, tsëhë xi hya xi cuechú jain nixtin rë ne, sacú chjí naja, sa xi scaa naja. <sup>10</sup> Vëhë xi nguyějë rë xi tjin sa nixtin ne, ha tuxa meje rë xi nihña cjuandaja cojo yějë ni me xi sacuaha xingueen tsëhë xi hacuaha mangucacun me cojo Jesucristu. Hacuaha meje rë xi nihña cjuandaja cojo ngayějë ni xuta.

*Sua Pablo conseju, hacuaha sua me Nina rë me cojo xuta Galacia*

<sup>11</sup> Ngayujun ni ne, ¡nutsujun letra yehe vihi xi titsihindu nuju cojo hntsa suva! <sup>12</sup> Xuta xi meje rë me xi ndaja cuichja xuta tsëhë me ne, me vëhë xi meje sahmi nuju me ngujoyë xi xtí chuxin nuju. Cuatjin sahmi me, cojo sa xi tsajin cuatju me cjuañihi ngatsë rë xi chja me tsëhë cru rë Cristu. <sup>13</sup> Hisca me xi ti chuxin rë ne, vihndiin me tsëhë ley rë Moisés. Peru meje rë me xi xtí chuxin nuju, cojo sa xi cuaxëndaja me yojo rë me xi cuatjin camá cojo nuju. <sup>14</sup> Peru sacuaha ngahan ne, ngatsë ni rë cru rë Nai naja Jesucristu xi cuaxëndaja yojo naha. Cuatjin sahme, tsëhë xi ngatsë rë cru rë Cristu jan ne, sacuaha xi cahme ngasunhndë xi cuma ná ngahan, hacuaha ngahan ne, sacuaha xi cavéya xi cuma rë ngasunhndë. <sup>15</sup> Tsajin mé vengui chjí rë xi cati o xi catiin rë chuxin naja ta xi vengui chji rë ne, xi cuma ngayaan xuta xatsë. <sup>16</sup> Ngayujun ni xi tsangunndujun cojo cjuatacun xi sehe cachjá cojo nuju jan ne, Nina catisua nuju me cjuajeya cojo cjuayumatacun. Hacuaha cojo yëjë sa me xi má xuta ladu rë Nina ne, cuatjin catisua Nina me.

<sup>17</sup> Nchujun ni nguini ne, mijí ná xi yo sua sa ná cjuandya ta, tsëhë xi yëjë yanda xi yaha yojo naha ne, vëhë tsingacun xi sahme xa rë Jesús sacuaha mosu hndixahan rë me.

<sup>18</sup> Nai naja Jesucristu ne, catisua nuju me cjuandaja ngayujun ni. Cuatjin jain.

## Carta xi catsingatju San Pablo tséhë xuta nandya Efeso

### *Pablo tsihindu me xuta rë yungun*

<sup>1</sup> Ngahan Pablo ne, apóstol tséhë Jesucristu ngahan ta, tséhë xi cuatjin camameje rë Nina. Tsingátju nuju carta vihi ngayun xuta nandya Efeso, ngayujun ni xuta ladu rë Nina xi jercu ndaja titsangunndujun cojo ndiya rë me. <sup>2</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya rë me xi cuma nuju.

### *Ximinchacun xi cachjahantsan tséhë Cristu*

<sup>3</sup> ¡Nina ne, me vëhé xi Nina rë hacuaha nahmi rë Jesucristu me xi matitjun tsajan, jemu jyë hnga camahani me cojo hasen rë me! Me vëhé ne, ngatsë rë xi tséhë Cristu ngayaan ne, catsinchacun naja me cojo yëjë ni xcusun cjuandaja xi siu tsja me. <sup>4</sup> Nihña jyë hnga Nina cojo hasen rë me ta hisca hya xi chajasa casahasen ngasunhndë ne, hya cavaxijin naja Nina ngatsë rë xi tséhë Cristu ngayaan, hane ngatsë rë xi casahmi tséhë me ngayaan ne, camatyjahi cjuatacun naja hacuaha tsajin xi cún naja. Hacuaha Nina cojo cjuahmutacun xi tjin rë me cojo naja ne, <sup>5</sup> vëhé xi ha tjin chjine rë me cjuatacun xi ngatsë rë mé xi casahmi Jesucristu ne, ngayaan ne, quihndi ndaja jain rë me má ngayaan. Cuatjin tjin cacun me xi cumá, cuatjin cavejñacacun me. <sup>6</sup> Cuatjin nihña jyë hnga me cojo hasen rë me tséhë cjuandaja rë me. Jemu cavincha naja me cjuandaja ngatsë rë xi ngayaan ne, tséhë Cristu yaan; hane Nina ne, hmucacun me Cristu. <sup>7</sup> Cojo jni rë Cristu xi cavanga hya xi cahme me, vëhé machji rë xi camandaya yaan tséhë castigu xi satë naja, cavaxëtje rë cjuatsehen xi canihña, tucu cjuahmucacun rë me xi jercu jyë camahani. <sup>8</sup> Tjercu tu ndaja casahmi me cjuandaja cojo naja xi cavuxaha ndaja me cjuatacun naja xi vijnercun cjua rë me ta, <sup>9</sup> casua camachaya naja tséhë cjuatahahma xi tjin cacun me xi cumá, tséhë cjuatacun xi cavejñangucacun suva me xi cumachihin. <sup>10</sup> Cjuatahahma vë ne, cumachihin hya xi cuetjucaa xi cuechu nixtin rë. Hya ne, Nina sahmitangun me ngu nguyëjë ni ngahma Cristu, me xi matitjun rë. Sahmitangun me yëjë xi siu ngahnga hacuaha yëjë xi siu nangui, hane sacuaha ngu ni cjuatacun cuma.

<sup>11</sup> Hacuaha ngatsë rë xi tséhë Cristu ngayaan ne, Nina cavaxijin niji xi satë niji hitsë tséhë mé xi satë rë Cristu ta, Nina sahmicihin me yëjë ni mé xi sua má rë me sacuahatjin

ha cavejñacacun me xi cumá. <sup>12</sup> Cuatjin casahmi me cojo sa xi ngayin xuta tjë rë Israel xi tjun tjun cavinechinyin rë xi nduva Cristu ne, nihñi jyë hnga Nina cojo hasen rë me ngajñi rë yějë ni mé xi nihñi. <sup>13</sup> Hacuaha ngayun ni, hya xi canuhyun rë cjuaquixi cjuandajyihi xi chja hacutjin cuma cuetjuntjun tséhë jyë nuju ne, camatangun cjuatacun nuju cojo Cristu. Hane sacuaaha xi setaha sellu ngu xujun rë nangui xi tsejen xi quixi xi tséhë me, cuatjin caveya Nina Hasen rë me sacuaaha cavejña me cjuaxi sua nuju me, cojo sa xi tsejen xi tséhë me yun. <sup>14</sup> Hane tséhë xi hincha naja Hasen rë Nina ne, vëhë tsinguixi rë xi chjahanntsani yějë xi cavejñacacun Nina xi cumá tsajan, tsinguixi rë xi sahmi ndaya me yaan tséhë jyë naja, hane ngatsë rë vëhë ne, me vëhë cuma jyë hnga sa me cojo hasen rë me.

*Pablo ne, fehya me Nina xi scuxaha me cjuatacun rë xuta xi ndaja macjain rë me Jesucristu*

<sup>15</sup> Hindë ta cuatjin catsinchacun Nina yaan ne, vëhë xi ngahan, hisca xi camachaya ná xi naxunndujun Jesucristu hane xi tjin nuju cjuahmutacun cojo yějë ni xuta xi tséhë Nina me, <sup>16</sup> suá cuaha nacuechji rë Nina ngatsë nuju. Hane yějë ni hora xi tisahme oración naha, veyanangë nuju, chjayuma ngatsë nuju. <sup>17</sup> Féhya rë Nina rë Nai naja Jesucristu, Nina Nahmi naja xi jemu hnga me cojo hasen rë me. Féhya rë me xi sua me yun cjuatacun rë Hasen rë me cojo sa xi cuijnercun mé xi tséhë me hane xi hitsë sa ndaja chun yo me. <sup>18</sup> Féhya rë Nina xi scuxaha me cjuatacun nuju cojo sa xi cumachaya nuju tséhë xcusun vëhë xi vetahan tacun ngatsë rë xi cavaxijin naja Nina. Xi machaya nuju xi jercu vatjutaha ndajyihi cjuatjo rë me xi cuatëcja me ngajñi xuta ladu rë me. <sup>19</sup> Hacuaha xi machaya nuju ta ngahñu rë me ne, tsajin chuva rë ne, hane tacunntsaan. Hacuaha ngahñu jan catsingacun me ta jemu hñu cjuaxi. <sup>20</sup> Catsingacun me chuva rë ngahñu jan hya xi catsicuya me cjuahñu rë Cristu tséhë cjuaveya hane hacuaaha hya xi casahmi jyë hnga me Cristu xi cavejña me cahndë ladu quixi rë me ngajan ngahnga. <sup>21</sup> Jercu hñu camahani cjuaxi rë Jesucristu xi cumá rë yějë ni hasen, yějë ni ángel, yějë ni rey hasen xi hacuaaha vitexa ngajan sa xi nixtin quihndë o sa xi nixtin xi nduva ngascan. Hacuaha hitsë sa jyë hnga ñihi rë xa xi tacuntsja me. <sup>22</sup> Hacuaha yějë xcusun xi siu, Nina ne, caviyuju me ngahma gobiernu rë Cristu. Hacuaha ha Cristu nga ni, casua me xi cumá titjun me tséhë yějë ni xuta rë yungun hane vitexa me xuta ladu rë Nina sacuatjin rë rcuun xi vitexa rë yojo naja. <sup>23</sup> Hane sacuaaha vitsojo cjuatacun rë rcuun ngajñi yějë yojo naja ne, cuatjin vitsojo Cristu ngajñi

rë jingujyë ni xuta yungun, hane cojo Cristu ne, majingu jingujyë ni xusun.

## 2

*Ngatsë rë xi hmucacun naja Nina ne, cavaxëtje naja me*

<sup>1</sup> Hacuaha ngayun ne, catsingasca Nina cjuatacun nuju ta, titjun ne, camá ngayun sacuaha xi caveyun xi cumá rë Nina ngatsë rë xi canuhyuun tsëhë Nina hane canihña cjuatsehen. <sup>2</sup> Cavanguntengun cjuatsehen sacuaha xusun rë xuta tsehen rë ngasunhdë. Canuhyun tsëhë rey xi hacui hasen tsehen xi vitexa rë yahnga hasen tsehen ngajan ngahnga, rey jan xi vitexa rë xuta xi vihndiin me tsëhë Nina. <sup>3</sup> Hacuaha ngayëjë ni ngayaan ni, cuatjin xusun naja hatsëë. Canihña yëjë cjuatsehen xi cafehya rë yojo jyë naja, xi masua rë xahasen naja. Tsëhë xi hatuxa xuta tsehen yaan, ngatsë rë vëhë ne, tacunya castigu xi cuma naja sacuaha yëjë sa yahnga xuta. <sup>4</sup> Peru Nina ne, tjercu tu tjin rë me cjuayumatacun ngatsë rë xi jemu tu jyihi camahani cjuahmutacun xi tjin rë me cojo naja. <sup>5</sup> Hane handasa xi camá sacuaha xi caveyan ngayaan xi cuma rë Nina ta canuhyaan tsëhë me, peru hindë ne, sacuaha xi casacu naja cjuahña xatsë tangun cojo Cristu. (Cjuanijyutacun rë Nina ne, vëhë casahmi xi cavaxëtje nuju me tsëhë cjuatsehen xi canihña.) <sup>6</sup> Hacuaha sacuaha catsicuya nga naja Nina cjuahña tangun cojo Cristu hane casahmi jyë hnga me yaan xi cavejña me yaan cojo Cristu ngajan ngahnga ngatsë rë xi tsëhë Jesucristu yaan. <sup>7</sup> Cuatjin casahmi me cojo sa xi hisca nixtin xi sehe nduva ne, cumatsejen xi jercu vatjutaha cjuanijyëtacun xi tjin rë me cojo naja, cjuanijyëtacun vë xi matsejen ngajni rë cjuahmutacun xi tsingacun me yaan ngatsë rë Jesucristu. <sup>8</sup> Cuatjin jan ne, cjuanijyëtacun rë Nina ne, vëhë casahmi xi cavaxëtje nuju me tsëhë jyë nuju hya xi camacjain nuju ta, hacuiin suvun cavinchunsun chuva rë xi cavetjuntjun ta tsëhë xi Nina ne, tu cuatjo ni casua nuju me cahndë. <sup>9</sup> Hacuuiin tsëhë xi canihña suvun xi jemu ndaja xi cavéchuntuhun xusun vë ne, ngatsë rë vëhë ne, hisca ngu xuta cumaji sahmi jyë me yojo rë me. <sup>10</sup> Ta sacuajyihni ngayaan ne, Nina casahmi naja me. Hane ngatsë rë xi tsëhë Jesucristu yaan, vëhë xi catsindaja me ngayaan cojo sa xi ndaja nihña, sacuatjin xi ha cojo tjun sa cavejñacacun me xi má xusun naja.

*Ngatsë rë jni rë Cristu ne, ma vetjutje xutaxín*

<sup>11</sup> Ngajan xi ninguitsjun ta, ngayun ne, xutaxín yun ta hacuiin tsëhë xuta tjë rë Israel catsin ngayun. Hacuaha xuta tjë rë Israel jan ta casahmi suva me sacuaha vitexa ley rë Moisés, me vëhë chja me tsujun ta, xuta xi catiin rë chuxin

rë; hane chja me suva me ta, xuta xi cati rë chuxin rë. <sup>12</sup> Hacuaha hya ne, hisca tsajin quitahatacun xi sacuse nuju Cristu. Casatiin nuju cahndë cojo xuta tjë rë Israel hacuaha casatiin nuju compromisu xi vetaha cacun me. Jemu va cavinechun cojo ngasunhdë nuju ta hacuiin vinga nuju Nina xi cjuaquixi. <sup>13</sup> Peru quihndë xi camá tsëhë Cristu yun, handasa xi hya jemu xin nechun xi cuma rë Nina, peru hindë casacu cahndë camatiña yun ngatsë rë jni rë Cristu xi cavanga hya xi cahme me. <sup>14</sup> Ta Cristu ne, me vëhë casahmi me xi cavisehen naja ngayëjë ni cjuandaja cjuajeya. Hane xi cuatjin casahmi me ne, sa xuta tjë rë Israel yaan o sa xutaxín yaan, sacuaha ngu ni xuta má ngayaan. Ta hya xi cahme me, cakahaxin me cjuachan xi vetsuntaha naja. <sup>15</sup> Catsicjë me ngahñu rë ley rë Moisés cojo yëjë ni cjua xi vitexa jan. Hane cuatjin ne, tsëhë catsijo tjë rë xuta jan ne, tsajin sa cjuachan ta casahmitangun Cristu me xi sacuaha ngu ni xuta má me xi tsëhë me suva me. Cuatjin cavisehen me cjuandaja tsëhë xcusun xi cavetsutaha rë me titjun. <sup>16</sup> Hacuaha cuatjin casahmitangun me catsijo tjë jan xi cumá ngu ni hane tangun catsindajacacun me me jan cojo Nina ngatsë rë xi cahme me xcun cru. Hane cuatjin cavatëcja me cjuachan xi tjin ngajñi rë me jan.

<sup>17</sup> Cuatjin camá xi canduva Jesucristu cachja me cjuandajyihî tsëhë cjuajeya cojo nuju ngayun xutaxín xi xín nechun xi cuma rë Nina, hacuaha cojo xuta nangui Israel xi tiña siu me xi cuma rë Nina. <sup>18</sup> Vëhë xi ngatsë rë mé xi casahmi Cristu hane cojo ngu ni Hasen rë Nina ne, xingu xingu ngayaan ne tjin naja cahndë cojo Nina Nahmi naja. <sup>19</sup> Vëhë xi ngayun ne, hindë hacuiin xutaxín yun hacuiin xín tujyuhunyun ni xi cumá rë xuta rë Nina ta hindë ne, sacuaha camá ngu nangui nuju ngayujun ni hacuaha cojo rë me ne xuta rë Nina má ngayun. <sup>20</sup> Cojo rë me ne, ngayun ne tangun ngayun sacuaha xihndë rë ngu yungun xi sehe tjunihnga rë. Xihndënaña rë ne, vëhë casahmi apóstol cojo profeta hya xi cachja me cjua rë Nina. Hane Jesucristu ne, me vëhë má me ndyojo xi matitjun xi vejña yuju rë, <sup>21</sup> ta sacuaha ndyojo jan vaniji hai rë ndihya xi ndaja hñu cuejña xihndë rë xi cuijin, hacuaha ngatsë rë Jesucristu sacuaha ndaja setahacoo ngu xihndë ne, cuatjin vetahacoo Jesucristu xuta rë yungun hya xi scunihnga me xi cuma me sacuaha ngu yungun quicun xi camanchacun tsëhë me. <sup>22</sup> Hacuaha cuanitjin ngayun ne, cavinchajñi me yun sehe cojo yun cumá ngayun sacuaha yungun quicun jan rë Nina hiscan cuejña me.



*Cjua tsëhë xa xi sahmi Pablo ngajñi rë xutaxín*

<sup>1</sup> Cuatjin camá xi ngahan Pablo ne, tejñaya ndavaya ngatsë rë xa rë Jesucristu, xa jan xi sahme ngajñi nuju xutaxín. <sup>2</sup> Cuejña ni xi há machaya nuju tsëhë cjuaniyëtacun xi Nina cavincha ná me xi satë ná sahme xa ngatsë nuju ta, <sup>3</sup> Nina casua me camachaya ná tsëhë cjuatacun hma jan sacuaaha xi ha catsíhindu nuju hitsë tsëhë. <sup>4</sup> Hane xi chutahayun tsëhë ne, mangutacun xi ngahan ne vijnercu cjuatahahma jan xi sahmichihin Jesucristu. <sup>5</sup> Cjuatacun jan ne, hatsëë nixtin tsajin yo camachaya rë tsëhë. Peru hindë ne, cojo Hasen rë me catsingacun me tsëhë xi cumachaya rë apóstol cojo profeta xi cavaxijin me. <sup>6</sup> Cjuatacun hma jan ne, cuatjin fi: Camá xi cojo cjuandajyihi rë Nina ne, xutaxín ne, fahatsja tangun me cuatjo rë Nina cojo xuta tjë rë Israel, hacuaha cojo me ngu xuta má me. Hacuaha ngatsë rë xi tsëhë Jesucristu me ne, hacuaha satë rë me compromisu xi vetahacacun xuta tjë rë Israel.

<sup>7</sup> Sacuaaha cjuatahahma vëhë ne, casatë ná ngahan xi sahme xa xi cuichja tsëhë. Cuatjin casatë ná ngatsë rë cjuaniyëtacun xi casua Nina ngahan xi cojo ngahñu rë me cuma. <sup>8</sup> Ngahan ne, handasa tsajin chuva rë xi ngahan sahme xi cuma rë xi sahmi tu yo sa yahnga xuta tsëhë Nina, peru casua ná Nina cjuaniyëtacun xi satë ná xa xi cuichjá cojo xutaxín xi cumachaya rë me tsëhë cjuanchina ndajyihi rë Cristu xi tsajin cojo chuva rë. <sup>9</sup> Hacuaha cavetahaxa ná Nina xi scuxáha cjuatacun rë xuta cojo sa xi cumachaya rë me cjuatacun hma jan. Nina, xi casahmi me yëjë ni ne, hisca ntsacu cavetsihin cavejñacacun hma me xi cuatjin cumá. <sup>10</sup> Cuatjin camá cojo sa xi nixtin quihndë ne, ngajñi xuta yungun rë Nina ne, tsingacun rë cjuahasen rë Nina, cojo sa xi yëjë ni hasen, yëjë ni ángel xi hacuaha vitexa ngajan ngahnga, machaya rë xi jemu cjin xcusun rë cjuahasen jan ta, <sup>11</sup> cjuatacun jan ne, hisca ntsacu cavetsihin cuatjin cavejñacacun me, hane casahmichihin me cojo Cristu Jesús, me xi matitjun tsajan. <sup>12</sup> Hacuaha ngatsë rë xi tsëhë Cristu yaan hane ngatsë rë xi mangutacun cojo me ne, rcuun nihña tiña tsëhë Nina cuinújan cojo me ta, tjín ngutacun xi sacu naja cahndë. <sup>13</sup> Vëhë xi cojo cjuatacun vëhë ne, cuichjá cojo nuju ta hacuiin nihñuchuvuntacun ngatsë naha ngahan xi choho tivatju tijima tsëhë xa xi sahme ngatsë nuju, ta ngajñi rë xi cuatjin tivatju ngahan ne, hitsë sa tivaxëndaja nuju.

*Cjuahmutacun xi tjín rë Nina*

<sup>14</sup> Cuatjin camá xi ngatsë rë vëhë ne, vixcuhnchëtaha xcun Nina nahmi rë Jesucristu me xi matitjun tsajan. <sup>15</sup> Yëjë ni tjë rë xuta o sa ángel, sa ngahnga o sa ngasunhndë viyuju me ne, faha ñihi me tsëhë Nina sacuaaha tsëhë Nahmi rë me.

<sup>16</sup> Nina Nahmi naja ne, tjemu tjin rē me ngahñu xi casahmi hnga hasen me ngajan ngahnga. Chjáhya rē me xi tucu chuva rē yějē cjuandaja rē me jan ne, sua nuju me xi cuiyujuhñu xahasen nuju cojo ngahñu rē Hasen rē me. <sup>17</sup> Hane ngatsē rē xi cuatjin macjain nuju Cristu ne, hacuaha cuejña cahndē me cahntsua xahasen nuju. Hane cjuahmutacun xi hinchu nuju ne, cuma sacuaha ngu tyjama xi sua nuju ngahñu hane tsuvangui nuju, <sup>18</sup> cojo sa xi hacuaha cuijnercunndujun ngayun cojo yějē yahnga xuta xi macjain rē me, ta tsajin hisca cjuē ta jemu tu jyē hnga cjuahmutacun xi tjin rē Cristu cojo naja. <sup>19</sup> Hacuaha cjuehyá xi sacuse nuju cjuahmutacun xi tjin rē Cristu cojo nuju, ngu cjuahmutacun xi jercu vatjutaha rē hisca tsajin chuva rē xi hatuxa hyan, cojo sa xi ma tsē rē cjuatacun nuju suva cojo yějē ni xi tsēhē Nina.

<sup>20</sup> Quihndē ne, catama jyē catama hnga Nina. Me vėhē cojo ngahñu rē me xi sahmixa ngajñi naja ne, hitsē sa cjin cuma sahmi me tsēhē xi cuma chjahyan o sa xi matacun xi ma sahmi me. <sup>21</sup> Catama jyē catama hnga me ngajñi xuta yungun rē me hacuaha ngajñi Jesucristu; catama jyē catama hnga me yějē ni nu yějē ni nixtin. Cuatjin jain.

## 4

### *Tjin tangun yaan ngatsē rē Hasen rē Nina*

<sup>1</sup> Ngatsē rē vėhē ne, ngahan xi tejñaya ndavaya ngatsē rē xa xi sahme tsēhē Nina, ngahan fehya nuju xi tangun nduju cojo ngasunhdē nuju sacuaha meje rē xi sahmi me xi cavaxijin Nina, sacuahatjin ngayun xi catuxijin nuju. <sup>2</sup> Tjin nuju cjuajeya hacuaha ninguijnu yojo nuju cojo xingun. Hacuaha jyētacun xingu xingu yun cojo xingun ngatsē rē cjuahmutacun xi tjin nuju. <sup>3</sup> Nihñu ngu jyē xi yějē nixtin tjin tangun yun, cojo ngahñu rē cjuajeya xi sua Hasen rē Nina xi sahmi tangun nuju ngayun ngayujun ni. <sup>4</sup> Ngayaan ne, ngu ni yojo má yaan, hacuaha ngu ni má Hasen rē Nina. Hacuaha cuanitjin ne, ngu ni cjuaxi cuetaha tacun xi sacu naja cjuahñu xatsē, ngayaan xi cajindaya naja me. <sup>5</sup> Hacuaha ngu ni Jesucristu xi Nai naja, ngu ni cjuachacun xi macjain naja, hacuaha ngu cjuatacun ni xi xtenda yaan. <sup>6</sup> Ngu ni Nina Nahmi naja ngayejen ni. Hane Nina ne, matitjun me tsēhē ngayějē ngarca ni ne, tsinguitsojo me jingujyē ni ngajñi yojo naja, hacuaha tacun me ngajñi naja.

<sup>7</sup> Peru jimangu yaan ne, ha casua naja me cjuatjo cjuatacun xi satē naja xa xi nihña jimangu yaan, sacuaha chuva rē xi casua Cristu. <sup>8</sup> Vėhē xi xujun rē Nina chja cuitjin: Hya xi camiji me ngahnga, hacuaha quiji cojo me xuta presu xi cafaha me.

Hane casua me cjuatjo xi cafahtsja xuta rë me.

<sup>9</sup> ¿Hane mé vijne cjua xi camiji me? Cjua vëhë ne, vijne xi titjun ne cajne me hiscan xi hitsë sa nangui tsëhë nga-sunhndë. <sup>10</sup> Hane xi cajne jan ne, hacui ni me xi hacuaha camiji hiscan xi hitsë sa hnga tsëhë ngahnga, cojo sa xi jingujyë ni cuejña cahndë me. <sup>11</sup> Ha me vëhë ni casua me cjuatjo cjuatacun xingu xingu. Casua me xi yahnga me ne, cumá me apóstol, yahnga me ne xi sua me xi cumachaya rë xuta cjua xi cafahtsja me tsëhë Nina, hane yahnga nga me ne, cuichja me cojo xuta tsëhë cjua xi cuaxëtje naja, hane yahnga nga me ne, pastor xi vicuya. <sup>12</sup> Cuatjin cavëhëchjine me xuta rë me jan cojo sa xi xa xi sahmi me jan ne, cuisecoo rë xuta yungun xi sacu hñu rë me. <sup>13</sup> Hisca xi ngayejen ni ne, cuma tangun yaan cojo ngu ni cjuachacun xi macjain naja hacuaha cojo yëjë cjua xi machaya naja tsëhë me xi Quihndi rë Nina. Hane xi cuatjin cuma tangun yaan, cumacha yaan hane cuiyuju cahndë cjuatacun naja sacuaha tjín chihin yëjë cjuatacun rë Cristu. <sup>14</sup> Hane sehe hacuiin tangun yaan cojo langa xi tsindeya cjuatacun rë hane fi tjengui ndiya rë tu mé ni cjuachacun xatsë sehe vixuya ngajñi cjuandacha rë xuta xi vincha haxi me. <sup>15</sup> Hitsë sa ndaja xi cuinújan cjuaquixi ngatsë rë cjuahmutacun xi tjín naja cojo rë me cojo sa xi cumacha yaan cojo sa xi yëjë ni xcusun naja cuma yaan sacuaha Cristu, me xi matitjun tsajan. <sup>16</sup> Hane ngatsë rë ngahñu rë me vëhë ne, yëjë xuta xi macjain rë me Nina ne, ndaja yahangui xicjin me, sacuaha naxahñu naja ne, tsuvangui rë yojo naja, ngatsë rë xi hincha xicjin. Hacuaha ngatsë rë xi jima ngu xuta jan ndaja sahmi me xa ne, ngu tangun ni cuma yehe me, hacuaha sacu hñu rë me ngajñi rë cjuahmutacun jan.

*Xcusun xatsë xi casacu naja ngatsë rë xi macjain naja Cristu*

<sup>17</sup> Ha cuanitjin ne, sacuaha tichjá cojo nuju cojo cjua rë Nai naja Jesucristu xi quihndë hacuiin cuinechun sa sacuaha siu xuta xi hvíin me yo xi Nina, ta me vëhë ne, siu me cojo cjuatacun jñu rë me xi tsajin me vetjuncaa. <sup>18</sup> Vijniircu me ta tsëhë xi tsajin rë me cjuahñu xi sua Nina ta, tsëhë xi taja rcu me ngatsë rë xi taja xahasen rë me. <sup>19</sup> Hacuaha cachaja cjuatacun rë me, hane casuatë me yojo rë me, vëhë xi jercu macacun me xi sahmi me yëjë xcusun cjuatsehen xi tjín ngasunhndë. <sup>20</sup> Peru ngayun ne, hacuiin cuatjin camá nuju tsëhë Cristu <sup>21</sup> ta ngayun ne, hatuxa cachutayun jain tsëhë me, hacuaha camá nuju tsëhë me, cojo cjuaquixi xi tjín rë Cristu. <sup>22</sup> Sacuaha cjuatacun changá xi canduvuncujun ne, tejñuxun ta tsëhë xi vëhë xi tsitsehen cojo cjuandacha xi jercu matacun cojo. <sup>23</sup> Meje rë cuma xatsë yun cojo cjuatacun nuju hacuaha cojo hasen nuju. <sup>24</sup> Hane nihñu tsujun cjuatacun xatsë xi ha

tjin ndaja xi fayangui xcusun xi tsëhë Nina ta xcusun vëhë ne, tsingacun ngu cjuahñu xi hatuxa cjuaquixi hacuaha tyjahi.

<sup>25</sup> Quihndë ta cuatjin ne, canújuun cjuandacha cojo cjuandesu ta, jima ngu yun ne, tinújun cjuaquixi cojo xingun tsëhë xi ngayëjë ni ngayaan ne, camatangun yaan ta ngu ni yojo má ngayaan.

<sup>26</sup> Handasa cjan nuju ne, cavinchun ngu jyë, hane cjuacjan jan ne, hacuiin xi cjuecani rë cuaha nixtin, <sup>27</sup> hane hisca xi hitsë ne, caningatjuun rë xitsehen xi sahmi xi nihñu ngu jyë.

<sup>28</sup> Xuta xi catsichëjë me ne, catejñaxin me xcusun vëhë, hane catisahmi me xa nguñajacacun me cojo sa xi cuechutaha me yëjë xcusun xi machaja rë me. Hane hacuaha cuma cuisecoo me xuta xi machaja rë.

<sup>29</sup> Canújuun cjuatsehen. Nújun ngu cjuaxi ndajyihî xi cuincha ndiya rë xuta xi cuiseñuju me cojo sa xi tsëhë me ndaja. <sup>30</sup> Xi canihñuu xi cuma va rë Hasen rë Nina ta, cojo Hasen rë me jan ne, ngayun ne, casetaha nuju chuva xi tsingacun xi sacu nuju cjuahñu xatsë nixtin xi cuaxëtje nuju me tsëhë jyë nuju.

<sup>31</sup> Hacuaha tiyujunxun yëjë ni cjuachan, yëjë ni cjuasuë, yëjë ni cjuahnga, yëjë ni cjuachjataha cojo yëjë sa xcusun cjuatsehen <sup>32</sup> ta cahndë rë vëhë ne, nihñu cjuandaja cjuajeya xingu xingu yun cojo xingun. Tjin nuju cjuayumatacun cojo xingun. Hacuaha ninchatuhun xingun sacuaha catsinchataha Nina yun ngatsë rë Cristu.

## 5

### *Hacutjin meje rë xi cuiyuju xuta ladu rë Nina*

<sup>1</sup> Ngatsë rë xi jemu hmucacun nuju Nina ta, tsëhë xi quihndi rë me yun, vëhë xi chjayunngun tsëhë me. <sup>2</sup> Hane nechun cojo cjuahmutacun xi catsihmucacun naja Cristu hane hisca casua me yojo rë me ngatsë naja sacuaha ngu tsánga ndajyihî xi cueya chu hane cuma tsëhë Nina sacuaha ngu cuatjo xi chuya rë me.

<sup>3</sup> Quihndë ta ngayun ne, tsëhë Nina yun ne, hisca xi caveyunnanguun cjuatsehen xi matacun cojo yojo jyë nuju ngajñi nuju. Caveyunnanguun hisca ngu sa cjuatacun chocun cojo cjuachan ta, ngayun ne, tsajin chuva rë xi nihñu xcusun vëhë. <sup>4</sup> Cavisiajmuun xcusun xi cjuasava, cojo cjuangarca cojo cjuaxcuehyu hya xi hacuiin mameje rë ta cahndë rë vëhë ne, tuhun nacuechji rë Nina. <sup>5</sup> Ha hyun ta xuta xi sahmi me cjuatsehen xi sahmi ngu xuta cojo ngu xi hacuiin tsëhë me, o sa ngajñi ni xihin me o ngajñi ni chjuun me o tu mé sa xcusun cjuatsehen jan o sa xi choho me, tangun cún me sacuaha me xi faharcu me nina ndyojo hane sacuiin rë me

cahndé hiscan sahmi gobiernu Cristu cojo Nina. <sup>6</sup> Cuidadu cojo sa xi tsajin yo xi cuindacha nuju cojo cjuangarca ta, hatuxa ngatsé rē cjuachocun xi cuicun vihi ne, vinduva castigu jyé xi sua Nina xi cuma rē xuta xi vihndiin tséhē me. <sup>7</sup> Véhē xi ngayun ne, caninguisuunjñuu cojo rē me.

<sup>8</sup> Ta handasa xi hatsēē ne, ngayun cavinechun ngajñi jñu vë, peru quihndé xi tjin tangun yaan cojo Nai naja ne, camá hasen tsujun, hane nihñu sacuaha sahmi xuta xi cama hasen cjuatacun rē me. <sup>9</sup> Ta tséhē hasen jan ne, vetjucun xi jemu ndaja xuta jan hacuaha tyjahi cjuatacun rē me, hacuaha quixi me cojo xcusun rē me. <sup>10</sup> Nihñu xatitacun xi cuma nuju mé xi chuya rē Nina. <sup>11</sup> Caninguisuunjñuu cojo xcusun xi venguichjiin rēhē xcun Nina xi sahmi xuta xi jñu cjuatacun rē me. Hitsé sa ndaja ne, ningacun tsejen cjuatsehen véhē ta, <sup>12</sup> tséhē xi cjuatsehen véhē xi sahmihma me ne, hisca mijí rē xi cueyananguen ta sava tsejen. <sup>13</sup> Ta hya xi vetjucaa tsejen xcusun xi sahmihma me jan ne, matsejen ndaja xi hatuxa cjuatsehen. <sup>14</sup> Cuatjin ta hya xi vetjucaatsejen ne, ma quixi yějē xcusun, sa xi cjuatsehen o sa xi cjuandaja. Véhē xi chja cjuatsejen:

Ningascun rē cjuatacun nuju, ngayun xi catuhun rē cahndé  
xi cjuahajenda

hane nduvunxun tséhē xuta xi cachaja cjuatacun rē me,  
hane sehe Cristu ne, sua hasen nuju me.

<sup>15</sup> Véhē xi ngatsé rē yějē ni cjuatsejen véhē ne, chjuhun chuvun hacutjin cuangun cojo ngasunhndé nuju, hacuiin nechun sacuaha xuta xi jñu cjuatacun rē me, ta nechun sacuaha siu xuta xi jemu chutaha cjuatacun rē me. <sup>16</sup> Chjavunvuhun hora nuju ne, tetjún cjuandaja ta nixtin vihi ne, jemu tjin cjuatsehen. <sup>17</sup> Véhē xi hacuiin ngarca yun ta, nihñu xati tacun xi cuma nuju mé xi chuya rē Nina. <sup>18</sup> Hacuiin nihñu cjuachihi ta, véhē ne, tsinguetsun rē cjuatacun nuju ne, hane cahndé rē xi ningatjuntuhun xi siuhun nandá xi cuitexa rē cjuatacun nuju jan ne, tuhun cahndé xi Hasen rē Nina ne, cuitexa rē cjuatacun nuju. <sup>19</sup> Véhē xi ngajñi cjuavisiajmi nuju ne, teyunnangun cjuatsejen rē salmo, cojo himno cojo yějē sa xcusun xi sen xi tséhē Nina, quitaha tisun ne, cojo véhē ne, hacuaha nihñu jyé nihñu hnga Nina cojo nguñajatacun. <sup>20</sup> Hacuaha tuhun nacuechji rē Nina Nahmi naja yasen ni tséhē yějē ni xcusun xi vatjun má, hane nihñu cojo ñihi rē Nai naja Jesucristu.

*Hacutjin cuinechan cahntsua ndya naja*

<sup>21</sup> Ninguijnu yojo nuju cojo sa xi cuma chjuhunrcun xingu xingu ngayun, cuatjin nihñu ngatsé rē xi chjuhun rcun Nina.

<sup>22</sup> Ngayun yachjin ne, ninguijnu yojo nuju tinuhyun tsëhë xihin nuju ta, cuatjin vitexa Nai naja. <sup>23</sup> Ta xihin nuju ne, vitexa nuju me sacuaha rcun, cuanitjin sacuaha Cristu vitexa rë yëjë xuta xi macjain rë me sacuaha rcu me. Hane Cristu cavaxëtje me xuta yungun jan sacuaha xi hacui yojo rë suva me. <sup>24</sup> Cuanitjin ne, sacuaha xuta yungun ne, vihndë me tsëhë Cristu ne, cuanitjin ni ngayun yachjin ne, yëjë xi nihñu xcun cjuahñu nuju ne, tinuhyun tsëhë xihin nuju.

<sup>25</sup> Hacuaha ngayun xihin ne, nihmutacun chjuun nuju, sacuatjin Cristu ne, catsihmucacun me xuta rë yungun hane casua me yojo rë me ngatsë rë xuta jan. <sup>26</sup> Cuatjin casahmi me cojo sa xi sahmi tyjahi me cjuatacun rë xuta yungun jan cojo sa xi cuma xatsë me, hane catsityjahi me cojo cjua rë me sacuaha má xi matyjahi cojo nandá. <sup>27</sup> Cojo sa xi cuma tsingacun suva me xi xuta yungun jan ne, cun tyjahi tyjahi me, ta hisca hitsë tsajin mé camá chojyihí cjuatacun rë me. <sup>28</sup> Vëhë xi ngayun xihin ne, meje rë xi nihmutacun chjuun nuju sacuaha yojo nuju suvun ta, yo xi tsihmucacun chjuun rë ne, tsihmucacun suva yojo rë. <sup>29</sup> Tsajin yo xi tsitjunngui suva yojo rë ta, hatuxa vangui me xi xinë me sehe sacuhñu rë yojo rë me, hacuaha sahmi me cuidadu tsëhë. Hacuaha Cristu ne, cuanitjin ni sahmi me cojo xuta rë yungun ta, <sup>30</sup> tsëhë xi sacuaha yojo rë me má xuta jan. Cuatjin ngayaan ta camá yaan tsëhë yojo tsëhë ninda rë me casahmi me yaan sacuaha xcusun rë suva me. <sup>31</sup> Ngatsë rë vihi ne, xihin ne, cuiyuju cha nahmi ra cojo naa rë cha, sehe cumatangun cha cojo chjuun ra, hane catsijo ni jan ne, cumatangun sacuaha xi ngu ni yojo. <sup>32</sup> Vihi ngu cjuatacun xi jemu chja vinuhya rë peru hacuaha jemu ndajyihí ta, chjá cojo nuju ta cjua vëhë ne, tichja tsëhë Cristu cojo xuta yungun. <sup>33</sup> Peru handasa cuatjin vijne cjua vëhë ne, hacuaha sahmi ngujoyë xi jimangu yun ne, nihmutacun chjuun nuju, sacuaha yojo nuju suvun. Hane ngayun chjuun ne, mameje rë xi chjuhunrcun xihin nuju.

## 6

<sup>1</sup> Ngayun quihndi ne, xi vitexa tsujun sacuaha xuta xi macjain rë me Nina ne, tinuhyun tsëhë xutacha nuju ta, tsëhë xi cuatjin mameje rë ta, <sup>2</sup> cuitjin chja cjua tsëhë ley: “Chjuhunrcun chjuhunjeyun nahmi nuju cojo naa nuju.” Hane cjua rë ley jan, vihi xi tjun cachja Nina xi hacuaha ticojo rë ngu cjuandaja xi hacui vi: <sup>3</sup> “Cuatjin nihñu cojo sa xi ndatjin cuinechun hacuaha jyë nixtin cjuecani nuju nguehe xcun cjuahñu nuju.”

<sup>4</sup> Hacuaha ngayun nahmi ne, hacuiin xi tuhun xti rë quihndi nuju ta, xi hitsë sa ndaja ne, nichun hacuaha tinújuntuhun

rë cojo cjuandaja cojo cjuajeya hacuaha ningacun rë xi cumacjain rë Nina.

<sup>5</sup> Hacuaha ngayun xi nihñu xa handasa mosu xi cavatsë me yun ne, tinuhyun tsëhë patrón nuju nguehe xcun cjuahñu vihi, tjin ngutacun xi nihñu xa, hacuaha nihñu nguñajatacun, sacuaha xi tinihñu ngatsë rë Cristu. <sup>6</sup> Nihñu nguñajatacun, hacuiin suva hya xi tivutsejen nuju me cojo sa xi cuichja ndaja me tsujun ta, nihñu sacuaha meje rë xi sahmi mosu xi cachaha rë xi sahmi xa rë Cristu. <sup>7</sup> Nihñu nguñaja ni cjuasua, sacuaha xi tinihñu tsëhë Nina, hane hacuiin tsëhë ngu xuta. <sup>8</sup> Cuatjin nihñu ta, ha hyun ta yëjë xcusun ndaja xi nihñu ne, Nina ne, sua me chjí nuju.

<sup>9</sup> Hacuaha ngayun patrón ne, ha chuva vëhë ni nihñu cojo mosu xi siu ntsun hane hacuiin cojo cjuachan ta, ninguitsun ta sa ngayun sa me vëhë ne, Nina siu tsja nuju me. Hane Nina ne, texta ni vutsejen naja me ngayëjë ni.

*Xcusun ndaja xi sua Nina yaan xi cuisecoo naja xi nihña si cojo xitsehen*

<sup>10</sup> Sacuaha ngu sa cjua xi cuichjá cojo nuju ngayun xingueen, cojo ngahñu xi sua me xi tjercu hñu camahani ne, tiyujhñu cjuatacun nuju xi tjin tangun yun cojo Nai naja. <sup>11</sup> Chjuhun yëjë ni xcusun xi siu ntsun xi casua Nina yun cojo sa xi cuiyujunhñu cjuatacun nuju tsëhë cjuandacha xi sahmi xitsehen xi matitjun ta, <sup>12</sup> si xi nihña ne, hacuiin cojo ngu xuta ngasunhdë má ta, cojo jingu sa hasen tsehen xi matitjun hacuaha cojo yëjë xi vitexa rë ngasunhdë jñu vi cojo yëjë sa xi siu ngahnga. <sup>13</sup> Vëhë xi quihndë ne, chjuhun yëjë ni xcusun xi siu ntsun xi casua Nina yun cojo sa xi scaa nuju cuangun xcun hya xi nduva cjuacjintacun vë, hane handasa cuatjun vëhë ne, cuiyujunhñu cuaha cjuatacun nuju. <sup>14</sup> Cuiyujhñu cjuatacun nuju sacuaha ngu sindadu xi tjin chjine cha. Nechun cojo cjuaquixi rë Nina ta, vëhë cumachji rëhë nuju sacuaha ngu cinturón xi cuetuhun cahntsua nuju. Hacuaha quixi yun cojo cjuatacun nuju ta, vëhë sahmi chjí rëhë nuju sacuaha chingá quicha rë sindadu xi cuetjo rë ndanisin rë cha. <sup>15</sup> Hacuaha tjin chjine yun cojo cjua rë Nina xi chja tsëhë cjuajeya sacuaha tjin chjine cha sindadu xi vincha ntsacu cha zapatu. <sup>16</sup> Hacuaha cojo yëjë sa vihi ne, ndaja catamacjain nuju cojo sa xi cuma tsicangui rë yojo nuju hane tsicjë ngahñu rë cjuañihi xi sahmi si xitsehen cojo nuju, sacuaha sahmi ngu quichatë xi yahatsja sindadu xi tsicangui rë yojo rë cha. <sup>17</sup> Chjuhunntsun cjuaninchataha rë Nina xi vetahatacun xi cumachji rëhë sacuaha ngu cascu xi vaxëtje rë rcuun, hacuaha chjuhunntsun cjua rë Nina sacuaha ngu espada xi sua nuju Hasen rë Nina. <sup>18</sup> Hacuaha quitaha tinihñu

oración nuju yějě ni hora. Tinújun hacuaha chjahyun rě Nina ngatsě rě Hasen rě Nina. Cojo sa xi cuma nihñu vihi, quitaha nechun cuidadu, hacuaha tinihñu oración nuju ngatsě rě yějě xuta ladu rě Nina. <sup>19</sup> Hacuaha tinihñu oración ngatsě naha. Chjahyun xi Nina ne, sua sa ná me cjua hya xi cuichjá, hane cuma cuichjá nguñajacacun cojo sa xi suá cumachaya rě xuta tsěhě cjua ndajyihi rě Nina xi cuaxětje rě xuta ta, <sup>20</sup> ngatsě rě cjua vėhě ne, Nina catsingatju me ngahan, hacuaha ngatsě rě cjua vėhě ne, tejñaya ndavaya quihndě. Vėhě xi nihñu oración cojo sa xi cuma cuichjá cjua vihi cojo xuta cojo yějě ngahñu xi mameje rě.

*Nina rě Pablo xi titsinguijnetaha me cjua*

<sup>21</sup> Tíquico, xingueen, xi vinga ná hacuaha ndaja cjuinduju me cojo xa rě Nai naja ne, sua me vėhě xi cumachaya nuju tsěhě yějě ni xcusun xi tivatju tijima, cojo tsěhě yějě ni xcusun xi tisahme. <sup>22</sup> Vėhě xi tsingátju nuju me cojo sa xi cuichja me cojo nuju hacutjin nechin hane cojo vėhě ne, cuma suatacun.

<sup>23</sup> Hane Nina nahmi naja ne cojo Nai naja Jesucristu ne, catisua nuju me ngayun xingueen cjuandaja cjuajeya cojo cjuahmutacun ngajñi xi cumangutacun. <sup>24</sup> Hane Nina ne, catsinchacuntihin me yějě xuta xi hmucacun me Nai naja Jesucristu cojo ngu cjuahmutacun xi tsajin nixtin fěya. Cuatjin jain.



## Carta xi catsingatju San Pablo xi cafahatsja xuta nandya Filipos

*Cristu má me cjuahñu rë xuta xi macjain rë me*

<sup>1</sup> Ngahan Pablo cojo Timoteo ne, sacuaaha mosu hndixahan rë Jesucristu ngayin. Ningatjin nuju ngu nina niji, ngayujun ni xi tsëhë Nina ngayun, hacuaaha macjain nuju Jesucristu ndyá nandya Filipos. Hacuaha cojo me xi matitjun tsujun sacuaaha obispos hacuaaha cojo me xi visecoo rë me ne, ningatjin nina niji tsëhë me. <sup>2</sup> Nina Nahmi naja cojo Jesucristu, me xi matitjun tsajan ne, catisua nuju me cjuandaja cjuajeya rë me.

*Oración xi sahmi Pablo tsëhë xuta xi macjain rë me Nina*

<sup>3</sup> Hya xi tsingátahacacun ngatsë nuju ne, suá nacuechji rë Nina. <sup>4</sup> Hya xi féhya rë Nina ngatsë nuju ngayujun ni ne, hatuxa tjin ná cjuasua ta, <sup>5</sup> tsëhë xi ngayun ne, cuatjin visecun ná xi cumachaya rë xuta cjuanda ndajyihî tsëhë Jesucristu. Cuatjin visecun ná hisca hya xi cafëhë tjëngë nuju ne, hisca quihndë. <sup>6</sup> Cavetsihin casahmi ndajyihî Nina cjuatacun nuju. Vëhë xi ngahan ne, tjin ngucacun xi cuatjincjin ni sahmi me hisca nixtin xi cuya Jesucristu. <sup>7</sup> Hacuaha ndatjin xi cuatjin tsingátahacacun ngatsë nuju ngayujun ni ta, tsëhë xi jemu vinga ná ngayun. Vinga ná ngayun ta, tsëhë xi ngayujun ngarcun ni ne, cojo ngayun tinihñu tsë tsë xa xi casua ná Nina cojo cjuandaja rë me, quihndë xi tejñaya ndavaya nguehe, hora xi tisuá cjuaquixi naha cojo xutaxa rë, xi cjuanda ndajyihî tsëhë Jesucristu ne, jemu ndaja camahani hacuaaha hatuxa cjuaquixi. <sup>8</sup> Hisca vëë jain me ta jemu meje cuinduva tjëngë nga nuju ta, tsëhë xi ngahan ne, hmú cacún nuju ngayujun ni sacuatjin hmucacun nuju Jesucristu.

<sup>9</sup> Féhya rë Nina xi cuma jyë sa cjuahmutacun xi tjin nuju, hacuaaha féhya rë me xi cuechutaha sa cjuatacun nuju, <sup>10</sup> cojo sa xi cuijnercun jarë xcusun xi ndatjin xi nihñu. Sehe ngajan xi cuma tyjahi xahasen nuju, hacuaaha ha cafë jyë nuju nixtin xi cuya nga Jesucristu ta, <sup>11</sup> tsëhë xi Jesucristu ne, ha casua nuju me cjuandaja xi cuma nihñu hacutjin xi cjuaquixi. Xi cuatjin ne, xuta ne, cjuaharcun me Nina hacuaaha jemu ndaja cuichja me tsëhë me.

*Cjuasua ne, caa rë fi xcun handasa vatju me cjuañihî*

<sup>12</sup> Meje ná xi cumachaya nuju tsan, ta handasa cuitjin tejñaya ndavaya ne, hacuiin ndajintjin ta xuta ne, hitsë sa tijima chaya rë me cjuanda ndajyihî tsëhë Jesucristu. <sup>13</sup> Hisca yëjë

sindadu xi jiyahñu rë ngahan cojo yějë ni xuta xi yahnga ne, vëë me xi tsëhë xi jemu xuta rë Jesucristu ngahan ne, vëhë xi caveya ná me ndavaya. <sup>14</sup> Hacuaha jemu cjín xingueen ne, tsëhë xi camachaya rë me hacutjin vátju quihndë xi tejñaya ndavaya ne, hitsë sa mangucacun me cojo Nina. Hane vëhë xi macjiin cacun me xi chja me cjua rë Nina.

<sup>15</sup> Quixi ta hacuaha tjin xuta xi sua me machaya rë xuta cjua tsëhë Jesucristu. Peru tsëhë xi sahmi xín cacun me cojo ná, hacuaha mijí rë me xi cjua naha cjuexcun, vëhë xi cojo me chja me. Peru yahnga nga me ne, cuatjin chja me ta, tsëhë xi jemu tjin rë me cjuandaja. <sup>16</sup> Cuma cuinújan ne, me xi cuacun tjin rë cjuandaja jan ne, sua me machaya rë xuta cjua tsëhë Jesucristu ngatsë rë cjuahmutacun xi tjin rë me cojo ná, tsëhë xi ha vëë me ta Nina ne, casua ná me xa xi cuichjátë ngatsë rë cjua ndajyihi tsëhë Jesucristu. <sup>17</sup> Peru me xi cuacun tjin rë cjuaxintacun jan ne, sua me machaya rë xuta cjua vëhë ngatsë rë xi meje sahmi yehe suvá me yojo rë me. Tsajin rë me ngu cjuatacun xi ndajyihi xi cuatjin chja me. Xi má rë me ne, ngahan ne, xi tejñaya ndavaya nguehe ne, cumacjíncacun ngatsë rë xcusun xi tisahmi me. <sup>18</sup> Tsimii sahmi rë xi cuatjin cjuatacun rë me xi chja me cjua rë Nina, ¿há xi nguñajacacun me ne?, o ¿há xi hacuiin nguñajacacun me ne?, ndastu cuenda xi cjua tsëhë Jesucristu ne, tijimachaya rë xuta. Vëhë xi jemu ndama ná.

<sup>19</sup> Hya xi ha cuatju cjuacjintacun naha ne, hacuaha ndaja cuma ná ta tsëhë xi ha hvë ta hya cuma tsejen xi tsajin jyë naha. Cuatjin cuma ta tsëhë xi tichjahyun rë Nina ngatsë naha, hacuaha tsëhë xi Hasen xi casua naja Jesucristu ne, cuisecoo ná. <sup>20</sup> Jemu meje ná xi ngajñi rë yějë ni xcusun xi sahme ne, tsajin mé xi sua sava ná. Hacuaha meje ná xi cumacjiin cacún ngajñi rë tu mé ni cjuacjintacun, cojo sa xi xuta ne, hatuxa sahmi jyë hnga me Jesucristu ngatsë naha, sa xi tsismi ná xutaxa rë ne, o sa tsajin ne, sa xi tsiquehen ná me. <sup>21</sup> Peru jinguyëjë rë xi tejña cjuahñu ne, hatuxa meje sahme nguñajacacun yějë ni hacutjin xi Jesucristu meje rë me. Hacuaha sa xi cueya ne, jemu ndaja tsahan. <sup>22</sup> O sa xi cuitejña sa cjuahñu ne, xa xi sahme ngatsë rë Jesucristu ne, ndatjin cuetju. Vëhë xi hisca hveen ne, jarë xi hitsë sa chuya ná, ¿há xi cueya ne?, ¿há xi cuitejña cjuahñu? <sup>23</sup> Cuma cuinújan ne, jemu chja sacuse ná jarë xcusun xi ndatjin. Jercu meje cjuë tjëngë Jesucristu ngajan hiscan tacun me ta, jemu sa ndaja tsahan xi cuatjin. <sup>24</sup> Peru hitsë sa mameje rë xi cuitejña cjuahñu ngatsë nuju. <sup>25</sup> Tsëhë xi cajnecacún tsëhë cjuatacun vëhë ne, vëhë xi hvë ta cuitejña sa cjuahñu. Cuitejña sa cojo nuju ngayujun ni ne, cojo sa xi cuisécoo nuju xi tuxaha sa cjuatacun nuju xi

chutayun cjuachacun xi macjain naja, hacuaha hitsë sa ndaja cuma rë xahasen nuju tsëhë cjua vëhë. <sup>26</sup> Hacuaha hya xi cuinduvá cuitejña nga cojo nuju ne, cuinújun ta jemu ndaja Jesucristu, ngatsë rë xi cavétju ndavaya.

<sup>27</sup> Nihñu yëjë ni hacutjin xi meje rë xi sahmi xuta xi ha macjain jain rë me cjua ndajyihi tsëhë Jesucristu. Cuatjin nihñu, cojo sa xi ndaja cjua sacu ná tsujun, ¿há xi cuinduvá tjëngë nuju?, o sa tsajin ne, ¿há xi tejñataha jingu sa ladu? Peru meje cumachaya ná xi ngayun ne, tjin tangun cjuatacun nuju, hacuaha visecuun xingun xi nújun tjun ngatsë rë cjua ndajyihi xi macjain naja. <sup>28</sup> Hacuaha meje cumachaya ná xi ngayun ne, rcuun camahani tsëhë xuta xi sahmi nuju me condra. Xi cuatjin rcuun ne, cuma tsejen xi Nina ne, tacun jain me cojo nuju. Hacuaha cuma tsejen xi cuechu nixtin xi Nina ne, tsingatju me xuta xi cuacun jan xcun ndihi, peru ngayun ne, cuaxëtje nuju me. <sup>29</sup> Nina ne, ndaja casahmi me cojo nuju xi hacuain suvá xi cumacjain ni nuju Jesucristu ta hacuaha cuatjun cjuañihi ngatsë rë xi macjain nuju me. <sup>30</sup> Titjun ne, cahyun cjuañihi xi cavátju camá. Quihndë ne, camachaya nga nuju xi ha cuanitjin ni tivátju tijima. Hacuaha ngayun ne, hacuanitjin ni tivatjun tijima quihndë.

## 2

*Meje rë xi chjayanguen tsëhë Cristu sacuaha catsinguijne me yojo rë me*

<sup>1</sup> Tjin rë xahasen nuju cjuasua ta, tsëhë xi tjin tangun cjuatacun nuju cojo Jesucristu. Tjin nuju cjuetacun ta, tsëhë xi me vëhë ne, hmucacun nuju me. Tjin tangun cjuatacun nuju cojo Hasen rë Nina. Hacuaha tjin nuju cjuahmutacun cjuayumatacun cojo xingun, xingu xingu ngayun. <sup>2</sup> Quihndë ne, cojo sa xi cuma chihin cjuasua xi tjin rë xahasen naha ne, cuitjin nihñu. Nihñu tangun cjuatacun nuju cojo xingun. Hacuaha ngajñi nuju ne, nihmutacun xingun cojo ngu ni cjuatacun nuju. <sup>3</sup> Sa xi meje nuju xi suvun ni xi ndajyihi cuatjun cuma ne, ndajin tjin. Hacuaha mijí rë xi nihñu yehe yojo nuju ta, xi meje rë ne, jeya ngayun. Hacuaha meje rë xi chutsujun xingun sacuaha xi hitsë sa vengui chjí rë me xi cumá nuju ngayun. <sup>4</sup> Mijí rë xi tsujun suvun ni cuinchunsun xi ndaja ta, hacuaha meje rë xi tinchunsun xi ndaja xi cumá rë jingu sa xuta.

<sup>5</sup> Meje rë xi ningatuhuntacun sacuaha catsingatahacacun Jesucristu. <sup>6</sup> Me vëhë ne, handasa ha Nina me ne, peru hacuain casahmi jyë hnga me yojo rë me xi meje cuejña me sacuaha Nina ta, <sup>7</sup> cahndë rë vëhë ne, cavejñaxin me cahndë rë me xcun Nina, hane casahmicuenda me xuta camá me

ngu xuta sacuaha yaan, cojo sa xi sahmi me yějě ni hacutjin cuitexa Nina me. Hya xi ha camá me xuta ne, <sup>8</sup> cahndě me yějě ni hacutjin cachja Nina, hacuaha catsingatihin me xi catsisava xuta me, hisca catsingatihin me xi catsiquehen xuta me xcun cru, sacuaha xi jemu jyě jyě rě me. <sup>9</sup> Věhě xi Nina ne, hya xi catsicuya me Jesucristu cjuahñu ne, hya casahmi jyě hnga me Jesucristu, hacuaha ngu ni me věhě xi jemu vengui chjí rě ñihi rě me. <sup>10</sup> Cuatjin casahmi Nina, cojo sa xi yějě ni ángel, yějě ni xuta, cojo yějě ni xitsehen ne, cuechú nixtin xi cuixcuhnchi xcun Jesucristu xi cjuaharcun rě me. <sup>11</sup> Hacuaha cuichja ta Jesucristu ne, hatuxa matitjun jain me. Xi cuatjin ne, cumatsejen xi Nina Nahmi naja ne, hatuxa jemu jyě hnga me cojo cjuatacun rě me.

*Xuta xi macjain rě me Nina ne, tsejen xcusun rě me xcun yahnga xuta*

<sup>12</sup> Sacuatjin ndaja canuhyun tsahan hya xi cavinechan cojo nuju, tsan ne, cuatjin hitsě sa nguñajatacun tinuhyun tsahan quihndě xi xín tejñataha. Hacuaha meje rě xi nihñu yějě ni hacutjin xi chuya rě Nina ta, tsěhě xi me věhě xi vaxětje nuju me. Ndaja cuidadu cojo sa xi cumachihin cjuatacun věhě. <sup>13</sup> Hacuaha scaa nuju nihñu cuatjin ta, tsěhě xi Nina sahmi me xi meje nihñu yějě ni hacutjin xi chuya rě me, hacuaha sua nuju me ngahñu xi scaa nuju nihñu cuatjin.

<sup>14</sup> Ngajñi rě yějě ni cjuacjintacun xi tjin nuju ne, xi canújunjuun cojo xingun xi chuyiin nuju, xi canujuun cuitjin cuatjin. <sup>15</sup> Xi cuatjin ne, tsajin jyě nuju hacuaha tyjahi xahasen nuju. Cuma cuinújan ne, ngayun xi ha quihndi rě Nina ngayun ne, tsajin jyě nuju, xi nechun ngajñi rě xuta tsehen xuta ndajin xi siu ngasunhdě. Meje rě xi cumatsejen xi jemu ndaja ngayun ngajñi rě xuta tsehen, <sup>16</sup> xi tuhun machaya rě xuta cjua ndajyihí xi sua naja cjuahñu xatsě. Cuatjin nihñu ne, cojo sa xi ndaja cuma ná ngatsě nuju nixtin xi cuya nga Jesucristu ta, tsěhě xi xi cuatjin ne, hya cumatsejen xi hacuiin tu mahya casahme ngahñu xi sahme hacutjin xi chuya rě Jesucristu, hacuaha hacuiin tu mahya casahme xá. <sup>17</sup> Ha ndasa tsiquehen ná xutaxa rě tsěhě xi ngahan cavisécoo nuju xi cumacjain nuju Jesucristu hacuaha cavisécoo nuju xi nihñu xa rě me, peru ndaja cuma ná. Hacuaha ndama ná xi ngayujun ni ne, casua nuju Nina cjuandaja rě me. <sup>18</sup> Ha chuva věhě ni ne, ndaja catama nuju ngatsě rě cjuandaja vě, hacuaha ndaja catama nuju ngatsě naha.

*Ejemplu xi sua apóstol*

<sup>19</sup> Sa xi meje rě Jesucristu, me xi matitjun tsajan, sacuatjin xi meje ná ne, tsingátju nuju Timoteo. Meje tsingátju nuju

me cojo xati, cojo sa xi ngahan ne, hacuaha ndaja cuma rē xahasen naha, hya xi cuya nga me cojo cjua hacutjin tivatjun tijima. <sup>20</sup> Me vëhë tsingátju me ta, tsëhë xi tsajin sa ná ngu xuta xi vinga nuju sacuaha me vëhë. Me vëhë ne, jemu meje rē me xi ndaja cuatjun cuma. <sup>21</sup> Peru yëjë me xi yahnga ne, sahmi cuenda me cjuandya rē suvá ni me, sahmi cuendaain me xa xi meje rē Jesucristu xi cumá. <sup>22</sup> Peru ha hyun xcusun rē Timoteo. Ha hyun ta hya xi cavisecoo ná me xi catihin cumachaya rē xuta cjua rē Nina ne, cavisecoo ná me sacuaha visecoo ngu quihndi nahmi rē. <sup>23</sup> Vëhë xi, xi tu sacú cumachaya ná mé xi cuátju cuma ne, me vëhë xi meje tsingátju nuju me. <sup>24</sup> Hacuaha xi má ná ne, me xi matitjun tsajan ne, sua me cahndë xi cojo xati ne, cuinduvá tjëngë nuju.

<sup>25</sup> Peru xi má ná ne, hacuaha sahmi ngujoyë xi tsingátju nuju Epafrodito xingueen. Me vëhë ne, casahmi me coná xa, hane cojo me vëhë cacaa niji cojo cjuahngatacun rē xuta xi chohovëë naja. Hacuaha cavisecoo ná me sacuatjin xi meje nuju ngayun xi caningatjun me. <sup>26</sup> Hane me vëhë ne, jemu tjïn cacun me xi meje scuëë nuju me ngayujun ni ta, tsëhë xi choho camá rē me xi camachaya nuju cjua xi hmu rē me. <sup>27</sup> Hacuaha quixi xi jemu cama hmu rē Epafrodito. Ña meje cueya me. Peru cahmii me ta, tsëhë xi camayuma rē Nina me. Hacuaha camayuma rē Nina ngahan ta, tsëhë xi mijí rē me xi cuma jyë sa cjuachoho xi tivátju tijima. <sup>28</sup> Vëhë xi cojo xati ne, tsingátju nuju Epafrodito, sehe cuma sua rē xahasen nuju xi chun nga me ngu ndiya. Hacuaha ngahan ne, cuma chuva hitsë cjuachoho xi tivátju tijima. <sup>29</sup> Vëhë xi chjuhunntsun me cojo cjuasua, tsëhë xi me vëhë ne, hacuaha macjain rē me me xi matitjun tsajan. Hacuaha chjuhunrcun yëjë ni xuta xi tangun cjuatacun rē cojo rē me. <sup>30</sup> Me vëhë ne, tsëhë xi jercu casahmi me xa tsëhë cjua rē Jesucristu ne, vëhë xi hitsë sa ne, cahme me. Handasa cavetaha tsavi me yojo rē me xi cavisecoo ná me ne, peru camacjiincacun me xi cavisecoo ná me cahndë nuju ngayun.

### 3

*Xcusun xi jemu vengui chjí camahani rē*

<sup>1</sup> Quihndë tsan ne, catamasua rē xahasen nuju ngatsë rē me xi matitjun tsajan.

Ngahan ne, hacuiin ndya ma ná xi cúya tsihindu nga nuju cjua xi ha cachjá cojo nuju ta, tsëhë xi cjua vëhë ne, cuisecoo nuju xi tsajin yo tsinguetsun cjuatacun nuju xi macjain nuju Jesucristu. <sup>2</sup> Nechun cuidadu cojo xuta machjiriin xi vindacha xi chja xi hachu meje rē xi xtí yojo naja, sehe tsejen xi tsëhë Nina ngayaan. <sup>3</sup> Quixiin cjua rē me ta ngayaan xi tsejen

xi tsëhë Nina ngayaan. Hane Hasen rë Nina ne, visecoo naja xi ma chjahanrcun Nina, hacuaha nechan cjuasua ngatsë rë Jesucristu. Ha hyan ta hatuxa cumaji cuetjuntjen ngatsë rë xcusun xi cun ngayaan cojo xcusun xi nihña. <sup>4</sup> Peru sa xi cuatjin cuma cuetjuntjen suvaan ne, ngahan ne, hitsë sa tjin ná chuva rë xi cuétjutjë xi cumá rë xuta xi yahnga. <sup>5</sup> Ngahan ne, hacuaha cati ná xi cavéchu xi jyin nixtin, sacuaha xcusun rë xutachanga naha. Ngahan ne, tjë rë xuta nangui Israel ngahan. Hacuaha quihndindai cjin rë Benjamín ngahan. Ha tuxa xuta tjë rë Israel ngahan ta xutacha naha ne, hacuaha xuta tjë rë Israel me. Ngahan ne, tsëhë partidu fariseo ngahan hacuaha casahme yëjë ni hacutjin chja ley rë yungun naha. <sup>6</sup> Ngahan ne, jercu cavétaharcu xcusun rë xutachanga naha, hane vëhë xi hisca casuá cjuañihi xi cuma rë xuta xi macjain rë Jesucristu. Ngahan ne, tsëhë xi casahme sacuatjin chja ley rë yungun naha ne, vëhë xi camaji catsicaniji ná xuta hisca ngu jyë. <sup>7</sup> Xi catsingátahacacun hatsëë ne, jemu vengui chjí rë yëjë xcusun vëhë. Peru ngatsë rë Jesucristu ne, xi má ná quihndë ne, venguiin camahani chjí rë xcusun vëhë ta, cumaji cuaxëtje ná. <sup>8</sup> Hisca venguiin chjí rë yëjë sa xcusun, má ná ta, tsëhë xi jercu vengui chjí rë xi tjin tangun cjuatacun naha cojo Jesucristu, me xi matitjun tsajan. Ngatsë rë me vëhë ne, ngahan ne, cacandëxen yëjë ni xcusun, sacuaha xi chanden xtë, cojo sa xi ngahan ne, cuma tsëhë Jesucristu ngahan. <sup>9</sup> Hacuaha cuma tangun cjuatacun naha cojo rë me. Xi cuatjin ne, cjuë jyë naha, hacuiin ngatsë rë xi sahme hacutjin chja ley rë yungun ta ngatsë rë xi macjain ná Jesucristu. Nina ne, tsicjë me jyë naja ngatsë rë xi macjain naja Jesucristu. <sup>10</sup> Jemu meje ná xi ndaja cuma tangun cjuatacun naha cojo Jesucristu. Hacuaha meje ná xi cojo ngahan sacu ná ngahñu xi catsingacun Nina, hya xi camá catsicuya me Jesucristu cjuahñu. Sa xi meje rë Nina ne, ngahan ne, tsingatehen xi cuátju cjuañihi hacuaha hisca tsingatehen xi tsiquehen ná xuta ta, tsëhë xi cuatjin cavatju Jesucristu camá. <sup>11</sup> Hane hya xi cueya ne, meje rë Nina xi hacuaha tsicuya ná me cjuahñu xi tejña ngajñi rë nima.

<sup>12</sup> Cjëë cuma chihin yëjë ni cjuatacun xi meje ná vë, hacuaha chaja sa cuma tyjahi cjuatacun naha. Peru tisahme sa ngahñu, cojo sa xi cuma sahme chehen cjuatacun vëhë. Cuatjin sahme ta, tsëhë xi Jesucristu ne, ha casahmi tsëhë me ngahan. <sup>13</sup> Cúya cuichjá cojo nuju tsan ta, cjëë sahme chehen cjuatacun vëhë. Peru cuitjin meje sahme: tsicháya xcusun xi ha cavátju camá, hacuaha sahme ngahñu xi cuma sahme xcusun xi vengui chjí rë xi sehe nduva. <sup>14</sup> Tisahme ngahñu xi cuma sahme chehen xcusun vëhë, cojo sa xi sacú ná cuatjo

xi sua ná Nina ngatsë rë xi macjain ná Jesucristu. Nina ne, cuaxijin ná me xi cuitejña ngajan ngahnga hiscan tacun me.

*Meje rë xi tjin tangun yaan xi macjain naja Nina*

<sup>15</sup> Vëhë xi ngayaan xi ha ndaja macjain naja Jesucristu ne, meje rë xi cuatjin cuiyujun cjuatacun naja. Hane sa xi tjin yahnga ngayun xi hacuün cuatjin cuiyujun cjuatacun nuju ne, Nina tsingacun nuju me hacutjin xi cjuaquixi. <sup>16</sup> Ndastu sahmi ngujoyë xi nihña cuenda tsëhë cjuaquixi xi ha hyan ne, cuatjin meje rë xi nihña.

<sup>17</sup> Vëhë xi meje rë xi nihñu hacutjin xi sahme, tsan. Hacuaha tetuhuncun xcusun rë xuta xi sahmi hacutjin xi sahme. <sup>18</sup> Ha jemu cachjá cojo nuju ta jemu cjín xuta xi condra me tsëhë cjua ndajyihí xi sua machaya naja hacutjin cahme Jesucristu xcun cru. Ña tijíhnda xi tichjá nga ngu ndiya cojo nuju cjua vëhë. <sup>19</sup> Peru xuta xi sahmi me condra cjua ndajyihí vë ne, cjue me xcun ndihi. Cahndë rë xi cjuaharcun me Nina xi cjuaquixi ne, hitsë sa faharcun me tu mé ni xcusun xi chuya rë me. Cahndë rë xi cuma sava rë me tsëhë xcusun xi sahmi me ne, tu hitsë sa sahmi yehe me yojo rë me. Cuma cuinújan ne, tjin tangun cjuatacun rë me cojo cjuatacun rë ngasunhdë. <sup>20</sup> Peru ngayaan ne, xuta tsëhë ngahnga ngayaan. Hacuaha ha nechayan rë Jesucristu, me xi matitjun tsajan, ta cuinduva me tsëhë ngajan xi cuaxëtje naja me. <sup>21</sup> Me vëhë tsindeya me yojo jyë naja xi tsajin mé machji rëhë, hane sahmi me sacuaha yojo rë suvá me xi jercu vengui chjí rë. Cojo ngahñu rë suvá me ne, sahmi me ta, tsëhë xi me vëhë matitjun me tsëhë yëjë ni xcusun.

## 4

*Tahan cjuasua yëjë ni nixtin ngatsë rë Nai naja*

<sup>1</sup> Vëhë xi sacuatjin xi ha macjain nuju me xi matitjun tsajan tsan ne, cuatjin tangun cojo ngasunhdë nuju. Jercu meje cuinduvá tjëngë nuju tsan. Jemu ma sua rë xahasen naha ta, tsëhë xi ngayun ne, tivangun nduju cojo cjuatacun nuju xi macjain nuju Jesucristu.

<sup>2</sup> Quihndë ne, féhya nuju ngayun Evodia cojo ngayun Síntique nihñu favor ne, ngu tangun ni catama cjuatacun nuju cojo xingun, sacuatjin meje rë xi nihña ngayejen ni xi tsëhë me xi matitjun tsajan ngayaan. <sup>3</sup> Hacuaha ngaye xi ndaja compañeru naha ngaye ne, nihñi favor ne, tisecuee rë na xi cuacun vë, xi cuijnetaha si xi tisahmi na cojo xicjin na. Ta na xi cuacun vë ne, jercu casahmi na cojo ná xa, hya xi catihin camachaya rë xuta cjua ndajyihí tsëhë Jesucristu. Hacuaha cojo cha Clemente cojo sa yahnga compañeru naha

ne, cavisecoo ná me. Xuta xi cuacun vë ne, hatuxa sacú rë me cjuahñu xatsë ta, tsëhë xi ha tsëhë Nina me.

<sup>4</sup> Ndaja catama rë xahasen nuju ngatsë rë xi tjin tangun cjuatacun nuju cojo me xi matitjun tsajan. Cúya cuichjá nga cojo nuju, ndaja catama rë xahasen nuju. <sup>5</sup> Meje rë xi cuma tsejen xi tjin nuju cjuandaja cojo yëjë ni xuta ta, tsëhë xi me xi matitjun tsajan ne, ha tacun xati xi cuinduva nga me. <sup>6</sup> Ngajñi rë yëjë ni cjuacjintacun nuju ne, xi camacjiintacun. Tinújun cojo Nina hacuaha chjahyun rë me cjuandaja rë me. Hacuaha tuhun nacuechji rë me. Cuatjin meje rë xi tuhun cumachaya rë Nina tu mé ni xi meje nuju. <sup>7</sup> Ngajan xi cjuajeya xi sua nuju Nina ne, vëhë cuetjo nuju, cojo sa xi cumacjiintacun, xi tjin tangun cjuatacun nuju cojo Jesucristu. Sacuaha cjuajeya xi sua nuju Nina jan ne, hisca vijniircun ndandaja ta, tsëhë xi jemu tu ndaja camahani cjuajeya vëhë.

*Xcusun ndaja xi meje rë xi cuinchan cjuatacun naja*

<sup>8</sup> Quihdë tsan ne, nihñu tangun cjuatacun nuju cojo cjuatacun xi cuicun vihi: cjuatacun xi cjuaquixi, cjuatacun xi chjaharcun rë, cjuatacun xi ndatjin, cjuatacun xi tyjahi, cjuatacun xi ndacun, cjuatacun xi chuya rë xuta ndaja. Cuma cuinújan ne, tu jarë ni cjuatacun xi jemu ndaja o sa xi hatuxa tjin chuva rë xi chjaharcun rë ne, vëhë nihñu tangun cjuatacun nuju cojo. <sup>9</sup> Hacuaha nihñu yëjë ni hacutjin xi camá nuju hya xi cavicuyá nuju hacutjin meje rë xi nihñu. Peru hacuiin suvá cjua xi cachjá cojo nuju ta hacuaha cojo xcusun xi casahme ngajñi nuju ne, cojo vëhë meje rë xi nihñu. Hane cuatjin ne, Nina xi sua naja cjuajeya ne, tacun me cojo nuju.

*Cjuatjo tsëhë xuta nandya Filipino xi cuma rë Pablo*

<sup>10</sup> Ngatsë rë me xi matitjun tsajan ne, jercu ndama ná ta, handasa jemu cavatju nixtin ne, hindë cavuyun caningatuhuntacun nga ngatsë naha. Hacuiin hatuxa canichayun ná ta, cuenda xi casacuinyiin nuju hacutjin cuma xi cuiseacun ná hisca quihndë. <sup>11</sup> Hacuiin tichjá cojo nuju cuatjin ngatsë rë xi tjin mé xi ma chaja ná ta, ngahan ne, ha casacu ná chuva rë hacutjin cumangucacún cojo tu mé ni cjuacjintacun xi nduva. <sup>12</sup> Sa yuma sa nchina ngahan ne, hatuxa mangucacún. ¿Há tjin xi sínë?, o ¿há tsajin xi sínë?; ¿há xi jercu tjin ná?, o ¿xi ma chaja ná?, tsimii sahmi rë ta ngahan ne, ha catuxaha cjuatacun naha xi cumangucacún cojo tu mé ni cjuacjintacun xi nduva. <sup>13</sup> Scaa ná cojo tu mé ni cjuacjintacun ta, tsëhë xi Jesucristu ne, tisua ná me ngahñu. <sup>14</sup> Peru, jemu ndaja canihñu xi caviseacun ná ngajñi rë cjuañihi xi tivátju tijima.



15 Ngayun xuta nandya Filipino ne, ha hyun ta hya xi tjutjun casuá camachaya nuju cjuá ndajyihí tsëhé Jesucristu hacuaha sehe cavétju tsëhé distritu Macedonia ne, hisca ngu yungun cavise-cuaain ná cojo tujún hya. Suvun tutu xi cavise-cun ná. 16 Hacuaha hya xi tejñataha ngajan nandya Tesalónica ne, ngu jo ndiya ne, caningatjun tujún tsëhé cjuachaja xi tjin ná. 17 Hacuian jercu meje ná cjuandaja xi ningatjun ná ta xi hitsë sa meje ná ne, xi sacu nuju cjuandaja rë Nina ngatsë rë cjuandaja xi nihñu. 18 Ha cafahántsa yëjë ni xi caningatjun ná cojo Epafrodito. Vëhé xi ha tjin ná yëjë ni xi mameje ná. Hisca vangui sa xi tjin ná. Cuatjo nuju vë ne, tangun cojo ngu cuatjo xi ndaja jne, xi vejña xacun ngasuncun. Hane Nina ne, fahatsja me cuatjo jan ta jemu chuya rë me tsëhé. 19 Hacuaha Nina naja ne, tsëhé cjuanchina ndajyihí xi tjin rë me ne, hatuxa sua nuju me tu mé ni xi machaja nuju, ngayujun ni xi tjin tangun cjuatacun nuju cojo Jesucristu. 20 Quihndë ne, catichja xuta ta Nina Nahmi naja ne, jercu ndaja camahani me yëjë ni nu yëjë ni nixtin. Cuatjin jain.

### *Cjuá xi vijnetaha*

21 Yëjë ni xuta xi tjin tangun cjuatacun rë cojo Jesucristu ndyá ne, tuhun rë me nina naha. Hacuaha xingueen xi siu cojo ná nguehe ne, tsingatju me ngu nina nuju. 22 Hacuaha cojo sa yëjë me xi tsëhé Nina, hisca cojo me xi siu ngajan ndava me xi matitjun camahani tsëhé xuta Roma ne, tsingatju me nina nuju.

23 Cjuandaja rë Jesucristu, me xi matitjun tsajan ne, catejña cojo nuju.

## Carta xi catsingatju San Pablo xi cafahatsja xuta ladu rë Jesucristu ngajan nandya Colosas

<sup>1</sup> Ngahan Pablo ne, apóstol tsëhë Jesucristu ngahan ta, tsëhë xi cuatjin camameje rë Nina. Ngahan cojo Timoteo xingueen ne, <sup>2</sup> ningátjin nuju carta vihi ngayun xuta nandya Colosas, ngayujun ni xuta ladu rë Nina xi jercu ndaja titsangunndujun cojo ndiya rë me hacuaha tjin tangun cjuatacun nuju cojo Jesucristu. Nina Nahmi naja ne, catisua nuju me cjuandaja cjuajeya.

*Sua Pablo nacuechji rë Nina ngatsë rë xuta nandya Colosas*

<sup>3</sup> Jercu tihín nacuechji rë Nina Nahmi rë Nai naja Jesucristu yasen yasen ni, hya xi nihñi oración ngatsë nuju. <sup>4</sup> Tihín nacuechji rë Nina ta camachaya niji hacutjin xi ngayun ne, mangutacún cojo Jesucristu hacuaha nihmutacún yëjë ni xuta ladu rë Nina. <sup>5</sup> Cuatjin tinihñu ta, jercu vetuhun tacún cjuandaja xi Nina tacunxin rë me ngajan ngahnga xi cuma nuju ngayujun ni. Cavetsuhun cavetuhun tacún cuatjin, hatsë hya xi canuhyun cjuandajyihî xi cjuaquixi, xi chja tsëhë Jesucristu. <sup>6</sup> Cjuandajyihî jan ne, casacu camachaya nuju sacuatjin sa rë yahnga xuta tsëhë jercu cjín sa cahndé. Hane xi macjain rë xuta cjuandajyihî jan ne, jercu tisahmi me cjuandaja, hacuaha jercu cjín sa xuta tijimacjain rë me. Cuanitjin tivatju ngajñi nuju ngayujun ni, hisca hya xi camachaya nuju cjua jan hacuaha ndaja cavijnercun xi Nina ne, jercu sahmi me cjuandaja. <sup>7</sup> Cuatjin cachja cojo nuju Epafras, me xi jercu vinga niji hacuaha tangun fahacuenda me cojo niji xa xi vitexa Jesucristu. Me vëhë ne, jercu ndaja cjuinduju me tifahacuenda me tsëhë xa jan cojo sa xi tsujun ndaja. <sup>8</sup> Hacuaha casua me camachaya niji xi ngayujun ni ne, tjin nuju cjuahmutacun cojo yëjë ni xuta ladu rë Nina, cojo cjuahmutacun xi sua nuju Hasen rë Nina.

<sup>9</sup> Ngatsë rë xi cuatjin camachaya niji tsëhë cjua xi chja tsujun ngayujun ni ne, vëhë xi tinihñi oración tsujun ngayujun ni yasen yasen ni hisca hya xi camachaya niji. Tichjahyin rë Nina xi cuijnercun yëjë hacutjin xi meje rë Nina xi nihñu. Tichjahyin rë me xi ndaja tuxaha cjuatacun nuju hacuaha cuijnercun cojo cjuatacun xi sua nuju Hasen rë Nina. <sup>10</sup> Cuatjin tichjahyin rë me, cojo sa xi ngayujun ni ne, cuangunndujun cojo ngasunhndë nuju sacuatjin meje rë xi sahmi xuta ladu rë Nai naja, cojo sa xi chuya rë me tsëhë yëjë

ni xi nihñu. Cuatjin tichjahyin rë me, cojo sa xi ngayujun ni ne, nihñu yëjë ni xcusun cjuandaja, hacuaha ndaja sa chun Nina ngu nixtin ngu nixtin. <sup>11</sup> Nina catisua nuju me ndaja cjin ngahñu, tucu ngahñu xi tjin rë me, cojo sa xi yëjë ni nixtin scaa nuju cojo yëjë ni xcusun xi vatjun má hacuaha nijyun tacún cojo xuta, táha tijimasua nuju. <sup>12</sup> Cuatjin tichjahyin rë Nina, cojo sa xi ngayujun ni ne, tuhun nacuechji rë Nahmi naja ngatsë rë xi me vëhë ne, cavëhëchjine nuju me cojo sa xi cojo ngayun satë nuju cjuandaja xi sua me xuta ladu rë me ngajan ngahnga. <sup>13</sup> Nina Nahmi naja ne, cavaxëtje naja me tsëhë xitsehen xi matitjun tsëhë yëjë ni cjuatsehen, hane cavejña naja me tsja Quihndi rë me xi jercu hmucacun me. <sup>14</sup> Cojo xcusun xi casahmi Quihndi rë me jan ne, Nina ne, cavechjitje me yëjë ni jyë xi quitjen xuta, hane catsinchataha me ngayaan.

*Sahmi Nina xi cuya cumandaja ngayaan cojo rë me*

<sup>15</sup> Quihndi rë me jan ne, tsingacun naja hacutjin xcusun rë Nina cojo Hasen rë me, handasa maji matsejen Nina. Quihndi rë me jan ne, hatuxa matitjun me tsëhë yëjë ni xi casahmi Nina ta, <sup>16</sup> tsëhë xi cojo me ne, Nina ne, casahmi me yëjë ni xi tjin ngasunhdë xi tsejen, cojo yëjë ni xi tjin ngahnga xi matsijin, sacuaha yëjë ni xcusun hasen xi matitjun sa hasen ndaja sa hasen tsehen. Cojo me vëhë ne, casahmi Nina yëjë ni, cojo sa xi yëjë ni xi cuacun jan ne, sahmi jyë sahmi hnga rë me. <sup>17</sup> Quihndi rë me jan ne, hatuxa matitjun me tsëhë yëjë ni xi casahmi Nina ta, tsëhë xi me vëhë xi tjun sa tacun me xi cuma rë yëjë ni hacuaha ngatsë rë me vëhë ne, siuchihin yëjë ni. <sup>18</sup> Me vëhë ne, vitexa me xuta ladu rë Nina sacuatjin rë rcuun xi vitexa rë yojo naja. Hacuaha sua me cjuahñu xatsë xuta ladu rë Nina ta, tsëhë xi me vëhë tjun tjun me cavuya me cjuahñu tsëhë ngajñi rë yëjë nima, cojo sa xi cumatitjun camahani me. <sup>19</sup> Quihndi rë Nina jan ne, tsingacun naja hacutjin xcusun rë Nina cojo Hasen rë me ta, tsëhë xi cachuya rë Nina xi cuisehentë me cuejñacahndë suvá me cahntsua xahasen rë Quihndi rë me. <sup>20</sup> Nina Nahmi naja ne, cavejña naja me tsja Quihndi rë me, tsëhë xi cavejñangucacun me xi cojo Quihndi rë me ne, tsicuya me ladu rë me ngayëjë ngarca ni, sa ngahnga sa ngasunhdë, cojo sa xi cumajyë cumahnga Quihndi rë me jan. Hane ngatsë rë jni rë Quihndi rë me xi cavanga xcun cru ne, hindë tsajin mé cjuachan.

<sup>21</sup> Ngayujun ni ne, handasa hatsëe ne, jemu cjin nechun tsëhë Nina hacuaha condra nuju me ngatsë rë xi jemu tsehen cjuatacun nuju hacuaha jemu tsehen xcusun xi canihñu, <sup>22</sup> peru quihndë ne, casahmi Nina xi cavuya nga camandaja yun cojo rë me. Cuatjin casahmi me cojo cjuaveya tsëhë yojo

rë Quihndi rë me, cojo sa xi ngayujun ni ne, tsëhë me yun hacuaha tsajin camahani jyë nuju, hya xi squindaya nuju me xi cuangun xcun me. <sup>23</sup> Cuatjin cuma sa xi cjuenduju xi siu cahndë cjuatacun nuju xi macjain nuju cjuandajyihi xi chja tsëhë Cristu, hacuaha cjuenduju xi vetuhun tacún cjuandajyihi xi canuhyun jan. Hane cjuandajyihi jan ne, casacu camachaya rë xuta tsëhë jercu cjin cahndë. Hane ngahan Pablo ne, casatëxa ná xi suá machaya rë xuta cjuandajyihi jan.

*Casuaxa Nina Pablo xi cuichjatë me cjuatahahma ndajyihi xi chja tsëhë Jesucristu*

<sup>24</sup> Quihndë ne, ma sua ná xi tivátju cjuañihi cojo sa xi tsujun ndaja. Tisahmechehen tsëhë yëjë ni cjuañihi xi cachja Cristu xi cuátju cuma cojo yojo naha, cojo sa xi tsëhë xuta ladu rë me ndaja, hane ngayejen ni xi ladu rë me ne, sacuaha yojo rë me ngayaan. <sup>25</sup> Ngahan ne, camá ngahan ngu xuta xi visécoo rë xuta ladu rë Cristu, tsëhë xi Nina casuaxa ná me xi cuisécoo nuju ngayun xutaxín, cojo sa xi suá cumachaya nuju tsëhë yëjë ni cjuandajyihi xi cachja me. <sup>26</sup> Cjuandajyihi jan xi cachja me ne, hacui cjuatahahma. Cjua vëhë ne, cavetjo Nina tsëhë yëjë ni xuta xi caviyuju me yëjë ni nixtin xi cavatju, peru quihndë ne, casua me camachaya rë yëjë ni xuta ladu rë me. <sup>27</sup> Nina ne, cavejñangucacun me xi sua me cumachaya rë xuta xi cuacun jan xi cjuatahahma vihi ne, chja xi jercu tsinchacuntihin Nina xutaxín jan. Cuma cuinújan ne, Cristu ne, cuejñacahndë me cahntsua xahasen nuju ngayun xutaxín. Hane cuetuhun tacún xi sehe cuaxëndaja me yun. <sup>28</sup> Ngayin ne, tihín cumachaya rë xuta tsëhë cjua xi chja tsëhë Cristu. Yëjë ni xcusun xuta ne, viyijin me cuidadu hacuaha vicuyin rë me cojo yëjë ni cjuahasen xi tjin niji. Cuatjin nihñi, cojo sa xi yëjë ni xuta xi cuacun jan ne, tyjahi camahani me xi tjin tangun cjuatacun rë me cojo Cristu, hya xi ningacuín me xcun Nina. <sup>29</sup> Ngatsë rë vëhë ne, ngahan ne, hacuaha hñu tisahme xa, hacuaha tisahme ngahñu cojo yëjë ni ngahñu xi tisua ná Cristu.

## 2

<sup>1</sup> Hacuaha meje ná xi cumachaya nuju xi jercu tisahme ngahñu ngatsë nuju cojo ngatsë rë me xi siu ngajan nandya Laodicea cojo tsëhë yëjë sa me xi cjëë scuëë ná. <sup>2</sup> Cuatjin sahme, cojo sa xi ngayujun ni ne, sacú hñu rë xahasen nuju ngatsë rë xi tjin tangun cjuatacun nuju cojo xingun cojo yëjë ni cjuahmutacun. Hacuaha cuatjin sahme, cojo sa xi sacúndaja cumachaya nuju hacuaha jercu ndaja camahani cuijnercun cjuatahahma ndajyihi rë Nina, xi chja tsëhë Cristu. <sup>3</sup> Cristu ne, suvá ni me vëhë cuma sua naja me

cjuatacun xi jercu ndaja cuijnercun yějě ni cjuatahahma ndajyihi jan. <sup>4</sup> Cuitjin tichjá cojo nuju, cojo sa xi tsajin yo cuma cuindacha nuju cojo cjua xi matanguaain cojo cjua xi cjuaquixi, handasa jercu ndaja nuhya rě, xi má nuju. <sup>5</sup> Handasa tsajin tejñataha cojo nuju ne, peru jercu vityangě cacún tsujun ngayujun ni. Hacuaha ma sua ná, tsěhě xi hvě xi ngayujun ni ne, tjin tangun cjuatacun nuju cojo xingun hacuaha jercu ndaja mangu tacún cojo Cristu.

*Vitexa Pablo xi nihña sacuatjin meje rě xi sahmi xuta ladu rě Jesucristu*

<sup>6</sup> Věhě xi, sacuatjin xi camacjain nuju cjuandajyihi xi chja tsěhě Jesucristu, me xi Nai naja ne, cuatjin tángunndujun cojo ngasunhndě nuju xi tjin tangun cjuatacun nuju cojo rě me. <sup>7</sup> Catjinduju xi ndaja macjain nuju cjua jan, hacuaha ndaja sa catamacjain nuju ngu nixtin ngu nixtin. Catjinduju xi siu cahndě cjuatacun nuju cojo cjuachacun xi macjain naja, sacuatjin cavicuya nuju Epafras. Hacuaha catjinduju xi jercu tuhun nacuechji rě Nina Nahmi naja.

*Tsavi cojo ngu cjuachacun xatsě xi vicuya xuta ndacha*

<sup>8</sup> Nechun cuidado, sá tu yo sahmi xi cuisuhun ladu rě ngatsě rě xi cuindacha nuju cojo ngu cjuachacun xi venguiin chjí rě, tsěhě xi cjuachacun jan ne, nduva tsěhě xcusun rě xuta ngasunhndě ni, hacuaha tsěhě suvá ngasunhndě vihi yějě ni cjua rě jan, hacuiin tsěhě Cristu. <sup>9</sup> Nihñu cuidado ta, yějě xcusun rě Nina ne, tjin Cristu, ta Nina ne, vejñacahndě me yojo rě Cristu, <sup>10</sup> hacuaha ngayun ne, tsajin mé xi chaja rě hasen nuju, tsěhě xi tjin tangun cjuatacun nuju cojo Cristu, me xi matitjun camahani tsěhě yějě ni hasen xi hacuaha vitexa, sa hasen ndaja sa hasen tsehen. <sup>11</sup> Ngatsě rě xi tjin tangun cjuatacun nuju ngayujun ni cojo rě me ne, ha sacuaaha xi me vėhě cavatě me chuxin nuju. Hane vėhě ne, hacuiin vijne xi cati jain chuxin nuju sacuaaha sahmi xuta cojo quihndi langa ta xi vijne jan ne, yějě ni cjuatsehen xi tjin naja cojo yojo naja ne, cavaxėxin camahani Cristu. <sup>12</sup> Hya xi caxtenda ngayun ne, ha sacuaaha xi caveyun ne, hacuaha Nina caveyaniji nuju me tangun cojo Cristu, sehe catsicuya nuju me cjuahñu nga cojo rě me, ngatsě rě xi camangu tacún cojo ngahñu rě Nina, me xi catsicuya rě Cristu cjuahñu tsěhě ngajñi rě yějě nima. <sup>13</sup> Hatsěe ne, ha sacuaaha xi nima má ngayun ngatsě rě jyě nuju hacuaha ngatsě rě yějě cjuatsehen xi tjin nuju cojo yojo nuju. Peru quihndě ne, ngayujun ni xi catsicuya nga nuju Nina cjuahñu tangun cojo Cristu, Nina ne, catsinchataha naja me cojo yějě jyě naja. <sup>14</sup> Cuma cuinújan ne, sacuaaha xi cavujnu Nina cjua xi hinchaxcun xujun xi tsicaniji jyě naja. Sacuaaha

xi catsicjëya me xujun jan, hya xi cahme Cristu xcun cru. <sup>15</sup> Nina ne, cafaixin me xa xi siutahá yëjë ni hasen ndaja cojo hasen tsehen xi cavitexa, hane catsingacuntë me xi cuatjin casahmi me. Caca rë me cavinchanghma me hasen xi cuacun jan, cojo yëjë ni xi casahmi Cristu.

<sup>16</sup> Xicachjasuun tsëhë xuta xi tsicanijijyë me ngayun ngatsë rë xcusun xi chinu o xi hyun, o ngatsë rë suhi xi nihñu, há chuva nu, há chuva sá, o há chuva totje. <sup>17</sup> Xichachuun ta yëjë ni xcusun xi cuacun jan ne, sacuaaha tjahnguen ni rë yëjë ni cjuandaja xi casua nuju Cristu. <sup>18</sup> Xichachuun tsëhë xuta xi cuatjin tsicanijijyë nuju me xi chja me xi hatuxa meje rë xi ninguijnu yojo nuju hacuaaha chjuhuncun ángel. Xuta xi cuacun jan ne, chja me xi chja xu nijhá cojo rë me hacuaaha sahmi yehe me yojo rë me suvá me ngatsë rë cjuatacun tsehen xi vitexa rë me. <sup>19</sup> Cuatjin sahmi me ta, vicuyaain me cjuachacun cjuaquixi tsëhë Cristu, me xi sahmi xi cumatangun cjuatacun rë yëjë ni xuta ladu rë Nina cojo xicjin hacuaaha sahmi xi cuijin xcun xi cjuenduju me cojo ndiya rë Nina sacuatjin xi meje rë Nina.

<sup>20-21</sup> Ngayujun ni ne, ngatsë rë xi tjin tangun cjuatacun nuju cojo Cristu, me xi cahme ne, vëhë xi camandaya ngayun tsëhë xcusun rë xuta ngasunhdë, sacuaaha mandaya ngu xuta tsëhë yëjë ni cjuandya rë me hya xi hme me. Vëhë xi mijí rë xi cuanguntjengun xcusun rë xuta xi chja xi cumaji chjahan vihi, cumaji xinëë vëhë, cumaji nicojon xingu vë, sacuaaha xi tuxa sahmi ngujoyë xi cuinuhyun jan. <sup>22</sup> Mijí rë xi cuanguntjengun xcusun xi cuacun jan ta, tsëhë xi xichinë cojo xi hyun ne, hatuxa fë hya xi nicojo rë. Hacuaaha xcusun xi cuacun jan ne, nduva tsëhë cjua xi vitexa xuta ngasunhdë ni, nduva tsëhë cjua xi vicuya xuta ngasunhdë ni. <sup>23</sup> Hacuaaha xcusun xi cuacun jan ne, sahmi xi xuta ne, sahmi me yëjë ni xi meje rë cjuatacun tsehen xi vitexa rë me, handasa tsejen sacuaaha xcusun ndaja, ngatsë rë xi vitexa naja xi chjahanrcun nina sacuatjin meje rë xuta ngasunhdë ni hacuaaha xi ninguijne yojo naja hacuaaha xi chjahanñehe cojo yojo naja. Peru xcusun xi cuacun jan ne, vitexaain camahani xi nihña cjuandaja.

### 3

#### *Catamameje naja yëjë ni xi tsëhë ngahnga*

<sup>1</sup> Ngayujun ni ne, casua nuju Nina cjuahñu xatsë, ha sacuaaha xi catsicuya nuju me cjuahñu tangun cojo Cristu. Vëhë xi yëjë ni hora ne, catamameje nuju yëjë ni xi tsëhë ngahnga, hiscan tacun Cristu, me xi Nina casahmi jyë casahmi hnga rë xi cuitexa me ngayëjë ni. <sup>2</sup> Catamameje nuju yëjë

ni xi tsëhë ngahnga, hacuiin cjuatsehen xi tsëhë ngasunhndë ta, <sup>3</sup> tsëhë xi ngayun ne, ha caviyujunxun xcusun xi canihñu hatsëë, sacuatjin rë nima xi ha quihndë tsajin mé cuma sahmi sacuaaha hya xi tacun sa xcun cjuahñu. Hacuaha quihndë ne, tjin nuju cjuahñu xatsë tangun cojo Cristu, me xi tacun xcun Nina. Hane xcusun vëhë ne, hatuxa matsijin. <sup>4</sup> Hya xi Nina tsingacuntë me Cristu, me xi sua nuju cjuahñu xatsë ne, hya tsingacuntë nuju me hacuaaha sahmi jyë sahmi hnga nuju me tangun cojo rë Cristu jan.

*Xcusun changá cojo xcusun xatsë*

<sup>5</sup> Vëhë xi xicanihñuu cjuatsehen, sacuatjin rë nima xi maji sahmi cjuatsehen. Xicanihñuu cjuatsehen sacuaaha cjuatsehen xi sahmi xuta cojo ngu xi hacuiin chjuun rë me, hacuiin xihin rë me, o sa xi ngajñi ni xihin me, o ngajñi ni chjuun me. Hisca ndajin tjin xi meje nihñu xcusun xi cuacun vë, cojo yëjë sa xcusun cjuatsehen. Mijí rë xi jercu nihmu tacún cjuanchina ta, sa xi cuatjin nihñu ne, hitsë sa nihmu tacún cjuanchina jan xi cuma rë Nina. <sup>6</sup> Nina ne, sahmi me castigu yëjë ni xuta xi vihndiin tsëhë me, xi cuatjin sahmi. <sup>7</sup> Hacuaha ngayujun ni ne, cuatjin canihñu hatsëë, hya xi tivinuhuun tsëhë Nina. <sup>8</sup> Peru quihndë ne, mijí rë xi nihñu yëjë ni xcusun xi cuichjá cojo nuju vihi: hacuiin cumacjan nuju, hacuiin nihñu cjuatsehen, hacuiin choho cuinújun tsëhë xingun, <sup>9</sup> hacuiin cuinújun cjuandacha cojo xingun. Xicanihñuu cuatjin ta, tsëhë xi ha caviyujunxun cjuatacun changá cojo yëjë ni xcusun xi canihñu xi cavitexa nuju cjuatacun jan, <sup>10</sup> hane ha cavisehen nuju cjuatacun xatsë xi Nina tisahmi me xi cuijin xcun xi cuma sacuaaha cjuatacun rë suvá me xi catsindaja cjuatacun jan, cojo sa xi ngayujun ni ne, cumachaya ndaja sa nuju nguñaja cjuaquixi yo me. <sup>11</sup> Ngajan xi cuendaain rë ¿há xutaxín o há xuta tjë rë Israel má ngayaan?, ¿há cati chuxin naja o há catiin rë?, ¿há xuta ngu nangui ngayaan?, ¿há tichjá cjuatacun naja?, ¿há xuta caxteña ngayaan, o há xuta ndaya tjin ngayaan? ta Cristu ni ne, me vëhë xi jercu tu vengui chjí camahani rë me.

<sup>12</sup> Ngayujun ni ne, tsëhë xi cavaxijin nuju Nina, hacuaaha caviyujuxin nuju me, hacuaaha hmu cacun nuju me ne, vëhë xi meje rë xi tjin nuju cjuayumatacun cojo xingun, meje rë xi tjin nuju cjuandaja cojo xingun, meje rë xi tjin nuju cjuajeya cojo xingun, meje rë xi yehe tacún cojo xingun. <sup>13</sup> Hacuaha meje rë xi scaa nuju cojo xingun hacuaaha ninchatuhun xingun, sa xi tjin mé tsëhë xi cuinchunjyun xingun. Sacuatjin rë Nai naja xi catsinchataha nuju me ne, cuanitjin ni nuju ngayujun ni cojo xingun. <sup>14</sup> Peru xi jercu vengui chjí sa rë xi cuma rë yëjë ni cjua xi cachjá cojo nuju jan ne, meje rë xi tjin nuju

cjuahmutacun cojo xingun ta, xi cuatjin nihñu ne, hatuxa jercu ndaja cuma tangun cjuatacun nuju cojo xingun xingu xingu ngayun.

<sup>15</sup> Cjuajeya xi casua nuju Cristu ne, catitexa rë cjuatacun nuju ta, tsëhë xi Nina ne, cavaxijin nuju me cojo sa xi cuinechun cojo cjuajeya ngajñi nuju cojo xingun. Hane meje rë xi yasen yasen ni ne, tuhun nacuechji rë Nina. <sup>16</sup> Cjuandajyihi xi chja tsëhë Cristu ne, catiyujucahndë cahntsua xahasen nuju. Ticuyun xingun hacuaha tiyujun xingun cuidadu xingu xingu ngayun cojo yëjë cjuahasen xi sua nuju Nina. Sún nguñaja tacún tsëhë Nina, sacuaha salmo cojo himno cojo yëjë sa xcusun xi sen xi tsëhë Nina, sacuaha ngu nacuechji rë me xi tuhun.

<sup>17</sup> Tu mé ni xi cuinújun o xi nihñu ne, catama sacuatjin meje rë xi sahmi xuta xi tjin tangun cjuatacun rë me cojo Nai naja Jesús. Hacuaha tuhun nacuechji rë Nina Nahmi naja, xi nihñu oración cojo Jesús.

*Chja Pablo hacutjin meje rë xi nihña cojo xingueen cahntsua ndya naja*

<sup>18</sup> Ngayujun ni yachjin ne, tinuhyun tsëhë xihin nuju ta, tsëhë xi cuatjin ndatjin xi cuma ta, tjin tangun cjuatacun nuju cojo Nai naja. <sup>19</sup> Ngayujun ni xihin ne, hacuaha meje rë xi nihmu tacún chjuun nuju, hacuiin choho xcusun nuju cojo rë me.

<sup>20</sup> Ngayujun ni xi siucuaha xutacha nuju ne, tinuhyun tsëhë me tsëhë yëjë ni xi cuichja me cojo nuju ta, hya xi cuatjin nihñu ngayujun ni xi tjin tangun cjuatacun nuju cojo Nai naja Jesús ne, jercu chuya rë Nina. <sup>21</sup> Ngayujun ni xi má yun nahmi ne, xicaningatjuntuun xi cuinújuntuhun rë quihndi nuju, ta sá tu sahmi chúvacacun.

<sup>22</sup> Ngayujun ni xi má yun mosu hndixahan ne, tinuhyun tsëhë xuta xi má me nai nuju tsëhë yëjë ni xi cuichja me cojo nuju, hacuiin suvá hya xi tivutsejen me ngayun, sacuatjin sahmi yahnga xuta xi meje cuaxëndaja suvá me yojo rë me xcun xuta, ta tinuhyun tsëhë me cojo ngu xahasen tyjahi ngatsë rë xi chjuhuncun Nai naja. <sup>23</sup> Tu mé ni xcusun xi nihñu ne, nihñu nguñaja tacún, sacuaha xi tinihñu tsëhë Nai naja, hacuiin tsëhë xuta ni. <sup>24</sup> Cuatjin nihñu, tsëhë xi ha hyun ta Cristu Nai naja ne, me vëhë cuechji nuju me ta hacui me xi tivisecun rë. <sup>25</sup> Peru sa xi tjin ngajñi nuju xi hatuxa choho tisahmi ne, Nina sahmi rë me castigu tucu xcusun tsehen xi casahmi me, hacuaha Nina ne, hatuxa quixi jain me cojo cjuatacun rë me xi tsichuva me yëjë ni xuta cojo cjuatacun rë me.



## 4

<sup>1</sup> Ngayujun ni xi má yun nai tséhë mosu hndixahan ne, ndaja nihñu cojo mosu hndixahan xi siu ntsun, sacuatjin mameje rë ta, tséhë xi ha hyun xi hacuaha cojo ngayun ne, tjin nai nuju xi tacun ngajan ngahnga.

*Vitexa Pablo xi nihña oración hacuaha cuisiajme cjuandaja*

<sup>2</sup> Ngayujun ni ne, nihñu oración yasen yasen ni. Mijí rë xi cuma tséhë tacún. Tuhun nacuechji rë Nina. <sup>3</sup> Hacuaha nihñu oración ngatsë niji. Chjahyun rë Nina xi tuxaha ndiya xi cuisiajmi cojo xuta, cojo sa xi cuma tihín cumachaya rë me tséhë cjuatahahma ndajyihi xi chja tséhë Cristu. Hane ngatsë rë cjuandajyihi jan ne, tejñaya ndavaya. <sup>4</sup> Nihñu oración ngatsë naha, cojo sa xi ngahan ne, cuichjátë cjuatahahma jan, sacuatjin meje rë xi cuichjá.

<sup>5</sup> Hacuaha yëjë ni xuta xi hacuiin ladu rë Nai naja me ne, meje rë xi ndaja nihñu cojo rë me cojo yëjë ni cjuahasen xi tjin nuju, yëjë ni hora xi cuma. <sup>6</sup> Hacuaha yëjë ni cjuavisiajmi nuju ne, meje rë xi cojo cjuandaja cuinújun yëjë ni hora. Xi cutjin nihñu ne, sacú cumachaya nuju hacutjin chjayunngun cjuat tséhë xingu xingu xuta xi cuacun jan.

*Tsinguijnetaha Pablo cjuat rë me*

<sup>7</sup> Yëjë ni xi tivátju tijima ne, Tíquico ne, sua me cumachaya nuju. Me vëhë ne, ngu xuta ladu rë Jesús xi jercu vinga ná, hacuaha jercu ndaja cjuinduju me tivisecoo me ngahan xi tangun fahacuenda me cojo ná xa xi vitexa Cristu. <sup>8</sup> Titsingátju nuju me, cojo sa xi ngayujun ni ne, cumachaya nuju tsijin hacuaha cojo sa xi sua nuju me cjuajyëtacun. <sup>9</sup> Hane cojo me vëhë ne, titsingátju nuju cha Onésimo, cha nangui nuju. Cha vëhë ne, cha ladu rë Nina xi jercu ndaja cjuinduju cha cojo ndiya rë me, hacuaha jercu vinga ná cha. Catsijo me xi cuacun vë ne, sua me cumachaya nuju tséhë yëjë ni xi cavatju nguehe camá.

<sup>10</sup> Aristarco ne, me xi jiyatangun cojo ná nguehe ndavaya ne, tsingatju me nina nuju. Hacuanitjin ni Marcos, xicjin Bernabé. Ha cachjá cojo nuju tséhë Marcos jan. Vëhë xi sa xi cjuehe me nangui nuju ne, chjuhunntsun me cojo cjuandaja. <sup>11</sup> Jesús, me xi hacuaha hmí rë Justo ne, hacuaha tsingatju me nina nuju. Ngajñi rë yëjë ni xuta tjë rë Israel ne, jyan tu tu ni me vëhë xi tisahmitangun cojo ná xa, cojo sa xi xuta ne, tsingatihin me xi Nina cuitexa rë me. Jyan me xi cuacun jan ne, casua ná me cjuajyëtacun. <sup>12</sup> Hacuaha Epafras, me xi tangun nangui nuju cojo hacuaha fahacuenda tséhë xa xi vitexa Cristu ne, tsingatju me nina nuju. Me vëhë ne, jercu sahmi me oración ngatsë nuju yasen yasen ni, cojo sa

xi ngayujun ni ne, cuma tyjahi camahani ngayun xcun Nina, hacuaha cojo sa xi ndaja cuijnercun yějě ni hacutjin xi meje rě Nina. <sup>13</sup> Ngahan ne, cuichjá cojo nuju ta Epafra jan ne, jercu vityanguicacun me tsujun cojo xuta Laodicea cojo xuta Hierápolis. <sup>14</sup> Hacuaha tsingatju nina nuju Demas cojo Lucas, me xi doctor xi jercu vinga ná.

<sup>15</sup> Tuhun rě ngu nina yějě ni xuta ladu rě Nina ngajan nandya Laodicea. Hacuaha tuhun rě Ninfa ngu nina cojo yějě sa me xi matangun me ndava na. <sup>16</sup> Hane xi cjuě chutahaya tě rě xujun vi ngajñi nuju ne, nihñu xi hacuaha catichutahaya tě rě ngajñi rě xuta ladu rě Nina ngajan nandya Laodicea. Hacuaha xujun xi catsingátju tsěhě xuta Laodicea ne, hacuaha chutahayun tě ngajñi nuju. <sup>17</sup> Hane tinújun cojo Arquipo cjuá vihi: “Catjiniya tacún xi nihñuchuhun xa xi casatěxa nuju, xi tjin tangun cjuatacun nuju cojo Nai naja.” nina vi.

<sup>18</sup> Ngahan, Pablo ne, titsihindu nuju cojo hntsa ngahan ngu nina vi. Ninguitsjun ná nguehe ndavaya. Nina ne, catisua nuju me cjuandaja.

## **Cjua xi titjun catsihindu San Pablo xi camá rë xuta nandya Tesalónica**

<sup>1</sup> Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi matangun ngayun tsëhë xi macjain nuju Nina Nahmi naja cojo Nai naja Jesucristu, ngajan nandya Tesalónica. Catisua nuju Nina cjuandaja cjuajeya.

### *Macjain ndaja rë xuta nandya Tesalónica*

<sup>2</sup> Jercu tihin nacuechji rë Nina Nahmi naja ngatsë nuju ngayujun ni, hacuaha hatuxa veyinnanguin nuju tu ya ni hya xi nihñi oración. <sup>3</sup> Hya ninguitsjin hacutjin jercu nihñu xa tsëhë xi ndaja macjain nuju, hacutjin jercu nihñu cjuandaja tsëhë xi hmu tacún Nina cojo xuta yumacujun, hacuaha hacutjin jercu ndaja ticaa nuju xi tinechunyun rë Nai naja Jesucristu. <sup>4</sup> Ngayun ne, jemu hmucacun nuju Nina, hacuaha hyin xi cavaxijin nuju me. <sup>5</sup> Cuatjin ta xi catihin camachaya nuju cjua rë Nina ne, hacuiin suvá cjua ta hacuaha Hasen rë Nina ne, casua niji ngahñu xi cuatjin canújin cojo nuju cjua jan xi hatuxa cjuaquixi. Ngayun ne, ha hyun hacutjin xcusun niji ngajñi nuju, xi ndajyihí xi cuma nuju.

<sup>6</sup> Ngayun ne, sacuaha canihñi hacuaha sacuaha casahmi Nai naja ne, ha cuanitjin ni canihñú xi cachjuhunntsun cjua jan cojo cjuasua xi casua nuju Hasen rë Nina, handasa jemu choho cavatjun camá. <sup>7</sup> Cuatjin camá xi ngayëjë ni me xi macjain rë Nina ngajan ladu tsëhë Macedonia cojo Acaya ne, hisca casahmi me sacuatjin canihñú ngayun. <sup>8</sup> Hisca hya xi titjun ngayun cachjuhunntsun cjua rë Nai naja ne, sehe jercu cjin quiji cjua jan, peru hacuiin tu ngajan ni Macedonia cojo Acaya ta hisca jingujyë ni. Hacuaha camachaya rë xuta xi jemu ndaja camacjain nuju tsëhë Nina. Cuatjin ne, ha quihndë tsajin sa mé xi cuinújin ta <sup>9</sup> suvá xuta ne, chja me hacutjin cojo cjuandaja cachjuhunntsun niji hacuaha hacutjin caviyujunxun nina xi macjain nuju titjun, hane camacjain nuju ngu Nina xi cjuaquixi xi quicun. <sup>10</sup> Hacuaha chja me hacutjin tinechunyun rë Jesús, Quihndi rë Nina, xi cuya me tsëhë ngahnga. Jesús jan ne, me vëhë xi catsicuya Nina cjuahñu rë me xi cavaxë Nina me ngajñi rë nima, hacuaha me vëhë ni xi cuaxëtje naja me tsëhë castigu xi nduva.

## **2**

*Xa xi casahmi Pablo ngajan nandya Tesalónica*

<sup>1</sup> Ngayun ne, ha hyun ta xi catsanguin tjenguin nuju ne, hacuiin tu mahya ta <sup>2</sup> handasa jemu choho cavatjin camá ngajan nandya Filipos sacuatjin xi ha hyun, peru camacjain tacuin xi canújin cojo nuju cjua rë Nina ta, tsëhë xi Nina jan ne, cavisecoo niji me, handasa jemu camacjan rë yahnga xuta. <sup>3</sup> Hacuaha xi nújin cojo nuju ne, hatuxa cojo cjuaquixi cojo cjuandaja. Hacuuiin vindachin. <sup>4</sup> Nina ne, me vëhë xi cafachuva niji me, hane cachuya rë me tsijin, hacuaha casua me ngayin xa xi cuinújin cjua rë me cojo xuta. Vëhë xi cuatjin nújin. Hacuuiin xi xuta chuya rë me ta xi Nina chuya rë me, tsëhë xi Nina ne, me vëhë xi vëë me cjuatacun niji cojo xahasen niji. <sup>5</sup> Ngayun ne, ha hyun ta hacuiin cjuahaxi xi canújin cojo nuju, hacuaha vëë Nina jain ta hacuiin xi tujún meje niji. <sup>6</sup> Hacuuiin jemu meje niji xi cjuaharcun niji xuta, sa ngayun sa xuta xi yahnga, handasa tjin niji chuva rë xi chjaharcun niji tsëhë xi apóstol rë Cristu ngayin. <sup>7</sup> Peru jemu cojo cjuajeya cavinechin ngajñi nuju, sacuaaha xi sahmi ngu naa xi sahmi cuidadu me quihndi rë me. <sup>8</sup> Jemu cavinga niji ngayun. Hacuaha meje niji xi hacuiin tu suvá cjua rë Nina xi canújin cojo nuju ta hisca mé sa cjuacjintacun ne, cavejñitacuin xi cuisecuin nuju ta, tsëhë xi jemu cachuya niji tsujun. <sup>9</sup> Ngayun ne, vitsjen rë nuju tsëhë xi jemu jyë xa canihñi. Canihñi nixtin nixten, tsëhë xi hisca ngu ngayun mijí tihin nuju ngu cjuandya hya xi canújin cojo nuju cjua rë Nina.

<sup>10</sup> Ngayun xi macjain nuju Nina ne, cahyun, hacuaha hisca Nina ne, vëë jain me ta jemu ndaja cavinechin cojo nuju. Hisca ngu jyë cumaji nicanuju niji. <sup>11</sup> Hacuaha ngayun ne, ha hyun hacutjin canújin cjuandaja cojo nuju jima ngu ngayun, sacuaaha chja ngu nahmi cojo quihndi rë me. <sup>12</sup> Hacuaha catihin nuju cjua xi nchunchujun ni ne, nihñu cjuandaja sacuatjin meje rë ndiya rë Nina ta, Nina ne, me vëhë xi vaxijin me ngayun xi sacú nuju cahndé hiscan xi me vëhë tacun tsja me. Ngajan ne, jemu cahndé ndajyihi camahani.

<sup>13</sup> Vëhë xi jercu tihin nacuechji rë Nina, tsëhë xi hya xi canuhyun cjua rë Nina xi canújin cojo nuju ne, camacjain nuju cjua jan. Hane ndatjin sacuatjin caningatuhuntacun ta cjua rë Nina jain, hacuiin cjua rë ngu xuta. Hacuaha jemu ndajyihi tsujun xi cuatjin macjain nuju cjua jan. <sup>14</sup> Hacuaha ngayun ne, cavatjun camá sacuaaha cavatju me camá titjun, me xi camacjain rë Jesucristu ngajan nangui Judea. Sacuaaha xuta nangui rë me ne, jercu casuandya rë me, hacuanitjin ni xuta nangui nuju ne, jercu casuandya nuju me. <sup>15</sup> Nai naja Jesús ne, catsiquehen xuta nangui Judea me, hacuanitjin catsiquehen xuta jan xutachanga xi cachja cjua rë Nina hatsëë. Hisca cojo ngayin ne, hacuaha casuandya niji me. Chuyiin

rë Nina tsëhë xuta jan xi cuatjin sahmi me. Hacuaha choho vëë me me xi yahnga sa ta, <sup>16</sup> tsëhë xi mijí sua me cahndë xi cuinújin cjua rë Nina cojo xuta xi hacuain tsëhë nangui Judea ne, catamacjain rë me hacuaha cuetjutje me. Jercu tu jyë camahani jyë rë me xi cuatjin sahmi me. Peru quihndë ne, cavechu nixtin xi cuma me castigu xi cuichja Nina.

*Pablo ne, meje cjue scutsejen nga me xuta Tesalónica*

<sup>17</sup> Hya xi ha catsanguinxin ngu jo nixtin tsujun ne, handasa cahyiín nuju, peru hatuxa ninguitsjin nuju cojo xahasen niji. Hacuaha jercu meje cuanguin tjenguin nga nuju. <sup>18</sup> Cavejñi xi cuanguin. Ngahan Pablo ne, ngu jo ndiya ne, cavejñá xi cjué, peru Satanás ne, casuaain cahndë. <sup>19-20</sup> ¿Mé ngatsë rë xi tivinechinyin rë Jesús? ¿Mé ngatsë rë xi tjin niji cjuasua? ¿Mé ngatsë rë xi ndaja cuichja xuta tsijin? Ngatsë nuju ngayun xi camacjain nuju cjua rë Nina xi canújin cojo nuju. Ngatsë rë vëhë xi hya xi cuinduva Jesús Nai naja ne, jemu ndaja cuichja xuta tsijin hacuaha jercu ndaja cuma niji.

### 3

<sup>1</sup> Xi camá ne, tsëhë xi ha quihndë cacain niji xi meje niji cumachaya niji hacutjin tivatjun tijima ne, vëhë xi camangutacuín xi cuinechin suvin ngajan nandya xi hmí Atenas. <sup>2</sup> Hane caningatjin cha Timoteo xingueen xi quiji tjengui cha ngayun. Cuatjin caningatjin cha ta, tsëhë xi mosu rë Nina cha, xi chja cha cjua ndajyihi tsëhë Cristu. Cuatjin caningatjin cha, cojo sa xi tsinguixi nuju cha hacuaha cuichja sa cha cjua cojo nuju, cojo sa xi hitsë sa ndaja cumacjain nuju <sup>3</sup> hacuaha hacuain cuma chuva tacún ngajñi rë cjuacjintacun xi tivatjun tijima. Hane ngayun ne, ha hyun xi hatuxa cuatjin cuatjuun cjuacjintacun xi choho scuëë naja xuta, <sup>4</sup> tsëhë xi hisca hya xi cavinechin cojo nuju ne, hya catihin camachaya nuju xi hatuxa cuatjun cjuañihi. Xi camá ne, cuatjin camá, sacuatjin xi ha hyun. <sup>5</sup> Hane ngahan ne, xi meje xati ná cumachaya ná hacutjin tivatjun tijima, vëhë xi catsingátju cha Timoteo, quiji cjaha cha cjua sa xi ngayun ne, macjain cuaha nuju. Cuatjin casahme, tsëhë xi camacjíncácun ngatsë nuju tsëhë xi sa cavindacha nuju naain xi cuinengun ngajñi cjuatsehen ne, xa xi canihñi ne, tu mahya.

<sup>6</sup> Peru quihndë ne, cavuya cha Timoteo xi quiji tjengui cha ngayun. Hane ndajyihi cjua yaha cha tsujun, tsëhë xi macjain cuaha nuju cjua rë Nina hacuaha hmutacun cuaha yëjë ni xuta. Hacuaha cachja cha cojo niji ta ninguitsjun cuaha niji cojo cjuandaja, hacuaha xi jercu meje chun niji sacuahatjin jercu meje chin nuju. <sup>7</sup> Cuatjin xi handasa jemu ndya tivatjin

tijima cojo cjuañihi cojo cjuaxti, peru jemu casacu niji cjuetacun, tsëhë xi ngayun ne, macjain cuaha nuju. <sup>8</sup> Quihdë ne, jercu tu ndaja camahani cuma niji ngayin, sa xi ngayun ne, ha ndatjin siu nuju cjuatacun nuju cojo Nai naja. <sup>9</sup> Hacuaha jemu meje tihin nacuechji rë Nina naja tsëhë yëjë ni cjuasua xi casua niji me ngatsë nuju. <sup>10</sup> Nixtin nixten ne, jemu tichjahyin rë Nina xi sua me cahndë xi tjin ngu hora tjin ngu nixtin sacú xingueen ne, cuicuyin sa nuju cjuarë Nina xi cjëë cumachaya nuju.

<sup>11</sup> Meje niji xi Nina Nahmi naja cojo Nai naja Jesús ne, catisecoo niji me xi cuechintihin nuju. <sup>12</sup> Hacuaha Nai naja meje rë me xi catamajyë sa cjuahmutacun ngajñi nuju cojo xingun hacuaha cojo xuta xi yahnga sa, sacuatjin ngajñi naja cojo nuju. <sup>13</sup> Nina Nahmi naja catisahmi me cuatjin, cojo sa xi tsajin jyë nuju xcun me hya xi cuya Nai naja Jesús cojo yëjë ni ángel rë me.

## 4

### *Xcusun xi Nina chuya rë me hacutjin xi nihña*

<sup>1</sup> Quihdë ne, ha tinihñú hacutjin xi cavicuyin nuju xi meje rë xi cumá, cojo sa xi chuya rë Nina tsujun. Vëhë xi jemu nújin cojo nuju tsan ta hitsë sa nihñu cuatjin ta, tsëhë xi hatuxa cuatjin meje rë Nai naja Jesús.

<sup>2</sup> Hane ngayun ne, ha hyun cjuarë Nai naja Jesús xi ha cavicuyin nuju. <sup>3</sup> Cjuatacun xi meje rë Nina ne; xi cuma tyjahi cjuatacun nuju, xi canindesuun cojo chjuun xi xín, xi canindesuun cojo xihin xi xín. <sup>4</sup> Meje rë me xi jima ngu ngayun ne, catisacu chjuun nuju, peru cojo cjuandaja, xi tyjahi cjuatacun nuju. <sup>5</sup> Mijí rë xi cojo cjuatsehen, sacuatjin sahmi xuta xi hvíin me Nina. <sup>6</sup> Sacuaha cjuacjintacun vëhë ne, xi canihñuu xi cuindachun rë xingun ta, tsëhë xi Nai naja ne, sahmi me castigu ngayëjë ni cjuatsehen vëhë, sacuatjin xi ha canújin cojo nuju. <sup>7</sup> Hacuaha hacuüin cajindaya naja Nina xi cjuatsehen nihña ta cajindaya naja me xi fë jyë naja. <sup>8</sup> Vëhë xi me xi tsitjungui cjuatacun vëhë ne, hacuüin xuta tsitjungui me ta Nina xi tisua nuju Hasen rë ne, vëhë tsitjungui me.

<sup>9</sup> Quihdë ne, tsajin sahmi ngu jyë xi nihindin nuju xi nihñu hmutacun xingun ta, tsëhë xi suvá Nina ne, ha cavicuya nuju me hacutjin meje rë me xi nihñu hmutacun xingun. <sup>10</sup> Hacuaha tinihñú jain hmutacun yëjë ni xuta xi macjain rë Nina ngajan yëjë ni nandya tsëhë distritu Macedonia. Peru nújin cojo nuju ta cuatjin ndaja sa nihñu. <sup>11</sup> Hacuaha tejñu tacún xi jyuu nechun, nihñucuendun xi tsujun. Peru nihñu xa, sacuatjin xi ha cavicuyin nuju. <sup>12</sup> Sa xi cuatjin nihñu ne,

hisca cojo xuta xi macjaain rë Nina ne, cjuaharcun nuju me, hacuaha sacú nuju yějë ni xi cuma meje nuju.

### *Cuinduva nga Nai naja*

<sup>13</sup> Quihndë ne, meje niji xi cuma chaya nuju hacutjin cuatju nima xi ha cahme, cojo sa xi hacuiin jemu choho cuma nuju sacuatjin rë xuta xi sacuiin rë me ngu cjuetacun, tsëhë xi macjaain rë me Nina. <sup>14</sup> Tsëhë xi macjain naja xi cahme jain Jesús hacuaha cavascaya nga rë me ne, vëhë xi hacuaha macjain naja xi Nina ne, tsingascaya rë me nima xi xcun cjuahñu rë camacjain rë me Jesús.

<sup>15</sup> Vëhë xi nguehe tihin cumachaya nuju ngu cjua tsëhë Nai naja ta jarë ngayaan xi nechan quicun hisca xi cuya Nai naja ne, hacuiin cuma titjun ngayaan tsëhë me xi ha cahme. <sup>16</sup> Tsëhë xi suvá Nai naja ne, cuinduvajne me tsëhë ngahnga. Cuinuhya rë sacuaha cjua rë ngu me xi vitexa jain. Cuinuhya rë sacuaha cjua rë ngu ángel xi ma titjun. Cuinuhya rë sacuaha xta rë tyjo xi tsëhë Nina. Xi camá ne, nima xi camacjain rë me Cristu ne, tjun tjun me cuascaya rë me, <sup>17</sup> sehe ngayaan xi nechan quicun ne, cjuaha Nina ngayaan ngajñi rë yufí, hacuaha cojo nima xi cuacun jan, cumatangun ngayejen ni cojo Nai naja ngajan ngajñi tjo. Sehe yějë ni hora yějë ni nixtin cuinechan cojo rë Nai naja. <sup>18</sup> Vëhë xi meje rë xi tinújun cojo xingun cjua vihi ne, sacú nuju cjuetacun.

## 5

<sup>1</sup> Peru sacuaha nixtin xi cuma cjuacjintacun vëhë ne, sáhmiu ngujoyë nihindin nuju ta, <sup>2</sup> tsëhë xi ngayun ne, ha hyun ta, hya xi cuya Nai naja ne, jemu cjuercun camahani rë ngayëjë ni xuta, tsëhë xi tu ñahñu ni cuinduva me. <sup>3</sup> Hya xi cuichja xuta xi macjain rë Nina ta: “Jemu ndatjin ta jemu jyuu tjin”, peru hya ne, tu ñahñu ni ne cuatju me ngu cjuañihi, sacuatjin vatju ma ngu chjuun xi tu ñahñu meje tsin quihndi rë me. Hane cuatjin cuatju me ta hisca ngu me cuatjinhngaain me. <sup>4</sup> Xi nguixun cjuehe ngu chëjë ne, jemu cjuercun naja. Peru ngayun ne, hacuiin jñu camaha tsujun xi nihñu cjuatsehen, xi cjuercun nuju hya xi cuechutaha nixtin xi cuya Nai naja ta, <sup>5</sup> ngayujun ni ne, nechun sacuaha hasen rë nguinxtin. Ngayaan ne, hacuiin jñu camaha tsajan xi nihña cjuatsehen. <sup>6</sup> Cuatjin xi mijí rë xi nechan sacuaha xi titsjuñafen, sacuaha viyuju yahnga xuta xi macjain rë me Jesús ta, meje rë xi nechan quicun, nguñajatacun. <sup>7</sup> Hatuxa xcusun naja xi nguixun xi tsjuñafen. Hacuaha xcusun rë xuta chihi ne, nguixun ma chihi me. <sup>8</sup> Peru ngayaan ne, tsëhë xi nechan sacuaha ndavá rë nguinxtin ne, vëhë xi meje rë xi nechan nguñajatacun. Meje rë xi ndaja cumacjain naja hacuaha nihña hmu tacun

xingueen. Xi cuatjin nihña ne, hacuaha vëhë ne, cuisecoo naja ta cuetjo naja Nina. Hacuanitjin ni meje rë xi cuetahan tacun ta cjuaquixi xi cuaxëtje naja Nina. <sup>9</sup> Cuatjin meje rë ta, tsëhë xi Nina ne, hacuiin cavaxijin me ngayaan xi cuatjun castigu rë me ta, cavaxijin naja me xi cuaxëtje naja me, ngayaan xi macjain naja Nai naja Jesucristu ta, <sup>10</sup> Jesucristu ne, cahme me ngatsë naja, cojo sa xi tangun cuinechan cojo rë me, sa xi nechancuaan cjuahñu o sa xi nima camá ngayaan. <sup>11</sup> Vëhë xi meje rë xi tinújun cojo xingun cjua vëhë, hane sacu nuju cjuetacun, sacuatjin xi ha tinihñú.

*Pablo ne, tisua me cjua xuta xi macjain rë Nina*

<sup>12</sup> Ngayun ne, nihñu favor ne, chjuhuncun rë xuta xi cavaxijin Nai naja xi cuma titjun tsujun, xi sahmi xa ngajñi nuju, xi tsinguixi nuju. <sup>13</sup> Jemu meje rë xi chjuhuncun me hacuaha nihñu hmu tacun me tsëhë xi tisahmi me xa vëhë. Ndaja tinechun cojo xingun.

<sup>14</sup> Hacuaha nújin cojo nuju ta xuta xi mijí sahmi xa ne, tinújun cojo rë me catisahmi me xa. Hane xuta xi jima chuvacacun ne, tinújun cojo rë me, hane sacú rë me cjuetacun. Hacuaha tisecuun rë me xi cjëë ndaja cumacjain rë. Hane tjin nuju cjuajeya cojo ngayëjë ni me.

<sup>15</sup> Hacuaha nechun cuidadu xi hacuiin choho nihñu cojo rë me xi choho sahmi cojo nuju ta, xi meje rë ne, yëjë ni hora yëjë ni nixtin ne, suvá cjuandaja nihñu cojo xingun hacuaha cojo yëjë ni xuta.

<sup>16</sup> Ndaja catama nuju yëjë ni nixtin. <sup>17</sup> Meje rë xi jemu nihñu oración. <sup>18</sup> Hacuaha hatuxa tuhun nacuechji rë Nina, handasa choho cuatjun cuma. Cuatjin meje rë Nina xi nihñu, ngayujun ni xi macjain nuju Jesucristu.

<sup>19</sup> Hacuiin nitjunngun xcusun xi sahmi Hasen rë Nina ngajñi nuju. <sup>20</sup> Hacuiin nitjunngun cjua rë me xi chja cjua xi casua Nina. <sup>21</sup> Peru chjuhunchuvun ngayëjë ni cjua. Hane jarë cjua xi ndaja ne, vëhë tiseñuju hacuaha tinuhyun. <sup>22</sup> Peru tétjuncun tsëhë ngayëjë ni cjuatsehen.

<sup>23</sup> Nina xi tsicjë me cjuachan ne, catisahmi tyjahi tyjahi me hasen nuju cojo cjuatacun nuju cojo yojo nuju, cojo sa xi nixtin hya xi cuya Nai naja Jesucristu ne, tsajin camahani jyë nuju. <sup>24</sup> Me xi tivaxijin nuju ne, cjuaquixi xi chja me. Hatuxa sahmichihin me hacutjin xi chja me.

*Cjua xi cuijnetaha*

<sup>25</sup> Ngayun ne, nihñu oración ngatsë ni.

<sup>26</sup> Nuvuncjun yëjë ni me xi macjain rë Jesús xi tuhun rë me ngu nina ni, sacuaha xcusun naja.



<sup>27</sup> Tsëhë xi cavaxijin ná Nai naja ne, vëhë xi vitéxa nuju xi nújun cojo xujun vi xi cuihdë yëjë ni me xi macjain rë Jesús.

<sup>28</sup> Cjuandaja rë Nai naja Jesucristu ne, catisehen xahasen nuju.

## Cjua xi ma jo catsihindu San Pablo xi cumá rë xuta nandya Tesalónica

<sup>1</sup> Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi ma tangun ngayun tsëhë xi macjain nuju Nina Nahmi naja cojo Nai naja Jesucristu, ngajan nandya Tesalónica. <sup>2</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya.

*Hya xi cuinduva Cristu ne, Nina ne, sahmi me castigu xuta xi tjin jyë rë*

<sup>3</sup> Hachu tjin niji xi tihin nacuechji rë Nina ngatsë nuju ngayun. Hacuaha ndatjin xi cuatjin nihni ta, tsëhë xi jemu xcun tivangun xi macjain nuju, hacuaha hitsë sa jima tsejen cjuahmutacun xi tjin nuju jima ngu ngayun cojo xingun.

<sup>4</sup> Vëhë xi ngayin ne, hya xi ma tangun me xi macjain rë Nina ne, nújin cojo rë me ta jemu sua má niji tsëhë xi ngayun ne, jemu yehe tacún hacuaha jemu macjain nuju, handasa jemu yehe cjuañihi xi tivatjun tijima. <sup>5</sup> Cuatjin ma tsejen xi Nina ne, fahachuva naja me cojo cjuaquixi. Hane xi cuijnetaha ne, cuichja Nina ta sacú nuju ngu cahndë hiscan xi me vëhë má titjun me, ta ngatsë rë vëhë xi jercu choho tivatjun tijima.

<sup>6</sup> Xi tsingatahacacun Nina ne, yëjë ni xuta xi choho tisahmi cojo nuju ne, ndatjin xi hacuaha cuma ngojo cojo rë me, <sup>7</sup> hacuaha ndatjin xi ngayaan xi choho tivatjuun tijima ne, sacú naja ngu cahndë xcun Nina xi chjahanjendan, hya xi Nai naja Jesús cuya me tsëhë ngahnga ngajni rë ngu ndihi jyë cojo ángel rë me xi jercu hñu ngahñu rë. <sup>8</sup> Hya sahmingojo me cojo xuta xi macjaain rë Nina, xi hacuaha hndiin me tsëhë cjua ndajyihî tsëhë Nai naja Jesús. <sup>9</sup> Hane castigu xi cuma xuta xi cuacun vë ne, cuaxëxin Nina me ngu ladu hiscan xín, xi tsajin nu tsajin nixtin xi cuechu me xcun Nai naja. Cuatjin ne, xi scuiin me hasen ndajyihî cojo ngahñu rë Nai naja. <sup>10</sup> Cuatjin cumá nixtin xi cuinduva Nai naja xi cuma jyë cuma hnga me. Hya ne, cuinduva me, cojo sa xi ngayëjë ni xuta xi camacjain rë me ne, cjuaharcun rë me hacuaha cjuercun rë me, hisca cojo ngayujun ni ta tsëhë xi camacjain nuju cjua ndajyihî xi canújin cojo nuju.

<sup>11</sup> Vëhë xi ngayin ne, jercu chjahyin rë Nina naja xi ngayun xi má yun ladu rë me ne, catamachji rëhë rë me ngayun. Hacuaha chjahyin rë Nina xi cojo ngahñu rë me ne, cuetjucaa jain yëjë ni cjuandaja xi ningatuhuntacun hacuaha yëjë ni xa xi nihñu tsëhë xi macjain nuju me. <sup>12</sup> Hacuaha xi cuatjin

cumá ne, xuta xi vutsejen me ne, sahmi jyë sahmi hnga me Nai naja Jesús, hacuaha ngayun ne, cuma yehe cuma hnga ngayun ngatsë rë cjuandaja rë Nina naja cojo cjuandaja rë Nai naja Jesucristu.

## 2

### *Cuinduva ngu cha tsehen*

<sup>1</sup> Quihdë ne, ha hyun xi Nai naja Jesucristu ne, cuinduva nga me xi sahmi tangun naja me. Vëhë xi nújin cojo nuju ta <sup>2</sup> hacuiin ngutjen cumacjintacun, hacuiin rcun cuma, sa xi sacú nuju cjua xi ha cavechu nixtin xi cafehe Nai naja. Handasa cuatjin cuichja xuta cojo nuju, o sa xi cuichja me xi cuatjin casua Nina me cjuatacun, o sa xi chjuhunntsun ngu xujun xi cuichja cuatjin sacuaha xi ngayin caningatjin, peru hacuiin cumacjain nuju ta, quixiin. <sup>3</sup> Catuun camahani cahndë xi cumandacha ngayun, tsëhë xi chaja sa xi cuechu nixtin vëhë ne, titjun ne, jemu sahmi xuta condra Nina, hacuaha cuinduva ngu cha tsehen xi hatuxa cuechiin cha xcun Nina. <sup>4</sup> Cha tsehen jan ne, choho scuëë cha yëjë ni xi hmí nina, hacuaha choho scuëë cha yëjë ni xi vechu chuva rë xi chjaharcun rë. Hane hisca cjue cha cuejña cha cahntsua yungun xi matitjun xi tsëhë Nina, hane cuichja cha ta cha vëhë nina cha.

<sup>5</sup> ¿Há vitsjiin nuju ta ha cachjá cojo nuju cjua vihi, hya xi cavitejña nandya nuju? <sup>6</sup> Hacuaha ha hyun ta xi ngutjen ne, tsajin cahndë cuinduva cha tsehen jan ta, cuinduva cha hisca xi cuechu nixtin xi Nina sua me cahndë. <sup>7</sup> Hacuaha cjuatsehen ne, hisca hyan, ta jemu tijima yehe. Hane hisca xi cjuexin me xi tivechja cahndë ne, <sup>8</sup> sehe hya cuinduva cha tsehen jan. Peru Nai naja Jesús ne, tsiquehen me cha cojo tjo hntsua ni me, hacuaha tsicjë me cha, hya xi cuinduva me. <sup>9</sup> Hya xi cuinduva cha tsehen jan ne, tsëhë xi Satanás tsingatju rë cha ne, jemu hñu ngahñu rë cha hacuaha jemu cjín xcusun cjuarcun ndacha xi sahmi cha. <sup>10</sup> Hacuaha sahmi cha yëjë ni xcusun cjuatsehen xi cuindacha cha xuta. Cuindacha cha xuta xi cuechiin xcun Nina ta, tsëhë xi mijí rë me chuyiin rë me cjuaquixi xi vaxëtje naja. <sup>11</sup> Ngatsë rë vëhë ne, sua Nina cahndë xi cumandacha xuta jan, cojo sa xi cumacjain rë me cjuandesu jan. <sup>12</sup> Ngajan xi cuma me castigu, ngayëjë ni me xi camacjaain rë cjuaquixi jan ta, tu cjuatsehen jan cachuya rë me.

### *Nina cavaxijin nuju me xi cuetjuntjun*

<sup>13</sup> Peru ngayin ne, meje rë xi jercu tihin nacuechji rë Nina ngatsë nuju ngayun xi hmucacun nuju Nai naja ta, tsëhë xi Nina ne, cavaxijin nuju me xi tjun tjun ngayun cuetjuntjun.

Ngatsë rë xi Hasen rë Nina ne, titsityjahi rë xahasen nuju xi tsajin xi cún nuju xcun Nina, hacuaha ngatsë rë xi macjain nuju cjuaquixi ne, vëhë xi cuetjuntjun. <sup>14</sup> Hya xi canújin cojo nuju cjuandajyihi rë Nina ne, hya cavaxijin nuju me xi cuetjuntjun. Cavaxijin nuju me xi sacú nuju cjuahñu ndajyihi sacuaha xi tjin rë Nai naja Jesucristu. <sup>15</sup> Vëhë xi nújin cojo nuju ta xi camacjiintacun, hacuaha xi canichayuun cjua xi cavicuyin nuju, cjua xi canújin jan cojo cjua xi canihindín jan. <sup>16</sup> Nai naja Jesucristu cojo Nina Nahmi naja ne, casahmi hmucacun me ngayaan, hacuaha cojo cjuandaja rë me casua naja me cjuetacun xi tsajin hora tsajin nixtin xi cjuë, hacuaha casua naja me ngu cjua ndajyihi xi nechayan ni rë nixtin xi cuetjucaa. <sup>17</sup> Me vëhë ne, catisua me cjuetacun xahasen nuju, hacuaha catisua nuju me ngahñu xi cuinújun hacuaha xi nihñu yëjë ni cjuandaja.

### 3

#### *Nihñu oración ngatsë niji*

<sup>1</sup> Quihndë ne, nihñu oración ngatsë niji, cojo sa xi cjua rë Nai naja ne, xati cuechu jingujyë ni, hacuaha cojo cjuasua cjuahatsja xuta cjua rë me, sacuatjin camá ngajñi nuju. <sup>2</sup> Hacuaha nihñu oración, cojo sa xi cuetjintjin tsëhë xuta tsehen ta, hacuiin ngayëjë xuta xi macjain rë me Nina. <sup>3</sup> Peru Nai naja ne, hatuxa quixi me cojo cjua rë me. Sua me yun ngahñu xi scaa nuju, hacuaha cuetjo nuju me, cojo sa xi tsajin mé cuma sahmi Satanás cojo nuju. <sup>4</sup> Ngatsë rë Nai naja ne, fë mangutacuin ta ngayun ne tinihñú jain, hacuaha nihñu sa cjua xi vitexin nuju. <sup>5</sup> Nai naja ne, catincha me cjuahmutacun rë Nina xahasen nuju, hacuaha catisua nuju me ngahñu rë Cristu xi scaa nuju tsëhë yëjë ni cjuacjintacun.

#### *Meje rë xi nihña xa*

<sup>6</sup> Quihndë ne, sacuahatjin meje rë Nai naja Jesucristu ne, vitexin nuju xi naxunxun yojo nuju tsëhë yëjë ni me xi jemu tsëhë me sahmi me xa, hacuaha xi sáhmi hacutjin xi cavicuyin nuju xi nihñu. <sup>7</sup> Ngayun ne, ha hyun ta meje rë xi nihñu ngu xa sehe sacú xi xinu, sacuatjin xi cahyun xi canihñí. Hacuiin tu jyuu ni cavinechinyinjñi ngajñi nuju ne, <sup>8</sup> hacuiin tu cjuatjo ni casacu niji niñu xi cachini ta, nixtin nixten ne, jercu canihñí xa, cojo sa xi hacuiin ngayun nihñu gastu ngatsë niji. <sup>9</sup> Handasa satë niji cahndë xi chjahyin nuju xi cuiseacun niji, peru cachjahyiin ta canihñíxin xa, xi cuejñí ngu xcusun xi cuatjin nihñu. <sup>10</sup> Hacuaha hya xi cavinechintihin cojo nuju ne, hya canújin cojo nuju ta: Me xi mijí sahmi xa ne, xi catuun sinë me. <sup>11</sup> Cuitjin tinújin cojo nuju ta, tsëhë xi

casacu niji cjuaxi ngajñi nuju ne, hinchajñi me xi sáhmii xa. Tu tsinguissehenjñi me xcun cjuacjintacun xi ña cuendaain rë me. <sup>12</sup> Ngajan xi vitexin rë me xi cuacun vë, sacuatjin meje rë Nai naja Jesucristu, xi catiyujujuu cjuatacun rë me, hane catisahmi me xa xi sacú sinë me.

<sup>13</sup> Hacuaha ngayun ne, xi camacjintacun tsëhë cjuandaja xi tinihñú. <sup>14</sup> Sa xi tjin jarë me xi mijí cuihndë cjuaxi tinújin xcun xujun vihi ne, chjuhuncuendun jarë me jan, hacuaha xi caninguisuunjñuu cojo rë me, sehe me vëhë ne, cuma sava rë me. <sup>15</sup> Peru hacuiin choho chun me ta, tuhun rë me cjuaxi cojo cjuandaja ta, tsëhë xi xingun me.

### *Cjuaxi cuijnetaha*

<sup>16</sup> Hane Nai naja, me xi tsëhë cjuajeya ne, catisua nuju me cjuajeya yëjë ni nixtin hacuaha xcun yëjë ni cjuacjintacun. Hacuaha Nai naja yaha nuju me ngayujun ni. <sup>17</sup> Suva ngahan, Pablo, tsihindu nuju ngu cjuaxi vi, xi tisuá nuju ngu nina. Hatuxa xcusun naha xi cuitjin tsihindu xcun yëjë ni xujun xi tsingátju. <sup>18</sup> Cjuandaja rë Nai naja Jesucristu ne, catisehen xahasen nuju ngayujun ni.

## Xujun xi titjun catsihindu San Pablo cha Timoteo

<sup>1</sup> Ngahan Pablo ne, apóstol tséhë Cristu Jesús má ngahan ta, tséhë xi cuatjin cavitexa Nina, me xi vaxëtje naja, hacuaha cuatjin cavitexa Cristu Jesús, me xi vetahan tacun. <sup>2</sup> Tsihindu ri xujun vihi, ngaye Timoteo. Ngaye ne, sacuaha quihndi ndaja naha ngaye ta, tséhë xi camacjain ri cjua rë Nina, hora xi cachjá cojo ri cjua jan. Nina Nahmi naja cojo Nai naja Cristu Jesús ne, catamayuma rë me ngaye, catisua ri me cjuandaja cjuajeya.

*Tjin xuta xi vicuya ngu cjuachacun xi machjiriin*

<sup>3</sup> Sacuahatjin xi ha cachjá cojo ri, hora xi cavëtju cëjë hiscan ladu tséhë Macedonia ne, tinechintehe sa ngajan nandya Efeso. Tjin ngu jo cha ngajan xi tivicuya cha cjuachacun xi hacjahi. Hane ngaye ne, titexe rë cha xi cuacun vë ta ha quihndë cuicuyaain sa cha cuatjin. <sup>4</sup> Hacuaha titexe rë cha ne, hacuiin cuetaharcu cha yëjë cuentu rë xutachanga naja ta, tséhë xi hacuiin yëjë xi cjuaquixi. Ngu jo cuentu xi cuacun vëhë ne, jemu nduju fi, hane tsajin mé machjirëhë ta suvá ni xi si vangui, hacuaha tsajin mé visecoo naja xi nihña hacutjin xi meje rë Nina. Tséhë xi macjain naja cjua rë Nina ne, vëhë xi hyan hacutjin xi Nina meje rë me xi nihña.

<sup>5</sup> Tichjá cojo ri xi cuatjin titexe rë cha xi cuacun vë, sehe cuma tyjahi xahasen rë cha, cuma ndajyihi cjuatacun rë cha, hacuaha cumacjain nguñajacacun rë cha. Xi cuatjin ne, hacuaha sacú rë cha cjuandaja xi cuma tsihmucacun xicjin cha. <sup>6</sup> Peru ngu jo cha xi cuacun vë ne, cachaja cha ndiya rë cjuaquixi, cavetjuxin cha tséhë cjuandaja jan, hane tu cjua xi machjiriin, vëhë tivisiajmi cha. <sup>7</sup> Meje sahmi cha maestru tséhë cjua xi cavitexa Nina xutachanga naja. Peru hvíin cha mé vijne cjua xi visiajmi cha, hisca suvá cha vijniircu cha cjua xi vicuya nguñaja nguñajacacun cha.

<sup>8</sup> Quihndë ne, ha hyan ta cjua xi cavitexa Nina jan ne, jemu ndaja. Peru meje rë xi cuijnercun, mé ngatsë rë xi Nina ne, cavitexa me cjua jan. <sup>9</sup> Nina ne cavitexa me cjua jan, peru hacuiin ngatsë rë xuta xi ndaja sahmi ta, ngatsë rë xuta xi choho sahmi, xuta xi hndiin tséhë ngu xuta xi matitjun tséhë, xuta xi cuendaain rë tséhë Nina, xuta xi sahmi cjuatsehen, cojo xuta xi faharcuaain rë Nina, xuta xi macjaain rë cjua rë Nina, xuta xi tsiquehen nahmi rë, tsiquehen naa rë, cojo sa tsiquehen xicjin. <sup>10</sup> Hacuaha cavitexa Nina cjua jan ngatsë rë xuta xihin xuta chjuun xi tjin chjuunnahña rë, xuta xi

xanda, xuta xi vinchahma ngu xuta sehe fehya tujún xuta rë, xuta xi chja cjuandacha cojo xicjin, xuta xi chja cjuandacha hisca xcun xutaxa rë, hacuaha xuta xi sahmi vihi sahmi vëhë xi matanguaain cojo cjuaquixi. <sup>11</sup> Peru cjuaquixi jan ne, matangun cojo cjua ndajyihî tsëhë Nina. Hacuaha Nina xi jercu ndaja me ne, me vëhë casua ná me cjua xi cuatjin cuichjá.

*Nacuechji rë Nina tsëhë cjuandaja rë me*

<sup>12</sup> Suá nacuechji rë Nai naja Cristu Jesús ta, tsëhë xi camangucacun me cojo ná xi casua ná me xa rë me, hacuaha tisua ná me ngahñu cjua xi scaa ná sahme xa jan. <sup>13</sup> Cuatjin casahmi me cjuandaja cojo ná quihndë, handasa hatsëe ne, jemu choho cachjá tsëhë me hacuaha jemu choho casahme, xi jemu yehe cjuañihî casuá rë xuta ladu rë me. Peru Nai naja ne, cama yuma rë me ngahan ta, tsëhë xi cjëe xi cumacjain ná me, hane vëhë xi hveen mé xi casahme. <sup>14</sup> Hane jemu casahmi camahani me cjuandaja cojo ná, xi casua me cahndë xi camacjain ná me hacuaha xi caveya me cjuahmutacun cahntsua xahasen naha. Cuatjin sahmi me cojo naja xi nihña tangun cjuatacun naja cojo Cristu Jesús.

<sup>15</sup> Cjua xi cuichjá nguehe ne, jemu cjuaquixi, hacuaha ndaja tjin xi cumacjain rë ngayëjë ni xuta ta, Cristu Jesús ne, canduva me nguehe ngasunhndë xi cuaxëtje me xuta xi sahmi cjuatsehen. Tsëhë yëjë xuta tsehen xi cuacun jan ne, ngahan hitsë sa tsehen ngahan. <sup>16</sup> Peru Jesucristu ne, camayuma rë me ngahan ta, tsëhë xi meje rë me xi cumachaya rë yëjë ni xuta ta jemu sahmi jyë cacun me cojo ngu xuta xi jercu sahmi cjuatsehen. Sacuatjin xi casahmi me cjuandaja cojo ná ne, hacuaha ni tjin sahmi me cjuandaja cojo yëjë ni xuta xi cumacjain rë cjua rë me. Sehe sacú rë xuta jan cjuahñu xatsë xcun Nina. <sup>17</sup> Vëhë xi meje rë xi hatuxa chjahanrcun rë Nina, ndaja cuinújan tsëhë Nina yëjë ni nixtin ta, me vëhë xi matitjun me, xi vitexa me yëjë ni nixtin ta, suvá ni me vëhë xi Nina me, hacuaha matsijin naja me. Hacuaha tsajin nixtin tsajin hora cueya me. Cuatjin jain.

<sup>18</sup> Ngaye Timoteo ne, sacuatjin cjuatacun xi ha cachja me xi hmí profeta tsiji hatsëe nixtin tsan ne, ha chuva vëhë ni tivitéxa ri xi nihñi. Hane cjuatacun vëhë ne, cumachjirëhë riji xcun xa rë Nina xi tinihñi sacuaha tjin machjirëhë ngu quicha ngajñi rë ngu si. <sup>19</sup> Mijí rë xi cuihin ngaxtin xi macjain ri cjua rë Nina ta, meje rë xi nihñicuende cjuatacun ndajyihî xi quichehe. Ngu jo xuta ne, casahmi cuendaain me cjuatacun ndajyihî xi cavaha me, hane cuatjin catsichaja me cjuatacun rë me, hacuaha ha quihndë macjaain rë me Jesucristu. <sup>20</sup> Cuatjin cavatju cha Himeneo cojo cha Alejandro camá.

Vëhë xi ngahan ne, casuá cahndë xi suandya hitsë Satanás cha xi cuacun vë, sehe cumachaya rë cha ta cuaintjin camahani xi choho chja cha tsëhë Nina.

## 2

### *Meje rë xi nihña oración*

<sup>1</sup> Vëhë xi nguehe cuichjá cojo ri ta jemu meje rë xi chjahan rë Nina cjuandaja, meje rë xi tahan nacuechji rë me, hacuaha meje rë xi nihña oración ngatsë rë yëjë ni xuta. <sup>2</sup> Meje rë xi nihña oración ngatsë rë xutaxa rë, hacuaha ngatsë rë ngayëjë ni xuta xi vítexa naja, sehe ngayaan ne, tsajin yo suandya naja suaxti naja, xi tsejen xi chjahanrcun rë Nina, hacuaha xi nihña cjuandaja. <sup>3</sup> Jercu ndaja tjin xi cuatjin nihña oración ta, Nina, me xi vaxëtje naja ne, cuatjin chuya rë me. <sup>4</sup> Meje rë me xi ngayejen ni xuta ne, cuetjuntjen hacuaha ndaja cuijnercun cjuá xi cjuaquixi. <sup>5</sup> Ngu ni Nina xi tacun me, hacuaha ngu ni me xi sahmi xi matangun cjuatacun naja ngayaan xuta cojo Nina. Me xi cuatjin sahmi jan ne, hacui ngu xuta xi hmí Cristu Jesús. <sup>6</sup> Me vëhë xi casua me yojo rë me xi cuechjitje me jyë naja ngayejen ni ngayaan. Hane hya xi cavetjucaa nixtin ne, cuatjin cama tsejen xi Nina ne, meje rë me xi cuetjuntjen. <sup>7</sup> Vëhë xi casatë ná xi má ngahan apóstol, xi cuicuyá rë xuta xi xín nangui rë me, cuichjá cojo rë me cjuá xi cjuaquixi xi macjain naja. Hatuxa cjuaquixi cjuá xi chjá cojo ri. Hacuuiin vindácha.

<sup>8</sup> Hacuaha meje ná xi xuta xihin ne, sahmi me oración ha tu jani ni hiscan xi matangun me. Hya xi scunitjen me tsja me xi sahmi me oración ne, meje rë cojo ngu xahasen tyjahi. Mijí rë xi quitaha cjan rë me, hacuaha mijí rë xi cojo si. <sup>9</sup> Hacuaha yachjin ne, cataja me tsjian rë me hacutjin xi ndaja tjin, hacuiin ngu xcusun xi jemu nchina tsejen. Mijí rë xi cuircu cun sahmi me tsjarcu me. Mijí rë xi tsindaja me yojo rë me cojo oro, cojo tuseti xi jemu hnga chjí rë, cojo tsjian hnga chjí rë. <sup>10</sup> Meje rë xi sahmi me cjuandaja ta, cuatjin ndaja tsejen tsëhë yachjin xi macjain rë me Nina. <sup>11</sup> Hacuaha hya xi viseñuju me ngu cjuá rë Nina ne, catitsinguijne me yojo rë me, jyuun ni catiyuju me. <sup>12</sup> Hacuaha suaan cahndë xi yachjin ne, cuicuya me ngajñi rë xuta cjín, hacuaha suaan cahndë xi me vëhë cuitexa me xuta xihin. Xi meje rë ne, tu catiseñuju ni me. <sup>13</sup> Cuatjin meje rë ta, tsëhë xi hya xi casahmi Nina xuta ne, titjun casahmi me xutachanga naja Adán, sehe má jo ne, casahmi me Eva. <sup>14</sup> Hane Adán ne, hacuiin camandacha me ta, chjuun jan ne, me vëhë xi camandacha me, hane cuatjin camá xi casahmichiin chjuun jan cjuá xi cavitexa Nina. <sup>15</sup> Peru yachjin ne, meje rë xi catisacu rë me quihndi.



Cuatjin xi cuetjutje me, sa xi macjain rë me Nina, sa xi tsihmu cacun xicjin me, sa xi tyjahi xahasen rë me, hacuaha sa xi vetjo me cjuatacun rë me.

### 3

#### *Xuta xi vitexa ngajñi rë xuta ladu rë Nina*

<sup>1</sup> Nguehe cuichjá cojo ri ngu cjua xi cuatjin jain: yo xi meje cuitexa sacuaha obispo ngajñi rë xuta ladu rë Nina ne, jemu ndaja xa xi meje rë xuta jan. <sup>2</sup> Ngajan xi me xi cuitexa ngajñi rë xuta ladu rë Nina ne, meje rë xi ngu xuta ndaja xi tsajin mé choho sahmi. Meje rë xi ngu xuta xi ngu ni chjuun rë, hacuaha xi vetjo yojo rë, xi tacun cahndë cjuatacun rë. Mijí rë xi tujyë sahmi me. Meje rë xi ngu xuta xi cojo cjuandaja cjuahatsja me xuta xi nduva tjengui rë me ndava me. Hacuaha meje rë xi chutaha cjuatacun rë me xi cuicuya me xuta. <sup>3</sup> Mijí rë xi ngu xuta chihi. Mijí rë xi choyo xuta me ta, meje rë xi tjin rë me cjuandaja cjuajeya. Mijí rë xi jercu tsimeje me tujún. <sup>4</sup> Hacuaha me xi vitexa ngajñi rë xuta ladu rë Nina jan ne, meje rë xi ngu xuta xi ndaja sahmi gobiernu ndava, hacuaha quihndi rë ne, vihndë tsëhë hacuaha faharcun rë. <sup>5</sup> Ta sa xi hacuiin ndaja ma sahmi me gobiernu ndava me ne, ¿hacutjin cuma cjuahacuenda me xuta ladu rë Nina? <sup>6</sup> Hacuaha mijí rë xi ngu xuta xi sehe tiña nixtin cavisehen me ndiya rë Nina, sá tu jemu sahmi jyë xuta jan yojo rë me, cjuë ne, cuatju me castigu rë Nina, sacuaha tjin cavatju xitsehen matitjun camá. <sup>7</sup> Hane meje rë xi ngu xuta xi ha chjaharcun rë me, xi hisca cojo xuta xi hacuiin ladu rë Nina ne, ha tifaharcun rë me. Cuatjin xi xuta xi vitexa jan ne, hacuiin cuetju sava me, hacuaha hacuiin tsinguetsun xitsehen xi matitjun cjuatacun rë me.

#### *Xuta xi visecoo ngu me xi vitexa*

<sup>8</sup> Hacuaha ni tjin ni xuta xi visecoo rë ngu me xi vitexa jan ne, meje rë xi ngu xuta xi ha chjaharcun rë, ngu xuta xi hacuiin jo xcun jo hntsua. Mijí rë xi ngu xuta xi jercu hvi xan. Mijí rë xi ngu xuta xi jercu tsimeje tujún. <sup>9</sup> Meje rë xi ngu xuta xi cojo ngu cjuatacun tyjahi macjain rë cjua xi cama ngascan casuacuenda naja Nina, cjua xi tsajin yo vëë rë hatsëë nixtin. <sup>10</sup> Tjun tjun ne, meje rë xi chjahachuva rë xuta jan. Hane sa xi tsejen ta tsajin mé jyë rë xuta jan ne, cuma cjue me xa xi cuisecoo me xuta xi vitexa. <sup>11</sup> Hacuaha chjuun rë me ne, meje rë xi ngu chjuun xi ha chjaharcun rë, ngu chjuun xi visiajmii cjuandesu. Meje rë xi ngu chjuun xi vetjo me cjuatacun rë me, ngu chjuun xi ha sahmi chihin xa rë. <sup>12</sup> Hane xuta xi visecoo rë ngu me xi vitexa jan ne, meje rë xi ngu ni chjuun rë me. Hacuaha meje rë xi ngu xuta xi ndaja sahmi me gobiernu

ndava me cojo quihndi rë me. <sup>13</sup> Hane me xi jemu ndaja jain xa sahmi ne, jercu cjuaharcun xuta me, hacuaha hitsë sa tsacjuuin me xi cuichja me cjua ndajyihi tsëhë Cristu Jesús xi macjain naja.

*Ngu cjua rë Nina xi tsajin yo vëë*

<sup>14</sup> Quihndë xi titsihindu ri cjua vihi ne, vetahá cáacun ta xati cuma cjuë tjëngë ri. <sup>15</sup> Peru sa xi cuindeya ná ne, cjua xi titsingátju ri vi ne, sua cumachaya ri hacutjin xi mameje rë xi sahmi xuta rë Nina. Hane xuta rë Nina jan ne, hacui ngayaan xi macjain naja Nina xi quicun, hacui ngayaan xi nújantjen ngatsë rë cjuaquixi. <sup>16</sup> Cjuatacun rë Nina xi tsajin yo vëë, xi macjain naja vi ne, suvá tsejen ta jemu vengui chjí rë:

Cristu Jesús ne, hya xi canduva me nguehe ngasunhdë vihi ne, camá me ngu xuta sacuahatjin ngayaan xuta.

Peru tsajin camahani jyë rë me, chja Hasen xi tsëhë Nina.

Hacuaha cavëë ángel me.

Hane camachaya rë xuta tsëhë me yëjë ni nangui.

Hacuaha camacjain rë xuta me jingujyë ni ngasunhdë.

Hacuaha cafahatsja Nina me ngajan ngahnga.

## 4

*Xuta xi vicuya cjuandacha*

<sup>1</sup> Quihndë ne, Hasen rë Nina ne, chja quixi ta cuechu nixtin xi yahnga xuta ne, cuiyujuxin me cjua tsëhë Cristu Jesús, cjua xi macjain naja, hane tu cjua tsëhë xitsehen xi vindacha ne, vëhë scutaya me hacuaha vëhë cuetaharcu me. <sup>2</sup> Hacuaha cuetaharcu me cjua xi cuicuya xuta xi jo xcun jo hntsua xi vindacha. Sacuahatjin má taja chuxin rë ndyaja hiscan xi faha chu quicha ne, cuatjin cuetsun cjuatacun rë xuta ndacha xi cuacun vë. <sup>3</sup> Cjuavixan ne, suaain me cahndë cuma, hacuaha cuichja me ta tjin yahnga xcusun xi ndajin xi xinë. Peru Nina ne, casahmi me yëjë ni xcusun ne, cuma xinë ngayejen ni xi macjain naja me, ngayejen ni xi cavijnercun cjuatacun xi cjuaquixi. Peru meje rë xi tahan nacuechji rë me ta, <sup>4</sup> yëjë ni xcusun xi Nina casahmi me ne, jemu ndaja. Vëhë xi mijí rë xi nitjunnguen tu mé ni xcusun, ta meje rë xi chjahanntsán, peru tahan nacuechji rë Nina. <sup>5</sup> Hane ngatsë rë cjua rë Nina cojo cjua xi nújan hya xi tahan nacuechji rë me ne, vëhë sahmi xi tsajin tsavi tsëhë tu mé ni xcusun.

*Ngu me xi ndaja sahmi xa rë Cristu Jesús*

<sup>6</sup> Sa xi tehe rë xuta ladu rë Nina yëjë ni cjua xi sehe catsihindu ri vë ne, jemu ndaja nihñi, xi tinihñi xa rë Cristu Jesús. Hacuaha hitsë sa cuma jyë cjuatacun riji ngatsë rë cjua xi macjain naja, hacuaha ngatsë rë cjuandaja xi cachutaye xi

nihñi. <sup>7</sup> Peru xi canihñicuendiin yějē ni cuentu rē xutachanga naja ta, hacuiin yějē xi machjirēhē ta, ngu jo ne, suvá ni xutachanga naja, me vēhē xi cavaxēcun me. Cahndē rē vēhē ne, ngaye ne, nihñi ngahñu yějē ni nixtin xi tsejen xi chjehercuin rē Nina nguñajatacuin. <sup>8</sup> Xi niniyan yojo naja ne, jemu ndaja tjin. Peru hitsē sa ndaja tjin xi tsejen xi chjahanrcun rē Nina ta, tsēhē xi hya xi cuatjin nihña ne, sacu naja cjuandaja rē Nina quihndē nguehe xcun cjuahñu naja, hacuaha ni tjin ngajan xcun Nina. <sup>9</sup> Cjua xi titsihindu vi ne, hatuxa vechu chuva rē xi cumacjain naja ta, tsēhē xi jemu cjuaquixi. <sup>10</sup> Vēhē xi jercu tinihña xa, tsēhē xi ha vetahan tacun Nina xi quicun, Nina xi vaxētje naja ngayejen ni ngayaan xuta, hacutjin ngayejen ni ngayaan xi macjain naja me.

<sup>11</sup> Ticoye rē xuta cjuatacun xi catsihindu vē, hane hisca titexe rē me. <sup>12</sup> Nihñi cjuandaja ne, sehe tsajin yo xi chuyiin rē tsiji ngatsē rē xi chuva nu riji. Nihñi cjuandaja ne, sehe xuta xi macjain rē Nina ne, xi scuēē me hacutjin nihñi ne, hacuaha ni tjin sahmi me; sacuaha tjin xi ha noje, sacuaha tjin xi nihñi, sacuaha tjin xi hmu tacuin xinguin, sacuaha tjin xi macjain ri Nina, sacuaha tjin xi ndajyihí xahasen riji. <sup>13</sup> Nguyējē rē xi cjēē cjuēhē ne, hñu tinoje cojo xujun rē Nina, hya xi ma tangun xuta ngajan yungun. Ndaja tinoje cojo rē me ne, catisahmi me cjuandaja, hacuaha ticoye rē me. <sup>14</sup> Nihñixe cojo cjuatjo xi Nina casua ri me, nixtin hya xi me xi vitexa xuta ladu rē Nina ne, cavetahatsja ri me. Cuatjin camá ta, tsēhē xi cuatjin cachja Nina cojo ngu xuta xi hmí profeta xi cuatjin meje rē me xi cuma.

<sup>15</sup> Nihñi nguñajatacuin ngayējē ni hacutjin xi vitexa xujun vi. Xi cuatjin ne, ngayējē ni xuta scuēē me hacutjin tihmi xcun cojo cjuandaja rē Nina. <sup>16</sup> Cuidadu ni tjin ri tsiji sove, hacuaha cojo cjuatacun xi vicoye. Tu chihin ni tihincueje cjuatacun vē. Sa xi cuatjin nihñi ne, cuma naxetje yojo riji, hacuaha cuma naxetje me xi cuiseñuju cjua xi vicoye.

## 5

### *Hacutjin xi cuitexe rē xuta ladu rē Cristu*

<sup>1</sup> Sa xi ngu me xi ha nchava ne, choho sahmi me ne, hacuiin cuinojetehe rē me ta, cojo jeya tinoje cojo rē me, hacutjin xi sahmi me cjuandaja, sacuaha tjin xi nújan cojo nahmi naja. Hacuaha cojo xuta xihin, me xi vasen xuta ni ne, tinoje cojo rē me sacuaha tjin xi nújan cojo tseen. <sup>2</sup> Hane yachjin xi ha chicuhun me ne, cojo cjuandaja tinoje cojo rē me sacuaha tjin xi nújan cojo naa naja. Hacuaha cojo yachjin xi vasen xuta ni

me ne, tinoje cojo rë me sacuaha tjin xi nújan cojo na xi tíchjan, cojo ngu xahasen ndajyihi.

<sup>3</sup> Yachjin cahan xi cjuaquixi xi tsajin yo ngatsë rë me ne, meje rë xi chjahanrcun rë me, cuisecoon rë me. <sup>4</sup> Peru ngu chjuun cahan ne, sa xi tjin rë na quihndi o quihndindai ne, catisahmi nixti jan cjuandaja, catisecoo rë na, cojo sa xi cuatjin sahmingojo nixti jan cojo xutacha rë. Xi cuatjin cuma ne, hatuxa chuya rë Nina. <sup>5</sup> Tjin chjuun xi cjuaquixi xi cahan me, me xi ha siu suvá. Me vëhë xi vetaha cacun me Nina, hane sahmi me oración, fehya me cjuandaja rë Nina nixtin nixten. <sup>6</sup> Peru hacuaha tjin chjuun cahan xi sahmi ni me hacutjin xi ma sua rë xahasen rë me. Hane chjuun cahan xi cuatjin sahmi jan ne, handasa ndaja cun cjuahñu rë me ne, peru cjuatacun xi sahmi me ne, tsajin mé machjirëhë. <sup>7</sup> Cuatjin tinoje cojo xuta ladu rë Cristu, sehe tsajin mé jyë rë me cojo xutacha rë me. <sup>8</sup> Peru sa xi ngu xuta marcuaain rë me tsëhë xuta rë me, o sa xi marcuaain rë me tsëhë cahntsua ndava me ne, vëhë tsingacun naja xi catsitjungui me cjuarë Nina xi macjain naja. Hacuaha hitsë sa choho sahmi me xi cuma rë ngu xuta xi hatuxa macjaain rë Nina.

<sup>9</sup> Xcun xujun xi yaja ñihi rë yëjë ni yachjin cahan ne, cumahindu ñihi rë na xi ha cafahá rë xi jyanchan nu, na xi cavejña cojo ngu ni xihin, <sup>10</sup> na xi ha vëë xuta xi ndaja xcusun rë, xi ha casahmi yëjë ni cjuandaja vihi: ha catsicha na quihndi, ha cafahatsja na cojo cjuandaja xuta xi quiji tjengui me na ndava na, ha cavisecoo na yahnga me xi ladu rë Cristu, ha casua na cjuetacun me xi tjin rë ngu cjuacjintacun, hacuaha ha casahmi na jingu sa xcusun xi ndatjin.

<sup>11</sup> Peru xcun xujun jan ne, mijí rë xi cuaquí ñihi rë na cahan xi chuva nu rë, sá cuechu ngu nixtin xi ha quihndë sahmi na xa rë Cristu nguñajacacun na, hane meje nga cuixan na ngu ndiya. <sup>12</sup> Xi cuatjin sahmi na ne, cuetjucaa jyë rë na, tsëhë xi tsichaja na cjuarë xi ha catsinguissehenjñi na. <sup>13</sup> Hacuaha cuma tsëhë na xi tu tsujihya ni na ndava xuta. Hane hacuiin tu suvá ni cuma tsëhë na ta, hisca cuetsihin cuichja na cjuandesu, cuetsihin tsinguissehenjñi na jingu sa cjuatacun xi cuendaain rë na, hacuaha cuetsihin cuisajmi na cjuarë xi mamijí rë xi cuichja na. <sup>14</sup> Vëhë xi meje ná xi catixan nga na cahan xi chuva nixtin rë. Catisacu rë na quihndi, hacuaha catjahacuenda na cahntsua ndava na. Sehe xuta xi chuyiin rë me tsajan ne, sacuiin rë me hacutjin choho cuichja me tsëhë xcusun xi ndaja sahmi na yachjin cahan jan. <sup>15</sup> Cuatjin chjá ta, tsëhë xi tjin ngu jo na cahan xi ha cavetjuxin na tsëhë ndiya rë Nina, cavisehen na ndiya rë Satanás.

<sup>16</sup> Ngu chjuun xi ladu rë Cristu me ne, sa xi tjin ngu chjuun

xi xicjin me xi cahan ne, mijí rë xi xuta ladu rë Cristu sahmi me gastu ngatsë rë chjuun cahan jan ta, me xi xicjin ni na ne, catisecoo me na. Xi cuatjin ne, xuta ladu rë Cristu ne, cuma cuisecoo me yachjin cahan xi tsajin yo ngatsë rë.

<sup>17</sup> Yëjë ni xuta changá xi ndaja vitexa me ngajñi rë xuta ladu rë Cristu ne, vechu chuva rë xi chjaharcun rë me hacuaha ndaja chjí sacu rë me. Peru me xi sahmi nguýë xi chjaharcun rë hacuaha ndaja chjí sacú rë me ne, me xi sua machaya rë xuta cjua tsëhë Jesús cojo me xi vicuya naja cjuachacun.

<sup>18</sup> Cuatjin chjá ta, tsëhë xi xcun xujun rë Nina ne, cuitjin camahindu cjua vihi: “Mijí rë xi cueyún changa hntsua ngu ndyaja hya xi sahmi chu xa nuju xi sunesun chu naxu rë trigu xi cuetju trigu rë.” Hacuaha: “Ngu mosu ne, tjin rë cha chuva rë xi cjuaha cha chjí rë cha.”

<sup>19</sup> Hya xi xinchajyë rë ngu xuta changá xi vitexa me xuta ladu rë Cristu ne, xi canihñicuendiin jyë jan sa xi ngu ni cha tichja cha. Hisca xi cjuehe jo jyan cha xi cavëë cha xcusun xi casahmi xuta changá jan ne, sehe nihñicuende jyë xi vincha cha. <sup>20</sup> Peru me xi tisahmi jain cjuatsehen ne, tinoje cojo rë me xcun ni ngayëjë xuta ne, hacuaha yëjë ni xuta jan ne, tsacjun me cuma, hane sahmi me cjuatsehen. <sup>21</sup> Nihñi ngayëjë ni cjua hacutjin xi titsihindu ri. Hacuaha meje rë xi chuva xi nihñi cojo ngu ne, nihñi cojo ngayëjë ni xuta, sa xi vinga ri me o sa xi vingain ri me. Hisca Nina cojo Cristu Jesús cojo ángel xi cavaxijin me ne, vëë me hacutjin xi titsihindu ri vi.

<sup>22</sup> Cuechu nixtin xi cuma meje sa xuta xi cjuahatsja me xa ngajñi rë xuta ladu rë Cristu, sacuaha ngu me xi cuitexa, o ngu me xi sahmi tu mé ni ngu xa xi cuma meje. Peru hacuiin marcu macjain cuinoje yo xuta xi satë rë xa jan. Ndaja ningatehetacuin titjun yo xuta xi ndaja me ta, tsëhë xi mijí rë xi ninguisihinjñi cojo xuta tsehen. Hisca sove ne, mijí rë xi nihñi cjuatsehen.

<sup>23</sup> Ha quihndë xi cahyiin suvá ni nandá ta, sihi hitsë xan rë uva ngatsë rë cahntsue, hacuaha ngatsë rë chíhin xi tu quitaha tu quitaha sacu ri.

<sup>24</sup> Tjin xuta xi suvá tsejen tsëhë me xi sahmi me cjuatsehen. Hane cjuatsehen ni rë me jan ne, vëhë sahmi xi cuma me castigu. Hacuaha tjin yahnga xuta xi matsijin tsëhë me xi sahmi me cjuatsehen. Peru xi cuma ngascan ne, cuma tsejen xi cun xi má me cojo jyë rë me. <sup>25</sup> Hacuaha ni tjin xcusun xi ndaja ta suvá tsejen. Hane ha ndaja sa hacuiin ngutjen cuma tsejen, peru hatuxa cumaji cuiyujhma ta, tjin xi cuma tsejen.

## 6

<sup>1</sup> Xuta ladu rë Cristu xi má mosu hndixahan rë ngu xuta

ne, jemu meje rë xi cjuaharcun me xuta xi má nai rë me. Sa tsajin ne, choho cuma cuichja xuta tsëhë Nina hacuaha cojo tsëhë cjuachacun xi vicuyan. <sup>2</sup> Hane me xi nai rë mosu hndixahan jan ne, sa xi macjain rë me Cristu ne, mijí rë xi choho scuëë hndixahan jan me, tsëhë xi tangun ni macjain rë me Cristu. Cahndë rë xi choho scuëë rë me ne, meje rë xi cuisecoo hndixahan jan me yëjë ni xa xi cuitexa me ta, tsëhë xi me xi cuma tsëhë yëjë ni cjuandaja xi sahmi hndixahan jan ne, xuta ladu rë Cristu me. Hane vëhë xi jemu hmucacun hndixahan jan me. Tinoje cojo xuta yëjë ni cjua vëhë, hya xi cuicoye rë me.

### *Cjuandacha cojo cjuanchina*

<sup>3</sup> Sa xi ngu xuta vicuya me ngu cjuachacun xi hacjahi fi ne, sa xi manguaaincacun me cojo cjua xi cjuaquixi xi cachja Nai naja Jesucristu ne, hacuaha manguaaincacun me cojo cjuachacun xi tsëhë Nina ne, <sup>4</sup> me vëhë ne, ngu xuta xi jemu sahmi jyë me yojo rë me. Peru hvíin camaha ni me, hacuaha machjiriin cjuatacun rë me ta, tsëhë xi jemu meje cuisiajmi me tsëhë tu mé ni cjua: “Cuitjin vijne cjua vëhë; jéya, cuatjin vijne”, chja me. Hatuxa jemu meje scaan me cojo cjua ngajñi rë cjuavisiajmi rë me. Hane xi cuatjin visiajmi me ne, vetjucaa cjuaxintacun, vetjucaa cjuahngatacun, hacuaha choho chja me tsëhë xicjin me, choho tsingatahacacun me tsëhë xicjin me, <sup>5</sup> hacuaha ngajan fë ngajan vetsihin ticjan me cojo cjua, xi tsajin hiscan cuijnetaha. Cuatjin sahmi me ta, tsëhë xi ha cavetsun cjuatacun rë me ne, cjua xi cjuaquixi ne, hvíin camahani me. Xi tsingatahacacun me ne, xuta xi faharcun rë Nina ne, jemu ndaja cuatju me cuma ta, jercu sacú rë me cjuanchina. <sup>6</sup> Bueno, quixi ta ndaja cuátjun cuma xi tsejen xi chjahanrcun rë Nina, sa xi cumangutacun cojo xi tjin naja. <sup>7</sup> Ta tsajin camahani mé quichahan xi catsin yaan xi cafehen ngasunhdë vi, hacuaha tsajin camahani mé xi cuma cuanguencon, hya xi cueyan. <sup>8</sup> Peru sa xi ha tjin naja xi xinë cojo xi chajan ne, meje rë xi cojo vëhë ne, cumangutacun. <sup>9</sup> Peru xuta xi jemu meje rë me cuma nchina me ne, ndaya ndaya ni tsingatihin me xi cumandacha me xi sahmi me cjuatsehen. Xitu tsingusehenjñi me ngajñi rë cjuatsehen jan ne, ha quihndë cumaji cuetjuxin me, sacuatjin rë ngu chu xi jiyahñu cahntsua ngu chen. Hacuaha jemu cjín xcusun yumhasen xi meje rë me. Peru machjiriin xcusun jan ta, tu tsichaja tu tsinguetsun ni rë cjuatacun rë me. <sup>10</sup> Sacuaha xuta xi jercu meje rë me tujún ne, jemu cjín xcusun cjuatsehen sahmi me xi sacú rë me tujún. Yahnga me xi cuacun jan ne, hisca caviyujuxin me cjuachacun xi macjain

naja. Hane ngatsë rë xi cavetjuxin me ne, vëhë xi jemu choho tivatju me jima.

*Pablo ne, tsinguixi me Timoteo*

<sup>11</sup> Peru ngaye xi ladu rë Nina ngaye ne, tihinxin tsëhë xcusun xi cuacun vëhë. Tihin tjengui ndiya xi tsëhë cjuaquixi, hacuaha nihñi hacutjin xi Nina chuya rë me. Ndaja cata-macjain ri me, hacuaha ndaja nihmutacuin me. Caticaa ri xcun ngayëjë ni cjuacjintacun xi cuátji cuma, hacuaha nihñi jeya cjuatacun riji. <sup>12</sup> Nihñi ngahñu xi yëjë ni xcusun xi nihñi ne, cumatangun cojo cjuatacun xi macjain ri, sehe sacú ri cjuahñu xatsë ngajan xcun Nina xi tsajin nixtin cjuë. Tsëhë vëhë xi Nina cavaxijin ri me. Hacuaha ha catehe cjuaquixi riji xcun jemu cjin xuta hacutjin xi macjain jain ri Nina. <sup>13</sup> Nina xi tisua me cjuahñu rë ngayëjë ni xi tjin ne, vëë me hacutjin tivitéxa ri. Hacuaha Cristu Jesús, me xi casua cjuaquixi rë xcun Poncio Pilatu ne, vëë me hacutjin tivitéxa ri. <sup>14</sup> Cjua xi tivitéxa ri ne, tinohye. Hacuian nindeye cjua vë ta nihñichihin, hisca xi cuechu nixtin xi cuinduva nga Nai naja Jesucristu. <sup>15</sup> Hane hya xi cuechutaha nixtin vëhë ne, Nina tsingatju nga me Jesucristu. Nina ne, me vëhë xi ndaja me, me vëhë xi tyjahi me. Ngu ni me vëhë xi matitjun me. Matitjun me tsëhë ngayëjë ni xi matitjun. Matitjun me tsëhë ngayëjë ni xi vitexa. <sup>16</sup> Ngu ni me vëhë xi tsajin nixtin cueya me. Tacun me xcun ngu ndavá seti ndajyihí, xi tsajin yo cuma cuechu. Hacuaha tsajin yo cavëë rë me, hacuaha hisca ngu cumaji scutsejen rë me. Me vëhë xi catjaharcun xuta me. Me vëhë xi catitexa me yëjë ni nixtin yëjë ni hora. Cuatjin jain.

<sup>17</sup> Xuta xi jemu tjin rë me cjuanchina rë ngasunhndë vihi ne, titexe rë me xi hacuiin sahmi yehe me yojo rë me. Hacuian cuetaha cacun me cjuanchina xi tjin rë me ta, vëhë ne, tsajin cjuaquixi xi cjuecani rë. Peru catetaha cacun me Nina ta, Nina ne, hacuiin choho me ta, me vëhë xi sua naja me yëjë ni xcusun xi ndajyihí tsajan. <sup>18</sup> Hacuaha tinoje cojo rë xuta nchina xi cuacun jan ne, yehe cjuandaja catisahmi me cojo ngayëjë ni xuta. Mijí rë xi choho me. <sup>19</sup> Xi cuatjin sahmi me ne, tivetjo me cjuandaja xi sehe cumachjirëhë rë me, hacuaha sacú rë me cjuahñu xi cjuaquixi.

*Cjua xi vijnetaha*

<sup>20</sup> Ngaye Timoteo ne, chjehecuende cjua xi ha ntse siu. Xi cavetincuiin cjuavisiajmi yumahasen xi chuyiin rë Nina tsëhë. Hacuaha xi cavetincuiin yëjë ni cjua rë xuta xi hisca ngajñi rë me matanguaain cjua rë me, handasa chja me xi jemu vechu cjuatacun rë me xi vijnercu me cjua. <sup>21</sup> Peru me xi

cuatjin chja ne, ha cavetjuxin me tsëhë cjuachacun xi macjain naja.

Nina catisua nuju me ngayujun ni cjuandaja rë me.



## Xujun xi majo xi catsihindu San Pablo cojo Timoteo

<sup>1</sup> Ngahan Pablo ne, apóstol tséhë Cristu Jesús má ngahan ta, tséhë xi cuatjin meje rë Nina. Véhë xi catsingatju ná me, xi cuichjá cojo xuta ta sua naja me ngu cjuahñu ndajyihi, sa xi nihña tangun cjuatacun naja cojo Cristu Jesús. <sup>2</sup> Ngaye Timoteo ne, tsihindu ri xujun vihi ta, tséhë xi sacuaha quihndi ndaja naha ngaye. Nina Nahmi naja cojo Cristu Jesús Nai naja ne, catamayuma rë me ngaye, catisua ri me cjuandaja, cjuajeya.

### *Tisua me cjuaquixi tséhë Nina*

<sup>3</sup> Nixtin nixten, hora xi sahme oración naha ne, jercu veyanangë ri, hacuaha suá nacuechji rë Nina. Hacuaha sahme xa rë Nina cojo ngu cjuatacun tyjahi, sacuahatjin casahmi xutachanga naha. <sup>4</sup> Vitsjen ná hacutjin cachjihnde, ngatsë rë xi cavétju cëjë tsiji. Hacuaha jemu meje ná xi ndove tjengui ná, sehe ngahan ne, jemu ndaja cuma ná. <sup>5</sup> Hacuaha vitsjen ná hacutjin xi jemu ndaja macjain ri cjua rë Nina, sacuaha tjin xi titjun camacjain rë chicuhun riji, chicuhun Loida, cojo na Eunice naa riji. Hane fëmangúcacun xi cojo ngaye ne, ha cuatjin ndaja macjain ri.

<sup>6</sup> Véhë xi chjá cojo ri ta xi catiin cahndë xi cjuë cjuatacun xi casua ri Nina, hya xi cavétahantsa ri. <sup>7</sup> Ta Nina ne, hacuiin casua naja me ngu cjuatacun xi ngayaan ne, cumacjintacun ta, casua naja me ngu cjuatacun xi sacú naja ngahñu, xi nihña hmu tacuun xingueen, hacuaha xi scaa naja cuetjoon yojo naja. <sup>8</sup> Véhë xi hacuiin nihñi savá, hya xi cuinoje cjuandajyihi tséhë Nai naja. Hacuaha hacuiin nihñi savá ngatsë naha ngahan xi tejñaya ndavaya, ngatsë rë xi chjá cjua rë me. Hacuuiin nihñi savá ta, nihñi ngahñu cojo yëjë ni cjuañihi xi cuátji cuma, ngatsë rë cjuandajyihi xi tinoje. Cuatjin nihñi hacutjin chutaha ngahñu xi tisua ri Nina. <sup>9</sup> Nina ne, cavaxëtje naja me hacuaha cavaxijin naja me, xi cuma tséhë me ngayaan. Hacuuiin ngatsë rë xi jemu ndaja canihña xi cuatjin casahmi me ta ngatsë rë xi cuatjin meje rë me, tséhë xi jemu ndaja me. Hisca xi chaja sa cuejña ngasunhndë ne, ha catsingatahacacun Nina xi sua naja me cjuandaja rë me, ngayejen ni xi tséhë Cristu Jesús ngayaan. <sup>10</sup> Hane hya xi cafehe Cristu Jesús, me xi vaxëtje naja ne, hya camachaya jain naja cjuandaja rë Nina jan. Hane Cristu jan ne, catsicjë me ngahñu rë cjuaveya, hacuaha casuacuenda naja me ta

sua naja Nina ngu cjuahñu ndajyihí, xi tsajin nu tsajin nixtin cueyan nga. Vêhê cjuatacun xi vicuya naja cjuandajyihí rê me.

<sup>11</sup> Nina ne, casua ná me xa xi suá cumachaya rê xuta hacuaha cuicuyá rê xuta cjuandajyihí rê me. <sup>12</sup> Ngatsê rê xa vêhê ne, jemu cjín cjuañihí tivátju jima. Peru ma savaain ná, tsêhê xi ha hvê Cristu, hacuaha camangucácun cojo rê me. Hacuaha tjin ná cjuaquixi xi me vêhê ne, jyê me cojo cjuatacun rê me xi cuetjo ná me, hisca nixtin xi cuinduva nga me nguehe ngasunhdê.

<sup>13</sup> Nihñi sacuaha tjin cjuaquixi xi ha cachjá cojo ri. Hacuaha nguñajatacuin catamacjain ri Nina, hacuaha nihñi hmutacuín xinguin, tsêhê xi ngaye ne, ladu rê Cristu ngaye. <sup>14</sup> Nihñicuende cjuaquixi xi casua ri Nina. Hane Hasen rê Nina xi tacun cahntsua xahasen naja ngayejen ni xi macjain naja me ne, Hasen vêhê xi sua ri ngahñu xi cuatjin nihñi.

<sup>15</sup> Ngaye ne ha hye xi ngayêjê ni xuta xi tsêhê ladu xi hmí rê Asia ne, casmicacun ná me. Ngajñi rê xuta xi cuacun jan ne, hinchajñi cha Figelo cojo cha Hermógenes. <sup>16</sup> Peru cha Onesíforo ne, catamayuma rê Nina yêjê ni ndava cha ta, tsêhê xi jemu cjín ndiya xi casahmi cha cjuandaja xi cavisecoo ná cha. Hane cama savaain rê cha xi tejñaya ndavaya. <sup>17</sup> Xi tu cafehe cha nguehe nandya Roma ne, cavetsihin cavanguise cha ngahan, hisca xi casacu rê cha ngahan. <sup>18</sup> Nai naja ne, catamayuma rê me cha, nixtin hya xi cuinduva nga me nguehe ngasunhdê. Ta ngaye ne, ha ndaja hye hacutjin xi jemu cavisecoo ná cha ngajan nandya Efeso.

## 2

### *Xuta xi ndaja sahmi me xa rê Cristu*

<sup>1</sup> Peru ngaye tsan ne, catisua ri Cristu Jesús cjuandaja rê me, xi cuma cuinechin nguñajatacuin. <sup>2</sup> Jemu cjín xuta xi hacuaha caviseñuju me yêjê ni cjua xi cachjá cojo ri. Peru quihndê ne, meje rê xi ticoye rê ngujo cha cjua jan, cha xi tsejen xi mangutacuín cojo rê hacuaha chutaha cjuatacun rê, sehe cha xi cuacun jan ne, hacuaha cuicuya cha xuta xi yahnga.

<sup>3</sup> Ngaye ne, nihñi ngahñu xi scaa ri cojo yêjê ni cjuañihí xi cuátji cuma ngatsê rê Cristu Jesús, sacuaha tjin caa rê ngu sindadu xcun ngu si. <sup>4</sup> Hane sindadu xi hinchajñi cha tsêhê xa xi yaha cha ne, cumaji tsinguisehenjñi cha tu mé ni xa ta, tjin rê cha xi sahmi cha hacutjin xi chuya rê me xi matitjun tsêhê cha. <sup>5</sup> Hacuaha ngu cha xi cuisehen xcun ngu juego xi ntsavê cha ne, sa xi chohotjin ntsavê cha ne, sacuiin rê cha cjuatjo, handasa tjun cha cuetju cha. <sup>6</sup> Hacuaha cha xi sahmi xa nguijña ne, meje rê xi cha vêhê xi titjun satê rê cha

tsëhë xitjê xi casahmi cha. <sup>7</sup> Ndaja ningatehetacuin hacutjin cjua xi tichjá cojo ri. Sehe Nai naja ne, me vëhë sahmi me xi cuijnercui cjua vë.

<sup>8</sup> Ninguitsjin xi Jesucristu ne, cavascaya rë me ngajñi rë nima, hacuaha canduva tjë rë me xutachanga naja David. Vëhë cjuandajyihi xi ngahan visiajme cojo xuta. <sup>9</sup> Hane ngatsë rë xi cuatjin visiajme cjuandajyihi jan ne, vëhë xi choho tivátju jima. Hisca quitahahñu rë xuta ngahan nguehe ndavaya, sacuaha tjín rë ngu xuta tsehen xi yehe jyë rë. Peru cjua rë Nina ne, hacuiin quitahahñu. <sup>10</sup> Vëhë xi ticaa ná ngayëjê ni cjuañihi xi tivátju jima, cojo sa xi yëjê ni xuta xi cavaxijin Nina ne, cuetjutje me ngatsë rë xi macjain rë me Cristu Jesús, hacuaha cuechu me xcun Nina ngajan cuiyuju me nu cjuí nu nduva.

<sup>11</sup> Cjua vihi ne jemu cjuaquixi:

Sa xi ha macjain naja Cristu hya xi cueyan ne, hacuaha cuinechan quicun nga cojo rë me;

<sup>12</sup> sa xi ha cacaa naja ne, hacuaha cuisecoon rë me cuitexan.

Sa xi ha canújan xi hyaan yo me ne, hacuaha ni tjín cuichja me ta hvín me yo ngayaan.

<sup>13</sup> Handasa ngayaan ne, nihñacheen cjua naja, peru me vëhë ne, hatuxa sahmi chihin me cjua rë me ta,

tsëhë xi hatuxa vindachain me.

### *Hacutjin xi Nina chuya rë me*

<sup>14</sup> Ninguitsjin rë xuta jan cjua xi chjá cojo ri. Hacuaha tinojetehe rë me xi ha quihndë scaain me cojo cjuavisiajmi rë me ta, tsëhë xi cuatjin meje rë Nina. Venguiin camahani chjí rë xi cuatjin ticjan me cojo cjua ta, xi cuatjin sahmi me ne, tu titsinguetsun me cjuatacun rë xuta xi viseñuju. <sup>15</sup> Nihñi ngujoyë xi Nina ne, chuya rë me tsëhë xa xi tinihñi. Xi cuatjin ne, tsajin mé nihñi sava ta, tsëhë xi ha chihin tivicoye rë xuta cjua xi cjuaquixi. <sup>16</sup> Xi caninguisinjñii ngajñi rë cjuavisiajmi ngarca xi tsajin mé machjirëhë xi visiajmi xuta ta, me xi cuatjin visiajmi ne, quihndë nga nchujun ne, tijima yehe sa cjuatsehen xi tjín rë me. <sup>17</sup> Hacuaha cjuavisiajmi rë me xi cuacun jan ne, tangun cojo hiscan xi hmu, xi quihndë nga nchujun ne, tijima tojo sa. Cuatjin tivatju cha Himeneo cojo cha Fileto ta, <sup>18</sup> tsëhë xi ha cavetjuxin cha tsëhë ndiya rë cjuaquixi. Chja cha ta quixiin xi cuascaya naja hya xi ha caveyan. Hane cojo cjua vëhë ne, titsinguetsun cha cjuatacun rë ngujo xuta xi macjain rë me Nina. <sup>19</sup> Peru Nina ne, cavejña me ngu cjuatacun xi hatuxa cjuaquixi, xi tsajin yo cuma tsinguetsun rë. Hacuaha jo cjua rë Nina xi hatuxa cjuaquixi. Ngu ne, chja cuitjin: “Nai naja ne, vëë me jarë xuta xi tsëhë me”; ngu nga ne, chja cuitjin: “Yëjê ni xuta xi chja me xi

ladu rë Nai naja me ne, meje rë xi catiyujuxin me tsëhë cjuatsehen.”

<sup>20</sup> Ndava ngu xuta xi ndaja vatju me ne, jemu cjín xcusun trasti xi tjin. Tjin trasti xi tsëhë oro cojo xi tsëhë quicha. Hacuaha tjin xi tsëhë ya cojo xi tsëhë nihndë. Ngujo trasti jan ne, jemu machjirëhë. Hane ngujo nga ne, chuva machjirëhë.

<sup>21</sup> Cuatjin naja ngayaan xuta ladu rë Cristu ta, jemu tecjanjñi ngayaan. Peru xi cuma yaan xuta xi vengui chjí rë ne, meje rë xi cuiyujuxen yëjë ni cjuatsehen. Xi cuatjin ne, cuma tyjahi cjuatacun naja, cumachjirëhë rë Nai naja ngayaan, hacuaha tjin ndaja ngayaan xi nihña yëjë ni cjuandaja.

<sup>22</sup> Yëjë ni cjuatacun tsehen xi meje rë xuta xi chihndë me ne, ngaye ne, tiyijixin. Tihin tjengui ndiya rë cjuaquixi. Catjë catamacjain ri. Tihin tjengui cjuahmutacun. Tihin tjengui cjuajeya, sacuaha tjin sahmi yëjë ni xuta xi cojo ngu cjuatacun tyjahi fehya rë me Nai naja xi cuisecoo rë me. <sup>23</sup> Hya xi tivinenguise xicjin xuta tsëhë cjua ngarca xi venguiin chjí rë ne, xi canihñicuendiin cjua xi chja me. Tsëhë xi ha hye ta tsëhë cjua vëhë ne, hatuxa cuetjucaa ngu si. <sup>24</sup> Hane xuta xi sahmi xa rë Nai naja ne, mijí rë xi sircu me ta meje rë xi ndaja me cojo ngayëjë ni xuta. Meje rë xi quicun cacun me xi cuicuya me xuta. Meje rë xi yehe cacun me. <sup>25</sup> Hacuaha xuta xi chuyiin rë me tsëhë cjuaquixi ne, meje rë xi cuma quixi me, peru cojo cjuandaja cojo cjuajeya. Xi cuatjin ne, cuma xi sua Nina cahndë xi cuindeya cjuatacun rë xuta xi cuacun jan, hacuaha xi cuijnercu jain me cjua xi cjuaquixi. <sup>26</sup> Sehe hacuaha sacú nga rë me cjuatacun ndajyihi, hacuaha cuetjutje me tsëhë xitsehen matitjun xi cavindacha rë me. Cavindacha xitsehen xuta jan, xi casahmi me yëjë ni hacutjin xi meje rë xitsehen jan.

### 3

#### *Nixtin xi cuijnetaha*

<sup>1</sup> Catijnercuí cjua vihi: hya xi cuma tiña nixtin xi cjuë ngasunhndë ne, jemu choho cuatju xuta cuma ta, <sup>2</sup> tsëhë xi xuta ne, cuitjin sahmi me: meje rë me xi suvá ni me ndajyihi cuatju me cuma; jercu sahmi me cojo tujún; jemu haxi me ta jercu cuichja me xi ndaja vatju me. Hacuaha jercu sahmi hngacacun me; choho cuichja me tsëhë xicjin me hacuaha choho cuichja me tsëhë Nina. Cuihndiin me tsëhë xutacha rë me. Hisca ngu nacuechji naja suaain me, hisca ngu nacuechji rë Nina suaain me. Cuendaain rë me tsëhë Nina; <sup>3</sup> tsajin rë me cjuahmutacun; tsajin rë me cjuayumatacun; cuichja me cjuandesu. Hacuuiin cuetjo me yojo rë me; jemu sahmi xcuahya me; chuyiin rë me tsëhë yëjë ni cjuandaja. <sup>4</sup> Jo xcun

jo hntsua me ta, cuiteña xicjin me; jemu tujyë sahmi me; jemu sahmi yehe me yojo rë me. Chuyiin rë me tsëhë Nina ta cjuasua xi tsëhë ngasunhdë ne, vëhë jemu chuya rë me tsëhë. <sup>5</sup> Hacuaha sahmi me xcusun rë xuta xi macjain jain rë Nina, peru tsitjungui me hacutjin xi cjuaquixi.

Xi caninguisinjñii cojo xuta xi cuacun vë ta, <sup>6</sup> tsëhë xi ngajñi rë me ne, hinchajñi cha xi vanguise chuva rë xi cuma cuisehen ndava xuta, hane cuindacha cha yachjin xi ha tsingatihin mandacha. Tsingatihin na mandacha na ta, tsëhë xi jemu va tjïn cacun na tsëhë jyë rë na, xi tisahmi na yëjë ni hacutjin xi xahasen rë na meje rë. <sup>7</sup> Hacuaha yachjin jan ne, jemu vutaya na yëjë ni cjuatacun xatsë, peru hatuxa vijniircu na cjua xi cjuaquixi. <sup>8</sup> Ha hye ta hatsëë nixtin ne, jo cha surqui xi hmí Janes cojo Jambres ne, casahmi cha condra xutachanga naja Moisés. Hacuaha ni tjïn rë cha ndacha xi cuacun jan ne, sahmi cha condra cjua xi cjuaquixi ta, cavetsun cjuatacun rë cha, hacuaha machjiriin cha xi cumacjain rë cha Nina. <sup>9</sup> Hane hacuiin jemu xcun cuma cjue cha cojo cjua ndacha rë cha ta, tsëhë xi ngayëjë ni xuta ne, cjuahacuenda me xcusun yumahasen xi cun cha, sacuatjin cama tsejen xcusun yumahasen xi cun cha surqui xi cuacun jan hatsëë nixtin.

*Pablo ne, tsinguixi me Timoteo*

<sup>10</sup> Peru ngaye ne, jemu ndaja tichutaye cjua xi vicuyá cojo xcusun xi sahme cojo cjuatacun xi tjëngë. Hacuaha jemu ndaja hye hacutjin xi fë macjain ná, hacutjin xi jyë cáacun, hacutjin xi hmu cáacun, cojo hacutjin xi ndaja ticaa ná. <sup>11</sup> Hacuaha ndaja camachaya ri tsëhë yëjë ni cjuañihi xi cavátju camá. Jercu choho cavátju camá ngajan nandya Antioquía cojo Iconio cojo Listra. Peru Nai naja ne, cavaxëtje ná me tsëhë yëjë ni cjuañihi xi cavátju camá jan. <sup>12</sup> Hacuaha yëjë ni xuta xi meje cjuaharcun me Nina ta tsëhë xi macjain rë me Cristu Jesús ne, hatuxa tjïn xi cuatju me cjuañihi. <sup>13</sup> Peru xuta tsehen cojo xuta ndacha ne, quihndë nga nchujun ne, tichaja sa cjuatacun rë me, xi vindacha me yahnga xuta ne, hacuaha jima ndacha suvá me.

<sup>14</sup> Ngaye ne, hacuiin cuejñixin cjua xi cachutaye, cjua xi café ma ngu tacuin cojo. Ha hye yo xi cavicuya ri ta, <sup>15</sup> tsëhë xi hisca cjuaquihndi riji ne, cachutaye xujun rë Nina. Hane xujun jan ne, vëhë sua machaya ri xi Nina ne, cuaxëtje naja me, ngayaan xi macjain naja Cristu Jesús. <sup>16</sup> Nina ne, casua me cjuatacun rë me ngujo xuta, sehe xuta jan ne, catsihindu me xujun rë Nina. Vëhë xi xujun jan ne, jemu machjirëhë xi cuicuya naja, xi cuichjataha naja, xi tsinguixi naja, xi cuincha naja ndiya rë cjuaquixi, <sup>17</sup> cojo sa xi ngayaan xuta ladu rë

Nina ne, cuechutaha cjuatacun naja xi cuma nihña yějē ni cjuandaja.

#### 4

<sup>1</sup> Tivutsejen naja Nina. Hacuaha tivutsejen naja Cristu Jesús, me xi tsichuva naja ngayějē ni ngayaan xuta, sa xi quicun cuaha ngayaan, o sa xi caveyan. Tséhē xi cuinduva nga me, hacuaha tséhē xi cuitexa naja me ne, véhē xi chjá cojo ri ta <sup>2</sup> tinoje cjua rē Nina cojo xuta. ¿Há chuya rē me? ¿há chuyiin rē me? peru tsimii sahmi rē, tinoje cojo rē me. Hacuaha tinojetehe rē me. Ninguixi me. Ticoye rē me. Peru nijyētacuín cojo rē me. <sup>3</sup> Cuatjin nihñi ta, tséhē xi cuetjucaa nixtin xi xuta ne, ha quihndē chuyiin rē me tséhē cjua xi cjuaquixi. Sahmi me hacutjin xi meje rē me, hane cuihndē me tu mé ni cjua xi cuicuya maestru xi yahnga ta, maestru xi cuacun jan ne, suvá cjua xi chuya rē xuta ne, véhē cuicuya me. <sup>4</sup> Cuatjin xi xuta ne, sahmi ngaxtun me cjua xi cjuaquixi ne, tu cuentu xi machjiriin ne, véhē cuetaha rcu me. <sup>5</sup> Peru ngaye ne, meje rē xi tacun cahndē cjuatacun riji ngajñi rē tu mé ni ngu cjuacjintacun. Hacuaha tehe tacuín tséhē yějē ni cjuañihi. Tinoje cojo xuta cjua rē Nina, nihñichihin xá xi casua ri me.

<sup>6</sup> Ngahan ne, chuva sa nixtin xi cjuē ngahan. Ha cama tiña nixtin xi cueya. <sup>7</sup> Ndaja casahme xa, casahmechehen xa xi casua ná Nina. Hacuaha ndaja macjain cuaha ná Nina. <sup>8</sup> Véhē xi ha tjin ndaja cjuatjo xi sacú ná, tséhē xi tyjahi cjuatacun naha. Nai naja, me xi tsichuva naja cojo cjuaquixi ne, me véhē xi sua ná me cjuatjo jan haya xi cuechutaha nixtin. Hacuaha hacuín tu suva ni ngahan xi sua ná me ta cojo ngayějē ni xuta xi jemu meje rē me xi cuya nga Nai naja.

#### *Pablo ne, fehya me ngu cjuandaja*

<sup>9</sup> Nihñi xati tacuín ndove tjengui ná ta, <sup>10</sup> tséhē xi cha Demas ne, cavetjuxin cha tsahan, quiji cha ngajan nandya Tesalónica. Cuatjin casahmi cha ta, tséhē xi hitsē sa chuya rē cha tséhē xcusun rē ngasunhndē. Cha Crescente ne, quiji cha ladu tséhē Galacia. Hane cha Tito ne, quiji cha ladu tséhē Dalmacia. <sup>11</sup> Hane suvá ni cha Lucas quitaha cha cojo ná. Noje cojo cha Marcos ne, sehe ndove cojo cha ta, tséhē xi jemu machjiréhē cha xi cuisecoo ná cha tséhē xa xi sahme. <sup>12</sup> Cha Tíquico ne, catsingátju cha ngajan nandya Efeso. <sup>13</sup> Hya xi cuindove ne, ndovecueje tsjian tsangá naha xi cavejñá ndava cha Carpo, ngajan nandya Troas. Hacuaha cojo xujun naha, hacuaha cojo yějē ni sa xujun naha ne, ndovecueje.

<sup>14</sup> Cha Alejandro chjine quicha ne, jemu choho casahmi cha cojo ná. Peru Nai naja ne, sehe sahmingojo me cojo rē cha,

chuva rë jyë xi tjin rë cha. <sup>15</sup> Hane ngaye ne, tjin ri cuidadu tsëhë cha ta, tsëhë xi jemu casahmi cha condra cjuarë Nina xi canújin.

<sup>16</sup> Hya xi tjun tjun casuá cjuaquixi naha xcun xutaxa rë ne, tsajin yo cavisecoo ná. Yëjë ni amigu naha ne, cavetjuxin me tsahan. Hane catitsijyëcacun Nina cojo me xi cuacun cavetjuxin tsahan jan. <sup>17</sup> Peru Nina ne, cavisecoo ná me, casua ná me ngahñu, xi cama cachjá cjuarë me cojo yëjë ni xuta xi hacuiin tsëhë nación tsëhë Israel. Hacuaha Nina ne, cavaxëtje ná me tsëhë xuta xi meje tsiquehen ná. <sup>18</sup> Hacuaha cuaxëtje ná Nai naja tsëhë ngayëjë ni cjuatsehen, sehe cjuahatsja ná me ngajan ngahnga hiscan xi vitexa me. Me vëhë xi hatuxa jyë me, hatuxa hñu me yëjë ni nixtin. Cuatjin jain.

*Tsinguijnetaha me cjuarë*

<sup>19</sup> Cha Aquila cojo chjuun rë cha, na Prisca ne, tehe rë me ngu nina naha. Hacuaha cojo xuta rë cha Onesíforo ne, tehe rë me ngu nina naha. <sup>20</sup> Cha Erasto ne, casetaha cha nandya Corinto. Hane cha Trófimo ne, tsëhë xi hmu rë cha ne, cafaña cha ngajan nandya Mileto. <sup>21</sup> Nihñi xati tacuin, ndove tjengui ná quihndé xi chaja sa chan hnchan. Cha Eubulo ne, cha Pudente ne, cha Lino ne, na Claudia ne, cojo ngayëjë ni xuta xi macjain rë cjuarë Cristu Jesús ne, tsingatju me nina riji.

<sup>22</sup> Nai naja yaha ri me. Nina catisua nuju me cjuandaja rë me ngayujun ni.

## Carta xi catsingatju San Pablo xi cafahatsja Tito

<sup>1</sup> Ngahan Pablo, sacuaaha ngu mosu hndixahan tsëhë Nina ngahan, hacuaaha apóstol tsëhë Jesucristu ngahan.

Jesucristu casuaxa me ngahan xi cuisécoo rë xuta xi cavax-  
ijinjñi Nina, cojo sa xi cumacjain rë me tsëhë Jesucristu,  
hacuaha cojo tsëhë xi cumachaya rë me cjuaquixi rë Nina  
hane ndaja tsejen xi má me tsëhë Nina. <sup>2</sup> Jercu vetahan  
tacun xi sacú naja cjuahñu xatsë, tsëhë xi cuatjin cachja Nina  
hisca hya xi chaja sa cuma ngasunhndë. Hacuaha Nina ne,  
vindachaaïn me cojo cjuarë me. <sup>3</sup> Quihndë ne, jercu nixtin  
rë xi casua me camachaya naja tsëhë cjuarë me. Ngahan ne,  
casatëxa ná xi suá cumachaya rë xuta tsëhë cjuarë, tsëhë xi  
Nina xi vaxëtje naja ne, cuatjin cavitexa me.

<sup>4</sup> Tito, tsihindu ri carta vihi, ngaye xi sacuaaha quihndi naha  
ngaye, tsëhë xi tangun mangutacun cojo Jesucristu. Nina  
Nahmi naja cojo Jesucristu xi vaxëtje naja ne, catisua ri me  
cjuandaja cjuajeya.

### *Xa xi sahmi Tito ngajan distritu Creta*

<sup>5</sup> Cavejñá ri hiscan distritu Creta, cojo sa xi ngaye  
nihñichihin yëjë xi caviyuju vasen, hacuaaha cojo sa xi tehe xa  
ngu jo xuta xi cumatitjun me tsëhë yungun tsëhë jima ngu  
nandya sacuahatjin cavitëxa ri. <sup>6</sup> Xuta xi cuatjin tehe xa rë  
me ne, meje rë xi jercu tyjahi xahasen rë me, hacuaaha ngu  
ni chjuun rë xingu xingu me. Hacuaha meje rë xi quihndi  
rë me ne, ladu rë Jesucristu me, hacuaaha xi tsajin cjuarë  
me xi choho sahmi me o sa xi vihndiin me. <sup>7</sup> Cuatjin meje  
rë, tsëhë xi xuta xi matitjun me sacuaaha obispo ngajñi rë  
xuta rë yungun ne, me vëhë fahacuenda me tsëhë ngu tsë  
ngu xti tsëhë Nina. Vëhë xi meje rë xi jercu tyjahi xahasen  
rë me. Mijí rë xi xta me, mijí rë xi ngutjen ma xti rë me, mijí  
rë xi cha chihi me, mijí rë xi hngacacun me, mijí rë xi jercu  
vetahacacun me tujún xi sacurë me ngajñi rë ngu cjuandacha  
cojo xicjin me. <sup>8</sup> Xi meje rë ne, xuta xi cumatitjun me jan ne,  
tjin rë me cjuandaja cojo xuta hinchandiya, hatuxa sahmi me  
cjuandaja, yehe cacun me, tsajin jyë rë me, hacuaaha jiya me  
ndiya rë Nina, hacuaaha jercu yehe xahasen rë me. <sup>9</sup> Hacuaha  
meje rë xi cuetaha me yojo rë me tsëhë cjuarë xi cjuaquixi xi  
ha camá rë me, cojo sa xi cuma cueya me xahasen rë xingu  
xingu sa xuta cjuachacun xi cjuaquixi, hacuaaha cojo sa xi  
cuma sahmi me xi cuijnecacun xuta xi chjataha me tsëhë  
cjuachacun vëhë.



<sup>10</sup> Meje rë xi xuta xi cuacun vë ne, tsëhë xi jercu tjin xuta xi vihndiin me tsëhë xutaxa rë yungun ne, jercu tjin xuta xi tujyë visiajmi me, jercu tjin xuta xi vindacha. Hatuxa ngajñi rë xuta tjë rë Israel xi cavisehen ladu tsëhë Jesucristu ne, jercu tjin xuta xi cuacun vë. <sup>11</sup> Sahmi nguujyë xi nihña xi hindë cuichjaain me, tsëhë xi tsinguetsun me cjuatacun rë xuta tsëhë yëjë ngu ndihya. Cuatjin sahmi me hya xi vicuya me ngu cjua xi hisca mijí rë xi cuatjin cuicuya me. Hane cuatjin sahmi me, cojo sa xi sacú rë me tujún ngajñi rë ngu cjuandacha.

<sup>12</sup> Ngu profeta tsëhë distritu Creta ne, ha suvá me vëhë xi cachja me tsëhë xuta rë nangui rë me cuitjin: Yëjë ni xuta Creta ne, hatuxa ndacha me, jercu chu me, jercu vatjutaha jinë me, hacuaha jercu tsëhë me. Cuatjin cachja me. <sup>13</sup> Hane jercu quixi xi cachja me. Vëhë xi hñu nojetehe rë me, cojo sa xi ndaja cumacjain rë me cjuachacun, <sup>14</sup> hacuaha cojo sa xi cuetaharcuaain me tsëhë cuentu tsëhë xuta tjë rë Israel o sa xi cjua xi vitexa xuta xi tsindeya me cojo cjuandacha cjua xi cjuaquixi.

<sup>15</sup> Me xi tyjahi cjuatacun rë ne, tsajin mé xi tsavi xi cuma rë me. Peru me xi macjaain rë cjuachacun ne, tsajin mé xi tsaviin xi cuma rë me ta hisca cjuatacun cojo xahasen rë me ne, ha camachocun. <sup>16</sup> Chja me xi vëë me Nina, peru yëjë ni xi sahmi me ne, tsingacun me xi quixiin. Xuta xi cuatjin cun ne, sahmi xi choho vëë Nina me. Hatuxa vihndiin me, hane machjiriin me xi sahmi me cjuandaja.

## 2

### *Cjuachacun xi cjuaquixi*

<sup>1</sup> Cjua xi noje ne, meje rë xi matangun cojo cjuachacun xi cjuaquixi. <sup>2</sup> Tinoje cojo yëjë ni xihin changá, hacuiin tsingatjutaha me xi cuihi me o sa xi sinë me, hacuaha meje rë xi cuma chjahárcun rë me, meje rë xi yehe cacun me. Meje rë xi ndaja cumangucacun me cojo Nina, hacuaha ndaja tjin rë me cjuahmutacun, hacuaha ndaja scaa rë me tu mé ni cjuacjintacun. <sup>3</sup> Hacuanitjin ni tinoje cojo yëjë ni yachjin changá ne, meje rë xi jeya me, hacuaha mijí rë xi ndesu me, hacuaha mijí rë xi cuetaha me yojo rë me vinu. Meje rë xi cuicuya me yëjë ni xi ndaja. <sup>4</sup> Meje rë xi cuicuya me yëjë yachjin xi hitsë ni chuva nu rë ta meje rë xi tsihmucacun me xihin rë me cojo quihndi rë me, <sup>5</sup> hacuaha xi yehe cacun me, tyjahi xahasen rë me, hacuaha xi ndaja cjuahacuenda me cahntsua ndava me, hacuaha xi ndaja me, hacuaha xi cuihndë me tsëhë xihin rë me. Cuatjin meje rë xi cuicuya na me, cojo sa xi tsajin yo choho cuichja tsëhë cjua rë Nina.

<sup>6</sup> Hacuaha ni tjin ni tinoje cojo yějē ni xuta xi xihin xi hitsē ni chúva nu rē ta hacuaha meje rē xi yehe cacun me. <sup>7</sup> Hacuaha ngaye sove tejñi ntsacu tsēhē cjuandaja. Hane hya xi cuicoye ne, meje rē xi jercu tyjahi cjuatacun riji, hacuiin xcuehyu cuinoje ta <sup>8</sup> suvá cjua xi ndaja, xi tsajin yo cuma cuichjataha tsēhē. Cuatjin meje rē, cojo sa xi xuta condra riji ne, cuma sava rē me, tsēhē xi tsajin mé xi choho cuichja me tsajan.

<sup>9</sup> Tinoje cojo mosu hndixahan ne, meje rē xi cuihndē me tsēhē yějē cjua xi cuichja nai rē me. Meje rē xi ndaja me, hacuiin choho cjuayangui me tsēhē nai rē me. <sup>10</sup> Mijí rē xi tsichējē me ta meje rē xi tsingacun me xi cuma cumangutacun cojo rē me. Cuatjin meje rē xi sahmi me, cojo sa xi yějē xuta ne, cumachaya rē me xi jercu ndajyihi cjuachacun rē Nina, me xi vaxētje naja.

<sup>11</sup> Nina ne, catsingacun me cjuandaja rē me, hane cjuandaja vē ne, hacui xi cuaxētje naja ngayejen ni xuta. <sup>12</sup> Hacuaha cjuandaja vēhē ne, vicuya naja xi meje rē xi cuejñaxen yějē ni cjuatsehen cojo yějē ni xcusun tsēhē ngasunhndē xi meje naja, hacuaha vicuya naja xi meje rē xi tyjahi cjuatacun naja, meje rē xi tsajin jyē naja, meje rē xi nechanyan ndiya rē Nina xi tivanguen cojo ngasunhndē naja. <sup>13</sup> Meje rē xi cuatjin nihña nguyějē rē xi nechanyan rē nixtin ndajyihi xi jercu vetahantacun, nixtin xi cuetjuaatsejen cjuahasan ndajyihi rē Nina naja Jesucristu, me xi cuaxētje naja, me xi jercu jyē hnga me cojo hasen rē me. <sup>14</sup> Me vēhē ne, casua me yojo rē me xi cueya me ngatsē naja, cojo sa xi cuaxētje naja me tsēhē yějē ni cjuatsehen, hacuaha tsityjahi me ngayaan ne, sehe sahmi tsēhē me ngayaan, hane ngayaan ne, jercu meje nihña cjuandaja.

<sup>15</sup> Tinoje yějē cjua vēhē. Tinche ndiya xuta hacuaha tinojetehe rē me nguñajatacuin. Catiin cahndē xi yo sahmi chúva ri cojo cjuatacun riji.

### 3

#### *Yějē ni xcusun xi meje rē xi sahmi xuta ladu rē Jesucristu*

<sup>1</sup> Ninguitsjin rē yějē xuta ladu rē Jesucristu xi meje rē xi cuihndē me tsēhē xutaxa rē xi vitexa, hacuaha meje rē xi yějē ni nixtin ne, tjin ngu cacun me xi sahmi me cjuandaja.

<sup>2</sup> Tinoje cojo rē me ta mijí rē xi choho cuichja me tsēhē hisca ngu xuta. Meje rē xi hacuiin hngacacun me ta xi meje rē ne, jeya me, hacuaha ndaja me cojo xcusun rē me cojo yějē ni xuta. <sup>3</sup> Cuatjin noje cojo rē me, tsēhē xi ngayaan ne, hacuaha jemu chúva ningatahantacun hatsēē, hacuaha cavinuhyaan tsēhē Nina, hacuaha cavinechanyaan ngu ndiya xi hacuiin hacui. Caninguissehen rcun cojo yějē ni xcusun

cjuasua. Cavinechanyan ngu ndiya rë cjuatsehen, ngu ndiya rë cjuaxin. Xuta ne, choho cavëë me ngayaan, hacuaha choho cahyan xingueen xingu xingu ngayaan. <sup>4</sup> Peru Nina, me xi vaxëtje naja ne, hya xi catsingacun me cjuandaja rë me cojo cjuahmutacun xi tjin rë me xi cuma rë yëjë ni xuta ngasunhndë ne, <sup>5</sup> cavaxëtje me ngayaan. Hacuuiin tsëhë xi jercu ndaja canihña ta tsëhë xi yuma camá rë me ngayaan xi cavaxëtje me ngayaan. Cuatjin cavaxëtje me ngayaan hya xi casahmi me xi cavuya catsin ngayaan hya xi catsityjahi me ngayaan. Hacuaha cuatjin cavaxëtje me ngayaan hya xi casua naja me cjuahña xatsë hya xi casua me ngayaan Hasen rë me. <sup>6</sup> Hane ngatsë rë cjuandaja xi casahmi Jesucristu, me xi vaxëtje naja ne, vëhë xi cuatjin jemu casua Nina ngayaan Hasen rë me, <sup>7</sup> cojo sa xi cjuë jyë naja ngatsë rë cjuandaja rë Jesucristu, hacuaha chjahanntsán cjuahña xatsë xi jercu vetahan tacun.

<sup>8</sup> Yëjë ni cjua xi cachjá cojo ri vëhë ne, jemu cjuaquixi. Hacuaha meje ná xi cuinoje yasen yasen ni yëjë cjua vëhë cojo xuta xi camangucacun me cojo Nina, cojo sa xi me xi cuacun jan ne, sahmi me ngahña xi sahmi me suvá cjuandaja. Yëjë ni cjua vëhë ne, jercu ndaja hacuaha jercu machjirëhë rë xuta. <sup>9</sup> Xín tejñi yëjë ni cjuavisiajmi xi hacuiin machjirëhë; xín tejñi cjuavisiajmi tsëhë ñihi rë yëjë xutachanga rë xingu xingu me; xín tejñi yëjë ni cjuavisiajmi tsëhë xuta xi cjan cojo xicjin; xín tejñi yëjë ni cjuavixcan tsëhë ley rë Moisés. Yëjë ni cjuavisiajmi vëhë ne, machjiriin hacuaha tu mahya cuisiajme. <sup>10</sup> Ngu xuta xi vaxë me ngu ngu xuta tsëhë ngajñi rë xuta yungun xi cjue ladu rë me ne, tinojetehe rë me ngu ndiya o hisca jo ndiya. Xi cjuë vëhë ne, hindë xicachasiin tsëhë me, <sup>11</sup> tsëhë xi ngaye ne, ha hye xi ngu xuta xi cuatjin sahmi ne, jiya me ngu ndiya xi xín cjui, hacuaha sahmi me cjuatsehen. Hane cjuatsehen rë me jan ne, vëhë tsingacun xi cuaaintjin xi sahmi me.

### *Cjuacjintacun tsëhë suvá Pablo cojo Tito*

<sup>12</sup> Hya xi tsingátju Artemas o sa Tíquico xi cjuetjengui ri ne, nihñi ngu jyë xi cuindove tjengui ná ngajan Nicópolis, tsëhë xi tuxa ngajan cavejñángucácun xi tsingátju chan hnchan. <sup>13</sup> Tisecuee rë Zenas, me xi abogado me, cojo Apolos ne, catjindujú me cojo ndiya rë me, hane chjehecuende xi tsajin mé tsichaja rë me ndiya. <sup>14</sup> Hacuaha meje rë xi xuta naja ne, cuma rë me hacutjin sahmi me cjuandaja, cojo sa xi cuisecoo me ngajñi rë ngu cjuachaja xi jercu sahmi ngu jyë. Meje rë xi cuengui chjí rë me cojo ngasunhndë rë me.

*Pablo ne, tisua me ngu nina*

<sup>15</sup> Yějě ni me xi siutahá cojo ná ne, tsingatju me ngu nina riji. Hacuaha tehe rě xuta xi hmucacun me ngayaan ngatsě rě xi tjin tangun cjuatacun naja cojo Jesucristu ngu nina.

Nina ne, catisua nuju me cjuandaja ngayujun ni. Cuatjin jain.

## Carta xi Catsingatju San Pablo tsëhë Filemón

<sup>1</sup> Ngahan Pablo, xi tejñaya ndavaya ngatsë rë xi sahme xa rë Jesucristu ne, tsihindu cojo Timoteo xingueen xujun vihi xi ningatjin nuju ngayun Filemón, ngayun xi jemu hmutacuin nuju, ngayun xi visecun niji xcun xa xi nechantahan. <sup>2</sup> Hacuaha ningatjin nuju xujun vihi ngayun Apia, ngayun xi hacuaha xinguin nuju, cojo ngayun Arquipo, ngayun xi tangun canihña cojo nuju ngahñu ngatsë rë cjua rë Nina, cojo ngayujun sa xuta ladu rë Nina xi ma tangun ngayun ngajan ndava me vëhë. <sup>3</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya.

### *Vaxëndaja Pablo Filemón*

<sup>4</sup> Ngayun Filemón, hya xi veyanangë nuju ngajñi rë oración naha xi tisahme ne, nchunchujun ni ne, suá nacuechji rë Nina naha ta, <sup>5</sup> tsëhë xi tivechutaha ná cjua xi jemu tjin nuju cjuahmutacun cojo yëjë xuta ladu rë Nina hacuaha jemu tjin ngu tacún cojo Nai naja Jesús. <sup>6</sup> Hacuaha féhya rë Nina xi ngayun xi mangutacun cojo Nai naja sacuatjin niji ngayin ne, catuxaha sa me cjuatacun nuju xi cuijnercun yëjë ni cjuandaja xi tjin naja ngatsë rë xi tjin tangun cjuatacun naja cojo Jesucristu. <sup>7</sup> Jemu ndama ná, tai, hacuaha jemu sacu ná cjuetacun ngatsë rë cjuahmutacun xi tjin nuju ta, tsëhë xi ngatsë nuju ne, casacu rë xahasen rë xuta ladu rë Nina cjuetacun.

### *Pablo fehya rë Filemón cjuandaja xi cuma rë Onésimo*

<sup>8</sup> Vëhë xi handasa tsacjun xi cuitéxa nuju mé xi ndatjin nihñu tsëhë xi tjin tangun cjuatacun naha cojo Jesucristu ne, <sup>9</sup> peru hitsë sa chuya ná xi cjuéhya nuju tsëhë xi ngajñi naja ne, jiya vasen xi hmí cjuahmutacun. Ngahan, Pablo ne, jemu changá ngahan hacuaha tejñaya ndavaya quihndë ngatsë rë xi sahme xa rë Jesucristu ne, <sup>10</sup> tiféhya nuju ngu cjuandaja xi cuma rë cha Onésimo, cha xi sacuaha quihndi naha tsëhë xi camá cafaha cha cjuandajiyi xi chja tsëhë Jesucristu xi casuá rë cha nguehe ndavaya.

<sup>11</sup> Handasa camachjiriin nuju cha mosu hndixahan nuju cha Onésimo hatsëë nixtin jan ne, peru quihndë ne, hisca ngayun hisca ngahan ne, jemu machjirëhë naja cha. <sup>12</sup> Quihndë ne, titsingátju nga nuju cha, hane meje ná xi chjuhunntsun cha sacuaha xi ngahan suva xi chjuhunntsun ná. <sup>13</sup> Hacuaha meje ná xi cuejña cha cojo ná, cojo sa xi

cjuahacuenda ná cha ngojo nuju jinguyèjè rë xi tejnaya ndavaya ngatsë rë cjuandajyihí xi chja tsëhë Jesucristu. <sup>14</sup> Peru mijí sahme tu mé ni hya xi chaja sa cuinújun mé xi ndatjin xi sahme. Cuatjin ta, tsëhë xi meje ná xi cjuandaja xi nihñu ne, hacuiin cojo cjuachan ta suvá cojo cjuasua nuju. <sup>15</sup> Cavetjuxin rë xuma quihndi tsujun ngujo nixtin cojo sa xi quihndë xi cuya cha ne, cuejñacahndë nga cha cojo nuju yëjè ni nu yëjè ni nixtin. <sup>16</sup> Peru ha quihndë hacuiin sacuaaha ngu mosu hndixahan nuju cha xi cuejña cha cojo nuju ta sacuaaha ngu xuta xi jemu vengui sa chjí rë me, sacuaaha ngu xingun xi jercu hmutacún. Ngahan ne, jercu hmú cacún cha, hacuaaha ngayun ne, hitsë sa ndaja hmutacún cha, hacuiin suvá sacuaaha ngu xuta ni ta sacuaaha ngu xuta ladu rë Nai naja.

<sup>17</sup> Quihndë ne, ngayun Filemón ne, ngatsë rë xi ha hyun ta ngayaan ne, tangun ni mangutacun cojo Jesucristu ne, vëhë xi quihndë ne, chjuhunntsun cha sacuaaha xi chjuhunntsun ná ngahan. <sup>18</sup> Hane sa xi mé choho casahmi cha cojo nuju, o sa xi quitjen cha tsujun ne, vëhë ne, tejñu ladu naha. <sup>19</sup> Ngahan Pablo ne, cojo letra naha suva titsihindu cjua vihi; ngahan cuejñangojo vëhë. Mijí tsinguitsjén nuju xi ngayun ne, jemu quitjun camahani tsahan, tsëhë xi casuá camachaya nuju cjuandajyihí xi chja tsëhë Jesucristu. <sup>20</sup> Quihndë tai ne, tiseacun ná hitsë ta ngayaan ne, tjin tangun cjuatacun naja cojo Nai naja; tuhun hitsë cjuetacun xahasen naha ta ngayaan ne, tjin tangun cjuatacun naja cojo Jesucristu.

<sup>21</sup> Cuitjin tsihindu nuju ta, tsëhë xi tjin ngu cáacun cojo nuju ta cuinuhyun tsahan, hacuaaha hvë ta hisca quisun sa nihñu tsëhë cjua xi chjá cojo nuju. <sup>22</sup> Hacuaaha tuhunndujun ngu cahndë hiscan xi cuitejña ta, ngahan ne, vetahácacun xi Nina ne, sua me cahndë cjuétjengë nga nuju ngatsë rë xi cuatjin chjahyun rë me.

### *Tsinguijnetaha Pablo cjua*

<sup>23</sup> Epafras, me xi hacuaaha jiya ndavaya cojo ná ngatsë rë xi sahmi me xa rë Jesucristu ne, hacuaaha tsingatju me ngu nina tsujun ngayun Filemón. <sup>24</sup> Hacuanitjin ni Marcos, Aristarco, Demas, cojo Lucas, me xi cuacun tangun sahmi xa cojo ná ne, hacuaaha tsingatju me ngu nina tsujun.

<sup>25</sup> Catisehen cjuandaja rë Nai naja Jesucristu cahntsua xahasen nuju ngayujun ni. Cuatjin jain.

## **Xujun xi camahindu xi cjuahatsja xuta xi visiajmi Hebreo**

<sup>1</sup> Nixtin titjun ne, jemu cjin ndiya hacuaha jemu cjin chuva rë xi casua Nina camachaya rë xutachanga naja ngu cjua hya xi catsingatju me cjua cojo profeta rë me. <sup>2</sup> Peru quihndë nixtin vihi ne, casua me camachaya naja hya xi catsingatju me cjua cojo Quihndi rë me. Hane me vëhë xi cachja Nina xi cuma Nai rë yëjë ni xcusun xi tjin ngasunhndë, hacuaha casuaxa Nina Quihndi rë me jan xi me vëhë casahmi me ngasunhndë. <sup>3</sup> Hacuaha sacuatjin jemu jyë hnga Nina cojo hasen ndajyihi rë me ne, cuatjin jyë hnga Quihndi rë me cojo hasen rë. Hacuaha sacujyihi suvá Nina ne, cuajyihi camahani Quihndi rë me. Hacuaha Quihndi rë Nina jan ne, yahangui me yëjë ni xcusun xi tjin ngasunhndë cojo cjua rë me xi jemu hñu ngahñu rë. Hane xi caffè catsityjahi me xuta tsëhë jyë rë ne, sehe quiji me ngahnga, cavejña me taha ladu quixi tsëhë Nina.

*Hitsë sa matitjun Quihndi rë Nina xi cumá rë yëjë ni ángel*

<sup>4</sup> Hacuaha tu tjin xi hitsë sa jemu ndajyihi xa xi casacu rë Quihndi rë Nina xi cumá rë xa xi casacu rë ángel ne, hacuanitjin ni cavechutaha me xi hitsë sa jemu camatitjun me tsëhë ángel xi cuacun jan, hya xi quiji cavejña me cojo Nina. <sup>5</sup> Hisca xi ngu ángel ne, cachjaain Nina cojo cjua vihi, sacuatjin cachja me cojo Quihndi rë me:

Ngaye xi quihndi naha ngaye;

hacuaha quihndë casuáxa ri.

Cuatjin cachja me. Hacuaha cachjaain me tsëhë ngu ángel cuitjin:

Ngahan cumá ngahan nahmi rë cha,

hane cha vëhë ne, cumá cha quihndi naha.

Cachjaain me cuatjin cojo ángel. <sup>6</sup> Hane ngu ndiya nga, hya xi tsingatju me Quihndi ngu rë me ngasunhndë ne, cuitjin chja me tsëhë Quihndi rë me:

Yëjë ni ángel naha ne, catjaharcun rë me.

Cuatjin cachja me. <sup>7</sup> Hane xi tsëhë ángel rë me ne, cuitjin chja me:

Ngahan sahme xi ángel naha ne, tangun xcusun rë cojo tjo, hane ángel xi fahacuenda xa naha ne, sahme xi tangun xcusun rë cojo ndihi.

Cuatjin cachja me. <sup>8</sup> Peru xi tsëhë Quihndi rë me ne, cuitjin chja me:

Ngayun Nina, tsajin nu tsajin nixtin cuijnetaha gobiernu nuju,

hacuaha gobiernu xi nihñu ne, hatuxa cjuaquixi.

<sup>9</sup> Canihmutacun cjuaquixi hane choho cahyun cjuatsehen;

hane vëhë xi ngahan Nina nuju ne, cavaxejen nuju,

hacuaha hitsë sa jyë cjuasua casuá nuju ngayun

xi cuma rë xingun.

Cuatjin cachja me. <sup>10</sup> Hacuaha chja nga me cuitjin:

Ngayun, Nai naha, ntsacu cavetsihin ne, ngayun canindujun nangui;

hacuanitjin ni ngahnga, hacuaha ngayun canindujun.

<sup>11</sup> Yëjë xcusun vëhë ne, cuechu nixtin xi cjuë,

peru ngayun ne, tsajin nu tsajin nixtin xi cjuë ngayun.

Hacuaha yëjë xcusun vëhë ne, cuma changá sacuatjin rë ngu tsjian xi chajá rë;

<sup>12</sup> hacuaha cuechu nixtin xi nijeyun xcusun xi cuacun vë sacuaha ngu tsjian tsjanga,

hacuaha nindeyun sacuaha vindeya ngu tsjian xi chajá rë.

Peru ngayun ne, hatuxa vindeyaain ngayun;

hacuaha nixtin nuju ne, hatuxa cuijnitaain.

Cuatjin cachja me. <sup>13</sup> Hacuaha hisca ngu ángel ne, cachjaain

Nina cojo rë cjuá vihi, sacuatjin cachja me cojo Quihndi rë me:

Tinechin nguehe ladu quixi naha,

hisca hya xi yëjë ni xi sahmi ri condra ne, cuiyujú ngahan ngahma gobiernu riji.

<sup>14</sup> Sacuaha ángel ne hacui hasen xi tsujyihya tixa tsëhë Nina.

Nina tsingatju me ángel xi cuacun vë xi fehe visecoo naja ngayaan xi cuetjuntjen tsëhë jyë naja.

## 2

*Mijí rë xi chasen cjuandajyihí xi chja hacutjin cuetjuntjen*

<sup>1</sup> Vëhë xi meje rë xi hitsë sa ndaja cuetahanrcun cjuandajyihí xi cavisiñuju, cojo sa xi hacuiin tu hitsë tu hitsë ne, cuetjunxen tsëhë ndiya ndajyihí xi tivanguen. <sup>2</sup> Ta sacuaha ley rë Nina xi cachja ángel hatsëë nixtin ne, tjin jain rë ngahñu.

Hane yëjë xuta xi casahmi cjuatsehen hacuaha cahndiin me tsëhë ley jan ne, camá me castigu sacuatjin xi mameje rë jyë rë me. <sup>3</sup> Hacuaha ngayaan ne, cumaji cuatjuhnga ngayaan tsëhë castigu xi satë naja, sa xi chasen cjuandajyihí xi jercu tu ndajyihí camahani xi chja hacutjin cuetjuntjen.

Cjuandajyihí vëhë ne, titjun Nai naja cachja me, hane xuta xi cahndë me cjuá rë Nai naja ne, hacuanitjin ni cachja me cojo naja xi camá ngascan. <sup>4</sup> Hacuaha Nina ne, cojo jemu cjin cjuarcun xi ña quijircun naja hisca carcun cachutsejen ne, casua me camachaya naja xi cjuandajyihí vëhë ne, cjuaquixi



jain. Hacuaha hya xi casua naja Nina Hasen rë me sacuatjin cavejñangucacun me ne, cuatjin xi casua me camachaya naja xi cjuandajyihî vëhë ne, cjuaquixi jain.

*Hacutjin vaxëtje naja cjuaveya rë Jesús*

<sup>5</sup> Nina ne, cachjaain me xi ngahma gobiernu rë ángel cuejña ngasunhdë, hya xi cuinduva me sahmi me gobiernu ngasunhdë xi tinújan tsëhë vi. <sup>6</sup> Tjin ngu cahndë tsëhë xujun rë Nina xi cachja ngu xuta cojo Nina cuitjin:

¿Mé vengui chjí niji ngayin xuta, xi cuatjin ninguitsjun niji?

¿Mé vengui chji niji xi cuatjin chjuhuncuendun niji?

<sup>7</sup> Ngayun ne, ngujo nixtin ne, hitsë sa caninguijnu niji xi cuma rë ángel,

peru canihñu yehe canihñu hnga niji cojo cjuatacun niji hacuaha canihñu xi chjihinjendin;

<sup>8</sup> yëjë ni xcusun xi tjin ngasunhdë ne, caviyujun ngahma gobiernu niji ngayin xuta.

Cuatjin cachja ngu xuta cojo Nina. Hya xi cuatjin caviyuju Nina yëjë xcusun xi cuacun vë ngahma gobiernu rë xuta ne, yëjë ni caviyuju me, hisca ngu xcusun catsicanguiin me. Peru hisca quihndë ne, cjëë chan xi yëjë xcusun xi cuacun vë ne, cuiyuju ngahma gobiernu rë xuta. <sup>9</sup> Peru xi hyan ne, Jesús, xi ngu jo nixtin ne, hitsë sa catsinguijne Nina me xi cumá rë ángel, peru quihndë ne, casahmi jyë casahmi hnga Nina me cojo hasen rë me hacuaha casahmi me xi Jesús ne, cjuahájenda me. Cuatjin casahmi Nina cojo rë me tsëhë xi jemu jyë cjuañihî cavatju me hya xi cahme me. Cuatjin camá cojo sa xi cojo cjuandaja rë Nina ne, Jesús cueya me ngatsë rë yëjë ni xuta.

<sup>10</sup> Nina ne, casahmi me yëjë ni xcusun xi tjin, tsëhë xi cuatjin chuya rë me. Hacuaha meje rë me xi jemu cjín quihndi rë me xi cuma yehe cuma hnga cojo cjuatacun rë. Vëhë xi ndatjin xi sahmi Nina xi ngajñi rë cjuañihî xi cavatju Jesús, me xi vaxëtje naja ne, cuechutaha me yëjë ni hacutjin xi meje rë Nina xi cuechutaha me. <sup>11</sup> Me xi tiviyujuxin rë xuta xi cumá tsëhë Nina me cojo yëjë ni xuta xi tiviyujuxin ne, ngu ni nahmi rë me. Hane vëhë xi me xi Quihndi rë Nina ne, ma savaain rë me xi chja me xi xicjin me xuta xi cuacun jan, <sup>12</sup> sacuatjin chja me xcun xujun rë Nina xi chja me cuitjin:

Suá cumachaya rë yëjë xingueen yo ngayun,

hacuaha cuaxëndaja nuju së tsujun ngajñi rë me hiscan xi matangun me.

Cuatjin cachja Quihndi rë Nina. <sup>13</sup> Hacuaha chja nga me cuitjin:

Hacuaha ngayun xi cumangu cáacun cojo nuju.

Cuatjin cachja nga me. Chja nga me cuitjin:

Nguehe cuajyihí ngahan cojo yějě quihndi nuju xi catuhun ná.

Cuatjin cachja me.

<sup>14</sup> Tséhě xi ngayaan quihndi rě Nina ne, tjin jni tjin yojo naja ne, vėhě xi Jesús ne, hacuaha casacu rě me jni casacu rě me yojo rě me, cojo sa xi ngatsě rě cjuaveya rě me ne, cjuahataha me ngahñu rě xitsehen xi matitjun xi vitexa rě cjuaveya. <sup>15</sup> Hacuaha ngatsě rě cjuaveya rě me ne, ma sahmi ndaya naja me ngayejen ni xuta xi rcun cjuaveya. Hane tséhě xi cuatjin rcun cjuaveya ne, vėhě xi sacuaha xi cjuaveya ne, cavitexa naja xcun cjuahñu naja. <sup>16</sup> Ha cjuaquixi ta hacuiin canduva me xi cuisecoo me ángel ta xi canduva me ne, tséhě xi cuisecoo naja me ngayaan xuta tjě rě Abraham. <sup>17</sup> Hane ngatsě rě vėhě xi casahmi ngu jyě xi camá me sacuaha ngayaan cojo ngayějě ni chuva rě sacuatjin cun ngayaan xicjin me, cojo sa xi hacuaha cuma me ngu nahmi xi matitjun xi tjin rě me cjuayumatacun, hacuaha jemu ndaja sahmichihin me xa rě Nina, hacuaha cojo sa xi cuechjitje me jyě naja. <sup>18</sup> Hane tséhě xi cuatjin suvá Jesús cavatju me cjuañihi hya xi cafachuva xitsehen me ne, vėhě xi quihndě ne, hacuaha cuma cuisecoo naja me ngayaan hya xi tifachuva naja xitsehen.

### 3

*Hitsě sa jyě hnga Jesús cojo hasen rě me xi cumá rě Moisés*

<sup>1</sup> Ngayujun ni xuta ladu rě Nina xi cavaxijin nuju me xi cuma tséhě me ngayun ne, cuisiajme hitsě tséhě Jesús, me xi catsingatju Nina xi sua cumachaya naja tséhě cjuachacun xi nújan xi macjain naja, me xi hacuaha má nahmi xi matitjun tséhě cjuachacun xi nújan xi macjain naja. <sup>2</sup> Jesús ne, jemu ndaja casahmichihin me yějě hacutjin xi meje rě Nina xi casuaxa rě me, sacuatjin casahmi xutachanga naja Moisés hatsěě xi hacuaha jemu ndaja casahmichihin me xa xi cavisecoo me xuta rě Nina. <sup>3</sup> Jesús ne, vechú chuva rě xi hitsě sa cuma jyě cuma hnga me cojo hasen rě me xi cuma rě Moisés. Má sacuatjin rě ngu cha xi sahmi ngu ndihya, xi vechú chuva rě xi hitsě sa chjaharcun rě cha xi cuma rě ndihya xi casahmi cha jan ta, <sup>4</sup> tséhě xi yějě ni ndihya ne, tjin ngu xuta xi casahmi me, vėhě xi camá, peru me xi casahmi yějě ni xcusun xi tjin ngasunhdě ne, hacui Nina. <sup>5</sup> Moisés ne, ngu xuta xi sahmi xa rě Nina ni má me, hane jemu ndaja chihin casahmi me xa xi casatěxa rě me ngajñi rě yějě ni xuta rě Nina. Hane xa xi casahmi me jan ne, xi catsingasca rě me cjuatacun rě xuta tséhě cjuaxi cuichja Nina cuma ngascan. <sup>6</sup> Peru Cristu ne, Quihndi rě Nina camahani má me, hane jemu ndaja chihin casahmi me cuidadu yějě

ni xuta rē Nina. Xuta xi cuacun vë ne, hacui ngayaan, sa xi hacuiin nismetacun cjuatacun xi rcun camahani hacuaha sa xi hacuiin nismetacun cjuasua xi tjin rē xahasen naja xi vetahan tacun Nina.

*Cjuahajenda tangun xuta rē Nina cojo rē me*

<sup>7</sup> Vëhë xi meje rē xi cuetuhunrcun cjua xi chja Hasen rē Nina xi chja cuitjin:

Sa xi cuisiniñuju cjua xi chjá quihndë ne,

<sup>8</sup> hacuiin nihñu taja tacún sacuatjin casahmi xuta hya xi cachjataha me Moisés

hacuaha cafachuva ná me ngajan hiscan jemu xín tsëhë nandya.

<sup>9</sup> Hane ngajan cafachuva ná xutachanga nuju, handasa ha cavëë me yëjë cjuandaja xi casahme cahntsua yachan nu xi catsuyihiya me jan.

<sup>10</sup> Vëhë xi camacjan ná cojo yëjë xuta xi caviyuju nixtin hya, cuitjin cachjá tsëhë me: “Cjuatacun rē me ne, hatuxa hacjahi ndiya fi,

hvíin me ndiya naha.” Cuatjin cachjá.

<sup>11</sup> Vëhë xi camacjan ná cojo rē me hane cachjá quixi xi tsajin nu tsajin nixtin xi cuisehen cjuahajenda tangun me cojo ná.

Cuatjin cachja Hasen rē Nina.

<sup>12</sup> Nechun cuidadu, ngayujun ni, cojo sa xi tsajin hisca ngu ngayun xi cumatsehen cjuatacun nuju hacuaha cumacjaain nuju tsëhë me, sa tu cjuatacun tsehen jan ne, cuaxëxin nuju tsëhë Nina xi quicun me. <sup>13</sup> Cahndë rē vëhë ne, nchunchujun ni ne, tuhun cjuetacun xingun xingu xingu ngayun jinguyëjë rē xi tjin sa hora quihndë, cojo sa xi tsajin ngu ngayun xi cuma taja cjuatacun nuju ngatsë rē cjuandacha xi sahmi cjuatsehen. <sup>14</sup> Ta cojo ngayaan satë naja cjuandaja xi tjin rē Cristu, sa xi scaa jain naja cumangutacun hisca xi cuijnetaha nixtin naja, sacuatjin camangutacun ntsacu cavetsihin.

<sup>15</sup> Tetuhunrcun nga sacuatjin chja xujun rē Nina xi chja cuitjin:

Sa xi cuisiniñuju cjua xi chjá quihndë ne,

hacuiin nihñu taja tacún sacuatjin casahmi xuta hya xi cachjataha me Moisés.

Cuatjin chja xujun rē Nina. <sup>16</sup> ¿Yo me xi cuatjin cachjataha rē Moisés hya xi cavatju cavisiniñuju me cjua rē Nina ní? Yëjë ni xutachanga naja xi cavaxëxin Moisés tsëhë nangui Egipto.

<sup>17</sup> Hane ¿yo me xi camacjan rē Nina cojo rē cahntsua yachan nu ní? Ha hacui ni me changá xi cuacun vë xi casahmi cjuatsehen hane cahme me ngajan hiscan jemu xín tsëhë nandya. <sup>18</sup> Hane ¿yo me xi cachja quixi Nina cojo xi tsajin

nu tsajin nixtin xi cuisehen cjuahajenda tangun cojo me ni? Ha hacui ni me changá xi cuacun vë xi cahndiin tsëhë Nina. <sup>19</sup> Hane cuatjin camá xi camaji cavisehen cafaahajenda me ngajan, tsëhë xi camacjaain rë me.

#### 4

<sup>1</sup> Vëhë xi jinguyëjë rë xi tacun quicun cjua xi cachja Nina xi cuisen chjahanjendan tangun cojo rë me ne, meje rë xi cumacjintacun sá tu tjin ngu ngayun xi cuechuntuun xcusun ndajyihi vëhë. <sup>2</sup> Ngayaan ne, hacuaha cojo ngayaan camachaya naja cjuandajyihi vëhë sacuatjin camachaya rë xutachanga naja xi cuacun jan; peru me xi cuacun jan ne, tsajin mé camachjirëhë rë me cjua xi cavisiñuju me jan ta, tsëhë xi hya xi cavisiñuju me cjua jan ne, camacjaain rë me. <sup>3</sup> Peru ngayaan xi camacjain naja ne, cuma cuiseen chjahanjendan tangun cojo rë Nina. Sacuatjin xi ha cachja me tsëhë cjuandajyihi vëhë, xi cachja me cuitjin:

Vëhë xi camacjan ná cojo rë me hane cachjá xi tsajin nu tsajin nixtin xi cuisehen cjuahajenda tangun me cojo ná.

Cuatjin cachja me. Nina ne, catsinguijnetaha me xa xi sahmi me hisca hya xi casahmi me ngasunhndë; <sup>4</sup> hacuaha tjin ngu cahndë tsëhë xcun xujun rë me ne, cachja me tsëhë nixtin xi má yatu jan cuitjin:

Ngahan ne, nixtin xi má yatu ne, cafaahájenda tsëhë yëjë ni xa xi casahme.

Cuatjin cachja me. <sup>5</sup> Hacuaha ha xujun vëhë ni ne, cachja nga me cuitjin:

Tsajin nu tsajin nixtin xi cuisehen cjuahajenda tangun me cojo ná.

Cuatjin cachja me. <sup>6</sup> Hane tsëhë xi chaja sa cuisehen yahnga xuta xi cjuahajenda tangun me cojo Nina ne, hacuaha tsëhë xi xutachanga naja xi cojo tjun camachaya rë cjuandajyihi jan ne, cavisiin me cafaahajenda tangun me, ngatsë rë xi cahndiin me tsëhë cjua xi tjun camachaya rë me jan ne, <sup>7</sup> vëhë xi Nina ne, cavejña nga me ngu nixtin, xi hacui quihndë. Jemu tsëë cavatju nixtin xi cavitexa Moisés, hya xi catsihindu xutachanga naja David cjua rë Nina xi ha canújan titjun xi chja cuitjin:

Sa xi cuisiniñuju cjua xi chjá quihndë ne, hacuiin nihñu taja tacún.

Cuatjin cachja Nina. <sup>8</sup> Sa xi xutachanga naja Josué quijicojo me xuta xi cjuahajenda tangun cojo Nina ne, Nina ne, hacuaha cachjaain me xi camangascan xi tjin sa ngu nixtin xi cuiseen chjahanjendan tangun cojo rë me. <sup>9</sup> Ngajan xi tjin sa ngu nixtin xi cuisehen xuta rë Nina cjuahajenda tangun me

cojo Nina. <sup>10</sup> Ta xuta xi visehen fahajenda tangun cojo Nina ne, hacuaha fahajenda me tsëhë xa xi casahmi me sacuatjin cafahajenda Nina tsëhë xa xi casahmi me. <sup>11</sup> Ngajan xi meje rë xi nihña ngahñu xi cuma cuiseen chjahanjendan cojo rë Nina, cojo sa xi hisca ngu ngayaan ne, hacuiin nihña sacuatjin casahmi xuta xi cahndiin me tsëhë Nina.

<sup>12</sup> Cjua xi chja Nina ne, quicun jain, hacuaha jemu tjin rë ngahñu, hatuxa vetjucaa. Sacuaha xi hitsë sa yuju xi cumá rë quicha xi jo yuju rë, xi vatjucja rë hisca hasen naja, hacuaha handasa hiscan hinchacoo ninda naja ne, cuatju, cuechu hisca ngajñi rë xineninda naja. Cjua xi chja Nina jan ne, vëë hacutjin ningatahantacun, hacuaha vëë hacutjin má rë xahasen naja.

<sup>13</sup> Hisca ngu xcusun xi Nina catsindaja me ne, cumaji chahma xi cumá rë me; yëjë ni xcusun vëhë ne, tjin tsejen xi cuma rë Nina, me xi tahancuendan rë yëjë ni xcusun xi canihña.

*Jesús ne, hacui me xi má nahmi xi matitjun*

<sup>14</sup> Jesús, Quihndi rë Nina ne, hacui me xi nahmi xi matitjun xi tjin naja. Jemu ndaja camahani me, hacuaha cavatjutaha me ngahnga, sehe cavechu me xcun Nina. Vëhë xi meje rë xi hacuiin nismetacun cjuachacun xi nújan xi macjain naja. Cuatjin meje rë ta, <sup>15</sup> tsëhë xi nahmi xi matitjun xi tjin naja ne, ma mayuma rë me ngayaan xi jemu chuva tacun ta, tsëhë xi me vëhë ne, hacuaha cavatju me camá yëjë ni cjuacjintacun sacuatjin vatjun ngayaan má. Peru handasa cuatjin cavatju me camá ne, hisca ngu cjuatsehen ne, casahmii me. <sup>16</sup> Vëhë xi meje rë xi rcun camahani xi nihña tiña tsëhë Nina, me xi sahmi naja gobiernu cojo cjuandaja. Nihña tiña cojo sa xi chjahanntsan cjuayumatacun rë me, hane hacuaha sacú naja cjuandaja rë me xi cuisecoo naja hora xi mameje rë.

## 5

<sup>1</sup> Yëjë ni nahmi xi matitjun xi tuxijin rë ngajñi rë xuta ne, satë xa rë me xi visecoo me xuta, cojo sa xi sahmi tiña xuta tsëhë Nina. Hacuaha nahmi xi cuacun vë ne, satëxa rë me xi sua me yëjë ni xcusun cjuatjo cojo Nina ngatsë rë cjuatsehen xi sahmi xuta. <sup>2</sup> Nahmi xi cuacun vë ne, ma tsijyëcacun me cojo xuta xi hvín camahani hacuaha cachaja tsëhë ndiya rë Nina ta, tsëhë xi nahmi vë ne, hacuaha chuva cacun me. <sup>3</sup> Vëhë xi tjin rë me xi sua me cjuatjo cojo Nina ngatsë rë cjuatsehen xi casahmi suvá me, cojo ngatsë rë cjuatsehen xi casahmi jingu sa xuta.

<sup>4</sup> Tsajin ngu xuta xi cojo cjuatacun rë suvá ni me ne, cjuaha me ngu xa ndajyihi vëhë ta me xi cjuaha ne, me xi suvá Nina cuichja me xi satë rë, sacuatjin cavatju xutachanga naja

Aarón camá. <sup>5</sup> Hacuaniitjin ni rē Cristu ta, hacuiin casahmi jyē casahmi hnga suvá me yojo rē me xi cuma me ngu nahmi xi matitjun ta me xi cachja xi cuma me nahmi ne, hacui Nina, xi cachja me cuitjin:

Ngaye xi quihndi naha ngaye;  
hacuaha quihndē casuá xa ri.

Cuatjin cachja Nina. <sup>6</sup> Hacuaha chja me jingu sa cahndē tsēhē xujun rē me cuitjin:

Ngaye xi nahmi ngaye yējē nu yējē nixtin  
sacuaha camá Melquisedec hatsēē nixtin.

Cuatjin cachja Nina. <sup>7</sup> Hane jinguyējē rē xi Cristu tacun sa me cjuahñu cojo yojo rē me ne, hora xi cafehya rē me Nina, Nina xi tjin rē chuva rē xi cuaxētje rē me tsēhē cjuaveya ne, jercu cajindaya me hacuaha jercu cajihnda me. Hane cafa-hacuenda Nina cjua rē me ta, tsēhē xi jemu cafaharcun me Nina. <sup>8</sup> Cristu ne, handasa Quihndi rē Nina me xi cjuaquixi, peru cjuañihi xi cavatju me camá nguehe ngasunhndē ne, vēhē hitsē sa cavicuya rē me mé vijne xi nuhyan tsēhē Nina. <sup>9</sup> Hane xi cuatjin casahmi Nina xi cavechutaha Jesús yējē ni hacutjin xi meje rē Nina xi cuechutaha me ne, vēhē xi Jesús ne, ma vaxētje me yējē ni xuta xi vihndē tsēhē me, hacuaha tsajin nu tsajin nixtin xi cuatju xuta xi cuacun vē castigu.

<sup>10</sup> Hane hacuaha Nina casuaxa me Jesús xi má me nahmi xi matitjun sacuaha camá Melquisedec hatsēē nixtin.

### *Mijí rē xi nismetacun ndiya rē Nina*

<sup>11</sup> Sacuaha tsēhē cjuatacun vēhē ne, jemu tjin cjua xi cuinújin cojo nuju, peru jemu chja cuátjin xi tihincuendin nuju ta, tsēhē xi hacuiin ndaja meje cuisinúju. <sup>12</sup> Ngayun xi ha jemu tsēē nduvun chutayun cjua rē Nina ne, ha tivicuyun rē xuta cjua rē Nina. Peru cahndē rē xi ha tivicuyun ne, tu ngayun meje rē ngu xi cuicuya nga nuju cjua xi tjun tjun chutaya rē tsēhē cjua rē Nina. Sacuaha xi mameje rē xi cuyun siuhun nga lechi, cahndē rē xi xinu niñu. <sup>13</sup> Sacuaha quihndi langa ne, vēhē xi suvá lechi hvi, hacuaha hvíin camahani mé xi ndaja o mé xi ndajin. <sup>14</sup> Peru sacuaha niñu xi chinē ne, xuta changá xi jinē me, xuta xi ha vēē me mé xi ndaja mé xi ndajin ta, tsēhē xi cjuatacun rē me ne, ha jemu nduva sahmixa.

## 6

<sup>1</sup> Quihndē ne, meje rē xi cuejñaxen hitsē cjuachacun xi cachutayan hya xi tjun tjun camangutacun cojo Cristu, hane chutayan jingu sa cjua xi hitsē sa chja, cojo sa xi cuejñachihin ndaja cjuatacun naja. Mijí rē xi cuyan chutayan nga cjua xi ha cama naja titjun, sacuaha cjua xi chja xi meje rē xi cuejñaxen rē yējē xcusun xi machjiriin xi nihña; sacuaha cjua xi chja xi

meje rē xi cumangutacun cojo Nina; <sup>2</sup> sacuaha cjua xi chja xi meje rē xi cuma tyjahi vihi cuma tyjahi vĕhĕ xi cuma rē Nina; sacuaha cjua xi chja xi meje rē xi cuisanentsan ngu xuta; sacuaha cjua xi chja xi cuya nima cjuahñu; sacuaha cjua xi chja xi cuechu nixtin xi Nina ne, tsichuva naja me ngayejen ni cojo cjuatacun naja. <sup>3</sup> Vĕhĕ xi quihndĕ ne, cuejñaxen hitsĕ cjua xi cuacun vĕ, hane chutayan jingu sa cjua xi hitsĕ sa chja cuijnercuun, sa xi sua Nina cahndĕ.

<sup>4</sup> Xuta xi ha cavisehen cjuahasen rē Nina ngajñi rē cjuatacun rē me ne, hacuaha casacu rē me hitsĕ cjuandaja xi Nina sua me, hacuaha cavisehen Hasen rē Nina cahntsua xahasen rē me, <sup>5</sup> hacuaha cavejña rē me hitsĕ cjuandajyihi rē Nina, hacuaha camachaya rē me hitsĕ cjuarcun xi hitsĕ sa rcu cjín cuma nixtin xi sehe nduva. <sup>6</sup> Sa xi xuta xi cuacun vĕ tsismicacun me ndiya rē Nina ne, cumaji cuisecoon rē me xi tsindeya me cjuatacun rē me ngu ndiya nga ta, xcusun xi tisahmi me ne, titsixcuehyu me Quihndi rē Nina, sacuaha xi tivuya tivetaha suvá me me xcun cru. <sup>7</sup> Xuta xi cuacun vĕ ne, tangun me cojo nangui xi hvi rē tsi xi vaha xcun: sa xi nangui vĕhĕ ma ngu xcusun xitjĕ xi cumachjirĕhĕ rē xuta xi nai rē ne, tsinchacun Nina nangui vĕhĕ; <sup>8</sup> peru sa xi suvá nahyá cuetju xcun nangui vĕhĕ ne, venguin camahani chjĭ rē. Hacuaha choho cuichja Nina cojo, hane hiscan xi cuijnetaha ne, cueti.

### *Cuanguen nduju cuetahantacun Nina*

<sup>9</sup> Peru handasa cuatjin nújin cojo nuju, ngayujun ni xi jemu hmutacuin nuju ne, peru ha hyin cojo cjuatacun niji xi ngayun ne, ndaja tivatjun tijima, cuma cuinújan ne, ha tivan-guncujun ndiya xi cuaxĕtje nuju. <sup>10</sup> Nina ne, quixi me cojo cjua rē me. Vĕhĕ xi tsichayaain me yĕjĕ xcusun xi canihñu, hacuaha tsichayaain me cjuahmutacun xi camatsejen xi tjin nuju cojo rē me, hya xi cavisekun rē xuta ladu rē me, sacuatjin xi tinihñu hisca quihndĕ. <sup>11</sup> Xi meje niji ngayin ne, jima ngu ngayun ne, hacuanitjin ni tinechun ngunajatacún jinguyĕjĕ rē xi nechun cjuahñu, cojo sa xi sacú nuju yĕjĕ cjuandaja rē Nina xi vetuhun tacun. <sup>12</sup> Hacuaha meje niji xi hacuiin cuma tsĕhĕ ngayun ta xi meje niji ne, nihñu sacuatjin sahmi xuta xi ngatsĕ rē xi jemu ndaja ticaa rē me xi mangucacun me cojo Nina ne, vĕhĕ xi tifahatsja me cjuandaja xi ha cachja Nina xi sacú rē me.

<sup>13-14</sup> Hya xi cachja quixi Nina cojo Abraham xi sua rē me ngu cjuandaja ne, tsĕhĕ xi ha quihndĕ tsajin sa yo xi matitjun xi cuma rē Nina ne, vĕhĕ xi cachja me cuitjin: “Ngahan suva hvĕ xi cjuaquixi xi tsinchácun ri, hacuaha jemu cjín sahme ri cojo xuta riji.” Cuatjin cachja me. <sup>15</sup> Hane xi cuatjin cacaa rē Abraham cavejñaya me cojo cjuajeya cjua xi cachja Nina ne,

cavechu nixtin xi casacu jain rë me cjuandaja xi ha cachja Nina xi sua rë me. <sup>16</sup> Hya xi ngu xuta sua me ngu cjuarë me xi cjuaquixindaja ne, hisca veyanangui me ngu xi hitsë sa matitjun xi cumá rë me, xi hacui Nina; hane hya xi jo xuta tisua cjuarë me ne, sa xi cuetjújñi ngu me xi cuacun vë xi cuichja me: “Vëë Nina jain xi quixi” ne, ngajan ma chihin cjuavisiajmi rë me. <sup>17</sup> Vëhë xi hya xi cachja Nina xi sua rë me Abraham ngu cjuandaja ne, cuitjin cachja me: “Ngahan suva hvë.” Cuatjin cachja me cojo sa xi ngayaan xi chjahanntsan cjuandaja vëhë ne, cumachayandaja naja ta Nina ne, hya xi cuichja me ngu cjuarë me, tsindeyaain me cjuatacun rë me. <sup>18</sup> Cuatjin cachja Nina cojo sa xi jercu ndaja sacú naja cjuetacun ngatsë rë jo xcusun xi hatuxa cumaji cuindeya. Ngu xcusun jan ne, hacui suvá Nina, hane xi ma jo jan ne, hacui cjuarë me cachja me cojo Abraham. Hacuaha Nina ne, hatuxa maji vindacha me. Hane ngayaan xi vetahan tacun Nina ne, sacú naja cjuetacun vëhë, cojo sa xi cumangutacun cojo cjuarë me Nina cachja me xi cuechu nixtin xi cuiseen chjahanjendan tangun cojo rë me. <sup>19</sup> Hane xi cuatjin vetahan tacun Nina ne, tsajin camahani mé cuma rë hasen naja, hacuaha cuma cuechun hisca hiscan tacun Nina, <sup>20</sup> hiscan xi quiji Jesús cavuxaha me ndiya tsajan. Hane Nina casua xa me Jesús xi camá Jesús nahmi xi matitjun xi tsajin nu tsajin nixtin xi cjuarë me, sacuaha camá Melquisedec hatsëë nixtin.

## 7

### *Jesús ne, má me nahmi sacuaha camá Melquisedec*

<sup>1</sup> Melquisedec vë ne, matitjun me tsëhë nandya Salem, hacuaha má me nahmi xi sahmi me xa tsëhë Nina xi hatuxa jyë hnga cojo Hasen rë. Hane hya xi cavuya Abraham xi quiji cavaxëtje me quihndi rë hntsë me tsëhë condra rë ne, cavetju Melquisedec tsëhë nandya Salem quijitjengui me Abraham hiscan nduva, hane xi casacu xicjin me ndiya ne, catsinchacun Melquisedec Abraham. <sup>2</sup> Hya xi camá ne, të cahndë cavatëcja Abraham yëjë ni xcusun xi camá sa cafaha me tsëhë xuta xi cuacun condra jan ne, casua rë me Melquisedec ngu cahndë tsëhë të cahndë jan, tsëhë xi Abraham ne, faharcun me Nina. Ñihi xi Melquisedec ne, meje cuichja “ngu me xi matitjun xi vitexa cojo yëjë ni cjuaquixi”; hacuaha ñihi xi chja Me xi Matitjun tsëhë Salem ne, meje cuichja “ngu me xi matitjun xi vitexa cojo yëjë ni cjuajeya.” <sup>3</sup> Xcun xujun rë Nina ne, tsajin camahani hiscan xi chja tsëhë naa tsëhë nahmi rë Melquisedec. Hisca tsëhë xutachanga rë me ne, tsajin hiscan xi chja. Hacuaha chjaain hacutjin catsin me ne, chjaain hacutjin cahme me. Cuatjin xi Melquisedec ne, meje



tangun me cojo Quihndi rē Nina, tsēhē xi hacuaha ngu nahmi má me xi tsajin nu tsajin nixtin fē xa rē me.

<sup>4</sup> Chutsujun hacutjin jercu vengui chjí rē Melquisedec, xi hisca xutachanga naja Abraham ne, casua me me ngu cahndě tsēhē yějē xcusun xi cavatēcja me tē cahndě jan. <sup>5</sup> Ley xi casua Nina rē Moisés xi camá ngascan ne, chja ta nahmi xi nduva tjē rē Leví ne, tjin rē me chuva rē xi cjuehya me cojo naja ngayaan xuta tjē rē xuta Israel xi cuichancjan tē cahndě yějē ni xcusun xi tjin naja, cjuaha nahmi vėhē ngu cahndě tsēhē tē cahndě jan. Cuatjin chja ley rē Moisés xi cuechjen diezmu naja, handasa xicjin nahmi jan má ngayaan, hacuaha tjē rē Abraham ngayejen ni. <sup>6</sup> Melquisedec ne, handasa hacuiin tjē rē Leví má me, peru cafahatsja me ngu cahndě tsēhē xi camá tē cahndě jan, xi casua Abraham. Hacuaha catsinchacun Melquisedec Abraham, me xi ha cachja Nina xi sacú rē cjuandaja. <sup>7</sup> Ngayejen ni ne, ha hyan ta me xi tsinchacun ne, me vėhē xi matitjun me tsēhē me xi manchacun. <sup>8</sup> Nguehe xcun cjuahñu naja vi ne, nahmi xi fahatsja me diezmu tsēhē yějē xcusun xi ticja tē cahndě ne, hacuaha xuta ngayaan ni me xi hacuaha hme me; peru xcun xujun rē Nina ne, chja tsēhē Melquisedec sacuaha xi tacun cuaha me. <sup>9</sup> Nahmi xi nduva tjē rē Leví xi hacuaha cojo me tifahatsja me diezmu ne, cuma cuinújan ne, sacuaha xi cojo me cavechji me diezmu rē me hya xi casua Abraham cojo Melquisedec jan diezmu rē me. <sup>10</sup> Cuatjin sacuaha xi cavechji nahmi xi cuacun jan ta, tsēhē xi Abraham ne, ha cojo tjē xi cuacun vė yaha me hya xi casua me diezmu rē me cojo Melquisedec.

<sup>11</sup> Xuta Israel ne, cafahatsja me cjua xi chja hacutjin meje rē Nina xi sahmi yějē xuta xi tjē rē Leví xi sahmi me xa sacuaha nahmi. Quihndě ne, sa xi nahmi xi cuacun vė camá casahmi me xi cavechutaha xuta yějē ni hacutjin xi meje rē Nina xi sahmi me ne, ha quihndě hacuiin sahmi ngu yějē xi cuetjújñi sa ngu nahmi xi hacjahi xcusun rē, ngu nahmi xi hacuiin tangun xcusun rē cojo Aarón ta ngu nahmi xi tangun xcusun rē cojo Melquisedec. <sup>12</sup> Hane hya xi vindeya xcusun rē xa xi sahmi nahmi ne, hacuaha hatuxa vindeya ley xi vitexa rē me. <sup>13</sup> Hane Nai naja, me xi cuatjin chja xujun rē Nina tsēhē ne, hacjahi tjē me, hane sacuaha tjē vėhē ne, hisca ngu nahmi cjěě cuetjújñi me. <sup>14</sup> Hacuaha ha hyan ta Nai naja ne, tsēhē tjē rē Judá canduva me, hane Moisés ne, cachjaain camahani me xi tjē vėhē ne, ngajan cuetjújñi ngu nahmi.

<sup>15</sup> Yějē cjua xi tinújan vi ne, tsejen xi jemu cjuaquixi, hya xi vetjújñi sa ngu nahmi sacuaha Melquisedec. <sup>16</sup> Hane nahmi xingu jan ne, hacui Nai naja, me xi cavechutaha xi camá nahmi, hacuiin ngatsě rē ngu ley xi chja yo tjē rē xi cuma

nahmi ta ngatsë rë ngahñu rë ngu cjuahñu xi tjin rë me xi tsajin nu tsajin nixtin vetsun. Ngatsë rë vëhë xi cavechutaha me xi camá me nahmi.

<sup>17</sup> Hacuaha Nina ne, cuitjin chja me tsëhë Nai naja:

Ngaye xi nahmi ngaye yëjë nu yëjë nixtin sacuaha camá Melquisedec hatsëë nixtin.

Cuatjin cachja Nina. <sup>18</sup> Sacuaha cjua rë ley xi cavitexa titjun ne, cavetsunya, tsëhë xi hatuxa tsajin rë ngahñu hacuaha machjiriin ta, <sup>19</sup> tsëhë xi camaji casahmi xi cavechutaha xuta yëjë ni hacutjin xi meje rë Nina xi cuechutaha me. Hane cahndë rë ley vëhë ne, vetahan tacun ngu cjua xi hitsë sa ndajyihi, hane ngatsë rë xi cuatjin vetahan tacun ne, vëhë xi nihña tiña tsëhë Nina.

<sup>20</sup> Hya xi casua xa Nina Jesús xi cuma me nahmi xi matitjun ne, cachja me cjua vihi: “Ngahan suva hvë.” Cuatjin cachja me. Peru hya xi cafaha xa nahmi xi yahnga jan ne, cachjaain Nina: “Ngahan suva hvë.” <sup>21</sup> Peru sacuaha tsëhë Nai naja ne, xujun rë Nina ne, cuitjin chja:

Nai naja ne, cachja me cjua vihi: “Ngahan suva hvë.” Cuatjin cachja me,

hacuaha tsajin hora tsindeya me cjuatacun rë me xi cachja me cjua vihi:

“Ngaye xi nahmi ngaye yëjë nu yëjë nixtin sacuaha camá Melquisedec.”

Cuatjin cachja me. <sup>22</sup> Hane xi cuatjin casua xa Nina Jesús xi camá me nahmi xi matitjun tsajan ne, vëhë xi sacu naja cjuaquixindaja xi Nina ne, sahmichihin jain me compromisu xi sehe tisahmi me. Hane compromisu vëhë ne, hitsë sa ndajyihi xi cuma rë xi casahmi me titjun. <sup>23</sup> Sacuatjin rë nahmi xi yahnga jan ne, sacuiin rë me cahndë xi cjuenduju me sahmi me xa yëjë nu yëjë nixtin ta, tsëhë xi hatuxa hme me. Vëhë xi hisca ntsacu cavetsihin hisca quihndë ne jemu cjín camá me cojo yëjë sa tjë rë me xi yahnga xi hacuaha camá nahmi. <sup>24</sup> Peru Jesús ne, tsëhë xi tsajin nu tsajin nixtin xi cueya me ne, vëhë xi hacuaha tsajin nu tsajin nixtin xi jingu sa cjuahatsja xa rë me xi má me nahmi. <sup>25</sup> Vëhë xi ma vaxëtje me xuta xi sahmi tiña tsëhë Nina ngatsë rë xi camangucacun xuta jan cojo Jesús. Hane hya xi vaxëtje me xuta xi cuacun vë ne, ha quihndë tsajin nu tsajin nixtin xi cumameje nga cuetjutje me ta, tsëhë xi Jesús ne, tacun me yëjë nixtin xi cjuehya rë me Nina ngatsë rë xuta xi cuacun vë.

<sup>26</sup> Jemu ndatjin xi tjin naja ngu nahmi xi matitjun xi cuatjin xcusun rë me. Jesús, nahmi xi matitjun jan ne, jemu tyjahi me, tsajin rë me cjuatsehen, tsajin mé jyihi mé má me, cavetjuxin me tsëhë xuta tsehen, quiji me hisca ngajan sa tsëhë ngahnga. <sup>27</sup> Me vëhë ne, hacuiin tangun me cojo nahmi

xi matitjun xi yahnga jan ta, me vëhë ne, tsajin mé má xi cojo me nchunchujun ni sua rë me Nina ngu chu xi cahme ngatsë rë jyë rë suvá me, hane xi cuma ngascan ne, sua nga me ngu chu xi cahme ngatsë rë jyë rë xuta. Jesús ne, ngu ndiya ni casua me ngu cjuatjo cojo Nina ngatsë rë jyë rë xuta, hya xi casua me yojo rë me xi cahme me. <sup>28</sup> Sacuaha ley rë Moisés ne, sua xa rë xuta xi cuma me nahmi xi matitjun tsëhë yëjë ni nahmi. Hane xuta ne, hatuxa caain rë cjuatacun rë me xi suvá cjuandaja sahmi me. Peru sacuaha cjua xi cachja Nina hya xi cachja me xi “Ngahan suva hvë” ne, cjua vëhë casua xa rë Quihndi rë Nina xi cuma me ngu nahmi xi matitjun. Hane cjua xi cachja Nina jan ne, camá ngascan canduva xi cuma rë ley. Hacuaha Quihndi rë Nina ne, tsajin nu tsajin nixtin xi caain rë cjuatacun rë me xi suvá cjuandaja sahmi me.

## 8

*Jesús ne, sahmi tangun me xuta cojo Nina ngatsë rë ngu compromisu xatsë*

<sup>1</sup> Quihndë ne, cjua xi hitsë sa matitjun tsëhë yëjë ni cjua xi tinújan vi ne, hacui cjua vihi: tjin naja ngu nahmi xi matitjun xi cuatjin xcusun rë me. Quiji me ngahnga, cavejña me taha ladu quixi tsëhë Nina xi jemu jyë hnga cojo hasen rë. <sup>2</sup> Ngajan sahmi me xa xi má me nahmi ngajan ndava Nina. Peru ndava Nina jan ne, hacuiin ngu ndihya xi catsindaja ngu xuta ta cahndë vëhë ne, suvá Nai naja catsindaja me.

<sup>3</sup> Yëjë ni nahmi xi matitjun ne, hatuxa xa rë me xi sua me cjuatjo cojo Nina sua me ngu chu xi tsiquehen xuta. Vëhë xi cojo Jesús camameje rë xi tjin mé xi sua me cjuatjo cojo Nina. <sup>4</sup> Sa xi nguehe ngasunhndë tacun cuaha me quihndë ne, hacuiin cojo me má me nahmi ta nguehe ne ha tjin nahmi xi sua cjuatjo cojo Nina sacuatjin vitexa ley rë Moisés. <sup>5</sup> Sacuaha xa xi sahmi nahmi nguehe ngasunhndë vi ne, hacuiin tangun cojo xa xi má ngajan ngahnga ta, sacuaha ejemplu o tjahnguen ni rë xa xi má jan ne, vëhë xi má nguehe. Hya xi ha cuetsihin sahmi Moisés ndava Nina jan ne, cuitjin cachja Nina cojo rë me: “Nechin cuidadu ne ndandaja nihñi yëjë ni xcusun vë sacuaha xcusun xi ha catsingácun ri ngajan hiscan naxi jan.” Cuatjin cachja Nina. <sup>6</sup> Quihndë ne, Jesús casacu rë me ngu xa xi hitsë sa ndaja, tsëhë xi hacuaha me vëhë sahmi tangun me xuta cojo Nina ngatsë rë ngu compromisu vëhë hane hitsë sa ndaja cjua cachja me.

<sup>7</sup> Sa xi ndatjin tjin chihin compromisu xi casahmi Nina titjun ne, sehe camamiji rë ngu nga compromisu xi ma jo xi hitsë sa ndaja. <sup>8</sup> Peru Nina ne, cavëë me xi xutachanga naja ne, quitjen me jyë, vëhë xi cachja me cuitjin:

Ngahan Nai nuju ne, cuichjá cojo nuju ta cuechu nixtin xi sahme nga ngu compromisu xatsë cojo nuju ngayun xuta tjë rë Israel cojo xuta tjë rë Judá.

<sup>9</sup> Peru ha quihndë hacuiin sacuaha compromisu xi casahme titjun cojo xutachanga nuju,

hya xi cojo cjuahmutacun naha ne, cavaxëxen me tsëhë nangui Egipto;

hane tsëhë xi hacuiin quiji nduju me sacuatjin compromisu xi casahme cojo rë me ne,

vëhë xi ngahan ne, casahmecuendaan me, cuatjin chjá ngahan, Nai nuju.

<sup>10</sup> Sacuaha compromisu xatsë xi sahme cojo nuju ngayun xuta tjë rë Israel

hya xi cuma ngascan tsëhë nixtin vëhë ne, hacui vihi:

Cueyá ley naha cahntsua cjuatacun nuju,

sacuaha xi cuma hindu cjuarë ley vëhë cahntsua cjuatacun nuju.

Hacuaha ngahan cuma ngahan Nina nuju

hane ngayun cuma ngayun xuta naha.

<sup>11</sup> Tsajin yo xi cuicuya xicjin,

tsajin yo xi cuichja cojo xicjin cuitjin: “Meje rë xi cumachaya ri yo xi Nai naja.”

Tsajin yo xi cuichja cuatjin ta tsëhë xi yëjë ni sa quihndi sa changá ne,

ha camachaya rë yo ngahan.

<sup>12</sup> Nixtin hya ne, jemu tjin ná cjuaninchataha cojo cjuatsehen xi cún me

hacuaha ha quihndë tsajin nixtin tsinguítsjen jyë rë me.

Cuatjin cachja Nina. <sup>13</sup> Hya xi chja Nina tsëhë ngu compromisu xi tjun jan ne, casahmi changá me. Hane xcusun xi ha jima changá jan ne, ha meje cjuëya.

## 9

### *Ndava Nina nguehe nangui*

<sup>1</sup> Quihndë ne, ngajñi rë cjuarë tsëhë compromisu xi casahmi Nina titjun ne, cachja me hacutjin xi chjahanrcun rë me, cojo xi cuma ndava me nguehe ngasunhdë. <sup>2</sup> Vëhë xi camá ngu ndihya tsjian xi camá ndava Nina. Ngu cahntsua xi tjun tjun tacun, xi hmí rë Cahndë Rcup ne, ngajan tacun candeleru, tacun maxë, siu pan xi viyuju xcun Nina. <sup>3</sup> Ngu cahntsua xi tacun cahncun taha cahntsua tsjian xi tyjangui má jo cahndë jan ne, ngajan tacun cahndë xi hmí Cahndë Xi Jercu Tu Rcup Camahani. <sup>4</sup> Ngajan tacun ngasuncun xi suvá oro camá hiscan xi tí tyjungunsa. Hacuaha ngajan tacun caxa tsëhë compromisu xi suvá oro casaxtë rë yëjë ni ladu rë.

Hane cahntsua caxa jan ne, ngajan jiya tilu xi suvá oro cama, hane cahntsua tilu jan hinchandaja scuan cjuarcun xi hmí rë maná. Hacuaha bastón tsëhë Aarón xi cavetjusehen jan ne, cahntsua caxa jan jiyandaja. Hacuaha ngajan hinchandaja ndyojo të xi camahindu cjua rë ley. <sup>5</sup> Xcun caxa jan ne, hinchacun jo quicha, xi sacuaha ángel rë Nina, xi fehma rë tyjunga rë xcun caxa jan. Hane xcun tyjavaxcun caxa jan ne, ngajan tsejen hasen rë ngahñu cjua rë Nina hiscan tsicjë me jyë rë xuta. Peru quihndë ne, tsëhë cjua xi ha cachjá cojo nuju vë ne, ha quihndë cuichjaan chichihin sa cojo nuju.

<sup>6</sup> Quihndë xi ha caviyuju chihin yëjë ni xcusun vëhë cuatjin ne, yëjë ni nahmi ne, visehen me nchunchujun ni cahntsua xi tjun tjun tacun tsëhë ndihya tsjian jan, xi sahmi me xa rë me sacuaha nahmi. <sup>7</sup> Peru cahntsua xi má jo tacun tsëhë ndihya jan ne, suvá ni nahmi xi matitjun visehen me ngu ndiya xi ngu nu, hane hatuxa vaha me jni rë chu xi sua me cjuatjo cojo Nina ngatsë rë cjuatsehen xi casahmi suvá me, cojo ngatsë rë cjuatsehen xi casahmi xuta xi hisca hvíin me xi tjin rë me jyë. <sup>8</sup> Cojo cjuatacun vëhë ne, Hasen rë Nina ne, sua machaya naja xi ndiya xi cjuecani naja xcun Nina ne, cjëë tuxaha, jinguyëjë rë xi ndava Nina jan ne, tisahmi xa cuaha. <sup>9</sup> Yëjë cjuatacun xi cuatjin má vë ne, machjirëhë naja ngayaan sacuaha ngu ejemplu ni, quihndë nixtin vihi. Ta sacuaha cjuatjo xi sua me cojo Nina ngajan ndihya vëhë cojo chu xi tsiquehen xuta ne, maji tsityjahi rë cjuatacun rë xuta xi cuatjin faharcun me Nina. <sup>10</sup> Yëjë cjuatacun vëhë ne, vitexa suvá tsëhë xi chinë xi hyun ni cojo tsëhë xi ma tyjahi vihi ma tyjahi vëhë xi cumá rë Nina. Cjuatacun vëhë ne, vitexa suvá ni tsëhë taha xcun, hacuiin tsëhë cahntsua xahasen naja. Peru cjuatacun vëhë ne, cuitexa hisca nixtin xi Nina tsindeya me cjuatacun vëhë.

### *Ndava Nina ngajan ngahnga*

<sup>11</sup> Peru Cristu ne, ha cavetjucun me xi má me nahmi xi matitjun xi sua naja me yëjë ni cjuandaja xi titsingatju Nina. Sacuaha cahndë hiscan xi tisahmi me xa xi má me nahmi ne, hitsë sa vengui chjí rë hacuaha hitsë sa tjin rë cjuaquixi. Hacuaha hacuiin xuta casahmi me, cuma cuinújan ne, hacuiin nguehe ngasunhdë vihi tacun. <sup>12</sup> Hacuaha hacuiin ngatsë rë jni rë chu tentsun cojo jni rë chu ndyaja chihndë xi cavisehen me xcun Nina ta ngatsë rë jni rë suvá me. Hane ngu ndiya cavisehen ni me, hya xi ha cavaxëtje naja me xi quihndë tsajin nu tsajin nixtin chajá ngayaan. <sup>13</sup> Hane jni rë chu tentsun cojo jni rë chu ndyaja cojo ndesu rë chu ndyaja chihndë ne, hora xi xinchutaha rë xuta xi camachocun yojo rë ne, caa rë tsityjahi rë yojo rë xuta jan cojo sa xi cuma tyjahi me xcun Nina. <sup>14</sup> Ha hitsë sa jni rë Cristu, me

xi tsajin nu tsajin nixtin cjuë Hasen rë, hacuaha casua suvá me yojo rë me cojo Nina, ngu cjuatjo xi hatuxa jercu tu tyjahi camahani. Jni rë me jan ne, tsityjahi rë cjuatacun naja tsëhë yëjë xcusun xi machjiriin xi nihña, cojo sa xi cuma nihña xa rë Nina, me xi quicun.

*Ngatsë rë jni ne, ma tyjahi yëjë ni xcusun*

<sup>15</sup> Vëhë xi Cristu ne, me vëhë xi sahmi tangun me xuta cojo Nina ngatsë rë ngu compromisu xatsë. Cahme me xi cuaxëtje me xuta tsëhë cjuatsehen xi casahmi xuta jinguyëjë rë xi sahmi xa cuaha compromisu xi tjun casahmi Nina. Hane ngatsë rë xi cuatjin cahme Cristu ne, vëhë xi xuta xi cavaxijin Nina ne cuma cjuahatsja me cjuandaja xi ha cachja Nina xi sua rë me, cjuandaja xi tsajin nu tsajin nixtin chjahataha rë. <sup>16</sup> Hiscan xi tjin rë xuta ngu testamentu ne, cuma sahmi xa, peru hisca hya xi ha tjin cjuaquixi xi ha cahme me xi casahmi xujun jan. <sup>17</sup> Ta ngu testamentu ne, vetsihin sahmi xa ngatsë rë ngu cjuaveya ta, tsëhë xi jinguyëjë rë xi tacun quicun me xi casahmi ne, hatuxa tsajin rë ngahñu. <sup>18</sup> Vëhë xi hisca compromisu xi tjun casahmi Nina cojo xutachanga naja ne, hacuaha cojo jni rë chu camachihin. <sup>19</sup> Xi cavatju casua Moisés camachaya rë yëjë ni xuta yëjë ni cjuat tsëhë ley xi casua Nina ne, sehe cafaha me hitsë tsanga hani cojo ngu tsja rë ya xi hmí rë hisopo, sehe catsicahnchi me cojo jni rë chu hndindyaja cojo jni rë chu tentsun, cavisecjan rë me nandá ne, sehe cavinchutaha rë me libru tsëhë ley hacuaha cavinchutaha rë me yëjë ni xuta. <sup>20</sup> Ngajan xi cachja Moisés cojo xuta cuitjin: “Vihi jni xi sahmicihin rë compromisu xi cavitexa Nina hacutjin xi meje rë me xi nihña.” Cuatjin cachja me. <sup>21</sup> Hacuanitjin ni cojo yëjë ni xcusun xi sahmi xa cahntsua ndihya jan. <sup>22</sup> Sacuatjin vitexa ley ne, ha ña meje yëjë ni xcusun ne, ma tyjahi ngatsë rë jni. Hane sa xi cuangaain jni ne, hacuaha sacuiin cjuaninchataha.

*Casua Cristu yojo rë me xi cjuahaxin me cjuatsehen*

<sup>23</sup> Vëhë xi camameje rë xi cuatjin camatyjahi rë yëjë xcusun xi sacuaha tjahnguen rë xcusun xi tjin ngajan hiscan tacun Nina. Peru xcusun xi tjin ngajan hiscan tacun Nina ne, camameje rë xi camatyjahi ngatsë rë cjuaveya xi hitsë sa ndacun xi cuma rë cjuaveya xi cuacun vë. <sup>24</sup> Cristu ne, hacuiin cavisehen me ndava Nina xi xuta catsindaja me, ndihya xi tu cavetjutaha ni tsëhë hiscan xi cjuaquixi xi tacun Nina ta hisca ngahnga hiscan xi tacun Nina ne, ngajan xi cavisehen me. Cuatjin cavisehen me cojo sa xi quihndë ne, cuejña me xcun Nina, cuichjatje me ngatsë naja. <sup>25</sup> Peru hacuiin cavisehen me xi sua me yojo rë me cojo Nina jemu

cjín ndiya, sacuatjin sahmi nahmi xi matitjun xi chuva nu chuva nu visehen me ndava Nina cojo jni xi hacuiin jni rë me. <sup>26</sup> Sa xi cuatjin cjín ndiya cavisehen Cristu ne, hacuaha cuatjin cjín ndiya camameje rë xi cueya me hisca hya xi cavetsihin ngasunhdë ne hisca quihndë. Peru quihndë xi ha tivijnetaha nixtin changá vëhë ne, Cristu ne, ngu ndiya canduva ni me xi sua me yojo rë me xi cueya me cojo sa xi cjuahaxin me cjuatsehen. <sup>27</sup> Ngayejen ni ne, hatuxa ngu ndiya ni cueyan. Ngaxtun vëhë ne, sehe tsichuva naja Nina cojo cjuatacun naja. <sup>28</sup> Hacuanitjin ni Cristu ta hacuaha ngu ndiya ni casua me yojo rë me xi cjuahaxin me jyë rë jemu cjín xuta. Ngaxtun vëhë ne, cuinduva nga me xi ma jo ndiya, peru ha quihndë hacuiin tsëhë jyë rë xuta ta tsëhë xi cuaxëtje me xuta xi siuya rë me.

## 10

<sup>1</sup> Peru ley rë Moisés ne, sacuaha tjahnguen ni rë yëjë cjuandaja xi sehe sua naja Nina. Hacuiin ndandaja sua ley vëhë machaya naja hacutjin jain cun cjuandaja vëhë. Vëhë xi ley ne, tsajin nixtin xi cuma tsityjahi rë cjuatacun rë xuta xi tu nu tu nu fi me ndava Nina cojo chu xi tsiquehen me jan xi sua me cjuatjo cojo Nina. <sup>2</sup> Sa xi cjuaveya rë chu vëhë cacaa rë catsityjahi jain rë cjuatacun rë xuta xi cafarharcun rë me ne, hacuaha ha quihndë tsiquiin sa me chu ta, tsëhë xi xi má rë me ne, ha quihndë tsajin jyë rë me. <sup>3</sup> Peru xi cuatjin tsiquehen xuta chu ne, tu nu tu nu tsinguitsjen rë me tsëhë jyë rë me ta, <sup>4</sup> tsëhë xi jni rë chu ndyaja cojo jni rë chu tentsun ne, hatuxa maji fahaxin rë jyë rë xuta.

<sup>5</sup> Vëhë xi hya xi cavéjña Cristu ngasunhdë ne, cachja me cojo Nina cuitjin:

Ngayun ne, hacuiin suvá cjuaveya rë chu xi meje nuju, hacuiin suvá cjuatjo xi meje nuju, vëhë xi canihñu yojo naha.

<sup>6</sup> Hacuiin suvá cjuatjo xi tí xi chuya nuju tsëhë, hacuaha hacuiin suvá ni jingu sa cjuatjo xi sua nuju xuta ngatsë rë jyë rë me xi chuya nuju tsëhë.

<sup>7</sup> Sehe ngajan xi cachja nga Cristu: “Cuajyih ngahan nguehe, xi sahme yëjë ni hacutjin xi meje nuju, ngayun Nina naha,

sacuatjin camahindu tsahan xcun xujun nuju.”

Cuatjin cachja Cristu cojo Nina. <sup>8</sup> Xi tjun tjun ne, cachja Cristu xi Nina ne, mijí rë me hacuaha chuyiin rë me tsëhë cjuaveya rë chu cojo jingu sa cjuatjo, cojo cjuatjo xi tí, cojo cjuatjo xi sua xuta ngatsë rë jyë rë me, handasa cuatjin vitexa ley xi cuatjin sahmi xuta. <sup>9</sup> Ngaxtun vëhë ne, cachja nga me xi tacun me

xi sahmi me yějě ni hacutjin xi meje rě Nina. Cuma cuinújan ne, tsicjě me xcusun changá xi hme chu, cojo sa xi cuejña me ngu xcusun xatsě xi sahmi xuta yějě hacutjin xi meje rě Nina. <sup>10</sup> Nina ne, catsityjahi me cjuatacun naja ngatsě rě xi Jesucristu ne, casahmi me yějě ni hacutjin xi meje rě Nina, ngatsě rě cjuatjo xi casua Jesucristu xi casua me yojo rě me ngu ndiya ni.

<sup>11</sup> Yějě ni nahmi ne, nchunchujun ni hinchacun me fahacuenda me xa rě me xi má me nahmi, hacuaha cuatjin cjin ndiya vuya sua me cjuatjo xi tu vėhě tu vėhě ni, xi hatuxa tsajin nixtin xi ma fahaxin rě jyě rě xuta. <sup>12</sup> Peru Cristu ne, xi cavatju casua me ngu ni cjuatjo cojo Nina ngatsě rě jyě rě xuta ne, sehe quiji me ngahnga cavejña me taha ladu quixi tsėhě Nina. Hane cjuatjo xi casua me jan ne, tsajin nu tsajin nixtin xi meje rě xi cuya cjue nga xcun Nina. <sup>13</sup> Hane quiji me ngajan, cojo sa xi nixtin xi cjui sa ne, ngajan cuejñaya me hisca hya xi yějě ni xi sahmi rě me condra ne, cuiyuju ngahma gobiernu rě me. <sup>14</sup> Vėhě xi ngatsě rě ngu ni cjuatjo vėhě ne, catsityjahi Cristu cjuatacun rě xuta xi ha Nina tiviyujuxin rě me xi cuma tsėhě me me, hane tsajin nu tsajin nixtin xi cuya cuetsun nga cjuatacun rě xuta xi cuacun vė. <sup>15</sup> Hasen rě Nina ne, ha cuanitjin ni sua machaya naja cuitjin:

<sup>16</sup> Sacuaha compromisu xi sahme cojo xuta xi cuacun vė hya xi cuma ngascan tsėhě nixtin vėhě ne, hacui vihi:

Cueyá ley naha cahntsua cjuatacun rě me, sacuaha xi cumahindu cjua rě ley vėhě cahntsua cjuatacun rě me.

<sup>17</sup> Hacuaha jyě rě me cojo cjuatsehen xi sahmi me ne, ha quihndě tsajin nixtin xi tsinguítsjen. Cuatjin cachja Hasen rě Nina. <sup>18</sup> Hya xi ha camanchataha jyě ne, ha quihndě mamijí rě xi cjue sa cjue sa cjuatjo xcun Nina ngatsě rě jyě vėhě.

### *Meje rě xi nihña tiña tsėhě Nina*

<sup>19</sup> Vėhě xi ngayejen ni ne, rcuun camahani xi cuiseen xcun Nina quihndě ngatsě rě jni rě Jesús. <sup>20</sup> Jesús ne, cavuxaha me ngu ndiya xatsě xi cuma naja, ngu ndiya xi cjuecojo naja xcun cjuahñu, ngu ndiya xi cjuecojo naja xcun Nina ngatsě rě cjuaveya rě Jesús. <sup>21</sup> Jesús ne, me vėhě má me nahmi xi jercu tu vengui camahani chjí rě, hacuaha sahmi naja me cuidadu ngayejen ni xi má ngayaan ladu rě Nina. <sup>22</sup> Ngatsě rě yějě cjuatacun vėhě ne, meje rě xi nihña tiña tsėhě Nina cojo nguñajatacun, meje rě xi tjin ngu tacun xi macjain naja Jesús ta, tsėhě xi cjuatacun naja ne, cachjahaxin rě cjuatsehen xi cún tsėhě xi sacuaha xi caxinchutaha rě jni, hane yojo naja ne, sacuaha xi cafengui cojo nandá tyjahi. <sup>23</sup> Meje rě xi hacuiin



nismetacun cjuandaja xi nújan xi vetahan tacun ta, tsëhë xi me xi cachja cojo naja yëjë cjuandaja xi sahmi me ngascan ne, hatuxa sahmichihin me yëjë cjuandaja vëhë. <sup>24</sup> Meje rë xi cuinchan chuva rë hacutjin cuisecoon xingueen xingu xingu ngayaan cojo sa xi tjin naja cjuahmutacun hacuaha nihña cjuandaja. <sup>25</sup> Mijí rë xi cuejñaxen xi ma tangun ngayaan sacuaha xcusun rë jingu sa xingueen. Xi meje rë ne, cuma tangun ngayaan cojo sa xi tahan cjuetacun xingueen xingu xingu ngayaan, hitsë guan ta nixtin xi cuinduva Jesús ne, chutsejen ta ha tijima tiña.

*Handajasa cjuatjo casacu naja cjuahñu xatsë, peru suaain cahndë xi tujyë nihña cjuatsehen*

<sup>26</sup> Cuatjin meje rë xi nihña ta sa xi ngu xingueen xi ha ndaja cafahatsja me cjua xi ha cjuaquixi cjuenduju me cojo ngu ndiya rë cjuatsehen ne, ha quihndë tsajin sa mé cjuatjo xi cuma cjue ngatsë rë jyë rë me. <sup>27</sup> Cahndë rë vëhë ne, hatuxa sacú rë me castigu, cjue cuetí me xcun ndihi xi ha jima tiña nixtin xi tsicjë rë yëjë xi choho vëë rë Nina. <sup>28</sup> Hya xi ngu xuta tsitjungui me ley rë Moisés ne, cojo jo cojo jyan ni xuta xi tsinguixi me xi cuaaintjin sahmi xuta vëhë ne, chja ley ta hatuxa cueya me, hacuaha hisca ngu tsajin yo cumayuma rë tsëhë me. <sup>29</sup> Ngayun ne, ha ndaja hyun ta hitsë sa jercu jyihí camahani castigu meje rë xi cuma xuta xi sune tsufë me Quihndi rë Nina, hacuaha tsingatahacacun me xi tsajin mé vengui chjí rë jni rë Quihndi rë Nina jan, hacuaha choho chja me tsëhë Hasen rë Nina xi jercu casua rë xuta jan cjuandaja. Jni xi tsitjungui xuta jan ne, jni vëhë xi casahmichihin rë compromisu xi cachja Nina, hacuaha ngatsë rë jni vëhë ne, camatyjahi cjuatacun rë xuta jan. <sup>30</sup> Ngayaan ne, ha hyan Nai naja, hane me vëhë xi cachja me cuitjin: “Ngahan satë ná xi sahmengojo cojo xuta tsehen; hatuxa ngahan sahmengojo.” Hacuaha chja nga me ngu ndiya cuitjin: “Ngahan Nai nuju ne, cjuahá chuva xuta naha.” Cuatjin cachja Nai naja. <sup>31</sup> Jjemu jyë chircun sa xi ngayaan cjuinenguyenan ngajñi rë castigu xi sahmi Nina, me xi quicun!

<sup>32</sup> Peru ninguitsjun nixtin titjun, hya xi ha cafë cachjuhun-ntsun cjuahasen rë Nina sehe cacaa nuju cojo ngu cjuacjintacun jyë xi casua nuju cjuañihi xi cavatjun camá. <sup>33</sup> Jiya hora ne, xcun cojo xcun ni choho cachja xuta tsujun hacuaha casua nuju me cjuañihi, hacuaha jiya hora nga ne, cavisecuun rë xuta xi cuatjin cavatju me camá. <sup>34</sup> Chjá cuatjin ta hacuaha hvë xi hacuaha camayuma nuju me xi hinchá ndavaya. Hacuaha hisca cojo cjuasua caningatuhun xi cachjahataha cjuachan rë yëjë ni xcusun xi ngayun tsujun, tsëhë xi ha hyun ta ngajan ngahnga ne, ha tjin nuju ngu xcusun xi hitsë sa

ndaja, xi tsajin nu tsajin nixtin cjuë. <sup>35</sup> Xicanismutacuun cjuatacun xi rcun camahani, ta xi cuatjin cuanguncujun cjuatacun vëhë ne, Nina ne, hatuxa jemu jyë cjuatjo xi sua nuju me. <sup>36</sup> Ngayun ne, meje rë xi scaa nuju cojo cjuacjintacun xi vatjun má, cojo sa xi hya xi cuatjin cafë canihñu hacutjin xi meje rë Nina ne, sacú nuju cjuandaja xi ha cachja Nina xi sua nuju me. <sup>37</sup> Xujun rë Nina ne, cuitjin chja:

Ha tu chúva sa nixtin ne,  
me xi cuinduva ne, hatuxa cuinduva me, ha quihndë  
cuindeyaain rë me.

<sup>38</sup> Xuta naha xi tsajin jyë rë me ne, sacú rë me cjuahñu xatsë  
ngatsë rë xi mangucacun me cojo ná;

peru sa xi cuya me cjue ngaxtun me ne, chuyiin ná tsëhë me.  
Cuatjin chja xujun rë Nina. <sup>39</sup> Peru ngayaan ne, hacuiin tangun  
ngayaan cojo xuta xi vuya fi ngaxtun me sehe tsicjë Nina  
me ta ngayaan ne, tangun ngayaan cojo xuta xi mangucacun  
me cojo Nina sehe cuaxëtje Nina me.

## 11

*Ninguitsjen xutachanga naja xi jemu camangucacun me  
cojo Nina*

<sup>1</sup> Quihndë ne, hya xi ha camangutacun cojo ngu cjua ne,  
sacuaha xi ha tjin naja cjuaquixi xi hatuxa sacú naja ngu  
xcusun xi vetahan tacun, sacuaha xi ha hyan xi xcusun xi  
matsijin ne, hacuaha cjuaquixi. <sup>2</sup> Tsëhë xi xutachanga naja  
ne, camangucacun me cojo Nina, vëhë xi Nina cachja tsëhë  
me xi tsajin xi cún rë me xcun Nina.

<sup>3</sup> Tsëhë xi mangutacun cojo Nina ne, vijnercun xi Nina cojo  
cjua ni rë me ne, catsindaja me ngasunhndë, hacuiin cafaha  
me ngu xcusun xi matsejen xi catsindaja me ngasunhndë vi  
xi tsejen naja.

<sup>4</sup> Tsëhë xi camangucacun xutachanga naja Abel cojo Nina  
ne, hitsë sa ndaja cjuatjo xi casua rë me Nina xi cuma rë  
cjuatjo xi casua xutachanga naja Caín. Vëhë xi Nina ne, cachja  
me xi Abel ne, tyahi me cojo cjuatacun rë me. Hacuaha suvá  
Nina catsingacun me xi cjuatjo xi casua Abel ne, jemu ndaja.  
Hane tsëhë xi cuatjin camangucacun Abel cojo Nina ne, vëhë  
xi handasa cahme me, peru hisca quihndë ne, cumachjirëhë  
sa naja cjuatacun rë me.

<sup>5</sup> Tsëhë xi camangucacun xutachanga naja Enoc cojo Nina  
ne, cachjahataha rë me tsëhë ngasunhndë vi, cojo sa xi  
cueyaain me. Hane ha quihndë casacuiin me ta, tsëhë xi Nina  
cafahataha rë me. Peru chaja sa xi cjuahataha Nina me ne, ha  
camatsejen xi Nina ne, jemu cachuya rë me tsëhë Enoc. <sup>6</sup> Peru  
sa xi manguaaintacuun cojo Nina ne, cumaji nihña xi chuya

rë me tsajan. Xuta xi sahmi tiña me tsëhë Nina ne, meje rë xi macjain rë me xi tjin jain Nina, hacuaha Nina vëhë xi jemu jyë cjuatjo xi sua rë me xuta xi cuacun vangui rë me.

<sup>7</sup> Tsëhë xi camangucacun xutachanga naja Noé cojo Nina ne, hya xi casua Nina camachaya rë me tsëhë xcusun xi cjëë cuma ne, casahmi me ngu barcu cojo sa xi cuetjutje me cojo xuta rë me. Cuatjin casahmi me ta, tsëhë xi faharcun me Nina. Hane xi cuatjin camangucacun me cojo Nina hacuaha casahmi me cuatjin ne, ngajan camatsejen xi yëjë sa xuta tsëhë ngasunhndë ne, chajá me. Hane Noé ne, cuatjin camatyjahi me cojo cjuatacun rë me sacuatjin matyjahi ngayaan cojo cjuatacun naja xi mangutacun cojo Nina.

<sup>8</sup> Tsëhë xi camangucacun xutachanga naja Abraham cojo Nina ne, hya xi cachja Nina xi cuetjuxin me tsëhë nangui hiscan xi tacun me xi cjue me ngu cahndë hiscan xi sua Nina xi cuma tsëhë me ne Abraham ne, cahndë me tsëhë Nina hane cavetju me quiji me, handasa hvíin me jani cuechú me.

<sup>9</sup> Tsëhë xi camangucacun Abraham cojo Nina ne, caviyujutaha me ngu nangui xín xi cachja Nina xi sua rë me. Hane ndihya tsjian ni caviyuju me cojo quihndi rë me, Isaac cojo Jacob, quihndi xi hacuaha cojo cjuahatsja cjuandaja xi ha cachja Nina xi sua me jan. <sup>10</sup> Cuatjin caviyuju Abraham ta, tsëhë xi jemu meje rë me xi cuechú me ngu nandya xi ndaja hñu cun ndihya rë cojo xihndënaña rë, ngu nandya xi Nina cavejña me cjuatacun rë me hacutjin cuma, hacuaha me vëhë casahmi me. <sup>11</sup> Tsëhë xi camangucacun Abraham cojo Nina ne, Nina casua rë me ngahñu xi cuma sacú rë chjuun rë me quihndi, handasa Sara chjuun rë me ne, hatuxa maji sacú rë me quihndi hacuaha Abraham ne, jemu changá me xi sehe sacú rë chjuun rë me quihndi. Cuatjin camá ta, tsëhë xi camangucacun Abraham xi Nina ne, hatuxa sahmichihin me cjua xi cachja me. <sup>12</sup> Vëhë xi ngatsë rë ngu ni Abraham ne, handasa hatuxa ha quihndë tsajin rë me ngahñu xi sacú rë chjuun rë me quihndi ne, peru tjë rë me ne, tangun cjín camá cojo niñú xi yaja ngahnga, tangun cojo tsumi rë tjehen ndachacun xi maji maxqui.

<sup>13</sup> Yëjë ni xutachanga naja xi cuacun vë ne, mangucacun cuaha me cojo Nina hya xi cahme me. Casacuiin rë me cjuandaja xi cachja Nina xi sua rë me, peru sacuaha xi ha cavëë me cjuandaja vëhë hane jemu ndama rë me. Cachja quixi me xi sacuaha xuta ngu nangui me xi caviyujutaha me nguehe ngasunhndë. <sup>14</sup> Hane xuta xi chja cuatjin ne, jemu quixi sua me machaya naja xi tivangui sa me ngu nangui xi cuma tsëhë suvá me. <sup>15</sup> Sa xi catsinguitsjen sa me nangui hiscan cavetju me ne, tjin sa rë me chuva rë xi camá cavuya

me jan. <sup>16</sup> Peru me xi cuacun vë ne, xi meje rë me ne, ngu nangui xi cuma tsëhë suvá me ngajan ngahnga hiscan tacun Nina. Vëhë xi Nina ne, ma savaain rë me xi hmí rë me Nina rë xutachanga naja xi cuacun vë, tsëhë xi ha tjin ndaja rë Nina ngu nandya xi cumá rë me.

<sup>17</sup> Tsëhë xi camangucacun xutachanga naja Abraham cojo Nina ne, hya xi catsichuva Nina me cojo cjuatacun rë me ne, casua Abraham cojo Nina quihndi rë me Isaac. Hane Abraham, me xi cachja Nina xi sua rë cjuandaja ne, cavejñangucacun me xi sua me quihndi ngu rë me, <sup>18</sup> handasa cuitjin cachja Nina cojo rë me: “Suvá tjë rë quihndi riji Isaac ne, vëhë ni xuta xi cumá tjë riji xi cjuaquixi.” Cuatjin cachja Nina. <sup>19</sup> Abraham ne, camacjain rë me xi Nina ne, tjin jain rë me chuva rë xi hisca nima ne, tsicuya me cjuahñu. Cuatjin camá xi sacuaaha xi ngajñi rë nima jain cavuya cafachatsja Abraham quihndi rë me.

<sup>20</sup> Tsëhë xi camangucacun xutachanga naja Isaac cojo Nina ne, catsinchacun me quihndi rë me Jacob cojo Esaú. Cachja me yëjë mé xi nduva ngascan xi cuma rë quihndi rë me.

<sup>21</sup> Tsëhë xi camangucacun xutachanga naja Jacob cojo Nina ne, hya xi ha meje cueya me ne, catsinchacun me jima ngu quihndindai rë me xi quihndi rë xutachanga naja José, hacuaaha cafacharcun me Nina taha yahangui me bastón rë me.

<sup>22</sup> Tsëhë xi camangucacun José cojo Nina ne, hya xi ha meje cueya me ne, caveyanangui me xi cuechú nixtin xi yëjë ni xutachanga naja ne, cuetjuxin me tsëhë nangui Egipto, hacuaaha cavitexa me hacutjin cuma cojo rë ninda rë me hya xi ha cahme me.

<sup>23</sup> Tsëhë xi camangucacun xutacha rë xutachanga naja Moisés cojo Nina ne, hya xi catsin Moisés ne, jyan sá caveyahma me, tsëhë xi cavëë me xi quihndinda jan ne, jemu ndajyihí camahani, hane cavincharcuaain rë me yojo rë me tsëhë cjua xi cavitexa me xi matitjun xi cueya yëjë ni quihndinda xi xihin tsëhë xutachanga naja.

<sup>24</sup> Tsëhë xi camangucacun Moisés cojo Nina ne, hya xi camachangá me ne, catsitjungui me cahndë rë me xi má me quihndi rë na quihndi rë me xi matitjun tsëhë nangui Egipto. <sup>25</sup> Hitsë sa cachuya rë me xi cjue me choho cuatju me cuma cojo xuta rë Nina, xi cuma rë xi sua me cjuasua xahasen rë me nguhñu ngu hora ni ngajñi rë cjuatsehen. <sup>26</sup> Catsingatahacacun me xi hitsë sa vengui chji rë xi scaa rë me xi choho cuichja xuta tsëhë me ngatsë rë xi sahmi tangun me cojo xutachanga naja xi ha Nina cavaxijin me, xi cuma rë xi sacú rë me cjuanchina rë Egipto. Cuatjin catsingatahacacun me ta, tsëhë xi hatuxa quitahacacun me

cjuatjo xi sua Nina me ngascan. <sup>27</sup> Tsëhë xi mangucacun me cojo Nina ne, cavetjuxin me tsëhë nangui Egipto, hacuaha hisca cavincharcuain rë me yojo rë me tsëhë xi cjan rë me xi matitjun jan. Cacao rë me cojo yëjë ni cjuacjintacun vëhë sacuaha xi tivutsejen me Nina xi matsijin. <sup>28</sup> Tsëhë xi mangucacun me cojo Nina ne, casahmi me suhi tsëhë Pascua, hane cavitexa me yëjë ni xutachanga naja xi cuinchataha me jni rë chu ngajan ya ngahñu rë tingotjo ndava me xingu xingu me, cojo sa xi hora xi cjuehe hasen xi tsiquehen rë quihndi tjun rë yëjë ni xuta ne, tsiquiin rë hisca xi ngu quihndi tjun rë xutachanga naja.

<sup>29</sup> Tsëhë xi mangucacun xutachanga naja cojo Nina ne, cavatjucja me Ndachacun Hani sacuaha vatju me nangui quixí. Hya xi camá ne, xi canduva xuta Egipto tivatju me ne, hora vëhë cavuya camatangun nga nandá hane ngajan café xuta xi cuacun vë.

<sup>30</sup> Tsëhë xi mangucacun xutachanga naja cojo Nina ne, cavitijñundee me hnhua xondyojo tsëhë nandya Jericó, hane xi cavatju yatu nixtin ne, cavixujne hnhua vëhë. <sup>31</sup> Hacuaha tsëhë xi mangucacun ngu na Jericó xi hmí rë Rahab cojo Nina ne, hacuiin hya xi cahme yëjë sa xuta Jericó xi cahndiin tsëhë Nina, hya cahme na xi viteña yojo rë vë ta, tsëhë xi cojo cjuandaja cafahatsja na ngu jo xutachanga naja xi quiji cavutsejensun me nandya Jericó jan.

<sup>32</sup> ¿Mé sa xi meje nuju xi cuichjá cojo nuju? ta hisca chutaain sa hora xi cuichjá cojo nuju tsëhë xutachanga naja Gedeón, cojo Barac, cojo Sansón, cojo Jefté, cojo David, cojo Samuel, cojo yëjë sa profeta. <sup>33</sup> Xuta xi cuacun vë ne, tsëhë xi camangucacun me cojo Nina ne, cacao rë me hya xi casahmi me si cojo xuta tsëhë jingu sa nandya, casahmi me xi ndiya rë cjuaquixi, cavetjucaa ngu jo cju xi cachja Nina cojo rë me. Camaji cavuxaha chu xa hntsua chu hora xi meje sinë chu me. <sup>34</sup> Catiin me hya xi cavincha xuta me ngajñi ndihi xi meje cuaca me me. Cavatjuhnga me tsëhë xuta xi meje tsiquehen rë me cojo quicha. Handasa jemu ndaya tjin cacun me ne, casacu rë me ngahñu. Jemu casacu rë me ngahñu hya xi casahmi me si cojo xuta tsëhë jingu sa nandya, cacao rë me catsinguijne me xuta xi choho vëë rë me. <sup>35</sup> Ngu jo yachjin ne, cavuya cafahatsja me xuta rë me xi cavuya cjuahñu hya xi cahme.

Peru ngu jo nga xutachanga naja ne, jercu cavaja xuta me. Peru catsingatiin me xi sehenndaya me ta, tsëhë xi mijí tsismicacun me Nina hacuaha meje rë me xi sacú rë me ngu cjuahñu xatsë xi hitsë sa ndajyihí. Vëhë xi cacao rë me hya xi cavaja xuta me hisca xi cahme me. <sup>36</sup> Hane ngu jo nga me ne, catsixcuehyu xuta me, hacuaha cavaja xuta me cojo

cuarta rē chu, hisca quiji me ndavaya hacuaha camahñu me cojo cadena. <sup>37</sup> Catsiquehen xuta me cojo ndyojo, cavatēcja vasen xuta me cojo quicha nehñu, catsiquehen xuta me cojo quicha, catsujyihya nguehe catsujyihya ngajan me tixtē rē me chuxin rē chu tsánga cojo chuxin rē chu tentsun. Jemu camachaja rē me, jemu jyē cjuañihi cavatju me camá, choho casahmi xuta cojo rē me. <sup>38</sup> Xutachanga naja xi cuacun vë ne, hisca vechiin chuva rē xi sacú rē ngasunhdë me. Catsujyihya me ngajan ngu xín camahani hiscan naxindya, hiscan nguijo, hisca ngu ngojo naxi caviyuju me.

<sup>39</sup> Peru xuta xi cuacun vë ne, handasa ha cavetjundaja me ngatsë rē xi mangucacun me cojo Nina ne, peru hisca xi ngu me casacuiin rē me cjuandaja xi ha cachja Nina xi sua rē me, <sup>40</sup> tsëhë xi Nina ne, hya xi catsingatahacacun me ngatsë naja ne, ha cavejñangucacun me xi sahmi me ngu xcusun xi hitsë sa ndaja, xi hisca nixtin quihndë ne, sahmi Nina xi cuechutaha xutachanga naja xi cuacun vë yëjë ni hacutjin xi meje rē Nina xi cuechutaha me, sacuatjin tisahmi Nina cojo naja ngayaan quihndë.

## 12

### *Meje rē xi cuejñahñu cjuatacun naja cojo Jesús*

<sup>1</sup> Vëhë xi ngayaan ta ha jemu cjín xutachanga naja xi machaya naja xi camangucacun me cojo Nina ne, meje rē xi cuejñaxen yëjë ni xcusun xi sahmindya naja, hacuaha cuejñaxen cjuatsehen xi mijí cjuexin tsajan, hacuaha nihña ngahñu xi scaa naja cuanguen nduju cojo ndiya xi Nina cavejña me xi cuma naja. <sup>2</sup> Hacuaha meje rē xi cuejñahñu cjuatacun naja cojo Jesús, me xi cavejña ntsacu cjuachacun xi macjain naja hacuaha catsichihin me. Ngatsë rē cjuasua xi cavejña Nina xi cuma rē Jesús ne, caca rē me cojo cjuañihi xi casetaha me xcun cru, hisca casahmicuendaain me xi jemu cjuasava xi cuatjin cahme me. Hya xi camá ne, sehe quiji me ngahnga, hane ngajan tacun me taha ladu quixi tsëhë Nina.

### *Meje rē xi ningatehen xi cueyaquixi naja Nina ndiya*

<sup>3</sup> Vëhë xi ninguitsjun Jesús, me xi caca rē cojo yëjë xcusun xi casahmi xuta tsehen hya xi catsitjungui me Jesús. Ninguitsjun me, cojo sa xi hacuiin cjuenda rē cjuatacun nuju, hacuiin cuma ndaya tacún. <sup>4</sup> Ta ngayun ne, hisca cjuaveya cjëë cuechuntuhun xi nihñu ngahñu xi ningatuun rē cjuatsehen. <sup>5</sup> Sacuaha xi ngayun ne, canichayun cjua xi chja Nina cojo nuju sacuaha chja ngu nahmi cojo quihndi rē me xi chja cuitjin:

Hacuiin tu xcuehyu ni cumacjain ri hya xi Nai naja tiveyaquixi me ngaye ndiya, tsan,

hacuaha hacuiin cuma ndaya tacuin hya xi tichjataha me ngaye.

<sup>6</sup> Ta Nai naja ne, quihndi xi hmucacun me ne, veyaquixi me ndiya,

hacuaha sahmi me castigu yějē ni xuta xi fahatsja me sacuaha quihndi rē me.

Cuatjin chja cjuajan. <sup>7</sup> Ngayun ne, caticaa nuju cojo yějē ni cjuacjintacun, ta xi cuatjin vatjun má ne, Nina tiveyaquixi nuju me ndiya. Nina ne, vutsejen me ngayun sacuaha quihndi rē me ta, cjuaquixi xi tsajin ngu quihndi xi nahmi rē ne, veyaquixiin rē ndiya. <sup>8</sup> Peru sa xi Nina cueyaquixiin nuju me ndiya sacuatjin veyaquixi me ndiya tsajan ngayejen ni ne, ngajan matsejen xi hacuiin quihndindaja rē me ngayun.

<sup>9</sup> Ngayaan ne, hacuaha tjin xutacha naja nguehe ngasunhndē xi cavinchaquixi naja me ndiya, hacuaha cachjahanrcun me. Peru hitsē sa meje rē xi cuinuhyan tsēhē Nina Nahmi naja xi tacun me ngahnga. Xi cuatjin ne, cuechuntahan ngu cjuahñu xatsē. <sup>10</sup> Me xi cuacun vē ne, cavinchaquixi naja me ndiya ngu jo nixtin ni hacutjin xi má rē me xi ndatjin. Peru xi vinchaquixi naja Nina ndiya ne, ngayaan ndaja tsajan, cojo sa xi cuma tyjahi cjuatacun naja sacuatjin tyjahi cjuatacun rē suvá me. <sup>11</sup> Hya xi tjin yo vinchaquixi naja ndiya ne, hacuiin ndama naja ta choho má naja, hora xi tichja me cojo naja. Peru sa xi cuinuhyan ne, xi cuma ngascan ne, sacú naja cjuandaja cjuajeya xi cuma tyjahi cjuatacun naja.

### *Mijí rē xi nitjunguen Nina*

<sup>12</sup> Vēhē xi ngayun xi ndaya tjin tacún xi tivangun cojo ndiya rē Jesús ne, tuhun ngahñu xahasen nuju. <sup>13</sup> Ngu quixi tángun ni cojo ndiya rē Jesús, cojo sa xi yo xi ndaya tjin cacun ne, hacuiin chajá tsēhē ndiya rē Jesús ta sacú rē ndiya xi cjuaquixi.

<sup>14</sup> Nihñu ngahñu xi cuinechun ngu cjuandaja ngu cjuajeya cojo yějē ni xuta, hacuaha nihñu ngahñu xi cuma tyjahi cjuatacun nuju, ta hisca xi ngu xuta ne, cuechiin me xcun Nai naja sa xi hacuiin tyjahi cjuatacun rē me. <sup>15</sup> Nechun cuidadu cojo sa xi tsajin ngu xuta xi cuechintaain me cjuandaja rē Nina, ta ngaxtun vēhē ne, choho cuma rē me hane tu hitsē tu hitsē ne, tsinguetsun me cjuatacun rē jemu cjín xuta. <sup>16</sup> Nechun cuidadu cojo sa xi tsajin ngu xuta xi sahmi me cjuatsehen cojo ngu xi hacuiin chjuun rē me. Hacuaha nechun cuidadu cojo sa xi tsajin ngu xuta xi hisca sahmicuendaain me Nina, sacuatjin rē xutachanga naja Esaú, xi casua me yějē cjuanchina xi satē rē me xi má me quihndi tjún, ngatsē rē ngu comida xi cajinē me. <sup>17</sup> Ngayun ne, ha hyun ta xi camá ngascan hya xi meje cjuahatsja me ximinchacun rē nahmi rē

me ne, cavitjungui me, tsëhë xi ha quihndë tsajin chuva rë xi tsindeya me cjuatacun rë me, handasa hisca cajihnda me xi meje rë me xi cuatjin cuma.

<sup>18</sup> Ha jemu hatsëë xi xutachanga naja ne, quiji casahmi tiña me tsëhë ngu naxi xi tacun nguehe ngasunhndë hiscan xi cati ngu ndihi jyë, hiscan xi jemu jñu camahani, hiscan xi jercu hñu camahani cavanga tjo, <sup>19</sup> hiscan xi canuhya rë xi fane ngu tyjo, hiscan xi canuhya rë cjua xi cachja Nina. Hane xuta xi cahndë me cjua vëhë ne, jercu cafehya rë me xutachanga naja Moisés xi ha quihndë cuichjaain sa Nina cojo xuta xi cuacun vë. <sup>20</sup> Cuatjin cachja me ta, tsëhë xi cacaain rë me cojo cjua xi cachja Nina hya xi cachja me cuitjin: “Yo xi cjue cuisane ntsacu hiscan naxi vë ne, meje rë xi cueya cojo ndyoyo, handasa ngu chu.” Cuatjin cachja Nina. <sup>21</sup> Xcusun vëhë ne, ngu chircun jyë, vëhë xi hisca Moisés ne, cuitjin cachja me: “Jemu tsácjun, ña fatsë ngahan.” Cuatjin cachja me.

<sup>22</sup> Peru ngayun ne, casatiin sa nuju cjuacjintacun vëhë ta ngayun ne, canihñutangun cjuatacun nuju cojo Nina xi quicun, me xi tacun ngajan ngahnga, sacuaaha nandya xi hmí rë Jerusalén, ndetjún xi hmí Sión. Canihñutangun cjuatacun nuju cojo yëjë jercu tu cjín camahani ángel xi tjin tangun xi sahmi jyë sahmi hnga rë Nina. <sup>23</sup> Ngayun ne, canihñutangun cjuatacun nuju cojo yëjë xuta xi cahme xi quihndi rë Nina xi tjin tangun ngajan ngahnga hiscan xi siutahaxujun ñihi rë. Yëjë nima vëhë ne, vëhë xi sacuaaha quihndi tjun rë Nina. Canihñutangun cjuatacun nuju cojo Nina, Nina xi tsichuva rë yëjë ni xuta cojo cjuatacun rë me. Ngayun ne, canihñutangun cjuatacun nuju cojo hasen rë xuta xi tsajin jyë rë, xi casahmi Nina xi cavechutaha me yëjë ni hacutjin xi meje rë Nina xi cuechutaha me. <sup>24</sup> Ngayun ne, canihñutangun cjuatacun nuju cojo Jesús, me xi sahmitangun rë xuta cojo Nina ngatsë rë ngu compromisu xatsë. Hacuaha canihñutangun cjuatacun nuju cojo jni rë Jesús jan ne, hitsë sa ndaja sua machaya naja tsëhë cjuandaja rë Nina xi cuma rë jni rë xutachanga naja Abel.

<sup>25</sup> Nechun cuidadu, hacuiin nitjungun Nina, me xi tichja cojo naja. Ta sa xi xutachanga naja cavatjinhngaain me tsëhë castigu hya xi catsitjungui me Moisés, me xi cachja cjua rë Nina cojo xuta nguehe ngasunhndë ne, hitsë guan ngayaan, sa xi nicuyan taha ngaxtuun tsëhë Jesús, me xi tichja cojo naja hisca ngajan ngahnga. <sup>26</sup> Sacuaaha nixtin rë xutachanga naja jan ne, ña nangui cafiniya cojo cjua xi cachja Nina, peru quihndë ne, chja me cuitjin: “Ngu ndiya sa tsiniya nangui, peru hacuiin suvá nangui ni tsiniya ta cojo ngahnga tsiniya.” Cuatjin chja Nina. <sup>27</sup> Hya xi chja me cjua xi “ngu ndiya sa”



ne, sua machaya naja xi chjahaxin rë yëjë ni xcusun xi finiya, cuma cuinújan ne, yëjë ni xcusun xi Nina casahmi me, cojo sa xi cuiyuju xcusun xi maji finiya. <sup>28</sup> Vëhë xi quihndë ne, tahan nacuechji rë Nina ngatsë rë xi tiviseen ngahma gobiernu rë me; gobiernu vëhë ne, vëhë xi maji finiya. Hane xi cuatjin nihña ne, chjahanrcun Nina sacuatjin xi chuya rë me, cojo yëjë ni cjuandaja cjuajeya tsëhë xi ngayaan ne, rcun me. <sup>29</sup> Cuatjin meje rë xi nihña ta Nina naja ne, tsicjë me yëjë ni xi cjuatsehen sacuatjin rë ngu ndihi jyë xi tsicjë cuaca rë yëjë ni xcusun xi ma tí.

## 13

### *Meje rë xi nihña hacutjin xi chuya rë Nina*

<sup>1</sup> Tángun nduju cojo xcusun naja xi nihñahmutacun xingueen sacuaaha xi ngu jni ngu yojo naja. <sup>2</sup> Hacuüin nichayun xi cojo cjuandaja chjuhunntsun xuta ngu nangui xi cjuehe nangui nuju ta tjin ngu jo xutachanga naja ne, cuatjin cafaahatsja me xuta ngu nangui xi cafehe nangui rë me ne, hisca hvín me ne, ángel xi cafaahatsja me jan.

<sup>3</sup> Ninguitsjun xuta xi hincha me ndavaya. Nihñucuendun sacuaaha xi cojo ngayun nechunyun cojo rë me ndavaya. Hacuaha ninguitsjun xuta xi choho sahmi jingu sa xuta cojo ta, tsëhë xi ngayun ne, tjin ngu nixtin ne, hacuaaha cuma cuatjun cuatjin. <sup>4</sup> Ngayujun ni ne, meje rë xi chjuhunrcun xi hmí rë cjuavixan. Hisca ngu ngayun ne, mijí rë xi ninguetun ngu cjuavixan xi ha tjin ndaja ta cuechu nixtin xi Nina ne, sahmi me castigu xuta xi sahmi me cjuatsehen cojo ngu xi hacuüin chjuun hacuüin xihin rë me, há tjin chjuun tjin xihin rë me ne, o há tsajin chjuun tsajin xihin rë me.

<sup>5</sup> Hacuüin jercu meje nicujun tujún xi tivangun cojo nixtin nuju. Catamangutacun ni cojo xi ha tjin nuju. Cuatjin nihña ta, tsëhë xi Nina ne, cuitjin cachja me: “Hatuxa tsajin nixtin xi tsismecácun nuju.” Cuatjin cachja me. <sup>6</sup> Vëhë xi jemu ndama naja xi cuitjin nújan:

Nai naja ne, me vëhë xi visecoo ná me; vëhë xi tsacjuun.

¡Ndastu mé sahmi xuta cojo ná ngahan!

Cuatjin nújan.

<sup>7</sup> Ninguitsjun me xi matitjun ngajñi nuju, me xi cuacun cachja cojo nuju cjuarë Nina. Ningatuhuntacún tsëhë cjuandaja xi cavetjucaa tsëhë xcusun xi casahmi me, hacuaaha catamangutacun cojo Nina sacuatjin camangucacun me xi cuacun vë.

<sup>8</sup> Yëjë ni cjuatacun xi tjin rë Jesucristu hisca ntsacu cavet-sihin ne, cjuatacun vëhë tjin rë me hisca quihndë, hacuaaha cjuatacun vëhë tjin rë me yëjë nixtin xi cjui sa. <sup>9</sup> Xicatsanguun

ndiya rē jingu sa cjuachacun xi hacuiin tangun cojo cjuachacun xi cjuaquixi. Hitsē sa ndaja xi ngayaan ne, cumangutacun cojo Nina ngatsē rē cjuandaja rē me, xi cuma rē ngatsē rē cjuachacun xi vicuya yahnga xuta hacutjin xi meje rē xi xinē xi siuhun ta, tsēhē xi cjuachacun xi vicuya xuta xi cuacun vē ne, tsajin mé machjirēhē rē xuta xi tjengui me cjuachacun vēhē.

<sup>10</sup> Cjuaveya rē Jesucristu ne, tangun hitsē cojo cjuatjo xi tu nu tu nu ni cjue xcun Nina ngatsē rē jyē rē yējē ni xuta. Tangun hitsē ta, tsēhē xi sacuaha nahmi xi sahmi me xcusun rē xutachanga naja ne, hatuxa cumaji sinē me yojo rē chu xi hme xi sua me sacuaha ngu cjuatjo vēhē. <sup>11</sup> Ngayujun ni ne, ha ndaja hyun ta nahmi xi matitjun ne, vaha me jni rē chu xi cahme, ficojo me ngajan Cahndē Rkun, xi sua rē me Nina sacuaha ngu cjuatjo ngatsē rē jyē rē xuta, peru yojo rē chu ne, cahndē rē xi sinē me ne, cjue ngajan ngu xín tsēhē nandya, hane ngajan cjuē cueti. <sup>12</sup> Cuanitjin rē Jesús ta ngajan ngu xín tsēhē nandya cahme me. Cahme me cojo sa xi tsityjahi me cjuatacun rē xuta ngatsē rē jni rē suvá me. <sup>13</sup> Ngajan xi ngayaan ne, cuetjunxen tsēhē nandya, cuma cuinújan ne, cuetjunxen tsēhē xcusun rē xutachanga naja, cuanguentjenguen Jesús, hacuaha meje rē xi scaa naja xi choho chja xuta tsajin sacuatjin choho cachja me tsēhē Jesús. <sup>14</sup> Cuma cuetjunxen tsēhē nandya vē ta, tsēhē xi nguehe ngasunhdē vi ne, tsajin naja ngu nandya xi cuejña yējē nu yējē nixtin ta ngayaan ne, tivinchasen sa nandya xi tsindaja Nina xi cuma ngascan, cuma cuinújan ne, ngajan ngahnga. <sup>15</sup> Vēhē xi ngayaan ne, xi tivanguen ndiya rē Jesús ne, meje rē xi yējē ni hora naxenndajan Nina, sacuaha xi titahan ngu cjuatjo xi cuma rē me, cuma cuinújan ne, meje rē xi ndaja cuinújan tsēhē me, meje rē xi cuinújanquixen xi tsēhē me ngayaan. <sup>16</sup> Hacuiin nichayun xi nihñu cjuandaja hacuaha cuisecun xingun xingu xingu ngayun ta xi cuatjin nihñu ne, sacuaha xi titahun rē Nina ngu cjuatjo xi jemu chuya camahani rē me tsēhē.

<sup>17</sup> Tinuhyun tsēhē me xi matitjun ngajñi nuju, hacuaha nihñu yējē hacutjin xi meje rē me xi cuacun vē ta me vēhē xi sahmi cuidadu nuju me hacuaha vēē me xi cuechu nixtin xi sua me cuenta cojo Nina. Nihñu ngahñu xi me xi cuacun vē ne, cuma sua rē xahasen rē me, hacuiin choho cuma rē me xi tisahmi me xa cuatjin ta sa xi choho cuma rē me ne, tsajin mé machjirēhē xi cuma nuju.

<sup>18</sup> Nihñu oración ngatsē niji ta, tsēhē xi ngayin ne, hyin cojo cjuatacun niji xi cjuatacun niji ne, tyjahi, hacuaha hatuxa meje nihñi cjuandaja ngajñi rē tu mé ni cjuacjintacun. <sup>19</sup> Hacuaha ngahan ne, jercu cjuéhya sa nuju xi cuatjin nihñu

oración ngatsë niji, cojo sa xi sua Nina cahndě xi hitsë sa xati cuinduvatjengë nuju.

*Nguehe cuijnetaha cju*

<sup>20</sup> Quihndě ne, ngayaan ne, ha hyan ta Nina ne, sua naja me cjuandaja cjuajeya, hacuaha catsicuya me Nai naja cjuahñu, me xi cavejña ngajñi rë nima. Nai naja ne, hacuaha jemu ndaja sahmi naja me cuidadu sacuaha sahmi cuidadu ngu xuta chu tsánga rë me. Cuatjin ma sahmi Nai naja ngatsë rë jni rë me xi cavetju hya xi cahme me, jni xi casahmichihin rë compromisu xi yějë nu yějë nixtin sahmi xa. <sup>21</sup> Nina catisua nuju me yějë cjuandaja rë me, cojo sa xi ngayun ne, cuma nihñu yějë hacutjin xi meje rë me. Hacuaha catisahmi me cojo naja hacutjin xi chuya rë me, ngatsë rë xi ngayaan ne, tjin tangun cjuatacun naja cojo Jesucristu. Hane ngayaan ne, meje rë xi nihña jyë nihña hnga Jesucristu yějë nu yějë nixtin. Cuatjin jain.

<sup>22</sup> Ngayujun ni ne, nihñu favor ne, tisiñuju cojo cjuasua cju

xi catsihindu nuju vë ta hacuaha hacuain cjin cju vë xi catsihindu nuju. <sup>23</sup> Nguehe tisuá tijimachaya nuju ta cha Timoteo xingueen ne, ha camandaya cha tséhë cjuañihi. Sa xi cjuehe xati cha ne, cuinduvintjenguin nuju ndyá, hane ndyá sacú xingueen. <sup>24</sup> Tuhun ngu nina naha cojo yějë me xi matitjun ngajñi nuju cojo yějë sa me xi má ladu rë Nina. Xuta Italia xi xuta rë Nina ne, hacuaha tsingatju me ngu nina nuju.

<sup>25</sup> Nina catisua nuju me cjuandaja rë me. Cuatjin jain.

## Carta xi catsihindu Santiago

*Cjua xi catsihindu Santiago me xi hacuaha yahañihi rë Jacobo*

<sup>1</sup> Ngahan Santiago, xi mosu hndixahan tsëhë Nina cojo tsëhë Nai naja Jesucristu ne, tsingátju ngu nina tsujun, ngayujun ni xi xuta ladu rë Nina ngayun, ngayujun ni xi cavitsojo yun ngasunhndë.

*Cjuatacun ndaja xi nduva tsëhë Nina*

<sup>2</sup> Ngayujun ni tsan ne, ngajñi rë yëjë ni xcusun cjuacjintacun xi cuátjun cuma ne, meje rë xi ndaja catama rë xahasen nuju ta, <sup>3</sup> tsëhë xi ha hyun ta, hya xi cavatju xi cacaa nuju cojo ngu cjuacjintacun jan ne, sa xi hacuiin canismutacún cjuachacun xi macjain nuju ne, vëhë cuisecoo nuju xi hitsë sa scaa nuju tu mé ni cjuacjintacun xi cuátjun sa cuma. <sup>4</sup> Peru nihñu ngu jyë xi scaa nuju cojo yëjë ni cjuacjintacun jan hisca xi cuijnetaha. Sehe ngajan xi cuma yun xuta tyjahi xi chutaha cjuatacun rë xi cuma sahmi yëjë ni cjuandaja.

<sup>5</sup> Peru sa xi yo yun xi sahmi chaja nuju cjuatacun ne, chjahyun rë Nina, hane sacú nuju ta, tsëhë xi Nina ne, hisca sesuntaha sa hya xi sua naja me, hacuaha hacuiin chjahnga me cojo naja, hya xi chjahyan rë me. <sup>6</sup> Peru meje rë xi catamangutacún hora xi chjahyun rë me, hacuiin jo cuma tacún ta, tsëhë xi xuta xi jo má cacun me ne, tangun me cojo tsindyü rë ndachacun xi ficojo rë tjo, xi fi nguehe fi ngajan. <sup>7</sup> Xuta xi cuátjin cun me ne, catijnercu me ta tsajin mé xi sua Nina me ta, <sup>8</sup> tsëhë xi jo má cacun me, jo xcun jo hntsua me tsëhë yëjë ni xcusun xi sahmi me.

<sup>9</sup> Peru xuta yuma xi ladu rë Nina me ne, ndaja catama rë xahasen rë me ta, xcun Nina ne, jercu venguí chjí rë me. <sup>10</sup> Hane xuta nchina xi ladu rë Nina me ne, hacuaha ndaja catama rë xahasen rë me, hya xi cuijnercu me xi yëjë ni cjuanchina rë me ne, hisca venguin chjí rë xi cuma rë Nina. Xuta nchina ne, cjuë me sacuatjin fë naxu ndexin. <sup>11</sup> Hya xi tjercu ma suë chan ndavá ne, xca jan ne, fë yëjë xi. Hacuaha naxu rë ne, fë vixu. Xcusun rë ne, handasa tjercu ndajyihí camahani ne, fë vetsun. Hacuanitjin ni cjuë xuta nchina ngajñi rë cjuayuma xi sahmi me.

*Cjuatacun tsehen*

<sup>12</sup> Jemu ndaja tsajan ngayaan, sa xi scaa naja cojo yëjë ni cjuacjintacun xi cuátjun cuma ta, hya xi cavatju xi cacaa naja ne, hya sacú naja ngu cjuahñu ndajyihí ngajan xcun

Nina. Ta cachja Nina xi, sa xi hmutacun me ne, sua naja me ngu cjuahñu ndajyihi jan. <sup>13</sup> Hya xi xahasen naja meje rë xi nihña ngu cjuatacun tsehen ne, mijí rë xi cuinújan xi Nina casua naja me cjuatacun tsehen jan, ta Nina ne, hatuxa tsajin rë me cjuatacun tsehen, hacuaha hatuxa suaain naja me cjuatacun tsehen xi nihña. <sup>14</sup> Peru cjuatacun tsehen xi meje nihña ne, hatuxa vetju tsëhë xahasen naja suvaan. <sup>15</sup> Hya xi ningatahantacun xi meje nihña cjuatsehen ne, cjuatacun jan sahmi xi nihña cjuatsehen. Hane sa xi hatuxa ningatehen rë yëjë ni cjuatsehen xi nihña ne, sacuiin cahndë cuechun xcun Nina.

<sup>16</sup> Ngayujun ni tsan ne, mijí ná xi cuma ndacha ngayun. <sup>17</sup> Yëjë ni cjuandaja ndajyihi xi sacu naja ne, nduva tsëhë ngahnga ta, Nina xi casahmi me yëjë ni ndihi xi siutaha ngahnga ne, me vëhë sua naja me yëjë ni cjuandaja jan. Ndihi xi siutaha ngahnga jan ne, vindeya xcusun rë ta, tjin hora sua ndavá rë ne, tjin hora suaain ndavá rë. Peru Nina ne, chuva xi tacun ni me, tsajin vindeya cjuatacun rë me. <sup>18</sup> Hane hora xi camacjain naja cjuaxi cjuaquixi ne, hora hya casua naja me ngu cjuahñu xatsë. Cuatjin casua naja me ta, tsëhë xi meje rë me xi ngayaan ne, tjun tjun cuma yaan xuta ladu rë me. Sehe ngaxtun vëhë ne, cjín sa xuta xi hacuaha cuma me ladu rë Nina.

### *Cuitjin xi chjahanrcun jain Nina*

<sup>19</sup> Ngayujun ni tsan ne, hya xi yo cuichja cojo nuju ngu cjuaxi, titjun tinuhyunndujun mé cjuaxi cuichja me. Hacuuiin ngutjen chjayunngun, hacuiin ngutjen cuma cjan nuju. <sup>20</sup> Ta sa xi cjan nuju ne, nihñuu cjuandaja sacuahatjin xi meje rë Nina. <sup>21</sup> Peru yëjë ni cjuatsehen ne, meje rë xi tiyujunxun. Hane cjuaxi rë Nina xi camacjain nuju ne, tetjún cojo cjuandaja cojo cjuajeya cahntsua xahasen nuju ta, tsëhë xi cjuaxi vëhë ne, cuma cuaxëtje nuju.

<sup>22</sup> Hane sa xi tu cuisinuju ni cjuaxi rë Nina jan, hane nihñuu hacutjin xi chja ne, tu cuindachun suvun ni rë yojo nuju. Vëhë xi hacuiin tu cuisinuju ni ta, meje rë xi nihñu yëjë ni hacutjin xi vitexa cjuaxi rë Nina. <sup>23</sup> Sa xi tu cuisinuju ni hane nihñuu hacutjin xi vitexa cjuaxi jan ne, tangun yun cojo ngu cha xi vutsejenya cha xcun cha cojo espeju. <sup>24</sup> Cavutsejenya cha xcun cha hacutjin jyihi cha ne, peru xi cafe cha ne, ngutjen cachaya rë cha hacutjin jyihi cha. <sup>25</sup> Peru hya xi cuisinuju cjuaxi vitexa Nina jan ne, sa xi chutayun sa cjuaxi, sa xi chayaaain nuju cjuaxi, sa xi nihñu jain hacutjin xi vitexa cjuaxi jan ne, sacú nuju cjuandaja rë Nina xcun ngasunhndë nuju. Cjuaxi rë Nina xi cuacun jan ne, hatuxa cjuaquixi, hacuaha cjuaxi vëhë xi vëhëndaya naja tsëhë ngajñi rë cjuatsehen.

<sup>26</sup> Sa xi tiningatuhuntacún xi jemu ndaja tichjuhuncun jain rë Nina, ngajñi rë xi tuyë choho vetju ntsuvun nújun ne, tu mahya xi chjuhuncun rë Nina ta, tu tivindachun suvun ni rë yojo nuju. <sup>27</sup> Jyan xcusun vihi xi chuya rë Nina Nahmi naja xi nihña: ngu ne, xi chjahanrcun jain me cojo ngu xahasen xi tyjahi; má jo ne, xi cuisecoon rë hndixahan cojo chjuun cahan ngajñi rë cjuacjintacun rë me; xi ma jyan ne, xi hacuiin nihña cjuatsehen.

## 2

### *Meje rë xi chjahanrcun yëjë ni xuta*

<sup>1</sup> Ngayujun ni tsan ne, quihndë xi macjain nuju Nai naja Jesucristu, me xi tjemu tjin rë cjuandaja ne, mijí rë xi nihñu jyë ngu xuta ne, hane nihñu chuvun nga ngu me. <sup>2</sup> Sa xi cuisehen ngu xuta nchina cahntsua yungun nuju, xi hisca oro xtungun rë me hacuaha tjercu ndajyihi tsjian rë me ne, hacuaha cuisehen nga ngu xuta xi yuma cojo tsjian rë me xi jyihi ntsun ntsun me ne, ¿mé cuinújun cojo rë me? <sup>3</sup> Me xi ndajyihi tsjian rë jan ne, ¿há jemu chjuhuncun me, xi cuitjin cuinújun cojo rë me?: “Tinechun nguehe cahndë ndajyihi vihi.” Hane me xi yuma jan ne, ¿há cuitjin cuinújun cojo rë me?: “Ngaye ne, ngajan nechin jan”, o sa tsajin ne: “Nguehe nechin nguehe nangui.” <sup>4</sup> Sa xi cuatjin cuinújun ne, ngajan matsejen xi hisca ngajñi nuju ne, hacuiin tangun xcusun nuju xi nihñu cojo ngayëjë ni xuta. Tinichuvun xingun ni ne, peru cojo ngu cjuatacun tsehen.

<sup>5</sup> Ngayujun ni tsan ne, tinuhyun cjua vihi. Nina ne, cavaxijin me xuta xi yuma xcun ngasunhdë, cojo sa xi tjemu ndaja cumacjain rë xuta jan me, hacuaha sacú rë xuta jan cahndë ndajyihi nixtin xi cuetsihin cuitexa jain me ngajñi rë yëjë ni xuta ngasunhdë, sacuatjin xi ha cachja me xi sacú rë yëjë ni xuta xi tsihmucacun me Nina. <sup>6</sup> Peru ngayun ne, nisavun rë xuta yuma. Peru ¿yo xi choho sahmi cojo nuju ni? ¿Yo xi faha nuju, fi vinchajyë nuju xcun xutaxa rë? Xuta nchina xi cuatjin sahmi cojo nuju. <sup>7</sup> Hacu jain me. Hacuaha xuta xi nchina ne, me vëhë xi choho chja me tsëhë Jesucristu. Hane Jesucristu jan ne, hacui me xi casua naja ñihi xi tsëhë suvá me.

<sup>8</sup> Xcun xujun rë Nina ne, camahindu ngu cjua xi cavitexa Nina, xi chja cuitjin: “Meje rë xi nihmitacuín xinguín sacuahatjin nihmitacuín yojo riji.” Sa xi cuatjin jain nihñu ne, jemu ndaja tjin. <sup>9</sup> Peru sa xi nihñu jyë ngu xuta hane nihñu chuvun nga ngu me ne, ha canichujún cjua xi cavitexa Nina. Hacuaha suvá cjua jan ne, vëhë cuinchajyë nuju ta canihñuu hacutjin chja cjua jan. <sup>10</sup> Ta sa xi nichujún ngu cjua xi cavitexa Nina ne, handasa nihñu yëjë ni cjua xi yahnga ne,

peru tangun jyě nuju cojo jyě rě ngu xuta xi hndiin camahani tsěhě yějě ni cjua xi cavitexa Nina jan. <sup>11</sup> Cuatjin ta, tsěhě xi ngu ni Nina xi cavitexa me catsijo cjua vihi. Ngu ne: “Xi canindesiin cojo rě ngu chjuun, o cojo rě ngu xihin xi xín.” Ngu nga ne: “Xi caniquiin xuta.” Věhě xi handasa hacuiin nindesun cojo rě ngu chjuun, peru sa xi nicuhun ngu xuta ne, ha canichujún cjua xi cavitexa Nina jan, hane tjin jyě nuju xcun cjua vėhě. <sup>12</sup> Ngajan xi meje rě xi tinújun hacuaha nihñu cjuandaja, sacuaha xi ha ndiya tsichuva nuju Nina, scutsejen me hacutjin canihñu xi vitexa cjua xi vėhëndaya naja. <sup>13</sup> Hane sa xi tsajin nuju cjuayumatacun cojo jingu sa ne, hacuaha tsajin rě Nina cjuayumatacun cojo nuju nixtin hya xi tsichuva nuju me. Peru sa xi tjin nuju cjuayumatacun ne, hacuaha tjin rě Nina cjuayumatacun cojo nuju nixtin hya.

*Sa xi macjain jain naja ne, nihña cjuandaja*

<sup>14</sup> Ngayujun ni tsan ne, sa xi cuinújun xi macjain nuju Jesucristu, peru nihñuu cjuandaja ne, hisca vengui chjiin rě ta, tsěhě xi Nina ne, cuaxintjiin nuju me xi cuatjin nihñu. <sup>15</sup> Hya xi sacú xingun cojo ngu xuta ladu rě Jesucristu xi jemu yuma camahani, xi jercu ntsun tsjian rě me, hacuaha hisca tsajin niñu xi sině me ne, <sup>16</sup> ¿há cuitjin cuinújun cojo rě me? “Tangún ni tsan. Xicamacjiintacún. Ndaja tetsun yojo nuju ta jemu hnchan, hacuaha ndaja xinu niñu ta quiji hora.” Peru sa xi tsajin mé catuhun rě me xi cuaja xi sině me ne, vengui chjiin camahani rě xi cuatjin cuinújun cojo rě me. <sup>17</sup> Věhě xi vengui chjiin rě xi tu suvá cuinújan ni xi macjain naja Jesucristu nguyějě rě xi mijí nihña cjuandaja.

<sup>18</sup> Peru tjin ngu cha xi cuichja cuitjin: “Hacjahi xuta xi macjain rě me Jesucristu, handasa sahmi me cjuandaja. Hacjahi xuta xi sahmi me cjuandaja, handasa macjaain rě me Jesucristu.” Peru ngahan cuichjá cojo rě cha jan ta hacuiin hacjahi xuta ta ¿hacutjin cuma xi macjain jain naja, sa xi hacuiin nihña cjuandaja? Ngatsě rě cjuandaja xi nihña ne, vėhě tsejen xi macjain jain naja Jesucristu. <sup>19</sup> Cha vėhě ne, ¿há macjain jain rě cha xi tjin ngu ni Nina? Tjemu ndaja tjin xi cuatjin macjain rě cha. Peru hacuaha xitsehen ne, cuatjin macjain rě, hane ña fatsě xitsehen má xi tsacjun. <sup>20</sup> Tjemu yumahasen cha xi cuatjin cuichja jan. Peru nguehe cuichjá cojo rě cha ngu jo cjua, cojo sa xi cuijnercu cha ta, vengui chjiin rě xi cuinújan xi jercu macjain naja Jesucristu, sa xi mijí nihña cjuandaja. <sup>21</sup> Sacuaha xutachanga naja Abraham ne, ha hyan xi hatsěě nixtin ne, camangucacun me xi tsiquehen me quihndi rě me xi hmí Isaac ngajan xcun ngasuncun, sacuatjin xi ha cachja Nina cojo rě me. Hane ngatsě rě xi cuatjin cahndě me tsěhě Nina ne, vėhě xi cachja Nina xi ngu xuta ndaja me, ngu xuta

tyjahi me. <sup>22</sup> Ngajan matsejen ta xcusun xi casahmi me ne, cama tangun cojo cjua xi macjain rë me. Hacuaha ngatsë rë xi cuatjin casahmi me ne, vëhë xi camatsejen ta macjain jain rë me. <sup>23</sup> Cuatjin camá sacuatjin chja ngu cjua xi camahindu xcun xujun rë Nina, xi chja cuitjin: “Abraham ne, camacjain rë me Nina. Vëhë xi Nina cachja me xi ngu xuta ndaja me, ngu xuta tyjahi me.” Hacuaha cachja Nina tsëhë me ta amigu rë me.

<sup>24</sup> Cuatjin xi hyan xi chja Nina xi xuta tyjahi yaan sa xi nihña cjuandaja, hacuiin sa xi tu suvá ni macjain naja. <sup>25</sup> Hacuaha ni tjin ni cavatju na xi hmí rë Rahab, na xi caviteña na yojo rë na. Cama tyjahi xahasen rë na ta, tsëhë xi casahmi na ngu cjuandaja, hya xi cojo cjuandaja casua na cahndë xi caviyuju xuta ndava na, xuta xi catsingatju xutachanga naja ngajan nangui rë na. Hacuaha hacjahi ndiya xi catsingacun na me, xi cuetju me cjue me hiscan xi tsajin condra rë me. <sup>26</sup> Sacuatjin xi machjiriin yojo rë ngu nima ta tsajin hasen rë ne, ha cuatjin machjiriin xi macjain naja Jesucristu, sa xi tsajin cjuandaja xi nihña.

### 3

#### *Hacutjin sahmi neje*

<sup>1</sup> Mijí rë xi cjín ngayun cuma yun maestru tsëhë cjuachacun tsan ta, ha hyun ta ngayin xi vicuyin cjuachacun ne, hitsë sa tsichuva niji Nina xi cuma rë xuta xi yahnga. <sup>2</sup> Ngayejen ni ne, hatuxa cjín cjuatsehen xi nihña. Peru sa xi suvá cjuandaja chja ngu xuta, hane hisca ngu cjua chojyihin chjaain me ne, me vëhë ne, ngu xuta ndaja me, ngu xuta tyjahi me. Hacuaha ma vetjo me yojo rë me. <sup>3</sup> Sacuaha ngu naxin ne, sa xi cueyan frenu hntsua chu cojo sa xi cuihndë chu tsajan ne, vëhë sahmi xi cuma cuanguen cojo chu tu cutjin hiscan xi meje naja. <sup>4</sup> Hacuaha sacuaha tjin barcu ne, handasa tjercu jyihí, handasa jemu hñu ngahñu rë tjo xi tsivaha rë ne, peru cha xi cjuicojo barcu jan ne, ngu sasa ni tsiniya cha ngu ya lihndi xi hmí rë timú, sehe ficojo cha tu cutjin hiscan xi meje cjue cha. <sup>5</sup> Hacuaha ni tjin ni neje ta, ngu rquí lihndi ni tsëhë yëjë ni yojo naja. Peru handasa lihndi ne, tjemu yehe cjuahaxi xi nújan cojo rë. Sacuaha ngayaan ne, xi cuetahan rë ngu ndihi ne, handasa ngu ndihi lihndi ni ne, peru cuma cuaca rë yëjë ni ngu nguiñacha. <sup>6</sup> Hane neje ne, tangun cojo ndihi ta tjemu cjan rë. Tjercu ma chja cjuatsehen. Handasa tjin cahndë rë xi quitaha ngajñi yojo naja ne, peru caa rë tsinguetsun naja. Vëhë xi tjercu choho vatjun má xcun ngasunhndë naja ta, tsëhë xi xitsehen ne, vëhë sahmi xi choho nújan. <sup>7</sup> Ngayaan xuta ne, camá canimaxun yëjë ni xcusun chu, sacuaha chu



nguijña, chu nisë, chu yë, cojo chu ti. <sup>8</sup> Peru neje ne, tsajin yo cuma tsimaxu rë ta, hatuxa tsehen yojo vëhë. Suaain cahndë xi cuma maxu. Hacuaha sacuaha nehñu chu yë cjan rë, xi quitsë rë xan rë chu xi tsiquehen naja hya xi faha chu ne, cuatjin neje ta, quitsë rë cjuatsehen xi choho nújan. <sup>9</sup> Ha cojo neje ni ne, ndaja nújan tsëhë Nina Nahmi naja, hane ha cojo vëhë ni ne, nchaten tsëhë xingueen, handasa casahmi naja Nina sacuaha jyihni suvá ni me. <sup>10</sup> Tsëhë ntsuvan ni ne, tecjan cjuandaja cojo cjuatsehen xi vetju nújan. Cuaaintjin camahani xi nújan, tsan. <sup>11</sup> Ngu nandan ne, hatuxa cumaji cuetju tangun nandá xi hyun cojo nandá xi sa. <sup>12</sup> Hane ngu ya laxa ne, cumaji cuaqui rë tsë. Hacuaha ngu nahñu tutsëjë ne, cumaji sua laxa rë. Hacuaha ni tjin ni nandá xtya ne, suaain nandá yufa.

### *Cjuatacun xi vengui chjí rë*

<sup>13</sup> Sa xi tjin ngajñi nuju ngu ngayun xi tjemu vechutaha cjuatacun nuju ne, meje rë xi nihñu cjuandaja. Meje rë xi cuma tsejen xi xuta ndaja xuta jeya ngayun, ngatsë rë xi nihñu cjuandaja xi vitexa cjuatacun nuju. <sup>14</sup> Peru sa xi tjin nuju cjuaxin cahntsua xahasen nuju, hane sa xi meje nuju xi suvun ni ngayun xi ndajyihni cuátjun cuma ne, meje rë xi hacuiin nihñu yehe yojo nuju, hacuiin nújun xi tjercu vechutaha cjuatacun nuju ta, quixiin vë. <sup>15</sup> Ta cjuatacun vëhë ne, hacuiin ngu cjuatacun xi casua Nina ta cjuatacun ni rë xutajyë ngasunhdë vihi, sacuaha cjuatacun rë xitsehen. <sup>16</sup> Hiscan xi tjin cjuaxin, hiscan xi tjemu choho me, ngajan ne, tjemu tujyë sahmi xuta, tjemu sahmi me yëjë ni cjuatsehen. <sup>17</sup> Peru sa xi tjin naja cjuatacun xi nduva tsëhë Nina ne, tjemu tyjahi xahasen naja, tjemu tjin rë cjuajeya xahasen naja, nihña yëjë ni ngu cjuandaja, tjin naja cjuayumatacun cojo xuta, tacun cahndë cjuatacun naja, hacuiin jo má tacun. <sup>18</sup> Hane sa xi ngatsë rë cjuandaja xi nihña cuma cuijnetaha si xi tjin ngajñi rë xingueen ne, cjuandaja cuinechan cojo xingueen, hane yahnga sa xuta ne, hacuaha cuetsihin sahmi me cjuandaja.

## 4

### *Xuta xi tjercu macacun me cojo ngasunhdë*

<sup>1</sup> ¿Mé má cuatjin tjercu nihñu si ngajñi nuju? ¿Mé má cuatjin chicjun cojo xingun? Nihñu ngatsë rë yëjë ni cjuatsehen xi tjercu meje rë xahasen nuju. <sup>2</sup> Tu mé ni ne, meje nuju, peru ngatsë rë xi sacuiin nuju ne, vëhë xi nicuhun xingun. Tjin nuju ngu cjuaxin tsëhë tu mé ni, peru ngatsë rë xi sacuiin nuju ne, vëhë xi vetsuhun si cojo xingun, vetsuhun chicjun cojo xingun. Sacuiin nuju xi meje nuju ta, tsëhë xi chjahyuun

rë Nina. <sup>3</sup> Hacuaha handasa chjahyun ne, peru sacuiin nuju ta, tsëhë xi hacuiin tsëhë cjuandaja xi chjahyun ta, xi chjahyun ne, tu nicujun ngajfi rë ngu cjuasua xi fehya xahasen nuju. <sup>4</sup> Ngayun xi jo xcun jo ntsuvun ne, ¿há hyuun ta sa xi tjenguen xcusun rë xuta ngasunhdë ne, má yaan condra tsëhë Nina? Vëhë xi tu yo ni xi vejñangucacun xi tjengui xcusun rë xuta ngasunhdë ne, sahmi me condra Nina. <sup>5</sup> Hacuiin tu cuenda camahindu xcun xujun rë Nina, hiscan xi chja cuitjin: “Nina ne, casua naja me ngu hasen xi tacun cahndë cahntsua xahasen naja. Vëhë xi mijí rë Nina xi cuetjunxen tsëhë ladu rë me.” <sup>6</sup> Hacuaha Nina ne, visecoo naja me cojo yëjë ni cjuandaja rë me, ta tjin sa ngu cahndë ngajan xujun rë me xi chja cjua rë me cuitjin: “Nina ne, chuyiin rë me tsëhë xuta xi sahmi yehe yojo rë, peru xuta xi jeya me ne, sua Nina me cjuandaja.” <sup>7</sup> Vëhë xi meje rë xi tinuhyun tsëhë Nina. Sa xi nihñuuu hacutjin xi meje rë xitsehen ne, cuetjuxin xitsehen tsujun. <sup>8</sup> Tejñutsja Nina cjuatacun nuju, hane sehe Nina ne, cuaha nuju me. Tiyujunxun cjuatsehen xi tinihñu, hane ngayun xi jo má tacún ne, nihñu tyahi xahasen nuju. <sup>9</sup> Catamavatacún, hacuaha chjihndun, tsëhë xi canihñu cjuatsehen. Cahndë rë xi cuéjnu ne, chjihndun, hane cahndë rë xi sua ma nuju ne, choho catama nuju. <sup>10</sup> Ninguijnu cjuatacun nuju xi chjuhunrcun Nai naja, sehe Nai naja ne, sahmi yehe nuju me.

### *Mijí rë xi nichuvan xinguen*

<sup>11</sup> Hacuiin choho nújun tsëhë xingun tsan ta, sa xi choho nújun tsëhë xingun ne, tangun vëhë cojo xi choho nújun tsëhë cjua xi vitexa Nina. O sa xi nichuvun xingun ne, tangun vëhë cojo xi nichuvun cjua xi vitexa Nina. Hane sa xi nichuvun cjua xi vitexa Nina jan ne, hacuiin tinihñu hacutjin xi vitexa ta, tinihñu yojo nuju sacuaha ngu xutaxa rë. <sup>12</sup> Peru ngu ni me xi cavitexa hacutjin xi nihña, hane ngu ni me vëhë xi tsichuva me. Me vëhë ni xi cuma cuaxëtje naja me, me vëhë ni xi cuma tsinguetsunya naja me. Peru ngayun ne, ¿yo cavitexa nuju xi nichuvun xingun?

### *Tsajin yo vëë rë mé xi cuma nchujun ni*

<sup>13</sup> Nguehe cuichjá ngu cjua. Tjin ngu jo yun xi cuitjin nújun cojo xingun: “Nchujun ni nguini ne, cuétjun cuanguen ngu nangui. Ngajan cuinechan ngu nu xi nihña cjuayuma naja. Cuatjin nihña, sehe sacú naja tujún.” <sup>14</sup> Peru hisca hyúun hacutjin cuátjun cuma nchujun ni nguini. Ngayaan xcun ngasunhdë naja ne, tangun yaan cojo yufí nangui ta, yufí jan ne, tsejen hora xi nduva. Peru xi tu ngu hora ne, ha cavatjucjin, caféya. <sup>15</sup> Vëhë xi hitsë sa ndatjin xi cuitjin cuinújun: “Sa xi Nai

naja meje rë me ne, sua sa me cjuahñu naja xi nihña cuitjin cuatjin xa.” <sup>16</sup> Peru ngayun ne, tjercu nihñu yehe yojo nuju xi nújun cojo xingun hacutjin xi meje nihñu. Hane xi cuatjin nihñu yehe yojo nuju ne, ngu cjuatsehen vëhë. <sup>17</sup> Hane sa xi ha hyan hacutjin fi yëjë ni cjuandaja, peru mijí nihña ne, tjin jyë naja xcun Nina.

## 5

### *Hacutjin cuatju xuta nchina cuma*

<sup>1</sup> Quihndë ne, ngayujun ni xi nchina yun ne, meje rë xi chjindayun chjihndun, ngatsë rë yëjë ni cjuachoho xi cuátjun cuma. <sup>2</sup> Yëjë ni cjuanchina nuju ne, cuenguichjiin rë ta, tsëhë xi cjuë yëjë cjuehndu. Sacuaha tsjian ndaja nuju ne, cjuë sinë chu quixún. <sup>3</sup> Sacuaha tujún ndaja nuju ne, cuma xutsë. Hane tsëhë xi cuatjin xutsë tujún nuju ne, vëhë tsejen xi canihñuu cjuandaja cojo tujún jan, hane ngatsë rë vëhë ne, cuátjun castigu cuma. Tjercu tivetjun camahani cjuanchina nuju quihndë, nixtin xi ha ndiya cuijnetaha cjuë ngasunhdë. <sup>4</sup> Cjëë cjuë cuechjun yëjë ni chjí rë mosu nuju xi casahmi xa nguijña nuju, hane Nai naja ne, me xi ma titjun tsëhë yëjë ni ne, vihndë me cjuä xi tivinchajyë yëjë ni mosu nuju xi quitjun tsëhë. <sup>5</sup> Nguehe ngasunhdë vihi ne, tjercu ndajyihhi cavatjun camá, tjercu catuhun rë cjuasua yojo nuju. Peru sacuatjin xi hatuxa vechu nixtin xi cueya chu chinga xi jercu hñucacun chu ne, hacuaha ni tjin ni cuechu nixtin xi cuátjun castigu cuma. <sup>6</sup> Ngayun ne, canihñu castigu canicuhun xuta ndaja xuta tyjahi. Hane xuta ndaja xi cuacun jan ne, johu ni rë me xi canihñu cojo rë me.

*Meje rë xi cuinechanyan rë Nina cojo jeya hacuaha chjahyan rë Nina*

<sup>7</sup> Vëhë xi tinechunyun cojo jeya tsan, hisca xi cuinduva nga Nai naja. Cha xi sahmi xa nguijña ne, xi cjuë cuincha cha tjë ne, cuejñaya cha cojo jeya hisca xi cuatju chan tsi ne, sehe cuma sacú rë cha ngu cosecha xi ndajyihhi tsëhë xitjë rë cha. <sup>8</sup> Hacuaha ni tjin ni, meje rë xi tinechunyun cojo jeya, hacuaha tejñuhñu xhasen nuju ta, tsëhë xi jima tiña nixtin xi cuinduva nga Nai naja. <sup>9</sup> Sa xi cuinchunyun xingun tsan ne, hacuaha cojo ngayun cuma yun castigu. Vëhë xi mijí rë xi cuinchunyun xingun ta, tsëhë xi me xi tsichuva naja ne, chaja sa hitsë xi cuinduva nga me. <sup>10</sup> ¿Há vitsjiin nuju hacutjin cacaa rë yëjë ni xutachanga naja xi cachja me cjuä xi caveya Nina cjuatacun rë me hatsëë nixtin? Me xi cuacun vëhë ne, casahmi me cjuetacun ngajñi rë yëjë ni cjuañihhi xi cavatju me camá. Hacuaha cuatjin meje rë xi nihñu tsan. <sup>11</sup> Hatuxa nújan xi tjercu ndaja tsëhë me xi cacaa rë cojo cjuañihhi. Ngayujun

ni ne, ha machaya nuju cjuá xi chja hacutjin cacaa rë ngu xutachanga naja xi hmí rë Job, hya xi cavatju me cjuañihi camá. Hacuaha ha hyun ta, hya xi cajnetaha cjuañihi xi cavatju me camá ne, tjemu ndaja casahmi Nai naja cojo rë me ta, tsëhë xi Nai naja ne, hatuxa tjin rë me cjuandaja, tjin rë me cjuayumatacun.

<sup>12</sup> Nguehe cuichjá cojo nuju ngu cjuá xi tjemu vengui chji rë tsan. Hora xi tivisiajmu cojo xingun ne, hacuiin cuinújun xi vëë Nina, vëë tsuhi, hacuiin cuinújun xi vëë tu mé sa ni xcusun. Meje rë xi yëjë ni xi cuinújun ne, cjuaquixi, hacuiin cuindachun. Sehe ngajan xi Nina ne, sahmi nuju me castigu.

<sup>13</sup> Sa xi choho tivatjun jima ne, chjahyun cjuandaja rë Nina. Sa xi tjemu sua nuju ne, sun ngu xi nihñu jyë nihñu hnga Nina. <sup>14</sup> Sa xi hmu nuju ne, chjindayun rë xuta changá xi vitexa ngajñi rë xuta ladu rë Nina, xi tsufë nuju me aceite hacuaha cjuehya me cjuandaja rë Nai naja ngatsë nuju. <sup>15</sup> Sa xi nguñajatacun hora xi chjahyan cjuandaja rë Nina ne, xuta hmu rë jan ne, cumandaja me ta, Nai naja ne, sua rë me cjuahñu. Hane sa xi casahmi xuta hmu rë jan ngu cjuatsehen ne, Nina tsinchataha jyë rë me. <sup>16</sup> Vëhë xi tijacun jyë nuju cojo xingun, hacuaha chjahyun cjuandaja rë Nina ngatsë rë xingun, sehe cumandaja me. Ngu xuta xi tyahi cjuatacun rë me xcun Nina ne, hya xi fehya me cjuandaja rë Nina ne, tjercu vengui chji rë cjuá rë me ta, Nina ne, visecoo rë me. <sup>17</sup> Ngu xutachanga naja xi hmí rë Elías ne, vëhë ngu xuta sacuaha ngayaan. Peru cafehya nguñajacacun me cojo Nina xi cuaain tsi. Hane chuva rë jyan nu vasen ne, cavaain camahani tsi xcun nangui. <sup>18</sup> Hya xi camá ne, cafehya nga rë me Nina xi cataha tsi, hane cavuya cavaha nga tsi, hacuaha camá nga yëjë ni xitjë.

<sup>19</sup> Ngayujun ni tsan ne, sa xi tjin ngu xuta ngajñi nuju xi cuetjuxin me tsëhë ndiya rë cjuaquixi, hane sa xi tjin ngu yun xi cuiseacun rë me xi cuya cuisehen nga me ndiya rë cjuaquixi ne, <sup>20</sup> ninguitsjun cjuá vihi: yo yun xi cuiseacun rë ngu xuta tsehen xi cuetjuxin me tsëhë cjuatsehen xi sahmi me ne, ngatsë nuju ne, cuetjutje me tsëhë castigu xi cuatju me cuma. Hacuaha ngatsë nuju ne, tjercu cjin jyë xi cumanchataha.

## Carta xi tjun tjun catsingatju San Pedru

<sup>1</sup> Ngahan Pedru, apóstol tséhë Jesucristu ne, tsingatju carta vihi xi cuma nuju ngayujun ni xi cavitsojo ngayun ngajan distritu Ponto, distritu Galacia, distritu Capadocia, distritu Asia, cojo distritu Bitinia, cahndë xi nechuntuhun. <sup>2</sup> Hisca hatsëë ne, Nina ne, cavejñangucacun me cavaxijin me ngayun, hacuaha Hasen rë me ne, caviyujuxin nuju, cojo sa xi cuin-uhyun tséhë Jesucristu hacuaha cuma tyjahi xahasen nuju ngatsë rë jni rë me. Nina ne, catitsixuva me cjuandaja cjuajeya xi cuma nuju ngayujun ni.

### *Cuetahantacun ngu cjuahñu xatsë*

<sup>3</sup> Nihña jyë nihña hnga me xi Nina Nahmi rë Nai naja Jesucristu cojo Hasen rë me. Jercu hmu camá rë Nina ngayaan, hane ngatsë rë xi Jesucristu cavuya me cjuahñu tséhë ngajñi rë nima. Nina ne, casahmi me xi cavuya catsin ngayaan cojo sa xi cuetahan tacun ngu cjuahñu xatsë, <sup>4</sup> hacuaha cojo sa xi satë naja ngu cjuandaja rë Nina xi tsajin nixtin xi cuetsun, hatuxa tyjahi, hacuaha tsajin nixtin cjuëya. Hane yëjë ni cjuandaja vëhë ne, tetjo vëhë ngahnga xi cuma nuju ngayujun ni. <sup>5</sup> Hane tséhë xi ngayujun ne, mangutacun cojo Nina ne, vëhë xi me vëhë tisahmi me cuidadu ngayujun ni cojo ngahñu rë me, cojo sa xi cuechuntuhun cjuandaja xi cuaxëtje me ngayun. Hane cjuandaja vëhë ne, ha tjín ndaja rë Nina cojo sa xi tsingacun me hya xi cjuë nixtin xi nechantahan ngasunhndë.

<sup>6</sup> Tséhë vëhë xi ngayujun ni ndama nuju, handasa hitsë sa nixtin ne, sahmi ngu jyë xi jemu cuatjun cjuañihi cuma. <sup>7</sup> Cuatjin meje rë xi chutaha nuju, cojo sa xi cumatsejenquixi xi ndaja mangutacun cojo Nina. Sacuaha oro xi ma vetsun ne, ma chutahachuva rë cojo ndihi. Hacuaha ni tjín ni nuju ngayun ne, meje rë xi chutaha chuva rë xi mangutacun cojo Nina. Hane xi cuatjin mangutacun cojo Nina ne, jercu sa vengui chjí rë xi cuma rë oro. Hane xi cuatjin ndaja mangutacun cojo Nina ne, Nina ne, sahmi jyë sahmi hnga me ngayun, jemu ndajyihí cjuandaja xi sua nuju me, hacuaha cjuaharcun nuju me nixtin hya xi cuya cumatsejen nga Jesucristu. <sup>8</sup> Ngayun ne, hmutacún Jesucristu handasa cahyuun me, hacuaha mangutacun cojo rë me handasa hacuiin tinutsujun me. Vëhë xi jercu ndama rë xahasen nuju ne, xi hisca maji nújun mé xi má nuju cojo xahasen nuju. <sup>9</sup> Ngajan xi Nina ne,

cuaxëtje me ngayun, ngatsë rë xi jercu ndaja camangutacun cojo rë me.

<sup>10</sup> Profeta ne, jercu cavutahahya camahani me hacutjin xi Nina cuaxëtje me xuta. Hacui me vëhë xi ha tjun sa cachja me tsëhë cjuandaja xi ngascan sua Nina ngayujun ni. <sup>11</sup> Jercu cavutaya profeta xi cuacun jan janihya hacuaha hacutjin cuechú nixtin xi cachja Hasen rë Cristu xi jiya cahntsua xahasen rë me, hya xi tjun sa casua me camachaya rë xuta tsëhë yëjë ni cjuañihi xi ngascan cuatju Cristu cuma cojo cjuandaja ndajyihî xi satë rë me ngascan. <sup>12</sup> Nina ne, casua me camachaya rë profeta xi cuacun jan ta cjua xi cachja me ne, hacuiin tsëhë me ndaja ta tsujun ndaja. Hane cjua vëhë ne, hacui cjua xi cachja xuta xi casua me camachaya nuju cjuandajyihî xi chja tsëhë Jesucristu ngatsë rë xi Hasen rë Nina xi caningatjun rë tsëhë ngahnga ne, cuatjin casua rë me chuva rë xi cuichja me. Cjua vëhë ne, hisca ángel ne, jercu meje cuijnercu.

*Meje rë xi naxenxen yojo naja tsëhë cjuatsehen*

<sup>13</sup> Vëhë xi meje rë xi tjin chjine ngayujun ni, hacuaha catiyuju chihin cjuatacun nuju. Ndaja tetuhun tacún tsëhë cjuandaja xi sua nuju Nina nixtin hya xi cuya cumatsejen nga Jesucristu. <sup>14</sup> Sacuaha quihndi xi ndaja vihndë ne, xicatuun cahndë xi cuitexa nuju cjuatacun tsehen xi tjin nuju hatsëe, hya xi jñu cjuatacun nuju. <sup>15</sup> Cahndë rë vëhë ne, ngajñi rë yëjë xi nihñu ne, naxunxun yojo nuju tsëhë cjuatsehen cojo sa xi tsëhë Nina cuma ngayun, sacuahatjin Nina, me xi cavaxijinjñi nuju ne, tuxa jercu xín me tsëhë yëjë ni cjuatsehen. <sup>16</sup> Tsëhë xi xcun xujun rë Nina ne, cuitjin camahindu cjua xi cachja Nina: “Meje rë xi naxunxun yojo nuju tsëhë cjuatsehen cojo sa xi tsahan cuma ngayun ta, ngahan ne, tuxa jercu xín ngahan tsëhë yëjë ni cjuatsehen.”

<sup>17</sup> Ngayujun ni ne, tsëhë xi “Nahmi” nújun tsëhë me xi texta ni tsichuva cjuatacun rë xingu xingu tucu xcusun xi sahmi me ne, vëhë xi meje rë xi ndaja chjuhuncun Nina nguyëjë rë xi nechuntuhun nguehe ngasunhndë vi. <sup>18</sup> Ha hyun xi Nina ne, cavaxëtje nuju me tsëhë ndiya xi hacuiin machjirëhë, ndiya xi caviyuju nuju xutachanga nuju. Hacuaha hyun xi hacuiin ngatsë rë ngu xcusun xi cuma cuetsun sacuaha plata cojo oro xi cuatjin casahmi Nina ta <sup>19</sup> ngatsë rë jni rë Cristu xi cavanga xi jercu machjirëhë, sacuahatjin machjirëhë jni rë cjuaveya rë ngu chu hnditsánga xi tsajin camahani mé má rë chu. <sup>20</sup> Cristu jan ne, casuaxa Nina me hisca chaja sa xi cuejña ngasunhndë, peru quihndë xi tijima chuva nixtin xi nechantahan ngasunhndë vi ne, casua Nina xi catimachaya naja tsëhë me cojo sa xi ndaja cuatjun. <sup>21</sup> Ngatsë rë me vëhë

ne, ngayun ne, camangutacun cojo Nina, me xi catsicuya Cristu cjuahñu tsêhê ngajñi rê yêjê nima hacuaha casahmi jyê casahmi hnga me Cristu. Vêhê xi mangutacun cojo Nina hacuaha vetuhun tacun me.

<sup>22</sup> Ngayujun ni ne, xi tivinuhyun cjuaquixi rê Nina ne, cuatjin canitsiuhun xahasen nuju cojo cjuatacun nuju, cojo sa xi nihmutacún cojo nguñaja ni cjuandaja yêjê sa me xi ladu rê Jesucristu. Ngajan xi meje rê xi hñu nihmutacún xingun cojo nguñaja xahasen nuju. <sup>23</sup> Ngayujun ni ne, hacuaha cavuya catsin nga ngayun, peru hacuiin tsêhê xuta xi hatuxa hme ta tsêhê ngu tjê xi cueyaain ta cjua rê Nina, cjua xi sua naja cjuahñu hacuaha tsajin nixtin cjuëya. <sup>24</sup> Xujun rê Nina ne, cuitjin chja:

Yêjê ni xuta ne, sacuaha xca nguijña me,  
yêjê ni xi ndaja tsêhê me ne, sacuaha naxu rê xca jan.

Xca nguijña jan ne, xí ne, naxu ne, vixu,

<sup>25</sup> peru cjua rê Nai naja ne, tsajin nixtin xi cjuëya.

Hane cjua vêhê ne, hacui cjuandajyihi xi casacu camachaya nuju.

## 2

<sup>1</sup> Vêhê xi ngayujun ni ne, meje rê xi tiyujunxun yêjê ni cjuatsehen, yêjê ni cjuandacha, yêjê xcusun xi sahmi xuta xi jo xcun jo hntsua tjin rê me, yêjê ni cjuaxin, yêjê ni cjuachjataha. <sup>2</sup> Sacuatjin rê ngu quihndinda xi meje rê suvá lechi ne, cuatjin catamameje nuju cjua rê Nina, cojo sa xi nguyêjê rê xi tivisehen nuju cjua jan ne, tuxaha sa cjuatacun nuju hisca xi cuetjuntjun. <sup>3</sup> Cuatjin nihñu, sa xi ha camachaya nuju xi Nai naja ne, jercu ndaja me.

*Sacuaha ngu ndyojo xi jercu vengui chjí rê ne, cuitjin rê Jesucristu*

<sup>4</sup> Nihñutiñu tsêhê me ta me vêhê ne, quicun me. Me vêhê ne, sacuaha ngu ndyojo xi handasa catsitjungi xuta ne, peru xi cuma rê Nina ne, hatuxa catuxijin rê hacuaha jercu vengui chjí rê. <sup>5</sup> Hacuaha ngayujun ni ne, sacuaha ndyojo xi quicun ne, tuhun cahndé xi cjuaha nuju Nina, cojo sa xi cuma ngayun sacuaha ngu yungun hiscan xi nechunxun, hane satêxa nuju nihñu xa rê Nina sacuaha nahmi, xi tuhun cjuandaja nuju xcun Nina. Hane yêjê ni cjuandaja vêhê ne, chuya rê Nina ngatsê rê Jesucristu. <sup>6</sup> Xcun xujun rê Nina ne, cuitjin camahindu cjua xi cachja Nina:

Ngahan vejñávasen ngu xihin ngajan ndetjún Sión,

hane xihin jan ne, sacuaha ngu ndyojo xi jercu vengui chjí  
rê, xi hacuaha catuxijin rê xi cuma titjun tsêhê xih-  
ndënaña;

hane xuta xi cumangucacun cojo xihin jan ne, tsajin nu tsajin nixtin xi cuetju sava me.

<sup>7</sup> Hane xi cuma nuju ngayujun ni xi mangutacun cojo Jesucristu jan ne, jercu vengui chjí rë me. Peru xi cuma rë xuta xi manguaaincacun me ne, cuetjucaa cjuua xi camahindu xcun xujun rë Nina xi cuitjin chja:

Me xi catsitjungui xuta sacuaha tsitjungui chjinevexo ngu ndyojo xi chuyiin rë me tsëhë ne, me vëhë ne, camatitjun me tsajan ngayejen ni.

Cuatjin camahindu. <sup>8</sup> Hacuaha cuetjucaa cjuua vihi:

Xihin jan ne, sacuaha ngu ndyojo xi xtenguiya rë xuta, ngu ndyojo xi sahmi xi tsichaja me ndiya rë me.

Cuatjin chja cjuua. Xuta xi manguaaincacun me ne, xtenguiya rë me, tsëhë xi vihndiin me cjuandajyihi xi chja tsëhë Jesucristu. Hatuxa cuatjin cavejña Nina xi cuatjin cuatju me cuma.

*Xuta xi tsëhë Nina me*

<sup>9</sup> Ngayujun ni ne, ngu tjë xi cavaxijin Nina ngayun, sacuaha nahmi xi fahacuenda yëjë ni xi tsëhë Nina ngayun, xuta xi hatuxa siuxin rë Nina ngayun, hacuaha xuta xi hatuxa tsëhë Nina ngayun. Cuatjin cun ngayujun ni, cojo sa xi ninguitsujun cjuandajyihi xi chja tsëhë yëjë ni cjuandaja xi casahmi Nina, me xi cajindaya nuju xi cavetjunxun tsëhë ngajñi jñu, xi cuisuhun ngajñi hasen ndajyihi rë me. <sup>10</sup> Hatsëë ne, hisca hacuiin xuta rë Nina ngayun, peru quihndë ne, xuta rë Nina camá ngayun. Hatsëë ne, hisca tsajin camayuma rë Nina ngayun, peru quihndë ne, camayuma rë me ngayun.

*Meje rë xi cuinechan ndiya rë Nina*

<sup>11</sup> Ngayujun ni xi sacuaha xuta ngu nangui xi nechunyun ndiya nguehe ngasunhndë vihi ne, vinchangë nuju xi nechunxun tsëhë yëjë ni cjuatsehen xi fehya rë xahasen naja, tsëhë xi sacuaha ngayaan xi vixcaan cojo xingueen ne, cuatjin rë yëjë ni cjuatsehen vëhë cojo hasen naja. <sup>12</sup> Ndaja nihñu ngajñi rë xuta xi hvíin me Nina, cojo sa xi me xi cuacun vë ne, handasa choho cuichja me tsujun quihndë sacuaha xi ngayun xuta tsehen má yun ne, peru scuëë me yëjë ni cjuandaja xi tinihñu, sehe sahmi jyë sahmi hnga me Nina nixtin hya xi cjuahataha Nina jyë rë xingu xingu me.

<sup>13</sup> Ngatsë rë Nai naja ne, tinuhyun tsëhë yëjë ni xutaxa rë ngasunhndë vihi, há xi me xi matitjun camahani, <sup>14</sup> há xi xuta xi tsingatju me xi sahmi castigu rë xuta xi choho sahmi hacuaha cuaxëndaja me xuta xi ndaja sahmi. <sup>15</sup> Cuatjin nihñu ta, tsëhë xi Nina ne, meje rë me xi cjuandaja xi ngayun nihñu ne, sahmi xi xuta xi hvíin ne, cumaji choho cuichja me tsujun. <sup>16</sup> Tángun cojo ngasunhndë nuju sacuaha xuta xi



tsajin camahani mé xi tjin tsavi xi cuma rë me, peru hacuiin ngatsë rë vëhë xi nihñu ngu xcusun cjuatsehen ta, xi meje rë ne, tángun cojo ngasunhdë nuju sacuaha xi mosu hndixahan rë Nina má ngayujun ni. <sup>17</sup> Chjuhuncun ni yëjë xuta. Nihmu tacún yëjë ni xi hacuaha ladu rë Jesucristu me, meje rë xi rcún Nina, hacuaha chjuhuncun me xi matitjun camahani.

*Cjuahmu xi cavatju Jesucristu camá*

<sup>18</sup> Ngayujun ni mosu hndixahan ne, tinuhyun tsëhë nai nuju, hacuaha chjuhuncun me, hacuiin suvá me xi xuta ndaja cojo me xi jeya ta cojo me xi hngacacun. <sup>19</sup> Cuatjin nihñu ta jercu chuya rë Nina sacuatjin rë ngu me xi caa rë cojo ngu cjuañihi ngatsë rë xi vihndë me tsëhë Nina, handasa tsajin jyë rë me xi cuatjin vatju me má. <sup>20</sup> Sa xi ngayun choho nihñu hane má yun castigu ne, ¿yo ndaja cuichja tsujun xi scaa nuju castigu jan? Peru sa xi ngayun ndaja nihñu hane má ngayun castigu ne, jercu chuya rë Nina sa xi ngayun scaa nuju. <sup>21</sup> Nina ne, cajindaya me ngayun xi cuatjin cuatjun cuma. Cristu ne, cavatju me cjuañihi camá ngatsë nuju, hane cuatjin cavejña me ntsacu, cojo sa xi ngayun nihñu sacuatjin casahmi me. <sup>22</sup> Me vëhë ne, hisca ngu cjuatsehen casahmi me, hacuaha hisca ngu cjuandacha ne, cavetjiin cachja me. <sup>23</sup> Hya xi xuta choho cachja cojo rë me ne, me vëhë ne, hacuiin choho catsicuya me tsëhë xuta jan. Hya xi cavatju me cjuañihi ne, hacuiin cavincharcun me xuta jan ta cavetahacacun me Nina, me xi tsichuva rë xuta cojo cjuatacun rë me cojo cjuaquixi. <sup>24</sup> Suvá Cristu jan ne, cavaha me yëjë cjuatsehen naja ngajñi yojo rë me, ngajan xcun cru, cojo sa xi cuma cuetjunxen tsëhë cjuatsehen, hane cuma cuangentjenguen ndiya rë cjuaquixi. Ngayun ne, cavetjun-tjun ngatsë rë cjuahmu xi me vëhë cavatju me camá. <sup>25</sup> Titjun ne, sacuaha chu tsánga xi cachaja tjin nuju ngayun, peru quihndë ne, cavuyun nga ladu rë Cristu, me xi fahacuenda nuju sacuaha ngu xuta xi fahacuenda rë chu tsánga, cuatjin sahmi nuju me cuidadu.

### 3

*Cuitjin xi meje rë xi cuiyuju xuta cojo chjuun cojo xihin me ndava me*

<sup>1</sup> Quihndë ne, ngayujun ni yachjin ne, tinuhyun tsëhë xihin nuju xingu xingu ngayun, cojo sa xi yahnga me xi vihndiin me tsëhë cju rë Nina ne, cuijnecacun me, xi scuëë me xcusun nuju, handasa tsajin mé xi nújun, <sup>2</sup> cuenda xi scuëë me xcusun ndaja xcusun jeya nuju. <sup>3</sup> Mijí rë xi jercu nihñuxun cojo yëjë ni ngu xcusun xi sahmi ndacun nuju cojo yojo nuju sacuatjin hya xi vatjutaha nihñu ndacun tsjarcun, hacuaha cojo hya xi

nihñuxun cojo adorno tsëhë oro, hacuaha cojo hya xi chujun ngu tsjian hnga chjí rë. <sup>4</sup> Cahndë rë vëhë ne, meje rë xi nihñuxun cojo yëjë ni ngu xcusun xi hinchu cahntsua xahasen nuju sacuatjin hya xi ningacun cjuajeya xi cun yun ta yëjë cjuandaja vëhë ne, jercu vengui chjí rë xcun Nina. <sup>5</sup> Hatsëë ne, cuatjin casahmi yachjin xi siuxin me xi cuma rë Nina, yachjin xi cavetaha cacun me Nina. Me xi cuacun jan ne, cavihndë me tsëhë xihin rë me. <sup>6</sup> Nima Sara ne, cuatjin cahndë me tsëhë xutachanga naja Abraham, xihin rë me, hane “nai naha” cachja me tsëhë me. Hane ngayujun ni ne, quihndi rë me ngayun, sa xi nihñu yëjë ni cjuandaja hacuaha tsajin mé xi rcún.

<sup>7</sup> Cuanitjin ni nuju ngayujun ni xihin, xi nechun tangun cojo chjuun nuju xingu xingu yun ne, meje rë xi hyun xi hitsë ni chúva ngahñu rë yachjin. Chjuhunrcun me ta, me xi cuacun vë ne, hacuaha chjuhunntsun tangun cojo rë me cjuahñu xatsë xi sua nuju Nina cojo cjuandaja rë me. Cuatjin nihñu ngayun ne, cojo sa xi tsajin mé sahmíndya rë oración xi nihñu.

*Hya xi vatjun cjuañihi ngatsë rë nihña cjuandaja*

<sup>8</sup> Quihndë xi tsingújnetaha cuichjá cojo nuju ne, ngayujun ni ne, meje rë xi tjin tangun cjuatacun nuju cojo xingun, meje rë xi tjin tangun xahasen nuju cojo xingun, meje rë xi nihmutacún xingun xingu xingu ngayun sacuaha xi ngu naa ngu nahmi nuju ngayujun ni. Meje rë xi tjin nuju cjuayumatacun, hacuaha meje rë xi jeya ngayun cojo cjuatacun nuju. <sup>9</sup> Hacuaha cuéyanangë nuju xi mijí rë xi choho nihñu cojo yo xi choho sahmi cojo nuju, hacuaha sa xi yo choho cuichja cojo nuju ne, mijí rë xi choho chjayunngun tsëhë ta xi meje rë ne, ninchacuntuhun rë. Cuatjin meje rë xi nihñu ta, Nina ne, cajindaya me ngayujun ni xi chjuhunntsun ngu cjuaninchacuntihin. <sup>10</sup> Tjin ngu cahndë xcun xujun rë Nina xi chja cuitjin:

Me xi meje rë xi ndaja cjue cojo ngasunhndë rë hacuaha meje  
rë xi ndaja cuatju cuma ne,

mijí rë xi choho cuichja me hacuaha mijí rë xi cuichja me  
cjuandacha;

<sup>11</sup> catetjuxin me tsëhë ndiya rë cjuatsehen, hane catisahmi me  
cjuandaja,

catanguise me ndiya rë cjuajeya, hane vëhë catjicojo me.

<sup>12</sup> Cuatjin meje rë ta Nai naja ne, fahacuenda me xuta xi tsajin  
jyë rë,

hacuaha vihndë me oración xi sahmi xuta jan,

peru Nai naja ne, chuyiin camahani rë me tsëhë xuta xi sahmi  
cjuatsehen.

Cuatjin chja xujun rē Nina.

<sup>13</sup> ¿Yo choho sahmi cojo nuju sa xi ngayun hatuxa nihñu cjuandaja? <sup>14</sup> Peru handasa cuatjun cjuañihi cuma ngatsē rē xi nihñu cjuandaja ne, tsimii sahmi rē ta ha tsujun ndaja. Hane xicarcuun hisca xi ngu, hacuaha hacuiin cumacjintacún. <sup>15</sup> Meje rē xi chjuhuncun Cristu cojo cjuatacun nuju ta me vëhë xi Nai nuju me. Hacuaha meje rē xi yëjë ni hora ne, tjin chjine ngayujun ni, cojo sa xi tuhun cjuaquixi nuju cojo tu yo ni xi cjuinenguisse nuju mé má cuatjin vetuhun tacún Nina, <sup>16</sup> peru tinújun cojo nguñaja ni cjuandaja cjuajeya. Tángun cojo ngasunhdë nuju cojo ngu xcusun xi ngascan ne, hisca hitsë tsajin cuma sava nuju, cojo sa xi xuta xi choho cuichja me tsëhë cjuandaja xi nihñu ngatsë rē xi tjin tangun cjuatacun nuju cojo Cristu ne, cuetju sava me tsëhë yëjë xi choho chja me tsujun. <sup>17</sup> Hitsë sa ndaja xi cuatjun cjuañihi ngatsë rē xi nihña ngu cjuandaja, sa xi cuatjin meje rē Nina, xi cuma rē xi cuatjun cjuañihi ngatsë rē xi nihña ngu cjuatsehen. <sup>18</sup> Cristu ne, ngundiya ni cahme me ngatsë rē jyë naja. Me vëhë ne, tsajin xi cún rē me xcun Nina, peru cahme me ngatsë naja xi tjercu tjin jyë naja, cojo sa xi cuma cuiseen ladu rē Nina. Cristu ne, sacuaha xihin xi má me ne, catsiquehen xuta me, peru sacuaha hasen xi hacuaha má me ne, catsicuya Nina me cjuahñu. <sup>19</sup> Hane sacuaha hasen me jan ne, quiji cachja me ngu cju cojo yëjë ni hasen xi hinchahñu. <sup>20</sup> Hane hasen xi cuacun jan ne, hacui xi cahndiin tsëhë Nina, hya xi tacunya tacunya Nina cojo jeya nguyëjë rē xi Noé titsindaja me barcu rē me. Hane ngu jo me xi caxincha me cahntsua barcu jan ne, chuva rē jyin má me xi yëjë me, cavetjutje me hya xi cavatju me xcun nandá. <sup>21</sup> Hane nandá jan ne, sacuaha nandá xi xtenda yaan xi vaxëtje naja quihndë. Hya xi xtenda yaan ne, hacuiin xi tinityjahin yojo naja ta tichjahyan rē Nina ngu cjuatacun tyjahi, ngu cjuatacun ndaja, hane cuatjin vetjuntjen ngatsë rē xi Jesucristu ne, cavuya nga me cjuahñu. <sup>22</sup> Me vëhë ne, quiji me ngahnga, hane tacun me ladu quixi rē Nina. Quihndë ne, me vëhë vitexa me ángel cojo jingu sa xcusun hasen sa hasen ndaja sa hasen tsehen xi hacuaha matitjun ngajan ngahnga.

## 4

*Meje rē xi ningatahantacun sacuaha catsingatahacacun Jesucristu*

<sup>1</sup> Vëhë xi, sacuatjin Cristu cavatju me cjuañihi nguehe ngasunhdë vihi ne, cuanitjin ni ngayujun ni, meje rē xi taha catamangutacun cojo cjuañihi quihndë, tuxa má sa xi ngascan cuatjun cuma. Cuatjin meje rē ta, me xi ha cavatju

cjuañihi camá ne, ha quihndë cuitexaain rë me cjuatsehen, <sup>2</sup> hane cjuenduju me cojo ngasunhdë rë me sacuatjin meje rë Nina, hacuiin sacuaaha meje rë cjuatacun naja ngayaan xuta ngasunhdë. <sup>3</sup> Ha jercu canichujun nixtin hatsëë, hya xi canihñu xcusun xi chuya rë xutaxín tsëhë. Jercu choho ndiya cavinechunyun, jercu camameje nuju cjuatsehen, jercu camachuhun, jercu catsangun suhi hisca xi jercu si rcu xuta hacuaaha jercu vatjutaha hvi me, hacuaaha jercu cachjuhuncun nina ndyojo, xcusun xi hatuxa ndajintjin. <sup>4</sup> Quihndë ne, xutaxín jan ne, fircun rë me hisca choho chja me, hya xi ngayun ne, matanguaain yun cojo rë me hya xi me vëhë findujú me cojo ndiya rë cjuatsehen xi hincha me. <sup>5</sup> Peru me vëhë ne, cuechú ngu nixtin xi sua me cuenta xcun me xi ha tjin chjine xi tsichuva me xuta xi quicun cojo xuta xi cahme cojo cjuatacun rë xingu xingu. <sup>6</sup> Vëhë xi hisca yëjë nima ne, casacu camachaya rë tsëhë cjuandajyihí xi chja tsëhë Jesucristu, cojo sa xi, sacuaaha hasen xi má jan ne, sacú rë cjuahñu sacuaaha cjuahñu rë Nina. Cuatjin camá handasa, sacuaaha xuta ngasunhdë xi má nima xi cuacun jan ne, ha cachjaháchuva rë xingu xingu cojo cjuatacun rë, sacuaaha chjaháchuva rë yëjë xuta ngasunhdë.

*Hacutjin meje rë xi cuisecoon xingueen cojo cjuandaja xi sua naja Nina*

<sup>7</sup> Quihndë ne, ha camatiña nixtin xi cjuë ngasunhdë. Vëhë xi meje rë xi ngayujun ni ne, tiyujun chihin cjuatacun nuju hacuaaha tjin chjine ngayun, xi nihñu oración. <sup>8</sup> Hitsë meje sa rë xi nihmutacún xingun xingu xingu ngayun nguñajatacún ta, tsëhë xi cjuahmutacun ne, vujnu rë jercu cjín jyë naja. <sup>9</sup> Hacuaaha chjuhunntsun xingun xingu xingu ngayun ndya nuju, xi hisca hitsë tsajin choho cuma tacún hya xi chjuhunntsun xingun. <sup>10</sup> Ngayun xi jercu cachjuhunntsun cjuandaja rë Nina hacuaaha satëxa nuju xi ninguitsujun cjuandaja jan ne, meje rë xi xingu xingu ngayun ne, cuiseacun rë xuta xi yahnga, ha chuva rë xi casua nuju Nina ngu cjuandaja. <sup>11</sup> Yo ngayun xi cuinújun ne, tinújun sacuaaha ngu xi chja cjuá rë Nina. Hane yo ngayun xi cuiseacun xingun ne, tiseacun rë me cojo yëjë ni ngahñu xi sua nuju Nina. Cuatjin meje rë xi nihñu, cojo sa xi ngajñi rë tu mé ni cjuacjintacun ne, Nina ne, cuma jyë cuma hnga me cojo Hasen rë me ngatsë rë Jesucristu. Me vëhë ne, hatuxa jyë hnga me cojo Hasen rë me hacuaaha jercu hñu me cojo cjuatacun rë me yëjë nu yëjë nixtin. Cuatjin jain.

*Cjuañihi xi cuatjun ngayaan xuta ladu rë Jesucristu*

<sup>12</sup> Ngayujun ni ne, mijí rë xi cjuercun nuju tsëhë cjuañihi jyë xi vatjun má xi chutahachuva nuju ta, tsëhë xi hacuiin

hacui ngu xcusun xi cjuercun naja. <sup>13</sup> Cahndě xi cjuercun nuju ne, meje rě xi catamasua nuju táha hacutjin tivatjun cjuañihi tijima sacuaaha cjuañihi xi cavatju Jesucristu camá. Cuatjin catamasua nuju, cojo sa xi hacuaha jercu cumasua nuju nixtin hya xi cumatsejen hacutjin jyě hnga Jesucristu cojo Hasen rě me. <sup>14</sup> Sa xi xuta choho chja me tsujun ngatsě rě xi tjin tangun cjuatacun nuju cojo Cristu ne, tsujun ndaja ta, vėhě meje cuichja xi Hasen rě Nina xi jercu jyě hnga ne, tivėjña cojo nuju. (Xuta xi cuacun jan ne, hatuxa choho chja me tsėhě Jesucristu, peru ngayun ne, nihñu jyě nihñu hnga me.) <sup>15</sup> Sa xi yahnga ngayun cuatjun cjuañihi ne, mijí rě xi tsėhě xi caniqhun ngu xuta o sa tsėhě xi canihñu cjuachějě o sa tsėhě xi tu mé sa ngu cjuatsehen o sa tsėhě xi visuhunjñu ngajñi rě cjuacjintacun rě xuta xi yahnga. <sup>16</sup> Peru sa xi yahnga ngayun cuatjun cjuañihi ngatsě rě xi ladu rě Cristu ngayun ne, mijí rě xi cumasava nuju ta meje rě xi nihñu jyě nihñu hnga Nina ngatsě rě vėhě.

<sup>17</sup> Ha cavechú nixtin xi cuetsihin tsichuva Nina xuta cojo cjuatacun rě xingu xingu me, hane cuetsihin me cojo naja ngayaan quihndi rě me. Hane sa xi tjun ngayaan tsichuva Nina ngayaan cojo cjuatacun naja ne, ¿hacutjin cuatju me xi vihndiin tsėhě cjuandajyihi xi cachja Nina? <sup>18</sup> Hacuaha tjin ngu cahndě xcun xujun rě Nina xi cuitjin chja:

Sa xi xuta xi cafě jyě rě sehe tu ma vetjutje me ne,  
 ¿hacutjin cuatju me xi hisca cuendaain rě tsėhě Nina cojo me  
 xi jercu sahmi cjuatsehen?

Cuatjin chja xujun rě Nina. <sup>19</sup> Vėhě xi yějě me xi vatju cjuañihi tsėhě xi cuatjin meje rě Nina ne, meje rě xi catjindujú me cojo cjuandaja xi sahmi me hacuaha catejña me yojo rě me tsja Nina, me xi catsindaja rě me ta, Nina ne, hatuxa sahmi chihin me yějě cjuar rě me.

## 5

### *Cjua rě Pedru xi vinchangui me xuta ladu rě Jesucristu*

<sup>1</sup> Quihndě ne, meje cuichjá cojo nuju ngayujun ni xuta changá xi vitexun ngajñi rě yějě xuta ladu rě Jesucristu. Ngahan ne, hacuaha xuta changá ngahan xi cavėě hacutjin cavatju Jesucristu cjuañihi camá. Hacuaha satě ná ngahan sacuatjin rě me xi cuacun jan cjuandaja xi cuetjucaa ngascan.

<sup>2</sup> Cuichjá cojo nuju xi hacuaha meje rě xi chjuhuncuendun xuta ladu rě Nina xi siuntsun, sacuaaha ngu cha xi fahacuenda rě chu tsánga. Cuatjin nihñu nguñaja cjuasua sacuatjin meje rě Nina, hacuiin cjuachan hacuaha hacuiin ngatsě rě xi jercu meje nuju tujún. Chjuhuncuendun me nguñajatacún,  
<sup>3</sup> hacuiin sacuaaha xi ngayun má yun nai tsėhě me ta meje rě

xi tejñu ntsacu, cojo sa xi xuta ne, tjengui me ngayun cojo xcusun nuju. <sup>4</sup>Ngajan xi hya xi cuinduva nga me xi matitjun ne, ngayun ne, chjuhunntsun cjuandaja xi sua nuju Nina, cjuandaja xi tsajin nu tsajin nixtin cjuëya.

<sup>5</sup>Cuatjin ngayujun ni xihin xi hitsë ni chúva nu nuju ne, tinuhyun tsëhë xuta changá. Hane ngayujun ni ne, meje rë xi jeya ngayun cojo cjuatacun nuju hacuiin xta yun ngajñi nuju cojo xingun ta tjin ngu cahndé xcun xujun rë Nina xi cuitjin chja:

Nina ne, tsitjungui me xuta xi jercu tjin rë cjuaxta cahntsua xahasen rë,

peru xuta xi jercu tjin rë cjuajeya cahntsua xahasen rë me ne, Nina ne, jercu sua rë me cjuandaja.

Cuatjin chja xcun xujun rë Nina. <sup>6</sup>Vëhë xi ngayujun ni ne, meje rë xi ninguijnu vojo nuju xi cuinuhyun tsëhë Nina, me xi jercu hñu cojo cjuatacun rë. Cuatjin nihñu cojo sa xi me vëhë ne, sahmi jyë sahmi hnga me yun, hya xi cuechú nixtin rë. <sup>7</sup>Tiyujunxun yëjë ni cjuacjintacun nuju, tiyujun tsja Nina, tsëhë xi me vëhë ne, vutsejen me ngatsë nuju.

<sup>8</sup>Ngayujun ni ne, meje rë xi tjin chjine yun hacuaha nechun quicun ta, tsëhë xi Satanás ne, xitsehen xi maji vëë nuju ne, tsujyihí sacuaha ngu chu xa xi jercu titsichan chu, xi vangui chu yo xi sacú ru xi sinë chu. <sup>9</sup>Xicaningatuun rë, hane tiyujunhñu cjuatacun nuju xi mangutacún cojo Nina. Cuatjin nihñu ta ha hyun xi yëjë sa me xi hacuaha cojo ladu rë Cristu hinchá jingujyë ni ngasunhdé ne, hatuxa tjin rë me xi cuatju me yëjë ni cjuañihí vëhë cuma. <sup>10</sup>Peru xi ha cavatjun cjuañihí hitsë nixtin ne, Nina ne, tsityjahi me cjuatacun nuju, cuiyujuchihin me cjuatacun nuju, cuiyujuhñu me xahasen nuju, hacuaha cuiyuju cahndé me cjuatacun nuju. Nina xi sahmi cuatjin jan ne, hacui me xi tjin rë yëjë ni cjuandaja, hacui me xi cajindaya nuju me xi satë nuju cjuahasen ndajyihí rë me xi tsajin nu tsajin nixtin xi cjuëya, ngayujun ni xi tjin tangun cjuatacun nuju cojo Cristu. <sup>11</sup>Nina ne, hatuxa jemu hñu me cojo cjuatacun rë me yëjë nu yëjë nixtin. Cuatjin jain.

### *Cjua xi vijnetaha*

<sup>12</sup>Ngahan ne, catsihindu nuju ngu jo cjua vëhë, cojo sa xi cuinchangë nuju hacuaha tsinguixë nuju xi cjua vëhë ne, hacui cjuandaja jain rë Nina. Tiyujunhñu cjuatacun nuju xi cuangunndujun cojo cjuandaja vëhë. Silvanu ne, me xi ndaja fitjengui rë ndiya rë Cristu ne, cavisecoo ná me xi catsihindu nuju.

<sup>13</sup>Xuta rë yungun nguehe Babilonia, xi hacuaha cavaxijin rë me Nina ne, tsingatju me nina nuju. Hacuaha Marcos xi sacuaha quihndí naha ne, tsingatju cha nina nuju. <sup>14</sup>Tuhun

rë xingun ngu nina, cojo cjuandaja cojo cjuahmutacun tindat-  
suhun xingun, sacuahatjin xcusun naja. Catisua nuju Nina  
cjuandaja cjuajeya ngayujun ni xi tjin tangun cjuatacun nuju  
cojo Cristu.

## Carta xi majo xi catsingatju San Pedru

*Pedru ne, tsingatju me cjuat tséhë xuta xi macjain rë me Nina*

<sup>1</sup> Ngahan xi hmí ná Simón Pedru, mosu rë Jesucristu, hacuaha apóstol tséhë me ne, tsingatju carta vihi tsujun ngayujun ngayun xi Nina naja Jesucristu cavaxëtje nuju me xi casua nuju ngu cjuatacun xi macjain nuju cuanitjin sacuahatjin ngayin. Cuatjin casahmi me ta Nina hatuxa jyihi tyjahi tyjahi cjuatacun rë me. <sup>2</sup> Nina ne, catitsixuva me cjuandaja cjuajeya xi cuma nuju ngayujun ni ngatsë rë xi ndaja hyun Nina cojo Jesús, Nai naja.

*Hacutjin cun xuta xi macjain rë me Nina*

<sup>3</sup> Jesucristu xi cojo ngahñu ndajyihí rë me, jyë hnga me ne, cajindaya me yaan xi chan yo me. Hane cuatjin casua naja me yjë ni xi mameje rë tséhë cjuahñu xatsë hacuaha tséhë ngu cjuatacun tyjahi. <sup>4</sup> Cojo ngahñu vëhë casua naja Nina cjuat rë me xi tjercu tu ndaja vengui chjí rë. Cojo sa xi ngatsë rë cjuat vë ne, ngayun ne cuechuntuhun ngu cjuatacun sacuaha Nina, hacuaha cojo sa xi cuetjuntjun tséhë xi cuetsun cjuatacun nuju cojo cjuatsehen xi fehya rë xuta. <sup>5</sup> Hindë ngatsë rë vihi ne, ndaja nihñu ngahñu cojo sa xi ha macjain nuju Nina ne, má tyjahi cjuatacun nuju. <sup>6</sup> Hane hacuiin cuanitjin ni, ta hacuaha ningascunyun cjuatacun nuju. Sehe tuhun hñu yojo nuju tséhë cjuatsehen. Hacuaha cuanitjin ne cojo xi nihñu jyë tacún. <sup>7</sup> Hacuaha cojo xi chjuhuncun Nina, hacuaha cojo xi chjuhuncun xingun, hane hacuiin tu cuanitjin chjuhuncun xingun ta cojo ngu cjuahmutacun.

<sup>8</sup> Sa xi cuatjin ndaja xcusun nuju, hane sa xi nihñu jain sacuatjin vitexa ne, xcun cjuahñu nuju ne, tjercu cuengui chjí nuju hacuaha hacuiin tu mahya ni camachaya nuju tséhë Nai naja Jesucristu. <sup>9</sup> Peru xuta xi cuaaintjin jyihí xcusun rë me ne, cumá jñu cjuatacun rë me sacuaha ngu rcá me o sacuaha ngu cha xi vutsejen hiscan xi cjin peru hvíin cha mé xi tivutsejen cha. Ngatsë rë xi cachaya rë me xi camanchataha jyë rë me xi ha casahmi me. <sup>10</sup> Vëhë xi ngayujun ni xingueen ne, sa xi nihñu jain sacuatjin vitexa xcusun ndaja jan ne, ngajan machihin cjuat ta Nina ne, cajindaya nuju me hacuaha cavaxijin nuju me ne, hane cuatjin ha tuxa tsajin ngu nixtin xi cuetjuncun tséhë ndiya rë Nina. <sup>11</sup> Cuahatjin jemu ndaja sacu nuju cahndë xi cuisuhun hiscan xi sahmi gobiernu Nai



naja Jesucristu, me xi vaxëtje naja, hane tsajin nu tsajin nixtin cuetjunixun.

<sup>12</sup> Vêhë xi vejñacacun xi cúa tsinguitsjen nuju cjuandaja vihi ha ndasa ha hyun hane hacuaha quitahatacún cjuatacun nuju yêjê ni cjuahñu xi camachaya nuju. <sup>13</sup> Peru jinguyêjê rê xi tjin ná cjuahñu ne, xi má ná ne, sahmi ngujoyê xi cuascaya rê cjuatacun nuju xi tsinguitsjen nuju vi ta, <sup>14</sup> tsêhê xi tacun xati nixtin xi cuejñá ngasunhdê vi, sacuaha ha casua Nai naja Jesucristu camachaya ndaja ná. <sup>15</sup> Hisca hacuaha xati tisahmecácun ne sehe ngajan xi handasa cavéya ne tu mé ni hora cuma cuitsjen nuju tsêhê yêjê ni cjua vihi.

*Cavindeya xcusun rê Jesucristu, hacuaha cavaxëndaja Nina me*

<sup>16</sup> Catihin camachaya nuju cjua sacuaha tsêhê ngahñu xi tjin rê Nai naja Jesucristu cojo tsêhê hya xi cuinduva me. Cjua vêhê hacuini ngu cuentu ndacha xi ndaja nuhya rê peru cjuaquixi jain. Quixi ta cahyin cojo tuxcuin ta Jesucristu ne, jemu rcun me ta jemu jyê hnga hasen rê me. <sup>17</sup> Hya ne, Nina nahmi naja ne cafararcun rê me hacuaha cavaxëndaja me Jesús ta cjua rê Nina ne canduva tsêhê ngahnga xi cachja cojo rê me cuitjin: “Vihi quihndi naha xi hmucácun ne, xi ngatsê rê me ne tjercu ndaja má ná.” <sup>18</sup> Hindê ngayin suvin canuhyin cjua vê ta canduva tsêhê ngahnga hya xi cavinechintihin ngajan cojo Nai naja rcu naxi hiscan cavatju camá.

<sup>19</sup> Cojo xcusun xi cahyin ne, vêhê catsinguixi rê cjua changá xi catsihindu profeta. Ngayujun ni ne jemu ndaja nihñu xi tivetuhun rcun yêjê ni cjua changá jan. Cjua jan ne, tangun sahmi sacuaha ngu ndihi xi sua hasen rê hiscan xi jñu, hane cjuecani rê hisca xi sahasen ne. Hane sacuaha sua hasen rê tiña sahasen xi cuetju niñú seti ne hacuaha Jesucristu sua hasen rê xahasen nuju. <sup>20</sup> Cjua xi hitsê sa sahmi ngujoyê xi meje rê xi machaya nuju ne, cjua vihi má: sacuaha yêjê cjua xi catsihindu profeta xcun xujun rê Nina ne, cumajin sesuntaha sa ngu cjuatacun rê xuta ta, <sup>21</sup> hisca ngu cjua jan tsajin xi catsihindu profeta cojo cjuatacun rê suva ni me, ta Hasen rê Nina casua rê me cjuatacun xi cuichja me cjua jan xi tsêhê Nina.

## 2

*Cuinduva maestru ndacha*

<sup>1</sup> Peru nixtin hatsêê ne ngajan nangui rê Israel ne, hacuaha cavetjujñi xuta xi tsejen sacuaha profeta peru tu vindacha me. Hacuaha cuanitjin hindê ne cuetjucun maestru xindacha xi xinchajñi me ngajñi nuju. Me xi cuacun vê ne, tsinguisse-henhma me cjuanchacun ndacha. Hisca tsitjungui me Nai

naja xi cavaxëtje rë me. Vëhë xi nguhñusasa cuechutaha rë me castigu xi satë rë me. <sup>2</sup>Ngajan xi tjemu cjin xuta cuisehen cojo me ndiya tsehen vëhë, hacuaha ngatsë rë me ne, choho cuichja yahnga xuta tsëhë ndiya rë cjuaquixi xi cjuecojo naja xcun Nina. <sup>3</sup>Maestru xi cuacun ne, jercu sahmi me cojo tujún. Vëhë xi cuaxë me tsujun cojo cjuandacha xi ndaja nuhya rë. Peru me xi cuacun ne, hisca hatsëë ne tacunvasen castigu xi cuechutaha rë me, tacun cuaha hatuxa maji cuetjutje me tsëhë.

<sup>4</sup>Cahyun ni ta Nina ne catsinchataain me ángel hya xi casahmi ángel cjuatsehen, ta cacandiya me catsihñu me cojo cadena hiscan jñu cojo sa xi siucuaha hisca cuechutaha nixtin xi sahmi cuenda me tsëhë. <sup>5</sup>Hacuanitjin ne, catsinchataain Nina xuta ngasunhdë hatsëë nixtin ta hisca catsingatju me ngu tsi cjuarcun xi catsicjë rë ngayëjë ni xuta tsehen jan. Cavetjutje me ngu tu tu xihin xi hmí rë Noé, ngu xihin xi casua camachaya rë xuta tsëhë ndiya rë cjuaquixi. Hacuaha yatu sa xuta cavetjutje me hya. <sup>6</sup>Hacuanitjin ne, casahmi Nina xi cavetsunya nandya Sodoma cojo nandya Gomorra, cavaca me ne hisca xi camá suva ndesu sa rë. Vëhë camá sacuaha ngu ejemplu xi chja xi cuatjin cuatju yëjë ni xuta xi sahmi me cjuatsehen. <sup>7</sup>Peru hya ne, cavaxëtjeyñi Nina ngu cha xi tyjahi cjuatacun rë xi hmí rë Lot, cha vëhë ne jemu choho má rë xahasen rë cha tsëhë yëjë ni cjuatsehen xi casahmi xuta nandya jan.

<sup>8</sup>Jemu camá rë cha jan cjuaxti ta, tyjahi cjuatacun rë cha hane nchunchujun ni cavutsejen cha cavihndë cha xcusun tsehen xi casahmi xuta ta tsëhë xi cha vëhë jan ne, jiyajñi cha ngajñi rë me. <sup>9</sup>Cuatjin tsejen ta Nina ne, ma vaxëtjeyñi me xuta tyjahi tsëhë cjuañihi hacuaha ma viyujvasen me xuta tsehen nguihma castigu rë me xi cuejñaya me hisca xi cuechutaha nixtin xi cumacuenda tsëhë me. <sup>10</sup>Quixi jain ta xuta xi sahmi me cjuatsehen xi fehya yojo jyë rë me hacuaha xuta xi tsitjungui me xi tjin rë Nai naja derechu xi vitexa me ne, xuta vëhë ne, viyujvasen me nguihma castigu. Me xi cuacun jan ne, jemu hñu jni rë me, sehñu me cojo cjuatacun rë me hane tsacjuuin me xi choho cuichja me tsëhë ángel xi siu cojo Nina. <sup>11</sup>Peru ha ndasa sa xi ángel ne hitsë sa hñu cjuame xi cumá rë me xi cuacun jan, hacjahi xcusun sahmi ángel ta vetjiincacun cuinchajyë xcun Nai naja.

<sup>12</sup>Xuta tsehen xi cuacun vë ne, jemu chu me, ta ngu chu ne, cjuatacun rë chu xi vitexa ru, hacuiin tsingatahatacun chu. Hacuaha siu chu cojo sa xi chjaha ru sehe cueya chu, hane cuatjin cumachjirëhë chu. Cuanitjin ne xuta jan choho chja me tsëhë yëjë ni xcusun xi vijniircu me ta, tsingataaincacun me hacuaha sacuatjin catsijehnduya me cjuatacun hacuaha

cjuë cjuhndu me suva me tangun me cojo ngu chu. <sup>13</sup> Cuatjin cuatju me ngu cjuañihi sacuaha casahmi me xi cavatju ñihi xuta. Xi má rë me ne, tjemu tjin rë me cjuasua xi tisahmi me ha tu cutjin ni xi masua rë xahasen rë me hora hya. Nguyëjë rë xi tichinu tangun tsëhë suhi xi tjin nuju ne, me xi cuacun vëhë ne, ngu cjuasava me, ngu xcuehyu hinchajñi me cojo nuju xi tisua me cjuasua yojo rë me cojo ngu cjuandacha.

<sup>14</sup> Xi tu scutsejen ni me jan ngu chjuun ne, hachu cuehya ran xahasen rë me. Fendaain rë me xi sahmi me cjuatsehen. Tsitsehen me xuta xi ndaya cacun. Yëjë fehya rë xahasen rë me ta cuatjin camanga rë. Ha tjinchihin xujun jyë rë me xcun Nina. <sup>15</sup> Cachaja me ndiya ta, tsëhë xi cavetjuxin me tsëhë ndiya quixi rë Nina. Cafayangui me xcusun xi casahmi Balaam quihndi rë cha Beor. Cha vë ne, jercu casahmi cha cojo tujún, hisca meje rë cha chjí rë cjuatsehen. <sup>16</sup> Hacuaha Nina casahmi me xi ngu chu burra xi majin tsingatahacacun chu cojo cjuatacun ru, peru cojo xta rë xuta cachjataha chu cha jan hane casuaain chu cahndë xi cjue sa cha cojo cjuasca rë cha.

<sup>17</sup> Maestru jan ne, machjiriin cjuarë me. Tangun me cojo ngu ndava nandá xi quixíya, hacuaha tangun me cojo yufi xi ficojo rë tjojne. Nina tjin ndaja rë me ngu cahndë xi cuisehen me hiscan xi jñu cjin ni. <sup>18</sup> Maestru jan ne, jindayatë me cjuarë me sahmi yehe me xi ndastu venguichji rë. Hacuaha tsingas-caya rë me cjuatacun rë jingu sa xuta xi cuma meje rë me cjuatsehen xi fehya yojo rë me. Xuta jan ne, sehe tisahmi me ngahñu xi tivetjutje me tsëhë ngajñi rë xuta xi hincha ndiya rë cjuandacha. <sup>19</sup> Chja ndacha maestru xi cuacun ta cuma ndaya xuta jan tsëhë cjuarë me vitexa ley, cuatjin chja me. Peru suva ni me ne, cjëë cuma ndaya me tsëhë cjuatsehen. Hane jima ngu ngayaan ne, ha tu jarë ni xi scaa rë tsinguijne naja ne, vëhë scaa rë cuitexa naja tsihñu cjuatacun naja. <sup>20</sup> Cuatjin ne, xuta xi ha vëë me yo xi Nai naja Jesucristu xi vaxëtje naja hane yo xi cavetjuxin me tsëhë yëjë ni ngu cjuatsehen tsëhë ngasunhndë ne, sa xi tsingatihin me xi cuixuya nga me ngajñi cjuatsehen jan ngu ndiya nga ne, hane cjuatsehen jan scaa rë cuitexa rë me ne, hitsë sa sahmi yehe me jyë rë me xi cuma rë titjun. <sup>21</sup> Hya hitsë sa ndatjin tsëhë me sa xi camachayiin rë me ndiya quixi jan tsëhë xi cuma rë xi titjun quiji ndaja me ne, peru sehe catsismicacun me tsëhë cjuarë ndajyihni rë Nina xi cafahatsja me. <sup>22</sup> Hya xi cuatjin sahmi xuta ne, ngajan tsejen xi quixi jain cjuarë me chja cuitjin: “Naña xi cavesu rë chu ne, vuya jinë chu tsëhë chu hane chu chinga xi sehe tu café catsinduya me chu ne, vuya vinduyachajo chu ngajñi ndasi.”

## 3

*Handajasa vindeya rē Nai naja, peru cuiduva me*

<sup>1</sup> Vihi má jo carta xi tsihindú nuju, ngayujun ni xingueen. Catsijo carta vi ne, yaha conseju xi ha hyun peru xi meje ná xi tsingascaya rē cjuatacun nuju cojo. <sup>2</sup> Ninguitsjun tsēhē cjua xi hatsēē cachja profeta rē Nina, hacuaha ninguitsjun tsēhē cjua xi cachja Nai naja xi vaxētje naja, cjua jan xi apóstol cavicuaya nuju.

<sup>3</sup> Hacuaha hatuxa nihñucuendun tsēhē cjua vihi: nixtin ngascan rē ngasunhdē ne, hya cumatsejen xuta xi sahmi me cjuatsehen tu cutjin cuehya rē yojo rē me. Me vēhē ne, cuejnucēē me <sup>4</sup> cuinenguise me cuitjin: “¿Jani tsejen Cristu? ta, tacunvasen cuaha cjua xi cuinduva nga me. Peru café cahme xuta changá naja ne, hane ha nduva ni chuva xi nduva, cuanitjin sacuahatjin camá hisca xi casahasen ngasunhdē.” Cuatjin chja me. <sup>5</sup> Peru quixiin cjua xi chja me ta, hatuxa mijí cjuahacuenda me tsēhē xcusun xi cama vi: cojo cjua xi cachja Nina ne, ngasunhdē ne, ha tacun cuaha hisca hatsēē nixtin. Nangui ne, camatangun ngajñi nandá, hacuaha nandá ni ne, casua ngahñu rē ngasunhdē. <sup>6</sup> Sehe hacuaha nandá vēhē ni ne, catsinguetsun rē hya xi casesuntē nandá ngasunhdē nixtin vē. <sup>7</sup> Hindē ne hacuaha cojo cjua rē Nina jan ne, ngahnga cojo nangui xi tsejen quihndē ne, ha tetjo cuaha rē Nina peru cojo cjua vēhē ni ne, sehe cueti cojo ndihi. Ndihi vēhē ne cuaca rē hya xi cjuaháchuva Nina yējē ni xuta tsehen nixtin xi cjuēya me xi cuma rē Nina.

<sup>8</sup> Peru ngayun xingueen, chjuhuncuendun tsēhē cjuaquixi vi: xi má rē Nai naja ne, ngu nixtin ne, tangun ni nduju sacuaha ngu mil nu, hane xi ngu mil nu ne, tangun chuva sacuaha ngu nixtin. <sup>9</sup> Handasa xi ma tsingatahacacun xuta xi jemu tivindeya rē Nina xi cuma chihin cjua xi cachja me ne, peru quixiin vē. Nina ne, ta tsijyēcacun me cojo nuju, tisua sa nuju cahndē cojo sa xi tsajin hisca ngu xuta xi chaja me ta, meje rē me xi yējē ni xuta ne, tsindeya me cjuatacun rē me hane cuisehen me ndiya ndajyih.

<sup>10</sup> Peru xi cuechun nixtin xi cuinduva Nai naja ne, ha sacutsja rē cjuehe me sacuaha xi cjuehe ngu chējē xi má nguixun. Sehe ngajan cumá xi ngahnga ne, cuetsunya cojo ngu chircun xi tjercu cjuaneya camahani, hane yējē xcusun xi camá cojo ne, cjuēya tundecjaya cojo ndihi. Hacuaha nangui ne, cjuē cueti cojo yējē xcusun xi tjin rē. <sup>11</sup> Tsēhē xi quixi jain xi hatuxa cuatjin cjuē cuetsunya yējē xcusun vē ni, ngajan xi sahmi ngu jyē xi ngayun ne, ndandaja nihñu ngayun hacuaha tyjahi cjuatacun nuju. <sup>12</sup> Nechunyun rē nixtin xi cuinduva Nina hane nihñu xati tacun xi xati cumá cjuehe. Nixtin vēhē

ne, ngahnga ne cuetsunya cojo ndihi, hane yějě xcusun xi camá cojo ne, tundecjaya rě ne, cjuěya. <sup>13</sup> Peru ngayaan ne, nechayan rě cahndě xi cachja Nina xi cuiseen, ngu ngahnga xatsě, ngu nangui xatsě hiscan cuinechanchnden cojo suva mé xi tsajin jyě rě.

<sup>14</sup> Věhě xi ngayujun ni xingueen ne, jinguyějě rě xi nechunyun rě yějě ni xcusun vihi ne, nihñu nguñajatacun xi ndandaja nihñu cojo sa xi hya xi cuechutaha me yun ne, tyjahi cjuatacun nuju, tsajin xi cún nuju, hane hacuiin mé cjuachan tjin. <sup>15</sup> Ningatuhuntacun ngayun ta hindě xi titsijyěcacun Nai naja cojo naja ne xi jemu tafi me ne, vaxěcun rě xi xuta ne, cuetjutje me. Tangun ni chja Pablo xingueen ne, hane hacuanitjin catsihindu nuju tsěhě, sacuahatjin cjuatacun ndajyihi xi casua Nina me. <sup>16</sup> Ngajan xi xcun yějě ni carta xi catsihindu me ne, hacuaha chja me cojo nuju tsěhě yějě ni xcusun vihi, handasa hinchajñi yahnga cjua xi tjemu chja vijnercu. Xuta ngarca ne, xuta xi hacuiin nguñajacacun me ne, titsindeya me cjuatacun rě cjua jan xi chja vijnercu hane hacuaha tsindeya me cjuatacun rě yahnga xujun rě Nina. Xi cuatjin sahmi me ne, tivangui me suva me jyě rě me.

<sup>17</sup> Ngajan xi ngayun, xingueen, hangu ta hya xi chaja sa cumá ne ha camachaya nuju tsěhě cjuacjintacun vihi, nechun cuidadadu tsěhě. Sehe ngajan hacuiin mahinda tacun cojo cjuandacha tsěhě xuta tsehen ta sehñu cuaha cojo cjuatacun quixi. <sup>18</sup> Peru catamajyě sa tsujun cjuandaja rě Nina hacuaha catuxaha sa cjuatacun xi tjin nuju tsěhě Nai naja Jesucristu, me xi vaxětje naja. Catama jyě catama hnga me yějě nu yějě nixtin. Cuatjin jain.

## Xujun titjun, xi catsihindu San Juan

### *Cumangutacun ta Jesús camá me Quihndi rë Xuta*

<sup>1</sup> Tihín cumachaya nuju ngujo cjuá tséhë Jesucristu, me xi sua cjuahñu xatsë. Me vëhë xi ha tacun me hisca xi casahasen ngasunhdë. Canuhyin cjuá xi cachja me. Cahyin yëjë ni hacutjin xi casahmi me. Hisca casatë ntsin me. <sup>2</sup> Me xi sua cjuahñu jan ne, camatsejen me. Hane ngayin ne, cahyin me. Vëhë xi titihín cjuaquixi niji, xi titihín tijimachaya nuju ta me vëhë ne, tsajin nu tsajin nixtin xi cavetsihin cjuahñu rë me, hacuaha tsajin nu tsajin nixtin xi cuijnetaha cjuahñu rë me. Ha tacun me ngajan cojo Nahmi rë me ne, peru canduva me nguehe, cama tsejen me ngajñi niji. <sup>3</sup> Vëhë xi titihín tijimachaya nuju cjuá xi canuhyin cojo xcusun xi cahyin, sehe ngajan xi cuma tangun cjuatacun nuju cojo Nina sacuatjin tjin tangun cjuatacun niji cojo Nina Nahmi naja cojo Jesucristu, Quihndi rë me. <sup>4</sup> Vëhë xi cuitjin tinihindin nuju, cojo sa xi jemu ndaja cuma rë xahasen niji.

*Xi cuanguen nduju cojo Nina ne, má sacuaha casua hasen rë cjuatacun naja*

<sup>5</sup> Cjuá xi cachja Jesucristu cojo niji ne, cuitjin fi: Nina ne, hatuxa tjemu ndaja me. Tsajin camahani cjuatsehen hiscan tacun me. Hane ha cjuá vëhë ni xi tinújan cojo nuju. <sup>6</sup> Sa xi cuinújan xi tjin tangun cjuatacun naja cojo Nina hya xi tinihña cjuatsehen ne, tu vindachan ni ta, cjuatsehen xi tinihña ne, chuyiin rë Nina tséhë. <sup>7</sup> Peru sa xi nechan ngajñi rë cjuandaja, sacuatjin rë Nina xi hatuxa tacun me ngajñi rë cjuandaja ne, cuatjin xi cuma tangun cjuatacun naja. Hacuaha cuatjin xi cjuengui xahasen naja tséhë yëjë ni jyë naja, ngatsë rë xi cahme Jesús, Quihndi rë Nina.

### *Sa xi cuijacun cojo Nina ne, cumanchataha jyë naja*

<sup>8</sup> Sa xi cuinújan xi tsajin jyë naja ne, tu cuindachan suvaan ni rë yojo naja ta, quixiin xi nújan. <sup>9</sup> Peru sa xi cuijacun jyë naja cojo Nina ne, tsinchataha naja me, hacuaha cuaxëxin me yëjë ni cjuatsehen xi hincha xahasen naja. Cuatjin sahmi me ta tjercu ndaja me. Yëjë ni cjuá xi chja me ne, hatuxa sahmi chihin me. <sup>10</sup> Sa xi cuinújan xi hisca ngu cjuatsehen cjëë camahani nihña ne, tangun vëhë cojo xi cuinújan xi Nina ne, jemu ndacha me xi chja me xi tjin jyë naja, hacuaha cuatjin cumatsejen xi cjuá rë Nina ne, cavisiin camahani ngajñi rë cjuatacun naja.

## 2

*Cristu, me xi chjatje ngatsë naja*

<sup>1</sup> Titsihindu nuju yějë ni cjua vihi tsan ta, tsëhë xi cjua vihi ne, cuicuya nuju xi hacuiin nihñu cjuatsehen. Peru sa xi tjin yo yaan xi nihña ngu cjuatsehen ne, hacuaha tjin naja ngu me xi cuichjatje ngatsë naja xcun Nahmi naja. Me vëhë ne, hacui Jesucristu, me xi hatuxa tyjahi. <sup>2</sup> Hacuaha me vëhë ne, cavechjitje me tsëhë yějë ni jyë naja. Peru hacuiin tu suvá ni jyë naja ta hacuaha cojo jyë rë yějë sa xuta.

<sup>3</sup> Sa xi nihña jain hacutjin xi vitexa Nina ne, ngajan matsejen xi cjuaquixi xi xuta rë me ngayaan. <sup>4</sup> Peru sa xi cuinújan xi hatuxa xuta rë Nina ngayaan hya xi mijí nihña hacutjin vitexa me ne, tjercu ndacha yaan ta quixiin xi nújan. <sup>5</sup> Peru hya xi nihña jain hacutjin xi vitexa me ne, hya matsejen xi nihmutacun jain me. Sa cuatjin ne, hyan ta tjin tangun cjuatacun naja cojo me. <sup>6</sup> Sa xi cuinújan xi tjin tangun cjuatacun naja cojo me ne, meje rë xi nechan ngajñi rë cjuandaja sacuatjin cavejña Jesucristu.

*Cjuatacun xatsë*

<sup>7</sup> Cjua xi titsihindu nuju vihi tsan ne, hacuiin ngu cjuatacun xatsë xi sehe tivitéxa nuju xi nihmutacun xingueen ta, ha hacui ni cjuatacun xi cavitéxa nuju hya xi tjun tjun camacjain nuju. <sup>8</sup> Peru cjuatacun xi titsihindu nuju vihi ne, cuma cuinújan xi sacuaha ngu cjuatacun xatsë ta, hiscan xi ha cavechu cjuatacun jan ne, tivetsihin tisahmi xuta cjuandaja. Hane vëhë sahmi xi tivetsihin tifë cjuatsehen xi tjercu tjin ngasunhdë. Jesucristu ne, casahmi jain me yějë ni hacutjin xi vitexa cjuatacun xatsë vihi, hacuaha ngayujun ni ne, tinihñu hacutjin vitexa cjuatacun xatsë jan. <sup>9</sup> Sa xi cuinújan xi nechan ngajñi rë cjuandaja, hya xi choho hyan xingueen ne, quixiin xi nújan ta nechancuaan ngajñi rë cjuatsehen. <sup>10</sup> Peru sa xi hmutacun xingueen ne, cuatjin matsejen xi nechan ngajñi rë cjuandaja. Hane tsajin mé nihña xi sahmi xi cuixuya xingueen ngajñi rë cjuatsehen jan. <sup>11</sup> Peru sa xi choho hyan xingueen ne, nechan ngajñi rë cjuatsehen, hacuaha sacuiyiin naja hacutjin ndatjin nihña ta tsëhë xi cjuatsehen xi tinihña ne, sahmi jñu tsajan.

<sup>12</sup> Ngayujun ni tsan ne, tsihindu nuju ta, jyë nuju ne, ha camanchataha ngatsë rë Jesucristu. <sup>13</sup> Ngayujun ni xi xuta changá yun ne, tsihindu nuju ta, tsëhë xi ha hyun me xi ha tacun hisca xi casahasen ngasunhdë. Hane ngayujun ni xi cjëë cuma changá yun ne, hacuaha tsihindu nuju ta ha cacaa nuju cojo xitsehen má titjun.

<sup>14</sup> Ngayujun ni tsan ne, tsihindu nuju ta ha hyun Nina Nahmi naja. Ngayujun ni xi xuta changá yun ne, tsihindu nuju ta ha hyun me xi ha tacun hisca xi casahasen ngasunhdë. Hane ngayujun ni xi hacuiin changá yun ne, hacuaha tsihindu nuju ta nechun nguñajatacún xi macjain nuju cjua rë Nina, cjua xi quichuhun cahntsua xahasen nuju, hacuaha cacaa nuju cojo xitsehen ma titjun.

<sup>15</sup> Mijí rë xi chuya naja cjuatacun xi tjin ngasunhdë ta, sa xi chuya naja ne, cumaji nihmutacun Nina Nahmi naja. <sup>16</sup> Cuatjin ta, tsëhë xi yëjë ni cjuatacun xi tjin ngasunhdë vihi, sacuaha cjuatacun tsehen xi ningatahantacun, sacuaha cjuatacun xi tjercu meje naja yëjë ni xcusun xi chutsejen, sacuaha cjuatacun xi tjercu nihña yehe yojo naja ne, yëjë ni cjuatacun xi cuacun vëhë ne, hacuiin nduva tsëhë Nina Nahmi naja ta nduva tsëhë suvá ngasunhdë vihi. <sup>17</sup> Hane xcusun rë ngasunhdë vihi ne, cojo yëjë ni cjuatacun xi tjercu chuya rë xuta ne, cjuëya. Peru xuta xi sahmi jain me hacutjin meje rë Nina ne, me vëhë ne, tsajin nu tsajin nixtin cjuëya me.

### *Cjuaquixi cojo cjuandesu*

<sup>18</sup> Ngayujun ni tsan ne, ha tijima tiña nixtin xi cjuë ngasunhdë. Ha canuhyun ta cuinduva xu ngu cha xi sahmi condra tsëhë Cristu. Peru quihndë ne, tjemu cjín xuta xi ha tijimatsejen xi condra tsëhë Cristu me. Hane vëhë xi ha hyin ta cama tiña nixtin xi cjuë ngasunhdë. <sup>19</sup> Xuta xi cuacun jan ne, cavetjuxin me tsajan. Peru hatuxa hacuiin ladu naja me ta, sa xi quixi xi ladu naja me ne, caviyuju me ngajñi naja. Peru cavetjuxin me tsajan, cojo sa xi cuma tsejen ta hacuiin ladu naja me.

<sup>20</sup> Ngayujun ni ne, casua nuju Jesucristu Hasen xi tsëhë Nina. Vëhë xi vijnercun cjua xi cjuaquixi. <sup>21</sup> Hacuiin tsingátahacacun xi vijniircun cjua xi cjuaquixi ta ha hvë xi vijnercun. Hacuaha hyun ta cjuandacha ne, hatuxa sacuiin naja ngajñi rë cjua xi cjuaquixi. Vëhë xi cuitjin tsihindu nuju cjua vihi.

<sup>22</sup> Tjin xuta xi chja xi Jesús ne, hacuiin Cristu me, hacuiin me xi cavaxijin Nina xi cuaxëtje naja. Hane xuta xi cuatjin chja me ne, hatuxa tjemu ndacha me. Hacuaha xuta xi tsitjungui me Nahmi naja xi tacun ngahnga cojo Quihndi rë ne, me vëhë xi sahmi condra tsëhë Cristu. <sup>23</sup> Yëjë ni xuta xi tsitjungui Quihndi rë Nina jan ne, tsajin tjin tangun cjuatacun rë me cojo Nahmi rë Quihndi jan. Peru xuta xi macjain rë Quihndi jan ne, hacuaha tjin tangun cjuatacun rë me cojo Nahmi jan.

<sup>24</sup> Ninguitsjun yëjë ni cjua xi canuhyun hisca nixtin haya xi tjun tjun camacjain nuju. Sa xi quichuhun cjua jan cahntsua xahasen nuju ne, hacuatjin tjin tangun cjuatacun nuju cojo



Quihndi cojo Nahmi rë. <sup>25</sup> Hacuaha cachja Cristu xi sua naja me ngu cjuahñu xatsë.

<sup>26</sup> Cuitjin tsihindu nuju ta, tsëhë xi tjin xuta xi meje cuindacha nuju me. <sup>27</sup> Peru ngayun ne, Hasen xi tsëhë Nina xi casua Cristu ngayun ne, quichuhun cahntsua xahasen nuju. Vëhë xi hacuiin sahmi ngujoyë xi cuinduva xuta cuicuya nuju me ta, tsëhë xi Hasen xi casua me jan ne, tivicuya nuju yëjë ni cjua. Hane cjua xi tivicuya nuju ne, hatuxa cjuaquixi, hacuiin cjuandacha. Quihndë ne, cuatjin tangunndujun cojo xi ha macjain nuju Jesucristu, sacuatjin xi ha cavicuya nuju Hasen xi tsëhë Nina jan.

<sup>28</sup> Quihndë tsan ne, cúa cuichjá cojo nuju ta tangun nduju cojo xi ha macjain nuju Jesucristu, sehe ngajan xi nixtin xi cuinduva nga me ne, ngayaan ne, hacuiin rcun cuma, hacuaha hacuiin tsisava naja me. <sup>29</sup> Ha hyan ta Cristu ne, hatuxa tyjahi me. Vëhë xi cumangutacun ta yëjë ni xuta ndaja xuta tyjahi ne, me vëhë xi ha camá me quihndi rë Nina.

### 3

*Me xi tsin ngatsë rë Hasen rë Nina ne, sacu rë me cjuahñu xatsë*

<sup>1</sup> Tjercu tsihmucacun naja Nina Nahmi naja. Hisca chja me xi quihndi rë me ngayaan. Peru hacuiin tu suvá chja ni me ta cjuaquixi jain xi quihndi rë me ngayaan. Peru xuta tsehen ne, hvíin me xi quihndi rë Nina ngayaan ta, tsëhë xi hacuiin xuta rë Nina me. <sup>2</sup> Ngayaan tsan ne, quihndë ne, quihndi rë Nina ngayaan. Peru cjëë cumachaya naja mé xcusun xuta cuma ngayaan xi cuma ngascan. Peru ha hyan ta, hya xi cuinduva Cristu ne, cuma ngayaan sacuaha me vëhë ta, tsëhë xi hya ne, chan jain me hacutjin xi jyihi me. <sup>3</sup> Yëjë ni xuta xi tivetahacacun me Cristu ne, sahmi tyjahi suvá me xahasen rë me, sacuatjin tyjahi xahasen rë Cristu.

<sup>4</sup> Peru yëjë ni xuta xi hinchajñi ngajñi rë cjuatsehen ne, hatuxa hndiin me tsëhë cjua xi cavitexa Nina. Ta xi hacuiin nuhyaan tsëhë cjua xi cavitexa Nina ne, vëhë xi hmí cjuatsehen. <sup>5</sup> Peru ha hyun ta Cristu ne, canduva me nguehe ngasunhdë, xi cjuahaxin me yëjë ni jyë naja. Hane me vëhë ne, hatuxa tsajin camahani jyë rë me. <sup>6</sup> Vëhë xi yëjë ni xuta xi cjui nduju me cojo xi macjain rë me Jesucristu ne, ha quihndë tsajin hinchajñi me ngajñi rë cjuatsehen. Peru yëjë ni xuta xi hinchajñi cuaha me ngajñi rë cjuatsehen ne, me vëhë xi hatuxa cavijniircu me hacutjin cjuatacun rë Jesucristu, hacuaha hacuiin xuta rë Jesucristu me.

<sup>7</sup> Ngayujun ni tsan ne, nechun cuidadu xi tsajin yo cuindacha nuju. Xuta xi hatuxa hinchajñi me ngajñi rë cjuandaja

ne, me vëhë xi tyjahi xahasen rë me, sacuatjin tyjahi xahasen rë Cristu. <sup>8</sup> Peru xuta xi hatuxa hinchajñi me ngajñi rë cjuatsehen ne, tsëhë xitsehen matitjun me ta, tsëhë xi xitsehen matitjun jan ne, hatuxa hisca ntsacu cavetsihin ne, sahmi cjuatsehen. Vëhë xi canduva Quihndi rë Nina ta, tsëhë xi meje tsicjëya me yëjë ni cjuatsehen xi sahmi xitsehen matitjun jan.

<sup>9</sup> Xuta xi camá me quihndi rë Nina ne, tsajin hinchajñi me ngajñi rë cjuatsehen ta, tsëhë xi yaha me cjuatacun rë Nina. Hatuxa cumaji xinchajñi me ngajñi rë cjuatsehen ta, tsëhë xi quihndi rë Nina me. <sup>10</sup> Suvá tsejen yo xi quihndi rë Nina, hacuaha suvá tsejen yo xi quihndi rë xitsehen. Ta tu yo ni xi tsajin hinchajñi ngajñi rë cjuandaja, tu yo ni xi tsihmaaicacun xicjin ne, hacuiin quihndi rë Nina.

### *Nihmu tacun xinguen xingu xingu yaan*

<sup>11</sup> Cjua rë Nina xi canuhyun hisca ntsacu cavetsihin ne, cuitjin chja: meje rë xi nihmutacun xingueen. <sup>12</sup> Mijí rë xi nihña sacuatjin casahmi cha Caín ta cha vëhë ne, quihndi rë xitsehen cha, hacuaha catsiquehen cha hntsë cha. Peru ¿há hyun mé ngatsë rë xi cuatjin catsiquehen cha hntsë cha ni? Catsiquehen cha hntsë cha ngatsë rë cjuaxin ta, tsëhë xi yëjë ni xi casahmi cha ne, hatuxa suvá cjuatsehen, hane xi casahmi hntsë cha ne, hatuxa suvá cjuandaja.

<sup>13</sup> Vëhë xi hacuiin cjuercun nuju tsan, hya xi choho scuëë nuju xuta tsehen. <sup>14</sup> Ngayaan ne, nihmutacun xingueen. Hane cuatjin matsejen xi ha cavetjunxen tsëhë ngajñi rë cjuatsehen, caviseen ndiya rë cjuandaja. Peru yo xi tsihmaaicacun xicjin ne, hinchu cuaha ngajñi rë cjuatsehen. <sup>15</sup> Yëjë ni xuta xi choho vëë xicjin ne, tangun me cojo xuta xi tsiquehen xicjin. Hane ha hyun ta, yëjë ni xuta xi tsiquehen xicjin ne, tsajin rë me cjuahña xatsë. <sup>16</sup> Cristu ne, ngatsë rë xi tsihmuacacun naja me ne, johu ni rë me xi catsiquehen xuta me. Cuatjin camatsejen xi hmí cjuahmutacun. Hane hacuatjin ngayaan ne, meje rë xi ningatehen xi tsiquehen naja xuta, sa xi cuatjin mameje rë, ngatsë rë xi nihmutacun xingueen. <sup>17</sup> Ngayaan xi tjin chinë tjin hyun ne, sa xi tsajin naja cjuayumatacun hya xi ma chaya naja xi tjin ngu xingueen xi tsajin mé sinë me tsajin mé cuihi me ne, cuatjin matsejen ta tsajin camahani cjuahmutacun rë Nina cahntsua xahasen naja. <sup>18</sup> Mijí rë xi tu cuinújan ni xi nihmutacun xingueen tsan ta meje rë xi nihña cjuandaja, cojo sa xi cumatsejen xi tjin jain naja cjuahmutacun cojo xingueen.

<sup>19</sup> Sa xi cuatjin nihña ne, vëhë matsejen xi tsëhë Nina xi cjuaquixi jain ngayaan, hacuaha vëhë xi cumangutacun tu ya ni ni hya xi chjahyan rë me cjuandaja rë me. <sup>20</sup> Hane ha ndasa xahasen naja cuinchajyë naja xcun Nina xi choho nihña ne,

peru mijí rë xi cumacjintacun ta, tsëhë xi Nina ne, hitsë sa jyë me cojo cjuatacun rë me xi cumá rë xahasen naja ta, tsëhë xi me vëhë ne, vëë me yëjë ni cjuatacun. <sup>21</sup> Ngajan xi sa xi tsajin mé cuinchajyë naja xahasen naja ne, hacuiin cumacjintacun hya xi chjahyan rë me cjuandaja rë me. <sup>22</sup> Hane me vehe ne, sua naja me yëjë ni xi chjahyan rë me ta, tsëhë xi tinihña yëjë ni hacutjin xi cavitexa me, hacuaha tsëhë xi yëjë ni xi chuya rë me ne, cuatjin tinihña. <sup>23</sup> Cjua xi cavitexa naja Nina ne, cuitjin chja: meje rë me xi catamacjain naja Jesucristu, Quihndí rë me, hacuaha meje rë me xi nihmutacun xingueen. Cuatjin cavitexa me. <sup>24</sup> Hane yëjë ni xuta xi vihndë cjua xi cavitexa Nina ne, tjin tangun cjuatacun rë me cojo Nina, hacuaha Nina ne, jiya cahntsua xahasen rë me. Ngayaan ne, hyan xi jiya Nina cahntsua xahasen naja ta, tsëhë xi casua naja me Hasen rë me.

## 4

### *Chuva rë profeta ndacha*

<sup>1</sup> Ngayujun ni tsan ne, mijí rë xi ngutjen cumacjain nuju tsëhë yëjë ni cjuatacun xi cuichja xuta cojo nuju ta titjun chjuhunchuvun cjuatacun jan, ¿há ma tangun cojo cjuatacun rë Nina? Cuatjin meje rë ta, tsëhë xi ngasunhndë ne, tjemu cjin xuta xi tivindacha me. Chja suvá me ta cjuatacun xi vicuya me ne, cjuatacun rë Nina, peru quixiin vë. <sup>2</sup> Peru sa xi ngu xuta cuichja quixi me ta Jesucristu ne, camá me ngu xuta ngasunhndë vihi ne, cumangutacún ta, ngajan matsejen xi me vëhë ne, chja jain me cjuatacun rë Nina. <sup>3</sup> Peru xuta xi hacuiin cuatjin chja quixi tsëhë Jesús ne, hatuxa tsajin camahani rë me cjuatacun rë Nina ta tjin rë me cjuatacun tsëhë xuta xi sahmi condra tsëhë Cristu. Ha canuhyun ta hatuxa cuechu nixtin xi cjuehe ngu cjuatacun xi sahmi condra tsëhë Cristu, peru cuichjá cojo nuju ta cjuatacun vëhë ne, ha hisca hinchajñi ngajñi naja nguehe ngasunhndë. <sup>4</sup> Ngayujun ni tsan ne, tjin tangun cjuatacun nuju cojo Nina. Vëhë xi cacaa nuju xi camacjaain nuju tsëhë xuta ndacha xi cuacun jan. Camá cacaa nuju cuatjin ta, tsëhë xi Nina xi jiya xahasen nuju ne, hitsë sa jyë me xi cuma rë xitsehen matitjun xi jiya xahasen rë xuta xi macjaain rë Jesucristu. <sup>5</sup> Xuta ndacha xi cuacun jan ne, hatuxa tjin rë me cjuatacun rë xuta xi macjaain rë Jesucristu. Vëhë xi cjuatacun xi vicuya me ne, cjuatacun rë xuta xi macjaain rë Jesucristu, hacuaha yëjë ni xuta xi macjaain rë Jesucristu ne, vetaharcu me cjua jan. <sup>6</sup> Peru ngayaan ne, tjin tangun cjuatacun naja cojo Nina. Yëjë ni xuta xi hacuaha tjin tangun cjuatacun rë me cojo Nina ne, vetaharcu me cjua xi vicuyan. Peru yëjë ni xuta xi tsajin tjin

tangun cjuatacun rë me cojo Nina ne, vetaharcuaain me cjua xi vicuyan. Cuatjin xi ma sacuse naja yo xi chja cjuaquixi ne, o yo xi vindacha.

*Xuta xi tsëhë Nina ne, hacuaha tjin rë me cjuahmutacun xi nduva tsëhë Nina*

<sup>7</sup> Meje rë xi nihmutacun xingueen tsan ta, yëjë ni cjuahmutacun ne, hatuxa nduva tsëhë Nina. Yëjë ni xuta xi tjin rë me cjuahmutacun ne, quihndi rë Nina me, hacuaha amigu rë Nina me. <sup>8</sup> Peru me xi hacuiin tsihmucacun xicjin ne, hacuiin amigu rë Nina me ta, Nina ne, hatuxa tjin rë me cjuahmutacun. <sup>9</sup> Nina ne, ngu tutu ni Quihndi xi tjin rë me. Hane ngayaan ne, hyan ta Nina ne, tjin rë me cjuahmutacun cojo naja, tsëhë xi catsingatju me Quihndi rë me nguehe ngasunhndë. Cuatjin catsingatju me Quihndi rë me, cojo sa xi sacú naja cjuahñu xatsë ngatsë rë Quihndi jan. <sup>10</sup> Ngayaan ne, nihmutacun Nina. Peru Nina ne, hitsë sa tsihmucacun naja me. Vëhë xi hisca catsingatju me Quihndi rë me xi cuechjitje ngatsë rë yëjë ni jyë naja.

<sup>11</sup> Hane tsëhë xi cuatjin catsihmucacun naja Nina tsan ne, vëhë xi hacuaha meje rë xi nihmutacun xingueen. <sup>12</sup> Nina ne, hatuxa tsajin yo xi cavëë rë me. Peru sa xi nihmutacun xingueen ne, Nina ne, jiya me cahntsua xahasen naja, hane cuatjin matsejen xi tjin jain naja sacuaha cjuahmutacun xi tjin rë Nina.

<sup>13</sup> Ngayaan ne, hyan ta tjin tangun cjuatacun naja cojo Nina hacuaha hyan ta jiya me cahntsua xahasen naja, tsëhë xi casua naja me Hasen rë me. <sup>14</sup> Hane ngayin ne, cahyin jain cojo tuxcuin Quihndi rë Nina. Vëhë xi tinújin cojo cjuaquixi ta Nina Nahmi naja ne, catsingatju me Quihndi rë me, xi cuaxëtje rë xuta ngasunhndë. <sup>15</sup> Tu yo ni xi chja cjuaquixi xi Jesús ne, Quihndi rë Nina jain me ne, me vëhë ne, jiya Nina cahntsua xahasen rë, hacuaha tjin tangun cjuatacun rë cojo Nina. <sup>16</sup> Ngayaan ne, macjain naja hacuaha ha hyan ta Nina ne, hmucacun jain me ngayaan. Nina ne, hatuxa tjin rë me cjuahmutacun. Hane xuta xi tjin rë cjuahmutacun ne, tjin tangun cjuatacun rë me cojo Nina, hacuaha Nina ne, jiya cahntsua xahasen rë me. <sup>17</sup> Hane hya xi cumachihin cjuahmutacun xi tjin naja ne, ngajan xi hacuiin rcun cuma, hya xi cuechutaha nixtin xi tsichuva naja Nina. Cuatjin ta, tsëhë xi nguehe ngasunhndë ne, hacuaha quihndi rë Nina ngayaan sacuatjin rë Jesucristu, xi Quihndi rë Nina me. <sup>18</sup> Hiscan xi tjin cjuahmutacun ne, tsajin mé chircun hinchajñi ta hya xi ha tjin chihin cjuahmutacun xi tjin naja ne, hisca hitsë ne, tsajin rcun cuma. Sa xi ningatahantacun xi Nina sahmi naja me castigu ne, vëhë xi rcun cuma. Peru sa xi cuatjin rcun

cuma ne, ngajan matsejen xi tsajin tjin chihin cjuahmutacun xi tjin naja.

<sup>19</sup> Ngayaan ne, tjin naja cjuahmutacun ta, tséhë xi Nina ne, tjun me catsihmucacun naja me. <sup>20</sup> Peru sa xi nújan xi nihmutacun Nina, hane choho hyan xingueen ne, tu vindachan ni xi nújan. Cuatjin ta, tséhë xi sa xi hacuiin nihmutacun xingueen xi tsejen naja cojo tuxcun ne, hacuaha cumaji nihmutacun Nina xi cjëë camahani chaan me. <sup>21</sup> Nina ne, cavitexa naja me cjua vihi: yo xi tjin rë cjuahmutacun cojo Nina ne, hacuaha meje rë xi tjin rë cjuahmutacun cojo xicjin.

## 5

### *Me xi má hya xi macjain naja Jesucristu*

<sup>1</sup> Jesús ne, hacui me xi Cristu, me xi cavaxijin Nina xi cuaxëtje naja. Hane ngayejen ni xi cuatjin macjain naja tséhë cjua vëhé ne, quihndi rë Nina ngayaan. Yëjë ni xuta xi tsihmucacun me xi má xutacha rë ngu quihndi ne, hacuaha cojo quihndi jan tsihmucacun me. <sup>2</sup> Sa xi nihmutacun jain Nina hacuaha nihña sacuatjin xi cavitexa me ne, ngajan matsejen xi tjin naja cjuahmutacun cojo yëjë ni xuta xi quihndi rë Nina me. <sup>3</sup> Hacuaha sa xi chjahanrcun jain yëjë ni cjua xi cavitexa Nina ne, ngajan matsejen xi nihmutacun jain me. Hane yëjë ni cjua xi cavitexa me ne, hacuiin jercu chja xi nihña ta, <sup>4</sup> tséhë xi yëjë ni xuta xi quihndi rë Nina ne, scaa rë me cojo yëjë ni cjuatsehen xi tjin nguehe ngasunhndë. Cuatjin caa naja cojo cjuatsehen jan ta, tséhë xi macjain naja Jesucristu. <sup>5</sup> Hane suvá ni xuta xi macjain rë tséhë Jesús xi Quihndi rë Nina jain me ne, me vëhé xi caa rë me cojo yëjë ni cjuatsehen xi tjin ngasunhndë.

*Hasen rë Nina ne, tsinguixi xi Jesús ne, hacui Quihndi rë Nina me*

<sup>6</sup> Hya xi canduva Jesucristu ne, camatsejen xi Quihndi rë Nina me nixtin xi cojo nandá caxtenda me cojo nixtin xi cavixu jni rë me hya xi cahme me. Peru hacuiin suvá ni nixtin xi caxtenda ni me ta cojo nixtin xi cahme me ne, hya camatsejen xi Quihndi rë Nina me. Hasen xi tséhë Nina ne, cuatjin tisua naja cjuaquixi ta, tséhë xi Hasen jan ne, hatuxa cjuaquixi xi chja. <sup>7</sup> Siu jyan xcusun xi tisua machaya naja ta Jesús ne, Quihndi rë Nina jain me. <sup>8</sup> Ngu ne, cuatjin chja quixi Hasen xi tséhë Nina. Ma jo ne, cuatjin camatsejen hya xi caxtenda Jesús. Ma jyan ne, hacuaha cuatjin cama tsejen hya xi cahme me. Hane catsijyan xcusun xi cuacun jan ne, tjin rë ngu ni cjuatacun. <sup>9</sup> Ngayaan ne, macjain naja tséhë cjua xi chja xuta cojo naja. Peru hitsë sa vengui chjí rë cjua xi chja Nina. Hane Nina ne, casua me camachaya naja yo

xi Quihndi rë me. <sup>10</sup> Xuta xi macjain rë me tsëhë Quihndi rë Nina ne, hatuxa vëë me cojo cjuatacun rë me ta quixi jain cjua xi cachja Nina. Xuta xi macjaain rë me tsëhë cjua xi cachja Nina ne, sacuaaha xi cuichja me xi Nina ne, jemu ndacha me. Cuatjin chja me tsëhë Nina ta, tsëhë xi macjaain rë me tsëhë cjua xi cachja quixi Nina, yo xi Quihndi rë me. <sup>11</sup> Hane Nina ne, cachja cjuahñu xatsë jan ngatsë rë Quihndi rë me. <sup>12</sup> Xuta xi tjin tangun cjuatacun rë me cojo Quihndi jan ne, tjin rë me cjuahñu xatsë vëhë. Peru xuta xi tsajin tjin tangun cjuatacun rë me cojo Quihndi rë Nina jan ne, hacuaha tsajin rë me cjuahñu xatsë jan.

*Conseju xi sua Juan xi cajnetaha*

<sup>13</sup> Vëhë xi cuitjin titsihindu nuju ngayujun ni xi macjain nuju tsëhë Quihndi rë Nina. Titsihindu nuju yëjë ni cjua vihi, cojo sa xi cumangutacun ta quixi xi tjin jain nuju ngu cjuahñu xatsë xi tsajin nu tsajin nixtin xi cjuë. <sup>14</sup> Ngayaan ne, mangutacun jain cojo Nina ta, tsëhë xi ha hyan ta sa xi tjin tangun cjuatacun naja cojo rë me hora xi tichjahyan rë me ne, cuihndë me xi cuinújan. <sup>15</sup> Hane tsëhë xi hyan ta vihndë me yëjë ni cjua xi nújan cojo rë me ne, vëhë xi hacuaha hyan ta sacú naja xi cachjahyan rë me.

<sup>16</sup> Yo ngayaan xi chutsejen xi tivixuya ngu xingueen ngajñi rë ngu cjuatsehen xi cuma cumanchataha ne, meje rë xi cuinújanyumatahan tsëhë me, hane cuatjin sacú rë me cjuahñu xatsë. Peru tjin cjuatsehen xi cumaji cumanchataha. Hane hacuiin tichjá cojo nuju xi cuinújunyumuntuhun tsëhë xuta xi tjin rë me jyë vëhë. <sup>17</sup> Yëjë ni cjuatsehen ne, Nina ne, chja me ta hatuxa jyë hmí rë. Peru tjin cjuatsehen xi cuma cumanchataha.

<sup>18</sup> Ngayaan ne, hyan ta yëjë ni xuta xi cjuaquixi xi quihndi rë Nina me ne, hatuxa tsajin hinchajñi me ngajñi rë cjuatsehen. Cuatjin ta, tsëhë xi Quihndi rë Nina ne, sahmi rë me cuidadu, hane xitsehen matitjun ne, cumaji mé sahmi cojo rë me.

<sup>19</sup> Ngayaan ne, ha hyan ta tsëhë Nina ngayaan. Hane yëjë sa xuta xi yahnga ne, tsëhë xitsehen má titjun me.

<sup>20</sup> Ngayaan ne, hacuaha hyan ta ha canduva Quihndi rë Nina. Hacuaha casua naja me cjuatacun, cojo sa xi cuijnercun yo xi Nina xi hatuxa cjuaquixi. Tjin tangun cjuatacun naja cojo me xi hatuxa cjuaquixi ta, tsëhë xi tjin tangun cjuatacun naja cojo Jesucristu, Quihndi rë me. Me vëhë xi Nina xi hatuxa cjuaquixi, hacuaha me vëhë xi sua naja cjuahñu xatsë xi tsajin nu tsajin nixtin xi cjuë.

<sup>21</sup> Ngayujun ni tsan ne, mijí camahani rë xi chjuhuncun nina xi hacuiin cjuaquixi.

## Xujun má jo, xi catsihindu San Juan

### *Cjuaquixi cojo cjuahmutacun*

<sup>1</sup> Ngahan, ngu xuta changá matitjun tséhë yungun ne, tsihindu nuju ngayun, ngu chjuun xi cavaxijin Nina. Hacuaha cojo yějë ni quihndi nuju ne, tsingátju nuju ngayujun ni ngu nina naha ta, tséhë xi tjemu hmú cáacun nuju cojo nguñaja cjuaquixi. Peru hacuiin tu suva ni ngahan ta yějë ni me xi vëë jain me cjua xi hatuxa cjuaquixi ne, hacuaha tsihmucacun nuju me. <sup>2</sup> Cuatjin nihmitacuin nuju, ngatsë rë cjuaquixi xi ha siu cahndë ngajñi rë cjuatacun naja. Hane cjuaquixi xi cuacun jan ne, tsajin nu tsajin nixtin xi cuetjuxin tsajan. <sup>3</sup> Nina nahmi naja cojo Jesucristu Quihndi rë me ne, hatuxa sua naja me cjuandaja cjuajeya cojo cjuayumatacun, cuatjin xi ma vanguen tjenguen cjua xi cjuaquixi, hacuaha ma nihmutacun jain xingueen.

### *Cuanguennduju cojo cjuachacun rë Cristu*

<sup>4</sup> Tjemu ndaja camá rë xahasen naha ta, tséhë xi cavécutaha ngu jo quihndi nuju xi hatuxa hinchajñi me ngajñi rë cjuaquixi, sacuahatjin Nina Nahmi naja cavitexa naja me. <sup>5</sup> Quihndë ne, nguehe cuichjá cojo nuju tsan ta meje rë xi ngayejen ni ne, nihmutacun xingueen. Hane cjua vihi xi tichjá cojo nuju ne, hacuiin ngu cjua xatsë xi sehe cavitexa naja Nina ta cjua vihi ne, hacui xi tacun hisca hya xi sehe cavetseen camacjain naja cjua rë Nina. <sup>6</sup> Hane sa xi nihña jain yějë ni cjua xi cavitexa naja Nina ne, ngajan matsejen xi tjin jain naja cjuahmutacun. Hane cjua xi cavitexa Nina ne, hacui vihi: meje rë xi nihmutacun xingueen. Hacuaha hacui cjua vëhë xi camachaya nuju hisca hya xi sehe cavetsuhun camacjain nuju cjua rë Nina.

### *Cjua xi tanguiin cojo cjua rë Nina ne, má cjua ndacha*

<sup>7</sup> Cuatjin chjá cojo nuju ta, tséhë xi ngasunhndë vihi ne, tjemu tjin xuta ndacha xi macjaain rë me xi Jesucristu ne, camá jain me ngu xuta ngasunhndë vihi. Xuta ndacha jan ne, hacui me xi vindacha, hacuaha hacui me xi má condra rë Cristu. <sup>8</sup> Tjin nuju cuidadu, sehe ngajan xi hacuiin nichayun cjuandaja xi canihñi ngajñi nuju. Cahndë rë vëhë ne, sacú nuju yějë ni cjuatjo xi sua nuju Nina.

<sup>9</sup> Yějë ni xuta xi vatjutaha me tséhë cjua xi cavicuya Cristu ne, tsajin tjin tangun cjuatacun rë me cojo Nina. Peru yějë ni xuta xi vetaharcu me suvá ni cjua xi cavicuya Cristu jan ne, me vëhë ne, tjin tangun cjuatacun rë me cojo Nina Nahmi

naja cojo Quihndi rē me. <sup>10</sup> Hya xi cjuehe ngu me xi cuichja xi vicuya me cjua rē Nina, peru sa xi cuicuyaaain me cjua xi cavicuya Cristu ne, xi catuun cahndě cuisehen me cuejña me ndya nuju. Hisca ngu nina cachjayunnguun tsēhē me ta, <sup>11</sup> sa xi cuatjin tuhun rē me nina ne, sacuaaha xi ma tangun yun cojo cjuatsehen xi sahmi me.

*Cjua xi vijnetaha*

<sup>12</sup> Tjemu cjin sa cjuavisiajmi xi meje cuichjá cojo nuju ngayujun ni. Peru tsihinduun sa nuju sacuahatjin xcun ngu xujun vihi ta, tsēhē xi hatuxa vejña xi cjuē tjēngē nuju, sehe cuinújan xcun cojo xcun, sehe ngajan xi tjemu ndaja cuma rē xahasen naja.

<sup>13</sup> Na tichjun, xi hacuaaha cavaxijin Nina na ne, tsingatju quihndi rē na ngu nina tsujun.



## Xujun ma jyan, xi catsihindu San Juan

*Juan sua suva me nina rë me*

<sup>1</sup> Ngahan, ngu xuta changá matitjun tsëhë yungun ne, tsihindu ri ngaye Gayo, ta ngaye ne, tjemu vinga ná ngaye, tjemu hmú cáacun ri cojo nguñaja cjuaquixi.

<sup>2</sup> Catisecoo ri Nina, tsan, xi cuma cuihin xcun cojo yëjë ni cjuandaja, hacuaha xi ndajyihi cjuahñu riji, sacuahatjin xi ha ndajyihi xahasen riji. <sup>3</sup> Tjemu ndaja camá rë xahasen naha ta, tsëhë xi jima ngu ndiya xi cafehe ngu ngu xingueen ne, tjemu ndaja cachja me tsiji. Ha tuxa chja me ta ngaye ne, nguñajatacuin hmi tjengui ndiya rë cjuaquixi. <sup>4</sup> Tjemu ndaja má camahani rë xahasen naha, hya xi machaya ná xi yëjë ni xingueen xi sacuaha quihndi naha ne, cjuí tjengui me ndiya rë cjuaquixi.

*Conseju xi cuma rë xinguen xi chja me cjua rë Nina*

<sup>5</sup> Tjemu ndaja tinihñi, tsan, xi cuatjin tivisecue rë jingu sa xingueen, hisca cojo sa xingueen xi hyiin yo jan ta, tsëhë xi cjin nandya nduva me. <sup>6</sup> Hane ngujo me xi cuacun vëhë ne, sehe cavuya cafehe nga me nguehe. Hane hya xi cama tangun ngayin yungun ne, cachja me cojo niji ngayijin ni xi tjemu tjin ri cjuahmutacun. Quihndë ne, tu jani hya ni xi cuatju nga me nandya riji ne, tjemu ndatjin xi cuisecue rë me, cojo sa xi tsajin mé xi sahmi chaja rë me xi cuetju me cjue me ndiya ta, tsëhë xi cuatjin chuya rë Nina xi nihña. <sup>7</sup> Cuatjin meje rë xi nihña ta, tsëhë xi xuta xi cuacun jan ne, cavetju quiiji me ngu nangui xi cuichja me cjua rë Jesucristu. Hane hisca ngu hñú ngu tē ne, faain me tsëhë xuta xi macjaain rë Nina. <sup>8</sup> Vëhë xi ngayaan ne, meje rë xi cuatjin cuisecoon rë me xi cuacun jan ta, tsëhë xi cuatjin ne, hacuaha cuisecoon rë cjua xi cjuaquixi.

*Diótrfes ne, choho chja cha tsëhë Juan*

<sup>9</sup> Ha catsihindu ngu xujun xi tsingátju rë xuta xi ma tangun ngajan yungun. Peru cha Diótrfes, xi tjemu meje sahmi tjun cha ngajñi rë me ne, handasa hacuaha xingueen cha, peru faharcuaain cha cjua xi nújin. <sup>10</sup> Vëhë xi hya xi cjuëhë ndyá ne, cuichjáyë cojo nuju ngayujun ni yëjë ni xcusun xi sahmi cha jan. Cuichjá quixë hacutjin choho chja cha tsijin. Hane manguaaincacun cha cojo xi choho chja ni cha ta hacuaha tsitjungui cha ngu ngu xingueen xi nduva jingu sa nandya. Hane hya xi yahnga me xi meje sahmi me cjuandaja

cojo xingueen xi cuacun nduva jan ne, mijí sua cha cahndě, hacuaha hisca mijí rě cha xi cuisehen nga me yungun.

<sup>11</sup> Xi canihñii cjuatsehen xi tisahmi yahnga xuta, tsan, ta tu tjin tisahmi xuta xi tisahmi cjuandaja ne, cuatjin meje rě xi nihñi. Xuta xi sahmi cjuandaja ne, tséhë Nina me. Peru xuta xi sahmi cjuatsehen ne, hacuiin amigu rě Nina me.

<sup>12</sup> Yějë ni xuta ne, ndaja chja me tséhë cha Demetrio. Hacuaha suvá tsejen xi sahmi jain cha sacuaha tjin vitexa Nina. Hisca ngayin ne, ndaja nújin tséhë cha. Hane ngaye ne, ha hye ta xi nújin ne, ha tuxa cjuaquixi.

### *Cjua xi vijnetaha*

<sup>13</sup> Tjemu tjin vasen sa xi meje cuichjá cojo ri, peru mijí cuichjá cojo ri sacuaha tjin xcun ngu xujun vihi. <sup>14</sup> Cahndě rě vėhë ne, tu tjenhñu ni ne, vejñá xi cjuë tjěngě ri, sehe cuisiajme xcun cojo xcun.

<sup>15</sup> Quihndě ne, tsingatju ngu nina tsiji, hacuaha yějë ni amigu riji ne, tsingatju me ngu nina tsiji. Nihñi favor ne, yějë ni amigu niji xi siutaha ndyá ne, tehe rě me ngu nina niji jima ngu jima ngu me.

## Carta tsëhë San Judas

*Judas ne, tichja me nina cojo yëjë ni xuta xi cavaxijin Nina*

<sup>1</sup> Ngahan Judas, xi mosu hndixahan rë Jesucristu, hacuaha xi hntsë cha Jacobo ne, tsihindu xujun vihi xi chutayun ngayujun ni xi cavaxijin nuju Nina Nahmi naja, tsëhë xi tjercu hmucacun me ngayun. Hane ngayujun ni xi camacjain nuju Jesucristu ne, Nina tisahmi cuidadu nuju me. <sup>2</sup> Yëjë ni cjuandaja cojo cjuajeya cojo cjuahmutacun tsëhë Nina ne, catamacjín sa ngajñi nuju.

*Xuta xi vicuya cjuandacha*

<sup>3</sup> Ngayujun ni tsan ne, casahme xati cacun xi tsihindu nuju tsëhë cjuandaja rë Nina xi cuaxëtje naja. Peru quihndë ne, hacuaha sahmi ngujoyë xi tsihindu nuju, cojo sa xi cuichjá cojo nuju xi cuinújuntjun ngatsë rë cjuachacun xi ha casua Nina ngayaan xi macjain naja me. <sup>4</sup> Tsëhë xi tjin xuta xi cavindacha xi caxinchajñi me ngajñi nuju. Peru hatsëë nixtin ne, camahindu xcun xujun rë Nina tsëhë castigu xi cuatju me cuma. Hatuxa xuta tsehen me, xi handasa tsejen sacuaha xi tjin rë me cjuandaja rë Nina naja ne, peru vatjutaha me yëjë ni cjuatsehen xi sahmi me, hacuaha tsitjungui me ngu ni Nai naja Jesucristu.

<sup>5</sup> Quihndë ne, handasa ha hyun cju vihi ne, cúa cuichjá cojo nuju hacutjin casahmi Nai naja. Ngu ne, xuta nangui Israel ne, handasa cavaxëtje Nai naja me tsëhë nangui Egipto ne, peru cama ngascan ne, ngajñi rë xuta nangui Israel jan ne, hacuaha casahmi me castigu xuta xi camacjain rë tsëhë me. <sup>6</sup> Ma jo ne, ángel xi caviyijin hiscan xi cachja Nai naja xi cuiyuju ta tu cavetjuxin tsëhë cahndë rë ne, cavinchahñu me hiscan jñu, hisca xi cuechutaha nixtin xi cuichja Nai naja mé castigu cuatju ángel jan cuma nu cjui nu nduva. <sup>7</sup> Hane xi ma jyan ne, xuta nandya xi hmí rë Sodoma cojo xuta nandya Gomorra cojo sa xuta xi siu tahndee rë jan ne, hacuanitjin ni cahndiin me tsëhë Nina. Tjercu casahmi me cjuatsehen xi tjin chjuunnahñu rë me. Hisca cavatjutaha sa me cjuatsehen ta ngajñi xihin ni me ne, casahmi me cjuatsehen sacuaha xi chjuunnahñu rë me xicjin me. Vëhë xi suvá sa cahndë rë nandya xi cuacun vëhë ne, siu cuaha xi ninguitsjen tsëhë castigu xi cavatju camá, xi cafë catí cojo ndihi rë Nina.

<sup>8</sup> Hacuanitjin ni tisahmi xuta tsehen xi hinchajñi ngajñi nuju jan ta, ngajñi rë cjuatacun rë me ne, tichja cojo rë me xi catisahmi me cjuatsehen jan, xi sahmi me cju xi vitexa Nai naja, hacuaha xi choho catichja me tsëhë ángel xi siu cojo

Nina. <sup>9</sup> Peru suvá ángel matitjun xi hmí Miguel ne, hya xi ticjanya cojo xitsehen matitjun yojo rë Moisés ne, cavetjiincacun xi choho cuichja cojo xitsehen jan ta tu cuinitjin cachja: “Nina catichjataha me ngaye.” <sup>10</sup> Peru xuta tsehen xi cuacun vë ne, choho chja me tséhë yějë ni xcusun xi vijniircu me. Hane hitsë sa chu me xi cuma rë chu ta, handasa vëë me xi hmí rë cjuatsehen ne, hatuxa sahmi me. Hane cjuatsehen xi sahmi me jan ne, vëhë xi tsinguetsun rë cjuatacun rë me.

<sup>11</sup> Jemu choho cuatju me cuma, tséhë xi fi me ndiya tsehen sacuatjin quiji xutachanga naja Caín, sahmi me cjuatsehen ngatsë rë tujún xi jercu meje rë me sacuatjin casahmi cha Balaam, hacuaha cueya me sacuatjin cahme cha Coré, ngatsë rë xi meje cjuahaxin cha xutaxa rë. <sup>12</sup> Xuta tsehen xi cuacun jan ne, ngu cjuasava me hora xi tichinutangun tséhë cjuahmutacun xi tjin nuju cojo xingun ta, tséhë xi hisca jinë hisca hvi me cojo nguñaja ni cjuasua, peru fahacuendaain me yo xi cajinë yo xi cajinii ta tu tséhë suvá ni me fahacuenda me. Sacuaha yufí xi cavaain ta cavatjucjin xi cavaha rë tjo quiji ne, hacuaha cuatjin machjiriin me. Sacuaha ya xi machjiriin xi vaquiin tú rë nixtin rë ne, tjune ni rë hisca tyjama rë sehe xi ne, hacuaha cuatjin machjiriin me. <sup>13</sup> Machjiriin me sacuaha tsindyu rë ndachacun xi hisca xu jima xcun xi cjan rë ne, hacuaha cuanitjin ni hisca xu jima cjuasava ngajñi rë me. Machjiriin me sacuaha machjiriin niñú xi siutaha ngahnga xi vejñaai cahndë rë ne, hacuaha cuatjin machjiriin me. Hane castigu xi cuatju me cumá ne, xi tsajin nu tsajin nixtin xi cuma ndaya me tséhë hiscan xi tjercu tu jñu camahani.

<sup>14</sup> Hane ngu xutachanga niji xi hmí rë Enoc, xi quihndindaicjin rë Adán ne, hya xi cachja me ngu cjuaxi caveya Nina cjuatacun rë me xi cuma ne, hacuaha cachja me tséhë xuta tsehen xi cuacun vë, cuitjin cachja me: “Cahvë Nai naja xi nduva me ngajñi rë ángel rë me xi tjercu tu cjín camahani. <sup>15</sup> Nduva me xi cjuahachuva me ngayejen ni, sehe cuichja me mé castigu xi cuatju yějë ni xuta tsehen tséhë yějë ni cjuatsehen xi casahmi me, hacuaha tséhë yějë ni cjuaxi choho cachja xuta tsehen xi cuacun jan tséhë Nina.” <sup>16</sup> Xuta tsehen jan ne, hatuxa choho chja me tséhë yějë ni, hacuaha sahmi me tu cutjin xi macacun me. Sahmi yehe suvá me yojo rë me, hacuaha chja me cjuahaxi cojo xuta, tséhë xi meje rë me xi sahmi yehe xuta me.

### *Conseju xi sua Judas xuta xi macjain rë Nina*

<sup>17</sup> Peru ngayujun ni tsan ne, ninguitsjun cjuaxi ha cachja apóstol tséhë Nai naja Jesucristu, <sup>18</sup> xi cachja me cuitjin: “Hya xi ha jima tiña cuya Nai naja ne, hya tjin xuta xi cuejnucëë me tséhë yějë ni cjuandaja rë Nina, hacuaha sahmi me yějë ni

cjuatsehen xi cuetju tsëhë xahasen rë me.”<sup>19</sup> Xuta tsehen xi hinchajñi ngajñi nuju jan ne, vatëcja me ngajñi rë yëjë ni ngu cjuandaja xi cuma. Tsingatahacacun ni me xi sinë xi cuihi me, hane Hasen rë Nina ne, tsajin camahani rë me.

<sup>20</sup> Peru ngayujun ni tsan ne, sacuaaha cjua rë Nina xi ha camacjain nuju ne, nihñu ngujoyë xi catamacjain sa nuju. Tinújunyumu ha tu cutjin xi visecoo nuju Hasen rë Nina.  
<sup>21</sup> Nihñu cuidadu xi hacuiin nichayun cjuahmutacun rë Nina. Hacuaha tinechunyun rë nixtin xi Nai naja Jesucristu ne, cojo cjuandaja rë me ne, sua naja me cjuahñu naja xi tsajin nu tsajin nixtin xi cueyan.

<sup>22</sup> Xuta xi jo má cacun me tsëhë cjuandaja rë Nina ne, nújun cojo rë me ne, cojo sa xi hacuiin jo cuma cacun me.  
<sup>23</sup> Naxuntjun me sacuaaha ngu xuta xi naxentjen me xi ha ndiya cueti me. Hane yahnga me ne, tjin nuju cjuayumatacun cojo rë me, peru cojo cuidadu, xi satiin nuju jyë rë me.

### *Tsinguijnetaha Judas cjua*

<sup>24-25</sup> Ngu ni Nina xi vaxëtje naja ngatsë rë Nai naja Jesucristu ne, me vëhë xi cuma sahmi cuidadu me ngayun xi tsajin xtundiya yun ngajñi rë cjuatsehen, hacuaha cuiyuju me ngayun xcun me xi cun tyjahi tyjahi xahasen nuju ne, cojo yëjë ni cjuasua. Me vëhë xi tjin rë me yëjë ni ngu cjuandaja, hacuaha jyë me, hacuaha ma vitexa me, hacuaha ma sahmi me, hisca xi chaja sa xi cumandaja ngasunhndë, hisca quihndë, hacuaha hisca xi cuatju xi cjuë ngasunhndë. Cuatjin jain.

## Apocalipsis, cjuaxi sua cumachayana

*Cjuaxi tsëhë Jesucristu xi cafehecani chini rë Juan*

<sup>1</sup> Cjuaxi vihi ne, cjuaxi tsëhë Jesucristu xi casua Nina cojo sa xi tsingacun Jesucristu xuta ladu rë me xcusun xi hatuxa sahmi ngujoyë xi cuatjü. Cjuaxi jan ne, ngu ángel cafehecani ná, ngahan xi hmí ná Juan, ngu mosu hndixahan rë me. <sup>2</sup> Hane ngahan ne, tsinguixë ta cjuaquixi yëjë xcusun xi cahvë haya, xcusun tsëhë cjuaxi rë Nina cojo tsëhë cjuaquixi xi chja Jesucristu. <sup>3</sup> Jemu ndaja tsëhë me xi cuichjasun me cjuaxi rë xujun vihi, hacuaha jemu ndaja tsëhë me xi cuihndë me cuincha me xahasen rë me cjuaxi xi camahindu xcun xujun vihi, tsëhë xi ha camá tiña nixtin xi cuma chihin cjuaxi rë.

*Cjuaxi xi catsihindu Juan xi cafahatsja yatu yungun xi tjin ngajan Asia*

<sup>4</sup> Ngahan Juan ne, tsihindü cjuaxi vihi xi cjuahatsja yatu yungun xi tjin ngajan nangui Asia. Chjuhunntsun cjuandaja cjuajeya tsëhë Nina, me xi hacui, hacui ni me xi cavejña me hatsëë, hacuaha hacui ni me xi cuejña cuaha, hane cojo tsëhë Hasen rë me xi siu xcun me xi hacui sacuaha yatu hasen. <sup>5</sup> Hacuaha cojo tsëhë Jesucristu, me xi má testigu cjuaquixi, me xi tjun tjun cavuya cjuahñu tsëhë ngajñi rë nima, me xi hacuaha matitjun tsëhë yëjë ni xuta xi matitjun tsëhë ngasunhndë, hane me xi hmucacun naja hacuaha cavaxëtje naja tsëhë jyë naja haya xi cavanga jni rë me xi cahme me. <sup>6</sup> Hacuaha Jesucristu ne, casahmi me xi ngayaan ne, satë naja xi cuitexan ne, hacuaha cuma yaan sacuaha nahmi xi chjahancuendan Nina, Nina xi hacuaha má me nahmi rë me. Me vëhë ne, catimá jyë hnga me hacuaha catimá titjun me yëjë ni nu, yëjë ni nixtin. Cuatjin jain.

<sup>7</sup> ¡Nutsujun, ta cuinduva me cojo yufí! Hacuaha yëjë ni tuxcun ne, scuëë rë me. Hisca cojo me xi cahndiin tsëhë me ne, scuëë rë me. Hane yëjë xuta tsëhë jimangu tjë rë xuta ngasunhndë ne, cuatju me cjuandusin ngatsë rë me. ¡Cuatjin cumá! ¡Cuatjin jain!

<sup>8</sup> Cuitjin chja Nina: “Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin. Ngahan xi tejña, hane ngahan xi vijnetaha. Cavéjña hatsëë, hacuaha cuéjña cuaha. Yëjë ni má sahme.”

*Juan ne, cavutsejen me xi jyë hnga Jesucristu*

<sup>9</sup> Ngahan Juan ne, xingun má ngahan, tangun satë naja cjuañihi, tangun nechan ngahma gobiernu hacuaha tangun caa naja ngatsë rë xi mangutacun cojo Jesús. Ngahan cavitejñataha ngu nandya xi hmí rë Patmos xi vetjucaa tsëhë ndachacun. Ngajan tejñataha ngatsë rë xi cachjá cjuarë Nina cojo tsëhë cjuaquixi xi chja Jesús. <sup>10</sup> Hya xi camá ne, nixtin xi chjaharcun Nina ne, Hasen rë Nina ne, cavisehentë cjuatacun naha. Hora vëhë ni ne, tsëhë taha ngaxtun ne, cahndë ngu xta xi jemu hñu camahani nuhya rë, nuhya rë sacuaha xta rë tyjo <sup>11</sup> hane cuitjin cachja:

—Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Chjehe ngu xtë xujun ne, nihndi xcusun xi tichutsijin hane sehe ningatjin catahatsja xuta yungun xi siu yatu nandya Asia xi cuicun vi: Efeso, cojo Esmirna, cojo Pérgamo, cojo Tiatira, cojo Sardis, cojo Filadelfia cojo Laodicea. —Cuitjin cachja xta jan.

<sup>12</sup> Hya xi camá ne, cavuya xi scutséjen yo xi tichja cojo ná, peru xi tu cavuya ne, xi cahvë ni ne, yatu candeleru xi camá tsëhë oro. <sup>13</sup> Hane vasencja rë candeleru jan ne, jiyajñi ngu xihin xi tsejen sacuaha Quihndi rë Xuta Jain. Yaja me ngu tsjian tjin të ni xi vechu hisca ntsacu me, hane tjihñucja hiscan ndanisin rë me cojo ngu pañu nduju camá cojo nachjun tsëhë oro. <sup>14</sup> Hane rcu cojo tsjarcu me ne, tyava tsejen sacuaha tsejen tyava tsja rë chu tsánga o sacuaha tsejen hnchan xi vixu. Hane tuxcun me ne, tsejen sacuaha ndihi xi ña vitjen. <sup>15</sup> Ntsacu me ne, seti sacuaha quicha sine xi catsicjë ndihi xutsë rë; hane xta rë ne, nuhya rë sacuaha xta rë nandan xi tjemu hñu vanga. <sup>16</sup> Tsja xi ladu quixi ne, vahangui me yatu niñú. Hane tsëhë hntsua me ne, vetju ngu espada yuju xi vatë taha xcun cojo taha ngaxtun. Hane xcun ne, tsejen sacuaha tsuhi hya xi sua hasen cojo yëjë ni ngahñu rë.

<sup>17</sup> Ngajan xi ngahan ne, xi cahvë xcusun rë me ne, catícja taha ntsacu me sacuaha xi cahme ngahan. Ngajan xi cavisane me tsja me ladu quixi xcun yojo naha, sehe cachja me cojo ná cuitjin:

—Xi carcuin. Ngahan xi ntsacu vetsihin ne, hacui ni ngahan xi vijnetaha. <sup>18</sup> Ngahan, quicun ngahan. Cavéya, peru quihndë tacunntsa llavi tsëhë cjuaveya cojo tsëhë Hades, cahndë hiscan siu nima. <sup>19</sup> Hindë ngaye ne, nihindi xcusun xi cahye vi cojo xcusun xi tijima quihndë cojo xcusun xi sehe cumá. <sup>20</sup> Sacuaha yatu niñú xi cahye hntsa ladu quixi naha cojo yatu candeleru xi camá tsëhë oro jan ne, cuitjin vijne cjuatacun hma jan: yatu niñú jan ne, hacui ángel xi sua

cumachaya rë xuta rë yatu yungun jan cjua rë Nina, hane yatu candeleru jan ne, hacui yatu yungun jan.

## 2

### *Cjua xi cjuahatsja yungun ngajan nandya Efeso*

<sup>1</sup>Hindë nihindi cjua vi xi cjuahatsja ángel rë yungun ngajan nandya Efeso. Cuitjin nihindi: “Cjua vihi ne, cjua rë cha xi vahangui yatu niñú jan tsja ladu quixi cha hacuaha tsujyihya cha vasencja rë yatu candeleru jan xi camá tsëhë oro: <sup>2</sup>Ha ndaja hvë tsëhë xa nuju sacuaha cjuandaja xi nihñu, jemu chja tivatjun peru ticaa nuju titsangun nduju cojo. Hvë xi tuun rë xuta tsehen cahndé ta, nichuvun cjuatacun rë xuta xi vindacha me sacuaha xi má me apóstol. Hane camachaya nuju xi tu vindacha ni me. <sup>3</sup>Hacuaha titsangun nduju hacuaha ticaa nuju cojo cjuacjintacun xi tivatjun ngatsë rë xi veyunnangun ñihi naha, hacuaha machuvaain cjuatacun nuju ngajñi rë cjuacjintacun jan. <sup>4</sup>Peru cojo yëjë sa ne, tjin ná vihi condra nuju ta, hacuiin jemu nihmutacún ná sacuaha xi canihmutacún ná hya xi titjun camangutacún cojo ná. <sup>5</sup>Vëhë xi ninguitsjun hacutjin cavatjun hya xi tjin nuju cjuahmutacun vëhë, hane nindeyun cjuatacun nuju ne, cuyun nihñu nga xcusun sacuaha xi canihñu titjun. Cuatjin nihñu ta, sa tsajin ne, cuinduvá tjëngë nuju ne, cuaxëxen candeleru xi satë nuju tsëhë cahndé rë. <sup>6</sup>Peru hacuaha tjin sa nuju ngu xcusun xi ndaja tsujun ta, ndaja tsujun tsëhë xi choho hyun xcusun xi sahmi xuta xi tjengui me cjuachacun tsëhë Nicolás, ta cjuachacun jan ne, hacuaha cojo ngahan ne, choho hvë. <sup>7</sup>Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhuncun. Cuitjin chja: Yo xi scaa rë cjue xcun tsëhë cjuatsehen ne, suá rë cahndé xi sinë tuhaxi xi sua cjuahñu xi vaqui rë ya xi secun cahndé ndajyihi xi tsëhë Nina.”

### *Cjua xi cjuahatsja yungun ngajan nandya Esmirna*

<sup>8</sup>Hindë nihindi cjua vi xi cjuahatsja ángel rë yungun ngajan nandya Esmirna. Cuitjin nihindi: “Cjua vihi ne, cjua rë cha xi matitjun hacuaha matjengui. Cjua rë cha xi cahme jan hane hacuaha cavuya nga cjuahñu. Hacui cjua vihi: <sup>9</sup>Ha hvë cjuacjintacun xi tivatjun cojo cjuayuma nuju. Peru ngajñi rë vëhë ne, ¡nchina ngayun! Hacuaha hvë cjua chjataha rë xuta vë xi chja me xi xuta tjë rë Israel, o sa xuta rë Nina, má me, peru quixiin ta, xuta ladu rë Satanás má me. <sup>10</sup>Xi carcuun tsëhë xcusun xi cúatjun cuatjin. Naain ne, tsitsehen cha xuta cojo sa xi scandiya me yahnga ngayun ndavaya sehe chjahachuva nuju. Hacuaha tsujihhya tjengui nuju xuta jan cojo cjuañihi xcun të nixtin ní. Peru tangunnduju



cojo cjuatacun nuju handasa xi cueyun, hane ngahan ne, suá nuju corona rē cjuahñu. <sup>11</sup> Yo ngayun xi tjin nuju cjuasua xi cuinuhyun cjua xi chja Hasen rē Nina cojo yungun jan ne, ndaja tetuhunrcun. Cuitjin chja: Yo me xi scaa rē cjue xcun ne, tsajin mé choho cuatju me tsēhē cjuaveya xi majo.”

*Cjua xi cjuahatsja yungun ngajan nandya Pérgamo*

<sup>12</sup> 'Quihndē nihindi cjua vi xi cuahatsja ángel rē yungun ngajan nandya Pérgamo. Cuitjin nihindi: “Cjua vihi ne, cjua rē cha xi tjin rē quicha yuju, xi vatē taha xcun cojo taha ngaxtun. Cuitjin chja cha: <sup>13</sup> Ha hvē cahndē jani hisca nechuntuhun, ta cahndē vēhē ne, cahndē hñu xi vitexa Satanás. Peru cojo yējē sa ne, ndaja mangutacún cojo ná. Handasa hya xi catsiquehen me Antipas, me xi catsinguixi cjuaquixi naha ngajan cahndē hñu xi vitexa Satanás ne, hisca hya ne, hacuiin cavitijayun ndiya rē xuta xi macjain rē me ngahan. <sup>14</sup> Peru hacuiin yējē tsujun ndaja ta, tjin ná ngu jo xcusun condra nuju ta nijyuntacún tsēhē ngu jo me ngajñi nuju xi tjengui me cjuachacun rē cha Balaam. Cha vēhē catsingacun cha Balac chuya rē hacutjin tsitsehen cha xuta nangui Israel nixtin hatsēē. Hane casahmi me jyē xi cajinē me yojo tsēhē cjuatjo rē nina ndyojo, hacuaha xi casahmi me cjuatsehen xi satē rē cjuachacun jan. <sup>15</sup> Hane hacuanitjin ngayun, ta ngajñi nuju siu me xi hacuaha tjengui rē cjuachacun jan, cjuachacun rē cha Nicolás. <sup>16</sup> ¡Nindeyun cjuatacun nuju! ta, sa tsajin ne, ha nduvá tjēngē nuju, hane sahme si cojo rē me xi cuacun vē cojo quicha rē cjua xi vetju ntsuva. <sup>17</sup> Yo ngayun xi tjin nuju cjuasua xi cuinuhyun cjua xi chja Hasen rē Nina cojo yungun jan ne, ndaja tetuhunrcun. Cuitjin chja: Yo xi scaa rē cjue xcun ne, suá rē comida cjuarcun xi hmí rē maná xi jiyahma, hacuaha suá rē ngu ndyojo lihndi tyava hiscan camahindu ngu ñihi xatsē, ngu ñihi xi tsajin yo vēē rē, ta suva me xi cjuahatsja rē ne, suva ni me vēē me.”

*Cjua xi cjuahatsja yungun ngajan nandya Tiatira*

<sup>18</sup> 'Hacuaha nihndi cjua vihi xi cjuahatsja ángel rē yungun ngajan nandya Tiatira. Cuitjin fi cjua: “Vihi cjua rē Quihndi rē Nina Jain, me vēhē ne, tuxcun me, sacuaha ndihi tsejen, hane ntsacu me sacuaha quicha sine xi catsicjē ndihi xutsē rē. <sup>19</sup> Ha machaya ná tsēhē xa sacuaha cjuandaja xi nihñu, sacuaha cjuahmutacun nuju, cojo xi mangutacún, hvē xa xi tinihñu cojo sa xi ndaja cjuecani nuju. Cjuandaja xi nihñu quihndē ne, quisun sa xi cuma rē xi canihñu ntsacu cavetsihin. <sup>20</sup> Peru cojo yējē sa ne, tjin ná vihi condra nuju ta, nijyuntacún tsēhē na chjuun Jezabel vē, na xi chja suva na xi profeta má na. Na vēhē ne, cojo cjuachacun rē na ne, tsinguetsun na hacuaha

tsitsehen na xuta ladu naha cojo sa xi sahmi me cjuatsehen ngajñi xicjin ni me, hacuaha sinë me yojo rë chu xi cahme sacuaha ngu cjuatjo rë nina ndyojo. <sup>21</sup> Na vëhë ne, casuá ran cahndë xi tsindeya na cjuatacun ran, peru mijí choho cuma ran tsëhë xcusun tsehen rë xi sahmi na cojo xicjin na. <sup>22</sup> Vëhë xi tsijaña rë na xcun ngu cahndë tsëhë cjuahmu, hane me xi sahmi cjuatsehen cojo na ne, suá rë me ngu cjuañihi jyë, sa tsajin choho cuma rë me hane cuindeyaain cjuatacun rë me tsëhë xcusun chocun rë na xi catsitsehen rë me xi casahmi me cjuatsehen jan. <sup>23</sup> Hane me xi má sacuaha quihndi tjë rë na ne, cjuë tsiquéhen me, cojo sa xi cuatjin ne, cumachaya rë yëjë sa xuta yungun naha xi ngahan ne, ndaja tsichúva cjuatacun cojo xahasen nuju, hane suá nuju jima ngu yun tucu satë nuju tsëhë xcusun xi canihñu. <sup>24</sup> Peru yahnga ngayun xuta Tiatira xi hacuiin cojo ngayun cachjuhunntsun cjuachacun jan ne, ngayun hyun mé xi vijne cjua xi cahntsua nungun tsëhë Satanás. Ngayun ne, ndastu mé sa cuichjá xi nihñu ta, <sup>25</sup> xi sahmi ngujyë ne, xi cuangunndujun tuhunhñu mé xi tjin nuju tsëhë Nina hisca hya xi nduvá ngahan. <sup>26</sup> Yo xi scaa rë xi cjue xcun, hacuaha sahmi chihin me cjuandaja naha hisca xi cuijnetaha ne, suá rë me ngahñu xi sahmi me gobiernu rë nanguicjín. <sup>27</sup> Hane me vëhë ne, cuitexa rë me xuta nanguicjín jan cojo ngahñu xi tjin rë me, sacuaha cojo ngu cuarta xi camá tsëhë quicha, hane sacuaha cuma xuva rë ngu tiji xi nihndë camá ne, cuatjin cumá cojo xuta cjín jan. Sacuaha ngahan ne, cafahántsa xa jan tsëhë nahmi naha, cuanitjin suáxa rë me xi sahmi me gobiernu. <sup>28</sup> Hane suá rë me hasen rë niñú seti xi vetjucaa nguitajñu. <sup>29</sup> Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun.”

### 3

#### *Cjua xi cjuahatsja yungun ngajan Sardis*

<sup>1</sup> Cjua vihi nihindi cojo sa xi cjuahatsja ángel tsëhë yungun ngajan nandya Sardis. Cuitjin fi cjua: “Cjua vihi xi cachja me xi tsuvangui rë yatu hasen rë Nina cojo yatu niñú: Hvë xa nuju. Tjin cjua nuju xi quicun yun, peru quixiin ta hvë ta cahme yun. <sup>2</sup> ¡Catasca nuju! Mé tsujun xi siu quicun handasa ndiya cueya ne, tuhun rë ngahñu ta, xi má rë Nina naha ne, xa xi nihñu ne, hacuiin tsejen sacuaha xi ha camá chihin xa jan. <sup>3</sup> Tetuhunrcun nguyëjë ni cjua xi ha cachjuhunntsun tsëhë Nina, tangunndujun cojo, hane nindeyun xcusun nuju. Cuatjin nihñu ta, sa xi cuascaain rë cjuatacun nuju ne, sehe cjuë tjëngë nuju sacuaha cjue tjengui rë xuta ngu cha chëjë, ta hyun hora xi cuinduva tjëngë nuju. <sup>4</sup> Peru cojo yëjë sa ne,

tjin ngajñi nuju ngu jo xuta ngajan Sardis xi cjëë tsinguetsun me tsjian rë me cojo cjuatsehen. Me xi cuacun vë ne, cojo ná tsujyhiya me; hane cojo ngahan ne, cuaja me tsjian tyava tyjahi, tsëhë xi cuatjin ndatjin vechu chuva rë xi casahmi me. <sup>5</sup> Me xi scaa rë cjue xcun ne, cojo me nicaja rë me tsjian tyava, sacuaha me xi cuacun vë. Hacuaha tsajin nixtin xi scujñu ñihi rë me tsëhë libru xi yaha ñihi rë xuta xi sacu rë cjuahñu ta, hisca cueyanangë ñihi rë me xcun Nahmi naha cojo xcun ángel rë me. <sup>6</sup> Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun.”

*Cjua xi cjuahatsja xuta rë yungun ngajan nandya Filadelfia*

<sup>7</sup> Cjua vihi nihndi cojo sa xi cjuahatsja ángel tsëhë yungun ngajan nandya Filadelfia. Cuitjin fi cjua: “Cjua vihi ne, cjua rë me xi ndastu mé cjuatsehen tjin rë, hacuaha quixi me. Me vëhë ne, tacuntsja me llavi xi casatë rë nima David, me xi cavitexa. Hane cahndë xi vuxaha me jan ne, tsajin yo xi cuma cuechja. Hane sa xi vechja me ne, tsajin yo cuma scuxaha.” <sup>8</sup> Cuatjin fi cjua: “Hvë xa nuju. Casuá nuju cahndë xi tixaha tingotjo xi cumá nuju, hane tsajin yo cuma cuechja xi cumá nuju. Hacuaha hvë ta, chuva má ngahñu nuju, peru handasa cuatjin ne, cavetjun cjua naha hacuaha cjëë cjuahmu ñihi naha. <sup>9</sup> Tuhun cjuasua ta, chutsujun mé cumá rë xuta jan xi vihndë me tsëhë Satanás. Xuta jan ne, chja me xi tjë rë Israel má me, peru hacuain xuta naha me ta, xuta ndacha me. Sahme xi xuta jan ne, cuinduva me cuiticjxcun me ntsacun, hane scuëë me ta ngahan ne, meje ná ngayun. <sup>10</sup> Cavetjun cjuajeya xahasen nuju sacuaha xi ngahan catsingácun nuju. Ngatsë rë vëhë ne, ngahan ne, hacuaha cuetjo nuju cojo sa xi satiin nuju cjuacjintacun tsëhë hora xi chjahachuva rë xuta. Hora vëhë ne, ha tacun xati xi nduva xcun jingujyë ni ngasunhndë, hane hya chjahachuva rë jinguyëjë ni me. <sup>11</sup> Ngutjen ni cjuëhë. Tangunndujun cojo cjua xi ha camachaya nuju tsëhë, cojo sa xi tsajin yo cjue cojo corona xi satë nuju. <sup>12</sup> Yo xi scaa rë cjue xcun tsëhë cjuatsehen, ngahan ne, sahme xi cumá me sacuaha xihndë xi secun vasencja rë yungun xi vaniji hai rë yungun rë Nina. Hane quihndë cuetjuxiin me. Setaha rë me ñihi rë Nina naha cojo ñihi rë nandya rë Nina, Jerusalén xatsë. Nandya jan ne, sahmi Nina xi nduvajne tsëhë ngahnga. Hacuaha hisca setaha rë me ñihi xatsë naha. <sup>13</sup> Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun.”

*Cjua xi cjuahatsja yungun ngajan Laodicea*

<sup>14</sup> 'Cjua vihi nihndi cojo sa xi cjuahatsja ángel tsëhë yungun ngajan nandya Laodicea: "Cjua vihi ne, cjua rë me xi cjuaquixindaja, cjua xi chja me ne, quixi hacuaha cuatjin jain. Ngatsë rë me vë jan ne, cavetjucaa yëjë xi casahmi Nina. Cuitjin fi cjua jan: <sup>15</sup> Ndaja machaya ná hacutjin nihñu xa nuju. Hacuuiin jemu ndaja peru hacuaha hacuuiin jemu chojyihí, tu vasentjin siu. Xi má ná ne, hitsë sa ndaja sa xi hatuxa ndaja o sa xi hatuxa chojyihí. <sup>16</sup> Ngayun ne, ha maji sa tu ngu tsë vë ngayun, peru ngayun ne, jemu va xcusun nuju, vëhë xi cuaxëxin nuju sacuaha xi cuëhë natya cojo ntsuva. <sup>17</sup> Vihi cjua xi nújun: Ngayin ne, nchina ngayin. Jercu cavetjin tujún hane tsajin mé machaja niji. Cuatjin nújun. Peru machayiin nuju tsëhë cjuaquixi ta, xi quixi ne, jemu chojyihí tsujun, cojo cjuatsehen nuju, yuma yun, rcá yun, hane hacuaha quixti ngayun. <sup>18</sup> Vinchajyë nuju xi chuhun tsahan. Tjin ná oro ndaja xi catsicjë ndihí xutsë rë, hane cojo vëhë cuma nchina jain yun. Tjin ná tsjian tyava xi cuma chujun cojo sa xi hacuuiin tu yo ni scuëë cjuasava nuju xi quixti ngayun. Hacuaha tjin ná rqui xi cuincha tuxcun, hane cumatsejen jain nuju. <sup>19</sup> Tichjátaha nuju ta, hya xi tjin yo me xi ngahan meje ná me ne, chjátaha rë me hacuaha vicuya rë me. Tsëhë vëhë ne, catamachinitacun hane choho catama nuju, nindeyun xcusun nuju. <sup>20</sup> Nguehe tejña xi tichjá cojo nuju. Tu yo ni xi cuihndë xta naha ne, sehe sua cahndë ne, ngahan ne, cuisehen ngajan, hacuaha sinë niñu cojo me, hane me vëhë ne, sinë me cojo ná ngahan. <sup>21</sup> Yo ngayun xi scaa nuju cuangun xcun tsëhë cjuatsehen, suá nuju cahndë xi cuinechun cojo ná cahndë hñu naha. Cuatjin cumá cojo nuju tangun ni sacuaha xi ngahan ta, hacuaha cacaa ná cëjë xcun, hane tejña cojo Nahmi naha cahndë hñu rë me. <sup>22</sup> Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun."

## 4

### *Cavëë Juan cahndë rcun ngajan ngahnga*

<sup>1</sup> Hya xi cavatju vihi ne, cahvë xi ngajan ngahnga ne, tsejen ngu tingotjo xi tixaha. Hane xta rë me xi cahndë xi cachja cojo ná titjun jan xi nuhya rë sacuaha nuhya rë ngu tyjo, xta vëhë cachja cojo ná cuitjin:

—Ndoveniji nguehe sehe tsingácun ri xcusun xi sehe cumá.

<sup>2</sup> Hora vëhë ne, catsuva ná ngahñu rë Hasen rë Nina, ngajan cahvë xi ngajan ngahnga ne, tacun ngu cahndë rcun cojo ngu me xi tacun xcun. <sup>3</sup> Hane me xi tacun xcun jan ne, xcusun rë me ne, seti tsejen sacuaha ndyojo seti xi hmí rë jaspe o cornalina. Hane ngu yejña sacuaha ndyojo seti xi hmí

rë esmeralda, vëhë vindee rë cahndë rcun jan. <sup>4</sup> Tahndee rë cahndë rcun jan ne, siu sa can ñuju cahndë rcun, hane xcun jan ne, siu can ñuju xuta changá. Me vëhë ne, yaja me tsjian tyava hacuaha hinchasun rcu me corona tsëhë oro. <sup>5</sup> Tsëhë cahndë rcun jan ne, vatë ndihichuhún hacuaha tsingá chuhun. Hacuaha xcun cahndë rcun jan ne, ti ndihi rë yatu lámpara xi hacui yatu Hasen rë Nina. <sup>6</sup> Hacuaha nangui xcun cahndë rcun jan ne, tsejen sacuaha ngu ndachacun tsëhë vidriu xi hasen sacuaha hasen ndyojo tsin. Hane tsëhë tahndee rë cahndë rcun jan ne, chuva ngu yuju rë, siu ñuju xcusun xi quicun. Hane xcusun jan ne, yaja tuxcun jingujyë yojo rë, sa taha xcun, sa taha ngaxtun. <sup>7</sup> Ngu xi quicun jan ne, xcusun rë ne, sacuaha chu xa tsejen. Xi majo ne, sacuaha ndyaja, hane xi má jyan ne, sacuaha xcun xuta jyihi xcun. Xi má ñuju ne, sacuaha ngu chu jya xi tivitjen chu, cuatjin tsejen. <sup>8</sup> Jima ngu xi quicun jan ne, tjin jyun tyjunga rë. Hane jingujyë ni tsëhë yaja tuxcun, taha xcun cojo taha ngaxtun. Hane xi quicun jan ne, sa nixtin, sa nixten, sejiin ta, chja cuitjin:

Tyjahi, tyjahi, tyjahi

camahani Nina xi jemu hñu cjua.

Nina tacun me, cavejña me hatsëë, hacuaha cuejña cuaha me. Cuitjin chja.

<sup>9</sup> Hane sahmi jyë hnga ñihi rë Nina hacuaha sua nacuechji rëhë hacuaha vaxëndaja rë Nina xi tacun xcun cahndë rcun jan, Nina xi tacun cuaha me yëjë nu, yëjë nixtin. Hane jimangu ndiya xi vaxëndaja rë Nina ne, hora hya ne, <sup>10</sup> can ñuju xuta changá xi siu jan, viticjaxcun me xcun me xi tacun cahndë rcun jan, hane faharcun me me xi tacun nu cjuí nu nduva. Hacuaha xuta changá jan ne, candisun me corona rë me xcun cahndë rcun jan, sehe chja me cuitjin:

<sup>11</sup> Ngayun Nai niji, ngayun Nina niji,

vechu chuva rë xi cuma jyë cuma hnga yun hacuaha sacunju ngahñu cjua.

Ngayun canihñu yëjë ni xcusun,

hane ngatsë rë cjuandaja nuju siu yëjë ni hacuaha camá yëjë ni.

## 5

### *Xtë xujun cojo yatu sellu*

<sup>1</sup> Sehe cahvë xi tsja ladu quixi me xi tacun xcun cahndë rcun jan, yaha me ngu xtë xujun xi camahindu xcun cojo ngaxtun, hacuaha xujun jan ne, tine rë yatu sellu. <sup>2</sup> Hane hya ne, cahvë ngu ángel xi jemu hñu cjua, hane titsiquindë cojo yëjë ni ngahñu rë cjua vihi:

—¿Yo ngayun xi vechu chuva rë xi cuicheyun sellu rë sehe nixingun xtë xujun vihi?

<sup>3</sup> Hya xi camá ne, ndastu yo, sa xi siu ngahnga, sa xi siu nangui, o sa xi siu ngahma nangui, ndastu yo cavetjucacun xi tsixinga xtë rë xujun jan, o sa xi scutsejen mé xi chja. <sup>4</sup> Hane ngahan ne, cajíhnda nguñajacácun, tséhë xi casacuiin yo xi cuechu chuva rë xi tsixinga xtë rë xujun jan, sehe scutsejen mé xi chja. <sup>5</sup> Ngajan xi ngu xuta changá jan ne, cachja me cojo ná cuitjin:

—¡Xi cachjihndiin sa! Chutsijin ta, me xi hmí rë Chu Xa tséhë tjë rë cha Judá ne, me xi cavetjusehen tséhë David xi cavitexa hatsëe ne, me vëhë cacaa rë me quiji me xcun. Hane me vëhë cuma tsixinga me xtë rë xujun cojo yatu sellu rë.

*Cristu, ta xuta matitjun má me, cafaha me xtë xujun*

<sup>6</sup> Xi cavutsejen, ngajan secun vasencja rë cahndë rcun jan cojo tahndee rë, ngajñi rë ñuju xi quicun jan cojo xuta changá jan, ngajan secunhñu ngu xihin sacuaha Chu Tsánga, xi tsejen sacuaha ngu chu xi cahme. Me xi sacuaha tsánga jan ne, tjin yatu ndyaja rë cojo yatu tuxcun xi hacui yatu hasen rë Nina xi visehen jingujyë ni ngasunhndë. <sup>7</sup> Hane me xi sacuaha tsánga jan ne, canduva me cafaha me xtë rë xujun tséhë tsja quixi me xi tacun xcun cahndë rcun jan.

*Xuta changá ne, faharcun me Jesucristu*

<sup>8</sup> Hane hora xi cafahatsja me xtë rë xujun jan ne, catsiñuju xcusun xi quicun jan cojo can ñuju xuta changá jan ne, caticjaxcun me xcun Tsánga jan. Jimangu me ne, yaha me ngu arpa hacuaha jimangu me hinchangui tsja me tyucu ndixuhi tséhë oro xi quitsë rë cojo tyjungunsa. Hane tyjungunsa jan ne, hacui oración rë me xi nguñajacacun macjain rë me. <sup>9</sup> Hane me vëhë ne, tisë me ngu sun xatsë xi cuitjin fi cjua rë:

Vechu chuva rë xi chjuhun xtë rë xujun vë, hane nuxuhun sellu rë;

tséhë xi catsiquehen me yun,

hane cojo jni nuju xi cavanga ne, cachuhun xi cumá rë Nina xuta tséhë yëjë ni tjë, yëjë ni hne, yëjë ni nandya, cojo yëjë nación.

<sup>10</sup> Hacuaha ngayun ne, canihñu xi xuta jan ne, cumá me xuta xi vitexa me,

hacuaha cumá me sacuaha nahmi xi cjuahancuenda rë Nina xi faharcun me,

hane cuitexa me guehe xcun nangui.

*Cjín ángel ne, faharcun rë Jesucristu*

<sup>11</sup> Sehe cavutsejen jemu cjín camahani ángel xi cavindee rë cahndë hñu hiscan siu xcusun xi quicun jan cojo xuta changá

jan. Hane tjin xqui sacuaha tsëhë të mil ndiya xi të mil. Hacuaha cahndë xta rë ángel cjín jan <sup>12</sup> cachja hñu cuitjin: Me xi má Tsánga xi catsiquehen xuta me ne, vechu chuva rë xi cjuahatsja me ngahñu xi cuitexa me, cojo cjuanchina, cojo cjuahasen, hacuaha hñu cumá cjua rë me, tjin rë me cjuandaja rë xuta, cuma jyë hnga me hane yëjë ni me ne, tsinchacuntihin rë me.

*Yëjë ngarca ni ne, faharcun rë Jesucristu*

<sup>13</sup> Sehe cahndë xi nguyëjë ni xi siu ngahnga cojo nguyëjë ni xi siu ngasunhdë cojo nguyëjë ni xi siu nguihma nangui cojo ngajñi ndachacun, yëjë ngarca xi cuacun vë ne, tichja cuitjin: Cuitjin cumá tsëhë me xi tacun cahndë rcun hacuaha cumá tsëhë Tsánga jan:

¡Catama tsëhë me xi tsinchacuntihin rë me, xi chjaharcun rë me, xi cuma jyë hnga me, xi tjin rë me ngahñu!

¡Cuatjin catama me tsëhë me nu cjui nu nduva!

<sup>14</sup> Hane catsiñuju xcusun xi quicun jan ne, cachja cuitjin:

—¡Cuatjin jain!

Hane xuta changá jan ne, caticjaxcun me sehe cafaharcun rë me.

## 6

*Sellu tjun*

<sup>1</sup> Cavutsejen ngahan hya xi Tsánga jan ne, cavuxaha me ngu sellu tsëhë yatu sellu jan. Hane tsëhë catsiñuju xcusun xi quicun jan ne, cahndë ngu xta xi nuhya rë sacuaha xi faneya. Cuitjin cachja:

—¡Ndove!

<sup>2</sup> Hane cavutsejen xi cavetjutsejen ngu naxin tyava. Hane me xi quisun rë chu jan ne, yaha me ngu yanchijnu, sehe casacu rë me ngu corona hane cavetju me sacuaha ngu cha xi cjue sahmi si xi tjin ngucacun cha xi scaa rë cha xi cjue cha xcun.

*Sellu xi majo*

<sup>3</sup> Hane hya xi cavuxaha Tsánga jan sellu xi majo ne, cahndë ta, xcusun xi majo xi quicun jan ne, cajindaya cuitjin:

—¡Ndove!

<sup>4</sup> Ngajan cavetjutsejen ngu nga naxin xi hani hñu xcusun ru. Hane me xi quisun rë chu vë ne, ngu me xi casatë xa rë xi cjuahaxin me cjuajeya xi tjin nangui, cojo sa xi xuta ne, tsiquehen xicjin me ngajñi rë me. Hane suva me vëhë ne, cafahatsja me ngu quicha jyë.

*Sellu xi majyan*

<sup>5</sup> Hya xi cavuxaha me sellu xi majyan ne, cahndë xcusun xi quicun xi majyan jan, hane cuitjin cachja:

—¡Ndove!

Hane cavutsejen xi cavetjutsejen ngu naxin jma. Hane me xi quisun rë chu vë ne, yahatsja me ngu nisu chuva. <sup>6</sup> Sehe cahndë sacuaaha ngu xta xi vetju tsëhë ngajñi rë catsiñuju xcusun xi quicun jan xi cachja cuitjin:

—Ngu ni kilu trigu sacu chjí rë mosu, o sa jyan kilu ni cebada sacu rë me; peru aceite cojo xan rë uva ne, cumachajin.

### *Sellu xi má ñuju*

<sup>7</sup> Hane xi cavuxaha me sellu xi má nuju ne, cahndë xcusun xi quicun xi má nuju jan, hane cuitjin cachja:

—¡Ndove!

<sup>8</sup> Hane cavutsejen xi cavetjutsejen ngu naxin xi jemu va jyihi. Hane me xi quisun rë chu jan ne, Cjuaveya hmí rë me, hane tjengui tiña rë me, me xi hmí rë Hades, cahndë hiscan xi má hasen rë nima castigu. Hane me vëhë jan ne, tjin rë me cahndë xi tsëhë ngu tsëhë ñuju rquí xuta ngasunhdë xi cuma tsiquehen me ngu rquí vë cojo espada o cojo jindya o cojo chíhin o sa xi cojo chu cjan rë xi tjin xcun nangui.

### *Sellu xi má hñu*

<sup>9</sup> Hya xi catuxaha sellu xi má hñu ne, ngajan ngahma rë ngasuncun ne, cahvë hasen rë nima xi catsiquehen xuta ngatsë rë xi camacjain rë me cjuar rë Nina cojo ngatsë rë cjuaquixi rë me xi casua me. <sup>10</sup> Me vëhë ne, cajindaya me cachja me cuitjin:

—Ngayun Nai rë yëjë ni, jemu tyjahi yun, quixi cjuar nuju. ¿Janihya nihñu cuendun jyë rë xuta xi siu me xcun nangui, hane nihñu ngojo jni niji? —Cuatjin cachja me.

<sup>11</sup> Ngajan xi cafhatsja me jimangu me ngu tsjian tyava, hane cafaaha me cjuar xi cuejñajyu me ngu jo nixtin sa. Vindaya sa rë hisca hya xi cumachihin xquí rë xuta ladu rë me cojo me xi hacuaaha tangun cueya sahmi xuta sacuaaha cavatju me suva me.

### *Sellu xi má jyun*

<sup>12</sup> Hacuaaha cavutsejen hya xi cavuxaha me sellu xi má jyun. Hya ne, jercu cjuachan cafani nangui. Tsuhi ne, camá jma. Jemu va jyihi camá, sacuaaha ngu tsjian jma. Hane sá xatsë ne, camá hani sacuaaha jni. <sup>13</sup> Hane niñú tsëhë ngahnga ne, cavixu xcun nangui sacuaaha vixu tu rë ya higo hya xi vanga tjo hñu. <sup>14</sup> Ngahnga ne, cafëya sacuaaha ngu xujun të xi catsijeyu, hane hisca tjin ngu naxi o ngu nangui xi hinchu vasencja rë ndachacun ne, catjune rë cahndë rë. <sup>15</sup> Ngajan xi xuta xi vitexa me ngu nangui, cojo yahnga me xi cojo me vitexa me, cojo xuta nchina, cojo sindadu capitán,



cojo xuta xi hñu cjuá, cojo yějē sa xuta, sa xuta xi caxteña o sa xuta xi ndaya tjin, nguyějē ni me quiji cavangahma me cahntsua nguijo cojo ngajñi naxindya rē nguijña cha. <sup>16</sup> Sehe cafehyataha rē me nguijña cojo naxindya jan cuitjin:

—¡Catixusun niji cojo sa xi tinchunhmu niji! Cuatjin cuma cuinechinhmi tséhē xcun me xi tacun cahndé rcun hane satiin niji cjuaxti rē Tsánga jan.

<sup>17</sup> Cuatjin cumá ta cavechu nixtin xi jercu choho cumá ngatsē rē cjuaxti rē me, hane ¿há tjin yo scaa rē cojo?

## 7

### *Xuta xi macjain rē Nina*

<sup>1</sup> Xi cavutsejen vihi ne, cahvē ñuju ángel xi hinchacun quixi catsiñuju yuju rē ngasunhdē. Hane ángel jan ne, casuaain cahndé xi cuanga catsiñuju tjo xi vanga ngasunhdē ta, hisca xi ngu tjo ne, cuangaain xcun nangui, o xcun ndachacun, o hisca rcu ngu ya. <sup>2</sup> Sehe cahvē ngu ángel xi hacjahi. Hane camiji ángel jan hiscan xi vetjucaa tsuhi, hacuaha yaha ángel sellu rē Nina quicun. Hane cajindayahñu ángel jan cojo catsiñuju vē ta tacuntsja ángel vē xi choho sahmi cojo nangui cojo ndachacun. <sup>3</sup> Cuitjin cachja me cojo:

—Ndastu mé dañu nihñu cojo nangui, cojo ndachacun, cojo ya. Ndastu mé nihñu hisca xi cajnetaha cavetaha sellu xten xuta xi cavatsē Nina naja.

<sup>4</sup> Ngajan xi cahndé xi cachja me xqui rē me xi casetaha rē chuva cojo sellu jan: ngu cientu cojo yachan ñuju mil má me tséhē yějē xuta tjē rē Israel. <sup>5</sup> Tséhē xuta tjē rē Judá ne, tejó mil má me xi yaha sellu; hacuaha tejó mil má me tséhē xuta tjē rē Rubén, tejó mil tséhē xuta tjē rē Gad. <sup>6</sup> Tejó mil má me tséhē xuta tjē rē Aser, tejó mil tséhē xuta tjē rē Neftalí, hacuaha tejó mil tséhē xuta tjē rē Manasés. <sup>7</sup> Tséhē xuta tjē rē Simeón ne, tejó mil má me xi yaha sellu; hacuaha tejó mil má me tséhē xuta tjē rē Leví, tejó mil tséhē xuta tjē rē Isacar. <sup>8</sup> Tséhē xuta tjē rē Zebulón ne, tejó mil má me xi yaha sellu; hacuaha tejó mil má me tséhē xuta tjē rē José, tejó mil tséhē xuta tjē rē Benjamín.

### *Xutaxín xi hacuaha camacjain rē me*

<sup>9</sup> Xi cavatju xcusun vihi ne, cavutsejen, hane cahvē xutacjín. Hisca tsajin yo cuma cuexqui rē me. Canduva me tséhē ngajñi rē jimangu nación, jimangu tjē rē xuta, jimangu nandya cojo jimangu hne. Hane cafehe me hinchacun me xcun cahndé rcun cojo xcun Tsánga jan. Yaja me tsjian tyava hacuaha yahatsja me jne. <sup>10</sup> Hane jindaya me cojo ngu xta hñu, tichja me cuitjin:

Xi cavetjuntjen ne, camá ngatsē rē Nina naja

xi tacun me cahndé rcun  
cojo ngatsé rē Tsánga jan.

Cuatjin cachja me. <sup>11</sup> Ngajan xi yějē ni ángel ne, hinchacun quixi tahndee rē cahndé rcun jan hacuaha cavindee rē xuta changá jan cojo catsiñuju xcusun xi quicun jan. Hane cat-icjaxcun ángel xcun cahndé rcun hane cafaharcun rē Nina, <sup>12</sup> tichja cuitjin:

¡Cuitjin jain!

Nina ne, yějē ni tsinchacuntihin me. Jyē hnga me.

Tjin rē me cjuahasen. Taan nacuechji rē me.

Xuta ne, vaxëndaja me. Vechu chuva rē xi cjuahatsja me ngahñu xi cuitexa me. Hacuaha hñu cjua rē me.

Cuanitjin cjue me yějē nu yějē nixtin.

¡Cuatjin jain!

<sup>13</sup> Hya xi camá ne, ngu xuta changá jan, cafinenguise me ngahan cuitjin:

—Me xi cuicun xi yaja tsjian tyava ne, ¿yo má me? hane ¿hisca jani canduva me?

<sup>14</sup> Ngajan xi cafayanguē cuitjin:

—Tatá, xcusun vëhë ne, ngayun hyun, hacuiin ngahan.

Sehe cachja me cojo ná cuitjin:

—Me vihi caca rē me cjuañihi cjuacjintacun jyē. Cavane me tsjian rē me, camá tyava cojo jni rē Tsánga. <sup>15</sup> Vëhë xi tjin rē me cahndé xcun cahndé rcun rē Nina, hane fahacuenda me nixtin nixten cahntsua yungun rē me. Hane Nina xi tacun xcun cahndé rcun ne, ngu tangun ni cuejñándaja me cojo xuta jan. <sup>16</sup> Hindé tsjin nu tsjin nixtin cuma vojo rē me. Cuma xindaain rē me, cuacaain rē me tsuhi; hacuaha tsijendaain rē me cojo hnde rē, <sup>17</sup> ta cahndé rē vëhë ne, Tsánga xi tacun cavasencja rē cahndé rcun ne, cuahacuenda rē me, hane cuincha ndiya rē me xcun nandá xi sua cjuahñu. Hane Nina ne, tsixiya me yějē ndatuxcun xuta jan.

## 8

### *Sellu xi má yatu*

<sup>1</sup> Hane xi cavuxaha me xi sacuaha Tsánga jan sellu xi má yatu ne, ngahnga ne, cavejña jyu camahani sacuaha chuva rē vasen hora. <sup>2</sup> Cuatjin camá. Sehe cahvë xi yatu ángel vë xi siucahndé xcun Nina ne, cafahatsja yatu tyjo. <sup>3</sup> Sehe canduva sa ngu ángel xi yaha ngu tyucu ndixuhi tsëhë oro, hane casecunquixi cojo tiña ngasuncun. Ngajan cafahatsja me cjín tyjungunsa cojo sa xi cuaca me xcun ngasuncun tsëhë oro jan xi tacun xcun Nina. Hane hnde rē ne, camatangun cojo oración rē yějē me xi tyjahi cjuatacun rē me cojo sa xi cuma chihin cjua. <sup>4</sup> Hane nihndi rē tyjungunsa xi yahatsja

ángel jan ne, casecjan cojo oración rē me xi tyjahi cjuatacun rē me, hane camiji tangun hiscan tacun Nina. <sup>5</sup> Ngajan xi ángel jan ne, cafaha tyucu ndixuhi jan, catsinguitsē rē cojo ndihi tsēhē ngasuncun jan hane catsingatjen rē xcun ngasunhdē. Hane hora vēhē cafaneya cjuachan cavatē hacuaha cafani nangui.

*Yatu tyjo xi tsijane ángel*

<sup>6</sup> Hya xi camá ne, yatu ángel xi yaha yatu tyjo jan ne, caviyu-jucacun xi tsijane tyjo rē. <sup>7</sup> Ángel xi tjun jan ne, catsijane tyjo rē. Hane jercu cavaha tsi ndyojo xcun nangui. Hacuaha cavixu ndihi xi tecjan cojo jni. Cojo vēhē ne, tsēhē yējē ni ya xi tjin ne, tsēhē chuva jyan ne, ngu cati. Hisca cojo jingujyē nguijña xi xcuen ne, cafē cati.

<sup>8</sup> Sehe catsijane ángel xi majo jan tyjo rē. Hane hora vēhē ne, camatsejen sacuaha ngu nguijñacha jyē xi yaha rē ndihi xi cjanenguiya ngajñi ndachacun. Hane tsēhē yējē ndachacun ne, tsēhē chuva jyan cahndē, ngu ni cavuya jni. <sup>9</sup> Ngajan xi tsēhē yējē chu xi hinchá nandá jan, tsēhē chuva jyan chu ne, ngu chu cahme chu; hacuaha tsēhē chuva jyan barcu xi hinchasun ne, ngu cafē cati.

<sup>10</sup> Sehe catsijane ángel xi majyan jan tyjo rē. Hane hora vēhē ne, canenguiya tsēhē ngahnga ngu niñú jyē xi jercu ndaja seti sacuaha seti ngu ndihi jyē. Hane niñú jan ne, casatē rē ndajyē cojo hiscan vetju nandá. Hane tsēhē yējē nandan jan ne, ngu tsēhē chuva jyan cahndē casatē rē. <sup>11</sup> Niñú jan ne, yaha ñihi rē xca sa xi hmí rē Ajenjo, ta cavuya sa nandá hiscan cjanenguiya niñú. Hane jemu cjín xuta cahme me xi cahvi me nandá sa jan.

<sup>12</sup> Sehe catsijane ángel xi ma ñuju tyjo rē, hane choho casahmi cojo tsuhi cojo sá ta jemu camachuva hasen rē. Hacuaha chuva rē jyan niñú ne, ngu ni cafē ngahñu rē cahvo. Ngajan xi tsēhē ngu cuaha nixtin o tsēhē ngu cuaha nixten ne, ngu tsēhē chuva jyan cahndē ne, camajñu hane casacuiin hasen rē.

<sup>13</sup> Hya xi camá ne, ngajan vasencja rē ngahnga tivitjen ngu chu jya. Hane cuitjin sahmi sen chu cajindaya chu cojo ngu xta hñu:

—Cojo cjuatsehen nuju, ngayun xuta xi nechun ngasunhdē ta, tsēhē xi vangui sa jyan sa ángel xi chaja sa tsijane tyjo rē.

## 9

<sup>1</sup> Hya xi camá ne, catsijane ángel xi má hñu jan tyjo xi yaha, hane cahvē ngu niñú xi cjanengui tsēhē ngahnga xcun nangui. Hane cafhatsja niñú jan llavi tsēhē ngojo rē nduchin.

<sup>2</sup> Sehe cavuxaha nduchin ne, hane jemu camiji nihndi rë sacuaha nihndi rë ngu hornu jyë. Hisca tsuhi cojo jingujyë ni tjo ne, tsejen jñu ngatsë rë nihndi xi vetju tsëhë nduchin jan. <sup>3</sup>Hane tsëhë ngajñi rë nihndi jan ne, cavixu chu nchahva xcun nangui. Hane chu jan ne, tsavi cojo chu sacuaha tsavi cojo chu naya xi siu ngasunhdë. <sup>4</sup>Hane cafaha chu cjua xi tsajin mé sahmi chu cojo nguijña o cojo xca o sa cojo ya ta, suva xi satë chu xuta xi siutaain xten me sellu rë Nina. <sup>5</sup>Casacuiin rë chu cahndë xi tsiquehen chu xuta jan ta, cuenda jemu cuiyujumu me cahntsua hñu sa. Hane cjuahmu xi cuiyuju me cojo ne, jineya sacuaha jineya hiscan cjuaha chu naya.

<sup>6</sup> Nixtin hya ne, xuta jan ne, tsimeje me cjuaveya, peru sacuiin cjuaveya xi cuma rë me. Xuta jan ne, cjuehyacacun me cjuaveya, peru sacuiin.

<sup>7</sup> Chu nchahva jan ne, tjin chjine chu sacuaha naxin xi tjin chjine chu xi cjue chu si. Hinchasun rcu chu ngu xcusun sacuaha ngu corona tsëhë oro, hane xcun chu ne, tsejen sacuaha xcusun rë xcun xuta. <sup>8</sup>Tsa rë chu ne, sacuaha tsarcu yachjin, hane nehñu chu ne, sacuaha nehñu xa cjan rë. <sup>9</sup>Tixtë cun ru cojo ngu xcusun sacuaha chinga quicha, hane xi nuhya rë xi fane tyjunga ru ne, hñu nuhya rë sacuaha cjin camahani carreta xi tijuvë naxin xi cuetsihin si. <sup>10</sup>Ndetsihin chu yaha quicha rë chu naya. Hane cojo quicha jan ne, tjin ru cahndë xi sua chu cjuañihi xuta xcun xi hñu sa jan. <sup>11</sup>Hane sacuaha rey rë chu ne, má ángel rë nduchin jan. Ángel jan ne, Abedón hmí rë sa xi hne hebreo o Apollyon sa xi hne griego. Catsijo cjua vë ne, vijne Ngu xi Tsiqueya rë.

<sup>12</sup>Vëhë má cjuañihi xi tjun cuma. Jo sa má xi ha meje cuatju.

<sup>13</sup>Hya xi camá ne, catsijane ángel xi má jyun tyjo rë. Ngajan xi canuhya rë ngu xta xi cavetju tsëhë tjehehen rë ngasunscun xi tacun xcun Nina, hiscan xi jyihi sacuaha ndyaja ru. <sup>14</sup>Xta jan ne, cachja cojo ángel xi má jyun xi catsijane tyjo jan. Cuitjin cachja:

—Nismi catsiñuju ángel xi tjihñu tjehehen rë ndajyë jyë xi hmí rë Eufrates.

<sup>15</sup>Hane camandaya catsiñuju ángel jan. Ángel jan ne, caviyujuya hisca xi cuechu nu, cuechu sa, hane cuechu nixtin xi cuma meje rë xi tsiquehen rë xuta. Chuva jyan chuva jyan xuta ne, ngu ngu me cueya me. <sup>16</sup>Hane xqui rë sindadu xi vitexa ángel jan ne, jo cientu millón má xi hinchasun naxin. Hane ngahan suva cahndë xqui rë.

<sup>17</sup>Naxin cojo cha xi hinchasun rë chu xi cahvë ngajñi nijña naha ne, cuitjin cun. Cha xi hinchasun rë chu ne, yaja cha chinga quicha xcusun hani rë ndihi, xcusun rë susë hñu hacuaha xcusun sine. Hane rcu chu naxin jan ne, sacuaha rcu

chu xa cjan rē cun. Hane tsēhē hntsua chu ne, tivetju ndihi tivetju nihndi cojo azufre. <sup>18</sup> Hane ngatsē rē jyan cjuañihi jan xi vetju tsēhē hntsua chu matsejen ne, ngatsē rē ndihi, cojo nihndi cojo azufre ne, ngu cahndē tsēhē chuva jyan cahndē xuta cahme me. <sup>19</sup> Jemu tsavi cojo hntsua chu, peru hacuaha tsavi cojo ndetsihin chu. Ndetsihin chu ne, sacuaha chu yē cun ta, tjin rcu. Hane rcu vēhē ne, má sahmi chu dañu cojo.

<sup>20</sup> Peru handasa cuatjin camá, xuta xi cacaa rē me ta cahmii me cojo cjuacjintacun vēhē ne, tsajin camacjincacun me tsēhē cjuatsehen xi casahmi me ta, cafarharcun cuaha me xitsehen cojo nina xi camá tsēhē oro, tsēhē plata, tsēhē quicha sine, tsēhē ndyojo, cojo tsēhē ya. Cafaharcun cuaha me nina jan xi maji vutsejen, maji hndē, maji tsujyihya. <sup>21</sup> Hacuaha tsajin camacjincacun me tsēhē xi catsiquehen xicjin me, o tsēhē xcusun xi sahmi me ngatsē rē xi ma rē me cju surqui, o tsēhē cjuatsehen xi sahmi ngajñi rē me sa chjuun cojo chjuun o sa xihin cojo xihin, o sa tsēhē cjuachējē rē me. Catsindeyaain me xcusun rē me.

## 10

### *Ángel xi yaha xtē lihndi xujun*

<sup>1</sup> Hya xi camá ne, ngajan cahvē ngu ángel xi hñu cju, nduvajne tsēhē ngahnga tixtēcun rē yufi. Hacuaha ngu yejña cavindee rē rcu ángel jan. Xcun ne, seti sacuaha tsuhi; hane tyuhmi rē ne, tsejen sacuaha ngu ndihi hndē xi vitjen. <sup>2</sup> Hane yahatsja ngu xtē lihndi xujun xi cavixinga. Hacuaha cavisane ntsacu quixi xcun ndachacun hane xi scun ne, xcun nangui quixí. <sup>3</sup> Ángel jan ne, cajindaya cojo ngu xta hñu, hane nuhya rē sacuaha xi tsichan ngu chu xa. Hacuaha hora xi cajindaya ne, cachja xta rē yatu chuhun vatē. <sup>4</sup> Hora xi cachja yatu chuhun jan ne, cavéjñacácun xi tsihindú cju jan peru casahmee ta, cahndē ngu xta tsēhē ngahnga xi cachja cojo ná cuitjin:

—Caveni nihindi cju rē yatu chuhun vē ta, cuiyujhma cju vē.

<sup>5</sup> Hya xi camá ne, ángel xi cahvē xi secun xcun ndachacun cojo xcun nangui quixí jan ne, catsiquijin tsja quixi ngahnga. <sup>6</sup> Hane casua cjuaquixi rē hisca caveyanangui rē Nina xi tacun yējē nu yējē nixtin, me xi hacuaha catsicha rē ngahnga cojo yējē ni xi tjin rē, cojo nangui cojo yējē xi tjin rē, cojo ndachacun cojo yējē xi tjin rē. Cuitjin cachja xi casua cjuaquixi rē:

—Vindeyaain sa rē ta, <sup>7</sup> ha ndiya jiya nixtin xi suacuenda ángel xi má yatu. Hya tsijane tyjo rē ne, hane cumachihin cju

xi jiyahma rē Nina, cjuā xi casua me camachaya rē profeta xi sahmi xa rē me.

<sup>8</sup> Hya xi camá ne, ngajan cahndē nga xta xi cachja tsēhē ngahnga cojo ná cuitjin:

—Tihin chjehe xujun lihndi xi tjin tē jan tsēhē tsja ángel xi secun xcun ndachacun cojo xcun nangui quixí. —Cuatjin cachja xta cojo ná.

<sup>9</sup> Vēhē xi cējētjēngē ángel hane cafehya rē xi catisua ná xujun lihndi jan. Hane cachja cojo ná cuitjin:

—Juhun, chjehe xini cjuā rē cojo sa xi titehercui. Cjuā jan ne, sahmi sa rē cahntsue, peru ntsove ne, sahmi haxi rē.

<sup>10</sup> Sehe cafaha xujun lihndi jan tsēhē tsja ángel, hane cajínē. Hane ntsuva ne, camá haxi rē sacuaaha xi cajínē tsjen, peru xi cafē cajínē ne, cahntsua canangui naha ne, camahmu. <sup>11</sup> Sehe cavuya cachja nga cojo ná cuitjin:

—Tjin xi cuinoje ngu ndiya nga ngatsē rē Nina. Cuinoje tsēhē xutacjín, xuta xi hacjahi hacjahi nación rē me, xuta xi hacjahi hne chja me, hacuaaha cojo xuta xi hñu cjuā me ngatsē rē xi vitexa me.

## 11

### *Jo testigu xi cahme ne, cavuya nga cjuahñu rē*

<sup>1</sup> Hya xi camá cajinē ne, casua ná ngu rquí ya naxu xi machjirēhē sacuaaha ngu ya chuva. Sehe cachja ángel jan cojo ná cuitjin:

—Tihin chjehe chuva rē yungun xi matitjun rē Nina cojo tsēhē ngasuncun. Hacuaha texqui me xi faharcun ngajan.

<sup>2</sup> Xi nichove yungun xi matitjun ne, hacuiin cojo cahndē xi má ndatsen rē nichove. Xi canichuviin vē. Cahndē vēhē ne, satētsja xutaxín xi macjaain rē me Nina. Me xi cuacun vē ne, tsinguetsun rē vē, hacuaaha tsinguetsun rē nandya rē Nina xcun xi yachan jo sá cojo xcusun tsehen xi cún me. <sup>3</sup> Xcun nixtin vēhē ne, tsingátju jo testigu naha, hane me xi cuacun vē ne, cuichja me xcusun xi sehe cumá. Ngu mil cojo jo cientu cojo jyanchan nixtin jan ne, cuichja me cjuā naha, hacuaaha cuaja me tsjian rē cjuachoho.

<sup>4</sup> Jo me vēhē ne, hacui jo ya olivu xi tjin cjuā tsēhē, hacuaaha hacui me xi jo candeleru xi siu xcun Nina, me xi vitexa ngasunhdē. <sup>5</sup> Sa tjin ngu xuta xi meje sahmi me dañu me ne, cuetju ndihi tsēhē hntsua me hane tsicjēya rē xi chohovēē rē me. Chuva vēhē cueya tu yo ni xi meje xi choho sahmi cojo rē me. <sup>6</sup> Jo me vēhē ne, siutsja me ngahñu xi cuechja me ngahnga sehe cuaain tsi nixtin xi cuehya me. Hacuaha satē rē me ngahñu xi sahmi me xi nandá ne cuya jni o xi cuanguihmu

rë me nangui cojo yějë xcusun cjuacjintacun. Cuatjin cumá tu cutjin cjin ndiya cuma meje sahmi me.

<sup>7</sup> Ndatjin, peru hya xi cafë casua me cjuaquixi rë me ne, ngu me sacua ha ngu chu chojyíhi xi miji tséhë nduchin ne, sahmi chu si cojo rë me, hane scaa ru cjue chu xcun hane tsiquehen chu me. <sup>8</sup> Hane nima jan ne, hacuiin xinchaniji ta cuiyuju ndiyatë rë ciudad jyë. Ciudad jyë jan ne, sa xi chjahanchuvan ne, cuma cuinújan xi hmí rë Sodoma cojo Egipto. Ngajan ni ne, cahme Nai naja xcun cru, hane ngajan cuiyuju nima. <sup>9</sup> Xcun xi jyan nixtin vasen ne, jemu cjuehe xuta. Cjuehe me tséhë yějë ni nandya, tséhë yějë ni tjë, tséhë yějë ni hne cojo tséhë yějë ni nación. Cjuehe me scutsejen me nima, hane tsingatiin me xi xinchaniji nima. <sup>10</sup> Hane xuta xi siu ngajan ne, jercu ndama rë me ngatsë rë cjuaveya jan. Hisca cuiyuju me suhi hane tsingatju me cuatjo ngajñi xicjin me. Cuatjin sahmi me ta tjin rë me cjuasua xi cafë jo profeta jan xi jercu casua me cjuañihi.

<sup>11</sup> Peru xi cafë jyan nixtin vasen jan ne, xta xi sua Nina xi tséhë cjuahñu ne, cavisehen nga rë nima. Hane caxinchacun quixi me. Ngajan xi ngu chircun jyë cavisehen rë xuta xi cavutsejen rë me. <sup>12</sup> Hya xi camá ne, me xi cavuya xta rë ne, cahndë me ngu xta hñu xi cachja tséhë ngahnga cuitjin:

—Nduvun nuju nguehe.

Ngajan xi quijiniiji me ngahnga ngajñi ngu yuffi. Hane cavëë xuta xi chohovëë rë me ta quijiniiji me. <sup>13</sup> Ha hora vëhë ni ne, jercu cjuachan cafani nangui hane tséhë chuva rë të rquí tséhë ciudad jan ne, cavixujne ngu. Hane ngatsë rë me vëhë ne, yatu mil xuta cahme. Ngajan xi xuta xi cavangui me ne, jercu catsacjun me camá. Sehe casahmi jyë casahmi hnga me Nina xi tacun ngahnga.

<sup>14</sup> Cojo vëhë cajnetaha cjuacjintacun xi majo. Peru ha cjuehe xi ma jyan.

*Xcusun xi camá hya xi cafane tyjo xi má yatu*

<sup>15</sup> Hya xi camá ne, catsijane ángel xi má yatu tyjo rë, sehe canuhya rë tséhë ngahnga xta hñu xi cachja cuitjin:

Jingujyë rë nandya xi vitexa xuta ngasunhdë xi matitjun ne, cavisehen gobiernu rë Nina naja cojo Cristu, me xi catsingatju me.

Hane me vëhë sahmi me gobiernu yějë nu yějë nixtin.

<sup>16</sup> Ngajan xi catsiyëjë can ñuju xuta changá xi siu me xcun cahndë rcun rë me ngajan xcun Nina ne, caticjan xcun me, hane cafaharcun me Nina. <sup>17</sup> Hane cuitjin cachja me:

Tihin nacuechji nuju, Tatá Nina. Ngayun jercu hñu camahani ngayun.

Hacui ni yun hya, hacui ni yun quihndë, hane hacui ni yun  
yëjë nixtin.

Hindë ticujun ngahñu jyë nuju xi satë nuju  
hane ha tivetsuhun nihñu gobiernu.

<sup>18</sup> Xuta ne, choho hvë me yun,  
peru cavechu nixtin xi macjan nuju cojo cjuahngatacun rë  
me.

Cafehe hora xi nihñu cuendun tsëhë nima.  
Tuhun chjí rë me xi casahmi xa nuju sacuaha profeta,  
sacuaha xuta nuju, sacuaha xutaxín xi faharcun me ñihi nuju.  
Tuhun rë yëjë ni me, sa yehe sa langa me.

Hane me xi tsicjëya rë cojo xcusun rë ne, tuhun rë me xi cjueya  
me.

<sup>19</sup> Ngajan xi cachjahaxin rë tsjian rë tingotjo rë yungun  
rë Nina ngajan ngahnga, hane cahntsua yungun jan ne,  
camatsejen caxa ximinchacun xi yaha contratu xi casahmi  
Nina cojo xuta rë me. Cavatë ndihichuhún, cavaneya, catsinga  
chuhun, cafani nangui hacuaha cavaha ngu tsi ndyojo xi  
jercu hñu camahani. Cuatjin camá.

## 12

### *Scaanya yë xitsehen cojo quihndi xi catsingatju Nina*

<sup>1</sup> Hya xi camá ne, camatsejen cjuarcun xi sahmi sen ngajan  
ngahnga. Camatsejen ngu chjuun xi tixtëcun ran tsuhi. Hane  
sá ne, tacun ngahma rë ntsacu na. Hane ngu corona xi camá  
tsëhë tejó niñú ne, vëhë quitaha xten na. <sup>2</sup> Hane chjuun jan  
ne, meje tsin quihndi ran. Jercu jindaya na ngatsë rë cjuahmu  
cojo cjuachoho tsëhë hacutjin tivatju ran. <sup>3</sup> Hane camatsejen  
nga ngu sen ngajan ngahnga ta, camatsejen ngu yë xi jercu  
jyihí chu; hani xcusun ru. Chu jan ne, yatu má rcu chu, tē má  
ndyaja ru. Hane jima ngu rcu chu híncha sun ngu corona.  
<sup>4</sup> Cojo ndetsihin chu ne cajavëjne chu ngu cahndë tsëhë jyan  
cahndë rë niñú rë ngahnga, hane cacandi chu nangui. Hane  
yë jan ne, cafaña vasen chu xcun chjuun xi ha hindëya tsin  
quihndi ran cojo sa xi tsinguijne jingu chu quihndi rë na  
hora xi tsin. <sup>5</sup> Hya xi camá ne, na vëhë ne, catsin rë na ngu  
quihndi xihin. Hane quihndi xihin jan ne, yaha bastón xi  
cuitexa me cojo yëjë ni nación cojo ngahñu cjuá xi tjin rë me.  
Hane quihndi ran jan ne, cachjaha rë xcun Nina, ngajan xcun  
cahndë rcun rë me. <sup>6</sup> Hane chjuun jan ne, cavanga na quiji  
na ngu xín. Ngu cahndë xi Nina tjin chjine rë me xi cumá ran.  
Hane ngajan sacu xi sinë na xcun ngu mil cojo jo cientu cojo  
jyanchan nixtin.

<sup>7</sup> Hya xi camá ne, cavetsihin ngu si ngajan ngahnga. Miguel  
cojo yahnga ángel ladu rë me ne, casahmi me si cojo yë xitse-  
hen jan hacuaha cojo ángel ladu rë xitsehen. <sup>8</sup> Hane cacaain rë



yë jan cojo ángel ru, hacuaha catsichaja chu cahndë ru ngajan ngahnga. <sup>9</sup> Vëhë xi caningatjen ru xcun ngasunhdë. Yë jan ne, jemu changá chu. Xitsehen xi matitjun o Satanás hmí ru. Chu ndacha chu, vindacha ru xuta ngasunhdë. Hane caningatjexin ru cojo ángel ru hiscan ngasunhdë.

<sup>10</sup> Hya xi camá ne, cahndë ngu xta xi jemu hñu cachja ngajan ngahnga cuitjin:

—Quihndë cavechu nixtin xi Nina cuaxëtje me xuta, cumatsejen ngahñu rë me cojo gobiernu rë me. Hacuaha tsejen xi hñu cjua rë Cristu, me xi catsingatju me ta, cama catsingatjexin me chu xi vinchajyë xingueen. Nixtin nixten cavinchajyë rë me xcun Nina naja, peru hindë tsajin. <sup>11</sup> Hane xingueen jan ne, caca rë quiji me xcun ngatsë rë jni rë Tsánga jan cojo ngatsë rë cjuaquixi rë me xi casua me tsëhë Nina ta, hacuiin machuvacacun me xi cjue xcun me cojo Nina handasa cjueya me. <sup>12</sup> Hane ngatsë rë vëhë ne, ¡catama sua rë ngahnga cojo me xi siu xcun! Peru ¡ay tsëhë nangui cojo ndachacun! ta, tsëhë xi canduva tjengui rë xitsehen xi matitjun. Hacuaha jemu quitsë rë cjuaxti tsëhë xi vëë xi nixtin rë ne, meje cuijnetaha. —Cuatjin cachja xta jan.

<sup>13</sup> Hya xi camachaya ru xi caningatjen ru nangui ne, cavet-sihin cavanga cojo chu chjuun xi catsi ran quihndi xihin jan. <sup>14</sup> Peru chjuun jan ne, cafahtsja na jo tyjunga rë chu jya xi jercu jyihi cojo sa xi cuma cuitjen na tsëhë chu yë hiscan cahndë xi tjín chjine xi cuma ran ngajan ngu xín. Hane ngajan sacu xi sinë na xcun ngu chan cojo jo chan cojo vasen chan, hane cuechiintaain chu yë na. <sup>15</sup> Ngajan xi chu yë jan ne, cavaxë chu tsëhë hntsua chu nandá sacuaha ngu ndajyë cojo sa xi cuechutaha rë chjuun jan ne, cjue tyjava na cojo ngahñu rë ndajyë. <sup>16</sup> Peru nangui ne, cavisecoo rë chjuun jan, hane caseya tsjuhun ne, cavingui rë ndajyë xi cavetju rë yë jan. <sup>17</sup> Vëhë xi yë jan ne, jercu camaxti ru cojo chjuun jan hane sehe quiji casahmi chu si cojo tjë rë na xi cavangui. Casahmi chu si cojo xuta ran xi vetjo cjua xi cavitexa Nina hacuaha sua me cjuaquixi rë Jesús.

## 13

*Yë xitsehen ne, casua chu ngahñu xi cjuahatsja chu chojyihí*

<sup>1</sup> Hya xi camá ne, cavejña chu yë jan tjehe ndachacun, hane cahvë xi ngu chu chojyihí ne, tivetju chu tsëhë ndachacun. Të má ndyaja ru hacuaha yatu má rcu chu. Hane të corona seya xcun ndyaja ru. Hane jima ngu rcu chu ne, yaja ngu ñihi xi tsitjungui rë Nina. <sup>2</sup> Chu chojyihí xi cahvë vë ne, sacuaha ngu xa hindu jyë cuatjin jyihí chu, peru ntsacu chu cojo tsja chu ne, sacuaha ntsacu cojo tsja chu oso; hane hntsua

chu ne, sacuaha hntsua chu xa sine cjan rë. Hane yë jan ne, casua chu vë ngahñu ru cojo cahndé rcun rë chu, hacuaha casua xa rë chu. <sup>3</sup> Hane ngu rcu chu jan ne, casacuhmu rë hane tsejen xi tsajin rqui rë, ta cueya. Peru cojo yëjë sa ne, camandaja. Hane jinguyjë ni xuta ngasunhndë ne, jercu quijircun rë me xi camandaja. Hane cojo cjuasua tjengui me chu. <sup>4</sup> Hane xuta ne, caticjan xcun me cafarharcu me chu yë jan ta, tsëhë xi casua yë cahndé xi vitexa chu. Hacuaha cafarharcun me chu chojyihî jan. Cuitjin cachja me tsëhë chu:

—Ndastu yo xi cuechu xi cumá sacuaha chu vi. Ndastu yo cuma scaanya cojo chu. —Cuatjin cachja xuta tsëhë chu.

<sup>5</sup> Chu jan ne, casetaha ngu hntsua chu xi jemu cojo cjuaxta chja chu hacuaha tsitjungui ru Nina. Hane casacu ru cahndé xi cuitexa chu xcun xi yachan jo sá. <sup>6</sup> Hane cavetsihin xi choho cachja chu tsëhë Nina, canchati chu tsëhë ñihî rë cojo tsëhë cahndé hiscan viyuju Nina, hane tsëhë yëjë sa me xi siu me ngahnga. <sup>7</sup> Hane cafarhaxa chu xi sahmi si chu cojo xuta xi tyjahî cjuatacun rë me cojo me xi ndaja cjuinduju me cojo Nina. Hane caa ru cjue chu xcun. Hacuaha cafaaha xa chu xi cuitexa chu xuta rë yëjë ni tjë, yëjë nandya, yëjë hne cojo yëjë nangui. <sup>8</sup> Hane jinguyëjë me xi viyuju me ngasunhndë ne, cafarharcun me chu. Yëjë ni me xi tsajin ñihî rë me xcun xujun rë Tsánga rë Nina xi hisca ntsacu cavetsihin ngasunhndë ne, cavejña xi cueya. Tsajin ñihî rë me jan ta, tsajin rë me ngahñu xatsë. Hane me vëhë cafarharcun me chu.

<sup>9</sup> Yo ngayun xi tjîn nuju cjuasua xi cuinuhyun cjua vihi, ndaja tetuhunrcun. <sup>10</sup> Me xi satë rë xi cuma me presu, cuatjin cumá. Me xi satë rë me xi cueya me cojo quicha, cuetjucaa jain. Jinguyëjë rë vëhë ne, mameje rë xi xuta xi macjain rë me Nina ne, cjuecani rë xi cumacjain sa rë me.

<sup>11</sup> Ngaxtun vëhë ne, cahvë nga ngu chu chojyihî, hane tivetju chu tsëhë nangui. Chu chojyihî xi majo ne, tjîn jo ndyaja ru sacuaha tjîn chu tsánga, peru chja chu sacuaha ngu yë jyë. <sup>12</sup> Hane hacuaha cojo chu vëhë casatë rë chu ngahñu xi casatë rë chu xicjin cojo ñihî ru. Hane casahmi chu vë xi yëjë ni xuta xi siu ngasunhndë ne, cjuaharcun me chu chojyihî xi tjun jan, chu xi handasa cueya chu xi casacuhmu rë ne, camandaja. <sup>13</sup> Hane cama casahmi chu vë cjuarcun yehe cojo seña. Casahmi chu xi cuixu ndihî tsëhë ngahnga, hane xuta ngasunhndë ne, cavutsejen me cjuarcun. <sup>14</sup> Cuatjin cavindacha chu vë xuta ngasunhndë cojo cjuarcun xi cama casahmi chu ngatsë rë chu xi tjun. Hane cavitexa chu xi xuta ne, cuaxëtaha me ngu xcusun rë chu tjun jan xi casacuhmu rë cojo quicha peru cojo yëjë sa ne, quicun chu. Hane cuatjin casahmi me. <sup>15</sup> Hane chu xi majo jan ne, casacu ru cahndé xi

sua chu xta rë xcusun jan cojo sa xi cuma cuichja xcusun jan, hacuaha cuma sahmi xcusun jan xi cueya tu cutjin cjín me xi tsingatiin xi cjuarcun xcusun jan. <sup>16</sup> Hane xcusun jan ne, casahmi nguujyë xi yëjë ni xuta ne, setaha ngu sellu tsja ladu quixi o sa xten me. Cuatjin casetaha rë xuta, sa quihndi, sa changá me, sa nchina, sa yuma me, sa xuta ndaya tjin o sa xi mosu hndixahan; yëjë ni me casetaha rë me. <sup>17</sup> Hane chuva vëhë ne, sacuiin cahndë xteña hacuaha sacuiin cahndë cuatsë sa xi casetaain rë me sellu jan cojo ñihi rë chu chojyihí jan o cojo xqui rë letra rë ñihi ru.

<sup>18</sup> Cjuatacun vihi ne, tjin mé vijne, peru meje rë xi cuacjantaha me cjuatacun rë me ta cuitjin fi cjua: Catitsichuva me xqui rë chu jan ta, hatuxa xqui rë ngu xuta xihin. Hane xqui rë jan ne, jyan cientu cojo jyanchan jyun má.

## 14

### *Ngu cientu cojo yachan ñuju mil me xi cavatsë Nina*

<sup>1</sup> Hya xi camá ne, cavutsejen nga, hane ngajan secun Tsánga jan, secun quixi xcun naxi xi hmí rë Sion. Hacuaha siu cojo me ngu cientu cojo yachan ñuju mil xuta xi casetaha xten me ñihi rë Tsánga jan cojo ñihi rë Nahmi rë me. <sup>2</sup> Hacuaha canuhya rë ngu xta tsëhë ngahnga xi nuhya rë sacuaha fane jemu cjín nandan xi vanga o sacuaha xi jemu hñu faneya. Hacuaha nuhya rë sacuaha xi tsijane cha chjine arpa rë cha. <sup>3</sup> Hane xuta jan ne, tisë me ngu sun xatsë xcun cahndë rcun rë Nina hacuaha xcun ñuju xcusun xi quicun cojo can ñuju xuta changá xi viyuju me ngajan. Hacuuiin yëjë me xi tjin rë me cahndë xi cuma rë me sun jan ta, suvá ngu cientu cojo yachan ñuju mil me xi cuacun jan xi cachaha rë me tsëhë ngasunhndë, me vëhë cuma rë me. <sup>4</sup> Me xi cuacun vë ne, catsinguetsiin me cjuatacun rë me cojo yachjin, ta caviyuju suva me. Me xi cuacun vë ne, tjengui me Tsánga tu jani xi cjui. Me xi cuacun vë ne, hacuaha me xi cachjahaxin rë tsëhë ngajñi rë yahnga xuta xi cuma me sacuaha ngu cuatjo xi cumá rë Nina cojo Tsánga. <sup>5</sup> Me xi cuacun vë ne, hisca xi ngu cjuandesu cavetjiin tsëhë hntsua me; ta tsajin xi cún rë me.

*Jyan ángel xi cachja hacutjin cumá cojo xuta xi faharcun rë chu chojyihí*

<sup>6</sup> Sehe cahvë ngu ángel xi hacjahi xi vitjen vasencja rë ngahnga. Ángel vëhë ne, cjuecani rë cjuandajyihí rë Nina xi machuvaain ngahñu rë. Hane sua rë xuta ngasunhndë tsëhë yëjë ni nación, o tjë, o hne, o nandya xi cumachaya rë me cjua jan. <sup>7</sup> Hane cachja cojo xta hñu cuitjin:

—Chjuhuncun rë Nina hacuaha nihñu jyë nihñu hnga me ta, tsëhë xi ha cavechu hora xi sahmicuenda me yëjë ni. Chjuhuncun me xi casahmi ngahnga cojo nangui cojo ndachacun cojo nanda yufa.

<sup>8</sup> Sehe tjengui rë me ngu ángel xi majo, hane cachja cuitjin:

—Camá cafë ngahñu cjua rë gobiernu xi vitexa rë nandya Babilonia. Xuta rë nandya jan ne, catsitsehen yahnga xuta tsëhë xi sacuaha catsichihí rë me cojo xan xi hacui cjuatsehen xi sahmi ngu xihin cojo chjuun xi hacuiin tsëhë.

<sup>9</sup> Sehe tjengui rë me ngu ángel xi majyan, hane cachja hñu cuitjin:

—Yo xi cjuaharcun rë chu chojyihí o sa xi cjuaharcun rë xcusun ru, hane setaha sellu ru xten o sa tsja me ne, <sup>10</sup> xuta jan ne, tjin rë me xi cuihingui me xan xi hacui cjuacjan rë Nina, hane tsajin mé xi tsinguijne rë ngahñu rë cjuacjan jan. Xuta jan ne, cuatju me cjuahmu tsëhë ndihí tsëhë azufre xi seti, cuatjin cuatju me xcun ángel cojo Tsánga. <sup>11</sup> Hane nihndi rë ndihí rë cjuahmu rë me ne, cuiji yëjë nu yëjë nixtin. Sa nixtin sa nixten ne, sacuiin rë me cahndë cjuahajenda me tsëhë. Cuatjin cumá cojo me xi faharcun ru cojo xcusun ru. Cuatjin cumá cojo me xi siutaha rë sellu ru.

<sup>12</sup> Jinguyëjë rë xi vatju vëhë ne, mameje rë xi xuta xi macjain rë me Nina ne, cjuecani rë xi cuetjo me cjua xi cavitexa Nina hacuaha cumacjain sa rë me.

<sup>13</sup> Hya xi camá ne, cahndë ngu xta tsëhë ngahnga xi cachja cojo ná cuitjin:

—Nihndi cjua vihi: “Xuta xi ha cueya me quihndë cojo nixtin xi sehe nduva ne, jercu ndaja tsëhë me sa xi tjengui me ndiya rë Nina.”

Hasen rë Nina ne, chja tsëhë me cuitjin:

—Juun, cjuahajenda me tsëhë xi tsijenda rë me ta, tsëhë xi cumatsejen chjí rë xa xi casahmi me. —Cuatjin chja Hasen rë Nina.

*Ángel ne, fanga me xuta ngasunhndë xi satë rë me cjuacjan rë Nina*

<sup>14</sup> Hya xi camá ne, cavutsejen ngu yufí tyava, hane xcun yufí ne, tacun ngu xi tsejen sacuaha quihndi rë xuta. Quisun rcu me ngu corona tsëhë oro hane yahatsja me quicha yuju ta cuatë me xitjë. <sup>15</sup> Ngajan xi cavetju nga ngu ángel tsëhë ndava Nina hane hñu cajindaya cojo ángel xi tacun xcun yufí jan. Cuitjin cachja:

—Chjuhun quicha nuju nangun ta, ha cavechu nixtin xi xti ta, tsëhë xi camá quichji cosecha tsëhë ngasunhndë.

<sup>16</sup> Hya xi camá ne, me xi tacun xcun yufi jan ne, cavaja me nangui cojo quicha rë me, hane tjë rë ngasunhdë ne, camá cachaya rë.

<sup>17</sup> Hya xi camá ne, hacuaha cavetju ngu ángel xi cavetju tsëhë ndava Nina xi tacun ngahnga ne, hacuaha yaha ngu quicha yuju. <sup>18</sup> Hane cavetju ngu ángel xi majo. Ángel vë ne, tacuntsja rë ndihi. Hane ángel vë ne, hñu cajindaya cojo ángel xi yaha quicha yuju. Hane cuitjin cachja cojo:

—Chehe quicha yuju riji ne, tiche yëjë hne rë uva tsëhë xcun ngasunhdë ta tsëhë xi uva rë ne, jemu quichji.

<sup>19</sup> Hya xi camá ne, ángel jan ne, catsingatju quicha rë xcun nangui ne, cavatë rë uva xi hacui xuta tsehen. Hane cavincha rë cahndë hiscan xinune rë cojo sa xi cumatsyuhun ne cuetju nandá rë sacuaha satë rë matsyuhun cjuacjan rë Nina. <sup>20</sup> Camatsyuhun hiscan xín hitsë tsëhë nandya, hane jemu cavetju jni hiscan camatsyuhun uva jan. Xi camiji jni ne, cavechutaha rë hiscan frenu rë chu naxin hacuaha cavanga ngu chuva rë jyan cientu cojo can kilómetro.

## 15

### *Yatu ángel xi siutsja cjuacjintacun*

<sup>1</sup> Hya xi camá ne, cahvë ngajan ngahnga ngu nga sen cjuarcun xi jemu fircun naja. Cahvë yatu ángel cojo yatu cjuacjintacun. Hane cojo cjuacjintacun jan ne, cuijnetaha cjuañihi xi cumá ta, seyyu cjuacjan rë Nina.

<sup>2</sup> Hacuaha cahvë sacuaha ngu ndachacun hasen sacuaha hasen ndoyojo tsin, hane tsejen sacuaha tecjan cojo ndihi. Hane ngajan hinchacun xuta xi cacaa rë me quiji xcun tsëhë chu chojyih cojo xcusun ru cojo xqui rë ñihi ru. Secun me cojo arpa xi cafahatsja me tsëhë Nina. <sup>3</sup> Me vëhë ne, së me sun xi tsëhë Moisés, me xi casahmi xa rë Nina hane hacuaha tsëhë Tsánga. Cuitjin fi cjuarë:

Jemu má nihñu xa, jemu fircun niji tsëhë.

Nai niji ngayun. Ngayun, tsajin mé xi maji nihñu.

Quixi nújun, hacuaha chichihin ndiya nuju.

Ngayun vitexun jinguyëjë ni nación.

<sup>4</sup> ¿Yo xi tsacjuuin nuju, tatá? Tsajin yo.

Yëjë ni me sahmi jyë sahmi hnga me yun ta tsëhë xi ngu ni ngayun xi tyjahi cjuatacun nuju.

Vëhë xi yëjë ni nación cuinduva cuiticja xcun nuju tsëhë xi cumatsejen ndaja xa cjuaquixi nuju.

<sup>5</sup> Hya xi camá xi cavatju vihi ne, cavutsejen nga ngahnga ne, hane tixaha hiscan cahndë rcun rë ndihya tsjian rë Nina hiscan hinchacuachu xi camá cojo Nina. <sup>6</sup> Hane tsëhë ngajan ne, cavetju yatu ángel xi cuacun jan xi siutsja me xa

rë yatu cjuacjintacun xi cumá. Ángel jan ne, yaja tsjian rë nachjun ndaja xi ndaja tyjahi. Hacuaha tjihñucja ndanisin rë cojo cinturón tséhë oro. <sup>7</sup> Ngajan xi ngu xi quicun jan xi ñuju má ne, casua rë yatu ángel xi cuacun jan ngu ngu tyucu rë oro xi ndaja teya. Hane tyucu jan ne, quitsë rë cojo cjuacjan rë Nina, Nina xi tacun cuaha me yějë nu yějë nixtin. <sup>8</sup> Hane ndihya tsjian rë Nina jan ne, catsë rë cojo nihndi xi nduva tséhë cjuahasen rë Nina xi seti cojo ngahñu rë me. Cuatjin camá xi tsajin yo ma visehen ngajan hisca xi cuijnetaha nixtin rë cjuañihi xi yahatsja yatu ángel jan.

*Tyucu xi hinchu cjuacjan rë Nina*

## 16

<sup>1</sup> Hya xi camá ne, cahndë ngu xta hñu xi vetju tséhë ndava Nina hane cachja xta jan cojo yatu ángel jan cuitjin:

—Tangun titejnu tyucu jan cojo sa xi cjuacjan rë Nina ne, satë rë ngasunhdë.

<sup>2</sup> Cojo vëhë ne, quiji ángel xi tjun jan ne, cavitsingaxten rë tyucu rë xcun nangui. Hane yějë xuta xi yaha me sellu rë chu hacuaha faharcun me xcusun ru ne, casetaha rë me ngu xcusun chíhin vetju xi jemu cjan rë.

<sup>3</sup> Sehe ángel xi majo ne, cavitsingaxten tyucu rë xcun ndachacun. Hane ndachacun ne, cavuya jni sacuaha jni rë ngu nima. Ngajan cafë cahme xi hinchu rë ndachacun.

<sup>4</sup> Sehe ángel xi majyan ne, cavitsingaxten tyucu rë cojo sa xi casatë rë nandan ndajyë cojo hiscan xi vetjun nandá. Hane nandan jan ne, hacuaha cavuya jni. <sup>5</sup> Ngajan xi cahndë xi cachja ángel xi tacuntsja nandan jan cuitjin:

—Quixi yun chuva vihi. Ngayun nechun cuaha, hacuaha cavinechun. <sup>6</sup> Quixi yun chuva vihi ta catsinguitsojo me jni rë xuta nuju cojo profeta xi chja cjua nuju. Hane canicuyun chuva rë ta hacuaha cavanga jni rë me.

<sup>7</sup> Hacuaha canuhya rë xi ngasunscun rë yungun ne, cafayangui cuitjin:

—Juun, cuatjin camameje rë. Tatá, Nina yun, hane tu mé ni ne, ma nuju. Jemu quixi cjua xi vitexun.

<sup>8</sup> Hya xi camá ne, ángel xi má ñuju ne, cavitsingaxten rë tyucu rë xcun tsuhi. Ngajan casacu rë ngahñu xi jemu cuaca rë xuta cojo ndavá rë. <sup>9</sup> Hane xuta ngasunhdë ne, cati me cojo ndavá hñu. Peru cahndë xi sahmi jyë sahmi hnga me Nina ne, canchati me tséhë ñihi rë Nina, me xi vitexa me xcun yějë cjuacjintacun vihi.

<sup>10</sup> Hya xi camá ne, ángel xi má hñu ne, cavitsingaxten rë tyucu rë xcun cahndë rcu rë chu jan. Hane ngajan camá xi nación xi sahmi chu gobiernu tséhë ne, jemu jñu camahani

camá jingujyë ni. Hane xuta ne, cajinëne me neje me tsëhë xi jercu má rë me. <sup>11</sup> Hane nchati me tsëhë Nina rë ngahnga ngatsë rë cjuahmu rë me cojo tsëhë nindu xi vetju yojo rë me. Nchati me tsëhë Nina cahndë rë xi choho camá rë me tsëhë cjuatsehen rë me.

<sup>12</sup> Hya xi camá ne, ángel xi má jyun ne, cavitsingaxten rë tyucu rë xcun ndajyë jyë xi hmí rë Eufrates. Ngajan xi nandan jan ne, caxiya hane camandaja ndiya rë cojo sa xi ma vatjucja rey xi nduva ladu vetjucaa tsuhi.

<sup>13</sup> Sehe cahvë jyan hasen tsehen xi cun sacuaha licuen, cavetju tsëhë hntsua chu yë jyë jan, tsëhë hntsua chu tjun cojo tsëhë hntsua chu ndacha. <sup>14</sup> Hane hasen jan ne, hacui hasen tsehen xi ma sahmi seña cjuarcun hacuaha hacui xi sahmi tangun rey, xuta matitjun rë jingujyë ni ngasunhdë cojo sa xi xuta jan ne, sahmi si condra rë Nina xi ma sahmi me yëjë ni hya xi cuetjucaa nixtin rë Nina.

<sup>15</sup> Tetuhunrcun cjua rë Nina xi chja cuitjin: “Tjin chjine yun ta, tu ñahñu ni nduvá sacuaha nduva ngu chëjë. Jercu ndaja tsëhë yo xi tacun quicun, sacuaha ngu me xi tacun chjine tsjian rë me xi cuaja me cojo sa xi tsajin yo sacutsejentë cjuasava rë me.” Cuatjin chja cjua jan.

<sup>16</sup> Hane casahmi xi cama tangun rey jan ngajan ngu cahndë xi hne hebreo ne, hmí rë Armagedón.

<sup>17</sup> Hya xi camá ne, ángel xi má yatu ne, cavitejnu tsëhë tyucu rë ngajñi tjo. Ngajan xi hiscan ndava Nina, hiscan cahndë rcun rë me, canuhya rë ngu xta hñu xi chja cuitjin:

—¡Ha camá cajnetaha!

<sup>18</sup> Ngajan xi sehe cavetsihin cavatë ndihi chuhun, cafaneya, catsinga chuhun, cojo xi jemu hñu cafani nangui. Hisca cjëë cjuani nangui cuatjin jinguyëjë rë xi caviyuju xuta xcun ngasunhdë ta, jercu cjuachan camahani cafani nangui. <sup>19</sup> Hane ciudad jyë ne, jyan rquí caseya tsuhun. Hacuaha yahnga nandya rë ngasunhdë ne, cavixujne. Hane Nina ne, catsinguitsen me cjuatsehen rë nandya Babilonia jyë hane casahmi me xi hacuaha cuma rë nandya jan castigu tsëhë cjuacjan rë Nina xi hinchu tyucu. <sup>20</sup> Hacuaha nangui xi vetju vasencja ndachacun cojo naxi ne, hya cafëya. <sup>21</sup> Hane tsëhë ngahnga ne, tsi ndyojo yehe cavixusun rë xuta jan. Hane chuva ngu tsi ndyojo vë ne, sacuaha yachan kilu hai. Hane xuta ne, canchati me choho cachja me tsëhë Nina ngatsë rë cjuacjintacun tsëhë tsi ndyojo jan ta, cjuacjintacun jan ne, jemu chircun camahani.

<sup>1</sup> Hya xi camá ne, ngu tséhë yatu ángel jan xi yaha tyucu ne, canduva tjengui ná ne, cachja cuitjin:

—Ndove ne, tsingácun ri castigu rë na xi viteña yojo rë, na xi tacun na xcun jemu cjín nandá. <sup>2</sup> Cojo na vëhë ne, rey tséhë nangui ne, casahmi me cjuatsehen; hane xuta ngasunhndë ne, catsichihî rë me cojo xan xi hacui cjuatsehen ran. —Cuatjin cachja ángel cojo ná.

<sup>3</sup> Ngajan xi ángel ne, quijicojo ná ngajñi nguijña ngu cahndë xín. Hane ngajan cahvë ngu chjuun xi quisun na ngu chu chojyihî xi hanî xi yatu rcu chu cojo tē ndyaja ru. Hane chu jan ne, yaha ñihî xi tsitjungui rë Nina. <sup>4</sup> Chjuun jan ne, yaja na tsjian chacun xi moradu cojo hani. Hacuaha tsjian vëhë hisca seti jyihî cojo oro cojo ndyojo ndacun hane cojo tu seti xi cavaqui rë. Hane yahatsja na ngu tyucu tséhë oro xi quitsë rë cojo xcusun tsehen cojo xi chocun rë cjuatsehen rë na. <sup>5</sup> Hane xten na ne, camahindu cjua vihi: “Ngu cjua xi meje rë cjuatacun: Babilonia, nangui xi matitjun. Nangui xi hacui na xi viteña yojo rë cojo yahnga xuta xi sahmi me cjuatsehen ne, fayanguî xuta xcusun rë na.” Cuatjin camahindu. <sup>6</sup> Hane camachaya ná ta na vëhë ne, chihî na ta cahvi na jni rë nima xi cahme me ngatsë rë xi macjain rë me Nina cojo jni rë nima xi casua cjuaquixi rë Jesús.

Hane hya xi cahvë na ne, ngahan ne, jercu quijircu camahani ná. <sup>7</sup> Ngajan xi cachja ángel cojo ná:

—¿Mé má fircun ri? Ngahan ne, suacuenda ri cjuatacunhma tséhë chjuun jan cojo tséhë chu chojyihî xi quisun na, chu xi tjín yatu rcu chu cojo tē ndyaja ru. <sup>8</sup> Chu chojyihî jan ne, quicun chu hatsëë, peru quihndë tsajin chu. Hane xi cuinduvaniji chu tséhë nduchin ne, jiya ndiya chu xi cjuëya chu. Hane xuta xi viyuju me ngasunhndë ne, me xi casetaain ñihî rë xcun xujun, xujun xi hisca ntsacu cavetsihin ngasunhndë, hinchâ ñihî rë me xi satë rë me cjuahñu xatsë xi sua Nina ne, me vëhë cjuercun rë me. Cjuercun rë me hya xi scuëë me chu ta quicun chu hatsëë, tsajin chu quihndë, peru cuya cuejña nga chu.

<sup>9</sup> Mameje rë cjuatacun ta chja nuhya rë, peru yatu rcu chu ne, nuhya rë xi má yatu ndetjun hiscan quisun na o sa nandya hiscan vitexa na jan. Hacuaha nuhya rë xi má yatu me xi vitexa ngajan. <sup>10</sup> Hñu me vëhë ne, ha cajnetaha nixtin xi cavitexa me. Ngu nga me ne, tivitexa me. Hane ngu sa me jan ne, hya xi cuitexa me, sahmi ngujoyë xi hacuiin cjín nixtin scaa rë me. <sup>11</sup> Hane chu chojyihî xi quicun chu hatsëë, peru quihndë tsajin chu, cojo chu vëhë cuma jyin me xi cuitexa me ngajan. Chu jan ne, ma jyin, peru hacuiin xín cuinduva chu ta,



tsëhë ngajñi rë me xi yatu jan ne, ngajan cuinduva chu hane cjui hiscan cjuëya cha.

<sup>12</sup> Hane të ndyaja ru xi cahye ne, hacui të xuta xi cjëë cjuahatsja me xa xi cuitexa me. Hane me vëhë ne, sacu rë me cahndë xi cuitexa me tangun cojo chu, peru ngu hora ni cjuecani rë nixtin rë me. <sup>13</sup> Hane me vëhë ne, cama sacuaha ngu ni cjuatacun rë me. Hane sahmi tangun me ngahñu rë me cojo gobiernu rë me sehe sua me xi cjuahatsja chu chojyihi. <sup>14</sup> Hane hya xi sahmi me si cojo Tsánga jan, scaa rë xi cjue xcun Tsánga cojo xuta xicjin. Hane xuta xicjin Tsánga ne, hacui me xi cavuxijin Nina, me xi ndaja finduju xi tjengui rë ta, Tsánga jan ne, Nai rë yëjë ni nai má me. Hacuaha vitexa me xuta xi vitexa. —Cuatjin cachja ángel cojo ná tsëhë na vëhë.

<sup>15</sup> Cachja sa ángel cojo ná cuitjin:

—Sacuaha nandá xi cahye hiscan xi tacun na xi viteña yojo rë na, nuhya rë xi má xuta tsëhë yëjë ni tjë, yëjë nandya, xuta cjín, xuta xi chja yëjë hne. <sup>16</sup> Hane me xi sacuaha të ndyaja ru ne, cuya xi choho scuëë me na xi viteña yojo rë, tsismi me na, hacuaha cuejña cuatjin na. Hane xi cavejña suva na ne, sehe sinë chu yojo ran sehe cuaca ran cojo ndihi. <sup>17</sup> Të me jan ne, cojo ngu ni cjuatacun meje sua me xa rë me cojo ngahñu cju rë me xi cjuahatsja chu chojyihi jan. Xi cuatjin casahmi me ne, camá hacuatjin cavincha Nina xahasen rë me xi cumá hisca nixtin xi cuma chihin hacutjin cavejñacacun Nina xi cumá. <sup>18</sup> Hane sacuaha chjuun xi cahye jan ne, nuhya rë xi má ciudad rcun xi satë rë xi cumatitjun tsëhë yëjë ni xuta xi vitexa xuta ngasunhdë.

## 18

### *Cjanengui nandya Babilonia*

<sup>1</sup> Hya xi cavatju vihi ne, cahvë nga ngu ángel xi nduvajne tsëhë ngahnga xi jemu tjin rë ngahñu cju rë. Hane nangui ne, casahasen rë cojo hasen rë ngahñu jan. <sup>2</sup> Hane ángel jan ne, cojo ngu xta hñu cajindaya cuitjin:

—¡Cjanengui! ¡Cafë ngahñu rë Babilonia jyë! Quihndë suva machji rë tsëhë xitsehen. Ngajan tsujyihiya hasen tsehen, ngajan vangui yëjë chu nisë xi jinë chu ngu xcusun chocun, chu xi chohovëë xuta chu. <sup>3</sup> Cuatjin camá rë ta tsëhë xi xuta ngasunhdë ne, cavincha sca rë me cojo xan rë cjuatsehen ran. Cojo na vëhë ne, me xi vitexa me ne, casahmi me cjuatsehen. Hacuanitjin tsëhë xuta xi sahmi me negocio ta, camanchina me ngatsë rë cjuatsehen ran. —Cuatjin cachja ángel.

<sup>4</sup> Sehe cahndë nga ngu xta tsëhë ngahnga xi cachja cuitjin:

—Ngayun xi xuta naha ne, tetjun tsëhë nandya vihi. Tangunxun cojo sa xi cuajiin yun cuatjunxcun jyë rë, hane satiin nuju cjuañihi xi satë rë xuta vëhë. <sup>5</sup> Jyë rë na xi hacui nandya vëhë ne, casexohnga rë hisca cavechu ngahnga. Hane Nina ne, cjuaha cuenda me tsëhë cjuatsehen ran. <sup>6</sup> Nicuyun tsëhë na chuva xi casahmi na. Jo cuatjin vechutaha castigu xi cumá ran. Tiseccun rë copa ran jo cuatjin sa sehe hitsë sa cumá cjan xi cuma rë copa xi cavincha na tsëhë xuta. <sup>7</sup> Ngojo rë cjuaxta rë na xi jercu sahmi na mé xi fehya cjuatacun tsehen rë na ne, ndaja tuhun ran cjuañihi cjuachoho. Cuatjin cumá ran ta, cuitjin catsingatahacacun na cachja na: “Tejña cahndë rcun ta matitjun ngahan. Hacuuiin cahan ngahan, satiin ná cjuachoho.” Cuatjin tsingatahacacun na. <sup>8</sup> Vëhë xi xcun ngu ni nixtin, cuechutaha ran yëjë ni, ta cuechutaha ran cjuachoho, cuechutaha ran jindya. Hacuaha tsicjëya ran ndihi. Cuatjin cumá ta, tsëhë xi Nina, me xi sahmi cuenda rë jyë ran ne, ma sahmi me yëjë ni.

<sup>9</sup> Ngajan xi xuta xi rcun xi casahmi cjuatsehen ngajan hacuaha casua cjuasua xahasen rë ngajan ne, scuëë me nihndi rë, hane squihnda me hacuaha cuiyuju va me. <sup>10</sup> Hane cjuercun rë me ngatsë rë chircun xi tivatju ngajan, sehe squindaya me cuichja me cuitjin:

—¡Ay! Jercu choho cavatju ciudad ndajyihí, ciudad rcun. Tu ñahñu ni ne casatë rë yëjë ni cjuacjintacun xi cuma castigu rë.

<sup>11</sup> Hacuaha xuta xi sahmi me negocio ne, squihnda me hacuaha choho cumá rë me tsëhë xi quihndë ne, tsajin yo cuatsë chaha xi viteña me, <sup>12</sup> chaha xi camá tsëhë oro, tsëhë quicha tyava, cojo ndyojo ndacun, cojo tu seti, cojo tsjian ndacun sa lino sa seda, sa xcusun hani sa moradu. Chaha rë ya xi ndaja jne, chaha xi camá tsëhë nehñu elefante, o tsëhë ya xi hnga chjí rë o tsëhë quicha sine, quicha hinda o tsëhë ndyojo seti. <sup>13</sup> Tsajin yo cuatsë rë chaha rë canela cojo yahnga xcusun xi sahmi xi ndaja chinë comida o sa tyjungunsa, sa balsamo xi hmí rë muro, sa vinu, sa aceite, sa ndyaja, sa chu tsánga, sa naxin o sa carreta, sa mosu cachaha rë xi hacui cjuahñu rë xuta. Tsajin yo cuatsë tsëhë me. <sup>14</sup> Cuitjin chja tsëhë nandya jan:

—Xcusun ndacun xi jercu cafehya xahasen riji ne, quijixin tsijin. Yëjë ni cjuanchina riji xi ndajyihí ne, cafëya, hane tsajin nu tsajin nixtin cuya sacu ri.

<sup>15</sup> Ngajan xi me xi caviteña ngajan hane cojo vëhë cama nchina me ne, cjuercun rë me ngatsë rë chircun xi tivatju ngajan, xinchacun me cjin tsëhë, hane squihnda me hacuaha choho cumá rë me. <sup>16</sup> Cuitjin cuichja me tsëhë:

—¡Jemu va jyihi nandya! Camá ngu nandya jyë, jemu ndacun tsjian catsicaja rë xuta rë. Tsjian ndaja xcusun hani moradu. Tsjian xi cavaqui rë nachjun oro cojo ndyojo ndacun cojo tu seti. <sup>17</sup> Peru xcun xi ngu hora ne, caffè cavetsunya cjuanchina vë.

Hane yëjë me xi matitjun xi vitexa tsëhë barcu cojo xuta xi hinchá me cahntsua, cojo cha xi sahmi xa xcun barcu o sa xuta xi sahmi negocio cojo, cumamijí sahmi tiña me tsëhë. <sup>18</sup> Squindayava me hya xi scuëë me nihndi rë xi seti hane cuichja me cuitjin:

—Hatuxa tsajin sa ngu ciudad xi cuanitjin ndajyihí sacuaaha camá ciudad jyë vi.

<sup>19</sup> Hane cuitejnu me scuan rcu me ta jemu choho má rë me hacuaaha squihndava me cuichja me cuitjin:

—¡Cojo cjuatsehen rë xuta nandya vi! Ngatsë rë cjuanchina rë me ne, tu yo ni me xi tjín rë ngu barcu rë chaha ne, cama nchina me. Peru ngu ñahñu ne, cavetsunya.

<sup>20</sup> Catamasua nuju tsëhë na, ngahnga. Catamasua nuju ngayun xi tyjahi cjuatacun nuju, ngayun xi má apóstol cojo ngayun xi má profeta. Catamasua nuju ta hindë casahmi Nina castigu na, casahmi cuenda me tsëhë na chuva xi casahmi na cojo nuju.

<sup>21</sup> Ngajan xi ngu ángel xi jercu tjín rë ngahñu ne, cafaha me ngu ndyojo jyë chuva rë natsi rë molinu, hane catsingatjeya rë ngajñi ndachacun. Sehe cachja cuitjin:

—Chuva ngahñu vihi, cuanitjin ngahñu xi cjuinengui cojo nandya jyë xi hmí rë Babilonia. Hane tsajin nixtin xi cuya cumá. <sup>22</sup> Tsajin nixtin xi cuinuhya rë xi tsijane cha chjine arpa ngajan, o sa ngu sun, o sa fane chiruvi o sa fane tyjo. Hisca ngu cha chjine tsëhë tu mé ni xcusun ne, cuyaain sahmi xa ngajan. Hacuaaha cuyaain nuhya rë ndyojo rë molinu xi sahmi scuan rë pan. <sup>23</sup> Ndihi rë ngu lámpara ne, cuyaain tsejen hasen rë ngajan. Tsajin nu tsajin nixtin xi ngajan cuma cjuavixan. Cuatjin cumá cojo ta, xuta xi casahmi me negocio ngajan ne, jemu hñu cjua rë me cojo yëjë ni xuta ngasunhndë. Hane cavincha sca me xuta ne, cavindacha me cojo xcusun rë me.

<sup>24</sup> Hacuaaha ngajan cavanga jni rë profeta cojo tsëhë xuta xi tyjahi cjuatacun rë me xcun Nina cojo jni rë yëjë ni xicjin me xi camá catsiquehen me nguehe ngasunhndë.

## 19

### *Xutacjín xi cuaxëndaja me Nina*

<sup>1</sup> Hya xi camá cavatju vihi ne, cahndë sacuaaha xta rë xutacjín ngajan ngahnga xi chja cuitjin:

¡Catama jyë, catama hnga Nina! Nina ne, vaxëtje me xuta, tjin rë me hasen ndajyihi xi seti, hacuaha ma sahmi me yëjë ni.

<sup>2</sup> Jemu quixi cjua xi vitexa me ta, casahmi me xujun jyë rë na xi caviteña yojo rë, na xi hñu cjua na.

Na vëhë ne, catsinguetsun na cjuatacun rë ngayëjë ni cojo cjuatsehen rë na.

Hane Nina ne, casahmingojo me cojo rë na jni rë xuta xi sahmi xa rë me. Jni rë me xi casahmi na xi cavanga.

<sup>3</sup> Sehe cavuya cachja me cuitjin:

—¡Catama jyë, catama hnga Nina! ta, nihndi ran ne, miji nchunchujun ni, nu nu ni.

<sup>4</sup> Ngajan xi can ñuju xuta changá cojo catsiñuju xcusun xi quicun ne, caviticja xcun Nina xi cjuaharcun rë me xi tacun me cahndë rcun. Cuitjin cachja me:

—¡Cuatjin jain! ¡Nihñu jyë nihñu hnga Nina!

<sup>5</sup> Sehe cavetju tsëhë cahndë rcun ngu xta xi chja cuitjin:

Nihñu jyë nihñu hnga Nina, ngayun xi nihñu xa rë me.

Nihñu jyë hnga me sa quihndi sa changá yun.

<sup>6</sup> Hya xi camá ne, cahndë sacuaha xi tisë xutacjín. Nuhyá rë sacuaha fane nandan xi jemu hñu vanga o sacuaha faneya xi tsinga chuhun. Hane cjua rë ne cuitjin chja:

¡Catamajyë catamahnga Nina naja ta, ha cavetsihin sahmi me gobiernu hane ma sahmi me yëjë ni!

<sup>7</sup> Catamasua naja. Tahan cjuasua xahasen naja. Nihña jyë hnga me tsëhë xi cavechu cjuavixan rë Tsánga.

Chjuun rë ne, ha catsindaja na yojo ran.

<sup>8</sup> Casacu rë na cahndë. Hane cuaja na tsjian ndaja xi seti, xi tyjahi.

Tsjian jan ne, hacui xcusun ndaja xi sahmi xuta xi tyjahi cjuatacun rë me xcun Nina.

Cuatjin cachja xutacjín jan.

*Sinësuhí me tsëhë cjuavixan rë Tsánga*

<sup>9</sup> Hya xi camá ne, cachja ángel cojo ná cuitjin:

—Nihndi cjua vi: “Jercu ndaja tsëhë me xi camachaya rë xi nduva me sinësuhí me tsëhë cjuavixan rë Tsánga.”

Hane cachja sa ángel cuitjin:

—Cjua xi cachjá ne, cjuaquixi jain rë Nina.

<sup>10</sup> Hane ngahan ne, caticjátaha ntsacu ángel xi cjuahárcun rë.

Peru cachja cojo ná cuitjin:

—¡Xicanihñii! ta, tangun ni chjí naja, ta xa naha ne, tangun cojo xa xi nihñu cojo xingun xi sua cumachaya rë cjuaquixi rë Jesús ne, hacui xa xi vitexa Nina. Nina ne, me vëhë chjuhuncun me.

Hacuaha cjuaxixi rë Jesús ne, vëhë sacuaha cacun rë cjuaxi cachja profeta.

*Me xi quisun rë naxin tyava*

<sup>11</sup> Sehe cahvë xi tixaha ngahnga, hane ngajan ne, cahvë ngu chu naxi tyava. Hane me xi quisun rë chu ne, chja tsëhë me ta, sahmi chihin me cjuaxi rë me hacuaha quixi me. Jemu quixi cjuaxi me hya xi tsichuva me xuta cojo sa xi hya xi sahmi me si. <sup>12</sup> Tuxcun me ne, sacuaha ndihi xi ña vitjen. Rcu me ne, jercu hinchasun corona. Hane camahindu ngu ñihi rë me xi tsajin yo vëë rë, peru suva me vëë me. <sup>13</sup> Yaja me ngu tsjian xi tjintë ni ne, xi caseyaquinda cojo jni. Hane sacuaha ñihi rë me ne, Cjuaxi rë Nina hmí rë me. <sup>14</sup> Hane tjengui rë me sindadu cjín tsëhë ngahnga. Sindadu jan ne, cuaja me tsjian ndaja xi tyava, xi tyjahi. Hane hacuanitjin hinchasun me naxin tyava. <sup>15</sup> Hane suva me ne, tsëhë hntsua me ne, vetju ngu quicha yuju xi cuanguihmu rë xutacjín. Hane hacuiin yuma cumá rë me xuta ta, cuitexa rë me cojo yaxti rë quicha. Hane sune me cahndé hisca nune rë uva cojo sa xi cuaxë me xan rë cjuacjan rë Nina, me xi ma sahmi yëjë ni. <sup>16</sup> Hacuaha xcun tsjian rë me cojo tyjuhmi rë me ne, camahindu ñihi vi: “Me xi matitjun tsëhë ngayëjë ni xi matitjun. Me xi matitjun tsëhë ngayëjë ni xi vitexa.”

<sup>17</sup> Hane cahvë xi ngu ángel ne, secun xcun tsuhi. Hane jindayahñu tsëhë nisë xi jemu hnga vitjen chu. Cuitjin cachja cojo chu:

—Nduvun. Catamatangun yun tsëhë suhi jyë rë Nina. <sup>18</sup> Ngajan xinu yojo rë xuta xi camatitjun, cojo yojo rë capitán rë sindadu cojo yojo rë xuta xi hñu cjuaxi, cojo yojo rë chu naxin cojo yojo rë xuta xi caxinchasun rë chu. Xinu yojo rë xuta, sa ndaya tjin me o sa xi caxteña me, sa langa me, sa changá me, xinu yojo rë me. —Cuatjin cachja me cojo chu nisë jan.

<sup>19</sup> Hane cahvë chu chojyihí jan cojo xuta xi vitexa me cojo sindadu cjín rë, hane camatangun cojo sa xi sahmi si cojo me xi hinchasun chu naxin tyava jan. <sup>20</sup> Hane ngajñi si vëhë ne, cachjaha rë chu chojyihí jan camá presu chu. Hacuanitjin ne camá presu chu xi casahmi cjuarcun ngatsë rë chu chojyihí cojo sa xi cavindacha chu xuta sehe setaha sellu rë chu xten me hacuaha faharcun me xcusun ru. Sehe cacandiya quicu me catsijo chu ngajñi ndachacun xi ti cojo azufre. <sup>21</sup> Hane xicjin chu xi cavanguí ne, catsiquehen me cojo quicha xi vetju tsëhë hntsua me xi miji rë naxin. Sehe yëjë ni nisë ne, cajnësua chu hisca xi cavechu rë xahasen ru cojo yojo rë xi cuicun vi.

## 20

*Ngu mil nu xi seyahñu xitsehen*

<sup>1</sup> Sehe cahvë ngu ángel xi nduvajne tsëhë ngahnga, hane yahatsja ángel vë llavi tsëhë nduchin hacuaha yahatsja ngu cadena jyë. <sup>2</sup> Hane cafaha rë yë jyë jan. Chu vëhë ne, hisca hat-sëë tacun chu. Chu vëhë ne, hacui naain o sa Satanás. Hane xi cafaha rë chu ne, catsihñu rë chu cojo cadena xcun xi ngu mil nu. <sup>3</sup> Hacuaha catsingatjenya ru cahntsua nduchin. Sehe casechjahñu tingotjo rë cojo llavi hane casetaha xcun ngu sellu. Cuatjin camá cojo sa xi sacuiin sa cahndë cuindacha ru xutacjín hisca xi cuijnetaha ngu mil nu. Hane xi cuatju vëhë ne, cumandaya nga chu ngu jo nixtin.

<sup>4</sup> Hya xi camá ne, cahvë cahndë rcun hane xcun silla jan ne, siu me xi casatë rë xa xi cuitexa me. Hacuaha cahvë hasen rë me xi catisun rë rcu ngatsë rë cjuaquixi rë me xi casua me tsëhë Jesús hacuaha ngatsë rë cjuarë Nina. Me vëhë ne, cafarharcuaain rë me chu chojyih cojo xcusun ru, hacuaha casetaain rë me sellu rë chu sa xten me o sa tsja me. Hane cahvë xi cavuya nga cjuahñu rë me sehe cojo Cristu casahmi me gobiernu xcun ngu mil nu. <sup>5</sup> (Yahnga nima ne, cuyaaín cjuahñu hisca xi cjuë mil nu jan.) Matsejen ta vëhë nixtin xi tjun cuya cjuahñu rë nima. <sup>6</sup> Jercu ndaja tsëhë me hacuaha tyjahi cjuatacun rë me xi cojo me satë rë me xi tjun cuya me cjuahñu. Cjuaveya xi majo ne, satiin rë me ta, tsajin mé ma sahmi cojo me. Cumá me sacuaha nahmi xcun Nina cojo Cristu hane sahmi me gobiernu cojo me xcun ngu mil nu.

<sup>7</sup> Hane xi cuijnetaha mil nu jan ne, cumandaya nga Satanás tsëhë ndavaya hiscan caveya me. <sup>8</sup> Sehe cuya cuindacha xutacjín rë jingujyë ni ngasunhndë, cuindacha me xuta rë Gog cojo xuta rë Magog, cojo sa xi sahmitangun rë tsëhë si. Hane xqui rë me xi cumatangun me ne, cuechu sacuaha tsumi tjehen rë ndajyë. <sup>9</sup> Hane xi camatangun me condra jan ne, cjue me jingujyë ni xcun nangui. Hane ngajñi si ne, cuiyujuhndee rë me cahndë xi siu sindadu cjín rë Nina cojo nandya xi tsihmucacun me. Peru ndihi ne, cuijne tsëhë ngahnga hane cjue cueti xuta condra jan.

<sup>10</sup> Hane Naain xi cavindacha rë ne, ningatjenya rë ngajñi laguna tsëhë azufre xi seti. Hane ha cuanitjin ne catundiya chu chojyih jan cojo chu xi cavindacha. Hane ngajan ne, cuatju chu cjuañih nixtin nixten, nu cjuí, nu nduva.

*Camacuenda tsëhë nima xcun cahndë rcun tyava*

<sup>11</sup> Hya xi camá ne, cahvë nga cahndë rcun tyava xi matitjun cojo me xi tacun xcun. Hane ngatsë rë cavatjuxcun me, cafëya nangui cojo ngahnga, hane casacuiin cahndë xi cuma rë. <sup>12</sup> Hacuaha cahvë nima. Sa changá, sa quihndi, hinchacun

yějē ni nima xcun cahndě rcun jan. Hya xi camá ne, ngu jo libru ne catuxaha. Hacuaha catuxaha ngu libru xi hacjahi. Hane libru vėhė ne, libru rė cjuahńu. Sehe camacuenda tsėhė, sacuaha xcusun xi casahmi nima, hacutjin xi camahindu xcun libru tjun. <sup>13</sup> Ndachacun ne, casua nima xi tjintsja. Cjuaveya cojo tsjun ne, hacuaha casua nima xi tjintsja. Hane jima ngu nima ne, camacuenda tsėhė hacutjin xcusun xi casahmi me. <sup>14</sup> Hya xi camá ne, tsajin sa cjuaveya, tsajin Hades, cahndě xi viyuju nima ta, catundiya ngajńi laguna xi seti cojo ndihi. Hane ndihi vėhė ne, hacui cjuaveya majo. <sup>15</sup> Ngajan xi nima xi casetaain ńihi rė me xcun libru tsėhė cjuahńu ne, cavixuya ngajńi laguna tsėhė ndihi jan.

## 21

### *Ngahnga cojo ngasunhndě ne, camá xatsė*

<sup>1</sup> Xi cavatju vėhė ne, cahvė ngu ngahnga xatsė cojo ngu ngasunhndě xatsė ta, tsėhė xi ngahnga xi tjun cojo nangui xi tjun ne, cafėya. Hane sacuaha ndachacun ne, tsajin. <sup>2</sup> Hane ngahan, Juan, cahvė nandya xi catsinchacun Nina xi hmı rė Jerusalėn xatsė. Canduvajne tsėhė Nina ngajan ngahnga. Jemu ndaja tsejen nandya vė ta, tsejen sacuaha ngu na xi cuixan xi canicaja rė na tsjian ndajyihi tsėhė xi nduva cha xi cuixan cojo rė na. <sup>3</sup> Sehe cahndě ngu xta hńu xi cachja tsėhė cahndě rcun. Cuitjin cachja:

—Ha quihndě cjue cuiyuju tangun Nina cojo xuta. Hane xuta jan ne, cumá xuta rė me, hane suva me ne, cumá me Nina rė me. <sup>4</sup> Hane Nina ne, tsixiya me yějē ndatuxcun me. Quihndě tsajin sa cjuaveya. Tsajin sa cjuachoho. Tsajin mé má squihnda me. Tsajin cjuahmu. Cuatjin cumá ta, tsėhė xi xcusun changá ne, ha cavatju.

<sup>5</sup> Hane me xi tacun xcun cahndě rcun ne, cachja me cuitjin:

—ıTisahme xatsė yějē ni xcusun!

Hane cachja me cojo ná cuitjin:

—Nihindi cjua vihi ta, hacui cjuaquixindaja hane macjain naja tsėhė.

<sup>6</sup> Hane cachja sa cojo ná cuitjin:

—Ha camachihin. Sacuaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Me xi xinda rė xahasen rė me ne, tu cuatjo ni suá cuihi me tsėhė nandá xi sua cjuahńu xatsė. <sup>7</sup> Me xi scaa rė cjue xcun ne, sacu rė me cjuatjo rė Nina. Hane cumá ngahan Nina rė me, hacuaha cumá me quihndi naha. <sup>8</sup> Peru yo xi tsacjun, yo xi macjaain rė, yo xi hngacacun, cha tsiquehen, me xi sahmi cjuatsehen ngajńi xihin o sa ngajńi chjuun, o xi sahmi surqui, o xi faharcun nina

ndacha, o xi chjaain me cjuaquixi ne, yějě ni me vėhė ne, sacu rė me cahndė ngajńi laguna tsėhė ndihi xi ti cojo azufre. Hane vėhė ne, hacui cjuaveya xi majo.

*Hacutjin jyihi ciudad xatsė xi hmí Jerusalén*

<sup>9</sup> Hane ngu ángel tsėhė yatu jan xi yahatsja tyucu tė xi quitsė rė cojo yatu cjuacjintacun xi vijnetaha jan ne, canduvatjengui ná ne, cachja cojo ná cuitjin:

—Ndove ta, tsingácun ri na xuta vixan, na xi camá chjuun rė Tsánga.

<sup>10</sup> Hane ángel jan ne, quijicojo ná ngajńi nijńa naha hiscan ngu ndetjun naxi hnga. Sehe catsingacun ná nandya xi catsinchacun Nina, nandya xi hmí rė Jerusalén ta tinduvajne tsėhė Nina ngajan ngahnga. <sup>11</sup> Hane ńa tsejen xi seti cojo hasen tsėhė ngahńu rė Nina, hisca sua hasen rė sacuaha ngu ndyojo seti xi yufa sacuaha ndyojo tsin. <sup>12</sup> Hane cavindee rė ngu xondyojo teya hacuaha hnga. Tejó má tingotjo rė, hane jimangu tingotjo jan ne, ngajan siu ngu ángel. Hacuaha ngajan camahindu ńihi rė tejó tjė rė xuta nangui Israel. <sup>13</sup> Xondyojo jan ne, tjin jyan tingotjo jimangu ladu. Jyan má ladu vetjucaa tsuhi. Jyan má ladu ngatihin. Jyan má ladu canangui. Hacuaha jyan má ladu vetje tsuhi. <sup>14</sup> Xondyojo rė ne, tacun xcun tejó xihndė nańa. Hane xihndė nańa ne, yaha ńihi rė tejó apóstol rė Tsánga xi camahindu xcun.

<sup>15</sup> Ángel xi chja cojo ná ne, yaha ngu ya naxu tsėhė oro xi machjirėhė sacuaha ya chuva xi cjuahachuva rė nandya cojo xondyojo cojo tingotjo rė. <sup>16</sup> Nandya jan ne, cuadradu jyihi. Jimangu tjehen rė ne, jo mil jo cientu kilómetro má xi nduju. Hane hacuanitjin ne má xi hnga. <sup>17</sup> Hane catsichuva xondyojo rė. Vėhė tjin rė ngu cientu cojo yachan ńuju nda sacuaha chuva rė xuta ta vėhė casahmixa ángel cojo.

<sup>18</sup> Sacuaha xondyojo rė ne, camá cojo ndyojo seti xi hmí rė jaspe, hane nandya ne, suva oro camá hane seti sacuaha ndyojo tsin. <sup>19</sup> Xihndė nańa rė xondyojo rė nandya ne, camá cojo ndyojo seti rė yějě ni xcusun xi sacuaha xcusun rė yejńa. Xihndė nańa rė xi tjun ne, camá tsėhė jaspe. Xi majo ne, tsėhė zafiro. Xi majyan ne, tsėhė ágata, má ńuju ne, tsėhė esmeralda, <sup>20</sup> má hńu ne, tsėhė ónice, má jyun ne, tsėhė cornalina, má yatu ne, tsėhė crisólito, má jyin ne, tsėhė berilo, má ńaja ne, tsėhė topacio, má tė ne tsėhė cirsopraso, má tengu ne, tsėhė jacinto, hane má tejó ne, tsėhė amatista. <sup>21</sup> Sacuaha tejó tingotjo jan ne, camá tsėhė tu seti xi hmí perla. Hane jimangu tingotjo camá tsėhė ngu perla. Hane ndiyatė rė nandya jan, tsėhė suva oro camá peru sacuaha ndyojo seti xi ńa hasen tsejen.



<sup>22</sup> Ngajan ciudad vëhë ne, cahveen ngu yungun. Mamijí rë ta tsëhë xi ngajan cuiyuju Nina, Nai naja xi ma sahmi me yëjë ni, cojo Tsánga xi hacui me sacuaha yungun. <sup>23</sup> Cuanitjin ne, mamijí rë tsuhi cojo sá xi sua hasen rë ta, tsëhë xi hasen rë ngahñu rë Nina ne, sua hasen rë ngajan, hane Tsánga ne, má ndihi rë. <sup>24</sup> Yëjë xutacjín ne, tsujyihya me cojo ndihi vë xi cjue me cojo ngasunhdë rë me, hane xuta matitjun rë me ne, ngajan cjue cani me ngahñu rë xa xi vitexa me cojo xi cuaxëndaja me. <sup>25</sup> Ngajan hisca xi ngu nixtin ne, sechjaain tingotjo rë, tsëhë xi ngajan ne, tsajin nixtin cuma nguixun. <sup>26</sup> Hane xutacjín tsëhë ngasunhdë ne, cjue cani me ngahñu cjua rë me cojo cjuanchina rë me. <sup>27</sup> Hatuxa tsajin cahndë xi cuma rë tu mé ni xi hacuiin tyjahi xcun Nina. Tsajin yo xi sahmi cjuatsehen, tsajin yo xi cuichja ndesu. Suva ni me xi casetaha ñihi rë xcun libru rë Tsánga, libru xi yaha ñihi rë me xi sacu rë cjuahñu xatsë ne, me vëhë sacu rë me cahndë.

## 22

<sup>1</sup> Sehe ángel ne, catsingacun ná ndajyë xi hacui nandá xi sua cjuahñu. Nandá vëhë ne, nandá yufa xi hasen sacuaha ndyojo tsin. Hane nandá vëhë ne, vetju tsëhë cahndë rcun rë Nina cojo Tsánga, <sup>2</sup> hane vanga taha ndiyatë cavasen nandya. Xingu xingu ladu tsëhë ndajyë ne, secun ya tsëhë cjuahñu. Ya vëhë ne, tejó ndiya xi ngu nu tjín chan tsëhë tu rë ta, chuva sá sua tu rë. Hane xca rë ya ne, machjirëhë xi tsirqui rë xutacjín jan. <sup>3</sup> Ngajan ne, tsajin mé xi chohovëë Nina tsëhë. Ngajan nandya vë tacun cahndë rcun xi tsëhë Nina cojo Tsánga. Hane ngajan ne, me xi tacun xi xa rë me ne, cjuahacuenda rë me. <sup>4</sup> Scuëë me xcun Nina, hane ñihi rë Nina ne, setaha xten me. <sup>5</sup> Mamijí rë ndihi, sa ndihi rë lámpara o sa tsëhë tsuhi ta, Nina Nai naja ne, sua rë me hasen rë me. Hacuaha gobiernu xi sahmi me ne, cjuecani rë yëjë nu, yëjë nixtin.

### *Camatiña nixtin xi cuya Jesucristu*

<sup>6</sup> Hya xi camá ne, cachja ángel jan cojo ná cuitjin:

—Cjua vihi ne, cumacjain nuju tsëhë ta, quixi jain. Nina, Nai naja ne, catsingatju me ángel rë me xi sua cumachaya rë hasen rë xuta xi chja cjua rë me tsëhë xcusun xi xati cumá.

<sup>7</sup> Chja cjua ta:

—Tuhuncuendun xi ngutjen cuinduvá. Jercu ndaja tsëhë xuta xi vetjondaja me sahmichihin me cjua rë libru vihi xi chja tsëhë xcusun xi sehe cumá.

<sup>8</sup> Juan hmí ná. Cahndë, hacuaha cahvë xcusun vihi. Hane hya xi camá cahndë cahvë ne, caticjaxcun taha ntsacu ángel jan xi catsingacun ná xcusun vihi ta, cjuaharcun ángel jan.

<sup>9</sup> Peru cachja ángel cuitjin:

—¡Xicanihñii! ta, tangun ni chjí naja, ta xa naha ne, tangun cojo xa xi nihñu cojo xingun xi má profeta cojo yahnga xingun xi vetjo me cjua rë libru vihi. Nina ne, me vëhë chjuhuncun me.

<sup>10</sup> Hacuaha cachja me cuitjin:

—Xicavisaniin sellu cjua xi sehe cumachihin xi hinchu libru vihi, ta nixtin rë ne, ha meje cuechu. <sup>11</sup> Cvejña xi xuta xi choho sahmi me ne, catjinduju xi choho sahmi me, hane xuta tsehen ne, catjinduju me cojo cjuatsehen rë me, hacuanitjin ni xuta xi quixi me ne, catjinduju me cojo ndiya rë cjuaquixi, hane xuta xi tyjahi cjuatacun rë me, catjinduju me cojo ndiya rë cjuatacun tyjahi.

<sup>12</sup> Chja me cuitjin:

—Tuhuncuendun xi ngutjen cúa. Hane xi cúa ne, nduva cojo chjí nuju. Suá rë jimangu me chuva rë hacutjin xi casahmi me. <sup>13</sup> Ngahan ne, sacuaha letra xi vetsihin cojo letra A ne, vijnetaha cojo zeta. Hacu ni ngahan xi ntsacu vetsihin ne, hacui ni ngahan xi vijnetaha. Tejña hisca ntsacu cavetsihin yëjë ni, hane tejña cuaha hya xi cjuë. Matitjun, matjengui ngahan.

<sup>14</sup> Jemu ndaja tsëhë xuta xi catsityjahi me tsjian rë me cojo sa xi sacu rë me cahndë xi sinë me tsëhë ya rë cjuahñu xatsë. Xi cuatjin ne, cuma cuisehen me taha tingotjo rë nandya jan. <sup>15</sup> Peru xuta tsehen cuiyuju me ndatsen cojo xuta xi sahmi cjuasurqui, o xi sahmi cjuatsehen ngajñi xihin o sa ngajñi chjuun, o xi tsiquehen, o xi faharcun nina ndyojo o me xi tsihmucacun cjuandacha. Yëjë ni me vëhë cuiyuju me ndatsen nandya.

<sup>16</sup> —Ngahan, Jesús ne, catsingátju ángel naha xi tsinguixi xcun ngayun xuta yungun cjuaquixi vihi. Ngahan ne, tjë rë David má ngahan. Quihndindaicjin rë David má ngahan. Niñú seti tsëhë nguitajñu má ngahan. —Cuatjin chja Jesús.

<sup>17</sup> Ngajan xi Hasen rë Nina cojo na xi cuixan cojo Tsánga ne, cjuayangui me cuitjin:

—Nduvun.

Hacuaha me xi cuihndë cjua vëhë ne, cuichja me cuinitjin ni:

—Nduvun.

Sa xi xinda nuju ne, nduvun. Sa xi cjueyatacun ne, siuhun tu cuatjo ni nandá rë cjuahñu.

<sup>18</sup> Suá cumachaya nuju ngayun xi visiñuju cjua rë xujun vihi xi sehe cumachihin ta, sa xi tjin yo xi cuesuntaha sa cjua cojo cjua xi camahindu nguehe, Nina ne, cuesúntaha me cjuañihi xi camahindu xcun xujun vi. <sup>19</sup> Hacuanitjin ne, sa xi tjin yo xi cjuahataha rë cjua vihi xi sehe cumachihin, Nina ne, cjuahaxin me cahndë xi cumá rë me xcun xujun rë cjuahñu

cojo tsëhë nandya xi catsinchacun Nina cojo tsëhë xcusun ndaja xi camahindu xcun libru vihi.

<sup>20</sup> Hane me xi sua cjuaquixi xi cuicun vi ne, chja me cuitjin: —Hatuxa nduva xati.

Cuatjin chja me. Cuatjin ndatjin. Nduvun, Tatá Jesús.

<sup>21</sup> Quihdë ne, catisatë nuju cjuandaja rë Nai naja, Jesucristu. Cuatjin jain cumá.